


Quiarinio pueyaso rupaa pa jiyaniijia

Jesucristojiniji pueyano rupaajinia



New Testament in Arabela (PE:arl:Arabela)

# Quiarinio pueyaso rupaa pa jiyaniijia Jesucristojiniji pueyano rupaajinia New Testament in Arabela (PE:arl:Arabela)

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

## Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### The New Testament

in Arabela

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 21 Feb 2024 from source files dated 29 Jan 2022  
90034700-94c6-5f48-ae9c-2383843fed68

Contents

MATEO . . . . .	1
MARCO . . . . .	59
LUCAS . . . . .	95
JUAN . . . . .	154
MIISHANO . . . . .	198
ROMA . . . . .	255
1 CORINTO . . . . .	281
2 CORINTO . . . . .	309
GÁLATA . . . . .	326
ÉFESO . . . . .	337
FILIPO . . . . .	346
COLOSA . . . . .	353
1 TESALÓNICA . . . . .	358
1 TESALÓNICA . . . . .	363
1 TIMOTEO . . . . .	366
2 TIMOTEO . . . . .	373
TITO . . . . .	378
FILEMÓN . . . . .	381
HEBREO . . . . .	383
SANTIAGO . . . . .	404
1 PEDRO . . . . .	411
2 PEDRO . . . . .	419
1 JUAN . . . . .	424
2 JUAN . . . . .	430
3 JUAN . . . . .	431
JUDAS . . . . .	432
NIQUISHANO . . . . .	434

## MATEO NAAJIOTASANO JESUCRISTOJINIJI

*Jesucristo supuetanaajiniji pahuatasano  
(Lc 3.23-38)*

<sup>1</sup> Jesucristoori supuetana Abraham jiuhuacuajinio supueno quiquiaari, supuetana David niqiuoacuajinionio. Nioori Jesucristo supuetanaa sesaca. Naa quiquiaaritiij:

<sup>2</sup> Abrahamri Isaac que quiquiaari. Isaacri Jacobo que quiquiaari. Jacoboori Judá que quiquiaari, tapueyocuaca quejuhuaj. <sup>3</sup> Judaari Fares que quiquiaari, Zara quejuhuaj. Cuno pojori nucuaari quiquiaari Tamar, Judá niqiuocua. Faresri Esrom que quiquiaari. Esromri Aram que quiquiaari. <sup>4</sup> Aramri Aminadab que quiquiaari. Aminadabri Naasón que quiquiaari. Naasónri Salmón que quiquiaari. <sup>5</sup> Salmónri Booz que quiquiaari. Booz nucuaari quiquiaari Rahab. Boozri Obed que quiquiaari. Obed nucuaari quiquiaari Rut. Obedri Isai que quiquiaari. <sup>6</sup> Isaiiri David que quiquiaari. Davidri Israel pueya jiyaniijia quiquiaari. Davidri Salomón que quiquiaari. Salomón nucuaari coteenu quiquiaari Urías niqiuocua.

<sup>7</sup> Salomónri Roboam que quiquiaari. Roboamri Abías que quiquiaari. Abíasri Asa que quiquiaari. <sup>8</sup> Asaari Josafat que quiquiaari. Josafatri Joram que quiquiaari. Joramri Uzías que quiquiaari. <sup>9</sup> Uzíasri Jotam que quiquiaari. Jotamri Acaz que quiquiaari. Acazri Ezequías que quiquiaari. <sup>10</sup> Ezequíasri Manasés que quiquiaari. Manasésri Amón que quiquiaari. Amónri Josías que quiquiaari. <sup>11</sup> Josíasri Jeconías que quiquiaari, tapueyocuaca quejuhuaj. Jiyacaritiij, Israel pueyapueeri quioosaaquiaari Babilonia jiyajiniara. <sup>12</sup> Babilonia jiyajinia, Jeconíasri tii mueratequiaari Salatiel. Salatielri Zorobabel que quiquiaari. <sup>13</sup> Zorobabelri Abiud que quiquiaari. Abiudri Eliaquim que quiquiaari. Eliaquimri Azor que quiquiaari. <sup>14</sup> Azorri Sadoc que quiquiaari. Sadocri Aquim que quiquiaari. Aquimri Eliud que quiquiaari. <sup>15</sup> Eliudri Eleazar que quiquiaari. Eleazarri Matán que quiquiaari. Matánri Jacobo que quiquiaari. <sup>16</sup> Jacoboori José que quiquiaari. Joseeri María niyaca quiquiaari. Cuno Maríari Jesu nucua quiquiaari. Jesu sesa tarajanuuri quiquiaari Cristo. Nioori pueyano rupaajinia sequeya “Pueyaso jiyarosano Jiyaniijiarano”.

<sup>17</sup> Naacuajitij, Abrahamjiniji, catorce supuetanaari quiquiaari Davidta. David nuhuaji, socua catorce supuetanaari quiquiaari. Jiyacaritiij, Israel pueyapueeri quioosaaquiaari Babilonia jiyajiniara. Babilonia jiyajiniara nojori quioosaanu nuhuaji, socua catorce supuetanaari quiquiaari Cristo jaara rasaanquiaari.

*Jesucristo rasacari pahuatasano  
(Lc 2.1-7)*

<sup>18</sup> Naa quiquiaariti Jesucristo rasacari: na nucuarano Maríari tari Joseeta camiriquiano quiquiaari. José numuetuqueyaquishacarijia María, Maríari tariucua manajaraca quiriquiaa. Pueyaso Sohuanucuaajaari na manajetequiaari. <sup>19</sup> Neyacarano José jaara niishiquiaari necorano tariucua manajaraca quiya, nojuajaari jiyanohua niishiriojoriquiaa na cartenura jiyasohuaja. Nojuajaari jiyaniquiaari tamonu jiyoteeri na manajoree. Joseeri maninia pueyano quiquiaari. Majaari María na cararonu paniniu quiquiaari pueya niqiuara. <sup>20</sup> Naa José niishiriojosacari na cartenura juucuatej, Pueyaso seruuri nocua muetaquiaari na maquenujine. José sequereeri:

–Supuetana jiyaniijia David niqiuoacuajinio supueno Joseenaa, María quia camiri naajaa. Maja quia puerenu. Pueyaso Sohuanucuaajaari na manajorucuaa. <sup>21</sup> Maríari neyanu ranutaniya. Quiocua na sesojore “Jesu”. Sesa na pueya miijiosano tuujunutaniya nojori jiuujiajinijiiri. Naaratej, na sesaari quiniutianiya “Jesu”.

<sup>22</sup> Jesu rasaanuuri naa quiquiaaritiij, tariucuaaanu pueyara Pueyaso sequesano caminiujunia pahuatasano tohuateenura. Pueyasoori naa na pahuataniquiaari jiyanohua tarijiatej:

<sup>23</sup> “Nia tojiri. Niyacoori manajenutaniya. Neyanu ranutaniyari. Na sesojonutaniyari ‘Emanuel’”.

Nioori pueyano rupaajinia sequeya “Pueyaso pata quiyani”.

<sup>24</sup> José niucuasacari, nojuajaari naa miiquiaaritiij taa Pueyaso seru sequequiaari nojuacuajani. María riquiaariiri na tijajiniara necocuara. <sup>25</sup> Nojoriiri maja na quiniu quiquiaari juhua seetanujuanaa camitioono, María jaara raquiaari neyanujuaatijia. Jaara na raquiaari, na sesojoreeri “Jesu”.

## 2

*Niishijiaca tiuquijiosacari conaajaacua*

<sup>1</sup> Jesuuri rasaanuqaari Belén tiacajinia, Judea jiyajinia. Cuno quishacari, Herodesri jiyaniijia quiquiaari Judea jiyajinia. Jesu rasaanu nuhuaji, niishijiacaari tiuquijioquiaari Jerusalén tiacajinia. Nojoriiri Jesu niquniuria tiuquijioquiaari jiya pajamaji. <sup>2</sup> Nojori tiuquijiosacari, nojoriiri pueya nequesoreetaquiaari:

—¿Tee Judiocuaca jiyaniijiarano rasaanuqaani? Canaari niishiyani nojuajaari tari rasaanuqaari. Canaari na rijia niquiquianu jiya pajamajini, canaa jiyajinia canaa quishacari. Canaari nocua niyareeni canaa shuquiritianura nojuaja, jiyaniijiarano na quiniucua.

<sup>3</sup> Jiyaniijia Herodes tojishacari naa niishijiaca sequesantej, jiyanojua tacaquiaari. Puetunu Jerusalén tiacajinia quiniaajanaari tacaquiaarijuhuaj. <sup>4</sup> Nocuaji, Herodesri Judiocuaca seconaa sequequiaari nocua nojori nijionura, Moisés Rootasanojini niishitiojanaano. Nojori tiuquijiosacari nocua, Herodesri naa nequesoreetaquiaari nojori:

—¿Tee Cristo rasaanutaniyani, Judiocuaca jiyaniijiarantej?

<sup>5</sup> Nojoriiri na riucuaquiaari:

—Belén tiacajinia rasaanutaniyani, niya Judea jiyajiniani. Naa naajiotasano quiyacuaari Pueyaso sequesano caminiujunina sequesano. Cuno tariucuaaanu naajiotasanojuaari naa sequeyatej:

<sup>6</sup> “Belén tiacajinia quiniaanaa, nia tiacaari maja najuhuaa shiitianiyojua tiaca Judea jiyajinia. Cuno nia tiacajiniani, jiyaniijiajanaa cutaraari supenutaniya. Nojuajaari socua cutara jiyaniijiajanaa quiniutaniya tamasa jiyaniijiacajiniji Judea jiyajinijinio. Cunoori maninia jitianutaniya cua pueya, Israel pueya”.

<sup>7</sup> Naa pueya sequesano na tojinu nuhuajitij, Herodesri cuno jiya pajamaji nijiono niishijiaca nequesoreetaquiaari jiyasohuaja:

—¿Taaari rijia niquishaacanu seetanujuaanaani?

<sup>8</sup> Nojori riucuanu nuhuaji, Herodesri na sapojonuta nojori sequequiaari:

—Nia quiaare Belén tiacajinia. Niocua jacaria nequesoreetasee cuno mueyajiniji. Nia jaara na riuriatara, niocua cua numootecuhua. Janyacua nocua quiaarejaanihuaj cua shuquiritianura nojuaja.

<sup>9</sup> Niishijiaca tojinu nuhuaji naa jiyaniijia Herodes sequesantej, nojoriiri quiojia-reecuhua. Jiya pajamaji na niqutiushano rijia niqutiuriiri nojori puetaano. Rijiaari pootia tiushii tia caco, tee mueya quiriquiaacujani. <sup>10</sup> Nojori niquishacari rijia, niishijiacaari jiyanojua timitiuquiaari. <sup>11</sup> Tiaco tiuquitiaseeri. Conaaja niqutiushii na nucua Mariataari. Conaajaacuara mojuetacoquiaari. Na shuquiritatureeri. Na nuhuaji, niishijiacaari na patootasano casaa riataquequiaari, nareya na niqutiosocoriquiano conaaja. Nojoriiri na niqutiouquiaari oro, shanohua jaanutaja catijiasocoriquianojuhuaj, tamaatiucua shanohua jaanutajanio. Na sesaari tahue rupaaajinia “mirra”. <sup>12</sup> Na nuhuaji, Pueyasoori cuno niishijiaca sequequiaari na maquenujinia, maja Herodescua nojori tacatenuhuara Herodes nojori pohuatanuhua conaajiniji. Naacujitij, niishijiacaari tamonu nucuaacuhua tacatequiaarihuua na jiyajiniohuara.

*Egipto jiyajiniara Jesu mashitiasaanujiniji pohuatasano*

<sup>13</sup> Niishijiaca jaara quiaquiaarihuua, Pueyaso seruuri Joseecua muetaquiaari na maquenujinia. José sequereeri:

—¡Quia sanere! ¡Conaaja quia mashitiare na nucuaata Egipto jiyajiniara! Quiniqui nia quishii, janiya cuara sequerohua quajaniyajaatijia. Herodesri Belén tiacajinia na pueya pajetenutaniya conaaja, na motesocoriquiano.

<sup>14</sup> Joseeri sanecuaari. Cuno niucua, conaaja mashitiaree na nucuatajaari Egipto jiyajiniara. <sup>15</sup> Nojori tiuquishacari Egipto jiyajinia, ti quishiiquiaariiri, Herodes cuara cusoorajaatijia. Nojoriiri naa Egipto jiyajinia quiquiaaritij, tariucuaaanu Pueyaso sequesano tohuateenura maninia, Herodes cusonu nuhuaji. Pueyasoori naa pohuatequiaari na sequenu panishano caminiujuniacua:

“Cua niyanu piiriinjia, Egipto jiyajiniji na tacatenuhuara”.

*Herodes puecootesacari muerasu*

<sup>16</sup> Jiyaniijia Herodes jaara niishiquiaari cuno niishijiacaari na ruuretaquiaari saaja, Herodesri jiyanojua juaquiaari. Na pueya jiyaroquiaari puetonu naatujoori canuniyojuaanaa nojori puecoonura Belén tiacajinia, na shocuaqueya tiacajinia quiniaa muerasunio. Naa miiquiaariiri Jesu na monura juucua. Herodesri na pueya sequequiaari

cuaara puecoosaaria puetunu shusha roosanojuanaa, mariyata canapueete caapiqui marjia shocoteo quiquiaarijiani. Herodesri naa sequequiaari niishijiaca pohuatanuucua nojuaja, Jesu rijiaari tarijia niquishaaquiaari. Juhuanajuajaari maja caapiqui marijia shocojonu quiquiaari rijia niquishaanujiniji. <sup>17</sup> Naacujitij, tariucuacaanu Pueyaso sequesano caminiujunia Jeremías sequesanoori tohuateequiaari. Jeremías sequesanoori naa naajiotasaquiaaritij:

<sup>18</sup> “Sapuenuari tojishiya Ramá tiacajinia. Jiyanhua taraatia. Raquelri necohuacua sariyacojiya. Majaari na paniniu na cumanjiasaanura. Necohuari tari puecoosaarucaaa”.

<sup>19</sup> Na nuhuaji, Herodes jaara cusoquiaari, Pueyaso seruuri Josecua muetaquiaariuhua na maquenujinia, Egipto jiyajinia nojori quishacarija. <sup>20</sup> Na sequereeri:

—Quia sanere. Mueya quia tacaretaarohua Israel jiyajiniohua na nucuataja. Mueya monu panijiaacari tari cusonuurucuaa.

<sup>21</sup> Joseeri sanequiaari. Mueya tacaretaquiaariuhua Israel jiyajiniohuara na nucuatajaari. <sup>22</sup> Israel jiyajinia na tiuquishacari, Joseeri numootesaaquiaari Herodes niyanu Arquelori jiyaniijia quiriquiaa jiyacari, na que niti Judea jiyajinia. Nocuai, Joseeri puerequiaari quiniqui na quiniuria. Jiyacarijuhuj, Pueyasoori na niishitioquiaari na maquenujinia, tamocora na quianura. Naaratej, Joseeri mueya nucua pacuquiaari Galilea jiyajinara. <sup>23</sup> Galilea jiyajinia nojori tiuquijiosacari, Nazaret tiacajinia quishiiri. Naacujitij, tariucuacaanu Pueyaso sequesano caminiujunia sequesanoori tohuateequiaari nojori jaara naa naajiotaquiaaritij:

“Jiyaniquishaanutaniyari Nazaret tiacajininio pueyano”.

### 3

#### *Tiuquinijiona Juan pohuatasacari cariquia jiyajinia*

(Mr 1.1-8; Lc 3.1-9, 15-17; Jn 1.19-28)

<sup>1</sup> Na nuhuaji, tamonu pueyanoori cariquia jiyajinia quiquiaari Judea jiyajinia, Jordán moo shuriucua. Nojuajaari sesojosaaquiaari Tiuquinijiona Juan. Nojuajaari Pueyaso sequenu panishano poojotaquiaari pueya niquiara. <sup>2</sup> Naa pohuataquiaaritij:

—¡Nioojia nia tacatore sesa nia miiniujiniji! Pueyasoori tari nia jiyanoonu paniya, na muerasu nia quiniuria seetanujuanaa.

<sup>3</sup> Jiyanhua tarijia, Pueyasoori na pueyano Isaías pohuataniquiaari miriqui na sequenu panishano pueyara. Isaíasri naa na pohuataquiaaritij:

“Pueyano rupaari tojishaaree cariquia jiyajinia. Naa nacajoriquiaari: ‘Nia jeecanamitiri Jiyaniijia nuu, maja mojoquetunu na quiniuria’”.

Tiuquinijiona Juanjanaacujiaari nio tariucuacaanu pohuatasano tohuateequiaari, pueya na niishitiojosacari nojori jeenucuanura nojori jiuujia Jesuucuaij.

<sup>4</sup> Cuno Juan toqueeri camello cajacajiniji shitiasano quiquiaari. Na cajiniocua camarucutequiaari shoque sacuanijiasanoori. Na miaquesanoori quiquiaari cariquia jiyajinia na riuritasano sequeru, samiyatunio. <sup>5</sup> Pueyari Juancua quiojoquiaari na tojtianura. Queraatia pueyari nocua quiojoquiaari Jerusalén tiacajininio, Judea jiyajininiojuhuj, puetunu Jordán moo shocuaqueyajininiojuanaano. <sup>6</sup> Pueya jaara pohuataquiaari Juan niquiara sesa nojori miijiosano, Juanri nojori tiuquinioquiaari Jordán moojinia, Pueyaso tojjiaari nojori quiniu panishacari.

<sup>7</sup> Na tiuquinijosacari pueya, Juanri queraatia Fariseocuaa niquiquiaari nocua nijiyano, Saduceocuanio. (Nojoriiri Moisés Rootasanojiniji niishitiojonaa quiquiaari.) Tiuquinijiona Juanri nojori sequequiaari:

—¡Niaaquiiri sesa pueya, juha sacocua! ¿Cante nia numootere nia mashiniuria Pueyaso saniitionuucuaij nijaniyani? Nio pa quishacariini, quera Pueyaso saniitiosacari jiyanhua na ruuretajaca pueya. <sup>8</sup> Naa jaara seetanujuanaa nioojia tacatore sesa nia miiniujiniji, ¡saaja maninia nia miiri, maja sesa! <sup>9</sup> Majaari nia jiyaniniu niaari Pueyaso muerasu, Abraham niquihuacuajinio supueno nia quiniucua. Cua tojiri, Pueyaso jaara paniri, nojuajaari na naata Abraham niquihuara shipininio nio saajinijijuhuj. <sup>10</sup> Nio miriqui sequesano nia tojirijuhuj pueyanaa. Naana jaara maninia jajau muetuyaquiri, na camaruuri na nuya na catijiasocoriquiano. Naajuhuj, Pueyasoori quera saniitionutaniya nijaniya, na tojijashijiaca nia quiniucua.

Tiuquinijiona Juanri pueya sequequiaari socua:

<sup>11</sup> —Janiyari moojinia nia tiuquinijiyani, nioojia nia tacatosacari sesa nia miishanojiniji. Cua nuhuaji, tamonuuri niriqiano cutara. Nojuajaari jiyanhua socua jiyaniijijanaa janiyajiniji. Janiya maara jiyanhua shuquiriaatia quirini, nojuaja jaara cua sequere na seru cua quiniuria quenaaja na sapatu cua jocuanura nera. ¡Nojuajaari jiyaniijijanaa

cutara! Nojuajaari Pueyaso Sohuanu tiuquinijionutaniya niooqiajinia, cumaacaraca nia quiniuria, seetanu Pueyaso muerasujuanaa nia quiniuria. Nia jeequenutaniyajaariuhua juhua manitia, sesa nia miishanojiniji. <sup>12</sup> Nia tojitiare miriqui cua sequesano. Trigo jaara rapijiosaare maninia, na camaruuri na queyaroojua, jiyocuacaanuji na totinijiaso-coriquiano. Naa miiquiaari paratu cuaara paara na cocua, na sucuanio, na jajau na racatanura tiajiniaaco. Naajuhuj, cua nuhuaji niniaari tariucua pueca, na tojtianaa na rijionura na quiquojiniara, saniniuuja na tojiyashijiaca na quejoonura manijinia na saniitionura, tee mani maquesaaquiyacuajani.

*Jesu tiuquinishacari moojinia*

*(Mr 1.9-11; Lc 3.21-22)*

<sup>13</sup> Na nuhuaji, Jesuuri tiuquiquiaari Galilea jiyajiniji Tiuquinijiona Juancua, Jordán moojinia. Tiuquinijiona Juan sequeseeeri:

–Cua tiuquinirijia.

<sup>14</sup> Juanri saaja na sequereee:

–Maja Jiyaniijianaa. ¡Quiaa cutaraari maninia pueyano! ¿Casaara cucua quia nimiaa cua tiuquininiuria quiajaniya moojiniani? ¡Cua tiuquiniri juhuari cutara!

<sup>15</sup> Jesuuri saa sequeseejaa:

–Quiarjia quia miiri cua panishano. Cua tiuquiniri naajaa. Maniniaari pa miiniuria puetunu Pueyaso panishanojuanaa.

Naacaujiti, Juanri na tiuquiniquiaari. <sup>16</sup> Jesu jaara tiuquinishaaquiaari, nojuajaari ritia tacaquiaari moojiniji. ¡Jiyacaritij, jiya cajiniocuaari riateguee! Jesuuri Pueyaso Sohuanu niquiquiaari nocua roseyano juhua mococoonu niquishano. Nocua tiuushiiri.

<sup>17</sup> Jiyacaritij, jiyocuacaanuji Pueyaso rupaari tojishaaree naa sequeseyano:

–Niiori cua Niyanuniyojua. ¡Na shuquiritiaa jiyanojuanijia!

## 4

*Samaruhua jiyaniijia saniniujishacari Jesu*

*(Mr 1.12-13; Lc 4.1-13)*

<sup>1</sup> Na nuhuaji, Pueyaso Sohuanuuri Jesu jiyataquiaari cariquia jiyajiniara, Sesaaca saniniujishocoriquiano cuniqui.

<sup>2</sup> Majaari quenaaja Jesu miaquenu quiquiaari. Cuarenta juuca, cuarenta niucua na shoconujuquiaari na miaqueyaquishacari. Na nuhuaji miaajequiaariiri. <sup>3</sup> Sesaacaari jiyacari nocua niquiaari na saniniujiniuria. Jesu sequeseeeri:

–Quiaa jaara seetanujuanaa Pueyaso Niyanu quiri, nio sai quia jataniri panra. Quiocua na sarohua.

<sup>4</sup> Jesuuri saaja na riucaaree:

–Maja. Pueyaso Rupaajiniacuajaari naa naajiotasano quiyatej:

“Pueyanoori maja na naatanu saa miaquesanoocuaaja. Seetanujuanaa saminio quiaa cutaraari na tojishacari puetunu Pueyaso Rupaajanaa”.

<sup>5</sup> Na nuhuaji, Sesaacaari Jesu jiyataquiaari Jerusalén tiacajinia. Na nujuatequiaari jiyocuacaanuuri, Pueyaso Secojojua tia cacojiria. <sup>6</sup> Na sequeseeeri:

–Quiaa jaara seetanujuanaa Pueyaso Niyanu quiri, niiquiji quia jaataare jiyocua. Pueyaso Rupaajiniacuajaari naa naajiotasano quiaa:

“Pueyasoori na seya sequenutaniya na cojuanura quiajaniya. Nojoriiri quia quianutaniya, maja quenaaja saajiaacua quia jiriataaquiniuucuaaji”.

<sup>7</sup> Jesuuri na riucaaree:

–¡Maja! Pueyaso Rupaajinia, naa naajiotasanoori quiyajuhuj:

“Maja quia saniniujiniuru quia Jiyaniijia Pueyaso”.

<sup>8</sup> Na nuhuaji, Sesaacaari Jesu tacaniquiaari socua jiyanojua jiyaconaja tuhananuucua. Cuniquiji na niquitiriji puetunu jiya jiyaniijiacajanaari. Jiyanojua cumaacaraca quijiaca. Jiyanojua queraatia casamiriaca quijiacajuhuj. Jiyanojua maninia niquishano. <sup>9</sup> Jesu sequeseeeri:

–Janiyacua quia jiyatere jiyaniijiajanaara nojori nitini, quiaa jaara cua cariquimijaji mojoquetare quia shuquiritianura janiya, quia jiyaniijia cua quiniuria.

<sup>10</sup> Jesuuri na sequereee:

–¡Niiquiji quia quiaare Satanásnaa! Naa naajiotasano quiyacuajaari Pueyaso Rupaajinia: “Saaja quia Jiyaniijia Pueyaso quia shuquiritiare cutara. Saaja nojuaja quia tojiri”.

<sup>11</sup> Na nuhuaji, Sesaacaari na tarinitiaquiaari. Jiyacaritij, Pueyaso seyari Jesuucua niquiaari na mianuutenura.

*Jesu cotesacari poonijionu Galilea jiyajinia*

*(Mr 1.14-15; Lc 4.14-15)*

<sup>12</sup> Jesu niishishacari Tiuquinijiona Juan nujuatesaarucuaa nujuatejojuajinia, nojuajaari Galilea jiyajinia quiaquiaariuhua. <sup>13</sup> Jesuuri Nazaret tiacajiniji pacuquiaari Capernaum tiacajinia na quiniuria, caminia shuriucua. Cuno jiya quiquiaari Zabulón niquiohuacujinio supueno pueya jiya, Neftalí niquiohuacujinio supueno pueya jiyanio. Zabulón, Neftalínio, nojoriiri supuetana Jacobo niquiohua quiquiaari. <sup>14</sup> Jesu quishacari cuno jiyajinia, naa tohuateequiaariiri taa tariucuacaanu Pueyaso sequesano caminiujunina Isaias pohuataquiaari cuno jiyajinijicujani. Nojuajaari naa pohuataquiaari Pueyaso niishitiosano nojuaja taa na nuhuaji na sequesano tohuateenutaniyani:

<sup>15</sup> “Zabulón pueya jiya, Neftalí pueya jiyanio, cunoori caminia shuriuquiumia neteja nucuama quiyaa, mariyata Jordán moo tamajiria. Cunoori mariyata Galilea jiya, tee taucuaca quiyacuajani. <sup>16</sup> Cuno jiyajinia quiniiaari ninishiqui quijiaca quiquiaari. Quiarijia saniniujua, nojoriiri jiuujia Cuhuatana niquriucuaa. Nojoriiri cusonu pueretujuaca quiquiaari tarijia. Quiarijia cutara nojoriiri cuhuatasaaree nojori puereyaquiniucujani”.

<sup>17</sup> Jiyacaritij, Jesuuri Pueyaso rupaa pohuatanu coteequiaari. Naa sequequiaariiri: —Nioojia nia tacatore sesa nia miiniujiniji. Pueyasoori nia paniya na pueya nia quiniuria.

*Jesu saquiriojosacari sapitiaaja ritianaa*

*(Mr 1.16-20; Lc 5.1-11)*

<sup>18</sup> Jesuuri Galilea caminia shuriuquioco rucuaneriquiaa. Jiyacaritij, Pedro niquriiri, tarajanu Andrésnio. Pedro sesa quiquiaarijuhuaj Simón. Nojoriiri sapitiaaja ritianaa quiquiaari shiyaruta. Nojoriiri jiyacari shiyaru jaqueroorariquiaa. <sup>19</sup> Jesuuri nojori sequeere:

—¡Mijil! Cua tarajare. Cua pueyara nia quiri. Janiyacua nia jiyatere pueya quioojuara saniniunijia, juhua sapitiaaja quioonaa.

<sup>20</sup> Nojoriiri na shiyaru tuujiaquiaari ritia. Jesuta quiojijareeri.

<sup>21</sup> Jesuuri shiitaniyojua socua rucuanequiaari na tacoji. Socua caapiqui pueya riuri-ataseeri. Nojoriiri quiquiaari Santiago, tarajanu Juannio. Cuno pojori queeri quiquiaari Zebedeo. Nojoriiri na queta quiriquiaa botejinia. Na shiyaru cushipirijionuuriquiaari. Jesuuri Santiago sequeere Juannio, na pueyara nojori quiniuriajuhuaj. <sup>22</sup> Nojoriiri ritia bote tuujiaquiaari na queta, Jesuta na quojonura.

*Jesu niishitiojosacari queraatia pueya*

*(Lc 6.17-19)*

<sup>23</sup> Jesuuri puetunu Galilea jiyajiniajanaa rucuaneriquiaari na saquiriojosano pueyata. Pueyaso secujojua tiacajiniaqueya niishitiojoriquiaari. Pueyaso rupaa pohuatariquiaari taa Pueyaso jitianu paniya maninia na pueyani. Puetunu tamaatia cusonuunu jitiacojuajanaa naatanijioquiaariiri. Puetunu nootunejaca pueyajanaa shaataquiaarijiaariuhua. <sup>24</sup> Naa maninia na miishanoori pojojtasaaquiaari puetunu Siria jiyajiniajanaa. Naaratej, pueyari Jesuucua patootaquiaari puetunu cusosuhuaanaa, puetunu tamaatia cusonu jitiacajajanaano, cumatacuruhuana cusosuhuajuhuaj, nootunejaciono. Nocua jiyatasaaquiaarijuhuaj samaruhuaraca quijiaca, canashiyajuji cusojonuujuaciono. Jesuuri nojori naatanijioquiaari puetunujanaa. <sup>25</sup> Jiyanojua queraatia pueyari Jesu nuhuajiquiaari Galilea jiyajiniji, Decápolis tiacajinijinio. Na nuhuajiquiaarijuhuaj Jerusalén tiacajinijinio, Judea jiyajinijiniojuhuaj, mariyata Jordán moo taquijiria jiyajinijinionio.

## 5

*Jesu pohuatasacari Pueyaso rupaa tuhuananujiniji*

*(Lc 6.20-23)*

<sup>1</sup> Jesu niquishacari jiyanojua queraatia pueya nocua niyano, nojuajaari tuhuananucua tacaquiaari tiji na cajiniuria. Na saquiriojosano pueyari nocua catecanoquiaari. <sup>2</sup> Jesuuri nojori niishitiojonu coteequiaari. Naa na pueya sequeereeri:

<sup>3</sup> —Shuquiriaatia quijiaca cutaraari noo pojori, canapuete niishiyani noojia sesa quiya. Nojoriiri Pueyaso pueyara quiriquiano, pueyaracaanu na jitianura nojori.

<sup>4</sup> 'Shuquiriaatia quijiaca cutaraari noo pojori canapuete taraatia quiyani sesa na miinuucua. Pueyasoori nojori cumanijianutaniya.

<sup>5</sup> 'Shuquiriaatia quijiaca cutaraari noo pojori, canapuete maja tama nerajaaja niishiriojojuacioni. Nojoriiri nio jiya camaruhua quiniutianiya, taa Pueyaso sequequiaaricujani.

<sup>6</sup> 'Shuquiriaatia quijiaca cutaraari noo pojori, canapuete maninia quiniuucua jiaatiaa jiyanojua, taa pa jiaatiaacuaa miaquenuucua. Pueyasoori maninia quijiacara nojori jiyatenutaniya.



<sup>7</sup> 'Shuquiriaatia quijiaca cutaraari noo pojori, canapuate naquiya miishanoocua taraajejani. Pueyasoori nojoriicua taraajenutaniyajaacuhuai.

<sup>8</sup> 'Shuquiriaatia quijiaca cutaraari noo pojori canapuate maninia jiuujjaracani. Nojoriiri Pueyaso niquniutianiya cutara.

<sup>9</sup> 'Shuquiriaatia quijiaca cutaraari noo pojori, canapuate pueya jiyanoootiootejani. Nojoricuajaari Pueyaso muerasu quiniutianiya.

<sup>10</sup> 'Shuquiriaatia quijiaca cutaraari noo pojori, canapuate naquiya miishanoni, Pueyaso panishano nojori miiniucua. Pueyasoori nojori jitianutaniya pueyaracaanu shuquiriaatia, na muerasu nojori quishacari.

<sup>11</sup> 'Shuquiriaatia quijiaca nijaniya, tamasaca jaara nia macaatiri cua tojitiyajaca nia quishacari, naajuhuai, nojori jaara miya naquiya nijaniya. Naajuhuai, niaari shuquiriaatia quijiaca, nojori jaara saquiriojotare niaacuara na sajonota, maninia nia tojiniucua janiya. <sup>12</sup> Naa jaara naa miishaaretej, jiyanohua nia timiquiore. ¡Shuquiriaatia nia quirijihuai! Pueyasoori cunora jiyanohua maninia nia miiniutianiya jiyocuacaanu nia quishacari nata. Tariucuacaanu Pueyaso sequesano caminiujuniaacuajaari naa naquiya miishaaquiaarijihuai, nia supueyaquishaacarijiyoua.

*Pueyaso muerasuuri juhua shoni quiya mijiria, juhua ninishiqui cuhuatanaajuhuai*  
(Mr 9.50; Lc 14.34-35)

<sup>13</sup> 'Mijiria, niaari juhua shoni quiya, mijiria quiniaa mariqui socua seseyareeri. Shoni jaara na tiquiriquia jatama, ¿maatucua taa tiquiriquiara quirihoani? Maja na naata. Shoni jaara naa quiriritij, najuhuaana quiyari, shaaca. Jiyano shoni cuara jataaarina nuujinia, pueya rapijosocoriquiano.

<sup>14</sup> 'Naajuhuai, niaari juhua ninishiqui cuhuatana mijiria quiniaara. Tiaca jaara tuhuanuucua quiri, majaari na naata na jamaaniu. <sup>15</sup> Naajuhuai, pueya jaara samaritiu noshitiri, jiyocuacaanu morotashiyari, tiaco na cuhuatanura maninia, pueya niquniuria maninia nocuaji. Majaari samaritiu niatasaanu conatu cariquiaco. <sup>16</sup> Naajuhuai, nijaniya cuara maninia miiria pueya niquiara. Maninia nia miishacari, niaari pueya cuhuataa juhua samaritiu. Naa maninia mijia nia quishacaritij, pueyari Jiyocuacaanu Quijia nia Que Pueyaso maniniuhuaqueetanutiya.

*Jesu niishitiojosanoori tariucuacaanu Moisés Rootasanojiniji*

<sup>17</sup> 'Majaari nia jiyaniniu janiyari niqiaarini Moisés Rootasano cua tarinitiniuria nijaniya, Pueyaso sequesano caminiujuniaa rootasanonio. Maja. Niquiaari cutaranijia puetunu cunoro rootasanojuanaa cua tojiniuria, cua tohuateenurajuhuai. <sup>18</sup> Pueyanaa, seetanujanaa nia sequeyanijia. Nio jiya quishacarijia, jiya cajiniocuanio, majaari quenaaja niquiriyatu naashanoniyojuua Pueyaso Rupaajiniji shaajetesaanu quiniutianiya. Majaari na shaajetesaanu quiniutianiya puetunu Pueyaso naajotesaanu cuara tohuateerejaatijia. <sup>19</sup> Naaratej, tamonu pueyano jaara jiyaniri tamonu rootasano tariucuacaanu Pueyaso Rupaajiniji najuhuaana sequesano, nojuajaari cocuaatia miya. Nojuaja jaara cunoro tariucuacaanu rootasano tojiyaquiri, cunoro pueyanoori socua rerequetesano quiniutianiya narta Pueyaso muerasujinijianaa. Naajuhuai, nojuaja jaara pueya niishitiojore nojori tojiyaquiniuria cunoro rootasano, cunoro pueyanoori socua rerequetesano quiniutianiya puetunu narta Pueyaso muerasujinijianaa. Saniniuuja, cante tariucuacaanu Pueyaso rootasano tojiqiaianijia, na niishitiojoquiaa tamasacajaariuhuai, cunoro pueyanoori socua tojishano pueyano quiniutianiya Pueyaso shuriucua jiyocuacaanu. <sup>20</sup> Naa nuooteyanijia, niaa jaara quiyaquiri socua maninia quijiaca Fariseocuacajiniji, Moisés Rootasano niishitiojonaajinijinio, majaari Pueyaso muerasu nia quiniu quiniutianiya.

*Jesu niishitiojosano maja pa juaaniuria*  
(Lc 12.57-59)

<sup>21</sup> 'Niaacuajaari tojiqiaari taa pa supuetanaa sequesaaquiaaricuaajani: "Maja monu. Cante pueyano monani, nojuajaari nequesoreesaanutaniya". <sup>22</sup> Janiyari saniniuuja nia niishitiojijiani, cante narta pueyanota juaajiani, cunoori nequesoreesaanutaniya. Naajuhuai, cante narta pueyano saarijiojuani, cunoori nequesoreesaanutaniya jiyaniijianu-cua niquiara. Naajuhuai, cante narta pueyano sesacareeni, cunoori quera jatashiya mani quiqiojinia, pueyaracaanu saniitosocoriquiano.

<sup>23</sup> 'Naacuajitij, nia niqutionu panishacari Pueyasora nia casaa, niaa jaara jiyacari niishiquii, quiaari quiarta pueyano juaatiriucuaa quiocuara, ritia quia tiujiare cuniqui quia niqutiosocoriquiano Pueyasora, catijiaja shuriucua. <sup>24</sup> Quiarta pueyanota quia jiyanoootioocoocuara coteenu. Na nuhuaji cutara quia naata niqutionu quia casaa Pueyasora.

<sup>25</sup> Tamonu jaara quia jiyataa nequesoreenaacua, sesa quia miiniuucua nojuaja, maninia quia pohuatere ritia nojuaja, taa quia miiniutianiyani na jiyanooniuria quiajanija. Ritia nia jeecatoore nucuaco nia quiasacarijia, quiaa mariqui nequesoreena niquitiosaareeri. Nequesoreena naasucuaari quia niquitionutaniya nujuatejoju camarnu saniniuuja. Nojuajaari quia nujuatenutaniya nujuatejojuajinia. <sup>26</sup> Seetanujuanaa nia sequeyanijia, majaari quia tohuatanu quiniutianiya, quiaa cuara niquitiorejaatijia puetunu na sequesano cumaneecajanaa quia cumaneecajiniji.

*Jesu niishitiojosano, maja pa camishoo maajiicua pa jiaataiaquiniuria*

<sup>27</sup> Niaacuaajaari tari tojiquiaari nio tariucuaaanu rootasano: “Maja tamonu niquiocua numuetucunu”. <sup>28</sup> Janiya cutaraari nia sequeyani, pueyano jaara na camishoo maaji niquiri nocua na jiaatianuta, cunoori juhua na numuetucuree tari noojiajinia.

<sup>29</sup> Na nuhuaji, Jesuuri nio miriqui sequesano sequequiaari pueyara, jiyanohua na niishitiojonura nojori:

–Naaratej, quia miaquetajara quia namijia jaara sesa miitiri quiajanija, quia namijia quia jiatere. Tamocora quia jatere. Quiajanijara socua maninia cutaraari namijijiu quia quiniuria, maja quia jatasaanura mani quiquiojinia puetunu quia cuaqueyatajanaa. <sup>30</sup> Naajuhuj, quia miaquetajara quia numatu jaara quia miitiri sesa, quia jiyatarenoj. Tucuaaanu quia jatere. Socua maninia cutaraari quia quia jiyatanura quia numatu, maja puetunu quia cuaqueyatajanaa quia jatasaanura manijinia, pueyaraanu quia miiniuria naquiya tii.

Naa na pohuatasacaritij, Jesuuri pa niishitiojija maja pa tojiniuria poojia panishano, sesa na miitiniuria pa cuaqueya.

*Jesu niishitiojosano maja pueya cartenura necocua*

(Mt 19.9; Mr 10.11-12; Lc 16.18)

<sup>31</sup> Jesuuri naa niishitiojoquiaarijuhuaj:

–Pa supuetanaari naa rootasaquiaarijuhuaj: “Pueyano jaara necocua cartere, maaji cuara niquitiosaaria naajione, pueya niishiniuria neyacaqui na carteree”. <sup>32</sup> Janiyari saniniuuja nia sequeyanijia, pueyano jaara necocua cartere, sesa miya Pueyaso niquiaaraari. Naacujitij, na cartesano maajiiri tamonuta quiniutianiya na nuhuaji. Cunoori sesa Pueyaso niquiara. Pueyano jaara niishiri necocuaari tamonu caya numuetucujutequiaa, saa cunoraja cutara na naata na cartenu. Pueyanoori sesa miyajuhuj, jaara cartesano maaji camiri.

*Jesu niishitiojosano maja pa sapojonura*

<sup>33</sup> Niaari tarijia tojtiaquiaari taa pa supuetanaa rootasaquiaarini. Naa rootasaquiaariiri: “Majaari nia jatanu nia sequesano, niaa jaara sequere: ‘Seetanujuanaari cua sequesano. Pueyasocuaajaari niishiya majaari cua sapojonu’”.

<sup>34</sup> Janiya cutaraari nia sequeyani, nia sequesano jaara seetanujuanaa sequesano quiri, saaja nia sequere “jaa”. Jaara seetanujuanaa quiaquiri nia sequesano, saaja nia sequere “maja”. Majaari nia sequesano nia maateni najuhuaa naatej: “¿Janiyate sapojouani? Cua rupaari juhua jiya cajiniocua. Maja na jatanu quiniutianiya”. Majaari naa sequenutej pueyanaa. ¿Majateeri nia niishiniu, jiya cajiniocuaari Pueyaso quiquio? <sup>35</sup> Naajuhuj, ¿casaara nia sequequiaa najuhuanani: “Cua sequesanoori juhua pa jiya? Majaari na shaajenu quiniutianiya”. Maja nia sequenutej. Pa jiya, cunoori Pueyaso niaja na niohuaca. Naajuhuj, ¿casaara nia sequequiaani: “Cua sequesanoori juhua Jerusalén tiaca? Pueyaraanu quiniutianiyari”. Maja nia sequenutej. Jerusalén tiacaari pa Jiyaniijia Pueyaso tiaca. <sup>36</sup> Naajuhuj, ¿casaara nia sequequiaa na najuhuanani: “Quia naataari cua sequesanoocua tiuuniu, cua naca quishacarijia”? Majaari naa sequenutej pueyanaa. Niaa jaara naa sequeretej, nia niishiri, majaari nia naata quenaaja niquimi nia miesujinijinio nia jiyatenu taariuria, muerumecarano. <sup>37</sup> Naaratej, pueyaraanu saaja seetanujuanaa nia sequere “jaa”, “maja”. Cante na sequesano maatejani, cunoori Sesaaca niishitiojosano nijaniya.

*Jesu niishitiojosano maja pa naminiuria*

(Lc 6.29-30)

<sup>38</sup> Niaacuaajaari tari rootasaquiaari: “Pueyano jaara tamonu pueyano namijia cocuartare, na namijia cuara cocuartaariajuhuaj, pueya nequesoreena niquiara. Naajuhuj, pueyano jaara tamonu pueyano quiaja shaatare na pishacari, na quiaja cuara shaataariajuhuaj”. <sup>39</sup> Janiyari saniniuuja nia sequeyani, pueyano jaara quia miiniu paniri sesa, quia cuaqueya quia tarinitiare nera. Majaari na nujuatanu. Naacujitij, pueyano jaara quia maseca piri, majaari juaani. Quia jiyanoori. Nojuaja jaara socua quia piriouhua, quia jiyanoori. Majaari na naminiu. <sup>40</sup> Pueyano jaara quia toque jaaritianu

paniri, nera quia tarinitiare. Cuaara na paara. Mariyata quia cushishano shiniquiaacuaji quia niquitiore nareja. Majaari jamueja quia quiniu. <sup>41</sup> Tamonu camarnu jaara quia sequere na naacutanura na casami quia jatanura nuu cajiniocua, majaari na tarijionu. Saniniuujia, shuquiriaatia quia naacutare na casami jatanura socua tucuacaanu na sequesanojiniji. <sup>42</sup> Tamonu pueyano jaara quia casami masenu paniya nera, quia niquitiore nareja. Naajuhujaj, tamonu pueyano jaara quia casaa panu paniya nareja rupaquijiara, quia niquitiore. Majaari na ruuretanu. Capora quia quiri.

*Jesu niishitiojosano pa paraca pa paniniuria*

(Lc 6.27-28, 32-36)

<sup>43</sup> Niacuajaari nio tariucuacaanu sequesano tojtiaquiaarijuhuaj: “Quia shuriucua quinia quia paniri. Saniniuujia, majaari quia paraca quia niquiniu”. <sup>44</sup> Janiya cutaraari nia sequeyani, nia paraa nia paniri. Nia sesacaja pueya nia maniniuhuaqueetare pueya niquiara. Pueyano jaara niaacuara saquiriojotare na sauponuta, nocuara nia secojore Pueyaso. Sesa nia miiniaacuara nia secorejehuhaj. <sup>45</sup> Naa maninia nia miishacaritij, niaari seetanujuanaa jiyocuacaanu Quijia nia Que Pueyaso muerasu quiniutianiya. Nia niishiri, Pueyasoori pananu muetaniquiaa sesa pueyara na janura, maninia pueyara na janurajuhujaj. Pueyasoori maru nitiquiaa maninia miijiaca pueyara, sesa miijiacarajuhujaj, maninia nojori nataacuaca moritianura. <sup>46</sup> Naa jaara saaja nia panijiaca pueya panijia quiri quia, ¿Pueyasoteeri cunora nia shuqiritianutaniya, socua na casaajiniji na niquitionura nijaniya? Maja. Sesa miijiaca pueyani, noo pojori canapute cumaneeca masejoquiaa na sauponutani, nojoriiri maninia miiquiaa na panishano pueyajuhujaj. <sup>47</sup> Naa jaara saaja nia panishano pueya saruhuataquiaa, ¿niaateeri cunora maninia miijiaca quia Pueyaso niquiara? Maja. Pueyaso niishiyashijiaca pueyari naa maninia miiquiaa na panishano pueyajuhujaj. <sup>48</sup> Naaratej, maninia miijiaca nia quiri juhua jiyocuacaanu Quijia nia Que Pueyaso. Nojuajaari seetanujuanaa maninia miijia. Rimiajata miyashijia cutara.

## 6

*Jesu niishitiojosano saaja maninia pa miiniuria Pueyaso niquiara*

<sup>1</sup> Tama nia cuaqueyajaaja nia cojuare maja maninia nia miiniuria saaja pueya niquiara, pueya maniniuhuaqueetanura nijaniya. Pueya jaara nia maniniuhuaqueetare maninia nia miiniucua, nia Que Pueyasoori maja na niquitionu quiniutianiya nijaniya socua, maninia nia miiniucua. <sup>2</sup> Naaratej, niaa jaara casamijiuucua pueya niquitionu paniri nareja nia casamijiniji, majaari juhua sesa jiuujiaraca pueya nia miiniu. Cuno pojoriiri pueya numootequiaa na niquitionu panishacari na casaa, puetunu pueyajanaa shootianura nojori. Cuno pojoriiri naa miiquiaaqui Pueyaso secjojua tiacajinia, tiacaacacajuhujaj, pueya maniniuhuaqueetanura nojori. Seetanujuanaa nia sequeyanijia, cuno pojoriiri tari maseree narta pueya maniniuhuaqueetanu. Majaari nojori masenu quiniutianiya socua Pueyasojiniji naa maninia nojori miiniucua. <sup>3</sup> Saniniuujia, niaa jaara nia casaajiniji casamijiuucua niquitionu paniri nareja, quia mueneca cuaara niishiyaqiirria quia niquitiosano quia miacquetajata. <sup>4</sup> Naa miriqui sequere nijaniyanijia cua niishitiojonura nijaniya, jiyasohuaja nia miiniuria puetunu maninia nia miiniu panishanojuanaa. Naacuajitij, saaja nia Que Pueyasoori jiyasohuaja maninia nia miishano niishiniutianiya. Naaratej, nojuacuajaari nia niquitionutaniya na casamijiniji, na shuqiritiasacari nijaniya.

*Jesu niishitiojosano naa pa secjonura Pueyaso*

(Lc 11.2-4)

<sup>5</sup> Naa secjosacari Pueyaso, majaari juhua sesa jiuujiaraca pueya nia miiniu. Cuno pojoriiri Pueyaso secjonu maniniucuaquiaa na nujuanuta pueya niquiara, saaja pueya shootianura nojori. Nojoriiri naa secjonuuquiaa Pueyaso secjojua tiacajiniatej, tiaca nuucujinijuhujaj, tee queraatia pueya quiyacuajani. Seetanujuanaa nia sequeyanijia, cuno pojoriiri tari maniniuhuaqueetasarecuaaja. Jiyano pueyatej, majaari nojori masenu quiniutianiya socua Pueyasojiniji. <sup>6</sup> Nijaniya saniniuujia, nia secjosacari Pueyaso, nia sohuacamara nia tiuquiri. Nia tiootiu nia tiore. Na nuhuaji, cuniqui nia Que Pueyaso nia secjore jiyasohuaja tamajaaja. Nia Que Pueyaso niquishacari naa jiyasohuaja nia miishanotej, nojuaja cutaraari nia niquitionutaniya na casamijiniji, na shuqiritiasacari nijaniya.

<sup>7</sup> Naa secjosacari Pueyaso, majaari nia sequesano pacutejojua nia quiniu puera, juhua Pueyaso niishiyashijiaca. Cuno pojoriiri jiyaniya Pueyasoori nojori tojiniutianiya pueyaracaanu na pacutejosacari tariucua na sequesano. <sup>8</sup> Majaari juhua nojori nia miiniu. Pa secjojiaquishaacarijijojua, pa Que Pueyasocujaari tari niishiya casaa pa paniyani. <sup>9</sup> Naaratej, naate nia secjore:

“Canaa Queana, quiaa cutaraari jiyocuacaanu Quijia. Pueya cuaara niishiiria quiaari saaja maninia quijia. <sup>10</sup> Quia quiri canaa Jiyaniijia, canaa quia jiitianura. Quia panishano cuaara miishaaria mijiria, taa jiyocuacaanu na miishaaquiaacuaani. <sup>11</sup> Canaa quia niqutiore canaa miaquesocoriquiano quiarijiani. <sup>12</sup> Canaa quia jiyanoori sesa canaa miishanojiniji, taa canaa jiyanooquiaa tamasaacuaani, sesa nojori miishacari canaa. <sup>13</sup> Majaari canaa quia shanacunu canaa saniniujushaanura sesa canaa miiniuria. Saaja canaa quia cojuare cutara Sesaacaacuai. Saaja quiajaniya cutaraari seetanujuanaa Jiyaniijijanaa. Quiaa cutaraari puetunu cumaacaracajanaa. Quiaari shanohua shacantuua quijia cutara. Quiaari naa quijia pueyaraanutej. Tariucuaaja”.

<sup>14</sup> “Naatej, niaa jaara jiyanoori tamasa, sesa na miishacari niajaniya, nia Que Pueyasoori nia jiyanoonutianiyajuhuj. <sup>15</sup> Saniniujia, niaa jaara tamasa jiyanoyaquiri, nia Que Pueyasoori maja na jiyanoonu quiniutianiya niajanijuhuj sesa nia miishanojiniji.

*Jesu niishitijosano taate pa naata miaqueyaquiniuni Pueyaso pa secojonura*

<sup>16</sup> “Niaa jaara miaqueyaquiya Pueyaso nia secojonura, majaari macuhuaejeconu pueya niqiiara, taa sesa jiuujiaaca pueya miiquiaatej. Nojoriiri naa miiquiaatej, pueya niishishocoriquiano nojori miaajeya. Naa pueya shootiasacari nojoritij, seetanujuanaa nia sequeya cutaranijia, narta pueyari tari nojori maniniuhuaqueetarecuaaja. Majaari Pueyasojiniji nojori masenu quiniutianiya socua. <sup>17</sup> Niajaniya saniniujia, nia miaqueyaquishacari Pueyaso nia secojonura, nia jiquioco nia jeequere. Nia canuure nia muesu, taa nia miiquiaa pueyaracaanucujani. <sup>18</sup> Naa nia miiri Pueyaso nia secojosacari, maja pueya niishiniuria cunogui miaajeya. Saaja pa Que Pueyaso cutara cuaara niishiiria nia miishano. Naacujitij, nojuajaari nia niqutionutianiya na casamijini nia shuquiritianuucua niajaniya.

*Pa casami pa racatare jiyocuacaanu Pueyaso shuriucua*  
(Lc 12.33-34)

<sup>19</sup> “Pueyanaa, maja mijiria nia racatanu nia casami najuhuanaj. Saaja capora nia quiri cutara. Mijiria pa racatasacari pa casami, surequeyari na miaquenutianiya. Tiyarashiniutianiyajaariuhuj. Nohuasenujuacaari nocua tiuquiniutianiya na nohuasenura. <sup>20</sup> Nia racatare cutara nia casami Pueyaso shuriucua jiyocuacaanu. Tii cutaraari shaacqui surequeya, shaacqui tiyara. Naajuhuj, nohuasejojuuari maja na naata nocua tiuquiniu tii, jiyocuacaanuji nia casami na nohuasenura. <sup>21</sup> Niaa jaara nia casami racatare mijiria, niaari nocua niishiriojonutianiya pueyaracaanu. Nia casami jaara racatasano quiri Pueyaso shuriucua saniniujia, niaari Pueyasoocua niishiriojonutianiya. Majaari nia tacaaniu quiniutianiya mijiria casaacua tari.

*Pa cuaqueyajinia cuhuatanajiniya pohuatasano*  
(Lc 11.34-36)

<sup>22</sup> “Pa namijiaari juhua poojia cuhuatana. Naacujitij, paa jaara sesa casaacua jiaatiaahijia qiririni, poojiaari juhua cuhuashiqui quiya maninia. <sup>23</sup> Niaa jaara sesa casaacua jiaatiaajaca quiri saniniujia, nioojiaari juhua ninishiqui quiya. Nioojia jaara sesa casaacua jiaatiaja quiri, nioojiaari socua ninishiqui quiya cariyujuaru pueyanojiniji.

*Pueyaso panijia pa quiri, maja cumaneeca panijia*  
(Lc 16.13)

<sup>24</sup> “Maja nia naata poonijionu maninia caapiqui camarnura. Niaa jaara caapiqui camarnuraca quiri, niaari tamonu paniniutianiya, niaari saniniujia tamonu niqiniuni paniaquiniutianiyacujua. Naacujitij, niaari shuquiriaatia poonijionutianiya nia panishano camarnura. Niaari tamonu soojotanutianiyacujua. Naajuhuj pueyanaa, majaari nia naata Pueyasora poonijionu maninia, cumaneecaacua nia jiaatiasacarijuhuaj.

*Pueyaso na muerasu cojuaja*  
(Lc 12.22-31)

<sup>25</sup> “Naaratej, nia sequeyanijia, maja puera nia niishiriojonu casaa nia miaquenutianiyani, casaa nia ratunutianiyani, casaa nia cushiniutianiyani. Pueyaso jaara pa shipiniquiaari pueyano pa quiniuria, ¿majateeri na niqutionu quiniutianiya pa miaquenu panishano, pa cushiniu panishanonio, maninia pa rishiniuria? Taaquiriirinij. <sup>26</sup> Jiyocuacaanu jaacuatujua nia niquiricuaa. Nojoriiri maja na natanu. Majaari na senoonu. Majaari nojori mishinijionu tiaco na miajajaura. Naajaa, pa Que Pueyasoori nojori niqutioquiaa na panishano. Nia niishiri. Niaa cutaraari socua Pueyaso panishano cuno jiyocuacaanu jaacuatujacajini. <sup>27</sup> ¿Nia naatate socua jiaaconajara maashiniu, jiyanohua nia tacaanuitia? Maja.

<sup>28</sup> Naajuhuj, ¿casaara nia tacaquaiarini nia niishiriojosacari casaa nia cushiniutianiyani? Naana shuucuaca nia niquiriquiacuaa. Nojoriiri maja na niishiniu poonijionu. Majaari na niishiniu na maniniushitajara shitianujuhuj. <sup>29</sup> Seetanujuanaa nia sequeyanijia, pa supuetanaa jiyaniijia Salomónri jiyanohua shanohua toqueya cushijia quiquiaari. Naajaa, na toqueeri maja socua shanohua niquishano quiquiaari cuno naana shuucuacajiniji. <sup>30</sup> Naana shuuri saaja rupaquijia shanohua niquishano. Jaara sorere, namitiashiyari catijiasocoriquiano. Pueyasoori naana shuu shipiniquiaari saaja rupaquijia shanohua niquishocoriquiano, na nuhuaji catijiasocoriquianonio. Nojuaja jaara naa shanohua naana shuucuaca shipiniquiaari, ¿mamateeri socua maninia na miiniu quiniutianiya niaara? ¿Casaara nia tiuyaquiya nia Que Pueyasocuaarini? <sup>31</sup> Naaratej pueyanaa, maja nia tacaaniu. Majaari nia sequenu: ¿casaa pa miaquenutaniyani?, ¿casaa pa ratunutaniyani?, ¿casaa pa cushiniutaniyani? <sup>32</sup> Pueyaso niishiyashijiaaari naa sequejacatej, puera nojori tacaashacari puetunu na panishano casaacujanaa. Niaa cutaraari jiyocuaaanu quijia Queraca. Nojuacuajaari tari niishiya puetunu nia panishanojuanaa. <sup>33</sup> Naaratej, coteenu nia niishiriojore Pueyaso tojjijara nia quiniuria cutara. Pueyasocua nia niqutiore puetunu nia panishanojuanaa. <sup>34</sup> Naajuhuj, majaari tariquiria nia tacaaniu. Saaja nia niishiriojore cutara, taa nia miiniutianiya maninia quiarijiani. Tariqui cutara niocua niishiriojore taa nia miiniutianiya maniniani. Tariucujaja quiarijia nia niishiriojosano nio juucara. Majaari socua tariquiria nia tacaaniu. Saaja nia Que Pueyasocua nia tiuuri, juhuajaniya nia quiniuria.

## 7

*Majaari quarta pueyanoocura soqueto nia quiniu*  
(Lc 6.37-38, 41-42)

<sup>1</sup> Maja niarta pueyano nia soquenu najuhuanaj, Pueyaso mariqui nia jiyanoyaquirijiaariuhuj. <sup>2</sup> Taa nia sesacaquiaa tamasacuaani, niaari naa sesacasaaanutaniyajuhuj. Naatej, taa nia miiquiaa tamasacuaani, Pueyasoori mariyata naa miiniutianiya nianianiyajuhuj. <sup>3</sup> Nio miriqui cua sequesano nia tojiri. ¿Casaara nia niquiya rucucua nia tarajanu namijiajiniani, niaa jaara puereetuca maca jitiiaa tama nia namijiajiniajaaja cutara? <sup>4</sup> Maca nia jitiiasacari tama nia namijiajiniajaaja, ¿casaara nia sequeya niarta pueyanoni: “Cuno rucucua pa taquiri quia namijiajiniji?” <sup>5</sup> Sesa jiuujiaracanaa, coteenu nia pare cuno maca nia namijiajiniji cutara. Na nuhuaji niocua maninia niquiri cutara, nia tarajanu rucucua nia taquiniuria na namijiajiniji. Nio miriqui cua sequesanoori nio sequeya: nioojia seque nia jeeicare coteenu, na nuhuaji cutara niocua maninia nacasure niarta pueyano.

<sup>6</sup> Majaari Pueyaso ruuretajaca nia niishitiojonu Pueyaso rupaa najuhuanaj. Cuno tojiyashijiaaari nia tojiyaquiniutianiya, naatej taa tamonu pueyano sare tojiyaquiquiaa nijaniyacuaani. Majaari Pueyaso soojeaca nia pohuatanu Pueyaso miishano shanohua nijaniyara. Nojoriiri saaja rerequetenutaniya Pueyasojiniji nia pohuatasano, naatej taa cushiya rapijioquiaa marajinia juhuajaniya na niishishoo maninia casaacuaani.

*Pueyaso pa secorej*  
(Lc 11.9-13; 6.31)

<sup>7</sup> Pueyaso nia secorej. Nojuajaari nia niqutionutaniya nia masesano. Niaa jaara pajere, niaari nia pajesano riuratanutaniya. Tohuateyaji nia piqiri, niaacuajiiri riataaanutaniya. <sup>8</sup> Cante Pueyaso maseya na panishanoni, seetanujuanaa na masenutaniyari. Naajuhuj, cante pajejani, na panishano riuratanutaniyari. Cante tohuateyaji piqijiani, nocuajiiri riataaanutaniyajuhuj.

<sup>9</sup> Mueya jaara na que nenecojore neecaruura, ¿na queteeri na niqutionutaniya saajia? ¡Maja! <sup>10</sup> Mueya jaara na que nenecojore sapitiaajara, ¿na queteeri na niqutionutaniya soconu? ¡Maja! <sup>11</sup> Nijaniyari sesa miiniu niishijiaa. Naajaa, niaacuajaari maninia casaa niqutionu niishijia, nia mueya jaara nia nenecojore. Nia Que Pueyaso cutaraari jiyanohua socua maninia niqutionu niishijia, na muerasu secojosacari nojuaja.

<sup>12</sup> Pueyaracaanu maninia nia miiri tamasaca, taa nia paniquiaa pueya miiniuria nijaniyacujani. Niaa jaara maninia miiriquia nio cua sequesano, niaari tari tojitiiaa maninia puetunu tariucuaaanu Moisés Rootasanojuanaa, tariucuaaanu Pueyaso sequesano caminiujuniaa rootasanonio.

*Pueyasocua nuuri secanuniojua*  
(Lc 13.24)

<sup>13</sup> Pueyasocua neteja nuu nia pajere, shiitaniyojua nuuri tuneja. Saniniujia, puereetuca nuuri neteya mani quiquiojinia. Puereetuca na tuneja. Puereetucaari neteya, carianujuhuj. Naaratej, queraatia pueyari juhuajaniya cuno nucuaco quiojiya

saniitiosocoriquiano. <sup>14</sup> Saniniuuja, shiitianiyojua nuuri maninia cutara. Cuno nuacuaco quiojonaari pueyaracaanu quiniutianiya Pueyasota cutara. Jiyanojua shiitianiyojuaari cuno nuu tuneja. Secaja pueyari na riuriataa, cami na quiojonura.

*Naanaari niishishano na jajaujini*  
(Lc 6.43-44)

<sup>15</sup> Tama nia cuaqueyajaaja nia cojuare sapojonuujuaacuajiji, noo pojoriicuajiji canapue te najuhua sequejacuajani: “Pueyaso Rupaa pohuatananijia”. Nojoriiri sapuenu juhua maninia pueya niquishano, nojori sapojonura niajaniya. Nojoriiri sapuenu juhua borregoniyojua niquishano, seetanujuanaa juhua puereeta sare nojori quishacari, sayoru. <sup>16</sup> Niocua nojori niishiri, sesa nojori miiniucua. Nojoriiri maja na naata miiniu maninia, naatej taa cohuatucuaani, majaari na naata muetunu marijiaca. ¿Shuumiateeri na naata muetunu cohuajaru? Maja. Naajuhua, cuno sesa jiuujaraca pueyari maja na naata maninia miiniu. <sup>17</sup> Maninia naanaari, maninia jajau muetujua cutara. Saniniuuja, sesa naanaari, sesa jajau muetujuaaja. <sup>18</sup> Maninia naanaari maja na naata sesa jajau muetunu. Naajuhua, sesa naanaari maja na naata maninia jajau muetunu. <sup>19</sup> Naana jaara sesa jajau muetujua quiri, nushiyari, manijinia catijasocoriquiano. <sup>20</sup> Naacuajitij, niocua cuno sapojonuujua pueya niishiri nojori miishanojiniji sesa.

*Saaja noojiaqueya pueyari Pueyaso muerasura quiniutianiya*  
(Lc 13.25-27)

<sup>21</sup> Cuno pojori canapue te cua sequejacani: “Cua Jiyaniijianaa, cua Jiyaniijianaa”, noojiaqueya nojoriinijinioori maja nojori tiuquitianu quiniutianiya cua Que Pueyaso quiquiojinia. Saaja seetanujuanaa cua Que tojtiajaca cutaraari nocua tiuquitianutianiya. <sup>22</sup> Cua nequesoreesacari pueya nio jiya puequesacari, queraatia pueyari cua sequentianiya: “Cua Jiyaniijianaa, cua Jiyaniijianaa, canacuajaari quia rupaa pohuataquiaari pueya niquiarani. Canaa sequesacari quia sesa, canaari samaruhua tohuatanijioquiaari quia cumaacatani. Naajuhua, canaari cusosuhua naatanijioquiaarini quia sesa canaa jiyaniquishacari”. <sup>23</sup> Janiyari saniniuuja naa sequejaca riuquanutianiya: “Maja cua niishiniu niajaniya. ¡Nia quiojorohua! Niaari saaja sesa miijiaca quiquiaari”.

*Jesu tojtiajaca miishanoori pueyaracaanu rishiniutianiya cutara*  
(Mr 1.22; Lc 6.47-49)

<sup>24</sup> Naacuajitij, cante cua sequesano tojjijiani, cuno pueyanoori shuquiriaatia quiniutianiya juhua niishijia pueyano. Niishijia pueyanoori tiaquiaari cumueeca jiyajinia. <sup>25</sup> Na nuhuaji, maruuri jiyanojua niquiaari. Moori pajaashiquiaari. Paratuuri jiyanojua piyarojoquiaari cuno tiaacuara. Naajaa, majaari na pojoretanu quiquiaari, cumueeca jiyajinia na nujuatasacari. <sup>26</sup> Cante cua sequesano tojyashijia saniniunijia, cunoori moseeca. Cua sequesano ruuretajaari taraatia quiniutianiya juhua moseeca pueyano. Moseeca pueyanoori jaaquiajinia tiaquiaari. <sup>27</sup> Maruuri jiyanojua niquiaari. Moori pajaashiquiaari. Paratuuri jiyanojua piyarojoquiaari cuno tiaacuara. Cuno pueyano tiaari pojotaquiaari. Na camaruuri jiyanojua taraatia quiquiaari na tia pojotasacari.

<sup>28</sup> Jesu jaara niishitiojonu pucaquiaari, pueyari jiyanojua jiuujateriquiaa na niishitiojosano nojori tojishacari. <sup>29</sup> Pueyari naa jiuujiatequiaari seetanu cumaacatajanaa Jesu niishitiojosacari juhua jiyaniijiajanaa, maja juhua Moisés Rootasanojiniji niishitiojonaa. Cuno pojoriiri nareja tariucuaaanu rootasano caminiujuquiaari pueyaracaanu.

## 8

*Jesu naatanishacari sesa cusonu jiiitaja*  
(Mr 1.40-45; Lc 5.12-16)

<sup>1</sup> Jesu jaara tuhananujiniiji rosequiaariuhua na cuginiaata, jiyanojua queraatia pueyari na nuhuajiriqiaa. <sup>2</sup> Tamonu pueyano cusosuuri jiyacari Jesuucua catecanoquiaari. Jiyanojua sesa cusonu jiiitajiaquiariri. Tahue rupajinia, cuno cusonu sesaari quiquiaari “lepra”. Pueyano shuuri juhua miaquesano quijia na cuaqueyajinia cuno cusonu na jiiitasacari. Cusosuuri Jesu cariquimijia mojoquetaquiaari Jesu na sequenura na panishano. Naa na sequereeri:

– Jiyaniijianaa, quia jaara paniri, niishiyacuajaniya quia naata cua cusonu cushirititini.

<sup>3</sup> Jesuuri nocua taraajequiaari. Nocua niaree na juaashiquiaari. Na sequereeri:

– Jaa, panianijia. Cuaara cushiriiria quia cusonu.

¡Jiyacaritij, ritia cushiriiquiri! Jeequerohuari. <sup>4</sup> Na nuhuaji, Jesuuri naa na rootaquiaari:

– Cua tojiri. Maja tamasa niquiara quia pohuatanu cua miishano quiajaniya. Saaja Pueyaso secojonaa jiyaniijia quia cuaqueya quia niquitiri, na cartenura quiajaniya, pueya tajinia quia rucanejonuhua juhujaniya. Na nuhuaji, ritia quia niquitioire quia seru

Pueyasooacara catijiasocoriquiiano. Naa quia miiritij taa Moisés niishitiojoquiaari tarijiacuajani, juhua jeequesano quia quiniuria Pueyasora. Naacuajitij, pueyari niishiniutianiya quiaari tari jeequerohua quia cusonujiniji.

*Jesu naatanishacari Romano capitán seru*  
(Lc 7.1-10)

<sup>5</sup> Jesu jaara tiuquiquiaariuhua na pueyata Capernaum tiacajiniohua, Romano soldadohua jiyaniijiaari Jesuucua niquiaari na secojonura Jesu. <sup>6</sup> Naa na sequequiaariiri:

–Jiyaniijanaa, cua seruuri cusosu maquetujinia. Majaari na naata pooniniu quenaaja. Jiyanohua naquiya miya na noonutaari.

<sup>7</sup> Jesuuri na sequequiaari:

–Janiyacuajaari nocua quianutaniyani na cusonu cua shaatanura.

<sup>8</sup> Soldadohua jiyaniijiaari na riucaaree:

–¡Maja jiyaniijanaa! Janiyari maja pueyano maniniuni, cua tiajinia quia tiuquiniuria. Nareja quia sequere, cua seru cusonu cuaara shaateera tamajaaja. Niishiyacuajaniija, quiaari na shaatanutaniya saa quia rupaataja. <sup>9</sup> Janiyari jiyaniijiaracajaniuhua. Na tojiquiaanijia. Naajuhua, cua soldadohuari cua tojtiaquiaajuhua, cua sequesacari nojori. Naacuajitij, janiya jaara tamonu sequereni: “Quia quiaare”, cunoori ritia quiaquiaa. Naajuhua, janiya jaara tamonu sequereni cuaara niiria, cunoori ritia niya cucua. Janiya jaara cua pataaco seru sequereni cuaara miiria cua panishano, na miiquiaari. Cua sequesano jaara naa tojishaquiaacuaa, quia sequesano cutaraari tojishaanutaniya.

<sup>10</sup> Jesu jaara tojiquiaari naa cuno tahue sequesantej, jiuujiatequiaariiri. Na cojiniaa sequereeri:

–¡Seetanujanaa nia sequeyanijia, majaari quenaaja parta Israel pueyainijinio cua niqiniuu quiquiaa Pueyasooacara tiuujia cutara, juhua nio tahue! <sup>11</sup> Seetanujanaa nia sequeyanijia, queraatia taucuacaari Pueyasooacara tiuujiaa quiniutianiya juhua nio tahue. Nojoriiri tucuacaanuji nijionutaniya pananu muetasamaji, pananu tiuquishocojijuhua. Nojoriiri pa supuetanaata cajitiuniutianiya na miaquenuunura Pueyaso shuriucua. Tii quiniutianiya shuquiriaatiari pa supuetanaata: Abrahamta, Isaactajuhua, Jacobotania.

<sup>12</sup> Parta Israel pueya, canapueete Abraham jiniuanucujinio supuenoni, nojoriiri saniniuujia tamocora quejoosanutaniya ninishiqui, nojori tojtiaaquiniucua Pueyaso. Nojoriiri tii sariyocuatunutaniya naquiya na miishacari. Na quiaa miaquenuunutaniyani na noonuta. Nojoriiri juucua saquiriojsaaquiaari Pueyaso muerasu nojori quiniuria. Nojoriiri jiyaniya nojoriiri Pueyaso muerasu cutara Abraham jiniuanucujinio nojori quishacari.

<sup>13</sup> Na nuhuaji, Jesuuri cuno soldadohua camarnu sequequiaari:

–Quia tiajinia quia quiaarohuaqui. Cuaara quiiriaqui taa quia sequereecuajani.

Jiyacaritij, na seruuri ritia naataquiaariuhua.

*Jesu naatanishacari Pedro reyarucua*  
(Mr 1.29-31; Lc 4.38-39)

<sup>14</sup> Jesuuri quiaaree Pedro tiajinia. Tii Pedro reyarucua niquishiiri cusosu mataano na maquetujinia. Naseeca matariquiaari. <sup>15</sup> Jesuuri na juaashiquia quiasee. Na naseeca cusonuuri ritia na tajiquiaari. Ritia sanequiaariiri Jesu na mianuutenura.

*Jesu naatanijosacari queraatia pueya*  
(Mr 1.32-34; Lc 4.40-41)

<sup>16</sup> Shusha ninishacari cuno juucaja, cuno tiacajinijinio pueyari queraatia samaruhuara pueya jaatucunuquiaari Jesuucua. Jesuuri cuno samaruhua tohuatanijioquiaari saa na rupaataja. Puetunu cusosuhujanaa naatanijiorejaariuhua. <sup>17</sup> Naa tohuateequiaariti supuetana Isafas naajiotasano, Pueyaso niishitishacari nojuaja Jesujiniji. Naa naajiotasano quiyari:

“Nojuajaari taraatia pa miiniu jaariutiaree pajaniyajiniji. Pa niti cusoyareeri puetunu pa cusonujanaa na jatanura”.

*Tamasaca pueya quiniu panishacari Jesu pueyara juucua*  
(Lc 9.57-62)

<sup>18</sup> Jesu jaara jiyanohua queraatia pueya niquiquiaari na shocua maano, na pueya sequereeri:

–Caminia taquijiria pa niuutiaare.

<sup>19</sup> Jiyacaritij, Moisés Rootasanojiniji niishitiojona pueyanoori Jesu sequere:

–Niishitiojonanaa, janiyari quiata quianu paniani. Janiyacua quia tarajareni puetunu tiquiyocujanaa quia rucuanijosacari.

<sup>20</sup> Jesuuri na riucaaree:

—Quioojuapue cutaraari na raa jiitiaa. Shuhuari na jesuhua jiitiaajuhua. Saniniuujia, pueyano cua quishacari mijiria, majaari cua maquejara cua jiitianu quenaaja, taa cuno casami jiitiaacuaa na maquetujuarani.

<sup>21</sup> Tamonu Jesu pueyajiniinioori Jesu sequeree:

—Cua jiyaniijianaa, cua tarinitiare, cua que niquirijaara. Janiya jaara na shaajareni, janiyacua quia tarajare cutarani.

<sup>22</sup> Jesuuri na riuquaree:

—Naajaa, cuata quia quiaare cutara. Quia tarinitiare nojuaja. Macunucua cuaara jamoora tama narta macujuaaja. Naatej, cante Pueyaso tojtiaashijiacani, nojoriiri tari-cua juhua macunucua quiya Pueyasora.

*Jesu suraajasacari paratu, mohuacanio*

(Mr 4.35-41; Lc 8.22-25)

<sup>23</sup> Na nuhuaaji, Jesuuri botejinia tacaquiaari. Na saquirojosano pueyari nata quiojo- quiaari. <sup>24</sup> Paratuuri senota piyarojonu coteequiaari nojori niuutiasacari. Jiyano- hua piyarojoriquiaari. Caminiaari jiyano- hua queyocuariquiaa paratu piyarojosacari. Mohua- caari bote jiniacuma mishiriquiaa. Jesuuri jiyacari maqueriquiaa. <sup>25</sup> Na pueyari cunora na niucujasee. Jesu sequetteeri:

—jIyaniijianaa, canaa quia naacutare! ¡Paa tari tiuquitiaareni!

<sup>26</sup> Nojori riuquareeri:

—¿Casaara nia pueretiuyani? ¿Majateeri nia niishiniu Pueyasocua tiuuniu?

Jesuuri saneree. Paratu sequereeri, mohuacanio:

—jNiaaj, nia suraajere!

Paratu, mohuacaari ritia suraajequiaari. <sup>27</sup> Jesu pueyari jiuujiatequee. Tama nojoriji- aarijia sequequiaari:

—jUhuej! ¿Taamueca pueyanotucuaanojoni? ¡Paratuuri na tojiya, mohuacajuhua!

*Jesu tohuatanishacari samaruhua, caapiqui pueyajiniji Gadara jiyajinia*

(Mr 5.1-20; Lc 8.26-39)

<sup>28</sup> Jesuuri na saquirojosano pueyata tiuquijioquiaari caminia taquijiria Gadara jiya- jinia. Jiyacaritij, caapiqui pueyanoori Jesuucua tohuaretaquiaari raacajiniji, macunucua nucu- hua paaquiosaquiji. Nojoriiri samaru- huaraca quiquiaari. ¡jIyanohua pueya puere- sano! Cuno nucuaco, majaari pueya rucuanenu quijia, cuno pojori na puerenucua. <sup>29</sup> Samaruhuaraca caapiqui pueyanoori Jesuucua nacaturee:

—¿Casaacua miji quia niyani, Pueyaso Niyanunaa? ¿Quiaate juhuacarijia niyaree canaa quia sanitionura Jesunaa?

<sup>30</sup> Jiyacaritij, cushiyari cateca naataja miaquenuuriquiaa. Jiyano- hua queraatia cushi- yari quiquiaari. <sup>31</sup> Samaruhuari cuno caapiqui pueya pocuatequiaari. Naa Jesu seco- joreeri:

—jQuiaa jaara canaa tohuatanijiore nio caapiqui pueyanojiniji, canaa quia jiyarore cuno cushiyacua canaa tiuquitianura!

<sup>32</sup> Jesuuri cuno samaruhua sequeree:

—jNia quiaare!

Samaruhuari cuno caapiqui pueyajiniji tohuaretaquiaari. Cushiyacua tiuquitiaaseeri. ¡Cushiyari cocuatequee! Saaja caminiajinia totesee tajojinijiiri. Cushiyari tii shushiniu- ushii.

<sup>33</sup> Cushiya cojuanaari netecuatuquiaariuhua na shiriiquiniutia na tiacajiniara. Nojori tiuquijiosacariuhua, pueya niquiara pohuatatuquiaari cushiyajiniijiiri, samaru- huaraca pueyajiniinio. <sup>34</sup> Naaratej puetunu pueyanaari cuno tiacajiniji nijoquiaari Jesuucua. Nojori niquishacari Jesu, na sequetteeri nojori jiyajiniji na quianura tamaqui.

## 9

*Jesu naatanishacari cumatacuruhuana cusosu*

(Mr 2.1-12; Lc 5.17-26)

<sup>1</sup> Na nuhuaaji, Jesuuri botejinia roseta- quiaari na saquirojosano pueyata. Caminia taqui- jiria niuutiaquiaariuhuari tama na tiacajiniaraajaaja. <sup>2</sup> Tii nojori tiuquijiosacari, Jesuucua patasaquiaariiri cumatacuruhuana cusosu pueyano. Patasaquiaariiri na matujinia. Jesu niquishacari taa na patanaa tiuquiaari jiyano- hua nocuani, cusosu sequereeri:

—jQuia shuquiriri sanajanaa! Quiaacujaari tari jiyanooshaaree sesa quia miishano- jiniji.



<sup>3</sup> Noojiaqueya Moisés Rootasanojiniji niishitiojonaari Jesu sequesano tojtiri quiaa. Nojoriiri tama noojiajiniajaaja niishiriojonuuquiaari: “¡Nio pueyanoori tama na cuaqueyajaaja jiyateya juhua Pueyaso na quiniuria naa na sequesacari! ¡Cumoori jiyanoohua sacuraatia!” <sup>4</sup> Jesuuri cuno pueya niishiriojosano niishiquiaari. Nojori sequereeri:

–¿Casaara sesa nia niishiriojijani? <sup>5</sup> Seetanujanaa, pueyano maja na naata jiyanooni pueya miishano sesa. Naajuhua, majaari na naata tamajaaja pueya na naataniniu. <sup>6</sup> Naajaa, janiyari nia niishitiniutaniyani janiyari mijiria jiyarosaaquiaarini cua jiyanooniuria pueya, sesa nojori miishanojiniji.

Jiyacaritij, Jesuuri cusosu sequequiaari cuno pueya niquiaari:

–¡Quia sanere! Quia matu quia pataarohua quia tiajinia.

<sup>7</sup> Cusosuuri sanequiaari. Na tiajinia quiaarohuari. <sup>8</sup> Na niquitiushacari Jesu miishano, puetunu pueyajanaari shiriqituuquiaari. Nojoriiri Pueyaso maniniuhuaqueetaquiaari pueya na niqitionuucua na cumaaca, naa Jesu miiniuriatej.

*Jesu sequesacari Mateo na pueyano na quiniuria*

*(Mr 2.13-17; Lc 5.27-32)*

<sup>9</sup> Jesu quiasacari cuno tiacajiniji, tamonu pueyano niqiquiaari cajiyanoori cumaneeca masejojuajinia Romano jiyaniijara. Na sesa quiquiaari Mateo. Nojuacuajaari janiya; nio naajionani. Jesuuri cua sequequiaari:

–Cua nuhuajiyare cua pueyano quia quiniuria.

Janiyari ritia sanequiaarini. Janiyari nata quiaareeni.

<sup>10</sup> Na nuhuaji, janiyari Jesu masuquiaarini cua tiajinia na miaquenura, na pueyajuhaaj. Naacuajitij Jesuuri cua tiajinia tiuquitiaquiaari miaquenura. Queraatia cuarta cumaneeca masejonaari canaa kojiriquiaajuhua, queraatia noo pojorijihua, Fariseocuaa jiyaniqitushano sesoriquia pueyatatej. Puetunu canaajanaari Jesuta miacquenuriquiaani. <sup>11</sup> Fariseocuaa jaara Jesu niqiquiaari miaqueyano canaata, nojori soosano pueyani, nojoriiri naa Jesu saquiriojosano pueya nequesotaree:

–¿Casaara nia niishitiojona miaqueya cuno sacuraatia cumaneeca masejonaatani, sesoriquia pueyatano?

<sup>12</sup> Jesuuri naa nojori sequesano tojirii. Nojori sequeree miriquiiri:

–Cante na cuaqueya jiyaniyani maja cusosu na quiniu, nojuajaari maja naarajona na paniniu. Cusosuhua cutaraari naarajona panijia. Naajuhua, sesa miijia pueyari cua paniya nojori cua jiyanooniuria sesa nojori miijosanojiniji. <sup>13</sup> Niaa cuara niishitiojosuhua socua, maninia nia niishiniuria casa tariucuacaanu Pueyaso sequesano niishitiojijani naa na sequesacaritij:

“Niaacuajaari nia seya catijiaquiaa cucuara. Maninia juhuari nia taraajenura tamasacaacua. Cuno cutaraari cua shuquiritiasano”.

Naara niqiaarinijia nia sequesano sesa miijia cua jiyanooniuria sesa nojori miishanojiniji. Maja cutaraari mijiria cua ninu quiquiaari maninia pueyacia.

*Pueya nequesotasano casaara Jesu pueya tarinitiaaqui quiaa quenaaja miaquenuni*

*(Mr 2.18-22; Lc 5.33-39)*

<sup>14</sup> Tiuquinijona Juan pueyari Jesuucua niquiaari naa na nequesotanura:

–¿Casaara quia pueya tarinitiaaqui quiaa quenaaja miaquenuni, nojori secojonura Pueyasoni? Canacuajaari miaquenu cartequiaani Pueyaso canaa secojonura taa Fariseocuaa miiquiaacuani.

<sup>15</sup> Jesuuri nojori riucaaree miriqui:

–Pueyano camishacari, ¿na masusano pueyatucua taraatia quiriri, camiriquiano pueyano jaara nojoritia quiyajaa? Maja. Tamacari cutara, camiriquiano pueyanoori nojori tajiniji rishaanutaniya. Jiyacari cutara maja cua pueya miaquenu quiniutaniya, janiya jaara nojori tajiniji rishaareni.

<sup>16</sup> Socua cua tojtiare pueyanaa. Pueyano jaara cushipirijionu paniri na toque mocua, maja na naata quiarinio toquerau ruposaaunu toque mocua cuhuocojinia, jeequesoojua na quishacari. Quiarinio toquerau jaara ruposaaunu toque mocua cuhuocojinia, na jeequesacari, posequenutaniyari. Cunota, toque mocua cuhuocoori socua sutenutaniya.

<sup>17</sup> Naajuhua, majaari pa naata uva caaca racatanu shoque tariucuacojinia. Uva quiarinichu jaara racataaare juuca shoque tariucuacojinia, jaara jerema vinora na quiniuria, shoque tariucuaco surtanutaniyari. Vinoori niitiasaanutaniya najuhuanaj. Shoque tariucuacoori maja na naata tooni, uva caaca jaara jerema. Naaratej, uva caaca nia shuujiore shoque quiariquiojinia, maja najuhua nia niitianura uva caaca. Naajuhua, majaari na naata cua niishitiojosano cojtishaanu tariucuacaanu niishitiojosanota. Cua niishitiojosano nia tojtiare cutara.

*Caapiqui maajipohua naatanijiosacari*  
(Mr 5.21-43; Lc 8.40-56)

<sup>18</sup> Jesu pocuasacarijia, nocua niqviaariiri Pueyaso secojojua tia camarnu. Jesu cariquimijai mojoquetaquiaariiri. Na sequereeri:

—¡Quiyatuuiri shusha cusoquee! Naajaa, miji, cuata quia quiaare. Niishyanijia quiaa jaara niare nocua quia juaashiquia, samiitianutanihuari.

<sup>19</sup> Jesuuri saneree. Nata quiaareeri. Canaa, Jesu saquiriojosano pueyani, canaari nata quiaareejuhuj. <sup>20-21</sup> Canaa quiasacari, tamonu maaji cusosuuri Jesuucua catecanoquiaari jiyasohujaa na paramaji. Cuno maajiiri pueyaracaanu naatequiaari. Doce marijiaari tari na shoconjuquiaari pueyaracaanu na naatesacari. Tama niishiriojoriquiaajaarijia: “Janija jaara Jesu toque quiareni, cua nanacaari curetanutaniya”. Cunora, maajiiri Jesu toque casaca quiaasee jiyasohujaa. <sup>22</sup> Jesuuri na nijiniara tacatequee. Cuno maaji niqiriiri. Na sequereeri:

—Shuquiriaatia quia quiri, sanaunaa. Cucua quia tiushacari, quia nanacaari tari curetaquee.

Jiyacaritij, cuno maaji jiniacumaari ritia sacuantaquee.

<sup>23</sup> Jesuta canaa tiuquishacari Pueyaso secojojua tia camarnu tijinia, canaari pueya niqishiini macura naajua jonenenuyano taraatia, sapiyoniuyanonio. <sup>24</sup> Jesuuri cuno pojori sequereeri:

—¡Niiquiji nia tohuareetare! Nio maaji samiriuri maja macu. Nareja maqueyano.

Pueyari Jesu saroojotaree saaja, naa na sequesacaritij. <sup>25</sup> Jesuuri cuno pojori tohuatanijiore saaja. Na nuhuaji, sohuacamara tiuquimiaari macuucua. Na juaashiquiajiniji na quiaaseeri. ¡Maaji samiriuri sanemaa! <sup>26</sup> Naa Jesu miishanojinijiiri pohuatasaquiaari puetunu cuno jiyajiniajanaa.

*Jesu jeecasacari caapiqui cariyujuaru namijiaa*

<sup>27</sup> Canaa jaara tohuareetaquiaari cuno tijinjini, caapiqui cariyujuaruuri Jesu nuhuajiquiaari. Canaa nuhuaji nacariquiaari nojori niishishacari Jesuuri seetanujanaa Pueyaso jiyarosano. Naaratej, Jesu sequeturiquiaari:

—¡Supuetana David niquihuacuajinio supueno pueyanonaa, canaacua quia taraajere quenaaja!

<sup>28</sup> Canaa tiuquishacarihua canaa quijia tijinia, cariyujuarujuriiri Jesuucua catecanoquiaari. Jesuuri nojori nequesotaree:

—¿Niaate cucua tiuya nia namijiaa cua jeecanura?

Jesu riucatureeri:

—Jaa, jiyaniijianaa. ¡Quia naatacuaaquiniatejaj!

<sup>29</sup> Jesuuri na juaashiquia niaree nojori namijiaacua. Jesuuri cariyujuarujuri sequereeri:

—Cucua nia tiuuniucua, cuaara quiriira taa nia sequereecujani,

<sup>30</sup> Cuno pojori namijiaari maniniujiacara quiquiaariuhua. Jesuuri jyanohua nojori rootaree:

—¡Majaari tamasaca niqiuara nia pohuatanu cua miishano!

<sup>31</sup> Na tohuareetasacari, cuno cariyujuarujuriiri ritia pohuatanu coteequiaari Jesu miishanojiniji. Naacuajitij, Jesujiniji niishishaaquiaariiri puetunu cuno jiyajiniajanaa.

*Jesu pocuatasacari tiquia pueyano*

<sup>32</sup> Cariyujuarujuri tohuareetanu nuhuaji, tamasaca pueyari Jesuucua jaatucuciaari samaruraca pueyano. Cuno pueyanoori maja na naata pocuanu quijia. Tiquiatuhuj.

<sup>33</sup> Jesuuri samaru tohuatanirii cuno pueyanojiniji. Na nuhuaji, cuno pueyanoori ritia pocuanu coteequiaari. Naa pueya niquishacaritij, nojoriiri jyanohua jiuujiatequiaari. Sequetureeri:

—¡Naa miishanoori maja na niquishaanu quiquiaari Israel jiyajinia!

<sup>34</sup> Fariseocuaari saaja Jesu macaatiquiaari pueya niqiuara. Naa sequetureeri:

—Cuno Jesuni, nojujaari samaruhua jiyaniijia cumaacaraca. Naacuajitij, na naata samaruhua tohuatanijionu.

*Jesu taraajesacari pueyacua*

<sup>35</sup> Jesuuri puetunu tiacajiniajanaa rucuanajoquiaari Pueyaso rupaa na pohuatanura, puereetuca tiacajinia, shiitaniyojua tiacajiniano. Maninia rupaa pohuataquiaariiri Pueyaso secojojua tiacajiniaqueya, pueya niishiniuria taa Pueyaso jyanooniu paniya nojorini. Naajuhuj, nojujaari queraatia tamaatia cusonu naatanijioquiaari puetunujanaa, nootunejacadu.

<sup>36</sup> Jesu shootiasacari pueya, nojoriicua taraajequiaari jyanohuari. Pueyari taraatia niquishano quiquiaari, juhua tashuquioonu pueya. Nojoriiri taraatia quijiaa quiquiaari

juhua cojuasoo borregohua. Shaaqui na camaru. <sup>37</sup> Cunora, Jesuuri canaa na saquiriojosano pueya sequequiaari:

—¡Nia niquiri! Jiyanohua queraatia pueya. Cuno pojoriiri juhua puereetuuca sucohua. Saniniuuja, secajaari na senoonaa. <sup>38</sup> Nocuaaji nia sequeyanijia, na Camaru nia secojore, nojuaja cuara jiyaroora queraatia poonijionaa na senooriquiano nera.

## 10

*Jesu saquiriojosacari doce pueya na jiyaramiquishocoriquiano*

*(Mr 3.13-19; Lc 6.12-16)*

<sup>1</sup> Jesuuri canaa na doce saquiriojosano pueya sequequiaari na rootasano canaa tojini-uria, canaa na jiyaramiquiaquishacarijia. Jesuuri canaa niqutioquiaari na cumaaca, samaruhua canaa tohuatanijionura, cusosuhua canaa naatanijionura, puetunu noonujua-na canaa shaatanurajuhua.

<sup>2</sup> Nioori canaa sesaca, na jiyaramiquishocoriquiano pueya sesacani: coteenuuri quiquiaari Simón. Pedroori na sesa quiquiaarijuhuaj. Pedro tarajanu Andrésri quiquiaarijuhuaj. Quiriquiaaariuhua Santiago, tarajanu Juannio. Cuno pojoriiri Zebedeo niqiohua quiquiaari. <sup>3</sup> Felipeeri quiriquiaajuhua, Bartolomé, Tomásnio. Quiriquiaa-jaariuhua janiya Mateoni. Janiyari tarijia quiquiaarini cumaneeca masejojua Romano jiyaniijara. Quiriquiaaariuhua socua tamonu Santiago. Cuno Santiagoori Alfeo niyanu quiquiaari. Quiriquiaaariuhua Lebeo. Na sesa tarajanuuri quiquiaari Tadeo. <sup>4</sup> Quiriquiaaariuhua Simón. Nojuajaari Cananeo pueya maanujinjinio quiquiaari. Judas Iscarioteeri quiriquiaajuhua. Nojuajaari Jesu quiateriquiano quiquiaari moso-coriquiano.

*Jesu rootasano na pueya na jiyaramiquiaquishacarijia*

*(Mr 6.7-13; Lc 9.1-6)*

<sup>5</sup> Jesuuri nio na doce pueya jiyaramiquiaquishacarijia. Coteenu, canaa rootaquiariiri, canaa na jiyaramiquiaquishacarijia. Naa canaa sequequiaariiri:

—Majaari taucuaacua nia quiojonu. Naajuhua, majaari nia tiuquiniu Samaria pueya tiacajinia. <sup>6</sup> Saaja parta Israel pueyacua nia quiaare cutara. Nojoriiri juhua borregohua tashuquioono quia. <sup>7</sup> Nojori niquiara nia pohuatate puetunu tiacajinijanaa. Nojori nia sequere: “Pueyasoori quiarjia nia jitianu paniya, nia jaara na rupaa tojtiajacara quiri”. <sup>8</sup> Cusosuhua nia naatanijiore. Macunucua nia samiitianijiore. Canapuate lepra cusonu jitiaani, cuno cusonu nia shaajare pueya cuaqueyajiniji. Samaruhua nia tohuatanijiore pueyajiniji. Niaacuajaari nio cumaaca maseree nareja. Naaratej, nareja nia naatanijiore-juhuaj. Majaari cua cumaaca nia jamuenu.

<sup>9</sup> Majaari cumaneeca nia panu. <sup>10</sup> Majaari nia caashoque nia panu. Majaari socua toqueya nia panu, sapatunio. Saa nia cushishanotaja nia quiaare. Majaari nia panu nia miojotu. Naaacutanaso pueya cuara niqutioora saniniuuja nia panishano.

<sup>11</sup> Naa rucuanesacari, niaa jaara tamonu tiacajinia tiuquishii, nia nequesotare tee maninia pueyano quiyani. Cuno pueyano tiacajinia nia jijojetare, niaa cuara cuniquiji quiaarejatijia. <sup>12</sup> Naa jaara tamonu tiacajinia tiuquishiiquia, pueya nia sequere naatej: “Pueyaso cuara nioojia cajitiiria”. <sup>13</sup> Cuno tiacajinia quiniaa jaara maninia pueya quiri, juhuajaniya quiniutianiyari taa nia sequerecuajani. Nojori jaara Pueyaso tojiyashijia quiri saniniuuja, nojori jiuujiacaari cajitiyaquishaanutaniya. <sup>14</sup> Tamonu tia camaru jaara nia tiuquinitianu paniyaquiri na tiacajinia, Pueyaso Rupaa ruuretajaca nojori quiniucua, nojori niquiara nia niouacaacuaji nia rapijiotare jiya joocua. Naacuajitij, cuno pueyari niishiniutianiya Pueyasoori nojori jiyanoquiniutianiya, nojori maseyaquiniucua na rupaa pohuataanaa. Naa nia miirijuhua cuno tiaca pueya niquiara, cuno pojori jaara Pueyaso rupaa tojiniu paniyaquiri nia pohuatasacari. <sup>15</sup> Seetanujananaa nia sequeyanijia, jiya puequesacari, cua nequesoresacari pueya, cuno pueyari jiyanohua saniitiosaanutaniya socua Sodoma tiaca pueyajiniji, Gomorra tiaca pueyajinjinio.

*Pueyaso rupaa pohuataanaari naquiya miishaanutaniya*

<sup>16</sup> Socua cua tojtiare. Janiyari nia jiyaroya Pueyaso tojtiaashijia niquiara nia pohuatanura cua rupaani. Naaari nojori tajinia puereeta quiniutianiya, naatej, taa borregohua quia sayoru tajiniacuani. Nojoriiri sesa miiniutianiya nijaniya. Nocuaaji jiyanohua niishijia nia quiri, tama nia cuaqueyajaaja nio cojuanura. Naajaa, majaari nojori naminiu. Saaja maninia nia quiri juhua noseja, pueyano porocua. <sup>17</sup> Tama nia cuaqueyajaaja nia cojuare tamasaca pueyacuaji. Cuno pojoriiri nia jiyatanutaniya tiaca jiyaniijianucua nia saniitiosaanura, nojori tojiniu paniyaquishacari cua rupaa. Naaari Pueyaso secojojua tiacajinia piqishaanutaniya. <sup>18</sup> Cua rupaa nia pohuatanucua,

niaari quioosaanutaniya tiaca jiyaniijianucuaacuara, nojori nequesoreenura niajaniya. Niaari jiyaca jiyaniijianucua niquitiosaanutaniyajuhuaaj. Naajaa, naacuaajitij, niaari nojori niqiuara pohuatanutaniya janiyajiniji, taucuaca jiyaniijianucua niquiaranio. <sup>19</sup> Niaa jaara jiyaniijianucua tacoji nujuatesaare nequesoreesocoriquiano, majaari nia niishiriojonu taa nia riuucuanutaniyani. Nia riuucuanu panishacari, niaari jiyacari niishitiosaanutaniyacuaa maninia nia riuucanura. <sup>20</sup> Naacuaajitij, nia riuucasanoori maja tama niajanijajini-jijiaaja quiniutianiya. Pueyaso Sohuanu cutaraari nia pohuatenutaniya jiyaniijianucua niqiuara.

<sup>21</sup> Pueyari tama tarajanujuaaja niquitionutaniya mosocoriquiano, tarajanu tiuushacari cucua. Pueyanoori neyanu niquitionutaniya mosocoriquiano, cucua neyanu tiuuniucua. Mueraasapueeri tama na queya tacartanutaniyajaacujua na motenura, na queya tiuushacari cucua. <sup>22</sup> Puetunu pueyajanaari nia niqiniu paniyaquiniutianiya, cucua nia tiuushacari. Naajaa, cante seetanujuanaa cucua tiuujia quiya pueyaracaanuni, nojuaja cutaraari jatanishaanutaniya pueyaracaanu shacantuca quijia na quiniuria. <sup>23</sup> Pueya jaara naquiya nia miiri Pueyaso rupaa nia pohuatasacari nojori tiacajinia, cuno tiacajiniji nia mashiri tamonu tiacajiniara tii nia pohuatanura. Seetanujuanaa nia sequeyanijia, juhuanujuaja nia tucataaquishacarijia pohuatanu Pueyaso rupaa puetunu Israel pueya tiacajiniajanaa, janiyari jiyocuaaanuji tacatenutaniuhuani.

<sup>24</sup> 'Nio nia niishirijiuhuaj. Pueyanoori maja socua tojishano na niishitiojonajiniji. Naajuhuaaj, seruuri maja socua tojishano na camarnujiniji. <sup>25</sup> Pueyano jaara maninia tojiriqia na niishitiojona, maniniacuajaari nojuaja jaara na nuhuaji juhua na niishitiojonara quirijiuhuaj. Maniniacuajaari, seru jaara juhua na camarnura quirijiuhuaj. Naaratej, nia Jiyaniijia jaara jiyaniquishiyacuaa "Sesaacata", ¿taariquitijia socua na muerasu sesacasaanutaniyatej?

*Cante socua pa pueresaroni*

*(Lc 12.2-7)*

<sup>26</sup> Naaratej, majaari nia puerenu niarta pueya. Puetunu jiyasohuaja pueya miishanojuanaari niishishano quiniutianiya. Puetunu pueya seetasanojuanaari niishishaanutaniyajuhuaaj. <sup>27</sup> Jiyasohuaja cua niishitiojosano niajanianiyani, cuno nia pohuatare puetunu pueya niquiarajanaa. Cua sasacojosano nia numaa pajamani, cuno nia nacatare puetunu pueya niquiarajanaa. <sup>28</sup> Majaari nia puerenu pa puecojuaca. Nojoriiri maja na naata pa sohuanu monu. Saaja nia puerere cutara nooj, cante cumaacaracacuajani mani quiqiuojinia nia sohuanu na quejoonura, nia cuaqueyanio.

<sup>29</sup> 'Pa naata saaja niquriyatuu cumaneeniyajuata caapiqui shiyojuanijojua masenu pa miaquesocoriquiano. Naajaa, pa Que Pueyasoori puetunu cuno shuhua niishiyajanaa. Naacuaajitij, majaari quenaaja niquriyatujua shiyojua cusunu Pueyaso paniyaquishacari. <sup>30</sup> Naajuhuaaj, Pueyasoori puetunu nia naca cajasu niishiyajanaa. Puetunujuanaari na serojosano quiya. <sup>31</sup> Naacuaajitij, maja nia puerenu. Niaari jiyanohua socua Pueyaso panishano queraatia shuhuaajiniji.

*Maja cumaati Jesucristojiniji pa caririquiniu*

*(Lc 12.8-9)*

<sup>32</sup> 'Niaa jaara tamasa pueya niqiuara sequere niaari cucua tiuujia cutara, janiyacua jiyocuaaanu quijia cua Que niqiuara sequerejanihuaj, niaari cua muerasu. <sup>33</sup> Cante saniniujia cucuaji seetaja tamasa niquiarani, janiyari cua Que niqiuara na tamacanutaniyajaacuhuaaj.

*Jesuucua tiuujia pueyari narta pueya juaashano*

*(Lc 12.51-53; 14.26-27)*

<sup>34</sup> 'Majaari nia jiyaniinu janiya mijiria niquiarini pueya quiniuria juhuaajaniya. Maja. Mijiria cua niniucua, pueyari juayonuujanutaniya. <sup>35</sup> Niqiuari cutaranijia pueya tiuuniuria cucua. Naacuaajitij, pueya tiuushacari cucua, cucua tiuyashijia pueyari nojori niqiniu paniyaquiniutianiya. Naacuaajitij, pueyanoori na que paracaaniutianiya, cucua tiuujia na que quiniucua. Maajiiri na nucia paracaaniutianiyajuhuaaj, na nucia tiuuniucua cucua. Pueyano niqiuocuaari na reyarucua paracaaniutianiyajuhuaaj, cucua tiuujia na reyarucua quiniucua. <sup>36</sup> Naacuaajitij, tama pueya panishano pueyajaajaari na paracara quiniutianiya, cucua nojori tiuuniucua.

<sup>37</sup> 'Cante na queya panijia socua janiyajinijini, jiyano pueyanoori maja maninia cua pueyano na quiniuria. Cante necohua panijia socua janiyajinijini, jiyano pueyanoori maja maninia cua pueyano na quiniuriajuhuaj. <sup>38</sup> Cante tama na cuaqueyajaaja panitiaaquijia na tojiniuria janiyani, cunoori maja maninia quiria. <sup>39</sup> Cante saaja tama na cuaqueyajaaja cojuanu paniya shuquiriaatia na quiniuria mijiriani, jiyano pueyanotej, nojuaja cutaraari

shaajasaanutaniya, pueyaracaanu taraatia na miitiasaanura. Saniniuujia, cante tama na cuaqueyajaaja panitiaa naquiya na miishaanura cua tojjia na quiniuucuan, nojuaja cutaraari rishijara jatanishaanutaniya. Seetanujuanaa cuata shuquiriaatia quiniutianiya pueyaracaanuuri.

*Pueyasoori maninia miijiaa niqutionutaniya na jiiitiasanoiniji*

(Mr 9.41)

<sup>40</sup> Cante na tiaco nia tiuquinitiaja cua rupaajiniji nia pohuatasano na tojiniuriani, cuno pueyanoori cua tojiyajuhaaj. Cuno, cante cua tojjiani, nojuajaari cua Jiyarona tojjiajuhaaj. <sup>41</sup> Naajuhaaj, cante Pueyaso rupaa pohuatana tiuquinitiaja na tiaconi, Pueyaso rupaa pohuatana na quiniuucuan, Pueyasoori cuno pueyano niqutionutaniya maninia na casaajiniji. Nojuajaari niqitiosaanutaniya mariyata taa Pueyaso rupaa pohuatana niqitiosaanutaniyaacuaani, Pueyasojiniji na pohuatano sami. Cante maninia miijia pueyano tiuquinitiaja na tiaconi, maninia pueyano na quiniuucua, na tiaco tiuquinitiaja pueyanoori maninia casaa niqitiosaanutaniya mariyata taa maninia miijia pueyano niqitiosaanutaniyaacuaani. <sup>42</sup> Naajuhaaj, cante quenaaja shiniituniacu mohuaca raateya tamonuni, cua mueyaniojua na quiniuucua, Pueyasoori seetanujuanaa na jiiitiasanoiniji na niqutionutaniya na raatenu sami.

## 11

*Tiuquinijiona Juanri na pueya jiyaroquiaari Jesu nequesotanura*

(Lc 7.18-35)

<sup>1</sup> Jesu jaara canaa na doce saquiriojosano pueya rootanu tucutaquiaari tii, nojuajaari tiji quiaquiaari cuno jiya tiacajinia quiniaa na niishitiojonura Pueyaso rupaa.

<sup>2</sup> Tiuquinijiona Juan quishacari nujuatejojuajinia, nojuajaari jiyacari niishiquiaari Jesucristo miishanoiniji. Cunora, nojuajaari na pueya jiyaroquiaari Jesuucua naa na nequesotanura:

<sup>3</sup> —¿Quiaate seetanujuanaa Cristo, tariucuacaanu Pueyaso sequesano canaacua niriqianotej? ¿Canaate tamonu sashiya soj?

<sup>4</sup> Jesuuri nojori riucaaree:

—Nia quiaarohua. Tiuquinijiona Juan nia pohuatasuhua puetunu cua miishanojuanaa nia niquishano, nia tojishanojuhaaj. <sup>5</sup> Naa nia pohuatasuhua: “Cariyojuarujiriiri tari niqitiarohua. Shipiiniquiniuujiacaari maninia rucoorohua. Shu miaqueja cusono jiiti-ajacaari tari jeequerohua. Numueejunucuaari tari tojtiarohua maninia. Macunucuaari samiitiacorohua. Casamiijiuniucua pueyari Pueyaso rupaa pohuatasaaaree, Pueyaso muerasura nojori quiniuria”. <sup>6</sup> Shuquiriaatia quijia cutaraari noo pueyano, cante cucuaij taacanuyaquijiani.

<sup>7</sup> Tiuquinijiona Juan pueya jaara quiojoquiaariuhua Juancua, Jesuuri Tiuquinijiona Juanjiniji naa pohuatanu coteequiaari pueya niquiaratej:

—¿Casaa niqiniuucua nia quiojocanu cariiquia jiyajiniani? ¿Niaateeri paratu piyarosano naajua niqiniuucua quiacanu? Maja. ¿Tiuquinijiona juanteeri noojia niqijioteja? Maja. <sup>8</sup> Cua sequeture, ¿casaa niqiniuucua nia quiojocanuni? ¿Niaateeri pueyano niqiquianu maniniuqui toque cushiyano? Maja. Cuno pojori cante maniniuqui toque cushijiani, nojoriiri jiyaniujanucua tiajinia quijiaa cutara, maja cariiquia jiyajinia. <sup>9</sup> ¿Taateerinitioj? ¿Casaacua nia quiojocanuuri? ¿Pueyaso sequenu panishano caminiujuninia niqiniuucuatee? Jaa. Seetanujuanaa nia sequeyanijia, Tiuquinijiona Juanri jiyanoohua socua cutara pueyano tamasaca Pueyaso sequesano caminiujuniaajiniji. <sup>10</sup> Cuno Juanjinijicuaajaari tariucuacaanu Pueyaso Rupaajinia pohuatasaaquiaari. Naa naajiotasaaquiaari miriquiri Pueyaso sequesano janiya nojuajiniji:

“Janiyari cua pueyano jiyaronutaniya quiocuajini. Nojuajaari quia puetanutaniya, quia nuu jecariquiano quiocuaji”.

Juanri naa maninia miiquiaari cucuaij, pueya tojiniuria janiya cua tiuquishacari.

<sup>11</sup> Seetanujuanaa nia sequeyanijia. Majaari tamonu pueyano quini quiaquiaari socua cutara pueyano Tiuquinijiona Juanjiniji. Naajaa, cante Pueyaso muerasuniyojua quia cucua na tiuushacari, cunoori socua cutara pueyano Tiuquinijiona Juanjiniji.

<sup>12</sup> Tiuquinijiona Juan jaara coteequiaari Pueyaso rupaa pohuatanu, pueyari jiyanoohua saniniujiriquiaa Pueyaso muerasu nojori quiniuria. Pueyari naa saniniujia quiarijajuhuaaj. Cante jiyanoohua saniniujia Pueyaso muerasu na quiniuriani, naa quiniutianiyari. <sup>13</sup> Supuetana Moisés, mariyata puetunu Pueyaso sequesano caminiujuniaa-janaari tariucuacaanu pohuataquiaari taa Pueyaso jitianutaniya pueyani. Naa poojotasaaquiaariiri Tiuquinijiona Juan jaara tiuquiquiaariiaatijia. Quiarijiani, Tiuquinijiona Juanta, nojori pohuatasanoori tari tohuateenu coteya. <sup>14</sup> Naa jaara nio cua

pohuatasanoocua tiuuniu paniri, nia tojiri nio: Tiuquinijiona Juancujaari tariucua-caanu pueyara Pueyaso sequesano caminiujiunia Eliascuja. Eliascujaari sequesaaquiaari niriqiuano. <sup>15</sup> Cante numaaracani, cuara tojiiria cua sequesano.

<sup>16</sup> Nia pohuatareera taamuecate nio pa quishacari pueyani, quiarijiani paa na quiyani. Nio pueyari juhua naatujoori, canapue carijiniacuma tacuarishijionu paniya juucuan. Nojoriiri narta naatujooricua naca, nojori tacuarishijionu panishacari juucua. <sup>17</sup> Naa nacaari: “Canaari juucua naajua jonenejiyani. Majaari nia nianujunu paniniu. Canaa jaaquequejosacari taraatia saniniuujia, majaari nia sapuenu”. <sup>18</sup> Naajuhua pueyanaa, Tiuquinijiona Juan quishacari, nojuajaari mashaca ratuyashijia quiquiaari, sumatuu miaqueyashijiajuhuaj. Pueyari saaja na sequequiaari samaruraca pueyanota. <sup>19</sup> Na nuhuaji, janiyari tiuquiquiaarini. Janiya cutaraari sumatuucua miaquejani, mashaca ratujuajuhua. Pueyari cua sequequia: “Miaquejoru cuno, ratunu porocuanio. Sesa pueya cojijia, pa soosano Romano jiyaniijia seya cojijia sacuaraatiajuhuaj”. Naa nia soosacari janiya, Tiuquinijiona Juannio, niaari puetunu Pueyaso niishitiojosanojuanaa ruureta. Naajaa, pueyari na naata niishiniu maninia canaa miishanojiniji, janiya, Tiuquinijiona Juannio, canaari mariyata Pueyaso jiyaramiquishano cutarani.

*Jesu piriyojosacari tojiyashijianucua pueya*  
(Lc 10.13-15)

<sup>20</sup> Corazín tiacajinia, mariyata Betsaida tiacajinia, Jesuuri tii socua pueya naatani-jioquiaari tamasaca tiacajiniji. Jiyajeneta casaa miiquiaari tii Pueyaso cumaacataari. Pueyari saaja nocua tiyaaquiquiaari. Nojoriiri maja noojia na tacatonu quiquiaari sesa nojori miiniujiniji. Cunora, Jesuuri nojori piriyojouquiaari. Naa sequequiaari nio caapiqui tiacajinia quiniaa pueyari:

<sup>21</sup> —¡Niaari taraatia saniitosaanutaniya, nioojia nia tacatoyaquinuucua sesa nia miishanojiniji! Janiya jaara Pueyaso cumaacata miiquiaari Tiro tiacajiniani, mariyata Sidón tiacajiniano, taa cua miiquiaari nia tiacajiniacuaani, cuno taucua maara Pueyasocua nari noojia tacatocanu cutara. Nojori maara ritia cocuaque toqueya cushyonuquiaari nojori tacaani niishishanura sesa nojori miishanojiniji. Naajuhua, nojori maara juaca quejooquiaari na nacaacua, noojia nojori tacatosacari Pueyasocua, sesa nojori miiniucua. <sup>22</sup> Naaratej, janiyari nia numooteyani: jiya puequesacari, niaari socua jiyanhua saniitosaanutaniya Tiro tiacajinia quiniaa pueyajiniji, Sidón tiaca pueyajinijio. <sup>23</sup> Capernaum tiacajinia quiniaanaa, ¿niaateeri jiyaniya niaari tamasaca tiaca shocotanutaniya nia jiyanihacari niaari socua maninia cutara? ¡Maja! Niaari mani quiqiojinia quejoosaanutaniya. Janiya jaara cua cumaacata cutara casaa miiquiaari Sodoma pueya tiacajiniani, taa cua miiquianu nia tajiniacuaani, Sodoma tiaca maara qiriqiaajaj. <sup>24</sup> Nocuaji nia sequeya cutaranijia: jiya puequesacari, niaari socua jiyanhua saniitosaanutaniya Sodoma tiaca pueyajiniji.

*Jesuucua tiuuniari samaateriquiano cutara*  
(Lc 10.21-22)

<sup>25</sup> Jiyacaritij, Jesuuri na Que Pueyaso sequequiaari:

—Quia shuquiritiaanijia cua Quenaa. Quiaari jiya camarnu, jiyocuaaanu camarnunio. ¡Quiaari maninia! Quiaari niishiyashijia pueya maninia casaa niishitirii, niishijia pueyacuaji quia jamosanoni. Niishijia pueyari saaja tama nojori niishishanoocujaaja tiuujia. <sup>26</sup> Naacujitij cua Quenaa, quiaari maninia niishitirii niishiyashijia pueya, taa quia paniquiaaricujani.

<sup>27</sup> Cua tojitiare pueyanaa, cua Queeri cua niquitioquiaari puetunu casaajanaa cua jiiiasocoriquiano. Majaari seetanujanaa tamasaca niishiniu janiya. Saa cua Queja cutaraari cua niishiya. Naajuhua, majaari seetanujanaa tamasaca niishiniu cua Que. Saaja janiya, Neyanuni, na niishiya cutaranijia, naajuhua canapue cua niishitiniu paniya cua Quecujani. <sup>28</sup> Cucua nia nijiore, puetunu nijaniyanaa, canapue tacaquioyani, canapue puera niishirojonujuacani. Naa jaara cucua nimia, janiyari nia samaraatanutaniyani. <sup>29</sup> Cua niishitiojosano nia tojiri. Janiyajiniji nia niishiri taamuecatucua janiyani. Janiyari ritia juayashijiani. Janiyari pueya shocoteyaquijiani. Naacujitij, nioojiaari maja na tacaani quiniutianiya nia rupesacari janiya. <sup>30</sup> Nia tojishacari janiya, nioojiaari juhujaniya quiniutianiya. Cua poonitijosacari nijaniya, majaari jiyajeneta na quiniu quiniutianiya niaara, cua cumaquishacari nijaniya.

## 12

*Jesu pueya carojotasacari trigo samaatenu juuca*  
(Mr 2.23-28; Lc 6.1-5)

<sup>1</sup> Jiyacaritij, Jesuuri canaa na saquiriojosano pueyata cuhuariquia jiuujiaaco tajiriquiaa samaatenu juuca. Canaari jiyacari miaajeriquiaani canaa quiasacari nucuaco. Canaari se-  
caja trigo jajau carojotanu coteequiaarini. Canaari na miojonuuriquiaani. <sup>2</sup> Fariseocuaca  
jaara canaa niqiuquiaari naa miyanotej, Jesu sequetureeri:

—¡Quia niqiri! ¡Quia pueya trigo shuniitia! ¡Na shuquiuquojoniuyari! ¡Naa nojori  
miishacaritij, poonijionuyari! Cuno maja panishano samaatenu juuca miiniuria. ¡Pa  
supuetana Moiséscaujaari naa pa rootaquiaariti!

<sup>3</sup> Jesuuri cuno pojori riucaaree:

—¿Majateeri nia serojonu quiquiaari Pueyaso Rupaajinia taa pa supuetana David mi-  
iquiaari na miaajesacarini, na pueyano? <sup>4</sup> Nojoriiri Pueyaso Secojoua tiajinia tiuquiti-  
aquiaari. Pueyasora niqutiojosano pan satureeri. Cuno panri saaja pueyacuara seco-  
jonaa sasocoriquiano quiquiaari, maja socua tamonu pueyano sasocoriquiano. Naajaa,  
Davidri na saquiaari. Na miishanoori maninia quiquiaari Pueyaso niqiuara. <sup>5</sup> Naajuhuj,  
¿majateeri nia serojonu quiquiaari tariucuacaanu Moisés naajiosanojinia, taa pueyacuara  
secojonaa pueyaracaanu poonijioquiaa Pueyaso Secojoua tiajiniani? Nojoriiri naa  
poonijionuquiaa samaatenu juucajuhuaj. Naa nojori poonijiosacari Pueyaso Secojoua  
tiajinia samaatenu juucatej, cunoori maja sesa. <sup>6</sup> Moiséscaujaari pa rootaquiaari maja  
pa poonijionura samaatenu juuca. Naajaa, cuno rootasanoori seetanujanaa maja na  
quiniu Pueyaso Niyanura, jaara Pueyaso Secojoua tiajinia poonijionaara quiaquiriji-  
uhuj. <sup>7</sup> Maja naascuaari nia niishiniu quiquiaari casaa nio tariucuacaanu naajiotasano  
niishitiojiya nijaniya juucuan. Naa sequeyari: “Janiya cutaraari socua nia panitiaani  
niarta pueyacu na taraajenura, maja saaja nia niqutiojonura nia seya cucuara catijlaso-  
coriquiano”. Naa jaara nio naajiotasano niishijia quiriquia, niaa maara sesa miyashijia  
pueyacuara tonujiaquiriquiaj. <sup>8</sup> Cua tojitiare quiaritia. Janiyacuajaari Pueyaso Nya-  
nuni. Naacuajitij, mijiria cua quishacari cua naata sequenu casaate samaatenu juuca  
miishiyani.

*Jesu jeeacasacari pueyano juaashiquia cuseetucojuara joojequetano*  
(Mr 3.1-6; Lc 6.6-11)

<sup>9</sup> Na nuhuaji, canaari Jesuta quiojoquiaari quiniquijini. Canaari Pueyaso Secojoua  
tiajinia tiuquishiini. <sup>10</sup> Pueyanoori tii quiriquiaa cuseetucojuara joojequetano na  
juaashiquia. Taa canaa Judiuocuaca camarucua Jesuucuara saquiriojotanu paniriquiaa  
juucuacuajani, jiyacaritij, na sapojonuta Jesu nequesotaturee naari.

—¿Maniinateeri samaatenu juuca cusosu naataniniuria? Paacuajaruhua niishitio-  
josaaquiaarini maja pa poonijionura samaatenu juuca.

<sup>11</sup> Jesuuri cuno pojori riucaaree:

—Naa jaara niqiriyaatujua borregoniojua jiitiare, cuno jaara tiyare raama samaatenu  
juuca, ¿majateeri nocua nia quianu, raamaji nia panura nia seruniyojua? ¡Taaquiririnij!  
<sup>12</sup> ¿Majateeri pueyano socua jiyanojua panishano borregojinij? Taaquiririnij. Naaratej,  
maja pa tarinitianu maninia pa miiniuria pueyaracaanu, samaatenu juucajuhuaj.

<sup>13</sup> Na nuhuaji, sesarucojua sequereeri:

—Quia juaashiquia quia shiitiore.

Na juaashiquia shiitioreeri. Ritia jeequequeeri juhua tanecaraja. <sup>14</sup> Naa Fariseocuaca  
niquishacari Jesu miishanotej, tohuareetaqueeri. Tama nojoriijaarijia roojotooquiaari  
nojori motenura Jesu.

*Jesujiniji pahuatasano tariucuacaanu naajiotasanojinia*

<sup>15</sup> Jesu jaara niishiquiaari Fariseocuaca miiniu panishano nojuaja, quiniquiji quiaque-  
eri. Queraatia pueyari na nuhuajiquiaari canaata. Jesuuri puetunu cusosuhujanaa  
naatanijioquiaari. <sup>16</sup> Jesuuri na naatanijosano pueya rootaquiaari maja tamasa  
niqiuara nojori pahuatanura cante nojuajani. <sup>17</sup> Naacuajitij, tariucuacaanu Pueyaso  
sequesano caminiujumia Isaias pahuatasanoori tohuateequiaari. Nojuajaari juhuacaritia  
naa pahuataquiaari Jesujiniji Pueyaso sequesano miriquitij:

<sup>18</sup> “Niocujaari cua seru, cua saquiriojosano. Na timitiaanijia. Nojuajaari jiyanojua  
panishano. Janiyari cua Sohuanu jiyaronutaniya nocuani. Nojuajaari tamasa  
pueyapue pahuatanutaniya janiyajiniji, nojori quiniuria cua muerasura pueyaraca-  
caanu. <sup>19</sup> Majaari pueyata juaajia na quiniu quiniutianiya. Majaari nacojojua  
na quiniu quiniutianiya. Majaari na rupaa tojishano quiniutianiya tiacaacaco.  
<sup>20</sup> Majaari quenaaja shuniitasano naajua na shutianu quiniutianiya puetunujua-  
naa. Naajuhuj, majaari na maquishajanu quiniutianiya jatarinitiaja nojijano

samaritiiu. Nojuajaari naa sesa miijiaca jiyanooniutianiya, nojuaja jaara tiuquiri-ohuaajatiijaa, puetunu sesa miiniujianaa na puecanura, jiyaniijiajanaa na quini-uhuaa pueyaracaanu. <sup>21</sup> Puetunu tiquiyocuacajiniijinio quijiaca pueyajanaari nocua tiuuniutianiya”.

*Pueya sequesacari Jesu samaru cumaacaracana*  
(Mr 3.20-30; Lc 11.14-23; 12.10)

<sup>22</sup> Tiquiaari Jesuucua jaatucusaquiaari. Cariyojuaru quiriqiaajaariuhuaaj. Naa quiqiaariiri samaruraca na quiniuucua. Jesuuri na jeeceeree. Naacuajitij, tiqiaari pocuajara quiqiaari, niquijiaarajuhuaaj. <sup>23</sup> Cunora, puetunu pueyajanaari nocuaji jiuuji-atequiaari. Seqetureeri:

—¡Nio jiyoteeri pa supuetana David niqiuohuacuajinio supueno pueyano, tariucuaacaanu sequesano pa jiyaniijiaara quiriqianotej!

<sup>24</sup> Fariseocuaca jaara tojiqiaari naa pueya sequesacari Jesujiniitij, nojoriiri na juaaniutia sequequiaari saaja:

—¡Cuno pueyanoori samaruhua tohuatanijiya Satanás cumaacata!

Satanásri samaruhua jiyaniijia. <sup>25</sup> Jesuuri cuno pueya niishiriojosano niishiquiaari. Cunora, nojori sequeereeri:

—Jiya camarucua jaara juayonuujutare tama nojoriijaaaja, majaari pueyaracaanu na naata quiniu camarnura. Ritia jatashiyari. Naajuhuaaj, tiacajinia quiniaa jaara juayonuutare jiyareta tama nojoriijaaaja, cuno pueyari maja na naata quiniu jatiqui. Naa-jaariuhuaaj, pueyano jaara juayonuujutare tapueyocuacata tama na tiajiniaajaaja, majaari nojori naata jatiqui quiniu. <sup>26</sup> Jaara naa quiritij, samaruhua jaara tohuatanijiosaare Sesaaca cumaacata, tama na cuaqueya paracayajaarijia. Naacuajitij, majaari na naata na cumaaca rishiniu. <sup>27</sup> Janiya jaara samaruhua tohuatanijiya Satanás cumaacatani, taa nia sequeya janiyacujani, cua sequeretoj, ¿cante nia niishitiojosano pueya cumaquiya samaruhua nojori tohuataniniuriani? ¿Satanáste? Majaruhua. Nojoricuajaari samaruhua tohuataniquiaa Pueyaso cumaacata. Naacuajitij, nojori tohuatanijiosacari samaruhua Pueyaso cumaacata, niaari jiyanoohua jiyajeneya nia sequesacari janiya samaruhua tohuatanijiya Sesaaca cumaacatani. <sup>28</sup> Seetanujuanaa Pueyaso Sohuanu cumaquishacari janiya, samaruhua cua tohuatanijionura, niaa cumaati cua sequesano tojirii. Naa cua tohuatanijiosacari samaruhuatej, niaacuajaari niishiya Pueyasoori tari poonijiya juhua jiyaniijia, mijiria nia tajinia.

<sup>29</sup> ¿Pueyanote na naata cumueeca pueyano tiajinia tiuquiniu na casami na jaariuuti-nura? Maja na naata na jaariuutianu, jaara coteenu na morojiyaquiri. Jaara na morojore coteenu, na nuhuaji cutara na naata na casami panu. Naajuhuaaj, janiyari Pueyaso cumaacata jaariuutiaa Sesaaca jiiitiasano pueyani.

<sup>30</sup> Cante cua jiyano quiyacuiyani, cunoori cua paraca. Cante cua naacutaaquiya pueya rerecojonura Pueyasanori, nojoriiri saaja pueya cocuataa Pueyasocujaji.

<sup>31</sup> Naarate nia sequeyanijia: puetunu pueya miishano sesajanaari na naata jiyanooshaanu. Sesacojojua pueyanoori na naata jiyanooshaanujuhuaaj. Saniniuujia, cante Pueyaso Sohuanu miishano sesacajani, cunoori maja na jiyanooshaanu quiniutianiya cutara. <sup>32</sup> Cante Pueyaso Niyanu sesacajani, nojuajaari na naata jiyanooshaanujuhuaaj. Saniniuujia, cante Pueyaso Sohuanu sesacajani, nojuaja cutaraari jiyanoaquishaanutianiya pueyaracaanu. Na ruuretanuucua Pueyaso Sohuanu, majaari na jiyanooshaanu quiniutianiya mijiria, jiyocuacaanujuhuaaj.

*Naanaari niishishano na jajaujiniiji*  
(Lc 6.43-45)

<sup>33</sup> Naana jaara maninia naana quiri, maninia jajau muetuyari. Naana jaara sesarunaja quiri, sesa jajau muetuyari. Naacuajitij, na jajaujiniiji paari niishiyani taamueca naanatenojoni. <sup>34</sup> Niaari juhua sacocua. ¿Niaatucua taa maninia pocuajaca quirini, niaa jaara pueyaracaanu sesa miijiaca quiyajaa? Paari poojiajiniji pa niishiriojosano pocuajaaani. <sup>35</sup> Naacuajitij, maninia jiuujiaraca pueyanoori saaja maninia casaa pocuajaa. Sesa jiuujiaraca pueyano saniniuujia, sacuaratia casaa pocuajaa. <sup>36</sup> Nia sequeya cutaranijia, Pueyaso saniitonu juuca, pueyari puetunu najuhuaana sesa na pocusanojini-jijianaa nequesoreesaanutianiya. <sup>37</sup> Cante maninia casaa pocuajaa quiqiaarini, cunoori sequesaanutianiya “maninia pueyanota”. Naajuhuaaj, cante sesa casaa pocuajaa quiqiaarini, nojoriiri saniitisaanutianiya saniniuujia. Naaratej, majaari nia niti nia taquirocuatenu sacuaratia casaa nia pocuanura.

*Fariseocuaca niqiniu panishacari Jesu miishano Pueyaso cumaacata*  
(Mr 8.12; Lc 11.29-32)



<sup>38</sup> Noojiaqueya Moisés Rootasanojiniji niishitiojonaari tii quiriquirea Fariseocucata. Nojoriiri Jesu sequequiaari:

—Niishitiojonanaa, jiyajeneta casaa quia miiri Pueyaso cumaacata canaa niquishocoriquiano.

<sup>39</sup> Jesuuri nojori riucaaree:

—Niari sesoriquia pueya, Pueyaso tojiyashijiaca. Majaari nia niquiara casaa cua miiniu quiniutianiya Pueyaso cumaacata. Niaari saaja niquiriyatu cutara miishano niquiniutianiya taa supuetana Jonás miishaaquiaaricuaani. Cuno Jonásri Pueyaso sequesano caminiujunua quiquiaari. <sup>40</sup> Nojuajaari puereetuca sapitiaaja seecojinia shocojotequiaari jiuujianaraca juuca, jiuujianaraca niucuanio. Naajuhua, janiyari raaco macu niojosaqui camueenujunutianiya jiuujianaraca juucani, jiuujianaraca niucuanio. <sup>41</sup> Jonás pohuatasacari Pueyaso rupaa Ninive tiacajinia, cuno tariucuaaanu taucuaacari noojia tacatoquiaari sesa nojori miishanojiniji. Cunora, Pueyaso nequesoreenu juuca quishacari, Ninive pueyari saneecuatunutianiya nojori tonujunura nio pa quishacari pueyacuara. Nojoriiri Pueyaso saquiriojotanutianiya nio pa quishacari pueyacuara, nojori ruuretanuucua tamonu Pueyaso sequesano caminiujunua socua jiyaniijiajanaa cutara Jonásjiniji. <sup>42</sup> Naajuhua, tariucuaaanu jiyaniijia maajiiri niquiaari tucuaaanuji pa supuetanaa jiyaniijia Salomón tojiniucua. Cunoori quiquiaari jiyanohua niishijia Salomón quiniucua. Cuno maajiiri pananu shuucuaaji niquiaari Salomón na tojiniuria, jiyanohua tucuaaanu na jiyajini. Naaratej, Pueyaso nequesoreenu juuca quishacari, cuno maajiiri sanenutianiya na saquiriojotanura nio pa quishacari pueyacuara. Nojoriicua saquiriojotanutaniyari nojori ruuretanuucua tamonu niishijia, socua niishijia Salomónjiniji cutara.

*Samaruuri na tohuatanishaquiji tacatejohua*  
(Lc 11.24-26)

<sup>43</sup> Samaru jaara tohuatare pueyanojiniji, joojuashiquio rucuaneyiyari na samaatejara na pajesacari. <sup>44</sup> Jaara riuriataaquiri na samaatejara, naa niishiriojiyari: “Tacateyaru-huaraqui tariucua cua quiquiojinihua”. Jaara tacatemohua, cuno na pueyano riuriata-suhuari juhua camarujuu tia, netoosano, maninia jeenucuasano. <sup>45</sup> Naaratej, samaruuri socua tamasaca narta samaruha pajeja. Socua siete narta samaruha riuriataari socua jiyanohua sesa nojuajini. Puetunu nojorijianaa jaara tiuquitiare cuno pueyanocua tii na quiniuria, cuno pueyanoori na nuhuaji socua jiyanohua sesa quijiaa jiyateja.

Naa quiniutianiyajaariuhua nio pa quishacari pueyara na tojitiaaquiniucua janiya. Nojoriiri socua sesa quijiacara jiyacatenutaniuhua taa cua niyacarijia quijiaa nojori quiquiaaricujani.

*Cante seetanujanaa Jesu nucuan, tapueyocacajuhua*  
(Mr 3.31-35; Lc 8.19-21)

<sup>46</sup> Jesu pohuatasacarijia pueya niquiara, na nucuaari tiuquijioquiaari Jesu tapueyocucata Jesuucua. Carijiniacuma qutiuriquiaari. Jesuta pocoojonu paniriquiaa juucuaari.

<sup>47</sup> Tamonu pueyanoori Jesu sequeree:

—iNiishitiojonanaa! Quia nucuaqui quia tapueyocucata carijiniacuma quiya. Quiata pocoojonu paniyaquiniaari.

<sup>48</sup> Jesuuri saaja na numootena pueyano riucaaree:

—¿Cante cua nucuan? ¿Cante cua tapueyocucani?

<sup>49</sup> Jiyacarijij, Jesuuri canaa na tojitianaa pueya shishirii. Tii quiniaa pueya sequereeri:

—Nio cua tojitianaani, nojori cutaraari juhua cua nucua, juhua cua tapueyocucata cutara.

<sup>50</sup> Naacujitij, cante cua Que Pueyaso panishano miiquiaa cutarani, nojuaja cutaraari cua tarajanu, cua rimiatu, cua nucuanio.

## 13

*Natoojojua pueyanojiniji pohuatasano*  
(Mr 4.1-9; Lc 8.4-8)

<sup>1</sup> Cuno juucaja, Jesuuri tohuataquiaari tiajiniji. Caminia casaqueyaji cajishiiri. Canaari nata quiriquireaani. <sup>2</sup> Jiyanohua queraatia pueyari nocua rerequeejioquiaari. Puera pueya quiniucua, Jesuuri botejinia tacaquiaari. Tii cajishiiri. Puetunujanaa pueyari jaaquiajina jatejequiaari, tija na tojitianura Jesu canaata. <sup>3</sup> Jesuuri queraatia casaa pueya maanu niishitiojoriquiaa miriqui. Naa pohuataquiaari puetunu canaajanaari:

—Pueyanoori natoojonura quiaquiaari na cuhuariquiajina. <sup>4</sup> Na jacutasacari, secajaari nucua totequiaari. Shuhuari nocua rosetaquiaari. Puetunujanaa nucuaoci na natau miojoquiaari. <sup>5</sup> Tajaacaari totequiaari tamaqui sai tajiniaqueya. Majaari puera jiya quiniu quiquiaari tii. Naaratej, cuno natauri ritia moritiaquiaari. <sup>6</sup> Pananu jaara tacaquiaari, cuno natauri ritia sorequiaari maja puera nujuacaraca na quishacari.

<sup>7</sup>Tajaacaari totequiaarijuhua riyocuaca tajinia. Riyocuaca maashishacari, majaari cuno natau maashiniu quiquiaari maninia. Majaari na muetunu quiquiaari. <sup>8</sup>Maninia jiyajinia totequiaariiri tajaaca saniniuujia. Tii moritiaquiaari maninia cutaraari. Maninia muetquiaari cutaraari. Puetunu cuno jiyoneejinijijianaani, noojiaqueyari muetquiaari cien jajau niquiriyatu jiyonaacua. Tamonu jiyoneeri muetquiaari sesenta jajau niquiriyatu jiyonaacujahuaj. Socua tamonu jiyoneeri muetquiaari treinta jajau. <sup>9</sup>Niaa jaara numaaraca quiri, nia tojitiare cua pohuatasano.

*Casaara Jesu niishitiojia miriquini  
(Mr 4.10-12; Lc 8.9-10)*

<sup>10</sup>Jesuuri naa pohuataquiaari miriqui pueya niquiaratej. Na nuhuaji, canaa, Jesu saquiriojosano pueyani, canaari nocua catecanoquiaarini. Canaari na nequeso-taquiaarini:

—Jiyaniijanaa, ¿casaara pueya quia niishitiojoriquiaa miriquini?

<sup>11</sup>Jesuuri canaa riucaaree:

—Pueyasoori nia saquiriojoquiaari, nia niishishoo casaa Pueyasojiniji nia niishiniuria, taa Pueyaso poonijia pueya jiuujajiniani, na muerasura nojori quiniuria shuquiriaa-ta. Tamasacara saniniuujia, majaari nio jiyasohuaja Pueyasojiniji niishishano nojori niishishocoriquiano. <sup>12</sup>Cante Pueyaso rupaa tojia cutarani, nojuajaari socua niishitiojosaanutaniya, Pueyasojiniji jiyanoehua na niishiniuria. Cante Pueyaso tojiyashijiani, shiitianiyojua Pueyasojiniji nojori niishishanoori puetunu jaariutiasaanutaniyajanaa nojorijiniji. <sup>13</sup>Cunora, janiyari miriqui pohuatariquiaa nojori niquiarani. Naacujitij, nojoriiri najuhuaana niquiquiaa cua miishano na niishiyaquiniutia. Nojori tojishacari cua pohuatasano, na numaa shama tojitiuquiaa saajaari. Majaari quenaaja nojori niishiniu na tojishano. <sup>14</sup>Naa nojori quiniucuatej, tari tohuateereeri juhuacaritia supuetana Isala sequesano nojorijiniji. Pueyara Pueyaso sequesano caminiujunia na quiniucua, nojuajaari naa sequequiaari pueyatej:

“Niaari seetanujuanaa Pueyaso rupaa tojiniutianiya najuhuanaj. Majaari nia niishiniu quiniutianiya. Niaari Pueyaso miishano niquiniutianiya najuhuanaj. Majaari nia niishiniu quiniutianiya nia niquishano. <sup>15</sup>Nojoriiri cumajiuujiaaca quia. Nojoriiri juhua numeejeu, tojiyashijiaa. Nojoriiri juhua nimishitiu quiyajuhuj. Naa juhua nimishitiu quitiuyari nojori niquiyaquiniucuaaji. Nojoriiri naa juhua numeejunucujahuaj, nojori tojitiaaquiniucuaaji noojiaata. Naa quitiuyari nojori niishiyaquiniucuaaji noojiaata, cucua nojori tacatenuhuara cua jeeanura nojori jiuujia seque”.

<sup>16</sup>‘Cua pueyanaa, niaari saniniuujia shuquiriaatia quia maninia nia niishishacari cua miishano, nia tojishacari cua pohuatasanojuhuaj. <sup>17</sup>Seetanujuanaa nia sequeyanijia, queraatia tariucuaaanu pueyari quiaritia nia niquishano niquiniucua jiaatiaquiaari juucua. Naa nio niquiniucua jiaatiaquiaariiri tariucuaaanu Pueyaso sequesano camini-ujunaa, queraatia maninia pueyanio. Majaari nojori niquiniu quiquiaari saaja. Nojoriiri nia tojishano tojiniucua jiaatiaquiaari juucujahuaj. Majaari nojori tojiniu quiquiaari saaja.

*Jesu niishitiojosacari miriqui na pohuatasano natojojuajiniji  
(Mr 4.13-20; Lc 8.11-15)*

<sup>18</sup>Nia pohuatareera nia niishiniuria cua pohuatasano natojojuajiniji. <sup>19</sup>Canapute Pueyasojiniji cua pohuatasano niishiyaquiyani, nojoriiri juhua nuacuaco toteno jajau. Sesaacaari niquiaa. Pueyaso Rupaa jaariutiaa noojiajinijiiri. <sup>20</sup>Noojiaqueya pueyari juhua sai tajiniaqueya jacutasano jajau quiquiaa. Naaratej, nojori jaara shuquiriaatia tojiri Pueyaso Rupaa, nojoriiri ritia shitimia nocua tiuquiaa. <sup>21</sup>Nojoriiri juhua nujuacaaju. Majaari cumaatia na nujuatunu. Naaratej, nojori jaara naquiya miishaare Pueyaso Rupaa tojijiaa nojori quiniucua, nojoriiri ritia Pueyaso tojiniu tarinitiaquiaa. <sup>22</sup>Noojiaqueya pueyari juhua riyocuaca tajinia toteno jajau quiquiaa. Nojoriiri Pueyaso Rupaa tojirii. Na nuhuaji, nojoriiri saaja puera tacaquiaa nio jiya casamiuca. Naajuhuj, nojoriiri sapojosaquiaa nojori jiyanihacari nojori jaara queraatia casamiriaca quiriquia, nojori maara shuquiriaatia quiriquiaj. Cunora, Pueyaso Rupaari maja na naata poonijionu nojori jiuujajinia. Naacujitij, cuno pueyari juhua natau muetuhuo quiquiaa. <sup>23</sup>Saniniuujia, cante maninia tojijia Pueyaso Rupaani, maninia na niishiyari. Cunoori juhua jiya maniniujinia jacutasano jajau. Naacujitij, cuno pueyari juhua maninia natau, maninia muetuna cutara. Jiyanoehua maninia pueyari quiquiaa na tojishacari Pueyaso Rupaa. Naaratej, tamonuuri juhua cien jajau muetujua. Tamonuuri juhua sesenta jajau muetujua. Tamonuuri juhua treinta jajau muetujahuaj.

*Jesu pahuatasano miriqui trigo tajinia moritaja sesa jiyasocujajini*

<sup>24</sup> Jesuuri tamonu miriqui pahuatasano pahuataquiaari pueya niqiuara, nojori na niishitiojonura taa Pueyaso tojitiaashijiaca pueya quiniutianiya Pueyaso muerasu tajiniani. Jesuuri naa pueya pahuataquiaari:

–Tamonu pueyanoori maninia jajau nataquiaari na cuhuariquiajinia. <sup>25</sup> Puetunu pueyjanaa jaara niucua maqueturiquiaa, na paracaari jiyacari niqiuari. Sesa jiyasocua jajau jaquerooquiaari trigo natanaso cuhuariquiajiniiaari. Na natanu nuhuaji, tacateyarohuari. <sup>26</sup> Trigo jajauri maashiquiaari. Na nuhuaji, na jajau mueratuusacari shusha, sesa jiyasocuaari mariyata niquishaaquiaari maashiyano. <sup>27</sup> Cuhariquia camaru seyari quiaquiaari na camarujuanaa nojori sequenura: “Jiyaniijianaa, ¿majateeri maninia saquirojosano jajau quiquianucuaaja quia natanaso cuhuariquiajiniiani? ¿Teje cuno sesa jiyasocua moritiarucuaa quia natau tajiniacuaraarini?” <sup>28</sup> Cuhariquia camaruuri nojori riuucaree: “Pa paracaari cunohuaj, naa pa miirucuaani”. Na seyari na nequesotaree: “¿Quiaate paniya canaa quianura cuno jiyasocua jayotanura trigo tajiniaqueyajini?” <sup>29</sup> Na seyari sequere saajaari: “Maja. Maja nia jayotanu jiyasocua, niaa mariqui trigo na cojiritiareeri. <sup>30</sup> Naajaa, nia tarinitiare cuara maashiiria, mariyata cuara noshiirijaara trigo jajau. Na nuhuaji cutara janiyari senoonaa jiyaronutaniyani, cuara coteenu jiyasocua namirioora, nojori jiuniojonura jiyasocua catijasocoriquiano. Na nuhuaji cutara, cuara trigo jajau racatatuura nataco”.

*Jesu pahuatasano miriqui mostaza jajajajini*

(Mr 4.30-32; Lc 13.18-19)

<sup>31</sup> Jesuuri socua miriqui pahuataquiaari pueya niqiuara, na niishitiojonura taa Pueyaso poonijiya pueya jiuujiajiniani, nocua nojori tiuushacari. Naa sequereeri:

–Tamonu pueyanoori mostaza jajau nataquiaari na cuhuariquiajinia. <sup>32</sup> Seetanujanaa mostaza jajauri socua jiyanoohua shiitianiyojua puetunu tamonu jajajajiniijianaa. Naajaa, cuno mostaza jaara maashiri, socua puereetuucara maashijaari narta nataacuacajini. Naacuajitij, shuhuari na cashacucuaacua jesuya. Naajuhuj, pueyano tojishacari Pueyaso rupa, seetanujanaa maninia Pueyaso muerasura jatanishiyari.

*Jesu pahuatasano miriqui pan poreetajajini*

(Lc 13.20-21)

<sup>33</sup> Jesuuri nio miriqui pahuatasano pahuatarohuacuhua pueya niqiuara, taa Pueyaso Rupa poonijiya mijiriani. Nojori sequereeri:

–Pueyaso rupaari jiyanoohua cumaacaraca na poonijionura juhua pan poreetaja. Maaji jaara pan poreetaja cojitiri jiuujianaraca shiitianiyojua tohuatashi mishaja trigo cashojuata, puetunujanaa na poreeteyari. Pueyaso rupaari naa cumaacaracajuhuj, pueya na jataniniuria quiariniora.

*Casaara saaja miriqui sequesano pahuatasaaquiaa pueya niquiarani*

(Mr 4.33-34)

<sup>34</sup> Puetunu Jesu pahuatasanojuanaa pueya niquiarani, miriqui sequesanoori quiquiaari. Puetunu na pahuatasanojuanaari naa quiquiaariti. <sup>35</sup> Naacuajitij, maninia tohuatee-quiaariiri tariucuaaanu pueyara Pueyaso sequesano caminiujunia sequesano, jaara nio naajiotaquiaari:

“Pueyasoori naa sequeyaquij: ‘Janiyari pueya niishitiojonutaniyani saaja miriqui cua pahuatanota. Naacuajitij, janiyari pueya pahuatanutaniya pueyaracaanu nojori niishishoo casaani, shusha jiya shipinishaanujiniji’ ”.

*Jesu niishitiojosacariuhua miriqui na pahuatasano sesa jiyasocujajini*

<sup>36</sup> Na nuhuaji, Jesuuri pueya maanu sequeree:

–Tariucuaaja pueyanaa. Nia quiojorohua.

Na nuhuaji, nojuajaari na quijia tajinia tacaarohua. Jiyacaritij, canaa, na saquirojosano pueyani, canaari nocua catecanoquiaarini. Canaari Jesu sequereeni:

–Canaa quia niishitirijia miriqui quia pahuatasano cuno sesa jiyasocujajini.

<sup>37</sup> Jesuuri canaa sequeree:

–Janiyacuaajaari cunoni, maninia jajau natojojuani. <sup>38</sup> Nio jiyari juhua cuno cuhuariquia. Pueyaso muerasuuri juhua cuno maninia jajau, cuhuariquiajinia natanasoni. Tamasacaari saniniuujia Sesaaca muerasu quia. Nojoriiri juhua cuno sesa jiyasocua, cuhuariquiajinia natau tajinia maashinioni. <sup>39</sup> Sesaacaari juhua cuno cuhuariquia camaru paraca. Nojuajaari cuno sesa jiyasocua nataquiaari. Nio jiya puequesacariiri juhua cuhuariquia senoosacari quiniutianiya. Jiyocuaaanuji Pueyaso seyari juhua cuhuariquia senoona quiniutianiya. <sup>40</sup> Naatej, taa sesa jiyasocua namitiashiya catijasocoriquianocuaani, naa quiniutianiyajariuhua nio

jiya puequesacari. <sup>41</sup> Janiyari cua seya jiyaronutaniya jiyocuacaanujini. Nojoriiri sesa miijiaa quioonutaniya, mariyata canapue te tamasaca miitiquiaa sesani. <sup>42</sup> Nojoriiri quejoosaanutaniya mani quiquiojinia. Nojoriiri tii sapuenutaniya pueyaracaanu. Naquiya na miishacari, na quiaca miaquenutaniyari. <sup>43</sup> Na nuhuaji, Pueyaso tojtiajacaari jiyanhua shacantuucara quiniutianiya juhua pananu, na Que Pueyaso jiitiasacari nojori pueyaracaanu. Cante numaaracani, cuara tojtiaara na sequesano.

*Jesu pahuatasano miriqui jiyanhua panishano casaajiniji*

<sup>44</sup> Jesuuri canaa na pueya pahuataquiari miriqui, Pueyaso muerasu pa quiniuni, cunoori jiyanhua panishano. Nojuajaari naa sequequiaaritiij:

—Tamonu pueyanoori tamasaca cuhuariquia tajiriquiaa juucua. Casaa riuriatamaari, jiyanhua panishano casaa. Tiijia na jamorohuari tee na quiriquiaacuajani. Jiyanhua na shuquiritiasacari na riuriatano casaa, puetunujuanaa tama na casamijiaaja niqutiojoreeri queraatia cumaneeca na jiitianura. Na nuhuaji, puetunu na cumaneeccajanaa pataareeri cuno cuhuariquia camaruuca, cuno cuhuariquia na masenura. Naacuajitij, cuno jiyanhua na panishano casaari tama na casaara quiquiaarijiaaja. Naajuhua, socua jiyanhua panishano cutaraari, Pueyaso pueyanora nia quiniuria. Cunoori jiyanhua socua panishano puetunu pa panishano casaajinijianaa.

<sup>45</sup> Socua nia tojiri nio pahuatasano. Casami niqutiojonaari pueyaracaanu rucuaneriquiaa shanhua cohuajaaca tiujiaa na pajenura. Cunoori noturu shipinijiosano sai quiquiaari. <sup>46</sup> Tamonu juuca, jiyanhua shanhua noturu saaja niqutishaaquiariiri. Jiyanhua na panishano. Naaratej, puetunu na jiitiasanojuanaa niqutiojoquiariiri, cumaneeca na jiitianura, cuno na panishano casaa na masetajara. Na nuhuaji, puetunujuanaa na casami samitia masequiaari cuno noturu saajaari, jiyanhua na panishanoni. Naajuhua, nia tarintiare puetunu nia panishano casaajanaa, Pueyaso pueyara nia quiniuria seetanujuanaa.

*Jesu pahuatasano miriqui shiyarujiniji*

<sup>47</sup> Pueyaso Rupaari juhua puereetuuca shiyaru na camaru jartasano caminiajina. <sup>48</sup> Jaara mishaja quiquiaari sapitiaajata, pueyari na jayotaquiari jaaquijiniara. Queraatia tamaatiuniucua sapitiaajaari tii quiriquiaa. Pueyari jaaquijinia cajituuquiari saaja maninia sapitiaaja nojori saquiriojonura. Canaasatujinia na niojotureeri racatasocoriquiano. Sesa sapitiaajaari saniniujia jacutasaaquiari. <sup>49</sup> Naa quiniutianiyajaari iuhua jiya puequesacari. Naacuajitij, Pueyaso seyari rosetanutaniya, sesa miijiaa na saquiriojonura maninia pueya tajiniji. <sup>50</sup> Na nuhuaji, sesa pueyari quejoosaanutaniya mani quiquiojinia, taa sesa sapitiaaja jacutasaaquiariicuaani. Nojoriiri tii sapuenutaniya. Na quiaca miaquenutaniyajaariuhua naquiya na miiniutia.

*Pueyaso Rupaari jiyanhua panishano: tariucuacaanu naajiotasano, quiari naataja naajiotasanonio*

<sup>51</sup> Jesu pahuatanu puecasacari, canaa na pueya nequesotaquiariiri:

—¿Niaate maninia niishirii puetunu cua pahuatasanojuanaacuaja?

Canaari Jesu riucuaareni:

—Taaquiriirinij Jiyaniijianaa.

<sup>52</sup> Jesuuri canaa sequeeree:

—Maniniacuajaqui. Tariucuacaanu Pueyaso Rupaajiniji niishitiojona jaara quiarinio cua niishitiojosano Pueyasojiniji niishirijuhua, nojuaja cutaraari Pueyaso Rupaa niishijia seetanujuanaa. Nojuajaari juhua tia camaru, cante tariucuacaanu shanhua casamiri-acacuajani, quiarinio casamiriacajuhua, na tiajiniaaco racatasano. Na panishacari, na camaruuri na racatasanojiniji na panishano rijia.

*Jesu quishacari Nazaret tiacajinia*

(Mr 6.1-6; Lc 4.16-30)

<sup>53</sup> Jesu jaara puecaquiari miriqui pahuatanu, tiji quiaquiariuhuari. Canaari na nuhuajiriquiaani. <sup>54</sup> Canaari na maashijia tiacajinia tiuquiariuhuari. Canaa tiuquijiosacari, canaari Pueyaso secjojua tiajinia tiuquiariini. Jesuuri tii pueya niishitiojonu coteequiaari. Pueyari jiuujiatequiari na niishitiojosano nojori tojishacari. Nojoriiri tama sequequiaarijiaaja:

—¿Taa nio pueyano niishiya puerajaaranii? ¿Tejenotejaara na cumaacani, cusosuhua na naatanijionurani? <sup>55</sup> Na shipininiocuajaari suruhuatujiniji casaa shipinijiona quijia. Na nucuacuajaari María. Na tapueyocuaari Santiago, José, Simón, Judasno. <sup>56</sup> Na rimiatuhuari mariyata niya pa tajinia quiya. ¿Taa na niishiya pueraarini?

<sup>57</sup> Naaratej, pueyari na ruuretaquiari saaja. Naa na tiacajinijinio pueya tojtiaaquiashacari nojuajatej, Jesuuri nojori sequequiaari:

–Puetunu tiqiyocua pueyajanaari maninia tojtiaquiaa cutara Pueyaso sequenu panishano caminiujiumia. Saaja narta pueya tama na jiyajiniujiojuaarijia na tojtianu paniyaquiya, tama na tiajinijiniojuaaja pueyanio.

<sup>58</sup> Naa nojori ruuretanuucua Jesutej, majaari puera na cumaacata na miiniu quiquiaari tii, nojori tiuyaquiniuucua nocua.

## 14

*Herodes motesacari Tiuquinijiona Juan*

(Mr 6.14-29; Lc 9.7-9)

<sup>1</sup> Cuno quishacari, Galilea jiya jiyaniijia Herodesri pohuataaquiari Jesu miishano-jiniji na cumaacata. <sup>2</sup> Herodesri na seya sequequiaari Jesujiniji:

–¡Nojuacuajaari cua mosano Tiuquinijiona Juan! ¡Samiitiarohuacuaaqui! Naacuajitij, jiyanojuaa cumaaca jiitiaari, jiyajeneta casaa na miiniuria Pueyaso cumaacata.

<sup>3</sup> Herodesri naa sequequiaariti na monuucua Tiuquinijiona Juan. Nojuajaari naa miiquiaari Juantej: coteenu na quiatequiaariiri. Na morojoquiaariiri cumayocua shipinishano jiyocuata. Na nuhuaji, na nujuatequiaari nujuatejojuajiniaari. Herodesri naa miiquiaari na juaniutia Juantej, Juan nacasunuucua nojuaja, Herodes quiniuucua tarajanu Felipe niqiuocuata. <sup>4</sup> Tiuquinijiona Juanri naa Herodes sequequiaari quiasano na quiyaquishacarjia:

–¡Quiaari Pueyaso tojiyashijia! ¡Majaari maninia quia quiniuria Herodíasta! ¡Nojuacuajaari quia tarajanu Felipe niqiuocua!

<sup>5</sup> Herodesri cunora Juan monu paniriquiaa juucua. Judiocuaca puereriquiaa saajaari. Judiocuacaari niishiquiaari cutara, Juanri seetanujuanaa Pueyaso sequenu panishano caminiujiumia quiquiaari. <sup>6</sup> Tiuquinijiona Juan nujuasacarijia nujuatejojuajinia, Herodesri na rasaanu juucajinia queranacuquiaari na masuusano pueyata. Jiyacari-tij, cuno maaji Herodías niyatuuiri nianujuquiaari Herodes masuusano pueya niqiuara. Jiyaniijia Herodesri jiyanojuaa na shuquiritiaquiaari. <sup>7</sup> Naaratej, Herodesri necanuru sequequiaari puetunu pueya niquiarajanaa:

–Sanaunaa, cua sequere casaa quia paniyani. Janiyacua quia niquitiore quia panishanoni. ¡Seetanujuanaa quia sequeyanijia! Majaari cua rupaa cua jatanu quiniutianiya. ¿Casaa quia paniniutianiyani?

<sup>8</sup> Jiyacari-tij, niyacoo nucua Herodíasri neyatu rootaquiaari jiyasohuaja, casaa na masenutianiyani. Naaratej, niyacoori jiyaniijia Herodes sequesee:

–Cua quenunaa, cua niquitiore Tiuquinijiona Juan naca miacojuajinia.

<sup>9</sup> Jiyaniijia Herodesri taraajequee niyacoo sequesano na tojishacari. Naajaa, majaari na naata na rupaa jatanu quiquiaari, seetanujuanaa na sequenuucua na masuusano pueya niqiuara. Naacuajitij, Herodesri na seya sequequiaari cuara niquitiosaarianoj.

<sup>10</sup> Naaratej, na pueyano jiyaroquiaari nujuatejojuajiniaari, Tiuquinijiona Juan na nacatanura. <sup>11</sup> Na nuhuaji, Juan nacaari patasaaquiaariuhua miacojuajinia. Niyacoo niquitiosaa-suhuari. Niyacoori saniniuuja na nucuaacua na pataquiaari.

<sup>12</sup> Na nuhuaji, Tiuquinijiona Juan pueyari quiojoquiaari na quete na panura. Na jamotuquiaariiri. Na nuhuaji, nojoriiri nijioquiaari Jesu pohuatanuucua Tiuquinijiona Juanjiniji.

*Jesu mianuutesacari cinco mil pueya*

(Mr 6.30-44; Lc 9.10-17; Jn 6.1-14)

<sup>13</sup> Jesu tojishacari Tiuquinijiona Juan tari mosaarucuaa, nojuajaari canaa jiyataquiaari botejinia tamaquiria, pueya quiyaquishaquiria. Pueya jaara niishiquiaari tee Jesu quiaareeni, queraatia pueyari cuno jiya tiacajiniji quiojoquiaari tiriarajuhuj. Nojoriiri na neteyotaquiaari nuacu caminia shuriuquiuoco. Cuno pueyari canacuajitij cutesee.

<sup>14</sup> Naacuajitij, Jesu rosesacari botejiniji, jiyanojuaa queraatia pueya niquishii saajaari. Nojoricua taraajereeri. Cuno pueya patootasano cusosuhua naatanijioreeri. <sup>15</sup> Tariucua tenacari, canaa, Jesu saquiriojosano pueyani, canaari nocua niqiuarini. Canaari na sequereeni:

–Canaa Jiyaniijianaa, paa niya quiya pueya quiyaquishaquini. Paari nininiutianiyani. Juhucarijia pueya quia sequere nojori cuara quiojohuara tiacajinia, na miaqueso-coriguano nojori masenura.

<sup>16</sup> Jesuuri canaa sequere saaja:

–¿Maatucua casaara quiojiyarohuani? Naa mariqui nojori mianuutere saniya.

<sup>17</sup> Canaari Jesu sequereeni:

–Maja canaa jiitianu miaquesano. Niya quiya saajaari cinco pan, caapiqui sapitiaajanio.

<sup>18</sup> Jesuuri canaa sequere:

—Miji nia patare.

<sup>19</sup> Jesuuri sequeree pueya cuaara cajitiuuria jiyasocuaijania. Na nuhuaji, Jesuuri cuno pan pataree, sapitiaajanio. Jiyocuaaanu maureeri na Queecuara, miaquesanoocuara na secojonura. Na nuhuaji, Jesuuri pan neecasequiaari queraatiara. Canaa na niqutiojoreeri puetunu pueyajanaa canaa niqutiojosocoriquiano. <sup>20</sup> Puetunu pueyajanaari miaquenuuquiaari. Maninia tooquioreeri. Nojori puecasacari miaquenu, canaari pan neeca reratequiaariuhuan, sapitiaaja raquiquiano. Doce canaasatuuri mishinijiosaaquiaari na raacuata. <sup>21</sup> Jiyanoehua queraatia pueyari miaquenuuquiaari; cinco mil quiquiaari saa canuujuu. Majaari maajipohua serojosaanu quiquiaari, naatujoorinio.

*Jesu rucuanesacari mohuaca caco*

(Mr 6.45-52; Jn 6.16-21)

<sup>22</sup> Na nuhuaji, Jesuuri canaa na saquirojosano pueya secootequiaari botejinia canaa tacatanura, canaa puetanuracuaa nojuaja caminia taquijiria. Jesuuri jiyacari pueya maanu sequeriquiaa nojori quiojonuhua. <sup>23</sup> Pueya jaara tari quiojoquiaariuhua, Jesuuri tuhananuucua tacaquiaari tamajaaja, na Que Pueyaso na secojonura. Jaara niniquiaari, Jesuuri tii quiriquiaa tamajaaja. <sup>24</sup> Canaari saniniuujia caminia jiuujiajania tari jaaretariquiaacuani. Mohuacaari saaja canaacuara cajiniuucuariquiaa, paratu piyarojosacari canaacuara. <sup>25</sup> Juhuaquenu panishacari, Jesuuri canaa rupuesee mohuaca caco na rucuanenuta. <sup>26</sup> ¡Canaa niquishacari casa mohuaca caco rucuaneyano, canaari jiyanoehua shiriqutiuriini! Canaari sariyocuatereeni.

—¡Yae! ¡Samaruhua!

<sup>27</sup> Jesuuri ritia pocuaree. Canaa sequereeri:

—¡Nioojia nia cumaquiri! Janiyacujanjia. Maja nia puerenu.

<sup>28</sup> Canaa tojishacari Jesu, Pedroori Jesu sequeree:

—¡Jaara seetanujanaa quiajaniya quiri Jiyaniijianaa, cua sequere quiocua cua quianura mohuaca caco!

<sup>29</sup> Pedro sequereeri:

—Mijicuarajaj.

Pedroori ritia rosequiaari botejiniji. Mohuaca caco rucuanenu coteequiaariiri Jesuucua na quianura. <sup>30</sup> Na niquishacari paratu jiyanoehua piyarojiyano, Pedroori puerequiaari. Na pueresacari, moo cariquimia tiuquiniu coteequiaariiri. Nacareeri:

—¡Jiyaniijianaa cua quiare!

<sup>31</sup> Jesuuri ritia Pedro juaashiquiajiniji quiaree. Na sequereeri:

—Pedronaa, majaqui puera quia tiuuniu cucua. ¿Casaara cua sequesanoocuaji quia taacanureeni?

<sup>32</sup> ¡Nojori jaara botejinia tacataquiaariuhua, paratuuri jiyacari pueyajequee! <sup>33</sup> Canaa niquishacari naa Jesu mishano na cumaacatatej, canaari Jesuucuaa mojuquetacoquiaarini. Canaari na sequereeni:

—¡Quiaqui seetanujanaa Pueyaso Niyanu!

*Jesu naatanijosacari cusosuhua Genesaret jiyajinia*

(Mr 6.53-56)

<sup>34</sup> Canaa jaara caminia taquijiria niuutiaquiaarini, canaari Genesaret jiyajinia shiitaseeni. <sup>35</sup> Genesaret pueya jaara niishiquiaari Jesu tiuquirii, nojoriiri puetunu na jiyajiniajanaa pueya numootequiaari, cuaara patootasaaria cusosuhua Jesuucua. Naacujitij, Jesuucua patootasaquiaariiri puetunu cusosuhujanaa. <sup>36</sup> Pueyari Jesu sequetuquiaari:

—Nareja quia shanacure cusosuhua quiocua, nojori cuaara quia tucuaque toque quiaara quenaaja, nojori naataconuhua.

Jesuuri naa miirii. Puetunu na toque quianaajanaari naatacoquiaariuhua na cusonujiniji.

## 15

*Casaate sesa miitjia pueyanoni*

(Mr 7.1-23)

<sup>1</sup> Na nuhuaji, Jerusalén tiacajinijinio pueyari canaacua tiuquijioquiaari Jesuta pocojonura. Nojoriiri quiquiaari Fariseocuaca, Moisés Naajioneejiniji niishitiojanaanio. Jesu sequetureeri:

<sup>2</sup> —Quia pueyari shuquitiojua miaquenuuquiaa. ¿Casaara nojori tojitiaaquiquiaa canaa niishitiojosano pa supuetanaajiniji? ¡Nojori cuaara miiria taa pa supuetanaa miiquiaaricuani!

<sup>3</sup> Jesuuri nojori nequesotaree saniniuujia:

—¿Niajanariyahuaj? ¿Casaara nia tojtiaaquiquiaa saniniuujia Pueyaso Rupaani, nia supuetanaa jiidishano miiniu nia miiniuriani? <sup>4</sup> Pueyasocuaajari sequequiaari: “Quia que tojjia quia quiri, quia nucua tojjiano. Majaari nojori rerequetenu”. Naacuajitij, maninia pa cojuare pa queya. Pueyasoori sequequiaarijuhuaj: “Cuaara mosaaria cante na que sesacajani, na nucua sesacajano”. <sup>5</sup> Niaari saniniuujia sequequiaacujua, maniacuaajari pueyano jaara na queya sequere: “Cua quenea, cua nucuaana, janiyari Pueyasora niqutionantania cua casamini. Naacuajiti majaari cua naata nia naacunu cua jiidiasano casamitia”. <sup>6</sup> Naa nia niishitiojosacari pueyatej, niaari pueya tarinitiya na queya nojori cartenura, naacuso nojori quiniuria. Naa nia tojjishacari tama nia niishitiojosanojuaaja juhua nia supuetanaa nia miiniuriatej, niaari Pueyaso Rupaa jiyateya najuhuanara. <sup>7</sup> ¡Sapueno Pueyaso Rupaa tojtiajacanaa! Supuetana Isafasquiri maninia naajotaquiaaricuaaja niajanijajiniji, na caminiujishacari nio rupaa Pueyasojiniji:

<sup>8</sup> “Nio pueyari saa na rupaataja cua maniniuuaqueetaquiaa. Nojori jiuujiaari saniniuujia tucuaaanu quiya janiyajiniji. <sup>9</sup> Nojoriiri najuhuaana rerejoquiaa na maniniuuaqueetanura janiya. Nojori niishitiojosanoori tama nojori niishishanojuaaja, maja cua rupaa”.

<sup>10</sup> Na nuhuaji, Jesuuri puetunu pueyajanaa sequere:

—Miji, niya cua tojtiasecuarajaj maninia nia niishinuria. <sup>11</sup> Pa miasanoni, cunoori maja sesara na jiyatenu poojia. Pa rupaata pa pocuasano sesani, cuno cutaraari poojia sesojua.

<sup>12</sup> Jiyacaritij, canaa, Jesu saquiriojosano pueyani, canaari nocua catecanoquiaarini naa canaa sequenura nojuaja:

—Jianijianaa, ¿quiaate niishiya Fariseocuaacari juaaquioree naa quia sequesacaritij?

<sup>13</sup> Jesuuri canaa riucaare:

—Naajaa. Cuaara juaaquiorea. Cuno pojoriiri juhua sesa jiyasocua, Sesaaca natasano cua Que cuhuariquijania. Nojoriiri juhua sesa jiyasocua jayotasaanutaniya. <sup>14</sup> Seetanujanaa Pueyaso niishiyashijaca nojori quishacari, nojoriiri juhua cariyojuaru quiya. Narta cariyojuaru jaatucuyari. Cariyojuaru jaara narta cariyojuaru jaatucure juucua, nojoriiri mariyata raama totenutaniya.

<sup>15</sup> Pedroori Jesu sequere:

—Jianijianaa, canaa quia niishitiojoreja casaa quia sequenu paniriquiaa quia pohuatasacari pa miasanojinijini.

<sup>16</sup> Pedro riucaareeri:

—¿Niaateeri na niishiyaquiyajuhua? <sup>17</sup> ¿Majateeri nia niishiniu, pa miaquesano pa rupaataari pa seecojinia tiuquiya saaja? Na nuhuaji, pa marecuhuacuma tajimiaari. <sup>18</sup> Saniniuujia, pa rupaata pa pocuasano sesani, cunoori poojiajiniji tohuataa cutara. Naacuajitij, pueyanoori sesa quiya Pueyaso niquiara, sesa casaa na pocuanuucua. <sup>19</sup> Pueyano jiuujiajinia coretaari puetunu sesa niishiriojosanojuanaa: monu paniniu; na camishoo maajipohua numuetucunu paniniu; saaja numuetucunuua jiaatianu; nohuasejonu paniniu; sajonota saquiriojotanu paniniu; sacuraatia coriaacojonu paniniu. <sup>20</sup> Puetunu naa sesa pueya niishiriojosanojuanaa cutaraari pueyano sesojua. Saniniuujia, pueyano jaara miaquere shuquitiojua, naajaa. Cunoori maja na sesonu pueyano Pueyasora.

*Taatu tiushacari Jesuucua  
(Mr 7.24-30)*

<sup>21</sup> Jesuuri Genesaret jiyajiniji quiaquiaari canaa na pueyata. Canaari quiojoquiaari tamonu tucuaa jiyajiniarani. Cuno jiyajinia quiquiaariiri Tiro tiaca, Sidón tiacajuhua. <sup>22</sup> Canaa riucaanejosacari tii, cuno jiyajinjinio taatuuri Jesuucua niquiaari. Nojuajaari Cananeo pueyajinjinio maaji quiquiaari. Jesu nuhuaji nacariquiaari:

—Jianijianaa, cucua quia taraajere! ¡Pueyaso Jiyarosonanaa, cucua quia taraajere quenaaja! Quiyatu samaru jiidia. Jiyanohua taraatia na miiquiaari.

<sup>23</sup> Jesuuri maja na riucaanu quiquiaari. Sanaa canujiriquiaa saajaari. Naaratej, canaari Jesu catecanoquiaarini canaa sequenura nojuaja:

—Jianijianaa, na panishano quia miiri cuaara quiohuara! ¡Taajeta naca pa nuhuajini!

<sup>24</sup> Jesuuri canaa riucaare:

—Janiyari saaja Israel pueyacia jiyarosaaquiaarini. Nojoriiri juhua borregohua tashuquiono. Nojoriicua taraajeyanijia.

<sup>25</sup> Cuno maajiri Jesu sequesano tojirii. Naajaa, Jesu cariquimiaji mojoquetaseeri. Na sequereeri:

—Jianijianaa, cua naacutare!

<sup>26</sup> Jesuuri na riucaare:

—Majaari maninia pa jaariutianura pa niqiuohua miaquesano, sare niqiuohua niqiu-tiosocoriquiano saniniuuja.

<sup>27</sup>Maajiiri saaja na sequeree:

—Maniniacuaja quia sequesano Jiyaniijianaa. Naajaa, sareyaniojuacuajaari miaque-sano shiriya miaquenuuqiaa, na camaru totinijosano na miaquejajiniji.

<sup>28</sup>Jesuuri maaji sequeree:

—Maniniacuaja quia sequesano maajinia. Quiaaqui jiyanoahua cucua tiuya. Cuaara quiriiraqui taa quia paniyacuajani.

Jiyacaritij, neyatuuri naataquiaariuhua.

*Jesu naatanijosacari queraatia cusosuhua*

<sup>29</sup>Canaari Jesu cuniquiji quiaquiaariuhuanu. Canaari Galilea caminia shuriuquico tajimiaani. Canaari tuhuananuucua tacatamaani. Jesuuri tii cajishii. <sup>30</sup>Queraatia pueyari nocua nijioquiaari. Nojoriiri queraatia cusosuhua niojotaquiaari Jesu shuriucua, nojori tiacajiniji nojori patootasano. Cusosuhuari quiquiaari shipiiniquiujiuniaa pueya, cariy-ojuarujurinio, tiqianucujuhujaj, sesarunecatohuanio, socua queraatia tamaatia cusosuhuanio. Jesuuri nojori naatanijioquiaari puetunujuanaa. <sup>31</sup>Pueyari jiuujiatequiaari nojori niqushacari tiqianucua pocoyano, shipiiniquiujiuniaa rucuaneyano maninia, cariyojuarujuri niqushacari maniniajuhuaj. Naajuhujaj, sesarunecatohuari maninia nu-matucuaraca quiquiaariuhua. Naa pueya niqushacari Jesu miishanotej, nojoriiri Pueyaso maniniuhuaqueetaree. Sequetureeri:

—jijanoahua maninia Israel pueya Pueyaso!

*Jesu mianuutesacari cuatro mil pueya*

*(Mr 8.1-10)*

<sup>32</sup>Na nuhuaji, Jesuuri canaa na saquirojosano pueya sequeree:

—Miji pueyanaa. Nio pueyacua taraajeyanijia. Nojoriiri tari jiuujianaraca juuca camueenujiya niya pata. Majaari nojori jiitiatunu quenaaja casaa na miaquetusocoriquiano. Majaari cua jiyaronu paniniu miaqueyojua nojori, nojori mariqui na miaajenuta cusojoniuyarohua nucuacoori.

<sup>33</sup>Canaari Jesu nequesotareeni:

—¿Canaatucua tee riuriatate queraatia miaquesano nio queraatia pueyarani? Niya, majaari pueya quiniu quenaaja.

<sup>34</sup>Jesuuri canaa nequesotaree:

—¿Taa pan nia jiitiaani?

Canaari na riuacuareeni:

—Canaa saaja siete pan jiitiaani, secaja sapitiaajaniyojuanio.

<sup>35</sup>Jesuuri pueya sequeree na cajitiuniuria. <sup>36</sup>Na nuhuaji, Jesuuri cuno siete pan pataree, sapitiaajanio. Jesu jaara na Que secojoquiaari coteenu miaquesanoocuaru, na nuhuaji na neecasequiaariiri canaa niqutiojonura pueya. <sup>37</sup>¡Puetunu pueyajanaari maninia miaquenuuquiaari! Tooquioreeri. ¡Canaari miaquesano cureenota mishinijioquiaari siete canaasatuni! <sup>38</sup>Queraatia pueyari na miaquenuuquiaari. ¡Saaja canuuri serojosaquiaari cuatro mil pueya! Majaari maajipohua serojosaanu quiquiaari, naatujoorinio. <sup>39</sup>Na nuhuaji, Jesuuri pueya sequequiaari nojori quiojonuhua. Na nuhuaji, Jesuuri canaa jiyataquiaari botejinia Magdala jiyajiniara.

## 16

*Fariseocuaca, Saduceocuaca niqiniu panishacari Jesu miishano Pueyaso cumaacata*  
*(Mr 8.11-13; Lc 12.54-56)*

<sup>1</sup>Fariseocuacaari Saduceocuacata Jesuucua nijioquiaari nojori saniniujuniuria no-juaja. Nojoriiri Jesu sequequiaari:

—Casaa quia miiri quia cumaacata canaa niqushocoriquiano, canaa niishiniuria quiaate seetanujuanaa Pueyaso jiyarosano.

<sup>2</sup>Jesuuri nojori sequeree saaja:

—Jiya jaara naatuuca quiri pananu tiuquishacari, niaari sequequiaa: “Maninia juucaqui tariqui quiniutianiya”. <sup>3</sup>Naajuhujaj, pananu jaara tariquicuajaj jama, niqutioocua jaara niqushaarejuhuaj, niaari sequequiaa: “Maruqui niniutianiya”. Niaari naa niishiquiaa taamueca juucate quiniutianiyanii jiya nia niqushacari. ¡Mosanucuanaa! ¿Casaara sanini-uujia nia niishiyajuiya casaa Pueyaso niishitiojiya juucua niajaniani? Nojuacuajaari juucua na cumaacata na miishano miiquiaa nia niqiuara najuhuanaj.

<sup>4</sup>Jesuuri nojori niqiuara sequereejuhujaj:

—Nio sesoriquia pueya, Pueyaso tojitiaashijiacani, nojoriiri Pueyaso cumaacata cua miishano niqiniu pania juucua. Majaari nojori niqutishaanu quiniutianiya socua.



Nojoriiri saaja nio niquiriyatu Pueyaso cumaacata miishocoriquiano niquiniutianiya: janiyari miishaanutaniyani taa supuetana Jonás miishaacquiaaricuaani.

Naa Jesu sequenu nuhuajitij, nojori tarinitiaqueeri. Canaari quiaqueeni.

*Jesu numootesacari na pueya Fariseocuaca niishitiojosanoocuaji*  
(Mr 8.14-21)

<sup>5</sup> Canaa niuutiasacari caminia taquijiria, canaari canaa coseyaca panu niyajetaquiaari canaa sasocoriquianoni. <sup>6</sup> Jiyacaritij, Jesuuri canaa sequeree:

—Niishijaca nia quiri. Tama nia cuaqueyajaaja nia cojuare Fariseocuaca pan poreeta-jaacuaji, Saduceocuaca pan poreetajaacuajinio.

<sup>7</sup> Cunora, canaari tama sequetooreejaanijia:

—¿Casa na sequeyani? Pan pa paaquiniucua naa pa sequeya jiyoteeri.

<sup>8</sup> Jesu niishishacari naa canaa sequesantej, canaa sequereeri:

—¿Majateeri juhanouaja cucua nia tiuuniu maninia? ¿Casaara tama nia pocooyajajaaja panjinijini? <sup>9</sup> ¿Majateeri juhanouaja nia niishiniu tari cua mishanojiniji? ¿Niaateeri tari niyajetarucuaa taa canaasatu mishajate cureecanuni, cinco mil canuu jaara miaquenu-ucanu cinco panjinijitij? <sup>10</sup> Naa jiyoteeri niyajetarucuaajuhuaaj taa canaasatu mishajate cureecanuni, cuatro mil canuu jaara miaquenuucanu siete panjinijitij. <sup>11</sup> ¿Casaara nia jiyaniirini janiya miaquesanojiniji sequeriquiaani? Maja cua sequenu panjiniji. Nia sequeriquiaanijia tama nia cuaqueyajaaja nia cojuare Fariseocuaca pan poreetajaacuaji, Saduceocuaca pan poreetajaacuajinio.

<sup>12</sup> Naa na sequesacaritij, canaari jiyacari niishiquini majaari Jesu sequenu quiriquiaa pan poreetajinijini. Canaari shusha niishiquini Jesuuri miriqui canaa numooteriquiaa tama canaa cuaqueyajaaja canaa cojuanura Fariseocuaca niishitiojosanoocuaji, Saduceocuaca niishitiojosanoocuajinio.

*Pedro sequesacari Jesuuri seetanujuaana Pueyaso Jiyarosano*  
(Mr 8.27-30; Lc 9.18-21)

<sup>13</sup> Canaa tiuquijiosacari Cesareya Filipino tiaca jiyajinia, Jesuuri canaa nequesotaree:

—¿Taa pueya sequequiaa janiyajinijini, cantena janiyani?

<sup>14</sup> Canaari Jesu riucaareni:

—Noojiaqueya pueyari sequequiaa, quiaanaari Tiuquinijiona Juan. Herodes motesano naasucuaanaari samiiarohuacuaa. Tamasacaari sequequiaacuajua, quiaanaari Elías, tar-ucuaaanu pueyara Pueyaso sequesano caminiujunua. Tamasacaari saniniujia quia sequequiaacuajua, quiaanaari supuetana Jeremías, pueyara Pueyaso sequesano camini-ujunajuhuaaj, tamonu Pueyaso sequesano caminiujunua soj.

<sup>15</sup> Jesuuri canaa nequesotarahua socua:

¿Niajaniryahuaj? ¿Taa nia sequeyanijia? ¿Cante janiyani?

<sup>16</sup> Simón Pedroori na riucaaree:

—¡Quiaacuajaari Pueyaso Jiyarosano! Quiaari Cristo, Pueyaso Niyanu.

<sup>17</sup> Jesuuri Simón Pedro sequerohua:

—Quiaacuajaari Pueyaso shuquiritasano pueyano, Jonás niyanunaa. Jiyocuacaanu Quijia cua Quecuajaari quia niishitirii cante janiyani. Janiyajiniji quia niishishanoori maja pueya niishitishano quiajanija. <sup>18</sup> Janiyari socua sequenu panija quiajaniani Pedronaa. Quia sesaari Pedro. Niiori pueyano rupaajinia sequeya “saajia”. Naatej, taa saajiacuaani jataniyaquishoo, quiaari cumaatia nujuataja quiniutianiya, seetanujua-ana cucua quia tiushacari, quia niishishacari janiyari Pueyaso Niyanuni. Naajuhuaaj, puetunu pueyajanaa cante cucua tiuuriini taa cucua quia tiuyacuani, janiyari nojori jiyatenutianiya cua muerasurani. Puetunu cua saquiriojosano pueyajanaari cumaatia nujuatunutianiya, nojori niishishacari janiyari Pueyaso Niyanuni. Naacuajitij, nojoriiri juhua puereetuua saajiacua tiasano quiniutianiya. Puetunu cua muerasujanaari juhua cua tia quiniutianiya, cua quiquio nojori quishacari. Sesaacaari maja na naata cua tia pojoretanu quiniutianiya. Majaari na naata na tarinitiniu quenaaja janiya, cua tiasacari cua quiquiora. <sup>19</sup> Naajuhuaaj Pedronaa, quiaari juhua cua quiquio tiotiu riatataja jiiatana quiniutianiya. Naacuajitij, quiaari coteenu pohuatanutianiya pueya niquiara janiyajiniji, nojori tiuuniurua cucua, juhua Pueyasocua nojori tiuquiniurua na muerasura nojori quiniurua. Naajuhuaaj, quiaa jaara rootare taate Pueyaso muerasu naata miiniu maniniani, Pueyasoori sequenutianiya cuara naa quiriartej. Naajuhuaaj, quiaa jaara casaa tenujura, maja naa pueya miniuriatej, Pueyasoori naa sequenutaniyajuhuaaj.

<sup>20</sup> Na nuhuaji, Jesuuri canaa na pueya rootaree maja canaa pohuatanura tamasaca niquiara nojuacuajaari Pueyaso Niyanu.

*Jesu numootesacari na pueya, nojuajaari mosaanutaniya*  
(Mr 8.31-9.1; Lc 9.22-27)

<sup>21</sup> Jiyacaritij, Jesuuri canaa pohuatanu coteequiaari taa nojuaja miishaanutaniyani. Canaa sequereeri:

—Janiyari Jerusalén tiacajinia quiariquianoni. Parta Judiocuaca jiyaniijianucuaari tii cua miiniutaniya naquiya jiyanoehua. Pueyacuara secोजना jiyaniijianucuaari nojori rupenutaniya naa cua paracaashaanurajuhua, mariyata tariucuacaanu Moisés Naajioneejiniji niishitiojonaanio. Naacuajitij janiyari mosaanutaniyani. Jiuujianaraca juucajinia, janiyari samiitianutaniuhuani.

<sup>22</sup> Naa Jesu sequesacaritij, Pedroori Jesu jaatucuree tamocora na nacasunura tamajaaja. Jiyanoehua Jesu sequereeri:

—¡Maja naa pocuanutej! ¡Pueyaso cuara cojuara quiajaniya maja naa quia miishaanuratej!

<sup>23</sup> Jesuuri saaja Pedro nijiniaquequee. Na sequereeri:

—¡Niiquiji quia quiaare Satanásnaa! ¡Quia sanaajere! Sesaacaari naa quia pocuateree Pedronaa. Quia sequesanoori maja Pueyasojiniji. Quia niishiriojosanoori juhua mijiria pueya niishiriojosano saaja. Naa quia sequesacaritij, quiaari cua Que sequesanoocuaij cua tarinitiniu paniya juucua.

<sup>24</sup> Na nuhuaji, Jesuuri canaa na pueya sequequiaari:

—Pueya jaara cua tojjijara quiniu paniya, nojori cuara carteera tama nojori panishanojuaja. Na nuhuaji cutara, cuara miiria cua panishano, tama na cuaqueya na panitianutajaaja cucuara. <sup>25</sup> Naatej, pueyano jaara tama na cuaqueyajaaja shuquiritiniu paniya mijiria, cuno pueyanoori na nuhuaji jiyanoehua taraatia quiniutaniya. Saniniujia, cante tama na cuaqueyajaaja panitiaa cucuara mijiriani, cuno pueyanoori na nuhuaji pueyaracaanu shuquiriaatia quiniutaniya cutara. <sup>26</sup> Naajuhua, pueyano jaara masere puetunu nio jiya casamijanaa, na casamiiri najuhua quiniutaniya nera, na camaru jaara jatasare mani quiujojinia na shaajesacari. Nojuajaari maja na naata Pueyaso jiyanootiniu tama na cuaqueyajaaja, naajaa, nojuaja jaara puetunu na casamijanaa niqitiore Pueyaso, Pueyaso samiitianinihuara nojuaja.

<sup>27</sup> Janiyacuajaari jiyanoehua shacantuuca quijjara quiniutaniyani, cua Que jiyatesacari janiya Jiyaniijiarajanaa. Na nuhuaji, janiyari mijiria niniutaniuhua jiyocuacaanuji cua Que seyatani, puetunu pueyajanaa cua nequesoreenura. Jiyacaritij, pueyari maninia casaa niqitiosaanutaniya maninia nojori miiniucua. Pueyaso tojtiaashijiaacari saniniujia naquiya miishaanutaniya, sesa nojori miiniucua. <sup>28</sup> Seetanujuanaa nia sequeyaniija, noojiaqueya niajanijinjini nia cuata quiyani, majaari nia shaajenu quiniutaniya juhuanujuaja, niaa cuara niquirijaatijia Pueyaso cumaaca cucua tiuquiyano, cucua tiujiaa jiitiariquiano.

## 17

*Jesu jatasacari shacantuucara*  
(Mr 9.2-13; Lc 9.28-36)

<sup>1</sup> Seis juuca nuhuaji, Jesuuri nio pojori jiyataquiaari jiyaconaja tuhuananuucua. Nojori-iri quiquiaari Pedro, Santiago, Santiago tarajanu Juannio. Jiyareta tama nojoriiaarijia quiaquiaari. <sup>2</sup> Jesuuri tii tamaatiara jataquiaari nojori niqiaara. Na jiquicoori jiyanoehua shacantuucara jataquee, juhua pananu. Na toqueeri mariyata jiyanoehua cohuajara jataquiaarijuhuaj, juhua cuhuratana. <sup>3</sup> Jiyacaritij, nojoriiri caapiqui supuetanaa niquirii, Moisés, Elíasnio. Jesuta pocoojoriaari. <sup>4</sup> Cunora, Pedroori Jesu sequereeri:

—¡Jiyaniijianaa, canaajetj namitia niya quiyani! Quiaa jaara paniri, canaa quicuajj suhuoronutaniyani, Moisésrajuhuaj, Elíasranio.

<sup>5</sup> Pedro pocuasacarijia, shacantuuca najacaari nojori mishiquioma. Najacajiniji, ru-paari tojishaaquiaari naa sequeyano:

—¡Niiori cua Nyanuniyojua, cua shuquiritiasano! ¡Saaja nojuaja nia tojtiaari!

<sup>6</sup> Naa nojori tojishacari Pueyaso pocuaanotej, nojoriiri jacamatuquiaari jiyanoehua na puerenuta. <sup>7</sup> Jesuuri nojoriicua nimiaa. Nojori quiaseeri na juashiquiata. Nojori sequereeri:

—Nia saneecuaturuhua. Maja puereenu.

<sup>8</sup> Nojori jaara niqiniijionuquiaari, majaari tari na niqitiuniu quiquiaari cuno supuetanaa. Saaja Jesuuri quiriquiaa.

<sup>9</sup> Nojori rosetasacariuhua tuhuananujiniji, Jesuuri naa nojori rootaquiaari:

—¡Majaari nia pohuatanu pueya niqiaara tuhuananujiniji nia niqishano! Niocua na pohuatarohua cutara janiya jaara samiitiarohuani.

<sup>10</sup> Na pueyari Jesu nequesotaree:

—¿Casaara tariucuacaanu Pueyaso Rupaañiniji niishitiojona sequequiaacuaraarini, supuetana Elíasnaari quicuajaji mijiria niniutianihua coteenu, pueya na jiyanoootenuhuara necohuata?

<sup>11</sup> Jesuuri riucaaree:

—Elíasri seetanujuanaa coteenu niriqiano quiquiaari, puetunu pueya jiuujiaajanaa na jeenucanura. <sup>12</sup> Janiya cutaraari nia sequeyani, Elíascuajaaari tari niqiaari. Majaari pueya niishiniu quiquiaari cante nojuajani. Naaratej, pueyari taraatia na miiquiaari taa nojori paniquiaaricuajani. Nojoriiri naa cua miiniutianiya naquiyajuhua.

<sup>13</sup> Naa Jesu pohuatasacari Elíasjinijitij, na pueyari niishiquii nojuajaari Tiuquinijiona Juanjiniji pohuatariquiaa miriqui.

*Jesu naatanishacari samaruraca caya samijia*

(Mr 9.14-29; Lc 9.37-43)

<sup>14</sup> Jesu jaara tuhuananujiniji tiuquijioquiaari canaacua, tamonu pueyanoori nocua catecanoquiaari canaata quinaa maanujiniji. Jesuucuaa mojuquetaseeri na sequenura neyanuucuaa. <sup>15</sup> Jesu sequereeri:

—Jiyaniijianaa, cua niyanuucua quia taraajere quenaaja! ¡Nojuajaari pueyaracaanu cusojoquiaa! Na jiiatasano cusonuuri na taquiriocuatequiaa. Na cusojosacari miiquiaa naquiyari. Naacuajitij, sequeyarucua manijinia tiquiaari, moojiniano. <sup>16</sup> Janiyari quia pueyacua na tiuquitiasee na naataniniuria juucuan. Nojoriiri maja na naata na naataniniu.

<sup>17</sup> Jesuuri cunora sequere:

—¡Niaaqui Pueyasocua tiuyashijiaca, na tojiyashijiacanío! ¿Janiyateeri nia rejeretanutianiya pueyaracaanuni? ¿Taacari nia niishiniutianiya Pueyaso tamajaajarini? Miji nia jaatucuma cuno mueya.

<sup>18</sup> Mueya tiuquishacari nocua, Jesuuri samaru juarii. ¡Na tohuatereeri! Jiyacaritij, caya samijiaari maninia quiquihua.

<sup>19</sup> Na nuhuaji, tamajaaja canaa quishacari Jesuta, canaari na nequesotareeni:

—Jiyaniijianaa, ¿casaara maja canaa naata cuno samaru tohuatenu quiriquiaani?

<sup>20</sup> Jesuuri canaa riucaaree:

—Maja puera maninia nia tiuuniu juhuanujuaja Pueyasocua. Seetanujuanaa nia sequeyanijia, nia tiuuniu Pueyasocua jaara quiriquia shiitianiyojua juhua mostaza jajau quenaaja, jiyacari cutaraari nia naata miiniu puetunu nia panishanojuanaa. Naacuajitij, nio tuhuananu maara nia tojori, niaa jaara na sequere: “Tuhuananunaa, niiquiji quia quiaare tamaqui”. <sup>21</sup> Saniniuujia, jiyano samarutej, na naata tohuatanishano cutara saaja Pueyaso nia secojosacari nia miaqueyaquiniutia.

*Jesu pacutesacari pohuatanu nojuajaari mosaanutianiya*

(Mr 9.30-32; Lc 9.43-45)

<sup>22</sup> Tamonu juuca Jesu rucojosacari canaa na pueyata Galilea jiyajinia, Jesuuri canaa sequere:

—Janiyari sapojonuta niqutiosaanutianiya taucuan. <sup>23</sup> Nojoriiri cua monutianiya. Jiuujianaraca juucajinia, janiyari samiitanutanihuani.

Naa Jesu sequesacari canaatej, canaari jiyanohua taraajequiaarini.

*Cumaneeca niqutiosacari Pueyaso Secojoua tiaacuara*

<sup>24</sup> Canaa jaara tiuquijioquiaari Capernaum tiacajinia Jesutani, tamonu pueyanoori Pedroocua catecanoquiaari. Nojuajaari cumaneeca masejona quiquiaari Pueyaso Secojoua tiaacuara. Cuno pueyanoori Pedro nequesotaree:

—¿Majate nia niishitiojona niqutionu na cumaneeca Pueyaso Secojoua tiaacuara, taa pa jiyaniijianucua sequequiaaricuajani?

<sup>25</sup> Pedroori na riucaaree:

—Na niqutioquiaanocuaaja.

Na nuhuaji, Pedro tiuquishacarihuua na tiajinia, Jesuuri na nequesotaree:

—¿Taa quia sequeyani Simónnaa? Mijiria jiyaniijianucua jaara cumaneeca paniri, ¿teyanu pueyajiniji cumaneeca maseshiyani? ¿Tama na pueyajinijitij, taucacajiniji soj?

<sup>26</sup> Pedroori Jesu riucaaree:

—Taucuaca niqutiojoteshiyancuaaja nojori jiya jiiitiana sequesano.

Jesuuri na sequere:

—Naacuaaquinatejaj. Naacuajitij, tama na pueyajaarijia maja na niqutionu. Pueyaso Secojoua tiacuaajaari cua Que tia. Naaratej, maja cumaati Neyanu sequesaaanu na niqutionura na cumaneeca. <sup>27</sup> Naajaa, pa niqutiojore juhuari nojori sequesano, paa mariqui

nojori juaatiriiri. Nocuaji quia rioosee caminiajania. Quiocua coteenu quia jatasano sapitiaaja rupaama niquiri. Quiaari tii cumanee riuriatanutaniya. Quiocua cuno cumanee niqutiosuhua nojori, quiria, quiarajuhuaaj.

## 18

### *Cante jiyaniijajanaa cutarani*

(Mr 9.33-37; Lc 9.46-48)

<sup>1</sup> Jiyacaritij, canaa, Jesu saquiriojosano pueyani, canaari Jesuucua catecanoquiaarini naa canaa nequesotanura nojuaja:

—Jiyaniijajanaa, canaa quia sequeretoj, puetunu quia pueyajinijiniojuanaani, ¿cante jiyaniijajanaa cutarani?

<sup>2</sup> Jesuuri naatujua piiri. Canaa tajinia na nujuatereeri.

<sup>3</sup> Na nuhuaji, Jesuuri canaa sequeree:

—Nia niyaretare socua tojishano pueyano nia quiniu paniniu tamasacajiniji. Seetanujuanaa nia sequeyanijia, nia jataniyaquishacari tama nia cuaqueyajaaja juhua nio naatujoori nia quiniuria, majaari Pueyaso muerasura nia quiniu quiniutianiya quenaaja. <sup>4</sup> Naacuajitij, cante tama na cuaqueyajaaja jiyateya pueya shocoteyashijia na quiniuria juhua naatujuaani, nojuajaari socua jiyaniijajanaa quiniutianiya cutara narta Pueyaso muerasujinijinio. <sup>5</sup> Naajuhuaaj, cante naatujua maseja maninia na paniniuucua janiyani, nojuajaari cua maseyajuhuaaj.

### *Paari cocuaatia miyani sesa pa miishacari*

(Mr 9.42-48; Lc 17.1-2)

<sup>6</sup> 'Sesa cutaraari, sesa nia miitiniuria cucua tiujia naatujua. Socua maninia cutaraari sesa miitiriqiano pueyanora, nojuaja jaara juhuacarijia caminia queronijinia jartasaare puereetuajau saajia na riquiajiniji morotasano. <sup>7</sup> ¡Mijiria quiniaari jiyanohua cocuaatia miiquiaa sesa na miitishacari tamasaca! Mijiria, pueyari pueyaracaanu sesa miitishaaquiaajuhuanajaj. ¡Taraatia quiniutianiya cutaraari noo pueyanora, cante sesa miitirii tamonuni!

<sup>8</sup> 'Nio miriqui cua niishitiojosano nia tojiri: nia juaashiquia, nia niohuaca jaara sesa miitiya niajaniya, nia rashiquiarenoj, tucuacaanu jatasocoriquiano. Naa nia miiri niaa mariqui mani quiquiojinia jatasaaereeri puetunu nia cuaqueyatajanaa. Socua maninia cutaraari juaashiquiaaaju, niohuacaaju nia tiuquitianura Pueyaso quiquiojinia jiyocuacaanu. Niaari tii quiniutianiya shuquiriaatia pueyaracaanu. <sup>9</sup> Naajuhuaaj, nia namijia jaara nia miitiri sesa, nia jiatere. Tucuacaanu nia jatarenoj. Jiyanohua socua maninia cutaraari niaara, jiyocuacaanu nia tiuquiniuria namijijiu, maja nia jatasaanura mani quiquiojinia, saniitiosocoriquiano puetunu nia namijiaatajanaa.

Naa Jesu niishitiojosacari miriquitij, nojuajaari canaa niishitiojoriquiaa canaa tarinitianura jiyanohua canaa miiniu panishano, cuno jaara sesa miijiaa jiyateriquia canaa.

### *Jesu pohuatasano miriqui borrego tashucuanojiniji*

(Lc 15.3-7)

<sup>10</sup> Jesuuri naa canaa niishitiojorohua socua:

—Tama nia cuaqueyajaaja nio cojuare nia soyaquiniuucaaji tamonu muerasuniyojua, juhua nio mueyaja. Cua tojitiare. Pueyasocujaari na seya seerataquiaa nojori cojuanura muerasu. Cuno na seyari pueyaracaanu cua Que Pueyaso jiquioco shootiaquiaa. Naajuhuaaj, Pueyasocujaari na muerasuranocua niishiriojoquiaa. <sup>11</sup> Naaratej, janiyari mijiria niqiaarini tashucuanu pueya cua pajenura, nojori cua jiaruutianura Sesaaca.

<sup>12</sup> ¿Taa nia sequeyani pueyanaa? Tamonu pueyano jaara cien borregohua jitiare, niquiriyatujua jaara tashucua tapueyocuacajiniji, ¿majateeri na camaru na borregohua cureeno tiujianu rupaquija, tashucuanu na pajenura? Taaquiriirinij. <sup>13</sup> Jaara na riuriatere, seetanujuanaa socua jiyanohua cuno borrego tashucuanu shuquiritiaari tamasaca na borregohuajiniji. <sup>14</sup> Naajuhuaaj, jiyocuacaanu quijia nia Queri maja na paniniu quenaaja niquiriyatujua nio muerasujinijinio tashucuanura puetunurajanaa.

### *Taa pa jiyanoja pa tarajanuni*

(Lc 17.3)

<sup>15</sup> 'Quarta Pueyaso pueyano jaara sesa miiri quiajaniya, nocua quia quiaare na nacunura tamajaaja nia quishacari. Nojuaja jaara tojiri quiajaniya, maniacujaari. Niaari maninia rupuetoojuacara quiniutianihuacuahuaj. <sup>16</sup> Nojuaja jaara tojijaquiri quiajaniya saniniujia, nocua quia quiaare socua tamonu pueyanota, caapiqui pueyata soj. Nojori niqiaara quia nacasure cuno sesa miinia. Naa jaara naa miiritij, naa quiniutianiyari taa tariucuacaanu Pueyaso Rupaajinia niishitiojosaaquiaaricujani: "Querajaa pueya jaara

mariyata pohuatate na niquishano, na tojishanojuhuaj, cunoori maja sapojonu". Naacua-jitij, nojori saquiriojotasanoori seetanujuanaa quiniutianiya. <sup>17</sup> Cuno sesa quia miinia jaara nia tojiniu paniyaquiya saaja, puetunu niarta Pueyaso pueya niquiarajanaa quia pohuatate sesa na miishano. Cuno pueyano jaara tojiniu paniyaquiri puetunu Pueyaso pueyajanaa, nojuaja cuaara quiriia juhua Pueyaso niishiyashijia niaara. Naacua-jitij, majaari socua nia rupenuunoj.

<sup>18</sup> "Seetanujuanaa nia sequeyanijia, cana nia jiyanoyaquiri mijiriani, na tojiniu paniyaquishacari niajaniya, cunoori jiyanoyaquishano quiniutianiya jiyocuacaanu cua Que Pueyasorajuhua. Naajuhua, cana nia jiyanoori mijiria na tojishacari niajaniyani, cunoori jiyanooshano quiniutianiya jiyocuacaanu cua Que Pueyasorajuhua.

<sup>19</sup> "Naajuhua, janiyari seetanujuanaa sequeya niajaniyani. Caapiqui niajaniyajinijinio jaara mariyata niishiriojore nia panishanoocua nia secojonura Pueyaso, cua Queeri nia tojiniutianiya. Nojuajaari jiyocuacaanuji naa maninia miniutianiya niaara, taa nia secojosacari nia sequereecuanajanoj. <sup>20</sup> Querajaa niajaniyajinijinio jaara rerejore, cucua tiuujiaca nia quishacari, janiyari tii niaata quiyajaaniuhua. Naacua-jitij, cua Queeri nia secojosano tojiniutianiya cutara.

<sup>21</sup> Jiyacaritij, Pedroori Jesu nequesotasee:

–Jiyaniijanaa, tamonu pueyano jaara sesa miiniu pacutejore janiya, ¿janiyatucua pueyaracaanu na jiyanoorini? ¿Majateeri tariucua, janiya jaara na jiyanoori siete sesa na miishanojiniji janiyani?

<sup>22</sup> Jesuuri Pedro riucaaree:

–Maja naatej Pedronaa. Maja quia tarinitianu na jiyanooni. Pueyaracaanu sesa na miishacari quiajaniya, pueyaracaanu quia jiyanoori quiarta pueyano. Majaari quia serojonu sesa na miishano quiajaniya. Pueyaracaanu quia jiyanoori saaja.

*Jesu pohuatasano jiyanoashijia serujiniji*

<sup>23</sup> "Naaratej, cua tojiri pueyanaa. Nia pohuatateera nia niishiniuria taa Pueyaso paniya jiyanoootiojuaca na muerasu nia quiniuriani. Tamonu jiya jiyaniijaari nera poonijionaa pueya sequequiaari nojori cuaara tari niqutiojora nojuaja na cumaneeca, nojori na niqutiojosanojiniji na casami. <sup>24</sup> Noojiaqueya nera poonijionaa pueya jaara tari nojori pasano casamijiniji niqutiojori quia cuaa tama nojori cumaneecajinijijaaja, jiyacaritij, tamonuuri tiuquinishaarejuhuaj. Nojuajaari jiyanohua queraatia casami masejoquiaari na jiyaniijaajiniji, queraatia millón cumaneeca. <sup>25</sup> Nojuajaari maja na jitianu quiquiaari na cumaneeca, na jiyaniija na niqutionuhua. Na jiyaniijaari cunora na pueya sequeere: "Tamonu camarnu nia niqutione nio cua seru, necocuatata, cua cumaneecara, necouajuhua, puetunu na casamijianaanio. Naacua-jitij, na cuentaari puequenutaniya". <sup>26</sup> Cuno na seru tojishacari naa na jiyaniija sequesantej, nocuaa jacamaquiaari. Na jiyaniija sequeereeri: "¿Cua tarinitiare quenaaja cua jiyaniijanaa! ¡Rupaquijiaa cua tarinitiarejaara! Janiyacuajaari quia cumaneeca niqutionutaniya puetunujuanaani". <sup>27</sup> Na jiyaniijaari nocua taraajeree. ¡Na carterohua puetunujuanaari! Naa na jiyanoori, nocua na taraajenucua.

<sup>28</sup> "Cuno seru tohuatasacari jiyaniija tiajiniji, narta seruta naacuneetooreeri. Cuno narta seruuri tarijia masequiaari shiitianiyojua casami cuno jiyanooshano serujiniji. Secaja cumaneecaari quiquiaari na cuenta. Naajaa, cuno jiyanooshano seruuri narta seru quiaree. Cumaatia na riquiajinia na miniriiri. Na sequeereeri: "¡Ritia cua niqutione cumaneeca, tarijia quia masesano janiyajiniji!" <sup>29</sup> Narta seruuri na riquiajinia mininia cariquimiaaji mojoquetaree. Na sequeereeri: "¿Cua tarinitiarecuaraja quenaaja! ¡Janiyacuaajaari quia cumaneeca quia niqutionutaniya!" <sup>30</sup> Majaari na sashinu paniniu quiquiaari. Saaja na nuuatequiaari nuuatejojuajiniara cuaara na cumaneeca na niqutionejaatijia. <sup>31</sup> Narta seya niquishacari naa cuno jiyanooshano seru miishantej, nojoriiri jiyanohua taraajequiaari. Nojoriiri jiyaniijaacua quiojoquiaari puetunu sesa narta seru miishanojuanaa nojori pohuatanura. <sup>32</sup> Naaratej, jiyaniijaari tamonu na seru jiyaroree cuno jiyanooshano seru riniuucua. Na tiuquishacari, jiyaniijaari na juuari. Na sequeereeri: "¡Quiaaqui jiyanohua sesajuhuanajaj! Quia sequesacari janiya, janiyari quia jiyanoori cuana, maja quia naata niqutionu quishacari quia cumaneeca. <sup>33</sup> ¿Majateeri quia naata quiri quia taraajenu quiarta seruucua, taa cua taraajeree quiocuacuana?" <sup>34</sup> Jiyaniijaari jiyanohua juuari. Cunora, cuno sesa miijia seru jiyarotareeri nuuatejojuajinia na nuuatesaanura. Sequereejariuhua quia na quia miishaaria tii, cuaara puetunujuanaa na cumaneeca niqutionejaatijia, casami na pasanoiniji.

<sup>35</sup> "Nia Que Pueyasoori naa miniutianiya niajaniyajuhua, niaa jaara seetanujuanaa jiyanoyaquiri niarta Pueyaso muerasu.

## 19

*Jesu niishitiojosano maja pa niquiocua pa cartenura*  
(Mr 10.1-12; Lc 16.18)

<sup>1</sup> Jesu jaara naa pohuatanu puecaquiaariti, canaa na pueyata quiaquiaari Galilea jiyajiniijiiri. Canaari Judea jiya shuriucua tiuquishii Jordán moo taquijiriani. <sup>2</sup> Jiyanohua queraatia pueyari Jesu nuhuajiyaree. Quiniqui canaa quishacari, Jesuuri cusosuhua naatanijioore.

<sup>3</sup> Jiyacariti, noojiaqueya Fariseocacajinijioori Jesuucua nijioquiaari sesa na pocu-atenura Jesu juucua nocuara nojori tonujunura. Naaratej, nojoriiri Jesu nequesotaree:

—¿Maninate pa cartenura pa niquiocua, jaara pa juaatiri?

<sup>4</sup> Jesuuri nojori riuucaree:

—¿Majate nia serojonu quiquiaacuaaja Pueyaso Rupaajinia? Coteenujanaa Pueyaso shipinishacari pueyano, Pueyasoori shipiniquiaari caya, maajinio. <sup>5</sup> Naaratej, nojori shipininiari sequequiaari: “Caya cuara tujiaara na que, na nucuanio, necocuata na quiniuria. Nojoriiri juhua niquiriyatu pueyanora quiniutianiya na camitioosacari”. <sup>6</sup> Naaratej, caya, maaji jaara camitioore, majaari tari na quiniu caapiqui pueyano. Juhua niquiriyatu pueyanoujaari quiqii. Naacuajitij, majaari maninia Pueyaso rupuetootesano rupartanura.

<sup>7</sup> Nojoriiri Jesu sequeree:

—Jaara naa quiriti, ¿casaara supuetana Moisés rootaquiaaricuararini caya cuara naajionee niqutioora necocua, na cartenu panishacari?

<sup>8</sup> Jesuuri nojori riuucaree:

—Moisés cuajaari niishiquiaari niaari puera cumajiuujiaaca. Naaratej Moisésri nia tarini-tiaquiaari nia niquiocua nia cartenura. Coteenujanaa, Pueyaso jaara shipiniquiaari caya, maajinio, majaari naa na quiniu quiquiaari. <sup>9</sup> Cua tojitiare pueyanaa. Janiyari nia sequeya cutarani. Cante necocua cartee najuhanani, tamonu maajitia na caminiuria, coteenu necocua jaara tamonu cayata quiaquiri, neyacaari jiyanohua sesa miya Pueyaso niqiara. Jaara naa miiritij, Pueyasora, nojuajaari sesoriquia pueyano. Nojuacuajaari juhua pueyano, cante narta pueyano niquiocua numuetucujani. Naajuhuj, cante cartesano maaji camiyani, naa sesa miyajaariuhuj.

<sup>10</sup> Canaa, Jesu saquiriojosano pueyani, canaa tojishacari naa Jesu sequesantej, canaari na sequereeni:

—Jaara naa quiriti taa quia sequeriquiaacujani, maninia naasucuaari maja mashaja caminiuria. ¿Naatejaaratej?

<sup>11</sup> Jesuuri canaa riuucaree:

—Maja na naata puetunu pueyajanaa nio cua niishitiojosano tojinu. Saaja noojiaqueya pueya cutaraari na tojiniutianiya, noo pojori canapuate jiyocuaaanuji cumaaca niqutiosareeni na tojiniuria. <sup>12</sup> Naajuhuj, noojiaqueya canuuri maja na naata caminiu, riyacajajaaju nojori quishacari. Nojoriiri naa rasanajuhanajaj. Tamasaca canuuri maja na caminiu saniniujia, jiatejosano nojori riyacajaju quishacari. Tamasacaari maja na caminiujihujaj tama nojori paniaquishacarijiaaja, saaja Pueyasora nojori poonijionu panishacari. Cante na naata naa miiniuni, cuara naa miiriatej.

*Naatujooriucua Jesu secojosacari Pueyaso*  
(Mr 10.13-16; Lc 18.15-17)

<sup>13</sup> Na nuhuaji, pueyari Jesuucua nitaquiaari necohua juucua, Jesu nianura nojoriicua na juaashiquia, nocuara na secojonura Pueyaso. Canaa, Jesu saquiriojosano pueyani, canaari saaja nojori tenujoree canaa juaaniutiani. <sup>14</sup> Jesuuri saniniujia canaa sequeree:

—¡Maja nojori tenujuni! Nia tariniatiare naatujoori cuara cucua nijioora. Nia tojiri, canapuate seetanujanaa juhua nio naatujoorini, nojoriiri Pueyaso muerasu quiriquiano.

<sup>15</sup> Na nuhuaji, Jesuuri na juaashiquia niaquiaari naatujooriicua, nojoriicua na secojonura, Pueyaso miiniuria maninia nojori. Na nuhuaji, Jesuuri quiniquiji quiaquiaariuhua.

*Jiyanohua casamiriaca mashaja pocoojosacari Jesuta*  
(Mr 10.17-31; Lc 18.28-30)

<sup>16</sup> Tamonu mashajaari Jesuucua niqiaari. Na nequesotaseeri:

—Niishitiojonanaa. Quiaari maninia pueyano. Cua sequere, ¿taa cua miiniutianiya maninia cua quiniuria Pueyaso niqiara, pueyaracaanu quijiaa cua quiniuriani?

<sup>17</sup> Jesuuri na riuucaree:

—¿Casaara quia sequeya janiya maninia pueyanotani? Saaja niquiriyatujaaari maninia quijiaa cutara. Nojuacuajaari Pueyaso. Naajaa, quiaa jaara maninia quiniucua jiaatiaa

Pueyaso pueyano quia quiniuria, quia tojiri tariucuacaanu Moisés Rootasano Pueyaso-jiniji.

<sup>18</sup> Jesu riucuaereeri:

—¿Teyano rootasanoteni?

Jesuuri na sequeree:

—Maja quia monu. Maja quiarta pueyano niquiocoa quia numuetucunu. Maja quia nohuasenu. Maja quia saquiriojotanu tamonuucuaa quia sapojonuta. <sup>19</sup> Quia que, quia nucua tojjia quia quiriquia. Maja nojori quia rerequetenu. Mariyata quiarta pueyano quia paniri taa quia paniyacuaa tama quia cuaqueyajaani.

<sup>20</sup> Mashajaari Jesu sequeree:

—Janiyacuaajari puetunujuanaa nio tojjia quiquiaari cua naatujuajinjini. ¿Casaa cua miinitianiya socuani?

<sup>21</sup> Jesuuri na sequeree:

—Quiaa jaara seetanujuanaa maninia quiniucua jiaatiaa Pueyaso niquiara, quia quiaarohua quia tiajinia. Quia niquitiojore puetunu quia casamijianaa cumaneecara. Na nuhuaji, casamijiuniucua quia niquitiojore nareja quia cumaneeca. Naacuaajitij, quiaari queraatia casami jitianutaniya jiyocuacaanu. Na nuhuaji, quiocua nimiohua cutara, cua tojjia quia quiniuria.

<sup>22</sup> Na tojishacari naa Jesu sequesantej, mashajaari taraatia quiaarohua jiyanhua casamiriaca na quiniucua.

<sup>23</sup> Jiyacaritij, Jesuuri canaa sequeree:

—Seetanujuanaa nia sequeyanijia, jiyanhua jiyajenetaari pueyano tojiniuria Pueyaso, na pueyano na quiniuria, cuno pueyano jaara puera jiyanhua casamiriaca quiri. <sup>24</sup> Pueyanaa, ¿camelloteeri na naata cusupuetaja cuhuoco tamajiria tajiniu? Maja na naata. Cua tojitiare. ¿Socua jiyanhua jiyajenetaari casamiriaca pueyanora, Pueyaso pueyanora na jatanishaanura!

<sup>25</sup> Canaa tojishacari naa Jesu sequesantej, canaari jiyanhua jiuujatereeni. Canaari na nequesotareeni:

—¿Canteeri Pueyaso pueyanora jiyatesaanutaniya socuanitioj?

<sup>26</sup> Jesuuri canaa shootiaree tacuriitia. Canaa sequereeri:

—Pueyari maja na naata tama na cuaqueyajaaja jiyatenu Pueyaso muerasu nojori quiniuria. Pueyaso cutaraari na naata na miiniu. Nojuajaari cumaacaraca puetunu na panishanojuanaa na miiniuria.

<sup>27</sup> Pedroori Jesu sequeree:

—¿Canaarijiataj? Canaari puetunu canaa casamijianaa tiujiaquiaarini canaa rupenura quiajaniya. ¿Casaa canaa masenutaniyarinjia?

<sup>28</sup> Jesuuri canaa riucuaere:

—Seetanujuanaa nia sequeyanijia. Nio jiya maniniushitishacariuhua, janiyari cajiniutianiyani jiyaniijia cajitujinia puetunu cua Quejiniji shanhua cua cumaacatajanaa. Jiyacaritij cua pueyanaa, niaari mariyata cajitijosaanutaniya doce jiyaniijia cajitucujajinia. Niaari pa supuetana Israel doce niquiohuacuajinio caneno pueya nequesorenaa quiniutianiya. <sup>29</sup> Cua pueya tojiniuria janiya, noojiaqueya nojorijinjinioori na tia tiujianutaniya, tapueyocuaa, na rimiatuhua, na que, na nucua, necohua, na cuhuariquiano. Canapuate naa tiujiaquiaa na tojiniuria janiyani, cuno pojoriiri Pueyasojiniji socua jiyanhua queraatia masenutaniya nojori tiujiasanojiniji. Nojoriiri pueyaracaanu shuquiriaatia quijiaaca quiniutianiyajuhua, shaajeyashijiaaca. <sup>30</sup> Saniniuujia, queraatia tojishano pueyari Pueyaso shocotasano quiniutianiya na tojtiaashijiaaca nojori quiniucua. Naajuhua, mijiria, queraatia pueyari juhua shocotasano pueya quia Pueyaso niishiyashijiaaca pueyara. Cuno pojori jiyanishano najuhua quijiacani, nojoriiri Pueyaso shuquiritasano pueya quiniutianiya cutara.

## 20

*Jesu pohuatasano cuhuariquiajinia poonitijosano pueyajiniji*

<sup>1</sup> Socua cua tojiri taa Pueyaso miiquiaa na pueyani. Nojuajaari na pueya miiquiaa taa tamonu cuhuariquia camaru miiquiaari na poonitijosano pueyacuaani. Cuno cuhuariquia camaruuri quiaquiaari tariquicuajij pueya na pajenura na uva cuhuariquiajinia nojori poonijionura. <sup>2</sup> Cuhuariquia camaruuri pueyata pocojoquiaari taa cumaneeca na niquitiojore nutaniya cuno juuca nojori poonijosanojinijini. Poonijionaa pueyari na sequeree: “Maniniacuaajari taa quia sequereecujani”. Na nuhuaji, cuno pueya jiyaroreeri uva cuhuariquiajinia nojori poonijionura. <sup>3</sup> Pananu tacasacari, cuhuariquia camaruuri tohuataquiaariuhua na tiajiniji. Jiyacaritij, socua tamasaca pueya niquishiiri juhuajaniya

quiyano tiaca jiuujiajinia curotasano cajitiucuajinia. <sup>4</sup> Cuhuariquia camaruuri nojori sequeese: “Nia quiaarejuhuaj, cua uva cuhuariquiajinia nia poonijionura. Janiyacua cumaneeca nia niquitiorohua nia poonijionu samini”. <sup>5</sup> Naacuajitij, nojoriiri quiojoquiaari cuno cuhuariquiajinia poonijionurajuhua. Na camaruuri socua tohuataquiaariuhua panacari. Socua tamasaca pueya niquishiiri juhuajaniya quiyano tiaca jiuujiajinia curotasano cajitiucuajinia. Nojori sequeerejaariuhua nera nojori poonijionura cuno juuca. Pananu mueecosacari, socua pueya riuriataquiaariiri. Nojori jiyaroree poonijionuucuaariuhua. <sup>6</sup> Tariucua pananu piriushacari, na camaruuri socua tohuataquiaariuhua. Socua tamasaca pueya niquishiiri tiaca jiuujiajinia curotasano cajitiucuajinia najuhuana quiyano. Nojori sequeereeri: “¿Casaara nia quiojiaquiyaree poonijionuucuaani? ¿Casaa nia miya niyani? Naa mariqui poonijiore”. <sup>7</sup> Nojoriiri na riuuaree: “¿Canaatucua taa poonijioreni, canaa jaara pajeshiyaquiri poonijionurani?” Cuhuariquia camaruuri nojori sequeere: “Nia quiaarequi cua cuhuariquiajinia nia poonijionura. Janiyacua nia poonijionu sami cumaneeca nia niquitiorohuani”. <sup>8</sup> Pananu tiuquishacari, cuhuariquia camaruuri na casami cojuana sequeere: “Cua poonitijosano pueya quia piiri mihi, nojori rerejonura. Na nuhuaji, cua sequesano cumaneeca quia niquitiojore puetunu nojorijianaa taa cua sequeere coteenujanaa quiria poonijionaacuajani. Majaari rimiajata nojori niquitiojore. Coteenu quia niquitiojore tariucua pananu piriushacari cua jiyaramiquishano. Naa quia niquitiojore puetunujanaa. Quiocua naa tucuatate niquitiojonu no pojorijuhua, canapuete tariquicuajaji coteere poonijionuucuaajani”.

<sup>9</sup> Jiyacaritij, tariucua pananu piriushacari poonitijosano pueyari nijiomaa. Puetunu nojorijianaari cumaneeca niquitiosaaree taa cuhuariquia camaruuri coteenujanaa tariquicuajaji poonijiona pueya sequequiaaricuajani. Majaari rimiajata nojori niquitiosaanu quiquiaari cumaneeca, nojori poonijionu sami. <sup>10</sup> Na nuhuaji, coteenujanaa poonijiona pueyari sequesaaquiaari na cumaneeca nojori masenera. Nojoriiri jiyaniquiaari nojori naasucuaari socua cumaneeca niquitiosaanutaniya rupaquijia poonitijosano pueyajiniji. Nojoriiri saaja niquitiosaaree taa cuhuariquia camaruuri sequeere nojori cuno juucacuajani. <sup>11</sup> Nojori masacari na cumaneeca, nojoriiri cuhuariquia camaruta juaaquioree. <sup>12</sup> Na sequetureeri: “Cuno pueyari saaja rupaquijia poonijioree. Quiaari nojori niquitiooree taa quia niquitioore canaacuaani. Canaari pananucari catere cutarani, pueyaracaanu canaa poonijosacari”. <sup>13</sup> Cuhuariquia camaruuri tamonu nojorijinijinio sequeere saaja: “Sanajanaa, maja sesa cua miiniu quirii quiajanija. ¿Majateeri quia niishiniu, paa jaara tariquicuajaji pocoojoriquiaatej, janiyari juhuacarijia quia sequeereeni janiyari naa cumaneeca quia niquitiojanutaniya? Quiaari cua riuuaree: ‘Maniniacuaja’. <sup>14</sup> Naaratej, quia jiyatarohua quia cumaneeca quia tiajiniohua. Janiyacuajaari naa niquitiojanu paniriquiaa tariucua pananu piriushacari cua poonitijosano pueyani, taa cua niquitioore quiajanijiacuaani. <sup>15</sup> ¿Majateeri cua naata miiniu tama cua panishanojuaaja tama cua cumaneecatajaaja? ¿Quiaateeri socua cumaneecacua jiaatijara quiquii, capora cua quiniuucua?”

<sup>16</sup> Na nuhuaji, Jesuuri naa sequequiaarijuhuaj, na pohuatasanojiniji na niishitiojonura: –Naa quiniutianiyari taa cua sequeriquiaacuajani: canapuete nuhuajishanaani, nojoriiri coteetanaa quiniutianija. Naajuhua, cante coteetanaani, nojoriiri nuhuajishanaa quiniutianija saniniuujia. Queraatia masusano pueyari quiya. Saniniuujia, secajaari saquiriojosano quia nojorijinijinio.

*Jesu camishacariuhua pohuatanu taa na mosaanutaniyani*  
(Mr 10.32-34; Lc 18.31-34)

<sup>17</sup> Tari Jesu quiasacari Jerusalén tiacajiniara, Jesuuri canaa na doce saquiriojosano pueya piiri tamocora nuu shuriuquicora, tamajaaja canaata na pocoojonura. Canaa sequeereeri:

<sup>18</sup> –Cua tojiri. Niaacuajaari niquiyaa paa tari Jerusalén tiacajiniara tacataani. Janiyari tii niquitiosaanutaniya pueyacuara secojona jiyaniijianucuaani, Moisés Naajioneenijini niishitiojanaanio. Nojoriiri cucuara saquiriojotanutaniya nojori sapojonuta cua mosaanura. <sup>19</sup> Nojoriiri cua niquitiojanutaniya taucua. Cuno pojoriiri cua rerequetenutaniya. Cua majacutunutaniyari. Na nuhuaji, niyacutesanojinia cua teetetunutaniyari tii cua cusonura. Jiuujianaraca juucujinia janiyari macujiniji samiitianutanihuani.

*Santiago, Juan nucua sequesacari Jesu, maninia na miiniuria necohua*  
(Mr 10.35-45)

<sup>20</sup> Jiyacaritij, Zebedeo niquiocuaari Jesuucua catecanoquiaari necohuata. Jesuucua mojoquetaseeri Jesu na sequenura nera na miiniuria na panishano. <sup>21</sup> Jesuuri na sequeere: –¿Casaa quia paniyani?  
Jesu riuuareeri:



—Quiaa jaara Jiyaniijjara jiyatesaare, quiocua cua niqiuohua cajitijiore quia shuriucua, Santiago, Juannio. Tamonu cuaara cajiiria quia miaquetajara, tamonu quia muenecara, quia naacunaa nojori quiniuria, juhua jiyaniijianucuaajuhuaaj.

<sup>22</sup> Jesuuri Santiago sequeree, Juannio:

—Majaari nia niishiniu casaa nia maseyani. ¿Nia naatateeri rejeretanu naquiya miiniu taa cua miishaanutaniyacuaani?

Nojoriiri saaja Jesu riucaaree:

—Taaquiririnij. Canaa naatacuaaquiniatejaj.

<sup>23</sup> Jesuuri nojori sequeree:

—Seetanujuanaa, niaari naquiya miishaanutaniya taa cua miishaanutaniyacuaani. Janiya cutaraari maja cua naata sequenu niajanija, cante cua miaquetajara cajiniutianiyani, cua muenecarano, Jiyaniijia cua quishacari. Saaja cua Que cutaraari tari na saquiriojosano pueya sequenutaniya cua shuriucua nojori cajitiniuria, teyano pojoricuaji na jeenucuaquiaaricuaajani.

<sup>24</sup> Canaa, narta saquiriojosano pueyani, canaari Juan juaariini, Santiagonio, canaa tojishacari nojori masesano juucua. <sup>25</sup> Jesuuri saniniuuja canaa sequeree:

—Miji pueyanaa. Niya cua tojitiasee. Niaacuajaari niishiya, mijiria jiyaniijianucuaari na pueya poonitijioquiaa juhua tama na seyajaaja. Mijiria camarucuaari taraatia miiquiaa na pueya, nojori na miitishacari puetunu na panishanojuanaa. <sup>26</sup> Niajanija saniniuuja, majaari naa nia quiniu quiniutianija. Naacuajitij, cante tojishano pueyano quiniu paniya niajanijajinijinioni, cuno cuaara quiiria narta Pueyaso pueya cumaquinia. <sup>27</sup> Cante nia jiyaniijia quiniu paniyani, cuno cuaara quiiria juhua nia seru, maninia na miiniuria niajanija, naatej, taa cua miiquiaa niajanijyacuaani. <sup>28</sup> Janiya cutaraari Jiyaniijiani. Naajaa, majaari mijiria cua ninu quiquiaari pueya cua poonitijionura quiria, shuquiriaatia cua quiniuria tamajaaja. Niqiaari cutaranijia pueya cua naacunura, tama janiyajaaja mosaanura pueya niti, queraatia pueyacuaji cua ritianura Sesaaca.

*Jesu jeeacasari caapiqui cariojuaru namijiaa*

(Mr 10.46-52; Lc 18.35-43)

<sup>29</sup> Jesuta canaa quiasacari Jerico tiacajiniji, jyanohua queraatia pueyari Jesu nuhua-jiriquiaa. <sup>30</sup> Jiyacaritij, caapiqui cariojuaruuri nuu shuucuaji cajituriquiaa. Nojori niishishacari Jesuuri nojori tajiriquiaa, nojoriiri nacanun coteequiaari:

—Jiyaniijianaa! ¡Canaacua quia taraajere! Quiaacuajaari Pueyaso Jiyarosano, Jiyaniijia quia quiniuria pa supuetanaa jiyaniijia David niti.

<sup>31</sup> Pueyari nojori juaarii nojori sanaajetanura juucua. Nojoriiri saaja jiyacatequee nacanura:

—Jiyaniijianaa, canaacua quia taraajere, Pueyaso Jiyarosano!

<sup>32</sup> Jesuuri socua nujuasee. Nojori sequereeri:

—¡Miji! ¿Casaa nia paniya cua miiniuria niajanijarani?

<sup>33</sup> Jesu riucaatureeri:

—Jiyaniijianaa, canaa namijiaa quia jeecare!

<sup>34</sup> Jesuuri nojoriicua taraajere. Nojori namijiaa quiareeri. ¡Nojoriiri niquijacara quiqui! Na nuhuaji, Jesuucua sacuaaree canaataari.

## 21

*Jesu tiuquishacari Jerusalén tiacajinia*

(Mr 11.1-11; Lc 19.28-40; Jn 12.12-19)

<sup>1</sup> Canaa quiojosacari, canaari socua tiuquijiose Betfagé tiacajiniani, Olivo nacuhua tuhuananu shuriucua. Cuniqiji, majaari puera tucuacaanu quiquiaari Jerusalén tiacajiniara. Jiyacaritij, Jesuuri caapiqui canaa na pueyajinijinio sequequiaari:

<sup>2</sup> —Cuno tiacajinia nia quiaare, noj pocuaji niqushiyatej. Niaari ti riuritanutaniya niqiuojuaraca burro morotasano. Niocua na samaacartasee. Niocua miji na jaatucuyarohuanoj, necojuataja. <sup>3</sup> Pueya jaara nia tenujunu paniri nocuaji, niocua na sequere: “Jiyaniijia na paniya. Ritia na tacatonutanihuacuaja”.

<sup>4</sup> Naa tohuateequiaariiri tariucuacaanu Pueyaso sequesano caminiujjunia sequesano, nojuaja jaara naa naajiotaquiaari Jerusalén tiacajinia quiniaa pueyara:

<sup>5</sup> “Sión tiacajinia quiniaa pueya nia sequere: ‘Nia niquiri! Nia Jiyaniijiaari burrojinia niaacua niya. Maninia pueyanoori, juayashijia. Burro nijinia cajiyano, necojuaacuanio’”.

<sup>6</sup> Jiyacaritij, cuarta Jesu pueyari quiaquiaari. Nojoriiri naa miiquiaari taa Jesu sequeriaari nojoricuajani. <sup>7</sup> Nocua jaatucutuquiaariuhua burroori, necojuataja. Na nuhuaji,

Jesu cajijiara, canaari canaa tucuaque toqueya niojoquiaari burro nijiniani, necojua nijiniano. Na nuhuaji, Jesuuri na nijinia cajirii. <sup>8</sup> Jiyanohua queraatia pueyari tii quiriqiaa. Nojoriiri na tucuaque toqueya muejoquiaari nucuaco Jesuucuaaji. Tamasacaari jaamasucua piyotaquiaari Jesuucuaaji niojotasocoriquiano nucuaco, nuu niquishaanura shanohua, juhua cutara jiyaniijiaacuaaji maniniushitishano. <sup>9</sup> Jesu puetanaa, mariyata na nuhuaji nijionaajuhuaaj, nojoriiri naa coteequiaari nacojonura: “¡Pueyanaa, nioori pocuaji Tacuna! ¡Nojuacuajaari pa Jiyaniijia, pa supuetanaa jiyaniijia David niti! ¡Cuaara quiriia shuquiriaatia pa Pueyaso jiyarosano! ¡Jiyanohua maniniaari pa Pueyaso! ¡Cuaara shuquiritasano quiriia!”

<sup>10</sup> Jesu tiuquishacari Jerusalén tiacajinia, puetunu tii quiniaa pueyajanaari jiuujiatecogiaari. Sequetureeri:

—¿Cantejaara cunoni, tiuquiyani?

<sup>11</sup> Jesuta tiuquijiaari nojori riucaaree:

—Nojuacuajaari Jesu, Pueyaso sequenu panishano caminiujunia, Nazaret tiacajinijinio pueyano, Galilea jiyajinijinio.

*Jesu jaacasacari seya niquitiojanaa Pueyaso Secojoja tiacariji*

*(Mr 11.15-19; Lc 19.45-48; Jn 2.13-22)*

<sup>12</sup> Na nuhuaji, Jesuuri Pueyaso Secojoja tiacari matacajinia tiuquiquiaari. Tii pueya niquishiiri seya niquitiojiano. Jesuuri puetunu nojorijianaa tohuatanijoree. Cumaneeca tacatojojuaca juhuacutucua caponeetareeri, tee pueya niquitiojoriquiaa taucuaa cumaneeca, Pueyaso Secojoja tiajinia niquitiosocoriquiano cumaneecaracuaajani. Mococoonu niquitiojanaa cajitucua caponeetareejaariuhuaaj, tee mococoonu niquitiojosaariquiaacuaajani Pueyasoocuaa catijasocoriquiano. <sup>13</sup> Jesuuri nojori sequere:

—Pueyaso sequesanoocuaajaari naa naajitosaquiaari tarijia:

“Cua quiqioori sesojosaanutaniya Pueyaso Secojoja tia”.

¡Niaari saniniuuja na jiyatecanu nohuasenujuaca quiqiora!

<sup>14</sup> Secojoja tiajinia na quishacarijia, cariyouarujuri pueya, mariyata shipiiniquijuniaa pueyari nocua nijioquiaari. Jesuuri nojori naatanijoree. <sup>15</sup> Pueyacuara secोजना jiyaniijanucuaari Moisés Naajioneejiniji niishitiojanaa Jesu shootiariquiaa cusosuhua naatanijiano. Jiyacaritij, naatujooriiri Secojoja tiajinia naa nacooriquiaa Jesujiniji: “¡Pa supuetanaa jiyaniijia David niquiohuacuajinijo supueno pueyano! ¡Nojuajaari pa Jiyaniijia!” Canaa Judocuaca jiyaniijanucua niquishacari naa Jesu miishanotej, mariyata nojori tojishacari naatujoori, nojoriiri juaaquioree. <sup>16</sup> Nojoriiri Jesu nequesotaree:

—¿Quiaate naatujoori tojiya casaa nojori sequeyani? ¡Nojoriiri jiyaniya quiaari Pueyaso Jiyarosano!

Jesuuri nojori riucaaree:

—¡Taaquiriiriniji! Na tojiyacuajani. Maniacuaajaari nojori sequesano. ¿Majateeri nia serojonu quiquiaacuaaja tariucuaaanu Pueyaso Rupaajinia naa sequesanojetej:

“Quiaari naatujoori niishitirii conaajanio, seetanujuanaa nojori maniniuhuaqueetanura quia Jiyarosano”?

<sup>17</sup> Naa nojori na sequenu nuhuajitij, Jesuuri nojori tiujiaquee. Jerusalén tiacajiniji quiaqueeri canaata Betania tiacajinia. Canaari tii maqueseeni.

*Jesu sesacasacari higo naana, muetuhuo na quiniuuca*

*(Mr 11.12-14, 20-26)*

<sup>18</sup> Tariquicuaji, Jesuuri Jerusalén tiacajiniara tacateriquiohua canaa na saquiriojosano pueyata. Jesuuri miaajeriquiaa. <sup>19</sup> Higo naana niquiriiri nuu shuriucua nujuaano. Nocua canujiyareeri. Shaanooi quiriqiaa, saa na jaamasucuaaja. Cunora, Jesuuri naana sequere:

—Majaari socua quia jajau sanishaanu quiniutianiya.

¡Naanaari ritia sorequee! <sup>20</sup> Naa canaa niquishacaritij, canaari jiuujiatereeni. Canaari Jesu nequesotareeni:

—¿Taateni? ¿Casaara higo naana sorequee ritiani?

<sup>21</sup> Jesuuri canaa riucaaree:

—Seetanujuanaa nia sequeyanijia, niaa jaara Pueyasoocua tiuujiaa quiri nioojia nia niquijioteyaquiniutia nocuaji, niaa maara socua cutara miishano miiri, socua jiyajeneta cua miishanojiniji. Naacuajitij, niaa maara nia sequesano niquiri niaa jaara nio tuhuananu sequere: “Quia jaataare shoniniacu caminiajinia”. <sup>22</sup> Puetunujuanaa nia masesano nia secosacari Pueyaso, niaa jaara seetanujuanaa nocua tiuuri, niaari nia masesano masenutaniya.

*Judiocuaca jiyaniijanucua nequesoreesacari Jesu, cante na jiyaronani*

*(Mr 11.27-33; Lc 20.1-8)*

<sup>23</sup> Jesuuri Pueyaso Secojoua tiajinia tiuquiquaari. Tii pueya niishitiojoriuuaari. Jiyacaritij, canaa Judiocuaca jiyaniijianucuaari nocua catecanoquuaari. Nojoriiri pueyacuara secojonaa jiyaniijianucuaa quiquiaari, canaa Judiocuaca camarucuanio. Nojoriiri Jesu nequesotaree:

—¿Canteeri quiajaniani, naa quia miiniuriatej? ¿Canteeri quia jiyatecanu juhua canaa jiyaniijia quia quiniuriani?

<sup>24</sup> Jesuuri nojori sequeree saniniuuja:

—Janiyari nia nequesotanutaniya saniniunijia. Naa jaara cua riuquare, janiyacia nia sequerohua saniniunijia cante cua jiyaroquuaari naa cua miiniuriani. <sup>25</sup> Naacuajitij, cua riuquare coteenu. ¿Cante Tiuquinijiona Juan jiyaroquuaari pueya na tiuquinijionurani? ¿Pueyasotee? ¿Tama pueyajaaja soj?

Jiyacaritij, tama nojoriijaarijia juayonuutunu coteequaari jiyasohuaja. Tama seque-tooreejaarijia:

—Paa jaara na riuquareni: “Pueyaso na jiyaroquuaari”, pa sequerucua: “¿Naatee? ¿Casaara na niishitiojosanoocua nia tiuyaquiuanucuaaraarini?” <sup>26</sup> Saniniuuja, paa jaara sequereni: “Nojuajaari nareja pueya jiyarosano quiquiaari”, ipueereeta quiniutianiyari pajaniyara! Paacuajaari niishiyani puetunu pueyajanaari sequequiaa Tiuquinijiona Juanna seetanujuanaa Pueyaso sequesano caminiujunua quiquiaari.

<sup>27</sup> Naaratej canaa Judiocuaca jiyaniijianucuaari Jesu riuquare:

—Maja canaa niishiniu canariquitijia na jiyaroquuaaritijiaj.

Jesuuri nojori sequeree:

—Janiyajuhuj, majaari cua sequenu quiniutianiya niajaninya cante cua Jiyaronani, naa cua miiniuriatej.

*Jesu pahuatasano pueyano niquiohuajiniji*

<sup>28</sup> Jesuuri naa nojori sequerohuacuahuaj:

—¡Cua tojitiare! Tamonu pueyanoori caapiqui niyanuraca quiquiaari. Nojuajaari jiyapueranu jiyaroree: “Quiyanunaa, quiria quia poonijiosee uva cuhuariquiajinia quiarijia”. <sup>29</sup> Neyanuuri saaja na riuquaree: “Maja cua quianu paniniu”. Na nuhuaji, niishiriojorohuari. Quiaqueeri. Poonijioseeeri. <sup>30</sup> Na queeri naa na nuhuajishana sequereehujhuaj. Neyanuuri na riuquaree: “Maniniacuaja, cua quenaa. Janiya quianutaniyani”. Na nuhuaji, majaari na quianu quiquiaari saaja. <sup>31</sup> ¿Taa nia sequeyani pueyanaa? ¿Teyano cuno caapiqui necohuajinijiniote na que tojijia quiquiaarini?

Nojoriiri Jesu riuquaree:

—Na jiyapueranucuaaja.

Naaratej, Jesuuri nojori sequeree:

—Seetanujuanaa nia sequeyanijia. Cumaneeca masejonaa pa pueyajiniji Roma tia-cajinia quijia jiyaniijiarani, mariyata paanatujurinio, cuno nia soosano pueyari nia shocotanutaniya Pueyaso muerasura nojori quiniuria. <sup>32</sup> Cua tojitiare casaara naa cua sequeree niajaniani. Tiuquinijiona Juanri niquiaari na niishitiojonura juucua niajaninya, maninia nia quiniuria Pueyaso niquiara. Majaari nia tiuuniu quiquianu nocua. Niaari saaja na tojijaquiquianu. Cumaneeca masejonaa nia soosano pueya cutaraari nocua tiu-uquianu, paanatujurinio. Nojoriiri na tojitiajara quiquianu. Niacuajaari na niquiquianu taa cuno sesa miijia pueya maninia pueyara jatacanuni. ¡Niajaniyarijijataj, majaari nia tacatonu quiquianu nioojia sesa nia quiniujiniji! Niaari saaja Tiuquinijiona Juancua tiuyashijia quiquianu.

*Jesu niishitiojosano cuhuariquia cojuanaa sesa miijiacajiniji*

(Mr 12.1-12; Lc 20.9-19)

<sup>33</sup> Socua tamonu cua pahuatasano nia tojiri. Tamonu pueyanoori cuhuariquiajinia uva natoquuaari. Maninia matacoquuaari puetunu na shuriquicojuanaari maja casaa tiuquitianura nocua. Saajia quejaquuaarijiaarihuaj uva rapijiojuara, na caaca rerate-saanura. Jiyaconajara tiaquuaarijiaarihuaj, cojuana niquijijara tiji nohuasejojuaacuaji. Na nuhuaji, na camaruuri tamasaca pueya niquitioquuaari na cuhuariquia, nera nojori cojuasocoriquiano. Na nuhuaji, na camaruuri tucuaaanu quiaquuaari pueyaracaanu camueenujuna. <sup>34</sup> Jaara tari quiquiaari uva carojotasacari, saniya cuhuariquia camarujuanaari na seya jiyaramiquiquaari na cuhuariquia cojuanaa pueyacia. Nojori jiyaramiquiquaariiri nojori masenura cuhuariquia cojuanaa carojotasanojiniji, taa nojori pocoojoquuaari taricuajani. <sup>35</sup> Cuhariquia cojuanaari cuhuariquia camarujuanaa jiyaramiquishano seya quiooree. Niquiriyatu majacatureeri. Tamonu moturee cutaraari. Tamonu jacaturee saitiaari. <sup>36</sup> Na nuhuaji, na camaruuri socua queraatia seya jiyaramiquiquaarihuaj. Nojoriiri naquiya miishaaquuaarijijuhuj.

<sup>37</sup> Na nuhuaji, na camarujuanaari tama sequereeaaja: “Jiyaroreera cua niyanu. Maja cutara nojori rerequetenu quiniutianiya cua niyanu”. <sup>38</sup> Cuhuariquia cojuanaa jaara niqiquiaari camarnjuanaa niyanu nojoriicua niyano, nojoriiri tama sequetooreeaaja: “¡Cunocuaqui cuhuariquia camaru quiriquiano na que niti, na que jaara shaajeeque! ¡Pa morej! Naacuaajtij, pocua nio cuhuariquia camaruhuaa quiquini”. <sup>39</sup> Naaratej, camar-njuanaa niyanu tiuquishacari, cuhuariquia cojuanaari na quiaree. Na jaatucutireeri cuhuariquiajiniji tamama. ¡Cuniqui na motureeri!

<sup>40</sup> Naa Jesu pohuatanu nuhuajtij, nojuajaari cuno canaa Judiocuaca camarucua neque-sotaree:

—¿Taa nia sequeyani pueyanaa? Cuhuariquia camaru jaara tiuquiriohua na cuhuariquiajinia, ¿taa na miiniutianiya cuno cuhuariquia cojuanaani?

<sup>41</sup> Jesu tojtianaari na riucaaturee:

—¡Cuno cuhuariquia camaruuri nojori puecoonutaniya, nojoriicua na taraajeyaquiniutia! Na nuhuaji, tamasaca pueya sequenutaniya cutaraari, nojori cojuanura nera na cuhuariquia. Nojori cutaraari cuhuariquia camaru panishano niqutionutaniya nojori carojotasanojiniji.

<sup>42</sup> Jesuuri nojori sequeree:

—Jaa, naa miiniutianiya. ¿Majate nia serojonu quiquiaaricuaa nio, tariucuaaanu Pueyaso Rupaajiniani?:

“Pueyari saitia tiariquiaa. Nojoriiri tamonu saajia jiyaniquiaari saajia sesarujuajau naasucua. Cuno saajiacuaajaari socua panishano saajia quiquiaari. Jiyaniijajanaari naa na jiyatequiaari. Cuno saajiata tiaree maninia cutaraari. Pueya niquishacari, jiuujatecoreeri”.

Naa naajiotasano quiyacuajaari.

<sup>43</sup> Camarucuanaa, nocuaji nia numooteyanijia, Pueyasoori nia ruuretanutaniya maja tari nia quiniuria na muerasu jitianaa. Tamasaca pueyari nia niti jiyatesaanutaniya cutara, nojori jitianura maninia Pueyaso muerasurano. Nojoriiri maninia Pueyaso tojtianaa quiniutianiya cutara, Pueyaso muerasu canenura jiyanohua nera, juhua cuhuariquiajiniji senoosano queraatia. <sup>44</sup> Cuno saajiainiji saniniuujia, pueyano jaara cuno saajiaaacya tiyare, nojuajaari juhua rashiquijiniutianiya. Cuno saajia jaara tiyare pueyanocua, jacaanura na miiniutianiya.

<sup>45</sup> Pueyacuara secojonaa jiyaniijianucua, mariyata Fariseocuaca tojtiasacari naa Jesu pohuatasantej, nojoriiri niishiquii Jesuuri nojoriiniji pohuatariquiaa miriqui.

<sup>46</sup> Naaratej, nojoriiri Jesu quianu panirii juucua, nojori juaanutia. Nojoriiri saaja pueriquiaa pueya. Pueyacuajaari sequeriquiaa Jesuuri seetanujuanaa Pueyaso sequenu panishano caminiuujunia quiquiaari. Naaratej, jiyaniijianucuaari jiyamitia puerecoriquiaa Jesu nojori quianura.

## 22

### *Jesu pohuatasano miriqui camishacari queranacunuujini*

*(Lc 14.15-24)*

<sup>1</sup> Na nuhuaji, Jesuuri socua niishitiojoquiaari miriqui pohuatasanta. Naa pohu-ataquiaaritiaj:

<sup>2</sup> —Pueyasoori pueya masuya nojoritia na quiniuria shuquiriaatia, taa tamonu cutara jiyaniijia miqiquiaari mijiriacaani. Cuno jiyaniijiaari shuquiriaatia quiniu paniriquiaa queraatia pueyata, neyanu camishacari. Naaratej, jiyaniijiaari queraatia sumatutequiaari, queraatia pueya miaquesocoriquiano. <sup>3</sup> Na nuhuaji, na seya jiyaramiquiriiri na masuusano pueya numootenura nojori niniuria queranacunura. Masuusano pueyari maja na niniu paniniu quiquiaari saaja. <sup>4</sup> Jiyaniijiaari socua tamasaca na seya sequere: “Cua masuusano pueya nia numotejocoo. Nia sequesee: ‘Jiyaniijia nia sashiya. Puetunujuanaari tari jeenucuasano nia queranacunura. Tari puecoosaaree na juyaca, na shiyoshitishano seyano. Tariucua rariyosanoori quiya. Ritia nia nimia. Nia miaquenuusee’”. Naa na seya na rootanu nuhuajtij, jiyaniijiaari nojori jiyaramiquiriiri. <sup>5</sup> Masuusano pueyari saaja tojtiaaquirii. Puetunujuanaari tama na panishanojuaja miiriquiaa saaja. Tamonuuri na cuhuariquiajinia quiaaree. Tamonuuri na casami niqutiojosaqui quiaareecujua. <sup>6</sup> Tamasacaari saniniuujia jiyaniijia seya quiooree. Jiyanohua naquiya nojori miiriiri. Na nuhuaji, nojori puecootureeri. <sup>7</sup> Jiyaniijia niishishacari, jiyanohua juaariiri. Nocuaji na soldadohua jiyaramiquiriiri cuno monaa nojori naminiuria saniniuujia, nojori tiaca na catijiatanurajuhua. <sup>8</sup> Na nuhuaji, jiyaniijiaari na seya sequere: “Puetunujuanaari tari jeenucuasano pa queranacunura cua niyanu camishacari. Cua masuusano pueyacuajaari saaja cua ruuretareeni. Namitia majaari nojori nijionu quimaa, saaja cua rerequetajaca

nojori quiniuucua. <sup>9</sup> Quiarijia cutara, nia quiaare nuu tunequetajajinia, tee queraatia pueya tajiniuucuaatquiaacuajani. Nia masuure puetunu nia niquishano pueyajanaa”.

<sup>10</sup> “Na seyari quiojoquiaari tiaca nucuaco. Nojoriiri puetunu na riuriatasano pueyajanaa rerejoteree, maninia pueya, sesa pueyanio. Queranacunuusaquuiri mishiquiaari masuusano pueyata. Camarnu seyari puetunu pueyajanaa cushiyotequiaari camishacari cushiyosano toqueya, nojori tiuquitiasacari tiaco queranacunura.

<sup>11</sup> “Na nuhuaji, jiyaniijiajanaari tiuquiquiaari masuusano pueya na niquniuria. Tamonu pueyano niquishiiri camishacari cushiyosano toqueeju. <sup>12</sup> Jiyaniijiaari na sequeree: “Pueyanonaa, ¿taa quia tiuquimiaa camishacari cushishano toqueejuni?” Pueyanoori sanaa na tojiriquiaa. Majaari na riucuanu quirii. <sup>13</sup> Cunora, jiyaniijiaari na seya sequeree: “¡Nia morojore na cashacucua, na numatucuanio! ¡Niocua na jartarohua carijiniacuma ninishiqui! Tii sapuenutaniyari. Na quiaa miaquenutaniyajaariuhua na noonuta, naquiya na miishacari”.

<sup>14</sup> “Naajuhua pueyanaa, Pueyasoori queraatia pueya masuya quiarijia na muerasu nojori quiniuria. Saniniuujia, secajaari saquiriojsaanutaniya nojorijiniinio seetanjuanaa na muerasura nojori quiniuria.

*Jiya jiyaniijia cuaara niquitiojsaaria na sequesano cumaneeca*

*(Mr 12.13-17; Lc 20.20-26)*

<sup>15</sup> Na nuhuaji, Fariseocuacaari quiojoquiaari Jesu shuriucuaaji tama nojori niishitiojotoonurajaaja. Nojoriiri Jesu pocuatenu paniquiaari sesa juucua, nocuara nojori saquiriojotanura. <sup>16</sup> Na nuhuaji, Fariseocuacaari na niishitiojosano pueya jiyaramiquirii Jesuucua, jiyaniijia Herodes panijaca pueyata. Herodesri jiyaniijia César jiyatesano quiquiaari Judea jiyajinia jiyaniijia na quiniuria. Fariseocuaca jiyaramiquishano pueyari Jesu sequese:

–Niishitiojonanaa, canaari niishiyani quiaari maninia pueyano. Majaari quia cuaracashijonu. Quiaari seetanjuanaa casaa niishitiojoquiaa cutara taate canaa naata maninia quiniu Pueyaso niquiarani. Majaari quia puerenu quiquiaa, pueya niquiara quia pohuatunura quia niishishano. Majaari rimiajata quia niquniu pueya. <sup>17</sup> Naaratej, canaa quia sequere taa canaa miiniutianiyani. Paari sequesaaquiaarini pa cumaneeca pa niquitiojonura jiyaniijiajanaa Césarra, taa cuno tahue César sequequiaaricuajani. Quiajanitariuhua, ¿taa quia sequeya saniniunijia?

<sup>18</sup> Jesuuri ritia niishiquii, nojoriiri naa na nequesotariquiaa na sapojonuta. Nocuaaji nojori sequereeri:

–Sapueno maninia quijiacanaa, ¿casaara nia saniniujiya naa janiyani? <sup>19</sup> Cua niquitiri nia cumaneetoj, cuno, jiyaniijia César sequesano pa niquitiojonura nojuajani.

Nojoriiri Jesu niquitirii cumanee. <sup>20</sup> Jesu niquishacari cuno cumanee, nojori nequesotareeri:

–¿Cana naaquiti nio nocuani? ¿Cana sesate nocua naajiotasanojanihuaj?

<sup>21</sup> Nojoriiri na riucaree:

–Jiyaniijia César naaquicuaaja, na sesajuhua.

Jesuuri nojori sequeree:

–Jaara naa quiritij, César nia niquitiojore tama na casaajaaja. Nojuacuajaari na camaru. Saniniuujia, Pueyaso nia niquitiojore nerano tama na casaajaaja. Nojuaja cutaraari pa camarnu.

<sup>22</sup> Nojori tojishacari naa Jesu sequesanotej, jiuujiatecoreeri. Na tarinitiatoreeri. Quiojiyaruahuari.

*¿Macunucuate samiitiaconutaniuhua?*

*(Mr 12.18-27; Lc 20.27-40)*

<sup>23</sup> Cuno juucaja, Saduceocuacaari Jesuucua nijioquiaari. Nojoriiri jiyaniquiaari macunucua maja na samiitiaconu quiniutianihuua. Naaratej, nojoriiri Jesu sequese:

<sup>24</sup> –Niishitiojonanaa, supuetana Moisésri pa sequequiaari na naajiotasanojinia, pueyano jaara cusoyare mueyaju, na tarajanu cuaara camiiria mashiquio, mueya na mueratenura tarajanu niti. <sup>25</sup> Tarijia, tamonu pueyanoori niya quiquiaari. Siete niquiohuaraca quiquiaariiri, saa canuuja. Jiyapueranuuri camiquiaari. Na nuhuaji, shaajequiaariiri muetuhuojuua. Naaratej, na mashiquioori camitishaaquiaari neyaca tarajanuta. <sup>26</sup> Nojuajaari muetuhuojuua shaajequiaarijihuua. Naaratej, neyaca tarajanuuri mashiquio camiquiaarijihuua. Nojuajaari mueyaju cusoquiaarijihuua. Naa cusunuuquiaariiri puetunu cuno siete canuujuanaa. <sup>27</sup> Na nuhuaji, mashiquioori cusoquiaarijihuua. <sup>28</sup> Saniniuujia, macunucua jaara samiitacorohua, ¿teyano cuno siete neyacaajiniote seetanu neyacajanaa quiniutianiyani, puetunu cuno pojorijianaa jaara neyaca quiquiaari?

<sup>29</sup> Jesuuri nojori riucaaree:

—iNiaari jiyanhua jiyajeneya nia niishiyaquishacari Pueyaso Rupaajinia naajiotasano, Pueyaso cumaacanio! <sup>30</sup> Macunucua samiitacosacariuhua, majaari canuu camiyonu quiniutianiya maaji. Naajuhua, maajipohuari maja na camiyonu quiniutianiya neyacaara. Caya, maajinio, nojoriiri juhujaniya quijiaca quiniutianiya juhua jiyocuaaanu quijiaca Pueyaso seya, maja camiyosano. <sup>31</sup> Socua cua tojitiare. Macunucuaari seetanujuanaa samiitacoriqianohua. ¿Majateeri nia serojonu quiquiaacuaja taa Pueyaso sequequiaari niajanियacuajani? Naa sequequiaariiri:

<sup>32</sup> “Janiyari nia supuetana Abraham Jiyaniijiani, nia supuetana Isaac Jiyaniijajuhua, nia supuetana Jacobo Jiyaniijianio”.

Naaratej, nia sequeyanijia, Pueyaso muerasu shaajecononi, nojoriiri maja macunucua na quiniu. Canapuate seetanujuanaa Pueyaso muerasuni, nojori cutaraari pueyaracaanu quijiaca.

<sup>33</sup> Pueya tojishacari naa Jesu niishitiojosanotej, nojoriiri jiyanhua jiuujiateree.

*Puetunu Pueyaso rootasanojinijianaani, teyanote socua na pueya tojishocoriqianoni (Mr 12.28-34)*

<sup>34</sup> Fariseocuaca jaara niishiquiaari Jesu Saduceocuaca sanaajaree, nojoriiri Jesucua nijoquiaari nojori saniniujuniuria nojuaja, nojori nequesoreenuta. <sup>35</sup> Nojoriiri jaarajaaja Jesu pocuatenu paniri quiaa sesa juucua. Tamonu nojoriinjiniioori Moisés Rootasanojiniji niishitiojona quiquiaari. Na saniniujuniuria, nojuajaari Jesu nequesotaree:

<sup>36</sup> —Niishitiojonanaa, ¿Pueyaso rootasanojinijini, teyanote socua pa tojishocoriqianoni?

<sup>37</sup> Jesuuri na riucaaree:

—Naa naajiosano quiyacuajaari:

“Quia Jiyaniijia Pueyaso quia paniri puetunu quioojitajanaa, puetunu quia sohuanutajanaa, puetunu quia niishitijatajanaanio”.

<sup>38</sup> Niocuaajaari socua na pueya tojishocoriqiano Pueyaso rootasano. <sup>39</sup> Tamonu na sequesanoori quera juhua niojuhuaj. Naa sequeyari:

“Quiarta pueyano quia paniri taa quia paniyacuaa tama quia cuaqueyajaajani”.

<sup>40</sup> Puetunu Moisés rootasanojuanaa, mariyata puetunu tariucuaaanu Pueyaso sequesano caminiujuniana rootasanojuanaari nio caapiqui rootasanojinijicuaa.

*¿Cante Cristo supuetanani?*

*(Mr 12.35-37; Lc 20.41-44)*

<sup>41</sup> Fariseocuaca quishacarijia cuniqui, Jesuuri nojori nequesotaree:

<sup>42</sup> —¿Taa nia niishiriojiya Cristojinijini? ¿Cante na supuetanani?

Nojoriiri Jesu riucaaree:

—Pa jiyaniijiarano Cristoni, nojuajaari pa supuetana David niqiohuacuajinio supuentaniya.

<sup>43</sup> Jesuuri nojori sequerohuacuahuaj:

—Taaquiririni. Jaara naa quiririti, ¿niaateeri niishiyacuaja casaara David sequequiaari “cua Jiyaniijata” Cristocuaarini, Pueyaso Sohuanu jaara na pocuatequiaari? Naa sequequiaariiri:

<sup>44</sup> “Jiyaniijia Pueyasoori cua Jiyaniijia Cristo sequequiaari: ‘Cua miaquetajara quia cajirijaara, janiya cuara quia paraa shocojotare quiocuajijiatijia’”.

<sup>45</sup> ¿Cristotucua taa David niqiohuacuaji supuereni, David jaara Cristo jiyaniquiya na jiyaniijata?

<sup>46</sup> Nojoriiri Jesu niqitiaree sanaa. Nojoriiri maja na naata na riucuanu quiquiaari. Cuno nuhuaji, pueyari maja socua na nequesoreenu paniniu quiquiaari Jesu.

## 23

*Jesu juaashacari Fariseocuaca, Moisés Rootasano niishitiojonaanio*

*(Mr 12.38-40; Lc 11.37-54; 20.45-47)*

<sup>1</sup> Na nuhuaji, Jesuuri tii quiniaa pueya sequeree, canaa na saquiriojosano pueyano:

<sup>2</sup> —Moisés Rootasanojiniji niishitiojonaa, mariyata Fariseocuacaari supuetana Moisés niti quiya, tariucuaaanu Pueyaso Rupaa nojori niishitiojonura. <sup>3</sup> Naaratej, nia tojitiare puetunu nojori sequesanojuanaa niajaninya. Saniniujia, maja cutaraari nia miiniu taa nojori miiquiaacuani. Nojoriiri najuhua niishitiojocuaa taa pueya miiniutianiya. Majaari saniniujia nojori miiniu tama nojori niishitiojosanojuaja. <sup>4</sup> Nojoriiri tama nojori niishishanojuaja rootaquiaa, maja saaja tariucuaaanu Pueyaso niishitiojosano pa supuetanaa. Nojori rootasano pueya miishocoriqianoni, cunoori juhua jiyanhua niiquiaa casaa pueya nitasocoriqiano. Nojoriiri maja quenaaja na naacutanu quiquiaa na juaashiquia sacasaruta. <sup>5</sup> Nojoriiri puetunu na miishanojuanaa miiquiaa saaja pueya

niquishocoriquiano, pueya shuquiritianura nojori. Nojoriiri Pueyaso Rupaajiniji naajio-tasano cushitiaquiaa na jiniji morotasano, na numatucuaacuanio. Nojoriiri naa miiquiaa taa pa supuetanaa miiquiaaricuaani. Saniniuujia, nojoriiri najuhuaana socua puereetucara na quiqhuora cusupuequiaa pueya shootiasocoriquiano. Naajuhuaaj, nojoriiri na toqueecuaji sohuatacojua tunujutaquiaa taa pa supuetanaa Pueyaso tojtiaajaca mi-quiaaricuaani. Saniniuujia, nojoriiri puera tucuaacujara na tunujutaquiaa saaja pueya niquishocoriquiano, pueya shootianura nojori. <sup>6</sup>Nojori jaara masuusaare tamonu tiajinia queranacunura, nojoriiri secooquiaa socua panishano cajitijunia nojori cajitiumiuria tia camaru shuriucua. Naajuhuaaj, Pueyaso secojojua tiacajinia pueya rerejosacari, nojoriiri cajitiumiuria camarucua cajitucuaajinia pueya shootianura nojori. <sup>7</sup>Nojori ru-cuanejosacari tiacajinia, nojoriiri paniquiaa pueya saruhuanura nojori. Panitiquiaa-jaariuhua pueya jiyaniquinuria nojori "niishitiojonaata".

<sup>8</sup>'Niajaniya saniniuujia cua pueyanaa, majaari pueya shanacunu niaacua, nojori jiyaniquinuria njajaniya "niishitiojonaata". Niajaniya cutaraari niquiriyatujua Niishitio-jonaraca. Puetunu njajaniyajanaari niarta Pueyaso pueya tapueyocua. <sup>9</sup>Naajuhuaaj, majaari tamonu pueyano mijiria nia jiyaniquinu "cua queta". Niaacuajaari niquiriyatu Queraca. Nojuajaari jiyocuaaanu Quinia. <sup>10</sup>Naajuhuaaj, majaari pueya nia shanacunu niaacua, nojori jiyaniquinuria njajaniya "cua jiyanijata". Niaari niquiriyatujua Jiyaniijiaracacuaaja. Nojuacuajaari Pueyaso jiyarosano nia Jiyaniijiaranonii. <sup>11</sup>Cante jiyaniijiajanaa cutara njajaniyajinijinioni, cuno cuaara jiyateera tama na cuaqueyajaaja nia cumaquinia na quiniuria. <sup>12</sup>Cante tama na cuaqueyajaaja jiyateja pueya shototaja na quiniuriani, narta pueya jiyaramojujia na quiniuriajuhuaaj, jiyano pueyano cutaraari cararosaanutaniya. Cante saniniuujia juhua narta pueya serura jiyateja tama na cuaqueyajaajani, cunoori jiyaniijara jiyatesaanutaniya cutara.

<sup>13</sup>'Cua tojtitiare, Moisés Rootasanojiniji niishitiojonaanaa, njajaniya Fariseocacajuhuaaj, niaari cocuaatia miiquiaa! ¡Niaari sapuenu juhua maninia quijiaa niquishano! Niaari pueya tarinitiaaquiquiaa nojori rupenura Pueyaso. Niaari maja nia tiuuniu Pueya-soocua. Naajuhuaaj, majaari pueya nia tarinitianu nojori tiuuniuria Pueyasocua, na muerasura nojori quiniuria.

<sup>14</sup>'Niaari taraatia miishaanutaniya, Moisés Rootasanojiniji niishitiojonaanaa, njajaniya Fariseocacajuhuaaj! Niaari sapuenu juhua maninia miijiaa niquishano. Niaari mashiquiopue tiaca masequiaa secaja nia cumaneecata, nia sapojonuta nojori. Naacuajitij, niaari nojori tiaca masequiaa tama njajaniyarajaaja. Naa nia miiniu nuhuajitij, niaari shitiarayocua secojoquiaa najuhuaana Pueyaso, pueya niqiuara, maninia pueya nia jiyani-shaanura. Naaratej, niaari socua jiyanojua saniitiosaanutaniya tamasa pueyajiniji.

<sup>15</sup>'Niaari puereeta miishaanutaniya Moisés Rootasanojiniji niishitiojonaanaa, njajaniyuhuaaj Fariseocacanaa! Niaari sapuenu juhua maninia miijiaa niquishano. Niaari tucuaaanu quiyacuaani, naajuhuaaj, cua shoniacu caminia taquijiriano, tamonu nia niishitiojonura najuhuaana Pueyaso tojjiara na quiniuria juucua, juhua tama njajaniya-jaaja. Nia niishitiojosano pueyano jaara nia tojjiara quiri, nojuajaari socua jiyanojua saniitiosocoriquiano quiya njajaniyajiniji, sesa nia rootasano tojjiara na quiniucua.

<sup>16</sup>'Niaari taraatia miishaanutaniya mosanucuaanaa! Niajaniyari juhua cariyojuaru, cante tamonu pueyano jaatucuya juucuaani, nuu nia niishiyaquishacari. Naacuajitij, niaari capa niishitiojoquiaa. Niaari rootaquiaa, pueyano panishacari tamonu tiuuni-uria na sequesanoocua, nojuaja cuaara sequeera: "Taa oro Pueyaso Secojojua tiajinia pueyaracaanu quiyacuaani, naajuhuaaj, cua sequesano quiajaniyari seetanujuanaa to-huateenutaniya quiara". Saniniuujia, niaari sequequiaa, Pueyaso Secojojua tiajinia oro jaara sequeyaquishaare, majaari na sequesanoocua tiuushaanu. Naacuajitij, niaari se-quequiaa, pueyano sequesanoori nareja sequesano, nojuaja jaara sequeera: "Taa Pueyaso Secojojua tia pueyaracaanu quiyacuaani, naajuhuaaj, cua sequesano quiajaniyari seetanujuanaa tohuateenutaniya quiara". Niaari sequequiaa cuno sequesanoocuaari maja tiuushaanu. <sup>17</sup>¡Mosanucuaana, niaari juhua cariyojuaru! ¿Teyanote socua pueresanoni, cuno orotee, Pueyaso Secojojua tia soj? Cuno oroori naa pueresanora jiyatesaquiiaari saaja Pueyaso Secojojua tiajinia na quiniucua. <sup>18</sup>Niaari rootaquiaajuhuaaj, pa seque-sacari parta pueyano, casaa pa miiniutianiya nerani, pocua na tiuuniuria paa cuaara sequeera naatej: "Seetanujuanaa quia sequeyanijia. Naatej, taa casaa Pueyasocuaara catijiaja juhuacutuucua niasano jiyanojua maninia quiyacuaa Pueyasoranii, naajuhuaaj, cua sequesanoori saaja maniniajuhuaaj. Majaari cua sapojonu". Naacuajitij, niaari sequequiaa, paa jaara naa sequereni, paa cuaara miiria pa sequesano. Saniniuujia, niaari sequequiaa: "Pa sequesanoori najuhuaana sequesano, paa jaara saaja Pueyasocuaara catijiaja juhuacutu sequereni. Majaari nocua tiuushaanu". <sup>19</sup>¡Cariyojuarujirinia! ¿Majateeri nia niishiniu? ¿Teyanote socua maniniani, Pueyasocuaara catijasocoriquiano casaatee,

Pueyasooacara catijiaja juhuacutu soj? Catijasocoriquiano casaari narejajuhuanajaj, jaara Pueyasooacara catijiajaacua niasoo quiyaquiri. <sup>20</sup> Naaratej, cante Pueyasooacara catijiaja sequeree seetanujuaanaani, nojuajaari maja saaja Pueyasooacara catijiaja na sequenu quirii. Nojuaja cutaraari na caco niasano sequereejuhuj. <sup>21</sup> Naajuhuj, cante Pueyaso Secojojua tia sequeree najuhuanani, cunoori maja saaja Pueyaso Secojojua tia na sequenu quirii. Nojuajaari Pueyaso sequereecujaja, Pueyaso Secojojua tia na sequesacari. ¡Pueyasocujaaari na Secojojua tiajinia quijia! <sup>22</sup> Naajuhuj, pueyano jaara sequere na sequesano seetanujuaanaa juhua jiya cajiniocua, nocua tiuushaanura, cunoori maja saaja jiya cajiniocua na sequenu quirii. ¡Pueyaso cajishaqui sequerejaariuhuj, Pueyasojuanaa sequerejaariuhuj, jiyocuaaanu casaa na sequesacari!

<sup>23</sup> ¡Niaari taraatia miishaanutaniya, Moisés Rootasanojiniji niishitiojonaanaa, niajanijayuhuj Fariseocucanaa! Niaari sapuenu juhua maninia miijiaa niquishano. Niaari Pueyaso niqutiojoquiaa maninia puetunu nio nia nataujinijijianaa, shanohua jaanujua jaamasucua, miaguesanojinia jatasano casaa: menta, anis, cominonio. Niaari jacaria serojoquiaa diez casaa puetunu cuno cien casaajinijijianaa, Pueyasora nia niqutiosocoriquiano taa supuetana Moisés sequequiaaricujajani. ¡Niaari saniniuujia socua pa tojishocoriquiano Moisés rootasano tojtiaaquiquiaa! ¡Naacuajitij, majaari maninia pueyano nia quiniu taa Moisés rootaquiaaricujajani! ¡Majaari nia taraajenu quiquiaa niarta pueyanoocua! ¡Majaari nia tiuuni Pueyasooacara! Niaari maninia niqutiojoquiaa nia nataacuacajiniji. Taa nia niqutiojoquiaa nia nataacuacajinijicuaani, jnaa nia tojtijarejuhua socua pa tojishocoriquiano rootasano Moisés Naajotasanojiniji! <sup>24</sup> Pueya nia niishitiojosacari Moisés Rootasanojiniji juucua, niari juhua cariyojuaru cante narta cariyojuaru jaatucuya juucuan. Niaari juhua tamonu pueyanojuhuj. Na ratusacari, nujuua taquirii na mashacajinijiiri. Socua na ratusacariuhua, ¡saaja cuartia miataaree juhuajaniyari!

<sup>25</sup> ¡Niaari cocuatia miiquiaa, Moisés Rootasanojiniji niishitiojonaanaa, niajanijayuhuj Fariseocucanaa! Niaari sapuenu juhua maninia miijiaa niquishano. Niaari juhua noo pueyajuhuj, cante nareja na ratujua cuaqueya jeequejoquiaani, na miacojua cuaqueyano. Na jiniacumaari saniniuujia jiyanoehua curuutuua quiyajaa. Nio miriqui cua sequesano nia niishiri. Nioojiaari naa quiyajuhuj. Niaari nohuasenuujuaa, jamuejacanio. <sup>26</sup> ¡Cariyojuaru Fariseocucanaa, nia ratujua jiniacuma nia jeequere coteenu, nia miacojua jiniacumano! Naacuajitij, na cuaqueyari maninia jeequesano quiniutianijayuhuj.

<sup>27</sup> ¡Niaari taraatia miishaanutaniya, Moisés Rootasanojiniji niishitiojonaanaa, niajanijayuhuj Fariseocucanaa! Puetunu niajanijajanaari sapuenu juhua maninia miijiaa niquishano, juhua macunucua quiquio shanohua niquishano, cohuajata noshijosano. Saniniuujia na jiniacuma quiyari sacuaraatia jaanujua pueya nucuhua mocuaca. <sup>28</sup> Niaari naajuhuj. Niaari sapuenu juhua maninia pueya niquishano. Saniniuujia nioojiaari jiyanoehua sesa, jiyanoehua sapojonu niishijia.

<sup>29</sup> ¡Niaari taraatia miishaanutaniya, Moisés Rootasanojiniji niishitiojonaanaa, niajanijayuhuj Fariseocucanaa! Niaari sapuenu juhua maninia miijiaa niquishano. Niaari macunucua nijotajara shanohua niquishano shipinijioquiaa, tariucuaaanu pueyara Pueyaso sequesano caminiujunianaa nucuhucujaj. Naajuhuj, niari tariucuaaanu Pueyaso tojtiajaca puecoosano quiquio maniniushitijiaa. <sup>30</sup> Naa nia miishacaritij, niari juhua sequequiaaruhua: “Paa jaara shipinijiosaaquiaari pa supuetanaa quishacaritij tariucuaaanuni, paa maara nojori cojiyaquiquiaari cutarani, nojori puecoosacari Pueyaso sequesano caminiujunianaa”. <sup>31</sup> Saniniuujia, naa nia sequesacaritij, niari tama niaacuara torejaacujua. Naaquii cuno tariucuaaanu Pueyaso sequesano caminiujunianaa puecoonaacujajinio supuenocujaja. <sup>32</sup> Naa Pueyaso sequesano caminiujunianaa puecoonaacujajinio supueno nia quishacaritij, Pueyaso Jiyarosano nia morejuhuj, nia tucatanura nia supuetanaa cotesano.

<sup>33</sup> ¡Sesa miijiaa pueyanaa, niari noonacuraca, juhua sacocua! ¿Niaateeri jiyaniya niari saniitioyaquishaanutaniya mani quiquiojinia nia supuetanaata? <sup>34</sup> ¡Cua tojtijare! Janiyari Pueyaso rupaa caminiujunianaa jiyaramiquiniutianiya niaacuani, Pueyaso Rupaa niishijiacajuhuj, Pueyaso rupaa niishitiojonaanio. Nojoriiri nia pohuatanutaniya Pueyasojiniji. Niaari noojiaqueya nojorijinijinio puecoonutaniya. Niaari tamasaca teetejonutaniya niyacutesanojinia nojori nia monura. Niaari tamasaca majacunutaniya Pueyaso secojojua tiacajinia. Niaari tamasaca neteyojotanutaniya puetunu tiacajinijijianaa, naquiya nia miinuria nojori. <sup>35</sup> Naaacuajaaari niishiya, coteenujuanaa mosaaquiaariiri Abel, maninia miijia pueyano. Naa puecoosaaquiaariiri queraatia Pueyaso tojtiajaca pueya. Na nuhuaji, socua jaatesaaquiaari monuuri Zacarías, Berequías niyanu. Cuno maninia pueyanoori mosaaquiaari Pueyaso Secojojua tiajinia, Pueyasooacara catijiasaqui shuriucua. Monu porocua nia quiniuucua taa nia supuetanaa quiquiaaricuaani, niari saniniuujia nocua



namishaanutaniyacuja puetunu tariucuacaanu Pueyaso tojitianaa puecoosaanuucua-janaa. <sup>36</sup> Seetanujuanaa nia sequeyanijia, nio pa quishacari pueyani, nojoriiri sanitiosaanutaniya puetunu cuno pueya puecoosaanuucujanaa.

*Jesu nujuquesacari Jerusalén tiacajinia quiniaa pueyacua*  
(Lc 13.34-35)

<sup>37</sup> Jerusalén tiacajinia quiniaa pueyanaa, jiyano hua taraajeya niaacuanijia! Niaari Pueyaso sequesano caminiujiunaa pueya puecoojuaca. Niaari Pueyaso jiyaramiquishano pueya jacujuaca saitia nojori pohuatunuucua Pueyaso rupaa nia niquiara juucua. Janyari cucua nia nijionura panijia juucuan tارااتيا nia miyaquishaanuucuaijia cua tacunura niaacuaji, naate taa caacaraja rijioquiaacuaa necohua na nesu cariquiacorani, na cojuanura nojori. Niaari saaja cua paniyaquijia cua cojuanura nijaniya. <sup>38</sup> Cua tojitiare. ¡Niaari nia quiqiojinijia sanaajasaanutaniya niqijijia! <sup>39</sup> Seetanujuanaa nia sequeyanijia, majaari socua nia niqiniuni quiniutianiya janiya, niaa cuaara cua tiuquishacariuhua sequerejaatijia: “Pueyaso cuaara shuquiritiiria pa Jiyaniijia quiqiuano na jiyarosano.”

## 24

*Jesu pohuatasacari, Pueyaso Secojoua tia niyartasaanutaniya*  
(Mr 13.1-2; Lc 21.5-6)

<sup>1</sup> Jesuuri Pueyaso Secojoua tiajinijia tohuataarohua. Nata canaa quiojosacari nucuaco, canaa, na saquiriojosano pueyani, canaari nocua catecanoquiaarini. Canaari Jesu niqutiriquiaa Pueyaso Secojoua tiani, shanohua niquishano tia. <sup>2</sup> Jesuuri saa canaa riucuaaree-jaa:

—Jaa, na niqiyacuajanijia. Niaa cumaati maninia na niqiyacuajia. ¡Seetanujuanaa nia sequeyanijia, cuno tia niaa na niqiyani, cunoori niyartasaanutaniya puetunujuanaa! ¡Majaari quenaaja tamonu saajia manu quiniutianiya tamonu caco!

*Taa pa niishiniutianiya quera jiya puequesacari*  
(Mr 13.3-23; Lc 21.7-24; 17.22-24)

<sup>3</sup> Na nuhuaji, canaari Olivo cuhuariquia tuhananuucua quiojoquiaarini. Jesu caji-shacari tii, canaa na saquiriojosano pueyani, canaari nocua catecanoquiaarini. Tama canaa quishacarijaaja, canaari na nequesotareeni:

—Canaa quia sequere  $\zeta$ taacari Pueyaso Secojoua tia niyartasaanutaniya? Naajuhua,  $\zeta$ taa canaa niishiniutianiyaarini taacari quia tacatenaniuhua mijiriani? Canaa quia sequerejuhuaj,  $\zeta$ taacari jiya puequenutaniya?

<sup>4</sup> Jesuuri canaa riucuaaree:

—Tama nia cuaqueyajaaja nia cojuare tamasaca mariqui nia sapojoreeri. <sup>5</sup> Queraatia saponujuacaari supenuutaniya. Nojoriiri tama na cuaqueyajaaja sequenuutaniya: “Janiyacuaaja Cristoni, Pueyaso Jiyarosano”. Naa nojori sequesacariitij, queraatia pueya saponutaniyaari. <sup>6</sup> Naajuhua, niaari pueyapue miaquetooujonujinijia tojiniiuutianiya, niya, tamonu jiyacajinianio. Niaari miaquetooujonura miananajotooujinijia tojiniiuutianiyaarijuhuaj. Niaa jaara naa tojiniiuutitij, majaari puereu. Naa quiniutianiyaari mijiria. Naajaa, juhuanojuajaari maja jiya puequesacari quiniutianiya. <sup>7</sup> Tamonu pueyari tamasaca pueyata miaquetooujonutaniya. Tamonu jiyajinijia jiyaniijiaari tamonu jiyaniijia-ata miaquetooujonutaniyaarijuhuaj. Jiyacaritij, jiyano hua miaajenuuri quiniutianiya queraatia jiyacajinia, cusunuujuhuaj. Rijiaari queraatia jiyacajinia jiuuquiuutianiyaari. <sup>8</sup> Naa naquiya miishacari mijiriatej, cunoori juhua manajaraca cotesacari noonu. Na nuhuaji, socua jiyacatenutaniyaari naquiya miishacari, mijiria cua tiuquiyacuquishacarija.

<sup>9</sup> Jiyacaritij, niaari jiya camarucua niqitiojosaanutaniya cua muerasu nia quiniuucua, naquiya nojori miitanura nijaniya. Niaari puecoosaanutaniya. Puetunu jiyacajinijinio pueyajanaari nia niqiniuni paniyaquiniutianiya, cua muerasu nia quiniuucua. <sup>10</sup> Jiyacaritij, queraatia cucua tiunuaa pueyari cucua tiunuu tarinitianutaniya nojori jaara naquiya miishaare. Nojoriiri narta Pueyaso muerasu tacartanutaniya. Majaari nojori niqiniuni paniniu quiniutianiya tarijia narta Pueyaso muerasu. <sup>11</sup> Queraatia saponujuaca Pueyaso rupaa pohuatanaari supenuutaniya. Nojoriiri queraatia pueya saponutaniya. <sup>12</sup> Jiyacaritij, sesa miiniuuri socua jiyano hua jiyacatenutaniya mijiria. Cunora, queraatia pueyari narta pueya paniniu tarinitianutaniya. <sup>13</sup> Saniniuuujia, cucua tiuuja jaara rejeretare pueyaracaanu cuno naquiya miishacari jiya cuaara puequerejaatijia, nojuaja cutaraari shacantuuca quijiara jatanishaanutaniya, pueyaracaanu na rishiniuria. <sup>14</sup> Pueyaso rupaa jaara pohuataaare janyajinijia pueyapue niquiara puetunu jiyacajinijanaa, nojori niishiniuria taate nojori naata cua muerasura quiniuni, jiyacaritij, jiyari shusha puequenutaniya cutara.

<sup>15</sup> Pueyaso sequesano caminiujiunia Danielri tariucuacaanu pohuataquiaari sacuaraatia casaanaari supenuataniya, puereeta niquishano. Cunoori Pueyaso pueya shaajariquiano. (Cante nio serojiyani, cuaara niishiiria casaa na sequeyani.) Naa jaara cuno sacuaraatia casaa niquri Pueyaso Secojojuua tiajinia nujuatesano, niocua mashiri. <sup>16</sup> Jiyacaritij, canapuate Judea jiyajinia quiyani, nojori cuaara mashiiria tuhuanuhuacua. <sup>17</sup> Canapuate na tia cacojiria quiyani, nojori cuaara tiuquiyaquiria na tiajiniaaco maja na tarishiniuria na casamiicua. <sup>18</sup> Canapuate cuhuariquiajinia quiyani, cuaara tacateyaquihuara na tiajiniohua na toqueyacua. <sup>19</sup> Jiyacaritij, jiyanohua taraatia quiniutianiyari maajipohuara, canapuate manajaatohua quiyani, mariyata canapuate supuejaca muerasu jitiiaani. <sup>20</sup> Juhuacaritia Pueyaso nia secojoriquia nia mashiycuatunu panishacari quiyaquiniuria shuniyara, samaatenu juucanio. <sup>21</sup> Cuno quishacari, jiyanohua naquiya miiniuuri quiniutianiya seetanujuanaa. Jiya coteenujiniiji, jiyano naquiya miiniuuri maja na niquishaanu quiquiaari tari. Naajuhuaaj, naa naquiya pueya miiniu nuhuajitij, majaari socua na caminiu quiniutianihua juhua nio naquiya miiniu. <sup>22</sup> Cuno naquiya miishacari jaara tajiyaquiri ritia, pueya maara cureyaquirij. Pueyaso cutaraari na tajitiniutianiya ritia, na saquiriojosano pueyacua na taraajesacari.

<sup>23</sup> Jiyacaritij, majaari nia tojiniu, tamonu jaara sequere niajaninya: “¡Cua tarajanunaa, Cristoqui tari tiuquiriohua! Niya quiyano”. Naajuhuaaj, majaari nia tojiniu tamonu jaara nia sequere: “Nooj, jati quiyatej”. <sup>24</sup> Queraatia sapojonuujuaacari supenuataniya. Nojoriiri tama na cuaqueyajaaja jiyatenutaniya juhua Pueyaso jiyarosana. Tamasacaari sequenutaniyacujua: “Janiyari Pueyaso sequenu panishano caminiujiuniani”. Nojoriiri pueya sapojonutaniya jiyajeneta nojori miishanota. Naa nojori miishacaritij, mijiria quiniaa pueyari jiyaniutianiya nojoriqui seetanujuanaa Pueyaso jiyaramiquishano. Jaara na naata quiri, Pueyaso saquiriojosano pueya sapojonutaniya-jaariuhuaaj. <sup>25</sup> Pueyanaa, naa cua sequesacari niajaninyatej, janiyacuaajaari juhuacaritia nia numootereeni. <sup>26</sup> Naaratej, majaari nia quianu cua pajenuucua, pueya jaara sequere niajaninya: “Cristo jati cariquia jiyajinia quiya”. Naajuhuaaj, majaari pueya nia tojiniu nojori jaara sequere niajaninya: “Miji, Cristo sohuacamara cajiya. Naa niquishiijia”. Majaari nia shanacunu naa nia sapojosaanuratej. <sup>27</sup> Mijiria cua tiuquishacariuhua, majaari jiyasohua cua tiuquini quiniutianihua. Naatej, taa pueya niquiquiaa miacana nunujiyano pananu muetasamajicuaani, pananu tiuquishocoranio, pueyari naa cua niquiniutianiya cua tiuquishacariuhua. <sup>28</sup> Tee casaa mocua quiyani, mohuari tii rerequeejonutaniya.

Jesuuri naa niishitiojoriquiaa miriqui, mijiria quiniaa pueya jaara sesere puera, nojori-iri saniitosaanutaniya.

*Taa na quiniutianiyani Cristo tiuquishacariuhua*  
(Mr 13.24-37; Lc 21.25-33; 17.26-30, 34-36)

<sup>29</sup> Jesuuri naa canaa pohuataquiaari socuatej:

—Ritia naquiya miishaanu nuhuajijia, pananuuri ninishiquiria quiniutianiya. Racaari maja na cuhuatanu quiniutianiya. Riyari totenutaniya. Jiya cajiniocua cumaaca jitiiajacaari tetecatunutaniya. <sup>30</sup> Jiyacaritij, puereeta casaari jiya cajiniocua niquishaanutaniya, mijiria quiniaa niishiniuria janiyari quera roseyani. Puetunu nio jiyajinia pueyapuejanaari sapiyonuunutaniya, jiyanohua nojori taraajenuta. Na nuhuaj, cua niqutiutianiyari cohuaja najacajinia roseyano, jiyanohua cua cumaacata, jiyanohua shacantuuca. <sup>31</sup> Janiyari jiyocuaaanuji cua seyata tiuquiniutianihua, cua jiyaramiquiniuria nojori puetunu cua saquiriojosano pueyacujanaa. Nojori tojtiasacari trompeta jonenenu jiyanohua, nojoriiri cua saquiriojosano pueya rerejotenutaniya cucua, puetunu nio jiyajinijianaa.

<sup>32</sup> Naa pohuatareera higo naanajiniiji, socua maninia nia niishiniuria taacari jiya puequenutaniyani. Higo naana cashacua jaara macumaaca quiri, na jaamasucuaari mueratiyua. Naa nia niquishacaritij, niaari niishiya tacareejonugui quera quiniutianiya. <sup>33</sup> Naajuhuaaj, niaa jaara puetunu cua sequesanojuanaa niquri tari tohuateyano, niocua niishiri janiyari quera tiuquihuani. Tari jiya puequesacari quera. <sup>34</sup> Seetanujuanaa nia sequeyanijia, nio pa quishacari pueyani, majaari nojori shaajenu quiniutianiya juhuanajuaja, nojori cuaara puetunujuanaa cua pohuatasano niqurijiaatijia. <sup>35</sup> Jiya, jiya cajiniocuanio, cunoori shaajenutaniya. Cua sequesano cutaraari tohuateenutaniyacujua. Cua rupaari pueyaracaanu seetanu rupaajanaa quiniutianiya.

<sup>36</sup> Maja cutaraari quenaaja tamonu pueyano niishiniu taacari jiya puequenutaniyani, mariyata taacari cua niniutianihua. Jiyocuaaanu quiniaa Pueyaso seyari maja na niishiniujuhuaaj. Majaari quenaaja cua niishiniujuhuaaj. Saaja cua Queeri tamajaaja na niishiya cutara.

<sup>37</sup> Quera cua tiuquiniu panishacariuhua, mijiria pueyari juhuajaniya quiniutianiya taa Noé quishacari mijiria tariucuacaanu pueya quiquiaaricuaani. <sup>38</sup> Jiyacaritij, nio jiya pajaashitiaaquishacarijia, supuetanaari juhuajaniya miaquenuujua quiquiaari. Juhuajaniya queranacunuuriquiaajaariuhua. Juhuajaniya necohua camiyoteriquiaajaariuhua. Noé jaara tiuquitiaquiaarijiaatijia na puereetua buqejiniacuma. <sup>39</sup> Nojoriiri saaja juhuajaniya quiriquiaa pajaa jaara nojori pajaashitiaquiaarijiaatijia. Puetunu pueyajanaari canashiyaquiji netasaaquiaari. Mariyata naa quiniutianiyari cua tiuquishacariuhua. <sup>40</sup> Jiyacaritij, caapiqui pueya quishacari cuhuariquiajina, niquiriyatuuri rishaanutaniya, Pueyaso pueyano na quiniucua. Tamonuuri jateenutaniya saniitosocoriquiano saniniujia. <sup>41</sup> Naajuhua, caapiqui maajipohua riiquiniushacari tunanajiniacuma, niquiriyatuuri rishaanutaniya. Tamonuuri jateenutaniya. <sup>42</sup> Nocuaji juhua sutejaca nia quiriquia. Majaari nia niishiniu taacari nia Jiyaniijia tiuquiniutianihuani. <sup>43</sup> Nio nia niishiri. Tia camaru jaara niishiriquia taacari nohuasejovia niniutianiya nocuani, nojuaja maara nocuaji sutere maja nohuasejovia tiuquiniuria na casami nohuasenura. <sup>44</sup> Naaratej pueyanaa, niaa cumaati cua sashiya, janiya mariqui nia jiyajenetemohuarini.

*Jesu pohuatasano maninia serujiniji, sesoriquia serujinijinio*  
(Lc 12.41-48)

<sup>45</sup> Socua cua pohuatasano nia tojitiare pueyanaa. Jiyanoehua casamiriaca pueyanoori queraatia seyaraca quiquiaari. Cuno jiyaniijiaari tucuacaanu quianu paniquiaari tamonu jiyajinia. Naaratej, na nuhuajiria, nojuajaari niquiriyatu na seyajinijinio jiyatequiaari juhua na tia camarura, narta seya na mianuutenura maninia, puetunu juucajanaa. Cuno seruuri niishijia quiquiaari, na camarnu tojjijajuhua. <sup>46</sup> Cuno seruuri shuquiriaatia quiniutianiya na camarnu jaara na riuriatasuhua maninia poonijiyano taa na camarnu sequequiaari na nuhuajiriacuajani. <sup>47</sup> Naaratej, seetanujuanaa nia sequeyanijia, na camarnuuri na jyatenuutaniya puetunu na jittiasanojuanaa cojuanara. <sup>48</sup> Saniniujia, cuno seru jaara sesa mijia quiri, nojuajaari tama sequenutaniyajaacujua: “Cua jiyaniijiaari jiyanoehua tarishiniutianiya”. <sup>49</sup> Jaara naa niishiriojore, nojuajaari narta seya piquiniu co-teenutaniya. Mashaasequenuujua cojiniutianiyaajaariuhua queranacunuunura. <sup>50</sup> Naa juhuajaniya na quishacaritij, na jiyaniijiaari jiyacari na jiyajenetenuutaniya. <sup>51</sup> Naa sesa na quiniucuatej, na jiyaniijiaari jiyanoehua na saniitonutaniya. Na nuhuaji, na jatanutaniyari na cojiritiasocoriquiano saniitonu sapuenu juhua maninia niquishano mijijaca pueyata. Nojoriiri tii nujuquetunutaniya. Na quicaa miaquenuunutaniyari, naquiya na miiquosacari.

## 25

*Jesu pohuatasano diez niyacoojorijiniji*

<sup>1</sup> 'Nia pohuatareera taa Pueyaso shuriucua tiuquitianu panijiaa quiniutianiya cua tiuquishacariuhua. Nojoriiri juhua diez niyacoojori quiniutianiya, canapute camiriquiano pueyano sashiriquiaacuajani. Cuno niyacoojoriiri quiojoquiaari camiriquiano pueyano sashiniuria, na tiuquishacari nojori tiuquitionura nata tiaco. Nojoriiri samaritu patootaquiaari. <sup>2</sup> Cinco cuno niyacoojorijinijiiri mosanucua quiquiaari. Tamasacari saniniujia niishijiaa quiquiaari cutara. <sup>3</sup> Mosanucuaari saaja niquiriyatu samaritu patootaquiaari. Majaari socua samaritu nojori panu quiquiaari. <sup>4</sup> Niishijiaa cutaraari socua samaritu pooquiaari, nojori samaritu puequesacari na noshitishocoriquiano. <sup>5</sup> Camiriquiano pueyano tarishishacari, puetunu nojorijianaari maquenujuquiaari. Nojoriiri socua maquetuquee. <sup>6</sup> Shiyaqueya, tamonu pueyanoori nacaquiaari: “¡Camiriquiano pueyano cumaji tari! ¡Nia naacusee!” <sup>7</sup> Puetunu cuno niyacoojorijianaari ritia saneecuatuquiaari. Quera pueetacoiano na samaritu nishiriiniuriiri. Nocuaji niishijiaa niyacoojoriiri socua na pootusano samari noshitirii. <sup>8</sup> Jiyacaritij, mosanucua niyacoojoriiri narta niyacoojori sequeere: “Canaara nia rashiquiojoreja nia samaritiujiniji. Canaa samaritu tari pueetaareeni”. <sup>9</sup> Cuno cinco niishijiaa niyacoojoriiri nojori riucaare: “Maja. Maja maninia canaa niquitionura nijaniya, puetunu pa samaritiujianaacua senota pueetama. Ritia nia quiaare juhuari na masejosaqui, socua nia masenura tiji”. <sup>10</sup> Cuno mosanucua niyacoojori quiojosacari samari masenucua, camiriquiano pueyanoori nojori niyacari tiuquishii. Cuno samaritiuriaca niyacoojori cutaraari camiriquiano pueyanota tiuquitiaquiaari camishaqui tiaco queranacunura. Tia tiootuuri mishiquiosaaree. <sup>11</sup> Na nuhuaji, mosanucua niyacoojoriiri tiuquijioquiaariuhua. Tia tohuatayaji jiiquioonuusuhuari. Sequetureeri: “¡Jiyaniijianaa, jiyaniijianaa, canaacuaji quia riatareja tiootu!” <sup>12</sup> Jiyaniijiaari saa sequeerejaa: “Seetanujuanaa nia sequeyanijia, maja cua niishiniu nijaniya”.

<sup>13</sup> Naa na pohuatanu nuhuajitij, Jesuuri canaa na saquiriojosano pueya sequeree:

–Pueyanaa, nia quiri juhua sutejaca, nia niishyaquishacari taacari cua tiuquiniutiani-huani, casaa juucatej.

*Miriqui Jesu pohuatasano cumaneeca poonitijionaa jiniji*  
(Lc 19.11-27)

<sup>14</sup> Na nuhuaji, Jesuuri socua miriqui pohuataquiaari canaa na niishitiojonura taa Pueyaso muerasu miishaanutaniya jiya puequesacarini. Jesuuri naa canaa pohuataquiaaritij:

–Tamonu jiyaniijaari tucuacaanu quianu paniquiaari tamonu jiyajinia. Na nuhuajiria, na seya niqutiojoquiaari na racatasano cumaneecaari, nojori cuaara poonitijioora cuno cumaneeca na canijiasocoriquiano. <sup>15</sup> Naacuajitij, coteenu seru niqutiooree cinco mil cumaneecaari. Tamonuuri niqutiosaaeree dos mil. Tamonuuri niqutiosaaeree mil cumaneeca. Na jiyaniijaari naa nojori niqutiojoquiaari na niishishacari nojoriiri rimiajata niishijiaa quiquiaari, socua cuno cumaneeca nojori canijianura. Na nuhuaji, nojori jiyaniijaari quiaquiaari. <sup>16</sup> Cinco mil cumaneeca jitianaaari ritia coteequiaari casami masenura na niqutiosocoriquiano socua cumaneecara, na reratenura na jiyaniijaara. Naacuajitij, cuno seruuri socua cinco mil cumaneeca reratequiaari coteenu na jitiananojiniji. <sup>17</sup> Naajuhuaaj, dos mil cumaneeca jitianaaari socua dos mil cumaneeca reratequiaari na jitiananojiniji. <sup>18</sup> Mil cumaneeca masenaari saniniuujia maja na poonitijionu quiquiaari na jiyaniija niqutiosano cumaneeca. Nojuajaari saaja jiyajinia jiuutiaquiaari na jamojuara na jiyaniija cumaneeca. <sup>19</sup> Seya jiyaniijaari camueenujuquiaari jiyano-hua. Socua tiuquiquiaarihuari na cumaneeca na masejonuhuaa na seyajiniji. <sup>20</sup> Coteenu nocua tiuquiquiaari cante cinco mil cumaneeca niqutiosaaquiaaricuaajani. Nojuajaari na jiyaniija sequeree: “Jiyaniijanaa, quiaari cua niqutiotocanu cinco mil cumaneeca. Niya quiyari socua cinco mil cumaneeca quiara, cua poonijosanojiniji cua reratesano”. <sup>21</sup> Na jiyaniijaari na sequeree: “Maniniacuaja. Quiaacuajaari maninia cua seru. Majaqui najuhuaana cua tiuuniu quiquianu quiocua. Quiaacuajaqui maninia miiquianu secaja cua niqutiosanota quiajaniya. Janiyari quia jiyatenutaniya queraatia jitianarani. Miji quia tiuquimia. Niya cuata quia quishii shuquiriaatia”. <sup>22</sup> Na nuhuaji, tamonu seruuri na jiyaniijaacua tiuquishijihuaaj, nooj, cante dos mil cumaneeca niqutiosaaquiaaricuaajani. Na jiyaniija sequereeri: “Jiyaniijanaa, quiaari cua niqutiotocanu dos mil cumaneeca. Niya quiyari socua dos mil cumaneeca quiara, cua reratesano na poonijosanojiniji”. <sup>23</sup> Na jiyaniijaari na sequeree: “Maniniacuaja. Quiaacuajaari maninia cua seru. Majaqui najuhuaana cua tiuuniu quiquianu quiocua. Quiaacuajaqui maninia miiquianu secaja cua niqutiosanota quiajaniya. Janiyari quia jiyatenutaniya queraatia jitianarani. Miji quia tiuquimia. Shuquiriaatia nia quia quishii cuata”. <sup>24</sup> Na nuhuaji, tamonu seruuri tiuquishijihuaaj cante mil cumaneeca niqutiosaaquiaaricuaajani. Na jiyaniija sequereeri: “Jiyaniijanaa, janiyari niishiyani quiaacuajaari quarta pueyaca taraa-jeyashijia. Quiaari tamasaca natoosanojiniji senoouja. Quiaari tamasaca poonijosanojiniji miajajuhuaaj. <sup>25</sup> Naaratej, janiyari quia cumaneeca pueretacanu nohuasenujuacani. Cunora janiyari quia cumaneeca jamocanu raamani. Quia niquri. Niya quiyacuaja quia cumaneeca puetunujuaana”. <sup>26</sup> Na jiyaniijaari na juuari: “¡Quiaaqui sesoriquia pueyano! ¡Taaajaca seque! ¿Quiaateeri niishiquianu janiyari tamasaca natoosanojiniji senooujani, tamasaca poonijosanojiniji miajajuhuaaj? <sup>27</sup> Quiaa jaara cua jiyaniquianu naa quijiatej, ¿casaara cua cumaneeca quia niqutioyaquiquianu cumaneeca cojuanaarini? Nojori jaara cua cumaneeca poonijiotecanu, nojori maara socua na canijiacanu quiria”. <sup>28</sup> Jiyacaritij, jiyaniijaari tamasaca na seya sequeree: “Nio sesa cua serujiniji nia jiyauutiare cua mil cumaneeca. Nia niqutioore cutara cua maninia seru, cante diez mil jitiaa tariucuaajani. <sup>29</sup> Naacuajitij, cante casaa jitiaacuaani, nojuajaari socua niqutiosaanutaniya, queraatia jitiaa na quiniuria. Saniniuujia, cante secaja jitiaa najuhuanani, nojuajaari secaja na jitiaasano jaariutiasaanutaniya puetunujuaana. <sup>30</sup> Nio najuhuaana quijia seru saniniuujia, nia jatare carijiniacuma ninishiqui. Tii sapuenutaniyari. Na quiaa miaquenutaniyari na noonuta, naquiya na miishacari”.

*Jiya puequesacari, puetunu pueyapuejanaari nequesoreesaanutaniya saniitiosocoriquiano*

<sup>31</sup> Puetunu cua seyajanaari jiyocuaaanuji cua cojiniutianiya janiya jaara tiuquirio-huani Pueyaso shacantuuca cumaacata, Jiyaniijajanaa cua quiniuria mijiria. Janiyari shanohua puereeta jiyaniija cajitijinia cajiniutianiya, pueya cua nequesoreesacari. <sup>32</sup> Puetunu pueyapuejanaari cucua rerejotesaanutaniya puetunu nio jiyajinjiojuanaa. Janiyari maninia pueya saquiriojonutaniya sesoriquia pueya tajinijini, taa borrego cojuana na borregohua saquiriojoquiaa cabraacuaca tajinijicuaani. <sup>33</sup> Janiyari maninia

pueya nujuatejonutaniya cua miaquetajarani. Saniniuuja, janiyari sesoriquia pueya nujuatejonutaniya cua muenecarani. <sup>34</sup> Na nuhuaji, janiyari cua miaquetajara nujuatiuyano sequenutaniyani: “Miji, cua Que shuquiritiasano pueyanaa. Shusha jiya shipinishacari niaarano cua Que riuriotaca nia masere. <sup>35</sup> Cunoori niajaniyara, maninia miijiaa nia quiniuucua. Cua miaajesacari, niaari cua miaqueteja. Cua jiyamuesacari, niaari cua raateja. Tucuaaanu cua rucuaanejoscari, niaari nia tiaco cua tiuquinjia. <sup>36</sup> Toqueeju cua quishacari, niaari cua niqutioquiaari. Cusosu cua quishacari, niaari cua niqiniuucua quiaja. Nujuatejojuajinia cua quishacari taraatia, niaari cucua quiojojua cua cumani-jianuucua”. <sup>37</sup> Na nuhuaji, maninia pueyari cua nequesotanutaniya: “Jiyaniijianaa,  $\zeta$ taacari canaa niqiuquiaari quiajaniya miaajeyanoni?  $\zeta$ Canaateeri quia miaquetequiaarini? Majaaruhua.  $\zeta$ Taacari canaa niqiuquiaari quiajaniya jiyamueyanoni?  $\zeta$ Canaateeri quia raatequiaarini? <sup>38</sup>  $\zeta$ Taacari canaa niqiuquiaari quiajaniya canaa jiyajinia rucuaanejeyanoni?  $\zeta$ Canaateeri canaa tiajinia quia tiuquinquiaarini? Majaaruhua naa canaa miiniu quiquiaari quiajaniya.  $\zeta$ Naajuhua, taacari canaa niqiuquiaari quiajaniya toqueejuni?  $\zeta$ Canaateeri quia niqutioquiaari toqueni? Maja. <sup>39</sup>  $\zeta$ Taacari canaa niqiuquiaari quiajaniya cusosuni, nujuatejojuajiniano?  $\zeta$ Canaateeri quiocua quiojoquiaari canaa niqiniuria quiajaniyani? Maja”.

<sup>40</sup> Janiyari cuno maninia pueya riucuanutaniyani: “Seetanujuanaa nia sequeyanijia. Niaa jaara naa maninia miiquiaari tamonu cua muerasuniyojuajinijinio, niaari maninia cua miiquiaarijuhua”.

<sup>41</sup> Na nuhuaji, janiyari cua muenecara nujuatiuyano sequenutaniyani: “ $\zeta$ Cua shuriucua niqiuji nia quiaare, sesoriquia pueyanaa!  $\zeta$ Niaari cua Que sesacasano! Niaari mani quiquiojinia quejoosaanutaniya. Cuno mani quiquioori maquesaashijia. Shipinishaaquiaariri samaruhua jiyaniijiaacuaji, na seya samaruhuaacuajinio. <sup>42</sup> Niaari naa miishaanutaniyaqui nia taraajeyaquiniuucua cucua. Cua miaajesacari, majaari nia miaquetenu quijia janiya. Cua jiyamuesacari, majaari quenaaja nia raatonu quijia janiya. <sup>43</sup> Cua rucuaanejoscari nia jiyajinia, majaari nia tiajinia nia tiuquininiu quijia janiya. Toqueeju cua quishacarijuhua, majaari toque nia niqutionu quijia janiya. Nujuatejojuajinia cua quishacari, cusosu cua quishacarijuhua, majaari nia quianu quijia cua niqiniuucua quenaaja”.

<sup>44</sup> Jiyacaritij, cuno pueyari cua nequesotanutaniya: “Jiyaniijianaa,  $\zeta$ taacari canaa niqiuquiaari quiajaniya miaajeyanoni, jiyamueyanojuhua? Majaari canaa niqiniu quijia quiajaniya canaa jiyajinia rucuaanejeyano tiaaju, toqueeju quiyano, cusosu quiyano, nujuatejojuajinia quiyanojuhua. Canaa jaara naa quiyano quia niqiuquiaarini, canaa maara quiocua taraajequiaarini”. <sup>45</sup> Janiyari nojori riucuanutaniyani: “Seetanujuanaa nia sequeyanijia, nia taraajeyaquiniuucua tamonu cua muerasuniyojuaacua, niaari seetanujuanaa cucua taraajeyaquiquiaari”. <sup>46</sup> Jiyacaritij, maninia miyashijia pueyari quejoosaanutaniya pueyaracaanu sanitiosocoriquiano. Saniniuuja maninia miijia pueyari Pueyaso shuriucua quianutaniya, pueyaracaanu shuquiriaatia nojori quiniuria.

## 26

### *Judiocuaca camarucua roojotoosacari Jesu nojori quianura*

(Mr 14.1-2; Lc 22.1-2; Jn 11.45-53)

<sup>1</sup> Jesu jaara puetunu nio pohuatasanojuanaa pohuatanu puecaquiaari, canaa na saquiriojosano pueya sequereeri:

<sup>2</sup> —Niaacuajaari niishiya, tama tariquiiri Pascua juucara queranacusacari. Janiyari jiyacari taucuaca niqutiosaanutaniyani, mosocoriquiano niyacutesanojinia teetasano.

<sup>3</sup> Jiyacarijuhua, canaa Judiocuaca camarucuaari rerejoquiaari Caifás tiajinia. Caifásri pueyacuara secojonaa jiyaniijajanaa quiquiaari. Cuno pueya rerejoquiaarini, nojori quiquiaari pueyacuara secojonaa camarucua, canaa Judiocuaca camarucuanio. <sup>4</sup> Nojoriirri cuno tiajinia pocojoquiaari taa nojori sapojonutaniya Jesu na quiatusocoriquianoni, nojori mosocoriquiano. <sup>5</sup> Nojoriirri tama sequetooquiaarijiaaja: “Maja pa monu Pascuara queranacusacari, paa mariqui pueya juaatiriiri”.

### *Tamonu maaji totasacari na shanohua jaanutaja Jesuucua*

(Mr 14.3-9; Jn 12.1-8)

<sup>6</sup> Tamonu juuca, Jesuta canaa quishacari Betania tiacajinia, canaari Simón tiajinia miagenuuriquiaani. Cuno Simónri tarijia lepra cusunujiniji Jesu naatanishano quiquiaari. <sup>7</sup> Miaquejajinia Jesu cajishacari, tamonu maajiiri nocua catecanoquiaari. Shiitaniyosua shucuariquiaja pataconiyosua cacatariquiaari, cohuaja saajajiniji quejasano. Tii quiriquiaari shanohua jaanutaja. Cuno jaanutajaari jiyanohua queraatia cumaneecata masesano quiquiaari. Cuno maajiiri Jesu nacaacua na totaree puetunujuanaa. <sup>8</sup> Canaa

jaara niquiquiaari naa cuno maaji miishanotej, canaari juaaquioreeni. Noojiaqueya canaajiniiniioori naa sequeturee:

—¿Casaara cuno maaji niitiaree najuhuaana shanohua jaanutajani? <sup>9</sup> ¡Cuno jaanutaja maara queraatia cumaneecara niquitiosaare, casamiiijuniucua niquitiosocoriquiano!

<sup>10</sup> Jesu tojishacari taa canaa sequeriquiaa cuno maajini, canaa sequereeri:

—¿Casaara nio maaji nia taroojiyani? ¡Na miishano janiyani, cunoori jiyanhua maninia quiria! <sup>11</sup> Casamiiijuniucuaari niaata quiriquiano pueyaracaanu cutara. Janiya saniniuu-  
jia, majaari cua quiniu quiniutianiya pueyaracaanu niaata. <sup>12</sup> Nio maaji totasacari cucua na shanohua jaanutajani, juhuacarijia cua cuaqueya jeecaari, raaco cua niasaanura janiya jaara mosaareni. <sup>13</sup> Seetanujuanaa nia sequeyanijia, pueyaracaanu pueya pohuatasacari Pueyaso rupaa janiyajiniji, nio maaji miishanoori pohuatasaanutaniyajuhua puetunu jiyacajinijanaa. Naa na miishano janiyani, majaari na niyajetasaanu quiniutianiya pueyaracaanu.

*Judas tacartasacari Jesu, na quiatenura*

(Mr 14.10-11; Lc 22.3-6)

<sup>14</sup> Jiyacaritij, Judasri pueyacuara secojonaa jiyaniijianucuaacua quiaquiaari. Nojuajaari niquiriyatu canaajiniini Jesu doce saquiriojosano pueyano quiquiaari. Na sesaari quiquiaari Judas Iscariote. <sup>15</sup> Secojonaa jiyaniijianucua sequeeseeri:

—¿Taa cumaneeca nia niquitionutaniya janiyani, janiya jaara nia quiatere Jesuni?

Nojoriiri ritia treinta cumaneeca niquitioquiaari Judas. <sup>16</sup> Na nuhuaji, Judasri pueyara-  
caanu niishiriojoriquiaa maatucua taacari quiatere Jesuni.

*Jesu miaquesacari na nuhuajiria na pueyata*

(Mr 14.12-25; Lc 22.7-23; Jn 13.21-30; 1 Co 11.23-26)

<sup>17</sup> Puetunu marijarajanaa, canaa judiocuacani, canaari poreetesoo pan miaquenu-  
quiaari puetunu siete juucajanaani. Coteenu juucaari sesojosaaquiaari Pascua ju-  
uca. Naaratej, Pascua juuca, canaa, Jesu saquiriojosano pueyani, canaari nocua cate-  
canoquiaarini naa canaa nequesotanura nojuaja:

—Jiyaniijianaa, ¿tee quia paniya canaa majeetenura quiocuaji borregoni, pa miaqueso-  
coriquiano quiarijia Pascuarani?

<sup>18</sup> Jesuuri canaa riucaaree:

—Paacuajaari miaquenutaniyani tari cua sequesano pueyano tiajinia Jerusalén tiaca-  
jinia. Tii nia quiaare. Tia camaru nia sequeese: “Canaa niishitiojonaari naa quia sequeya:  
‘Quera cua cusosacari. Janiyari cua nuhuajiria cua pueyata miaquenutaniya Pascua  
borrego quia tiajiniani”.

<sup>19</sup> Canaari naa miiquiaarini taa Jesu sequequiaari canacuajani. Canaari tii majeete-  
quiaari borregoni, Pascua juuca miaquesocoriquiano.

<sup>20</sup> Jaara niniquiaari, Jesuuri canaa na doce pueyata miaquejajinia cajitiuriquiaa.

<sup>21</sup> Canaa miaquenuusacari, Jesuuri canaa sequereeri:

—Seetanujuanaa nia sequeyanijia, tamonu nijaniyajinijiniioori cua tacartanutaniya,  
cua paraa na quiatenura janiya, nojori monura janiya.

<sup>22</sup> Canaari jiyanhua taraajequeeni naa Jesu sequesacaritij. Puetunu canaajanaari Jesu  
nequesotareeni:

—¿Janiya jiyoteeri Jiyaniijianaa?

<sup>23</sup> Jesuuri canaa riucaaree:

—Cante cuata tureneetaa pa miacojuajinijini, nojuacuajaari cua quiatenutaniya moso-  
coriquiano. <sup>24</sup> Janiyacuajaari mosaanutaniyani taa janiyajiniji naajiotasaaquiaaricujani  
tariucuacaanu Pueyaso Rupaajinia. Saniniuuja, jiyanhua taraatia miishaanutaniyani  
cua quiatერიquiano pueyano. Maara socua maninia quiquiaari cuno pueyanora jaara  
raaquishaaquiaari.

<sup>25</sup> Na quiatერიquiano Judasri socua Jesu nequesotareejuhuaj:

—¿Janiya jiyoteeri Niishitiojonanaa?

Judas riucaareeri:

—Taaquiririnij. Quiajanycuaaquinatejaj.

<sup>26</sup> Canaa miaquesacari, Jesuuri pan ririi. Na Que Pueyaso secojoree nocuaraari.

Na nuhuaji, na necasereeri puetunu canaarajanaa, canaa miaquesocoriquiano. Canaa  
sequereeri:

—Jajaa, nia masere. Nia miaquere. Nio panri cua cuaqueya.

<sup>27</sup> Na nuhuaji, Jesuuri raatonuque pataree. Pueyaso na secojonu nuhuaji nocuara,  
Jesuuri canaa na niquitioree. Canaa sequereeri:

–Niojiniji nia rature puetunu niajanijajanaa. <sup>28</sup> Nioori cua nanaca, Pueyaso jiyanooni-  
uria niajanija. Cua nanacaari queraatia pueyacuara shoonutaniya, nojori jiyanooshaa-  
nura sesa nojori miishanojiniji. <sup>29</sup> Seetanujuanaa, majaari socua cua ratunu quiniu-  
tianiya niaata mijiria nio uva caacajiniji. Janiyari niaata na ratunutaniya cutarani janiya  
jaara tacatemohuani, pueyaracaanu Jijaniijijajanaa cua quiniuria. Jiyacaritij, jyanohua  
maninia quiniutianiyari cuno quishacari. Paari mariyata jyanohua shuquiriaatia quiniu-  
tianiya pueyaracaanuni.

*Jesu sequesacari Pedro, nojuaja nocuaji seetanutaniya*  
(Mr 14.26-31; Lc 22.31-34; Jn 13.36-38)

<sup>30</sup> Canaa jaara jaaquequejoquiaari supuetana David naajioneejinijini, na nuhuaji  
canaari jojojoquiaarini Olivo cuhuariquia tuhananuucua. <sup>31</sup> Jesuuri jiyacari canaa  
sequeree:

–Puetunu niajanijajanaari cucua tiuuniu tarinitianutaniya quiari niucujaja. Naa naa-  
jiotasano quiyacuajajaari Pueyaso sequesano tarijia: “Janiyari borrego cojuana monu-  
taniyani. Na borregohuari niaquejonutaniya tamajaaja”. <sup>32</sup> Naajaa, janiya jaara sami-  
itiarohua macujinijini, janiyari nia puetanutaniya Galilea jiyajiniani.

<sup>33</sup> Pedroori Jesu sequeree:

–Puetunu quia pueyajanaa jaara quiocua tiuuniu tarinitiare, janiya cutaraari maja cua  
catenu quiniutianiya quiocujaji.

<sup>34</sup> Jesuuri Pedro sequeree saaja:

–Seetanujuanaa nio niucujajani, caacaraja niunijiyaquishacarijia, quiaari naa pacute-  
jonutaniya seetanu cucujaji: “Maja cua niishiniu cuno pueyano”.

<sup>35</sup> Pedroori Jesu sequeree:

–¡Pueya cuaara moora janiyaqui, naajaa, majaari cua seetanu quiniutianiya quiocujaji!  
Puetunu canaa Jesu pueyajanaari mariyata naa sequequiaaritij, taa Pedro  
sequeriquiaacuani.

*Jesu secijosacari Getsemani cuhuariquiajinia*  
(Mr 14.32-42; Lc 22.39-46)

<sup>36</sup> Na nuhuaji, Jesuuri tamonu cuhuariquiajinia tiuquijioquiaari canaa na saquirio-  
josano pueyata. Cuno cuhuariquia sesaari quiquiaari Getsemani. Jesuuri canaa sequeree:

–Niyaja nia cajituri cua secijosacari cua Que jati socua nia tachoji.

<sup>37</sup> Jesuuri Pedro jiyataquiaari, caapiqui Zebedeo niquiohuanio. Jesuuri juhuacatecara  
taraajequiaari. Jyanohua tacaariquiaaariuhuj. <sup>38</sup> Jiyacaritij, Jesuuri nojori sequeree:

–¡Coojia quera jiaqueya jyanohua cua taraajenuta! ¡Quera cusoyanijia! Niyaja cua  
sashituri. Nia sutere nia tarajanura janiya quenaaja.

<sup>39</sup> Jesuuri nojori shuriucuaji canujiyaree tamajaaja socua nojori tachoji. Jiyocuara  
jacamaseeri Pueyaso na secjonura. Naa sequereeri:

–¡Cua Quenaa, jaara na naata quiri, maja quenaaja cua cartenu naquiya cua miisha-  
nura! Naajaa, janiya cuaara miishaariaqui taa quia paniyacuajani, maja juhua cua  
panishano.

<sup>40</sup> Na nuhuaji, Jesuuri na pueya niquishuhua. Nojoriiri saaja maqueturiquiaa. Pedro  
sequereeri:

–Pedronaa, ¿majate nia naata cuata sutenu quenaaja rupaquijia? <sup>41</sup> Nia sutere Pueyaso  
nia secjonura, niaa mariqui sesa miiriiri niaa jaara saniniujiushaare. Seetanujuanaa,  
poojaari maninia miiniu panijia. Pa cuaqueyari saniniuuja sasaca quiyacujua. Naacua-  
jitij, majaari pa naata maninia miiniu Pueyaso cumaquiyaquishacari pajaniya.

<sup>42</sup> Jesuuri socua tacatequiaariuhua tamajaaja Pueyaso secjonuhuara. Naa sequereeri:

–Cua Quenaa, janiya jaara naquiya miishaareni, janiya cuaara miishaariaqui taa quia  
paniyacuajani.

<sup>43</sup> Jesuuri na pueyacia tacateyaruacuahuaj. Maquetiuyano nojori riuriatasuhuari-  
uhuj. Nojori namijiaari saaja seecutayariquiaa jyanohua nojori maquenu paniniutia.  
<sup>44</sup> Jesuuri nojori tarinitiaquiaari socua. Quiaquiaariuhuari na Que secjonuhuara. Sec-  
jonu pacutequiaariiri taa na secjoriquiaa coteenucujani. <sup>45</sup> Na nuhuaji, na pueyacia  
nimiohuariuhuj. Nojori sequesuhuari:

–Quiarijia cutara nia maquetiuyare. Nia paniyatere cutara maquetunu. ¡Juaj! ¡Nia tojiri!  
¡Janiyari tari quiatesaanutaniya sesa miijica pueyani! Nojoriiri cua miiniutianiya taa na  
panitiyuacuajani. <sup>46</sup> ¡Nia saneecuature! Pa quiaare. Cumaji tari cua quiateriquiano.

*Moronucua na paraa jaatucutasacari Jesu*  
(Mr 14.43-50; Lc 22.47-53; Jn 18.2-11)

<sup>47</sup> Jesu pocusacarijia, Judasri jiyacari tiuquishii. Nio Judascuajaari niquiriyatu canaajinijinio Jesu doce saquiriojosano pueyajiniji quiquiaari. ¡Queraatia pueyari Judasta nijioquiaari! Nojoriiri secojonaa jiyaniijianucua jiyaramiquishano pueya quiquiaari, canaa Judiocuaca camarucua jiyaramiquishano pueyajuhuj. Nojoriiri nijinaquetucujaja mueruu pooriquiaa, macacanio. <sup>48</sup> Judasri tari niishitioquiaari Jesu quiaturiquiano pueya taa nojori niishiniutianiyani teyanote Jesuni. Nojuajaquiiri tari nojori sequequiaari: “Teyano pueyano cua nujiya pa tiuquishacarini, cunocujajaari nojuaja. Niocua na quiaaseeritia”. <sup>49</sup> Naacuajitij, Judas tiuquishacari Jesuucua, na sequeseeri:

—Quiocua tiuquiyaniijia Niishitiojonanaa.

Jiyacarijia na nujuureeri. <sup>50</sup> Jesuuri na sequeere:

—Cua rupuenanaa, ¿casaacua quia niyareerini?

Jiyacaritij, Judasta nijionaa pueyari Jesu quiatusee. <sup>51</sup> Jiyacaritij, tamonu canaajinijinio pueyanoori ritia shitiaree na nijinaquetucujaja mueruu na shuucujaji. Nata jaateree secojonaa jiyaniijia seru numocoori. <sup>52</sup> Jesuuri na sequeere:

—¡Na co jiniacuma quia shiriohua quia mueruu! ¿Majate quia niishiniu, cante mueruuta miaqueja pueyanoni, mueruuta mosaanutaniyajaariuhuj? <sup>53</sup> ¿Quiaate niishiyaquiya-juhuj, janiya jaara cua Que sequereni cucua na jiyaramiquiniuria na seya jiyocua-caanuji na cojanura janiya, cua Que maara ritia cucua jiyaramiquiri cincuenta mil na seyajinijinio? <sup>54</sup> Naajuhuj, janiya jaara naa cua Que sequere na cojatenura janiyani, ¿tariucuaacaanu Pueyaso Rupaajinia janiyajiniji naajiotasanotucua taa tohuateerini?

<sup>55</sup> Jiyacaritij, Jesuuri na paraa sequeere:

—¿Taateni? ¿Janiyateeri nohuasejojuani, naa nia tiuqutianura cua quiannura mueruuta, macacanio? Niaacuajaari juucua cua niqijia puetunu juucajanaa Pueyaso Secojoua tiajinia cajiyano, pueya cua niishitiojosacari. ¿Casaara tii nia quiaaquiuanu janiyani? <sup>56</sup> Naajaa, naacuajitij puetunu nia miishanojuanaari tohuateenutaniya, taa tariucuaacaanu Pueyaso Rupaajinia naajiotasaquiaari janiyajinijicujani.

Jiyacaritij, canaa, na saquiriojosano pueyani, canaari Jesu tiujiaquiaari niquiriyatuni. Puetunu canaajanaari mashiyocuatureeni.

*Judiocuaca camarucua nequesoresacari Jesu*

(Mr 14.53-65; Lc 22.54-55, 63-71; Jn 18.12-14, 19-24)

<sup>57</sup> Jesu quianaari na jaatucucuaari jiyaniijia Caifáscua. Caifási pueyacuara secojonaa jiyaniijia quiquiaari. Judiocuaca camarucuaari tari Jesuucujaji rerejoquiaari Caifás tiajinia. Nojoriiri quiquiaari Moisés Rootasanojiniji niishitiojonaa, canaa Judiocuaca camarucanio. <sup>58</sup> Pedroori Jesu nuhuajiquiaari tucuaacaanuji secojonaa jiyaniijia tiajinia. Cuno puereetuca tia shocuaari mataca quiquiaari. Pedroori tii carijiniacuma tiuquiquiaarijuhuj. Jiyaniijia Caifás seya tajinia cajishiiri, na niqiniuria taa nojori miiniutianiya Jesuni.

<sup>59</sup> Pueyacuara secojonaa jiyaniijianucuaari puetunu canaa Judiocuaca camarucuaatanaa pajeriquiaa pueya, nojori saquiriojotanura na sapojonuta Jesuucuaara, na mosaanura. <sup>60</sup> Queraatia pueyari najuhuaana Jesuucuaara saquiriojotaree juucua. Nojori sequesanoori rimiajata quiquiaari tamasa sequesanojiniji. Na nuhuaji, socua caapiqui pueyari mariyata sesa saquiriojotaree Jesuucuaara. <sup>61</sup> Nojoriiri naa sequeere:

—Cuno pueyano naa sequecanutej: “Janiya jaara Pueyaso Secojoua tia niyartareni, janiyari na tianu tucatanutaniuhua juujianaraca juucajiniani”.

<sup>62</sup> Jesuuri sanaa nujuariquiaa saaja. Nocujaji, secojonaa jiyaniijiaari nujuaree. Jesu sequeereeri:

—¿Majate quenaaja quia riucuanuujaja? ¿Quiaate pueya tojirii quiocuara saquiriojotaano? ¿Seetanutejanaa nojori sequesano?

<sup>63</sup> Jesuuri saaja sanaa na tojiriquiaa. Nocujaji secojonaa jiyaniijiaari Jesu sequeere:

—¡Cua tojiri! Paa niya quiya Pueyaso niquiarani. ¡Cua riucuaere! ¡Majaari sapojonu! ¿Quiaate Cristo, Pueyaso Niyanu?

<sup>64</sup> Jesuuri na riucuaere:

—Jaa. Nojuacuajaniijia taa quia sequeerecujani. Cua tojitiare. Na nuhuaji, niari cua niqiniutianiya Pueyaso miaquetajara cajiyano. Niaari cua niqiniutianiyajuhuj jiyocuaacaanuji tacateyanohua cohuajajinia.

<sup>65</sup> Pueyacuara secojonaa jiyaniijia jaara tojiquiaari naa Jesu sequesanootej, tama na toque sutareejaarijia na juaniutia. Nata quiniaa sequeereeri:

—¡Juhuej! ¡Nia tojishuriucuaara na sequesano! ¡Nojuajaari tama na cuaqueyajaaja jiyateya juhua Pueyaso na quiniuria! ¡Jiyanohua sacuraatiaari na sequesano Pueyaso niquiarani! ¿Paatucua casaara sashiri socua tamonu saquiriojotanura nocuaraarini? Niaacuaja shusha



tojitiaree tama na sequesanojuaaja sacuaraatia Pueyaso niquiara. <sup>66</sup> ¿Taa pa miiniutianiyanoj? ¿Taa nia sequeyani?

Nojoriiri pueyacuara secojonaa jiyaniijia riuacuaree:

—¡Cuaara mosaaria!

<sup>67</sup> Jiyacaritij, tamasaacari Jesu jiquioco riocojoree. Na jiquioco na masetejotureejaaru-ihuaj. Tamasaca saniniuuja, Jesu namijia na morotunu nuhuaji, na mocroria na piquituriiri. <sup>68</sup> Na nuhuaji Jesu nequesotatureeri:

—Quiaa jaara Cristo quiri, Pueyaso jiyarosano, quia niishiritioj, ¿cante quia piriini?

*Pedro seetasacari Jesuucujaji*

(*Mr 14.66-72; Lc 22.56-62; Jn 18.15-18, 25-27*)

<sup>69</sup> Pedroori jiyacari tii cajiriquiaajaa carijiniacuma. Jiyacaritij, secojonaa jiyaniijia seruuri Pedro niquishii. Nojuajaari niyacoo quiquiaari. Pedro sequereeri:

—¡Jaj, quiaacuaja cuno Jesuta rucuanerajua, cuno Galilea jiyajiniijinio pueyanotani!

<sup>70</sup> Pedroori jiyacari seetaree puetunu pueya niquiarajanaa. Naa sapojoreeri:

—¡Maja cua niishiniu casaa quia sequeyani!

<sup>71</sup> Pedroori tohuateyajiaria canuijyaree. Jati, tamonu niyacoori na niquiriijihuaj. Cuno seruuri jiyacari tii quiniaa sequeree:

—¡Nio pueyanoori cuno Jesuta quijiajuhuaj, cuno Jesu, Nazaret tiacajiniijinio pueyanoni!

<sup>72</sup> Pedroori Jesujiniji socua seetanu camiriohuacuahuaj:

—¡Maja cua niishiniu cuno pueyano! ¡Pueyasocujaari niishiya, seetanujuanaa nia sequeyanijia!

<sup>73</sup> Pasaja na tarishiniu nuhuaji, quiniqui quiniaari Pedro sequetusee:

—¡Quiaaqui seetanujuanaa cuno Jesu pueyajiniijinio! ¡Quiaari juhua nojori pocuaajuahuaj!

<sup>74</sup> Jiyacaritij, Pedroori socua jiyacataree sapojonura. Naa cuno pueya sequereeri:

—¡Pueyasocujaari niishiya maja cua niishiniu cuno pueyano, niaa na sequeyani! ¡Pueyasocujaari cua sequesano tojiya! ¡Majaari cua sapojonu nijaniya!

Caacarajaari canashiyaquiji niunijioquee. <sup>75</sup> Jiyacaritij, Pedroori naa cuno niucuaaja Jesu sequesano niishiqui: “Pedronaa, caacaraja niunijiyaquishacarijia, quiaari tari janiyajiniji seetanu pacutejonutaniya”. Pedroori tia shocua matacainijii tohuataquiaari ritia. ¡Jijianohua nujuquequeeri na taraajenuta!

## 27

*Judiocuaca camarucua niqutiosacari Jesu jiyaniijia Pilato*

(*Mr 15.1; Lc 23.1-2; Jn 18.28-32*)

<sup>1</sup> Tariquicuajaji, puetunu pueyacuara secojonaa jiyaniijianucuaajanaari rerejoree narta Judiocuaca camarucuata. Nojoriiri roojotooree taa na miituniutianiya Jesu na motenurani. <sup>2</sup> Na nuhuaji, Jesu morotureeri na jaatucutunura jiyaniijia Pilatoocua. Pilatoori jiyaniijia Césarjanaa jiyatesano quiquiaari Judiocuaca jiyaniijia na quiniuria Judea jiyajinia.

*Judas Iscariote cusosacari*

<sup>3</sup> Judasri jiyanojua macuhuaquequiaari na niquishacari Jesuuri mosaanutaniya na quiatenucua nojuaja. Na tacaaniutia, Judasri quiaquiaari secojonaa jiyaniijianucuaacua, canaa Judiocuaca camarucuacuano, nojori na niqutionuhuaa cuno treinta cumaneeca.

<sup>4</sup> Judasri nojori sequesee:

—¡Janiyaqui sesa miiriucuaani, najuhuaa cua quiatenucua maninia pueyano nijaniya!

Nojoriiri saa na riuacuareejaa:

—Naajaa. Maja canaa miishano. Cuncuajaari tama quia miishanojuaaja.

<sup>5</sup> Judasri nojori cari cuno treinta cumaneeca jatatee Pueyaso Secojoua tijania. Tiji quiacuahuari. Na riquiajiniji morotaquiaari sohaneyocuaari. Naa cusoquiaariiri. Sohaneyocuaacuajaji jaasutaari. <sup>6</sup> Secojonaa jiyaniijianucuaari Judas jatasano cumaneeca reratequiaari. Nojoriiri tama sequetooquiaarijiaaja:

—Nio cumaneecaari maja na naata Pueyasora racatajajinia niasocoriquiano. Nio cumaneecaari pueyano monu sami.

<sup>7</sup> Puetunu nojorijianaa jaara niishiriojoquiaari taa na miituniutianiya cuno cumaneecani, nojoriiri marau panyoru pueyano cuhuariquia masequiaari cuno cumaneecata. Cuno cuhuariquiaari jiyatesaaciaari ruconaa jamojuara, nojori jaara cusoyare Jerusalén tiacajinia nojori quishacari. <sup>8</sup> Pueyano monu samitia cuno cuhuariquia masesaanucua, cuno cuhuariquiaari sesojosaaquiaari “Nanaca samitia masesano cuhuariquia”. Naa quiyajaari na sesa. <sup>9-10</sup> Naacujitij, Pueyaso sequenu panishano

caminiujiunia supuetana Jeremías sequesanoori maninia tohuatteequiaari. Nojuajaari naa sequequiaaritiij:

“Nojoriiri na treinta cumaneeca pataquiaari cuhuariquia masenura marau paniyuru pueyanojiniji, taa cua jiyaniijia Pueyaso sequequiaari janiyacujani. Tariija, cuno treinta cumaneecata, maninia pueyanoori nata masesaquiaari. Israel pueyari naa sequequiaaritiij: ‘Cuaara treinta cumaneecata masesaaria cuno pueyano’ ”.

*Pilato nequesoreesacari Jesu*

(Mr 15.2-5; Lc 23.3-5; Jn 18.33-38)

<sup>11</sup> Jesuuri jaatucusaquiaari jiyaniijia Pilatoocua. Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucaaree:

—Jaa. Naacuaaquiniatejaj, taa quia sequereecuajani.

<sup>12</sup> Secojonaa jiyaniijianucua, canaa Judiocuaca camarucuanio, nojori jaara Jesuucua saquiriojotariquiaa, Jesuuri sanaa tojiriquiaa nojori. <sup>13</sup> Naaratej, jiyaniijia Pilatoori Jesu sequeree:

—¿Majate quia tojinu nojori, quiocuara tonujiyano queraatia?

<sup>14</sup> Majaari Jesu riucaanu quirii quenaaja. Pilatoori nocuaji jiuujiateree, casaara na riucaaquia quenaajani.

*Pilato sequesacari Jesuuri mosaanutaniya*

(Mr 15.6-20; Lc 23.13-25; Jn 18.38-19.16)

<sup>15</sup> Puetunu Pascua juucarajanaa, Pilatoori nujuatejojuajinia nujuatesano pueyano cartenu jiitiquiaari. Judiocuaca panishano pueyanoori cartesaquiaari pueyaracaanu. <sup>16</sup> Cuno quishacari, tamonu pueyanoori nujuatejojuajinia nujuatesano quiriquiaa, Barrabás jyanishano. Puetunu pueyajanaari na niishijia sesa na miiniuucua. <sup>17</sup> Pueya rerejosacari Jesu na nacoojotasacari Pilato niquiara, Pilatoori nojori nequesotaquiaari:

—Judiocuacanaa, ¿teyano pueyano nia paniya cua cartenurani, Barrabáste, Jesu soj? Nojuajaari pueya sequesano, Pueyaso jiyarosana.

<sup>18</sup> Pilatoori naa nojori nequesotaree na niishishacari casaara canaa Judiocuaca camarucua monu paniriquiaa Jesuni. Puetunu pueyajanaari tari canaa camarucua tojiti-aquiriquiaa, nojori tojitanura Jesu. Cunora, camarucuaari Jesu monu paniriquiaa.

<sup>19</sup> Pilato cajishacari na nequesoreesaqui, necocuaari nocua jiyaroquiaari tamonu na seru, naa na numootenuratej: “¡Narejatejaj, nareja! ¡Janiyari niucua maquiyojoree puereeta cuno pueyanooquajini!”

<sup>20</sup> Jiyacaritiij, secojonaa jiyaniijianucuaari, canaa Judiocuaca camarucua pueya niishitiojoriquiaa nojori sequesano, Barrabás cuaara cartesaaria, Jesu cuaara mosaaria saniniuuja. <sup>21</sup> Naacuajitiij, jiyaniijia Pilato jaara pueya nequesotaquiaarihua teyano nojori paniya na cartenurani, nojoriiri na riucaaree:

—¡Barrabás quia cartere!

<sup>22</sup> Pilatoori nojori nequesotaree:

—¿Naatee? ¿Taa cua miinitianiya Jesuurinitioj, pueya sequesano “Pueyaso jiyarosani?”

Puetunu pueyajanaari ritia na riucaaree:

—¡Cuaara teetesaaia niyacutesanojinia!

<sup>23</sup> Pilatoori nojori nequesotarohuacuahuaj:

—¿Casaarateni? ¿Sesa miiritiijaara?

Pueyari saaja socua jiyanohua nacaree:

—¡Cuaara mosaaria niyacutesanojinia teetesano!

<sup>24</sup> Pilato cartenu saniniujiushacari Jesu juucua, pueyari saaja socua jiyanohua na-cooriquiaa. ¡Socua jiyanohua juaaquioriquiaari! Pilato niishishacari maja na naata quiniutianiya Jesu cartenu, taa na paniriquiaa juucuacuajani, nojuajaari mohuaca maseree. Pueya niquiara shuquitiaareeri. Na shuquitiasacari, Judiocuaca sequereeri:

—¡Majaari cucua na tiutiasaanu quiniutianiya nia mosacari nio maninia pueyano! Cunoori maja cua miishano quiniutianiya. ¡Cunoori tama nia miishanojuaja!

<sup>25</sup> Puetunu pueyajanaari na riucaaree:

—Naajaa. ¡Jaara mosaare, cuaara tiutiasaaria canaacua, canaa niqiuohuacuanio!

<sup>26</sup> Na nuhuaji, Pilatoori Barrabás tohuateree nujuatejojuajiniiji. Saniniuuja Jesu majacutereeri. Na nuhuaji, na soldadohua na niqutioreeri niyacutesanojinia nojori teetesocoriquiano.

<sup>27</sup> Jiyaniijia Pilato soldadohuari jiyacari Jesu jaatucuree Pilato tiajiniaaco. Nojoriiri puetunu narta soldadohuajanaa rerejoteree Jesu shocuaqueya. <sup>28</sup> Na nuhuaji, nojoriiri

Jesu toque jocuaturee. Tamonu tucuaque toque cushitishaareeri, shaaruque, juhua jiyaniijiajanaa cushishano. Naa na miitiiriiri na macaatinuria. <sup>29</sup> Nojoriiri juhuacontucua maaturee na nacaquerajuhua. Na nuhuaji, na cushititiri Jesuuri. Naajua niquitiosaa-reejaariuhua, juhua na macara, na miaquetajata na muetunura juhua jiyaniijia. Na nuhuaji, soldadohuari Jesuucua mojoquetacoquiaari. Nojoriiri naa na macaatiiri:

—¡Jejee, Judiocuaca jiyaniijiana!

<sup>30</sup> Nojoriiri Jesu riocojoree. Na naajua na jaariutiatureeri. Nataja na naca piqutiiriiri. <sup>31</sup> Naa nojori macaatinu nuhuaji Jesutej, nojoriiri cuno tucuaque toque jocuaciaariuhua nocuaji. Tama na toquejaaja cushitishaarohuari. Na nuhuaji, nojoriiri na jiyataquiaari na teetenura niyacutesanojinia.

*Jesu teetesacari niyacutesanojinia*  
(Mr 15.21-32; Lc 23.26-43; Jn 19.17-27)

<sup>32</sup> Nojori tohareetasacari tiacajiniji pucoosaquiria nojori quiojosacari, nojoriiri tamonu pueyano naacumaa. Nojuajaari Cirene jiyajinijinio pueyano quiquiaari. Simónri na sesa quijia. Soldadohuari cuno Simón pateree Jesu teetejara niyacutesano. <sup>33</sup> Nojoriiri tiuquijioseesa sesa miijaca pucoosaqui. Pueya pucoosaquini, na sesa quiquiaari “Gólgota”. Nioori pueyano rupaajinia sequeya “Pueyano nacaco”. <sup>34</sup> Quiniqui, soldadohuari Jesu raateree vino juucua, casaa piajata cojitishano. Jesu jaara na saniquiaari, majari na ratunu quirii.

<sup>35</sup> Jesu jaara niyacutesanojinia teetesaaquiaari tari, soldadohuari saitia tacuarishijoree nojori niishiniuria cante Jesu toque poonutaniya nerani. Naacuajitij, tama nojoriijaarijia Jesu toque seraatiquiaari. Naa tohuateequiaariiri tariucuaaanu Pueyaso sequesano caminiujiumia sequesano, nojuaja jaara naa naajiotaquiaari: “Pueyari saitia tacuarishijoree cua toque nojori seraatianura”.

<sup>36</sup> Na nuhuaji, cuno soldadohuari cajitiuquiaari Jesu na cojuanura.

<sup>37</sup> Jesu nacaacuma, naajioneeri rupotasaquiaari. Tii naajiosano quiriquiaari casaara na teetesareeni. Naa naajiosano quiriquiaari: “Nioori Jesu, Judiocuaca Jiyaniijia”.

<sup>38</sup> Caapiqui nohuasenujuacaari Jesu shuriucua teetesaaquiaarijuhua, socua tamonu caapiqui niyacutesanojinia; tamonu na miaquetajara, tamonu na muenecara. <sup>39</sup> Tamasaca pueya tajishacari nucuaco Jesu shuriuquiloc, nojoriiri Jesu macaatiquiaari. Na maanquenuta, nojoriiri Jesu sequetuquiaari:

<sup>40</sup> —¡Jaj! ¡Cumaacaraca quijia naatiijia! Quiaacuajaari sequeja quiaa jaara Pueyaso Secojua tia niyartare, quia naata na tianu tucuatunuhua jiuujianaraca juucajinia. ¿Naatee? ¡Quiaa jaara naa cumaacaraca quiriritj, canaa niqiara quia roserecuraraj, quiaa jaara Pueyaso Niyanu quiri seetanujuaana!

<sup>41</sup> Secojonaa jiyaniijianucuaari tii quiriquiaajuhua Moisés Rootasanojiniji niishitiojonaata, canaa Judiocuaca camarucuanio. Nojoriiri Jesu macaatiriquiaajuhua. Tama sequetooriquiaajaarijia:

<sup>42</sup> —Saaja tamasaca naatanijiojuaquiri. Maja cutaraa na naata tama nocuajijiaaja tacunu. Jaara seetanujuaanaa pa Israel pueya jiyaniijia quiri, cuaara roseera quiaritja pa niqiara niyacutesanojiniji, nocua pa tiuuniuria. <sup>43</sup> ¡Pueyasoocua tiuujia naatiijia! Jaara naa quiriritj, Pueyaso cuaara na roshiniiria, nojuaja jaara seetanujuaana Pueyaso panishano quiri. Nojuacuajaari pa sequeja: “Janiyari Pueyaso Niyanuni”.

<sup>44</sup> Cuno caapiqui nohuasenujuaca Jesu shuriucua teetejosano quiriquiaani, nojoriiri Jesu macaatiriquiaajuhua.

*Jesu cusosacari*  
(Mr 15.33-41; Lc 23.44-49; Jn 19.28-30)

<sup>45</sup> ¡Panacari, mijiriari ninishiquiria quiqiii! Pananu mueecosacari cuhatemohuari.

<sup>46</sup> Jiyacaritij, Jesuuri jiyanhua nacaquiaari naatej:

—¡Elí, Eliinaa! ¿lama sabactani?

Nioori pueyano rupaajinia sequeya: “¡Cua Pueyasonaa, cua Pueyasonaa!, ¿casaara quia carteree janiyani?” <sup>47</sup> Tamasaca na shuriucua nujatunaari na tojitiariquiaa. Nojoriiri sequeree:

—¡Nia tojiri! ¡Supuetana Elías jiiquioonuyano! Noo Elías, tariucuaaanu pueyara Pueyaso sequesano caminiujiumia quiquiaaritij.

<sup>48</sup> Tamonuuri ritia netequee namasu casaa na riniuria. Naajuaacua na morotanu nuhuaji, jereeca vinojinia na shiriiri. Na nuhuaji, Jesuucua na shiitioreeri na raatenura.

<sup>49</sup> Tamasacaari sequeree:

—¡Pa shanacure! ¡Elías jiyoteeri nocua ninutianiya na roshiniuria niyacutesanojiniji!

<sup>50</sup> ¡Jiyacaritij, Jesuuri jiyanhua nacarohua! ¡Na nuhuaji na sohanu tohutaniriiri! ¡Cusoqueeri! <sup>51</sup> Pueyaso Secojua tiajinia, shiquiaruque toquejiniji sohuacaari quiquiaari

Pueyaso Quishaqui mishiquotaja. ¡Jesu cusosacari, cuno toqueeri sutequee jiyocuacaanuji jiyocuaa puetunujuanaa! ¡Rijiaari jiya jiuuquiutiaquiaari jiyanoehua! ¡Sairi jiaquetacocuaaari noojiaacoji! <sup>52</sup> ¡Macunucua raacaari riatequequiaari! ¡Queraatia tariucuaaanu Pueyasocua tiuuniaari samiiticoquee na raacajinia! <sup>53</sup> Jesu jaara samiitiaquiaariuhua, cuno samiitiaconohua pueyari tohareetaquiaari na raacajiniji. Nojoriiri Jerusalén tiacajinia tiuquiutiaquiaari. Nojoriiri queraatia pueyacua muetaquiaari tii, Pueyaso panishano tiacajiniani. <sup>54</sup> Soldadohua capitánri na pueyata Jesu cojuariquiaa, Jesu cuaara cusoyarejaatijia nojori niquiara. Nojori jaara jiya niqutiutiaquiaari jiuuquiutiaano, socua puetunu nojori niquishanojuanaano, nojoriiri jiyanoehua puereturee. Sequetureeri:

—¡Nio pueyanoqui seetanujuanaa Pueyaso Niyanu quiquianu!

<sup>55</sup> Queraatia maajipohuari tii quiriquiaajuhua. Nojoriiri tucuaaanuji shootiaturiquiaa Jesu. Nojoriiri Jesu nuhuajiquiaari Galilea jiyajiniji, Jesura pueraquenuuriquiano. <sup>56</sup> Cuno maajipohua tajinia quiriquiaari María Magdalena, Santiago nucua Marijahuaj, José nucua Mariano, mariyata Zebedeo niquioehua nucuanio.

*Jesu quete niasacari raaco*

(Mr 15.42-47; Lc 23.50-56; Jn 19.38-42)

<sup>57</sup> Tamonu pueyanoori quiquiaari Arimatea tiacajinijinio. Jiyanoehua casamiriaca quijiaari. Na sesa quiquiaari José. Nojuajaari tarijia Jesu tojjiaara quiquiaari. Joseeri Jesu cusonu juucaja tiuquiutiaari cuno tenacari. <sup>58</sup> Joseeri Pilatocua quiquiaari Jesu quete na masenura. Pilatoori na pueya sequeree cuaara na niqutiosaarianoj. <sup>59</sup> Joseeri Jesu quete paquiaari na jeenucuanura raaco na niasocoriquiano. Na jiuniooreeri quenaaruque cohuajaque toquejinia. <sup>60</sup> Na nuhuaji na niaquiaari tama na raacoaarijia. Quiarinio raa quiquiaariiri. José jiutianishano saajiajinia. Na nuhuaji, Joseeri puereetuca saajia saqutiniquiaari raa tootuuria. Quiacuhuari. <sup>61</sup> María Magdalenaari na sesaanucuaata cajititiriquiaa raa canaja taquijiria.

*Soldadohua cojuasacari Jesu raa*

<sup>62</sup> Pascuara jeenucuanu juuca nuhuaji, secojonaa jiyaniijianucuaari Pilatocua quiojoquiaari Fariseocucata. <sup>63</sup> Naa na sequetuseeri:

—Jiyaniijianaa, canaari cuno sapojoua pueyano sequesano niishiquini, na sequesano saminio na quishacarijia. Nojuajaari sequeja: “Janiyari jiuujianaraca juucajinia samitianataniuhuanii”. <sup>64</sup> Nocuaji na raa quia cojuatere maninia tiosano, jiuujianaraca juuca cuaara shocorejaatijia, na pueya mariqui niucua macu nohuasequeeri. Nojori jaara na nohuasere, nojoriiri sequenutaniya Jesu samiitiarohuacuaa. Nojori jaara naa sapojore pueyatej, socua jiyacatenutaniyari Jesu sequesano, nojuaja jaara sequecanu: “Janiyari Pueyaso Jiyarosani”.

<sup>65</sup> Pilatoori nojori sequeree:

—Niya quiyacujaja cua soldadohua. Nojori nia cojuatere maninia cuno raa, taa nia paniyacuajani.

<sup>66</sup> Nojoriiri soldadohua nujuatejoquiaari raa nojori cojuanura. Raa tiotiuuri rupanacusaquiaarijuhuaj jiyaniijia Pilato sesa naajiotajata.

## 28

*Jesu samiitiasacariuhua*

(Mr 16.1-8; Lc 24.1-12; Jn 20.1-10)

<sup>1</sup> Samaatenu juuca jaara shocoquiaari, coteenu juuca seamaaninjini juhuaquesacari, shusha cuhuatesacari, María Magdalenaari raa niquniucua quiariquiaa na sesaanucuaata. <sup>2</sup> ¡Canashiyaquiji, rijiaari jiyanoehua jiuuquiutiaare! Cunoori quiquiaari Pueyaso seru rosenucua jiyocuacaanuji raacua. Raa tiotiu saajia saqutinishiiri. Na nuhuaji, saajiaacua cajiriohuari. <sup>3</sup> ¡Pueyaso seruuri niquishaquiaari shacantuca juhua micana! Na toqueeri jiyanoehua cohuajaque quiquiaari, juhua sohuantuu. <sup>4</sup> Raa cojuatunaari jiyanoehua shiriqutiutiaquiaari nojori niquishacari Pueyaso seru. Jiyanoehua tetecatureeri. Na puerenuta socua cusejonuureeri. <sup>5</sup> Maajipohua jaara tiuquiutiaari raajinia, Pueyaso seruuri nojori sequeree:

—Maja nia shiriqini. Janiyacuajaari niishiyani niaari Jesu pajeya, niyacutesanojinia mosanotej. <sup>6</sup> Maja niya na quiniu. Tari samiitiarohuano, taa nojuaja sequequiaari nijaniyacujani. Miji. Nia niquishushiiria na masaqui. Shaaqui. <sup>7</sup> Ritia nia quiaarohua. Na saqiriojosano pueya nia sequesuhua: “Jesu tari samiitiarohua. Nojuajaari nia puetanutaniya Galilea jiyajinia. Niaari jati na niquniutianiya”. Janiyacuajaari tari nia sequereeni. Naa nia pohuatasuhua na pueya.

<sup>8</sup> Maajipohuari masaacujutanuuriquioehua raajiniji na puerenuta, na shuquiriniutiajuhuaj. Nojoriiri socua netecuatiuyarohuaj, canaa na pohuatanuhua Pueyaso

seru sequesano nojori. <sup>9</sup> ¡Jiyacaritij, Jesujuanaari canashiyaquiji nojoriicua muetaquee nuujinia! Nojori saruhuatareeri. Maajipohuari nocua catecanoree. Na cariquimiaji mojoquetacoreeri. Jesu niohuaca quiatuereeri. Jesu shootiatuereeri na jiuujiatenuta. <sup>10</sup> Jesuuri nojori sequerree:

—Maja nia puerenu. Nia quiaarohua. Cua pueya nia sequesuhua nojori cuaara quiojoorra Galilea jiyajinia. Nojoriiri seetanujuanaa cua tapueyocuaca. Nojoriiri jati cua niquitiuniutianiya.

*Raa cojuanaa pahuatasano*

<sup>11</sup> Maajipohua quiojosacariuhua, noojiaqueya raa cojuanaajiniinooori tiacajinia quiojoquiaariuhua pueyacuara secojonaa jiyaniijianucua nojori pahuatanura nojori niquishano. <sup>12</sup> Pueyacuara secojonaa jiyaniijianucuaari canaa Judiocuaca camarucuata rerejoree na roojotoonura taa na miitiuniutianiyani. Na nuhuaji, nojoriiri queraatia cumaneeca niquitioquiaari raa cojuanaa, pueya niquiara nojori pahuatanura tamaatia nojori niquishanojiniji. <sup>13</sup> Soldadohuari naa rootasaquiaaritiij:

—Niocua na sequere pueyatej: “Canaa maquesacari, Jesu pueyaquiiri niucua nohuasequee Jesu quete raajiniji”. Niocua na sequeretej. <sup>14</sup> Jiyaniijia Pilato jaara niishiri naa nia pahuatasacariitij, majaari nia puerenu. Canacuajaari na shiniajanutianiyani jaara juaari. Naacuajitij, majaari na juaani quiniutianiya nijaniya.

<sup>15</sup> Jiyacaritij, soldadohuari cumaneeca maseree. Nojoriiri naa pahuatanu coteequiaari taa nojori rootasaareecuajani. Nojori cuaracashishanoori ritia caminiujiushaaquiaari canaa Judiocuacura. Naacuajitij, canaa Judiocuacaari naa sequeyajaa quiarijia.

*Jesu rootasacari na pueya na jiyaramiquiyaquishacarijia nojori*

*(Mr 16.14-18; Lc 24.36-49; Jn 20.19-23)*

<sup>16</sup> Canaa, Jesu once saquiriojosano pueyani, canaari Galilea jiyajinia quiojoquiaari tamonu tuhananuucuan. Jesuuri canaa sequequiaari canaa quiojonura tiriara, tii canaa coquetonura nata. <sup>17</sup> Canaa niquishacari Jesu quiyano tii, canaari nocuara mojoquetacquiaari canaa shuquiritianura nojuajani. Tamasaca canaajiniinooori jiyaniriquiaa maja naasucuaari Jesu. <sup>18</sup> Jesuuri canaacia catecanoree. Canaa sequereeri:

—Janiyari puetunu cumaacajanaa niquitiosaaareeni, Jiyaniijiajanaa cua quiniuria jiyocuacaanu, mijirianio. <sup>19</sup> ¡Naaratej, nia quiojore! ¡Puetunu pueyapuejanaa nia pahuatare cua rupaa, cua tojitiajacara nojori quiniuria! Moojinia nia tiuquinijiore cua tojitiajaca Pueyaso sesajinia, nojori rupuesacari pa Que Pueyaso, janiya, na Sohuanunio. <sup>20</sup> Nojori nia niishitiojore puetunu cua rootasanojuanaa nijaniya, nojori tojishocoriquiano. Nia niishiri nio: ¡janiyacuajaari niaata quiniutianiya pueyaracaanuni, jiya cuaara puequerejaatijia!

## MARCO NAAJOTASANO JESUCRISTOJINIJI

*Cariiquia jiyajinia Tiuquinijiona Juan poojotasacari Pueyaso rupaa  
(Mt 3.1-12; Lc 3.1-9, 15-17; Jn 1.19-28)*

<sup>1</sup> Pueyaso Niyanu Jesucristojiniijiiri naa coteetasaaquiaari pohuatanutej.  
<sup>2</sup> Tariucuacaanu pueyara Pueyaso sequesano caminiujiunia Isaiásri Pueyaso Niyanu niyacari naajiotaquiaari. Naajiotaquiaariiri taa Tiuquinijiona Juan poojotanutaniya pueya jeenucuanura nojori jiuujiani, niriquiano Jesu tojjia nojori quiniuria. Isaiásri naa naajiotaquiaari Pueyaso sequesano miriqui Neyanutej:

“Janiyari quiocuaji jiyaronutaniya tamonuni, quiocuaji quia nuu jeenucuariquiano. <sup>3</sup> Na nacanuari tojishaanutaniya cariiquia jiyajinia. Naa pueya sequeyari: ‘¡Nia jeenucuare Jiyaniija nuu! ¡Nia nuunore maninia, maja shuutiuniu!’”

<sup>4</sup> Quiari naataja, Tiuquinijiona Juanri seetanujunaan naa miiquiaari cariiquia jiyajinatej. Nocua nijionaa pueya tiuquinijioriquiaa moojiniaari. Tiuquinijiona Juanri cuno pueya sequequiaari:

–¡Nioojia nia tacatore sesa nia miiniujiniji, moojinia cua tiuquinijionura nijajaniya!  
¡Pueyasocua sesa nia miishanojiniji nia jiyanoori puetunujuanaa!

<sup>5</sup> Puetunu Judea jiyajininio pueyajanaari nocua nijioquiaari nojori tojtianura nojuaja, Jerusalén tiacajininio pueyano. Cuno pueya jaara sesa na miishano pohuataquiaari Juan niqiuara, Pueyaso niqiuarajuhuj, Juanri nojori tiuquinijioquiaari Jordán moojinia.

<sup>6</sup> Tiuquinijiona Juan toqueeri camello cajacajiniji shitiasano quiquiaari. Na cajiniocua na camarucutesanoori quiquiaari shoque sacuanijiasano. Na miaquesanoori quiquiaari sequeru, samiyatunio, cariiquia jiyajinia na riuratasano. <sup>7</sup> Juanri pueya niqiuara pohuataquiaari naatej:

–Tamonuuri cua nuhuaji niniutianiya. Nojuajaari socua cumaacaraca janiyajiniji. Janiya maara shuquiriaatia quirini, nojuaja jaara quenaaja cua sequere cua naacutanura nojuaja, juhua na seru, na sapatu neyocua cua samaacatanura. Nojuajaari Jiyaniijiajanaa cutara janiyajiniji. <sup>8</sup> Janiyari nia tiuquinijiya moojiniani, juhua jeequejosano nia quiniuria sesa nia miishanojiniji. Cua nuhuaji ninia cutaraari Pueyaso Sohuanu tiuquinijionutaniya nioojiajinia, na cumaaca nia jitianura, seetanujunaan maninia miijiaa nia quiniuria.

*Jesu tiuquinishacari moojinia  
(Mt 3.13-17; Lc 3.21-22)*

<sup>9</sup> Jesuuri jiyacari Nazaret tiacajiniji quiaquiaari Tiuquinijiona Juancua. Nazaret tiacaari Galilea jiyajinia quijia. Tiuquinijiona Juanri Jesu tiuquiniquiaari Jordán moojinia. <sup>10</sup> Jesu tacasacari moojiniji na tiuquinishaanu nuhuaji, jiyacaritij, nojuajaari jiya cajiniocua niqiuquiaari riateyano. Pueyaso Sohuanu niquiriri nocua roseyano juhua mococoonu. Nocua tiuushiiri. <sup>11</sup> Jiyacaritij, jiyocuaaanuji tojishaaquiaariiri Pueyaso pocuaano. Naa Jesu sequequiaariiri:

–¡Quiaari Quiyanuniyojua, cua panishano! ¡Jiyanohua quia timitiaanjia!

*Samaruhua jiyaniija saniniujiushacari Jesu  
(Mt 4.1-11; Lc 4.1-13)*

<sup>12</sup> Na nuhuaji, Pueyaso Sohuanuuri Jesu jiyatequiaari ritia cariiquia jiyajiniara.  
<sup>13</sup> Jesuuri cuarenta juuca shocojotequiaari tii tamajaaja, puereeta jiya camaruhua casami quishaqui. Tii na quishacari, Satanásri Jesu saniniujuriquiaa na tojjijara Jesu quiniuria juucua. Na nuhuaji, Pueyaso seyari nocua nijioquiaari na naacunura, na mianuutenura-juhuj.

*Jesu coteesacari poonijonu Galilea jiyajinia  
(Mt 4.12-17; Lc 4.14-15)*

<sup>14</sup> Jiyaniija Herodes jaara Tiuquinijiona Juan nujuatequiaari nujuatejoajajinia, na nuhuaji, Jesuuri Galilea jiyajinia quiaquiaariuhua. Nojuajaari pueya niqiuara poojotaquiaari tii, maninia pohuatasano Pueyasojiniji, taa Pueyaso jitianutaniya na muerasuni. <sup>15</sup> Jesuuri naa sequequiaari pueyatej:

–Nia sequeyanijia, nio pa quishacarini, quiarijiaari Pueyaso jiyanooshacari pueya, na muerasura nia quiniuria. Cunora, Pueyasojiniji cua pohuatasanoocua nia tiuuri. Nioojia nia tacatore sesa nia miiniujiniji, Pueyaso tojtiajaca nia quiniuria.

*Jesu saquiriojosacari pueya, na tarajariquiano  
(Mt 4.18-22; Lc 5.1-11)*

<sup>16</sup> Galilea caminia shuriuquioco Jesu rucuanijosacari, nojuajaari Pedro niquiquiaari, tarajanu Andrésnio. Nojoriiri shiyaru jaqueroootanaa quiquiaari. Jiyacariitij, nojoriiri shiyaru jaquerootariquiaa caminiajinia. <sup>17</sup> Jesuuri nojori sequeese:

—¡Miji, cua nuhuajitiuyare! Janiyari nia jiyatenutaniya pueya quioojuara saniniunijia, juhua sapitiaaja.

<sup>18</sup> Nojoriiri ritia na shiyaru tiujiaquiaari. Jesuta quiojijareeri.

<sup>19</sup> Socua shiitianiyojua na tacoji Jesu canujusacari, Santiago niquishiiri, tarajanu Juanio. Nojoriiri na shiyaru cushipirijionuuriquiaa botejinia. Nojoriiri Zebedeo niquiohua quiquiaari. <sup>20</sup> Jesuuri jiyacari nojori sequequiaari nata nojori quianurajuhuj. Nojoriiri na que Zebedeo tiujiaquiaari botejinia na naacunaata. Nojoriiri Jesuta quiojoquee.

*Samaruraca pueyanojiniji pohuatasano*  
(Lc 4.31-37)

<sup>21</sup> Nojoriiri Capernaum tiacajinia tiuquishii. Samaatenu juuca, Jesuuri tiuquiquiaari Pueyaso secjojua tiajinia. Tii pueya niishitiojonu coteequiaariiri. <sup>22</sup> Pueyari jiyanhua jiuujiatequiaari na rootasano nojori tojishacari. Jesuuri juhua jiyaniijajanaa niishitiojoriquiaa. Majaari na niishitiojonu quiquiaari taa Moisés Rootasanojiniji niishitiojonaa niishitiojoquiaaricuaani. Nojoriiri saaja Moisés pohuatasanojiniji caminiujuquiaari, pueya niqiuara nojori pohuatasacari Pueyaso Rupaa. <sup>23</sup> Samaruraca pueyanoori Pueyaso secjojua tiajinia quiriquiaa tiijuhuj. Nojuajaari nacaquiaari:

<sup>24</sup> —¡Nazaret tiacajininjio Jesunaa!, ¿quiaateeri tari canaacua nimiaa, canaa quia shaajana? Janiyari quia niishiyani. ¡Quiaacuajaari Pueyaso Nyanu!

<sup>25</sup> Jesuuri cuno samaru juaari. Na sequereeri:

—¡Quia sanaajere! ¡Quia tohuatere nio pueyanojiniji!

<sup>26</sup> Jiyacariitij, samaruuri jiyanhua taraatia miirii cuno pueyano. Jiyanhua na sariyotequiaariiri na tohuatasacari nojuajiniji. Juhua macu tiujiaquee pueyanoori. <sup>27</sup> Puetunu pueyajanaari shiriiquitiquiaari. Tama nojoriijaarijia nequesoreetooquiaari:

—¿Casatucuaa nioni? ¡Nioruhua quiarinio niishitiojosano! ¡Nio pueyanoqui cumaacaraca! ¡Taa samaruhua tojitiaa nojori na jiyarosacariiri!

<sup>28</sup> Pueyari ritia caminiujuquiaari Jesujiniji puetunu Galilea jiyajiniajanaa.

*Jesu naatanishacari Simón Pedro reyarucua*  
(Mt 8.14-15; Lc 4.38-39)

<sup>29</sup> Jaara tohuareetaquiaarihua Pueyaso secjojua tiajiniji, Jesuuri Simón, Andrés tiajinia quiaquiaari Santiagota, Juantano. <sup>30</sup> Simón reyarucuaari naseeca matariquiaa maquetujinia. Cusosutuhuj. Tiajinia quiniaari Jesu sequeturee nojuaja cusosu mataa. <sup>31</sup> Jesuuri nocua canujijaree. Na juaashiquiajiniji cusosu sanaseeri. Na cusonuuri seetanujanaa ritia tajiquiaari nocuaji. Naacuajitij, nojuajaari pueya mianuutenu coteequiaari ritia.

*Jesu naatanijosacari queraatia cusosuhua*  
(Mt 8.16-17; Lc 4.40-41)

<sup>32</sup> Shusha ninishacari, Jesuucua patootasaaquiaariiri puetunu cusosuhujanaa, samaruhuaraca cusosu pueyano. <sup>33</sup> Puetunu cuno tiacajiniji pueyajanaari tia tohuatayaji rerequeequiaari tee Jesu quiriquiaacuajani. <sup>34</sup> Jesuuri queraatia puetunu tamaatia cusonujanaa naatanijioquiaari na rupaa cumaacata. Queraatia samaruhua tohuatanijioquiaari tamasaca pueyajinijiaariuhuj. Samaruhuari niishiquiaari cante Jesuni. Nocuaji, majaari Jesu shanacunu quiquiaari samaruhua pocuanura quenaaja.

*Jesu pohuatasacari Pueyaso rupaa Galilea jiyajinia*  
(Lc 4.42-44)

<sup>35</sup> Jesuuri jiyanhua tariquicuajaji sanequiaari, ninishiqui quishacarijia. Tiacajiniji quiaquiaari tamaquiriaari, tii Pueyaso na secjonura tamajaaja. <sup>36</sup> Na nuhuaji, Simónri Jesu pajenuucua quiojoquiaari, nata quiniaata. <sup>37</sup> Jaara na riuriatatuquiaari, na sequetuseeri:

—¡Puetunu pueyajanaa quia juuretaa!

<sup>38</sup> Jesuuri saaja nojori sequereeri:

—Pa quiaare juhuari catecanaataja tiacajinia. Tii pa pohuatarehuhua Pueyaso rupaa pueya niqiuara. Janiyacuajaari cunora jiyasohuaja tohuataareeni.

<sup>39</sup> Naacuajitij, Jesuuri puetunu Galilea jiyajiniajanaa rucuanajoquiaari. Pueyaso rupaa pohuataquiaariiri Pueyaso secjojua tiacajiniaqueya puetunu Galilea jiya tiacajiniajanaa. Nojuajaari samaruhua tohuatanijioquiaarijuhuj.

*Jesu naatanishacari lepraraca pueyano*  
(Mt 8.1-4; Lc 5.12-16)

<sup>40</sup> Lepraraca cusosu pueyanoori Jesuucua catecanoquiaari. Jesu cariquimiaji mojqe-taseeri. Na sequereeri:

—Quiaa jaara paniri, quia naata cua naataniniu cua cusonujiniji.

<sup>41</sup> Jesuuri nocua taraajequiaari. Na juaashiquia niaree nocuaari. Na sequereeri:

—Taaquiririnij. Quia naataniniu paniyanijia. Quia cuaqueya cuara jeequehuara.

<sup>42</sup> Jesu jaara naa na sequequiaariti, na lepraari ritia cushiriqii. Na cuaqueyajiniji shaajequiaariiri na cusonu. Na cuaqueyari maninara quiquiaariuhua. <sup>43</sup> Na jiyaroy-aquishacarijia na naatanishano pueyano, Jesuuri jiyanoohua na rootaquiaari. Na sequereeri:

<sup>44</sup> —¡Cua tojiri, majaari pueya quia pohuatanu cua miishano! Saaja pueyacuara sec-  
ojonaa jiyaniijia quia cuaqueya quia niquitishii, na cartenuhuara quiajaniya, pueya  
tajinia quia rucuanefonuhua juhuajaniya. Mariyata ritia quia niquitiore quia seru  
Pueyasocuara catijasocoriquiano. Naa quia miiri taa Moisés niishitioquiaaricujani,  
puetunu pueyanaa niishinuria quiaa tari naatarohua quia cusonujiniji.

<sup>45</sup> Cuno pueyano jaara quiaquiaari, juhuacatecara pohuataquiaari puetunu pueya-  
janaari taa na naatanishaarohuani. Naaratej, puetunu pueyajanaari Jesu niqiniu panijia.  
Cunora, Jesuuri maja tari na naata tiuqiniu quiquiaari juhuajaniya tamonu tiacajinia.  
Nocuaij Jesuuri pueya quiaquishaqui rucuanajoa. Naajaa, puetunu cuno jiyajiniji  
pueyajanaari saaja nocua nijqoquiaari na niqiniuria.

## 2

### *Jesu naatanishacari cumatacuruhuana cusosu* (Mt 9.1-8; Lc 5.17-26)

<sup>1</sup> Na rucuanefonu nuhuaji, Jesuuri Capernaum tiacajinia tiuquiquiaariuhua na saquiri-  
ojosano pueyata. Pueya jaara niishiquiaari Jesu tari na quijia tijinia tiuquiriohua,  
<sup>2</sup> queraatia pueyari nocua nijjoquiaari cuno tijiniara. Nojoriiri tiaco mishiquiaari,  
tohuatayajijiuhuaj. Jesuuri cuno pueya niqiuara pohuataquiaari Pueyaso rupaa. <sup>3</sup> Jesu  
quishacari tii, nocua patasaquiaariiri pueyano cusosu na matujinia. Cuatro pueyari na  
patamaa. Cuno cusosuuri pootia mataja quiquiaari pueyaracaanu, cumatacuruhuana  
na quiniucua. <sup>4</sup> Cusosu patanaari maja na naata tiaco tiuquitianu quiquiaari Jesu-  
ucua, puera pueya rerequesacari tohuatayaji. Nocuaij nojoriiri tia cacojiria cusosu  
tacataquiaari tacatuhooco. Nojoriiri tia nijinia cuhuataquiaari. Namitia Jesu nujuasaqui-  
janaa cuhuataturee tiaari. Na nuhuaji, tia cuhuocojiniji, Jesuucua roshinitiasaareeri  
cusosu na matujinia. <sup>5</sup> Jesuuri cusosu patanaa pueya niquirii seetanujuanaa nocua  
tiuyano. Naaratej, Jesuuri cusosu sequeree:

—Quiyanunaa, sesa quia miishanojiniji quia jiyanoorii taricujaniijia.

<sup>6</sup> Moisés Rootasanojiniji niishitiojonaari tii cajituriquiaa. <sup>7</sup> Nojori tojishacari Jesu  
jiyanoyano cuno pueyano, nojoriiri niishiriojonuuree: “¿Casaara nio pueyano pocuaa  
naani? Majaari quenaaja pueyano naata pa jiyanooni sesa pa miishanojiniji. ¡Nojua-  
jaari tama na cuaqueyajaaja jiyateya juhua Pueyaso na quiniuria! ¡Cunoori jiyanoohua  
sacuraatia! ¡Saaja Pueyaso cutaraari na naata pa jiyanooni!” <sup>8</sup> Jesuuri tamajaaja  
ritia niishiquiaari noojajinia naa cuno pueya niishiriojonuusano. Jesuuri cunora nojori  
sequeree:

—¿Casaara naa nia niishiriojiani? <sup>9</sup> ¿Casaate jiyajenetashiya sequenurani: “Sesa quia  
miishano tari jiyanooshaaree”? ¿Mariyata jiyajenetateeri sequenurajuhua: “Quia sanere.  
Quia matu quia pataarohua”? <sup>10</sup> Seetanujuanaa nia sequeyanijia, janiyari quiarijia nia  
niishitiniutianiyani, pueyano cua quishacari mijiria, naajaa, janiyari Pueyaso cumaaca  
jiitiaa sesa miijiaa cua jiyanoonuriani.

Jiyacaritij, Jesuuri cumatacuruhuana cusosu sequeree:

<sup>11</sup> —Cua tojiri. ¡Quia sanere! Quia matu quia patare. Quia tijinia quia quiaarohua.

<sup>12</sup> Cusosuuri ritia sanequee. Pueya niqiuara na matu pataarohuari. Naaratej, pueyari  
jiujuatequiaari. Pueyaso maniniuhuaqueetatureeri. Cuno pueyari naa sequetuquiaariti,  
na shuquiritiasacari Pueyaso:

—¡Majaari quenaaja pa niqiniu quiquiaari naa miishanotej!

### *Jesu sequesacari Leví na nuhuajiniuria* (Mt 9.9-13; Lc 5.27-32)

<sup>13</sup> Na nuhuaji, Jesuuri na saquirojosano pueyata tacatequiaariuhua caminia casaque-  
yajiria. Queraatia pueyari nocua nijjoquiaari. Jesuuri cuniqui nojori niishitiojquiaari  
Pueyaso rupaa. <sup>14</sup> Na nuhuaji, Jesu quiojosacari na saquirojosano pueyata cuniquiji, Jesu-  
uri Leví niqumiaa cajiyano Roma tiacajinia quijia jiyaniijia cumaneeca masejoajinia.  
Nojuajaari Alfeo niyanu quiquiaari. Jesuuri na sequeree:



—Miji. Cua nuhuajiyare.

Jiyacaritij, Leviiri sanequiaari. Jesu pueyanora quiaquiaariiri.

<sup>15</sup> Cuno niucuaaja, Jesuuri Levi tiajinia miaqueriquiaa. Levi tiajinia miaquenuuriquiaa-jaariuhua queraatia narta cumaneeca masejonaa. Queraatia tamasaca pueyari nojoritia miaquenuuriquiaajuhua, canapue Judiocuaca camarucosa sequequiaari sesa pueyatacua-jani. Nojoriiri Jesuta miaquenuuriquiaa, Jesu saquiriojosano pueyatanio. Jiyanohua queraatia pueyari Jesu rupuenaa quiriquiaa. <sup>16</sup> Moisés Naajioneejiniji niishitiojonaa, mariyata Fariseocuaca jaara Jesu niquirii cuno pueyata miaqueyano, nojoriiri Jesu saquiriojosano pueya nequesotaquiaari:

—¿Casaara nia niishitiojona miaqueya cuno cumaneeca masejonaatani, mariyata cuno sesa miijiacatani? ¿Casaara cuno pojoritia na ratuyajaanihua?

<sup>17</sup> Jesuuri cuno pueya sequesano tojirii. Nojori sequeere miriquiri:

—Jiyotuuaari maja na paniniu naarajona. Cante cusosuni, cuno cutaraari naarajona paniya. Majaari cua niniu quiquiaari maninia miijiacacua. Niquiaari cutaranijia nia sequesano sesa miijiacua cua jiyanooniuria sesa nojori miijiosanojiniji.

*Pueya nequesotasacari Jesu, casaara na pueya miaquenu carteyaquiya, nojori shuquir-tiniuria Pueyaso*

(Mt 9.14-17; Lc 5.33-39)

<sup>18</sup> Tamacari, Tiuquinijiona Juan tojitiajaca, mariyata Fariseocuaca miaqueyaquishacari, tamasaca pueyari Jesuucua niijioquiaari. Na sequetuseeri:

—¿Casaara quia saquiriojosano pueya carteyaquiya miaquenu quenaajani? Tiuquinijiona Juan pueya cutaraari miaajecoquiaa Pueyaso nojori shuquirtiniuria. Fariseocua-caari naa miiquiaajuhua. ¿Casaara naa quia pueya miyaquiyaajaanihua?

<sup>19</sup> Jesuuri nojori riucaaree miriqui:

—¿Masuusano pueyateeri miaajenutaniya nojori jaara queranacusaqui quiya, pueyano camishacari maaji? Camiriquiano pueyano jaara nojoritia quiyajaa, maja na naata nojori miaajenu, shuquiriaatia nojori quishacari. <sup>20</sup> Tamacari cutara, cuno camiriquiano pueyanoori nojori tajiniji rishaanutaniya. Cua pueyari jiyacari miaqueyaquiniutaniya cutara.

<sup>21</sup> Seetanujuanaa nia sequeya cutaranijia, toque mocua cuhuocoori maja na naata c-shipirijiosaanu quiariqui toquerauta. Jaara jeequesaare, quiarinio toquerauri posequeja. Naacuajitij, toque mocua cuhuocoori socua queraaquetaree. <sup>22</sup> Naajuhua, quiariniacu uva caacaari maja na naata racatasaanu shoque tariucuacojinia. Quiariniacu uva caaca jaara jerema, shoque tariucuaco pojuaretaari. Naacuajitij, paari najuhuaa niitiaa uva caacani, shoqueno. Cunora, maninia cutaraari quiariniacu uva caaca shuujionu shoque quiariquiojinia, maja vino niitiasaanura najuhuanaj, shoqueno.

Jesuuri naa pohuataquiaaritij, pueya na niishitiojonura quiarinio na niishitiojosanoori maja na naata cojitishaanu tariucuacaanu niishitiojosanota.

*Jesu pueya carojotasacari trigo samaatenu juuca*

(Mt 12.1-8; Lc 6.1-5)

<sup>23</sup> Jesuuri samaatenu juuca quiojoquiaari cuhuariquiajiniaaco na saquiriojosano puey-ata. Na pueyari jiyacari trigo carojotanu coteequiaari na miaajenuta. <sup>24</sup> Fariseocuaca jaara na niiquiaaari, Jesu sequetureeri:

—¡Quia niquiri! ¿Casaara quia saquiriojosano pueya poonijiya samaatenu juucani? ¡Pueyaso Rupaajinia, paari piriyojoshiyacuaajani maja samaatenu juuca pa poonijionura!

<sup>25</sup> Jesuuri nojori sequeere:

—¿Majateeri nia serojonu quiquiaari Pueyaso Rupaajinia pa supuetanaa jiyaniijia David miishanojiniji, nojuaja jaara miaajequiaari na cojiniaata, nojori jiiitiaaquishacari na cosey-aca? <sup>26</sup> Cuno quishacari, supuetana Abiatar pueyacuara secejonaa jiyaniijia quiquiaari. Davidri tiuquiquiaari Pueyaso Secojoua tiajinia. Nojuajaari Pueyasora niquitiosano panjiniji saquiaari. Cuno panri saaja Pueyaso Secojoua tia cojuanaa sasocoriquiano quiquiaari. Naajaa, Davidri na saquiaari. Na neecasequiaariiaariuhua nata quiniaa pueyara.

<sup>27</sup> Jesuuri nojori sequequiaarijuhuaj:

—Pueyasoori samaatenu juuca shipiniquiaari pueyara. Maja cutaraari Pueyaso ship-ininiu quiquiaari pueya, samaatenu juucara. <sup>28</sup> Naaratej, pueyano cua quishacari mijiria, janiyari cumaacaraca cua Quejinijini cua sequenura casaa pa miiniutaniya samaatenu juucani. Janiyacuajaari samaatenu juuca camarnuni.

## 3

*Jesu jeeacasacari pueyano juaashiquia cuseetucojuara joojequetano*  
(Mt 12.9-14; Lc 6.6-11)

<sup>1</sup> Jesuuri Pueyaso secuojua tiajinia tiuquiquiaariuhua na saquiriojosano pueyata. Tii quiriqiaari pueyano, cuseetucojuara joojequetano juaashiquiaraca. <sup>2</sup> Cuniqiu quiniaa Fariseocuacaari shanacutariquiaa na niqiniuria taa Jesu miiniutianianoj. Nojoriiri tama sequetooreejaaja:

—Jesuteeri sesarucujua pueyano juaashiquia jeeacanutaniya samaatenu juucani?

Nojoriiri Jesuucara saquiriojotanu paniriquiaa, nojuaja jaara samaatenu juuca pooni-jiore. <sup>3</sup> Jesuuri jiyacari sesarucujua pueyano sequere:

—Quia sanere. Niya quia nujuasee canaa tajinia pueya niqiara.

<sup>4</sup> Na nuhuaji, Jesuuri pueya nequesotaree:

—¿Casaate samaatenu juuca miishiyani? ¿Paate maninia miyani, paate sesa miya soj? ¿Pueyanote naatanishiya, moshiyajanaa soj?

Nojoriiri sanaa niqitiariquiaa saaja, Jesu sequesacari naatej. <sup>5</sup> Jesuuri na shocuaqueya nujuatiuyano pueya niqiniujioree na juaaniutia. Nojoriicua taraajeriquiaaariuhua, cumajiuujiaaca nojori quiniuucua. Majaari nojori niishiniu paniniu quiquiaari taa Pueyaso paniya pueyacuara taraaja pa quiniuriani. Jesuuri sesarucujua pueyano sequere:

—¡Quia juaashiquia quia shiitiore!

Na juaashiquia shiitioreeri. ¡Jiyacaritij, na juaashiquiaari ritia jeequequee!

<sup>6</sup> Fariseocuaca niquishacari naa Jesu miishanotej, nojoriiri tohuareetaquee na juaaniutia. Nojoriiri Herodes panijiaaca pueyata pocoojoquiaari ritia, taa nojori monutaniya Jesuni.

*Queraatia pueya rerequeejosacari caminia casaqueyajaj*

<sup>7</sup> Na nuhuaji, Jesuuri quiojoquiaari caminiajinia na saquiriojosano pueyata. Queraatia pueyari na nuhuajiquiaarijuhua Galilea jiyajinjij. <sup>8</sup> Pueya niishishacari puetunu Jesu maninia miishanojinijijianaa na cumaacata, queraatia pueyari nocua nijioquiaari na niqiniuria. Nojoriiri nocua nijioquiaari puetunu jiyacajinjijinojuanaa: Judea jiyajinjijinio pueya, Jerusalén tiacajinjijinio pueyajuhua, Idumea jiyajinjijinio pueyano. Nijioquiaarijuhua Jordán moo taquijirajinjij pananu muetasamaji pueya, Tiro tiacajinjijinio pueyano. Sidón tiacajinjijinio pueyari nijioquiaarijuhua na niqiniuria Jesu. <sup>9</sup> Nocujaj Jesuuri na saquiriojosano pueya sequequiaari:

—Nocua juhuacarijia bote cojuare quiria, cua tacajara pueyacuajaj, maja pueya tanuujunura janiya.

<sup>10</sup> Jesuuri jiyacari jiyanhua queraatia pueya naatanijiriquiaa. Nocujaj cusosuhuari Jesuucua riutioconeetariquiaa na quianura Jesu, nojori cusonujinjij nojori naataconuhua.

<sup>11</sup> Samaruharaca pueya jaara Jesu niqitiuquiaari, nojoriiri nocuaa mojuquetacoquiaari. Naa nacatuquiaariiri:

—¡Quiaacuajaj Pueyaso Niyanu!

<sup>12</sup> Nocujaj Jesuuri nojori sequequiaari na juaaniutia, maja nojori sequenura pueya niqiara cante nojuajani.

*Jesu saquiriojosacari doce pueya na pueyajinjijinio, na rupaa pohuatariquiano*  
(Mt 10.1-4; Lc 6.12-16)

<sup>13</sup> Na nuhuaji, Jesuuri tacaquiaari tuhananuucua. Nojuajaari tiji sequequiaari cana na paniquiaaricuajani. Nocua nijioquiaariiri na jyaniquishano pueya. <sup>14</sup> Jesuuri doce pueya saquiriojoquiaari nata nojori quiniuria. Nojori jiyatereeri na jiyaramiquishocoriquiano, Pueyaso rupaa nojori pohuatanura. <sup>15</sup> Nojori niqitioree na cumaacaari, cusosuhua nojori naatanijionura, samaruhua nojori tohuatejonurajuhua. <sup>16</sup> Niioori na saquiriojosano doce pueya sesaca: Simón, Jesuuri na sesojoquiaari Pedro; Santiago, tarajanu Juannio. <sup>17</sup> Jesuuri nojori sesojoquiaari “Boanerges”. Naa sequenu paniyari nio, “Ritia juaajia, juhua miacana”. Nojoriiri Zebedeo niqiohuhua quiquiaari. <sup>18</sup> Socua quiquiaariiri Andrés, Felipe, Bartolomé, Mateo, Tomás, Santiagonio. Nojuajaari Alfeo niyanu quiquiaari. Socua quiquiaari Tadeo, Simónnio. Nojuajaari Romano pueya jatanu panijiaaca pueya manujinjijinio quiquiaari. <sup>19</sup> Quiquiaarijuhua Judas Iscariote, Jesu quietequiaari mosocoriquianoni.

*Judicuaca camarucua sapojosacari, Jesu samaruhua cumaaca jiiitiaa*  
(Mt 12.22-32; Lc 11.14-23; 12.10)

<sup>20</sup> Na nuhuaji, Jesuuri na saquiriojosano pueyata tamonu tiajinia tiuquitiaquiaari tamonu tiacajinia. Queraatia pueyari tiuquitiaquiaarijuhua cuno tiajinia Jesuucua. Naacuajitij, majaari nojori naata miaquenu quiquiaari. <sup>21</sup> Jesu tapueyocuaca jaara

niishiquiaari naa nocuajitij, nojoriiri nocua nijioquiaari na riniuucua juucua. Tama sequetooriquiaajaariija:

—Jesuqui tari paatecara quiriijuhuanajaj!

<sup>22</sup> Moisés Rootasanojiniji niishitiojonaa Jerusalén tiacajiniji nijiono pueyari saniniuujia naa sequetuquiaari Jesujiniji:

—Samaruhua jiyaniijia Satanáscuajaari cumaaca niquitiorucuaa cuno pueyano. Cunora, samaruhua tohuatanijia pueyajiniiri.

<sup>23</sup> Naaratej, Jesuuri cuno pojori sequequiaari nojori na niishiriojotenura:

—Miji, niya cua tojitisee. ¿Pueyanoteeri na naata Satanás tohuatenu pueyanojiniji tama Satanás cumaacatajaaja? Maja na naata. <sup>24</sup> Naajuhuj, mijiria jiya jiyaniijia jaara juayonuutaa tama na pueyatajaaja, nojuajaari maja na naata nujuatanu na paraa, jaara nocua niijoma. Nojuajaari shocotasaanutaniya. <sup>25</sup> Naajaariuhuj, pueyano jaara tapueyocucata juayonuutare, majaari nojori naata jatiqiu quiniu nojori tiajinia. <sup>26</sup> Niaari saniniuujia cua sequeree, janiyana Satanás cumaacata tohuatanijioquiaa samaruhuan. Satanás jaara naa miiritij, cuno maara tari quiri na shaajasaanurajanaa.

<sup>27</sup> Naajuhuj, pueyano maja na naata tiuquiniu cumueeca pueyano casamiriaca tiajinia, na casami na jaariuutianura, jaara coteenu na camaru morojijaquiri. Pueyano jaara coteenu na camaru morojorejaatijia, na cutara na naata na casami jaariuutianu.

<sup>28</sup> Seetanujanaa nia sequeya cutaranijia, pueyano sesa miishanoori na naata jiyanooshaanu. Janiyajiniji sesa na pocuasanoori jiyanooshiyajuhuj. <sup>29</sup> Saniniuujia, cante sesa rimiaaqueja Pueyaso Sohuanuucarani, cuno cutaraari maja na jiyanooshaanu quiniutianiya quenaaja. Jiyano pueyanotej, nojuajaari pueyaracaanu saniitiosaanutaniya.

<sup>30</sup> Jesuuri naa nojori sequequiaaritij, pueya sequesacari, nojuajana samaruraca quijia, Pueyaso Sohuanu cumaacata na tohuatejosacari samaruhua.

*Jesu nucujiniji pahuatano, Jesu tapueyocucacajinijino*  
(Mt 12.46-50; Lc 8.19-21)

<sup>31</sup> Jiyacaritij, Jesu nucuaari tiuquijioquiaari, Jesu tapueyocucacano. Majaari tiajiniaaco na tiuquitianu quiquiaari Jesuucua. Saaja carijiniacumaji tamonu pueyano sequetureeri na numootenura Jesu nojoriicuara. <sup>32</sup> Jesu shocuaqueya cajitiuniaari Jesu sequeturee:

—Quia nucuana quia tapueyocucata jati carijiniacuma nujuatiuya. Quia pajenuyaquinia.

<sup>33</sup> Jesuuri saaja nojori sequeree:

—¿Cante cua nucuani, cua tapueyocucacajuhuj?

<sup>34</sup> Na nuhuaji, na shocuaqueya cajitiuniaa niqunijioreeri. Sequereeri:

—Nio pueyari cua nucua, cua tapueyocucacano. <sup>35</sup> Cante cua Que panishano miijiani, nojuaja cutaraari cua tarajanu, cua rimiatu, cua nucuano.

## 4

*Miriqui pahuatano natojojua pueyanojiniji*  
(Mt 13.1-9; Lc 8.4-8)

<sup>1</sup> Jesuuri socua Pueyaso rupaa niishitiojonu coteequiaariuhua caminia casaqueyaji. Jiyanohua queraatia pueyari rerequeejoquiaari nojori tojtianura nojuaja. Boteeri tii cutariquiaa caminiajinia. Naacuajitij, Jesuuri botejinia tacaquiaari. Tii cajishiiri, caminia casaqueyaji rerequeejono pueya na niishitiojonura tiji. <sup>2</sup> Cuno pueya niishitiojoreeri queraatia miriqui pahuatano. Na niishitiojosacari pueya, Jesuuri naa sequequiaaritij:

<sup>3</sup> —Nia tojitiare nio sequesano. Tamonu juuca, pueyano na cuhuariquiajinia natoojonuucua quiaquiaari. <sup>4</sup> Na jacutasacari, nucuaco totequiaari tajaaca. Shuhuari na miojoree. Majaari na moritianu quiquiaari. <sup>5</sup> Tajaacaari totequiaari sai tajiniaqueyajujuaj. Majaari cuniqui puera jiya quiniu quiquiaari na maashiniuria. Naacuajitij, najuhuana ritia moritiaquiaari. <sup>6</sup> Pananu jaara jaquiaari, na catijareeri. Maja puera nujuacaraca na quishacari, ritia sorequeeri. <sup>7</sup> Tajaacaari totequiaarijuhua riyocuaa tajinia. Jiohuacacari socua ritia maashiquiaari. Natauri tarinitiucuaa quiquiaari saniniuujia. Naaratej, majaari na muetunu quirii. <sup>8</sup> Tajaacaari saniniuujia totequiaari maninia jiyajinia cutara. Cuno cutaraari maninia maashiquiaari cuno jiyajinia. Senoosaareeri queraatia. Niquriyatu jiyonajiniji carojosaaquiaariiri treinta jajau. Tanajajiniji socua sesenta jajau, naajuhuj socua cien jajau tanajajiniji.

<sup>9</sup> Jesuuri nojori sequeree:

—Cante numaaracani, cuara cua sequesano tojtiaara.

*Casaarate miriqui pahuatasoni*  
(Mt 13.10-17; Lc 8.9-10)

<sup>10</sup> Na nuhuaji, Jesu quishacari tamajaaja, na saquiriojosano doce pueyari na nequesotaquiaari, tamasaca pueyanio. Cuno pojoricuaajaari Jesu shuriucua quiriquiaa. Nojoriiri Jesu sequeree:

—¿Casa miriqui quia pahuatasano sequenu paniani?

<sup>11</sup> Jesuuri nojori sequeree:

—Pueyasoori nia niishitiojiya jiyasohua na miiniu panishano, taa na muerasu na jitianutaniya pueyaracaanu cutarani. Tamasacara saniniuujia, canapuate Pueyaso ruuretajacani, nojoririaari miriqui pahuatashiyacujua. <sup>12</sup> Naacujitij, nojoriiri cua cumaacata cua miishano niqutiuiquiaa pueyaracaanu najuhuanaj. Majaari nojori niishiniu na niqishano. Naajuhuaaj, nojori jaara Pueyaso Rupaa tojitiare, majaari na niishiniu na tojishano. Nojori jaara niishiri, nojori mariqui nojia tacatorohuari sesa nojori miishanojiniji nojori jiyanooshaanura.

*Jesu niishitiojosacari miriqui na pahuatasano natoojonajiniji*  
(Mt 13.18-23; Lc 8.11-15)

<sup>13</sup> Jesuuri nojori sequequiaarijuhuaaj:

—¿Majateeri nia niishiniu miriqui cua pahuatasano? ¿Niaatucua taa niishiriquia socua tamonu cua pahuatanoni? <sup>14</sup> Cua pahuatasano cuhuariquiajinia natoojonajiniji, nojuajaari juhua Pueyaso Rupaa pahuatana. <sup>15</sup> Noojiaqueya pueyari juhua nucuaco toteno jajau. Najuhuaana Pueyaso Rupaa tojiyari. Na tojinu nuhuaji, Satanásri nimiaa. Nojuajaari puetunu Pueyaso Rupaajanaa noojiajinia natasano jaariutiaquiaa. <sup>16</sup> Tamasaca pueyari juhua noo jajau saniniuujia, sai tajiniaqueya jacutasanotej. Nojori jaara Pueyaso Rupaa tojiri, jiyanohua na timitiaari. <sup>17</sup> Cunoori juhua secaja nujuacaraca moritiano jajau, sai tajinia na moritianuucua. Majaari na rishiniu. Naajuhuaaj, cuno pueya jaara saniniuujiaaare taraatia, jaara naquiya miishaarejuhuaaj Pueyaso Rupaa tojijiaa nojori quiniuucua, nojoriiri ritia Pueyasocua tiuuni tarinitiaja. <sup>18</sup> Noojiaqueya pueyari juhua noo jajau, jiohuacata tajiniaqueya jacutasanotej. Pueyaso Rupaa tojiyari. <sup>19</sup> Na nuhuaji, nojoriiri puera niishitiojiya taa nojori quiniutaniya maninia mijiriani. Nojoriiri sapojosaaquiaa puera na shuquiritiasacari mijiria casami. Nio jiya casamiicua jiaatiaquiaaariuhuaaj. Puetunu cunorajanaa, nojoriiri Pueyaso rupaa tojitiaquiaa na numaa shama. Naacujitij, nojoriiri juhua muetuhuo quia. <sup>20</sup> Noojiaqueya pueya saniniuujia, nojori cutaraari maninia tojitiaja Pueyaso Rupaa. Cuno pueyari juhua cuhuariquiajinia natau, queraatia muetujua, maninia jiyajinia natasano. Cuno maninia nataujinijinioni, noojiaqueyari maja puera na muetunu. Tarajanuuri maninia muetuna. Naajuhuaaj, tarajanuuri jiyanohua queraatia muetujua. Naajuhuaaj, cante Pueyaso Rupaa tojijia cutarani, nojuajaari juhua maninia muetujua natau.

*Pueyaso muerasuuri juhua samari*  
(Lc 8.16-18)

<sup>21</sup> Jesuuri nojori sequerejuhuaaj:

—¿Samaritiiiri noshitishano, conatu cariquiaco jamotasocoriquiano, maquetu cariquia-cojuhuaaj? Maja. Samaritiiu jaara noshitishaare, morijiuucua morotashiyari, tajiniaaco na cuhuatanura maninia. <sup>22</sup> Naajuhuaaj, jiyasohua nia miishanoori puetunujuanaa niishishaanutaniya. Cua pahuatasanoori juhua samaritiu, puetunu pueya juujiaajanaa na cuhuatanura. Naajuhuaaj, Pueyaso Rupaa jaara nioojiajinia jamosaare, juhua muetunutanitari puetunu pueya niqishocoriquianojuanaa. <sup>23</sup> Nijaniya, canapuate numaa jiiitiani, nia tojitiare cua pahuatasano.

<sup>24</sup> Jesuuri naa nojori sequequiaarijuhuaaj:

—Nia niishiri nia tojishano. Nia shanacutajataja, teyanota nia shanacujuquiaa nia niqitiosocoriquianocujani, Pueyasoori cunotaja niaara shanacunutaniyahuhuaaj. Naacujitij, niaa jaara capora quiriquia tamasacata, Pueyasoori socua capora quiniutaniya niaarahuhuaaj. <sup>25</sup> Cante na rupaa tojijiani, socua na niishitiojonutanitari. Saniniuujia, canapuate na rupaa tojitiaquiiani, secaja na niishishanoori puetunu jaariutiasaanutanijajanaa.

*Miriqui pahuatasano natau moritianojiniji*

<sup>26</sup> Jesuuri nojori sequequiaarijuhuaaj:

—Nia niishitiojonu saniriiria taa Pueyaso muerasu supuequiaani, Pueyaso jiiitiasano nojori quiniuria. Tamonu pueyanoori na cuhuariquiajinia nataquiaari jajau. Na nuhuaji, majaari na tacatenu quiquiaariuhua pueyaracaanu na natasano na niqiniuria. <sup>27</sup> Cuno pueyanoori na natanu nuhuaji camueenujuquiaari. Cuno jajauri moritiaquiaari juuca, niucuanio. Maashiquiaariiri na camaru maquesacari, na niqishacarijuhuaaj. Tamonu juuca, na camaru tacatesacariuhua na natasano na niqiniuria, tariucua puereetucaari quiquiaari. Majaari na camaru niishiniu quiquiaari taa na moritiareeni. <sup>28</sup> Jiyari

tamajaaja moritianijia natau. Coteenu moritiaari na jiyona. Na nuhuaji, na jajau coori supueya. Na nuhuaji, na jajauri querasapijiaacara quimaa na noshiniuria. <sup>29</sup> Na natau jaara noshimia, na senoonaaari na senoojua na racatasocoriquiano. Pueyaso muerasuuri naa miishaanutaniyajuhuj.

*Miriqui pahuatasano mostaza jajaujini*

*(Mt 13.31-32; Lc 13.18-19)*

<sup>30</sup> Jesuuri socua sequequiaari:

—¿Juhua casaa niquishanote Pueyaso cumaacani? ¿Casaatate pa naata na saniniujiuniuni, taa Pueyaso Rupaa poonijia pueya jiuujiajiniani? Quiaritia nia pahuatareeraj. <sup>31</sup> Pueyaso Rupaari pueya jiuujiajinia quia juhua mostaza jajau. Mostaza jajauri jyanohua socua shiitianiyojua puetunu tamasaca jajaujiniijianaa, majaan puera maatia na niquishaanu. Pueyaso Rupaari naajuhua pueya jiuujiajinia, nocua nojori tiuushacari. <sup>32</sup> Mostaza jajau jaara nataasaare, maashiyari socua puereetucara tamasaca nataujini. Na cashacucuaari maashiya puereetucucara. Shuhuari na cashacucua cariquiaco nujuatujua shinishiqui.

Pueyaso Rupaari pueyano jiuujiajinia naa cumaacaracajuhuj, na jataniniuria na tojjia, maninia miijia na quiniuria.

*Jesu niishitiojacari pueya saa na miriqui pahuatanotaja*

*(Mt 13.34-35)*

<sup>33</sup> Jesuuri naa queraatia miriqui pahuatanota niishitiojoquiaari Pueyaso rupaa saaja pueya niishishano casaata. Majaan socua jiyajeneta casaa na pahuatano quiquiaari. <sup>34</sup> Naacuajitij, nojuaja jaara casaa niishitiojonu paniquiaari pueya niquiaari, nojuajaari puetunujuanaa naa niishitiojoquiaari miriqui na pahuatanota. Tamajaaja nojori quishacari saniniujia, Jesuuri na saquiriojosano pueya niishitiojoquiaari maatia, casaa miriqui na pahuatanota sequenu paniriquiaani.

*Jesu pueyajetesacari paratu, mohuaca cajiniuucuanio*

*(Mt 8.23-27; Lc 8.22-25)*

<sup>35</sup> Cuno juuca jaara niniquiaari, Jesuuri na saquiriojosano pueya sequequiaari:

—Caminia taquijiria pa quiaare.

<sup>36</sup> Cuniqijia pueya tiujatiuyareeri, nojori quianura caminia taquijiria. Na pueyari Jesu quiojyaree cuno botenjiaja, tee nojuaja quiriqiaacuajani. Jesu quiasacari caminia taquijiria, tamasaca boteeri nata jaatequetariquiaajuhuj. <sup>37</sup> Maja puera na quenaacoy-aquishacarija, maruuri paratuta canashiyajia jyanohua niquiaari nojoriicua nojori niuutiasacari. Paratuuri jyanohua cajiniuucuatequiaari mohuaca nojori botenjiaacumara. Nocuaji na boteeri tari quera tiuquitiariciaa mohuacata. <sup>38</sup> Jesuuri jiyacari bote pajamaji maqueriquiaa juhuajaniya. Na nacaacuaji mataja caco maqueriquiaari. Na pueya niucujatusacari nojuaja, Jesu sequeteereeri:

—¡Niishitiojonanaa!, ¿majateeri quia puerenuujua paa tari tiuquitiareeni?

<sup>39</sup> Jesuuri sanemaa. Paratu sequereeri, caminianio:

—¡Quia suraajere! ¡Tariucujaj!

Paratuuri tajimiohua. Caminiaari pootia maquee. <sup>40</sup> Jesuuri na saquiriojosano pueya sequereeri:

—¿Casaara nia puereya puerani? ¿Niaateeri Pueyasocua tiuyashijiaa quiyajaaruhuaj?

<sup>41</sup> Nojoriiri jyanohua shiriqitiuri. Tama nojoriiaaritia sequetooquiaari:

—¿Cantejaaranajoni? ¡Paratu, caminiaari na tojjiri!

## 5

*Gerasa jiyajiniinio samaruharaca pueyanojini pahuatanano*

*(Mt 8.28-34; Lc 8.26-39)*

<sup>1</sup> Na nuhuaji, nojoriiri caminia taquijiria tiuquijioquiaari, Gerasa jiyajinia. <sup>2</sup> Jesu tacasacari botenjini, nocua niquiaari tamonu pueyano raacajini, macunucua nu-cuhua paaquiosajia. Cuno pueyanoori samaruraca quiquiaari. <sup>3</sup> Raacajinia quijia quiquiaari. Majaan na naata moronu quishaaquiaari quenaaja cumayocua shipinishano casaata. <sup>4</sup> Pueyari juucua na morojoua, na cashacucua, na juaashiquiacanio. Saaja na turojotajaa. Majaan quenaaja na nujuataja pueyano quiniu quijia. <sup>5</sup> Pueyaracaanu tuhananuhua rucuanajoquiaari, raacajinianio. Na rucuanesacari sariyacojuaari, juuca, niucuanio. Tama na cuaqueyajaaja piquijia saitiaari. <sup>6</sup> Nojuaja jaara Jesu niquiquiaari tucuaanuji, nocua netequiaari. Jesu cariquimiaajojoquetaseeri. <sup>7</sup> Jesuucara nacareeri:

—¿Casaacua miji quia niyani, Jesunaa, jiyocuaanu Quijia Pueyaso Niyanunaa? ¡Quia secojijianija maja naquiya quia miiniuria janiya!

<sup>8</sup> Samaruhuaraca pueyanoori naa sequeree Jesutej, tari Jesu sequenuucua samaru nojuajiniji na tohuatanura.

<sup>9</sup> Jesuuri na nequesotaree:

—¿Taa sesanaacatequia?

Na riucuaereeri:

—Canaa jiyanoehua queraatiani, cunora cua sesa “Queraatia”.

<sup>10</sup> Cuno samaruuri jiyanoehua Jesu secojoriquiaa maja nojori na taanuunura cuno jiyajiniji. <sup>11</sup> Cushiyari jiyacari cateca naataja miaquenuuriquiaa tuhananucari. Jiyanoehua queraatia cushiyari quiriquiaa. <sup>12</sup> Samaruhuari Jesu secojoree naatej:

—¡Canaa quia jiyarore canaa tiuquitianura cuno cushiyacua!

<sup>13</sup> Jesuuri samaruhua jiyaroree. Samaruhuari pueyanojiniji tohuareetaquee. Cushiyacua tiuquitiaseeri. Dos mil cushiya naasucuaari quiriquiaa. Cuno cushiyari cocuatequiaari, samaruhuaraca nojori quiniuucua. Tacobiniji totesee caminiajinaari. Puetunujuanaari ti shushiniuquiaari.

<sup>14</sup> Cushiya cojuanaari jiyacari netecuaturuhua na shiriiquiniutia. Na tiacajinia pueya poojotanuusuhua nojori niquishanoori, cuhuariquiacajinia quiniaa pueyano. Nocuaji pueyari nijioquiaari nojori niquiniuria casaate quiquiaarini. <sup>15</sup> Cuno pueya jaara tiuquijioquiaari Jesu quishaqui, cuno tarijia samaruhuaraca quijia pueyano niquitiushiiri panaatia cajiyano, toqueraca. Naa nojori niquishacari nojuajatej, pueyari pueretuquiaari. <sup>16</sup> Jesu miishano niqutiuniaari cuno pueya pohuataquiaari taa samaruhuaraca pueyano miishaareeni, mariyata cushiyajinijinio. <sup>17</sup> Cunora, cuno pueyari Jesu secooteree na quianuhua cuniquiji, nojori jiyajiniji.

<sup>18</sup> Jesu jaara tacaquiaariuhua na botejinia, cuno tarijia samaruhuaraca quijia pueyanoori nata quianu paniquiaari juucua. <sup>19</sup> Majaari Jesu paniniu quiquiaari. Na sequeree saajaari:

—Quia quiaarohua quia tajaanina quia pueyacua. Quia pohuatasuhua nojori taa Pueyaso miiri quiajaniyani, quiocua na taraajenuucua.

<sup>20</sup> Pueyanoori quiaarohua. Nojuajaari pohuatanu coteequiaari cuno na jiya diez tiacajinia taa Jesu miiquiaari maninia nojuajani. Puetunu pueyajanaari jiuujiatequiaari nojori tojishacari nojuaja. Cuno diez tiaca sesa quiquiaari “Decápolis”.

*Jairo niyatujiniji pohuatasano, Jesu toque quiana maajinijijuhua*  
(Mt 9.18-26; Lc 8.40-56)

<sup>21</sup> Jesu jaara niuutiaguaariuhua botejinia caminia taquijiriohua, queraatia pueyari nocua tiuquijioquiaari na quishaqui. <sup>22</sup> Jesu quishacarijia caminia casaqueyaji, nocua tiuquiquiaariiriri tamonu pueyano, Pueyaso secojoja tia jiyaniijia. Na sesa quiquiaari Jairo. Jaara Jesu niquiquiaari, na cariquimiaji mojoquetaseeri. <sup>23</sup> Naa Jesu secojoree jiyanoehuari:

—¡Quiyatu quera cusoya! ¡Miji, quia juaashiquia nocua quia niaquee na naatanuhua!

<sup>24</sup> Jesuuri jiyacari nata quiaaree, na saquiriojosano pueyano. Puera jiyanoehua queraatia pueyari na nuhuajiriquiaa. Jesu tanuujuturiquiaari. <sup>25</sup> Cuno pueya tajinia quiriquiaajaariuhua tamonu cusosu maaji. Doce marijaari tari na shoconujuquiaari pueyaracaanu na naatesacari. <sup>26</sup> Queraatia naarajonaari nareja naquiya na miiquiaari. Socua na jiyacatojoquiaari saajaari. Najuhuaana na cumaneeca puecaquiaariiri na naarajosaanura juucua. <sup>27</sup> Cuno maaji jaara Jesujiniji tojiquiaari, na nijiniji na nuhuajiquiaari jiyasohuari. Na tucuaque toque quiaasee pueya tajiniaari. <sup>28</sup> Cuno maajiri tama sequequiaariijaaja: “Janiya jaara quenaaja na toque quiareni, janiyari naatanataniuhuan!” <sup>29</sup> Naacujitij, na quiasacari Jesu toque, na nanacaari ritia curetaquee. Jiyacari na niishiquiri. Tama sequequiaariijaariija: “¡Cua cusonu tari tajiyatema!” <sup>30</sup> Jesuuri jiyacari niishiqui nojuaja na cumaacata cusosu naataniriri. Cunora, nojuajaari tacareecuaree na niquiniuria pueya. Pueya nequesotareeri:

—¿Cante cua toque quiareeni?

<sup>31</sup> Na saquiriojosano pueyari na sequeree:

—Quiaacuajaari queraatia pueya niquiya quia tanuujiyano. Quiaari najuhuaana nequesotaariquiohua saajuhua: “¿Cante cua quiareeni?”

<sup>32</sup> Jesuuri saaja na shocuaqueya niqunijioriquiaa, na niquiniuria cante na toque quiareeni. <sup>33</sup> Maajiri jiyacari tetecariquiaa na puerenuta. Jesu cariquimiaji mojoquetasee ritiaari. Nojuajaari niishiquiaari Jesu cumaaca na naataniriohua. Cunora, Jesu sequeree puetunu seetanujanaari. <sup>34</sup> Na nuhuaji, Jesuuri na sequeree:

—Sanaunaa, cucua quia tiuuniuucua, quiaacuaja tari quia cusonujiniji naatarohua. Juhuaajaniya quia quiaarohua. Quia cusonucua tari tajiyatemohua quiocuaji.

<sup>35</sup> Jesuuri cuno maajiicua pocuariquiaajaa pueya tiuquiiijosacari Jairo tiajiniji. Cuno pojoriiri maaji samiriu que sequetusee:

—¡Quia niyatu tari cusoquee! Maja najuhuaana Niishitiojona riniu quia tiajinia.

<sup>36</sup> Jesuuri nojori sequesano tojirii. Naaratej, maaji samiriu que sequereeri:

—¡Maja puerenu! ¡Cucua quia tiuuri saaja!

<sup>37</sup> Majaari Jesu paniniu quiquiaari tamasa quiojonura nata. Saaja nata quiojoquiaari cutaraari Pedro, Santiago, Santiago tarajanu Juannio. <sup>38</sup> Nojori jaara tiuquiiioquiaari Jairo tiajinia, pueya niquishii nujuquetiuyanoori, sariyocuatuiyanonio. <sup>39</sup> Jesu jaara tiajiniaaco tiuquiquiaari, cuno pojori sequereeri:

—¿Casaara puera nia cojuatuneyani? ¿Casaara naa nia nujuqueyani? Maaji samiriu maja macu. Nareja maqueyano.

<sup>40</sup> Pueyari saaja Jesu saroojotaquiaari nojuaja na rerequetenuta, naa nojori na sequenucuatej. Jesuuri cunora nojori tohuatanijioree tiajiniaacoji. Jesuuri macucua sohuacamara tiuquinitiaquiaari Jairo necocuata, tama na pueyajaajanio, cuniqui tii nata qutiiriquiaani. <sup>41</sup> Macu juaashiquiajiniji quiaaseeri. Na sequereeri:

—Talita, cumi.

Nioori pueyano rupaajinia sequeya: “¡Maaji samiriuniaa, quia sequeyanijia, quia sanere!”

<sup>42</sup> Jiyacaritij, maaji samiriuri ritia sanequee. Juhucatecara rucuanereeri. Doce mariijaari tari cuno maaji samiriu shocojoquiaari na queyata na quishacari. Pueya niquishacari naa Jesu miishanotej, nojoriiri jiyanohua jiuujiatequiaari. <sup>43</sup> Jesuuri jiyanohua nojori rootaree maja nojori pohuatanura pueya niquiara na miishano. Saaja sequeree cutaraari maaji samiriu cuara mianuutesaaria.

## 6

### *Jesu quishacari Nazaret tiacajinia*

(Mt 13.53-58; Lc 4.16-30)

<sup>1</sup> Jesuuri cuniquiji quiaquiaariuhua tama na jiyajiniohuaaja. Na saquirojosano pueyari nata quiojoquiaarijiuhua. <sup>2</sup> Jaara quiquiaari samaatenu juuca, Jesuuri tii niishitiojonu coteequiaari Pueyaso secojojua tiajinia. Queraatia pueyari na tojitiariquiaa. Nojoriiri jiuujiatequiaari. Tamajaaja sequeetooquiaariiri:

—¿Tee nio pueyano niishitiojosaaquiaari puetunu niojuanaani? ¿Teje na masecanu puetunu na niishishanojuanaani, cuno cumacanio, jiyajeneta miishano na miiniuriani? <sup>3</sup> Nojuacuajaari suruhuatujiiniji casaa shipinijona tiajiniaacor, niya pa tiacajiniani. Nojuajaari pa tiacajinia quinia María niyanu. Niya quiyajaariuhua na tapueyocuaa: Santiago, José, Judas, Simónnio. Na rimiatuhuari niya quiyajuhua pa tiacajiniani.

Cunora, majaari nojori tojtianu paniniu quiquiaari Jesu. <sup>4</sup> Naaratej, Jesuuri nojori sequeree:

—Pueyari tiquiyocua Pueyaso sequenu panishano caminiujunia tojinu paniquiaa cutara. Saaja tama na tiacajinijinio pueya cutaraari maja na tojtitiuni paniniu, na jiyasojinijinio supueno pueyajuhua, tama na tiajinia quiniaajaajanio.

<sup>5</sup> Naacuajitij, nocua nojori tiyuaquiniucua, majaari na naata na cumacata na miiniu quiquiaari. Saaja secaja cusosuhucua niojoquiaari na juaashiquiaari, nojori na naatani-ionura. <sup>6</sup> Jesuuri jiuujiatequiaari nojori tiyuaquishacari nocua. Na nuhuaji, Jesuuri rucuanajoquiaari pueya na niishitiojonura, queraatia shiitaniyojua tiacajinia catecaja na tiaca shocua.

### *Jesu jiyaramiquishacari na saquirojosano pueya Pueyano rupaa pohuatanura*

(Mt 10.5-15; Lc 9.1-6)

<sup>7</sup> Na nuhuaji, Jesuuri na saquirojosano doce pueya sequequiaari nocua nojori niniuria. Nojori jiyaramiquiniu coteereeri, nojori quiojonura caapiqui, caapiqui, Pueyaso rupaa nojori pohuatanura. Nojori niqitioree na cumaacari samaruhua nojori tohuatanijionura pueyajiniji. <sup>8</sup> Nojori sequereeri maja nojori panura nojori panishano, saaja nojori miojotu cutara. Nojori sequereeariuhua, maja nojori panura caashoque, coseyaca, cumaneecanio. <sup>9</sup> Nojori sequereeri saaja nojori cushiniuria na sapatu cutara, maja socua toque nojori panura na cushishocoriquiano. <sup>10</sup> Nojori sequereeariuhua:

—Niaa jaara tiuquishiiquia tamonu tiajinia, cuniquijia nia jiyojetare, niaa jaara cuniquiji quiaarejaatijia. <sup>11</sup> Pueya jaara nia tiuquinitianu paniyaquiri na tiajinia, nia pohuatasano nojori tojinu paniyaquishacarijiuhua, niocua cuniquiji quiaare. Niocua nia niohuacaacuaji jiya joocua piitiare nojori niquiara, nojori niishiniuria Pueyasoori nojori saniitionutaniya, na rupaa tojyashijianucua nojori quiniucua.

<sup>12</sup> Na nuhuaj, Jesu jiyaramiquishano pueyari quiojoquiaari. Nojoriiri Pueyaso rupaa pohuatanuquiaari pueya tacatonuhuaa nojori jiuujia Pueyasoocua. <sup>13</sup> Nojoriiri queraatia samaruhua tohuatanijioquiaari. Naajuhua, nojoriiri cusosuhucua tarooquiaari naana jajau shiyocua, nojori naatanijosacari queraatia pueya.

*Tiuquinijiona Juan mosacari*  
(Mt 14.1-12; Lc 9.7-9)

<sup>14</sup> Jesu miishanojinijiri caminiujiushaquiaari puetunu cuno jiyajinijanaa. Naacuajitij, Galilea jiya jiyaniijia Herodesri Jesujiniji pohuatasaaquiaarijuhuaj. Herodesri cunora sequequiaari:

—jTiuquinijiona Juanqui samiitiarohucuaa, cua mosano pueyanotej! Naaratej, cuno Jesuuri cuno cumaacaraca, jiyajeneta casaa na miiniuria na cumaacata. Nojuacuajaari cua mosano Juan samiitianohua.

Jiyaniijia Herodesri na jiyajenetaquiaari jiyanoehua cumaacaraca Jesu quiniuucua. <sup>15</sup> Tamasaca pueyari Jesujiniji sequequiaari tamaatia saniniuuja, nojori jiyajenesacarijuhuaj. Naa sequetquiaariiri:

—jNojuacuajaari tariucuaaanu pueyara Pueyaso sequesano caminiujiunia Elías!

Tamasaca pueyari saniniuuja naa sequequiaari, nojori jiyajenesacarijuhuaj:

—Nojuacuajaari quiarijia nio pa quishacari Pueyaso sequesano caminiujiunia pajaniyara, juhua tariucuaaanu pueyara Pueyaso sequesano caminiujiuniaajuhua.

<sup>16</sup> Herodes jaara pueya sequesano tojiquiaari, nojuajaari saa sequequiaarijia:

—Nojuacuaja Tiuquinijiona Juan, cana cua nacataniquianucujani. Samiitiarohucuaaquiiri.

<sup>17</sup> Tiuquinijiona Juan moyaquishacarijia, nojuajaari Herodías rupaaajinia nujuatesaaquiaari. Cuno maaji Herodíasni, nojuajaari Herodes tarajanu Felipe niquiocua quiquiaari coteenu. Herodesri tarajanu Felipe niquiocua jaariutiaquiaari necocuara.

<sup>18</sup> Nocuaji, Tiuquinijiona Juanri Herodes nacasujujua. Naa na sequejaari:

—jPueyasora, majaari maninia quia jitianura quia tarajanu niquiocua!

<sup>19</sup> Cunora, cuno maaji Herodíasri maja na niquinu paniniu quijia Tiuquinijiona Juan. Na monu panijiaari. Majaari na naata quiquiaari saaja. <sup>20</sup> Herodesri Tiuquinijiona Juan puereja. Nojuajaari niishiquiaari Tiuquinijiona Juanri maninia pueyano, Pueyaso tojijia pueyano, maja sesa miijia. Naaratej, Herodesri maninia na cojuateja nujuatejojuajinia. Majaari na shanacunu quiquiaari sesa na miishaanura. Herodesri Tiuquinijiona Juan pohuatasano tojinu maniniucua. Nojuajaari saaja noojia niquijoteja quiquiaari. Majaari na niishiniu quijia taa na miiniutianiyani. <sup>21</sup> Saniniuuja, cuno maaji Herodíasri pueyaracaanu niishiriojoriquiaa, Tiuquinijiona Juan na motenura. Jiyacaritij, namitia nera, Herodes rasaanu juuca quiquiaari. Cuno juuca, jiyaniijia Herodesri queraatia pueyata queranacuree. Na queranacunura, nojuajaari Galilea jiyajinijinio jiyaniijianucua masuquiaari, tama na soldadohua jiyaniijianucuaajajania. <sup>22</sup> Jiyacaritij, Herodías niyatuuri tiuquiquiaari queranacusaqui, tii na nianujunura puetunu pueya niquiarajanaa. Herodesri niyacoo nianujunu shuquiritiaquiaari jiyanoehua. Nata miaquena pueyari jiyanoehua na shuquiritiaquiaarijuhuaj. Naaratej, jiyaniijia Herodesri niyacoo sequere:

—Cua masere quia panishano. Janiyacua quia niqitioreni.

<sup>23</sup> Herodesri socua puetunu pueya niquiarajanaa na sequerohucuhua:

—jSeetanujanaa quia sequeyanijia, maja cua sapojonu! Janiyari quia niqutionutaniya quia masesanoni. Quiaa jaara cua masere cua jitianura cajiniocua, naajaa, janiyari quia niqutionutaniyani.

<sup>24</sup> Niyacoori tohuataquee na nucua Herodías na nequesotanura. Na sequeeri:

—Cua nucuaana, ¿casaa cua masenutaniya cua quenuni?

Na nucuaari na sequere:

—jQuia masere Tiuquinijiona Juan naca!

<sup>25</sup> Cuno niyacoori ritia tiuquiquihua jiyaniijia Herodes quishaqui. Na sequereeri:

—jQuiarijia cua niqitior Tiuquinijiona Juan naca miacojuajinia!

<sup>26</sup> Naa jiyaniijia Herodes tojishacaritij, jiyanoehua taraajequeeri. Naajaa, seetanujanaa na sequenuucua na masusano pueya niquiara, majaari tari na naata ruuretanu quiquiaari cuno niyacoo masesano. <sup>27</sup> Naaratej, jiyaniijiaari ritia jiyaroree na soldado, Juan naca na niqutionura cuno niyacoo. <sup>28</sup> Soldadoori quiaaree nujuatejojuajinia. Juan nacataseeri. Na naca patamohua miacojuajiniaari. Soldadoori niyacoo na niqitiosuhua. Nojuajaari na nucua na niqitiose saniniuuja.

<sup>29</sup> Tiuquinijiona Juan pueya jaara na niishiquiaari, na maanu patuquiaariiri, na jamotusocoriquiano.



*Jesu mianuutesacari cinco mil pueya*  
(Mt 14.13-21; Lc 9.10-17; Jn 6.1-14)

<sup>30</sup> Jesu jiyaramiquishano pueyari tiuquijioquiaariuhua Jesuucua nojori rucuanenjonu nuhuaji Pueyaso rupaa nojori pohuatanura. Nojoriiri Jesu pohuataquiaari puetunu nojori miitiushanojuanaa, nojori niishitiojosanojinijinio. <sup>31</sup> Na nuhuaji, Jesuuri nojori sequereee: –Miji, pueya quiaquishaqui pa quiaare tamaqui, tii pa samaatenura rupaquijia que-naaja.

Jiyanohua queraatia pueyari pueyaracaanu nojoriicua nijjoriquiaa. Tamasacaari quiojoriquiohuacuaa. Tamasacaari saniniuujia shusha tiuquijioriquiaacujua. Naaratej, majaari jeya nojori quiniu quiquiaari na miaquenura quenaaja. <sup>32</sup> Jiyacaritij, Jesuuri saaja na jiyaramiquishano pueyata quiaquiaari botejinia, pueya quiaquishaqui. <sup>33</sup> Queraatia pueyari saaja nojori niqutiuri quiaano. Cuno pojoriiri Jesu niishitiquiaari. Naaratej, puetunu caminia shuriuquico tiacajinjijianaa pueyari netecuatuquiaari. Nojoriiri Jesuucuaqui cutesee. <sup>34</sup> Jesu rosesacari botejiniji, saaja queraatia pueya niquriiri. Nojori na niquishacari, cuno pojoriicua taraajeguiaariiri. Nojoriiri juhua cojuanaaju borregohua quiriquiaa. Naaratej, Jesuuri nojori niishitiojonu coteeree queraatia casaa Pueyasojiniji. <sup>35</sup> Jaara quiquiaari tari tenacari, na saquiriojosano pueyari nocua nijjioquiaari. Na sequetuseeri:

–Tari tenacari. Paa tiajiyaqui quiyani. <sup>36</sup> Pueya quia sequere, nojori cuaara quiojoora cateca naataja tiacajinia, na miaquesocoriquiano nojori masenura tii.

<sup>37</sup> Jesuuri nojori riucaaree saaja:

–Niaa mariqui nojori miaquetereja saniya.

Nojoriiri na sequereee:

–¿Quiaateeri pania queraatia pan masenuucua canaa quianura puetunu cuno pojoriirijanaa? ¡Pa mianuutenura nojori, panishiyari dosciento cumaneeca! Majaari pa jiitianu.

<sup>38</sup> Jesuuri nojori nequesotaree:

–¿Taa pan nia jiitiaani? Nia niquishiitioj.

Nojori jaara niishiquiaari taa pante quiyani, na sequetusuhuari:

–Cinco pan quiya, caapiqui sapitiaajanio.

<sup>39</sup> Jesuuri jiyacari na pueya sequereee nojori cajitijionura pueya jiyasocujajinia, na mianuutesocoriquiano. <sup>40</sup> Pueyari cajituri cien, tamocora cincuenta, tamaqui socua cien, camiria cincuenta. Pueyari naa queraatia maapuera raquiriojotasaaree nojori mianuutesaanura. <sup>41</sup> Jesuuri cuno pan pataree, sapitiaajanio. Na nuhuaji, jiyocuaaanu maureeri Pueyaso na secojonura nocuara. Na nuhuaji pan neecasequiaari na saquiriojosano pueyaraari, nojori serotasocoriquiano pueya. Cuno caapiqui sapitiaaja shiquioreereejaariuhua puetunu pueyarajanaa. <sup>42</sup> Puetunu pueyajanaari maninia miaquenuquiaari. Maninia tooquioreejaariuhua. <sup>43</sup> Na nuhuaji, doce canaasatuuri mishinijiosaaquiaari pan raacuaa, sapitiaaja raquiquiatanio. <sup>44</sup> Cinco mil pueyari cuno panjiniji miaquenuunaa quiquiaari.

*Mohuaca caco Jesu rucuanenujiniji pohuatasano*  
(Mt 14.22-27; Jn 6.16-21)

<sup>45</sup> Nio nuhuaji, Jesuuri na saquiriojosano pueya tacanitiaquiaari botejinia, nojori puetanura nojuaja caminia taquijiria Betsaida tiacajiniara. Jiyacaritij, Jesuuri pueya sequeriquiaa nojori quiojonuhua na tiacajiniohua. <sup>46</sup> Pueya jaara tari quiojoquiaariuhua, Jesuuri tuhananuucua tacaquiaari tii na secojonura na Que Pueyaso. <sup>47</sup> Jaara niniquiaari, boteeri tari caminia jiuujiajinia jaaretariquiaa. Jesuuri juhuanujuaja na jateesaqui quiriquiaajaa. <sup>48</sup> Jesuuri nojori niquiquiaari najuhuana juaarioconuyano. Majaari nojori naata jaaretanu quiriquiaa, puera paratu piyarojosacari nojoriicuaara. Quera juhuaquenu panishacari, Jesuuri nojori rupusee. Mohuaca caco canujuriquiaari. Quera nojori tajiriquiaari. <sup>49</sup> Nojori jaara na niqutiquiaari mohuaca caco canujiyano, nojoriiri na jiyantiquiaari samaru. Nocua sariyocuatereeri. <sup>50</sup> Puetunu nojorijianaari na niqutiuri. Shiriqutiuriiri. Jesuuri ritia pocuaree. Nojori sequereeri:

–¿Casaara nia puereyani? ¡Nioojia nia cumaquiri! ¡Maja pueretunu! Janiyacujajinjia.

<sup>51</sup> Botejinia tacasee nojoriicuaari. Paratuuri jiyacari pueyajequee. Nojoriiri na shootariquiaa tacuriitia, jiyanohua na jiuujiatenuta. <sup>52</sup> Nojoriiri juhuanujuaja maja na niishiniu quiquiaari Jesu miishano, queraatiara na jiyatesacari pan, pueya miaquesocoriquiano. Nojori jiuujiaacari juhua ninishiqui quiquiaarjia.

*Jesu naatanijosacari cusosuhua Genesaret jiyajinia*  
(Mt 14.34-36)

<sup>53</sup> Jesuuri na pueyata caminia niuutiaquiaari. Tiuquijiooseeri Genesaret jiyajinia. Nojoriiri tii morotasee na bote. <sup>54</sup> Nojori jaara tohuareetaquiaari botejiniji, cuniquijinio pueyari ritia Jesu niishiquiaari. <sup>55</sup> Pueyari jiyacari netecuatuquiaari, Jesujiniji nojori pohuatanura puetunu cuno jiyajiniajanaa. Cusosuhuari juhuacatecara pa-tootasaquiaari na matucuaajinia tee Jesu quiriquiaa na rucuanijosacari nojori jiyajini-acuajani. <sup>56</sup> Tiquiyocua Jesu rucuanijosacari, cusosuhuari nocuaji nijotasaquiaari nucuaco, tuhuaqui tiacajinia, queraatia shiitianiyojua tiacajiniajuhuaj, cuhuariquiaacajiniano. Pueyari Jesu secojoree cusosuhua na quiatenura quenaaja na toque casaca. Canapuate na toque quiaquiaarini, puetunu nojorijianaari na cusonujiniji naatacoquiaar-uhua.

## 7

### *Casaate sesoriquiara pa jiyateja Pueyasorani (Mt 15.1-20)*

<sup>1</sup> Jesucua catecanoquiaariiri Fariseocuaca, Moisés Rootasanojiniji niishitiojanaano, canapuate Jerusalén tiacajiniji nijioquiaaricuaajani. <sup>2</sup> Cuno pojori quishacari tii, nojori-iri noojiaqueya Jesu pueyajinijinio niquiquiaari shuquitiojua miaqueyano. Nojoriiri jyanijia, nojori rucuanijosacari sesa miijiaa pueya tajinia, sesa nojori quiniu na naata nojoriicua pacunu. Nojoriiri cunora shuquitianu jitiitiquiaari, nojori jyanishacari nojori jiuujia naasucua curuushiniutianiya, shuquitiojua nojori miaquesacari. Naaratej, cuno pueyari Jesu pueya pocuanu coteequiaari. <sup>3</sup> Cuno Fariseocuaca, puetunu narta Judiocuacajanaano, nojoriiri maja na cartenu quijia tariucuaacanu nojori supuetanaa niishitiojosano. Naaratej, majaari nojori miaquenu quijia shuquitioo. <sup>4</sup> Naacuajitij, nojori jaara mi-quesano niquitiojosaquiji tacatequiohua, majaari nojori miaquenu shuquitiojua. Socua queraatia quiyari cuno pojori niishishano. Naacuajitij, nojoriiri jyaniquiaa, sesa nojori quiraquiniucuaaji Pueyaso niquiara, nojori cuara na ratujua jeeguejooora, pataco, coshi, na maquetucuanio. <sup>5</sup> Naaratej, Fariseocuaca, Moisés Rootasanojiniji niishitiojanaano, nojoriiri Jesu nequesotaquiaari:

—¿Casaara quia pueya tojtiaaquiya pa supuetanaa niishitiojosanoni? Nojoriiri maja na shuquitianu quiquiaa na miaquenuunura.

<sup>6</sup> Jesuuri cuno pojori riucaaree:

—¡Niaari sapuenu juhua maninia pueya niquishano! ¡Niaacuajaari seetanujuanaa sesa miijiaa! Pueyaso sequesano caminiujunia Isaíasri maninia sequequiaari nijajaniyajini-jicua, naa na naajiotasacari Pueyaso sequesano:

“Nio pueyari saaja na rupaata shuquiritiaa janiya. Nojori jiuujiaari saniniuujia tucua-caanu quiya janiyajiniji. <sup>7</sup> Nojori miishano quiriani, cunoori najuhuanaj. Naa nojori miishanoni, majaari na shuquiritiniu janiya. Nojori niishitiojosanoni, cunoori tama pueya niishitiojosanojuaaja, maja cua sequesano”.

<sup>8</sup> Niaari cua pueya pocuariquiaa. ¿Niajaniyariuhua? ¿Casaara Pueyaso sequesano nia tojiyaquiquiaanijia? Niaacuajaari Pueyaso sequesano tojiyaquiya, tama nia supuetanaa niishishanojuaaja nia miiniuria najuhuanaj.

<sup>9</sup> Jesuuri socua naa sequequiaari cuno pojoritij:

—Tama nia miini jitiishanoocua nia miiniurijaaaja, ¡niaari Pueyaso sequesano shocortaa saaja! <sup>10</sup> Moiséscuajaari naa rootaquiaari: “Maninia quia miiri quia que, quia nucuanio. Majaari nojori rerequetenu. Cante na que, na nucua sesacajani, cuno pueyano cuara cuara mosaaria”. <sup>11</sup> Niaari sequeya saniniuujia, maniniacuaja, pueyano jaara na que, na nucua sequere: “Maja cua naata naacutanu nijajaniya cua casamitia. Janiya tari Pueyasora jiyaterree puetunu cua jitiiasanojuanaani”. <sup>12</sup> Niaari sequequiaajuhua, pueyano jaara naa sequeretej, maniniacuaja maja na naacutanura na que, na nucuanio. <sup>13</sup> Naacuajitij, niaari Pueyaso sequesano shocortaa saaja, tama nia niishishanojuaaja nia miiniuria najuhuanaj. Cuno nia niishishanocuajaari saaja nia supuetanaajiniji caminiujishano. Niaari socua queraatia casaa miiquiaa juhua cunojuhuaj.

<sup>14</sup> Naa na nacasunu nuhuaji cuno pojoritij, Jesuuri pueya rerejeterohua na shocua. Nojori sequereeri:

—Cua tojitiare puetunu nijajaniyajanaa, maninia nia niishiniuria. <sup>15</sup> Casaa pa miaqueyari, Pueyasora naajaa. Cunoori maja na naata pueyano jiyatenu sesa miijiaa. Poojajinia pa niishiriojosano cutaraari sesara pa jiyateya Pueyasora. <sup>16</sup> Cante numaaracani, nojuaja cuara tojtiaara cua sequesano.

<sup>17</sup> Jesu jaara tiujiaquiaari cuno pueya, tiajiniaaco tiuquiyarohuari. Na saquiriojosano pueyari tii na nequesotaree pueya na niishitiojosanojiniji. <sup>18</sup> Jesuuri nojori sequere:

—¿Niaateeri cua sequesano niishiyaquiyajuhua? ¿Majateeri nia niishiniu? Puetunu pa jiniacuma tiuquijiajanaani, cunoori maja na jiyatenu sesa miijiaa pajaniya. <sup>19</sup> Pa

miasanoni, majaari na tiuquiniu poojiajnia, saaja pa seecojinia mishiya cutaraari. Na nuhuaji pocoma tajiyari pa marecuhuacuma.

Nio sequesana, pueya niishitiojoriqiaari, puetunu miaquesanojuanaari maninicauja pa miaquesocoriquiano. Maja cutaraari na naata na jiyatenu pajaniya juhua curuutuucara Pueyasora. <sup>20</sup> Jesuuri sequereejuhuj:

—Pueyano niishiriojosano sesa noojiajiniani, cuno cutaraari sesara na jiyatequiaa. <sup>21</sup> Pueyano jiuujiajiniji supueya cutaraari sesa niishiriojosano, sesa na miiniuria. Naacujitij, pueyanoori na camishoo maajipohua numuetucujua, seya numuetucujajuhuj. Tamonu pueyano casami nohuasejoquiaari. Pueya moquiaajaariuhuj. <sup>22</sup> Narta pueyano niquiocua numuetucujiaari. Tamonu pueyano casamiicua jiaatiaquiaari. Jiyanohua sesa miiquiaari. Cuaracashijionu niishiyari. Tama na cuaqueyajaaja shuquiritiquiaari na miiniu jiiitishanota. Narta pueyano miananajoquiaari. Tamonuucara tonujuquiaari. Naajuhuj, saaja tama na cuaqueyajaaja shuquiritija quiquiaari. Juhujaniya sesa miiquiaajaariuhuj, moseeca na quiniucua. <sup>23</sup> Puetunu nio sesa miishanojuanaari pueya jiuujiajiniji supuequiaa. Cuno cutaraari sesa quijiaa pueya jiyateja Pueyaso niquiara.

*Taatu tiuushacari Jesuucua*

*(Mt 15.21-28)*

<sup>24</sup> Jesuuri cuniquiji quiaaree Tiro tiaca shocua jiyajiniara. Tii tiuquishii tamonu tiajiniaari. Majaari na paniniu quiquiaari pueya niishiniuria nojiajiniji, tee na quiyani. Naajaa, majaari na naata jamaaniu quiriquiaa. <sup>25</sup> Tamonu maajiiri ritia Jesujiniji niishiquiaari. Neyatuuri samaruraca quiriquiaa. Naaratej, maajiiri Jesuucua niquiaari. Na cariquimijaji mojoquetaseeri. <sup>26</sup> Cuno maajiiri Sirofenicia jiyajininio taatu quijia. Jesu secojoseeri samaru na tohuataniniuria neyatujiniji. <sup>27</sup> Jesuuri maaji sequeree miriqui:

—Quia tarinitiare, muerasu cuaara coteenu miaquenuura. Majaari maninia muerasu pa jaariutianura na miaquesano, sareyacari jatasocoriquiano.

<sup>28</sup> Maajiiri Jesu riuuaree:

—Jaa, Jiyaniijanaa. Naajaa, sareyacajaari miaqueja cariquiacoji taticuaja, muerasu totinijosano miaquesano shiriya.

<sup>29</sup> Jesuuri na sequeree:

—¡Quiaacuja maninia cua riuuaree! Quia tacateyarohua. Samarucujaari tari tohuataree quia niyatujiniji.

<sup>30</sup> Maaji tiuquishacariuhua na tiajiniohua, neyatu riuratasuhuari na maquetujinia mataano. Samaruuri tari tohuatano quiriquiaa nocuaji.

*Jesu jeeacasari numueju, tiquia pueyano*

<sup>31</sup> Jesuuri tacatequiaariuhua Tiro tiaca shocua jiyajiniji. Na tacatesacariuhua, Sidón tiaca shocojiaariuhuari, Decápolis jiya tiacanio. Galilea caminiajnia tiuquishuhuari. <sup>32</sup> Tii na quishacari, nocua jaatucusaquiaariiri numueju, tiquia pueyano. Na jaatucunaari Jesu secojotiquiaari na juaashiquia na nianura nocua, na jeeanura cuno pueyano. <sup>33</sup> Jesuuri pueyano numueju jaatucuree tamocora pueyacujaji. Na numaama shirii na juaashiquiaari. Na nuhuaji, tama na juaashiquiajiniaaja riocoreeri. Na riacau cojuata pocuaashijia niti quiareeri. <sup>34</sup> Jiyacaritij, jiyocuaaanu maureeri. Noojia niareeri. Na nuhuaji, cusosu numaa sequereeri:

—¡Efata!

Nioori pueyano rupaajinia sequeya: “¡Quia riatere!”

<sup>35</sup> Jiyacaritij, numueju numaari riatequequee. Na nitiiri jeequequeejuhuaj. Ritia pocuaquee maniniaari. <sup>36</sup> Jesuuri cuno pojori rootaree maja nojori pohuatanura na jeecasano pueyanojiniji tamasaca niquiara. Nojoriiri saaja tiquiyocua pohuatanuquiaari. Naa Jesu rootasacari na naatanijosano pueyatej, maja nojori pohuatanura na miishanojiniji, nojoriiri saaja socua jiyacatequiaari pohuatanura. <sup>37</sup> Pueyari jiyanohua jiuujiatequiaari Jesu miishano na niqitiushacari. Tama nojorijiaarjia sequetoquiaari:

—¡Puetunujuanaa miya maniniaari! Numuejunucua jiyateya tojitiajacaari. Tiquianucua pohuateyajaariuhuj.

## 8

*Jesu mianuutesacari cuatro mil pueya*

*(Mt 15.32-39)*

<sup>1</sup> Jiyacaritij, jiyanohua queraatia pueyari rerejoquiaari Jesu na tojitianura. Majaari nojori jiiitanu quiquiaari casaa quenaaja na miaquetusocoriquiano. Jesuuri na saquiriojosano pueya piirii. Nojori sequereeri:

<sup>2</sup> —Nio pueyacua taraajeyanjia. Nojori tari jiuujianaraca juuca quiya niya cuata. Majaari quenaaja nojori jiiitiatunu miaquesano. <sup>3</sup> Janiya jaara nojori jiyaramiquiriohua

na tiajinia miaqueyojuani, nucuaco cusojoniuvarohuacua. Noojiaqueya nojoriijinijinioori niyara nijiorucuaa tucuacaanuji.

<sup>4</sup> Na saquiriojosano pueyari na riucuaree:

—¿Paatucua taa miaquetere nojori niyani, pueya quiyaquishaquini?

<sup>5</sup> Jesuuri nojori nequesotaree:

—¿Taa pan nia jiitiaani?

Nojoriiri na sequeree:

—Nareja siete.

<sup>6</sup> Jesuuri na pueya sequeree, nojori cuaara sequeraa puetunu pueyajanaa nojori caji-tiuniuria. Na nuhuaji, Jesuuri cuno siete pan pataree. Pueyaso secojoree nocuaraari. Na nuhuaji, na saquiriojosano pueyara na neecasereeri. Nojoriiri saniniuujia pueya na serotaree puetunujuanaa. <sup>7</sup> Secaja sapitiaaja jiitiaturiquiaajaariuhuj. Jesuuri socua nocuara secororhuacuahuaj. Na nuhuaji, na pueya sequereeri nojori niqutiojonura pueya. <sup>8</sup> Puetunu pueyajanaari maninia miaquenuuree. Tooquioreejaariuhuj. Mi-aquesano cureenota mishinijiosaaquiaariiri siete canaasatu. <sup>9</sup> Na miquenaa pueyari quiquiaari cuatro mil pueya. Na nuhuaji, Jesuuri nojori sequeree nojori quiojonuhuara. <sup>10</sup> Na nuhuaji, Jesuuri botejinia tacataquiaari na saquiriojosano pueyata. Quiaareeri Dalmanuta jiyajiniara.

*Fariseocuaca niqiniu panishacari Jesu miishano Pueyaso cumaacata*  
(Mt 16.1-4; Lc 12.54-56)

<sup>11</sup> Fariseocuacaari Jesuucua tiuquiiijosee. Nata juayonuutaseeri. Nojori saniniuujini-uria Jesu, nojoriiri na sequeree juucua cuaara nojori niquishocoriquiano casaa miiria Pueyaso cumaacata. Nojoriiri naa na sequeturee, nojori niishiniuria Jesute seetanujuanaa Pueyaso jiyarosano. <sup>12</sup> Jesuuri noojia niaree na taraajenuta. Sequereeri:

—¿Casaara nio pueya niqiniu paniya Pueyaso cumaacata miishanoni? Seetanujuanaa nia sequeyanijia, majaari cua niqitiniu quiniutianiya niajaniya cua cumaacata cua miishano.

<sup>13</sup> Jiyacaritij, cuno pojori tiujiaqueeri. Na pueyata botejinia tacataarohuari. Caminia taquijiria niuutiaareeri.

*Jesu numootesacari na pueya Fariseocuaca niishitiojosanoocua*  
(Mt 16.5-12)

<sup>14</sup> Jesu pueyari na coseyaca niyajatatuquiaari. Nareja niquiriyatujua panniyojua jiitia-turiquiaa botejiniaari. <sup>15</sup> Jiyacaritij, Jesuuri nojori sequeriquiaa miriqui:

—Cua tojitiare. Niocua tama nia cuaqueyajaaja cojuariquia Fariseocuaca pan poreeta-jaacuaji, Herodes pan poreetajaacuajijihuhaj.

<sup>16</sup> Majaari na pueya niishiniu quiriquiaa naa Jesu sequesacaritij. Nojoriiri cunora tama sequetooriquiaajaaja:

—Pa jiyaniija jiyoteeri naa pa sequeya, coseyaca pa paaquiniucua pa sasocoriquiano.

<sup>17</sup> Jesuuri na saquiriojosano pueya niishiriojosano niishiquii. Nojori sequereeri:

—¿Casaara naa nia niishiriojiya pan nia jiitaaquishacarini? ¿Majateeri juhuanojuaja nia niishiniu tamonu juuca cua miishanoinijii? ¿Niateeri cumajiuujiaacato, maja nia niishiniuria? <sup>18</sup> ¿Majateeri cua miishano nia niqiniu quiquiaacuaja nia namijiata? ¿Majateeri nia tojiniu quiquiaa nia numaatajuhuhaj? ¿Niateeri ritia niyajarucuaa cua miishano? <sup>19</sup> Janiya jaara cinco pan neecascanu cinco mil pueyaratej, ¿taa canaasatu nia mishinijiocanu miaquesano cureenotani?

Nojoriiri na riucuaree:

—Doce.

<sup>20</sup> —Naajuhuhaj, janiya jaara siete pan neecasercuaa cuatro mil pueyaratej, ¿taa canaasatu nia mishinijiorucuaani?

Nojoriiri na riucuaree:

—Siete.

<sup>21</sup> Naaratej, Jesuuri nojori sequeree:

—¿Majateeri juhuanojuaja nia niishiniu naa cua miishanoinijitij?

Jiyacariti nojoriiri Jesu sequesano niishiquii.

*Jesu jeeacasacari cariyojuaru pueyano, Betsaida tiacajinia*

<sup>22</sup> Na nuhuaji, Jesuuri Betsaida tiacajinia tiuquiiijioquiaari na pueyata. Tii na quishacari, Jesuucua jaatucusaquiaariiri cariyojuaru pueyano. Pueyari Jesu secojotuquiaari cuno cariyojuaru namijia na quianura quenaaja. <sup>23</sup> Jesuuri cariyojuaru quiaree na juashiquia-jinijii. Tiaca jyaquiria na jaatucuyareeri. Cariyojuaru namijia piquiojoree na riacautaari. Na nuhuaji, na juashiquia niaree nocuuari. Na nequesotareeri:

—¿Quia naatate niqiniu shiitianiyojua quenaaja?  
<sup>24</sup> Cariyojuaruuri niqiniu sanirii. Jesu sequereeri:  
 —¡Jaa! ¡Pueya niquiyanijia, juhua nacuhua rucoyano!  
<sup>25</sup> Jesuuri socua pacuterohua na juaashiquia nianu cariyojuaru namijiaacua. Cariyojuaruuri niqiniu saniriohuacuhua. Jiyacaritij, tojetaarucujanaa maninia niquijiara quiquiri. <sup>26</sup> Jesuuri na tiajinia na jiyarorohua. Cariyojuaru rootaree naari:  
 —Majaari tiacajinia quia quianuhua pueya quia pohuatanura cua miishanojiniji quia-janiya.

*Pedro sequesacari, Jesu seetanujuanaa Pueyaso Jiyarosano*  
 (Mt 16.13-20; Lc 9.18-21)

<sup>27</sup> Na nuhuaji, Jesuuri quiojoquiaari na saquiriojosano pueyata tucuaqui tiacajiniara Cesareya Filipino tiaca shocuaqueya. Na quiasacari nucuaco, na pueya nequesotareeri:

—¿Taa pueya sequequiaa janiyani, cantena janiyani?

<sup>28</sup> Nojoriiri na riucaaree:

—Noojiaqueya pueyari quia sequequiaa, quiaanaari Tiuquinijiona Juan. Tamasacaari saniniuuja quia sequequiaacujua quiaanaari supuetana Elias. Naajuhua, tamasaacari quia sequequiaa, quiaa naasucuaanaari tariucuaaanu pueyara Pueyaso sequesano caminiujunia, samiitianohuatuhua.

<sup>29</sup> Na nuhuaji, Jesuuri nojori nequesotaree:

—¿Niajanijarijataj, taa nia sequeyani, cante janiyani?

Pedroori na sequere:

—Quiajaniyacuaja Cristo, Pueyaso Jiyarosano.

<sup>30</sup> Jesuuri nojori rootaree maja nojori pohuatanura tamasa niquiara nojuajiniji Pedro niishishano.

*Jesu numootesacari na pueya, nojuaja mosaanutaniya*  
 (Mt 16.21-28; Lc 9.22-27)

<sup>31</sup> Jiyacaritij, Jesuuri na pueya niishitiojonu coteequiaari tama nojuajinijiaaja, taa Pueyaso Niyanu miishaanutaniya jyanohua naquiya taraatiani. Naa na pueya sequereeri:

—Parta Israel pueya jyaniijanucuaari cua tojitiaaquiniutianiya, pueyacuara Pueyaso secोजना jyaniijanucujuhua. Naajuhua, Moisés Rootasanojiniji niishitiojonaari cua rerequetejaca quiniutianiya. Janiyari mosaanutaniyani. Na nuhuaji, janiyari jiuujianaraca juucajinia samiitianutaniuhua.

<sup>32</sup> Jesuuri naa seetanujanaa nojori sequequiaari. Na pohuatasanoori maja miriqui na quiniu quiquiaari. Jesu jaara naa sequequiaari, Pedroori tamocora na jaatucuree. Cuniqiu na nacasureeri maja naa na pocuanuratej. <sup>33</sup> Jesuuri na nijiniara tacatequee saaja. Na saquiriojosano pueya na niqiniutia, Pedro sequereeri:

—¡Cua shuriucuaji quia quiaare, Satanásnaa! Quia niishiriojosanoori maja Pueyasojiniji. Majaari quia niishiriojonu juhua Pueyaso panishano. Quiaari saaja juhua nio jiyajinijinio pueya niishiriojiya.

<sup>34</sup> Naa na sequenu nuhuajitij, Jesuuri na saquiriojosano pueya piirii, puetunu cuniqiu quiniaa pueyajanaano. Nojori sequereeri:

—Pueyano jaara cua tojijiaa quiniu paniri, nojuaja cuaara niiria cucua, seetanujanaa nojiata na panishacari janiya. Nojuaja cuaara niyajetaara tama na cuaqueya na cojuanurajaaja. Cuaara cucuara panitiaara tama na cuaqueyajaaja. <sup>35</sup> Saniniuuja, cante tama na cuaqueyajaaja shuquiritiniu panijiani, na nuhuaji, nojuajaari jyanohua taraatia quiniutianiya pueyacaanu. Saniniuuja, cante tama na cuaqueya panitiaa cua panishano na miiniuriani, na pohuatanura janiyajinijihua, cuno pueyano cutaraari pueyacaanu quiniutianiya shuquiriaatia. <sup>36</sup> ¿Niaarate maninia, pueyano jaara puetunu nio jiya casamijanaa jitiare, na nuhuaji na sohanu jaara jatasaare mani quiquiojinia pueyacaanura? <sup>37</sup> ¿Pueyanote na naata Pueyaso niqutionu queraatia na casamijinijinio, Pueyaso jyatenuhura nojuaja pueyacaanu rishijia na quiniuria nata? Maja na naata. <sup>38</sup> Cante cua rupaa pohuatanu caririquiya sesa miijiaa pueya niquiara nio jiyajiniani, janiyari nojori caririquiniutianiyajacuhua. Naajuhua, cante caririquiya mijiria quiniaa niquiara sequenurani, janiya nojori jyanijiani, janiyari cua tacatesacariuhua nojori caririquiniutianiyajuhua. Janiyari jiyacari cua Que cumacata jiyocuaaanuji tacatenu-taniuhua, maninia miijiaa cua Que seyatajuhua.

## 9

<sup>1</sup> Jesuuri nojori sequequiaarijuhua:

–Seetanujuanaa nia sequeyanijia pueyanaa. Noojiaqueya niya quiniaajinjini quiarjiani, majaari nojori cusununu quiniutianiya juhuanajuaja, nojori cuara niquirijaatijia Pueyaso cumaaca tiuquiyano cucua, na muerasu jiitariquianoni.

*Jesu jatasacari shacantuucara*  
(Mt 17.1-13; Lc 9.28-36)

<sup>2</sup> Seis juuca nuhuaji, Jesuuri jyaconaja tuhananuucua tacaquiaari. Saaja nata quiojoquiaari Pedro, Santiago, Juannio. Jesu quishacari tuhananujiniji, na cuaqueyari tamaatiuucara jataquiaari nojori niquiara. <sup>3</sup> Na toqueeri shacantuquera jataquiaari, socua jyanohua cohuajara sohuanatuujiniji. Nio jiyajinia toqueya jeequejonaari maja na naata jyanohua cohuajquera toque na jyatenu, taa Jesu toque jataquiaaricuaani. <sup>4</sup> Jiyacaritij, nojoriiri supuetana Elías niquitiuquiaari, supuetana Moisésjuhuaj, Jesuta pocoojijano tii. <sup>5</sup> Jiyacaritij, Pedroori Jesu sequere:

–Niishitiojonanaa, ¡canaa namitia niya quiyani! ¡Canaacua niaacuaji suhuorojoreni: quiaara, Moisésra, Elíasrani!

<sup>6</sup> Jesu pueyari shiriiquitiriquiaa. Nocuaji Pedroori naa juhuajaniya pocuariquiaa. Majaari na niishini quiriquiaa casaa na pocuariquiaani. <sup>7</sup> Jiyacaritij, jiyocuaanuji cohuaja najacaari nojoriicua rosequiaari. Cohuajaa nojori mishiquioma. Cohuaja najacajiniji, Pueyasoori tojishaaree pocuaano. Naa sequequiaaritij:

–¡Niocuaja cua Nyanuniyojua, cua shuquiritiasano! ¡Saaja nojuaja nia tojiri!

<sup>8</sup> Jiyacaritij, nojori jaara ritia niqinijionuuquiaari na shocuaqueya, majaari quenaaja tamonu na niquitiuniu quiquiaari socua. Saaja Jesuuri tamajaaja quiriquiaa.

<sup>9</sup> Nojori rosetasacariuhua tuhananuucocoji, Jesuuri nojori rootaquiaari maja nojori pohuatanuhuaa tamasa niquiaara nojori niquishano. Jesuuri nojori sequequiaari cuara noojajinia racatatuura, nojuaja jaara samiitiarohuaajitijia. <sup>10</sup> Cunora, tama nojorijiaarjia maninia racataquiaari noojajinia nojori niquitiushano. Maja cutaraari nojori niishituniu quiquiaari, casaara naa Jesu sequere nojorini “cua samiitasacariuhua”. <sup>11</sup> Cunora, nojoriiri Jesu nequesotaquiaari:

–¿Casaara Moisés Rootasanojiniji niishitiojonaa sequequiaacuaraarini, Elíasna coteenu tiuquiniutianihua Pueyaso Jiyarosocoriqianooacuaji?

<sup>12</sup> Jesuuri nojori riucaaree:

–Seetanujuanaacuaaquinatejaj, Elíasri coteenu tiuquiriquiano quiquiaari, puetunu cucuaji jeenucuariquianojuanaa. ¿Niaate niishiya casaara tariucuaaanu Pueyaso Rupaa-jinia naa naajiotasaaquiaari janiyajinjini: “Pueyaso Jiyarosanoori naquiya miishaanutaninya? Pueyari na soonutanijahuaj”. <sup>13</sup> Janiyari seetanujuanaa nia sequeyani, Elíascuajaari tari niquiaari. Pueyari naquiya na miiquiaari taa nojori paniquiaaricuaani. Pueyaso Rupaajiniaacuajaari naajiotasaaquiaari nojuajaari naa miishaanutanijaqij. Seetanujuanaa tari naa miishaaquiaariiri.

*Jesu tohuatesacari samaru, caya samijajiniji*  
(Mt 17.14-21; Lc 9.37-43)

<sup>14</sup> Na nuhuaji, Jesu jaara tacatequiaariuhua na saquirojosano pueya quishaqui, queraatia pueya niquishuhuari nojori shocua maano. Tii quitiriquiaajaariuhua Moisés Rootasanojiniji niishitiojonaa. Nojoriiri Jesu pueyata juayonuutariquiaa. <sup>15</sup> Pueya jaara Jesu niquitiuquiaari, puetunu pueyajanaari nocuaji jiuujiatequiaari. Nojoriiri nocua netecuatuquiaari na saruhuanura. <sup>16</sup> Jesuuri na saquirojosano pueya nequesotaree:

–¿Casaajiniji nia juayonuutariquiaa cuno pojoritiani?

<sup>17</sup> Tamonu cuno pueyajinjinioori Jesu riucaaree:

–¡Niishitiojonanaa, quocua nitiaaree quiyanjia! ¡Samaru jiitiaano! ¡Samaruuri na jiyatequiaari tiqiaara! <sup>18</sup> Tiquiyocua na quishaqui, samaruuri na pojotequiaa. Naa na cusosacaritij, cushau jataquiaa na rupaamajiri. Na quica miquequiaajaariuhua. Na nuhuaji, pootia maquiaari juhua macu. Quiyanuuri cunora sasacara quiyaree. ¡Socua piriuquiniutianiyari! Janiyacuajaari tari sequere quia pueyani, nojori tohuatenura cuno samaru nojuajiniji. Nojoriiri maja na naata na tohuatenu quiriquiaa.

<sup>19</sup> Jiyacaritij, Jesuuri naa sequere:

–¡Niaaqui Pueyasocua tiyashijiaaja! ¿Janiyatucua pueyaracaanu nia jiitariquiani? ¿Janiyateeri pueyaracaanu nia rejeretanunijajaniuhua? ¡Miji nia jaatucure cuno caya samijia!

<sup>20</sup> Nocua jaatucusaareeri caya samijia. Samaru niquishacari Jesu, caya samijia miirri taraatiaari. Caya samijiaari pojoquee Jesu niquiaara. Tii taquiriociuariquiaari. Na rupaamajiri cushaariquiaa. <sup>21</sup> Jesuuri caya samijia que nequesotaree:

–¿Taacari na coteecanu naa na quiniuria juhuacatecarani?

Na queeri Jesu riucaaree:

—Na naatujajinjini naa quijiajuhuanajaj. <sup>22</sup> Na cusojuanura juucua, cuno samaruuri sequeyarucua na pojotequiaa manijnia, moojiniajuhuaj. Naaratej, ijaara quia naata quiri, canaacua quia taraajere quenaaja! ¡Canaa quia naacure!

<sup>23</sup> Jesuuri na sequeree:

—¿Casaara naa quia sequeree janiyani, “jaara quia naata quiri”? Cante Pueyasocua tiuya noojjata seetanujuanaani, nera miishiyari puetunu na panishanojuanaa.

<sup>24</sup> Jiyacarijij, caya samijia queeri nacaree:

—¡Jaa, quiocua tiuyanijia! ¡Cua naacure socua cua tiuuniuria quiocua!

<sup>25</sup> Jesuuri niquishacari queraatia pueya nocua rerequeejijano, ritia samaru sequereeri:

—¡Tojiyashijia, tiquia samarunaa, janiya quia sequeyani, quia tohuatate nio caya samijiajinij! ¡Puetunu quia tohuatatejanaa! ¡Majaari socua quia tacatenuhua, nocua quia tiuquiniuhua!

<sup>26</sup> Samaruuri sariyocuaquee. Caya samijia taquiriocuaterohuariuhua. Na tohuatate sacari caya samijiajinij, juhua macu na tiujiaqueeri. Nocuai, queraatia na niquitianaa pueyari sequequiaari:

—¡Juaj! ¡Tari cusoquee cutaratej!

<sup>27</sup> Jesuuri na juaashiquiajinij na quiaree. Na sanareeri. Caya samijiaari juhuajaniya nujuaqueaariuhua.

<sup>28</sup> Na nuhuaji, Jesuuri tiaco tiuquitiaquiaari na pueyataja. Tamajaaja nojori quishacari tii, na saquiriojosano pueyari na nequesotaree:

—¿Casaara maja canaa naata cuno samaru tohuatenu quiriquiaani?

<sup>29</sup> Jesuuri nojori riuquaree:

—¡Jiyano samaruuri na naata tohuatanishaanu cutara saaja jiyanohua Pueyaso nia secojonuta nia miaqueyaquiniutia.

*Jesu pohanu pacutesacariuhua nojuaja mosaanutaniya*

(Mt 17.22-23; Lc 9.43-45)

<sup>30</sup> Nojori jaara quiojoquiaariuhua tiji, Galilea jiya tajimiaari. Majaari Jesu paniniu quiquiaari pueya niishiniuria tee na quiyani. <sup>31</sup> Jesuuri jiyacari saaja na saquiriojosano pueyata quiniu paniriquiaa. Jiyacari, nojori niishitiojoriquiaari. Naa nojori sequereeri:

—Janiyari pueya niqutiosaanutaniyani, nojori miiniuria janiya taa nojori paniyacua-jani. Nojoriiri cua monutaniya. Jiuujianaraca juucajinia, janiyari samiitianutaniuhua.

<sup>32</sup> Majaari quenaaja na pueya niishiniu quiriquiaa Jesu sequesano. Nojoriiri saaja puereriquiaa maninia na nequesoreenura casaa naa na sequenu paniriquiaani.

*¿Cante jiyaniijajanaa cutarani?*

(Mt 18.1-5; Lc 9.46-48)

<sup>33</sup> Nojoriiri Capernaum tiacajinia tiuquijioosee. Tari nojori quishacari tiajinia, Jesuuri nojori nequesotaree:

—¿Casaajinjini nia juayonuutariquiaa nucuamajini?

<sup>34</sup> Nojoriiri saaja sanaajetaquee. Na juayonuutanujinjini niishituriquiaacuajaari. Nucuaamaji, nojoriiri riutioconetariquiaa teyano nojorinjinijioote socua tojishano pueyanoni. <sup>35</sup> Jesuuri jiyacari cajirii nojori na rootanura. Na doce pueya piiriiri. Nojori sequereeri:

—Cante socua tojishano pueyanora quiniu paniyani, nojuaja cuaara quiiria juhua serura, narta pueya na naacunura puetunujuanaa.

<sup>36</sup> Na nuhuaji, Jesuuri mueya nujuatequiaari nojori tajinia. Cuno mueya paree nojori niquiaraari. Na pueya sequereeri:

<sup>37</sup> —Cante jiyano mueya maseja na paniniutia janiyani, nojuajaari cua maseyajaacuhua. Cante cua maseyani, majaari saaja na masenu janiya. Jiyocuaanu Quijia cua Jiyarona maseyajaariuhua.

*Tamonu pueyano tohuatanijosacari samaruhua Jesu cumaacata*

(Mt 10.42; Lc 9.49-50)

<sup>38</sup> Tamacari, Juanri Jesu sequeree:

—¡Niishitiojonanaa, canaari tamonu pueyano niqiriini quia sesa jiyaniquiyano samaruhua na tohuatanijionura pueyajinjini! Nojuajaari maja pajaniyajinjini. Nocuai, ¡canaari na tenujoreeni maja socua naa na miiniuriatej!

<sup>39</sup> Jesuuri nojori sequeree:

—¿Casaara nia tenujoreeni? Pueyano jaara maninia miishano miiri cua sesa cumaacata, na nuhuaji, nojuaja maja na naata sesa pocuanu janiyajinjini. <sup>40</sup> Nia niishiri, cante maja pa paracani, nojuajaari pa jiyano. <sup>41</sup> Nia rucuanijosacari, cante nia raateya mohuacaniyojua

na paniniutia janiyani, cua pueya nia quiniuucujuhuj, Pueyasoori saniniuujia maninia casaa na niqutionutaniya na jiiitasanojiniji.

*Puereeta quiniutianiyari sesa miijiacara*  
(Mt 18.6-9; Lc 17.1-2)

<sup>42</sup> Nio mueyari cucua tiuujia. Cante jiyano mueya miitiri sesani, nera maara socua maninia quiri, puereetuujau saajia jaara morotasaare na riquiajiniji, caminia queronijinia jartasocoriquiano. <sup>43-44</sup> Nio miriqui cua niishitiojosano nia tojiri: tama nia juaashiquiajaaja jaara nia jiyatere sesa miijia, nia juaashiquia nia rashiquiare juhuari niaa mariqui mani quiquiojinia jatasaaereeri, sesa miijia nia quiniuucua. Cuno mani quiquiojiniani, majaari mani maquesanu. ¿Niaateeri paniya tii nia jatasaanura caapiquiquiojuata? Jiyanhua socua maninia cutaraari niaara, juaashiquiaaju nia tiuquinishaanura Pueyaso shuriucua, pueyaracaanu shuquiriaatia nia quiniuria nata. <sup>45-46</sup> Naajuhuj, nia niohuaca jaara nia jiyatere sesa miijia, nia rashiquiarenoj maja nia jatasaanura mani quiquiojinia. ¿Niaateeri paniya tii nia jatasaanura caapiquiniocuata, pueyaracaanu tii nia saniitiosaanura? Jiyanhua socua maniniaari niquiniocuata Pueyasoocua nia tiuquiniuria, pueyaracaanu nata nia quiniuria shuquiriaatia. <sup>47-48</sup> Naajuhuj, nia namijia jaara sesa miitiri quia niajaninya, nia jiaterenoj. Naa nia tarinitiare sesa nia miiniu, maja nia jatasaanura caapiqui namijia pueyaracaanu mani noshishaqui. Sesa miijiaaari cuno mani quiquiojinia quejoosaanutaniya, pueyaracaanu nojori saniitiosaanura. Cuno manijinia, majaari porohua cusonuunu. Maniiri tii pueyaracaanu noshia. Majaari na maquesanu. Jiyanhua socua maniniaari nia tiuquiniuria Pueyasoocua niquiriyatujua namijia pueyaracaanu shuquiriaatia nia shootianura nojuaja.

Naa Jesu niishitiojosacari miriquitij, nojuajaari pueya niishitiojoriquiaa nojori tarinitianura jiyanhua nia miiniu panishano, cuno jaara sesa miijia jiyateriquia nojori.

<sup>49</sup> Jesuuri socua niishitiojorohua:

—Puetunu Pueyaso muerasujanaari saniniujiushaanutaniya juhua manitia, taa shu caquishiyacuaani na moqueyaquiniuucujia. <sup>50</sup> Naajuhuj, shoniiri jiyanhua maninia, shu moqueyaquiniuucujia. Saniniuujia, shoni jaara shaacara quiri, ¿maatucua taa tiquiri-iquia quirohua saajaniuhuj? Maja na naata. Naajuhuj, Pueyaso cumaaca nia jiiitare nioojajinia, niaa mariqui najuhua quijia quiriiri juhua Pueyaso niishiyashijia pueya. Naajuhuj, jiyanojiaca nia quiri, jatiqui nia quiniuria shuquiriaatia.

## 10

*Jesu niishitiojosano maja pueya cartenura necocua*  
(Mt 19.1-12; Lc 16.18)

<sup>1</sup> Na nuhuaji, Jesuuri Capernaum tiacajiniji quiaquiaari na saquiriojosano pueyata. Judea jiyajinia quiojyareeri, Jordán moo taquijirajuhuj, pananu muetasamaji jiyajinia. Pueyari jati nocua rerejoquiaariuhua Jesu quishaqui. Jesuuri nojori niishitiojonu coteeree socua, taa na niishitiojoquiaari tarijiacuajani. <sup>2</sup> Jiyacaritij, noojiaqueya Fariseocuaaari Jesuucua nijioquiaari na saniniujiunuria nojori nequesotanuta, nocuara nojori saquiriojotanura juucua. Cunora, cuno pojoriiri Jesu nequesotaree:

—¿Maniate pueyano cartenura necocua?

<sup>3</sup> Jesuuri nojori nequesotaree saniniuujia:

—Cua sequeretoj, ¿taa Moisés sequequiaari niajaniani?

<sup>4</sup> Cuno pueyari Jesu riucuaare:

—Moisésri pa sequequiaaricuaa, pueyanoori na naata necocua cartenu. Neyaca cuara coteenu na niqutioora na cartetaja naajionee, necocua na cartenura. Moiséscajaari naa pa sequequiaaritij.

<sup>5</sup> Jesuuri cuno pojori sequerree:

—Moisésri naa sequequiaari niajaniatej, pueyaracaanu cumajiuujiaaca nia quiniuucua, nia niquiuocuaacua taraajeyashijia nia quiniuucujuhuj. <sup>6</sup> Saniniuujia, Moisésri naa naajiotaquiaari pueyajiniji:

“Pueyaso jaara puetunu casaajanaa shipiniquiaari, nojuajaari niquiriyatu caya shipiniquiaari, niquiriyatu maajinio”.

<sup>7</sup> Naaratej, pueyanoori na queya tiujanutaniya necocuara na caminiuria. <sup>8</sup> Nojori jaara camitioore, nojoriiri juhua niquiriyatujua pueyanora quiqui. Naacuaajitij, nojoriiri maja juhua caapiqui pueya na quiniu tari. Saaja juhua niquiriyatujua pueyano quiyari. <sup>9</sup> Cunora, pueyano cuara necocua carteyaquiiria, Pueyaso rupuetootesano nojori quiniuucua.



<sup>10</sup> Majaari Jesu saquiriojosano pueya niishitiuniu quiquiaari naa Jesu sequesano. Na nuhuaji, tiajinia nojori quishacariuhua, na saquiriojosano pueyari Jesu nequesotaquiaari casaa na sequenu paniriqiaaa naani. <sup>11</sup> Jesuuri nojori sequereee:

—Cante necocua carteya tamonu maajitia na caminiuriani, cuno pueyanoori jiyanoehua sesa miya coteenu necocua. Pueyasora, naa na miishacaritij, nojuajaari juhua narta pueyano niquiocuata quijia. <sup>12</sup> Naajuhuaaj, maaji jaara cartere neyaca tamonuta na caminiuria, cuno maajiiri sesa miya Pueyaso niquiarajuhuaaj.

*Jesu niasacari na juaashiquia naatujooriicua*

*(Mt 19.13-15; Lc 18.15-17)*

<sup>13</sup> Na nuhuaji, Jesuucua jaatucunuusaquiaariiri naatujoori, Jesu nianura na juaashiquia nojori nacaacua. Na saquiriojosano pueyari naatujoori jaatucunaa tenujuriqiaaa saaja. <sup>14</sup> Jesu jaara na niquiquiaari, juaaquiiri. Nojori sequereeri:

—¡Nia tarinitiare naatujoori cuara niiria cucua! ¡Maja na tenujuna! Canapuate Pueyaso muerasura quiniu paniani, nojori cuara juhua nio naatujooriria jataara. <sup>15</sup> Seetanujuanaa nia sequeyanijia, Pueyasocua nia tiuuri seetanujuanaa, taa naatujoori tiuya cucuacuaani na taacanuyaquiniutia. Saaja naacuajiti niaari Pueyaso pueyara jiyatesaanutaniya cutara, pueyaracaanu Pueyaso jiiitasano nia quiniuria.

<sup>16</sup> Jesuuri jiyacari cuno naatujooriniyojua pooree. Nojori nacaacua niojoree na juaashiquiaari Pueyaso na secojonuta, Pueyaso miiniuria maninia nojori.

*Jiyanoehua casamiriaca mashaja pocoojosacari Jesuta*

*(Mt 19.16-30; Lc 18.18-30)*

<sup>17</sup> Quera Jesu quianu panishacari quiniquiji, nocua netequiaariiri tamonu pueyano. Jesu cariquimijai mojoquetaseeri. Na nequesotareeri:

—Maninia niishitiojonanaa, ¿taa cua miiniutianiyani, seetanujuanaa Pueyaso pueyanora cua quiniuriani?

<sup>18</sup> Jesuuri na sequereee:

—¿Casaara quia sequeya janiya maninia pueyanotani, quia niishiyaquishacari janiyani? Saaja Pueyaso cutaraari seetanujuanaa maninia. <sup>19</sup> Quiaacuajaari Pueyaso niishitiojosano niishiya. Moisésuajaari naa na naajotaquiaari:

“Maja quia camishoo maaji quia numuetucunu. Maja monu. Maja nohuasenu. Maja tamonuucuaa tonujunu sapojonuta. Maja cuaracashijionu. Quia queya tojjia quia quiriqia”.

<sup>20</sup> Pueyanoori Jesu riuucaree:

—Niishitiojonanaa, janiyacuaajaari puetunu cuno rootasanojuanaa tojjia pueyaracaanu cua naatujuajinjini.

<sup>21</sup> Jesuuri na paniniutia na niquirii. Na sequereeri:

—Juhuanajuaja niquiriyatu casaari quiyajaa quia miishoo. Quia quiaarohua. Puetunu quia casamijianaa quia niquitiojocoo. Na nuhuaji, casamijiuniucua nareja quia niq-uitiore quia masesano cumaneeca quia casami sami. Naacuajitij, quiaari quia casami jiiitanutaniya jiyocuacaanu Pueyaso shuriucua. Na nuhuaji cutara, quiocua nimiohua cua nuhuajiriquiano.

<sup>22</sup> Cuno pueyano jaara tojjiquiaari naa Jesu sequesantej, jiyanoehua taraajequeeri. Na taraajenuta quiacuhua na tiajiniaari. Nojuajaari jiyanoehua casamiriaca pueyano quiquiaari. <sup>23</sup> Na nuhuaji, Jesuuri na shocuaqueya niquiniijoree. Na saquiriojosano pueya sequereeri:

—¡Jiyanoehua jiyajeneta cutaraari casamiriaca pueyano quiniuria Pueyaso pueyanora!

<sup>24</sup> Na saquiriojosano pueyari shiriiquitiuquiaari naa na sequesacaritij. Na nuhuaji, Jesuuri nojori sequenu pacutequiaari:

—Sanajooriniaa, seetanujuanaa nia sequeyanijia. Jiyanoehua jiyajenetaari casamiriaca pueyano quiniuria Pueyaso pueyanora. <sup>25</sup> Taa camello maja na naata cusupuetaja cuhuoco tamajiria tajiniucuaani, naajuhuaaj, casamiriaca pueyanoori maja na naata tama na cuaqueyajaaja jiyatenu Pueyaso pueyano na quiniuria.

<sup>26</sup> Na saquiriojosano pueya jaara na tojtiaquiaari, nojoriiri socua jiyanoehua jiuuji-ateere. Naaratej, tama nojorijiaarijia nequesoreetooquiaari:

—¿Canteeri Pueyaso pueyanora jiyatesaanutaniya socuanitioj?

<sup>27</sup> Jesuuri nojori niquirii. Naa sequereeri:

—Pueyano maja na naata tamajaaja Pueyaso pueyanora quiniu. Pueyaso cutaraari na naata na jiyatenu na muerasura. Pueyasora, maja jiyajeneta casaa quiniu.

<sup>28</sup> Pedroori Jesu sequereee:

—Jiyaniijianaa, canaari puetunu canaa jiiitasanojuanaa tiujiaquiaarini quia pueya canaa quiniuria.

<sup>29-30</sup> Jesuuri nojori riuquaree:

—Seetanujuanaa nia sequeyanijia, shuquiriaatia quijia quiniutianiya cutaraari noo pueyano cante na jiihtasano tiujajaja cua tojjija na quiniuucuan, janiyajinjiji pohuatana na quiniuucujuhuj. Cante na tia tiujajani, tapueyocuaca, na rimiatuhua, na queya, necohua, na cuhuariquiano, nojuajaari maninia miishaanutianiya quiarijia mijiria na quishacarijia. Nojuajaari socua jiyano hua queraatia niquitiosaanutanihua na tiujiasanojiniji. Niquitiosaanutaniyari tiaca, tapueyocuaca, na rimiatuhua, na nucua, necohua, cuhuariquiano. Naajuhuj, naquiya miishano quiniutianiyari cua tojjija na quiniuucua. Naajaa, na nuhuaji, pueyaracaanu Pueyasota shuquiriaatia quiniutianiyari quiarinio jiyajinia. <sup>31</sup> Saniniuujia, queraatia tojjishano pueyari najuhua quijia quiniutianiya Pueyasora, nojori tojijaquiniuucua nojuaja. Saniniuujia, Pueyaso ruuretajacara, queraatia Pueyaso pueyari quiarijia juhua najuhua quijia niquishano quiquiaa. Naajaa, nojoriiri na nuhuaji seetanujuanaa juhua jiyaniijianucua quiniutianiya Pueyasora, na tojtijajaca nojori quiniuucua.

*Jesu pacutesacariuhua pohuatanu nojuaja mosaanutaniya*  
(Mt 20.17-19; Lc 18.31-34)

<sup>32</sup> Jerusalén tiacajiniara nucuamaji nojori quiasacari, Jesuuri na saquirojosano pueya pueteriquiaa. Nojoriiri na nuhuaji sacuariquiaa na puerenuta. Socua pueyari na nuhuajitiuriquiaa nojori puerenutajuhuj. Nuu cajiniocua, Jesuuri na doce saquirojosano pueya jaatiraee tamocora tamajaaja. Tii nojori sequeriquaari taa nojuaja miishaanutaniyani, nojori tiuquishacari Jerusalén tiacajinia.

<sup>33</sup> Nojori sequereeri:

—Niaacuajaari niishiya, paa tari Jerusalén tiacajinia quiaani, tee cuniqui Pueyaso Niyanu niquitiosaanutaniya pueyacuara secojona jiyaniijianucuan, Moisés Rootasanojiniji niishitiojonaanio. Cuno pojoriiri cucuara tonujunutaniya jiyaniijianucua na saponuta, cua mosaanura. Janiyari taucua niquitiosaanutaniyani. Janiyari jiyano hua naquiya miishaanutaniyani. <sup>34</sup> Nojoriiri cua rerequetenutaniya. Cua riocojotunutaniyari. Cua piquitiuniutianijaariuhuj. Naa cua miishaanu nuhuajitij, nojoriiri socua cua monutaniya. Naajaa, jiuujianaraca juucajinia, janiyari seetanujuanaa samiitianutaniuhuan.

*Santiago, tarajanu Juanta, nojori sequesacari Jesu, maninia nojori na miiniuria*  
(Mt 20.20-28)

<sup>35</sup> Na nuhuaji, Santiagoori, tarajanu Juanta Jesuucua catecanoquiaari. Nojoriiri Zebedeo niqiuohua quiquiaari. Jesu sequetuseeri:

—Niishitiojonanaa, canaara quia miiri canaa masenu panishano quiajaniya.

<sup>36</sup> Jesuuri nojori nequesotaree:

—¿Casaa nia paniya cua miiniuria niaarani?

<sup>37</sup> Nojoriiri Jesu riuquaree:

—Pueyaso jaara quia jiyatere pueya jiyaniijia, quiocua canaa cajitijiore quia shuricua, tamonu quia miaquetajara, tamonu quia muenecara, quia naacuna canaa quiniuria.

<sup>38</sup> Jesuuri nojori sequereeri:

—Majaari nia niishiniu nia masesano. ¿Nia naatateeri rejeretanu naquiya miiniu taa cua miishaanutaniyacuaani? Naquiya cua miiniuuri jiyano hua noonu quiniutianiya juhua pueyano jaara mani noshiyanojinia tiuquinishaare.

<sup>39</sup> Nojoriiri na riuquaree:

—Taaquiririni, canaa naatacuaaquinateja naquiya miiniu rejeretanu juhua quiajaniya.

Jesuuri nojori sequereeri:

—Seetanujuanaa, niaari na nuhuaji cua ratuano raturiquianojuhuaj. Niaari juhua manijinia tiuquinishaariquianojuhuaj, taa cua tiuquinishaanutaniyacuaani.

Jesuuri naa nojori sequeriquiaa miriqui, taa jiyano hua naquiya na miishaanutaniyani, na cusosacari pueyacuara. Jesuuri naa nojori sequereeri socuatej:

<sup>40</sup> —Maja cutara cua naata niqution niajaniya nia masesano, cua cajitiniuria niajaniya cua miaquetajara, cua muenecario. Cunoori noo pojori niquitiosaanutaniya cutara, canra tari na jeenucuasaaquiaricujani.

<sup>41</sup> Narta saquirojosano pueya jaara tojiquiaari nojori masesano Jesu juucua, nojoriiri juaaquioquiaari. <sup>42</sup> Jesuuri nojori piiri. Nojori sequereeri:

—Niaacuajaari niishiya, mijiria jiya jiyaniijianucuaari na pueya jiiitiaquiaa juhua na seya, tama nojori panishano na miiniurajaaja nojortia. Naajuhuj, pueya jiyaniijianucuaari na jiihtasano pueyacuara paaretaquiaa na cumaaca, tojjishano pueya nojori quiniuria. <sup>43</sup> Nijaniya saniniuujia, majaari naa nia quiniu quiniutianiya. Cante tojjishano pueyanora

quiniu paniya niajanijajinininioni, cuno cuara jiyateera tama na cuaqueyajaaja juhua narta Pueyaso pueya serura na quiniuria. <sup>44</sup> Cante nia jiyaniijia quiniu paniyani, nojuaja cuara quiriia narta Pueyaso muerasu cumaquinia. <sup>45</sup> Janiyajuhuj, majaari mijiria cua niniu quiquiaari pueya cua poonijiotenura quiria, tama cua cuaqueya cua shuquiritiniurijaaja. Janiya cutaraari niqiaarini pueya cua naacutanura, tama janiyajaaja mosaanura pueya niti, queraatia pueyacuaji cua ritianura Sesaaca.

*Jesu jeeacasacari Bartimeo namijia*  
(Mt 20.29-34; Lc 18.35-43)

<sup>46</sup> Nojoriiri jiyacari tiuquiiioquiaari Jericó tiacajinia. Jesuuri cuno tiacajiniji quiariquiaa na saquiriojosano pueyata. Queraatia pueyari nata quiariquiaajuhuj. Jiyacaritij, tamono cariyajuuru pueyanoori tii cajiriqiaa nuu shuucua. Na sesa quiquiaari Bartimeo, Timeo niyanu. Nojuajaari cumaneeca mashiniquijiona quiquiaari, cariyajuuru na quiniucua. Nojuajaari maja na naata poonijionu quijia tamajaaja. <sup>47</sup> Nojuaja jaara tojiquiaari cuno tajiyano pueyano quiquiaari Jesu, Nazaret tiacajininio, nojuajaari naa nacanu coteeree:

—Jesunaa, Pueyaso Jiyarosanonaa, cucua quenaaja quia taraajereja!

<sup>48</sup> Queraatia pueyari na tenujiriqiaa na sanaajanura juucua. Saaja socua nacaree jiyanohuari:

—Pueyaso Jiyarosanonaa, cucua quia taraajere!

<sup>49</sup> Jiyacaritij, Jesuuri socua nujuasee. Pueya sequereeri:

—Miji nia sequere cuno nacaani.

Cariyajuuruuri naa sequesaree:

—¡Quia sanere! ¡Quia shuquiriri! ¡Quia sequeyacuaja! ¡Nocua quia canujiyare!

<sup>50</sup> Naa na tojishacaritij, cariyajuuruuri na tucuaque toque jataquee. Ritia jaaqueeri Jesuucua na catecanonura. <sup>51</sup> Jesuuri na nequesotaree:

—¿Casa quia paniya cua miinuria quiajaniani?

Cariyajuuruuri na riucaaree:

—¡Niishitiojonanaa, niqijiaara quiniu paniuhanijia! ¡Cua namijia quia jeecarohua quiria!

<sup>52</sup> Jesuuri na sequeree:

—Quia quiaarohua. Quia namijiaacuaja tari jeequerohua cucua quia tiuuniucua.

Jiyacaritij, cariyajuuruuri tari na naata niqiniu quiriqiaa. Nucuaco Jesu nuhuajiyareeri.

## 11

*Jesu tiuquishacari Jerusalén tiacajinia*  
(Mt 21.1-11; Lc 19.28-40; Jn 12.12-19)

<sup>1</sup> Nojoriiri tari catecanoriquiaa Jerusalén tiacaacua. Jiyacaritij, nojoriiri tiuquiiiojosee Olivo cuhuariquia tuhuananuucua. Cunoori Betfagé tiaca shuriucua, Betania tiaca shuriucuanio. Jesuuri caapiqui na saquiriojosano pueya jiyaroree tiji. <sup>2</sup> Nojori sequereeri:

—Cuno tiacajinia nia quiaare, pa tacoji niquishiyani. Naa jaara tiuquishii tii, niaari burro riuriatanutaniya morotasano, pueyano cajishoojua na nijinia. Naa jaara niquishiinij, niocua na samaacartasee. Niocua na jaatucumohua miji. <sup>3</sup> Pueya jaara naa nequesotare niajanija: “¿Casa nia samaacartaanoj?”, niocua na sequere: “Jiyaniijia na paniya rupaquijia. Ritia na niqutionutanihuacuaja”.

<sup>4</sup> Nojoriiri quiojoquiaari. Burro riuriataseeri morotasano nuujinia, tamonu tia tohuateya shuriucua. Nojoriiri na samaacartasee.

<sup>5</sup> Tamasaca tii quiniaari nojori sequereeri:

—¿Casa nia miyani? ¿Casa nia samaacartaa cuno burroni?

<sup>6</sup> Nojoriiri na riucaquiaari taa Jesu rootaquiaari nojoricuajani. Naaratej, cuno pueyari nojoriria na tarinitiaquiaari. <sup>7</sup> Na nuhuaji, Jesuucua jaatucutumohua cuno burroori. Pueyari na toqueya niojoquiaari burro nijinia, Jesu cajijia. Na nuhuaji, Jesuuri nocua cajirii. <sup>8</sup> Queraatia pueyari na toqueya muevoquiaari nucuaco, Jesuucuaaji nojori maniniushi-tiniuria nuu. Tamasacaari jaamasucua piyotaguaiaari cuhuariquiacajiniji, Jesuucuaaji nojori niojotasocoriquiano na nucuacohujua. <sup>9</sup> Jesu puetanaa, mariyata na nuhuaji nijionaari jiyanohua nacojonu coteequiaari nojori shuquiriniutia. Naa sequeturiquiaari:

—¡Pa shuquiritiare pa Jiyaniijia Pueyaso! ¡Jiyanohua maniniacuaja pa Jiyaniijia, cuno, Pueyaso cumaacata tiuquiyani! <sup>10</sup> ¡Pueyaso cuara na jiyateera maninia Jiyaniijia na quiniuria pajaniyara! ¡Nojuajaari pa supuetanaa jiyaniijia David niti pa jitianutaniya maninia cutara! ¡Jiyocuaanu Quijia pa Pueyasocuaajari pa shuquiritiasano!

<sup>11</sup> Jesuuri naa tiuquiquiaari Jerusalén tiacajiniatej. Pueyaso Secojojua tiajinia tiuquishi-iri. Na niqiniujionu nuhuaji puetunu casaajanaa, Betania tiacajiniara quiaquiaari ritiaari na doce saquiriojosano pueyata. Jiyacaritij, tari tenacariiri quiriquiaa.

*Jesu sesacasacari jajauju higo naana*  
(Mt 21.18-19)

<sup>12</sup> Tariqui, nojori quiojosacari Betania tiacajiniji, Jesuuri miaajeriquiaa. <sup>13</sup> Tucuacaanuji niqiriri higo naanaari queraatia jaamasucuaraca. Nocua canujiyareeri na niqiniuria seetanujuanaa jajaaracate quiriquiaa. Saaja queraatia jaamasucuaari quiriquiaa. Maja higo muetusacari quiquiaari jiyacari. <sup>14</sup> Jesuuri naa sesacaree higo naana:

—Maja quiocuaji socua quia jajau miasaanu quiniutianiya.

Na saquiriojosano pueyari na tojtitariquiaa naa na sequesacaritij.

*Jesu jaacasacari seya niqutiojonaa Pueyaso Secojojua tiajiniji*  
(Mt 21.12-17; Lc 19.45-48; Jn 2.13-22)

<sup>15</sup> Nojori jaara tiuquiiioquiaari Jerusalén tiacajinia, Jesuuri tiuquiquiaari Pueyaso Secojojua tiajinia. Tiji pueya tohuatanijionu coteereeri, cuno pojori, canapete Pueyasoocua puecosocoriquiano seya niqutiojoriquiaa cumaneecaracuajani. Na masejonaa tohuatanijioreejaarihuaj. Cumaneeca tacatojojuaca juhuacutucua caponeetareeri, tee pueya tacatojoriquiaa taucua cumaneecacuajani, Pueyaso Secojojua tiajinia niqutiojocoriquiano cumaneecaracuajani. Naajuhuaaj, Jesuuri mococoonu niqutiojonaa caji-tiucua caponeetaree. <sup>16</sup> Naajuhuaaj, majaari na shanacunu quiquiaari pueya niyacunura najuhuaana Pueyaso Secojojua tia, na nitiotasano casamitia. <sup>17</sup> Na nuhuaji, pueya niqiuara niishitiojonu coteereeri. Naa sequereeri:

—Tariucuaaanu Pueyaso Rupaajinia naa naajiotasanocuaajari quia:

“Cua tia sesaari quiniutianiya, Pueyaso Secojojua tia. Puetunu jiyacajiniujionu pueya seconuujuara quiniutianiya”.

Niaari saniniujia na jiyatequiaari nohuasenuujuaca quiquiora.

<sup>18</sup> Pueyacuara seconaa jiyaniujanucua, mariyata Moisés Rootasanojiniji niishitiojonaari niishiquaari naa Jesu miishanojiniji. Cunora, nojoriiri rootooquiaari taa na motunutianiya Jesuni. Saniniujia, puetunu pueyajanaari jiuujiteriquiaa Jesu niishitiojosano nojori tojishacari. Cunora, Judiocuaca jiyaniujanucuaari Jesu puereturiquiaa, puetunu pueyajanaa tojishacari na niishitiojosano. <sup>19</sup> Jaara niniquiaari, Jesuuri Jerusalén tiacajiniji quiacuhua na saquiriojosano pueyata.

*Higo naana sorenojini pohuatasano*  
(Mt 21.20-22)

<sup>20</sup> Tariquicuaji, nojori shocosacari higo naana, na niqutiuquiaariiri tariucua soreno, puetunu na nujuacatajanaa. <sup>21</sup> Pedroori jiyacari Jesu sequesano niishiquii. Jesu sequereeri:

—Niishitiojonanaa, ¡quia niqiri! ¡Quia sesacasano higo naanaqui tari soreree!

<sup>22</sup> Jesuuri nojori riucaree:

—Pueyasocua nia tiuuri. <sup>23</sup> Seetanujuanaa nia sequenyajia, niaa jaara Pueyasocua tiuuriquia nia taacanuyaquiniutia, nia naata nio tuhuananu sequenu: “Shiiquia niiquii. Quia jaataare shoniacu caminajinia”. Niaa jaara naa sequere seetanujuanaa Pueyasocua nia tiuuniutia, niaari nia sequesano niqiniutianiya. Naacuajitij, Pueyasocua nia taacanuyaquishacari, nia sequesanojuaari tohuateenutianiya taa nia sequereecua-jani. <sup>24</sup> Janiyari cunora nia sequenyani, puetunujuanaa nia masesano nia secojosacari Pueyasoni, nia niishiri niaa na jütiaa tari. Na nuhuaji, niaari seetanujuanaa na masenutianiya. <sup>25</sup> Naa secojosacari, niaa jaara niishiquii niaa sesa quia tamonu pueyanota, sesa na miiniucua nijaniya, nojuaja nia jiyanoori. Naacuajitij, jiyocuaaanu Quijia nia Queeri nia jiyanooniutianiya sesa nia miishanojinijijuhuaaj. <sup>26</sup> Naa jaara jiyanooyashijia quiriquia, jiyocuaaanu Quinia nia Queeri nia jiyanoyaquiniutianiya, sesa nia miishanojinijijuhuaaj.

*Pueya nequesotasacari Jesu, cante na jiyaronani*  
(Mt 21.23-27; Lc 20.1-8)

<sup>27</sup> Na nuhuaji, nojoriiri quiaquiaarihuua Jerusalén tiacajinihua. Jesu rucanejosacari Pueyaso Secojojua tiajinia, nocua catecanoquiaariiri pueyacuara seconaa jiyaniujanucua, Moisés Rootasanojiniji niishitiojonaajuhuaaj, narta Judiocuaca camarucuanio.

<sup>28</sup> Nojoriiri Jesu nequesotaree:

—¿Cante quia sequecanu naa quia miiniuriani? ¿Cante quia jiyatecanu Pueyaso Secojojua tia jiyaniujia quia quiniuriani?

<sup>29</sup> Jesuuri nojori riucaree:

—Janíya nia neqyesotanutaniya saniniuníjia. Níaa jaara cua nequesotasano ríucuaere coteenucuaa, janíyari nia sequenutaniyajuhaaj cante cua jíyaroquíaaari naa cua miiniuriani. <sup>30</sup> Cua ríucuatúretóje, ¿cante Tíuquíuníjiona Juan jíyaroquíaaari pueya na tíuquíuníjionura moojiniani? ¿Narejaca pueyatee, Pueyaso soj? Cua ríucuatúre.

<sup>31</sup> Jíyacaritíj, cuno pueyari jíyasohuaja tama juayonuutánu coteeqúaaaríjiaaja. Naa sequetooquíaaaríi:

—Paa jaara na sequereni Pueyaso na jíyaroquíaaari, pa ríucuarúca: “¿Casaara nocua nia tíuyaquíuanucúaraarini?” <sup>32</sup> ¿Paatúca taa sequereeri, nojuaja nareja pueya jíyarosano quíquíaaari?

Cuno pojoriiri narta Israel pueya puereturíquíaa sequenura, Tíuquíuníjiona Juanri nareja pueya jíyarosano quíquíaaari. Nojoricúaaari níishiríquíaa puetunu pueyájanaari níishíquíaaari Tíuquíuníjiona Juanri seetanujúanaa Pueyaso sequesano caminiujúunia quíquíaaari. Cunora, nojoriiri Tíuquíuníjiona Juan rerequetenu pueretuquíaaari, pueya quíshacari tii. <sup>33</sup> Naacúajitíj, maja na naata na ríucuatunu quíshacari, Jesu sequetúreeri:

—Maja canaa níishíniu.

Jesuuri nojori sequereeri:

—Janíyajuhaaj, maja cua sequenu quíniútianiya níajaniya, cante cua jíyaroquíaaari naa cua miiniuriani.

## 12

*Míríqui pohuatasano sesa míjiaa pooníjionaaíjini*

(Mt 21.33-46; Lc 20.9-19)

<sup>1</sup> Jíyacaritíj, Jesuuri míríqui pohuátanu coteeqúaaari cuno pojori níquiara. Cuno camarúca sequereeri:

—Támonu pueyanoori cuhuaríquíajinia uva nátooquíaaari. Na nuhuaji, na shuríuquíoco matácoreeri. Naajúhuaj, saajia quejáquíaaaríi uva rapíjíojuara, na caaca reratesaanura. Jíyaconajara tíareejaaríhuaj, tíji na cuhuaríquíaa na cojuajara nohuasejójuaacuají.

Na nuhuaji, támasaca pooníjionaa pueya na níquítíoreeri nojori cojuasocoríquiano nera. Naacúajitíj, uva carojotasacari, nojoriiri nojuaja níquítionutaniya tíjijíhuaj, na camarujúanaa na quíniuucua. Na nuhuaji, nojuajaari túcuacaanu quíaaquíaaari, tíi maríjia na shocotejonura. <sup>2</sup> Jaara tari quíquíaaari uva carojotasacari, saníya cuhuaríquíaa camarujúanaari na seru jíyaroquíaaari cuhuaríquíaa cojuanaa pueyáca. Na jíyaroquíaaaríi cuhuaríquíaa cojuanaa níquítionura nojori carojotasanojíníj, taa na camarujúanaa pocoojójuaaaríca uva nojoríaa taríjiani. <sup>3</sup> Cuhuaríquíaa cojuanaa pueyari saaja jíyarosano seru quíatúree. Na píquítíuríi. Na nuhuaji, júhuasu na jíyarotúrohua na camarnúcuuáari. <sup>4</sup> Na camarúuri socua jíyaroquíaaari támonu na seru. Cuno seruuri jacusaaree saítia. Na nácaari surtasaaere saajíata jasano. Na sesacátúreejaaríhuaj. <sup>5</sup> Na camarúuri socua jíyaroquíaaari támonu na seru. Cuno na seru cutaraari mósaquíaaari. Na nuhuaji, socua jíyaramíquíaaari queraatíaa na seyari. Puetunu nojoríjíníjíojuanaani, támasacaari píquíshaquíaaari. Támasacaari puecosaaquíaaari cutara.

<sup>6</sup> Cuhuaríquíaa camarúuri saaja níquíriyatújaa níyanuníyójuu jíitíaaquíaaari, jíyanohua na paníshano. Cunora, nojuajaari socua cuno néyanuníyójuu jíyaroquíaaari. Na queeri táma sequéaaaríjiaaja: “Cuno pueya jaara níquíri cua níyanu, nojoriiri na tojíníútianiya cutara”. <sup>7</sup> Cuno cuhuaríquíajinia pooníjionaa níquíshacari nojori camarnu níyanu nojoricíca níyanu, nojoriiri saaja támaajaa níshítíoatóoquíaaari:

—Níoori pa camarnu níyanu! Nío cuhuaríquíaaari táma neraajaa quíniútianiya, na que jaara cusoyare. ¡Pa morej! ¡Pocua nío cuhuaríquíaa camarúhuara quíquíaa tamajaajani!

<sup>8</sup> Cunora, na quíatúreeri. Na mótureeri. Na mótonu nuhuaji, nojoriiri macu jatáree cuhuaríquíajíníj tamama.

<sup>9</sup> Jíyacaritíj, Jesuuri cuno pojori nequesotáree:

—¿Taa cuhuaríquíaa camaru míniútianiya socuani? Níaa sequereera pueyanaa. Nojuajaari cuhuaríquíaa cojuanaa puecoonutaniya. Na nuhuaji, támasaca pueya níquítionutaniya cuno cuhuaríquíaaari, nera nojori cojuánura.

<sup>10</sup> ¿Majátee tariúcuacaanu Pueyaso Rupaajinia nia serojónu quíquíuanucúaja nío? Naa sequeyari:

“Tíajónaa pueyari támaatíuajíau saajia jatáree nojori tíasacari saíjíníjía. Na nuhuaji, cuno jíatasano saajíaaari socua cutara saajíara jíyatesaarohua támasaca saíjíníjía.

<sup>11</sup> Cunoori pa jíyaníjía míshano. Pajaníyara, na míshanoori jíyanohua manínia. Nocúají jíuujíatesano”.

<sup>12</sup> Jíyacaritíj, cuno júdíocúaca camarúcaari níishirícuajaa míríqui Jesu pohuatasanoori táma nojoríjíníjíaaja quíríquíaa. Naarátéj, nojoriiri Jesu quíatunu panírí juucua, nojori nújatesocoríquiano. Nojoriiri pueya puereríquíaa saaja, naa nojori míniuríaa Jesutéj.

Naacuajitij, nojoriiri nareja quiojoquiaariuhua. Naa Jesu pohuatasacari miriqui cuno saajiajinijitij, nojuajaari tama na cuaqueyajinijiaaja pohuatariquiaa.

*Jiya jiyaniijia cuaara pueyaracaanu niqutiosaaaria na sequesano cumaneeca*  
(Mt 22.15-22; Lc 20.20-26)

<sup>13</sup> Na nuhuaji, Jesucua jiyaramiquishaaquiaariiri noojiaqueya Fariseocuacajinijinio, Herodes panijiaa pueyajinijiniojuhuaj. Cuno pojoriiri Jesu pocuatenu paniquiaari sesa juucua, jiyaniijia nojori saquiriojotanura nocuara. <sup>14</sup> Naaratej, cuno pojoriiri Jesucua nijioquiaari. Na sequetuseeri:

—Niishitiojonanaa, canaari niishiyani quiaa cutaraari sapojiyashijia. Quiaari seetanujuanaa sequeja. Majaari rimiajata quia niquniu pueyajuhuaaj. Majaari pueya naata sapojonu quiajaniya. Quiaari seetanujuanaa pueya jiuujia niqijia. Quiaa cutaraari seetanujuanaa Pueyasojiniji niishitiojua, taate pa naata maninia quiniu Pueyaso niqiarani. Naaratej, canaa quia sequere, ¿maninate pa niqutiojonura pa cumaneecajiniji jiyaniijia Césarra, taa cuno tahue sequequiaari pajaniyacujani? ¿Taa quia sequeyani, niqutiojoshiyatee, maja soj?

<sup>15</sup> Jesuuri ritia niishiquii, naa nojori nequesotasacari nojuajatej, cuno pojoriiri na saniniujiriquiaa sesa na pohuatenura najuhanaj. Naaratej, Jesuuri nojori sequere:

—¿Casaara nia saniniujia janiyani? Miji nia riri cumanee cua niqushocoriguiano.

<sup>16</sup> Nera rishaareeri cumanee. Jaara na niqiquiaari, Jesuuri nojori nequesotaree:

—¿Cana naaquiti nocuani? ¿Cana sesateeri nocua naajiotasanojanihuahaj?

Nojoriiri na riucuaaree:

—Jiyaniijia César naaquicuaaja, na sesajuhuaaj.

<sup>17</sup> Jesuuri jiyacari nojori sequere:

—Jaara tama César casaajaaja quiri, tama na casaajaaja nia niqutiore na camaru. Saniniujia, Pueyaso nia niqutiore nerano tama na casaajaaja.

Jesu jaara naa nojori riucuaquiaaritij, nojoriiri jiyanohua jiuujiatequiaari.

*¿Macunucuate samiitiaconutaniuhua?*  
(Mt 22.23-33; Lc 20.27-40)

<sup>18</sup> Fariseocuaca nuhuaji, noojiaqueya Saduceocuacajinijinoori Jesucua nijioquiaari. Saduceocuacaari jiyaniya macunucua maja na samiitiaconu quiniutianihua. Naaratej, nojoriiri Jesu nequesotasee nojori niishiniuria taa na sequenutaniya macunucujinijini. Na sequetuseeri:

<sup>19</sup> —Niishitiojonanaa, supuetana Moiséscaajaari pa rootaa na naajioneejinia, pueyano jaara cusoyare mueyaju, tarajanu cuaara camiiira mashiquio, mueya na mueratenura tarajanu niti. <sup>20</sup> Tariija, tamonu pueyanoori niya quiquiaari. Siete niqiohuaraca quiquiaariiri, saa canuuja. Jiyapueranuuri camiquiaari. Na nuhuaji, shaajequiaariiri muetuhuoja. <sup>21</sup> Naaratej, na nuhuajishanaari tarajanu mashiquio camiquiaari. Nojuajaari muetuhuoja cusoquiaarijuhuaj. Naajuhuaaj, jiyareta na nuhuajishanaari na camiquiaari. Nojuajaari juhua tapueyocuaca cusoquiaari mueyajuhuaaj. <sup>22</sup> Cuno siete canuuri naa camyoquiaari cuno maaji. Puetunu nojorijianaari cusonuuquiaari. Majaari quenaaja niquiriyatujua mueya nojori mueratenu quiquiaari. Na nuhuaji, cuno maajiiri cusoquiaarijuhuaj. <sup>23</sup> Naacuajitij, macunucua jaara samiitacorohua, ¿teyano cuno siete neyacaajinijiniote seetanu neyacajanaa quiniutianiyani, puetunu cuno pojorijianaa jaara neyaca quiquiaari?

<sup>24</sup> Jesuuri nojori riucuaaree:

—Niaari jiyanohua jiyajeneya Pueyaso Rupaajinia naajiotasano nia niishiyaquishacari, Pueyaso cumaacano. <sup>25</sup> Macunucua samiitacosacariuhua, majaari canu camiyonu quiniutianiya maaji. Naajuhuaaj, maajipohuari maja na camiyonu quiniutianiya neyacaara. Canuu, maajipohua, nojoriiri mariyata quiniutianiya juhua jiyocuaaanu quijiaa Pueyaso seya, maja camiyosano. <sup>26</sup> Naa macunucua samiitianijionujiniji nequesoree-taate. ¿Majateeri nia serojonu quiquiaacuaa supuetana Moisés naajioneejinia, taa Pueyaso sequequiaari Moiséscaaja nequeru casaja noshiyanojinijini? Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijiajuhuaj, quia supuetana Jacobo Jiyaniijiano”.

<sup>27</sup> Naacuajitij, paari niishiyani Pueyaso pueya shaajeconoori saminiucua quia Pueyaso cutara. Pueyasoori maja macunucua jiyaniijia, saaja saminiucua pueya jiyaniijia cutaraari. Janiyari cunora nia sequeyani, niaari jiyanohua jiyajeneya nia niishiyaquiniucua Pueyaso Rupa.

*Puetunu Pueyaso Rootasanojinijijianaani, teyanote socua pa tojishocoriquianoni  
(Mt 22.34-40)*

<sup>28</sup> Tamonu pueyanoori Jesu tojiriquiaa Saduceocuaca riuhuaneyano maninia saaja. Cuno pueyanoori Moisés Rootasanojiniji niishitiojona quiquiaari. Nojuajaari Jesuucua catecanoquiaari. Jesu nequesotareeri:

—¿Teyano tariucuacaanu Pueyaso Rootasanojinijiniote socua pa tojishocoriquianoni?

<sup>29</sup> Jesuuri na riuucaree:

—Pueyaso sequesano socua na pueya tojishocoriquianoori nio: “Nia tojitiare Israel pueyanaa, pa Jiyaniijia Pueyasoni, nojuacuajaari pa Jiyaniijijanaa. Majaari tamonu quiniu socua. <sup>30</sup> Nia Jiyaniijia Pueyaso nia paniri puetunu nioojiatjanaa, puetunu nia sohanutajanaa, puetunujanaa nia niishitajata, puetunu nia cumaacatajanaa”. Nio rootasanoori socua pa tojishocoriquiano puetunu Pueyaso rootasanojinijijianaa. <sup>31</sup> Socua tarajanu na rootasano pa tojishocoriquianoori quera juhua coteenu na rootasanojuhuaj. Naa sequeyari: “Quiarta pueyano quia paniri taa quia paniyacuaa tama quia cuaqueyajaajani”. Puetunu Pueyaso rootasanojinijijianaani, majaari socua tamonu rootasano quiniu socua tojishocoriquiano nio caapiqui na rootasanojiniji.

<sup>32</sup> Jiyacaritij, cuno Moisés Rootasanojiniji niishitiojonaari na sequeree:

—Quiaacuaa maninia sequeree, niishitiojanaa. Seetanujanaari quia sequesano: quiyacuaaquiniateja niquiriyatujua Pueyaso. Majaari socua tamonu quiniu juhua nojuaja. <sup>33</sup> Seetanujanaa jiyano hua maninia cutaraari Pueyaso pa paniniuria puetunu poojiatjanaa, puetunujanaa pa niishitajata, puetunu pa sohanutajanaa, puetunujanaa pa cumaacatanio. Naajuhua, jiyano hua maniniaari parta pueyano pa paniniu, juhua tama pa cuaqueyajaaja. Paa jaara nio sequesano tojjiaa quirini, cunoori jiyano hua socua maninia Pueyasora, puetunu seya catijiasanojinijijianaa nocuara, mariyata puetunu pueya niqutiojosano na casamijinjijianaa nera.

<sup>34</sup> Jesu jaara tojiquiaari naa cuno pueyano riuucasano maniniatej, na sequereeri:

—Quiaaqui quera Pueyaso pueyanora quia.

Na nuhuaji, majaari socua pueya nequesoreetanu paniniu quiri quiaa Jesu.

*¿Canaacuajinio supenote Cristoni?  
(Mt 22.41-46; Lc 20.41-44)*

<sup>35</sup> Jesuuri Pueyaso Secojoua tiajinia niishitiojoriquiaa pueya. Jiyacaritij, nojuajaari na tojtianaa pueya nequesotaree:

—¿Casaara Moisés Rootasanojiniji niishitiojanaa sequequiaacuaraarini: “Cristonaari supuetana David niqiuoacuajinio supenutaniya”? <sup>36</sup> Pueyaso Sohanu pohuatesacari supuetana David, nojuacuajaari sequequiaari:

“Jiyaniijia Pueyasoori cua Jiyaniijia Cristo sequeree: ‘Quia cajirijiaara cua miaquetajara, janiya cuara quia paraa shocojotare quicuajijiaatijia, Jiyaniijijanaa quia quiniuria pueyaracaanu cutara’”.

<sup>37</sup> Supuetana David jiyaniijiasacari Cristo, ¿Cristotucua taa supuetana David niqiuoacuajinio supueno quirini? Davidcuajaari na jyaniquiaa “cua Jiyaniijiaata”.

Queraatia pueyari shanohua tojitiariquiaa Jesu pohuatasano.

*Jesu sequesano Moisés Rootasano niishitiojanaajiniji  
(Mt 23.1-36; Lc 11.37-54; 20.45-47)*

<sup>38</sup> Jesuuri nojori na niishitiojosacari sequeriquiaa:

—Tama nia cuaqueyajaaja nia cojuare Moisés Rootasano niishitiojanaacuaji. Cuno pojoriiri puera tucuaque toque cushiyonu maniniucuaaja nojori rucuanajotajara, pueya shootianura nojori. Nojoriiri timiquiaa pueya saruhuatasacari nojori, nojori quishacari tiaca jiuujajinia curotasano cajitiucujinia. <sup>39</sup> Nojori jaara masuusaare tamonu tiajinia queranacunura, nojoriiri ritia secooquiaa socua panishano shitiujinia nojori cajitiuniuria tia camaru shuriucua. Naajuhua, Pueyaso secojojua tiacajiniaqueya pueya rerejosacari, nojoriiri camarucua cajitiucujinia cajitiuniu paniquiaa, pueya shootianura nojori. <sup>40</sup> Nojoriiri mashiquopue tiaca masequiaa secaja cumaneecata nojori na saponuta. Naa nojori miiniu nuhuajitij, nojoriiri Pueyaso secojoquiaa shitiayarocua pueya niqiuara, maninia pueya nojori jyanishaanura. Naaratej, Pueyaso saniitiosacari maninia miyashjiaca pueya, nojoriiri socua jyanohua naquiya miishaanutaniya tamasacajiniji.

*Casamijiu mashiquio niqutiosacari na cumanee juurane Pueyasora  
(Lc 21.1-4)*

<sup>41</sup> Tamacari, Jesuuri cajiriquiaa Pueyaso Secojoua tiajinia cumaneeca niqutiojojua tajoji, tee pueya niojoriquiaa na cumaneeca Pueyasoracuajani. Jesuuri tiji pueya

shootiariquiaa na cumaneeca niqutiojiyano. Queraatia casamiriaca pueyari queraatia cumaneeca niqutiojoriquiaa. <sup>42</sup> Jiyacari tiuquishiiiaariuhua casamiijiu mashiquio. Caapiqui cumaneeniyojua niasee cumaneeca niojojuajiniaari. Cuno cumaneeca na niasanoori maja puera cumaneeca na quiniu quiriqiaa. Saaja cobrejiniiji shipinishano quiquiaariiri. <sup>43</sup> Jesuuri jiyacari na saquirojosano pueya piirri. Nojori sequereeri:

—Seetanujuanaa nia sequeyanijia, nio casamiijiu mashiquio cutaraari socua queraatia niqutiooree puetunu tamasacajiniijijianaa. <sup>44</sup> Puetunu pueyajanaari na cumaneeca cureenojiniji niqutiojoriquiaa. Saniniuujia, nio maajiiri puetunujuanaa na miaquesocoriquiano na masetajarano niqutiooree cutara.

## 13

*Jesu sequesacari Pueyaso Secojoua tia niyartasaanutaniya*  
(Mt 24.1-2; Lc 21.5-6)

<sup>1</sup> Jesu tohuareetasacari Pueyaso Secojoua tiajiniji, tamonu na saquirojosano pueyajinijinioori na sequereeri:

—Niishitiojonanaa, quia niquri Pueyaso Secojoua tia, puereetujaaca saitia tiasano. jiyanoohua shanohua tia!

<sup>2</sup> Jesuuri na riucaaree:

—¿Quiaateeri cuno shanohua tia niquiya, saijiniji tiasano jiyaconajani? Cuniqiu, majaari saajia cureenu quiniutianiya tamonu caco maano quenaaja. Puetunu niyartasanojuanaa quiniutianiya.

*Taa pa niishiniutianiya ni puequesacari quera*  
(Mt 24.3-28; Lc 21.7-24; 17.22-24)

<sup>3</sup> Na nuhuaji, nojoriiri quiojoquiaari olivo cuhuariquia tuhuananuucua. Cuniqiuji, maja puera tucuaaanu quiquiaari Pueyaso Secojoua tia. Na taquijirijaja quiquiaariiri. Jesu cajishacari tii, nocua catecanoquiaariiri Pedro, Santiago, Juan, Andrésnio. Nojoriiri na sequetuquiaari jiyasohuaja:

<sup>4</sup> —Canaa quia sequere taacari Pueyaso Secojoua tia niyartasaanutaniya. ¿Casaa Pueyaso miiniutianiya canaa niishiniuria quia sequesano quera tohuateya?

<sup>5</sup> Jesuuri nojori riucaaree:

—Tama nia cuaqueyajaaja nia cojuare tamasaca sapojiaquiniuucaaji nijaniya. <sup>6</sup> Nia numooteyacuajaniija, queraatia sapojonuujuaacari nijionutaniya nojori sequenura nijaniya: “Janiya Cristoni”. Naa sapojotunutaniya queraatia pueyari.

<sup>7</sup> Naa jaara tojiniuuri miaquetoojonujiniji niya, tucuaaanujuhuaj, majaari najuhua nia shiriqitiuniu. Seetanujuanaa naa quiniutianiya. Naajaa, jiyacari, majaari jiya puequesacari quiniutianiya juhuanujuaja. <sup>8</sup> Tamonu rupaa pocuajacaari miaquetoojonutaniya tamaatiuucua rupaa pocuajacata. Pueyari tamonu jiyajiniji miaquetoojonutaniya tamonu jiyajinijinio pueyata. Naajuhua, rijiaari jiuquiujiutianutaniya queraatia tiqiyocua tiacajinia. Jiyanoohua miaajesacariiri quiniutianiya jiyacari. Naajaa, puetunu niojuanaari saaja shusha naquiyia miiniu cotesacari quiniutianiya.

<sup>9</sup> Tama nia cuaqueyajaaja nia cojuare. Naaari tama nia tiacajinia jiyaniijianucuaajaaja niquitiosaanutaniya saniitosocoriquiano. Naajuhua, niaari Pueyaso Secojoua tiacajinijanaa majacusaanutaniya. Naaari jiyatasaanutaniyajuhaa tiaca jiyaniijiaacua, jiya jiyaniijianucuaacuanio, nojori nequesoreenura nijaniya, janiyajiniji pohuatanaa nia quiniuuca. Naacuajitij, niocua janiyajiniji pohuatane nojori niqiarajuhua. <sup>10</sup> Jiya puequeyaquishacariija, Pueyaso rupaari tari pohuatano quiniutianiya puetunu jiyacajinijanaa. <sup>11</sup> Cua tojiri, niaa jaara jiyatashiyare jiyaniijianucuaacua nequesoreesocoriquiano, majaari nia tacaaniu taa nia sequenutaniya, taa nia pocuanutaniya. Majaari quenaaja nia niishiriojonu naatej. Saaja nia sequere nojori niqiuara jiyacari Pueyaso Sohanu niishitiojosano nijaniya. Naa pocuasanoori maja nijaniyajiniji quiniutianiya, nia pocuasacari nojori niqiuara. Cunocuaajari Pueyaso Sohanu niishitishano quiniutianiya, na pocuatasacari nijaniya. <sup>12</sup> Jiyacarijuhuaj, pueyanoori sesa miiniutianiya tama tarajanujuaaja, cua tojijia tarajanu quiniuuca. Tama tarajanujuaariija na niqutionutaniya mosocoriquiano. Jiyacariitij, pueyari tama necohuajaaja miiniutianiya sesa, cucua tiuujiaca necohua quiniuuca. Naajuhua, necohuari tama na queya tacarantutaniya monujuaaja, na queya tojiniuuca Pueyaso rupaa. <sup>13</sup> Puetunu nio jiyajinijinio pueyajanaari maja na niqiniu paniniu quiniutianiya nijaniya, cua tojitiajaca nia quishacari. Naajaa, cante seetanujuanaa pueyaracaanu cucua tiuyajaani nio jiya jaara puequerejaatijia, nojuaja cutaraari shacantuca quijiaa jatanishaanutaniya, pueyaraanu cuata na quiniuria shuqiriataa.



<sup>14</sup> 'Niaa jaara cuno jiyanhua sacuaraatia casaa niquiri Pueyaso Secojoua tijainia nujuatesano, taa supuetana Daniel sequeya na naajioneejiniaacuajani, niocua ritia mashiri. (Cante nio serojiyani, nojuaja cuara niishiiria casaa na sequeyani.) Judea jiyajinia quiniaa cuara mashiiria ritia tuhuananuhuaa, cuno sacuaraatia casaa jaara nujuatesaare Pueyaso Secojoua tijainia. <sup>15</sup> Canapute jiyacari quiya na tia cacojiriani, nojori cuara tiuquitiaquiiiria tijainiaaco na casaa na riniuria juucua. <sup>16</sup> Canapute jiyacari quiya na cuhuariquiajiniani, nojori cuara tacateyaquihuara na toqueya na poonuhua. <sup>17</sup> Jiyacaritij, jiyanhua taraatia quiniutianiyari maajipohuara, nojori jaara manajaatohua quiya, jaara jiyacari jiitiare supiejaca conaajajuhua. <sup>18</sup> Nia secosacari, Pueyaso nia maseriquia juhuacarijia, nia mashiyocuatucacari cuara quiyacuiria shiniquia quishacari. <sup>19</sup> Cuno quishacari, jiyanhua naquiya miiniuuri quiniutianiya. Tariucuaaanu, majaari naa naquiya miiniu quiquiaari Pueyaso shipiniuu nuhuaji nio jiya. Naajuhua, cuno naquiya miiniu nuhuaji, majaari jiyano naquiya miiniu quiniutianiuhua socua, juhua nio. <sup>20</sup> Pueyaso jaara ritia tajitiyaquiri cuno naquiya miiquiosacari, pueya maara mijiria cureyaquirij. Pueyasocuaajari ritia tajitiniutianiya cuno naquiya miiniu, na saquiriojosano pueyacu na taraajenuucua.

<sup>21</sup> 'Jiyacaritij, tamasaca jaara nia sequere: "Nia niquiri, Cristo tari niya quiya", jaara sequerejuhuaj: "Nooj, jati quiyatej", majaari na tojtianunoj. <sup>22</sup> Jiyacaritij, queraatia saponuujuacaari supenutaniya. Nojoriiri sequenutaniya: "Janiyacuaa Cristoni". Tamasacaari sequenutaniyajuhua: "Janiya Pueyaso sequenu panishano caminiujuiniani". Nojoriiri pueya niquishoo casaa miniutianiya na cumaacata, Pueyaso saquiriojosano pueya na sapojonura juucua. Jiyacaritij, queraatia pueya cutaraari sapojosaanutaniya. <sup>23</sup> Cunora pueyanaa, tama nia cuaqueyajaaja nia cojuare. Janiyacuajaari tari juhuacarijia nia numooteyani. Majaari cua sequesano nia niyajetanu.

*Pueyaso Niyanu tacatenujiniji pohuatasano*  
(Mt 24.29-35, 42, 44; Lc 21.25-36)

<sup>24</sup> 'Naa naquiya pueya miiniu nuhuajitij, pananuuri ninishiquiria quiniutianiya. Naa-juhuaj, racaari maja na cuhuatanu quiniutianiya mijiria. <sup>25</sup> Riyari totenutaniya. Jiyocuaaanu cumaacaraca quijiacaari tetecatunutaniyajuhua. <sup>26</sup> Jiyacari, janiya Pueyaso Niyanuuri niquishaanutaniya jiyocuaaanuji roseyano cohuajajiniani, jiyanhua shacantuuca cua cumaacata. <sup>27</sup> Jiyacaritij, janiyari cua seya jiyarami quiniutianiyani nojori rerejotenura puetunu cua saquiriojosano pueyajanaa. Nojoriiri puetunu nio jiyajiniujuananaa rerejotesaanutaniya, socua jiyanhua tucuaaanu jiya cajiniocua puequeetujinijinio.

<sup>28</sup> 'Quiarjia cutara nia niishiri higo naanajiniji. Shuniyara, na jaamasucuaari totequiaa jaranacujua na quiniuria. Na nuhuaji, na cashacucua jaara macumaaca quiri, quiarinio jaamasucuaari mueratumohua. Niaa jaara naa niquiritij, niaari niishiquiaa tacareejonuqui quiniutianiya. <sup>29</sup> Quiarjia saniniuuja, naatej taa nia niishiquiaa higo naanacuaani, niocua naa niishirijuhua janiya quera tiuquihuani, niaa jaara puetunu cua pohuatasanojuanaa niquiri tohuateyano. <sup>30</sup> Seetanujanaa nia sequeyanijia, puetunu cua pohuatasanojuanaari niquishaanutaniya nio pa quishacari quiniaa pueya cusonuyaquishacarijia. <sup>31</sup> Jiya cajiniocuaari shaajenutaniya, nio jiyajuhua. Cua Rupaa cutaraari maja na jatanu quiniutianiya. Cua sequesanoori puetunujanaa tohuateenutaniya.

<sup>32</sup> 'Maja cutaraari nia niishiniu taacari cua tiuquiniutianiuhuani, casaa juucatej. Majaari jiyocuaaanu quijiaca Pueyaso seya niishiniujuhuaj. Janiyajanaari maja cua niishiniu. Saaja cua que Pueyaso cutaraari tamajaaja na niishiya.

<sup>33</sup> 'Cunora, janiyari nia sequeya cutarani, maja juhua maquenuujuuaca nia quiniu. Pueyaracaanu nia niqutiare cucuaji, juhua sutejaca. Tamajaaja nia soquere. Saaja pueyaracaanu nia secojoriguia Pueyaso. Majacuajaari nia niishiniu taacari cua tiuquiniutianiuhuani. <sup>34</sup> Cunoori quiniutianiya juhua tamonu pueyano quianu panishacari tamonu jiyajiniara tucuaaanu. Na quianura, nojuajaari na seya seeraataree maninia nojori cojuanura na tia. Tamasaca niqutiayaree na poonijosanoori, nojori poonijosocoriquiano. Tamonu sequereeri, tohuateyaji na cojuanura pueyaracaanu, nojuaja cuara tiuquihuaraajattijia. <sup>35</sup> Naaratej, nia sutere. Maja maquenuujunu. Majaari nia niishiniucuaaja taacari tia camaru tiuquiniutianiuhuani, shusha ninishacari, shiyaqueya, caacaraja niunijosacari, tariquicuaji soj. ¿Taacari cua tiuquiniutianiuhuani? Johua, maja pa niishiniu. <sup>36</sup> Cunora, juhua sutejaca nia quiriquia, janiya mariqui nia jiyajenetesuhuari, canashiyaquiji cua tiuquishacarihua niaacua. <sup>37</sup> Cua sequesano niajaniani, cunoori puetunu pueyarajanaa: "¡Nia sutereja! ¡Maja maquenu!"

## 14

*Judiocuaca camarucua roojotoosacari nojori qianura Jesu*  
(Mt 26.1-5; Lc 22.1-2; Jn 11.45-53)

<sup>1</sup> Jiyacari, juhuanoujaa querajaa juuca quiriquiaajaari Pascua juucara queranacunura. Pascua juucajuhuaj, poreetajaaju shipinishano pan miaquenu coteesaaquiaari siete juucara. Pueyacuara secojonaa jiyaniijianucuaari jiyacari Moisés Rootasanojiniji niishitiojonaata roojotooriquiaa Jesuucua. Nojoriiri roojotooriquiaa taa nojori sapojonuta nojori quiatunutaniya Jesu jiyasohuajani, na motusocoriquiano. <sup>2</sup> Nojoriiri naa sequetooriquiaa:

—Maja queranacusacari naa pa miiniutij, paa mariqui puetunu pueyajanaa juaatiriiri.

*Tamonu maaji totasacari na shanhua jaanutaja Jesuucua*  
(Mt 26.6-13; Jn 12.1-8)

<sup>3</sup> Jesuuri Betania tiacajinia quiriquiaa Simón tiajinia na saquiriojosano pueyataja. Cuno Simónri tarijia lepra cusotaja quiquiaari. Jesu cajishacari tii miaquejajinia, tamonu maajiiri tiuquiquiaari. Shiitaniyojua shucuariquiaja pataconiyojua cacatariquiaari, shanhua cohuaa saajiajiniji quejasano. Mishaja quiriquiaari shanhua jaanutajata, nardo jaamasucujiniji shipinishano. Jiyanhua queraatia cumaneecata masesano quiquiaariiri. Jiyacaritij, cuno maajiiri na shucuariquiaja pataconiyojua cocuateree, na totanura Jesu nacaacua. <sup>4</sup> Tamasaca tii quiniaa pueyari juaarii naa cuno shanhua jaanutaja niitiasaanucua. Tama nojoriijaarijia sequetooriquiaa:

—¿Casaara cuno shanhua jaanutaja niitiasaaree najuhuanani? <sup>5</sup> ¿Cuno jaanutaja maara niquitiosaacanu queraatia cumaneecara, casamiijiuniucua niquitiosocoriquiano!

Nojoriiri juhuacatecara cuno maaji juaarii.

<sup>6</sup> Jesuuri nojori sequereee saaja:

—¡Nia tarinitiare! ¿Casaara nia rimiaaqueya nio maajicuarani? Naa na miishano janiyani, cunoori jiyanhua maninia quiria. <sup>7</sup> Casamiijiuniucua pueyacuajaari pueyacaanu quiriquiano niaata. Nia naatacuajaari maninia miiniu nojori nia panishacari. Janiya saniniujia, maja cutaraari cua quiniu quiniutianiya pueyaracaanu niaata. <sup>8</sup> Nio maajiiri maninia miirii. Majaari na naata miiniu quiriquiaa socua maninia nio na miishanojiniji. Na totasacari cucua na shanhua jaanutajani, nojuajaari juhuacarijia cua cuaqueya jeenucuaa, raaco cua niasaanura janiya jaara mosaareni. <sup>9</sup> Seetanujanaa nia sequeyanijia, puetunu jiyacajiniajanaa tee Pueyaso rupaa pohuatasaanutaniyani, nio maaji miishanoori pueyaracaanu pohuatasaanutaniyajuhuj. Naa na miishano janiyatej, majaari na niyajetasaanu quiniutianiya.

*Judas tacartasacari Jesu, na quiatenura*  
(Mt 26.14-16; Lc 22.3-6)

<sup>10</sup> Jiyacaritij, Judas Iscarioteeri quiaquiaari pueyacuara secojonaa jiyaniijianucuaata roojotoonura taa nojori na quiatenutaniya Jesuni. Nojuajaari Jesu saquiriojosano pueyajinijinio quiquiaarijuhuaj. <sup>11</sup> Jiyaniijianucua jaara tojiquiaari, Judas nojori quiatenu panija Jesu, nojoriiri jiyanhua shuquiririi. Nojoriiri Judas sequereee:

—Canaa quia niqutionutaniya cumaneecani, canaa quia quiatenu sami Jesu.

Cunora, Judasri niishiriojonu coteequiaari taacari nojori na quiatenutaniya Jesuni.

*Jesu miaquesacari na nuhuajiria na pueyata*  
(Mt 26.17-29; Lc 22.7-23; Jn 13.21-30; 1 Co 11.23-26)

<sup>12</sup> Puetunu marijarajanaa, Judiocuacaari Jerusalén tiacajinia rerejoquiaari poreetesoo pan nojori miaquenuunura siete juuca. Coteenu juuca seasaari quiquiaari “Pascua”. Cuno juuca puecoosaaquiaariiri Pascuaa riuriotaca borregohua, Pueyaso niqiuara miaquenuusocoriquiano. Naaratej, Pascua juuca quishacari, Jesu saquiriojosano pueyari Jesu nequesotaree:

—Jiyaniijianaa, ¿tee quia paniya canaa majeetenura quiocuaji borregoni, pa miaquesocoriquiano quiarijia Pascuarani?

<sup>13</sup> Jiyacaritij, Jesuuri caapiqui na saquiriojosano pueyajinijinio sequereee:

—Nia quiaare Jerusalén tiacajinia. Niaari tii riuriatanutaniya tamonu pueyano, na mohuaca pataano na patacojinia. Niaa jaara na riuriatasee, niocua na nuhuajimia. <sup>14</sup> Jaara tiuquishii tiajinia, niocua cuno tia camaru sequese: “Niishitiojona naa quia sequeya: ‘¿Tee cuniqui cua miaquenutaniya cua saquiriojosano pueyata quiarijia Pascua niucuan?’”

<sup>15</sup> Jiyacaritij, nojuajaari nia niqutinutianiya pueretuuca sohuaca, jiyocuaaanu nataco, tariucua maninia jeenucuasano. Niocua cuniqui borrego majeetese, niucua pa miaquesocoriquiano.

<sup>16</sup> Na saquiriojosano pueyari quiojoquiaari. Tiacajinia tiuquiiijioseeri. Nojori tiuquiiijosacari, nojoriiri puetunujuanaa riuriatasee taa Jesu sequeree nojoricuajani. Nojoriiri tii majeetese borrego, Pascuara miaquesocoriquiano.

<sup>17</sup> Jaara niniquiaari, Jesuuri tiuquiiijioseer na saquiriojosano doce pueyata. <sup>18</sup> Nojori miaquenuusacari, Jesuuri nojori sequeree:

—Seetanujuanaa nia sequeyanijia, tamonu niajanijajininio nia cuata miaqueyani, nojuajaari cua tacatanutaniya na quiatenura janiya, naquiya cua miishaanura.

<sup>19</sup> Jesu sequesacari naatej, nojoriiri jyanohua taraajequee. Jiyacaritij, tama nojorijiaarjia na nequesoreetanu coteeree:

—¿Janiya jiyoteeri quia quiatenutaniyani Jiyaniijianaa?

Puetunu nojorijianaari naa na nequesotaree.

<sup>20</sup> Jesuuri nojori riucaaree:

—Niquiriyatujua doce niajanijajininio cuaja, nojuacuajaari nio, shusha pan shiya mia-cojuajiniani, nojuajaari cua quiatenutaniya. <sup>21</sup> Janiyacuajaari maninia tohuateenutaniya puetunujuanaani, taa tariucuacaanu Pueyaso Rupaajinia janiyajiniji naajiotasaaquiaaricujani. Saniniuuja, jyanohua taraatia quiniutianiyari cuno pueyanora, cantucuaja cua quiatenutaniya mosocoriquianoni. Maara socua maninia quiquiaari cuno pueyanora, nojuaja jaara raaquishaaquiaari.

<sup>22</sup> Nojori miaquenuusacari, Jesuuri pan ririi. Na Que Pueyaso secojoree nocuaraari. Na neecasenu nuhuaji, nojori niqutiojoreeri. Na niqutiojosacari, naa miriqui sequequiaariri:

—Jajaa. Nia miaquere. Nioori cua cuaqueya.

<sup>23</sup> Na nuhuaji, Jesuuri ratujua pataree. Na Que Pueyaso secojoreeri nojori ratuocoriquianoocua. Na secojonu nuhuaji, na saquiriojosano pueya niqutiojoreeri nojori ratunura tiji. Puetunu nojorijianaari ratujuajiniji raturee. <sup>24</sup> Nojori sequeree miriquiri:

—Nioori cua nanaca. Cua nanacaari queraatia pueyacuara shoonutaniya. Naacajitij, Pueyasoori seetanujuanaa jyanooñutianiyari pueya, saaja nojori tiuuniucua cucua, taa Pueyaso sequequiaaricujani. <sup>25</sup> Seetanujuanaa nia sequeyanijia, maja socua cua ratunu quiniutianihua uva caacajiniji, janiya cuara tacatemohujaatijia pueyaracaanu Jiyaniijianaa cua quiniuria. Jiyacaritij, janiyari shusha niaata na ratunutanihuani.

*Jesu sequesacari Pedro, nojuaja nocuaji seetanutaniya*

*(Mt 26.30-35; Lc 22.31-34; Jn 13.36-38)*

<sup>26</sup> Pueyasora na jaaquequenuunu nuhuaji, nojoriiri quiojoquiaari olivo cuhuariquia tuhuananuucua. <sup>27</sup> Na quiojosacari, Jesuuri nojori sequeree:

—Nio niucuajani, puetunu niajanijajanaari cucua tiuuniu tarinitianutaniya. Naa naajiotasano quiyacuajaari niajanijajiniji tariucuacaanu Pueyaso Rupaajinia. Naa sequeyari: “Janiyari borrego Cojuana monutaniyani. Na borregohuari na camaru nuhuaji niyaquejonutaniya tamajaaja”.

<sup>28</sup> Na nuhuaji, janiya jaara samiitiarohua macujinijini, janiyari nia puetanutaniya Galilea jiyajiniani.

<sup>29</sup> Pedroori jiyacari Jesu sequeree:

—Nia cuata quiniaa naasucua quiocuaji carajenutaniya. ¡Janiya cutara maja cua catenu quiniutianiyari quiocuaji!

<sup>30</sup> Jesuuri saaja na sequeree:

—Pedronaa, janiya seetanujuanaa quia sequeyani, nio niucuajani, quiaari janiyajiniji naa seetanutaniya pueya niquiara: “¡Maja cua niishiniu Jesu!” Quiaari naa pacutejonutaniya sequenutej, caacaraja caminiujujaquishacarijia niunijionu.

<sup>31</sup> Pedroori saaja na pataariquiaa naa Jesu sequesacari nojuajatej. Socua sequerohuari:

—¡Janiya cuara mosaaria quiataquí, naajaa, majaari cua seetanu quiniutianiyari quiocuaji!

Narta saquiriojosano pueyari naa sequetureejuhuj.

*Taraatia Jesu secojosacari Getsemaní cuhuariquiajina*

*(Mt 26.36-46; Lc 22.39-46)*

<sup>32</sup> Nojoriiri jiyacari tiuquiiijioquiaari tamonu cuhuariquiajina. Cuno cuhuariquia sesa quiquiaari Getsemaní. Jesuuri na saquiriojosano pueya sequeree:

—Niyaja nia cajitiuri, cua secojosacari cua Que socua nia tacoji.

<sup>33</sup> Nojuajaari saaja nocua ropojiyaree jiuujianaraca na pueya: Pedro, Santiago, Juannio. Jesuuri juhuacatecara shiriquiriquiaa. Tacaariquiaajaarihuaj. <sup>34</sup> Nojori sequereeri:

—¡Coojajinia taraajeya jyanohuanijia, quera cusoyanjia! Niyaja nia jiyojetare. ¡Niocua niqutiareja! ¡Majaari maquenu!

<sup>35</sup> Jesuuri socua shiitianiyojua quiaaree nojori tajoji. Na secojonura Pueyaso, mojoquetaseeri. Jiyocuara jacamaquiaariiri. Pueyaso masereeri, maja naquiya na miishaanura juucua. <sup>36</sup> Na secojosacari, nojuajaari naa sequequiaaritiij:

—Cua Quenaa, quiara maja jiyajeneta quia panishano quia miiniuria. Naaratej, janiya quia secojiyani, nio raatonuque cucuaji quia tajitiri. Naajaa, cuara quiaquiiiria juhua cua panishano. Saaja cuara quiiria cutara quia paniyacuajani.

“Nio raatonuque” na sequesacari, Jesuuri miriqui sequeriquiaa naquiya na mishocoriquiano.

<sup>37</sup> Na secojonu nuhuaji, na saquiriojosano pueyacua tacateyarohuari. Nojori riuriata-suhua maquetiuyanoori. Jesuuri Pedro sequeree:

—Simónnaa, ¿quiaate maqueya? ¿Majateeri quenaaaja quia naata rejeretanu rupaquijia quia maquenu? <sup>38</sup> Nia sutere. Maja maquenu. Pueyaso nia secojore nia mariqui sesa miitishaareeri. Seetanujanaa, poojiaari maninia miini panijia. Pa cuaqueyari saniniujia sasaca quiyacujua. Majaari pa naata maninia miiniu pa panishano tamajaaja. Cunora, Pueyaso nia secojore na cumaquiniuria nijaniya maninia nia miiniuria.

<sup>39</sup> Jesuuri quiaquiaariuhua socua secojonuhua. Na secojosacari, socua sequenu pacatequiaariiri juhua coteenu na sequesano. <sup>40</sup> Na nuhuaji, socua tacatequiaariuhua na saquiriojosano pueyacuaari. Nojori riuriatasuhuariuhua maquetiuyano. Nojori namijiaari saaja seecutayariquiaa na maquenuujunuta. Jiyacaritiij, nojoriiri maja na niishiniu quiriquiaa taa na riucuatunutaniyanoj. <sup>41</sup> Jesuuri socua quiaquiaariuhua na Que secojonura. Na tacatesacariuhua secojonujiniiji, nojori sequesuhuari:

—¿Niaate maquetiuyajaa? ¿Niaate samaateyajaa? ¡Tariucuaaja! ¡Quiarjia cutara janiyaari sesa mijiaa pueya quiatesaanutaniyani, nojori miiniuria janiya taa nojori panitiuyacuajani! <sup>42</sup> Nia saneecuature. Pa quiaare. Cua quiateriquiano tari cumaji.

*Na paraa quiasacari Jesu*

(Mt 26.47-56; Lc 22.47-53; Jn 18.2-11)

<sup>43</sup> Jesuuri pocuariquiaajaa Judas tiuquishacari nojoriicua. Cuno Judasri, Jesu saquiriojosano doce pueyajiniijinio quiquiaarijuhuaj. Queraatia pueyari Judasta nijioquiaari. Cuno pueyari nijiniaquetucuaaja mueruu pooriquiaa, macacanio. Cuno pojoriiri pueyacuaara secojonaa jiyaniijianucua jiyaramiquishano pueya quiquiaari, Moisés Rootasanojiniji niishitiojanaa jiyaniijianucua jiyaramiquishanojuhuaj, Judiocuaca camarucua jiyaramiquishanonio. <sup>44</sup> Judas, Jesu quiateriquianoni, nojuajaari juhuacarjia nata quiniaa pueya rootaquiaari, nojori niishiniuria teyanote Jesuni. Naa nojori sequequiaariiri:

—Teyano pueyano cua nujuya pa tiuquishacarini, cunocuaajaari nojuaja. Niocua na quiaase. ¡Niaari maninia morojosano jaatucutaarohuaquinioj!

<sup>45</sup> Naacuajitiij, Judas jaara tiuquiquiaari Jesuucua, nocua catecanoquiaariiri. Na sequereeri:

—¡Niishitiojonanaa!

Jiyacari na nujuereeri. <sup>46</sup> Judasta nijionaa pueyari jiyacari Jesu quiaase. Morojosanoori jaatucutashiyarohua.

<sup>47</sup> Cuniqiu Jesuta quiniaa pueyajiniijinioni, niquiriyatu nojorijiniijinioori na shuucuaaji shitiaquiaari nijiniaquetucuaaja mueruu. Nata jaateree pueyacuaara secojonaa jiyaniijia seru numocoori. <sup>48</sup> Jesuuri nocua nijionaa pueya sequeree:

—¿Casaara cucua nia nijioree nijiniaquetucuaaja mueruutani, macacatanio, morojosano nia riniuria janiya juhua nohuasejojuani? <sup>49</sup> Janiyacuajaari puetunu juucajanaa nia tajinia quiquiaani, Pueyaso Secojoua tiajinia cua niishitiojosacari pueya niqiuara. Majaari tii cua quishacari nia quianu quiquianu janiya. Naajaa, naa nia miiriqui, tariucuaaanu janiyajiniiji Pueyaso Rupaajinia naajiotasano tohuatenuara.

<sup>50</sup> Jiyacaritiij, puetunu Jesu saquiriojosano pueyajanaari na shuriucuaaji mashiyocuatucuaari. Tamajaaja Jesu tiujiatuqueeri. <sup>51</sup> Saaja tamonu mashajaari Jesu nuhuajii sacuariquiaa cutara. Cuno mashaja sesaari Marco. Nojuajaari saaja puereetucue lino toquerauta cuhuajaatiariquiaa. Jesu quiatunaa niquishacari nojuaja, na quiatreejaariuhuj. <sup>52</sup> Nojuajaari saaja na toque tiujiaquee nojori juashiquiajinia. Juhuasuari ritia netequee. Mashimiaari. Janiyacuajaari cuno pueyano quiquiaarini, nio naajionajuhuj.

*Judiocuaca camarucua nequesoreesacari Jesu*

(Mt 26.57-68; Lc 22.54-55, 63-71; Jn 18.12-14, 19-24)

<sup>53</sup> Jesu quiatunaaari Jesu jaatucuaquiaari pueyacuaara secojonaa jiyaniijia tiajinia. Puetunu nio pojorijianaari tii rerejoquiaari: pueyacuaara secojonaa jiyaniijianucua, Judiocuaca camarucua juhuaj, Moisés Rootasanojiniji niishitiojanaanio. <sup>54</sup> Pedroori Jesu nuhuajiquiaari tucuaaanuji. Jateeseeri pueyacuaara secojonaa jiyaniijia tia carijiniacuma. Cuno jiyaniijijajanaa seya tajinia cajishiiri. Mani jitiuriquiaa nojortia cuniquiiri.

<sup>55</sup> Pueyacuara secojonaa jiyaniijianucua, puetunu Judiocuaca camarucujanaari ni-ishiriojonuuriquiaa nojori saquiriojotanura Jesuucuara. Jesuucuara tonujuriquiaanoori pajesaaquiaari juucua, na motenura. Saaja shaaqui quiquiaariiri sesa casaa, nocuara tonujusocoriquiano. <sup>56</sup> Queraatia pueyari nocuara tonujuriquiaa juucua, nojori sapo-jonuta. Nojori saquiriojotasanoori saaja rimiajata quiriquiaa puetunujuanaa. <sup>57</sup> Na nuhuaji, tamasaacari sanetaquiaari nocuara nojori tonujunura na sapojonutajuhua. Nojoriiri naa sequetuquiaaritiij:

<sup>58</sup> —Canaa na tojiqianu sesa sequeyanoni. Naa sequecanuuri: “Janiya nio Pueyaso Seco-jojuua tia niyartanutaniyani, pueya tiasanoni. Jiuujianaraca juucajinia, janiyari tamajaaja na tianu tucuatanutaniuhuanu. Cunoori maja pueyata tiasano na quiniu quiniutianiya”.

<sup>59</sup> Nojori saquiriojotasanoori saaja rimiajata quiquiaari jiyaniijianucua niquiara.

<sup>60</sup> Jiyacaritiij, pueyacuara secojonaa jiyaniijiaari nujuaree pocuanura. Jesu nequesota-reeri:

—¿Majate quenaaja quia riuucuanuujua? ¿Quia tojiri, pueyaruhua quiocuara tonujiya!

<sup>61</sup> Jesuuri saaja sanaa nujuariquiaa. Majaari na riuucuanu quiriquiaa quenaaja. Puey-acuara secojonaa jiyaniijiaari socua na nequesotaquiaariuhua:

—¿Quiaate Cristo, jiyocuacaanuji Pueyaso Jiyarosano?

<sup>62</sup> Jesuuri na riuuaree:

—Jaa, nojuacuajaniija. Niaari cua niquiniutianiya jiyocuacaanu cumaaca Jiitiana mi-aquetajara cajiyano. Na nuhuaji, niaari cua niquiniutianiya tacatehuano cohuajajinia jiyocuacaanuji.

<sup>63</sup> Pueyacuara secojonaa jiyaniijia jaara tojiquiaari naa Jesu sequesantej, tama na toquejaaja sutaree na juaniutiaari. Sequereeri:

—¿Casaara pa sashiya tamasa saquiriojotanura saa nocuarajaanuihuaj? <sup>64</sup> Niaacuaja shusha tojiri Pueyasocuaru na sequesano sacuraatia. ¿Niajanijarijataj, taa nia niishirio-jiyani?

Puetunu pueyajanaari sequequiaari:

—¿Cuaara mosaaria!

<sup>65</sup> Jiyacaritiij, tamasaacari Jesu riocojonu coteequiaari. Na jiquioco morotureejaariuhua maja na niquiniuria. Na nuhuaji, pueyari na piqiniu coteequiaari. Na pinu nuhuaji, na nequesotaturiquiohuari:

—Quia niishiritioj, ¿cante quia piriini?

Secojojuua tia cojuanaa pueyari na jiquioco piqutiurijiuhuaj.

*Pedro seetasacari Jesujiniji*

*(Mt 26.69-75; Lc 22.56-62; Jn 18.15-18, 25-29)*

<sup>66</sup> Pedroori jiyaniijia tia carijiniacuma quiriquiaa. Jiyacaritiij, tamonu niyacoori rucanejoriquiaa carijiniacuma. Nojuajaari pueyacuara secojonaa jiyaniijia seru quiquiaari. <sup>67</sup> Pedro niqishii cajiyanoori, mani jitiuyano. Tacuriitia na shootariquiaari. Na nuhuaji na sequereeri:

—Jaj, quiaacuajaruhua Jesuta rucanejojuajuhua, cuno Nazaret tiacajinijinio pueyanotani.

<sup>68</sup> Pedroori na seetaree. Na sequereeri:

—¿Cuno pueyano maja cua niishishano! ¡Majaari quenaaja cua niishiniu casaa quia sequeyani!

Pedroori canujiaree. Mataca tohuatayaji nujuaseeri. Caacarajaari jiyacari niunijoree. <sup>69</sup> Cuno niyacoju jaara Pedro niquiquiaariuhua socua, juhuacatecara nata quiniaa sequereeri:

—¿Nio pueyanoori cuno Jesu pueyajinijiojuhuaj!

<sup>70</sup> Pedroori socua na seetaquiaari. Pasaja na tarishishacari, cuniqui nata quiniaari Pedro sequereeri socua:

—Seetanujuaanaa, quiaari cuno pueyajinijinio. Quiaacuajaari Galilea jiyajinijinio pueyano. Canaa tojishacari quiajaniya, quia pocuanuuri juhua nojori pocuanujua.

<sup>71</sup> Pedroori socua jiyanohua sapojonu coteequiaari. Naa sequereeri:

—¿Pueyaso cuaara saniitooora janiyaqui, janiya jaara sapojiani! ¡Seetanujuaanaa, maja cua niishiniu cuno pueyano, canajiniji nia nequesoreetaacuajani!

<sup>72</sup> Jiyacaritiij, caacarajaari niunijionu pacuterohuacuahuaj. Pedroori jiyacari niishiquii naa Jesu sequesano nojuajatej: “Juhuanujuaja caacaraja niunijionu pacutejiaquishacari-ijia juhuaquenu panishacari, quiaari janiyajiniji tari seetanu pacutejonutianiya”. Pedro jaara niishiquii naa Jesu sequesano nojuajatej, jiyanohua nujuquequeeri.

## 15

*Jesuucara pueya saquiriojotasacari Pilato*

*(Mt 27.1-2, 11-14; Lc 23.1-5; Jn 18.28-38)*

<sup>1</sup> Tariquicuaji, pueyacuara secojonaa jiyaniijianucuaari rerejoquiaari Judiocuaca camarucuata, Moisés Rootasanojiniji niishitiojonaatajuhuaj, Sanedrín maanutanio. Nojori-iri moronucua Jesu jaatucutaquiaari Pilatoocua. Cuno Pilatocuaajaari Judea jiya jiyaniijia quiquiaari. <sup>2</sup> Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucuaaree:

—Jaa. Naacuaaquinatejaj, taa quia sequerecuajani.

<sup>3</sup> Pueyacuara secojonaa jiyaniijianucuaari Jesuucara tonujuriquiaa queraatia sesa casaa. <sup>4</sup> Pilatoori Jesu nequesotarohuacuahuaj:

—¿Majateeri quenaaja quia riucuanuujua? Quia tojiri taa cuno pojori saquiriojotaa quiocuarani.

<sup>5</sup> Jesuuri maja na riucuanu quiriqiaa quenaaja. Cunora, Pilatoori jiyanohua jiuujiate-quiaari.

*Na paraa sequesacari Jesu cuaara mosaaria*

*(Mt 27.15-31; Lc 23.13-25; Jn 18.38-19.16)*

<sup>6</sup> Puetunu marijiajanaa, Pascuara queranacunu juuca, Pilatoori nujuatesano pueyano tohuataniniu jiitiquiaari nujuatejojuajiniji, cana pueya paniquiaari na cartesaanuracua-jani. <sup>7</sup> Jiyacaritij, tamonu pueyanoori nujuatejojuajinia nujuariquiaa. Na sesa quiquiaari Barrabás. Nojuajaari tamasaqa pueyata pueyano moquiaari. Cunoori quiquiaari nojori juaashacari, Romano taucuaa jiyaniijia jiitianuucua Judiocuaca. <sup>8</sup> Pilato nequesotesacari Jesu, jiyacaritij, queraatia pueyari Pilatoocua nijioquiaari naa nojori secojonura nojuaja:

—Pueyano quia carterohua nujuatejojuajiniji, taa quia miiquiaacuaa puetunu marijiajanaani.

<sup>9</sup> Pilatoori nojori riucuaaree:

—¿Cana nia paniya cua cartenurani? ¿Niaate niarta Judiocuaca jiyaniijia paniya cua cartenura?

<sup>10</sup> Nojuajaari tama niishiquiaarijiaaja, pueyacuara secojonaa jiyaniijianucuaari Jesu niqiniu paniyaquiquiaari pueya shocotenuucua nojori saniniuujia Jesuucara. <sup>11</sup> Pilato nequesotasacari nojori, pueyacuara secojonaa jiyaniijianucuaari jiyacari pueya shiniuji-uquiaari nojori sequenura Pilato, nojuaja cuaara carteera Barrabás. <sup>12</sup> Naarate Pilatoori nojori nequesotarohua socua:

—¿Taa nia paniya cua miiniuria nio pueyanoni, nia sequesano niarta Judiocuaca jiyaniijiani?

<sup>13</sup> Nojoriiri naa nacaree jiyanohua:

—¡Cuaara mosaaria niyacutesanojinia teetesano!

<sup>14</sup> Pilatoori nojori riucuaaree:

—¿Casaarateni? ¿Casaa na miiquianu sesajaarani?

Nojoriiri saaja jiyanohua nacaree:

—¡Niyacutesanojinia quia teetere!

<sup>15</sup> Pilatoori socua tariniquiaari. Nojuajaari maninia quiniu paniquiaari Judiocuacata. Cunora, Barrabás cartereeri. Saniniuujia, Jesu majacuteree cutaraari. Na nuhuaji, na soldadohua na niqitioreeri, niyacutesanojinia na teetsaanura.

<sup>16</sup> Jiyacaritij, soldadohuari Jesu jaatucuquiaari jiyaniijia Pilato tiajiniaaco. Nojoriiri puetunu narta soldadohuajanaa rerejoteree Jesu shocua. <sup>17</sup> Soldadohuari Jesu cushitiquiaari shaaruque toque, juhua jiyaniijiajanaa cushishano. Juhuacontucua maatusano cushitishaareejaariuhua na nacaquera. <sup>18</sup> Na nuhuaji, nojoriiri na rupaa paaretanu coteequiaari Jesu na macaatinuria:

—¡Jejee, Judiocuaca camarnuna nooj!

<sup>19</sup> Nojoriiri na naca piquiri naajuata. Na riocojoturejaariuhuj. Nocuara mojoquetacoreeri juhua jiyaniijiajanaa cariquimijaj, nojori sapojonuta na macaatinuria nojuaja.

<sup>20</sup> Naa na rerequetesaanu nuhuajitij, toque naatuqueeri nocuaji jocusaaciaari. Tama na toquejaaja cushitishaarohuari. Na nuhuaji, soldadohuari na tohuataniquiaari. Na jyatatuquiaariiri niyacutesanojinia na teetsaanura.

*Jesu teetesacari niyacutesanojinia*

*(Mt 27.32-44; Lc 23.26-43; Jn 19.17-27)*

<sup>21</sup> Soldadohua jiyatasacari Jesu, tamonu pueyanoori jiyacari tacateriquiohua na cuhuariquiajiniji. Cuno pueyano sesa quiquiaari Simón. Soldadohuari Jesu teetejarano niyacutesano patanirii nojuaja. Nojuacuajaari Alejandro que, Rufo quenio.

<sup>22</sup> Jesuuri shiitaniyojua tuhuananuucua jiyatasaaquiaari. Cuno tuhuananu sesa quiquiaari Gólgota. Nioori pueyano rupaajinia sequeya, “Pueyano nacaco”. <sup>23</sup> Soldadohuari Jesu raatequiaari vino juucua, mirrata cojitushano. Saaja na ratuyaquiriiri. <sup>24</sup> Jiyacaritij, nojoriiri Jesu teetequiaari niyacutesanojinia. Na nuhuaji, soldadohuari saitia tacuarishijioquiaari, nojori niishiniuria cantucua Jesu toque poore nerani. Naacuajitij, nojoriiri Jesu toqueya seraatiaquiaari tama nojoririjaaja.

<sup>25</sup> Jiyacaritij, niyacutesanojinia na teetesacari, shusha pananu tacasacariiri quiquiaari. <sup>26</sup> Naajioneeri na nacaacuma rupotasano quiquiaarijuhuaj. Tii sequequiaariiri casaara na mosaareeni. Naa naajiosano quiquiaariiri cuno rupotasanojinia: “Nioori Judiocuaca jiyaniijia”. <sup>27</sup> Jiyacaritij, caapiqui nohuasenujuacaari Jesu shuriucua teetejosaquiaari-jiuhuj, socua tamonu caapiqui niyacutesanojinia; tamonu na miaquetajara, tamonu na muenecara. <sup>28</sup> Naa tohuatequiaariiri taa tariucuaaanu Pueyaso Rupaajinia na naajiotasaaquiaaricujani. Naa sequeyari:

“Na sesaari sesa miijica pueya sesacata cojiritiasaaquiaari naajiotasaanujuhuj”.

<sup>29</sup> Pueya tajishacari nuucuo Jesu shuriuquico, nojoriiri na macaatiquiaari. Na maanuquenuta naa na sequetquiaariiri:

—¡Jaj! ¿Majateeri quiajaniya cumaacaracacua? ¿Quiaateeri jyaniriquiaa, quiaa jaara Pueyaso Secojoua tia niyartare, quia naata na tianu tucuatunuhua jiuujianaraca juucujinia? <sup>30</sup> Quiaa jaara naa cumaacaraca quiritij, niyacutesanojiniji quia roserecuarajaj.

<sup>31</sup> Pueyacuara secोजना jyaniijianucua, Moisés Rootasanojiniji niishitiojonaari na macaatiquiaarijuhuaj. Tama nojorijiaariija naa sequetooquiaari:

—¿Maatucua saa tamasa naatanijioriquiajaari? Tama nojuaja cutaraari maja na naata niyacutesanojiniji rosenu. <sup>32</sup> Jaara seetanujuaanaa quiri Pueyaso Jiyarosano, pa jyaniiija na quiniuria, cuara roseera niyacutesanojiniji pa niquiara. Pocua jiyacari nocua tiuuri cutarani.

Cuno nohuasenujuaca Jesu shuriucua teetejosano quiriquiaani, nojoriiri na sesacariquiaajuhuj.

### *Jesu cusosacari*

(Mt 27.45-56; Lc 23.44-49; Jn 19.28-30)

<sup>33</sup> Panacari, jiyari ninishiquiria quiquiaari puetunujuanaa. Tarishiquiaariiri. Shusha tenacariishacari cuhuatemohuari. <sup>34</sup> Jiyacaritij, Jesuuri jyanohua na rupaa paaretaciaari:

—Eloi, Eloi, ¿lama sabactani?

Nioori sequeya: “Cua Pueyasonaa, cua Pueyasonaa, ¿casaara quia carteree janiyani?”

<sup>35</sup> Na shuriucua nujuatunaa tojitasacari naa Jesu paaretasacari na rupaatej, nojoriiri sequeturee:

—¡Nia tojiri, supuetana Elías jiiquioonuyano, nocua na niniuria!

<sup>36</sup> Tamonu pueyanoori ritia netequiaari namasu casaara na shiniuria jereeca vinojinia. Na nuhuaji, na morotaree naajuaacuara, na shitasocoriquiano Jesu rupaama. Na raatereeri. Na nuhuaji, nojuajaari sequequiaari:

—¡Pa shanacure! ¡Supuetana Elías jiyoteeri nocua niniutianiya na roshiniuria niyacutesanojiniji!

<sup>37</sup> Jiyacaritij, Jesuuri jyanohua na rupaa paaretarohuacuhuj. Cusoqueeri. <sup>38</sup> Jiyacaritij, Pueyaso Secojoua tiajinicuma, shiquiquia toquejiniji sohuacaari sutequee tamajaaja, jiyocuaaanuji jiyocuaara. Cunoori pueya pueresano quiquio mishiquiotaja quiquiaari, pueya mariqui cusoqueeri Pueyasocua nojori tiuquishacari juucua, jiyanooshoojua nojori quishacari. <sup>39</sup> Cuno Romano soldadohua jyaniiijaari Jesu taccoji nujuariquiaa. Na niquishacari taa Jesu nacaquiaarini, naajuhuj, taa Jesu cusoquiaari na rupaa na paaretanutani, jiyacariti nojuajaari naa sequere:

—¡Nio pueyanoqui seetanujuaanaa Pueyaso niyanu!

<sup>40</sup> Maajipohuari tii quiriquiaajuhuj. Tucuaaanuji Jesu shootiatuquiriquiaari. María Magdalenaari nojoritia quiriquiaajuhuj, socua narta maajipohuanio. Cuno maajipohuani, nojoriiri quiquiaari Salomé, Mariano, cante Santiago, José nucua quiquiaaricujani. Nio Santiagoni, nojuajaari socua naatujua na sesaanucua Santiagonijini. <sup>41</sup> Puetunu nio maajipohujanaari Jesu nuhuajinia quiquiaari. Nojoriiri nera pueraquenuuna quiquiaari, Galilea jiyajinia na quishacari. Socua queraatia maajipohuari tii quiriquiaajuhuj, canapete Jerusalén tiacajiniara nijioquiaari Jesutacuajani.

*Jesu quete niasacari raaco*  
(Mt 27.57-61; Lc 23.50-56; Jn 19.38-42)

<sup>42</sup> Jesu cusonu juucani, cuno juuca sesa quiquiaari “Jeenucuanu juuca”, maja samaatenu juuca poonijionura. Saniniuujia, tariqui quiquiaariiri samaatenu juuca. Cunora, pueyari juhuacarija jeenucuaquiaari puetunujuanaa. <sup>43</sup> Cuno juucajani, jeenucuanu juuca ninishacari quera, tamonu pueyanoori Pilatoocua quiaquiaari. Nojuajaari José, Arimatea tiacajinjiniño pueyano. Cuno Joseeri tojishano pueyano quiquiaari narta Sanedrín pueyara. Joseeri mijiria Pueyaso Jiyarosocoriguiano niquniuucua jiaatiaja quiquiaar-jiuhuj, canaa Jiyaniijijanaa na quiniuria. Nojuajaari maja na puerenu quiquiaari Pilatoocua na tiuquiniuria, Jesu quete na masenura. <sup>44</sup> Pilatoori jiyano hua jiuujiatequiaari na tojishacari Jesu tari cusoquee. Pilatoori soldadohua jiyaniijia sequeree nocua na niniuria. Nocua na tiuquishacari, na nequesotareeri:

—¿Taacari Jesu cusoqueeni?

<sup>45</sup> Soldadohua jiyaniijia jaara na riucuaquiaari taacari na cusoqueeni, Pilatoori jiyamitia José sequeree Jesu quete na panura. <sup>46</sup> Joseeri jiyacari shanohua quenaaruque toque masequiaari tama na cumaneecatajaaja. Na nuhuaji, macu roshiniriiri niyacutesanojiniji. Cuno toquejinia na jiuuicoreeri. Na nuhuaji, na niaquiaari raacoori. Cuno raari jiuutiasano quiquiaari saajiajinia. Joseeri raa tioree jiyano hua puereetuca quejasano saajia. <sup>47</sup> María Magdalena, José nucua Marfania, nojoriiri na niqutiariquiaa tee na niasaareeni.

## 16

*Jesu samiitiasacariuhua*  
(Mt 28.1-10; Lc 24.1-12; Jn 20.1-10)

<sup>1</sup> Samaatenu juuca jaara shocoquiaari, María Magdalena, Santiago nucua Maríajuhuj, Salomeenio, nojoriiri shanohua jaanutaja masequiaari macuucua na tuujutasocoriguiano. <sup>2</sup> Jiyano hua tariquiucui Domingo juuca, shusha pananu muetasacari, nojoriiri raajinia quiojoquiaari. <sup>3</sup> Nucua na quiojosacari, tama nojoriijiaarjia sequetooriquiaa:

—¿Canteeri pocuaji shuquitiniutianiya tamocora raa tiootiuni?

<sup>4</sup> Nojori jaara niquniquiaari raa, saajia niqutiuriiri tariucua tamocora shuquitishano. Puereetuca saajiaari quiquiaari raa tiootiu. <sup>5</sup> Nojoriiri raaco tiuquitiamaa. Mashaja niqutiushiiri tii cajiyo nojori miaquetajara, cohuaja tucuaque toque cajitiaano. Nojoriiri jiyano hua shiriqitiuquiaari na niqutiushacari nojuaja. Cuno mashajaari Pueyaso seru quiriquiaa. <sup>6</sup> Maajipohua sequereeri:

—¡Maja nia shiriqiniui! Janiyari niishiyacuajani, niaari Jesu pajeya, Nazaret tiacajinjiniño pueyano, niyacutesanojinia teetsaarucuaani. ¡Nojuacuaja tari samiitiarohua! Maja niya na quiniu. Nia niqishuriiria na maja, tee na niasaarucuaacuajani, shaagui. <sup>7</sup> Na saquiriojosano pueya nia sequesuhua, Pedrojaajanio: “Nojuajaari nia puetanutianiya Galilea jiyajiniara. Niaari tii na niquniutianiya, taa na sequecanu nijaniyacujani”.

<sup>8</sup> Maajipohuari netecuatuquiaariuhua raajinjiji. Nojoriiri tetecaturiquiaa na shiri-iquiniutia. Majaari quenaaja tamasaca pueya na sequetunu quiquiaari na puerenuta.

*Jesu muetasacari María Magdalenaacua*  
(Jn 20.11-18)

<sup>9</sup> Jesu samiitianu nuhuaji, cuno Domingo juucaja, shusha semaana coteenu juucani, Jesuuri coteenujanaa muetaquiaari María Magdalenaacua. Jesucuaajari tarijia siete samarhua tohuatanijioquiaari cuno Maríajinjiji. <sup>10</sup> María Magdalena niqiniui nuhuaji Jesu, nojuajaari quiaquiaari Jesu cojiniaa na numootenura. Cuno nojoriiri jiyacari taraajecoriguiaa. Nujuqueturiquiaari Jesu mosaanuucua. <sup>11</sup> María Magdalenaari nojori sequese:

—Pueyanaa, ¡Jesu tari samiitiarohua! ¡Janía na niqiriini!

Nojoriiri María sequesano cuaracashitirii saaja.

*Jesu muetasacari caapiqui na saquiriojosano pueyacu*  
(Lc 24.13-35)

<sup>12</sup> Na nuhuaji, Jesuuri socua caapiqui na pueyacu muetaquiaari nojori quiojosacari tamocora. Nojuajaari tamaatia niquishano quiriquiaa nojoriira. <sup>13</sup> Nojori niishishacari nojuacuaja Jesu quiquiaari, nojoriiri ritia riujuuquiaariuhua tamasaca nojorinjiniño nojori numootenuhuara. Naajuhuj, Jesu saquiriojosano pueyari nojori pohuatasano cuaracashitirijuhuj.



*Jesu rootasacari na jiyaramiquishocoriquiano pueya**(Mt 28.16-20; Lc 24.36-49; Jn 20.19-23)*

<sup>14</sup> Tamacari, Jesuuri na once saquiriojosano pueyacua muetaquiaari. Nojoriiri mi-  
aquejajinia cajitiuriquiaa jiyacari. Jesuuri jiyacari nojori juaarii cumajiuujiaaca nojori  
quiniuucuaaja. Majaari quenaaja nojori tiuuniu quiquiaari nojorijinijinio pueyacua, nojori  
sequesacari: “Canaa Jesu niqiriini, samiitiarohuacuaaqui”. <sup>15</sup> Na nuhuaji, Jesuuri nojori  
sequeree:

–Nia quiaare puetunu jiyacajiniajanaa, janiyajiniji Pueyaso rupaa nia pohuatanura,  
puetunu nia pohuatasanoocua tiuujiaa pueyapuejanaa jiyanooshaanura. <sup>16</sup> Cante moo-  
jinia tiuquinishiya Pueyaso rupaacua na tiuuniuucuaani, Pueyasoori na jiyatenutaniya na  
pueyanora. Saniniuujia, cante Pueyaso rupaacua tiuyaquiiani, nojuajaari saniitiosano  
quiniutianiya. <sup>17</sup> Cucua tiuujiaaari nocuaji pueya jiuujiatesano casaa miiniutianiya  
cua cumaacata, pueya niishiniuria Pueyaso rupaaqui seetanu rupaajanaa. Naacua-  
tij, cucua tiuunaa pueya nia quiniuucua, niaari samaruhua tohuatanijionutaniya cua  
cumaacata, nia jiyaniquishacari cua sesa. Niaari nia niishiyaquishoo rupaaca pocuajaca  
quiniutianiyajuhuj. <sup>18</sup> Naajuhuj, niaa jaara soconu sajitishaare, niaa jaara casaa raate-  
saarejuhuj nia cusojuasaanura juucua, majaari nia cusonu quiniutianiya. Naajuhuj,  
cusosuhucua nia niasacari nia juaashiquia, cusosuhuari naataconutaniuhua.

*Jesu tacasacariuhua jiyocuacaanu na Queecua**(Lc 24.50-53)*

<sup>19</sup> Na pocuanu nuhuaji, Jiyaniijia Jesuuri tacanishaaquiaariuhua jiyocuacaanu. Nojua-  
jaari Pueyaso miaquetajara cajiquiaariuhua. <sup>20</sup> Na nuhuaji, na saquiriojosano pueyari  
quiojoquiaari Pueyaso rupaa nojori pohuatanura puetunu jiyacajiniajanaa. Jiyaniijia  
Jesuuri pueyaracaanu nojori cumaquiriquiaa. Pueya niqitiriijiaariuhua na cumaacata  
na pueya miijosano, pueya niishiniuria maatia, Jesu jiyaramiquishano pueya pohu-  
atansanoori seetanu rupaajanaa.

## LUCAS NAAJOTASANO JESUCRISTOJINIJI

*Niya pohuatashiyari casaara Lucas naajiotaquiaari nioni*

<sup>1</sup> Queraatia pueyari suraatia naajionu saniniujuquiaari puetunu canaa tajinia miishanojuanaa. <sup>2</sup> Nojoriiri naajioquiaari taa Jesu jiyaramiquishano pueya pohuataquiaari Jesujiniji pajaniyani. Cuno pojoriiri Jesu niquiniaa quiquiaari, shusha poonijionu na coteesacari. Nojoriiri na nuhuaji na rupaa pohuatanaara jiyatesaaquiaari. <sup>3</sup> Janiyari niishiriojoriquiaani, maniniaruhua quiocuara cua naajionurajuhuj cua panishano Teófilonaa. Naaratej, janiyari pueyaracaanu jacaria nequesoreeriquiaa puetunu Jesu miishanojuanaani, na coteejajiniji. <sup>4</sup> Naacuajitij, quiocuara naajiyaniija na coteenujiniji, seetanujuanaa quia niishiniuria puetunujuanaa, taa quia niishitiojosaacanucujani.

*Pueyaso seru pohuatasacari Tiuquinijiona Juan rasaanutaniya*

<sup>5</sup> Herodes jaara jiyaniija quiquiaari Judea jiyajinia, Zacaríasri jiyacari pueyacuara secojona quiquiaari. Nojuajaari supuetana Abías niqiuoacuajinio supueno quiquiaari. Necocua sesa quiquiaari Isabel. Cuno maajiiri supuetana Aarón niqiuoacuajinio supueno quiquiaari. Nojori supuetanaari mariyata tariucuacaanu pueyacuara secojona quiquiaari. <sup>6</sup> Zacaríasri necocua Isabelta maninia miijiaca quiquiaari Pueyaso niqiuara. Nojoriiri puetunu Pueyaso rootasanojuanaa tojtijajaca quiquiaari, taa Pueyaso-jiniji caminiujiuniaa naajionuutaquiaaricujani. Nojoriicuara maja na naata sesa casaa tonujusaanu quiquiaari, saaja maninia miijiaca nojori quishacari. <sup>7</sup> Nojoriiri maja na muetunu quijia, niyjaru Isabel quiniuucua. Naajuhuj, nojoriiri maja tari na naata muetunu quiquiaari, saaquiapue nojori quishacari.

<sup>8</sup> Tamacari, Zacaríasri narta pueyacuara secojonaata poonijioriquiaa Pueyaso Secojoua tiajinia Pueyaso niqiuara Jerusalén tiacajinia. Jiyacari saniniuuja nojori poonijosacari-iri quiquiaari. <sup>9</sup> Shanohua jaanutajaari catijiasaaquiaari puetunu juucajanaa Pueyaso Shuriucua Quiquiojinia, Secojoua tiajinia. Pueyacuara secojo naari jiiquiaari saajia naajosano jacatanura juhua tacuarishijosacari, nojori niishiniuria teyano nojorijinijioe Pueyaso Shuriucua Quiquio tiuquiniutianiyani, shanohua jaanutaja na catijanura tii. Cuno juuca saniniuuja, saajiaari Zacaríascuara tacateguiaari. Naacuajitij Zacaríasri seeratasaaquiaari tii na tiuquiniuria shanohua jaanutaja na catijanura. <sup>10</sup> Na catijiasacari, puetunu pueyajanaari Pueyaso secojonuuriquiaa Secojoua tia carijiniacuma. <sup>11</sup> Jiyacaritij, Pueyaso seruuri Zacaríascuara muetaquiaari. Nujuariquiaari shanohua jaanutaja catijiasaqui miaquetajara. <sup>12</sup> Zacaríasri shiriqiriiri na niquishacari Pueyaso seru. Jiyanhua na puerereeri. <sup>13</sup> Pueyaso seruuri na sequere:

—Maja puerenu Zacaríasnaa. Pueyasocujajari quia secojosano tojiquiaari. Quia niqiuocua Isabelri quiaara muetunutaniya. Quiocua na sesojore “Juan”. <sup>14</sup> Quiaari shuquiriaatia quiniutianiya. Quiaari quia mueya timitianutaniya. Queraatia pueyari na shuqiritianutaniya na rasacari. <sup>15</sup> Quia niyanuuri cutara pueyano quiniutianiya Pueyaso niqiuara. Nojuajaari vino ratuyashijia quiniutianiya, najatunacunio. Pueyaso Sohanuraca pueyano quiniutianiyari na rasaacarijiyojua. <sup>16</sup> Nojuajaari queraatia Israel pueya tacatonutaniuhua nojori Jiyaniija Pueyasocua. <sup>17</sup> Nio Juanri pa Jiyaniija puetana quiniutianiya. Nojuajaari pueyara Pueyaso sequesano caminiujiunia supuetana Elías sohanu jitianutaniya, na cumaacanio. Naacuajitij, pueya jiuujia taraajonutaniyari, nojori jiyanooniuria necohua. Naajuhuj, nojuajaari tojtiaashijia pueya rootanutaniya maninia, Pueyaso tojtijajaca nojori quiniuria. Naacuajitij, pueya jiuujiaacari jeenucuasano quiniutianiya pa Jiyaniijaacuaji.

<sup>18</sup> Zacaríasri Pueyaso seru nequesotaree:

—¿Taa cua niishiniutianiyarini quia sequesano seetanujuanaa tohuateenutaniya quiria? Janiyari tari saaquianoni. Cua niqiuocuaari motajajuhuj.

<sup>19</sup> Pueyaso seruuri na riucuaaree:

—Janiyacujajari Gabrieln, Pueyaso taccoji nujuana, na sequesano cua miiniuria. Nojuajaari cua jiyaroree cua pohuatanura quiajaniya nio maninia casaa Pueyasojiniji. <sup>20</sup> Quiarijia saniniuuja, cua sequesanoocua quia tiuyacuquiniuucua, quiaari tiqia quiniutianiya. Majaari quia pocuanu quiniutianiya cuara rasaarejaatijia quia niyanu. Naajaa, puetunu cua sequesanojuanaari naa quiniutianiya taa Pueyaso paniyacuajani.

<sup>21</sup> Jiyacaritij, pueyari Pueyaso quiquio carijiniacuma sashiriquiaa, Zacarías cuara tohuatohuara. Nojoriiri shiriqiriituri pueyaracaanu Zacarías tarishishacari Pueyaso Shuriucua Quiquiojinia. <sup>22</sup> Zacaríasri socua tohuatamohua. Majaari na naata pocuanu

quiriquiaa. Nareja shishinioriquiaari. Naacujitij, pueyari niishirii Pueyasoqui casaa niqutirii Zacarías, Pueyaso Shuriucua Quiquiojinia na quishacari.

<sup>23</sup> Zacarías jaara puecaquiaari puetunu na poonijionu juucajanaa taa na sequesaaquiaaricujani, na tiajinia quiaarohuari. <sup>24</sup> Na nuhuaji, necocua Isabelri manajeree. Na manaja jamaatiaquiaariiri. Majaari na muetanu quiquiaari na tiajiniji cuara na shocojoquiaarijaatijia cinco raca. Nojuajaari tama sequesaaquiaarijaaja: <sup>25</sup> “Quiarijiani, cua Jiyaniijiaari maninia miirii janiya. Majaari socua pueya rerequetenu quiniutianiya janiya, muetujua cua quishacari tari”.

*Pueyaso seru sequesacari Jesu rasaanutaniya*

<sup>26</sup> Seis raca jaara shocojoquiaari Isabel manajesacaricuaa, Pueyasoori na seru Gabriel jiyaroree Nazaret tiacajinia, Galilea jiyajinia. <sup>27</sup> Tamonu niyacoocua na jiyaroreeri, cante tari sequesaaquiaaricujani José jyanishano pueyanota na caminiuria. Na camiriquianoori supuetana jiyaniijia David niquihuacuajinio supueno pueyano quiquiaari. Niyacoo sesa quiquiaari María. <sup>28</sup> Pueyaso seruuri nocua tiuquimiaa. Na sequereeri:

—Janiyari quiocua jiyarosaareeni, Pueyaso shuquiritiasano niyacoona. Jiyaniijia Pueyasoori quiata quiya, socua shuquiriaatia quia quiniuria tamasaca maajipohuajiniji.

<sup>29</sup> Mariari jyanohua tacaquiaari naa Pueyaso seru sequesacari nojuaja. Nojuajaari tamajaaja niishirioquiriaa: “¿Casaara naa na sequeree janiyani?” <sup>30</sup> Na nuhuaji, Pueyaso seruuri na sequeree:

—Maríanaa, maja puerenu. Pueyasoori quia shuqiritiniutianiya. Quiaacuajaari na timitiasano. <sup>31</sup> Quiarijiani, quiaari manajenutaniya. Quiaari cayaniyojua ranutaniya. Quiocua na sesojore “Jesu”. <sup>32</sup> Nojuajaari cutara pueyano quiniutianiya. Sesojosaanutaniyari “Pueyaso Niyanu”, jiyocuacaanu Quijia Niyanu. Pa Jiyaniijia Pueyasoori na jiyatenutaniya Jiyaniijiarajanaa na quiniuria na supuetana David niti. <sup>33</sup> Israel pueya jiyaniijia quiniutianiyari. Pueyaracaanu jitianutaniya na pueyari. Majaari na shaajenu quiniutianiya Jiyaniijia na quishacari.

<sup>34</sup> Mariari Pueyaso seru nequesotaree:

—¿Taa cua manajenutaniyari, niyacaaju cua quishacari?

<sup>35</sup> Pueyaso seruuri na sequeree:

—Pueyaso Sohuanuuri quiocua niniutianiya. Na cumaaca naaquiiri quiocua pacunutaniya. Naacujitij, quia niyanuranoni, cunoori Pueyaso Niyanu quiniutianiya. Nojuajaari seetanujanaa Pueyaso tojjia quiniutianiya. <sup>36</sup> Naajuhua, quia supuetanajinijinio motaja Isabelri neyanu ranutaniyajuhua. Cuno maajiri sequesaaquiaari “niyajaru maajitia”. Naajaa, seis racaari tari na shocojia na manajesacari. <sup>37</sup> Pueyasora, majaari jiyajeneta casaa quiniu. Nojuajaari cumaacaraca na miiniuria puetunu na panishanojanaa.

<sup>38</sup> Mariari sequeree:

—Maniniacuajaqui. Janiyacuajaari cua Jiyaniijia Pueyaso seruni. Pueyaso cuara miiria janiya taa quia sequereecuajani.

Na nuhuaji, Pueyaso seruuri quiacuhua.

*María quiasacari Isabel niqiniuucua*

<sup>39</sup> Mariari jiyacari quiaquiaari na seconuta Judea jiyajinia, Zacarías tiajinia tamonu tiacajinia. Cuno jiyari tuhananuhuaraca. <sup>40</sup> Zacarías tiajinia María tiuquishacari, Isabel sequereeri. <sup>41</sup> Isabel tojishacari María sequesano nojuaja, ¡conajaari na jiniacuma nujuanequequee! Pueyaso Sohuanuuri Isabelcua tiuquiqui na cumaaca na jitianura. <sup>42</sup> Naacujitij, Isabelri jiyacari na rupaa paaretaree. Naa María sequereeri:

—¡Pueyasocujaari socua maninia miiriucuaa quiajaniya tamasaca maajipohuajiniji! ¡Maninia miiniutianiya quia niyanujariuhua! <sup>43</sup> ¿Janiyateeri pueya tojishano maajini, cua Jiyaniijia nucua tiuquiniuria cua tiajinia, na niquiniuria janiya? ¡Maja! Naajaa, jiyanojua timiyaniija! <sup>44</sup> Shusha cua tojishacari quiajaniya cua sequeyano, cua mueyari cua jiniacuma nujuanequequee na shuqiritiniutia. <sup>45</sup> Shuquiriaatia quia quiri, quia tiuuniucua Pueyaso sequesanoocua quiajaniya.

<sup>46</sup> Mariari sequeree:

—¡Coojia jyanohua shuqiritiaa cua Jiyaniijia Pueyaso! <sup>47</sup> ¡Cua sohuanuuri cua Jiyanoonia Pueyaso timitiaani! <sup>48</sup> Juhua najuhuaa quijianijia. Naajaa, Pueyasoori cua jyanoori. Cua saquiriojucuaari na tojjia cua quishacari. Quiarijiani, pueyari pueyaracaanu cua sequenutaniya: “Pueyaso shuqiritiasano María”. <sup>49</sup> ¡Pueyasoori jyanohua maninia miirii janiya! Nojuajaari puetunu cumaacaracajanaa. Nojuajaari tojetaarucujanaa maninia quijia. <sup>50</sup> Nojuajaari pueyaracaanu jyanooquiaa na tojitianaa, canapue te na rerequeteyaquijiacuajani. <sup>51</sup> ¡Nojuajaari

jijyanohua maninia miiquiaa na cumaacata! Nojuajaari niishijia pueya shocotequiaari, canapue te tama na cuaqueyajaaja jiyatequiaari juhua niishijiacaracuajani.<sup>52</sup> Nojuajaari cutara jiyaniijianucua jatatee, cuno pojori jiyaniishano niishiyashijia pueya jiyatesaanura jiyaniijara nojori niti saniniuujia.<sup>53</sup> Miaajeejunucua tootijioreeri maninia samatuuta. Puera casamiriaca pueya taanuquiaariiri, casaaju nojori quojonura.<sup>54</sup> Na pueya Israel naacureeri. Majaari na niyjetanu quiquiaari nojoriicua na taraajenu.<sup>55</sup> Naa miiquiaariiri taa na sequequiaari pa supuetanaacuajani. Pueyasoori naa pa supuetana Abraham sequequiaari: "Seetanujanaa quiocua taraajenutaniyanijia, quiocuajinio supueriquiano pueycuano".

<sup>56</sup> Na nuhuaji, Mariari queraatia tarishiquiaari Isabel tiajinia. Jiuujianaraca raca nuhuaji, Mariari tacatequiaariuhua na tiajiniohua.

### *Tiuquinijiona Juan rasacari*

<sup>57</sup> Na nuhuaji, Isabel rasacari quiquiaari. Jiyapueratereeri.<sup>58</sup> Na shuriucua quiniaa, mariyata na jiyasocucujinio supueno pueyajuhaaj, nojoriiri jiyanohua shuquiriquiaari nojori tojishacari taa Pueyaso jiyanohua taraajequiaari Isabelcuani, na shuquiritiniuria neyanuta. Nojoriiri Isabelta shuquiriquiaarijuhuaj.<sup>59</sup> Nojoriiri Zacarias tiajinia rerejoquiaari conaaja jiiiasacari ocho juuca, na cararaatiuquia co miatesaanura, taa Moisés rootaquiaaricuajani. Nojoriiri na sesojonu paniriquiaa juucua Zacarias, na que sesaanucua na quiniuria.<sup>60</sup> Na nucuari saaja sequeere:

—¡Maja! Sesojosaanutaniyano "Juan".

<sup>61</sup> Pueyari saaja sequeere:

—¿Casaarateni? ¡Majaari quenaaja tamonu quia pueyajiniujinio cuno sesaraca na quiniu quiquiaari! ¿Casaara naa quia sesojonu paniyarini?

<sup>62</sup> Cunora, pueyari na que Zacarias shishinioree na nequesotanura taa na sesojonu paniriquiaa neyanuni.<sup>63</sup> Zacariasri naajioju casa maseree na naajionura tii neyanu sesarano. Naajioreeri: "Na sesa, Juan". ¡Pueyari jiuujiateque! <sup>64</sup> Jiyacaritij, Zacarias nitiiri sasaquitiacuhua. Jhuacatecara pocuarohuari. Pueyaso miishano pohuateree pueya niquiaraari, na shuquiritiasacari Pueyaso.<sup>65</sup> Cunora, na tia shuriucua quiniaa pueyari jiuujiateree. Puetunu niojuanaari caminiujiushaquiaari puetunujuanaa cuno Judea tuhuananuhucua quijiaa pueyara.<sup>66</sup> Puetunu nio tojitianaa pueyajanaari nishiriojonuquiaari. Tama nojoriiaarijia nequesoreetooquiaari:

—¿Casaaquitijia cuno mueya quiniutianiya na nuhuajitijia?

Pueyari niishiquiaari Pueyasoori seetanujanaa cuno mueyata quiriquiaa, na cumaquiniuria.

### *Zacarias sequesano na shuquiritiasacari Pueyaso*

<sup>67</sup> Na que Zacarias jiuujiaari jiyanohua mishaja quiriquiaa Pueyaso Sohuanuta. Pueyaso Sohuanuuri na pohuateree. Naaratej, Zacariasri naa sequequiaari:

<sup>68</sup> —¡Jiyanohua maninia pa Jiyaniijia Pueyaso, pa supuetana Israel Jiyaniijia! ¡Cuaara jiyanohua shuquiritiasaaria mijiria na niniucua na pueyacua, pocuaji na tacunura! <sup>69</sup> Pocua jiyaroree cumaacaraca pocuaji Tacuriquianoori. Pa Jiyaniijiaranoori Pueyaso seru David niquiohuacuajinio rasaanutaniya, taa Pueyaso sequequiaari tariucuaacaanucujani.<sup>70-71</sup> Tariucuaacaanu na sequenu panishano caminiujiaacuajaraari naa pohuataquiaari pa supuetanaa niquiaratej, taa pa paraa na ritianutaniya pocujini, pa niqiniu paniyaquijia pueyanio.<sup>72</sup> Nojuajaari sequequiaarijuhuaj, majaari na niyjetanu quiniutianiya na sequesano pa supuetanaa, pocua na taraajenu.<sup>73-74</sup> Pueyasoori pa supuetana Abraham sequequiaari seetanujanaa, nojuajanaari pocuaji ritianutaniya pa paraa, pa puereyaquiniutia nera pa poonijionura shitimia.<sup>75</sup> Nojuajaari Abraham sequequiaarijuhuaj maninia quijia pa jataniniutianiyaquiniiaari, saaja nera pa quiniuria pueyaracaanu.<sup>76</sup> Quiajaniya saniniuujia, quianuniyojuanaa, quiaari sesojosaanutaniya Jiyocuaacaanu Quinia sequenu panishano caminiujia. ¡Quiaari pa Jiyaniijiaranojuanaa puetanutaniya, juhua na nuu jeenucuariquiano! <sup>77</sup> Quiocua Pueyaso saquirojosano pueya niishitiojore, nojoriiri na naata jiyanooshano quiniu sesa nojori miishanojinijia Pueyaso pueya nojori quiniuria.<sup>78</sup> ¡Pa Pueyasoori jiyanohua jiyanoojia! Pocua taraajeja. Na jiyarosacari poojia Cuhuatariquiano, nojuajaari pa cuhuatanutaniya, maja ninishiqui pa quiniuria socua.<sup>79</sup> Maninia pa cuhuatanutaniyari, maninia pa rucuanenonura Pueyaso niquiara, panaatia poojiacata. Naacuajitij, majaari socua pa cajitiuni quiniutianiya taraatia ninishiqui, juhua pa jamaca shuriucua.

<sup>80</sup> Conaajaari maashiquiaari. Nojuajaari tama na cuaqueyajaaja cumaquiquiaari socua seetanujuanaa Pueyasocua tiuujia na quiniuria. Nojuajaari pueyaracaanu cariquia jiyajinia quijia quiquiaari nojuaja jaara Pueyaso sequenu panishano caminiujiuniu coteequiaariijaatijia narta Israel pueya niqiuara.

## 2

### *Jesu rasacari*

*(Mt 1.18-25)*

<sup>1</sup> Tiuquinijiona Juan rasaanu nuhuaji, jiyaca jiyaniijiajanaa César Augustoori Roma tiacajiniji sequequiaari puetunu na jittiasano pueyapuejanaa cuaara serojosaari puetunu nojori jiyacajiniajanaa. <sup>2</sup> Pueya jaara coteenujuanaa serojosaaquiaari, Cirenio jiyaniishano pueyanoori jiyacari Siria jiyajinia jiyaniijia quiquiaari. Nojuajaari jiyaniijia César Augusto jiyatesano quiquiaari. <sup>3</sup> Puetunu pueyajanaari sequesaaquiaari nojori cuaara quiojohuara na raja tiacajinia, na sesaca naajiotasaanura tii.

<sup>4</sup> Joseeri jiyacari Nazaret tiacajinia quiriqiaa, Galilea jiyajinia. Na raja cutaraari quiquiaari Belén tiacajinia, Judea jiyajinia, tee na supuetana David rasaaquiaaricuaani. Naaratej, Joseeri Belén tiacajinia quiaquiaariuhua. <sup>5</sup> Mariari tari sequesaaquiaari nojuaja Joseeta caminiutianiya. Naaratej, Mariari nata quiaquiaarijuhua Belén tiacajinia, nojori sesaca naajiotasaanura tii. José niqiuocuaranoori tariucua manajaraca quiriqiaa. <sup>6</sup> Belén tiacajinia nojori quishacari, jiyacari tari quiquiaari María ranu juuca. <sup>7</sup> Tii jiyapuerateereeri. Conaaja juiococquiaari toqueraacuacajiniaari. Na nucuaari na niaquiaari juyaca miaqueejajinia. Mariari naa raquiaari cuniqui maja quiquio quishacari nojoriria rucoonaa tiuquijia tiajina.

### *Pueyaso seya muetasacari borrego cojuanaa pueyacua*

<sup>8</sup> Belén tiaca shuriucua cuno niucuaaja, borregohua cojuanaari suteriquiaa cuhuariquajinia, na seya nojori cojuasacari. <sup>9</sup> Canashiyaquiji Pueyaso seruuri nojoriucua muetaquiaari. Jiyaniijia Pueyaso shacantuca cumaacaari nojori cuhuataquiaari. ¡Nojoriiri jiyanohua shiriqitiurii! <sup>10</sup> Pueyaso seruuri nojori sequeere:

—¡Maja nia puerenu! Niaacua nimiaanijia, jiyanohua maninia casaa cua pohuatanura niajaniya. Cunora, puetunu pueyajanaari shuquiriniutianiya. <sup>11</sup> ¡Niaacuaji Tacunaari tari rasaaree supuetana David tiacajinia! Nojuajaari Pueyaso Jiyarosano, pa Jiyaniijia Cristotuhuaaj. <sup>12</sup> Niaa jaara nocua quiaare, niaari conaaja riuriatanutianiya toqueraacuacajinia jiuicocoso, juyaca miaqueejajinia maano. Naacuajitij, niaari niishiniutianiya, seetanujuanaari cua pohuatasano niajaniya.

<sup>13</sup> Jiyacaritij, narta Pueyaso seyari na cojishii. Jiyanohua queraatia quiriqiaari. Nojoriiri naa maniniuhuaqueetariqiaa Pueyaso:

<sup>14</sup> —¡Jiyanohua maninia pa Pueyaso, jiyocuaacaanu Quijia! ¡Nojuajaari jiyanohua pa shuquiritiasano, na jiyaronuucua jiyacua quinia Jiyanoonia! Naacuajitij, cana Pueyaso shuquiritiaani, nojoriiri jiyanoootioonutianiya narta pueyata.

<sup>15</sup> Pueyaso seya jaara tacataquiaariuhua jiyocuaacaanu na quiquiojiniuhua, borregohua cojuanaari tama sequetooquiaariijaaja:

—¡Belén tiacajinia pa quiaarequij! ¡Pa niquishii cuno, casaajiniji pa Jiyaniijia numooteree pajaniyacujani!

<sup>16</sup> Nojoriiri ritia quiojoquiaari. Conaaja riuriatutuseeri, María, Josénio. Conaajaari juyaca miaqueejajinia niasano mariquiaa. <sup>17</sup> Nojori niquishacari conaaja, nojoriiri ritia tii quiniaa pueya caminiujiurii conaajajiniji Pueyaso seru pohuatasano nojori. <sup>18</sup> Puetunu pueyajanaa, cante nojori pohuatasano tojiriqiaani, nojoriiri juujiatereeri. <sup>19</sup> Majaari María niyajetanu quiquiaari puetunu nojori pohuatasanojanaa. Noojajinia na niishiriojoriqiaa pueyaracaanuuri. <sup>20</sup> Borregohua cojuanaari quiojoquiaariuhua. Nojoriiri Pueyaso maniniuhuaqueetariqiaa nojori tojishanojiniji, nojori niquishanojinijinio. Puetunujuanaari naa quiquiaari taa cuno niucua Pueyaso seru pohuataree nojoricujani.

### *Conaaja Jesu pasacari Pueyaso Secojoua tiajina, Pueyasora jiyatesocoriquiano*

<sup>21</sup> María conaaja jaara ocho juuca jittiaquiaari, na cararaatiuuquia coori miatesaaquiaari, taa Moisés rootaquiaaricujani. Na miatesaanu nuhuaji, nojuajaari sesojosaaquiaari “Jesu”, taa Pueyaso seru sequequiaari Mariacuajani, na manajeyaquishacarijia.

<sup>22</sup> Na nuhuaji, Moisés sequesano juucaari quiquiaari na nucua neyacata cuaara juhua tuteera, jeequesano nojori quiniuria Pueyaso niqiuara, mueya rasaanu nuhuaji. Naaratej, nojoriiri conaaja Jesu paquiaari Jerusalén tiacajinia, Pueyasora na jiyatesaanura, Pueyasora na quiniuria. <sup>23</sup> Na queyari naa miiquiaaritij, tariucuaacaanu Pueyaso Rupajinia naajiotasano tojtiajaca nojori quiniucua. Naajiotasanoori naa quiyatej: “Puetunu

nia jiyapueranuhajanaa cuaara Pueyasora jiyatesaaria". <sup>24</sup> Naaratej nojoriiri quiaaree na seru mosaanura nojoriicuara Pueyaso Secojojua tiajinia, juhua jeequesano nojori quiniuria Pueyaso niquiara, taa pueya rootasaaquiaari Moisés naajiotasanojinijicuaiani. Pueyasoori naa sequequiaari Moisés tarijiatej: "Cuaara puecoosaaria caapiqui mococoonu. Mococoonu jaara quiyaquiri, cuaara puecoosaaria caapiqui shinjia".

<sup>25</sup> Jiyacaritij, tamonu pueyanoori Jerusalén tiacajinia quijia quiriquiaa. Na sesa quiquiaari Simeón. Nojuajaari maninia mijia quiquiaari Pueyaso niquiara. Pueyara-caanu Pueyaso shuquiritiaja quiquiaariiri. Nojuajaari pueyaracaanu sashijia Pueyaso cuaara jiyarooro Israel pueyacuaji Tacuriquiano. Nojuajaari Pueyaso Sohanu jitiiaja. <sup>26</sup> Pueyaso Sohanuuri na niishitiquiaari majaari na shaajenu quiniutianiya nojuaja cuaara niquiri Cristojaatijia, Pueyaso jiyarosaariquiano. <sup>27</sup> Pueyaso Sohanuuri na jiyatequiaari namitia cuno juuca Pueyaso Secojojua tiajinia. Naacuajitij, Jesu jaara pasaaquiaari Secojojua tiajinia, nera na miishaanura puetunu tariucuacaanu rootasano-juanaa, Simeónri jiyacari tii na niquirii. <sup>28</sup> Simeónri Jesu paree. Na cacanuureeri. Naa Pueyaso sequeree jiyanohua na shuquiriniutiaari:

<sup>29</sup> —¡Cua Jiyaniijianaa, tariucuaja! ¡Quiarjia cutara cua naata cusonu juhuajaniya, shuquiri-aatia cua quishacari! Quiaacuajaari tari cua niqitirii tarijia quia sequesano janiya, quia seru cua quiniucua. <sup>30</sup> Tari niquirii quia Jiyarosanocujaniija, canacuaji Tacuriquianoni. <sup>31</sup> Nojuajaari quia niqitiosano puetunu jiyacajinia quinia pueya-pueecuarajanaa. <sup>32</sup> Nojuajaari puetunu taucuaca jiuujajanaa cuhuatanutaniya, maninia nojori niishiniuria quiajaniya. Naajuhuj, quia pueya Israelni, nojoriiri tamasa pueya shuqiritiasano quiniutianiya na seera.

<sup>33</sup> Jesu que, na nucuajuhuj, nojoriiri jiuujiateree naa Simeón sequesacari conaajajini. <sup>34</sup> Na nuhuaji, Simeónri nojoriicua niaree na juashiquia. Naa sequereeri:

—Pueyaso cuaara jitiiaara maninia niajaniya.

Jesu nucua María sequereejariuhuj:

—¡Cua tojiri! ¡Nio conajaari cutara pueyano quiniutianiya! Queraatia Israel pueyari juhua tiuriniutianiya nojori ruoretasacari nojuaja. Saniniuujia, queraatia Israel pueyari cumaatia nujuatujuaca quiniutianiya, nocua nojori tiushacari. Na cumaacata na miniucua, pueyari na naata Pueyaso niishiniu maninia. Naajaa, queraatia pueyari na ruoretanutaniya saaja. <sup>35</sup> Naacuajitij, tama pueya niishiriojosano noojiacajinijaarijia niishishaanutaniya. Quiaa saniniuujia, jiyanohua taraatiaari quiniutianiya. Quioojaari juhua mueruuta tohuariquitishaanutaniya quia mueyacia quia miishacari.

<sup>36</sup> Cuniqijia, Pueyaso Secojojua tiajiniani, tamonu motajaari tii quiriquiaajuhuj. Cuno motajaari Pueyaso sequesano caminiujiunia quiquiaari. Na sesa quiquiaari Ana, Fanuel niyatu. Nojuajaari supetana Israel niyanu Aser niqiuoacuajinio supeno maaji quiquiaari. Jiyanohua motaja quiquiaariiri. Shusha niyocuo na quishacari, nojuajaari camiquiaari. Na nuhuaji, siete marijiaari na shocojoquiaari neyacata na quishacari. <sup>37</sup> Neyaca cusonu nuhuaji, socua ochenta y cuatro marijia na shocojoquiaari mashiquio na quishacari. Nojuajaari pueyaracaanu quiquiaari Pueyaso Secojojua tiajinia, Pueyaso na shuqiritiasacari juuca, niucuanio. Nojuajaari sequeyarucua miaqueyaquiquiaari Pueyaso na secojosacari pueyaracaanu. <sup>38</sup> Simeón pocuasacarijia, jiyacaritij, Anaari nocua nimiaa. Na niquishacari conaja Jesu, Anaari noojajinia niishiquiaari cante nojuajani. Cunora, Pueyaso sequeree na shuquiriniutiaari: "¡Paacarasho!" Na nuhuaji, nojuajaari juhuacatecara Jesujiniji pohuataree Pueyaso Jiyarosocoriquiano sashijia pueya niquiara. Nojori sequereeri:

—¡Niocuajaari pa sashishano pa pueyacuaji Tacuriquiano!

*Na queya tacartasacariuhua conaja Nazaret tiacajinihua*

<sup>39</sup> Jesu queyari puetunu Moisés naajionejinia Pueyaso rootasanojuanaa tucuaquiaari na conajara. Na nuhuaji, nojoriiri Galilea jiyajiniara tacatequiaariuhua tama nojori tiacajinihuaajaa, Nazaret tiacajinia. <sup>40</sup> Naatujua Jesuuri maashiquiaari. Socua cumuecara quiquiaariiri, maninia niishijiaranio. Pueyasoori jiyanohua na naacujua.

*Mashajaniyojua Jesu quishacari Pueyaso Secojojua tiajinia*

<sup>41</sup> Puetunu marijarajanaa, Jesu queyari quiojoquiaari Nazaret tiacajiniji, Jerusalén tiacajiniara, Pascua juacajinia nojori queranacunura. <sup>42</sup> Doce marijia jaara Jesu shoco-joquiaari tari, Jesuuri nojoritia jiyacari quiaquiaari shushajanaa, taa nojori quianu jiti- quiaaricujani puetunu marijarajanaa. <sup>43</sup> Queranacunuunu jaara puequequiaari, Jesu queyari quiojoriquiohua juhuajaniya. Jesuuri jiyacari Jerusalén tiacajinia jiyajequiaari. Majaari na queya niishiniu quiriquiaa. <sup>44</sup> Nojoriiri jiyaniquiaari Jesu naasucua narta quiojonaa tajinia quiariquiohuajuhuj. Naacuajitij, nojoriiri juhuajaniya rucuaneree

puetunu cuno juucajanaa. Cuno niucuaja, nojoriiri Jesu pajequiaari nojori pueya tajinia, nojori niishishano pueya tajinianio. <sup>45</sup> Shaaqui quiriquiaari. Cunora, nojoriiri Jerusalén tiacajinia tacatequiaariuhua, tii na pajenuhuara.

<sup>46</sup> Jiuujianaraca juuca nuhuaji, nojoriiri socua Jesu riuriataquiaari Pueyaso Secojua tiajinia, Moisés Rootasanojiniji niishitiojanaa pueya tajinia cajiyo. Nojori tojiriquiaari. Nojori nequesoreetariquiaaariuhuj. <sup>47</sup> Puetunu pueyajanaa, canapue te na tojtiriquiaani, nojoriiri jiuujiatequiaari niishijia Jesu quishacari. Jesuuri maninia nojori riuhaneriquiaa saaja, nojori jaara na nequesoreeriquiaa. <sup>48</sup> Na queya jaara na niquiquiaari, nojoriiri shiriquitiuhuaari. Na nucuaari na sequeree:

—Quiyanunaa, ¿casaara naa quia miiri canaani? ¡Janiyari quia queta quia pajeriquiaani jiyanhua canaa tacaaniutia quioqua!

<sup>49</sup> Jesuuri na riuucaree:

—¿Casaara nia pajeriquiaa janiyani? ¿Majateeri nia niishiniu, janiyari cua Que Secojua tiajinia quiniucua jiaatiaani?

<sup>50</sup> Majaari nojori niishiniu quiquiaari Jesu sequesano.

<sup>51</sup> Jesuuri na queyata quiaarohua nojori tajinihua Nazaret tiacajinia. Na queya tojijia quiquiaariiri. Na nucuaari pueyaracaanu noojiajinia racataja puetunu na niishishanojuanaa neyanu Jesujiniji. <sup>52</sup> Jesuuri socua maashiquiaari, socua niishijara quiquiaariiaariuhuj. Pueyaso shuquiritiasano quiquiaariiri. Puetunu pueyajanaari na shuquiritiquiaarijihuaj.

### 3

#### *Tiuquinijiona Juan pohuatasacari Pueyaso rupaa cariquia jiyajinia* (Mt 3.1-12; Mr 1.1-8; Jn 1.19-28)

<sup>1</sup> Na nuhuaji, Tiuquinijiona Juanri Pueyaso rupaa pohuatanu coteequiaari. Jiyacaritij, quince marijiaari tari shocojoquiaari César Tiberio, jiyaniijajanaa na quishacari Roma tiacajinia, puetunu jiyaca pueyapuejanaa camarnu na quishacari. Jiyacaritij, Poncio Pilatoori jiyaniijia quiriquiaa Judea jiyajinia. Herodesri saniniuujia jiyaniijia quiriquiaa Galilea jiyajinia. Tarajanu Felipeeri jiyaniijia quiriquiaajuhua Iturea jiyajinia, Traconite jiyajinianio. Lisanasri jiyaniijia quiriquiaa Abilinia jiyajinia. Puetunu cuno jiyaniijianucujanaani, nojoriiri jiyaniijianucuaara César Tiberio jiyatesano quiquiaari cuno jiyacajinia. <sup>2</sup> Jiyacaritij, Anásri Caifásta Judiocuacaacuara secोजनाa jiyaniijianucua quiriquiaa. Jiyacaritij, Zacarías niyanu Juanri cariquia jiyajinia quiriquiaa. Tii na quishacari, Pueyasoori na rupaa na niishitiquiaari. <sup>3</sup> Naaratej, Juanri puetunu Jordán moo shuriuquico jiyacajanaa tajiquiaari na poojotasacari Pueyaso rupaa pueya niqiara. Nojuajaari naa pohuataquiaaritij:

—¡Noojia nia tacatore maja socua sesa nia miiniuria, moojinia cua tiuquinijionura nijaniya, Pueyaso jiyanooniuria nijaniya sesa nia miishanojiniji!

<sup>4</sup> Naacuajitij, supuetana Isaías naajiotasanoori tohuateequiaari. Pueyaso sequenu panishano caminiujuunia na quiniucua, nojuajaari naa miriqui naajiotaquiaari supueriquiano Juanjiniji:

“Pueyano rupaari tojishiya cariquia jiyajinia nacaano. Sequeyari: ‘¡Jiyaniijia nuura nia jeenucare! ¡Puetunu maninijanaa nia nuunure, maja shuutiuniu na quiniuria! <sup>5</sup> ¡Puetunu tacocujanaa cuaara mishiquiojosaaria maninia jamatunu na nuu quiniuria! ¡Puetunu tuhuananuhajanaa cuaara jiuuriosaarria jaccanunu na nuu quiniuria! ¡Shuyorocotunu nuu cuaara pooquareesaaria! ¡Puetunu surocoshiquiaajanaa cuaara mishiquiojosaaria jaccanunu na nuu quiniuria! <sup>6</sup> Naacuajitij, puetunu jiyacajinia pueyajanaari Pueyaso Jiyarosano niishiniutianiya, Pueyaso jiyanootriquiano pueyan!’ ”.

Naa miriqui Isaías naajiotasanoori, cunoori pueya numooteriquiaa juhuacarijia nojori jeenucanura noojiaa, Jiyaniijia Jesu tojtiajaca nojori quiniuria.

<sup>7</sup> Pueya jaara quiojoquiaari na tiacajiniji Tiuquinijiona Juancua, Juan tiuquinijionura nojori, Juanri naa nojori juaquiaari:

—¡Niaacuajaari juhua sacocua! ¿Cante nia numooteree nia mashiniuria jiyanhua Pueyaso saniittonu panishacari nijaniyani? <sup>8</sup> ¡Maninia miijia nia quiri, canaa niishiniuria niaari setanujuanaa nioojiaa tacatoree sesa nia miiniujiniji! ¡Majaari najuhuaa tama nia cuaqueyajaaja nia sequenu: “Pueyaso pueyanonijia, supuetana Abrahamjinijinio cua supenuucua!” ¡Nia niishiri, Pueyaso jaara paniri, nojuajaari na naata nio saijiniji shipininiu Abraham niqiohuarajuhua! <sup>9</sup> ¡Pueyaso cajiiri tari mataa naana pajama, sesa naana nuujutajara! Naana jaara sesa jajau muetujua quiri, nushiyari catijasocoriquiano.

Naajuhuj, niajaniyari juhua sesa muetuna naana, maninia miyashijia nia quishacari. ¡Niaari quera saniitioshiyacuaaja!

<sup>10</sup> Naaratej, pueyari Tiuquinijiona Juan nequesotaree:

—¿Taa canaa miyarinitioj?

<sup>11</sup> Juanri nojori riucuaree:

—Cante querajaqueya toqueracani, nojuaja cuaara niqutioora taque cante toqueejuni. Naajuhuj, cante miaquesanoracani, nojuaja cuaara niqutioora miaquesanojunucua.

<sup>12</sup> Roma tiacajinia quijia jiyaniijajanana Césarra cumaneeca masejonaari Tiuquinijiona Juancua nijioquiaarijuhuaj. Nojoriiri tiuquinijosano quiniu paniriquiaajuhuj. Naaratej, nojoriiri Juan nequesotaree:

—Niishitiojonanaa, ¿canaarijataj, casaa canaa miyarinijia?

<sup>13</sup> Juanri nojori riucuaree:

—Maja puera cumaneeca nia masenu pueyajiniji. Saaja nia jiyaniijia sequesano nia masejore.

<sup>14</sup> Naajuhuj, soldadohuari Tiuquinijiona Juan nequesotaree:

—¿Canaarijataj? ¿Casaa canaa miiniutianiyarinijia?

Juanri nojori riucuaree:

—Niaacuajaari puecotajaraca. Naajaa, majaari pueya casami nia jaariuutianu, nojori nia miananajonuta, nojoriicuara nia tonjusacarijuhua nia sapojonuta. Juhujaniya nia quiri saaja nia jiyaniijia niqutiosano cumaneecata.

<sup>15</sup> Pueyari jiyanhua niishiriojoriquiaa Tiuquinijiona Juanjiniji. Nojoriiri Pueyaso sequesano na Jiyarosocoriquiano niquniucua jiaatiaya. Naaratej, nojoriiri jiyaniriquiaa Tiuquinijiona Juan naasucua Cristo, tariucuacaanu Pueyaso sequesano na Jiyarosocoriqianotej. <sup>16</sup> Nocuaji, Tiuquinijiona Juanri puetunu pueyajanaa sequeree:

—Janiya nareja nia tiuquinijia moojiniani, juhua jeequejosano nia quiniuria sesa nia miishanojiniji. Tamonu cutaraari cua nuhuaji niniutianiya. ¡Nojuajaari Pueyaso Sohuano tiuquinijionutaniya nioojiajinia, na cumaaca nia jiiitianura, seetanujuanaa maninia mijia nia quiniuria! ¡Nojuajaari juhua manitia nia saniniujuniutianiyajuhuj, maninia jiuujjaraca nia quiniuria! ¡Nojuajaari socua jiyanhua cumaacaraca janiyajiniji! Janiya maara shuquiriaatia quirini, nojuaja jaara cua sequere cua naacatanura nojuaja juhua na seru, quenaaja na sapatu neyocua cua saacatanura. <sup>17</sup> Niaari niishiyacuaja taa pueyano miiquiaa na trigoni paratu panura na cocua, na sucuanio, saniniuuja na jajau na racatocoriquiano tiajiniaaco. Naajuhuj, cuno pueyanoori tari niya qujora na pueya na saquisiojonura na tojiyashijiaa pueya tajiniji, na rijiosocoriquiano nata nojori quiniuria. ¡Sesa pueyari juhua trigo sucua catijiasaanutaniya saniniuuja! ¡Nojoriiri jatasaanutaniya manijinia! ¡Cuno maniiri maja na maquesanu quiniutianiya!

<sup>18</sup> Tiuquinijiona Juanri naa pohuataquaaari Pueyaso rupaa pueya niqiuara. Maninia rupaari, na tojitiaaja pueya quiniuria shuquiriaatia. Socua queraatia quiquiaariiri na pohuatasano na numootenura pueya. <sup>19</sup> Jiyaniijia Herodesri jiyacari tarajanu Felipe niqiuocua jiiitariquiaa necocuara. Cuno maaji sesa quiquiaari Herodías. Tiuquinijiona Juanri jiyaniijia Herodes piriyojoquaaari sesa na miishanojiniji. Herodesri maja na tojinu quiquiaari saaja. Jiyaniijia Herodesri socua queraatia sesa casaa mijia quiquiaari. <sup>20</sup> Na nuhuaji, jiyaniijia Herodesri socua sesa miiquiaari: Tiuquinijiona Juan nujuatequaaari nujuatejojuajiniari.

*Jesu tiuquinishacari moojinia*

*(Mt 3.13-17; Mr 1.9-11)*

<sup>21</sup> Tiuquinijiona Juan jaara puetunu pueyajanaa tiuquinijioriquiaajaa, nojuajaari Jesu tiuquiniquiaarijuhuaj. Jesu tohuatasacari moojiniji, na que Pueyaso secoriquiaari. Jiyacariitij, jiya cajiniocuuaari riatequee. <sup>22</sup> Pueyaso Sohuanuuri Jesuucua roseyaree juhua mococoonu niquishano. Jiyocuaaanuji, Pueyaso rupaari tojishaaree sequeyano:

—¡Quiaacuajaari cua panishano quianuniyojua! ¡Jiyanhua quia shuquiritiaanijia!

*Jesu supuetanaa sesaca*

*(Mt 1.1-17)*

<sup>23</sup> Treinta marijia jaara na shoconujuquaaari, Jesuuri na Que Pueyasora poonijionu coteequiaari. Pueyari jiyaniquaaari José naasucua seetanujuanaa na que quiquiaari. Joseeri Elí niyanu quiquiaari. <sup>24</sup> Eliiri Matat niyanu quiquiaari. Matatri Leví niyanu quiquiaari. Leviiri Melqui niyanu quiquiaari. Melquiiri Jana niyanu quiquiaari. Janaari José niyanu quiquiaari. <sup>25</sup> Joseeri Matatías niyanu quiquiaari. Matatíasri Amós niyanu quiquiaari. Amósri Nahúm niyanu quiquiaari. Nahúmri Esli niyanu quiquiaari. Esliiri Nagai niyanu quiquiaari. <sup>26</sup> Nagairi Maat niyanu quiquiaari. Maatri Matatías niyanu quiquiaari. Matatíasri Semei niyanu quiquiaari. Semeiri Josec niyanu quiquiaari. Josecri



Judá niyanu quiquiaari. <sup>27</sup> Judaari Joanán niyanu quiquiaari. Joanánri Resa niyanu quiquiaari. Resaari Zorobabel niyanu quiquiaari. Zorobabelri Salatiel niyanu quiquiaari. Salatielri Neri niyanu quiquiaari. <sup>28</sup> Neriiri Melqui niyanu quiquiaari. Melquiiri Adi niyanu quiquiaari. Adiiri Cosam niyanu quiquiaari. Cosamri Elmadam niyanu quiquiaari. Elmadamri Er niyanu quiquiaari. <sup>29</sup> Erri Jesús niyanu quiquiaari. Jesúsri Eliezer niyanu quiquiaari. Eliezerri Jorim niyanu quiquiaari. Jorimri Matat niyanu quiquiaari. <sup>30</sup> Matatri Leví niyanu quiquiaari. Leviiri Simeón niyanu quiquiaari. Simeónri Judá niyanu quiquiaari. Judaari José niyanu quiquiaari. Joseeri Jonam niyanu quiquiaari. Jonamri Eliaquim niyanu quiquiaari. <sup>31</sup> Eliaquimri Melea niyanu quiquiaari. Meleari Mena niyanu quiquiaari. Menaari Matata niyanu quiquiaari. Matataari Natán niyanu quiquiaari. <sup>32</sup> Natánri David niyanu quiquiaari. Davidri Isaí niyanu quiquiaari. Isaíiri Obed niyanu quiquiaari. Obedri Booz niyanu quiquiaari. Boozri Sala niyanu quiquiaari. Salaari Naasón niyanu quiquiaari. <sup>33</sup> Naasónri Aminadab niyanu quiquiaari. Aminadabri Admin niyanu quiquiaari. Adminri Arni niyanu quiquiaari. Arniiri Esrom niyanu quiquiaari. Esromri Fares niyanu quiquiaari. Faresri Judá niyanu quiquiaari. <sup>34</sup> Judaari Jacobo niyanu quiquiaari. Jacoboori Isaac niyanu quiquiaari. Isaacri Abraham niyanu quiquiaari. Abrahamri Taré niyanu quiquiaari. Tareeri Nacor niyanu quiquiaari. <sup>35</sup> Nacorri Serug niyanu quiquiaari. Serugri Ragau niyanu quiquiaari. Ragauri Peleg niyanu quiquiaari. Pelegri Heber niyanu quiquiaari. Heberri Sala niyanu quiquiaari. <sup>36</sup> Salaari Cainán niyanu quiquiaari. Cainánri Arfaxad niyanu quiquiaari. Arfaxadri Sem niyanu quiquiaari. Semri Noé niyanu quiquiaari. Noeeri Lamec niyanu quiquiaari. <sup>37</sup> Lamecri Matusalén niyanu quiquiaari. Matusalénri Enoc niyanu quiquiaari. Enocri Jared niyanu quiquiaari. Jaredri Mahalaleel niyanu quiquiaari. Mahalaleelri Cainán niyanu quiquiaari. <sup>38</sup> Cainánri Enós niyanu quiquiaari. Enósri Set niyanu quiquiaari. Setri Adán niyanu quiquiaari. Adánri Pueyaso niyanu quiquiaari.

## 4

### *Samaruhua jiyaniijia saniniujiushacari Jesu (Mt 4.1-11; Mr 1.12-13)*

<sup>1</sup> Jesu quiasacariuhua Jordán moojiniji, Pueyaso Sohuanuuri noojiajinia quiriquiaa puetunu na cumaacajanaa na jitianura. Pueyaso Sohuanuuri na jiyatequiaari pueya jiyaqui cariiquia jiyajiniara. <sup>2</sup> Tii camueenujuquiaariiri cuarenta juuca. Sesaacaari tii na saniniujiuriquiaa. Majaari quenaaja casaa na miaquenu quiquiaari tii na quishacari. Na nuhuaji miaajequiaariiri. <sup>3</sup> Jiyacaritij, Sesaacaari na sequeree:

—Quiaa jaara seetanujuanaa Pueyaso Niyanu quiri, nio saajia quia jataniri neecaruura na quiniuria.

<sup>4</sup> Jesuuri saaja na riucuaree:

—Pueyaso Rupaajiniacuaajaari naa naajiotasano quiya:

“Pueyanoori maja saminio na quiniu saa miaquesanotaja. Seetanujuanaa saminio quiyari na tojishacari puetunu Pueyaso Rupaajanaa”.

<sup>5</sup> Na nuhuaji, Sesaacaari Jesu jiyataaree jiyanoehua jiyaconaja tuhuananuucua. Sesaacaari ritia niqutiriiri Jesu puetunu mijiria jiyacajanaa. <sup>6</sup> Jesu sequereeri:

—Janiya quia niqutionutaniya puetunu nio jiyaca jiyaniijianucua cumaacajanaani, maninia jiyaniijijanaa quia quiniuria mijiria. Janiyari puetunu nio jiyacajanaa niq-uitiosaaquiarini. Naacuajitij, janiyari cumaaca niqutioquiaani cana cua niqutionu paniyacuajani, jiyaniijia na quiniuria. <sup>7</sup> Puetunjuanaari quiara quiniutianiya, quiaa jaara cucuara mojoquetare quia shuquiritianura janiya.

<sup>8</sup> Jesuuri saaja na sequeree:

—Pueyaso Rupaajiniacuaajaari naa naajiotasano quiya:

“¡Quia Jiyaniijia Pueyaso quia shuquiritiare! ¡Saaja nojuaja quia tojiri!”

<sup>9</sup> Na nuhuaji, Sesaacaari Jesu jiyataaree Jerusalén tiacajinia. Na tacaniriiri Pueyaso Secojoua tia cacojiria, jiyocuacaanu. Jesu sequereeri:

—Niiquiji quia jaataare jiyocua, quiaa jaara seetanujuanaa Pueyaso Niyanu quiri.

<sup>10</sup> Pueyaso Rupaajiniacuaajaari naa naajiotasano quiya:

“Pueyasoori na seya sequenutaniya na cojuanura quiajaniya. <sup>11</sup> Nojoriiri quia quianutaniya, saajiaacua quia jiriataaquiniuucaaji”.

<sup>12</sup> Jesuuri na riucuaree saaja:

—Naa naajiotasano quiyajaariuhua Pueyaso Rupaajinia:

“Maja quia Jiyaniijia Pueyaso quia saniniujiunuu”.

<sup>13</sup> Sesaacaari naa Jesu saniniujiuniu puecaquiaari puetunujuanaa. Majaari quenaaja na naata quiriquiaa sesa na miitiniuria. Naaratej, rupaquijia na tarinitiaquiaari tamacariri-aari.

*Jesu coteesacari na poonijosano miiniu Galilea jiyajinia*

*(Mt 4.12-17; Mr 1.14-15)*

<sup>14</sup> Na nuhuaji, Jesuuri tacatequiaariuhua Galilea jiyajinia puetunu Pueyaso Sohuanu cumaacatajanaa. Puetunu cuno jiyajiniajanaa pueyari Jesujiniji caminiujiutiooquiaari. <sup>15</sup> Jesuuri Pueyaso secojojua tiajiniaqueya niishitiojoquiaari puetunu tiacajiniajanaa cuno jiyajinia. Puetunu pueyajanaari na timitiaja.

*Jesu quishacari Nazaret tiacajinia*

*(Mt 13.53-58; Mr 6.1-6)*

<sup>16</sup> Jiyacaritij, Jesuuri quiaquiaari Nazaret tiacajinia, tee na canashitishaaquiaaricujani. Samaatenu juuca, Jesuuri Pueyaso secojojua tiajinia tiuquiquiaari taa na jiiitiquiaari miini-ucujani. Nojuajaari nujaquiaari Pueyaso Rupaa serojonura pueya niquiara. <sup>17</sup> Pueyari na niqutioree tariucuaaanu Pueyaso sequesano caminiujiunia Isaías naajionee jiuniosano, pueya niquiara na serojosocoriquiano. Jesuuri na saacataree. Serjonu coteereeri tee nio naajiotasano quiyacuajani:

<sup>18</sup> “Pueyaso Sohuanuuri coojajinia quiyani, na cumaaca cua jitianura. Naacuajitij, Pueyasoori cua seeratarucuaa maninia rupaa cua pohuatanura casamiijiuniucua pueya niquiara. Cua jiyaroreejaariuhua Sesaaca quiosano pueya cua pohuatanura maninia rupaa Pueyasojiniji. Naacuajitij, nojoriiri cartesano quiriohua Sesaaca sapojosanojiniji. Cua jiyaroreejaariuhua cariyojuarujuri pueya namijiaa cua jeecanura, maninia niqijiaara nojori quiniuhua. Cua jiyaroreejaariuhua taraatia miitiasano pueya cua jiyatenura shuquiriaatia quijiacara. <sup>19</sup> Cua jiyaroreejaariuhua cua pohuatanura pueya niquiara, quiarjiaari Jiyaniijia Pueyaso jiyanooshacari pueya”.

<sup>20</sup> Na serjonu nuhuaji, Jesuuri naajionee jiuniorohua. Na niqutiiorohua na cojuanaari. Jesuuri cajiriohua. Puetunu pueyajanaari tacuriitia na shootiaturiquiaa. <sup>21</sup> Jesuuri juhuacatecara pocuarohua. Naa sequereeri:

—Quiarjiani, Pueyaso Rupaajinia nio naajiotasanoori tari tohuateeree nia niquiara.

<sup>22</sup> Puetunu pueyajanaari jiuujiateree shanohua Jesu pohuatasano nojori tojishacari. Naaratej, nojoriiri maninia pocoojoriquiaa Jesujiniji. Tama nojoriijaarijia nequesoreetooriquiaa:

—¿Majate nio pueyano José niyanucuaaja, niya pa tiacajinia maashiniotej?

<sup>23</sup> Jesuuri nojori sequeree:

—Niaa jiyoteeri cua sequenu paniya nio tariucuaaanu sequesano: “Naarajonanaa, tama quia cuaqueyajaaja quia naarajore”. Niaari naa cua sequenu paniya jiyajeneta casaa cua miitiniuria cua cumaacata niaa tama cua tiacajiniaajaajani, taa nia tojiquianucuaaja cua miishanojiniji Capernaum tiacajiniacuani.

<sup>24</sup> Jesuuri socua sequeree:

—Seetanujuanaa nia sequenyajia, puetunu Pueyaso sequenu panishano caminiujiunijaajanaari tojishoo quijia, tama nojori tiacajiniaajaaja. <sup>25</sup> Supuetana Elías quishacari, queraatia mashiquiopueeri quiquiaari Israel jiyajinia. Jiyanohua miaajesacari quiquiaari-iri maru niyaquishacari pueyaracaanu. Jiuujianaraca marijaari shocojoquiaari socua seis racanio, maru niyaquishacari. <sup>26</sup> Naajaa, majaari Pueyaso jiyaronu quiquiaari Elías narta Israel jiyajinia quiniaa mashiquioocua. Pueyaso cutaraari na jiyaroquiaari taatu mashiquioocua Sarepta tiacajinia, Sidón tiaca shuriucua. Naacuajitij, cuno taatu mashiquioori miaquesano jiiitiaquiaari pueyaracaanu cutara, Elías na mianuutesacari miaajenu quishacari pueyaracaanu. Elías quiniucua Pueyasooocua tiuujia, cuno taatu miaquesanoori maja na puetanu quiquiaari nojoriira. <sup>27</sup> Naajuhua, supuetana Eliseo quishacari, queraatia leprata cusosuhuari quiquiaari Israel jiyajinia. Majaari quenaaja tamonu nojoriininijinio naatanishaanu quiquiaari Eliseo jiiitiasano Pueyaso cumaacata. Saaja cuno tahue Naamánri naatanishaaquiaari cutara, Siria jiyajininijinio pueyanoni.

<sup>28</sup> Pueyaso secojojua tiajinia quiniaa pueya tojishacari naa Jesu pohuatasanootej, puetunu nojoriijanaari jiyanohua juaaquioree. <sup>29</sup> Nojoriiri saneecuatuquee. Jesu caponeeturee nojori tiacajiniijiiri. Nojoriiri Jesu jaatucucuaari socua jiyocuaaanu nojori quijia tuhuananujinijiria, teyanooocua nojori tiaca tiasano quiquiaaricujani. Nojoriiri na capotunu paniriquiaa juucua tajojiyaji naa na monura. <sup>30</sup> Jesuuri saaja nojori tajiniaaco canajuquiaari juhuajaniya. Quiniquiji tamocora quiaareeri.

*Samaruraca pueyanojiniji pohuatasano*  
(Mr 1.21-28)

<sup>31</sup> Jesuuri Capernaum tiacajinia quiaquiaari, Galilea jiyajinia tiaca. Samaatenu juuca, Jesuuri pueya niishitiojoriquiaa. <sup>32</sup> Nojoriiri jiuujiatereee na niishitiojosano nojori tojishacari. Na niishitiojosanoori seetanujuanaa cumaacaraca quiquiaari juhua jiyaniijia niishitiojosano, maja juhua nareja rootasano caminiujiunia.

<sup>33</sup> Pueyaso secjojua tiajinia, samaruraca pueyanoori jiyacari tii quiriquiaa. Na niquishacari Jesu, naa jiyanoohua nacareeri:

<sup>34</sup> —¡Nazaret tiacajinijinio Jesunaa! ¿Taa quia miiniu paniya canaani? ¡Canaa quia niquiri nareja! ¿Quiaate tari niyaree canaa saniitionuucua? ¡Quia niishiyacuajanijia, cante quiajaniani! ¡Quiaacuajaari sesa miyashijia Pueyaso Niyanu!

<sup>35</sup> Jesuuri samaru sequeree:

—¡Quia sanaajere! ¡Quia tohuatare nio pueyanojiniji!

Samaruuri pueyano pojotequee puetunu pueya niquiarajanaa. Pueyanojiniji tohuataqueeri. Majaari na nuhuajiria sesa na miiniu quirii pueyano. <sup>36</sup> Puetunu pueyajanaari shiriqitiurii. Tama Jesujiniji sequetooreejaarijia:

—¡Nia tojiri! ¿Taamueca rupaatucuaanojoni? ¡Nio pueyanoori samaruhua jiyaronu niishiya juhua jiyaniijia! ¡Na rupaari jiyanoohua cumaacaraca! ¡Cunora samaruhua tohuataniriiri!

<sup>37</sup> Puetunu cuno jiyajinijanaa, Jesu miishanojinijiiri caminiujiushaquiaari pueya niquiara.

*Jesu naatanishacari Simón Pedro reyarucua*  
(Mt 8.14-15; Mr 1.29-31)

<sup>38</sup> Jesuuri Pueyaso secjojua tiajiniji tohuareetaquiaari na pueyata. Quoijyareeri. Simón tiajinia tiuquitiushiiri. Simón reyarucuaari jiyacari jiyanoohua naseeca matariquiaa. Pueyari Jesu sequeree na naataniniuria. <sup>39</sup> Jesuuri cusosu caco nujuasee. Jesuuri na naseeca cusonu jiyaroree. ¡Na naseecaari ritia shintiaquee! Tariucua jiyotuucari jiyacari sanemaa, na tiajinia quiniaa pueya na mianuutenura.

*Jesu naatanijosacari queraatia cusosuhua*  
(Mt 8.16-17; Mr 1.32-34)

<sup>40</sup> Pananu tiuquishacari, puetunu pueyajanaa, cante cusosuhua jiitiaquiaarini, nojoriiri na jiyataquiaari Jesuucua. Jesuuri na juaashiquia niaquiaari puetunu cusosuhuaacujanaa. Nojoriiri queraatia tamaatia cusonu jiitiaquiaari. Jiyacari na naatanijioree puetunujuanaari. <sup>41</sup> Naajuhuaq, queraatia samaruhuari tohuareetaquiaari cusosuhua-jiniji. Samaruhuari naa nacaquiaari Jesuucua:

—¡Quiaacuaja Pueyaso Niyanu!

Jesuuri nojori juarii. Majaari na shanacunu quirii nojori pocuanura, nojori mariqui pueya niquiara pohuatareeri, nojuajaari Pueyaso Jiyarosano.

*Jesu pohuatasacari Pueyaso rupaa Pueyaso secjonuujua tiajiniaqueya*  
(Mr 1.35-39)

<sup>42</sup> Tariquiiicuaqi, Jesuuri tiacajiniji quiaquiaari tamaquiiicua tamajaaja. Pueyari na pajequiaari. Nojoriiri socua nocua tiuquiiioquiaari na pajenuusacari. Majaari nojori cartenu paniniu quiquiaari Jesu quianura cuniquiji. <sup>43</sup> Jesuuri nojori sequeree saaja:

—Janiyari jiyarosaaquiaarini pueyapue niquiara cua pohuatanura quiarinio Pueyaso Rupaa. Quiarijiani, Pueyasoori pueya jiyanooniu paniya, nojori quiniuria na pueya, nojori tiushacari nocua. Naaratej, janiyari na rupaa pohuatanura quianu paniya tamonu tiacajinijaniuhuaq. Janiyacuajaari cunora jiyarosaaquiaarini.

<sup>44</sup> Naacuajitij, Jesuuri puetunu Judiucua jiyajinijanaa rucuanajoquiaari Pueyaso rupaa pohuatanura puetunu Pueyaso secjonuujua tiajiniaqueyajanaa.

## 5

*Sapitaaqara jaquerootanaa shiriqitiushacari*  
(Mt 4.18-22; Mr 1.16-20)

<sup>1</sup> Tamacari, Jesuuri caminia casaqueyaji quiriquiaa na pueyata. Jesuuri Pueyaso rupaa pohuatariquiaa. Puera jiyanoohua pueyari nocua catecanoquiaari catecaji na tojtianura nojuaja. Nojoriiri Jesu tanuujuriquiaa puera. <sup>2</sup> Jesuuri caapiqui bote niquiri caminia casaqueyaji. Shaama quiriquiaari. Na camaruhuari na shuriucua jeequejonuuriquiaa na shiyaruhua. <sup>3</sup> Jesuuri Simón botejinia tacaquiaari. Simón sequereeri cuara bote juariocotaara caminia jiuujiajinia naata. Na nuhuaji, Jesuuri cajirii. Quiniquiji pueya niishitiojonu coteequaariiri. <sup>4</sup> Jesu jaara niishitiojonu puecaquiaari, Simón sequereeri:

—Qeronijinia pa jaaretaare. Niocua tii jartasee nia shiyaruhua sapitiaajara.

<sup>5</sup> Simónri na riuquaree:

—Niishitiojonanaa, canaacuaajari tari jaquerootariquiaa najuhanani. Canaari naajaa nocua juhuaquemaani. ¡Saa shaa quiriquiaanojua! Naajaa, quiaacuaja na sequeya, socua canaa jaquerootarohuacuaraquii.

<sup>6</sup> Nojori jaara socua na shiyaruhua jartaquiaariuhua, jiyanojua queraatia sapitiaaja ritiatureeri! Shiyaruhuari sureequetanu coteequiaari. <sup>7</sup> Nojoriiri jatiqúi nata poonijionaa piinioree bote tarajanujinia quiyano, nojori niniuria na naacutanura. Nojoriiri ritia nimiaa. Cuno caapiqui bote mishinijloturee sapitiaajataari. ¡Quera tiuquitiariquiaari queraatia sapitiaajata! <sup>8</sup> Simón Pedro niquishacari naa Jesu miishano nojoriiriatej, Jesuucuaa mojoquetareeri. Jesu sequereeri:

—¡Jiyaniijianaa, maja cua rupuenu socua! Janiya puera sesa pueyanoni quia rupuena cua quiniuria.

<sup>9</sup> Simónri shiriiquirii, jiyanojua queraatia sapitiaaja nojori quiasacari. Nata quiniaa pueyari shiriiquitiriujuhuj. <sup>10</sup> Cuno pojoritia quiriquiaajaariuhua Zebedeo niquiohua, Santiago, Juannio. Nojoriiri Simón cojiniaa quiquiaari. Jesuuri Simón sequeree miriqui:

—Maja puerenu. Quiaari saniniuujia pueya quioojua quiniutianiya juhua sapitiaaja.

<sup>11</sup> Nojori shiitiasacari, nojoriiri puetunu na casaajanaa tiujiaquiaari Jesuta nojori quiojonura.

*Jesu naatanishacari lepraraca cusosu*  
(Mt 8.1-4; Mr 1.40-45)

<sup>12</sup> Tamonu tiacajinia Jesu quishacari, lepraraca cusosu pueyanoori tii quiquiaari. Na niquishacari Jesu, nocuara jacamareeri. Jesu sequereeri:

—Jiyaniijianaa, quiaa jaara paniri, quia naata cua naataniniu cua cusonujiniji.

<sup>13</sup> Jesuuri na quiaree. Na sequereeri:

—Taaquiriirinij. Quia naataniniu paniyanijia. Quia cuaqueya cuara jeequehuara.

Naa na sequesacartij, na lepraari shaajequee na cuaqueyajiniji. <sup>14</sup> Jesuuri na rootaree maja na pohuatanura na miishano tamasaca niquiara. Na sequereeri:

—Saaja pueyacuara secojona jiyaniijia quia niqitishii quia cuaqueya, na cartenuhuara quiajaniya, pueya tajinia quia rucuanefonuhua juhujaniya. Naajuhuj, quia seru quia niqitiose Pueyasocuara catijasocoriquiano. Naa quia miiri taa Moisés rootaquiara-icuajani, puetunu pueyajanaa niishiniuria quiaa tari jeequerohua quia cusonujiniji.

<sup>15</sup> Maninia Jesu miishanojinijiiri jiyanojua socua tamaquicua caminiujishaaquiaari pueya niquiara. Naaratej, jiyanojua queraatia pueyari nocua nijioquiaari na tojinuria, mariyata Jesu naatanijionura nojori, nojori cusonujiniji. <sup>16</sup> Jesuuri saaja pueya quiyaquishaqui quiaquiaari na Que Pueyaso na secojonura. Nojuajaari naa pueyaracaanu miiquiaari.

*Jesu naatanishacari cumatacuruhua cusosu*  
(Mt 9.1-8; Mr 2.1-12)

<sup>17</sup> Tamonu juuca, Jesuuri pueya niquiara niishitiojoriquiaa. Na tojtianaa tajinia cajituriquiaajaariuhua Fariseocua, Moisés Rootasanojiniji niishitiojonaanio. Nojoriiri nijioquiaari puetunu Galilea jiya tiacajinijianaa, Judea jiya tiacajiniji, Jerusalén tiacajinijinio. Jesuuri jiyanojua Pueyaso cumaaca jitiariquiaa cusosuhua na naatanijionura. <sup>18</sup> Jiyacartij, socua pueyari tiuquijioquiaari. Nojoriiri cumatacuruhua cusosu patariquiaa na matujinia. Nojoriiri juucua na tiuquitanu paniriquiaa tiajiniaaco Jesuucua. <sup>19</sup> Puera queraatia pueya rerejosacari tohuateyaji, majaari na naata cusosu tiuquinitiasaanu quiquiaari. Nocuaji, nojoriiri tia cacojiria tacanitiaquiaari cusosu. Cuno pueya tiaca tucuruuri quiquiaari marauneece majeetejosano. Nojoriiri tia nijinia papataquiaari. Na nuhuaji, nojoriiri cusosu roshinitiaree cuhuocojiniji na matujinia, Jesu nujuasaqui pueya tajinia. <sup>20</sup> Jesu niquishacari taa nojori tiuuriquiaa nocuani, cunora Jesuuri cusosu sequeree:

—Pueyanonaa, quiaacuaja tari jiyanooshaaree sesa quia miishanojiniji.

<sup>21</sup> Naa Jesu sequesacartij, Moisés Rootasanojiniji niishitiojonaa, mariyata Fariseocuaari naa niishiriojonuuriquiaa: “¿Cantejaara cuno pueyanoni? ¡Nojuajaari tama na cuaqueyajaaja jiyateya juhua Pueyaso na quiniuria! ¡Pueyanoori maja na naata tamonu pueyano jiyanooni sesa na miishanojiniji! ¡Saaja Pueyaso cutaraari na naata pa jiyanooni!”

<sup>22</sup> Jesuuri naa nojori niishiriojosano niishiriquiaa. Cunora, nojori sequereeri:

—¿Casaara naa nia niishiriojiani? ¿Niaateeri cucuaji taacanuyajaa? <sup>23</sup> Janiyara, maja jiyajeneta cua sequenura: “Quiaari tari jiyanooshaaree sesa quia miishanojiniji”. ¿Jiyajenetejaariuhua sequenura: “Quia sanere. Quia rucuanere”? <sup>24</sup> Cunora, janiyari quiarijia

nia niishitiniutianiyani, janiyari mijiria jiyarosaaquiaarinii pueya cua jiyanooniuria sesa nojori miishanojiniji.

Naacuaajitij, Jesuuri cumatacuruhuana pueyano sequere:

–Cua tojiri. ¡Quia sanere! ¡Quia matu quia pataarohua quia tiajinia!

<sup>25</sup> Jiyacaritij, pueyanoori sanequee nojori niquiara. Na tiajinia pataarohua na matuuri. Shuquiriaatia quiariquiohua na tiajiniohuari Pueyaso na maniniuhaaqueetanuta.

<sup>26</sup> Puetunu pueyajanaari shirriiquitiuri. Nojoriiri Pueyaso maniniuhaaqueetariquiaa cuno maninia casaa nojori niqiniuucua. Nojoriiri na puerenuta naa sequetuquiaarijihuaj:

–¡Paari quiarijia jiyanohua maninia miishano niquiriini! ¡Nocuaqi jiuujjatesano!

*Jesu sequesacari Leví, na pueyano na quiniuria*

*(Mt 9.9-13; Mr 2.13-17)*

<sup>27</sup> Nio nuhuaji, Jesuuri tohuataquiaari. Tamonu pueyano niquiriiri jiyaniijiajanaa Césarra cumaneeca masejosaqui cajiyyano. Na sesa quiquiaari Leví. Jesuuri na sequere:

–¡Cua nuhuajiri, cua pueyano quia quiniuria!

<sup>28</sup> Jiyacaritij, Leviiri ritia sanequiaari. Puetunu na jütiasanojuanaa tiujiaqueeri. Jesuta quiaqueeri.

<sup>29</sup> Na nuhuaji, Leviiri jiyanohua queraatia sumatuquiaari na tiajinia, Jesu na queranacutanura. Queraatia narta cumaneeca masejonaari tii quiriqiaajaacuhuj. Nojoritia miaquejajinia cajitiuriquiaari, socua tamasaca pueyano. <sup>30</sup> Moisés Rootasanojiniji niishitiojonaa, mariyata narta Fariseocuacaari juhuacatecara Jesu pueyacuara rimiaaquenu coteequiaari. Nojoriiri naa Jesu pueya sequeturee:

–¿Casaara cuno sesa pueyata nia miaqueyani, nia ratuyani, tama parta pueya tacartajacatajaajanio? Nojoriiri pa paraa sequera cumaneeca masejonaa.

<sup>31</sup> Jesuuri nojori riucuaare:

–Cante na cuaqueya jiyaniyani nojuaja maja cusosu na quiniu, nojuajaari maja naarajona na paniniu. Cusosuhua cutaraari naarajona paniya. <sup>32</sup> Naajuhuj, majaari mijiria cua ninu quiquiaari maninia miijia pueyacu. Niquiara cutaranijia sesa miijiaa cua tacatonuhuaa Pueyasocua, maninia miijia nojori quiniuria.

*Pueya nequesotasacari Jesu, casaara na pueya carteyaquiya miaquenu quenaajani Pueyaso nojori secojonura*

*(Mt 9.14-17; Mr 2.18-22)*

<sup>33</sup> Pueyari Jesu sequere:

–Tiuquinijiona Juan pueya cutaraari sequeyarucua miaqueyaquiquiaa. Nojoriiri naa Pueyaso secojoquiaa pueyaracaanu. Fariseocuacaari naa miqquiaajuhuj. Quia pueya saniniujia, saaja miaquequiaari, ratuquiaari. ¿Casaarateni?

<sup>34</sup> Jesuuri nojori riucuaare:

–Pueyano camishacari maaji, majaari masuusano pueya miaajenu, camiriquiano pueyano jaara nojoritia quiyajaa. <sup>35</sup> Tamacari, camiriquiano pueyano jaara jaariutiasaare nojori tajiniji, jiyacariti nojori cutaraari miaqueyaquiniutianiya. Naajuhuj, janiyari cua pueya tajiniji jaariutiasaanutaniyani. Jiyacariti nojori cutaraari miaqueyaquiniutianiya.

<sup>36</sup> Jesuuri socua nojori niquiara pohuataquiaari nio miriqui sequesano:

–Majaari pueyano miatenu quijia na toque quiariquijiniji, na toque mocua cuhuoco na cushipirijiotajara. Saniniujia, jaara naa miiritij, na toque quiariqui sesoyari. Quiarinio toquerauri sesoshiyajuhuj, toque mocujinia na posequesacari. Cua rupaari naajuhuj, juhua quiarinio toque. <sup>37</sup> Naajuhuj, majaari na naata quiariniacu uva caaca mishinishaanu shoque tariucuajinia, tariucuaco shoque mariqui pojuaretareeri, uva caaca jaara jerema vino na quiniuria. Jaara naa miishaaretej, vinoori najuhuaa niitiashiya. Shoqueeri najuhuaa sesoshiyajuhuj. <sup>38</sup> Naaratej, maninia cutaraari quiariniacu uva caaca shuujionu shoque quiariquiojina, maja vino niitiasaanuucuaaji, na quiquio shoquenio. Naajuhuj, nia niishitiojosanoori juhua tariucuaco shoque. <sup>39</sup> Naajuhuj, pueyano jaara vino tariucuanacu ratujua quiri, majaari na paniniu quiariniacu vino. Sequeyari: “Tariucuanacuuri maniniacuaja”. Naajuhuj, majaari cua niishitiojosano nia paniniu, quiarinio na quiniuucua.

*Jesu pueya carojotasacari trigo samaatenu juuca*

*(Mt 12.1-8; Mr 2.23-28)*

## 6

<sup>1</sup> Tamonu samaatenu juuca, Jesuuri trigo cuhuariquiajiniaaco quiojoriquiaa na pueyata. Na pueyari trigo carojotariquiaa. Nojoriiri na juaashiquiajinia na shuquiojoriquiaa na

corequetanura. Na nuhuaji, na jajau miojonuuriquiaari. <sup>2</sup> Fariseocuacaari na niquitiariquiaa. Nojoriiri Jesu pueya juaarii:

—¿Casaara nia tojitiaaquia Moisés Rootasanoni, taa na sequequiaaricujani maja pa poonijionura samaatenu juuca?

<sup>3</sup> Jesuuri nojori riucaaree:

—¿Majateeri nia serojonu quiquiaacuaja casaa supuetana David miiquiaari na miaajesacarini, mariyata na cojiniaa miaajesacarijiuhuaj? <sup>4</sup> Nojuajaari Pueyaso Secojoua tiajinia tiuquiquiaari. Pueyasora niojosano pan pooquiaariiri. Na sareeri. Mariyata nata quiniaa niqutiojoreeri nojori sanurajuhua. Cuno panri sequesaaquiaari saaja pueyacuara secojona sasocoriquiano. Naajaa, Davidri na saquiaari. Majaari Pueyaso juuanu quiquiaari naa David miiniuucua.

<sup>5</sup> Jesuuri socua cuno Fariseocuaca sequequiaari:

—Janiyacuajaari Pueyaso Jiyarosanoni. Jiyaniijara jiyatesaaquiarinijia cua sequenura caasaate samaatenu juuca miishiyani, Pueyaso pa shuquiritiniuria.

*Jesu jecacasari pueyano juaashiquia, cuseetucjuara joojequetano*

*(Mt 12.9-14; Mr 3.1-6)*

<sup>6</sup> Tamonu samaatenu juuca, Jesuuri Pueyaso Secojoua tiajinia tiuquiquiaari. Tii niishitiojoriquiaari. Quiniqui quiriquiaari pueyano, cuseetucjuara joojequetano na juaashiquia miaquetajara. <sup>7</sup> Moisés Rootasanonijini niishitiojona, mariyata Fariseocua-caari Jesu shanacutariquiaa. Nocuara tonujunu paniriquiaari Jesu jaara cuseetucjuara joojequetano juaashiquiaraca pueyano jecare samaatenu juuca. <sup>8</sup> Jesuuri tari niishiriquiaa taa nojori niishiriojoriquiaani. Jesuuri cuno rimiajatujuua pueyano sequeere:

—¡Quia sanere! ¡Niya quia nujuasee pueya tajinia!

Pueyanoori sanequee. Nujuaseeri tee Jesu sequequiaari na nujuanuracujani. <sup>9</sup> Jesuuri nocuara tonujunu panijiaa pueya sequere:

—Nia nequesotareeraj. Cua sequere, ¿taa pa niishitiojosaaquiaari Moisés Rootasanonijini? ¿Paate maninia miya samaatenu juucani? ¿Paate sesa miya soj? ¿Cusosuhuate naatanijoshiya, puetushiyajanaa monu soj? ¿Taa nia sequeyani?

<sup>10</sup> Jesuuri puetunu na shocuaqueya quiniaajanaa niqunijioree. Na nuhuaji cusosu sequereeri:

—¡Quia juaashiquia quia shiitiore!

Pueyanoori na juaashiquia shiitioree. ¡Na juaashiquiaari ritia jeequequee! <sup>11</sup> Cuno pueyari jiyanhua juaaquioree naa Jesu miishacaritij. Nojoriiri naa pocoojuquiaari tamajaaja: “¿Taa pa miinutianiya socua cuno Jesuurini?”

*Jesu saquiriojacari doce pueya na jiyaramiquishocoriquiano*

*(Mt 10.1-4; Mr 3.13-19)*

<sup>12</sup> Jiyacaritij, Jesuuri tamonu tuhuananuucua quiaquiaari, Pueyaso na secojonura. Puetunu niucujanaa secojoriquiaa Pueyasoori. <sup>13</sup> Jaara juhuaquequiaari, Jesuuri na tojitiaaja pueya sequequiaari nocua nojori nijionura. Puetunu nojorijinijuanaa, Jesuuri nareja doce pueya saquiriojuquiaari. Nojori sesojoreeri, “cua jiyaramiquishocoriquiano pueya”. <sup>14-15</sup> Nioori Jesu saquiriojosano pueya sesaca: Simón. Jesuuri na sesojuquiaarijuhua “Pedro”. Simón tarajanu Andrésri saquiriojosaaquiarijiuhuaj, mariyata Santiago, Juan, Felipe, Bartolomé, Mateo, Tomás, Alfeo niyanu Santiago, socua tamonu Simónnio. Nojuajaari Celote maanujiniji pueyano quiquiaari. <sup>16</sup> Santiago niyanu Judasri saquiriojosaaquiarijiuhuaj, Judas Iscarioteno. Nojuajaari quiquiaari Jesu quiateriquiano mosocoriquiano.

*Jesu niishitiojacari queraatia pueya*

*(Mt 4.23-25)*

<sup>17</sup> Na nuhuaji, Jesuuri tuhuananujiniji rosetaquiaarijuhua na saquiriojosano pueyata, jamatujinara. Cuno jamatujinia, queraatia na nuhuajiniaa pueyari tari nocuaji quiriquiaa. Mariyata jiyanhua queraatia pueyari tii quiriquiaa puetunu Judea jiyajinijinio, Jerusalén tiacajinijiojuhuaj, shoniacu caminia shuriquiumia quijiacajinijinio pueyano. Saaja nio pojoriiri quiquiaari Tiro tiacajinijinio, mariyata Sidón tiacajiniji pueyano. Puetunu cuno pueyajanaari cuniquiria nijioquiaari nojori tojniuria Jesu, na cusonujiniji nojori naatanijiosaanurajuhua. Jesuuri nojori naatanijioree. <sup>18</sup> Naajuhua, taraatia samaruhua miishano pueyari naatanijiosaquiarijiuhuaj. <sup>19</sup> Puetunu cusosuhujanaari Jesu quiuanu paniriquiaa, naatanijosano nojori quiniuria. Jesu cumaacaari jiyanhua poonijoriquiaa. Naaratej, puetunu pueyajanaari naatanijiosaariquiaa, saaja nojori quiasacari nojuaja.

*Jesu pohuatasano shuquiriaatia quiijajiniji, taraatia quiijajinijinio*  
(Mt 5.1-12)

<sup>20</sup> Na nuhuaji, Jesuuri na pueya niquiri na pocuanura. Naa sequereeri:

–Niaari Pueyaso shuquiritasano, niaa jaara niishiriquia nioojia saaja sesa mijia. Niaa jaara niishiri nioojia naa quiyatej, niaari Pueyaso jiitiasano pueya quiniutianiya.

<sup>21</sup> Niaari Pueyaso shuquiritasano, niaa jaara maninia mijia quiniucua jiaatiaa, taa miaajeyano pueyano miaquesanoocua jiaatiaacuaani. Niaa jaara naa quiniucua jiaatiaa, Pueyasocuaaari nia jataniniutianiya maninia quiijara nia quiniuria.

<sup>22</sup> Niaari Pueyaso shuquiritasano, niaa jaara sesa nia miiniu nuhuaji taraajequiaa. Niaari na nuhuaji saroojonutaniya nia shuquiriniutia, niaa jaara jiyanooshaarohua.

<sup>23</sup> Niaa jaara nia miishaaretej, jyanohua nia timiri. Nia jaacuatere nia shuquiriniutia. Niaa jaara naa nia miishacari rejeretajaca quiri, Pueyasoari nia niishishoo casaa racatasano jiitiaa jiyocuaaanu, na niquitosocoriquiano nijaniya. Nia paraa supuetanaari naa taraatia miiquiaari tariucuaaanu Pueyaso sequenu panishano caminiujuniaa pueyajuhua.

<sup>24</sup> Niaari saniniuujia taraatia quiijaca quiniutianiya, jamuejaca casamiriaca pueyanaa. Niaacuaaari tari shuquiriaatia quiiquianu, puetunu nia panishanojuanaa nia jiitiasacari.

<sup>25</sup> Taraatia quiijacaari nijaniya, cante sequejani: “Janiyacuaa maninia pueyanoni. ¿Janiyatucua casaaari paniri Pueyaso jyanooniuria janiyani?” Naa sequejaca pueyanaa, na nuhuaji, niaari niishiniutianiya niaari saaja sesoriqia pueya seque.

Taraatia quiijacaari nijaniyajuhua, jeya nia quiyaquishacari Pueyasora, saaja tamaaja shuquiriaatia nia quiniuria nia cojesacari pueyaracaanu. Niaari na nuhuaji sapuenutianiya Pueyasooju nia quishacari pueyaracaanu.

<sup>26</sup> Taraatia quiijacaari nijaniya, puetunu pueyajanaa jaara maninia pohuataquiaa nijaniyajiniji, maninia nia kojiniucua cuno pueya, Pueyaso tojiyashijiaca pueyani. Cuno pojori supuetanaacuaaari naa shuquiritaquiaaari cuno sapojonuujuaca, canapuate maja seetanujuanaa Pueyaso sequesano caminiujuniaa quiquiaaricuaani.

*Pa paraa panijaca pa quiri*  
(Mt 5.38-48; 7.12)

<sup>27</sup> Nijaniya, cante niya cua tojitiaacuaani, cua tojitiuri. ¡Nia paraa nia paniri! Maninia nia miiri nia niquiniu paniyashijia pueya. <sup>28</sup> Saaja maninia nia riuquare nia juayano pueyano. Sesa nia mijiaaca pueyacuara nia secore Pueyaso. <sup>29</sup> Pueyano jaara quia maseca piri, quia jyanoori nojuaja. Jaara taquijiria pirijuhua, socua quia jyanoori. Majaari na naminiu. Pueyano jaara shiniquiaacuaaji quia cushishano toque jaariutiare, quia cacojoqui quia niquitiorejuhuaj. <sup>30</sup> Pueyano jaara quia sequere quia casamijiniji quia niquitionura nojuaja, quia niquitiore nareja. Pueyano jaara quia casaa jaariutiare, majaari na sequenu: “Cua niquitiorehua”. <sup>31</sup> Maninia nia miiri tamasa, taa nia paniquiaa tamasa miiniuria nijaniyacuaani.

<sup>32</sup> Niaa jaara saaja nia panijaca paniriqia, majaari nia jyaniniu Pueyasoori nia shuquiritiaa naa nia miishacari. Sesa mijiaaca pueyari naa paniquiaa nojori panijacajuhua. <sup>33</sup> Maja puera maninia mijia nijaniya, niaa jaara maninia miiquiaa saaja noo pojori, canapuate maninia miiquiaa nijaniyacuaani. Sesa mijiaaca pueyari naa maninia miiniu niishiquiaajuhua, noo pojori canapuate maninia miiquiaa nojoricuaani.

<sup>34</sup> Maja puera maninia mijia nijaniya, niaa jaara nia masena niquitioquiaa na panishano, nia niishishacari nojuaja ritia niquitionutanihua nijaniyajiniji na maseno casaa. Sesa mijiaaca pueyari na casaa rupaquijia niquitioquiaa narta sesa mijia pueyajuhua, na niishishacari nojori ritia niquitionutanihua nojori maseno casaa rupaquijia.

<sup>35</sup> Nia paniri nia paraa. Maninia nia miiri nojori. Nia casami nia niquitiore nareja, pueya jaara na pania rupaquijia. Majaari nia taraajenu cuno pueyano jaara nia niquitioyquiriohua nia casaa. Naa nia miishacaritij, niaari seetanujuanaa jiyocuaaanu Quijia muerasu. Pueyasoori socua jyanohua queraatia nia niquitionutaniya tamasa nia niquitosanojiniji. Naaratej, capora nia quiri, taa nia Que Pueyasocuaani. Nojuajaari nareja niquitioquiaa sesa mijiaaca pueya, mariyaca canapuate na sequeyashijiacani “paacarasho”. <sup>36</sup> Naaratej, jyanootio nia quiri, taa nia Que Pueyasocuaani, jyanoojia.

*Maja sesa nia niishiriojonu niarta pueyanoocuaa*  
(Mt 7.1-5)

<sup>37</sup> Maja nia rimiaaquenu tamasaacuaa, Pueyaso mariqui saniniuujia nia jyanoyquiriiri. Niaa jaara tamasaacuaa tonujiyashijia quiri, naajuhua, Pueyasoori maja na saneenu quiniutianiya sesa nia miishanojuhuaj. Niaa jaara jyanootio quiri, Pueyasoori

nia jiyanooniutianiyajaacuhuj. <sup>38</sup> Niaa jaara tamasaca niqutioquiaa na panishano, Pueyasoori naa nia niqutionutaniya nia panishanojuhuaj, maninia shanacusano, jiuuquiutiasano, maninia quianujusano, mishaja quera niitiano. Pueyasoori mariyata juhua nia shanacutajajiniya niaquianutaniya niajaniya, taamueca shanacutajajinia nia niqutioquiaa pueyacuani.

<sup>39</sup> Jesuuri socua niishitiojoquiaari pueya, nio miriqui sequesano:

—¿Cariyojuarute na naata narta cariyojuaru jaatucunu? Naa na jaatucusacari narta cariyojuarutej, nojoriiri mariyata totenutaniya raama. <sup>40</sup> Pueyanoori maja socua niishijia na niishitiojonajiniji. Jaara puetunu maninia niishitiojosaarejanaa, saaja jiyacariti niishijia quiniutianiyajaarihuaj, juhua na niishitiojonaja.

<sup>41</sup> ¿Casaara nia niquiya rucucua maano quia tarajanu namijiajiniani, niaa jaara puereetuuca maca jiiitaa tama nia namijiajiniajaaja? <sup>42</sup> Naa jaara puereetuuca maca shanacuya tama nia namijiajiniajaaja, ¿niaatucua casaara sequere quiarta pueyanoni: “Cua tarajanunaa, cuno rucucua pa taquiri quia namijiajiniji”? Sesa jiuujiaracanaa, tama nia namijiajinijiajaaja nia pare coteenu cuno maca. Na nuhuaji cutara nia naata maninia niqiniu, cuno rucucua nia taquiniuria nia tarajanu namijiajiniji. Naaratej, majaari nia rimiaaquenu niarta pueyanooacara.

*Naanaari niishishano na jajajiniji*

(Mt 7.17-20; 12.34-35)

<sup>43</sup> Maninia naanaari maja na naata piiquia jajau muetunu. Saniniuujia, sesa naanaari maja na naata shoqueeca jajau muetunu. <sup>44</sup> Puetunu naanajanaari maninia niishishano na muetusanojiniji. Majaari pa naata satuna carojonu shuunajiniji. Naajuhuj, majaari pa naata tuhuaracona carojotanu saarianajiniji. <sup>45</sup> Naajuhuj, maninia pueyanoori maninia pocuaa cutara, maninia jiuujiaraca na quishacari. Sesa pueyanoori saniniuujia sacuaaraatia rimiaaqueja, sesa jiuujiaraca na quishacari. Casaa pa niishiriojoquiaa poojiajiniani, paari cuno pocuaani.

*Miriqui Jesu pohuatasano cumueeca jiyajiniji, sasaca jiyajinijinio*

(Mt 7.24-27)

<sup>46</sup> ¿Casaara nia sequequiaa jianiyani, “Cua jiyaniijianaa, cua jiyaniijianaa”, niaa jaara cua rootasano tojtiaaquiuaa? <sup>47-48</sup> Cua tojiri. Cante cua rupenara quiri cua rootasano tojijia na quiniuriani, nojuajaari juhua tamonu pueyano cante maninia tiaquiaarini. Cuno pueyanoori coteenu tucuaara jiuutiaquiaari cumueeca jiyajinia na morijiuucujaji. Na nuhuaji, moo jaara pajaashiquiaari, pajaacaari jiyanohua cajiquiaari cuno tiaacua. Naajaa, majaari na mueecurujutanu quiquiaari, maninia nujatejosano na morijiuuca quishacari cumueeca jiyajinia. <sup>49</sup> Saniniuujia, cante najuhuaana cua niishitiojosano tojiaquiquiaani, na miyaquishacari cua sequesano, cuno pueyanoori juhua tianu niishiyashijia. Cuno pueyanoori sesa tiaquiaari sasaca jiyajinia. Na nuhuaji, moo pajaashishacari, pajaacaari jiyanohua cajiquiaari cuno tiaacua. Cuno tia pojoretaquiaariiri. Pajaari cuno tia niyartaquiaari puetunujuanaa.

## 7

*Jesu naatanishacari Romano capitán seru*

(Mt 8.5-13)

<sup>1</sup> Jesu jaara pueya niishitiojonu puecaquiaari, na pueyata quiaaree Capernaum tiacajiniaari. <sup>2</sup> Romano soldadohua capitánri quiniqui quijia quiquiaari. Jiyanohua na panishano seruuri cusosu matariquiaa. Quera cusoriquiaari. <sup>3</sup> Capitán jaara tojiquiaari Jesujiniji, nojuajaari Judiocuaca camarucua jiyaramiquiquiaari Jesuucua, nojori sequenura Jesu cuara niiria nocua na seru na naataniniuria. <sup>4</sup> Judiocuaca camarucuaari Jesuucua quiojoquiaari. Nojoriiri juhuacatecara Jesu secojonu coteequiaari jiyanohua, nojoritia na quianura. Nojoriiri Jesu sequere:

—Cuno Romano capitánri canaa jiyaroreeni, ¡nojuajaari jiyanohua maninia pueyano! ¡Quenaaja quia miiri na panishano! <sup>5</sup> Nojuajaari parta Judiocuaca panijia. ¡Nojuacuajaari Pueyaso secojojuatiaatequiaari canaara tama na cumaneecatajaaja!

<sup>6</sup> Naacuajitij, Jesuuri nojoritia quiaquiaari capitán tiajinia. Tari Jesu quishacari cateca na tiaacuara, capitánri na rupeuaa pueya jiyaroquiaari Jesuucua, nojori caminiujuiniuria na sequesano Jesura. Naaratej, nojoriiri naa Jesu caminiujuishii capitán sequesano:

—Jiyaniijianaa, capitán naa sequeya: “Cua Jiyaniijianaa, majaari cua taajetenu paniniu quiajaniya. Janiyari maja maninia pueyanoni cucua quia tiuquiniuria cua tiajinia. <sup>7</sup> Nocujaji, majaari cua quianu quiyaree janiyajanaa, cua pajenura quiajaniya. Nareja cuniquiji quia sequere cua seru naatanura. Janiyari niishiyani, quiaa jaara naa sequere,



cua seruuri naatanutaniuhua. <sup>8</sup> Janiyari niishiyajaanuhua, cuno cusonuuri quia to-jiniutianiya taa cua tojiqiaa cua jiyaniijianucuaaani. Janiyari cua jiyaramiquishano soldadohua jiiitajuhua. Janiya jaara tamonu sequereni, 'Quia quiaare', nojujaari quiaqueequiaa. Janiya jaara tamonu sequereni, 'Miji', ritia nimiaquiaari. Janiya jaara cua seru sequereni casaa na miiniuria, ritia na miyari. Niishiyaniija quiaari jiyano cumaacaracajuhua".

<sup>9</sup> Jesu tojishacari cuno pojori caminiujiushano capitán sequesano, Jesuuri jiuujiateree. Jesuuri na nuhuajinia pueya niqiniijioree. Nojori sequereeri:

—Seetanujanaa nia sequeyanijia, puetunu parta Israel pueyajinijiojuanaani, ¡majaari quenaaja cua niqiniu quiqianu Pueyasoocua tiuujia pueyano juhua nio tahue!

<sup>10</sup> Capitán jiyaramiquishano pueya tiuquijiosacariuhua capitán tiajiniohua, nojoriiri Capitán seru niqishuhua tariucua naatanohua.

*Jesu samiitianishacariuhua mashiquio niyanu*

<sup>11</sup> Na nuhuaji, Jesuuri tamonu tiacajinia quiaquiaari. Cuno tiaca sesa quiquiaari Naín. Na pueyari nata quiojoriqiaajuhua, socua queraatia tamasaca pueyano. <sup>12</sup> Nojori catecanosacari Naín tiacaacua, Jesuuri pueya niqiquiaari macu pataano jamosocoriqiano. Macuuri jiyacunojuanaa na nucua niyanu quiquiaari. Na nucuaari mashiquio quitiasuquiaari. Queraatia pueyari na nucua macu nuhuaji sacuariquiaa, jamajiniara nojori quiojosacari. <sup>13</sup> Jesu niqishacari mashiquio, nocua taraajereeri. Na sequereeri:

—Maja nujuquenu.

<sup>14</sup> Jesuuri macucua catecanoree. Macu quiquio quiatareeri. Na patanaari pootia na nujuataquee. Jesuuri macu sequereeri:

—Mashajanaa, janiya quia sequeyani: "¡Quia sanere!"

<sup>15</sup> ¡Macuuri cajiQUII! Juhucatecara pocuareeri. Jesuuri na nucuaacua na jaatucuree. <sup>16</sup> Puetunu pueyajanaa jaara naa Jesu miishano niqiquiaari, jiyanohua pueretureeri. Nojoriiri Pueyaso shuquiritariere jiyanohua. Na puerenuta sequetureeri:

—¡Pueyaso sequenu panishano caminiujiuniaqui niya supuree pa tajinia! ¡Jiyanohua cumaacaraca!

Nojoriiri naa sequetureejuhua:

—¡Pueyasoori shusha quiaritia na saquiriojosano Israel pueya niishiriohuacuhua, na cumaquiniuria pajaniya!

<sup>17</sup> Jesuini pueya pahuatasanoori caminiujiushaaquiaari puetunu Judiocuaca jiyajini-ajanaa, mariyata puetunu na shocuaqueya jiyacajinijanaano.

*Tiuquinijiona Juan jiyaramiquishano pueya nequesoreesacari Jesu*  
(Mt 11.2-19)

<sup>18</sup> Tiuquinijiona Juan pueyari puetunu Jesu miishanojuanaa pahuataquiaari Tiuquinijiona Juan. Na nuhuaji, Tiuquinijiona Juanri caapiqui na pueya sequequiaari:

<sup>19</sup> —Jesuucua nia quiaare. Niocua na sequesee: "¿Quiaate seetanujanaa Pueyaso jiyarosano, tariucuaaanu sequesano niriqianotej, tamonute sashishiyajara so?"

<sup>20</sup> Naaratej, Tiuquinijiona Juan jiyarosano pueyari Jesuucua quiojoquiaari. Na sequetuseeri:

—Tiuquinijiona Juanri canaa jiyaree quiocuaani, canaa nequesotanura quiajaniya: "¿Quiaatena Cristo, Pueyasojiniji niriqianotej, canaate tamonu sashiyajara so?"

<sup>21</sup> Nojori tiuquijiosacari Jesuucua, jiyacaritij, Jesuuri queraatia pueya naatanijioree nojori niqiaara; cusosuhua, pueyaracaanu nootunejaca, samaruharaca pueyano. Mariyata queraatia cariojuarujuri jiyaterohua niqijiacaraari. <sup>22</sup> Na nuhuaji, Jesuuri naa Tiuquinijiona Juan pueya sequereeri:

—Nia quiaarohua. Tiuquinijiona Juan nia pahuatasuhua taa nia niqiriicujani, nia tojishanonio. Nia sequesuhanoj: "Cariojuarujuriiri niqijiacara quiriohua. Shipiiniuquiujiuniaari maninia rucoorohua. Lepra cusotajacaari cushiritishaarohua juhua juhuanaraja nojori quiniuhara. Numueejuncuaari tojjiacara quiriohua. Macunucuaari samiitianiijosaarohua. Casamijiuniucua pueyari Pueyaso rupaa pahuatasaree, Pueyaso pueyara nojori jiyatasaanura. <sup>23</sup> Shuquiriaatia quijia cutaraari nooj, cante cucua tiuuniu tarinitiaaquiyani".

<sup>24</sup> Tiuquinijiona Juan jiyarosano pueya jaara quiojoquiaariuhua, Jesuuri juhuacatecara pueya pahuataree Tiuquinijiona Juanjiniji. Jesuuri naa nojori nequesotaree:

—¿Casaa niqiniuucua nia quiojocanu cariquia jiyajimiani? ¿Niaate noojia niqijioteteja niqiniuucua quiojocanu? ¿Tiuquinijiona Juante juhua paratu piyarojosano naajua jiyareta na tacarojosano? Majaruhua. <sup>25</sup> ¿Casaa niqiniuucua nia quiojocanunitioj? ¿Niaate maniniqui toque cushijia niqiniuucua quiojocanu? Niaacuaajaari niishiya, shanohua toqueya cushiyonuujuaacari saaja jiyaniijianucua tiajinia quiyano niquishano. Nojoriiri tama na

panishanojuuaaja miijiaa. <sup>26</sup> ¿Taateerinitioj? ¿Casaa niquniuucua nia quiojocanuurini? ¿Pueyaso sequenu panishano caminiujiuniate quiuiuanu? Taaquiriirini. Nia niquishano pueyanoori seetanujuanaa socua tojishano pueyano puetunu Pueyaso sequenu panishano caminiujiunijiniijianaa. <sup>27</sup> Cuno Juanjinijicuaajaari tariucuaaanu Pueyaso Rupaajinia naajiotasano quiquiaari. Pueyaso sequesano nojuajiniijiri naa naajiotasaaquiaariti: “Cua sequenu panishano caminiujiuriquiano jiyaroyanjia, na puetanura quiajaniya, nuu jeenucuariquiano quiocuaji”.

<sup>28</sup> Seetanujuanaa nia sequeyanijia, puetunu Pueyaso sequenu panishano caminiujiunijianijiniujianaani, majaari tamonu socua cutara pueyano quiniu quiquiaari Tiuquinijiona Juanjiniji. Naajaa, cante Pueyaso muerasuniyoyua quiya cucua na tiuushacari, Pueyasa, nojuajaari socua cutara pueyano Tiuquinijiona Juanjiniji.

<sup>29</sup> Puetunu pueyajanaa, mariyata cumaneeca masejonaa Roma tiacajinia quijia jiyani-ijiarani, nojoriiri niishiquianu Tiuquinijiona Juan pohuatasano Pueyasojinijiri seetanu rupaajanaa quiuiuanu. Naaratej, nojori tacatosacari nojori jiuujia sesa nojori miishanojiniji, nojoriiri moojinia tiuquinijosaacanu.

<sup>30</sup> Saniniuujia, Fariseocuaca, mariyata Moisés Rootasanojiniji niishitijonaani, nojoriiri Tiuquinijiona Juan pohuatasano ruuretacanu saaja. Naacujitij, majaari nojori tiuquinijosaanu quiuiuanu, nojori seetanuucua nojoriiri sesa miijiacajuhuaaj. Nojoriiri Pueyaso miiniu panishano nojoriira soocanu saaja. Naacujitij, majaari nojori jiyanooshaanu quiuiuanu.

<sup>31</sup> Jesuuri socua sequerece:

—¿Quiarijia nio pa quishacari pueyarijataj? <sup>32</sup> Nojoriiri juhua naatujoori, na tacuarishijonu panishacari, na cajitiushacari tiaca jiuujiajinia cajitiucuaa curotasanojinia. Nojoriiri narta naatujooriicua naca: “Canaari juucua naajua jonenejiyani. Majaari nia nianujunu paniniu. Canaari taraatia jaaquequesano jaaquequejiyani. Majaari nia sapuenu paniniuujuhuaaj”. <sup>33</sup> Naajuhuaaj pueyanaa, niaari Tiuquinijiona Juan tojiyaquiuiuanu Pueyaso rupaa na pohuatasacari nia niquiara. Nojuaja cutaraari miaquesano miaqueyashijia quijia, vino ratuyashijiano. Naaratej, niaari na sequeja, “samaruraca”. <sup>34</sup> Na nuhuaji, janiyari niqiuani. Janiyari saniniuujia miaquesano miaquejojuani, vino ratujuajuhuaaj. Cunora niaari cua sequequiaa: “Cunoori sacuaraatia miaquejoru, ratunu porocuanio, sesa miijiaa rupueja sacuaraatia, mariyata pa soosano cumaneeca masejonaa rupuenanio”. Naa nia sequesacari, niaari cua tojitiaaquiyaacuhuaaj. <sup>35</sup> Naajaa, pueya jaara canaa pohuatasano tojiijiaa quiri, jiyacari cutara nia naata niishiniu canaa niishitijosanoori seetanujuanaa Pueyasojiniji, cua tojiijiaa jatasacari maninia quijiacara.

#### *Jesu miaquesacari Fariseo Simón tiajinia*

<sup>36</sup> Tamonu Fariseo pueyanoori Jesu masuquiaari na tiajinia na miaquenura. Jesuuri na tiajinia quiaaree. Miaquenuujua shuriuquiumia roshishiiri. <sup>37</sup> Paanatuuri cuno tiacajinia quijia quiquiaari. Na niishishacari Jesuuri cuno Fariseo tiajinia tiuquirii miaquenura, nojuajaari cuno tiajinia quiaquiaarijuhuaaj. Shiitaniyoyua seesariquiaja pataconiyoyua cacatariquiaari, cohuaja saajiajiniji quejasano. Mishaja quiriquiaari shanohua jaanutajata. <sup>38</sup> Maajiiri Jesu cashacuucuma mojoquetasee. Nujuqueriquiaari. Na namijiaacaari Jesu niohuacaacua totejoriquiaa. Naa Jesu niohuaca piquiojoreeri. Na nuhuaji, na muecacata na sacuanijiarohuari. Na niohuaca nujuureeri. Na shanohua jaanutajata totaree Jesu niohuacaacuaari. <sup>39</sup> Cuno Fariseo pueyano niishishacari naa cuno maaji miishanotej, nojiajinia niishiriojoriquiaari: “Jesu jaara seetanujuanaa Pueyaso sequenu panishano caminiujiunia quiri, mariqui niishiri cante na coyani, taamueca maajitijianojoni”. <sup>40</sup> Jesuuri cuno Fariseo pueyano niishiriojosano niishiriquiaa. Cunora na sequereeri:

—Simónnaa. Quia sequenu paniyanijia.

Fariseo pueyanoori Jesu riuuaree:

—Cua sequere, Niishitiojonanaa.

<sup>41</sup> Jesuuri na sequerece:

—Caapiqui pueyanoori cumaneeca masequiaari rupaquijiaari tamonu cumaneeca niqitiojanijini. Niquriyatu pueyanoori queraatia cumaneeca masequiaari, juhua quinientu juuca poonijosanojiniji masesano. Tamonu pueyanoori masequiaari nareja juhua cincuenta juuca poonijosanojiniji masesano. <sup>42</sup> Na nuhuaji, nojori sequesano juuca jaara tari quiquiaari na camaru nojori niqutionuhuaara na cumaneeca, majaari nojori jitianu quiquiaari cumaneeca. Naaratej, cumaneeca niqutionaari nojori sequerece: “Naajaa, maja socua nia niishiriojonu nia niqutionuhuaara tarijia cua niqitiosano cumaneeca nijaniya”. Cumaneeca niqitiojonaari naa cuno caapiqui pueya jiyanoquiaari. Simónnaa, cua sequerece, <sup>43</sup> teyano cuno caapiqui pueyanojinijiniote socua cuno cumaneeca niqitiojona panijara quiniutianiyanii?

<sup>43</sup> Simónri Jesu riuucuaaree:

—Cunocujani, cante socua queraatia cumaneeca niquitiosaaquiaaricujani.

Jesuuri na sequereee:

—Taaquiririnij.

<sup>44</sup> Jiyacaritij, Jesuuri cuno maajiicua tacateree. Simón sequereeri:

—¿Quiaate nio maaji niquiya? Cua tiuquishacari quia tijajinia, majaari quenaaja quia niqutionu quirii mohuaca janiya, cua niohuaca cua jeequetajara. Nio maaji cutaraari cua niohuaca jeequereee na namijiaacata. Na sacuanijiarohua na muecacataari. <sup>45</sup> Majaari quenaaja quia nujuunu quirii janiya, quia saruhuatasacari janiya. Nio maaji cutaraari cua niohuaca nujuunequejoriquiaa pueyaracaanu, niya cua cajishacari. <sup>46</sup> Naajuhuaaj, majaari quia totanu quirii mesu nunacu cua nacaacua. Nio maaji cutaraari cua niohuacaacua totaree shanohua jaanutaja. <sup>47</sup> Naaratej cua tojiri. Nio maajiiri jiyanoohua sesa miijia quiriquiaa. Naaratej, jiyanoohua cua paniyari puetunu sesa na miishanojinijianaa cua jiyanooniucua nojuaja. Saniniuujia, cante secaja sesa na miishanojiniji jiyanooshaareni, naajuhuaaj, nojuajaari secaja panijia na jiyanoonia.

<sup>48</sup> Na nuhuaji, Jesuuri cuno maaji sequereee:

—Quiaacuajaari tari jiyanooshaaree sesa quia miishanojiniji.

<sup>49</sup> Narta masuusano pueya nata cajitiyanoori juhuacatecara tama sequetooreejaaja:

—¿Cantucuaa nio pueyanoni, sesa miijia jiyanooriqianoni?

<sup>50</sup> Jesuuri maaji sequereee saaja:

—Cucua quia tiuushacari, quiaacuajaari tari jiyanooshaaree. Juhujaniya quia quiaarohua.

## 8

### *Jesura pueraquena maajipohujiniji pahuatasano*

<sup>1</sup> Na nuhuaji, Jesuuri rucuaanejoquiaari queraatia tiacajinia, shiitianiyojua tiacajinia-juhuaaj. Nojuajaari tii Pueyaso rupaa pohuatariquiaa, taa Pueyaso jitianu paniya na muerasuni. Na doce saquiriojosano pueyari na cojiriquiaajaacuhuaaj. <sup>2</sup> Noojiaqueya maajipohuari na tarajariquiaajuhuaaj. Cuno maajipohuari tamaatia cusunujiniji Jesu naatanijiosano quiquiaari. Tii quiriquiaajaariuhuaa noo maajipohua, Jesu nojorijiniji tohuatanijioquiaari samarhuatej. Nojorijinijinioori quiquiaari María Magdalena. Jesuuri cuno Mariajiniji tohuatanijioquiaari siete samaruhua. <sup>3</sup> Quiriquiaajaariuhua Juana, Cuza niqiuocuani. Cuzaari jiyaniijia Herodes jütiasano casami cojuana quiquiaari. Susaanaari nojorijinijinio quiquiaarijuhuaaj. Socua queraatia maajipohuari quiriquiaa. Puetunu cuno maajipohujanaari Jesu naacutaquiaari tama nojori jütiasano casaatajaaja. Nojoriiri nera pueraquenuuna quiquiaarijuhuaaj, tiqiyocua nojori rucuaanejosacari Jesuta.

### *Jesu pahuatasano natoojona pueyanojiniji*

(Mt 13.1-9; Mr 4.1-9)

<sup>4</sup> Queraatia cuno jiya tiacajinijinio pueyari nijioquiaari nojori niquniuria Jesu. Jaara nocua rerequeejoquiaari queraatia pueya, Jesuuri nojori niishitiojoquiaari miriqui, nio pahuatasanota. Nojori sequereeri:

<sup>5</sup> —Tamonu pueyanoori na cuhuariquiaajinia quiaquiaari natoojonuucua. Na jacutasacari, secajaari totequiaari nucuaco. Tii rapijosaaquiaariiri. Shuhuari na miojoquiaari. <sup>6</sup> Tajaacaari toteree sai tajinia. Cuno jajau jaara moritiaquiaari, ritia sorereeri puera joojuashiqui na quishacari. <sup>7</sup> Tajaacaari toteree riyocuaca tajinia. Riyocuacaari socua ritia maashiquiaari. Na natananoori tarinitiuuara quirii. <sup>8</sup> Socua tajaacaari maninia jiyajinia toteree. Tii maashiquiaari maniniaari. Queraatia mueturee cutaraari. Noojiaqueya cuno nataujinijiiri cien jajau quiquiaari niquiriyatu jiyonajiniji.

Nio pahuatasano na puecasacari, Jesuuri na rupaa paaretaree. Naa sequereeri:

—¡Niaa jaara numaraca quiri, nia tojitiare cua pahuatasano!

### *Casaarate miriqui pahuatasano*

(Mt 13.10-17; Mr 4.10-12)

<sup>9</sup> Na nuhuaji, Jesu pueyari na nequesotaree casaa na miriqui pahuatasano niishitiojonu paniyani. <sup>10</sup> Jesuuri nojori riuucuaaree:

—Niaari saquiriojosaaquiaari nia niishiniuria taa Pueyaso poonijia pueya jiuujajiniani, na muerasura nojori quiniuria. Cunoori tariucuacaanu pueya niishishoo. Janiyari tamasaca pueya niqiara pohuataquiaa miriqui cutarani. Naacuajitij, nojoriiri cua pahuatasano niishiyaquiquiaa na tojtiasacari. Naajuhuaaj, cua cumaacata cua miishano cariyoshitioquiaari, nojori niqiara cua miishacari.

*Jesu niishitiojosacari na pueya, miriqui na pohuatasano natoonajiniji*  
(Mt 13.18-23; Mr 4.13-20)

<sup>11</sup> Nia niishitiojoreera miriqui cua pohuatasano natoonajiniji. Pueyano natoosano jajaari juhua Pueyaso rupaa. <sup>12</sup> Pueyano jaara Pueyaso rupaa tojiri najuhanaj, nojujaari juhua nucuaco toteno jajau. Sesaacaari nimiaa. Pueyaso rupaa na tojishano jaariutiariohua noojajinijiiri, maja nocua na tiuuniuria, nojuaja mariqui jiyanooshaareeri. <sup>13</sup> Sai tajinia toteno jajaari juhua noo pueya, canapuee Pueyaso rupaa tojiriini. Na nuhuaji, ru-paquijia Pueyasocua tiuquuaa shuquiriaatiari. Naa miijiaaari juhua puera shiitianiyojua nujuacaraca. Naacuajitij, nojori jaara saniniujiushaare, nojoriiri ritia Pueyasocuaari rupatequiaa. <sup>14</sup> Riyocuaca tajinia toteno jajaari juhua noo pueya, canapuee maninia tojirii Pueyaso rupaani. Na nuhuaji, nojoriiri puera tacaquiaa mijiria casaacua, casamiriaca nojori quiniuria, tama na cuaqueyajaaja nojori shuquiritiniuriajuhuaj. Naaratej, nojoriiri juhua muetuhuo natau quiya, tarinitiuuara riyocuaca tariyoshitishano. <sup>15</sup> Maninia jiyajinia toteno jajaari saniniujia juhua noo pueya, canapuee maninia tojitiareecuaa Pueyaso rupaani. Na racataa maninia noojajiniaari. Pueyaraaanu na tojitiaquiaari. Majaari na pishiniu Pueyasocuaari. Naacuajitij, nojoriiri juhua queraatia muetujua natau.

*Pueyaso muerasuuri juhua samaritiu cuhuataja*  
(Mr 4.21-25)

<sup>16</sup> Majaari pueya noshitiniu quiquiaa samaritiu, na jamotasocoriquiano conatu cariquiaco, maquetu cariquiaconio. Samaritiu jaara noshitishaare, morijiuucua morotashiyari na cuhuatanura, pueya tiuquitasacari tiajiniaaco. Naajuhua, Pueyaso Rupaari pueya jiuujia cuhuataja. Cunora, Pueyaso Rupaa cuaara maatia pohuatasaria puetunu pueya niqiarajanaa. <sup>17</sup> Puetunu jamojosano casaajanaari riuriatasaanutaniya. Puetunu jiyasohuaa nia miijiosanojuanaari niishishaanutaniyajuhua. Cuhuatasaanutaniyari maninia niqishocoriquiano. <sup>18</sup> Cunora, cua sequesano tojitiajaca nia quiri maninia. Cante maninia jitiaa cua rupaani, nojujaari socua na niishijara jiyatesaanutaniya. Saniniujia, cante cua rupaa tojiyashijani, secaja najuhua na niishishanoori jaariutiasaanutaniya, puetunu shaaquiriajanaa.

*Jesu tapueyocuaca tiuquijiosacari Jesuucua nojori nucuata*  
(Mt 12.46-50; Mr 3.31-35)

<sup>19</sup> Jiyacarij, Jesu nucuata Jesu tapueyocuacata tiuquijioquiaari Jesu quishaqui. Majaari nojori naata tiuquitanu quiriquiaa Jesuucua. Jiyanohua queraatia pueyari nocuara ritiriquiaa saaja tia tohuateyaji. <sup>20</sup> Tamonuuri Jesu numooteree:

—Quia nucuata quia tarajanuhuaa jati carijiniacuma quiya. Quia niqitiuniu paniaquinia.

<sup>21</sup> Jesuuri tii quinia niqiaara sequeree saaja:

—Canapuee seetanujanaa Pueyaso Rupaa tojitiajani, nojoriiri cua nucuata cutara, cua tarajanuhua.

*Jesu pueyajetesacari paratu, mohuacanio*  
(Mt 8.23-27; Mr 4.35-41)

<sup>22</sup> Tamonu juuca, Jesuuri botejiniacatacaciaari na saquiriojosano pueyata. Nojori sequereeri:

—Pa niuutiaare caminia taquijiria.

Naaratej, nojoriiri niuutiariquiaa. <sup>23</sup> Nojori niuutiasacari, Jesuuri maqueriquiaa. Canashiyajitij paratuuri juhuaacatecara piyarojonu coteeree jiyanohua. Mohuaca queyacuquiquiaa bote jiniacumaraari. Boteeri quera tiuquitiariquiaa tari. <sup>24</sup> Jiyacarij, na pueyari Jesu niucuaajasee ritia. Na sequetuseeri:

—iNiishitiojonanaa! iNiishitiojonanaa! iPaa tari tiuquitiaani!

Jesuuri sanemaa. Paratu sequereeri, mohuacanio:

—iTariucuaaja! iNia suraajere!

Paratu, mohuacaari ritia suraajee. Paratu piyarojonuuri tajimiaa, caminia queyacuacuanonio. <sup>25</sup> Jesuuri na pueya sequerohua:

—Niaacuaa juucua Pueyasocua tiuujiaa. ¿Casaa nia tojetareerini?

Nojoriiri Jesuucuaari jiuujiatecoree. Shiriiquitiariquiaaari Jesu miishano nojori niqishacari. Tama nojoriiaari nequesoreetooriquiaa:

—¿Cantucuaanojoni? iPaa, mohuacaari na tojirii na sequesacari!

*Gerasa jiyajinijinio samaruhuaraca pueyanonijini pohuatasano*  
(Mt 8.28-34; Mr 5.1-20)

<sup>26</sup> Na nuhuaji, nojoriiri shiitiseequiaari Gerasa jiyajinia, Galilea jiya taquijiria. <sup>27</sup> Jesu jaara rosequiaari botejini, jiyacarij, samaruhuaraca pueyanoori nocua niqiaari, cuno

jiya tiacajinijinio pueyano. Cuno pueyanoori pueyaracaanu samaruhuaraca quiquiaari. Majaari toque na cushiniu quiija. Naajuhuaaj, majaari tiajinia na quiniu quiija. Saaja raacajinia quiijaari, macunucua nucuhua paaquiosaqui. <sup>28</sup> Na niquishacari Jesu, na cariquimijaji mojoquetaseeri: Jesuucua nacareeri:

—¿Casaara quia niyaree miji canaa quia cushitionurani Jesunaa? ¡Quia niishiyanjia! ¡Quiaacuaajaari Jiyanjiajanaa Pueyaso Niyanu! ¡Cua tarinitiare quenaaja! ¡Maja naquiya cua miiniu!

<sup>29</sup> Samaruhuaraca pueyanoori na sequeriquiaa Jesutej, Jesu sequesacari tari nojuaja, cuara tohuataara cuno pueyanojiniji. Samaruuri sequerucua cuno pueyano miitiqiaari sesa. Narta pueyari juucua na cashacucua, na numatucua morojoquiaari cumayocua jiyocua shipinishanota, na cojuasaanura maninia. Samaruhuaraca pueyanoori saaja na turojotaquiaari. Samaruuri na mashiquijia tiqiyocua, pueya quiaquishaqui na quiniuria. <sup>30</sup> Jiyacaritij, Jesuuri na nequesotaree:

—¿Taateja quia sesani?

Samaruuri na riucuaere:

—Cua sesa “Queraatia”.

Naa Jesu sequequiaariiri jiyanoehua queraatia samaruhua na jiiiasacari. <sup>31</sup> Samaruhuari jiyanoehua secojoree Jesu, maja nojori na jiyaronura puequeetuaju raama saniitiosocoriguano. <sup>32</sup> Jiyacaritij, queraatia cushiyari miaquenuiriquiaa cateca naataja, tuhuananujinia quiniqui. Samaruhuari cunora Jesu secojoree nojori na tiuquitianiniuria cushiyajinia. Jesuuri nojori tarinitiaree. <sup>33</sup> Cunora, samaruhuari pueyanojiniji tohuareetaquee. Cushiyajinia tiuquitiaseeri. Puetunu cushiyajanaari cocuateree. Tacobiniji totesee caminiajiniaari. Tii shushiniuuriiri.

<sup>34</sup> Cushiya cojuanaa jaara niquiquiaari naa miishanotej, nojoriiri netecuatuquiaari na shiriquiniutia, Jesu miishano nojori pohuatanura tiacajinia, cuhuariquiacajiniajuhuaaj, tee pueya quiriquiaacujani. <sup>35</sup> Puetunu pueyajanaari Jesuucua nijioquiaari na tiacajiniji, pueya pohuatanuusanoiniji nojori niquiniuria. Nojori tiuquijiosacari Jesuucua, nojoriiri cuno pueyano niquishii, canajiniji samaruhua tohuareetareecuajani. Nojuajaari Jesu shuriucua cajiriquiaa toqueraca, panaatia na quishacariuhua. Naa pueya niquishacari nojuajatej, pueretuquiaariiri. <sup>36</sup> Jiyacaritij, Jesu miishano niquitiuniaari shusha nijiono pueya pohuataree taa samaruhuaraca pueyano naatanishaarohuani. <sup>37</sup> Cunora, puetunu Gerasa jiyajinijinio pueyajanaari jiyanoehua puereturiquiaa. Naaratej, ¡Jesu secojotureeri na quianura nojori jiyajiniji! Naaratej, Jesuuri botejinia tacataquiaariuhua na pueyata na quianuhua. <sup>38</sup> Cuno pueyano, canajiniji samaruhua tohuareetareecuajani, nojuajaari Jesu secojoree juucua nata na quianura. Jesuuri saaja naa na sequeree:

<sup>39</sup> —Quia tiajinia quia quiaarohua. Quia pueya niquiara quia pohuatasuhua taa Pueyaso miirii maninia quiajaniani.

Pueyanoori quiaarohua. Puetunu na tiacajinijanaa pohuatasuhuari taa Jesu miirucua maninia nojuajani.

*Jesu naatanishacari Jairo niyatu, Jesu toque quiana maajinio*  
(Mt 9.18-26; Mr 5.21-43)

<sup>40</sup> Jesu jaara niuutiaquiaariuhua caminia taquijiria na pueyata, pueyari na timitiarohua na tiuquishacariuhua. Puetunu nojorijianaari na sashiriquiaa. <sup>41</sup> Jiyacaritij, tamonu pueyanoori Jesuucua tiuquishii. Na sesaari quiija Jairo. Nojuajaari Pueyaso secojoua tia jiyanjia quiquiaari cuno tiacajinia. Jesu cariquimijaji mojoquetaseeri na secojonura na tiajinia Jesu quianura. <sup>42</sup> Neyatuniyojuuari quera cusoriquiaa jiyacari. Majaari socua niquiohuaraca na quiniu quiija. Doce marijiaari tari shocojoquiaari cuno neyatu.

Jesu quiasacari Jairota, jiyanoehua queraatia pueyari nata quiojoriquiaajuhuaaj. Pueyari jiyanoehua na tanuujiriquiaa, nata nojori quiojosacari nucuaaco.

<sup>43</sup> Tamonu maaji cusosuuri cuno pueya tajinia quiriquiaajuhuaaj. Doce marijiaari tari na shocojoquiaari pueyaracaanu na naatesacari. Cuno maajiri puetunu na cumaneeca puecaquiaarijanaa najuhuanaj, na naarajosaanura juucua. Naarajonaari maja na naata na naataniniu quiquiaari. <sup>44</sup> Maaji cusosuuri Jesu nijiniji catecanoquiaari nocua. Na tucuaque toque casaca quiasee jiyasohuari. ¡Na nanacaari ritia curetaquee!

<sup>45</sup> Jiyacaritij, Jesuuri pueya nequesotaree:

—¿Cante cua quiareeni?

Puetunu na shocuaqueya pueyajanaari sequeree:

—Maja canaa quianu quirii quiajaniani.

Pedroori Jesu sequeree:

—Niishitiojonanaa, ¿majateeri quia niquiniucuaaja? Queraatia pueyacuajaari quia tanuujia.

<sup>46</sup> Jesuuri saaja sequereeri:

—Maja. Cusosu cua quiareeni. Niishiyanjia cua cumaacaari tari na naatanirii.

<sup>47</sup> Maaji niishishacari na miishano jiyasohuaja tari niishishaaree, Jesuucua nimiaari. Na puerenuta tetecariquiaari. Jesu cariquimiaji mojoquetaseeri. Puetunu pueya niquiara-janaa pohuataareeri casaara Jesu na quiareeni. Pohuataareejaariuhuaq taa na naataqueeriritiani, Jesu na quiasacari. <sup>48</sup> Jesuuri na sequereeri:

—Sanaunaa, cucua quia tiuuniuucua, quiaari naatarohua. Quioojia quia cajitiriohua. Juhuajaniya quia quiaarohua.

<sup>49</sup> Jesu pocoojosacarijia cuno maajitia, tamonu pueyanoori tiuquiquiaari Jairo tiajiniji. Jairo sequeseeri:

—¡Quia niyatu tari cusoquee! Maja najuhuana riniu paniniu Niishitiojona quia tiajiniaari.

<sup>50</sup> Jesu tojishacari cuno pueyano sequesano, Jairo sequereeri:

—Maja puerenu. Cucua quia tiuuri saaja. Quia niyatucuaa naatananiuhua.

<sup>51</sup> Jesu tiuquishacari Jairo tiajinia, nojuajaari maja na shanacuno quirii quenaaja tamonu pueyano tiuquiniuria macuucua. Saaja nata tiuquitiamaa cutaraari Pedro, Santiago, Juan, maaji samiriu que, na nucuanio. <sup>52</sup> Puetunu tii quiniaa pueyajanaari maaji samiriucua nujuqueturiquiaa. Sapiyonuuriquiaaariuhuaq. Jesuuri nojori sequereeri:

—Maja najuhuana nia nujuquenu. Maaji samiriu maja macu, nareja maqueyano.

<sup>53</sup> Naa Jesu sequesacarijij, pueyari na saroojotaree saaja. Nojoricuajaari niishiriquiaa maaji samiriucua seetanujuanaa macu quiriquiaa. <sup>54</sup> Jiyacarijij, Jesuuri macuucua tiuquiquii. Na juashiquiajiniji na quiaseeri. Jiyanohua na sequereeri:

—Maaji samiriunaa, ¡quia sanere!

<sup>55</sup> Na sohanuuri nocua tacatemohua jiyacari. Samiitiamohuari. Ritia sanequeeri. Jesuuri na nucua sequereeri na mianuutenura. <sup>56</sup> Na queyari jiyanohua jiuujatereeri. Jesuuri nojori sequereeri, maja nojori pohuatanura tamasa niquiara na miishano.

## 9

*Jesu jiyaramiquishacari na doce pueya Pueyaso rupaa nojori pohuatanura*  
(Mt 10.5-15; Mr 6.7-13)

<sup>1</sup> Jesuuri na doce saquiriojosano pueya rerejotequiaari na jiyaramiquishocoriquiano. Nojori niqutioree cumaacaari, puetunu tamaatia sesa samaruhanajanaa nojori tohuatejonura, cusosuhua nojori naatanijionurajuhuaq. <sup>2</sup> Nojori jiyaramiquiriiri Pueyaso rupaa nojori pohuatanura pueya niquiara, pueya niishiniuria taa Pueyaso jiyanooni pania nojorini, na muerasu nojori quiniuria. Nojori jiyaramiquiriijaariuhua cusosuhua nojori naatanijionura. <sup>3</sup> Jesuuri nojori sequereeri:

—Maja nia panu nia rucuanajotajara nia panishano. Majaari nia miojotu nia panu, nia caashoque, nia coseyaca, nia cumaneecanio. Saa nia cushishano toquetaja nia quiaare cutara. Maja socua toque nia panu nia cushishocoriquiano. <sup>4</sup> Naa jaara tamonu tiajinia tiuquishiquia, niocua cuniqui jiyojetaseequiaja, niaa jaara cuno tiacajiniji quiaarejaatijia. <sup>5</sup> Naa jaara tamonu tiacajinia tojinu paniaquishaare, cuno tiacajiniji nia quiaare. Naa nuhuajiria, cuno pueya niquiara niocua nia niouacajiniji cuno tiaca jaaquia nuutare. Naacuajitij, cuno pueyari niishiniutianiya, Pueyasoori nojori jiyanoaquiniutianiya, nojori tojitianu paniaquiniucua Pueyaso rupaa pohuatanura.

<sup>6</sup> Na nuhuaji, Jesu pueyari quiojoquee puetunu cuno jiyajinia shiitianiyojua tiacajinia-janaa, Pueyaso rupaa nojori pohuatanura tii. Nojoriiri Pueyaso rupaa pohuatanuquiaari pueya jiyanooshaanura, Pueyaso pueya nojori quiniuria. Naajuhuaq, cusosuhua naatani-jiotuquiaariiri.

*Jiyaniijia Herodes niishiniu panishacari cante Jesuni*  
(Mt 14.1-12; Mr 6.14-29)

<sup>7</sup> Jiyaniijia Herodesri pohuatasaaquiaari puetunu Jesu miishanojinijijanaa. Herodesri saaja jiyajenequiaari cante Jesuni. Jiyacarijij, noojiaqueya pueyari sequeriquiaa: “Jesu-cuajaari jiyaniijia Herodes nacatanishano Tiuquinijona Juan samiitianohua”. <sup>8</sup> Tamasaca pueyari Jesujiniji sequeriquiaajuhuaq: “Supuetana Elíascuaja tari tiuquiriohua”. Nojuacuajaari tariucuaaanu Pueyaso sequenu panishano caminiujunua quijia. Saniniujia, tamasa pueyari sequeriquiaajuhuaq: “Jesucuaajaari tamonu tariucuaaanu Pueyaso sequenu panishano caminiujunua samiitianohua”. <sup>9</sup> Herodesri saniniujia sequereeri:

—Janiyacuaajaari cua pueyano jiyarocanu Tiuquinijona Juan na nacatanurani. ¿Cantejaara cuno Jesuni? Janiyari queraatia nocuaji tojinuuyani.

Cunora, Herodesri jiyanohua Jesu niqiniu paniriquiaa juucua.

*Jesu mianuutesacari cinco mil pueya*  
(Mt 14.13-21; Mr 6.30-44; Jn 6.1-14)

<sup>10</sup> Jesu jiyaramiquishano pueya tacatesacariuhua, nojoriiri Jesu pohuataquiaari puetunu nojori miishanojuanaa. Na nuhuaji, Jesuuri nojori jiyataaree tamaquiria, Betsaida tiaca shuriucua, tii tamajaaja nojoritia na quiniuria. <sup>11</sup> Pueya niishishacari tee Jesu quiriquiaani, nojoriiri saaja nocua quiojoquiaari. Naajaa, Jesuuri maninia nojori maseree saaja. Cuno pueya pohuatareeri taa Pueyaso quiniu paniya nojori jiyaniijiarani. Jesuuri nojori cusosuhua naatanijiorejjuhuaj.

<sup>12</sup> Tenacariishacari, Jesu doce pueyari nocua catecanoquiaari. Na sequetureeri:

–Pueya quia jiyaramiquiri cateca tiacajinia, nojori cuaara cuniqui pajenuura na maquenuusocoriquiano, na maquetujarajuhuj. Nojori panishanoori shaaqui niya pa quishaquini.

<sup>13</sup> Jesuuri nojori sequeree saaja:

–Niaa mariqui nojori mianuutere saniya.

Nojoriiri Jesu sequeturee:

–¿Canaateeri miaquesanoracajaarani? Canaa saaja cinco panniojuaa jiiitiaani, caapiquiriyatu sapitiaajanio. ¿Canaateeri secaja pa cumaneecata masenutaniya queraatia miaquesano puetunu nio pueyarajanaani?

<sup>14</sup> Cuniqui nojoritia quiriquiaa naasucuaari cinco mil pueya. Jesuuri na pueya sequeree: –Pueya nia raquiriojotare maninia. Cuaara cajitiuria cincuenta jatiqúi, socua cincuenta tamaqui. Mianuutesocoriquiano puetunu pueyajanaa, cuaara naa cajitiuuriatej.

<sup>15</sup> Nojoriiri Jesu sequesano miirii. Puetunu pueyajanaari cajitiurii. <sup>16</sup> Na nuhuaji, Jesuuri cuno cinco pan pataree, caapiqui sapitiaajanio. Jiyocuaaanu maureeri na Que Pueyaso na secojonura miaquesanoocuaa. Na nuhuaji na neecasereeri. Na pueya na niqutioreeri puetunu pueyajanaa nojori serotasocoriquiano. <sup>17</sup> Puetunu pueyajanaari na miaquenuuree. Maninia tooquioreeri. Na nuhuaji, doce canaasatuuri mishinijiosaaquiaari pan raacuata, sapitiaaja raquiquiatanio.

*Pedro sequesacari Jesuuri seetanujuanaa Cristo*

*(Mt 16.13-19; Mr 8.27-29)*

<sup>18</sup> Tamacari, Jesuuri Pueyaso secojoriquiaa tamajaaja. Na saquiriojosano pueyari naa quiriquiaa. Jiyacaritij, Jesuuri nojori nequesotaree:

–¿Taa pueya sequequiaa janiyani, cantena janiyani?

<sup>19</sup> Nojoriiri na riucuaaree:

–Noojiaqueya pueyari quia sequequiaa, quiaana nacatasano samiitianohua Tiuquini-jiona Juan. Tamasacaari quia sequequiaajuhuj, quiaana Elías, tariucuaaanu Pueyaso sequenu panishano caminiujuunia. Tamasacaari saniniuujia quia sequequiaa, quiaa naasucuaana tamonu tariucuaaanu Pueyaso sequenu panishano caminiujuunia samiitianohua.

<sup>20</sup> Jesuuri saniniuujia nojori nequesotaree:

–¿Niajaniyariuhuj? ¿Taa nia sequeyani, cante janiyani?

Pedroori na sequeree:

–Quiajaniyacuajaari Cristo, Pueyaso Jiyarosano.

<sup>21</sup> Jesuuri jiyanoohua nojori rootaree maja nojori pohuatanura tamasaca niquiara cante nojuajani.

*Jesu numootesacari na pueya, nojuaja mosaanutaniya*

*(Mt 16.20-28; Mr 8.30-9.1)*

<sup>22</sup> Jesuuri naa nojori sequerohuacuahuaj:

–Janiyari jiyanoohua naquiya miishaanutaniyani. Pa Judiocuaca camarucuaari cua niqiniu paniyaquiniutianiya, na tojitianu paniyaquishacari janiya. Naajuhuj, pa pueyacuara secojonaa jiyaniijianucuaari cua niqiniu paniyaquiniutianiya, Moisés Rootasanojiniji niishitiojanaanio. Nojoriiri cua monutaniya. Naajaa, jiuujianaraca juucajania, janiyari samiitianutaniuhuanu.

<sup>23</sup> Na nuhuaji, Jesuuri puetunu pueyajanaa sequeree:

–Cante cua nuhuajiniu paniyani, cua pueyano na quiniuria, nojuaja cuaara niyajetaara tama na miiniu panishanojuaja. Cuaara panitiaara tama na cuaqueyajaaja puetunu juucajanaa, cua tojjia na quiniuria seetanujuanaa. <sup>24</sup> Saniniuujia, cante tama na cuaqueyajaaja shuquiritiniuria niishiriojoquiaani, nojuajaari jiyanoohua taraatia quiniutianiya na nuhuaji. Saniniuujia, cante tama na cuaqueyajaaja panitiaquiaa cua panishano na miiniuriani, nojuaja cutaraari Pueyaso pueyanora jiyatesaanutaniya, pueyaracaanu shuquiriaatia na quiniuria. <sup>25</sup> Pueyano jaara puetunu nio jiya casamijianaa jiiitiana quiri, cuno maara najuhuaa quiri, nojuaja jaara na shaajesacari jatasaare mani quiquiojinia Pueyasooju. <sup>26</sup> Cante cua seera caririqúiaa mijiria quiniaa pueya niquiara sequenurani, janiyari nojori jiyaniijiani, naajuhuj janiyari nojori seera caririqúiniutianiyani cua

tiuquishacariuhua Jiyaniijia cua quiniuria. Janiyari shanohua niquishano quiniutianiya cua tiuquishacariuhua cua Que shacantuuca cumaacatani, na seya cumaacatajuhuaj. Naa-juhuaj, cante cua rupaa pohuatenu caririquiya sesa miijiaa pueya niquiarani, janiyari nojori seera caririquiniutianiyajuahuaj. <sup>27</sup> Seetanujuanaa nia sequeyanijia, noojiaqueya niajanijiniinooori maja nia cusonuunu quiniutianiya juhuanajuaja, niaa cuuara niquir-ijiaatijia Pueyaso cumaaca tiuquiyano cucua, na muerasu jitiariquianoni.

*Jesu jatasacari shacantuucara*

*(Mt 17.1-8; Mr 9.2-8)*

<sup>28</sup> Naa Jesu sequenu nuhuajitij, ocho juuca nuhuaji, nojuajaari tuhuananuucua tacaquiaari na Que Pueyaso na secejonura. Nata quiaareeri Pedro, Santiago, Juannio. <sup>29</sup> Jesu secejosacari Pueyaso, na jiquiocoori tamaatiara jataquiaari. Na toqueeri jiyanoehua cohuajara jataquiaarijuhuaj, shacantuquera. <sup>30</sup> Jiyacaritij, caapiqui pueyari nocua muetaquiaari. Jesuta pocoajoriquiaari. Nojoriiri quiriquiaa supuetana Moisés, supuetana Elíasnio. <sup>31</sup> Nojori njuuatusaquiiri shacantuuca quiriquiaa puetunu nojori shocujanaa. Nojoriiri pocoajoriquiaa taa Jesu mosaanutaniya Jerusalén tiacajiniani. <sup>32</sup> Jiyacaritij, Pedroori jyanohua maquenuujiriquiaa, nata quiniaajuahuaj. Naajaa, majaari nojori maquenu quiriquiaa. Naacuajitij, nojoriiri Jesu shacantuuca niquiquiaari. Cuno caapiqui supuetanaa niqutiiriijaarijuhuaj, Jesuta pocoojiyano. <sup>33</sup> Cuno caapiqui pueya quiojonu panishacariuhua Jesu shuriucujaji, Pedroori Jesu sequeree najuhanaj:

—¡Niishitiojananaa, canaa namitia niya quiyani! ¡Canaa suhuororeera jiuujianaraca suhuorotucua; quiara, Moisésra, Elíasranio!

Pedroori naa najuhuaa pocuariquiaa. Majaari na niishiniu quiquiaari casaa na sequeriquiaani. <sup>34</sup> Pedro pocaasacarijia, cohuaja najacaari nojori mishiQUIOMAA. Nojoriiri puereturiquiaa cohuaja najacajinia nojori quishacari. <sup>35</sup> Na nuhuaji, nojoriiri Pueyaso tojirii pocuaano cuno cohuaja najacajiniji. Naa sequereeri:

—¡Niiori cua Niyanu, cua saquiriojosano nia Jiyaniijia na quiniuria! ¡Nojuaja nia tojitiare!

<sup>36</sup> Naa nojori tojinu nuhuaji cuno rupaatej, nojoriiri Jesu niquiriohua. Tari tamajaaja nujuariquiaari. Nojoriiri sanaa na niqutiariquiaa. Na nuhuaji, majaari quenaaja tamonu nojori pohuatenu quiquiaari nojori niquishano, Jesu jaara samiitiaquiaarijuajaatijiaj.

*Caya samijajiniji Jesu tohuatesacari samaru*

*(Mt 17.14-21; Mr 9.14-29)*

<sup>37</sup> Tariqui, nojori jaara rosetaquiaariuhua tuhuananujiniji, queraatia pueyari Jesuucua nijioquiaari. <sup>38</sup> Cuno pueya tajiniji, tamonu pueyanooori naa nacaquiaari:

—¡Niishitiojananaa, cucua quia taraajere quenaaja! ¡Cua niyanuniyojua quia niquiri! ¡Jiyaniujojanaari quiyaniuniyojua! <sup>39</sup> ¡Samaruuri na miiquiaa taraatia! ¡Na sariyotequiaari! ¡Na taquiriocatequiaaarijuhuaj! ¡Na rupaamajiiri cushaaquiaa! ¡Na cuaqueya miiquiaa moqutiuriariaari! Majaari ritia na cartenu paniniu quiquiaa. <sup>40</sup> Janiyari juucua quia pueya sequereeni, cuno samaru nojori tohuatenura. Majaari nojori naata quiriquiaa na tohuatenura.

<sup>41</sup> Jesuuri sequeree:

—Pueyaso tojitiaashijiacanaa, niaaqui Pueyasoocua tiyashijiacajuhanajaj. ¿Janiyateeri pueyaracaanu rejeretanutaniya niajaniani? Miji quia niyanu quia jaatucure.

<sup>42</sup> Caya samijia catecanosacari Jesuucua, samaruuri na pojotequee. Na taquiriocateereeri. Jesuuri samaru sequeree na tohuatenura. Caya samijia naataniriiri. Na niqutiariohua na queeri. <sup>43</sup> Puetunu pueyajanaari jyanohua jiuujiateere nojori niquishacari Jesu miishano Pueyaso cumaacata.

*Jesu pacutesacari pohuatenu nojuaja mosaanutaniya*

*(Mt 17.22-23; Mr 9.30-32)*

Pueya jiuujiatesacarijia puetunu Jesu miishanojinijianaa, Jesuuri na pueya sequeree:

<sup>44</sup> —Maninia nia tojiri casaa cua sequenutaniya niajaniani. Majaari na niyajetanu. Janiyari niqutiosaanutaniyani pueya miiniuria janiya taa nojori paniyacuajani.

<sup>45</sup> Majaari na pueya niishiniu quiriquiaa Jesu sequesano. Juhua miriqui sequesanoori quiriquiaa nojoriira. Naacuajitij, majaari nojori naata niishiniu quiquiaari. Nojoriiri Jesu nequesotanu puereturiquiaajuahuaj, casaa nojori na pohuatasano sequenu paniriquiaani.

*Cante jiyaniijajanaa cutarani*

*(Mt 18.1-5; Mr 9.33-37)*

<sup>46</sup> Jesu pueyari juhuacatecara juayonuutariquiaa teyano nojorijinijinote jiyaniijajanaa quiniutianiyanani. <sup>47</sup> Jesuuri nojori niishiriojosano niishirii. Naaratej, Jesuuri naatujua nujuateree na shuriucua. <sup>48</sup> Na pueya sequereeri:



—Cante nio mueya rupueya na cumaquiniuria cucua tiuujia cuno mueya quiniucuanu, nojuajaari cua rupueyajuhua. Cante cua rupueyani, cua Jiyarona rupueyajaariuhua. Naacuajitij, cante tama na cuaqueyajaaja jiyateya pueya shocoteyashijia na quiniuria juhua naatujuani, nojuajaari jiyaniijijanaa quiniutianiya puetunu narta Pueyaso muera-sujinijiniojuanaa.

*Cante maja pa paracani, nojuajaari pa jiyano*  
(Mr 9.38-40)

<sup>49</sup> Juanri Jesu sequeree:

—Niishitiojonanaa, canaari pueyano niquiriucuaani samaruhua tohuatanijiyano quia cumaacata. Canaari na tenujurucuaani nojuaja quiaquiniucua pajaniyajinijinio.

<sup>50</sup> Jesuuri na riucaaree:

—¿Casaara nia tenujurucuaarinioj?      ¿Niaateeri niishiyaquiya, cante pa paraca quiaquiyani, nojuajaari pa jiyano?

*Jesu nacasusacari Santiago, Juannio*

<sup>51</sup> Quera Jesu tacanu panishacari jiyocuaaanu, nojuajaari juhuacatecara Jerusalén tiacajinara quiaaree, juhua jiuujiaaju na puereyaquiniutia. <sup>52</sup> Jerusalén tiacaacuara nuu cajiniocua Samaria jiyajinia Jesu quishacari na pueyata, noojiaqueya na pueyajinijinio puerateree tamonu tiacajinia nojori masenura tia nojoriicuaajiiri. Naacuajitij, na pueyari Samaria jiyajinia quijia shiitianiyojua tiacajinia quiojoquiaari tii Jesu maquejara nojori pajenura. <sup>53</sup> Cuno Samaria pueya jaara niishiquiaari Jesuuri Jerusalén tiacajinara quiariquiaa, majaari nojori paniniu quirii Jesu maquenura nojori tiacajinia. <sup>54</sup> Santiago, Juan niishishacari cuno Samaria pueyari nojori sooriquiaa, nojoriiri cunora Jesu nequesotaree:

—Jiyaniijianaa, ¿quiaate paniya canaa tininiuria mani jiyocuaaanuji, cuno pojori na catijianura, taa tariucuaaanu Pueyaso sequenu panishano caminiujunua Elías miiquiaaricuaani?

<sup>55</sup> Jesuuri nojoriicua tacateree. Nojori nacasureeri naa nojori saniitonu panishacari cuno Samaria pueya. Naa nojori sequereeri:

—Majaari nia niishiniu cana sohuanute naa nia niishiriojoteyani. Nia niishiri, majaari cua ninu quiquiaari mijiria cua puecoonura pueya. Saaja niquiaari cutaranijia, pueyacuaji cua tacunura.

<sup>56</sup> Na nuhuaji, nojoriiri tamonu shiitianiyojua tiacajinia quiojiyaree tii maquenura.

*Tamasaca pueya quiniu panishacari Jesu pueyara juucua*  
(Mt 8.19-22)

<sup>57</sup> Nojori quiojosacari nucuaco, tamonu pueyanoori Jesu sequequiaari:

—Jiyaniijianaa, quia pueyanora quiniu paniyanijia. Janiyacua quia tarajareni puetunu tiquiyocua quia rucuanajosacarijianaa.

<sup>58</sup> Jesuuri na riucaaree:

—Quioojuapueeri na raaca jiiitia cutara. Shuhuari na jesuhua jiiitiaajuhua. ¿Saniniuujia Pueyaso Niyanuurijataj? Majaari cua jiiitanu tama cua maquejarajaaja.

<sup>59</sup> Jesuuri tamonu pueyano sequeree:

—Cua nuhuajiniara quia quiri.

Nojuajaari saa sequereaja:

—Cuaara Jiyaniijianaa. Cua que cuaara cua niquiara shaajeerajaara. Janiya jaara na jamoreni, janiyacua na nuhuaji quiata rucuanejore cutarani.

<sup>60</sup> Jesuuri na riucaaree:

—Naajaa, quia tarinitiare. Cua tojtiaashijiacaari juhua macunucua. Naaratej, cuno macunucua cuaara jamoora tama narta macujuaaja. Quia rucuanejore cutara Pueyaso rupaa quia pohuatanura.

<sup>61</sup> Na nuhuaji, tamonu pueyanoori Jesu sequeree:

—Jiyaniijianaa, janiya cutara quhuata quianu paniyani. Coteenu cua tiajinia quiquiooraj, cua pueya cua niquiniuria cua nuhuajiria.

<sup>62</sup> Jesuuri miriqui na riucaaree:

—Pueyano jaara na juyaca poonitijiya, jiya jiacataja na jayotanura na cuhuariquia na jeenucuanura, maja cumaati na nijiniara na niquiniu. Na camaru jaara na nijiniara niquiri, sesa naaniutianiyari shuyorocotiyocuara. Naajuhua, cua pueyano jaara na quiquiojinia tacatenu panijohua quiri, nojuajaari maja maninia Pueyasora poonijiona.

## 10

*Jesu jiyaramiquishacari setenta y dos na pueyajinijinio, Pueyaso rupaa nojori pohuata-nura*

<sup>1</sup> Nio nuhuaji, Jesuuri socua setenta y dos pueya saquiriojoquiaari, nojori puetanura nojuaja, puetunu Israel pueya tiacajiniajanaa Pueyaso rupaa nojori pohuatanura. Jesu- uri nojori nuhuaji tii quianu paniriquiaajuhuj. Puetunu nojerijianaa jiyaramiquiriiri caapiqui, caapiqui. <sup>2</sup> Nojori nuhuajiria, Jesuuri nojori rootaree nio miriqui sequesano:

—Queraatia Pueyaso muerasuranoori quiya, juhua senoosocoriquiano. Saniniuujia, secaja na senonaari quiya. Cunora, cuhuariquia camaru nia secojore, socua senonaa na jiyaramiquiniuria puetunujuanaa na senoosaanura. <sup>3</sup> Nia quiojiyare pueyanaa. Nia niishiri, janiyari nia jiyaramiquiya juhua borrego niquiohuani puereeta sareya tajinia. Pueyaso paraari juhua puereeta sareya. <sup>4</sup> Nia quiojosacari, majaari nia caashoque nia patanu, nia cumaneeca quiquiojuhuj, nia sapatunio. Majaari nucuaco nia tarishiniu pueya nia saruhatasacari. <sup>5</sup> Tamonu tiajinia nia tiuquishacari, coteenu nia saruhatare na camaru nio sequesano: “Juhujaniya nia quiri, nio tiajinia quiniaanaa”. <sup>6</sup> Cuno tia- jinia quiniaa pueya jaara jiyanojia quiri, naa nia sequesacari, Pueyasoori nojori mi- iniutianiya maninia. Nojori jaara juajia quiri saniniuujia, Pueyasoori nojori shuquir- itiyaquiniutianiya. <sup>7</sup> Tee nia masesaareni, cuno tiajinia nia jyojere. Nia miaquere, nia rature nojori niqutiosano nijaniya. Nia pohuatanuucua Pueyaso rupaa nojori niquiara, nijaniya cuara niqutiosaria nia panishano. Majaari tamasa tiajinia nia pacunujunu tii nia miaquenura. <sup>8</sup> Nia tiuquijiosacari tamonu tiacajinia, pueyano jaara nia masuure na tiajinia nia quiniuria, niocua niaara nojori rupojosano miaquere. Majaari na soonu. <sup>9</sup> Cusosuhua nia naatanijore cuno tiacajinia. Pueya niquiara nia sequere: “Pueyasoori quiarjia nia jyatenu paniya na muerasu nia quiniuria”. <sup>10</sup> Nia tiuquishacari tamonu tiacajinia, pueya jaara tii nia tojiniu paniyaquiri, niocua cuno tiaca nuucujinia naa nacare pueya niquiara: <sup>11</sup> “Nia tiacajinijinio jaquiani, canaari canaa nioluacaacuaji na majiriutiaani. Cunoori nia niishiniuria, Pueyaso jaara nia saniitiore, majaari canaacua na tiutiasaanu quiniutianiya. Pueyasocujaari nia jiyanooniu paniriquiaa juucua, na muerasu nia quiniuria”. <sup>12</sup> Seetanujuanaa nia sequeyanijia pueyanaa, Pueyaso saniitonu juuca jaara quiri, cuno tiacajinia quiniaari socua jyanohua saniitiosaanutianiya Sodoma tiacajinia quiniaa pueyajiniji.

*Jesu piriyosacari Pueyaso tojtiaashijia pueya*  
(Mt 11.20-24)

<sup>13</sup> ¡Corazín tiacajinia quiniaa pueyanaa, mariyata Betsaida tiacajinia quiniaa pueyanaa! Cua tojiri. ¡Niaari jyanohua saniitiosaanutianiya! ¡Niaari socua Pueyaso tojiyashijia quiya cuno tariucuacaanu Tiro tiacajinia quiniaa pueyajiniji, Sidón tiacajinia quiniaa pueyajinijinio! Cuno pueya jaara Pueyaso cumaacata miishano niquiquiaari, taacua miiquiano nia tiacajiniacaani, nojori maara ritia noojia tacatoquiaru cutara, sesa nojori miishanojiniji. Cuno tiacajinijinio pueya maara cocuaque toqueya cushiyonuquiaari, nojori taraajesacari sesa nojori miinuucua. Naajuhuj, nojori maara juaca niojoquiaari nojori nacaacua quera nojori macaashacari, sesa miijia nojori quiniucua. <sup>14</sup> Niaa cutaraari cua cumaacata cua miijiosano niqijia. Naajaa, majaari nioojia nia tacatonu quiquianu Pueyasocua. Naaratej, Pueyaso saniitonu juucujinia, ¡niaari socua jyanohua saniitiosaanutianiya Tiro tiaca pueyajiniji, Sidón tiaca pueyajinijinio! <sup>15</sup> Nijaniyarijiataj, Capernaum tiacajinia quiniaa pueyanaa, ¿niaateeri jiyaniya niaari jiyocuaanu quiniaara jiyatasaanutianiya? ¡Maja! ¡Niaari puequeetuuj raama quejooasaanutianiya saniya!

<sup>16</sup> Cua pueyanaa, cante nia tojtiajacani, nojoriiri cua tojtiajacajuhuj. Naajuhuj, cante nia ruuretaa cua rupaa nia pohuatasacari, nojoriiri cua ruuretaajuhuj. Cante cua ruuretaani, nojoriiri cua Jiyarona ruuretaajuhuj.

*Jesu jiyaramiquishano setenta y dos pueya tiuquijiosacariuhua nocua*

<sup>17</sup> Jesu jiyaramiquishano setenta y dos pueyari Jesuucua tiuquijioquiaariuhua. Nojori- iri jyanohua shuquiriaatia quiri quiaa. Jesu sequetureeri:

—¡Jiyaniijianaa, samaruahuari canaa tojtiaacanuni canaa tohuatanijiosacari nojori, canaa jyaniquishacari quia sesa!

<sup>18</sup> Jesuuri nojori sequere:

—Taaquiririnij. Janiyari Sesaaca niquiquianuni juhua niaco tiyano jiyocuaanu. <sup>19</sup> Janiyacuajaari cua cumaaca nia niqutiocanuni, juhujaniya nia rucuanenura sacocua caco, turucuaniniu caconio. Cua cumaacata, niaari puetunu Sesaaca cumaacajanaa shocotanutianiya, juhujaniya panaatia nia rucuanenonura, cua rupaa nia pohuatanura. Majaari quenaaja tamonu casaa miiniu quiniutianiya naquiya nijaniya. <sup>20</sup> Naajaa,

majaari saaja shuquiriaatia nia quiniu samaruhua tojtianuucua niajaniya. Shuquiriaatia nia qiri cutara nia sesaca naajiotasano quishacari jiyocuacaanu, Pueyaso muerasu sesaca naajiotasaqui.

*Jesu shuquirishacari*  
(Mt 11.25-27; 13.16-17)

<sup>21</sup> Jiyacaritij, Pueyaso Sohuanuuri Jesu shuquiritirii jiyano. Cunora, Jesuuri na Que Pueyaso sequere:

—¡Quia shuquiritiaanjia cua Quenea! ¡Quiaacuaajaari Jiyaniijajanaa quia jiyocuacaanu, mijiriano! ¡Quiaari maninia miirii! Cua pueyari juhua naatujoori, maja puera niishijia. Naajaa, quiaari quiarjia nojori niishitirii quia niishishano, quia jamosano mijiria niishi-jiaacaacuaaji. Jaa, cua Quenea, quiaacuaajaari naa nojori panitiaja.

<sup>22</sup> Cua Queeri tari cua niqitioquiaari puetunu na jiiitasanojuanaa, Jiyaniijiarano cua quishacari. Majaari tamonu niishiniu quenaaja cante Pueyaso Niyanuni, saaja cua Que cutaraari cua niishiya. Naajuhuj, majaari tamonu niishiniu cutara cante cua Queni. Saaja janiya cutaraari na niishiyani. Naajuhuj, noo pueyari na niishiya, canapue cua niishitiniu paniya cua Quecujani.

<sup>23</sup> Na nuhuaji, Jesuuri na pueyacuatacaterree. Saaja nojori sequereeri:

—Shuquiriaatia quijia cutaraari niajaniya, nia niqiniuucua puetunu nia niquishanojuanaa nia rupenuucua janiya. <sup>24</sup> Seetanujuanaa nia sequenyajia, queraatia tariucuaacaanu Pueyaso sequesano caminiujuninaa pueya, mariyata jiyaca jiyaniijianucuanio, nojoriiri nia niquishano niqiniuucua jiaatiaquiaari juucua. Majaari na niqitunio quiquiaari. Nojoriiri cuata nia quishacari nia tojishano tojtianuucua jiaatiaquiaari juucujuhuj. Majaari na tojtianu quiquiaari.

*Samaria jiyajinjio maninia mijajinjij pohuatasano*

<sup>25</sup> Na nuhuaji, Moisés Rootasanojinij niishitiojona pueyanoori Jesuucua niqiaari nata na poccojonura. Jesu na pocuatenura sesa juucua, naa na nequesotareeri:

—Niishitiojonanaa, ¿taa cua miiniutianiya pueyaracaanu rishijia cua quiniuriani?

<sup>26</sup> Jesuuri na riucaare:

—¿Taate Moisés Rootasanojinia naajiotasano? ¿Taa quia niishiriojoquiaani, quiaa jaara na serojoquiaa?

<sup>27</sup> Moisés Rootasanojinij niishitiojonaari Jesu riucaare:

—Naa sequeyano:

“Quia Jiyaniijia Pueyaso quia paniri puetunu quioojatjanaa, puetunu quia sohanutajanaa, puetunu quia cumaacatajanaa, puetunu quia niishitajatajanaano. Naajuhuj, quarta pueyano quia paniri taa quia paniyacuaa tama quia cuaqueyajajani”.

<sup>28</sup> Jesuuri na sequere:

—Quiaacuaajaari maninia riucaare. Naa quia miishacaritij, quiaari pueyaracaanu rishijia quiniutianiya.

<sup>29</sup> Moisés Rootasanojinij niishitiojonaari tama nocuaji tacunu paniriquiaajaaja, maninia quijia na quiniuria Pueyaso niqiaari. Naaratej, naa nequesotarahua Jesuuri:

—¿Canteeri cuarta pueyanoni?

<sup>30</sup> Jesuuri nio pohuatasano na pohuataree na niishitiojonura nojuaja. Naa coteereeri:

—Tamonu parta Judio pueyanoori Jericó tiacajiniara quiariquiaa juucua, Jerusalén tiacajinjij. Nohuasenujuaca pueyari na quiaree. Puetunu na jiiitasanojuanaa na jaariuutiatureeri, na cushishano toquenio. Na piquitiuri. Quera macu na tiujiatuqueeri. <sup>31</sup> Na nuhuaji, pueyacuaa secojonaari cuno nucuaco quiariquiaajaacuhuj. Na niquishacari piquishano narta Judio pueyano mataano nuu shuriquicora, na shocortamaa saajaari. <sup>32</sup> Na nuhuaji, Levita pueyanoori cuno nucuaco quiariquiaajuhuj. Na niquishacari narta Judio piquishano pueyano, nojuajaari saaja na shocortamaajuhuj. <sup>33</sup> Na nuhuaji, Samaria jiyajinjio tahueri cuno nucuaco quiariquiaajuhuj. Na niquishacari parta Judio pueyano mataano, Samaria jiyajinjio tahueri nocua tarajere. <sup>34</sup> Na cacataseeri. Nohuasenujuaca piquiyashiquia matejoree shiyocuataari, vinotanio. Na nuhuaji, na piquiyashiquia morojoreeri. Na nuhuaji, na niataree tama na seru nijinijaarjia. Ritia na jiyataaree rucojojuaca tiquijiojua tiajiniaraari. Cuniqiu na cojuatareeri. <sup>35</sup> Tariqui, cuno tahue quianu panishacariuhua, nojuajaari caapiqui cumaneeca pueraree. Ruconaa tia camaru na niqitioereeri. Na sequereeri: “Cucua quia jiyanoori. Nio pueyano quia cojuatare quiria. Quiaa jaara socua quia cumaneeca nocua puecare, janiyacua saniniujuja quia niqitiorohuanijia cua tacatesacariuhua”.

<sup>36</sup> Nio pohuatanu nuhuaji, Jesuuri cuno pueyano nequesotaree:

—Quiarijiani, ¿taa quia sequeyani? Cuno jiuujianaraca rucoonaa pueyajinijini, ¿tëyano cuno pojorijinijiniote narta pueyanoocua taraajeja cutarani?

<sup>37</sup> Moisés Rootasanojiniji niishitiojona pueyanoori Jesu riucuaaree:  
—Cuno Samaria jiyajinijinio tahuecuajani, nocua taraajequiaarini.

Jesuuri na sequeree:

—Taaquiririni. Quia quiaarohua. Naa pueyacua taraajeja quia quirijuhua, taa cuno tahue taraajequiaaricuaani.

*Jesu quishacari Marta, María tiajinia*

<sup>38</sup> Socua na rucuanesacari, Jesuuri tamonu tiacajinia tiuquiquiaari na pueyata. Cuno tiacajinia na quishacari, tamonu maajiiri na masuuquiaari. Naaratej, na tiajinia na tiuquintiareeri. Cuno maaji sesa quiquiaari Marta. <sup>39</sup> Martaari tarajanu jitiataja. Na sesaari quiquiaari María. Maríaari Jesu niohuaca shuriuquiumia cajiriquiaa, na tojniuria Jesu pohuatano. <sup>40</sup> Marta cutaraari poonijioriquiaa queraatia na miishocoriguiano na jitiatasacari. Cunora, Martaari Jesuucua catecanoree. Na sequereeri:

—Jiyaniijanaa, ¿majate cucua quia taraajenu? Cua tarajanuuri cua tarinitiaquee niquiriyatujua, puetunu nio poonijosanotajanaa. ¡Quia sequere na naacutanura janiya!

<sup>41</sup> Jesuuri saaja na sequeree:

—Martanaa, quioojia quia cajitiri sanaunaa. Quiaari puera quia miishano tacaataia.

<sup>42</sup> Saaja niquiriyatu casaa cutaraari jiyanoohua panishano. María cutaraari cuno socua panishano casaa saquiriojoree. Tamonuuri maja na naata na tojishano jaariutianu noojiajiniji.

## 11

*Jesu niishitiojosacari na pueya nojori secojonura Pueyaso*

(Mt 6.9-15; 7.7-11)

<sup>1</sup> Tamacari, Jesuuri Pueyaso secojoriquiaa tamaqui. Na puecasacari secojonu, tamonu na pueyajinijiniocori na sequeree:

—Jiyaniijanaa, canaa quia niishitiojore canaa secojonura Pueyaso, taa Tiuquinijiona Juan niishitiojoquiaari na pueyacaani.

<sup>2</sup> Jesuuri nojori sequeree:

—Pueyaso nia secojosacari, naa nia sequere:

“Jiyocuaaanu quijia canaa Quenaa, puetunu pueyajanaa cuaara niishiiria quiaari tojetaarucujanaa sesa miyashijia. Pueya cuaara seetanujuanaa quia jiyateera nojori jiyaniijia quia quiniuria. Quia panishano cuaara miishiiria mijiria, taa jiyocuaaanu miishiyacaani. <sup>3</sup> Canaa quia niqutioriquia canaa miaquesocoriguiano canaa panishano puetunu juucajanaa. <sup>4</sup> Canaa quia jiyanoori sesa canaa miishanojiniji, taa canaa jiyanooquiaacuaa sesa canaa miiniaani. Naajuhua, canaa quia cojuare, maja sesa canaa miitishaanura”.

<sup>5</sup> Jesuuri naa sequereehua, socua nojori na niishitiojonura:

—Niaa jaara nia rupuenaacua quiaare shiyaqueya, casaa nia masenura nojuajiniji, ¿nojuajatucua taa quia sequerene?, quiaa jaara na sequere: “Cua rupuenanaa, cua niqutiore jiuujianaraca pan. <sup>6</sup> Tamonu cua cojiniaari shusha tiuquiriohua tucuaaanu, miaajeyari. Shaquiri cua sumatuu cua miaquetesocoriguiano nojuaja”. <sup>7</sup> ¿Quiaatucua taa miirini quia rupena jaara na tiajiniaacumaji quia riucuaare?: “Maja cua taajetenu. Cua tia tiotiu tioree tarinijia. Tari cua mueya mataa maquetujinianijia. Maja cua naata sanenu cua niqutionura quia panishano”. <sup>8</sup> Jaara naa sequeretej, niaa jaara na tia tiotiu piquiniu tarinitiaaquiri, janiyari seetanujuanaa nia sequeyani, nojuajaari sanenutaniya na niqutionura nijaniya puetunu nia panishanojuanaa. Majaari na sanenu quiniutianiya saaja nia rupena na quiniuucua. Sanenutaniyari pueyaracaanu taajeta nia piquishacari na tia tiotiu. <sup>9</sup> Naajuhua, maja nia tarinitianu Pueyaso nia secojonu. Nojuajaari nia panishano nia niqutionutaniya. Cunora, nia panishano nia pajoriquia. Niocua na riuriatere. Tiotiu nia piquiriquia. Niaara riatasaanutaniyari. <sup>10</sup> Naaratej, cante Pueyaso secojoquiaani, nojuajaari na panishano masenutaniya. Cante na pajejani, na panishano riuriatanutaniyari. Cante tiotiu piquiquiaani, nera riatasaanutaniyari.

<sup>11</sup> ¿Niaatucua nia niyanu niqutiore saajia, neecaruu na masacari nijaniya? Maja. ¿Niaatucua soconu niqutiore nia niyanu, sapitiaaja na masacari nijaniya? Maja. <sup>12</sup> ¿Niaatucua turucuaniniu niqutiore nia niyanu, caacaraja riuriuquiu na masacari nijaniya? Maja. <sup>13</sup> Puetunu nijaniyajanaari sesa miiniu niishijia. Naajaa, niari maninia casaa niqutionu niishiya nia niqiohua. ¿Taatucua socua jiyocuaaanu Quijia nia Que Pueyasoni, tojetaarucujanaa sesa miyashijiani? Seetanujuanaa capora na

quishacari, nojuacuajaari na Sohuanu niqutionu niishijia na muerasu, canapuate na masequiaacuajani.

*Pueya sequesacari Jesu, samaru cumaacaracana*  
(Mt 12.22-30; Mr 3.20-27)

<sup>14</sup> Tamacari, Jesuuri samaru tohuataniriquiaa tamonu pueyanojiniji. Cuno pueyanoori tiquia quiquiaari samaru na jitiiasacari. Samaru jaara tohuataquiaari cuno pueyanojiniji, pocuajara quiriohuari. Pueya niquishacari naatej, nocuaji jiuujiatereeri. <sup>15</sup> Tamasaca pueyari saa sequequiaarijia:

– Cuno pueyanoori samaruhua tohuatanijija samaruhua jiyaniijia Satanás cumaacata.

<sup>16</sup> Tamasaca pueyari Jesu saniniujiuniu paniriquiaa. Naaratej, nojoriiri na sequeturee na cumaacata na miiniuria casaa, na niqitiniuria nojori, nojori niishiniuria nojuajaari seetanujuanaa Pueyasojinijinio. <sup>17</sup> Jesuuri nojori niishiriojosano niishiriquiaa. Nocuaji nojori sequereeri:

– Tamonu jiyajinia, cuno pueya jaara miaquetooyia tama nojori pueyatajaaja, nojoriiri maja na naata na paraa nujatanu, na paraa jaara nocua tiuquitiare raquiritano nojori quishacari. Naajuhua, niqiriyatu tiajinia quiniaa jaara tama nojorijiaaja juayonuujutaquiaa, nojoriiri maja na naata jatiqiu quiniu. <sup>18</sup> Naajuhua, niaari cua sequeriquiaa, janiyana samaruhua tohuatanijija Satanás cumaacatani. Jaara naa quiriti, ¿Satanástucua taa pueyaracaanu quiri jiyaniijiani, nojuaja jaara tama na samaruhuaaja tohuatanijija tama na cumaacatajaaja? <sup>19</sup> Naajuhua, janiya jaara samaruhua tohuatanijija Satanás cumaacatani, taa nia sequeyacuajani, ¿nia niishitiojosano pueyarihuaj, cana cumaacata nojori tohuatanijioquiaa samaruhuanu? ¿Taa nia sequeyani? ¿Satanás cumaacataree? Majaruhua. Naacuajitij, tama nijaniyajaaja nia niishiri, niaari jiyajeneya. <sup>20</sup> Naa Pueyaso cumaacata cua tohuatanijiosacari samaruhuatej, naacuajiti nia niishiri, Pueyasoori tari nia masuya seetanujuanaa na muerasu nia quiniuria.

<sup>21</sup> Niojinia nia niishiriojorejuhua; cumueeca pueyano jaara na tia cojuua queraatia na miaquejotaja casaata, majaari tamonu naata na jitiiasano casami jaariutiani. <sup>22</sup> Saniniujija, socua cumueeca pueyano jaara nocua tiuquiri, na miaquejotaja casaa jaariuutiaari, cuno, nocua na tiuushano juucuanu. Na nuhujaj, na jaariuutiasano casami paari, na pueya na serotasocoriguiano. Naajuhua, janiyari Satanás jitiiasano jaariuutiajani.

<sup>23</sup> Cante cua jiyano quiyaquyani, nojuajaari cua paraca. Cante cua naacutaquiyua pueya rerecojonura Pueyasorani, nojoriiri saaja pueya cocuataa Pueyasocuai. Naaratej, jacaria nia niishiriojore casaa nia niishiriojija janiyajinijini.

*Samaruhuari riujuujija na quiquiojiniohua*  
(Mt 12.43-45)

<sup>24</sup> Samaru jaara tohuatare pueyanojiniji, joojuashiquio rucuaneyajari na samaatejara na pajenura. Jaara na riuriataaquiri, niishiriojijari: “Cua quiquiojinia riujuuyarohuaraqui teje cua tohuatacanucujani”. <sup>25</sup> Samaru tiuquishacarihua cuno pueyanooqua, na riuriatasuhuari shaaco, juhua maninia netoonujusano tia, maninia jeenucuasanojuhua. <sup>26</sup> Naaratej, cuno samaruuri socua sesa miijiaa nojuajiniji siete narta samaruhua riqiuhua nata na quiniuria. Puetunu nojorijianaari cuno pueyanojinia tiuquitasuhua. Naacuajitij, cuno pueyanoori socua sesara jiyacateja, tarijia na quiniujiniji.

*Seetanujuanaa shuquiriaatia quiniu cutara*

<sup>27</sup> Jesu pohuatasacari nio, tamonu maajiiri jiyacari pueya tajiniji naa nacaree:

– ¡Shuquiriaatia quijia cutaraari cuno maaji cante quia raquiaarini, cante quia canashitiqiaarini!

<sup>28</sup> Jesuuri saaja na riucuaree:

– Socua shuquiriaatia quijia saniya sajara cante Pueyaso rupaa tojjiani, cante Pueyaso panishano miiquiaajaanihuaj.

*Sesa pueyari saaja Pueyaso cumaacata miishano niqiniu panijiaa*  
(Mt 12.38-42; Mr 8.12)

<sup>29</sup> Socua queraatia pueyari Jesuucua rerejoriquiaa puetunu na shocuaqueyajanaa. Jesuuri juhuacatecara naa pohuataree nojori niqiuara:

– Nio pa quishacari pueyari sesa miijiaa. Nojoriiri cua sequequiaa, jiyajeneta casaa na miiniuria Pueyaso cumaacata, nojori niishiniuria janiyari Pueyaso jiyarosononi. Seetanujuanaa majaari socua cua niqitiniu quiniutianiya nojori, cua cumaacata cua miishano. Nojoriiri saaja niqiniutianiya cutara taa cua miishaanutaniyani, naatej taa supuetana Jonás miishaaquiaaricuaani. <sup>30</sup> Jonás miishaanuuri nocuaji jiuujiatesano quiquiaari cutara. Naacuajitij, Nílive tiacajinia quiniaa pueyari niishiquiaari Jonásr Pueyaso jiyarosano quiquiaari. Janiyari naa miishaanutaniyajaanihuaj, nio pa quishacari pueya

niishiniuria janiyari Pueyaso Jiyarosononi. <sup>31</sup> Cua supuetana Salomón jaara Israel pueya jiyaniijia quiquiaari, jiyacari tamonu maajiiri pananu shuucuaaji jiyajinia jiyaniijia quiquiaari. Nojuajaari jiyanhua tucuacaanuji niqiaari narta jiyaniijia Salomón tojinuucua, jiyanhua niishijia Salomón quishacari. Jiya puequesacari Pueyaso saniniujishacari pueya, cuno maajiiri jiyacari sanenutaniya nio pa quishacari pueyacuara na tonujunura, nojori ruuretanuucua socua Niishijiajanaa cutara Salomónjiniji. Cuno Niishijiaari niya nia tajinia quiyacuaja. Janiyacuajaari nojuajani. <sup>32</sup> Naajuhua, cuno tariucuaaanu Nínive tiacajinia quiniaa pueyari saneecuatunutaniya Pueyaso nequesoreesacari nio pa quishacari pueya. Nojoriiri nio pa quishacari pueyacuara tonujunutanijuhua, nojori tacatoyaquiniucua nojori jiuujia sesa nojori miishanojiniji, Pueyaso rupaa nojori tojiyaquiniucua. Nínive pueya cutaraari noojia tacatoquiaari sesa nojori miishanojiniji, Pueyaso sequenu panishano caminiujunia Jonás jaara Pueyaso rupaa pohuataquiaari nojori niqiaara. Pueyaso sequenu panishano caminiujunia quiarijia nia tajinia quiyani, nojuajaari socua cutara Jonásjiniji. Janiyacuajaari nojuajani.

*Pueya jiuujia cuhuatanajiniji pohuatasano*  
(Mt 5.15; 6.22-23)

<sup>33</sup> Pueya jaara samaritiu noshitiri, majaari na jamotanu. Majaari na niatanu conatu cariQUIACO. Maninia cutaraari jiyocuaaanu na morotanu, tiaco tiuquitiánaa cuhuatariquiano. <sup>34</sup> Pa namijiaari juhua pa cuaqueya cuhuatanajuhua. Naacuajitij, paa jaara Pueyaso casaacua jiaatiaja quirini, paari cuhuashiqui quiya puetunujuaanaani. Saniniuuujia, pa namijia jaara sesa casaa niqiniuuucua jiaatiaja quiri, paari ninishiQUI quiya puetunujuaanaani. <sup>35</sup> Tama nia cuaqueyajaaja nia cojuare, niaa mariqui nioojia cuhuatana maquishajareeri. <sup>36</sup> Níaa jaara puetunujuaanaa juhua cuhuashiqui quiya, sesa casaacua jiaatiaashijia nia quishacari, niocua maninia niqunijia quiri puetunujuaanaa, juhua samaritiu cuhuatasacari niajaniya. Naacuajitij, niocua niishijia quiri, maninia miijia nia quiniuria.

*Jesu nacasusacari Fariseocuaca, Moisés Rootasanojiniji niishitiojanaano*  
(Mt 23.1-36; Mr 12.38-40; Lc 20.45-47)

<sup>37</sup> Jesu puecasacari pocuanu, tamonu Fariseo pueyanoori na masuuquiaari na tiajinia na miaquenura. Jesuuri na tiajinia quiaquiaari. Na tiuquishacari, miaquejajinia cajishijianaari. <sup>38</sup> Fariseo pueyanoori jiuujiatequiaari na niquishacari Jesuuri shuquitioo tari cajiriquiaa miaquenura. Judiocuacaari jiyaniijia, nojori rucoojosacari tamasa pueya tajinia, tamasa sesa miishanoori na naata nojoriicua pacunu. Nocuaji nojoriiri shuquitianu niishijia, tiajinia nojori tiuquishacariuhua. <sup>39</sup> Naa cuno Fariseo pueyano niishiriojosacariitij, Jesuuri saa na sequerejaa:

—Niajaniya Fariseocuaanaa, níari juhua noo pueya, canapueete saaja na ratujua cuaqueya jeequejiquiaacuajani, saaja na miacojua cuaqueyanio. Majaari na jiniacuma na jeequenu. Níari naajuhua. Níari sapuenu maninia pueya niquishano. Saniniuuujia nioojiaacari jiyanhua sesa quiya, casami nia masejonuucua nia nohuasejonuta, puetunu sesa nia miiniutiajanaajuhua. <sup>40</sup> Mosanucuaanaa, ¿niaateeri niishiyaquiya, pa cuaqueya Shipininaari poojia shipiniquiaarijijuhua? Naaratej, nioojia nia jeequere cutara, maja saaja nia cuaqueya. <sup>41</sup> Níaa jaara puetunu nioojiajinia nia jiiitasanojuanaa jiyatere Pueyasora na quiniuria, níaa maara juhua jeequesano quiri puetunujuaanaa.

<sup>42</sup> ¡Níari taraatia miishaariquiano, Fariseocuaanaa! Níari miaquesano jaamasucua serojoquiaa jacaria diez jaamasucua, puetunu cien jaamasucujinijinojuanaa, Pueyasora nia niqutiosocoriquiano. Cuno jaamasucuaari culantro, menta, socua tamonu jaamasucuaniojuanio. Níari naa maninia miqiaa taa Moisés niishitiojiquiaaricuajani. Naajaa, Moisésri niishitiojoquiaarijuhua maninia pa miiniuria parta pueya, Pueyaso pa paniniurijuhua. Majaari cuno na sequesano nia miini quiquiaa. Puetunu na sequesanojuanaa tojjijia nia quiri. Majaari saaja jaamasucua niqutiojojuaca nia quiniu.

<sup>43</sup> ¡Níari taraatia miishaariquiano, Fariseocuaanaa! Níari jiyaniijianucua shuriucua cajiniucua jiaatiaquiaa, Pueyaso secojua tiajinia nia quishacari, juhua cutara pueya nia quiniuria pueya niqiaara. Naajuhua, níari pueya paniquiaa nojori saruhuanura niajaniya juhua jiyaniijianucua, nia rucuanijosacari tiacajinia.

<sup>44</sup> ¡Níari taraatia miishaariquiano! Níacuajaari juhua niquishoo jamaca. Pueyari juhuajaniya na caco rucoquiaa na niishiyaquishacari. Naajuhua, pueyari juhuajaniya nia rupuequiaa, nojori niishiyaquishacari nioojaari jiyanhua sesa, juhua pueyano mocua jamajinia.

<sup>45</sup> Jiyacaritij, tamonu Moisés Rootasanojiniji niishitiojanaari Jesu sequeree:

—¡Niishitiojanaanaa, naa quia sequesacari Fariseocuatej, quiaari canaa sequeyajuhua!

<sup>46</sup> Jesuuri na riucuaare:

—Taaquiririni. ¡Niaari taraatia miishaariquianojuhuaj, Moisés Rootasanojiniji niishitiojonaanaa! Puetunu nia rootasanojuanaari juhua jiyanoehua niiquia casaa nitiaso-coriquiano. Majaari nia tojtiajaca pueya nia naacunu quiquiaa quenaaja nia juaashiquia sacasaruta, cuno niiquia casaa nitiasaanura. Naacujitij, pueyari maja na naata rejere-tanu nia niishitiojosano.

<sup>47</sup> ¡Niaari taraatia miishaariquiano! Niaari macunucua niojotajara shipinijioquiaa shanohuara, tariucuaaanu pueyara Pueyaso sequesano caminiujiunaa nucuhacuaji, teyano nia supuetanaa puecooquiaaricujani. <sup>48</sup> Naacujitij, canaari niishiyani, niaari nia supuetanaa miishano shuquiritiaa, nia cojuasacari nojori puecoosano nucuhua.

<sup>49</sup> Naacujitij, Pueyasoori na niishiniutia sequequiaari:

“Janiyari cua sequenu panishano caminiujiunaa jiyaramiquiniutianiya Israel pueyacuani, cua rupaa niishitiojonaanio. Israel pueyari noojiaqueya pueconutaniya. Tamasacaari naquia miishaanutaniyajuhua.”

<sup>50</sup> Cunora, Pueyasoori nio pa quishacari pueya naminiutianiya puetunu na sequenu panishano caminiujiunaa nanacaacujanaa, canapueete nio jiya coteejajini puecoosaquiaaricujani. <sup>51</sup> Coteenujanaa mosaaquiaari Abel. Na nuhuaji, queraatia Pueyaso sequesano caminiujiunaa puecoosaquiaari. Na nuhuaji, Zacariasri socua jaatesaaquiaari monujuhua. Nia supuetanaari na moquiaari Pueyaso Secojoua tiajinia, Pueyaso Shuriucua Quiquo tacoji, Pueyasoocura catijiasaqui shuriucua. Seetanujanaa nia sequeyanijia, nio pa quishacari pueyari namishaanutaniya puetunu nojori puecoosaanuucujanaa.

<sup>52</sup> ¡Niaari taraatia miishaariquiano, Moisés Rootasanojiniji niishitiojonaanaa! Niaari najuhua Pueyaso Rupaa jiiitiaa. Majaari nia tojiniu paniniu, Pueyaso jiyanooshano pueya nia quiniuria. Saniniuujia, tamasaca jaara Pueyaso Rupaa niishini paniri, Pueyaso muerasu nojori quiniuria, majaari nojori nia niishitiojonu paniniu quiquiaa.

<sup>53</sup> Jesu jaara nio sequequiaari, Moisés Rootasanojiniji niishitiojonaa, mariyata Fariseocuacari jiyanoehua juaaquioree. Jiyanoehua nojori juaaquiocari, nojoriiri Jesu nequesoreenu coteeree queraatia. Nojoriiri Jesu pocuatenu paniriquiaa sesa juucua.

<sup>54</sup> Nojoriiri nocuara tonujunu paniriquiaa juucua, jaara sesa quiri na sequesano.

## 12

### *Jesu niishitiojosano, maja sapuenu maninia pueyano niquishano pa quiniuria*

<sup>1</sup> Jiyacaritij, jiyanoehua jiyanoehua queraatia pueyari Jesuucua rerejoree. Tama nojoriijaarijia rapijiootoriguiaa puera nojori rerequeejosacari. Jiyacaritij, Jesuuri saa na pueyaja sequenu coteeree. Naa nojori sequeereeri:

—Tama nia cuaqueyajaaja nia cojuare Fariseocuaca pan poreetajaacuaji. Nojori niishitiojosanoori juhua pan poreetaja. Majaari na jataniniu pueya, sesa nojori miiniujini. Nojoriiri sapuenu maninia miijiaa pueya niquishano tamasaca niquiara. Saniniuujia, nojori jiuujiaari saa sesaja pueyaracaanu. <sup>2</sup> Nia niishiri, puetunu jiyasohuaja miishanojuanaari niishishaanutaniya. Puetunu jamosano casaajanaari niquishaanutaniyajuhua. <sup>3</sup> Puetunu nia sequesanojuanaa ninishiquini, cuhuashiqui caminiujiushaanutaniyari. Naajuhua, nia sasacojosano tama nia sohuacamarajaajani, cunoori jiyocuaaanu tia nijiniji nacatasaanutaniya puetunu pueya tojishocoriquianojuanaa.

### *Cante puereshiya cutarani*

(Mt 10.26-31)

<sup>4</sup> Cua rupuaanaa, majaari nia puerenu canapueete nareja pa cuaqueya mojuani. Nojoriiri maja na naata socua sesa na miinu pajaniya, paa jaara tariucua macu quiyani.

<sup>5</sup> Seetanujanaa nia sequeereeraj, cante puereshiya cutarani. Noo nia puerere cutara, cante cumaacaraca cutara na jatanura nijaniya mani quiquiojiniani, na cusojuanu nuhuaji nijaniya. Saaja nojuaja nia puerere cutara.

<sup>6</sup> Cinco shuhuari saaja caapiqui cumaneecaniyojuata masesano. Pueyara, cunoori najuhuanaj. Naajaa, majaari Pueyaso niyajetanu cuno shuhua jaara puecoosaare. Nojua-jaari na niishiya cutara. <sup>7</sup> Naajuhua, nia muesuuri puetunu serojosanojuanaa. Pueyasoori na niishiya. Naaratej, maja nia puerenu. Niaari socua jiyanoehua Pueyaso panishano cutara queraatia na cojuasano shuhujiniji.

### *Tamasaca niquiara pa seque paari Jesucristo pueyani*

(Mt 10.32-33; 12.32; 10.19-20)

<sup>8</sup> Cua tojitiare. Cante tamasaca niquiara sequejani: “Janija Jesucristo pueyanoni”, naajuhua, janiyari cua Que Pueyaso seya niquiara sequenutaniyani: “Nojuaja cua pueyano”. <sup>9</sup> Cante saniniuujia tamasaca pueya niquiara seetaa janiyajiniji, cua pueyano na quishacarini, janiyari cua Que Pueyaso seya niquiara na tamacanutaniyajuhua.

<sup>10</sup> Cante cua sesacareeni, nojuaja na naata jiyanooshaanu. Saniniujuja, maja cutaraari na naata jiyanooshaanu cante Pueyaso Sohuanu sesacareeni.

<sup>11</sup> 'Cua muerasu nia quiniucua, niaari Pueyaso secojojua tiajiniaqueya jiyatasaanutaniya, nequesoreenaa niquiara, mijiria jiyaniijianucua niquiaranio. Nojori nequesoreesacari nijaniya, majaari nia niishiriojonu taa nia riucuanutaniyanoj, casaa nia sequenutaniyajanihuaj. <sup>12</sup> Nia riucuanu panishacari, Pueyaso Sohuanuuri jiyacari nia niishitiojonutaniya taa nojori nia riucuanutaniyani.

*Puereetaari casamiriaca pa quishacari*

<sup>13</sup> Tamonu pueyanoori pueya tajiniji naa Jesu sequequiaari:

—Niishitiojonanaa, cua tarajanu quia sequere na niquisitionura janiya canaa shipininio jiiitiasanojiniji, taa canaa shipininio sequequiaari canaacuajani, saminio na quishacarijia.

<sup>14</sup> Jesuuri saaja na riucuaere:

—Pueyanonaa, ¿janiyateeri pueya nequesoreenara jiyatesaaquiaarini, cua serotanura nijaniya nia shipininio casamini?

<sup>15</sup> Jesuuri naa nojori sequequiaarijuhuaj:

—Jiyanoohua nia cojuare tama nia cuaqueyajaaja, maja casamiicua jiaatiajaca nia quiniuria. Pa naata shuquiriaatia quini casamiiju. Queraatia casamiiri maja na naata seetanujanaa shuquiriaatia quijiacara na jiyatenu pajaniya.

<sup>16</sup> Na nuhuaji, Jesuuri pueya niishitiree nio miriqui pohuatasano. Naa sequereeri:

—Tamonu pueyanoori quiquiaari, jiyanoohua casamiriaca. Na cuhuariquijainia na natoosanoori jiyanoohua muetuquiaari. Naacuajitij, queraatia miaquesocoriquiano jiiitiaquiaariri na cuhuariquijainiji na carojotasano. <sup>17</sup> Tama sequereejajarijia: “¿Taa cua miinitianiya? Cua tiajosano cua racatajara cua carojotasanoori puetunujanaa tari miishaja quiya. ¿Tee cua racatanutaniya shusha cua carojotasanoorinitioj? <sup>18</sup> ¡Jaj, niishiquinijia! Coteenu cua tiajosano cua casamiicuaaji niyaroorohuaraj. Janiyari socua puereetucocuaa tiajonutaniyani. Janiyari cuniqui mishinijionutaniya puetunu cua carojotasano cua cuhuariquijainijiojuanaani, puetunu cua jiiitiasano casamijianaani. <sup>19</sup> Na nuhuaji, janiyari taa cua cuaqueyajaaja sequenutaniyani: ‘Pueyanonaa, quiarijia cutara juhuajaniya quia quiri. Quiaari queraatia casamiriacacuaaja, queraatia marijia. Quiaari queraatia quia miaquesocoriquiano jiiitiaacuaja. Quiarijia cutara quia samaatere. Quia miaquere. Quia rature. Tama quia cuaqueyajaaja quia shuquiritiri’”. <sup>20</sup> Cuno niucuaaja, Pueyasoori na sequequiaari: “Moseecanaa, quiaari quiarijia macu juhuaque-nutaniya. ¿Canteeri puetunu quia jamuesano casamijianaa jiiitanutaniya quia nuhuajini? ¿Canra na quiniutaniyarini?” <sup>21</sup> Naa miishaanutaniyari puetunu pueyajanaa, cante saaja tama nerajaaja reratequiaa casamini. Cuno, jamuejaca casamiriaca pueyani, nojoriiri seetanujanaa casamiijuniucua Pueyasoora.

*Pueyasoori na muerasu cojuaja maninia*

*(Mt 6.25-34)*

<sup>22</sup> Na nuhuaji, Jesuuri na saquiriojosano pueya sequequiaari:

—Naaratej nia sequeyanijia pueyanaa, majaari nia tacaaniu casaa nia miaquenu-taniyani, casaa nia cushiniutaniyani. <sup>23</sup> Pueyaso jaara pa shipiniquiaari saminio pa quiniuria, majaari jiyajeneta nera na rishitiniuria pajaniyajuhuj. Naajaarihuaj, nojuaja jaara pa cuaqueya shipiniquiaari, majaari jiyajeneta na cushitiniuria pajaniyajuhuj. <sup>24</sup> Riquiacujua nia niquiriquia. Majaari nojori natoojonu. Majaari nojori carojotanu na racatasocoriquiano, na nuhuaji na miojosocoriquiano. Naajuhuj, majaari nojori jiiitanu na miojosano na racataja. Majaari tiaca nojori jiiitanu na carojotasano nojori racata-jarajuhuj. Naajaa, Pueyasoori nojori miojotequiaa. Naa cutaraari socua jiyanoohua Pueyaso panishano cuno riquiacuhujainiji. <sup>25</sup> Naajuhuj, nia nequesotaanijia, niaa jaara socua tamonu juucara rishiniu paniriquia quera nia shaajenu panishacari, ¿nia naatateeri socua rishiniu, jiyanoohua nia tacaaniutia? Maja nia naata. <sup>26</sup> Naaratej, nia tacaaniu jaara najuhuaa quiya socua shiitaniyojua nia rishiniuria, ¿niaatucua casaara tacaari tamonu casaacuan?

<sup>27</sup> Naa nuhuaju nia niquishurij, taa nojori corequetaani. Majaari nojori poonijionu. Majaari na cusupenuunujuhuj. Supuetana jiyaniijia Salomónri jiyanoohua shanohua toqueyaraca quiquiaari. Cuno jiyanoohua shanohua niquishano na cushishano toqueni, naajaa, majaari na shocotanu cuno natau shuucuaa. <sup>28</sup> Pueyasoori cuno natau shuucuaa shipiniquiaari rupaquijia naa shanohua niquishocoriquianotej. Jaara sorere, tariqui catijashiya saniniuurijia pan majeetetajara. Pueyaso jaara naa maniniushitiyacuaa shuucuatej, ¿majateeri na naata cushitiniu nijaniyajuhuj, jatarinitiaja Pueyasoocua tiujujacanaa? <sup>29</sup> Naaratej, nia sequeyanijia, maja nia tacaaniutia nia pajenu casaa nia miaquenutaniyani, casaa nia ratunutaniyani. <sup>30</sup> Pueyaso niishiyashijia pueyari



pueyaracaanu na panishano casaacua tacaacua. Niajaniya cutaraari Queraca. Nojuacajaari tari niishiya puetunu nia panishanojuanaa. <sup>31</sup> Naaratej, nia niishiriojore Pueyaso panishano nia miiniuria. Nojuajaari saniniuujia nia niqutionutaniya puetunu nia panishanojuanaa.

*Nia casami nia racatare Pueyaso shuriucua*  
(Mt 6.19-21)

<sup>32</sup> Maja nia puerenu, cua muerasuniyojuanaa. Niaari secajaniyojua. Naajaa, cua Queeri nia panijia. Capora na quiniucua, inia niqutionutaniya puetunu na jiiitasanojuanaari! <sup>33</sup> Nia casami nia niqutiojore cumaneecara. Na nuhuaji, cuno cumaneeca nia niqutiojore nareja casamiuniucua pueya. Naa nia miishacaritij, niaari jiyocuaaanu racataa nia jiiitasano. Tee Pueyaso racataa nareja nera nia niqutiosanocujani, cuniqui, nia cumaneeca quiquioori maja na piqiniu. Niaari tii nia racatasano jiiitanutaniya pueyaracaanu. Majaari nohuasejojua na naata nocua tiuquiniu na nohuasenura. Naajuhuj, surequeyari maja na naata miaquenu nia casami tii. <sup>34</sup> Nia casami jaara naa racatasano quiya jiyocuaaanu Pueyaso shuriucuatej, niaari saaja Pueyasoocua niishiriojonutaniya, tee nia casami racatasano quiyacuaani.

*Jeenucuasano nia quiri nia Jiyaniijaacuaji*

<sup>35</sup> Juhuata jeenucasano nia quiri pueyaracaanu, nia sashishacari nia Jiyaniija, taa tiajiniaaco maninia seyacuaani. Nojori sashishacari na jiyaniija, nojoriiri na toqueya cushiyono quiya tari, na samaritiu noshitishanojuhuaj. <sup>36</sup> Naa jeenucasano nia quirijihuhuj, juhua cuno seyaja. Nojoriiri na jiyaniija sashiya na caminiujini nia tiuquishacariuhua. Nojuaja jaara tohuateya piqishuhua, nojoriiri ritia nocuaji riatanutaniya tia tohuateya. <sup>37</sup> Shuquiriaatia quijiaca cutaraari cuno seya, canapuate na jiyaniijaacuaji suteyajaani, na jiyaniija cuara tiuquiriohuajaatijia. Seetanujanaa nia sequeyanijia, nojori jiyaniijaari nojori cajitijionutaniya miaquejajinia. Na toque maniniuqui jocanutaniyari na mianuutenura nojori. <sup>38</sup> Nojori jiyaniija jaara tiuquiriohua shiyaqueya, juhuaquenu panishacari, naajaa, shuquiriaatia quijiaca quiniutianiyari cuno seya, nojori jaara suteyajaa tia tohuateya riatariquiano nojori jiyaniijaacuaji. <sup>39</sup> Nio nia niishirijuhuj, tia camaru jaara niishiri taacari nohuasejojua niniutianiyani, nojuaja maara sutere na tia cojuanura, maja nohuasejojua tiuquiniuria na casami na nohuasenura. <sup>40</sup> Naajuhuj, jeenucasano nia quiri pueyanaa, juhua cuno sutejaca seyaja. Naa jaara jiyaniya juhuanujuaja maja cua tiuquiniu quiniutianihua, janiyari jiyacari nia jiyajenetenutaniyani.

*Jesu pohuatasano maninia serujiniji, sesa serujinijino*  
(Mt 24.45-51)

<sup>41</sup> Jiyacaritij, Pedroori Jesu nequesotaree:

—Jiyaniijanaa, ¿quiaate nio pohuataree saa canaaraja, puetunu pueyarajanaa soj?

<sup>42</sup> Jiyaniijaari na riucaaree:

—Tamonu seru jaara maninia seru quiri, nocua tiuushano, niishijajuhuj, na jiyaniijaari cuno na seru jiyatenutaniya narta seya jiiitariquiano na niti na niyacari. Nojori jiyaniija niyacari, cuno seeratasano seruuri narta seya mianuutenutaniya maninia, taa nojori jiyaniijajanaa mianuutequiaa nojoricuaani. <sup>43</sup> Cuno seruuri shuquiriaatia quiniutianiya na jiyaniija jaara na riuriatasuhua naa maninia miyanojua, taa na sequesaaquijaari na miiniuriacuajani. <sup>44</sup> Seetanujanaa nia sequeyanijia, na jiyaniijaari cuno maninia seru jiyatenutaniya puetunu na jiiitasano casamijanaa cojuana na quiniuria. <sup>45</sup> Saniniuujia, cuno seru jaara sesa miiniuria niishiriojore, na jiyaniishacari na jiyaniijaari jiyanohua tarishiniutianiya, nojuajaari niishiriojonutaniya nojuaja na naata miiniu na panishano. Cunora, nojuajaari narta seya majoonu coteenutaniya, seya maajipohuanio. Naajuhuj nojuajaari saaja miaquejonutaniya. Pueyaracaanu rarujunutaniyari. Mashaaseqejonutaniyaariuhuj. <sup>46</sup> Na jiyaniishacari na jiyaniija juhuanujuaja maja na tiuquiniu quiniutianihua, jiyacaritij, cuno juucaja, na jiyaniijaari tiuquiniutianihua canashyaquiji. Naa cuno seru miiniucua sesatej, na jiyaniijaari jiyanohua na saniionutaniya. Na jatanutaniyari Pueyaso tojiyajiaca pueyata na saniitosocoriquiano.

<sup>47</sup> Tamonu jiyaniija jaara na seru rootare maninia, taa nojuaja miiniutianiyani, cuno seru jaara jeenucaaquiri na jiyaniijaacuaji, mariyata jaara miyaquiri taa na jiyaniija sequequiaari na nuhuajiriacuajani, nojuajaari jiyanohua majacusaanutaniya cutara. <sup>48</sup> Saniniuujia, tamonu seru jaara sesa miiri na niishiyaquiniucua na jiyaniija panishano na miiniuria, nojuajaari saaja secaja majacusaanutaniya. Naajuhuj, cante queraatia niqutiosaaareeni, cuno serujinijiri queraatia masenu panishaanutaniya. Naajuhuj, cante jiyatesaaaree queraatia jiiitana na quiniuriani, na jiyaniijaari nocua tiuuniutianiya socua jiyanohua maninia miijia na quiniuria.

*Jesuucua tiuujiaacari narta pueya panishoo*  
(Mt 10.34-36)

<sup>49</sup> Mijiria niqiaarinijia, juhua mani cua noshitiniuria pueya tajinia. ¡Seetanujuanaa na noshitiriquia tarinij! Cua rupaari juhua mani quiniutianiya. <sup>50</sup> Coteenu, janiyari jiyanoehua saniniujiushaanutaniya juhua manitiani. Nocuaji coojaari tacaya janiya jaara naa miishaarejaatijia. Seetanujuanaa na jiyateriquia tariucua tucuateenonij. <sup>51</sup> ¿Niaateeri jiyaniya janiyari niqiaarini mijiria quiniaa quiniuria juhuajaniya? ¡Maja! Seetanujuanaa nia sequeyanijia, janiyari niqiaarini pueya cua raquiriojotanura. <sup>52</sup> Naaratej, pueyari quiarijia juayonuutunu coteenutaniya. Pueyano jaara necocuata jiitiare jiuujianaraca niqiuohua na tajinia, jiuujianaraca nojorijinijinio jaara cucua tiuuri, cuno caapiqui cucua tiuyashijiaacari saniniuuja nojori juaajiaa quiniutianiya. Naa noojiaqueya pueyajinijinio tiuuniucua cucuatej, queraatia pueyari naa tama tacaresetanutaniyajacujua. Naacuajitij, tamonu tajinia, queraajaa pueyari caapiquiriyatu cucua tiuujiaa juaajiaa quiniutianiya. <sup>53</sup> Pueyari necohua paracaajia quiniutianiya, necohua tiushacari cucua. Naajuhuaaj, necohuari na que paracaajia quiniutianiya na que tiushacari cucua. Naajuhuaaj, necojori paracaajia quiniutianiya necojori tiushacari cucua. Naajuhuaaj, necojori na nucua paracaajia quiniutianiya na nucua tiushacari cucua. Naajuhuaaj, maajipohuari necohua niqiuohua paracaajia quiniutianiya, necohua niqiuohua quiniucua cucua tiuujiaa. Naajuhuaaj, pueya niqiuohuari na quinia paracaajia quiniutianiyajuhuaaj, cucua tiuujiaa na quinia quiniucua.

*Pueya cuaara niishiiria quiarijia Pueyaso miishanojiniji, casaa na nishitiniu paniyani*  
(Mt 16.1-4; Mr 8.11-13)

<sup>54</sup> Jesuuri naa sequequiaari pueyajuhuaaj:

—Niaa jaara niqutioocua niqiuquiaa pananu tiuquishocora, niaari sequequiaa: “Maruqui niniutianiya”. Seetanujuanaa naa quiquiaari. <sup>55</sup> Naajuhuaaj, paratu jaara piyarojoquiaa pananu shuucuaaji, niaari sequequiaa: “Tacareejonuqui quiniutianiya”. Naa quiquiaari. <sup>56</sup> Pueyanaa, ¿niaateeri seetanujuanaa niishijiaa? Niaari maninia niishiquiaa jiya cajiniocua nia niquishano, nio jiyajinia nia niquishanonio. Saniniuuja, nia niquishacari quiarijia Pueyaso miishano nia niquiara, majaari cuno nia niishiniu, casaa na sequenu paniyani. Naaratej, majaari seetanujuanaa niishijiaa nijaniya.

*Niaacuara tonujunata nia jeecatoore*  
(Mt 5.25-26)

<sup>57</sup> Niaacuajaari niishiya, sesa miijiaacari saniitosaanutaniya. Naaratej, tama nijaniyajaja nia niishiriojore, casaate maninia nia miiniuriani. <sup>58</sup> Tamonu pueyano jaara quiocuara tonujure quia sesonuucua na casaa, quia saniri juhuata nata pocoojonu maninia, na jaatucusacari quiajaniya nequesoreena pueyanooocua. Quia sequerenoj casaa quia miiniutianiya nerani, na jiyanooniuria quiajaniya. Quiaa jaara jeecatoyaquiri nata, nojuajaari quiocuara saquiriojotanutaniya nequesoreena pueyano. Jaara quiocuara saquiriojotare nequesoreena pueyano, nequesoreenaari saniniuuja quia niqutionutaniya na pueya, quia nujuatesaanura nujuatejoajinia. <sup>59</sup> Seetanujuanaa nia sequeyanijia, majaari nia tohuatanu quiniutianiya nujuatejoajiniji, niaa jaara puetunu nequesoreena sequesano cumanecajanaa niqutiojorejaatijia niaacuara tonujuna pueyano.

## 13

*Nioojia nia tacatore sesa nia quiniujiniji*

<sup>1</sup> Jiyacari, tamasaca pueyari Jesuucua tiuquijioquiaari. Cuno pueyari naa Jesu pohuataquiaari:

—¡Jiyaniijia Pilatoori Galilea jiyajinijinio pueya puecoorucuaa! ¡Na nuhuaji, nojori nanaca cojitiriiri Pueyasooacara nojori puecoosano seya nanacata!

<sup>2</sup> Jesuuri nojori sequeree:

—¿Niaateeri jiyaniya cuno Galilea pueyari naa miishaarucuaa socua jiyanoehua sesa miijiaa nojori quiniucua narta Galilea pueyajiniji? <sup>3</sup> Seetanujuanaa nia sequeya cutaranijia, nojoriiri maja socua sesa miijiaa quiquianu nijaniyajiniji. Nijaniyajuhuaaj, niaa jaara tama nioojiaaja tacatoyaquiri sesa nia miiniujiniji, niaari taraatia puecoosaariquianojuhuaj. <sup>4</sup> ¿Cuno dieciocho pueyariuhuaaj, canapete cusonuucanu cuno jiyaconaja tia jaara nojori shiniacacanu Siloé cuari shuriucuatej? ¿Niaateeri jiyaniya nojori socua sesa miijiaa quiquianu narta Jerusalén tiacajinia quiniaa pueyajiniji? <sup>5</sup> Seetanujuanaa nia sequeyanijia, nojoriiri maja socua sesa miijiaa quiquianu nijaniyajiniji. Janiyari quiarijia nia numooteyani, niaa jaara tacatoyaquiri nioojia sesa nia miiniujiniji, niaari taraatia puecoosaanutaniyajuhuaaj.

*Miriqui Jesu niishitiojosano muetuhuo naanajiniji*

<sup>6</sup> Jesuuri na nuhuaji pueya niishitiojoquiaari nio miriqui pohuatasana:

—Tamonu pueyanoori higo naana jiitiaquiaari na uva cuhuariquiajinia. Tamacari, na camaruuri nocua quiaquiaari na niquiniuria. Na jajau mianu paniriquiaa juucuaari. Shaanoori quiriquiaa. <sup>7</sup> Cunora, na cuhuariquia cojuana sequereeri: “Quia niquiri nio naana. Janiyari pueyaracaanu najuhuaana niquiaani na jajau pajenura. Pueyaracaanu muetuyaquiari. Tari na shocojorucuaari jiuujianaraca marijia. ¡Quia nure! Tamonu cuara na nujuasaqui natasaaria, na muetunura cutara”. <sup>8</sup> Cuhuariquia cojuanaari na riucaaree: “Jiyaniijanaa, quia tarinitiarejaara tamonu marijia. Janiya na pajama jiya tacarojotanutaniyani na sasetanura. Na nuhuaji, janiyari juunu cueaca na pajama paatiniutaniyani. <sup>9</sup> Janiya jaara naa na miirini, muetunutaniya naasucua. Jaara muetuyaqui, pocua socua na nureni”. Naajuhuj pueyanaa, Pueyasoori sashiya, maninia miijia nia quiniuria.

*Jesu jeeacasari porocuatucua samaatenu juuca*

<sup>10</sup> Tamonu samaatenu juuca, Jesuuri tamonu tiacajinia niishitiojoriquiaa Pueyaso secojojuu tiajinia. <sup>11</sup> Tamonu maaji cusosuuri ti quiriquiaajuhuj. Dieciocho marijiaari na shoconujuquiaari porocuat na quishacari. Samaruuri naa na jiyatequiaari. Majaari quenaaja na naata maninia nujuanu quijia. <sup>12</sup> Jesu jaara na niquiquiaari, na sequereeri:

—¡Maajinia miji! ¡Quia nijiniacuaa tari jeequerohua!

<sup>13</sup> Jesuuri na juaashiquia niaree maajicua. Jiyacaritij, maajiiri maninia jeequequee. Nojuajaari Pueyaso maniniuhaqueetanu coteeree naa na miishaanuucuatej. <sup>14</sup> Pueyaso secojojuu tiajinia jiyaniijiaari juarii naa Jesu miiniucua samaatenu juuca. Naaratej, ti quiniaa pueya sequeree Jesu niquiaara:

—¡Seis juucacuaari quiya puetunu semaanjinijanaa pa poonijionura! ¡Niocua cuno juuca nijioriquia nia naatanijiosaanura, maja samaatenu juuca!

<sup>15</sup> Jiyaniijia Jesuuri sequereeri:

—¡Sapuenu juhua maninia miijiaa niquishano pueyanaa, puetunu nijaniyajanaari nia juunu, nia burro samaacartaquiaa samaatenu juuca, nia jaatucucoriquiano mohuaca na raatenura! <sup>16</sup> ¿Nio maajiirihua? Nojuaja cutaraari supuetana Abraham niquiohuacuajinio supueno. ¿Majateeri maniniajuhua samaatenu juuca pa samaacatanura Satanás morojosano? Dieciocho marijiaari tari nio maaji shoconujurucuaa pueyaracaanu porocuat na quishacari.

<sup>17</sup> Naa Jesu sequesacaritij, puetunu na paraajanaari caririquituri. Saniniuujia, puetunu pueyajanaari shuquiriaatia quiriquiaa nojori niquishacari queraatia maninia Jesu miishano na cumaacata.

*Miriqui Jesu pohuatasano mostaza jajaujiniji*

*(Mt 13.31-32; Mr 4.30-32)*

<sup>18</sup> Jesuuri sequeriquiaari:

—¿Taate cua naata niishitiojonu nijaniyani, nia niishiniuria taa Pueyaso poonijia pueya jiuujiajinia na rupaatani? <sup>19</sup> Na rupaari juhua mostaza jajauniyojuu, pueyano natanano na cuhuariquiajinia. Cuno jajau jaara moritiare, puereetucara caneyari. Naacuajitij, shuhuari na cashacucuaacua jesuya. Naajuhuj, Pueyaso rupaari caneya pueya jiuujiacajinia puetunu nio jiyajinijanaa maninia miijiaa nojori quiniuria.

*Miriqui Jesu pohuatasano pan poreetajiniji*

*(Mt 13.33)*

<sup>20</sup> Jesuuri nio pohuataquiaari socua:

—¿Casaa cua pohuatanutaniya nia niishiniuria taa Pueyaso poonijia mijiria na rupaatani? <sup>21</sup> Pueyaso rupaari juhua pan poreetaja maaji cojitishano trigo cashojuata, shanacusano jiuujianaraca shiitaniyojuu tohuatashijinia. Pan poreetaari puetunu cuno cashojuu miniquiootasanojuanaa poreeteja. Pueyaso rupaari naa poonijiojuajuhuj.

*Juhua shiitaniyojuu tohuateyari quiya Pueyasocua pa quianura*

*(Mt 7.13-14, 21-23)*

<sup>22</sup> Jesuuri Jerusalén tiacajiniara quiariquiaa na pueyata. Nucuaaco na quiasacari, pueya niishitiojoriquiaa tiacajiniaari, shiitaniyojuu tiacajinianio. <sup>23</sup> Jiyacaritij, tamonu pueyanoori na nequesotaree:

—Jiyaniijanaa, ¿saaja quenaaraqui pueyateeri Pueyaso pueyara jiyatesaanutaniya?

Jesuuri nojori riucaaree miriqui:

<sup>24</sup> —Jiyanhua nia saniniuujiri shiitaniyojuu tohuateyaco nia tiuquiniuria, Pueyaso nia rupuenura. Juhucarijia nia numooteyanjia, queraatia pueyari nocua tiuquitanu paniniutaniya juucua. Majaari nojori naata quiniutaniya saaja. <sup>25</sup> Cua tojtijare. Tia

camaru jaara sanere, tohuateya tionutaniyari. Niajaniya, cante na tia carijiniacuma quiyajaani, niaari tohuateya piquiniuniutianiya najuhuanaj. Naa jaara naa nacare: "¡Jiyaniijianaa, canaacuaji quia riatare tohuateya!", nojuajaari nia riucuanutaniya: "Maja cua niishiniu tejenote niajaniyani". <sup>26</sup> Jiyacaritij, niaari juhuacatecara sequenutaniya: "¿Majateeri canaa quia niishiniu? Canaacuajaari quiata miaquenuujuani. Canaari quiata ratujua mariyatani. Quiaacuajaari canaa tiaca nuucuaajinia niishitiojua". <sup>27</sup> Tia camaruuri nia riucuanutaniya: "Janiyacujaari tari nia sequereeni, maja cua niishiniu tejenote niajaniyani. Nia quiojorohua niiquiji, puetunu niajaniyajanaa sesa miijiacanaa". <sup>28</sup> Naa na taanusacari niajaniyatej, niaari nujuquetunutaniya. Naaari nia quiaa miaquenutaniya jiyanohua nia taraajenuta, nia niquishacari Abraham, Isaac, Jacobo, puetunu pueyara Pueyaso sequesano caminiujiunaa Pueyaso shuriucua quiyanoocua. <sup>29</sup> Queraatia tamasa pueyapueeri nijionutaniya puetunu jiyacajinijiojuaanaa Pueyaso shuriucua cajitiuniuria, nojori miaquenuunura nata. Nijionutaniyari pananu muetasamaji, pananu tiuquishacojinio, pananu shuucujaji jiyacajinijio, pananu muetasamaji miaquetajara jiyacajinijiojuhuaj. <sup>30</sup> Quiarijiani, queraatia pueyari juhua tojishoo quiya narta pueyara. Cuno quishacari saniniuujia, nojori cutaraari setanujuanaa tojishano pueya quiniutianiya Pueyasora, Pueyaso tojitiajaca nojori quiniuucua mijiria. Naajuhuj, quiarijiani, queraatia pueyari juhua tojishano pueya quiya narta pueyara. Saniniuujia, jiya puequesacari, nojoriiri najuhuaa quijiaa quiniutianiya Pueyasora, nojori tojitiaaquiniuucua nojuaja.

*Jesu taraajesacari Jerusalén tiacajinia quiniaa pueyacu*

*(Mt 23.37-39)*

<sup>31</sup> Jiyacari noojiaqueya Fariseocuacaari Jesuucua tiuquijioquiaari. Nojoriiri Jesu nu-mooteree:

—¡Niiquiji quia mashiri! ¡Jiyaniijia Herodes quia monu paniya!

<sup>32</sup> Jesuuri nojori sequere saaja:

—Cuno pueyanoori niishijia juhua jaami. Naa nia caminiujiushuhua cua sequesano cuno jaamiria: "Janiyari samaruhua tohuatanijiyani. Janiyari cusosuhua naatanijija-jaaniuhuj. Janiyari naa miya quiarijiani, tariquijiuhuaj. Janiyari tama tariqui tu-cuatanutaniya puetunu cua miiniu panishanojuanaani". Naa nia sequesuhua cuno pueyano. <sup>33</sup> Cuaara rupaquijia cua sashiiria. Janiya quiarijia rucuanenutaniyajaanani, tariqui, tama tariquinio. Janiya cuaara mosaaria cutara Jerusalén tiacajinia, tee cuniqui puetunu pueyara Pueyaso sequesano caminiujiunaajanaa puecoosaquiaricuaani. Majaari tamaqui cua monu quishaanutaniya.

<sup>34</sup> Jerusalén tiacajinia quiniaa pueyanaa, niaacuajaari Pueyaso sequesano caminiuji-uniaa puecojuaca. Naaari Pueyaso jiyaramiquishano pueya jacujuaca saitia. Janiyari juucua pueyaracaanu nia rerejonuucua jiaatiajani, taa caacaraja necohua rijioquiaacuaa na nesu cariquiaconi. Naaari saaja paniyaquiquiaa cua cojanura niajaniya. <sup>35</sup> ¡Cunora, cua tojitiaare! Nia quiquioori tojtaarucuaajanaa shaquiquiutianiya. Naajuhuj, majaaari socua nia niquiniu quiniutianiya janiya, niaa jaara nia timitiasacari janiya sequerejaatijia: "¡Cuaara shuquiriaatia quiiria pa Jiyaniijia, Pueyasojiniji tiuquihuano!"

## 14

*Jesu naatanishacari cusosu poreeno pueyano*

<sup>1</sup> Tamonu samaatenu juuca, Jesuuri tamonu Fariseocuaca jiyaniijia tiajinia quiaquiaari miaquenura, socua tamasa Fariseocuacatanio. Nojoriiri Jesu shootiaturiquiaa nojori niishiniuria casaa na miiniutianiya samaatenu juucani. <sup>2</sup> Jiyacaritij, tamonu pueyanoori Jesu tajoji nujuariquiaa, poreeno cusotaano. <sup>3</sup> Jesuuri Moisés Rootasanojiniji niishitiojona nequesotaree, Fariseocuacanio:

—¿Taa nia serojoquiaa Moisés Rootasanojiniani? ¿Maniate cusosu pa naataniniu samaatenu juuca?

<sup>4</sup> Nojoriiri saaja sanaa na tojitariquiaa. Jesuuri cusosu quiaree jiyacari. Na naataniriiri. Na jiyarorohua na tiajiniiaari. <sup>5</sup> Na nuhuaji, Jesuuri cuno Fariseocuaca sequere:

—Nia burro, nia juunu jaara raama tyare samaatenu juuca, ¿niaatucua samaatenu juuca shocoterejaara, raamaji nia jaaniuhuaa nia seru?

<sup>6</sup> Majaari nojori riucuanu quirii quenaaja.

*Taa pa miyani queranacunura masuusano pa quishacari, taamueca pueyate masu-shiyajaaniuhuj*

<sup>7</sup> Jesuuri shootariquiaa taa masuusano pueya socua panishano cajitiucujinia nojori cajitiuniuria riutioconeetariquiaani. Jesuuri cunora nojori niquiara pohuataree nio pohuatasano. Naa sequereeri:

<sup>8</sup>—Quiaa jaara masuusaariquia camishacari queranacunura, maja cumaati quia cajiniu socua tojishano pueyano cajijiaranojinia, tamonu pueyano mariqui tiuquiriiri socua tojishano pueyano quiajanijajini. <sup>9</sup> Socua tojishano pueyano jaara tiuquishii, nia masuuna pueyano naasucuaari quiocua niniutianiya na sequenura quiajanija: “Shiiquia. Quia sanere nio pueyanooquaji”. Naacujitij, quiaari cajitishaanutianiya quia caririqiniutia pueya paniyaquishano cajitijinia, miaqueja puequeetujinia. <sup>10</sup> Nocuai nia sequeyanija, niaa jaara masuusaariquia miaquenura tamonu tiajinia, niocua cajishiicia socua paniyaquishano cajitujinia. Naacujitij, quia masuuna jaara niquiri quiajanija, nojuajaari quia sequenutianiya: “Cua rupuenanaa, inia quia cajishii socua panishano cajitujiniani!” Naacujitij, cuniqui quiata quiniaari niishiniutianiya, quiajanija nia masuuna panishano pueyano. <sup>11</sup> Naajuhua Pueyasora, cante tama na cuaqueyajaaja jiyateya juhua tojishano pueyano na quiniuriani, nojuajaari cararosaanutianiya. Saniniujia, cante tama na cuaqueyajaaja jiyateya juhua panishoo pueyanoni, nojuajaari maninia jiyatesaanutianiya juhua tojishano pueyanora.

<sup>12</sup> Jesuuri na masuuna pueyano sequereehujaj:

—Quiaa jaara queranacunu paniya, majaari quia masuunu saaja quia rupuenaa, quia tapueyocua, quia panishano pueyanio. Naajuhuj, majaari quia masuunu quia shuriucua quiniaa casamiriaca pueya. Quiaa jaara nojori masuure, nojori quia masuunutianiya saniniujia. Naacujitij, quiaari tari namishaarohuacuaaja. Cunora, majaari socua quia masenu quiniutianiya Pueyasojinija. <sup>13</sup> Naaratej, quiaa jaara queranacunu paniya, quia masuure casamijiunucua pueya, sesaruneca pueya, sesacujuanucua pueya, cariyojuarujurino. <sup>14</sup> Naacujitij, quiaa jaara naa miiri, quiaari shuquiriaatia quijia quiniutianiya cutara. Majaari nojori naata masuunu quiajanija saniniujia. Naaratej, Pueyaso cutaraari maninia miiniutianiya quiajanija saniniujia, na samiitianijosacariuhua maninia miijia pueya.

*Miriqui Jesu pohuatasano na queranacunujini*

*(Mt 22.1-10)*

<sup>15</sup> Jesuta cajiyano pueyano tojishacari naa Jesu pohuatasantej, Jesu sequereeri:

—¡Shuquiriaatia quijia cutaraari cuno, cante Pueyaso shuriucua miaquenutianiya jiyocuaaanuni!

<sup>16</sup> Jesuuri na sequeree:

—Tamonu pueyanoori queraatia sumatuquiaari pueyata na queranacunura. Nojuajaari coteenu queraatia pueya masuquiaari. <sup>17</sup> Quera miaquenuusacari, na seru jiyaroreeri na masuusanu pueya na sequenura: “Miji, puetunujanaa tari jeenucusaaree niaacuai. Nia miaquesee”.

<sup>18</sup> Puetunu masuusano pueyajanaari juhuacatecara sequequiaari maja na naata quianu miaquenuucua. Coteenu masuusano pueyanoori cuno seru sequeree: “Janiyari shusha maseree tamonu cuhuariquiani. Janiyari nocua quiaa na niquiniucua. Cua jiyanoori quenaaja. Maja cua naata quianu quiata queranacunuucua”. <sup>19</sup> Tamonu masuusano pueyanoori sequeree: “Janiyari diez poonijiojuaca juyaca masereeni. Na saniniucua quiaanjia. Quiocua cua jiyanoori cua quiaaquishacari queranacunujinia”. <sup>20</sup> Tamonu masuusano pueyanoori sequereehujaj: “Shusha camiriinjia. Cunora, maja cua naata quianu”. <sup>21</sup> Seruuri tamajaaja tacateyarohua na camarnu tiajiniohua. Na jiyaniija pohuatasuhua na masuusano pueya sequesanoori. Na jiyaniijaari juaaqui. Na seru sequereeri: “Ritia quia quiaare tamasa pueya masuunuucua tiaca nucuaacaco. Miji quia rijocoo casamijiunucua pueya, sesaruneca pueya, sesacujua pueya, cariyojuarujuri pueyanio”. <sup>22</sup> Seru tiuquishacariuhua, na jiyaniija sequesuhari: “Jiyaniijanaa, janiyari tari miirini taa quia sequeree janiyacuajani. Juhuanajuaja maja tia mishiniu”. <sup>23</sup> Na jiyaniijaari na sequeree: “Socua pueya quia pajecoo tiaca nucuaacaco, tamasa tiacajiniara nucuaacacoo. ¡Socua pueya quia nenecojocoo nojori niniuria, cua tia mishiniuria! <sup>24</sup> Seetanujanaa nia sequeyanija, coteenu cua masuusano pueyanijinijini, majaari quenaaja niquiriyatu nojerijinjini saniniu quiniutianiya cua sumatusano”.

*Saja tama na cuaqueya panitajajaarija na naata Cristo nuhuajini*

*(Mt 10.37-38)*

<sup>25</sup> Jiyanohua queraatia pueyari Jesuta quiojoriquiaa. Jesuuri nojoriicua tacateree. Nojori sequereeri:

<sup>26</sup> —Cante cucua nia quia pueyano na quiniuriani, nojuaja cuaara niishiiria nio. ¡Maja nia naata quia pueyano nia quini nia paniyaquishacari janiya socua nia quejiniji, nia nucujinjini! Nia niquiocua, nia niquiohua, nia tapueyocua, nia rimiatuhajuhuj, nia panishacari nojori socua janiyajiniji, ¡majaari nia naata quia pueyara nia quini! Naajuhuj, ¡majaari quenaaja nia naata tama nia cuaqueyajaaja panija nia quini socua

janiyajiniiji! <sup>27</sup> Cante tama na cuaqueyajaaja panitiaaquijia cucuarani, majaari na naata cua pueyanora na quiniu. <sup>28</sup> Niaa jaara jiyaconaja tia tianu paniri, ¿majate coteenu nia cajiniu nia niishiriojonura taa cumaneecate panishaanutaniyani, na tucuatunura puetunujuaana? Naajuhuaaj, niaari niishiriojiya, queraatia quiyacuajate nia cumaneeca. <sup>29</sup> Niaa jaara coteenu naa miyaquiri, niaari najuhuaana morijiucua nujuatejonutaniya, na nuhuaji majaari socua nia cumaneeca quiniu nia tucuatunura nia tia. Puetunu nia tia niquiniaajanaari juhuacatecara nia macaatiniutianiya. <sup>30</sup> Nojoriiri sequenutaniya: “Cuno pueyanoori tianu coteecanu najuhuanaj. Majaari na naata na tucuatunu quiar-ijia”. <sup>31</sup> Naajuhuaaj, jiya jiyaniijia jaara quianu paniri narta jiyaniijata miaquetoona, ¿majate coteenu na cajiniu na niishiriojonura, na naatate diez mil na pueyata shocotanu cuno tamonu jiyaniijia, nocua niyano veinte mil na pueyatani? <sup>32</sup> Cuno jiyaniijia jaara niishiri, maja na naata na shocotanu quiniutianiya narta jiyaniijia nocua niyano, majaari na miaquetoonu quiniutianiya. Saniniuujia, tucuaaanu narta jiyaniijia quishacari-ijia, nocua jiyaramiquiniutianiya na pueyari, nata nojori pocoojonura maninia, nojori jiyanootoonura. <sup>33</sup> Naajuhuaaj, niaa jaara carteyaquiri puetunu nia jiiitasanojuanaa, majaari nia naata cua pueyanora nia quiniu.

*Miriqui Jesu pohuatasano shonijiniiji*  
(Mt 5.13; Mr 9.50)

<sup>34</sup> Shoni jaara tiqiriiquia quiya, maniniaari, pa panishano. Jaara shaacara quiqii, ¿taate na naata tiqiriiquiara na quiniuhuani? Maja na naata. <sup>35</sup> Najuhuaana quiyari. Majaari quenaaja maninia na quiniu cuhuariquiajinia jatasocoriquiano maninia na moritianiniuria natacuaca. Majaari quenaaja maniniajuhuaj, na paatishaanura na moquijianura, natau pajama nojosocoriquiano. Jaara naa maninia quiyaquiritij, nareja jatashiyari. Cante numaaracani, cuaara tojtiaara miriqui cua pohuatasano. Cuaara na niishiirijuhuaaj. Seetanujuaana cua tojtiaaja pueyani, nojoriiri juhua shoni mijiria.

## 15

*Jesu pohuatasano miriqui tashucucano borregojiniiji*  
(Mt 18.10-14)

<sup>1</sup> Roma tiacajinia quijia jiyaniijara cumaneeca masejona, mariyata sesa miijiaa pueyari Jesuucua nijioriquiaa na pohuatasano nojori tojtianura. <sup>2</sup> Cuno pojoriiri Fariseocuaa soosano pueya quiriquiaa, Moisés Rootasanojiniji niishitiojona soosano pueyano. Cunora, Fariseocuaaari, mariyata Moisés Rootasanojiniji niishitiojonaari tama rimiaaqueturiquiaajaaja Jesuucua. Naa pocaturiquiaa Jesuuri:

—Cuno pueyanoori sesa miijiaa pueya shanacuquiaa nocua nojori nijionura. ¡Juhua-janiya nojoritia miaquequiaajaariuhuaaj!

<sup>3</sup> Naaratej, Jesuuri nojori niqiuara pohuataree nio miriqui pohuatasano:

<sup>4</sup> —Niaa jaara cien borregohua jiiitariquia, nojoriijiniinio niquiriyatunioyua jaara tashucuaare, ¿taa nia miiquiaani? ¿Niaatucua nia noventa y nueve borregohua cureeno tiujiaaquiri rupaquijia cuhuariquiajinia, tashucucano borrego nia pajenura, niaa cuaara na riuriatarohuaajatija? Taaquiririniij. Niaacuaajaari naa miiquiaaquij. <sup>5</sup> Niaa jaara na riuriatasee, niaari nia shuquiriniutia na paquihua nia numueecuaji. <sup>6</sup> Niaa jaara na tiuquitarohua nia tiajiniohua, niaari nia rupuenaa, mariyata nia shuriucua quiniaa rerejotenutaniya nia sequenura nojori: “¡Cuata nia shuquiriri quiarijia! ¡Tari riuriatarohua cua borregonioyua tashucuanonijia!” <sup>7</sup> Seetanujuaana nia sequeyanijia, naajaariuhuaaj, jiyocuaaanu quiniaari jyanohua shuquiritiuquiaa niquiriyatu sesa miijia jaara noojia tacatore sesa na miiniujiniiji. Cuno pueyanoori socua jyanohua shuquiritasano tamasa noventa y nueve pueyajiniiji, canapuetucuaa tari maninia pueyacuani.

*Jesu pohuatasano miriqui juurequetesano cumaneejiniiji*

<sup>8</sup> Naajuhuaaj, tamonu maaji jaara diez cumaneecaraca quiri, jaara niquiriyatu juure-quetere tiajiniaaco, ¿maatucua taa miirini? Na samaritiu noshitiniutianiyaari, na tia na netoonujunura. Pueyaracaanu jacaria na pajenutaniyaari cuaara na riuriatatareajatija. <sup>9</sup> Na riuriatasacari na juurequetesano cumanee, maajiiri na rupuenaa, mariyata na shuriucua quiniaa maajipohua rerejotenutaniya na sequenura nojori: “¡Miji nia nimia! ¡Cuata nia shuquiriri! ¡Tari riuriatarohua cua juurequetesano cumaneenijia!” <sup>10</sup> Seetanujuaana nia sequeyanijia, jiyocuaaanu Pueyaso seyari naa shuquiriquiaajuhuaaj sesa miijia jaara noojia tacatore sesa na miiniujiniiji.

*Jesu pohuatasano taa tamonu pueyano jiyanooquiaari neyanuni*

<sup>11</sup> Na nuhuaji, Jesuuri nio pohuatareejuhuaj:

–Tamonu pueyanoori caapiqui niyanuraca quiquiaari. <sup>12</sup> Socua naatujuaari na que sequeree: “Cua quena, quiarjia cua niqutiore quia jittiasanojiniji, quiria quiriquiano quiaa jaara shaajeyare”. Naacuajitij, na queeri puetunu na jittiasanojuanaa niqutioree necohua. <sup>13</sup> Socua naatujuaari rupaquijia camuenujuquiaari na que tiajinia. Na nuhuaji, puetunu na que niqutiosanojuanaa nojuajani, nojuajaari saniniuujia tamasca na niqutioree na cumaneecara. Na nuhuaji, na cumaneecata quiaquiaari tucacaanuuri, tamonu jiyajinia. Cuniqiu, puetunu na cumaneecajanaa puecaquiaariresi sesa na miiniutia. <sup>14</sup> Nojuaja jaara puetunu na cumaneeca puecaquiaarijianaa, cuno jiyajiniaari jiyanohua miaaesacari quiquiaari. Mashajaari juhuacatecara miaajequiaari. <sup>15</sup> Cunora quiaaree tamonu tahuecua cuno jiyajiniaari, nera na poonijionura. Cuno tahueri na jiyaroree na cuhuariquiajinia na cushiya na cojuanura. <sup>16</sup> Mashajaari cushiya miaquesano miaquenu paniriquiaa juucua na miaajenuta. Cunoori tamaatia purootu cocua quiquiaari. Majaari tamonu pueyano niqutionu quijia quenaaja na miaquesocoriquiano. <sup>17</sup> Na nuhuaji, tama sequereearjia: “Cua queeri queraatia na tiajiniaaco seyaraca. Nojoriiri maninia miaquenuquiaa taquiya. Nojori sumatuuri cureequiaajuhua. ¿Janijarijiaitaj? ¿Janijari niya quera cusoya cua miaajenutani! <sup>18</sup> ¿Cua queecua tacateyarohuaraqui! Janiyacua na sequesuhuanu: ‘Cua quena, janijari Pueyaso miiquianu sesani. Janijari sesa miiquianu quiajanijuhua. <sup>19</sup> Majaari socua cua sequenu quia niyanuta. Janijari puera sesa miijiani. Cua jiyatere juhuari juhua quia seru cua quiniuria, quiaara cua poonijionura’ ”. <sup>20</sup> Naa na niishiriojonu nuhuajitij, mashajaari quiaquiaariuhua na queecua.

“Tucacaanu na quishacarijia na que tiajiniji, na queeri na niquirii. Nocua taraajereeri. Nocua neteyareeri na naacunura. Na cacaseeri. Na nujuuneequereeariuhua. <sup>21</sup> Neyanuuri na que sequeree: “Cua quena, janijari sesa miiquianu Pueyasoni, quiajanianio. Majaari cua sequenu quia niyanuta”. <sup>22</sup> Na queeri saaja na tiaco seya sequeree: “¡Ritia! ¡Socua maniniuqui toque miji nia riguioo! ¡Niocua quianu cushitirinoj! ¡janiisho nia cushitiri! ¡Sapatu nia cushitirijuhua! <sup>23</sup> Pa riuutianishano juunu niqiojua nia quiaoco mosocoriquiano. Quiarjia pa queranacure. Pocua miaquenuureni, quianu pa shuquiriasacari. <sup>24</sup> Nio quianunijoujaari juhua macu quiriquiaa. Quiarjia samiitiarohuari. Nojuajaari shaajequiaari. ¡Tari pocua muetarohuari!” Naacuajitij, nojoriiri juhuacatecara queranacuaari.

<sup>25</sup> Jiyacaritij, jiyapueranuuri cuhuariquiajinia quiriquiaa. Na tacatesacariuhua tiajiniohuara, jaara tari cateca quiriquiaa, saaja pueya tojirii jaaquequenuyanoori, nianujuniuyanonio. <sup>26</sup> Naaratej, na que tiaco seru piiriiri: “Miji, cua sequere, ¿casaara tiajinia cojuatuneshiyani?” <sup>27</sup> Seruuri na riuucaree: “Quia nuhuajishanacuaa tari tiuquiriohuano. Quia queeri shuquiriaatia quia maninia na tiuquishacariuhua, maja cusos. Naaratej, canaa sequereeri querasapiquia juunu niqiojua canaa monura”. <sup>28</sup> Jiyacaritij, jiyapueranuuri jiyanohua juaaqui. Majaari tiajinia na tiuquiniu paniniu quiriquiaa. Nocuaji na queeri nocua tohuatamaa carijiniacuma, na nenecojonura tiajinia na tiuquiniuria. <sup>29</sup> Na que sequeree saajaari: “Quiaacuajaari niishiya, janijari pueyaracaanu poonijioquiaa quiarani. Majaari quenaaja cua tarijonu quiquiaa quiajanija. Naa maninia tojjia cua quishacari quiajanijatej, ¡majaari quia niqutionu quiquiaari janija quenaaja niquiriyatu cabranijouja, cua queranacunura cua rupuenaa! <sup>30</sup> Quiarjia saniniuujia, quia niyanu seque tiuquishacariuhua, ¡quiaari querasapiquia juunu niqiojua moree nera! ¡Nojuajaari quia cumaneeca puecacanua paanatuji!” <sup>31</sup> Na queeri na sequeree: “Sanajanaa, quiaari pueyaracaanu cuata quia. Puetunu cua jittiasanojuanaari quia casaa. <sup>32</sup> Naajaa, quiarjiani, maninia pa queranacure. Shuquiriaatia pa quirij. Quia tarajanuuri juhua macu quiriquiaa tari. Quiarjia samiitiarohua pajaniyaraari. Nojuajaari juhua tashucacacu nuhuaji. Quiarjia pocua muetarohuari”.

## 16

*Miriqui Jesu pohuatasano pueyanofiniji, cante na jiyaniijia cumaneeca riutiocujuani*

<sup>1</sup> Jesuuri na pueya pohuataquiaari nio miriqui pohuatasanojuhuaj, nojori na niishitiojonura:

–Tamonu casamiriaca pueyanoori tamonu pueyano jittiaja na casami cojuariquiano, na cumaneecano. Tamasaca pueyari cuno camarnu pohuataree na seruna na cumaneeca riuticoriquiaa jiyasohuaa, tama nerajaaja. <sup>2</sup> Cunora, jiyaniijiaari cuno na seru sequeree: “¿Taa quia miiquiaa janijani? ¡Quiaana sesa miiquiaa! Quiarjia cua niqutiore quia naajiotasano puetunu quia miishanojinijianaa. Majaari socua quia quiniu quiniutianiya cua casami cojuana”. <sup>3</sup> Cunora, cumaneeca cojuanaari niishiriojooquee. Tama sequereearjia: “¿Taa cua miiniutianiyarini cua jiyaniijia jaara cua jatere cua

poonijiosanojiniji? Janiyari maja cumueecani, cuhuariquiajinia cua poonijionura. Naajuhuj, jiyanoahua cararaatiari quiria, pueyajiniji nareja cua mashiniquijionura cua panishano. <sup>4</sup> ¡Jaj! Tari niishiquiinijia taa cua miiniutianiyani tamasa taraajenura cucua, nojori masuunura janiya nojori tiajinia cua quiniuria, janiya jaara nio poonijiosanojiniji jataasa reni”. <sup>5</sup> Naaratej, nojuajaari naa miiquiaari. Juhucatecara sequequiaari pueyari, nojori nijionura nocua, canapue na jiyaniijia niqutiojoquiaari casamicuajani. Coteenu tiuquinia pueyano nequesotareeri: “¿Casaa cua jiyaniijia niqutiojocanu quiajanianiyani?” <sup>6</sup> Pueyanoori na riucaree: “Cua niqutiojocanu cien patacocua mishaja shiyocuan”. Cumaneeca cojuanaari na sequeree: “Ritia quia cajiri. Niya quiya quia masesano casamijiniji naajiotasano. Tamonu quiarinio quia miiri. Quia naajiotare saaja cincuenta patacocua mishaja shiyocua”. <sup>7</sup> Na nuhuaji, tamonu pueyano nequesotareeri: “¿Quiajanianiyariuhuj? ¿Casaa cua jiyaniijia niqutiojocanu quiajanianiyani?” Na riucareeri: “Cua niqutiojocanu cien canaasatu mishaja trigoni”. Cumaneeca cojuanaari na sequeree: “Niya quiya quia masesano casamijiniji naajiotasano. Tamonu quiarinio quia naajiotare saaja ochenta canaasatu mishaja trigo”. <sup>8</sup> Na jiyaniijia jaara niishiquiaari sesa na seru miishano, na sequereeri: “¡Quiaaquii jiyanoahua niishijia tama quia cuaqueyajaaja quia cojuanura!”

Seetanujanaa pueyanaa, Pueyaso niishiyashijiaa pueyari socua jiyanoahua niishijiaa cuhuashiqui quijiaa pueyajiniji. Nojori cutaraari niishijia maninia nojori miiniuria narta pueya, pueya paniniuria saniniuuja nojori.

<sup>9</sup> Naarate nia nacasujanijia, naa capora nia quirijiuhuj, maninia nia miiniuria pueya. Maja nia casami nia jamuenu. Cunocujaari nareja Pueyaso niqutiosano nijaniana. Naacujitij, capora nia quishacari mijiria jaara puequema, nia Jiyaniijaari nia tiuquini-tianutaniya pueyaracaanu quishaquí jiyocuaaanu, jiyanoahua na shuquiritiasacari nijaniana.

<sup>10</sup> Pueyano jaara jiyatesaare secaja casami cojuana na quiniuria, nojuaja jaara maninia cojuaquiaa cuno secaja casami, na camarnuuri nocua tiuuniutianiya. Naaratej, na camarnuuri queraatia casami cojuanara na jiyatenutaniya. Saniniuuja, cante jiyatesaare secaja casaa cojuana na quiniuriani, cuno pueyano jaara secaja na cojuasanojiniji nohuasejoquiaa jiyasohujaja, majaari tari nocua tiuushaanu. Nojuaja jaara jiyatesaare queraatia casami cojuanara, naa nohuasejonutaniyajaariuhuj. <sup>11</sup> Naajuhuj, niaa jaara maninia jiiitaaquiquiaa mijiria casami, Pueyasoori niaacua tiuyaquiniutianiya seetanujanaa maninia jiyocuaaanuji casami nia jiiitianura. <sup>12</sup> Naacujitij, niaa jaara tamonu pueyano casami cojuaaquiquiaa maninia, ¿Pueyasotucua taa niqutiore niaarano na riuriotacani? Maja cutaraari nia niqutiosaanu quiniutianiya.

<sup>13</sup> Poonitijosano pueyanoori maja na naata caapiqui jiyaniijiaara poonijionu. Jaara caapiqui jiyaniijiaraca quiri, tamonu samiritiaari, na panishacari tamonu. Naajuhuj, niquiriyatu jiyaniijia tojjia quiniutianiya maniniaari, na soosacari tamonu. Naajuhuj pueyanaa, majaari nia naata Pueyasocua jiaatianu, cumaneecaacuanio. Niaa jaara cumaneeca panijia quiri, niaari cumaneecara poonijiotesaanutaniya saaja. Naacujitij, Pueyasoori maja na naata nia poonitijionu nera.

<sup>14</sup> Fariseocuaacari jiyanoahua cumaneeca panijiaa quijia. Naaratej, nojori tojishacari Jesu sequesano, nojoriiri saaja na rerequeteree. <sup>15</sup> Jesuuri nojori sequeree:

—Niaacujaari tama nia cuaqueyajaaja jiyatequiaa sapuenu pueyano maniniu nia niqushaanura. Pueyasocujaari nioojia niishiya. Niaari pueya jiyajenetequiaa nojori jyanishacari niaari Pueyaso panishano cutara, queraatia casami nia jiiitiasacari. Saniniuuja, casaa pueya jiyatequiaa socua jiyanoahua na panishanorani, Pueyasoori cuno soya cutara.

*Moisés Rootasanoori coteenu quiquiaari, quiarijia quiya cutaraari quiarinio Pueyaso Rupaa*

<sup>16</sup> Moisés Rootasano, mariyata puetunu tariucuaaanu Pueyaso sequenu panishano caminiujuiniaa pohuatasanojuanaari pueya tojitasocoriquiano quiquiaari, Tiuquinijiona Juan pohuatasanojuhuaj. Quiarijia saniniuuja, maninia rupaa Pueyasojinijiri pohuatasaaquiaa, taa Pueyaso jiyanooniu paniya pueyani, na muerasu nojori quiniuria. Quiarijiani, puetunu pueyajanaari jiyanoahua saniniujiya Pueyaso muerasu nojori quiniuria.

<sup>17</sup> Nio jiyari shaajeriquiano, jiya cajiniocuanio. Saniniuuja, tariucuaaanu pueyara Pueyaso sequesano caminiujuiniaa pohuatasano cutaraari maja na shaajenu quiniutianiya quenaaja.

*Jesu niishitijosano, pueyano carteyaquiniuria necocua  
(Mt 19.1-12; Mr 10.1-12)*



<sup>18</sup> Pueyano jaara necocua cartere tamonu maajitia na caminiuria, cuno pueyanoori jyanohua sesa miya Pueyaso niquiara. Naajuhuj, cante cartesano maajitia camiyani, cunoori sesa miyajuhuj.

*Jesu pohuatasano casamiriaca pueyanojiniji, Lázarojinjinio*

<sup>19</sup> Casamiriaca pueyanoori quiquiaari. Jyanohua maniniuqui toqueya cushiyojoojuaari, juhua jyanijianucua toqueya. Jyanohua na shuquiriniutia, puetunu juucajanaa queranacujuaari. <sup>20</sup> Jiyacaritij, casamijiu pueyanoori quijiajuhuaj. Jyanohua sapueyaraca. Nojuajaari cuno casamiriaca pueyano tia tohuateyaji nojotasano puetunu juucajanaa. Na sesaari quijia Lázaró. <sup>21</sup> Nojuajaari casamiriaca miaquejajiniji totinijosano raacua miaguenu panijia juucua. Saaja sareyari na sapueya rimianacunuujua. <sup>22</sup> Na nuhuaji, cuno casamijiu pueyanoori cusoquiaari. Pueyaso seyari na riquiaari supuetana Abrahamta na quiniuria, Pueyaso muerasurano shanohua quiquiojinia. Cuno casamiriaca pueyanoori cusoquiaarijuhuaj. Jamosaquiaariiri. <sup>23</sup> Sesa miijiacarano quiquiojinia na quishacari, naquiya na miishacari tii, nojuajaari mauquiaari. Cuniqiji tucuaaanu niquirii Lázaroori, shuquiriaatia quiyano supuetana Abrahamta. <sup>24</sup> Casamiriaca pueyanoori nacaree: “¡Cua supuetana Abrahamna, cucua quia taraajere quenaaja! ¡Lázaró quia jiyarore cucua! ¡Cuaara na juaashiquia nacatu shiiria mohuacajinia! ¡Cua niti shiniajaquee quenaajacua! ¡Janiyari puera jyanohua naquiya miya nio manijimiani!” <sup>25</sup> Abrahamri saaja na riu-cuaree: “Sanajanaa, quia niishiri taa jyanohua maninia quia quiquiaarini, pueyara-caanu jiyocua quia quishacari. Lázaroori saniniuujia jyanohua taraatia quiquiaari pueyaracaanu, jiyocua na quishacari. Lázaroori quiarjia niya cumanijiashiya. Quiaari saniniuujia naquiya miishiyacujua. <sup>26</sup> Naajuhuj, jyanohua tucuaa tacoori pa tajinia quia. Cunora, cante niqiji niuuniu paniya cuniqijiria quiocuani, majaari na naata. Naajuhuj, cante quia quiquiojiniji niuuniu paniya niqijiriani, majaari na naatajuhuaj”. <sup>27</sup> Casamiriaca pueyanoori supuetana Abraham sequerohuacuhuj: “Naa naasucua cu supuetana Abrahamna. Naajaa, quia secojyanijia, Lázaró quia jiyarorohua cua que tiajinia. <sup>28</sup> Tii quijajaari cua tapueyocua. Cinco tarajanuhuaracanjia. Lázaró cuaara nojori numooteera, maja nojori quejoosaanurajuhua nio saniitiosaqui quiquiojinia”. <sup>29</sup> Abrahamri na riu-cuaree: “Nojoricuajaari Moisés Rootasano jiiitia, puetunu Pueyaso sequesano caminiujunaa naajiotasanojuanaanio. Quia tapueyocua cuaara tojtiaara cuno”. <sup>30</sup> Casamiriaca pueyanoori riu-cuaree: “Naa naasucuatuhuj, cua supuetana Abrahamna. Naajaa, tamonu pueyano macunucujajinjinio jaara muetarohua nojoricua, nojoriiri noojia tacatonutaniya sesa nojori miiniujiniji”. <sup>31</sup> Abrahamri saaja na riu-cuaree: “Nojori jaara Moisés Rootasano tojtianu paniyaquiquiaa, Pueyaso sequesano caminiujunaa naajionuutasanonio, majaari nojori tojtianu quiniutianiyajuhuj, macu pueyano jaara samiitiarohua”.

## 17

*Puereetaari quiniutianiya sesa miijiacara*

*(Mt 18.6-7, 21-22; Mr 9.42)*

<sup>1</sup> Na nuhuaji, Jesuuri na pueya sequequiaari:

–Mijiria, pueyari pueyaracaanu sesa miitishaaquiaa. Jyanohua taraatia quijiaari cuno, cante sesa miitirii tamonuni. <sup>2</sup> Jiyano pueyanoratej, maara socua maninia quiri nera, puereetuca saaja jaara na riquiajiniji morotasaare, shoniniacu caminia jiuujajinia jartasocoriquiano. Jaara naa miishaaretej, maara maninia quiri, maja sesa miijiaara na jiyatenura niquiriyatu nio muerasuniyojajinjinio. <sup>3</sup> Cunora, tama nia cuaqueyajaaja nia cojuare maja quenaaja sesa nia miitiniuria pueya.

‘Quia tarajanu jaara sesa miiri, quia nacasurenoj. Nojuaja jaara taraajerohua sesa na miiniucua quiajaniya, quia jyanoorinij. <sup>4</sup> Nojuaja jaara sequeyarucua sesa miya quiajaniya niquiriyatu juuca, naajaa, quia jyanooriquia, nojuaja jaara quia sequere: “Sesa miirii quiajaniyanijia. Cua jyanoori quenaaja”. Nojuaja jaara quia pacutejore sesa miiniu siete cuno juucaja, naajaa, majaari na tarinitianu jyanooniu.

*Pueyasocua tiuujia pueyanoori jyanohua cumaacaraca*

<sup>5</sup> Jesu saquiriojosano pueyari Jesu sequequiaari:

–Jyaniijianaa, socua jyanohua canaa quia tiuutiri Pueyasocua, socua cumaaca canaa jitianura.

<sup>6</sup> Jyaniijia Jesuuri nojori riu-cuaree:

–Pueyasocua nia tiuuniu jaara quiri quenaaja juhua mostaza jajauniyojua, jyanohua shiitianiyojua, niaa jaara nio satuna jiyona sequere: “Niiquiji quia pacure. Moojinia quia nujuasee”, maara nia sequesano tojiri.

*Pueyasora poonijionatucua taa miijia quiriquiani*

<sup>7</sup> Níaa jaara seruraca quiriquia, nojuaja jaara tajinia tiuquiriohua quia cuhuariquia-jiniji tee na namitiariquiaacuajani, quia seya cojuanujiniji soj, ¿niaatucua na sequere: “Miji, quia miaquesuhaja”? <sup>8</sup> Majaruhua. Niaari saaja na sequenutaniya: “¡Quiria quia sumature! Cua mianuutere coteenu. Cua raaterejuhuaj. Cua miaquenu nuhuaji, quiocua saniniuuja miaquerohua. Quiocua raturohuajuhua”. <sup>9</sup> Na nuhuaji, nia seru jaara puetunu nia sequesanojuanaa miiri, ¿niaateeri na sequequiaa “paacarasho”? ¡Maja! <sup>10</sup> Naajuhua, niaa jaara puetunu Pueyaso sequesanojuanaa miiri, tama nia sequere-jaaja: “Janiyari maja maninia seruni. Majaari tama cua niishitiajajiniijiaaja cua miiniu quiquiaa cua Jiyanijiaara. Janiyari saaja pueyaracaanu paniquiaa cucua na tequejonura juhua naatujuacuani”.

*Jesu naatanijosacari diez pueya, lepraraca cusosuhua*

<sup>11</sup> Jesuuri Jerusalén tiacajiniara na pueyata quiariquiaacuahuaj. Jiyacari, Galilea jiya, Samaria jiya tajiniaaco quiariquiaari. <sup>12</sup> Quera na tiuquishacari shiitianiyojua tiacajinia, diez pueya lepraraca cusosuhuari na naacuquiaari. Nojoriiri tucuaaanujijia Jesuucua ji nujuatusee. <sup>13</sup> Nojoriiri Jesuucua nacaree:

—¡Niishitiojona Jesunaa, canaacua quia taraajere!

<sup>14</sup> Jesu niquishacari nojori, nojori sequereeri:

—Nia cuaqueya nia niqutishii pueyacuara secojona, taa supuetana Moisés seque-quiariacuajani.

Nojori canujuucuatucarajia, nojori cusuuri shaajequee. <sup>15</sup> Tamonu nojorijinjinio niquishacari na cuaqueya tari cushiriqui, nojuajaari Jesuucua tacateyarohua. Nojuajaari na rupaa paaretariquiaa na maniniuhuaqueetasacari Pueyaso. <sup>16</sup> Jesu cariquimijia mojoquetaseeri. Jiyocuara naniriiri. Jesu sequereeri: “¡Paacarasho Jesunaa!” Cuno pueyanoori Samaria jiyajinjinio tahue quiquiaari. <sup>17</sup> Jesuuri na pueya niquiara naa sequere:

—¿Majateeri diez cusosuhua naatanijosaanu quirii? ¿Teeteeri narta naataconohua nueve pueyani? <sup>18</sup> ¿Saaja nio tahueteeri tacaterohua Pueyaso na maniniuhuaqueetanura?

<sup>19</sup> Na nuhuaji, Jesuuri cuno tahue sequere:

—Quia sanere. Quia quiaarohua. Quiaacuaja naatarohua cucua quia tiuuniucua.

*Taa na quiniutianiyani, Jiyanijia Cristo tiuquishacariuhua*  
(Mt 24.23-28, 36-41)

<sup>20</sup> Fariseocuacaari Jesu nequesotaquiaari taacari Pueyaso Jiyarosocoriquiano ninu-tianiya jiyaniijara na quiniuria mijiriani. Jesuuri nojori riucaaree saaja:

—Pueyaso Jiyarosano jiiatasacari na muerasu, majaari namijiaa niquishano. <sup>21</sup> Majaari na naata sequesaanu: “Niya quia pa Jiyanijia quiquio”, “Jati quiyaruhua”. Pueyasocua-jaari tari niya jiiata na muerasu nia tajinia.

<sup>22</sup> Na nuhuaji, Jesuuri tama na pueyajaaja sequequiaari:

—Na nuhuaji, taraatia quishacariiri quiniutianiya. Niaari cua niquniucua jiaatianu-taniya niaata cua quiniuria rupaquijia, taa niaata cua quia quiarijiacuaani. Majaari nia niquniu quiniutianiya janiya. <sup>23</sup> Tamasacaari nia sequenutaniya: “¡Niya quiyacuaja nia Jiyanijia!” Tamasacaari saniniuuja sequenutaniyacujua: “¡Noj, jati quiyatej!” Majaari nia tojinu jiyano pueyatej, nojori jaara naa nia sequeriquia. Majaari nojori neteyotanu najuhanaj. <sup>24</sup> Mijiria cua tacatesacariuhua, cuno juuca, janiyari niquishaanutaniyani, naatej, taa miacana puetunu jiya cajiniocuajanaa niquishaaquiacaana ni nunujusacari.

<sup>25</sup> Saniniuuja, mijiria cua quishacarijia, janiyari coteenu jiyanohua naquiya miishaanutaniyani. Nio pa quishacari pueyari cua paniyaquiniutianiya. <sup>26</sup> Quera cua tiuquiniu panishacariuhua mijiria, naa quiniutianiyari taa mijiria quinia pueya quiquiaaricuaa supuetana Noé quishacari. <sup>27</sup> Naa quiquiaariiri cuno quishacari. Mijiria quinia pueyari juhuajaniya miaquenuujua. Raruujuaari. Juhuaaniya maaji camiyojuaari. Pueyari necojori camiyoteja. Pueyari naa juhuajaniya miijioriquiaa Noé jaara tiuquitiaquiaari na pueretuca buquejinia. Canashyaquiji, maruuri jiyanohua niquiaari. Puetunu mijiria quiniaajanaari cusuquiciaari pajaacajinia. <sup>28</sup> Naa quiquiaarijuhua supuetana Lot quishacari Sodoma tiacajinia. Cuno pueyari juhuajaniya miaquenuujua. Raruujuaari. Casami masejojuaari. Juhuaaniya na casami niqutiojuaari. Na cuhuariquiaa natojuaari. Na tiacara tiajojuaariuhua. <sup>29</sup> Naa juhuajaniya nojori quishacarijij, Lotri tohuataquiaari Sodoma tiacajiniji. Jiyacaritij, maniiri asufreta cojitishano juhua maru niquiaari jiyocuacuanu. Puetunu cuno sesa miijiacajanaari manijinia catequiaari. <sup>30</sup> Naa quiniutianiyajariuhua quera jiya puequesacari. Pueyari juhuajaniya quiniutianiya. Janiyari jiyacari canashyaquiji tiuquiniutianihuani.

<sup>31</sup> Cuno juuca, pueyano jaara na tia cacojiria quiya, cuaara roseyaquiiria na casam-  
ica tiajiniaaco. Naajuhuaaj, pueyano jaara na cuhuariquiajinia quiya, nojuaja cuaara  
tacateyaquiuhuaa na tiajinia. <sup>32</sup> Nia niishiriquia supuetana Lot niquiocua. Na  
mashishacari, nojuajaari ritia cusoquiaari na nijiniara na niquiniuucua, na casamiuca na  
taraajesacari. <sup>33</sup> Cante saaja shuquiriaatia mijiria na quiniuria niishiriojojuani, nojuajaari  
na nuhuaji jiyanohua taraatia quiniutianiya Pueyasooju. Saniniujia, cante tama na  
cuaqueyajaaja panitiaja cua tojijiaara na quiniuriani, nojuajaari pueyaracaanu shuquiri-  
aatia quijiaara jiyatesaanutaniya.

<sup>34</sup> Cua tojiri. Cuno niucujuhuaaj, caapiqui pueya jiuriatoosacari juucua na maquetu-  
jinia, niquiriyatujuaari rishaanutaniya jiyocuaaanura, Pueyaso pueyano na quiniuucua.  
Tamonuuri tiujiasaanutaniya saniitiosocoriquiano. <sup>35</sup> Cuno juucajuhuaaj, caapiqui ma-  
jipohua riiquiniushacari jatiqui juucua, cucua tiuujaari tarajanu shuriucuaaji rishaanu-  
taniya. Tamonuuri tiujiasaanutaniya saniitiosocoriquiano. <sup>36</sup> Caapiqui pueya qushacari  
cuhariquiajinia, cua pueyanoori rishaanutaniya. Tamonuuri tiujiasaanutaniya sani-  
itiosocoriquiano.

<sup>37</sup> Jesu pueya tojishacari naa Jesu sequesantej, nojoriiri na nequesotaree:

—¿Tee nio quia pahuatasano niquishaanutaniyarini?

Jesuuri nojori riucaaree miriqui:

—Tee casaa moqueyani, mohuari tii rerejiya.

Naajuhuaaj, majaari quenaaja niquiriyatu Pueyaso tojijashijia cureneo quiniutianiya  
saniitiosoo.

## 18

*Jesu pahuatasano mashiquiojiniji, pueya nequesoreena pueyanojinijinio*

<sup>1</sup> Jesuuri na pueya pahuataquiaari nio miriqui pahuatasano nojori na niishitiojonura,  
nojori cuaara Pueyaso secojooa pueyaracaanu, nojori taacanuyaquiniutia. <sup>2</sup> Naa nojori  
sequereeri:

—Tamonuuri tiacajinia, pueya nequesoreena pueyanoori quijia. Pueyaso puereyashijia  
quijiaari, pueya rerequetejanio. <sup>3</sup> Cuno tiacajiniaja tamonu mashiquioori quiquiaariji-  
uhuaaj. Mashiquioori cuno nequesoreenaacua rucuanajojuua pueyaracaanu. Na secojo-  
juaari sesa na miinia pueyano cuaara na niquitiohuara na casaa saniniujia, sesa na  
miishanojiniji nojuaja. <sup>4</sup> Majaari nequesoreena tojinu paniniu quijia pueyaracaanu cuno  
mashiquio. Naajaa, pueyaracaanu nocua na rucuanajosacari, cuno nequesoreenaari  
socua tama sequequiaarijaaja: “Janiyari maja Pueyaso puerejani. Janiyari pueya to-  
jijashijia cutarani. <sup>5</sup> Naajaa, naa nio mashiquio taajetesacari janiya pueyaracaanutej,  
janiyari quiarijia na panishano miiniutianiya nerani, mariqui cua juaatijiore pueyara-  
caanuuri na nenecojosacari janiya”.

<sup>6</sup> Maninia na pueya niishiniuria na pahuatasano, Jiyaniijia Jesuuri naa nojori sequero-  
huacuhuaaj:

—Naa miiquiaariiri, cuno pueya nequesoreena seque. Jiyanohua pueya rerequeteja  
quiquiaariiri, naajaa, nojuajaari maninia miiquiaari cuno mashiquiora. <sup>7</sup> ¿Nia que  
Pueyasoorijiataj? ¿Niaateeri jiyaniya maja nojuaja tojinu quiniutianiya na muerasu,  
canapuate na secojoquiaani juuca, niucuanio? ¿Pueyasoteeri nia sashitiniutianiyajaara?  
¡Maja! <sup>8</sup> Nojuajaari maja na tarishiniu quiniutianiya. Ritia nia naacunutaniyari sesa nia  
miijiaa pueyacuaji. Sesa nia miijiaacari namishaanutaniya niaacua. Naaratej, majaari  
secojonu nia tarinitianu. Mijiria cua tiuquishacarihuua, ¿janiyate Pueyasoojua tiuujiaca  
riuriatanutaniya naa pueyaracaanu secojonuujuacani?

*Jesu pahuatasano miriqui Fariseo pueyanojiniji, Romano jiyaniijia cumaneeca mase-  
jojuajinijinio*

<sup>9</sup> Jesuuri socua nio miriqui pahuatasano pahuataquiaari noo pueya niquiara, canapuate  
tama na cuaqueyajaaja jiyaniijiani nojoriiri maninia pueyano. Naacuaajtij, nojoriiri  
tamasaca pueya soojee, niojori jiyaniishacari cuno pueyari socua sesa miijiaa nojorijiniji.  
Cunora, Jesuuri nojori niquiara naa pahuataquiaari:

<sup>10</sup> —Fariseo pueyanoori quiaquiaari Pueyaso Secojooja tiajinia na secojonura Pueyaso.  
Jiyacaritij, Romano jiyaniijia cumaneeca masejojuua pueyanoori quiaquiaari Pueyaso  
na secojonura tiijihuaaj. <sup>11</sup> Fariseo pueyanoori nujuariquiaa Pueyaso na secojosacari.  
Naa sequeriquiaari: “Pueyasonaa, paacarasho janiyari maja juhua tamasaca pueyani.  
Tamasaca cutaraari nohuasenujuuca, sesa miijiaa, maaji porocujuhuaaj. Naajuhuaaj,  
shuquiriaatia quiyaniijia, janiyari maja sesa miijiani juhua nio pueyanojuua niya cuata sec-  
ojiyani, cumaneeca masejona pueyanoni. <sup>12</sup> Janiyari caapiqui juuca miaqueyaquiquiaani

puetunu semaanajanaa cua shuquiritiniuria quiajaniya. Naajuhua, janiyari pueyara-  
caanu puetunu cua masesanojinijijiana niquitioquia quiarani, taa Moisés rootaquiaar-  
icuaajani".<sup>13</sup> Cumaneeca masejonaari saniniuujia tucuaacaanuji nujuasee. Na secojosacari,  
majaari quenaaja na maunu quiriquiaa jiyocuacaanu. Tama nojuajaari na jiriquia  
piquiriquiaa na taraajenuta sesa na miishanojiniji. Naa sequereeri: "Pueyasonaa, cucua  
quia taraajere. ¡Cua jiyanoori! ¡Sesa miijianijia!" Naa secojoquiaariri.<sup>14</sup> Seetanujuanaa  
nia sequeyanijia, cumaneeca masejonaari Pueyaso jiyanooshano tacateyarohua cutara.  
Fariseo pueyanoori saniniuujia jiyanoaquishoo tacateyarohuacujua. Naacujitij, cante  
tama na cuaqueyajaaja jiyateya juhua maninia pueyano na quiniuria tamajaajani, no-  
juajaari cararosaanutaniya. Saniniuujia, cante sesa na miishano seetaaquijiani Pueyaso  
jiyanooniuria nojuajani, Pueyasoori cuno pueyano jiyatenutaniya seetanujuanaa sesa  
mियाaquijia na quiniuria.

*Jesu niasacari na juaashiquia conaajaacua*

(Mt 19.13-15; Mr 10.13-16)

<sup>15</sup> Jiyacaritij, conaajaari poosaariquiaa Jesuucua, Jesu nianura nojoriicua na  
juaashiquia, Pueyaso jitianura maninia nojori. Jesu saquiriojosano pueya jaara  
niquiquiaari conaaja pooshiyano Jesuucua, nojoriiri na poonaa juaarii.<sup>16</sup> Jesuuri saaja  
conaaja poonaa sequeree, conaaja cuara nocua poosaaria. Na nuhuaji, na pueya  
sequereeri:

—Naatujoori cuara poosaaria cucua. Maja na poonaa tenujunu. Cante Pueyaso muera-  
sura quiniu paniyani, nojori cuara jiyateera tama na cuaqueyajaaja juhua nio naatu-  
jooriria.<sup>17</sup> Seetanujuanaa nia sequeyanijia, cante tama na cuaqueyajaaja jiyateyaquiya  
juhua naatujooriria Pueyaso rupaacua na tiuuniuriani, cuno pueyanoori maja na naata  
Pueyaso muerasura na quiniu.

*Casamiriaca pueyano pocoojosacari Jesuta*

(Mt 19.16-30; Mr 10.17-31)

<sup>18</sup> Tamonu Judiocuaca camarnuuri Jesu nequesotaquiaari:

—Maninia niishitiojonanaa, ¿taa cua miiniutianiyani, jiya puequesacari cua samiitian-  
ishaanura, pueyaraaanu quijiara cua quiniuria Pueyasotani?

<sup>19</sup> Jesuuri na riuuaree:

—¿Casaara quia sequeya janiya maninia pueyanotani? Saaja Pueyaso cutaraari see-  
tanujuanaa maninia. Majaari socua tamonu quiniu.<sup>20</sup> Pueyanonaa, quiaacuajaari  
Moisés Rootasano niishijia. Naa naajiotasanocujaaari quiya: "Maja quia camishoo maaji  
numuetucunu. Maja monu. Maja nohuasenu. Maja tamonuucua saquiriojotanu quia  
sapononuta. Quia que, quia nucua tojjia quia quiri".

<sup>21</sup> Pueyanoori Jesu riuuaree:

—Janiyacujaaari cua naatujuaajiniji puetunu cuno tojjijajanaani.

<sup>22</sup> Naa na sequesacaritij, Jesuuri na sequeree:

—Quiyajaari niquiriyatu casaa quia miishoojua. Nio quia miiri: puetunu quia jitianano-  
juanaa quia niquitiojore cumaneecara. Na nuhuaji, casamiiuniucua pueya cuno cumane-  
neeca quia niquitiojore nareja. Naacujitij, quiaari jiyanoohua casamiriaca quiniutianiya  
cutara jiyocuacaanu. Na nuhuaji, quiocua nimiohua cutara, cua pueyano quia quiniuria.

<sup>23</sup> Na tojjishacari Jesu sequesano, nojuajaari jiyanoohua taraajequee, jiyanoohua queraatia  
casamiriaca na quishacari.<sup>24</sup> Jesu niquishacari nojuaja taraajeyano, Jesuuri na pueya  
sequeree:

—Casamiriaca pueyara, jiyanoohua jiyajenetaari Pueyaso muerasu nojori quiniuria.

<sup>25</sup> ¿Camelloteeri na naata cusupuetaja cuhuoco tamajiria tajiniu? Maja na naata. Naajuhua,  
casamiriaca pueyanora, socua jiyanoohua jiyajenetaari Pueyaso muerasu na jatanishaa-  
nura.

<sup>26</sup> Pueya tojjishacari naa Jesu sequesanotej, nojoriiri naa na nequesotaree:

—¿Canteeri Pueyaso muerasura quiniutianiyantioj?

<sup>27</sup> Jesuuri nojori riuuaree:

—Maja pueya na naata tama na cuaqueyajaaja jiyatenu Pueyaso muerasu nojori quini-  
uria. Naajaa, Pueyaso cutaraari na naata.

<sup>28</sup> Pedroori Jesu sequeree:

—Jiyaniijianaa, ¿canaarijiaataj? Canaari puetunu canaa jitiananojuanaa tiujiaquiaarini  
canaa nuhuajiniuria quiajaniya.

<sup>29</sup> Jesuuri na riuuaree:

—Seetanujuanaa nia sequeyanijia, cante na panishano casaa tiujiaquiaari Pueyasora  
na poonijionurani: na tia, na que, na nucua, tapueyocuaca, necocua, necohua, nojuaja-  
ari socua jiyanoohua queraatia masenutaniya mijiria na quishacarijia.<sup>30</sup> Na nuhuaji,

samiitianishano quiniutianiyari pueyaracaanu shuquiriaatia na quiniuria Pueyaso ship-inishocoriquiano quiarinio jiyajinia.

*Jesu pacutesacari pohuatana, nojuaja mosaanutaniya*  
(Mt 20.17-19; Mr 10.32-34)

<sup>31</sup> Jesuuri saaja na doce saquiriojosano pueya jiyataaree tamocora. Naa nojori sequereeri:

—Paari quiarijia Jerusalén tiacajinia quiaani. Janiyari quiniqui puetunujuanaa miishaanutaniyani taa tariucuacaanu pueyara Pueyaso sequesano caminiujiuniaa sequequiaaricuaaja janiyajinjini. <sup>32</sup> Naacujitij, janiyari taha niquitiosaanutaniyani. Nojoriiri cua macaatinutianiya. Taraatia cua miituniutianiyari. Cua riocojotunutaniyari. <sup>33</sup> Cua piqutiuniutianiyajaarihuaj. Na nuhuaji, cua motunutaniyari. Naajaa, jiuujianaraca juucajinia, janiyari samiitianutanihuani.

<sup>34</sup> Majaari Jesu pueya niishiniu quiriquiaa quenaaja na sequesano. Majaari nojori niishiniu quiriquiaa casaa Jesu sequeriquiaani. Juhua miriqui sequesanoori quiriquiaa nojoriria.

*Jesu jeeacasari cariojuaru pueyano Jericó tiacajinia*  
(Mt 20.29-34; Mr 10.46-52)

<sup>35</sup> Na pueyata Jesu quishacari tari cateca Jericó tiacaacuara, cariojuaru pueyanoori nuu shuucuaji cajiriquiaa, cumaneeca na masejonura pueya tajishacari nucuaco. <sup>36</sup> Cariojuaru tojishacari queraatia pueya tajiya, pueya nequesotareeri:

—¿Casaatejanojoni?

<sup>37</sup> Pueyari na sequereeri:

—Nazaret tiacajinjini Jesucuaaja tajiya.

<sup>38</sup> Cariojuaruuri nacaquee:

—¡Jesunaa! ¡Supuetana David niquiohuacuajinio supueno pueyanonaa! ¡Cucua quia taraajere quenaaja!

<sup>39</sup> Jesu puetanaa pueyari na juaarii na sanaajanura juucua. Nojuajaari saaja socua jiyanoohua nacaree:

—¡Supuetana David niquiohuacuajinio supueno pueyanonaa! ¡Cucua quia taraajere!

<sup>40</sup> Jesu tojishacari nojuaja, nujuaseeri. Jesuuri pueya sequereeri cariojuaru cuaara jaatucusaaria nocua. Cariojuaru tiuquishacari nocua, Jesuuri na nequesotaree:

<sup>41</sup> —¿Casaa quia paniya cua miiniuria quiajaniani?

Cariojuaruuri Jesu riucaaree:

—¡Jiyaniijianaa, niquijiaara quiniu panihuaniija!

<sup>42</sup> Jesuuri na sequereeri:

—¡Niquijiaara quia quiriouhua! Quia namijiacuaaja tari jeequerohua cucua quia tiuushacari.

<sup>43</sup> Jiyacaritij, cariojuaruuri maninia niquijiaara quiqui. Jesu nuhuaji sacuaareeri na shuquiritianuta Pueyaso. Puetunu Jesu miishano niquiniaajanaari Pueyaso manihuaqueetariquiaa.

## 19

*Jesu pocojosacari Zaqueo*

<sup>1</sup> Jesuuri Jericó tiacajinia tiuquijioquiaari na pueyata. Tiaca jiuujiaaco quiariquiaari. <sup>2</sup> Cuno tiacajinia quiquiaariiri casamiriaca pueyano. Na sesa quiquiaari Zaqueo. Zaqueori Roma tiacajinia quijia jiyaniijiaara cumaneeca masejonaa camarnu quiquiaari. <sup>3</sup> Nojuajaari Jesu niishiniu panijia juucua. Majaari na naata niquiniu quiriquiaa Jesu, puera jiyanoohua pueya quiniucua Jesu shocua. Naajuhua, Zaqueori puera posucuaashi quijia. <sup>4</sup> Cunora, Zaqueori netequiaari Jesu tacoji. Nu shuucuaji sicómoro naanaaca macaseeri, maninia na niquiniuria tiji Jesu, jaara cunoco tajimia. <sup>5</sup> Jesu tajishacari Zaqueo cariquiaco, Jesuuri nocua mauree. Na sequereeri:

—Zaqueonaa, ritia quia rosemohua! Janiya quiarijia quia tijania maquenutaniyani.

<sup>6</sup> Zaqueori ritia rosemohua. Jesu tiuquinitiaree na tijaniaari jiyanoohua na shuquiriniu-tia. <sup>7</sup> Tamasaca pueya jaara Jesu niquiquiaari Zaqueo tijania tiuquiyano, puetunu nojorijianaari Jesu sesacanu coteequiaari. Tama sequeturiquiaajaari: “Cuno pueyanoori sesa mijia pueyano tijania tiuquishii”. <sup>8</sup> Na nuhuaji, Zaqueori nujuaree. Jesu sequereeri:

—Seetanujuanaa quia sequeyaniija, Jiyaniijianaa, janiyari quiarijia quiocua tiuuriini. Naacujitij, janiyari casamijiuniucua nareja niquitiojonutaniya puetunu cua jiiitasano cajiniocujiniijianaani. Naajuhua, janiya jaara puera cumaneeca masecanu tamasaca pueyajinjia cua sapojnutani, janiyari nojori niquitiojonutanihuua socua jiyanoohua queraatia cumaneecani cua nohuasesanojiniji nojori.

<sup>9</sup> Jesuuri na sequereeri pueya niquiara:

—¡Quiarijiani, nio tiajinia quiniaa pueyari tari jiyanooshaaree! Nio pueyanocuaajaari supuetana Abraham niquiohuacuajinio supuenojuhua. Nojuajaari cucua tiuuri taa Abraham tiuquuaari Pueyasooacuanaani. <sup>10</sup> Janiyacuajaari cunora mijiria niquiaarini, tashucano pueya cua pajenura, nojori cua jaariutianura Sesaaca.

*Miriqui Jesu pahuatasano diez cumaneecajiniji*  
(Mt 25.14-30)

<sup>11</sup> Tii quiniaa pueyari Jesu pahuatasano tojtariquiaa. Jesuuri tari cateca quiriquiaa Jerusalén tiacajiniji. Pueyari jyaniriquiaa Jesuuri Israel pueya jyaniiijara quiniutianiya tari, Pueyaso muerasu na jiiitianura mijiria. Nocua. Jesuuri nojori pahuataree nio miriqui pahuatasano, nojori na niishitiojonura. <sup>12</sup> Naa nojori niquiara pahuataree:

—Tamonu jyaniiijia niyanuuri quiquaari. Nojuajaari tucuaaanu tamonu jiyajinia quiaquiaari jyaniiijara na jiyatesaanura. Jyaniiijara na jiyatesaanu nuhuaji, nojuajaari tacateriquianohua quiriquiaa, narta pueya jyaniiijia na quiniuria. <sup>13</sup> Na nuhuajiria, nojuajaari diez na seya sequeree nocua nojori nijionura. Nojuajaari puetunu nojorijianaa niquitiojoree niquiriyatu cumanee, orojiniji shipinishano. Nojori sequereeri: “Nio cumanee nia poontijiore, janiya cuaara tiuquiriohuajaatiinijia”. <sup>14</sup> Na nuhuaji quiaqueeri. Na jiyajinjio pueyari maja na niquiniu paniniu quijia cuno pueyano. Cunora, nojoriiri pueya jiyaramiquirii na nuhuaji, jyaniiijajanaa nojori sequenura: “Maja canaa paniniu cuno pueyano, canaa jyaniiijia na quiniuria”.

<sup>15</sup> Naajaa, nojuajaari saaja jiyatesaaree jyaniiijia na quiniuria. Na nuhuaji, na jiyajinia tacateyarojuari. Jaara tiuquishuhua, na cumaneeca na niquitiojosano seya sequereeri, nocua nojori nijionura. Nojuajaari niishiniu paniriquiaa taa cumaneeca socua nojori reratequiaarini, nojori poontijiosacari na niquitiojosano cumaneeca. <sup>16</sup> Coteenu seruuri nocua nimiaa. Na jyaniiijia sequeseeri: “Cua jyaniiijianaa, cua poontijiosacari quia niquitiosano cumanee janiya, janiyari socua diez cumaneeca reratecanuni”. <sup>17</sup> Na jyaniiijiaari na sequeree: “¡Maniniacuaja! ¡Quiaacuajaari maninia cua seru! Quiaari secaja cua niquitiosano quiajaniya poontijioriquiaa shitimia quiria. Naaratej, janiyari quia jyatentaniya diez tiaca jyaniiijara quia quiniuriani”. <sup>18</sup> Na nuhuaji, tamonu na seruuri nocua nimiaajuhua. Nojuajaari na jyaniiijia sequeree: “Cua jyaniiijianaa, cua poontijiosacari quia niquitiosano cumanee janiya, janiyari socua cinco cumaneeca reratecanuni”. <sup>19</sup> Na jyaniiijiaari na sequereejuhua: “Quiaari cinco tiaca jyaniiijara quiniutianiya”.

<sup>20</sup> Na nuhuaji, tamonu na seruuri nocua nimiaajuhua. Na jyaniiijia sequeseeri: “Jyaniiijianaa, nia quia quia cumanee quia niquitiosano janiya. Janiyari na cojuacanun maniniani, toqueraujinia jniucosano. <sup>21</sup> Janiyari naa miiquianuni cua pueresacari quiajaniya. Janiyari niishiyani, quiaari quiarta pueyacuara taraajeyashijia. Quiaari tamasaca racatasanojiniji poojua. Quiaari tamasaca natoosanojiniji senoojuajuhua”. <sup>22</sup> Na jyaniiijiaari na juarii: “Sesaacanaa, tama quia sequesanojaja janiyari quia nequesorenutaniyani. ¿Naatee? ¿Quiaateeri niishiquianu janiyari pueyacuara taraajeyashijiani? ¿Janiyateeri tamasaca racatasanojiniji poojuani? ¿Janiyateeri tamasaca natoosanojiniji senoojuajuhua?” <sup>23</sup> Quiaa jaara jyaniquianu janiya naa miijiani, ¿casaara cua cumanee quia niquitioyiquianu cumaneeca cojuanaarini? Nojori jaara cua cumanee poontijiocanu, janiya maara socua queraati na riuriasuhuanu, cua tiajinia cua tiuquishacariuhua”. <sup>24</sup> Cunora, na jyaniiijiaari tii quiniaa pueya sequeree: “¡Cua cumanee nia jaariutare cuno! Nia niquitiojore na maninia seru, cante diez cumaneeca jiiitacuajani”. <sup>25</sup> Nojoriiri na sequeree: “Jyaniiijianaa, ¿casaarateni? Nojuacuajari tari diez cumaneeca jiiitaa”. <sup>26</sup> Jyaniiijiaari saaja nojori riucaaree: “Seetanujanaa nia sequenyaniija, cante tari jiiitaa, nojuajaari socua niquitiosaanutaniya. Cante na jiiitaaquiyani, secaja na jiiitaaanoori puetunujanaa jaariutiasaanutaniya, cucua tiuyashijia na quiniucua. <sup>27</sup> Quiarijia, cua paraa saniniujia, cuno nojori canapuecua na paniaquiquianu nojori jyaniiijia cua quiniuriani, miji nia jayore nojori. Nia cua niquiara nia puecoore cua ruuretajaca seque”.

*Jesu tiuquishacari Jerusalén tiacajinia*  
(Mt 21.1-11; Mr 11.1-11; Jn 12.12-19)

<sup>28</sup> Nio na pahuatanu nuhuaji, Jesuuri na pueya puetaareecuhua Jerusalén tiacajinara. <sup>29</sup> Jaara cateca quiriquiaa tari Betfagé tiaca, Betania tiacanio, Olivo cuhuariquia tuhuanujuhua, Jesuuri caapiqui na pueya sequeree:

<sup>30</sup> —Cuno shiitaniyojua tiacajinia nia quiaare, pa tajoji niquishiyani. Niaa jaara tiuquishii, niaari burro riuriantanutaniya morotasano, pueyano cajishoojua na nijinia. Niaa jaara na niquishii, niocua na samaacartasee. Niaari na jaatucumohua miji. <sup>31</sup> Pueya jaara nequesotare niajaniya casaara nia samaacartaanoj, niocua na riucaare: “Jyaniiijia na pania”.

<sup>32</sup> Jesu pueyari quiaaree. Nojoriiri na riuriatasee taa Jesu sequequiaaricujani. <sup>33</sup> Nojori samesacartasacari burro, na camaruhuari nojori nequesotaree:

—¿Casaara nia samaacartaa canaa burroni?

<sup>34</sup> Nojoriiri na riucaaree:

—Jiyaniijia na paniya.

<sup>35</sup> Na nuhuaji, nojoriiri na jaatucuyarohua Jesuucua. Jesu pueyari na toqueya niojoree burro nijinia Jesu cajijiara. Na nuhuaji, nojoriiri Jesu cajitiriri na nijinia. <sup>36</sup> Na quiasacari Jerusalén tiacajiniara, pueyari na toqueya muejoquiaari nucuaco Jesuucujai. <sup>37</sup> Nojori rosetanu panishacari Olivo cuhuariquia tuhuananujiniji, puetunu Jesu pueyajanaari juhuacatecara nacoquiaari nojori shuquiriniutia. Nojoriiri Jesu maniniuhaaque-tariquiaa puetunu na cumaacata na miishanojuanaa nojori niquniuucua. Nojoriiri cunora jiyanoehua shuquiritariquiaa Pueyaso. <sup>38</sup> Nojoriiri naa nacooriaquiaa:

—¡Pueyaso cuara shuquiritiirira pa Jiyaniijia, Pueyaso Jiyarosano na quiniuucua! Pueyaso pocua taraajerohuani. Pa jiyanooriohuani. ¡Nojuajaari jiyanoehua maninia! ¡Pa shuquiritarienoj!

<sup>39</sup> Cuniqiu pueya tajinia quiniaa Fariseocuaca tojishacari naa nojori sequesantej, nojoriiri Jesu sequeere:

—¡Niishitiojanaa, quia pueya quia sanaajare, maja naa nojori sequenura!

<sup>40</sup> Jesuuri saa sequeerejaja:

—Seetanujuanaa nia sequeyanijia, nio pojori jaara sanaajetare, ¡sairi saniniuujia naconutanuyacujua!

<sup>41</sup> Tari Jesu quishacari Jerusalén tiaca shuriuucua, na niquishacari cuno tiaca, Jesuuri cuno tiacajinia quiniaacua nujuqueree. <sup>42</sup> Cunora, juhua pueyano sequeere Jerusalén tiacaari:

—Jerusalén tiacanaa, quia niishitiriquia quiarijiani, casaa quia paniya jiyanooshano quia quiniuriani, shuquiriaatia quia quiniurijuhua. Taraatia quijianaa, quia jiyanoorioquianoori juucua niya quia. Majaari quia niishiniu nojuaja, juhua nimishituu quia quishacari. <sup>43</sup> Cunora, na nuhuajiiri jiyanoehua taraatia quiniutianiya quia. Quia paraari quia mataconutaniya quia shocuaqueya, na cosenura maninia quiajaniya quia mashiyaquiniuucujai. Naacuajitij, quia paraari quiocua juhuacanutaniya na miaquejonura quiajaniya. <sup>44</sup> Quiaari jiyareta suresaanutaniya. Quia tiacajinia quiniaari puecoosaanutaniya. Quia tiacaari puetunu niyartasaanutaniyajanaa. Majaari tamonu saajia cureenu quiniutianiya quenaaja tamonu saajia caco maano. Quiaari naa miishaanutaniyatej quia niishiyaquiniuucua, Pueyasoori quiocua niquiaari najuhuanaj, quiocuaji na tacunura juucua. Quiaari saaja na ruuretacanu.

*Jesu jaacasacari seya niqutiojanaa Pueyaso Secojoua tiajiniji*

*(Mt 21.12-17; Mr 11.15-19; Jn 2.13-22)*

<sup>45</sup> Na nuhuaji, Jesuuri Pueyaso Secojoua tiajinia tiuquiquiaari na pueyata. Nojuajaari juhuacatecara pueya tohuatanijioree, canapuee na seya niqutiojoriquiaacuajani Pueyasoocua puecoosocoriquiano. <sup>46</sup> Jesuuri nojori sequeere:

—Tariucuacaanu Pueyaso Rupaajinia naa naajiotasaaquiaariti Pueyaso sequesano: “Cua tiaari pueya secojonuujia janiya”. ¡Niaari saniniuujia na jiyatecanu nohuasenuujua quiquiora!

<sup>47</sup> Puetunu juucajanaa, Jesuuri jiyacari pueya niishitiojoriquiaa Pueyaso Secojoua tiajinia. Narta Judiocuaca jiyaniijianucuaari saaja na monu paniriquiaa. Pueyacuara secojanaa jiyaniijianucua, Moisés Rootasanojiniji niishitiojanaa, mariyata narta Judiocuaca jiyaniijianucuanio, puetunu nojorijianaari tari rojotooriquiaa juucua taa na motunutaniya Jesuni. <sup>48</sup> Puetunu pueyajanaari saaja shamaatia tojitiariquiaa puetunu Jesu sequesanojuanaa. Cunora, majaari cuno jiyaniijianucua naata monu quiriquiaa Jesu.

## 20

*Pueya nequesotasacari Jesu, cante na jiyaronani*

*(Mt 21.23-27; Mr 11.27-33)*

<sup>1</sup> Tamonu juuca, Jesuuri Pueyaso Secojoua tiajinia niishitiojoriquiaa. Pueya niqiuara pohuatariquiaari taate nojori naata Pueyaso muerasura quiniuni. Jiyacaritij, pueyacuara secojanaa jiyaniijianucuaari Jesuucua nijiomaa. Moisés Rootasanojiniji niishitiojanaari nojoritia nijiomajuhua, narta Judiocuaca camarucuanio. <sup>2</sup> Nojoriiri Jesu nequesotaree:

—¿Cante quia jiyatecanu Pueyaso Secojoua tia jiyaniijia quia quiniuriani? ¡Canaa quia riucaare! ¿Cante quia jiyaronani?

<sup>3</sup> Jesuuri nojori sequeere saniniuujia:

—Janiya nia nequesotanu paniyajuhuj. Cua riucature. <sup>4</sup> ¿Cante Juan jiyaroquiaari na tiuquinijionura pueyani? ¿Pueyasote na jiyaroquiaari, tama narta pueyajaaja soj?

<sup>5</sup> Nojoriiri juhuacatecara tamajaaja pocoojoquiaari. Tama sequeotooriquiaajaarijia:

—¿Taa pa riucuanutaniyani? Paa jaara sequereni: “Pueyaso na jiyaroquiaari”, nojuajaari pa sequenutaniya: “¿Casaara nocua nia tiuyaquiquiaariirini?” <sup>6</sup> Saniniuuja, paa jaara na sequereni: “Juancuaja nareja pueya jiyarosano quiquiaari”, puetunu pueyajanaari pa jacunutaniya saitia na puecoonura pajaniya. Nojoricuajaari sequequiaa: “Juanna seetanujanaa Pueyaso sequenu panishano caminiujunia quiquiaari”.

<sup>7</sup> Nojoriiri cunora Jesu riucaree:

—Johuaj. Maja canaa niishiniu canaquitijia Juan jiyaroquiaari na tiuquinijionura pueyatej.

<sup>8</sup> Naaratej, Jesuuri nojori sequeree:

—Janiyajuhuj, majaari cua sequenu quiniutianiya niajaniya, cante cua jiyaroquiaarini naa cua miiniuriatej.

*Miriqui Jesu pohuatasano sesa miijiaca poonijionaajiniji*  
(Mt 21.33-44; Mr 12.1-11)

<sup>9</sup> Na nuhuaji, Jesuuri pueya niishitiojonu coteerohuacuhuj nio miriqui pohuatasanaota. Sequereeri:

—Tamonu pueyanoori cuhuariquiajinia uva natoquiaari. Na nuhuaji, na niqutiogiaari tamasaca pueyari, nojori cojuanura nera. Na camaruuri tucuaaanu quiaaree, tii na shocotejonura marijia. <sup>10</sup> Uva quishacari noshuriujua, saniya cuhuariquia camarujua-naari na seru jiyaroree cuhuariquia cojuanaa pueyacia. Jiyarosaareeri tiji na masenura na camarurajanaa, uva carojotasanojiniji. Na camarujuaacuajaari tarijia pocoojoquiaari cuhuariquia cojuanaa pueyata, taa nojori niqutionutaniya na carojotasanojinijini. Cuhuariquia camaruuri tiuquishacari, ¡cuhuariquia cojuanaa na piquituri saaja! Na jiyaroturohua juhuasuuri. <sup>11</sup> Cunora, cuhuariquia camarujuaanaari tamonu na seru jiyaroree. Cuhuariquia cojuanaari na miituri sesajuhuj. Na saarijotureeri. Na piquituriiri. Na jiyaroturohua juhuasujariuhuj. <sup>12</sup> Cuhuariquia camarujuaanaari socua tamonu na seru jiyaroree nojoriicua. Nojoriiri sesa miituri nojuajuhuj. Na nuhuaji, nojoriiri na caponeeree cuhuariquiajiniji tariucua naatishano.

<sup>13</sup> Naaratej, cuhuariquia camaruuri tama sequereajaaja: “¿Taa cua miiniutianiyarini? Quiyanuniyojua jiyaroreeraquij. Cuno pojori jaara cua panishano niyanu niqutiuri, maja naasucua nojori rerequetenu quiniutianiya nojuaja”. <sup>14</sup> Saniniuuja, cuhuariquia cojuanaa jaara cuhuariquia camaruuri niyanujanaa niquri nojoriicua niyano, tama nojoriiaarijia sequetooree: “Nojuacuaja cuhuariquia camarura quiniutianiya na que niti, na que jaara shaajeyariquia. ¡Pa morej! Paari nio cuhuariquia camarura quiniutianiya saniniunijia”. <sup>15</sup> Naacuajitij, cuno cuhuariquia cojuanaa pueyari cuhuariquia camaruuri jaatiuri cuhuariquiajiniji. ¡Cuniqui na motureeri!

Naa nojori na pohuatanu nuhuajitij, Jesuuri pueya nequesotaree:

—Naa nojori miiniucua neyanutej, ¿ta na que miiniutianiya cuno sesa pueyarini? <sup>16</sup> Seetanujanaa nia sequeyanijia, nojuajaari nocua quianutianiya nojori na puecoonura. Na nuhuaji, na cuhuariquia niqutionutaniya tamasaca pueyari, nera nojori cojuanura cutara.

Pueya tojishacari nio, nojoriiri sequequiaari:

—¡Juhuej! ¡Pueyaso cuara naa miyaquiuriatej!

<sup>17</sup> Jesuuri nojori niqiniijoree. Nojori sequereeri:

—¿Naatee? ¿Nio naajiotasanooriuhuj, tariucuaaanu Pueyaso Rupaajiniani? ¿Niaate niishiya casaa na sequeyani? Naa sequeyariquij:

“Saitia tianaa pueyari tamonu saajia sojotanutaniya, nojori jiyanihacari cuno saajia sesarujajau. Na nuhuaji, cuno saajiaari socua panishano saajiaari jiyatesaanutaniuhua”.

<sup>18</sup> Cante cuno saajiaacua tiuriyani, nojuajaari juhua rashiquijiniutianiya. Cuno saajia jaara pueyanooocua tiyere, cuno pueyano jacananutaniyani. Shahuej.

<sup>19</sup> Jiyacaritij, pueyacuara seconaa jiyaniujanucua, mariyata Moisés Rootasanojiniji niishitiojonaari Jesu quianu panirii juucua. Nojoricuajaari niishirii, Pueyaso saquiriojosano Israel pueya jitianaa nojori quiniucua, Jesuuri miriqui pohuatariquiaa nojoriinijiji, tianaajiniji na pohuatasacari. Naajaa, jiyacaritij, majaari nojori quiatunu quiquiaari Jesu, nojori pueresacari Jesu panijia pueya.

*Jiya jiyaniijia cuara niqutiosaaria na sequesano cumaneeca*  
(Mt 22.15-22; Mr 12.13-17)



<sup>20</sup> Naaratej, nojoriiri tamasa pueya jiyaramiquiquiaari Jesuucua, sapuenu juhua maninia pueya niqishano. Cuno pueyari jiyaramiquishaquiaari Jesu nojori pocu-atenura sesa juucua, nocuara tonujusaanura. Jesu jaara nojori riucuaquiaari sesa, maara Romano jiyaniijia niqitiosaaquiaari saniitiosocoriquiano. <sup>21</sup> Naacujitij, cuno pueyari Jesu nequesotaquiaari:

–Niishitiojonanaa, canaari niishiyani, quiaari maninia niishitiojona. Majaari sesa quia sequesano. Naajuhuj, majaari rimiajata quia niqiniu pueya. Quiaacuaajaari seetanujanaa niishitiojoquiaa, taa Pueyaso paniya canaa miiniuriacuajani. <sup>22</sup> Cunora, canaa quia sequere taa canaa miiniutianiyani. Roma tiacajinia quijia jiyaniijiaari pa sequequiaari Judiocuaca cuara cumaneeca niqitiojora nera, na jiiitasano pueya pa quishacari. Naaratej, ¿maniateeri pa miiniuria na sequesano?

<sup>23</sup> Jesuuri niishiquii nojoriiri nojuaja nequesotariquiaa najuhuanaj, nojori sapojonuta. Cunora, nojori sequereeri:

<sup>24</sup> –Cua niqitiri quia cumanee. ¿Niiorihuj? ¿Cana naaquiti nocuani? ¿Cana sesate nocua naajiotasanoni?

Jesu riucuatereeri:

–Cunocuaaja canaa sequesano Roma tiacajinia quijia jiyaniijia César naaqi, na sesajuhuj.

<sup>25</sup> Jesuuri nojori sequere:

–Jiyaniijia César cuara tama na casaajaaja niqitiosaaria. Nojuacuajaari na camaru. Saniniujia, Pueyaso nia niqitioire cutara nerano tama na casaajaaja. Nojuajaari pa camarnu.

<sup>26</sup> Saaja maninia Jesu riucasacari pueya niquiara nojori, majaari nojori naata nocuara tonujunu quirii. Nojoriiri saniya jiuujiateree Jesu riucasacari saaja maninia nojori. Naacujitij, nojoriiri socua sanaajetaree.

*¿Paate samiitiaconutaniuhuanu?*

*(Mt 22.23-33; Mr 12.18-27)*

<sup>27</sup> Na nuhuaji, noojiaqueya Saduceocacajinijiniori Jesuucua niquiaari. Saduceocua- caari jiyaniijia macunucua pueya maja na samiitiaconu quiniutianihua. Naaratej, nojori-iri Jesu sequere:

<sup>28</sup> –Niishitiojonanaa, supuetana Moisés cuajaari pa rootaa na naajioneeginia, pueyano jaara cusoyare mueyaju, tarajanu cuara camiriia mashiquio, mueya na mueratenura tarajanu niti. <sup>29</sup> Tamonu mashajaari seis tapueyocucaraca quiquiaari. Nojuajaari jiyapueranu quiquiaari. Coteenu camiquiaariiri. Nojuajaari cusoquiaari muetuhuoja. <sup>30</sup> Cunora, na nuhuajishanaari na mashiquio camiri. Nojuajaari muetuhuoja cuso- quiaarijihuhuj. <sup>31</sup> Naaratej, neyaca tarajanuuri mashiquio camiquiaarijihuhuj. Nojuajaari muetuhuoja cusoquiaarijihuhuj. Puetunu cuno mashiquiorijianaari naa camiyoqueiaari cuno maajitia. Puetunu nojorijianaari cusunuuquiaari muetuhuoja. <sup>32</sup> Na nuhuaji, pueya mashiquioori shaajequiaarijihuhuj. <sup>33</sup> Naacujitij, macunucua jaara samiitiacorohua, ¿teyano cuno siete neyacaajinijinote seetanu neyacajanaa quiniutianiyani? Cuno mashiquiocuaajaari puetunu cuno siete pueya niquiocua quiquiaari.

<sup>34</sup> Jesuuri nojori riucuaere:

–Mijiria pa quishacarija, canuu, maajipohuari camiyoqueiaa. <sup>35</sup> Saniniujia, ma- jaari noo pojori camiyonu quiniutianiya canapuate samiitianijiosaanutanihuacuajani, maninia quijiaa nojori quiniucua Pueyaso niquiara mijiria. <sup>36</sup> Majaari nojori shaajenu quiniutianihua. Nojoriiri shaajeyashijiaa quiniutianiya juhua Pueyaso seya. Nojori samiitiaconucua macujiniji, cunora, nojoriiri Pueyaso muerasujanaa quiniutianiya cutara. <sup>37</sup> Supuetana Moisés cuajaari pa niishitiquiaari, macunucuaari samiitianijiosaanu- taniuhua. Moisésri naa naajiotaqueiaari Pueyaso sequesano nojuaja nequeru casaja noshiyanojinijitij. Pueyasoori naa sequequiaari Moisés:

“Janiyari quia supuetana Abraham jiyaniijiani, quia supuetana Isaac jiyaniijiano, quia supuetana Jacobo jiyaniijiajuhuj”.

<sup>38</sup> Naacujitij, paari niishiyani, puetunu Pueyasocua tiuujiaa shaajecono pueyajanaani, nojoricuaajaari saminiucua quia Pueyasora. Pueyasoori maja macunucua jiyaniijia. Na pueya shaajeconcuaajaari saminiucua quia nera cutara.

<sup>39</sup> Noojiaqueya Moisés Rootasanojiniji niishitiojona pueya tojishacari naa Jesu seque- sanotej, nojoriiri Jesu sequere:

–Maniniacuajaari quia sequesano, Niishitiojonanaa.

<sup>40</sup> Naa Jesu rihuanesacari saaja maninia nojoritij, majaari socua pueya nequesoreenu paniniu quiriquiaa nojuaja.

*¿Cante Cristo supuetanani?  
(Mt 22.41-46; Mr 12.35-37)*

<sup>41</sup> Jesuuri naa nojori nequesotaree saniniuuja:

—¿Casaara na sequesaaquiaacuaraarini, Pueyaso Jiyarosanaari supuetana David niqiuohuacuajinio supuenutaniya? <sup>42-43</sup> Supuetana Davidjanaacuajaari naa naajio-taquiaari na jaaquequejoneejinia:

“Jiyaniijia Pueyasoori cua Jiyaniijia Cristo sequequiaari: ‘Cua miaquetajara quia cajiriji-aara, janiya cuara quia paraa shocotare puetunujuanaajaatijia’”.

<sup>44</sup> ¿Cristotucua taa David niqiuohuacuajinio supuereni? Davidcuajaari na sequeya “cua Jiyaniijia”.

Cuno pueyari maja na naata na riucuanu quiriquiaa.

*Jesu numootesacari na pueya, Moisés Rootasanojiniji niishitiojonaa pueyacuaij  
(Mt 23.1-36; Mr 12.38-40; Lc 11.37-54)*

<sup>45</sup> Puetunu pueyajanaa tojtiasacarijia Jesu, Jesuuri naa na saquiriojosano pueya se-queere:

<sup>46</sup> —Tama nia cuaqueyajaaja nia cojuare Moisés Rootasanojiniji niishitiojonaa pueyacuaij, nia miyaquiniucuaij taa nojori miiquiaacuaani. Nojoriiri tucuaque toqueya cushiniu maniniucuaquiaa na rucuanejotajara pueya niquiara, pueya shootianura nojori. Nojoriiri paniquiaa pueya saruhuatanura nojori juhua tojishano pueya, nojori rucuanajosacari tiaca jiuujiajinia curotasano cajitiucujinia. Nojoriiri socua panishano cajitiucujinia cajiniu maniniucuaquiaa Pueyaso Secojoju tiajinia, tamasaca tiajinia-juhuaj, nojori jaara masusaare queranacunura. <sup>47</sup> Naajuhuj, nojoriiri mashiquiopue tiaca masequiaa secaja cumaneecata nojori sapojonuta. Naa jiyasohuaja nojori miiniu nuhuajitij, pueya niquiara, nojoriiri najuhuana tucuyocua secujojuaa Pueyaso, pueya jiyaniinuria nojori maninia pueya cutara. Naa nojori miiniuucuatej, nojoriiri jiyanohua saniitiosano quiniutianiya.

## 21

*Casamijiu mashiquio niqitiosacari na cumanee juuranee Pueyasora  
(Mr 12.41-44)*

<sup>1</sup> Pueyaso Secojoju tiajinia, Jesuuri casamiriaca pueya shootiariquiaa na cumaneeca niojyano cumaneeca racataja quiqiojinia, nojori niqitiosano Pueyasora. <sup>2</sup> Jesuuri tamonu casamijiu mashiquio niquiriijuhua caapiqui cumaneenyajua niaano tijiuhuj. Na niasanoori nareja cobrejiniji shipinishano cumaneeca quiquiaari. <sup>3</sup> Jesuuri na pueya sequeere:

—Seetanujuanaa nia sequeyanijia, cuno casamijiu mashiquioori socua queraatia niq-uitioree Pueyaso, cuno casamiriaca pueyajiniji. <sup>4</sup> Puetunu cuno pojorijianaari saaja na cureeno cumaneecajiniji niqutiojiya puetunu nojori panishanojuanaa nojori masejonu nuhuaji. Cuno mashiquio cutaraari puetunu na miaajaara na masetajara cumaneecajanaa niqitioree.

*Jesu pohuatasacari, Pueyaso Secojoju tia niyartasaanutaniya  
(Mt 24.1-2; Mr 13.1-2)*

<sup>5</sup> Noojiaqueya tii quiniaa pueyari pocoojoriqiaa Pueyaso Secojoju tiajiniji. Jiyanohua shanohua saitia shipinishano quiriquiaari. Nojoriiri na shootiariquiaa, naajuhuj taa na maniniushitishaquiaari nareja pueya niqutiojosano casamitiani. Jesuuri nojori sequeere:

<sup>6</sup> —Puetunu cunojuanaa niaa na niquiyani, tamacari niyartasaanutaniyari. Majaari que-naaja tamonu saajia cureenu quiniutianiya tamonu caco maano. Puetunu niyartasaanu-taniyajanaari.

*Taa nio jiya puequenu panishacari quiniutianiya  
(Mt 24.3-28; Mr 13.3-23)*

<sup>7</sup> Na pueyari Jesu nequesotaquiaari:

—Niishitiojanaa, ¿taacari nio tia niyartasaanutaniyarini? ¿Casaa canaa niqiniutiani-yarini, canaa niishinuria quia sequesanoori quera tohuateya?

<sup>8</sup> Jesuuri nojori riucuaere:

—Tama nia cuaqueyajaaja nia cojuare niaa mariqui sapojosaareeri. Queraatia sapo-jonuujuaca pueyari supuenutaniya. Nojoriiri sequenutaniya: “¡Janiya Cristoni, Pueyaso Jiyarosano! ¡Nio jiya quera puequeya!” Niaa jaara naa sequesaretej, majaari nia tojinu cuno sapojonuujuaca. <sup>9</sup> Naajuhuj, majaari nia puerenu niaa jaara tojiri tamonu jiyajinijinio pueyari tamasaca jiyacajiniji pueyata miaquetoojiya, naajuhuj, pueya jaara

juaatiooquiaa tama nojori jiyaniijia nojori jatanurajaaja. Naa quiniutianiyari coteenu. Naajaa, juhuanojuaja maja nio jiya puequesacari.

<sup>10</sup> Jesuuri naa nojori pohuatariquiaa socua:

–Tamonu rupaa pocuajacaari miaquetoohonutaniya tamaatia rupaa pocuajacata. Naa-juhuaj, tamonu jiyajiniijio jiyaniijiaari miaquetoohonutaniya tamonu jiyajiniijio narta jiyaniijiaata. Naa queraatia miaquetoohonuuri quiniutianiya. <sup>11</sup> Rijiaari jiyanoehua jiu-uquuijutiutananiya queraatia jiyacajinia. Jiyanoehua miaajenuuri quiniutianiya queraatia tamonu jiyacajiniajuhuaj. Paaqueja cusonuuri quiniutianiya niya, tamaquicuajuhuj. Naajuhuj, jiyanoehua puereeta casaari niqushaanutaniya jiyocuacaanu, mijiria quiniaa niishiniuria jiya puequenuraari tari catecanoya.

<sup>12</sup> Cuno puereeta quiyacquishacarijia, niaari quioosaanutaniya naquiya nia miishaanura, cua pueya nia quiniucua. Niaari jaatucusaanutaniya Pueyaso secojonuujua tiajiniaqueya nequesoreesocoriquiano. Niaari nujuatejojuacajinia nujuatejosaanutaniya. Niaari nia pueya camarucuaacua, mariyata jiyaca jiyaniijianucuaacua jaatucusaanutaniya nequesoreesocoriquiano. Niaari naa miishaanutaniya nia pohuatanucua janiyajiniijijia pueya niqiuara. <sup>13</sup> Naacuajitij, nia naata cuno jiyaniijianucua niqiuara pohuatanu janiyajiniijijia. <sup>14</sup> Nioojia nia cajitiri, maja juhuacarijia nia niishiriojonura taa nia riucuanutaniya nojorini. <sup>15</sup> Janiyacuajaari jiyacari nia niishitiojonutaniyani taa nia riucuanutaniyanoj, mariyata casa nia pohuatanutaniya jiyanoehua nia niishitiajatani. Niaari nojori sanaajanutaniya maninia nia riuhuanesacari saaja. Nia paraari maja na naata nia sequesano rerequetenu quiniutianiya. <sup>16</sup> Jiyacarijuhuaj, tama nia queyajaarijia nia tacartanutaniya, cua pueya nia quiniucua. Nia tapueyocuaacari nia tacartanutaniyajuahuaj, nia jiyasocujajinio supueno pueyajuhuj, nia rupueaanio. Nojoriiri noojiaqueya niajanijijiniijio puecoonutaniya. <sup>17</sup> Puetunu mijiria quiniaa pueyajanaari nia niqiniu paniyaquiniutianiya cua pueya nia quishacari. <sup>18</sup> Naajaa, majaari nia puerenu. Majaari quenaaja niquriyatu muesu shaajenu quiniutianiya nia nacajiniijia, Pueyaso jaara paniyaquiri. Pueyaso jaara naa nia muesu cojuaacuaa, ¿maatucua casaara cojuaquiri saniya niajaniani? <sup>19</sup> Naaratej, rejeretajaca nia quiri. Naa cutaraari shacantuuca quijacara jatanishaanutaniya pueyaracaanu nia rishiniuria, niaa jaara cumaatia nujuatate pueya miishacari sesa niajaniani.

<sup>20</sup> Niocua niishiri Jerusalén tiaca tari niyartasaanutaniya, niaa jaara na paraa niquri puetunu na shocuaqueyajanaa maano. <sup>21</sup> Jiyacaritij, canapueete Judea jiyajinia quiyani, cuno pojori cuara mashiiria tuhuananuhuaacua. Canapueete Jerusalén tiacajinia quiyani, nojori cuara ritia mashiiria tiji. Canapueete na cuhuariquiajia quiyani, nojori cuara tacateyaquihuara Jerusalén tiacajiniohua. <sup>22</sup> Cuno quishacari, jiyanoehua saniitiosacariiri quiniutianiya. Jiyacaritij, puetunu Pueyaso Rupaajinia naajiotasanojuanaari tohuatenuutaniya. <sup>23</sup> Jiyanoehua taraatia quiniutianiyari noo maajipohuara, canapueete manajaatohua quia jiyacari, mariyata canapueete conaaja supueja jiiitiaani. Jiyanoehua naquiya quiniutianiyari cuno quishacari nio jiyajinia. Nio jiya pueyari jiyanoehua saniitiosaanutaniya. <sup>24</sup> Noojiaqueya nojorijiniijioori puecoosaanutaniya tahua miaque-toosacari nojoritia. Tamasaca nojorijiniijioori quioosaanutaniya. Nojoriiri puetunu jiyacajiniarjanaa rijiosaanutaniya poonitijiosocoriquiano. Taucuacaari Jerusalén tiaca jiiitanutaniya tama nojorirajaaja, Jerusalén tiaca nojori jiiitanu cuara puequerejaatijia, taa Pueyaso sequequiaari tamajacuajani.

*Taa na quiniutianiyani Jesu tacatesacarihua  
(Mt 24.29-35, 42-44; Mr 13.24-37)*

<sup>25</sup> Mijiria quiniaa niishiniuria jiya quera puequeya, nojoriiri puereeta casa niqiniutianiya pananujinia, racajinia, riyajiniajuhuaj. Shoniacu caminiaacua shiriiquitiutianiyajarijuhuaj, jiyanoehua na queyocuasacari. Nojoriiri cushitiutianianiya na pueretunutajuhuj, jiyanoehua cojuata shoniacu caminia cajiniucuasacari. <sup>26</sup> Mijiria quiniaari cusojonuunutaniya na puerenuta, nojori niishiriojosacari taa nio jiya miishaanutaniyani. Puetunu jiya cajiniocua Pueyaso shipinishano casaajanaari jiuquitiutiasaanutaniya jiyanoehua. <sup>27</sup> Jiyacaritij, mijiria quiniaari nia niqitiutianianiya cohuaja najacajinia niyano, jiyanoehua shacantuuca cua cumaacata. <sup>28</sup> Naaratej, niaa jaara nio cua pohuatasano niquri tari coteyano, niocua tama cumaquitiioorejaaja. ¡Niocua timiri! ¡Niaacuajaari quera rijiosaanutaniya niquiji, pueyaracaanu cuata nia quiniuria!

<sup>29</sup> Jesuuri nojori pohuataree nio miriqui pohuatasanojuhuaj:

–Higo naana nia niquri, tamonu jaranacujua naananio. <sup>30</sup> Na jaamasucua jaara mueratuure, niaari niishiya, tacareejonuqui quera quiniutianiya. <sup>31</sup> Naajuhuj, niaa jaara puetunu cua pohuatasanojuanaa niquri tari tohuatayano, niocua jiyacari niishiri, janiyari quera tiuquihuani, Jiyaniijijanaa cua quiniuria.

<sup>32</sup> Seetanujuanaa nia sequeyanijia, puetunu cua sequesanojuanaari tohuateenutaniya Pueyaso tojtiaashijiaca pueya puequeyaquishacarijia. <sup>33</sup> Jiya cajiniocua, mariyata nio jiyari shaajenutaniya. Cua sequesanoori saniniuujia puetunu tohuateenutaniyajanaa cutara, taa cua sequeyacuajani.

<sup>34</sup> Tama nia cuaqueyajaaja nia cojuare niaa mariqui cua tojiyashijiacara quiriohuari. Naaratej, majaari shuquiriaatia nia quiniu paniniu juucua nia queranacunuunuta, nia mashaasequejonuta, mijiria casaacua nia niishiriojonutatio. Maja naa nia quiniu, janiya mariqui nia cariyatureeri, jeenucuasoo nia quishacari, canashiyaquiji cua tiuquishacariuhua. <sup>35</sup> Cua tiuquishacariuhua, juhua norijiotaja quiniutianiyari puetunu mijiria quiniaa pueyarajanaa, taa norijiotaja canashiyaquiji majaacuaani. <sup>36</sup> Cunora, cucuaji jeenucuasano nia quiri juhuacarijia. Pueyaso nia secojore pueyaracaanu, maja naquiya nia miishaanura cuno taraatia quishacari, taa cua sequeyacuajani, mariyata juhuajaniya nia nujuatunura cua tajoji, cua nequesoreesacari puetunu pueyajanaa.

<sup>37</sup> Jesuuri puetunu juucajanaa niishitiojua Pueyaso Secojoua tiajinia. Saniniuujia, niucua quiojowaari Olivo cuhuariquia tuhuananujinia tii na quiniuria. <sup>38</sup> Puetunu pueyajanaari tariquicuajaji quiojowa Pueyaso Secojoua tiajinia, nojori tojiniuria Jesu pohuatasano.

## 22

### *Judiocuaca camarucua roojotoosacari Jesu nojori quianura*

(Mt 26.1-5, 14-16; Mr 14.1-2, 10-11; Jn 11.45-53)

<sup>1</sup> Quera Pascuara queranacunuusacari quiquiaari, pueya miaquesacari pan na poreetajaaju shipinishano. <sup>2</sup> Jiyacari, pueyacuara secojonaa jiyaniijianucua, mariyata Moisés Rootasanojiniji niishitiojonaari roojotooriquiaa juucua taa nojori motunutaniya Jesuni, nojori juaatiyaquiniutia pueya. Nojoriiri narta pueya pueretujuaca, jyanohua queraatia pueya paniniuucua Jesu.

<sup>3</sup> Jiyacaritij, Satanásri Jesu pueyano Judas Iscariote jiuujiajinia tiuquiquiaari. <sup>4</sup> Nojuajaari pueyacuara secojonaa jiyaniijianucuaacua quiaquiaari, Pueyaso Secojoua tia cojuanaa jiyaniijianucuaacuajuhua. Judasri cuno pojoritia pocoojoquiaari. Nojori sequereeri nojuaja na naata nojori quiatenu Jesu. <sup>5</sup> Nojoriiri shuquiririi. Cunora, Judas sequetureeri taa cumaneeca nojori niqutionutaniya nojuajani. <sup>6</sup> Judasri jaarajaaja nojori sequesano tojirii. Jiyacaritij, Judasri juhuacatecara niishiriojoquiaari taa na quiatenutaniya Jesu jiyasohuajani.

### *Jesu miaquesacari na nuhuajiria na pueyata*

(Mt 26.17-29; Mr 14.12-25; Jn 13.21-30; 1 Co 11.23-26)

<sup>7</sup> Poreetajaaju pan miaquenu juucaari tari quiquiaari. Cuno juucajuhuaj, borre-goori mosano quijia, Pueyaso niquiara miaquesocoriquiano Pascuara queranacusacari. <sup>8</sup> Cunora, Jesuuri Pedro jiyaroree Juannio, nojori miaquesocoriquiano nojori majeetenura. Nojori sequereeri:

—Nia quiaare. Borrego nia majeetesecuaa pocuaji, pa miaquesocoriquiano quiarijia Pascuara.

<sup>9</sup> Nojoriiri na nequesotaree:

—¿Tee quia paniya canaa majeetenurani?

<sup>10</sup> Jesuuri nojori riucuree:

—Niaa jaara Jerusalén tiacajinia tiuquishii, niaari tamonu pueyano riuriatanutaniya mohuaca taquitiaano patacojinia. Niocua na nuhuaji rupaamia na tiajinia. <sup>11</sup> Cuno tiajinia na tiuquishacari, niocua cuno tia camaru sequesee: “Canaa niishitiojona naa quia sequeya: ‘¿Teete sohuacani, cua pueyata cua miaquejara quiarijia Pascua niucuan?’” <sup>12</sup> Nojuajaari nia niqutinutaniya puereetuua sohuaca, natao na tiajinia, tariucua jeenucuasano. Niocua cuniqui miishii puetunujuanaa pa miaquesocoriquiano.

<sup>13</sup> Jesu pueyari quiaare. Nojoriiri puetunujuanaa riuriataguiaari taa Jesu sequequiaari nojoricuajani. Nojoriiri tii miishii puetunujuanaa, Pascua niucua nojori miaquesocoriquiano.

<sup>14</sup> Jaara tari quiquiaari Pascuara miaquesacari niucua, Jesuuri na saquiriojosano puey-ata cajitiushii miaquejajinia. <sup>15</sup> Jesuuri nojori sequeree:

—Janiyari jyanohua niaata miaquenu paniriquiaa nio Pascua niucuan, pueya moy-aquishacarijia janiya. <sup>16</sup> Seetanujuanaa nia sequeyanijia, majaari socua cua miaquenu quiniutianiya Pascuara, janiya jaara tiuquiriohuajaatijia puetunu Pueyaso muerasuranotajanaa. Jiyacari cutara, paari jatiqui miaquenutaniyani. Jiyaniijijanaa cua quishacari.

<sup>17</sup> Na nuhuaji, Jesuuri ratujua pataree. Pueyaso sequereeri:

—Paacarasho nio mashacara.

Na pueya sequereeri:

–Jajaa, nio nia masetare. Nia rature puetunu niajanijajanaa. <sup>18</sup> Seetanujuanaa nia sequeyanijia, majaari socua cua ratunu quiniutianiya uva caacajiniji, janiya jaara tiuquiriohuajaatijia, Jijaniijajanaa cua quiniuria puetunu Pueyaso muerasurajanaa.

<sup>19</sup> Na nuhuaji, Jesuuri pan ririi. Pueyaso secojoree nocuaraari. Na neecasereeri. Na pueya na niqitiojoreeri. Nojori sequereeri:

–Nioori cua cuaqueya niaacuara mosocoriquiano. Niocua naa miiriquia pueyara-caanutej, nia niishiriojonura janiya.

<sup>20</sup> Nojori miaquenu nuhuaji, Jesuuri ratujua patareejuhuj. Naa sequereeri:

–Cua nanacaari niaacuara shoonutianiya nia jiyanooshaanura seetanujuanaa. Majaari socua seya nanaca panishaanu quiniutianiya. Quiarijiani, saaja cua nanaca shoonuucua, Pueyasoori pueya jiyanooniutianiya.

<sup>21</sup> Cua tojtitiare. Quiarijiani, cante cua tacartanutianiya pueya na motenura janiyani, nojuajaari cuata miaqueya. <sup>22</sup> Janiyari naa miishaanutianiya taa janiyajiniji juhuacarijia pohuatasaquiaricujani tariucuacaanu Pueyaso Rupaajinia. Saniniujia, cua tacartanaari jiyanoohua taraatia quiniutianiya naa na miiniuucua janiya.

<sup>23</sup> Jesu pueyari jiyacari juhuacatecara nequesoreetoree tama nojorijiaaja:

–¿Canteeri na tacartanutianiya?

*Cante seetanujuanaa jiyaniijajanaani*

<sup>24</sup> Jesu pueyari tama juayonutariquiaajaacujua, teyano nojorijiniiniote jiyaniijajanaani. <sup>25</sup> Jesuuri nojori sequeree saaja:

–Mijiria, jiya jiyaniijianucuaraari jiyanoohua jiyaramiquiniu niishijia nojori jütiasano pueya, juhua nojori poonitijosano pueya. Nojoriiri tama nojorijiniijiaaja sequeja: “Canaari maninia miiquiaa canaa pueyani”. <sup>26</sup> Niajanijia saniniujia, majaari naa nia quiniu juhua nojorijia. Cante socua tojishano pueyano quiya niajanijajiniinioni, nojuaja cuara tama na cuaqueyajaaja jiyateyaquiria na cumaaca paaretaja pueyacua. Cuara quiiria jacaria pocuaja. Naajuhuj, cante jiyaniijajanaa quiya niajanijajiniinioni, nojuaja cuara jiyateera tama na cuaqueyajaaja juhua nia serura. <sup>27</sup> ¿Taa nia sequeyani? ¿Cante jiyaniijajanaani? ¿Miaqueyano pueyanotee? ¿Na mianuutena soj? ¡Miaqueyano pueyanocuaja! Naajaa, janiyari juhua nia seru quiquiaa niaarani, maninia cua miiniuria niajanijia. Naajuhuj, naa maninia miijica nia quiriquia.

<sup>28</sup> Niacuajaari pueyaracaanu cua cojiriquiaa janiya jaara saniniujiushaariquiaani. <sup>29</sup> Naaratej, janiyari nia jiyatanutianiya jiyaniijianucua nia quiniuriani, taa cua Que jiyatequiaari janiyacuaani, Jiyaniijia cua quiniuria. <sup>30</sup> Naacuajitij, niaari cua miaquejajinia cajitiniutianiya cuata nia miaquejonura, cuata nia raruujunurajuhuj, Jiyaniijajanaa cua quishacari. Niaari mariyata jiyaniijianucua quiniutianiya, supuetana Israel doce niqiuoacuajinio supueno pueyapue nequesoreenaa nia quiniuria.

*Jesu sequesacari Pedro, nojuaja nocuaji seetanutianiya*

*(Mt 26.31-35; Mr 14.27-31; Jn 13.36-38)*

<sup>31</sup> Jiyaniijia Jesuuri Pedro sequequiaari:

–Simónnaa, cua tojiri. Satanásri niaacuara sequerucuaa Pueyaso, jiyanoohua na saniniujiunuria niajanijia. Naacuajitij, niaari jiyanoohua saniniujiushaanutianiya, naatej, taa trigo quejooshiya jiyocuacaanucuanaani, paratu panura na cocua. <sup>32</sup> Janiyari saniniujia Pueyaso secojoree quiocuara cutarani Simónnaa, cucua tiuuniu quia tarinitiaaquiniuucujia. Naacuajitij, quiaa jaara quioojia tacatorohua cucua, quiocua quiarta pueya cumaquiriohuajuhuj, nojori tiuunuria seetanujuanaa pueyaracaanu cucua.

<sup>33</sup> Simónri Jesu sequeree:

–¡Cua Jiyaniijanaa, quiaa jaara nujuatejojuajinia nujuatesaare, janiya cuara nujuatesaaria quiatajuhuj! ¡Quiaa jaara mosaare, naajaa, janiya cuara cojiritiasaaria quiajanijajuhuj!

<sup>34</sup> Jesuuri na sequeree:

–Pedronaa, seetanujuanaa quia sequeyanijia, caacaraja niunijiaquishacarijia quiarijia, quiaari tari naa cucuaji seetanu caminiujiunutianiya pueya niqiuara: “¡Maja cua niishiniu Jesu!”

*Quera Jesu miishacari taraatia*

<sup>35</sup> Jesuuri na pueya nequesotaree:

–Janiya jaara nia jiyaramiquiquiaari Pueyaso rupaa nia pohuatanura caashoqueejuni, cumaneeca quiquioju, sapatuujunio, ¿niaateeri nia panishano casaa niqitioy-aquishaquiaari?

Nojoriiri Jesu riucaaree:

—Maja. Canaacuajaari puetunu canaa panishanojuanaa niqutiojosaacquiarini.

<sup>36</sup> Jesuuri nojori sequeree:

—Quiarijia saniniuujia, cante caashoqueracani, cuaara na pataara. Cante cumaneeca quiquioracani, cuaara na pataarajuhuj. Cante nijiniaquetucuja mueruu jiti-aquiyani, cuno cuaara niqutioora na shiniquiaacuaji toque, nijiniaquetucuja mueruu na masenura na toque samitia. <sup>37</sup> Seetanujuanaa nia sequeyanijia, tariucuacaanu Pueyaso Rupaajinia janiyajiniji naajiotasanoori tohuateenutaniya. Janiyajiniji naajiotasanoori naa sequeyatej: “Nojuajaari jiyanishaaree sesa miijia, sesa miijiacata na teetesacari”. Puetunu janiyajiniji naajiotasanojuanaari tari tohuateya taa na naajiotasaaquiaaricua-jani.

<sup>38</sup> Nojoriiri Jesu sequeree:

—Jiyaniijianaa, niya quiya caapiqui nijiniaquetucuja mueruu.

Nojori riucuaereeri:

—Tariucuaja.

*Jesu secojosacari Pueyaso, Getsemani cuhuariquiajinia*

*(Mt 26.36-46; Mr 14.32-42)*

<sup>39</sup> Na nuhuaji, Jesuuri tohuataquiaari tiajiniji. Olivo cuhuariquia tuhuananujiniara quiaareeri. Nojuajaari cuniqui quianura jitiquiaari. Na saquiriojosano pueyari na nuhuajiyaree. <sup>40</sup> Na tiuquishacari tii, Jesuuri nojori sequeree:

—Pueyaso nia secjore, niaa mariqui sesa miiriiri niaa jaara saniniuujishaare.

<sup>41</sup> Na nuhuaji, Jesuuri tamajaaja quiaaree socua nojori tacoji, juhua saajia tishaqui, pueyano jasacari. Tii mojqoquetasee Pueyaso secojonuraari. <sup>42</sup> Naa secjoreeri:

—¡Cua Quenaa, maja cua miiniu paniniu naquiya! Naajaa, janiya cuaara miyaquishaaria taa cua paniyani. Janiya cuaara miishaaria cutara taa quia paniyacuajani.

<sup>43</sup> Jiyacaritij, Pueyaso seruuri jiyocuacaanuji nocua nimiaa na cumaquiniuria. <sup>44</sup> Jesuuri jiyanojua naquiya miiriquiaa. Nojiaari quera jiaqueriquiaa na tacaaniutia. ¡Jiyanojua, jiyanojua secjoriquiaa Pueyasoori! Cunora, na paneyacaari puereetujuaa juhua nanaca quiriquiaa, na caatesacari jiyocua. <sup>45</sup> Na secjonu nuhuaji, Jesuuri sanerohua. Na pueyacuatacetarohuari. Nojori niqishuhua maquetiuyano saajaari, puera nojori taraajenuucua. <sup>46</sup> Jesuuri nojori sequeree:

—¿Casaara nia maquetiuyani? Nia saneecature. Pueyaso nia secjore na cojuanura niajanija, maja sesa nia miiniuria niaa jaara saniniuujishaare.

*Judiocuaca camarucua quiasacari Jesu*

*(Mt 26.47-56; Mr 14.43-50; Jn 18.2-11)*

<sup>47</sup> Jesu pocuasacarijia na pueyata, queraatia pueyari jiyacari nocua tiuquishii. Judasri cuno pojori puetariquiaa. Nojuajaari Jesu doce saquiriojosano pueyajinijinio quiquiaari. Judasri Jesucua nimiaajanaa. Na saruhuataseeri na nujuunuta. <sup>48</sup> Jesuuri na sequeree:

—Judasnaa, ¿quiaate tama cua tacartaajaaja, quia nujuunuta sapojonu janiya?

<sup>49</sup> Jesu pueya niqishacari casaa cuno pueya miiniu paniriquiaani, nojoriiri Jesu nequesotaree:

—Jiyaniijianaa, ¿canaate nojori miaqueyani?

<sup>50</sup> Tamonu nojorijinijinoori pueyacuara secjonaa jiyaniijia seru piri na mueruuta. Saaja na miaquetajara numoco jaatereeri. <sup>51</sup> Jesuuri na sequeree:

—¡Tariucuaja! Maja naa miiniu.

Jesuuri numoco ririi. Na ruporohuari. <sup>52</sup> Judasta quiriquiaari pueyacuara secjonaa jiyaniijianucua, Pueyaso Secojojua tia cojuanaa jiyaniijianucujuhuj, Judiocuaca camarucuanio. Nojoriiri Jesucua nijioquiaari na quianura. Jesuuri cuno pojori sequeree:

—¿Casaara cucua nia nijioree nijiniaquetucuja muerutani, macacatanio nia quianura janiyani? ¿Janiyateeri nohuasejojuani, naa nia nijionura cucuatej? <sup>53</sup> Pueyaracaanu cua quishacari niaata Pueyaso Secojojua tiajinia, majaari nia quianu quijia janiya. Naajaa, quiarijia cutaraari nijajaniyara, nia panishano nia miiniuria janiya. Quiarijiani, Sesaacari cumaacaraca na panishano na miiniuria.

*Pedro seetasacari Jesujiniji*

*(Mt 26.57-58, 69-75; Mr 14.53-54, 66-72; Jn 18.12-18, 25-27)*

<sup>54</sup> Jiyacaritij, nojoriiri Jesu quiaree. Na jaatucutiuyareeri pueyacuara secjonaa jiyani-ijia tiajinia. Pedroori tucuaaanuji na nuhuajiriquiaa. <sup>55</sup> Jiyacaritij, pueyari jiyaniijia tia carijiniacuma mani noshitirii. Na shocua cajitiuriohuari. Pedroori nojori tajinia cajishijuhuj. <sup>56</sup> Cuno jiyaniijia serujinijinioni, niyacoori Pedro niquirii mani jitiuyano. Nojuajaari Pedro shootariquiaa. Na nuhuaji, niyacoori Pedro shishirii. Sequereeri:

—Noo pueyanoori cuno quiasano pueyanota quijiajuhuj.

<sup>57</sup> Pedroori seetaree. Naa sequereeri:

—Niyaconaa, imajaari quenaaja cua niishishano cuno pueyano!

<sup>58</sup> Na nuhuaji, tamonu pueyanoori Pedro niquiriijuhuj. Nojuajaari cuno jiyaniijia seru quiriquiaajuhuj. Pedro sequereeri:

—¡Quiaaqui cuno pojorijinjinio pueyanojuhuj!

Pedroori saa sequereejaa:

—¡Maja, pueyanonaa! ¡Janiya maja nojorijinjinioni!

<sup>59</sup> Pasaja na tarishiniu nuhuaji, tamonu pueyanoori sequenu pacuterohua:

—Nio pueyanocujaari cuno pueyanota quijia. Nojuajaari Galilea jiyajinjiniojuhuaj.

<sup>60</sup> Pedroori saa sequereejaa:

—¡Pueyanonaa, maja cua niishiniu quenaaja casaa quia sequeyani!

Pedro pocuasacarijia, jiyacaritij, caacarajaari niunijioree. <sup>61</sup> Jiyaniijia Jesuuri tacatequee. Na nijinara niquirii Pedroori. Pedroori jiyacari Jiyaniijia sequesano nojuaja niishiquii, naa na sequesanotej: “Quiaari tari seetanu caminiujuniutianiya janiyajiniji pueya niqiuara, caacaraja niunijyaquishacarijia”. <sup>62</sup> Pedroori cuniquiji tohuataquee. Jiyanhua nujuquereeri na taraajenuta, sacuaraatia na seetanuucua.

*Pueya macaatishacari Jesu*

(Mt 26.67-68; Mr 14.65)

<sup>63</sup> Jesu cojuanaa pueyari Jesu macaatiriquiaa. Nojoriiri na piquitiuriquiaa. <sup>64</sup> Nojoriiri Jesu namijia morotuquiaari coteenu. Na jiquioco piquitiurihuuari. Na nuhuaji, na sequetureeri:

—¡Quia niishiritioj! ¿Cante quia piriini?

<sup>65</sup> Nojoriiri socua queraatia sesa casaa sequeturiquiaa na macaatinuria Jesu.

*Judiocuaca jiyaniijianucua nequesoreesacari Jesu*

(Mt 26.59-66; Mr 14.55-64; Jn 18.19-24)

<sup>66</sup> Jaara juhuaquequiaari, Judiocuaca camarucuaari rerejoree pueyacuara secojonaa jiyaniijianucua, mariyata Moisés Rootasanojiniji niishitiojonaatajuhuaj. Nojoriiri Jesu jiyataquiaari Judiocuaca jiyaniijianucua rerejosaquiria. Nojoriiri na nujuatesee jiyaniijianucua taccoji, nojori nequesoreenura tii nojuaja. Nojoriiri naa Jesu nequesoreere:

<sup>67</sup> —Canaa quia sequere, ¿quiaate Cristo, Pueyaso Jiyarosano?

Jesuuri nojori riucaaree:

—Janiya jaara nia sequereni: “Taaquiririnij”, niaari saaja cua sequenutianiya: “Quiaa sapojija”. <sup>68</sup> Saniniujija, janiya jaara nia nequesoreere Pueyaso Jiyarosanojinijini, majaari nia riucaanu quiniutianiya janiya. <sup>69</sup> Naajaa, quiarijiani, janiyari puetunu cumaacaraca Quijiajanaa miaquetajara cajiniutianiya jiyocuaaanuni.

<sup>70</sup> Naa Jesu sequesacarij, puetunu nojorijianaari na sequere:

—¿Quiaateeri tama sequeyajaaja quiaari Pueyaso Niyanu?

Jesuuri nojori riucaaree:

—Taaquiririnij. Naacuaaquinatejaj, taa nia sequeyacuajani.

<sup>71</sup> Nojoriiri tama sequetooreejaja:

—¿Paatucua casaara socua tamonu pueyano pajere nocuara tonujuriquianoni? Paacuaajari tari tama pa numaatajaaja sesa na sequesano tojtiaareeni.

## 23

*Pilato nequesoreesacari Jesu*

(Mt 27.1-2, 11-14; Mr 15.1-5; Jn 18.28-38)

<sup>1</sup> Cuno nuhuaji, puetunu nojorijianaari sanetaree. Jesu jiyatatiuyareeri jiyaniijia Pilatoocua. <sup>2</sup> Cuniqii, nojoriiri juhuacatecara Jesuucua saquiriojotaree na sapojonuta. Pilato sequetureeri:

—Canaari nio pueyano niishiyani. Nojuajaari canaa Israel pueya nasojouquiaa pocuara. Nojuajaari niishitioquiaajuhuj, maja canaa Israel pueya niqitiojonura canaa cumaneeca pa jiyaniijiajanaa Césarra, taa César sequequiaaricujani. Naajuhuj, tama nojuajaari naa sequequiaa: “Janiya Cristoni, Pueyaso Jiyarosano, nia jiyaniijia cua quiniuria”.

<sup>3</sup> Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucaaree:

—Taaquiririnij. Naacuaaj, taa quia sequereecuajani.

<sup>4</sup> Jiyacaritij, Pilatoori pueyacuara secojonaa jiyaniijianucua sequere, pueya maanunio:

—Nio pueyano nequesoreere tarinijia. Nojuajaari maja sesa miijia.

<sup>5</sup> Nojoriiri saaja socua jiyacaree Jesuucua tonujunu. Naa sequetureeri:

—¡Nojuajaari puetunu canaa Judiocuacajanaa sesoya na niishitiojosanota! Nojuajaari Galilea jiyajinia niishitiojonu coteequiaari. Quiarijia, niya niishitiojyajaariuhua Judea jiyajiniani.

*Jiyaniijia Herodes nequesoreesacari Jesu*

<sup>6</sup> Pilato tojishacari naa nojori sequesantej, nojori nequesotareeri:

—¿Nio pueyanote Galilea jiyajinijinio?

<sup>7</sup> Nojoriiri na riucuree:

—Jaa.

Cunora, Pilatoori pueya jiyarotaree Jesu, Galilea jiya jiyaniijia Herodescua. Herodesri namitia tii Jerusalén tiacajinia quiriquiaa jiyacari. <sup>8</sup> Nojuajaari pueyaracaanu Jesu niqiniuuca jiaatiaja juucua. Herodesri tari pohuatasaaquiaari Jesujiniji. Naaratej, Herodesri Jesu miishacari na cumaacata niqiniuu panijia juucua. Naacaujiti, na niquishacari Jesu, nojuajaari timirii. <sup>9</sup> Herodesri queraatia nequesoreeree Jesu. Majaari quenaaja Jesu riucuanu quiquiaari nojuaja. <sup>10</sup> Pueyacuara secojona jiyaniijianucuaari tii quiriquiaajuhua, Moisés Rootasanojiniji niishitiojonaanio. Cuno pojoriiri jiyanohua Jesuucua saquiriojotariquiaa queraatia sesa casaa. <sup>11</sup> Herodesri na soldadohuata Jesu rerequeteriquiaa. Na macatiriiri. Na cushitirii jiyanohua shanohua toqueeri juhua jiyaniijia cushishano. Na nuhuaji, Herodesri pueya jiyarotarohua Jesu Pilatoocua. <sup>12</sup> Herodesri cuno juuca Pilato rupuenara quiquiaari. Coteenu, majaari nojori niqitioonu paniniu quiija. Nojoriiri saaja shocotetoojua.

*Puetunu pueyajanaa sequesacari Jesu cuaara mosaaria*

(Mt 27.15-26; Mr 15.6-15; Jn 18.39-19.16)

<sup>13</sup> Na nuhuaji, Pilatoori pueyacuara secojona jiyaniijianucua rerejotequiaari na tacoji, Judiocuaca camarucujuhua, tii quiniaa pueyano. <sup>14</sup> Nojori sequereeri:

—Niaari nio pueyano jaatucuree cucua najuhanaj. Niaari cua sequeturee, nojuajaari narta pueya nasoojquiaa. Janyacuajaari na nequesoreeriquiaa nia niquiarani. Ni-aacuajaari cua tojitiariquiaa cua nequesoreesacari nojuaja. Quiarijia niishiya cutaranijia, puetunu nocuara nia tonujusanajuanaari maja seetanujuanaa. <sup>15</sup> Jiyaniijia Herodesqui-iri tari niishiyajuhua, majaari seetanujuanaa nocuara nia saquiriojotasano. Cunora, Herodesri pocua na jiyarorohua. Seetanujuanaa, majaari sesa na miiniu quiquianu na mosaanura. <sup>16</sup> Janiyari na majacutenutaniya narejani, cartesaarohuari.

<sup>17</sup> Pascua juucara queranacusacari, Pilatoori nujuatesano pueyano cartenu jitiqiaari nujuatejojuajiniji. Nojuajaari naa miiquiaari pueyaracaanutej, pueya na shuqiritiniuria. <sup>18</sup> Jiyacariitij, puetunu pueyajanaari juhuacatecara jiyanohua nacaree jatiqui:

—¡Jesu quia more! ¡Barrabás quia cartere saniniuuja!

<sup>19</sup> Tarijia cuno Barrabásri narta nasojosano Judiocuacata Romano pueya taanuquiaari juucua Jerusalén tiacajiniji. Nojuajaari jiyacari pueyano moquiaarijuhua. Cunora, nojuajaari nujuatejojuajinia nujuatesano quiriquiaa. <sup>20</sup> Pilatoori Jesu cartenu panijia juucua. Naaratej, Pilatoori pueyata pocoojorohua socua. <sup>21</sup> Pueyari saaja jiyacaterree jiyanohua nacoonura jatiqui:

—¡Cuaara mosaaria niyacutesanojinia teetesano! ¡Cuaara mosaaria!

<sup>22</sup> Pilatoori pueya sequenu pacuterohuacuhua:

—¿Maatucua casaara mosaarejaarani? ¿Sesa miiritijiaaraj? Janyacuajaari tari na nequesoreereeni. Majaari sesa na miiniu quirii na mosaanura. Janiyari na majacutenutaniya narejani. Na nuhuaji cartesaarohuari.

<sup>23</sup> Pueyari saaja socua jiyanohua nacoree niyacutesanojinia na mosaanura. Pueyacuara secojona jiyaniijianucuaari mariyata pueyata jiyanohua nacoeriquiaa. Puera jiyanohua nojori nacoosacari, nojoriiri Pilato shocotaree. Cunora, Pilatoori maja na naata cartenu quirii Jesu, taa na paniriquiaacuajani. <sup>24</sup> Naaratej, Pilatoori socua tariniriohua. Pueya panishano miiriiri. <sup>25</sup> Pueya sequesano pueyano cartereeri, cante nujuatesaaquiaari nujuatejojuajiniacuajani na taanuunu paniniuuca Romano pueya, na monucua pueyanohua. Na nuhuaji, Pilatoori Jesu tarinitiaree socua, nojori mosocoriquiano, taa nojori paniriquiaacuajani.

*Niyacutesanojinia Jesu teetesacari*

(Mt 27.32-44; Mr 15.21-32; Jn 19.17-27)

<sup>26</sup> Pueya jiyatasacari Jesu pucoosaquiria, nojoriiri tamonu pueyano quiaree Jerusalén tiacajiniara riujuyano juucua. Nojuajaari Cirene jiyajinijinio pueyano quiquiaari. Na sesa quiquiaari Simón. Nojuajaari niyacutesano patesaree Jesu nuhuaji.

<sup>27</sup> Queraatia pueyari Jesu nuhuajiriquiaa, queraatia maajipohuanio. Maajipohuari Jesuucua nujuqueturiquiaa, na nuhuaji nojori sacuasacari. Nocua sapiyonuuriquiaari,



nocua nojori taraajenuta. <sup>28</sup> Jiyacaritij, Jesuuri cuno maajipohuacua tacateree. Nojori sequereeri:

—Jerusalén tiacajiniji maajipohuanaa, maja cucua nujuquetunu. Tama niaacuajaaja nia nujuquette, nia niquiohuacuanio. <sup>29</sup> Na nuhuaji, jyanohua taraatia quishacariiri quiniutianiya niaara, jyanohua taraatia. Jiyacaritij, pueyari sequenutaniya: “Socua shuquiriaatia quijiaa cutaraari noo maajipohua cante muetuyashijiani, cante manajeyashijianucuan, mariyata cante mueya supueteyashijianucujanuhuaaj”. Mueyaraca maajipohuari jiyacari jyanohua taraajenutaniya, nojori niquishacari necohua miishacari naquiya. <sup>30</sup> Naquiya miishacari, jiyacaritij, pueyari tuhuananuhua sequenutaniya: “¡Canaacua quia jiyaretaare!” Naajuhuaaj, shiitianiyojua tuhuananuhua sequenutaniyari: “¡Canaacua nia tiyare canaa nia jamonura!” <sup>31</sup> Jiyacariiri jyanohua naquiya miishacari quiniutianiya. Quiarijia, janiya jaara naa naquiya miishiyacuaani, ¿taaquitijia Pueyaso tojtiaashijiaa miishaanutaniyatejaj?

<sup>32</sup> Caapiqui sesa miijiaaari jaatucunuusaariquiaajuhuaaj, mariyata teetesocoriquiano Jesuta. <sup>33</sup> Nojoriiri puecoosaqui tuquijiosee. Cuniqiu pueya puecoosaquini, na sesa quiquiaari “Pueyano Nacaco”. Nojoriiri tii Jesu teeteree maca niyacutesanojinia. Cuno caapiqui sesa miijiaaari teetesosaarejuhuaaj, niquiriyatu na miaquetajara, tamonu na muenecara. <sup>34</sup> Jesu jaara tari pijiosaariquiaa maca niyacutesanoocua, nojuajaari na Que Pueyaso sequeree:

—¡Cua Quenaa, quia jyanoori nio pojori! Majaari nojori niishiniu casaa na miituyani. Na nuhuaji, soldadohuari saitia tacuarishijioree, nojori niishiniuria taa nojori seraanutaniya Jesu toqeni. <sup>35</sup> Pueyari Jesu shootiariquiaa. Judiocuaca jyaniijianucuaari jaarajaaja Jesujiniji naa tama sequetooriquiaajaaja:

—Nojuajaari saaja tamonu pueya naatanijiojua. Quiarijia, nojuaja jaara seetanujuanaa Pueyaso Jiyarosano Cristo quiri, cuaara roseera niyacutesanojiniji pa niquiara.

<sup>36</sup> Soldadohuari Jesu macatiriquiaajuhuaaj. Nojoriiri Jesu raateree piiquia vino juucua. <sup>37</sup> Jesu sequetureeri:

—Quiaa jaara Judiocuaca jyaniiijia quiri, ¡niyacutesanojiniji quia roserecuarajaj!

<sup>38</sup> Jesu nacaacuma, suruhuatuneeri rupotasaquiaari naajiosano Griego rupaajinia, Romano pueya rupaajinia, Hebreo rupaajinianio. Tii naajiotasano quiriquiaari na nocuara pueya saquiriojotasano: “Nio pueyanoori Judiocuaca jyaniiijia”.

<sup>39</sup> Tamonu cuno sesa miijiacajininijio Jesu shuriucua teetesano quiriquiaani, nojuajaari Jesu rerequeteriquiaajuhuaaj. Naa Jesu sequeriquiaari:

—Quiaa jaara Pueyaso jiyarosano Cristo quiri, tama quia roserejaaja cuniqiji. ¡Canaa quia roshinijiorejuhuaaj!

<sup>40</sup> Narta sesa miijiaari na juaarii:

—¿Quiaateeri Pueyaso puereyashijia? Quiaari mosaanutaniyajuhuaaj. <sup>41</sup> Pajaniya cutaraari sesa pa miiniucua naquiya miishiyani. Paacuajaari maninia saniitioshiyani sesa pa miiniucua. Saniniujia, nio pueyano pa tajinia nujuataani, ¡nojuajaari sesa miyashijia cutara!

<sup>42</sup> Na nuhuaji, narta sesa miijia juaaniaari Jesu sequeree:

—Jesunaa, majaari cua niyajetanuuja, Pueyaso jaara quia jiyatere Jiyaniiijajanaa quia quiniuria.

<sup>43</sup> Jesuuri na riucaaree:

—Seetanujuanaa quia sequeyanijia, quiarijiani, nio juucaja, quiaari cuata quiniutianiya shuquiriaatia quishaqui cutara.

### *Jesu cusosacari*

(Mt 27.45-56; Mr 15.33-41; Jn 19.28-30)

<sup>44</sup> Panacari, ¡jiyari ninishiquiria quiquiaari puetunujuanaa, juhua niucua! Pananu piriushacari, cuhuatemohuari. <sup>45</sup> Jiya quishacarijia ninishiqui, jiyacaritij, Jerusalén tiacajinia Pueyaso Secojoua tijinia, ¡jyanohua shiquiquia toquejiniji sohuacaari noojiaacoji sutequiaari puetunujuanaa querajaquera! <sup>46</sup> Jiyacariijuhuaaj, Jesuuri nacaree:

—¡Cua Quenaa, cua sohuano quia cojuare!

Naa na sequenu nuhuajitij, Jesuuri cusoquee.

<sup>47</sup> Romano soldadohua jyaniiijia niquishacari puetunu niojuanaa, nojuajaari maninia sequeree:

—¡Seetanujuanaa, nio pueyanoqui sesa miyashijia quiquianu!

Naa na sequesanoori Pueyaso shuquiritirii.

<sup>48</sup> Puetunu pueyajanaa, canapete Jesu shootiariquiaa cusoyanoni, nojoriiri taraatia na tijinia quiojoquiaariuhua. Nojoriiri tama na jiriquiaaja piquiniuuquiaariuhua, jyanohua nojori tacaaniutia naa nojori monucua Jesu. <sup>49</sup> Saniniujia, puetunu Jesu

niishishano pueyajanaari tii jiyojetarohuajaa, maajipohuajuhua, canapuete Jesu nuhua-jiquiaari Galilea jiyajinjicuaani. Puetunu nojorijianaari tucuaaanuji niqutiariquiaa Jesu.

*Jesu quete niasacari raaco*

*(Mt 27.57-61; Mr 15.42-47; Jn 19.38-42)*

<sup>50</sup> Tamonu maninia pueyanoori quiquiaari. Nojuajaari Pueyaso tojjia pueyano quiquiaari Arimatea tiacajinjio. Cuno tiacaari Judea jiyajinjiajuhuaj. Cuno pueyano sesa quiquiaari José. Nojuajaari Judiocuaca jiyaniijanucuaajinjio quiquiaari. <sup>51</sup> Cuno Joseeri Pueyasocua tiuujia quiquiaari. Nojuajaari pueyaracaanu sashijia, Pueyaso Jiyarosocoriquiano cuara Jiyaniijara jiyatesaaria cutara. Cunora, majaari José panini quiquiaari cutara, narta jiyaniijanucua sequesacari Jesu cuara mosaari. <sup>52</sup> Naacaujiti, Jesu cusosacari, Joseeri Pilatocua quiquiaari, Jesu quete na masenura. <sup>53</sup> Na nuhuaji, Jesu quete roshinirii niyacutesanojinijiri. Na jiuniooreeri cohuajaque quenaarueque toquejinia. Jesu quete niaree tarija na jiuutianishano saajajiniari. Cuno raajinia, juhuanojuaja maja macu niasaanu quiquiaari. <sup>54</sup> Cuno juucaari quiquiaari Judiocuaca jeenucuasacari juhuacarija samaatenu juucaacuara. Nojori samaatenu juucaari quera coteeriquiaa tari. Judiocuacaara, pananu tiuquishacari, tamonu juucaari tari coteequiaari nojorria.

<sup>55</sup> Cuno maajipohua, cante Jesuta nijioquiaari Galilea jiyajinjicuaani, cuno pojoriiri José nuhuajiquiaari raajiniara. Nojoriiri raaco niquishii, taa Jesu quete niasaareeni. <sup>56</sup> Nojori riujiuushacariuhua na tiajiniohua, nojoriiri juhuataja shanohua jaanutaja cojitijosuhua, macucua nojori niojosocoriquiano. Na nuhuaji, nojoriiri pootia quiriohua samaatenu juuca, taa Moisés rootaquiaaricuaani.

## 24

*Jesu samiitiasacariuhua*

*(Mt 28.1-10; Mr 16.1-8; Jn 20.1-10)*

<sup>1</sup> Coteenu semaana juucajinia, cuno maajipohuari tariquicuaji raajiniara quiaquiaari. Nojori cojitijosano shanohua jaanutaja patootaareeri. <sup>2</sup> Nojori tiuquijiosacari raajinia, saajajinjii quejasano raa tiotiu niqutiushiiri tariucua tamocora shuucquitishano. <sup>3</sup> Naaratej, nojoriiri raaco tiuquitiamaa. Shaaqui quiriquiaari Jiyaniijia Jesu quete. <sup>4</sup> Nojoriiri shiriquirii. Majaari nojori niishiniu quiriquiaa taa nojori miinutianiyani. Canashyaquiji caapiqui pueyari nojori shuriucua nujuatuquee. Nojori toqueeri shacantuque quiriquiaa. <sup>5</sup> Maajipohuari na puerenuta jiyocuara naniquieree. Cuno canuuri nojori sequeree:

—¿Casaara nia pajeya saminio pueyano macu niojosaquini? <sup>6</sup> Maja tari niya na quiniu. ¿Tari samiitarohuano! ¿Niaateeri tari niyaretaree na sequesano niajaniya, Galilea jiyajinia na quishacarija? <sup>7</sup> Nojuajaari tari nia sequecanucuaja, nojuaja sesa miijaca niqutiosaanutaniya. Nojoriiri na monutaniya niyacutesanojinia. Na nuhuaji, nojuajaari samiitanutaniuhua jiuuujanaraca juucajinia.

<sup>8</sup> Jiyacaritij, maajipohuari shusha niishiquii tarijia Jesu sequesano nojori. <sup>9</sup> Nojori tacatesacariuhua jamajinjii, nojoriiri Jesu once saquiriojosano pueya caminiujishuhua puetunu niojuanaa, puetunu Jesuucua tiunuaa pueyajanaano. <sup>10</sup> Cuno maajipohua, Jesu saquiriojosano pueya pohuataquiaariuhua, nojoriiri nio maajipohua quiquiaari: María Magdalena, Juana, Santiago nucua Maríajuhuaj, socua tamasaca maajipohuanio. <sup>11</sup> Jesu once pueyara, maajipohua pohuatasanoori juhua paateca sequesano quiquiaari saaja. Nojoriiri saa cuarachitirijiaa maajipohua pohuatanuuso.

<sup>12</sup> Naajaa, Pedroori tiajiniji netequiaari raajiniara. Raaco na cuquesacari, saaja Jesu jiuniocotaja cohuajaque toque niquiquiaari maanoori. Pedroori juhua jiuujiaaju tacateyarohua na shiriiquiniutia, na niquishanojiniji, maajipohua pohuatasanojinijio.

*Jesu tojtianaa pueya niquishacari Jesu, nojori quiasacari Emaús tiacajiniara*

*(Mr 16.12-13)*

<sup>13</sup> Cuno domingo juucaja, caapiqui Jesu pueyari Emaús tiacajiniara quiojoriquiaa. Emaús tiacaari querajaa hora quiquiaari Jerusalén tiacajinjii, niouacata quiasacari tirara. <sup>14</sup> Nojori quiojosacari nucuaoco, nojoriiri Jesujinjii pocojoriquiaa, mariyata shusha naataja pueya miishanojiniji Jesu. <sup>15</sup> Naa nojori pocojosacari nucuaacotej, Jesujuanaari jiyacari nojori rupuesee. Juhuaajaniya nojoritia pacutaareeri. <sup>16</sup> Majaari nojori niishiniu quiquiaari cana pueyanote cuno quiquiaarini. Nojori namijiaari tojequiaari, maja nojori niishiniuria Jesu. <sup>17</sup> Jesuuri nojori nequesotaree:

—¿Casa nia pocojotaacuaani?

Nojoriiri nujuatuquee. Taraajecoyano niquishaariquiaari.

<sup>18</sup> Cuno caapiqui pueyanojinijini, tamonu sesa quiquiaari Cleofas. Nojuajaari Jesu riucaaree:

—Puetunu pueyajanaacuaajaari niishiya casaate Jerusalén tiacajinia miishaarucuaa taraatiani. Quiaacuaajaari Jerusalén tiacajinia quiquianujuhuaj. ¿Quiaatucua casaara niishiyaquirini casaate miishaarucuaani?

<sup>19</sup> Jesuuri nojori nequesotaree:

—¿Casaate tii miishaarucuaajaarani?

Jesu sequereeri:

—¡Nazaret tiacajinijinio Jesuuri mosaarucuaajaj! Nojuajaari Pueyaso sequesano camini-  
ujiunia quiquianu. ¡Jiyanohua maninia quijiaari na cumaacata na miijosano, na niishi-  
tijosanojuhuaj! Pueyaso timitiasano quijiaari, puetunu pueya panishanojuanaano.  
<sup>20</sup> Pueyacuara secojonaa jiyaniijianucua, mariyata pa camarucuaari na niqitiorucuaa  
Romano jiyaniijia na motesocoriquiano. Niyacutesanojinia mosaarucuaari. <sup>21</sup> Canaari  
juucua jiyaniquianuni, nojuajaari Romano pueya taanuunutaniya, pa Israel pueya quini-  
uria juhuajaniya tama pajaniyajaaja. Quiarijiani, jiuujianaraca juucaari tari na shoconu-  
jiya na mosaanujiniji. <sup>22</sup> Tamasaca maajipohua canaa maanujinijinioori canaa shiروه  
nojori pohuatasanota. Nojoriiri quiarijia tariquicuaji quiojomaa Jesu raajinia. <sup>23</sup> Nojoriiri  
maja na riuriatanu quishii na quete. Nojori tacatesacariuhua, nojoriiri canaa pohuata-  
suhua, nojorinia Pueyaso seya niqirii juhua na maquenujinia. ¡Cuno Pueyaso seyanaari  
nojori sequeree, Jesu tari samiitiarohua! <sup>24</sup> Na nuhuaji, tamasa canaajinijinioori  
raajinia quiojyareejuhua. Seetanujuanaa naa quiriqiaari, taa maajipohua sequeree  
canaacuaani. Maja cutaraari nojori niqiniu quirii Jesu.

<sup>25</sup> Jiyacaritij, Jesuuri nojori sequeree:

—Pueyanaa, majaquiri juhuanujuaja nia niishiniu. Niaari taacanuyajaa puetunu tar-  
iucuaaanu Pueyaso sequesano caminiujiuniaa naajiotasanoocuaajanaa nia tiuuniuria.  
<sup>26</sup> ¿Majateeri naa na pohuatasaanu quiquiaaricuaa: “Cristoori coteenu naa mosaanu-  
taniyaquij. Na nuhuaji cutara, jiyanohua cumaacaracara quijara jiyatesaanutanihuari  
Jiyaniijiajanaa na quiniuria”?

<sup>27</sup> Jesuuri juhuacatecara nojori niishitiojoree puetunu tariucuaaanu Pueyaso Rupa-  
ajinijijianaa, tee nojuajiniji naajiotasano quiyacuaani. Moisés naajiotasanojiniji pohu-  
atanu coteereeri, na nuhuaji, puetunu Pueyaso sequesano caminiujiuniaa naajiotasano-  
jinijijianaano.

<sup>28</sup> Nojori tiuquishacari cuno tiacajinia, terara nojori quiojoriqiaacuaani, Jesuuri juhua  
shocoriquiano canujiriquiaa. <sup>29</sup> Nojoriiri nojoritia na jiyojetenu paniriquiaa jiyanohua.  
Nojoriiri na sequeree:

—¡Niyaja canaata quia jiyojere! Paa tari niniyareeni.

Naaratej, Jesuuri nojoritia jiyojese cuniqui. <sup>30</sup> Jesu jaara nojoritia cajiriquiaa tari mi-  
aquejajinia, nojuajaari pan ririi. Nocuara Pueyaso secojoreeri. Nojoriiri na neecasereeri.  
Na nuhuaji, nojori serotareeri. <sup>31</sup> Jiyacaritij, nojori namijaari juhua riatequequee. Jiy-  
acariqui na niishitiquiri. Jesuuri saaja shaajequee cuniquijia nojori tajiniji. <sup>32</sup> Nojoriiri  
sequetooree:

—¡Jesucuaajiquiri quiriqiaa! ¡Cunora poojiaqui jiyamitia timiriquiaa na pocoojosacari  
pajaniyata nucuamaji, nojuaja jaara niishitiojoriqiaa pajaniya Pueyaso Rupaajinia naa-  
jiotasantej!

<sup>33</sup> Jiyacaritij, nojori shuquiriniuta, nojoriiri ritia sanetaquee. Cuniquiji Jerusalén  
tiacajinaria tacaretaarohuari. Nojori tiuquishacariuhua, nojoriiri puetunu Jesu once  
saquiriojasano pueyajanaa riuriatasuhua tii tariucua rerejono, mariyata socua narta Jesu  
pueyata. <sup>34</sup> Tariucua tiajinia quiniaari Emaús tiacajiniji tiuquijionaa sequeree:

—¡Pa Jiyaniijiaqui seetanujuanaa samiitiarohua! ¡Simónri na niqirii!

<sup>35</sup> Na nuhuaji, shusha tiuquijionaa nojori pohuatareejuhuaj, taa Jesu pocoojoriqiaa  
nojoritiani, nucuaco nojori quiasacari, mariyata taa nojori niishirii nojuajani, pan na  
neecasacari nojoriiri.

*Jesu muetasacariuhua na saquiriojasano pueyacua*  
(Mt 28.16-20; Mr 16.14-18; Jn 20.19-23)

<sup>36</sup> Nojori pocoojosacarijia nojori niquishanojiniji Jesu, jiyacaritij, Jesujuanaari  
canashyaquiji nojori tajinia nujaaquee. Naa nojori sequereeri:

—¿Niaate quiyajaa? Nioojia nia cajitiri.

<sup>37</sup> Nojoriiri shiriqitiqui. Jiyanohua puereturiquiaari. Nojoriiri Jesu jyaniriquiaa  
naaqui. <sup>38</sup> Jesuuri nojori sequeree:

—¿Casaara nia pueretiuyani? ¿Casaara nia jiyajenetaa janiyani? <sup>39</sup> Cua juaashiquia nia niqiri, cua niohuacanio, nia niishiniuria janiyacuaajaari quiyani. ¡Cua cootiuri! ¡Cua niq-uitiuri! Naaquiiri maja cuaqueyaraca, maja nucuhuaraca taa nia niqiya janiyacujani.

<sup>40</sup> Naa nojori na sequesacarij, Jesuuri nojori niqitijioree na juaashiquia, na niohuacanio. <sup>41</sup> Puera nojori jiuujiatesacari, puera nojori shuquirishacarijuhuaj, nojoriiri taacanuuriquiaajaa, maja naasucua Jesu. Cunora, Jesuuri nojori sequere:

—¿Niaate miaquesocoriquiiano jiitiaacuaa?

<sup>42</sup> Nojoriiri Jesu niqitioree sapitiaaja raqui caquishano. <sup>43</sup> Jesuuri na maseree. Nojori niqiara na miaquereeri. <sup>44</sup> Na nuhuaji, nojori sequereeri:

—Janiyari naa miishaarucuaani taa cua pohuataquiaari nijaniyacujani, pueyara-caanu niaata cua quishacari tarijia. Nia sequequiaaricujani, janiyari naa miishaanuta-niyani, taa Moisés naajiotaquiaari janiyajiniicujani. Puetunu Pueyaso sequesano caminiujuniaajanaari janiyajiniji naajionuutaquiaarijuhuaj. Supuetana Davidri janiyajiniji naajiotaquiaarijuhua na jaaquejoneejinia. Quiarijia tari tohuateerucuaari puetunu janiyajiniji cuno naajionuutasanojuanaa.

<sup>45</sup> Jiyacaritj, Jesuuri nojori niishitirii tariucuaaanu Pueyaso Rupaa naajiotasano. <sup>46</sup> Nojori sequereeri:

—Tariucuaaanu naa naajiotasanoori quiya: “Pueyaso Jiyarosocoriquiianoori mosaariquiiano, na nuhuaji, jiuujianaraca juucajinia samiitianutaniuhuari”. <sup>47</sup> Naa naajiotasaaquiaarijuhuaj, Jerusalén tiacajinia, janiyajiniiri pohuataaanutaniya pueya niqiara, na nuhuaji puetunu jiyacajiniajanaanio. Pueya tiuushacari cucua, nojori jaara noojiaca tacatorohua sesa nojori miiniujiniji, sesa nojori miishanoori tuujusaanutaniya, Pueyaso jiyanooshacari nojori. <sup>48</sup> Niaacuajaari puetunu cua miishanojuanaa niqijiaca. <sup>49</sup> Cua tojitiare. Janiya jaara jiyocuaaanu quiaarohua cua Queecuani, janiyari Pueyaso Sohuanu jiyaronutaniya niaacuani, taa cua Que sequequiaaricujani. Niyaja pootia nia quiri Jerusalén tiacajiniani, niaa jaara jiyocuaaanuji niriquiiano cumaaca maserejaatijia.

*Jiyocuaaanu Jesu tacasacariuhua*  
(Mr 16.19-20)

<sup>50</sup> Na nuhuaji, Jesuuri nojori jiyataquiaari Jerusalén tiacajiniji, Betania tiacajiniara. Cuniqi nojori quishacarijia, Jesuuri na juaashiquia shiitioquiaari nojoriicuaara na secijosacari Pueyaso, Pueyaso jiitianura maninia pueyaracaanu nojori. <sup>51</sup> Nojoriicuaara na secijosacarijia, Jesuuri nojori shuriucujia tacanishaaquiaari jiyocuaaanu. <sup>52</sup> Nojoriiri na shuqiritiaree. Na nuhuaji, nojoriiri Jerusalén tiacajinia panaatia tacateyarohua. Nojoriiri jiyanohua shuquiriaatia quiriqiaa. <sup>53</sup> Nojoriiri pueyaracaanu quijia Pueyaso Secojua tijinia. Tii Pueyaso maniniuhuaquetatujua pueyaracaanuuri. Tariucujia.

## JUAN NAAJOTASANO JESUCRISTOJINIJI

### *Pueyaso Rupaa jatasacari pueyanora*

<sup>1</sup> Paari Jesucristojiniji niishiyani taamuecateja na Que Pueyasoni. Naaratej, Jesucristoori sesojosaaquuaari “Pueyaso Rupaa”. Nojuajaari tari pueyaracaanu quijia, jiya quiyaquishacarijia. Na Que Pueyasota quijiaari. Pueyaso quijijaariuhua. <sup>2</sup> Jiya coteesacari, nojuajaari na Que Pueyasota quiriqiaa. <sup>3</sup> Na Queeri na shipinitiquaari puetunu casaajanaa. Puetunu casaajanaari na shipinishano. Maja tamonu shipininia quiniu socua. <sup>4</sup> Nojuajaari quijiajuhanajaj. Naaratej, nojuajaari na naata pueya jiuujia cuhuatanu, pueyaracaanu rishijia nojori quiniuriajuhuaj. <sup>5</sup> Jesucristoori cuhuashiqui quijia. Naaratej, na rupaata poojia cuhuataari. Saniniuujia, Sesaacaari ninishiqui quijia. Naajaa, majaari na naata Pueyaso Rupaa na shocotanu. <sup>6</sup> Pueyasoori quari naataja tamonu pueyano jiyaroquiaari. Neyanujiniji pohuatariquiano. Na sesa quiquaari Tiuquinijiona Juan. <sup>7</sup> Pueyasoori na jiyaroquiaari pueya na niishitiniuria cante Jesucristoni, pueya tiuuniuria Jesuucua, nojori jiuujia na cuhuatanura. <sup>8</sup> Juanri maja pueya jiuujia cuhuatana. Nojuajaari Jesucristojiniji pohuataquiaari pueya niishiniuria cante saniya poojia cuhuatana cutarani. <sup>9</sup> “Pueyaso Rupaari” seetanu poojia cuhuatanajanaa. Nojuajaari Jesucristo. Jiyocua niquaariiri puetunu pueyajanaa niishiniuria cante Pueyasoni.

<sup>10</sup> “Pueyaso Rupaari” mijiria rucanejojua quiquaari. Pueyari tama nojori Shipinijaja niishiyaquiquaari. <sup>11</sup> Tama na saquiriojosano Israel pueyacua niquaariiri. Nojoriiri na tamacaquiaari saaja. <sup>12</sup> Saaja noojiaqueya pueyari nocua tiuquuaari. “Pueyaso Rupaari” cuno pueya jiyatequiaari Pueyaso muerasura nojori quiniuria. <sup>13</sup> Nojoriiri Pueyaso jatanishano, seetanujanaa na muerasu nojori quiniuria. Pueyaso saquiriojosano pueyajiniji pueyano supuesacari, cunoori maja na naata na jiyatenu Pueyaso pueyano na quiniuria. Pueyari maja na naata muetunu tariucua Pueyaso pueya. Naajuhua, pueyanoori maja na naata tama na cuaqueyajaaja jiyatenu Pueyaso pueyano na quiniuria. Pueya cutaraari Pueyaso muerasura jataquiaa Neyanuucua nojori tiuushacari saaja.

<sup>14</sup> “Pueyaso Rupaari” seetanujanaa pueyanora jataquiaari mijiria na quiniuria. Nojuajaari Jesucristo. Canaata quiquaariiri. Canaari na cumaacata na miijosano niquiquaariiri. Jiyanhua maninia quiquaariiri. Na Que Pueyasoori na cumaquijia jiyanhua maninia na miiniuria, Neyanuniyojua na quishacari. Nojuajaari saaja seetanu rupaajanaa sequeja Pueyasojiniji. Jiyanoojia quijiaari. <sup>15</sup> Tiuquinijiona Juanri Jesucristojiniji pohuataquiaari pueya niquiara. Jiyanhua na rupaa paaretaquiaariiri pueya tojtianura nojuaja. Naa sequejaari:

–Janiyacuaajari nojuajiniji nia pohuatajani, janiya jaara nia sequejani: “Tamonu pueyano cua nuhuaji niutiianiya”. Nojuajaari jiyaniijajanaa cutara janiyajiniji. Nojuajaari tari quijia cua quiyaquishacarijia.

Juanri naa pohuataquiaari Jesucristojiniji.

<sup>16</sup> Jiyaniijajanaa Jesucristo quiniuucua, puetunu pajaniyajanaari na jiiitasanojiniji masequiaani. Jiyanhua capora na quiniuucua, nojuajaari pueyaracaanu na cumaquiquaia. <sup>17</sup> Pueyasoori supuetana Moisés naajitequiaari na rootasano pajaniyara. Cunoori maja na cumaquiniu quiquaari pajaniya. Quiarijia saniniuujia, pa panijia Pueyaso quiniuucua, nojuajaari Neyanujanaa jiyaroquiaari pocua, pa jiyanooshaanura, naajuhua, seetanu rupaajanaa pa niishiniuria nojuajiniji. <sup>18</sup> Majaari quenaaja tamonu pueyano niquiniu quijia Pueyaso. Neyanu, cante na Que shuriucua quijiacuajani, nojuajaari na Que pa niishitioquiaari.

### *Tiuquinijiona Juan pohuatasano Jesucristojiniji*

(Mt 3.11-12; Mr 1.7-8; Lc 3.15-17)

<sup>19</sup> Jerusalén tiacajinijinio canaa Judiocuaca camarucuaari na pueya jiyaramiquiquaari Tiuquinijiona Juancua, nojori nequesoreenura Juan cante nojuajani. Nojori jiyaramiquishano pueyari quiquaari supuetana Leví niquihuacuajinio supueno pueya. Noojiaqueya cuno pojorijinijinioori quiquaarijuhua pueyacuara secojonaa pueya. <sup>20</sup> Nojori nequesotasacari Tiuquinijiona Juan, nojuajaari maja quenaaja na seetanu quiquaari cante nojuajani. Seetanujanaa naa nojori sequequiaariiri:

–Janiyari maja Pueyaso Jiyarosano Cristoni.

<sup>21</sup> Cuno pueyari socua na nequesotarohua:

–¿Canteeri quiajaniyani? ¿Quiaa jiyoteeri Pueyaso sequesano caminiujunia Elías soj? ¿Quiaa jiyoteeri samiitarohuacuaa?

Tiuquinijiona Juanri saaja nojori riucaaree:

—Maja. Janiya maja supuetana Elíasni.

Cuno pueyari socua na nequesotaro huacu huaj:

—¿Quiaa jiyoteeri Pueyaso sequesano caminiujuunia, nooj tariucuaaanu sequesaaquiaari niri quianotej?

Juanri saaja nojori riucaaree:

—Maja.

<sup>22</sup> Cuno pueyari socua na sequereee:

—Canaa quia pohuatareja, ¿cante quiajaniani? Canaacua saniniuuja canaa camarucua pohuatasuhanija.

<sup>23</sup> Juanri saaja naa nojori riucaaree:

—Janiyacua jaari noonni, carii quia jiyajinia nacajatej, taa supuetana Isaías juhuacarijia naajiotaquiaari janiyajini quiajani: “¡Jiyaniijia cuajani nia nuunore maninia! ¡Maja shuuti-niu!”

<sup>24</sup> Jiyacarij, Fariseocuaca camarucua jiyaramiquishano pueyari Tiuquinijiona Juan nequesotaree:

<sup>25</sup> —Quiaa jaara quiaquiri Cristo, Elíasjuhuaj, cuno tariucuaaanu sequesaaquiaari niri quiano Pueyaso sequenu panishano caminiujuuniatej, ¿casaara pueya quia tiuquinijia moojinia cuaraarini?

<sup>26</sup> Juanri nojori riucaaree:

—Janiyari nareja moojinia tiuquinijia pueyani. Saniniuuja, tamonuuri niya quia, nia niishiyaquishoojua. <sup>27</sup> Nojuajaari cua nuhuaji niniutianiya. Nojuajaari jiyaniijiajanaa cutara. Majaari quenaaja cua naata na seru quiniu na sapatu neyocua cua saacatanura nera.

<sup>28</sup> Naa cuno pojori nequesoreesacari Tiuquinijiona Juantej, cunoori quiri quiaa Betania jiyaniishano tiacajinia, Jordán moo taquijiria, tee cuniqui Juan tiuquinijioriquiaa moojinia pueyacuajani.

### *Jesu juhua Pueyaso borregoniyojua pocuara mosaariquiano*

<sup>29</sup> Tariqui saniniuuja, Tiuquinijiona Juanri Jesu niquirri nocua niyano. Juanri naa sequereee canaa ni quiaara:

—Paari pueyaracaanu moo quiaa borregohuani Pueyaso jiyanooniuria pajaniya. ¡Nia niquirri! ¡Cuno cumaji canujiani, cunoori Pueyaso Jiyarosano, juhua borrego puetunu pueyacuara mosocoriquiano, seetanujuanaa sesa pa miishanojiniji pa jiyanooshaanura!

<sup>30</sup> Jiyacuajaari nojuajini nia pohuatajani janiya jaara nia sequejani: “Cua nuhuaji niniutianiari jiyaniijiajanaa cutara. Nojuajaari tari rishijia cuajani cua quiaquishacarijia”. <sup>31</sup> Janiyari na niishiyaquijiajuhuaj, cante nojuajani. Naajaa, janiyari parta Israel pueya tiuquinijio quiaa moojiniani, noojia nojori jeenucuanura, Pueyaso Jiyarosano nojori niishiniuria cutara.

<sup>32</sup> Tiuquinijiona Juanri pueya sequereeejuhuaj:

—Janiyari Pueyaso Sohuanu niquiriucuaani jiyocuacaanu jiyoseyano nocua juhua mococoonu. Nocua tiuushiiri. <sup>33</sup> Cuno, cua jiyaroquiaari pueya cua tiuquinijionura moojiniani, nojuajaari cua sequequiaari: “Quiaa jaara cua Sohuanu niquiri pueyanocua roseyano, nocua na tiuuniuria, quiocua niishiri, cunocua jaari cua sequesano quiajaniani. Nojuajaari cua Sohuanu tiuquinijionutaniya pueya jiuujajinia cutara, seetanujuanaa cua muerasu nojori quiniuria”. Nojuaja jaara naa cua sequeyacuquiaari, janiya maara na niishiyaquiquianuni. <sup>34</sup> Janiyacuajaari tari na niquiri quianuni. Naaratej, janiyari saniniuuja nia pohuataani pueyanaa, ¡nojuajaari seetanujuanaa Cristo, Pueyaso Niyanu!

### *Coteenujanaa Jesu pueyajiniji pohuatasano*

<sup>35</sup> Tariqui, Tiuquinijiona Juanri tii quishi quihuua caapiqui na pueyata. Janiyari niquiriyatu cuno caapiqui pueyanojinijio quiri quiaani. <sup>36</sup> Tiuquinijiona Juan jaara Jesu niquiri quiaari shocoyano, jiyacari canaa sequereeri:

—¡Nia niquirri! Cunoori cua sequesano nijaniya, Pueyaso Jiyarosano pocuara mosocoriquiano juhua borrego, sesa poojia sequejeequesaanura.

<sup>37</sup> Naa canaa tojishacari Juan sequesantej, canaari Jesu nuhuajiquiaarini. <sup>38</sup> Jesuuri canaacua tacaterree. Canaa na niquishacari na nuhuaji sacuaano, canaa sequereeri:

—¿Casaa nia paniani?

Canaari na sequereeni:

—Niishitiojonanaa, ¿tee quia maquequiaacuaani?

<sup>39</sup> Jesuuri canaa riucaaree:

—Miji. Nia niquiri.

Canaari nata quiaareeni. Canaari na quijia niqitiushiini. Tari pananu piriuushacariiri quiriquiaa jiyacari. Cunora, canaari tii maquetusee Jesutani.

<sup>40</sup> Tiuquinijona Juan niqitiniuucua Jesu canaa, canaari Jesu nuhuajiquiaarini. Andrésri cua cojiriquiaa. Andrésri tarajanu jiitiaja. Na sesaari quijia Simón Pedro. <sup>41</sup> Tariquicuaji, Andrésri ritia tarajanu Simón pajenuucua quiaquiaari. Na riuriasacari, na sequereeri:

—¡Cua tarajanunaa, canaari Cristo niquiriquiacuaani, tariucuaaanu Pueyaso sequesano na jiyarosocoriquianotej!

<sup>42</sup> Na nuhuaji, Andrésri tarajanu Simón jiyataaree Jesuucua. Jesu niquishacari Simón, na sequereeri:

—Quiaacuajaari Simón, Juan niyanu. Quiarijia saniniuujia, quia sesaari quiniutianiya Cefas.

Griego rupaajinia, niiori sequeya Pedro. Pedroori saniniuujia pueyano rupaajinia sequeya “Saajia”.

*Jesu saquiriojosacari Felipe, Natanaelno*

<sup>43</sup> Tariqui, Jesuuri Galilea jiyajiniara quiariquiaa. Felipe riuriatamaari. Na sequereeri:

—Cua tarajare cua pueyano quia quiniuria.

<sup>44</sup> Felipeeri nata quiaaree. Nojuajaari Betsaida tiacajinijinio quiquiaari. Andrésri tarajanu Pedrota cuno tiacajinijinio quiquiaarijuhuaj. <sup>45</sup> Na nuhuaji, Felipeeri Natanael pajeree. Na riuriasacari, na sequereeri:

—¡Canaa noo pueyano niquiriini, Moisés nojuajiniji naajiotaquiaari tariucuaaanutej! Tariucuaaanu Pueyaso sequesano caminiujunaa pueyari nojuajiniji naajionuutaquiaarijuhuaj. ¡Nojuajaari Nazaret tiacajinijinio Jesu, José niyanu!

<sup>46</sup> Natanaelri saa riucaareejaa:

—¡Jaj! ¿Na naatate maninia miijia pueyano supenujuuara cuno sesa miijia Nazaret tiacajiniji?

Felipeeri na sequere saaja:

—¡Mijj! ¡Pa niquishii!

<sup>47</sup> Jesuuri Natanael niquirii nocua niyano. Na sequereeri:

—Nio pueyanoori seetanu pa supuetana Israel niquiohuacujinio supenujuanaa cutara. Majaari na niishiniu sapojonu.

<sup>48</sup> Natanaelri na sequereeri:

—¿Taa quia niishiya janiyarini?

Jesuuri na riucaaree:

—Felipe sequeyaquishacarijia quiajaniya cucua quia niniuria, janiyari tari quia niquirii coojiatani, higo naana pajama tateyano.

<sup>49</sup> Natanaelri shiriquirii. Jesu sequereeri:

—Niishitiojonanaa, ¡quiaacuajajui Pueyaso Niyanu! ¡Quiaari parta Israel pueya jiyani-ijiaranojuhuaj!

<sup>50</sup> Jesuuri na sequereeri:

—¿Quiaateeri cucua tiuuquii shusha saaja cua sequesacari quiajaniya: “Quia niquirii higo naana pajama tateyanonijia”? Seetanujuanaa quia sequeyanijia, quiaari na nuhuaji cua cumaacata cua miijiosano niquiniutianiya cutara.

<sup>51</sup> Jesuuri cuniqui quiniaa pueya sequereejuhuaj:

—Seetanujuanaa nia sequeyanijia, niaari jiya cajiniocua niquiniutianiya riateno. Pueyano cua quishacari, niaari Pueyaso seya niquiniutianiya cucua roseetaano, cucuaji taqueetaanojuhuaj.

## 2

*Jesu jatanishacari mohuaca vinora, pueyano camishacari*

<sup>1</sup> Jiuujianaraca juuca nuhuaji, tamonu pueyanoori camiquiaari Caná tiacajinia, Galilea jiyajinia. Masusano pueyari queranacuriquiaa. Jesu nucuaari tii quiriquiaajuhuaj. <sup>2</sup> Jesuuri na saquiriojosano pueyata masuusaquiaarijuhuaj, camishacari queranacunura. Janiyari na saquiriojosano pueyano quiriquiaa jiyacari tarijuhuaj. <sup>3</sup> Jiyacaritj, mashacaari ritia puequemaa. Na nucuaari Jesu sequereeri:

—Sanaa, mashaca tari puequemaa.

Mashacaari quiquiaari uva caaca, vinotuhuaj. <sup>4</sup> Jesuuri na nucua riucaaree saaja:

—Maajinia, ¿casaara quia sequeya janiyani? Juhuanajuaja maja cua poonijosacari Pueyaso cumaacata.

<sup>5</sup> Na nucuaari pueya raatojonaa sequereeri:

—¡Niocua Jesu tojirijia! Jaara nia sequere, niocua puetunu na sequesanojuanaa miiri.

<sup>6</sup> Tii cajituriquiaari seis conatu, saajiajiniji quejasano. Canaa Judiocuacaari sequeyaru-cua shuquirioojua tiajinia nojori tiuquishacariuhua, juhua jeequesano nojori quiniuria Pueyaso niquiara. Nojori mohuaca cajitiacojua quiquiaariiri cuno conaa. Jiyanohua puereetucocua quijiaari. Cuno conatuuri setenta tumococua mishaja mohuacata mishin- ishano quijia. <sup>7</sup> Jesuuri pueya raatojonaa sequere:

—Mohuaca nia taquirioore. Niocua nio conaa mishinijiore.

Pueya raatojonaa conaa mishinijioree. Mohuacaari conaa rupaacuma puecacosee. <sup>8</sup> Jesuuri nojori sequere:

—Quiarijiani, tiji nia shuuri. Queranacunu camaru nia sanitiore coteenu.

Raatojonaa na raatesee. <sup>9</sup> Queranacunu camaruuri vinora jatano mohuaca sanirii. Majaari na niishiniu quiquiaari cuno na ratusanoori mohuacajiniji jatanishaaree vinora. Saaja pueya raatojonaa cutaraari na niishiriquiaa. Nojoricuajaari mohuaca mishini- jioree cuno conaajinia. Queranacunu camaru saniniu nuhuaji cuno ratusano, camiyano pueyano piiriiri. <sup>10</sup> Na sequereeri:

—Pueyaruhatijia coteenu raateja shocuanacu vinote. Puetunu masuusano pueya jaara tari raruure queraatia, na nuhuaji raatesano cutaraari shaarunacu vino. ¡Quiarijia saniniuuja, nio cua ratusanoni, cunoori socua maniniuniacu vino coteenu quia raatojote- sanojiniji!

<sup>11</sup> Naa Jesu jatanishacari mohuaca vinoratej, cunoori coteenujuanaa na cumaacata na miishano quiquiaari Caná tiacajinia, Galilea jiyajinia. Nojuajaari naa niqitiquiaari Pueyasojiniji na cumaaca. Naacuajitij, canaa na saquiriojosano pueyani, canaari ni- ishiquiaarini Jesuuri seetanujuanaa Pueyaso Jiyarosano.

<sup>12</sup> Na nuhuaji, Jesuuri Capernaum tiacajinia quiaaree na nucuata, tapueyocucata- juhuaj, canaa na saquiriojosano pueyano. Canaari tii camueenujuquiaari pasajani.

*Jesu jaacasacari seya niqutiojonaa Pueyaso Secojoua tiajiniji*

(Mt 21.12-13; Mr 11.15-18; Lc 19.45-46)

<sup>13</sup> Quera canaa Judiocuaca queranacacari Pascua juucara Jerusalén tiacajinia, Je- suuri tii canaa jiyataareejuhuj. <sup>14</sup> Na tiuquishacari, Pueyaso Secojoua tiajinia quia- maari. Tii niquishii pueyari juyaca niqutiojiyano Pueyasoocua puecoosocoriquiano, borregohua, noseyanio. Pueyari tii na juhuacutucujinia cajituriquiaajuhuj, pueya na tacatojonura taucuaa cumaneeca, Pueyaso Secojoua tiajinia niqutiojosocoriquiano cumaneecara. <sup>15</sup> Naa na niquishacari pueya miyano Pueyaso Secojoua tiajinijatej, Jesuuri seya morojotaja jiyocua taticuaree. Na majacutajara na shitiareeri. Cunota, puetunu nojorijanaa jacaree Pueyaso Secojoua tiajinijiri, puetunu nojori borregohuatajanaa, mariyata puetunu nojori juyacatajanaa. Cumaneeca rerecojoree jiyocua juhuacutu- cuajinijiri. Naajuhuj, cumaneeca juhuacutucua caponeetareeri. Pojotaariquiaacuari.

<sup>16</sup> Noseya niqutiojonaa pueya sequereeri:

—¡Niiquiji nia patootare nio noseya! ¿Casaara nia jiyatecanu juhua casami niqutio- josaquiria cua Que tiani?

<sup>17</sup> Jiyacaritij, canaa, Jesu saquiriojosano pueyani, canaari niishiquiini, seetanujuanaa tariucuaaanu Pueyaso Rupaajinia naa naajiotasanoori quia:

“Quia tiaacua juaatishaaree jiyanoahuanijia, jiyanohua cua panishacari quia tia”.

<sup>18</sup> Naa Jesu miiniucuatej, narta Judiocuaca camarucuaari Jesu nequesotatee:

—¿Cante quia sequerucuaa naa quia miiniuriani? ¡Canaa quia niqitiricuaratej Pueyaso cumaacata quia miishano, canaa niishiniuria quiaari seetanujuanaa Pueyaso Jiyarosano!

<sup>19</sup> Jesuuri nojori riucuaaree miriqui:

—Pueyaso tia nia niyartare, janiyacua saaja jiuujianaraca juucajinia na tucatarohua tianu tamajaajani.

<sup>20</sup> Narta Judiocuaca camarucuaari na riucuaaree:

—¡Cuarenta y seis marijiaari shoconujuquiaari pueya tucuatunura nio secojoua tia! ¿Quiaateeri jiyaniya quia naata na tianuhua ritia, saaja jiuujianaraca juucajinia? ¡Maja quia naata!

<sup>21</sup> Jesuuri tama na cuaqueyajaaja pohuatariquiaa, Pueyaso tia na sequesacari.

<sup>22</sup> Naacuajitij, Jesu jaara samitiaquiaariuhua, canaa na pueyari jiyacari shusha niishiquiaari naa Jesu sequesano miriquini. Naaratej, canaari tariucuaaanu Pueyaso Rupaajinia naajiotasanoocua tiuqujaarini, Jesu sequesanoocuanio.

*Jesu puetunu jiuujia niishijajanaa cutara*

<sup>23</sup> Canaari ocho juuca camueenujuquiaari Jesuta Jerusalén tiacajiniani, Pascuaa quer- anacunuusacari. Tii canaa quishacari, tii quiniaa pueyari Jesu cumaacata na mijiosano niqiquiaari. Naaratej, queraatia pueyari nocua tiuququiaari. <sup>24</sup> Naajaa, majaari Jesu tiuuni quiriquiaa seetanujuanaa nojoricua. Nojuajaari nojori niishiriquiaa, taamueca



pueyate nojorini. <sup>25</sup> Tamonu pahuataaquishacarijia nojuaja, nojuajaari tari niishiya taamueca jiuujiaracate pueyani.

### 3

#### *Nicodemo pocojosacari Jesuta*

<sup>1</sup> Niucua, tamonu pueyanoori niquiaari Jesuucua. Na sesa quiquiaari Nicodemo. Nojuajaari canaa Judiocuaca camarucujinijinio quijia, Fariseocuaca maanujinijinojuhuj. Tojishano pueyano. <sup>2</sup> Jesuucua na tiuquishacari, naa na sequeeseeri:

—Niishitiojonanaa, quia cumaacata quia miiniuucua canaa niiquiaari, canaari cunora niishiyani quiaari Pueyaso jiyarosano, canaa niishitiojoriquiano. Seetanujuanaa, Pueyaso jaara pueyano naacuyaquiri na cumaacata, nojuajaari maja na naata cusosuhua naatani-jionu taa quia miiquiaacuaani.

<sup>3</sup> Jesuuri Nicodemo sequereer:

—Seetanujuanaa quia sequeyanijia, pueyano jaara juhua conaaja raaquishaarohua, majaari na naata Pueyaso pueyanora na quiniu, Pueyaso jiitianura nojuaja.

<sup>4</sup> Nicodemoori Jesu nequesotareer:

—¿Pueyanotucua taa rasaarohuani, nojuaja jaara tari cumantumaca quia? Majaari na naata na nucua saracajinia tiuquiniuhua na rasaanuhua.

<sup>5</sup> Jesuuri na riuuareer:

—Seetanujuanaari cua sequesano. Cua tojiri. Paari coteenu rasaanuquiaari pueyano pa quiniuriani. Saniniuujia, cante quiarinio pueyanora jataniyaquishano Pueyaso Sohuanu-tani, nojuajaari maja Pueyaso jiitiasanoniyojua na quiniu quiniutianiya. <sup>6</sup> Mijiria pueya muetusanoori saaja pueyano. Saniniuujia, cante Pueyaso Sohuanu jatanishano quiarinio pueyano na quiniuriani, nojuajaari Pueyaso pueyano cutara, pueyaracaanu rishiriquiano.

<sup>7</sup> Naaratej, majaari quia shiriquiniu puera, naa cua sequenuucua quiajaniatej, quiaa cuara rasuhua, seetanujuanaa quiarinio pueyano quia quiniuria. <sup>8</sup> Mijiria, paratuuri piyarojoquiaa taa na paniyacuajani. Paari nareja na cojuatunenu tojiquiaani. Majaari pa niishiniu teje na piyarojiyani, tee cunocora na quiaaaniuhuj. Naajaariuhuj, majaari quia niishiniu taa Pueyaso Sohuanu jataniquiaa pueyanoni, quiarinio pueyano na quiniuria.

<sup>9</sup> Nicodemoori Jesu nequesotaruahuaj:

—¿Pueyanotucua taa quiarinio pueyanora jatanishaarejaarani?

<sup>10</sup> Jesuuri na riuuareer:

—¿Majateeri quia niishiniu cua sequesano quiajaninya? Quiaari Pueyaso Rupaa niishitiojonacuaja Israel pueyara. <sup>11</sup> Canaari seetanujuanaa pahuataquiaa canaa niishishanoni, canaa niquishanojuhuj. Niaari saniniuujia saaja na cuaracashitiquiaa, canaa pahuatasacari nijaniya seetanu rupaaanaa. <sup>12</sup> Naa jaara saaja cuaracashitiquiaa cua pahuatasano mijiria casaajiniji, ¿niaatucua taa niishiriquiani, janiya jaara nia pahuatare jiyocuaaanuji casaani? <sup>13</sup> Janiyari jiyocuaaanu quijiani. Majaari quenaaja tamonu pueyano tacanu quiquiaari jiyocuaaanu, saaja tijinio roseno cutara. Nojuacuajaari janiya. <sup>14</sup> Cariiquia jiyajinia pa supuetanaa Israel pueya rucuanijosacari, Moisésri na shipinishano soconu nujuaretaquiaari macaacua, soconu sasuhua niquishocoriquiano. Na niquiniaa pueyari naatacoquiaariuhua. Naajuhuj, janiyari macaacua nujuaretasocoriquianoni. <sup>15</sup> Naacuajitij, puetunu cucua tiunnaajanaari pueyaracaanu quijiaa quiniutianiya.

#### *Pueyasoori puetunu mijiria quiniaa pueyajanaa panijia*

<sup>16</sup> Jiyanohua cua Que Pueyaso paniniuucua puetunu mijiria quiniaa pueyajanaa, nojuajaari Neyanujuanaa jiyaroquiaari puetunu pueyapueecuarajanaa mosocoriquiano. Puetunu cucua tiunnaa pueyajanaari saniitioyaquishaanutaniya cutara. Nojori cutaraari pueyaracaanu rishijiaa quiniutianiya Pueyaso shuriucua. <sup>17</sup> Pueyasoori maja na jiyaronu quiquiaari janiya pueya cua saniitionura. Seetanujuanaa cua jiyaroquiaari cutaraari pueyacuaji Tacuna cua quiniuria.

<sup>18</sup> Cante cucua tiuujiani, majaari na saniitiosaanu quiniutianiya. Saniniuujia, cante cucua tiuyashijiani, nojuajaari tari pueyaracaanu saniitiosocoriquiano jiyatesano quia. <sup>19</sup> Janiyari mijiria niquiaarini pueya jiuujia cua cuhuatanura Pueyaso Rupaata. Pueyari saaja na ruuretaquiaa, ninishiqui nojori jiuujia quiniuucua. Sesa mijiaa nojori quiniuucua, majaari nojori paniniu cuhuatasano nojori quiniuria. Naaratej, nojori saniitiosaanutaniya. <sup>20</sup> Puetunu sesa mijiacajanaari cua niquiniu paniyashijia, pueya jiuujia cuhuatanaa cua quishacari. Majaari nojori ninu paniniu cucua, sesa nojori miishano mariqui niishishaareeri. <sup>21</sup> Saniniuujia, cante maninia miiquiaani taa Pueyaso sequeya

na Rupaajiniacuajani, nojoriiri cuhuashiqui quiniu panijiaca cutara. Nojoriiri cucua nijioquiaa na niishishaanura nojori miishano cutaraari puetunu maniniajanaa, taa Pueyaso panyacuajani.

*Tiuquinijiona Juan pahuatasacari socua Jesujiniji*

<sup>22</sup> Na nuhuaji, Jesuuri quiojoquiaari canaata Judea jiyajinia, canaa na saquiriojosano pueyatani. Tii canaa quishacari Jesuta, canaari pueya tiuquinijioriquiaa moojiniani, pueya tacatosacari noojia sesa nojori miishanojiniji. <sup>23</sup> Tiuquinijiona Juanri jiyacari pueya tiuquinijioriquiaajuhua Enón tiacajinia, Salim tiaca shuriucua. Juanri tii tiuquinijioriquiaa pueya, queraatia mohuaca quishacari tii. Pueyari nocua quiojoquiaarijihuaj tiuquinijosano nojori quiniuria. <sup>24</sup> Juanri jiyacari nujuatejojuajinia nujuatesoo quiriquiaajaa.

<sup>25</sup> Cuno quishacari, Tiuquinijiona Juan pueyari tamonu narta Judio pueyanota pocojoriquiaa taate pueya naata juhua jeequesano quiniu Pueyaso niquiarani. <sup>26</sup> Nocuaji nojoriiri Tiuquinijiona Juan sequetusee Jesujiniji:

—Niishitiojonanaa, noo pueyano, quiaa nojuajiniji canaa pahuatatanutej, noo quiata quiquianu Jordán moo taquijiriatej, nojuajana pueya tiuquinijiyajuhua. Puetunu pueyajanaana nocua quiojiya tiuquinijosano nojori quiniuria.

<sup>27</sup> Tiuquinijiona Juanri nojori riucaaree saaja:

—Saaja Pueyaso cumaquishacari pueyano, pueyano na naata maninia miiniu Pueyasora. <sup>28</sup> Niajaniryacuajari cua tojiquianu sequeyano: “Janiyari maja Pueyaso Jiyarosano Cristoni. Janiyari nareja nocuaji jeenucuariquiano jiyarosaaquiaarini”. <sup>29</sup> Pueyano rupüena jaara camiya necocua, quiarjia cutara necocuaari seetanujuanaa saaja nerano. Naajaa, na rupüena quishacari na shuriucua, na timitiaari na tojishacari necota pocojijyano shuquiriaatia. Naajuhua, janiyari cunora shuquiriaatia quiarjia quiyani pueya rupuesacari Jesucristo. <sup>30</sup> Janiyari cunora jiyarosaaquiaaricuajani, pueya cua tojitiniuria nojuaja. Naaratej, pueya cuara carτερα janiya, Cristoocua nojori pacunura saniniuuja, nojori tojiinuria nojuaja. <sup>31</sup> Cante jiyocuaaanuji niqiaaricuajani, nojuajaari Jiyaniijajanaa cutara. Janiyari saaja mijiria quiniiani. Cunora, cua pahuatasaanori saaja mijiria cua tojishano. Jesucristo saniniuuja, nojuajaari jiyocuaaanuji ninio cutara. Nojuajaari Jiyaniijajanaa. <sup>32</sup> Naacuajitij, na pahuatasaanori tama na niquishanojuaja jiyocuaaanu, na tojishanonio. Pueyari na pahuatasaanu cuaracashitiquiaa saaja. <sup>33</sup> Canapüete Jesucristo pahuatasaanocua tiuujiacani, nojoriiri sequeya, seetanujuanaaqui Pueyaso sequesano Neyanujiniji. <sup>34</sup> Pueyasoori jiyanojua queraatia na Sohuanu niqitioquiaari na Jiyarosano. Naacuajitij, seetanu Pueyaso rupaajanaa pahuataari. <sup>35</sup> Pueyasoori jiyanojua panijia Neyanu. Naaratej, nojuajaari na jiyatequiaari puetunu casaa jiiitanarajanaa na quiniuria. <sup>36</sup> Canapüete Neyanucua tiuujiacani, nojoriiri tari jatanishano pueyaracaanu rishijia nojori quiniuria Pueyasota. Saniniuuja, canapüete Neyanucua tiuyashijiacani, nojoriiri tariucua Pueyaso juaashano quiya. Nojoriiri sanitiosaanutaniya Pueyasooju nojori quiniuria pueyaracaanu.

## 4

*Jesu pocojosacari Samaria jiyajinijinio maajitia*

<sup>1</sup> Fariseocuacaari pahuatasaquiaari, jiyanojua queraatia pueya Jesuucua quiojiya na tojitianaa nojori quiniuria. Nojoriiri pahuatasaquiaarijihuaj, Jesuuri socua queraatia pueya tiuquinijia Tiuquinijiona Juanjiniji. <sup>2</sup> Seetanujuanaa majaari Jesujuanaa tiuquinijionu quiriquiaa pueya. Saaja canaa cutaraari pueya tiuquinijioriquiaani. <sup>3</sup> Jesu jaara niishiquiaari Fariseocuaca naa pahuatasaarucuaa nojuajinijitij, nojuajaari Judea jiyajiniji jiyatequiaariuhua canaa Galilea jiyajiniara.

<sup>4</sup> Canaa quiasacari nucuaco, canaari Samaria jiyacuma tajiriquiano quiriquiaani. <sup>5</sup> Naa canaa quiasacari nucuacotej, canaari Sicar tiacajinia tiuquishiini, Samaria jiyajinia. Cuniqijij, cateca quiriquiaari supuetana José cuhuarigua, na que Jacobo niqitiosano nojuaja. <sup>6</sup> Cuno cuhuariquajinia quiriquiaari cuari, supuetana Jacobo jiuutiasano tariucuaaanu. Pueyaracaanu Jesu rucuanenuucua nucuamaji, nojuajaari cuno cuari shuriucua cajishii na samareenuta. Panacariiri quiriquiaa. <sup>7-8</sup> Jiyacaritij, canaari tiacajinia quiamaanu canaa miaquesocoriguiano canaa masenura casaa. Canaa niyacari, cuno Samaria tiacajinijinio maajiri cuarimia quiaquiaari mohuaca taquitianura. Jesuuri na sequeree:

—Cua raatere.

<sup>9</sup> Cuno maajiri Jesu sequeree:

—Pueyanonaa, ¿casaara quia sequeya Samaria jiyajinijinio maaji raatenura quiajaniani? Quiaacuajari Judio.

Cuno maajiiri naa sequeree Jesutej, na niishiniuucua Judiocuacacujaari maja na niquiniu paniniu quijia Samaria jiyajinijinio pueya.

<sup>10</sup> Jesuuri saaja na sequeree:

–Majaari quia niishiniu cante quia sequereeni: “Cua raatere”. Quiaa jaara niishiriquia casaa Pueyaso jiitiaa quiarani, quiaa maara cua sequere cua raatenura quiajaniya. Quiaa jaara cua masere, janiya maara quia raatere pueya samiitianijia mohuacani.

<sup>11</sup> Maajiiri na sequeree:

–Jiyaniijianaa, majaari quenaaja quia jiitianu casaa, mohuaca quia taquiriatajara. Nio cuariiri jiyanoehua tucuaa. ¿Quiaatucua teje taquitiare cuno mohuacani, pueya samiitianijiani? <sup>12</sup> ¿Quiaateeri jiyaniijianaa cutara, socua pa supuetana Jacobojiniji? Nojuajaari nio cuari tiujaquiaari canaara. Nojuajaari niqiuji ratujua quiquiaari necohuata, na seesano seyanio.

<sup>13</sup> Jesuuri na riucaaree miriqui:

–Puetunu nio cuarijiniji ratujuacajanaari saaja jiyamucoquiaa. <sup>14</sup> Saniniuujia, cante cua mohuaca ratunutaniya, majaari socua na jiyamuenu quiniutianihua. Cua mohuacaari juhua samo naca pacartanutaniya pueyaracaanu noojiajinia, shuquiriaatia na rishiniuria pueyaracaanu.

<sup>15</sup> Cuno maajiiri Jesu sequeree:

–¡Pueyanonaa, cuno mohuaca cua niqutiore cua ratusocoriquiano, maja socua cua jiyamuenu, naajuhua, maja pueyaracaanu cua taquiriojonura nio cuarijiniji!

<sup>16</sup> Jesuuri na sequeree:

–Miji quia niyaca quia sequecoo coteenu.

<sup>17</sup> Maajiiri na riucaaree:

–¿Janiyate niyacaracajaarani, quiaa jaara naa cua sequere?

Jesuuri na sequeree:

–Quiaacuajaari seetanujuanaa cua sequeree: “Niyacaajunijia”. <sup>18</sup> Seetanujuanaari. Quiaari tari cinco niyacaaraca quiquiaari. Mariyata cuno, quiarijia quiata quiyani, majaari quia niyacajuhua.

<sup>19</sup> Naa cuno maaji tojishacari Jesu sequesantej, Jesu sequereeri:

–Jiyaniijianaa, ¡quiaaqui Pueyaso sequenu panishano caminiujiunia! <sup>20</sup> Canaa supuetanaa pueyari niya nio tuhuananuucua Pueyaso secojonuujua tarijia. Niajaniya saniniuujia, Judiocuacani, niaari sequequiaa Pueyaso cuaara secojosaaria saaja Jerusalén tiacajinia.

<sup>21</sup> Jesuuri na riucaaree:

–Seetanujuanaa quia sequereera maajiniaa. Cua sequesanoocua quia tiurii. Quera quiniutianiyari Pueyaso nia secojosacari puetunu tiquiyocua nia quishacarijianaa. Majaari tari Pueyaso secojosaanu quiniutianiya saaja Jerusalén tiacajinia, nio tuhuananuucujuhua, ta quia sequececajani. <sup>22</sup> Niajaniyari maja nia niishiniu cana nia secojoquiaani. Canaa Judiocuacani, canaa cutaraari niishiyani cana canaa secojoquiaani. Pueyasocujaari canaa Judiocuaca supuetanaa niishitioquiaari pueyacuai Tacunaari supuentaniya tama canaa Judiocuacajinijinojuaaja. <sup>23</sup> Quiarijia cutara, cante seetanujuanaa Pueyaso shuquiritiajani, nojoriiri na Que Pueyaso secojonutaniya puetunu noojatatajanaa, seetanujuanaa na tojijiaa nojori quishacari. Pueyasoori naa paniya pueya secojonura nojuaja, cante na secojonuujacuajani. <sup>24</sup> Pueyasoori sohuanu. Naaratej, cante Pueyaso shuquiritiniu panijiacani, nojori cuaara secojora Pueyaso puetunu noojatatajanaa, Pueyaso Sohuanu tojijiaa nojori quishacari.

<sup>25</sup> Cuno maajiiri Jesu sequeree:

–Janiyacujaari niishiyani Pueyaso sequesano Cristo mijiria na jiyarosocoriquianoori niniutianiya. Nojuaja jaara tiuquiri, nojuajaari puetunu maninia pa pohuatanutaniyanaa.

<sup>26</sup> Jiyacaritij, Jesuuri maatia na sequeree:

–Janiyacujaari cunoni, quiata pocojijacuajani.

<sup>27</sup> Jiyacaritij, canaari Jesuucua tiuquijiorohuani. Canaari jiuujiatequiaarini canaa niquishacari Jesu pocojijiano cuno maajitia. Majaari quenaaja canaa nequesotanu quiri Jesu, casaa cuno maaji paniriquiaani, mariyata casaajiniji nojori pocojoriquiaani. <sup>28</sup> Cuno maajiiri cuniquijia na pataco tiujaquee. Na tiacajinia quiaarohuari. Na tiuquishacari, na tiacajinia quiniaa pueya sequesuhuari:

<sup>29</sup> –¡Miji pueyanaa, nia niqiqui pueyano! ¡Nojuajaari cua sequeree puetunu cua miishanojuanaa! ¿Majate Cristoni, tariucacaanu Pueyaso sequesano pocua na jiyarosocoriquianotej?

<sup>30</sup> Pueyari cuno tiacajiniji Jesuucua nijioquiaari. <sup>31</sup> Cuno maaji quiasacari na tiacajiniohua, jiyacaritij, canaari Jesu mianuutenu paniriquiaa juucuaní. Canaari na sequeriquiaani:

—¡Niishitiojonanaa, quia miaquere!

<sup>32</sup> Jesuuri saaja canaa sequeree:

—Janiyacuaa miaquesanoracani, cuno miaquesanoori nia niishishoo.

<sup>33</sup> Canaa, Jesu saquiriojosano pueyani, canaari naa tama nequesoreetooreejaanijia:

—Pa niyacari miaquetesaaquee jiyotucuaajaari.

<sup>34</sup> Jesuuri miriqui canaa sequeree:

—Cua miishacari cua jiyarona panishano, cunoori cua miaquesano, naajuhua, cua tucuatasaacari na panishano. <sup>35</sup> Niaari sequequiaa: “Cuaara shocoorajaara cuatro raza. Pueyari jiyacari shusha coteenutaniya na nataacuaca carojotanu”. Janiyara, maja naatej. Seetanujuanaa nia sequeya cutaranijia, nia namijia nia riatare maninia nia niquniuria. Nataacuacuaja tari noshiqua, carojotasocoriquiano. <sup>36</sup> Na carojotanaari na poonijionu sami niquitoshia. Na carojotanoori pueyaracaanu quiriquiano. Naacuajitij, cuhuariquia natoonaari jatiqui shuquiriniutianiya nataacuaca carojotanaata. <sup>37</sup> Naaratej, seetanujuanaari nio tariucuaacaanu sequesano. Naa sequeyari: “Tamonuuri saaja nareja nataja. Na nuhuaji, tamonuuri saniniuujia na carojotaja”. <sup>38</sup> Janiyari saniniuujia nia jiyaramiquianuní nataacuaca nia carojotanura quenaaja nia poonijiyaquishoo cuhuariquiajinia. Cunoori tamasaca poonijosano quiquiaari. Niaari juhuajaniya tamasaca poonijosanojinijia carojotaquiaa shuquiriaatia.

<sup>39</sup> Queraatia pueya cuno Samaria tiacajinijinoori Jesuucua tiuquiaari, nojori tojishacari naa cuno maaji sequesanootej: “Cua sequeree puetunu cua miishanojuanaani”.

<sup>40</sup> Naaratej, cuno pueya jaara Jesuucua tiuquijioquiaari, nojoriiri na masuuquiaari tii na camueenujuna nojori tiacajinia quenaaja. Naaratej, canaari Jesuta tii camueequiaari caapiqui juucani. <sup>41</sup> Socua queraatia cuno pueyajinijinoori Jesuucua tiuquiaari, nojorijanaa jaara Jesu tojiquiaari Pueyaso rupaa pohuataano. <sup>42</sup> Naaratej, nojoriiri cuno maaji sequeturee:

—Quiarijiani, majaari canaa tiuuniu Jesuucua, saaja canaa quia pohuatanuucua nojuajinijia. Quiarijia cutara, canaacuaajaari tama canaa numaatajaaja tojirii na pohuatasano. Naaratej, canaari quiarijia niishiyani, Jesuuri seetanujuanaa Pueyaso jiyanootiriquiano pajaniya, puetunu mijiria quiniaa pueyajanaano.

#### *Jesu naatanishacari jiyaniijia Herodes pueyano niyanu*

<sup>43</sup> Caapiqui juuca Jesu camueetanu nuhuaji canaa, Samaria pueya tiacajinia, nojujaari cuniquiji canaa na pueya jiyataaree Galilea jiyajiniara. <sup>44</sup> Jesuuri tarijia sequequiaari: “Nio tariucuaacaanu sequesanoori seetanujuanaa sequesano. Naa sequeyari: ‘Pueyaso sequenu panishano caminiujuuniaari maja tojishano quijia tama na jiyajiniajaaja’”.

<sup>45</sup> Naajaa, Jesu jaara canaa tiuquitiaseequiaari jiyacari Galilea jiyajinia, cuniquijinio pueyari maninia na tiuquitiquiaari saaja. Nojoriiri naa maninia na tiuquitiquiaari tari nojori niquniuucua Jesu miishano na cumaacata Jerusalén tiacajinia, Pascuara nojori queranacusacari tii.

<sup>46</sup> Galilea jiyajinia canaa quishacari, Jesuuri canaa jiyataaree Caná tiacajinia, tee na jataniquiaari mohuaca vinoracuajani. Jiyacaritij, Capernaum tiacajinia quiquiaariiri tamonu pueyano, Galilea jiya jiyaniijia jiyatesano camarnura. Cuno pueyano niyanuuri jiyanohua cusosu matariquiaa. <sup>47</sup> Cuno camarnu jaara niishiquiaari Jesu tari tiuquiriohua Judea jiyajinijia, nojujaari jiyacari niquiaari Capernaum tiacajinijia Jesuucua, Caná tiacajinia. Na tiuquishacari Jesuucua, na sequeeseri:

—¡Jiyaniijianaa, cucua quia taraajere! ¡Cua niyanu quia naataniquii, quera cusoyano!

<sup>48</sup> Jesuuri na riucaaree:

—Niaa jaara cua cumaacata cua miishano niquiyaquiri, niaari cucua tiuyaquiquiaa.

<sup>49</sup> Cuno camarnuuri saaja Jesu sequeree:

—¡Jiyaniijianaa, mijijijaj, jati pa quiaare cua tiajinia, quianu cusoyaquishacarijia!

<sup>50</sup> Jesuuri na sequeree:

—Quia quiaarohua. Quia niyanucuaaja tari naatarohua.

Cuno camarnuuri Jesu sequesanoocua tiuuri. Quiaarohuari. <sup>51</sup> Jiyacari na tiajinia, na seyari niquiquiaari camarnu niyanuuri seetanujuanaa maninia naatarohua. Naaratej, nojoriiri quiojoquiaari na camarnu numootenucua. Nojori quiojosacari, na camarnu naacuturee saaja nuu cajiniocuaari. Nojoriiri na sequeree:

—¡Quia niyanu tari naatarohua!

<sup>52</sup> Nojori camarnuuri nojori nequesotaree:

—¿Taacari na cusonu tajiyatemohuacuaani?

Nojoriiri na riucaaree:

—Naseeca nocuaji tajimiohuacuaa shusha pananu mueecosacari nio niniriquiacuaani.

<sup>53</sup> Cusosu queeri niishiquii, Jesucuaajaari jiyacari na sequeriquiacuaa: “Quia niyanu tari naatarohua”. Naaratej, camarnuuri necocuataja Jesucuaa tiuuri, puetunu necohuata-janaanio.

<sup>54</sup> Judea jiyajiniji Jesu tiuquishacarihuaj, naa na naatanishacari cuno cusosutej, cunota tari caapiqui quiquiaariiri na cumaacata na miishano Galilea jiyajinia.

## 5

*Jesu naatanishacari cumatacuruhuaa cusosu Betzata cuari shuriucua*

<sup>1</sup> Tamacariuhua, socua canaa Judiocuaca queranacusacari quiquiaari Jerusalén tiacajinia. Naaratej, canaari Jesuta nocua quiojoquiaarijiuhua. <sup>2</sup> Jerusalén tiacaari puetunjuanaa puereetuca sohuacajiniacuma quiya. Tohuateyacaari quiya tiuquitiajara. Tamonu tohuateya sesa quiquiaari “Borregohua tiuquitiaja”. Na shuriucua quiyari cuari. Canaa Judiocuaca rupaajiniani, cuno cuariiri sesojosaquiaari “Betzata”. Cinco suhuorotucuaari quijia cuno cuari shuriuquioco. <sup>3</sup> Queraatia cusosuhuari tii matacojua cuno cuari shuriuquioco. Cuno cusosuhuari quiquiaari cariojuarujuri, shipiiniquiujiunaa, cumatacuruhuaa cusosuhuanio. Nojoriiri mohuaca sashijia cuaara queyaquetesaaria. <sup>4</sup> Pueyaso seruuri noojiaqueya rosequiaari mohuaca na queyaquetenura. Cuari queyaquesacari, cante coteenujanaa rosequiaari tiini, nojuajaari naataquiaariuhua na cusonujiniji. <sup>5</sup> Tamonu cusosuuri tii narta cusosuhua tajinia matariquiaajuhua. Tari na shoconujuquiaariiri treinta y ocho marijia, pueyaracaanu na matasacari. <sup>6</sup> Jesuuri na niquiquiaari mataano. Noojiajinia niishirijiaariuhua cuno pueyano tari shocotejoquiaari queraatia marijia, naa pueyaracaanu na matasacari. Nocuaji Jesuuri na sequereee:

—¿Quiaate naatanu pania?

<sup>7</sup> Cusosuuri na riucaaree:

—¿Cantucua cua naacure cuarijinia cua rosenurani, mohuaca jaara queyaquetesaarecuaa? Janiya jaara rosenu paniquiaa juucuaani, cuarta cusosuuri saaja cua shocotaquiaani.

<sup>8</sup> Jesuuri na sequereee:

—¡Quia sanere! Quia matu quia pataarohua.

<sup>9</sup> Jiyacaritij, cusosuuri ritia jeequequee. Na matu pataarohuari. Cuno juucaari Sábado quiriquiaa, canaa Judiocuaca samaatenu juuca Pueyaso niquiara. <sup>10</sup> Canaa Judiocuaca camarucua jaara cusosu niquiquiaari na matu pataano, na juaatiuriiri. Naa na sequetureeri: —¿Majateeri quia niishiniu, quiarijiaari Sábado? ¡Maja quia matu quia patanujua!

<sup>11</sup> Cusosu naatanohuari nojori riucaaree:

—Cua naataniniacuaa cua sequereeno: “Quia matu quia pataarohua”. Janiyari cunora na pataani.

<sup>12</sup> Narta Judiocuaca camarucuaari na nequesotaree:

—¿Cantejaara naa quia sequereeni?

<sup>13</sup> Nojori riucaareeri:

—Johua. Maja cua niishiniu canaquitijia cua naataniriitij.

Jesu naatanishacari cuno pueyano, queraatia pueyari namitia tii quiriquiaa. Naacuajitij, Jesuuri ritia tajiniocuareequiaari pueya tajinia, na naatanishano pueyanocuaaji. <sup>14</sup> Na nuhuaji, Jesuuri na riuriataquiaari cuno juucaja Pueyaso Secojua tajinia. Jiyacari na sequereeri:

—Quiaacuajaari tari naatanishaarohua. Quiarijia cutara tama quia cuaqueyajaaja quia cojuare maja sesa quia miiniuhua socua, quiaa mariqui socua taraatia miirru.

<sup>15</sup> Naacuajitij, cuno pueyanoori Jesu niishirii. Cunora, canaa Judiocuaca camarucuaa quiaareeri. Nojori sequeseeri:

—Jesuqui cunocuaaja cua naataniriini.

<sup>16</sup> Naa Jesu miiniucua samaatenu juucatej, narta Judiocuaca camarucuaari na quiatunu panijia juucua. <sup>17</sup> Jesuuri saaja nojori sequereee:

—Cua Queeri pueyaracaanu poonijija. Janiyari cunora poonijijaacuhua.

<sup>18</sup> Naa Jesu sequesacari nojoritij, narta Judiocuaca camarucuaari jyanohua na monu paniriquiaa. Nojoriiri maja na monu paniniu quiriquiaa saaja samaatenu juuca na poonijionuucua. Socua jyanohua na motunu paniriquiaari Jesu jiyatenuucua tama na cuaqueyajaaja juhua Pueyaso, Pueyaso na jyaniquishacari na Queta.

*Jesuuri Jiyaniijajanaa, Pueyaso Niyanu na quishacari*

<sup>19</sup> Nocuaji Jesuuri narta Judiocuaca camarucua sequereee:

—Seetanujanaa nia sequeyanijia, Pueyaso Niyanu cua quishacari, maja cua naata casaa miiniu tamajaaja. Janiyari saaja miiquiaani taa cua Que cua niquiquiaa miyanocuaani.

Casaa cua Que miiquiaacuaani, janiyari naa miiquiaajaacuhuaaj. <sup>20</sup> Cua Queeri cua panijia. Cunora, nojuajaari puetunu na miishanojuanaa cua niishitiojoquiaa. Naajuhuaaj, cua niishitiojonutaniyari socua jiyajeneta casaa tariucua cua miishanojinijicuaa. Niaari nocuaji shiriiquitituniutianiya. <sup>21</sup> Cua Queeri macunucua samiitianijioquiaa, pueyara-caanu rishijia nojori quiniuria. Naajuhuaaj, janiyari pueya samiitianijioquiaa, cana cua samiitianiniu paniyacuajani. <sup>22</sup> Cua Queeri maja na nequesorenu quiniutianiya pueya. Nojuacuajaari tari cua niqutiocanu na cumaaca, puetunu pueyajanaa cua nequesoreenura. <sup>23</sup> Nojuajaari naa miiquianu puetunu pueyajanaa quiniuria cua tojtijajaca, naatej, taa cua Que na tojtiatuquiaacuaani. Cante cua na ruuretajani, cunoori cua Que ruuretajuhuaaj, nooj, cante mijiria cua jiyaroquiaaricuaajani.

<sup>24</sup> "Seetanujuanaa nia sequeyanijia, cante cua sequesano tojjiani, mariyata cante cua Jiyaronaacua tiuyajaanuhuaaj, nojuajaari pueyaracaanu Pueyasota rishiriqiuiano cutara. Nojuajaari maja na saniitiosaanu quiniutianiya. Nojuacuajaari tari samiitianishaarohua juhua macu na quiniujiniji Pueyasooju na quishacari. <sup>25</sup> Seetanujuanaa nia sequeyanijia, quera quiniutianiyaarini juhua macunucua quijiaa samiitiacosacari. Seetanujuanaa quiar-ijiaari, juhua macunucua quijiaaari cua rupaa tojtianutaniya. Cua rupaa tojtijajacaari samiiticonutaniya, pueyaracaanu rishijiaa nojori quiniuria. <sup>26</sup> Cua Queeri quijiajuhua-najaj. Majaari na naata shaajenu. Nojuajaari naa quijiaa cua jiyatequiaarijuhuaaj, juhua nojuarajuhuaaj. Naacuajitij, cua naata pueya jiyatenu naa quijiarajuhuaaj. <sup>27</sup> Pueyanora cua quiniucua, na cumaaca cua niqutioreeri cuarta pueya cua nequesoreenura, nojori cua saniitionurajuhuaaj. <sup>28</sup> Cua tojtijare. Majaari nio sequesanoocuaaji nia shiriqiuini. Tamacari, puetunu macunucuaajani cua rupaa tojtiiutianiya. <sup>29</sup> Macunucua tojtii-shacari cua rupaa, nojoriiri samiiticonutaniya, na jamacajiniji nojori tohuareetanura. Cante maninia mijiaa quiquiaarini, samiiticonutaniuhuari pueyaracaanu shuquiriaa-tia quijiaa nojori quiniuria Pueyasota. Saniniuujia, cante sesa mijiaa quiquiaarini, puetunu nojorijianaari quejoosaanutaniya pueyaracaanu saniitiosocoriquiano.

*Jiyaniijajanaa na quiniucua, Jesu tama nojuajiniji pahuataajaaja*

<sup>30</sup> Pueyasoo Niyanu cua quishacari, naajaa, majaari cua miiniu tama cua panishano-juaja. Janiyari sesa mijiaa juaaquiaacuaajani, saaja cua Que niishitishacari janiya, nojori miishanoori sesa. Tama cua panishanojuaja miyashijia cua quiniucua, janiyari namitijanaa nojori juaaquiaani. Janiyari pueyaracaanu miiquiaa saaja cua Jiyarona panishanoni. <sup>31</sup> Pueyano jaara tama nojuajinijiaa pahuataa narta pueyano, na pohuatasanoocua maja tiushano. Naaratej, janiya jaara tama janiyajiniji pohuatariquia nia niquiarani, tama cua pohuatasanojuaja maara najuhuaa quiriquiaaj. <sup>32</sup> Naajaa, quiarijia cutara nia naata niishiniu cua pohuatasanoori seetanujuanaa. Tamonucuaajaari janiyajiniji pahuataa seetanujuanaa. Nojuajaari cua Que. Cunora, niishyanijia na pohuatasano janiyajinijiri maja najuhuaanaj.

<sup>33</sup> "Niaari nia pueya jiyarocanu Tiuquinijiona Juancua, nojori nequesotanura janiya-jiniji. Nojuajaari saaja seetanujuanaa nia pahuatacanu janiyajiniji. Majaari na seetanu quiquianu janiyajiniji. <sup>34</sup> Nojuaja jaara seetacanu janiyajiniji nijaniya, quiria, naajaa. Janiyacuajaari niishyani seetanujuanaari cua pohuatasano nijaniya tama janiyajinijiaa-ja. Tiuquinijiona Juanri seetanujuanaa pahuatacanu janiyajiniji nijaniya. Naa cuaara na pohuatasanoocua tiuuria, Pueyasoo jiyanooniuria nijaniya. Janiyari saaja cunora nia pahuataa Tiuquinijiona Juanjinijini. <sup>35</sup> Nojuajaari juhua samaritiu noshitishano nia tajinia na quishacari. Niaari rupaquijia na timitiacanu, juhua na cuhuatasacari nijaniya. Niaari najuhuaa tojiquianu na pohuatasano. <sup>36</sup> Tiuquinijiona Juan pohuatasano janiya-jinijiri seetanujuanaa. Naa jaara na pohuatasanoocua tiuuniu paniyashijiaa quiyajaa, naajaa. Cua cumaacata cua miishacari, cunora seetanujuanaa nia niishiri, cua Que Pueyasoori cua jiyaroquiaari. Nojuacuajaari cua sequequiaari naa cua miiniuriatej. <sup>37</sup> Cua Quejanaari cua jiyaroquiaari. Nojuajaari janiyajiniji niishitioquiaari pueya. Naajaa, majaari quenaaja nia tojinu quiquiaari na pocuanu. Nojuajaari nia niquishoojuhuaaj. <sup>38</sup> Majaari quenaaja na rupaa quiniu niioojiajinia, nia tiuyaquishacari na Jiyaranoocua. <sup>39</sup> Niaari suraatia serojoquiaa tariucuaacanu naajiosano Pueyasoo Rupaa. Niaari jiyaniya nia jaara Pueyasoo Rupaa niishijiaa quiri, niaari naa pueyaracaanu quijiaa quiniutianiya. Seetanujuanaa majaari naatej. Cuno Naajioneejinia, tiiri janiyajiniji naajiotasano quiyacuaja. <sup>40</sup> Niaari saaja cucua ninu paniaquiquiaa cua jiyatenura nijaniya pueyara-caanu quijiacara cutara.

<sup>41</sup> "Maninia cua miishanoori maja pueya sequenura janiya: "Quiaari maninia pueyano". Janiyari saaja cua Que shuquiritiquiaa cutarani. <sup>42</sup> Janiyari seetanujuanaa nia niishyani. Niaari Pueyasoo shuquiritiaashijiaa, nia paniaquishacari nojuaja. <sup>43</sup> Cua Quecuajaari cua jiyaroquiaari cua niishitiojonura nijaniya nojuajiniji. Quiarijiani, majaari nia tojinu

paniniu janiya. Saniniuujia, tamonu jaara tama na cuaqueyajaaja jiyateya juhua Pueyaso Jiyarosanora na quiniuria, niaa maara cuno tojiri cutara, nojuaja jaara niaacua nimia na niishitiojonura niajaniya tama na niishishanojuaja. <sup>44</sup> Majaari nia naata cua pohu-atasanoocua tiuuniu, niaa jaara saaja niarta pueya shuquiritasano quiniu paniquiaa, maja Pueyaso shuquiritasano. <sup>45</sup> Majaari nia jiyaniyu janiya niaacuara tonujunutaniya cua Queni. Tama Moisés cuajaari niaacuara tonujunutaniya, cua tojtiaashijia nia quini-uucua. Niaari jiyaniya niaa Pueyaso muerasu, juhua Moisés tojijiaca nia quishacari. ¿Ni-aateeri seetanujuanaa Moisés tojijiaca? ¡Maja! <sup>46</sup> Nojuacuajaari janiyajini niaaajiotaquiaari. Naacuajitij, niaa jaara seetanujuanaa na naajiotasanoocua tiuuriquia, niaa maara cucua tiuuriujuhuaj. <sup>47</sup> Nocuaij, niaa jaara Moisés naajiotasanoocua tiyuaquiquiaa, ¿niaatucua taa tiuuri quiarijia cua pohuatasanoocuanii?

## 6

*Jesu mianuutesacari cinco mil canuu*  
(Mt 14.13-21; Mr 6.30-44; Lc 9.10-17)

<sup>1</sup> Na nuhuaji, canaari Jesuta niuutiaquiaari Galilea caminia taquijiriani. Galilea caminia sesa quiquiaarijuhua Tiberias caminia. <sup>2</sup> Jiyanhua queraatia pueyari Jesu niquiquiaari tari, cusosuhua na naatanijosacari. Naaratej, nojoriiri Jesu neteyotariquiaa caminia shuriquiuoco. <sup>3</sup> Canaa shiitiasacari caminia taquijiria, Jesuuri canaa tacatamaa tuhananuucua. Tii cajitiasee canaari. <sup>4</sup> Jiyacaritij, quera Pascuara queranacusacariiri quiriquiaa. <sup>5</sup> Jesu niquishacari jiyanhua queraatia pueya nocua niyano, canaa cojinia Felipe sequereeri:

—¿Tee pa masenutaniya queraatia pan nio pueyaraarini?

<sup>6</sup> Naa Felipe nequesotareeri nareja na saniniuria. Jesuuri tari niishiriquiaa taa nojuajanaa mianuutenutaniya cuno pueyani. <sup>7</sup> Felipeeri na riucaaree:

—¡Paa jaara cumaneeca jitiare doscientos juuca pa poonijosanojiniji pan pa masetajaranii, cuno maara najuhuaa secaja quiri puetunu nojoririjanaa!

<sup>8</sup> Jiyacaritij, canaa cojinia Andrésri Jesuucua nimiaa. Andrésri Simón Pedro tarajana. Nojuajaari Jesu saquiriojosano pueyanujuhuaj. Jesu sequeseeri:

<sup>9</sup> —Jiyaniijanaa, caya samijia niya cinco pan jitiiaa cebada cashojuajiniiji shipinishano, caapiqui sapitiaajania. Naajaa, cunoori najuhuaa puetunu cuno pueyarajanaa.

<sup>10</sup> Jesuuri saaja canaa na saquiriojosano pueya sequereeri:

—Puetunu pueyajanaa nia sequere cuaara cajitiuuria.

Cuniqui, canaa tii quiriquiaani, shanhua jiyasocuaari quiriquiaa, maninia cajitiujia. Naaratej, pueyari cajitiuuri. Puetunu cuno pueya maanujiniijinojuanaani, saaja canuuri quiquiaari cinco mil pueya. <sup>11</sup> Jiyacaritij, Jesuuri cuno pan pataree. Pueyaso secojoree nocuaraari. Na nuhuaji, canaa na serotaniriiri. Canaari cajitiuuyano pueya puetunu na panishanojuanaa niqutiojoreeni nojori miaquenuusocoriquiano. Jesuuri naa miirii sapitiaajajuhua. <sup>12</sup> Puetunu pueyajanaa jaara tooquiquiaari, Jesuuri canaa na saquiriojosano pueya sequereeni:

—Puetunu miaquesano raquiquiajanaa nia reraterohua, maja najuhuaa na niitiasaanura.

<sup>13</sup> Canaari cuno cinco panjiniji pueya miaquesano raacua reratereeni. Canaa reratesacari, canaari doce canaasatu mishinijoreeni. <sup>14</sup> Pueya niquishacari naa Jesu miishano na cumaacatatej, nojoriiri sequeturiquiaa:

—¡Nio pueyanoqui seetanujuanaa Pueyaso sequenu panishano caminiujunia, nooj, tariucuacaanu sequesaaquiaari pocua niriqianotej!

<sup>15</sup> Jesuuri niishirii cuno pueyari na quianu paniriquiaa, nojori jiyatenura nojuaja puetunu Israel pueyajanaa jiyaniijia na quiniuria. Nocuaij, Jesuuri tamajaaja tacaquee socua jiyaconaja tuhananuucua.

*Jesu rucuanesacari mohuaca caco*  
(Mt 14.22-27; Mr 6.45-52)

<sup>16</sup> Tariucua pananu tiuquishacari, canaa, Jesu saquiriojosano pueyani, canaari rose-taarahua caminiajinarani. <sup>17</sup> Canaari botejinia tacataseeni, cuniquiji Capernaum tiacajiniara canaa niuutianura caminia taquijiria. Tariucua ninishiquiiri quiriquiaa. Majaari Jesu tiuquiniu quiriquiohua juhanajuaja canaacua. <sup>18</sup> Tari canaa niuutiasacari, paratuuri jyanohua piyarojoriquiaa. Caminiaari cunora jyanohua cajiniuucuariquiaa. <sup>19</sup> Canaari tari caminia juuujajinia quiriquiaani, seis kilómetroruhua canaa ruparetasaquiji. ¡Canaari jiyacari casaa niquirii canaacua catecanoyanoni! ¡Mohuaca caco canujuriquiaari! ¡Canaari nocuaij shiriiquitiurii jyanohuani! <sup>20</sup> Jiyacaritij Jesuuri canaa sequereeni:

—¡Maja pueretunu! ¡Janiyacuajaniijia!

<sup>21</sup> Na rupaa canaa tojshacari, canaari shuquiriaatia na tacanitiurii botejiniani. Canashiyaquiji boteeri ritia shiitiasee terara canaa quiariquiaacuajani.

*Jesu mianuutesano pueya pajesacari nojuaja*

<sup>22</sup> Jaara juhuaquequiaari, Jesu mianuutesano pueyari na pajenuunu coteequiaari tee canaa quiriquiaa caminia taquijiriacuajani. Nojoricuajaari tenacari niqiquiaari saaja niquriyatua boteeri shiitariquiaa. Saaja canaa, Jesu saquiriojosano pueyani, canaari cuno botejinia quiaquiaarihua nojori niquiarani. Majaari Jesu quianu quiriquiaa cutara canaata. <sup>23</sup> Jiyacariitij, Tiberias tiacajiniji boteeri tiuquijioquiaari catecaja nojorijiniji, tee Jesu mianuutequiaari nojoricuajani. <sup>24</sup> Cuno pojori niishishacari maja Jesu quiniu quiriquiaa tari tii, canaa na saquiriojosano pueyajuhaaj, nojoriiri cuno boteyajinia tacataquiaari. Nojoriiri Capernaum tiacajinia nijioquiaari cuno boteyajinia, tii nojori pajenura Jesu.

*Jesu Cristo juhua poojia miaquesano*

<sup>25</sup> Cuno pojori tiuquijiosacari caminia taquijiria, Jesu riuriatuseeri. Na nequesotatureeri:

—Niishitiojonanaa, ¿taacari quia niyarohuacuuarini?

<sup>26</sup> Jesuuri saaja nojori sequeree:

—Janiyari seetanujuanaa nia sequeyani, majaari nia pajenu janiya nia niquniuucua cua cumaacata cua miishano. Niaari cua pajenuya saaja cua mianuutenuucua nijaniya, taa nia toogiorucuaacuajani, cua mianuutesacari nijaniya. <sup>27</sup> Maja saaja miaquesanoocua nia tacaaniu, nia cuaqueya nia cumaquitajara. Cunoori maja na jiyatenu quiniutianiya nijaniya pueyaracaanu rishijia. Saaja nia tacaari cutara nioojia samiitianiya miaquesanoocua, pueyaracaanu rishijia nia quiniuria. Janiyacuajaari cuno nia niqutioriquianoni, pueyano cua quiniuucua. Cua Quecuajaari cunora cua jiyaroquiaari. Cunora, cua Queeri cua miitiquiaa cua miishano na cumaacata, nia niishiniuria janiyari na jiyarosanoni.

<sup>28</sup> Cuno pueyari Jesu nequesotaree:

—¿Casaa canaa miiniutianiya Puyaso panishano canaa miiniuria, Puyaso shuquiritiasano canaa quiniuriajuhaaj?

<sup>29</sup> Jesuuri nojori riucuree:

—Pueyaso Jiyarosanooocua nia tiuuri. Saaja naa nia miishacaritij, Puyasoori nia shuqiritianutianiya.

<sup>30</sup> Cuno pueyari Jesu sequeturee:

—Canaa niqiuara quia cumaacata casaa quia miiricuararaj, canaa niishiniuria quiaari seetanujuanaa Puyaso Jiyarosano. ¿Casaa canaa quia niqutiniutianiya canaa tiuunuria quiocuanii? <sup>31</sup> Canaa quia niqutiricuaraja quia cumaacata quia miishano, taa Moisés niqutiquiaari canaa supuetanaacuaani. Nojuajaari jiyocuacaanuji pan tinqiiaari pueyaracaanu nojoriria, cariiquia jiyajinia nojori rucuanijosacari. Naa naajiotasano quiyacuajaari tariucuaaanu Puyaso Rupaajinia: “Nojuajaari nojori mianuutequiaari jiyocuacaanuji tinio pan”.

Naacuajitij, canaari niishiyani Moisés cuajaari Puyaso jiyarosano quiquiaari.

<sup>32</sup> Jesuuri nojori riucuree:

—Seetanujuanaa nia sequeyanijia, cuno jiyocuacaanuji panni, cunoori maja Moisés tinishano quiquiaari. Majaari seetanujuanaa jiyocuacaanuji pan na quiniu quiquiaarijihuaj. Quiaritia cutara, cua Queeri niaacua jiyarorucuaa seetanujuanaa jiyocuacaanuji panjanaa cutara. <sup>33</sup> Cuno, Puyaso niqutiosano pan jiyocuacaanuji rosenoni, cunoori puetunu mijiria quiniaa pueyajanaa samiitianiyojua cutara.

<sup>34</sup> Naaratej, cuno pueyari Jesu sequeree:

—Jiyaniijianaa, quiocua pueyaracaanu canaa niqutioriquiaa cuno pan!

<sup>35</sup> Jesuuri nojori sequeree:

—Janiyacujaari cuno panni, pueya samiitianiyojuani. Cante cucua niyani, majaari na miaajenu quiniutianiya socua. Cante cucua tiuuriiaanihuaj, majaari na jiyamuenu quiniutianiya juhaaj. <sup>36</sup> Taa cua sequeree tari nijaniyacujani, niaari juucua cua niquiya. Majaari quenaaja cucua nia tiuunuu. <sup>37</sup> Naajaa, puetunu cua Que niqutiosanojuanaa janiyani, nojoriiri cucua niya. Cuno pojori, cante cucua nijiyani, majaari cua ruuretano nojori. <sup>38</sup> Majaari jiyocuacaanuji cua rosenu quiquiaari cua miiniuria tama cua miiniu panishanojuaja. Mijiria niqiaarinijia saaja cua Que panishano cua miiniuria, cante cua jiyaroquiaaricuajani. <sup>39</sup> Majaari cua Jiyarona paniniu cua juurequetenura quenaaja niquriyatujua na niqutiosanojiniji janiya. Nojuajaari paniya cutara, nojori cua samiitianiyojura jiya puequesacari. <sup>40</sup> Canapuet cucua tiuujicani, nojori niishishacari janiya



Pueyaso Niyanuni, cua Queeri puetunu cuno pojorijianaa paniya pueyaracaanu rishijiaca nojori quiniuria. Naacuajitij, janiyari nojori samiitianijionutaniya jiya puequesacarini.

<sup>41</sup> Jesu sequenuucua, “Janiya jiyocuaaanuji roseno panni”, tii quiniaa narta Judiocuacaari cunora juaaquioree. <sup>42</sup> Sequetureeri:

—¿Majate nio pueyano Jesucuaaja, José niyanutej? ¡Paacuaajaari na queya niishiyani! ¿Casaara quiaririja na sequeyari: “Jiyocuaaanuji rosenonijia”?

<sup>43</sup> Jesuuri nojori sequeere:

—¡Tariucuaaja! ¡Maja nia juaaquiouu! <sup>44</sup> Pueyanoori maja na naata tiuuniu cucua tamaajaaja, cua Que jaara noojiajinia poonijiaquiri. Janiyari puetunu cucua tiuuniaajanaa samiitianijionutaniya jiya puequesacarini. <sup>45</sup> Tariucuaaanu pueyara Pueyaso sequesano caminiujiumia naajiotasanocuaajaari naa sequeya: “Pueyasocuaajaari puetunu nojorijianaa niishitiojonutaniya”.

Naacuajitij, cante cua Que niishitiojosano tojijia seetanujuanaani, nojuajaari cucua tiuya.

<sup>46</sup> Cua Queeri maja pueya niqushano quenaaja. Saaja na niquinia cutaraari janiya cante Pueyasojiniji niqiaaricuaajani. <sup>47</sup> Seetanujuanaa nia sequeyanijia, cante cucua tiuujiani, nojuajaari tari pueyaracaanu rishijia jatanishaaree. <sup>48</sup> Janiyacuajaari pueya samiitianijia panni. <sup>49</sup> Cariiquia jiyajinia nia supuetanaa camarucuneejotasacari, nojoriiri cuno jiyocuaaanuji tinio pan miaquenuquiaari juucua. Naajaa, saaja cusonuuquiaari-iri. <sup>50</sup> Saniniujia, cante quiaririja seetanujuanaa jiyocuaaanuji roseno pan miaqueyani, majaari Pueyaso shaajanu quiniutianiya nojuaja. <sup>51</sup> Janiyacuajaari cuno samiitianijia panni, jiyocuaaanuji rosenoni. Cante nio panjiniji miaquejani, nojuajaari pueyaracaanu quijia quiniutianiya. Nio pan, janiya na niqutionutaniya puetunu mijiria quiniaa pueyacuarajanaani, cunoori tama cua cuaqueyajaaja.

<sup>52</sup> Jiyacaritij, tii quiniaa narta Judiocuacaari naa sequetooree tamajaaja na juaaniutia:

—¿Nio pueyanotucua taa miaquetere tama na cuaqueyajaaja pajaniyani?

<sup>53</sup> Jesuuri jiyacari nojori sequeere miriqui:

—Seetanujuanaa nia sequeyanijia, niaa jaara miaqueyaquiri cua shu, niaa jaara ratuyaquiri cua nanacajuhuaaj, majaari samiitianijosano nia quiniu quiniutianiya, pueyaracaanu quijia nia quiniuria. <sup>54</sup> Cante cua shu miaquereeni, cante cua nanaca ratureejaaniuhuaaj, nojuajaari tari naatarohua shuquiriaatia na quiniuria pueyaracaanu. Jaara cusoyare, naajaa, janiyari na samiitianiniutianihuaa jiya puequesacarini. <sup>55</sup> Cua shuuri seetanujuanaa miaquesano cutara. Naajuhuaaj, cua nanacaari seetanujuanaa ratusanu cutara. Cunoori maja juhua mijiria nia miaquesano. <sup>56</sup> Cante cua shu miaquenani, cante cua nanaca ratunajaniuhuaaj, nojuajaari coojia rupueja. Janiyari noojia rupuejajuhuaaj, pueyaracaanu rupuetotesano canaa quiniuria. <sup>57</sup> Cua Jiyarona cua Queeri seetanujuanaa quijia cutara. Cua Que rupueja cua quishacari, janiyari cunora shaajeyashijiani. Naaratej, cante cua miaquenani, nojuajaari pueyaracaanu quijia quiniutianiyajuhuaaj, na rupesacari janiya. <sup>58</sup> Janiyari maja juhua nia supuetanaa miaquesano panni. Nia supuetanaari cuno pan miaquenuquiaari najuhuanaj. Naajaa, saaja cusonuuquiaariiri. Janiyari seetanujuanaa jiyocuaaanuji roseno pan cutarani, nia miaquesocoriquiano. Cante cua miaquejani, jaara cusoyare, naajaa, samiitianutianihuari pueyaracaanu quijia na quiniuria.

<sup>59</sup> Jesuuri puetunu niojuanaa pohuataquiaari pueya niquiara Pueyaso secojojua tiajinia Capernaum tiacajinia.

### *Queraatia Jesu nuhuajiniaa pueya cartesacari nojuaja*

<sup>60</sup> Naa pueya tojishacari Jesu niishitiojosanotej, queraatia na nuhuajiniaa pueyari naa sequetooquiaari tamajaaja:

—Cuno na sequesanoori jiyanohua jiyajeneta pa miiniuria puetunujuanaa. Maja pa naata. ¿Cantucua na tojirijaarajaanijia?

<sup>61</sup> Jesuuri naa nojori sequesano niishiriji noojiajinia. Nocuaaji nojori sequeereeri:

—¿Niaateeri naa cua sequenuucua juaya? <sup>62</sup> ¿Niaatucua taa sequere socuani, niaa jaara cua niquiri tacaano jiyocuaaanuhua, teje cua niqiaaricuaajani? <sup>63</sup> Cua shu maja cumaacaraca pueya na samiitianiniuria. Saaja cua Sohuanu cutaraari pueya samiitianijia, pueyaracaanu rishijiaca nojori quiniuria. Niaa jaara cua sequesanoocua tiuuri, cunoori cumaacaraca cutara na samiitianiniuria nijaniya. <sup>64</sup> Noojiaqueya nijaniyajiniinooori cucuaji taacanuyajaa.

Jesuuri tarijia niishijia cante nocua tiuyashijiacani, mariyata cante na paraa na quiatenutaniyani.

<sup>65</sup> Naa sequeere socua cuno pojoriiri:

—Janiyacuaajaari cunora nia sequeereeni: “Maja pueyano naata cucua tiuuniu, cua Que jaara noojiajinia poonijiaquiri”.

<sup>66</sup> Jiyacaritij, queraatia Jesu nuhuajiniaa pueyari na cartequiaari. Nojoriiri maja tari Jesuta na rucojonu quijia. <sup>67</sup> Nocuaji, Jesuuri jiyacari canaa na saquiriojosano pueya nequesotaree:

—¿Niajaniiyarihuaj, niaateeri cua cartentuniyajaacuhaj?

<sup>68</sup> Simón Pedroori Jesu riucaree:

—¡Maja Jiyaniijajanaa! ¿Canaatucua tamonu jiyaniijiaacua pacureni? Canaa quia pohuatasanocujajaari na naata canaa jataniniu pueyaracaanu rishijia canaa quiniuria. <sup>69</sup> Canaacujajaari tari quiocua tiuuquianuni, canaa niishishacari quiaari Pueyaso Niyanu, saa maninia miijiaja.

<sup>70</sup> Jesuuri canaa sequeree:

—Niaacujajaari tama cua saquiriojosano doce pueyajaaja. Saniniuujia, niquiriyatu nijaniyajiniinooori sesaaca.

<sup>71</sup> Naa Jesu sequesacaritij, Judasjiniji sequeriquiaari, Simón Iscariote niyanuni. Nojuajaari seetanujanaa niquiriyatu canaajiniinooori Jesu doce saquiriojosano pueyajiniinooori quiquiaari. Naajaa, tama na Jiyaniijajajaaja tacartariquiano quiriqiaaquiiri.

## 7

### *Tama Jesu tapueyocujajaaja Jesuucua tiuyashijiaa quiquiaari*

<sup>1</sup> Na nuhuaji, Jesuuri Galilea jiyajinia rucuanerjoriquiaa. Canaari na cojiriqiaani. Majaari na quiniu paniniu quiriqiaa Judea jiyajinia, tii quiniaa Judiocuaca monu panishacari nojuaja. <sup>2</sup> Jiyacaritij, quera socua canaa Judiocuaca queranacusacariiri quiquiaari Jerusalén tiacajinia. Cuno queranacusacariiria pueyari ocho juuca shocotejoquiaari suhuorotucujajinia nojori quishacari. Naa miituuquiaari puetunu marijiajanaa canaa niishiriojonura, canaa supuetanaa Israel pueyari saaja suhuorotucujajinia quijiaa quiquiaari, pueyaracaanu nojori camarucuneejotasacari cariquia jiyajinia nojori quishacari. <sup>3</sup> Jiyacaritij, tama Jesu tapueyocujajaari naa Jesu sequeturee nojori macatiniuria nojuaja:

—¡Majaari niyaja quia jateenu! Quiocua queranacunuucua Judea jiyajinia quiaarejuhuaj. Quiocua tii miijiosee quia cumacata, quia jiyopue niquniuria puetunu quia miishanojuanaa. <sup>4</sup> Pueyano jaara puetunu pueyajanaa tojinu panishano pueyano quiniu paniri, ¿maatucua casaara jiyasohuaja miijiore na cumacatani? Naatej, taa niya quia miijioquiaa quia cumacatacuaani, naa quia miijiosee puetunu pueya niqiarajanaa Jerusalén tiacajiniajuhuaj.

<sup>5</sup> Majaari quenaaja tapueyocujajaaja tiuuniu quijia Jesuucua. Cunora naa na sequetureeri.

<sup>6</sup> Jesuuri saaja nojori riucaree:

—Juhuanajuaja maja cua quiasacari cua miiniuria taa nia sequeyacuajani. Naa jaara quianu paniri, niama juhuajaniya quiaaretej. <sup>7</sup> Niarta mijiria quijiaa pueyari maja na naata juaani niajaniya. Janiya cutaraari nojori niquniu paniaquishooni. Cua niqitiuniu paniaquiquiaari, nojori cua niishitishacari nojori miishanoori sesa. <sup>8</sup> Nia quiojiyare queranacunuucua. Janiya cutaraari maja cua quianu quiniutianiya juhuanajuaja. Quiarijiani, puera juhuacarijiaari cua miiniuria taa nia sequeree janiyacujani.

<sup>9</sup> Naa nojori na sequenu nuhuajitij, Jesuuri cuniquijia jiyojeree Galilea jiyajinia.

### *Jesu quishacari cuno queranacunuujinia*

<sup>10</sup> Na tapueyocujajaaja jaara quiojoquiaaricuaa Jerusalén tiacajiniara tii queranacunuunura, Jesuuri jiyasohuaja quiaaree nojori nuhuajijihuaj. <sup>11</sup> Queranacunuusacari, narta Judiocuaca camarucuaari Jesu pajenuuriquiaa. Nojoriiri naa sequeturiquiaa:

—¿Tee cuno pueyano quiyarini?

<sup>12</sup> Puetunu pueyajanaari Jesujiniji sasacotooriquiaa. Noojiaqueyari sequeriquiaa:

—Jesuuri maninia pueyano.

Tamasacaari saniniuujia sequeriquiaacujua:

—¡Maja maninia pueyano! ¡Pueya sapojoua najuhuanaj!

<sup>13</sup> Puetunu pueyajanaari naa sasacotooriquiaa jiyasohuaja, nojori pueresacari narta Judiocuaca camarucua.

<sup>14</sup> Jiuujianaraca juuca jaara tari shocotojiaari nojori queranacunuusacari, Jesuuri jiyacari shusha tiuquiquiaari Pueyaso Secojoua tiacajinia. Tii coteeree pueya niishitiojonuuri. <sup>15</sup> Canaa Judiocuaca camarucuaari jiuujiatequiaari nojori tojishacari Jesu niishitiojosano. Naa sequetureeri:

—¡Cuno pueyanoori maja quenaaja na serojonu quiquiaari! ¿Taa na niishiya pueraarini?

<sup>16</sup> Jesuuri nojori sequeree:

—Cua niishitiojosanoori maja tama cua niishishanojuaja. Cunoori cua Jiyarona niishitishano janiya. <sup>17</sup> Cante Pueyaso panishano miiniu paniyani, nojuaja cuara miiria

taa cua niishitiojiyacuaani. Naacuaajitij, nojuajaari jiyacari niishiniutianiya, cua niishitiojosanocuaajaari Pueyasojiniji seetanujuanaa, maja tama cua niishishanojuaja. <sup>18</sup> Cante tama na niishiriojosanojuaja pohuatajani, nojuajaari saaja naa miiquiaa juhua tojishano pueyano na quiniuria. Jiyano pueyano cuaraa tojiyaquishaaria. Saniniuujia, cante na jiyarona niishitiojosano pohuataa pueyani, pueya tojinuria na jiyarona, cuno pueyano pohuatasano cutaraani seetanujuanaa. Cuno pueyanoori maja pueya sapojoua.

<sup>19</sup> ¿Niaateeri seetanujuanaa supuetana Moisés Rootasano tojtiajaca? Majaruhua. Majaari quenaaja niquiriyatu niajanijajinijinio na rootasano tojjia. ¿Casaara nia monu pania janiyani? ¿Supuetana Moiséste naa nia niishitiojiya na naajioneejinia?

<sup>20</sup> Nojoriiri Jesu riucaaturee na juaniutia:

—¡Quiaaqui samaruraca! ¿Cante quia monu paniani? ¡Canaa quia sequeretoj!

<sup>21</sup> Jesuuri nojori sequere:

—Puetunu niajanijajanaari shiriqutiuguianu samaatenu juuca cua miishacari niquiriyatu casaaniyojua cua cumaacata. <sup>22</sup> Supuetana Moiséscaajaari nia rootaquiiaari nia mueya cararaatiuquua co nia miatenu, ocho juuca jaara na shocojore na rasaanujiniji. Seetanujuanaa, nio niishishanoori maja tama Moisés niishishanojuaja. Cunoori tariucuaaanu pa supuetanaa niishishano Moisés niyacarijia. Pueyari nia rootasaaquiiaari nia nojori miinuria necohua, seetanujuanaa Pueyaso saquiriojosano Israel pueya nojori quiniuriajuhuaj. Naaratej, jaara quiri samaatenu juuca, naajaa, niaari nia nia niquihua cararaatiuquua co miatejoquia. <sup>23</sup> Naa nia miishacari samaatenu juucatej Moisés Rootasano nia tojinuria, ¿casaara nia juaya janiyani, cua naataniniuucua cusosu samaatenu juucani? Niaari saaja shiitianiyojua miatejiya, maninia nia niquihua quiniuria Pueyaso niquiara. Janiya cutaraari puetunu cuno cusosu cuaqueyjanaa jeecacanuni. <sup>24</sup> Naaratej, maja ritia pueya juaajia nia quiniu, nia niishiyaquishacari maninia. Jacaria niishiriojua nia quiri, niaa mariqui najuhua pueya juaariiri na miishano jaara sesa quiaquiri.

*Jesu pohuatasacari tama nojuajinijiaaja*

<sup>25</sup> Jiyacaritij, nojiaqueya Jerusalén tiacajinijinio pueyari tama sequetooreejaaja:

—¿Majate nio pueyano pa camarucua pajesanocuaaja na mosocoriqianotej? <sup>26</sup> ¿Taateni? Noocujaruhua juhuajaniya pohuataa pueya niqularatej. Majaari quenaaja pa camarucua tenuityunuj. ¿Pa camarucate jiyaniya soj, nojuaja seetanujuanaa Cristo, tariucuaaanu sequesano pocua jiyarosaariqianotej? <sup>27</sup> Paacuaajaari nio pueyano niishiyaari, tejenote nojuajani. Saniniuujia, Cristojuanaa jaara tiuquiri, majaari quenaaja na niishishaanu quiniutianiya cutaraa tejenote nojuajani.

<sup>28</sup> Jesuuri jiyacari niishitiojoriquiaa Pueyaso Secojuajinia. Naa na tojishacari pueya sequesantej, naa na rupaa paaretareeri:

—¿Naate? ¿Niaateeri cua niishiya? ¿Niaateeri niishiya juhuaj, tejenote janiyani? Naajaa, majaari cua ninu quiquiaari tama cua panishacarijiaaja. Janiyari jiyarosanoni. Cua jiyaronaari seetanujuanaa quijiajuhanaj. Nojuajaari nia niishishoo. <sup>29</sup> Janiyari na niishiya cutarani. Janiyacuaajari tiji ninioni. Nojuajaari cua jiyaroquiiaari.

<sup>30</sup> Nojoriiri jiyacari Jesu quiatunu panirii. Naajaa, majaari quenaaja tamonu naata quiriquiaa na quianura. Majaari na naata quianu quishaaquiiaari, juhuanajuaja na monu juuca quiaquishacarijia. <sup>31</sup> Saniniuujia, queraatia cuniqui quiniaa pueyari Jesuucua tiuquuaari. Nocua tiuuniari naa sequetuquiiaari:

—¿Cristojuanaa jaara tiuquiri, nojuajatucua socua jiyajeneta casaa miiri na cumaacata nio pueyano miishanojiniji?

*Fariseocuaa quiatenu panishacari Jesu juucua*

<sup>32</sup> Fariseocuaari cuno pueya tojiquiaari nia nojori maninihuaqueetaano Jesu. Naaratej, cuno Fariseocuaa, pueyacuara secojonaa camarucuanio, puetunu nojori-jianaari Jesuucuaa roojotooquiiaari. Na nuhuaji, nojoriiri Pueyaso Secojuaja tia cojuanaa pueya jiyaramiquiquiaari Pueyaso Secojuaja tiajinia, tii nojori quianura Jesu. <sup>33</sup> Jesuuri jiyacari nojori sequere:

—Janiyari saaja rupaquijia niaata quiniutianiya. Na nuhuaji, janiyari cua jiyaronaacua riujuuniutianihuani. <sup>34</sup> Niaari cua pajenuunutaniya najuhuanaj. Majaari nia riuriatanu quiniutianiya janiya. Majaari nia naata quianu quiniutianiya tee cua quiniutianiyacuaani.

<sup>35</sup> Nocuaaji, cuno Judiocuaari tama sequetooreejaaja:

—¿Tee na quianutaniyajanojoni nia pocuaaniquitij, na riuriataaquishaanurajuhuj? ¿Parta Judiocuaacua quianutaniya soj, noo pojoriicua Griegohua tajinia niaquejoquiiaaritij? ¿Tii niishitiojonutaniya cuno taucuaa soj? <sup>36</sup> ¿Casa na sequenu pania pajaniyarini na sequesacari: “Niaari cua pajenutaniya najuhuanaj. Majaari nia riuriatanu

quiniutianiya janiya”, na sequesacarijuhuaj: “Maja nia naata quianu quiniutianiya tee cua quiniutianiyacuaani?”

*Jesu pahuatasano miriqui Pueyaso Sohuanujiniji*

<sup>37</sup> Siete juuca jaara tari shocojoquiaari, queranacunuunu puequesacari juucajanaari juhuaquequiaari. Cuno juucaari quiquiaari socua Pueyaso timitiasaanu juuca. Jiyacaritij, Jesuuri nujuacquiaari pueya niquiara. Jiyanohua na rupaa paaretareeri. Naa sequereeri:

—¡Cante jiyamueyani, nojuaja cuaara niiria cucua, na ratunura janiyajiniji! <sup>38</sup> Cucua na tiuushacari, nera quiniutianiyari taa na naajiotasaaquiaari tariucuacaanu Pueyaso Rupaajiniacuajani. Naa sequeyari:

“Cante cucua tiuyani, pueyano samiitianijiojua mohuacaari noojajiniji jaatenutaniya”.

<sup>39</sup> Naa Jesu sequesacaritij, nojuajaari Pueyaso Sohuanujiniji pahuatariquiaa miriqui. Jiyacaritij, Pueyaso Sohuanuuri juhuanojuaja maja na quiniu quiriquiaa mijiria, Jesu tacaquishacarijia Jiyaniijajanaa na quiniuria. Naaratej, tii quiniaa pueya sequeriquiaari, cante quiarjia nocua tiuyani, nojoriiri Pueyaso Sohuanu masenutaniya na nuhuaji, nojuaja jaara na jiyarosee jiyocuacaanuji.

*Pueya juaatiosacari Jesuucua*

<sup>40</sup> Jesu jaara pahuatanu puecaquiaari, tii quiniaa pueyari tama pocojoriquiaajaaja. Noojiaqueya nojorijinijinioori sequereeri:

—¡Nio pueyanoqui seetanujanaa Pueyaso sequenu panishano caminiujunia, nooj, tarijia sequesaaquiaari pocua niriqianotej!

<sup>41</sup> Tamasacaari saniniuujia naa sequeriquiaacujua:

—¡Nojuacuajaari Cristo, Pueyaso Jiyarosano pocua!

Tamasacaari saaja nojori riucaaree:

—¿Cristoteeri Galilea jiyajiniji supenutaniya? ¡Maja! <sup>42</sup> Tariucuacaanu Pueyaso Rupaajinia naajiotasanojiniji, paari niishiyani, Cristoori pa supuetanaa jiyaniijia David niquiohuajiniji supenutaniya. Belén tiacajinia rasaanutaniyari, supuetana David tiacajinia.

<sup>43</sup> Naacujitij, puetunu pueyajanaari Jesuucua juayonuutaquiaari. <sup>44</sup> Tamasacaari saniniuujia Jesu quianu paniriqiaa juucua. Naajaa, majaari na quiatunu quirii.

*Judiocuaca camarucua tiuyaquishacari Jesuucua*

<sup>45</sup> Pueyaso Secojoja tia cojuanaa pueyari Jesu tojitariquiaa juhuajaniya. Na nuhuaji, socua quiojyarohuari na jiyaramiquiniaa pueyacua. Nojori jiyaramiquiniaa pueyari quiquiaari Fariseocuaca, pueyacuara secojonaa camarucuanio. Nojori jiyaramiquiniaari nojori sequereeri:

—¿Casaara Jesu nia jaatucuyaquimiohuani?

<sup>46</sup> Nojori jiyaramiquishano pueyari saaja nojori riucaaree:

—¡Majaari quenaaja tamonu pueyano pocuanu juhua cuno pueyanojua, seetanu rupajanaa pahuataja cutara!

<sup>47</sup> Fariseocuacaari cunora nojori juaarii:

—¿Niaateeri niaacua na shanacuree na sapojonura nijaniyajuhua? <sup>48</sup> ¿Tamonu pa camarucujinijinote nocua tiuurii, canaa Fariseocuacajinijiojuhuaj? ¡Maja! <sup>49</sup> ¡Cuno pojori Jesuucua tiuujiacani, nojoriiri Moisés Rootasano niishiyashjiaca! ¡Nojoriiri sesoriquia seque!

<sup>50</sup> Nicodemoori narta Fariseocuacata tii quiriquiaa. Nojuajaari noo Nicodemo quiriquiaa Jesuucua niquiaari niucatej. Nojuajaari narta Fariseocuaca sequereeri:

<sup>51</sup> —Pueyanaa, supuetana Moiséscaajaari pa rootaquiaari maja najuhua na sesacanura pueyano, paa jaara coteenu na nequesoreyaquirini casaa na miiriini.

<sup>52</sup> Narta Fariseocuacaari Nicodemo juarii saaja:

—¿Quiaateeri narta Galilea jiyajinijinio pueyanojuhuaj? ¡Jacaria quia pajere tariucuaaanu Pueyaso Rupaajinia! ¡Quiocua jiyacari niishiri majaari quenaaja niquiriyatu Pueyaso sequesano caminiujunia pueyano supueno quiniutianiya Galilea jiyajinia!

<sup>53</sup> Na nuhuaji, puetunu cuno pojorijianaari na tiajinia quiojyarohua.

## 8

*Jesu jiyanooshacari maaji*

<sup>1</sup> Jesuuri saniniuujia Olivo cuhuariquiajia quiaaree. <sup>2</sup> Jesuuri tariquicuaji tiuquiriohua Pueyaso Secojoja tiajinia. Canaari nata quiriquiaajuhua. Pueyari nocua rerejoquiaari. Nojuajaari cajirii pueya na niishitiojonura juucua.

<sup>3</sup> Moisés Rootasanojiniji niishitiojonaa, mariyata Fariseocuacanio, cuno pojoriiri jiyacari maaji jaatucumaa Jesuucua. Cuno maajiri riuratasaaquiaari numuetucushiyano. Nojoriiri cuno maaji nujuateree pueya taccoji. <sup>4</sup> Jiyacari Jesu sequetureeri:

—Niishitiojonanaa, nio maajiiri quiasaaree numuetucushiyano. <sup>5</sup> Moisés Rootasanojiniji paari niishiyani, jiyano maaji cuaara mosaaria saitia jacusano. ¿Quiajaniyarijiataj, taa quia sequeyanijia?

<sup>6</sup> Judiocuaca camarucuaari naa Jesu nequesotaree najuhuanaj, nojori tojiniuria casaa na sequenutaniyani. Jesu jaara nojori sequere maja nojori miiniuria Moisés Rootasano, nojori maara nocuara saquiriojotare nojori jiyaniijianucua. Jesu cutaraari maja quenaaja nojori na riucuanu quirii. Nojuajaari saaja joree, jiyajinia na naajionura na juaashiquiata. <sup>7</sup> Pueyaracaanu nojori nequesoreesacari nojuaja, Jesuuri socua sanerohua. Nojori sequereeri:

—Teyano niajanijiniote sesa miyashijiani, nojuaja cuaara na coteetaara janu.

<sup>8</sup> Jesuuri jororohuacuhua socua na naajionura jiyacua. <sup>9</sup> Cuno pojori tojishacari naa Jesu sequesantej, puetunujuanaari sanaa quiojorohua. Juhucatecara quiojonu coteequiaariiri socua saaquiapue, na nuhuaji, socua naatujoori nojorijiniji. Nojoriiri naa quiojoquiariuhua puetunujuanaa. Saaja Jesuuri jateeqee cuno maajitia. <sup>10</sup> Jiyacaritij, Jesuuri sanerohua. Maaji sequereeri:

—¿Teete quiocuara saquiriojotanaani? ¿Majate quenaaja tamonu cureenu quirii na jacunura quiajanija saitia?

<sup>11</sup> Maajiiri Jesu riucuaaree:

—Shaaqui puetunujuanaa, Jiyaniijianaa.

Jesuuri maaji sequeree:

—Janiyari quia jyanoya cutarani. Juhujaniya quia quiaarohua. Majaari sesa quia miini socua.

*Jesuuri pueya jiuujia cuhuatana*

<sup>12</sup> Nojori nuhuaji, Jesuuri pueya niishitiojonu coteerohua. Nojori sequereeri:

—Janiyari pueya jiuujia cuhuatanani. Cante cucua tiuriini, majaari tari ninishiqui quijia na quiniu quiniutianiya. Pueyaracaanu cuhuashiqui quijia quiniutianiya cutaraari.

<sup>13</sup> Tii quiniaa Fariseocuacaari naa Jesu juaarii:

—¡Quiaacuajaari tama quia cuaqueyajiniji pohuataa! ¡Puetunu quia pohuatasanojuanaari maja tojishano!

<sup>14</sup> Jesuuri nojori riucuaaree:

—Tama cua cuaqueyajinijiaaja cua pohuatasacari, cunoori maja najuhua pohuatasano. Cua pohuatasanoori seetanujuanaa cutara. Janiyacuajaari niishiyani teje cua niqiaarini, tee cua quianutaniuhuanu. Niaari saniniujia niishiyacuyacuaja teje cua niqiaarini, tee cua quianutaniuhuanu. <sup>15</sup> Niaari pueyacuara saquiriojotaquiaa saaja nia niqishanojiniji, nia tojishanojinijijihuaj. Janiya cutaraari maja cua saquiriojotanu pueyacuara. <sup>16</sup> Janiya jaara juaari sesa miijia cutarani, cua sequesano cutaraari seetanujuanaa, niqiriyatujua cua quiaquishacari. Cua Jiyarona cua Quecuajaari cua cojqiaa cuata na juaaniuria sesa miijia. <sup>17</sup> Niaacuajaari Moisés Rootasanojiniji niishitiojoquiaa: “Caapiqui pueyano pohuatasano jaara juhua tarajanu pohuatasano quiriijihuaj, cuno cutaraari seetanujuanaa”. <sup>18</sup> Naajuhuj, canaari caapiquini. Tama cua cuaqueyajaaja cua pohuatasacari, cunoori seetanujuanaa, cua Jiyarona cojishacari janiya. Nojuajaari cua Que.

<sup>19</sup> Fariseocuacaari na nequesotaree:

—¿Teeteeri quia queni?

Jesuuri nojori riucuaaree:

—Majaari nia niishiniu janiya, cua Quejuhuaj. Naa jaara cua niishiriquia, nia maara cua Que niishirijihuaj.

<sup>20</sup> Jesuuri puetunu nio pohuatariquiaajanaa Pueyasora niqitiojosano cumaneeca racataja shuriucuaji, Pueyaso Secojoja tiajinia. Naajaa, majaari pueya quianu quiriinquinijioj, juhuanajuaja na monu juuca quiaquishacarija.

*Jesuucua tiyashijitacaari jyanoyaquishaanutaniya*

<sup>21</sup> Jesuuri cuno Fariseocuaca sequerohuacuhuj:

—Janiyari quianutaniyani. Niaari cua pajenuunutaniya juucua. Niaari cusunuunutaniya sesa miijiacaja, jiyanooshoo nia quishacarija, cucua nia tiyacuiniucua. Naaratej, majaari nia naata quianu quiniutianiya tee cua quianutaniyacuaani.

<sup>22</sup> Naa Jesu sequesacariitij, cuno narta Judiocuacaari tama sequetooreejaaja:

—¿Casaara na sequerecuaraarini: “Maja nia naata quianu quiniutianiya tee cua quianutaniyacuaani”? Tama na cuaqueyajaaja miaquenutaniya jiyoteeri.

<sup>23</sup> Jesuuri nojori sequeree:

—Niaari ninishiqui quiqiojinijinio. Janiya cutaraari jiyocuacaanujinijionu. Niaari saaja mijiria quijia. Janiya cutaraari maja niqijinioni. <sup>24</sup> Janiyacuajaari cunora

nia sequereeni, niaari jiyanooshoojua cusonuunutaniya nia cuaracashitiniuucua janiyari maja Pueyaso Niyanuni, taa cua sequequiaa niajaniyacuajani. Cunora niaari jiyanooshoo quiniutianiya, pueyaracaanu saniitiosano nia quiniuria.

<sup>25</sup> Nojoriiri Jesu nequesotaree:

—¿Canteeri quiajaniani?

Jesuuri nojori riucaaree:

—Janiyari najuhuana niaata pocoojiyani. Majaari nia tojiniu janiya. Janiyacuajaari tari nia sequereeni cante janiyani. <sup>26</sup> Janiyari queraatia jiitiajaa cua sequesocoriquiano niajaniani. Naa jaara nocua tiyaquiri, niaari pueyaracaanu saniitiosaanutaniya. Puetunu cua sequesanojuanaa niajaniani, cunoori seetanujuanaa. Cua pohuatasano mijiria, cunoori cua Jiyarona sequesano janiya. Na sequesanoori seetanujuanaa cutara.

<sup>27</sup> Majaari nojori niishiniu quiriquiaa Jesuuri na Que Pueyasojiniji pohuatariquiaa na sequesacari “cua Jiyarona”. <sup>28</sup> Jesuuri cunora nojori sequeree:

—Naa jaara cua teetere, niaari shusha jiyacari niishiniutianiya, janiyari Pueyaso Niyanuni. Niaari niishiniutianiyajuhua, majaari tama cua niishirojosanojuaja cua miiniu quijia. Janiyari saaja cua Que niishitiojosano pohuatajani. <sup>29</sup> Cua Jiyaronacuajaari cuata quiya. Majaari cua Que cartenu janiya, pueyaracaanu cua miiniuucua na panishano.

<sup>30</sup> Naa Jesu pohuatasacari pueya niquiaratej, queraatia pueyari jiyacari nocua tiuuri.

*Pueyaso pueyajiniji pohuatasano, Sesaaca pueyajinijini*

<sup>31</sup> Jesuuri shusha nocua tiuuniaa narta Judiocuaca sequeree:

—Naa jaara seetanujuanaa cua pohuatasano tojjiaa quiri pueyaracaanu, niaari cua pueya quiniutianiya. <sup>32</sup> Naa jaara naa miiritij, niaari seetanu rupaajanaa niishijaca quiniutianiya. Naacuajitij, niaari seetanujuanaa juhua cartesano pueya quiniutianiya, juhuajaniya quijia nia quiniuria.

<sup>33</sup> Narta Judiocuacaari Jesu riucaaree:

—Canaacuajaruhua supuetana Abraham jihuacuajinio supueno pueyani. Majaari quenaaja canaa quiniu quijia tamasa poonijotesano pueya. ¿Casaara naa quia sequeya canaarini, canaa quiniuria cartesano pueyani?

<sup>34</sup> Jesuuri nojori sequeree:

—Seetanujuanaa nia sequeyanijia, cante sesa miijiacani, nojoriiri juhua poonijotesano pueya quiya. Majaari na naata maninia mijia na quiniu. <sup>35</sup> Poonijotesano pueyanoori maja seetanujuanaa na quiniu juhua na camarnu niyanu. Maja na naata sequenu: “Janiya pueyaracaanu quiniutianiya cua camarnutani”. Na camarnu jaara na paniyaquiri, na naata na jatanu na panishacari. Camarnu niyanu cutara, na queeri maja na jatanu quijia, neyanu na quiniuucua. <sup>36</sup> Naajuhua, janiya jaara nia jaariutiare nia poonijotenajinijini, niaari seetanujuanaa cartesano pueya quiniutianiya, Pueyaso muerasura nia quiniuria cutara. <sup>37</sup> Janiyacuajaari niishiyani, niaari seetanujuanaa pa supuetana Abraham jihuacuajinio supueno pueya. Naajaa, niaari cua tojiniu paniyaquiya. Niaari cunora cua monu paniya. <sup>38</sup> Janiyari nia pohuatariquiaa cua Quejiniji cua niquishanoni. Niaari saniniujia nia que sequesano miiquiaacujua.

<sup>39</sup> Nojoriiri Jesu sequeree:

—¡Abrahamcuajaari canaa shipininio!

Jesuuri nojori riucaaree saaja:

—Abraham jaara seetanujuanaa nia shipininio quiri, niaa mariqui maninia miijiaa quiricuara, taa Abraham quiquiaricuuaani. <sup>40</sup> Saniniujia, niaari cua monu paniya saaja cua pohuatanuucua seetanu rupaajanaa, cua tojishano Pueyasojiniji. Abrahamri maja naa na miiniu quijia cutara. <sup>41</sup> Niaari saaja sesa miijiaa taa nia que miiquiaacuuaani.

Nojoriiri Jesu juarii:

—¿Casaa quia sequeyani? ¡Canaari maja saa maaji rasanajuani! ¡Pueyasocujaari canaa Que, maja tamonu!

<sup>42</sup> Jesuuri nojori sequeree:

—Pueyaso jaara nia Que quiri seetanujuanaa, niaa mariqui cua paniricuara, Pueyasojiniji ninio cua quishacari. Majaari tamajaaja cua ninio quiquiaari. Cua Que Pueyasocujaari cua jiyaroquiaari. <sup>43</sup> Cua rupaa nia tojiniu paniyaquishacari, niaari cunora cua pohuatasano niishiyaquiya. <sup>44</sup> Seetanujuanaa, nia quecuajaari Sesaaca, samaruhua jiyajinijia. Niaari cunora miiniu paniquiaa na panishano. Nojuaja jaara shushajanaa coteequiaari sesa miiniuria, nojuajaari naajuhuanajaj, mona. Nojuajaari maja na niishiniu sequenu seetanujuanaa. Pueyaracaanu sapojojuuari. Na sapojosacari, naa miyari sapojojuua na quiniuucua. Sapojonu niishiniuni, cunoori nojuajiniji supuequiaari. Niaari cuno nia que tojjiaa. Nocuai niaari naa sapojonuuacuajuhua. <sup>45</sup> Saniniujia, cua pohuatasacari seetanu rupaajanaa niajaninya, majaari cucua nia tiuuniu quiquiaa. <sup>46</sup> ¿Casaa cua miiquianu

sesani? Cante na niishiyani cuaara sequeera. Saniniuuja, janiya jaara sesa miyashijia quirini, ¿casaara cucua nia tiyuaquiyacuaraarini, seetanu rupaajanaa cua pohuatasacari niajaniani? <sup>47</sup> Cante Pueyaso pueyani, nojoriiri Pueyaso rupaa tojiquiaa cutara. Nia-janiya saniniuuja, niaari na rupaa tojiaquiya, na muerasu nia quiyaquishacari.

*Jesucristoori tariucuacaanu quijiajuhuanaja Abrahamjiniji*

<sup>48</sup> Narta Judiocuacaari naa Jesu juaarii:

—¡Canaacuajaquiri maninia sequeriquiaa quiajanijajiniji, quiaari Samaria jiyajinijinio tahue, samaruraca pueyanotuhaj!

<sup>49</sup> Jesuuri nojori riucaaree:

—Majaari janiya samaruracani. Janiya cutaraari saaja cua Que tojiquiaani. Naaari saniniuuja cua rerequetequiaacujua. <sup>50</sup> Naajaa, majaari cua tacaaniu naa nia sesacasacari janiya. Tamonu cutaraari quiya, nojuajaari paniya pueya tojinuria janiya. Nojuajaari cua rerequetejaca saniitioriquiano. <sup>51</sup> Seetanujuanaa nia sequeyanijia, cante cua rupaa tojjiani, nojoriiri maja na shaajenu quiniutianiya.

<sup>52</sup> Narta Judiocuacaari na sequeeree:

—¡Quiarjia cutara canaari niishiyani quiaari seetanujuanaa samaruraca! Canaa supuetana Abrahamri cusoquiaari, mariyata puetunu Pueyaso sequenu panishano caminiujuunaaanao. Quiaari saniniuuja quiarjia sequeyacuaja: “Cante cua rupaa tojjiani, majaari na shaajenu quiniutianiya”. <sup>53</sup> ¿Quiaateeri jiyaniya quiaa socua cutara pueyano canaa supuetana Abrahamjiniji? ¡Maja! Nojuajaari shaajequiaari. Mariyata puetunu Pueyaso sequesano caminiujuunaa pueyajaanaari shaajequiaarijuhuaj. ¿Canteeri quiajaniani naa quia sequenuratej?

<sup>54</sup> Jesuuri nojori riucaaree:

—Janiya jaara tama cua cuaqueyajaaja jiyatenu paniri juhua jiyaniijarani, cunoori najuhuanaj. Seetanujuanaa, cua Quecuajaari cua jiyatequiaari jiyaniijarajanaa. Nojuajaari nia sequesano nia Pueyasota. <sup>55</sup> Naaari seetanujuanaa na niishiyashijia. Janiya cutaraari cua Que Pueyaso niishiyani. Janiya jaara nia sequerene, maja cua niishiniu nojuaja, janiya maara sapojoua quirini taa nia quiyacuaani. Janiya cutaraari na niishiyani. Janiyari cunora na rupaa tojjiani. <sup>56</sup> Nia supuetana Abrahamri timiquiaari na niishishacari janiya mijiria supuenutianiya. Nojuaja jaara cua niquiquiaari mijiria quiyano tari, jiyanohua timiquiaariiri.

<sup>57</sup> Narta Judiocuacaari Jesu juaarii. Naa na sequetureeri:

—¡jaj! Majaruhua juhuanouaja cincuenta marijia shocojonu quiajaninya. ¿Taa quia sequeyarini quiaa canaa supuetana Abraham niquiquiaari?

<sup>58</sup> Jesuuri nojori riucaaree:

—Janiya nia sequeya seetanujuanaani, Abraham raaquishacarijia, janiyari tari quijiani.

<sup>59</sup> Naa nojori tojishacari Jesu sequesanotej, narta Judiocuacaari sai pajenuree Jesu na jacutajara juucua. Jesuuri nojoriicujaji jamaarii saaja. Pueyaso Secojoja tiajiniji tohuatamaari.

## 9

*Jesu jeeacasacari cariojoaru namijia, naa rasanouhuanajaj*

<sup>1</sup> Tamacari Jesu rucuanajosacari canaata, canaari cariojoaru pueyano niquiriini, naa rasanouhuanajaj. <sup>2</sup> Canaari cunora Jesu nequesotareeni:

—Niishitiojonanaa, ¿casaara naa cuno pueyano rasaaquiaari cariojoaruni, na queya miiniuucua sesatee, tama sesa na miiniuucuaajaaja soj?

<sup>3</sup> Jesuuri canaa riucaaree:

—Maja. Maja cunora naa na rasaanu quiquiaari. Naa rasaaquiaariiri Pueyaso cumaaca niishishaanura, na namijia jaara jeeasaare niquijiaari na quiniuria. <sup>4</sup> Juuca quishacarijia, pa tucuatere miiniu cua Jiyaron sequesano cua miiniuria. Paa quera niniyani. Jaara niniquii, majaari pa naata ponionionu quiniutianiya tari. <sup>5</sup> Mijiria cua quishacarijia, janiyari pueya jiuujia cuhuatanani.

Jesu sequesacari: “Paa quera niniyani”, nojuajaari pa shaajenujiniji sequeriquiaa miriqui.

<sup>6</sup> Naa Jesu sequenu nuhuajitij, nojuajaari jiyocua riocoree. Na riacauta coniquioreeri. Coriyacau mara ruporohua cariojoaru namijiaacuaari. <sup>7</sup> Cariojoaru sequerohuari:

—Siloé cuarimia quia jeequese quia namijia.

Hebreo rupaajinia, Siloé cuariiri sequeya “Pueyaso Jiyarosano cuari”. Cariojoaruuri cuarimia quiaaree. Tii na namijia jeequeseeri. Tariucua niquijiaari na tiajinia tiuquirihua. <sup>8</sup> Cariojoaru na quishacarijia, nojuajaari na miajajau na masetajara cumaneeca

mashiniquijiojua quiquiaari. Puetunu pueyajanaari na niquitiujia naa na mashiniquijiosacari. Naacuaajitij, nojuaja jaara niquijiara quiquiaari, tarijia na niquiniaa pueyari, mariyata na shuriucua quiniaa pueyano, nojoriiri tama sequetooquiaarijiaaja:

—¿Cante cuno pueyanojaarani? ¿Majate noocujaja tarijia cumaneeca mashiniquijiojuatej?

<sup>9</sup> Noojaqueya pueyari sequereee:

—¡Taaquiriririni, nojuajacua!

Tamasacaari saniniuujia sequereecujua:

—Nojuajaquinio naasucua. Juhua nojuaja niquishiyacua, majaari seetanujuanaa nojuaja.

Tarijia quijia cariyojuaruuri saa sequereejaa:

—Taaquiriririni, janiyacuaaquinatejaj.

<sup>10</sup> Naaratej, pueyari na nequesotaree:

—¡Quiaacujaja cariyojuaru quijiaruhua! ¿Taa niquijiara quia quiriohuarini?

<sup>11</sup> Nojuajaari pueya riucaaree:

—Cuno, Jesu jyanishano pueyanoni, nojuajaari mara coniquioree cucuara. Cua nami-  
jiaacua na ruporohuari. Na nuhuaji, cua jiyaroreeri Siloé cuarimia cua jeequenura cua  
namijia. Janiyari quiaareeni. Cua namijia cua jeequesacari, jjaniyari niquijiara quiquini!

<sup>12</sup> Pueyari na nequesotaree:

—¿Teeteeri quia namijia jecana pueyanoni?

Nojori riucaareeri:

—Johuaj. Maja cua niishiniu.

*Fariseocuaca nequesoreesacari na namijia jecasano pueyano*

<sup>13</sup> Pueyari Fariseocuacaacua jiyataaree Jesu jecasano cariyojuaru pueyano. <sup>14</sup> Jesu  
jaara mara coniquiquiaari na jecanura cuno pueyano namijia, cuno juucaari Judiocuaca  
samaatenu juuca quiquiaari. <sup>15</sup> Nocuaaji Fariseocuacaari tarijia cariyojuaru quijia neque-  
sotaree taa niquijiara na quiriini. Nojuajaari nojori riucaaree:

—Jesu cua namijiaacua rupojorucuaa marani. Na nuhuaji, janiyari cua namijia jeeque-  
seeni. Naacuaajitij, janiyari quiarjia niquijia quiyani.

<sup>16</sup> Noojaqueya cuno Fariseocuacajinjinioori saa sequereejaa:

—Cuno pueyano, nio pueyano namijia jecarucuaani, nojuaja maja Pueyaso Jiyarosano.  
¡Nojuajaari Moisés Rootasano tojiyashijia, naa na miiniuucua samaatenu juuca!

Tamasacaari saniniuujia sequeriquiaacujua:

—Jaara sesa miijia quiri, ¿maatucua casaara poonijiore Pueyaso cumaacatacuaraarini?

Naa nojori juayonuutanuucuatej, nojoriiri juhua raqitiirini. <sup>17</sup> Nocuaaji tarijia quijia  
cariyojuaru nequesotaturoruhuaruhuj:

—Niquijia quia quishacari quiarjia, ¿taa quia sequeya Jesuni? ¿Maninia miijiatee?

Nojuajaari saaja Fariseocuaca riucaaree:

—Janiyara, nojuajaari Pueyaso sequesano caminiujunua.

<sup>18</sup> Tii quiniaa Judiocuacaari na cuaracashitirii saaja. Nojoriiri jyaniquiaari maja  
naasucua seetanujuanaa cariyojuaru cuno pueyano quini quijia. Nocuaaji nojoriiri na  
queya sequeturee nojoriicua na niniuria. <sup>19</sup> Nojori tiuquishacari, cuno Judiocuacaari  
nojori nequesotaree:

—Canaa nia sequere, ¿nio pueyanote seetanujuanaa nia niyanu, nia sequesano cariyojuaru  
rasanojuhanani? ¿Taa quiarjia niquijiara na quiriohuarini?

<sup>20</sup> Na queyari cuno pojori riucaaree:

—Taaquiriririni, nojuacuaaquinateja canaa niyanujaj. Naa cariyojuaru raaquiaari-  
iri. <sup>21</sup> Majaari canaa niishiniu cutara taa na quiriohua niquijiarani. Majaari canaa  
niishiniuujuhuj, cante na namijia jecarucuaani. Nojuaja nia nequesotare, tari cumant-  
tumacacujaja. Nojuajanaa cuara nia pohuataara cutara.

<sup>22</sup> Na queyari naa riucaquiaari narta Judiocuaca camarucuatej, na pueretusacari  
nojori. Judiocuaca camarucuaari tari sequetuquiaari: “Cante Jesu sequeyani nojuaja see-  
tanujuanaa Pueyaso Jiyarosano, naa sequejaca pueya cuara tenujusaaria maja Pueyaso  
secojojua tiajinia na tiuquiniuria socua”. <sup>23</sup> Naaratej, na queyari naa narta Judiocuaca  
riucaquiaari: “Nojuaja nia nequesotare, cumantumacacujaja”.

<sup>24</sup> Cunora cuno Judiocuacaari socua piiriohua na namijia jecasano pueyano. Nojoriicua  
na nishacari, na sequetureeri:

—¡Paacujajaari Pueyaso niquiara niya quiyani! Naaratej, ¡seetanujuanaa canaa quia pohu-  
atare cuno pueyanoinijij! ¡Canaa cutaraari niishiyani cuno pueyanoori sesa miijia!

<sup>25</sup> Na namijia jecasano pueyanoori nojori riucaaree:



—Naajaa, jaara sesa miijia quiri, jaara maninia miijia quirijjuhuaj, maja cua niishiniu cuno. Janiya cutaraari niishiyani, jjaninyari tarijia niquiyashijia quiquiaarini! jJaninyari saniniuujia quiarijia niquijia quiya cutarani!

<sup>26</sup> Nojoriiri na nequesotaroahuacuahuaj:

—¿Taa na miiriucuaa quiajanijaaarani, niquijia quia quiniuriani?

<sup>27</sup> Narta Judiocuaca camarucua sequeree saajaari:

—Janiyacuaja tari nia pohuataareeni. Majaari nia tojiniu paniniu janiya. ¿Casaara nia paniya socua cua pacutenura sequenu niajaninyani? ¿Niaate na pueyara quiniu paniya soj?

<sup>28</sup> Naa na sequesacari nojoritij, cuno Judiocuaca camarucuaari na sesacaturee. Naa na sequeteeri:

—iQuiaari cuno pueyano tojijiacuaja! iCanaa cutaraari supuetana Moisés Rootasano tojtijacani! <sup>29</sup> iCanaa cutaraari niishiyani Pueyasojuanaari Moisésua muetaquiaari na rootanura nojuaja! iSaniniuujia cuno pueyanoorijjataj, majaari quenaaja pa niishiniu teje na supuequiaarini!

<sup>30</sup> Na namijia jeecasano pueyanoori nojori riucaaree:

—iNiaaquiiri mosanucua seetanujuaanaa! ¿Majateeri nia niishiniu teje na supuequiaarini? iNojuajaari cua namijia jeecarucuaa! <sup>31</sup> iPaacuajaari niishiyani Pueyaso maja na tojiniu quijia sesa miijiaa secijosano! iSaaja na timitiajaca secijosano tojija cutaraari, cante na panishano miiguaacuajani! <sup>32</sup> iMajaari quenaaja pa tojiniu quijia tamonu pueyanojiniji, cante cariyajuaru namijia jeecajani, naa cariyajuaru rasanoyuhuanaj! <sup>33</sup> Cuno pueyano jaara Pueyaso Jiyarosano quiaquiri, ¿taa cua namijia na jeecarucuaacuaaarini?

<sup>34</sup> Cuno pojoriiri na juaniutia na sequeteeri:

—iQuiaari sesa miijia rasaaquiaari! ¿Quiaateeri jiyanojuua canaa niishitiojonu paniaruhua?

Naaratej, narta Judiocuaca camarucuaari na tenujuturee maja socua na tiuquiniuria Pueyaso seciojua tiajinia. Naacuajitij, cuno pueyanoori juhua taanusano pueyano quiquiaari narta Pueyaso timitiajaca pueyajiniji.

*Jesu tojtiaashijiaa pueya juhua cariyajuaru*

<sup>35</sup> Jesuuri niishiquiaari cuno pueyanoori tenujusaarucuaa. Jaara na riuriataquiaari, Jesuuri na sequeree:

—¿Quiaate Pueyaso Niyanuucua tiuujia?

<sup>36</sup> Jesu sequereeri:

—Jiyaniijianaa, cua sequere canteeri nojuajani, nojuaja cua niishiniuria nocua cua tiuuniuria.

<sup>37</sup> Jesuuri na sequeree:

—Quiaacuaja na niquiyaruhua. Nojuajaari cunocuaja, quiata pocooyiani.

<sup>38</sup> Jiyacaritij, pueyanoori Jesu cariquimijia mojoquetaree. Na sequereeri:

—iQuiocua tiuyanijia, cua jiyaniijianaa!

<sup>39</sup> Na nuhuaji, Jesuuri cuniqui quiniaa pueya niquiara sequeree:

—Janinyari mijiria niquiaarini juhua cua raquiriojotanura mijiria quiniaa. Naacuajitij, cante niishiyani nojuaja juhua cariyajuaru quiya, nojuajaari juhua namijiaraca quiniutianiya cucua na tiuushacari. Saniniuujia, cante jiyaniyani nojuaja niquijia cutara, nojuajaari juhua cariyajuaru tari jiyatesaaree, cucua na tiuyaquiniuucua.

<sup>40</sup> Tii quiniaa Fariseocuaca jaara tojiquiaari naa Jesu sequesantej, nojoriiri Jesu sequeree:

—Naa quia sequesacaritij, ¿quiaateeri sequeya canaari cariyajuaruurijjuhuaj?

<sup>41</sup> Jesuuri nojori riucaaree:

—Niaa jaara tama nia cuaqueyajaaja jiyatere juhua cariyajuaru cucua nia tiuuniuria, Pueyaso maara nia jiyanoori. Quiarijiani, tama nia sequenuucuaaja, “Canaa niquijia cutarani”, niaari jiyanooshoojua nioojia nia tacatoyaquiniuucua.

## 10

*Jesu pohuatasano miriqui borrego cojuanajiniji*

<sup>1</sup> Jesuuri socua pohuatarohua pueya niquiara. Naa sequereeri:

—Seetanujuaanaa nia sequeyanijia, cante borrego mataca tohuatayaco tiuquiyajijiani, nojuaja jaara tamocoji tiuquimia, cunoori nohuasejoja. <sup>2</sup> Saniniuujia, cante tohuatayaco tiuquijia cutarani, cunoori borregohua camarujuaanaa cutara. <sup>3</sup> Tohuataya cojuanaari tiootiu riataquiaa nocuaji. Borregohua camaruuri puetunu na seya sesacajanaa jiyaniquijia. Na borregohuari na rupaa niishijia. Na camaruuri naa na tohuatanijiojua puetunujuaanaa na matacainiji. <sup>4</sup> Puetunu na borregohujanaa jaara tohuareetama, na camaruuri na puetaja. Na seyari na nuhuaji sacuaaja, na camaru rupaa nojori niishishacari. <sup>5</sup> Saniniuujia,

borregohuari maja na nuhuajiniu quijia na niishiyaquishoo pueyano. Saaja nocuaji cocuatejaari na niishishacari cunoori maja na camaru rupaa.

<sup>6</sup> Jesuuri naa pohuataquiaari miriqui nojori niquiara. Nojoriiri saaja niishiyaquiaari casaa na niishitiojonu paniriquiaa nojorini.

*Jesucristo, maninia pa cojuana*

<sup>7</sup> Nocuaji Jesuuri naa nojori sequerohua maatia:

—Seetanujuanaa nia sequeyanijia, janiyari juhua tohuatayani, cua borregohua tiuquitianura cua Que Pueyasocua. <sup>8</sup> Cante cua niyacarijia nijioquiaari coteenuni, nojoriiri sesa miijiaa quiquiaari, nohuasenujuaca. Cua borregohuari namitia nojori numueejushiquiaari. <sup>9</sup> Janiyari juhua tohuatayani. Cante janiyariniji tiuquiya cua Queecuaní, nojuajaari Pueyaso pueyanora jiyatesaanutaniya cutara. Cuno pueyanoori maninia cojuasano juhua borrego. Janiyari na tiuquininiutianiyani, tii na quiniuria maninia cojuasano. Janiyari juuca na tohuatenutaniyani, jiyasocua cua miaquetenura carijiniacuma.

<sup>10</sup> Nohuasejojuaari saaja tiuquijia borregohuacua na nohuasenuura, na puecoonura-juhuaj. Naa na shaajaaja puetunujuanaari. Janiyari saniniuuja niquiaarini cua borregohua cua jiyatenura pueyaracaanu quijiacara, seetanujuanaa jiyanoehua shuquiriaatia quijiaa nojori quiniuria. <sup>11</sup> Janiyari maninia cojuananí, maja tamonu. Pueyano jaara maninia na seya cojuana maniniu quiri, tama na cuaqueyajaaja panitaja na seyacuara. <sup>12</sup> Saniniuuja, borregohua camarujuanaa jaara tamonu cojuateya na seya, cuno pueyano jaara niquiri sare nocua canujiyano, nojuajaari na puerenuta neteja. Borregohua tiu-jiaqueeri. Naa miijaari cuno borregohua quiaquiniucua na seyajanaa. Naacuajitij, sareeri borregohua soojua. Naa na cocuatajaari. <sup>13</sup> Cuno borregohua cojuanaari naa neteja sarecuajij na tacayaquishacari seetanujuanaa cuno borregohuacua. Nojuajaari saaja paniya na poonijiosano sami na niqitiosaanura.

<sup>14</sup> Janiya cutaraari maninia cojuaja borregohuani, na camarujuanaa cua quishacari. Janiyari puetunu cua seyajanaa niishijiani. <sup>15</sup> Nojoriiri cua niishiyajuhuaaj, taa cua Que niishiya janiyacuaani, mariyata taa cua niishiya cua Quejaniuhuaaj. Janiyari tama cua cuaqueyajaaja panitaja cua borregohuacuarani. <sup>16</sup> Janiyari socua borregohua jiiitiaani. Nojoriiri maja nio cua borregohua maanujinijinio. Janiyari nojori rijionutaniya niyara-juhuaj. Nojoriiri cua tojtitariquiano. Naacuajitij, puetunu cua borregohujanaari jatiqui quiriquiano, niquiriyatu cojuanaracajuhuaaj.

<sup>17</sup> Cua Queeri cua paniya naa cua panitiasacari tama cua cuaqueyajaaja cuno borregohuacuarani. Janiyari tama cua panishacarijaaja mosaanutaniyani, na nuhuaji cua samiitianuhuara, pueyaracaanu quijia cua quiniuhuara. <sup>18</sup> Majaari quenaaja tamonu naata monu janiya cua paniaquishacari. Janiyari cua panishacari cusonutaniya cua borregohuacuarani. Janiyari cumaacaracani nojoriicuaa cua cusonura. Janiyari cumaacarcacajuhuaaj cua samiitianuhuara. Cua Quecuajaari naa cua miiniuria cua jiyaroquiaari mijiria.

<sup>19</sup> Narta Judiocuaca jaara tojiquiaari naa Jesu sequesantej, nojoriiri socua tama juay-onuutaquiaarijaaja Jesuucua. <sup>20</sup> Queraatia pueyari jiyacari sequere:

—¿Cuno pueyanoori samaruraca! ¡Maja na tojiniu, pueyanaa! ¡Najuhuaana pocuaano!

<sup>21</sup> Tamasacaari saniniuuja sequeriquiaacujua:

—¿Samaruraca pueyanoteeri maninia casaa pohuatajajaara juhua nio pueyanojua? ¡Maja! ¿Pueyanoteeri na naata samaru cumaacata jeeccanu cariyojuaru namijiajaara? ¡Maja na naata!

*Judiocuaca camarucua niquiniu paniaquishacari Jesu*

<sup>22</sup> Tamacari, Jerusalén tiacajiniari queranacusaariquiaa. Cunoori quiriquiaa pueya niishiriojonura nojori juhua cuno juacajinia Pueyaso Secojoua tia jiyatequiaariuhua seetanujuanaa juhua Pueyaso quiquiora na quiniuhuara. Jiyacariiri shuniya quiriquiaa. <sup>23</sup> Jesuuri tii quiriquiaajuhuaaj. Pueyaso Secojoua tiajinia quiriquiaari. Nojuajaari pueya jiyaniquishano tariucuacaanu jiyaniijia Salomón canujuucojojuajinia riujuuni-quojoriquiaa. <sup>24</sup> Jiyacariitij, canaa Judiocuaca camarucuaari tii na cosesee. Naa na nequesotateereeri:

—¿Taacari canaa quia sequenutaniya socuacari cante quiajaniani? ¡Quiaa jaara seetanujuanaa Pueyaso Jiyarosano quiri, quiarijia canaa quia sequere!

<sup>25</sup> Jesuuri nojori riucuaaree:

—Janiyacuaaja tari nia sequecanuni. Niaari saaja na cuaracashitiquianu. Naa cuaara niishiiria cante janiyani, nia niquishacari cua miishano cua Que sequesano janiya. <sup>26</sup> Niaari saaja cucua tiyauquiaa cua borregohua maanujinijinio nia quiaquishacari. <sup>27</sup> Cua borregohuari cua rupaa tojijia cutara. Janiyari nojori niishiyajaaniuhuaaj. Nojoriiri cunora

cua nuhuajiquiaa. <sup>28</sup> Janiyari pueyaracaanu quijiara nojori jiyatequiaani. Majaari nojori juurequenu quiniutianiya. Majaari quenaaja tamonu naata jaariuutianu quiniutianiya nojori janiyajiniji. <sup>29</sup> Cua Queeri cua borregohua cua niqutioquiaari. Nojuajaari socua jiyanoehua cumaacaraca tamasaca cumaacaraca quijiacajiniji. Naacujatij, maja quenaaja tamonu naata cua borregohua jaariuutianu cua Quejiniji. <sup>30</sup> Janiya cua Queta, canaari juhua niquiriyatuni.

<sup>31</sup> Jiyacaritij, canaa Judiocuaca camarucuuaari sai rijiorohuacuuhaj, Jesu na jacutajara juucua. <sup>32</sup> Jesuuri saaja nojori sequeree:

–Janiyari queraatia maninia casaa miiquianu saaja cua Que cumaacata nia niquiarani. ¿Teyanoocua nia jacunu paniya janiyani?

<sup>33</sup> Nojoriiri Jesu riucuaaree:

–Majaari canaa jacunu quiniutianiya quiajaniya maninia quia miiniucua. ¡Canaari quia jacunutaniyani sacuaraatia quia pocuanuucua Pueyaso niqiuara! ¡Quiaari tama quia cuaqueyajaaja jiyateya juhua Pueyasora! ¡Cunoori jiyanoehua sesa! ¡Quiaacuajaari pueyano, juhua canaajuhuj!

<sup>34</sup> Jesuuri nojori sequeree:

–Niaacuajaari tariucuacaanu naajiosano Pueyaso Rupaa jiitiaa. Pueyaso sequesanoori naa naajiotasano quia tii:

“Janiyacujaari nia sequequiaarini, niaari pueyasohua”.

<sup>35</sup> Paacuajaari niishiyani, Pueyaso Rupaajinia naajiotasanoori maja na naata cuaracashitishaanu. Pueyasojuanaari pueya jiyaniquiquiaari “pueyasohuata”, noo pojori, teyano nojuaja jiyatequiaari Israel pueya jiiitanaaracuajani. <sup>36</sup> Naajuhuj, Pueyasocujaari cua saquirioquiaari mijiria na jiyarosocoriquiano. Naa Pueyasojuanaa Jiyarosano cua quishacaritij, ¿niaatucua casaara sequereni janiya Pueyaso niquiara pocuaaree sesani, cua sequesacari janiya Pueyaso Niyanuni? <sup>37</sup> Janiya jaara cua Que panishano miyaquiri na cumaacatani, janiya maara nia juayaquirini cucua nia tiuyaquiniucua. <sup>38</sup> Niaacuajaari cua Que cumaacata cua miishano niqiuquiaa. Naa jaara cua pohuatasanoocua tiunuu paniyaquiri, naajaa, cua Que cumaacata cua miishanoocua nia tiuuri quenaaja. Naa jaara niishiri puetunu cua miishanojuanaari cua Que Pueyaso cumaacata miishano, niaa maara niishiri Pueyasoori coojia rupueja, janiyari noojia rupueyajaaniuhuj.

<sup>39</sup> Jiyacaritij, nojoriiri socua Jesu quiatunu paniriohuacuuhaj. Jesuuri saaja nojoriicuaaji mashiquii.

<sup>40</sup> Jesuuri canaa jiyatarohua Jordán moo taquijiria tee Juan tiuquinijioquiaari tarijia pueyacuajani. Canaari tii quishiini. <sup>41</sup> Queraatia pueyari Jesuucua nijioquiaari tee canaa quiriqiaacuajani. Nojoriiri tama sequequiaarijaaja Jesujiniji:

–Tiuquinijiona Juanri maja quenaaja na miiniu quijia casaa Pueyaso cumaacata. Naa-jaa, puetunu nio pueyanojiniji na sequesanojuanaaquiiri seetanujuanaa quijia.

<sup>42</sup> Naacujatij, queraatia pueyari Jesuucua tiuquiquiaari tii, tee canaa quiriqiaacuajani.

## 11

### *Lázaro shaajenujiniji pohuatasano*

<sup>1</sup> Jiyacaritij, tamonu pueyanoori cusosu matariquiaa. Na sesa quiquiaari Lázaro. Nojuajaari Betania tiacajinijiojuanaa quiquiaari, Judea jiyajinia. Na rimiatuhua quiquiaari María, Martiano. Nojoriiri cunoo Betania tiacajinijinio quiquiaarijuuhuj. <sup>2</sup> Lázaro rimiatu Mariani, nojuajaari noo maajicuaja Jesu niohuaca sacuanijiaquiaari na muecatatej, nocua na totanu nuhuaji na shanohua jaanutaja. <sup>3</sup> Lázaro matasacari cusosu, na rimiatuhuari pueyano jiyarotuhuaari Jesu numootenuucua. Naaratej, cunoo pueyano tiuquishacari Jesuucua, nojuajaari naa caminiujuquiaari Lázaro rimiatuhua sequesano nojuaja:

–Jianiijianaa, quia panishano pueyanona cusosu mataa.

<sup>4</sup> Jesu tojishacari naa cunoo pueyano sequesanootej, tii quiniaa pueya sequereeri, canaajuhuj:

–Nojuajaari maja na cusonu quiniutianiya na shaajenura puetunujuanaa. Cuno cusonu na jiiitiasanojinijini, pueyari Pueyaso cumaacata miishano niqiniutianiya. Pueyari cunora Pueyaso Niyanu maninihuaqueetanutianiya, cua Que Pueyasojuhuj.

<sup>5</sup> Marta, María, Lázaroni, nojoriiri Jesu panishano pueya quijia. <sup>6</sup> Naajaa, Jesu jaara numootesaaquiaari Lázarojiniji, majaari nocua na quianu quiquiaari ritia. Caapiqui juuca camueeree cuniquijiaaraari, tee canaa quiriqiaacuajani. <sup>7</sup> Na nuhuaji, canaa na saquiriojosano pueya sequereeri:

–Judea jiyajinia pa quiaarohuacuara socua.

<sup>8</sup> Canaari Jesu sequereeni:

—Niishitiojonanaa, cuniquijinio Judiocuacacujaari shusha naataja tii quia jacunu paniquianu. ¿Casaara socua tii quia quianu paniuhuariniuhua?

<sup>9</sup> Jesuuri canaa riuuaree miriqui:

—Janiyara, juuca juhuanojuaja. Juucaari maninia seetanujuanaa pa rucuanefonura. Paa jaara pananu tiuquiyaquishacarijia rucuanefoneni, paari maninia niquiya pocuajini. Majaari pa tiuriini. <sup>10</sup> Paa jaara ninishiqui rucuanefjore saniniunijia, paari tiurijiani cuhuashiqui na quiyaquishacari.

Jesuuri naa sequeriquiaa miriquitij, nera, maja puereeta na quiniu quiriquiaa Judiocuaca niquiara na rucuanefonura, na mosaanu juuca quiyaquishacarijia. <sup>11</sup> Na nuhuaji, Jesuuri naa canaa sequeree socua:

—Pa rupuena Lázaroori tari maquequee. Janiyari na niucujajuucua quianutaniyani.

<sup>12</sup> Canaari Jesu sequereeni:

—Jiyaniijanaa, nojuaja jaara maqueya, maniacuajaqui. Naacuajiti paari niishiyani naatanutaniuhacuajaqui. ¿Paatucua casaara najuhanaa nocua quiaareni?

<sup>13</sup> Naa Jesu pohuatasacari canaa Lázaroinijitij, canaa sequeriquiaa juucuaari Lázaroo tari macu quiriquiaa. Canaari saniniuujia jyaniriquiaani Jesu naasucuaari canaa pohuatariquiaa Lázaroo nareja maqueriquiaa. <sup>14</sup> Nocuaji Jesuuri maatia canaa sequeree:

—Lázaroo tari cusoyarucuaa. <sup>15</sup> Janiyari timiyani tii cua quiyaquiniuucua Lázaroo quishacarijia saminio. Naa quiarjia macu na quishacaritij, niaari socua jiyajeneta casaa cua miishano niquiniutianiya, seetanujuanaa cucua nia tiuuniuria cutara. Quiarjia cutara, nocua pa quiaare.

<sup>16</sup> Jiyacaritij, Tomásri canaa narta saquiriojosano pueya sequeree:

—Pa Jiyaniijata pa quiaarejuhuaj, nata pa cojiritiasaanura puecoonu.

Cuno Tomásri pueya sesojosano quiquiaari “Caapueya muetusano”.

#### *Jesu, macunucua samiitianijiojua*

<sup>17</sup> Canaa jaara tiuquijioseequiaarini, Jesuuri pohuatasaaquiaari Lázaroo tari cuatro juuca shocotejoriquiaa raaco na niasaanujiniji. <sup>18</sup> Betania tiacaari catecaja Jerusalén tiacajiniji. (Nareja media hora paa jaara ritia rucuaneyareni). <sup>19</sup> Naaratej, queraatia narta Judiocuacaari quiojoquiaari Marta, María tiajinia, nojori na cumanijianura na nanu nuhuaji. <sup>20</sup> Marta jaara niishiquiaari Jesu shusha tiuquiriquiaa, nojuajaari nocua tohuataquiaari canaa na naacunura. Majaari María niniu quiriquiaa cutara. Tiajiniaja quiriiri. <sup>21</sup> Canaacua Marta tiuquishacari, nojuajaari Jesu sequeree:

—Jiyaniijanaa, quiaa jaara niya quiquianu, cua nanu maara shaajeyaquiquianu!

<sup>22</sup> Naajaa, janiyari niishiyani quiaa jaara Pueyaso secojore, Pueyasoori quia secojosano tojiniutianiya.

<sup>23</sup> Jesuuri Marta sequeree:

—Quia nanucujaja samiitianutaniuhua.

<sup>24</sup> Martaari na riuuaree:

—Taaquiriirini, janiyacujaja niishiyani nojuajaari samiitianutaniuhua macunucua samiitiacosacariuhua jiya puequesacari.

<sup>25</sup> Jesuuri na sequeree:

—Janiyacujajaari macunucua samiitianijiojuani. Cante cucua tiuujiani, jaara cusoyare, naajaa, samiitianutaniuhuari. <sup>26</sup> Cante cucua tiuurii saminio na quishacarijiani, nojuaja jaara cusoyare, naajaa, majaari na shaajenu quiniutianiya seetanujuanaa. ¿Quiaate cua sequesanoocua tiuya Martanaa?

<sup>27</sup> Nojuajaari Jesu riuuaree:

—Jaa, Jiyaniijanaa. Janiyacuaja niishiyani quiaari Cristo, Pueyaso Niyanu, noj tariucacaanu sequesaaquiaari mijiria niriqianotej.

<sup>28</sup> Naa Marta riuucuanu nuhuaji Jesutej, na tiajinia quiaarohuari. Naa María numaama sasacasuhuari:

—Niishitiojona jati quiya. Quia sequeyano nocua quia quianura.

<sup>29</sup> Naa María tojishacari Marta sequesantej, ritia sanequeeri. Jesuucua nimiaari tee canaa quiriquiaacuajani. <sup>30</sup> Jesuuri juhuanojuaja maja na tiuquitianu quiquiaari canaa cuno tiacajinia. Canaari tiaca shuriucua quiriquiaajaani tee Marta naacuquiaari canacuajani, Jesuucua na nishacari. <sup>31</sup> Nojori cumaniijanaa pueya jaara María niquiquiaari ritia tohuataano tiajiniji, nojoriiri na jyaniquiaari na nanu raajinia nujuquenuucua quiaa naasucua. Naaratej, nojoriiri na nuhuaji quiaaree.

<sup>32</sup> María tiuquishacari canaacua, Jesu cariquimiaaji mojuquetaseeri. Naa na sequereeri:

—Quiaa jaara niya quiquianu, cua nanu maara shaajeyaquiquianu.

<sup>33</sup> Jesu niquishacari María nujuqueyano, mariyata nata quiniaa nujuqueyanojuhuaj, Jesuuri nojori taraajetaree. <sup>34</sup> Jesuuri pueya nequesotaree:

—¿Tee na niasaarucuaani?

Pueyari Jesu sequeree:

—Miji, Jiyaniijianaa. Quia niquiquii. Niya niasaarucuaano.

<sup>35</sup> Jesuuri nujuqese. <sup>36</sup> Tii quiniaa Judiocuaca niquishacari Jesu nujuqueyano, tama sequetooreejaarijia:

—¡Nia niquiri! Jiyanoehua Lázaro panijiaquiiri.

<sup>37</sup> Noojiaqueya cuno pojorijiniinioori sequeriquiaajuhujaj:

—Jesu jaara cariojuaru namijia jeecacanucuaa, maara Lázaro naataniquianujuhujaj maja na shaajenura.

*Jesu samiitianishacari Lázaro*

<sup>38</sup> Jesuuri jiyanoehua na taraajenuta raa jiyajiria catecanoquiaari, canaajuhujaj. Raari puereetuca saajiaa mishiquiosano quiriquiaa. <sup>39</sup> Jesuuri pueya sequeree:

—¡Saajia nia ruutiniri tamocora!

Martaari Jesu sequeree:

—¡Jiyaniijianaa, cuatro juuca tari na shoconujiya! ¡Tari mocuaatia jaaniuya naasucua!

<sup>40</sup> Jesuuri Marta sequeree:

—Janiyacuaja tari quia sequereeni, quiaa jaara cua sequesanoocua tiuuri, quiaari Pueyaso cumaacata cua miishano niquiniutianiya.

<sup>41</sup> Jiyacaritij, pueyari saajia ruutinirii tamocora. Jesuuri jiyocuacaanu mauree. Naa Pueyaso sequereeri:

—Cua Quenaa, quia timitiaanijia. Quiaari tari cua sequesano tojiriucuaacuaja.

<sup>42</sup> Janiyari niishiyani quiaari pueyaracaanu cua tojiquiaa. Janiyari naa quia sequereeni, niya quiniaa pueya niishiniuria quiaari mijiria cua jiyaroquiaari.

<sup>43</sup> Naa Jesu sequenu nuhujitij, jiyanoehua na rupaa paaretareeri. Naa sequereeri:

—¡Lázaronaa, quia tohuatama!

<sup>44</sup> Macuuri tariucua saminio tohuatamaa. Na juaashiquiaca, na niouacaari jiunio-cosano quiriquiaajaa. Na nacaari puetunu na jiquiocotajanaa mishiquiosano quiriquiaajuhujaj, toquerauta morosano. Jesuuri pueya sequeree:

—Nia saacatare, cuaara rucuaneeera.

*Judiocuaca camarucua roojotoosacari na monura Jesu*

(Mt 26.1-5; Mr 14.1-2; Lc 22.1-2)

<sup>45</sup> Naa Jesu samiitianishacari Lázarotej, queraatia narta Judiocuacaari nocua tiuuquiaari, noo pojori canapueete Mariacua nijioquiaari na cumanijianuracuajani. <sup>46</sup> Noojiaqueya cuno Judiocuacajiniinioori Fariseocuacaacua quiojoquiaari nojori pohuatanura Jesu miishano. <sup>47</sup> Naaratej, Fariseocuaca, pueyacuara secojonaa jiyaniijianucuanio, nojoriiri rerejoquiaari puetunu Judiocuaca camarucuatajanaa. Nojoriiri sequetuquiaari:

—¿Taa pa miiniutianiyani? Cuno pueyanoori queraatia casaa miiquiaa na cumaacata pueya niquiara. <sup>48</sup> Paa jaara nareja na shanacure naa na miiniuriatej, ¡puetunu pueyajanaari na pueyara quiniutianiya, nocua nojori tiushacari! Nojoriiri na jiyaniijiaara socua na jiyatenutaniya. Naaratej, pa jiitianaa Romano pueyari pocua nijionutaniya Pueyaso Secojoua tia nojori niyatanura, pa pueya na pueconurajuhujaj.

<sup>49</sup> Caifásri tii quiriquiaajuhujaj. Nojuajaari canaa pueyacuara secojonaa jiyaniijiajanaa quiriquiaa cuno marijia. Jiyacaritij, nojuajaari narta camarucua sequeree:

—¡Niaaquiiri niishiyashijiaa seetanujuanaa! <sup>50</sup> ¿Majateeri nia niishiniu? Maninia cutaraari niquiriyatu pueyano cusonura pa niti, maja najuhuaana puetunu pa pueyajanaa puecoosanura.

<sup>51</sup> Caifás sequesanoori maja tama na sequesanojuaja quiquiaari. Pueyacuara secojonaa jiyaniijiajanaa na quishacari, Pueyasoori naa na pohuaterree taa Jesu cusonutaniya puetunu Judiocuacaacuarajanaani. <sup>52</sup> Seetanujuanaari. Jesuuri maja cusoriquiano quiquiaari saaja Judiocuacaacuara. Nojuajaari cusoriquiano quiquiaari puetunu tariucua Pueyaso saquiriojosano pueyapuecuarajanaajuhujaj, tee tiqiyocua niyaquejonu na muerasurano quiyacuajani. Nojuajaari cusoriquiano puetunu cuno pojorijianaa na rerejotenura, jatiqui na quitiuniuria juhua niquiriyatu maanu. <sup>53</sup> Naacuajitij, cuno juucajinijij, cuno Judiocuaca camarucuaari roojotooriquiaa taa nojori monutaniya Jesuni.

<sup>54</sup> Nocuaji, Jesuuri maja tari na rucuanejonu quijia narta Judiocuaca niquiara. Cunora tamaquiria canaa jiyataquiaariiri. Canaari nata quishii cariiquia jiya shuriucua tamonu tiacajiniani. Cuno tiaca sesa quiquiaari Efraín.

<sup>55</sup> Jaara quera quiquiaari tari canaa queranacusacari Pascua juucara, queraatia pueyari quiojoriquiaa Jerusalén tiacajiniara tama na tiacajiniijiaaja. Nojoriiri quiojoquiaari juhuacarijia nojori jeenucuanura na cuaqueya nojori puecoosacari tama na seyajaaja nojoriucua. Nojoriiri naa miiquiaari jiyanooshano nojori quiniuria Pueyaso niquiara,

taa supuetana Moisés rootaquiaaricujani. Nojoriiri naa miiquiaari juhuajaniya nojori queranacunura Pueyaso niquiaara Pascua juuca. <sup>56</sup> Pueyari tii Jesu pajenuiriquiaa. Pueyaso Secojoua tiajinia nojori quishacari, nojoriiri tama nequesoreetooriquiaajaaja: —¿Taa nia sequeyani? ¿Pa queranacunujinia niniutianiyatenojotij, maja soj? <sup>57</sup> Pueyacuara secojonaa jiyaniijianucua, Fariseocuacanio, nojoriiri tari pueya rootaquiaari, tamonu pueyano jaara niishiri tee Jesu quiyani, cuaara nojori numooteera nojori quietenura Jesu.

## 12

*María totasacari na shanohua jaanutaja Jesuucua*  
(Mt 26.6-13; Mr 14.3-9)

<sup>1</sup> Seis juuca jaara cureeriquiaajaa Pascua juucara, canaari jiyacari Jesuta Betania tia-cajinia quiaareeni, Lázaro quijia tiacajinia, teyano Jesu samiitiani quiaaricujani. <sup>2</sup> Cuno tiacajiniño Jesu rupuenaa pueya timitiasacari Jesu, nojoriiri sumatunuquiaari nojori miaquenuunura cuno niucua Jesuta. Martaari miaquesano patootariquiaa pueyara. Lázaroori Jesuta miaquenuiriquiaa narta masusano pueyata, canaatanio. <sup>3</sup> Jiyacarijij, Mariari Jesuucua pataree na shanohua jaanutaja. Cunoori “nardo” jiyaniishano natau-jiniji shipinishano quiquiaari. Jiyanohua queraatia cumaneecata masesano. Puereetuca moti quio cajiniocua puecariquiaari cuno shanohua jaanutaja. Mariari Jesu niohuacaacua na totaree. Na nuhuaji, na sacuanijiarohua na muecacataari. Puetunu tiacojuanaari shanohua jaanuriquiaa. <sup>4</sup> Naa María miishacarijij, niquiriyatu canaajiniño Jesu saquiri-ojosano pueyanoori juaari. Nojuajaari Judas Iscariote quiri quiaa, na nuhuaji Jesu quietequiaari na paraani. Nojuajaari naa sequere:

<sup>5</sup> —¿Casaara cuno shanohua jaanutaja niqutioyaquishaaree queraatia cumaneecarani, casamijiuniucua pueya niqutiojosocoriquianoni? ¡Jaara masenu panishaare, maara niqutiosaare juhua niquiriyatu marijara pueyano poonijionu sami!

<sup>6</sup> Naa Judas sequesacarijij, majaari seetanujuanaa na taraajenu quiri quiaa casamijiuni-ucua pueyacuara. Naa sequereeri saaja cumaneecaacua jiaatiaja na quiniucua, nohuase-jojua na quishacari. Judasri cumaneeca quiquio cojuatana quijia puetunu canaarajanaa. Naacuajitij, nojuajaari tiji nohuasejojua, pueya niqutiojosanojiniji canaara. <sup>7</sup> Jesuuri saaja Judas sequere:

—Nareja quia niquiri. Nojuajaari nio shanohua jaanutaja cojuataja pueyaracaanu, juhuacarijia na jeenucuatajara cua cuaqueya, pueya niaaquishacarijia janiya raajinia, janiya jaara mosaareni. <sup>8</sup> Casamijiuniucua pueyari pueyaracaanu niaata quiri quiano cutara. Saniniuujia, janiyari maja pueyaracaanu niaata quiri quianoni.

*Pueyacuara secojonaa jiyaniijianucua roojotoosacari Lázaroocuaara*

<sup>9</sup> Queraatia canaa Judiocuacaari niishi quiaari Jesu Betania tiacajinia quiri quiaa. Cunora, nojoriiri nocua quiojo quiaari na niquniucua, Lázaro niquniucua juhuaj, teyano Jesu samiitiani quiaaricujani. <sup>10-11</sup> Jesu samiitiani niucua Lázaro, queraatia canaa Judiocuacaari Jesuucua tiu quiaari, na pueya nojori quiniuria. Cunora, canaa puey-acuara secojonaa jiyaniijianucuaari roojotoo quiaari Lázaro na motunurajuhua.

*Juhua jiyaniijijanaa Jesu tiu quishacari Jerusalén tiacajinia*  
(Mt 21.1-11; Mr 11.1-11; Lc 19.28-40)

<sup>12</sup> Cuno queraatia pueya, tari Jerusalén tiacajinia quiri quiaa Pascua juucara quer- anacunurani, nojoriiri niishi quiaari Jesu tariqui tiu quiniutianiyajuhua. <sup>13</sup> Nocuaji, no- joriiri tucuru piyotaree. Na nuhuaji, nijiyareeri Jesu naacunuucua, na tucuru shiiniotan- uriquiaari. Naa nacooriquiaajariuhua nojori shuquiritiasacari Jesu:

—¡Pocuaji Tacuna! ¡Pocuaji Tacuna! ¡Cuaara shuquiriaatia quiiria pa Jiyaniijia, teyano Pueyaso jiyaro quiaari pocuacuajani! ¡Nojuacuajaari Israel pueya jiyaniijijanaa!

<sup>14</sup> Jesu quiiri jiyacari burro ni quiojua riuriatamaa. Tari na nijinia cajiriquiaari, taa tariucua cananu Pueyaso Rupaajinia naajiotasano quiyacuajani. <sup>15</sup> Naa sequeyari: “¡Sión tuhananuucua quinia pueyanaa, maja puerenu! ¡Nia niquiri! ¡Nia jiyaniijia cumaji nia niaacua! ¡Burro ni quiojua nijinia cajiyari!”

<sup>16</sup> Jiyacarijij, majaari canaa niishini quiri quiaa naa canaa tiu quishacari canaa jiyaniijia Jesutej, canaari nio tariucua cananu Pueyaso Rupaajinia naajiotasano tohua- teeriquiaani. Pueyaso jaara Jesu samiitiani quiaariuhua, canaari jiyacari shusha ni- ishiquiaarini cuno naajiotasano quiiri Jesujiniji quiquiaari.

<sup>17</sup> Cuno pueya, Jesu samiitianishacari Lázaro ni quiquiaarini, nojoriiri pueya pohu- atari quiaa taa Jesu jiquio quiaari Lázaro na raacoji na tohuatanurani. <sup>18</sup> Queraatia pueya niishishacari naa Jesu miishano na cumaacatatej, nojoriiri Jesu naacunuucua nijiyaree. <sup>19</sup> Nocuaji, Fariseocuacaari tama sequetooriquiaajaaja:

—¡Canaacuajaari cunora nia sequequiaani pa morejanaa! ¿Niaate na niquiya? ¡Puetunu pueyajanaari cuno pueyanoocua pacuree, na pueya nojori quiniuria!

*Grecia jiyajinijinio taucuaca pocoojonu panishacari Jesuta*

<sup>20</sup> Grecia jiyajinijinio taucuacaari Jerusalén tiacajiniara nijioquiaarijuhuaj Pueyaso niquiara nojori queranacunuunura Pascuara. <sup>21</sup> Cuno pojoriiri canaa cojinia Felipeecua catecanoquiaari. Felipeeri Betsaida tiacajinijinio quiquiaari. Cunoori Galilea jiyajinia tiaca. Cuno Griegohuari Felipe sequeturee:

—Pueyanonaa, canaa quia Jiyaniijia Jesuta pocoojonu paniyani.

<sup>22</sup> Jiyacaritij, Felipeeri Andrés sequesee cuno pojori sequesano nojuaja. Na nuhuaji, Andrésri Felipeeta quiaaree Jesuucua. Nojoriiri Jesu pohuatasejuhuaj. <sup>23</sup> Jesuuri naa nojori riucaaree:

—Quiarijiani, tama janiyajaarijia mosaanutaniya pueya nitini. <sup>24</sup> Seetanujuanaa nia sequeyanijia, sohuajajau jaara raama jataaquishaare, pueyaracaanu niquijijajau quiniutianiyari. Saniniuujia, jaara natasaare juhua na moquenura, saaja moritianutaniyari queraatia na muetunura. <sup>25</sup> Naajuhuj, cante tama na cuaqueyajaaja panijia puerani, nojuajaari puetunu shaajenutaniyajanaa. Saniniuujia, cante tama na cuaqueyajaaja panitijaa na tojniuria janiya mijiriani, nojuajaari pueyaracaanu shuquiriaatia rishijiaa jiyatesaanutaniya. <sup>26</sup> Cante quiria poonijionu paniyani, cuara seetanujuanaa cua tojjijia quiriia. Tee cua quiniutianiyacuaani, cua tojtijajacaari tii quiniutianiyajuhuj. Cua Queeri cua tojjijiaa timitianutaniya. ¡jyanohua maninia nojori miiniutianiyajaarijuhuaj!

*Jesu pohuatasacari nojuaja mosaanutaniya*

<sup>27</sup> Quiarijiani, janiyari jyanohua tacayani. ¿Casaa cua sequeyarini? ¿Janiyate sequeya soj: “Cua Quenaa, maja naquiya cua miitiniu”? Maja. Maja naa cua sequenu quiniutianiya. Janiyacuajaari cunora niquiaraa mijiriani. <sup>28</sup> ¡Cua Quenaa, janiya cuara miishiiriaqui taa quia paniyacuajani, pueya niishiniuria quiaari jyanohua maninia!

Jiyacaritij, Pueyasoori tojishaaree pocuaano jiyocuacaanuji. Naa Neyanu sequereeri:

—Janiyacuajaari naa niishitirii pueyani, pueyaracaanu quia miishacari cua panishano. Janiyari socua pacutenutaniuhua pueya niishitiniuni, quiaa jaara nojoriicuaa mosaare.

<sup>29</sup> Cuno pueya, canaata tii quiriquiaa Jesutani, nojori tojishacari Pueyaso pocuaano, nojoriiri sequeturee:

—¡Miacanacuaja cuno tojishaareeni!

Tamasacaari saniniuujia sequereecujua:

—¡Pueyaso serucuaja nocua pocuareeno!

<sup>30</sup> Saniniuujia, Jesuuri canaa sequeree:

—Cuno rupaa niaa na tojiriini, majaari quiria na quiniu quiriquiaa. Cunoori nia tojishocoriquiano quiriquiaa, nia niishiniuria cua Queeri cua tojiquiaa cua secojosacari nojuaja. <sup>31</sup> Quiarijiani, mijiria quiniaa miishacari naquiya janiya, nojoriiri saniniuujia sanitiosocoriquiano jiyatesaaree tari. Naajuhuj, mijiria jiyaniijia Sesaacaari jataसानutaniyajuhuj, maja cumaacaraca na quiniuria socua. <sup>32</sup> Janiya jaara nujuaretasaareni, janiyari puetunu pueyapuejanaa nijiotenutaniya cucuani. Nojoriiri juhua jaatiasaanutaniya cucua, cucua nojori tuuniuria, nojori ruuretanura janiya soj.

<sup>33</sup> Naa Jesu sequesacaritij, canaa niishitiriiri taa pueya monutaniya nojuajani. <sup>34</sup> Tii quiniaa pueyari na riucaaree:

—Canaacuajaari tariucuacaanu Pueyaso Rupaajiniji niishiyani, Pueyaso Jiyaroscocoriquiano Cristoori pueyaracaanu rishiriquiano cutara. Quiajanijarijijataj, ¿casara quia sequeyariniijia, Pueyaso Jiyarosanoori nujuaretasaanutaniya tii na cusonura? ¿Canteeri cuno pueyanoni, quiaa na sequeya Pueyaso Jiyarosanoni?

<sup>35</sup> Jesuuri nojori sequere saaja:

—Janiya, nioojia cuhuatanani, janiyari niaata quiniutianiyajaara rupaquijiani. Nocua nia tuuri juhuacarijia, ninishiqui quiaquishacarijia. Cante ninishiqui rucuanajojuani, nojuajaari maja na niishiniu tee na quiaani. <sup>36</sup> Nioojia cuhuatanaaca nia tuuri, niaata cua quishacarijia, seetanujuanaa cuhuashiqui quijiaca nia quiniuria.

Naa Jesu sequenu nuhuaji cuno pojoritij, quiacuhuari. Nojoriicujaji jamaashiiri.

*Judiocuaca tiuyaquishacari Jesuucua*

<sup>37</sup> Jesuuri jyanohua queraatia jiyajeneta na cumaacata miishano miiquiaari pueya niquiara. Nojoriiri saaja nocua tiuyaquiquiaari. <sup>38</sup> Naacuajitij, tariucuacaanu Pueyaso sequenu panishano caminiujunia Isaías pohuatasanoori tohuateequiaari, nojuaja jaara naa sequequiaari:

"Jiyaniijiana, ¿cante canaa pahuatasanoocua tiuuriini, canaa pahuatasacari quia Jiyarosocoriquianojinijini? ¡Shaaqui! ¿Cante niishiriijaaniuhua, jiyajeneta casaa nojori niquishanoori seetanujuanaa quia cumaacata miishano quiriquiaa? ¡Shaaqui!"  
<sup>39</sup> Naacuajitij, majaari nojori naata tiuuniu quiquiaari Jesuucua. Isafasri naa naajio-taquiaarijuhuaj:

<sup>40</sup> "Pueyasoori nojori jiyateree juhua nimishitiuria, maja nojori niquiniuria na namijiata. Nojori niishitiaja cushitireejaariuhua, maja nojori niishiniuria nojori jiuujia. Naa nojori miiriiri maja nojori tacatonura nojori jiuujia, cua jiyanooniuria nojori, quiarinio pueyara cua jataniyaquiniuria nojorijiuhuaj".

<sup>41</sup> Supuetana Isafasri naa caminiujuquiaari Pueyaso niishitishano nojuajatej, Jesu na niquiniuucua na shacantuca cumaacajinia quiyano. Naa na pahuatasacariitij, nojuajaari juhuacarijia Jesujiniji pohuatariquiaa.

<sup>42</sup> Naajaa, queraatia narta Judiocuacaari Jesuucua tiuquiaari. Queraatia canaa jiyani-ijanucuaari nocua tiuquiaarijuhuaj. Cuno jiyaniijanucuaari maja na pohuatanu quijia pueya niquiara, Jesuucua tiuujiaa nojori quishacari. Nojoriiri na pohuataaquijia, Fariseocuaca na pueretusacari, Fariseocuaca mariqui nojori tenujireeri maja socua nojori tiuquitianura Pueyaso secojojua tiacajinia. <sup>43</sup> Nojoriiri saaja narta pueya shuquiri-tiasano pueya quiniu panijia, maja Pueyaso shuquiritiasano cutara.

*Pueya tojittaaquiniuucua Jesu sequesano, nojoriiri saniitiosaariquiano*

<sup>44</sup> Jesuuri jyanohua na rupaa paaretaree. Naa sequereeri:

—¡Cante cucua tiuuriini, majaari saaja na tiuuniu cucua! ¡Cua Queecua tiuuriijaari-uhua, cante cua jiyaroquiaaricujani! <sup>45</sup> ¡Cante cua niquiriini, nojuajaari cua Jiyarona niquiriijiuhuaj! <sup>46</sup> Janiyari mijiria niquiaarini cua cuhuatanura niajanija. Naacuajitij, cante cucua tiuuriini, majaari tari na quiniu ninishiqui. <sup>47</sup> Pueyano jaara cua rupaa tojiriquia najuhuanaj, janiyajanaari maja nocuara cua saquiriojotanu quiniutianiya na saniitiosaanura. Majaari cua ninu quiquiaari mijiria, pueya cua saniitionura. Janiya cutaraari niquiaarini nojoriicujajia cua tacunura. <sup>48</sup> Cante cua ruuretaja saajani, cua sequesano tojijaquiyariuhua, nojuajaari tari nocuara saquiriojotana jittaa na saniitiosaa-nura. Nojoriria cua sequesano cutaraari tama nojoriicua saquiriojotariquianojuaja nio jiya puequesacari. <sup>49</sup> Cua pahuatasanoori maja tama cua niishishanojuaja. Cua Jiyarona cua Quecuajaari cua niishitiquiaa casaa cua sequenutaniyani, mariyata casaa cua niishitiojonutaniyani. <sup>50</sup> Janiyari niishiyani cante cua Que rupaa tojijiani, nojuajaari pueyaracaanu quijia quiniutianiya cutara. Naaratej, janiyari seetanujuanaa saaja na sequesano caminiujuquiaani, taa na niishitiquiaa janiyacujani.

## 13

*Jesu jeequejosacari na saquiriojosano pueya niohuaca*

<sup>1</sup> Jesuuri canaa na saquiriojosano pueyata rerejoquiaari Pascuaacuara juucajinia. Jesuuri jiyacari niishiquiaari tari quiquiaariiri quera na tiujiasacari canaa mijiria, na Queecua na tacanuhua. Nojuajaari canaa paniriquiaajaa, taa canaa na paniquiaari pueyaracaanucujani, mijiria na quishacari canaata.

<sup>2</sup> Cuno niucujaja, Jesuuri canaa na saquiriojosano pueyata miaqueriquiaa. Sesaa-caari tari Judas Iscariote niishitirii noojiajinia, nojuaja cuara Jesu quiateera na paraa, na mosaanura. Cuno Judasri tamonu Simón jyanishano pueyano niyanu quiquiaari. <sup>3</sup> Jesuuri niishijia nojuaja seetanujuanaa Pueyasojiniji niquiaari. Naajuhua, nojuajaari niishiquiaari, na Que Pueyasoori na jiyatequiaari Jiyaniijiarajanaa, puetunu casaa jiti-tianajanaa na quiniuria. Niishiriquiaajaariuhua nojuajaari quera na Queecua tacanu-taniuhua. <sup>4</sup> Jiyaniijiajanaa na quishacari, naajaa, nojuajaari miaquejajiniji sanequiaari. Na tucaque toque jocuareeri. Na nuhuaji na cajiniocua camarucuteree cuaqueya tu-ujutajaari. <sup>5</sup> Na nuhuaji, mohuaca shuuri tohuatashijiniiaari. Canaa niohuaca jeeque-joriquiaari juhua tiaco seru. Na nuhuaji, na sacuanijiariquiaajaariuhua na cajiniocua na camarucutesano cuaqueya tuujutajata.

<sup>6</sup> Na jeequenu panishacari Simón Pedro niohuaca, Pedroori saaja Jesu sequereeri:

—Jiyaniijiana, ¿taa quia miyani? ¿Quiaateeri cua niohuaca jeequenutaniya?

<sup>7</sup> Jesuuri Pedro riucaaree:

—Quiarijiani, majaari quia niishiniu casaara naa cua miyani. Naajaa, quiaacuaja na nuhuaji niishiniutianiya.

<sup>8</sup> Pedroori Jesu sequereeri:

—¡Cua Jiyaniijiana, janiya cutaraari maja quenaaja cua shanacunu quiniutianiya cucua quiajanija, cua niohuaca quia jeequenura!

Jesuuri na riucaaree:



–Janiya jaara quia niohuaca jeequejiyaquirini, majaari cua pueyano quia quiniu quiniutianiya.

<sup>9</sup> Simón Pedroori na sequeree:

–Jaara naa quiritij Jiyaniijianaa, maja saaja cua niohuaca jeequenuecuarajaj! ¡Quia jeequerejuhua cua juaashiquiaca, cua nacanio!

<sup>10</sup> Jesuuri na sequeree:

–Cante shusha nanajani, saaja na niohuacaari jeequeshiya cutara. Na cuaqueyacuajaari tariucua jeequesano quiya. Puetunu nijaniyajanaari tari jeequejosano quiyacuaaja. Saa niquiriyatujuaari jeequesoo quiya saniniuuja.

<sup>11</sup> Jesuuri tari niishiquiaari cante na quietanutianiya na paraani. Nocuaji sequeriquiaari: “Niquiriyatu pueyanoori jeequesoo quiya cutara”.

<sup>12</sup> Canaa niohuaca na jeequejonu nuhuaji, Jesuuri na toque cushiriohua. Miaquejajinia cajiriohuari. Canaa nequesotareeri:

–¿Niaate niishiya casaara naa cua jeequejoree nia niohuacani? <sup>13</sup> Niaacuajaari cua sequequiaa “Niishitiojonata”, nia “Jiyaniijiatanio”. Seetanujuanaa nojuacuajaniija, taa nia jiyaniquiquiaa janiyacuaajani. <sup>14</sup> Naaratej, janiya jaara jeequejoree nia niohuacacuaani, nia Jiyaniija cua quishacari, nia Niishitiojonajuhuaaj, naa nia miiriquia niarta Pueyaso muerasujuhuaaj. <sup>15</sup> Janiyari naa miiriini, cua niishitiojonura nijaniya, naa nia miitioonurajuhuaaj taa cua miirii nijaniyacuaani. <sup>16</sup> Seetanujuanaa nia sequeyanija, seruuri maja socua tojishano quijia na camarnujiniji. Naajuhuaaj, jiyarosano pueyanoori maja socua tojishano quijia na jiyaronajiniji. <sup>17</sup> Naa jaara cua rootasano niishiri, niaari shuquiriaatia quijiaa quiniutianiya niaa jaara na tojjijiaa quiri.

<sup>18</sup> Shusha cua sequesano nijaniyani, cunoori maja puetunu nijaniyaranojuanaa. Janiyacuajaari niishiyani canapue cua saquiriojoquiaarini, taamueca pueyate nijaniyani. Naacuajitij, tariucuaaanu Pueyaso Rupaajinia janiyajiniji naajiotasanoori tohuateenutianiya. Naa sequeyari:

“Tama cuata miaquenajaariija cua paracara quiri”.

<sup>19</sup> Janiyari juhuacarijia nia toyani. Naacuajitij, cua pohuatasano jaara tohuateere, niaari niishiniutianiya janiyari seetanujuanaa Pueyaso Niyanuni. <sup>20</sup> Seetanujuanaa nia sequeyanija, cante cua jiyaramiquishano pueya tojjiani, nojuajaari cua tojjijuhuaaj. Cante cua tojjijara quiriini, nojuajaari cua Jiyarona tojjijara quiriijihuaaj.

*Jesu pohuatasacari, Judascuajaari na paraa na quieteriquiano*

*(Mt 26.20-25; Mr 14.17-21; Lc 22.21-23)*

<sup>21</sup> Naa Jesu sequenu nuhuaji canaatej, jiyanoehua na taraajenuta naa canaa sequereeri:

–Seetanujuanaa nia sequeyanija, niquiriyatu nijaniyajinijinoori cua paraa cua quietanutianiya.

<sup>22</sup> Canaari jiyacari tama niqitiooreejaanija. Majaari canaa niishiniu quiriquiaa canajiniji naa Jesu sequeriquiaani. <sup>23</sup> Jiyacaritij, janiyari na shuriucuaji cajiriquiaa miaquenuujajiniani, na panishano pueyano cua quiniucua. <sup>24</sup> Naaratej, Simón Pedroori cua mashiniquirii sanaa cua nequesotanura Jesu, canajiniji naa na sequereeni. <sup>25</sup> Naarate janiyari Jesuucua tatereeni, jiyasohuaaja cua nequesotanura nojuaja. Janiyari naa na sasacareeni:

–Jiyaniijianaa, ¿canteeri naa quia miiniutianiyani?

<sup>26</sup> Jesuuri cua riucuaaree:

–Janiyari pan rau piquiojonutianiya caacajiniani. Cana cua niqitiojonutianiyani, nojuajaari cuno.

Jesuuri jiyacari pan rau piquiojoree. Judas Iscariote na niqitioereeri. Nojuajaari tamonu Simón jiyaniishano niyanu. <sup>27</sup> Judas masesacari cuno pan rau, Satanásri noojiajinia tiuquiquii. Jesuuri jiyacari Judas sequeree:

–Cuno, quiaa na niishiriojiya miiniuni, quiocua ritia miirinioj.

<sup>28</sup> Canaa na saquiriojosano pueya nata miaquenuuriquiaani, majaari quenaaja canaa niishiniu quiriquiaa casaara naa Jesu sequeree Judasni. <sup>29</sup> Judasri canaa cumaneeca cojutana quijia. Naaratej, noojiaqueya canaajinijinoori jiyaniriquiaani Jesu naasucua na jiyaroriquiaa socua casaa na masenura canaa queranacunuutajara, casamijuniucua na niqitiojonura cumaneeca soj. <sup>30</sup> Judas jaara masequiaari Jesu niqitiosano pan, jiyacari tohuataqueeri. Tariucua niucuaari quiriquiaa.

*Jesu rootasano quiarinio*

<sup>31</sup> Judas tohuatanu nuhuaji, Jesuuri canaa sequeree:

–Quiarijia cua miishanojiniji, janiyari maniniuhuaqueetasanutianiya. Pueyasoori jiyanoehua maniniuhuaqueetasanutaniyajuhuaaj, naa cua miishanojiniji. <sup>32</sup> Pueyaso

jaara maniniuhuaqueetasaare naa maninia cua miiniuucuatej, nojuajaari cua jiyatenu-taniya cumaacaraca quijia cua quiniuria na shuriucua. Quera naa cua miiniutiani-yari. <sup>33</sup> Quiquiohuaniyojuanaa, janiya rupaquijia niaata quiniutianiyajaarani. Taa cua sequecanu parta Judiocuacuaani, janiyari naa nia sequeyajaaniuhuj. Niaari cua pajenuunutaniya juucua. Majaari nia naata quianu quiniutianiya cucua, tee cua quianu-taniyacuaani. <sup>34</sup> Quiarijia nia niishitiriiria nio quiarinio rootasano. Nia tojiri. ¡Panitiojuaca nia quiri! Naatej, taa cua paniquiaacuaa nijaniyani, naa nia panitioorejuhuaj. <sup>35</sup> Niaa jaara naa panitioojuaca quiri, puetunu Pueyaso niishiyashijica pueyajanaari naacujaji niishiniutianiya, niaari cua tojitiajaca pueya.

*Jesu pohuatasacari Pedro nocuaji seetanutaniya*

*(Mt 26.31-35; Mr 14.27-31; Lc 22.31-34)*

<sup>36</sup> Simón Pedroori jiyacari Jesu nequesotaree:

—Jiyaniijianaa, ¿tee quia quianutaniyani?

Jesuuri na riucaree:

—Tee cua quianutaniyacuaani, majaari quia naata nuhuajiniu janiya. Naajaa, quiaari na nuhuaji quiariquiano.

<sup>37</sup> Pedroori na sequeree:

—Jiyaniijianaa, ¿casaara quia sequeyarini, quiarijia cutara maja cua naata quianu quiata? Jiyacuaja tama cua cuaqueyajaaja tarinijiotaaree quiocuarani.

<sup>38</sup> Jesuuri na riucaree:

—¿Naatee? ¿Quiaate tama quia cuaqueyajaaja tarinijiotaaree cucuara? Janiyari seetanujuanaa quia sequeyani: juhuaquenu panishacari caacaraja niunijiyaquishacarijia, quiaari jiyacari cucuaji seetanu pacutejonutaniya tari.

## 14

*Jesuuri juhua nuu Pueyasooocua*

<sup>1</sup> Jesuuri naa canaa sequeree socua:

—Maja nia tacaani, pueyanaa. Nioojia nia cajitiri. Saaja Pueyasooocua nia tiuuri. Cucua nia tiuurijuhuj. <sup>2</sup> Cua Que tiaari puereetuca. Queraatia quiquioori tii quiya. Cunora, janiyari coteenu nia puetanutaniyani, niaacuaji cua jeenucuanura nia quijia. Jaara naa quiaquiritij, janiya maara nia sequeyaquirini janiya nia puetanutaniyani, niaacuaji cua jeenucuanura. <sup>3</sup> Cua jeenucuanu nuhuaji nia quiquiora, janiyari niaacua tacatenutaniuhuan, cua rijionuhuaa nijaniya, cuata nia quiniurijahuaj tee cua quiniutianiyacuani. <sup>4</sup> Niaacuajaari cua quiquiojiniara neteja nuu niishiya, tee cua quianutaniyacuaani.

<sup>5</sup> Tomásri Jesu sequeree:

—Jiyaniijianaa, ¡maja canaa niishiniu quenaaja tee quia quiaani! ¿Canaatucua taa cunu nuu niishirini, quiaa na sequeyani?

<sup>6</sup> Jesuuri na riucaree:

—Janiyacujaari cunu nuuni, Pueyasooocua nia quianura. Janiyacuajaari seetanujuanaa Pueyaso Rupaani. Janiyari pueya samitianijajuhuj. Majaari pueya naata Pueyaso rupuenu tamajaaja. Saaja janiya cutaraari pueya rupueteja Pueyasoni, nojori tiuushacari cucua. <sup>7</sup> Niaa jaara seetanujuanaa cua niishiqaaricuaa, niaa maara cua Que niishirijihuj. Seetanujuanaa, niaari tari na niishiyacuaja. Niaari na niquiquiaajuhuj.

<sup>8</sup> Felipeeri na sequeree:

—Jiyaniijianaa, quiaa jaara canaa niqutiri quia Que Pueyaso, canaacua panaatia quiri-ohuani.

<sup>9</sup> Jesuuri Felipe riucaree:

—Felipenaa, janiyacujaruhua pueyaracaanu niaata quiquiaa juucuan. ¿Majateeri juhuanujuaja quia niishiniu janiya? Cante cua niquiquiaani, cua Que niquiquiaajaariuhuj. ¿Casaara quia sequeya cua niqutiniuria cua Que nijaniyarini? <sup>10</sup> ¿Majateeri quia tiuuniu cucua cua sequesacari quiajaniya, janiyari cua Que jiuujajinia quiyani, cua Queeri saniniuujia coojajinia quiyacujua? Canaari maja rimiajatani. Nio, cua sequesano nijaniyani, cunoori maja tama cua niishishanojuaja. Cua Que, coojajinia quiyani, nojuajaari na panishano miitiquiaa janiya. <sup>11</sup> Cucua nia tiuuri cua sequesacari nijaniya, janiyari cua Que jiuujajinia quiyani, cua Queeri saniniuujia coojajinia quiyacujua. Niaa jaara cua sequesanoocua tiuuniu paniaquiri, cucua nia tiuuriqui na cumaacata cua miiniuucua nia niqiara. <sup>12</sup> Seetanujuanaa nia sequeyanijia, cante cucua tiuujiani, nojuajaari puetunu cua miishanojuanaa miiniutianiyajuhuj. Cua tacasariuhua cua Que shuriucua cua quiniuhuaa, cucua tiuujiaari cua cumaacata seetanujuanaa socua jiyajeneta casaa miiniutianiya cua miishanojiniji. <sup>13</sup> Seetanujuanaa nioojajinia cua

quishacari, janiyari niaara miiniutianiyani puetunu nia masesanojuanaa nia secojosacari cua Que. Naacujitij, pueyari cua Que timitianutaniya, nojori niishishacari cua Queeri jiyano hua maninia mijia. <sup>14</sup> Nioojia rupueetosacari coojata, janiyari puetunu nia masesanojuanaa miiniutianiya niaarani.

*Jesu sequesacari, nojuaja Pueyaso Sohuanu jiyaronutaniya mijiria*

<sup>15</sup> Naa jaara seetanujuanaa cua panijiaa quiri, niaari cua rootasano tojtiaajaca quiniutianiya. <sup>16</sup> Naajuhuj janiyari cua Que secojonutaniyani, niaacua na jiyaronura tamonu cua niti mijiria, nia cumaquiriquiano. Nojuajaari pueyaracaanu niaata quiri quiano. <sup>17</sup> Nojuajaari Pueyaso Sohuanu, seetanu rupaa jitianajanaa. Pueyaso tojiyashijiaa pueyari maja na naata cuno Sohuanu na jitianu, nojori niquiyaquiniuucua nojuaja, na niishitiyaquiniuucua nojuajuhuj. Naa cutaraari na niishijiaa. Nojuajaari niaata quiyacuaaja. ¡Pueyaracaanu nioojiajinia quiri quiano jaariuhuj!

<sup>18</sup> Majaari seetanujuanaa cua tiujianu quiniutianiya niajanija juhua japueyojuaca nia quiniuria. Janiyacuajaari tacatenutaniuhuanu niaata cua quiniuhua. <sup>19</sup> Pueyaso tojtiaashijiaa pueyari quiri naataja cua niquiyaquiniutianiya socua. Naa cutaraari cua niquiija quiniutianiya. Samiitianiujua cua quiniuucua, niaari pueyaracaanu quijiaa quiniutianiyajuhuj. <sup>20</sup> Jiyacaritij, niaari niishiniutianiya janiyari cua Que jiuujia rupuejani, niaari coojia rupuejajuhuj. Janiyari saniniuujia nioojiajinia quijiani. <sup>21</sup> Cante cua rootasano niishijiani, nojuaja jaara na tojijia quiriuhuj, nojuajaari cua panijia cutara. Cante cua panijiani, cua Queeri na panijia quiniutianiyajuhuj. Janiyari na panijia quiniutianiyajuhuj. Janiyari cua panijiaacua niniutianiyani, seetanujuanaa na niishiniuria janiyari nata quiyani.

<sup>22</sup> Canaa cojinia Judasni, nooj, Judas Iscariote sesaanucuatej, nojuajaari Jesu nequesotaree:

–Jiyaniijanaa, ¿casaara saaja canaacua quia niniutianiyarini, maja puetunu mijiria quiniaa pueyacujanaa?

<sup>23</sup> Jesuuri na riucaare:

–Cante cua panijiani, cua rootasano tojijiajaariuhuj. Cua Queeri jiyano pueyano panijia. Naaratej, canaari nocua niniutianiyani, noojiajinia canaa quiniuria, canaa quiquiora canaa jiyatenura nojuaja. <sup>24</sup> Saniniuujia, cante cua panijiaquijiani, jiyano pueyari cua rootasano tojiyashijiacajuhuj. Puetunu cua rootasanojuanaa, niaa na tojiqiaani, cunoori maja tama cua niishishanojuaja. Cunoori cua Que niishitishano janiya, cante mijiria cua jiyaroquiaaricujani.

<sup>25</sup> Janiyari puetunu niojuanaa nia pohuataani, niaata cua quishacarija mijiria. <sup>26</sup> Cua Que jiyarosocoriquiano na Sohuanuuri nia cumaquiriquiano. Nojuajaari nia niishitiojonutaniya puetunu cua niishitiojonu panishanojuanaa niajanija. Naajuhuj, nojuajaari nia niishitiniutianiyuhua puetunu tari cua pohuatasano niajanijanaa.

<sup>27</sup> Janiyari nioojia cajitiniutianiyani. Janiyari coojia nianutaniya nioojiajiniani, juhuanijia quijiaa nia quiniuria taa cua quiyacuaani. Naacujitij, niaari seetanujuanaa juhuanijia quiniutianiya. Mijiria quiniaa pueyari maja na niishini cumanijianu juhua janiya. Naaratej, maja nia tacaaniu. Majaari puerenujuhuj. <sup>28</sup> Tari nia sequereecuanijia: “Janiya quera quiohuani. Janiyari na nuhuaji tacatenutaniuhuanu niaata cua quiniuria”. Naa jaara seetanujuanaa cua panijiaa quiri quia, niaa maara shuquiriri nia niishishacari janiyari cua Queecua quiohuani. Nojuajaari seetanu jiyaniijajanaa cutara janiyajiniji. <sup>29</sup> Janiyacuajaari juhuacarija nio nia sequeyani. Naacujitij, niaa jaara niquiri tohuatayano cua sequesano niajanija, niaari niishiniutianiya puetunu cua pohuatasanojuanaa seetanujuanaa.

<sup>30</sup> Majaari puera cua pocojonu quiniutianiya niaata tari. Cua Paraca cucua quenaacoya tarini, na miiniuria janiya taa na panijiaacujani. Nojuajaari Pueyaso tojtiaashijiaa jiyaniijia. Pueyaracaanu cua Que Pueyaso tojijia cua quiniuucua, cua Paraca maara naquiya cua miyaquiri janiya jaara cucua na shanacuyaquirini. Na cumaacari maja na shocotanu cua cumaaca cutara. <sup>31</sup> Naajaa, na miishanojiniji janiya, puetunu pueyajanaari niishiniutianiya, janiyari puetunu cua Que sequesanojuanaa tojijiani, na panijia cua quiniuucua.

‘Nia sanetare. Niiquiji pa quiaare.

## 15

*Jesu pueyari juhua Jesu cashacucua, Jesu quishacari juhua neyona*

<sup>1</sup> Jesuuri naa pohuataquijaari socua canaa niquiara:

–Janiyari juhua uva jiyonani, cua Que natau. <sup>2</sup> Cua pueyari juhua cua cashacucua. Tamonu cua cashacucujajinijinio jaara muetuyashijia quiri, cua Queeri na piyotaja.

Teyano cua cashacucua jininiote muetujua saniniunijia, cua Queeri na nacareetaja, socua queraatia na muetunura. <sup>3</sup> Nia tojiniucua cua rootasano, niaari tari juhua nacareetasano quiya. <sup>4</sup> Pueyaracaanu coojia nia rupuere, taa cua rupueya nioojiacuaani, niaa mariqui juhua uva cashacucua piyotasaareeri. Jaara neyonaacuaaji piyotasaare, majaari na naata muetunu tari. Naajuhua, majaari nia naata muetujua quiniu, niaa jaara coojia rupueyashijia quiri.

<sup>5</sup> 'Janiyari juhua nia jiyonani. Niaari juhua cua cashacucua. Cante coojia rupuejani, taa cua rupueya niajanijacuaani, naacuaajitij, niaari juhua queraatia muetujua quiniutianiya. Cucuaaji rupatejacaari maja na naata casaa miiniu janiyaju. <sup>6</sup> Cante cua rupueyashijiani, nojuajaari taraatia miishaanutaniya juhua uva cashacucua piyotasanoneyonajiniji, tamocora jaquerootasano. Jaara sorere, tatucusaarohuari manijinia quejosoicoriquiano. Tii cateyari.

<sup>7</sup> 'Niaa jaara coojia rupuejaca quiri, niaa jaara cua rootasano tojjijaca quirijihua, puetunu nia panishanoocuarajanaa nia secjore Pueyaso. Nojuacuajaari nia masesano miiniutianiya. <sup>8</sup> Naa cua Que miishacari nia panishanotej, niaari juhua queraatia muetujua quiniutianiya. Naacuaajitij, cua Queeri jiyanoehua timitiasaanutaniya. Naacuaajitij, niishishaanutaniyajaariuhua niaari cua tojtiajaca pueyaniojua. <sup>9</sup> Janiyari nia panijiani, taa cua Que panija janiyacuaani. Coojia rupuejaca nia quiri pueyaracaanu, cua panishano pueya nia quiniuria. <sup>10</sup> Janiyari cua Que panishanoni, pueyaracaanu cua miiniucua na panishano. Naajuhua, niaa jaara cua rootasano tojjijaca quiri quia, niaari pueyaracaanu cua panishano pueya quiniutianiyajuhua.

<sup>11</sup> 'Janiyari naa nia sequeyani, shuquiriaatia quijia nia quiniuria, taa shuquiriaatia quijia cua quiyacuaani. Naacuaajitij, niaari tojetaarucujanaa shuquiriaatia quijia quiniutianiya. <sup>12</sup> Cua tojiri. Niocori cua sequesano niaara: "¡Pueyaracaanu panitiojuaca nia quiri quia, taa cua panija niajanijacuaani!" <sup>13</sup> Cante tama na cuaqueyajaaja panitija na cusonura na rupueya nitini, naa miijia cutaraari seetanujanaa jiyanoehua narta pueya panija. <sup>14</sup> Niaa jaara cua sequesano miijia quiri, niaari cua rupueya. <sup>15</sup> Naacuaajitij, majaari cua sequenu quiniutianiya tari niajanija cua seyata. Pueyano seruuri maja na niishini casaa poonijosano na camarnu miijiaacuaani. Janiyari quiarija nia sequeya cua rupueyaatani, cua niishitiniucua niajanija puetunu cua Que sequesanojuanaa janiya. <sup>16</sup> Majaari nia saquiriojonu quiquiaari janiya. Janija cutaraari nia saquiriojoquiarini cua jiyaramiquiniuria niajanija, cua panishano nia miiniuria. Naa nia miishacari cua panishanotej, niaari juhua queraatia muetujua naana quiniutianiya. Puetunu nia miishanojuanaa cua cumaacatani, cunoori pueyaracaanu rishijia quiniutianiya. Cuno miishanoori maja najuhuanaj. Naaratej, cua Queeri puetunu nia masesanojuanaa nia niquitiojutaniya seetanujanaa coojia rupuejaca nioojia quishacari. <sup>17</sup> Janiyari cunora nia sequeyani: "Pueyaracaanu panitiojuaca nia quiri".

*Pueyaso niishiyashijia pueyari Pueyaso muerasu niquiniu paniyashijia*

<sup>18</sup> 'Pueyaso niishiyashijia jaara nia niquiniu paniyaquiri quia, majaari nia tacaani. Cuno pojoricuaajari naa cua niquituni paniyaquiri quia. <sup>19</sup> Niaa jaara Pueyaso muerasu quiyaquiri quia, Pueyaso niishiyashijia maara nia panijia quiri quia, taa nojori paniquia narta Pueyaso niishiyashijiacuaani. Niaari Pueyaso niishiyashijia quiquiaarijuhua. Naajaa, janiyari nojori tajiniji nia saquiriojoquiarini, cua pueya nia quiniuria. Cunora, Pueyaso niishiyashijiacari nia niquiniu paniyaquiri quia, maja tari nia quishacari juhua nojori. <sup>20</sup> Majaari nio cua sequesano nia niyajetanu: "Seruuri maja socua tojishano na camarnujiniji". Naaratej, Pueyaso niishiyashijia jaara naquiya cua miijiaacuaa, niaari naquiya miishaanutaniyajuhua. Naajuhua, nojori jaara cua rootasano tojjiaacuaa, nojori nia rootasano tojjijaca quiniutianiyajuhua. <sup>21</sup> Nojori nia naquiya miiniutianiya niajanijatej, cua pueya nia quiniucua, nojori niishiyaquishacari cua Jiyarona.

<sup>22</sup> 'Janiya jaara niyaquiquiaari nojori cua pohuatanura Pueyaso rupaani, nojoricuara maara saquiriojotaquishaare, sesa nojori miishanojiniji. Nojori niquiarua cua pohuatanuua Pueyaso rupa, majaari nojori naata sequenu quiniutianiya: "Cua jiyanoori. Maja cua niishini quiquiaari quia rootasano". <sup>23</sup> Cante cua niquiniu paniyashijiani, nojori nia cua Que niquiniu paniyashijiajuhua. <sup>24</sup> Sesa nojori miishano maara nojoricuara saquiriojotaquishaare, janiya jaara cua cumaacata miyaquiquiaari nojori niquiarani. Janiyari socua jiyajeneta casaa miijioquiaari cua cumaacata nojori niquiarani, socua tamasaca miishanojiniji. Naajaa, nia nojori niquishacari cua cumaacata cua miishanotej, nojori saaja cua niquituni paniyaquiri quia, cua Que niquituni paniyaquiri quia. <sup>25</sup> Naajaa, nia nojori miiniucua janiyatej, tariucuaanu Pueyaso Rupaajinia naajotasano janiyajinijiri tari tohuateeree. Naa sequeyari:

“Janiyari najuhuana niquiniu paniyaquishiyani”.

<sup>26</sup> Janiya jaara cua Que shuriucua quishuhuani, janiyari tiji Pueyaso Sohuanu jiyaronutaniya mijiriani. Nojuajaari seetanu rupaañanaa jiiitaja. Nojuajaari janiyajiniji niishitiniutianiya pueya. <sup>27</sup> Niaari janiyajiniji pohuatanutaniya pueyajuhuj, pueyaracaanu cuata nia quiniucua shushajanaa cua coteesacari pohuatanu Pueyaso rupaa.

## 16

<sup>1</sup> Janiyari naa nia numooteyani maja nia tarinitianura cucua tiuuniu niaa jaara naquiya miishaare. <sup>2</sup> Cua pueya nia quiniucua, majaari nia shanacusaanu quiniutianiya nia tiuquitianura Pueyaso secojoja tiacajinia. Pueya jaara nia puecoorejuhuaj cua tojtiajaja nia quiniucua, nojoriiri jiyaniutianiya nojori maninia miya Pueyasora, naa nojori miishacari. <sup>3</sup> Nojoriiri naa miiniutianiya nijaniyatej, nojori niishiyaquiniucua janiya, cua Quejuhuaj. <sup>4</sup> Janiyacuajaari juhuacarijia naa nia sequeyani. Naacuajitij, niaa jaara naquiya miishaare, niocua jiyacari niishiri janiyacujaari tari naa nia sequequiaarini. Majaari quenaaja nio cua sequenu quijia nijaniya, pueyaracaanu niaata cua quiniucua.

### *Pueyaso Sohuanu miishanojiniji pohuatasano*

<sup>5</sup> Quiarijiani, janiyari cua Jiyaronacua quiohuani. Quiarijiani, majaari quenaaja nijaniyajinijinio nequesotanu janiya: “¿Tee quia quiohuarini?” <sup>6</sup> Janiya jaara nia sequereeni janiya quianutaniuhuanu, niaari saaja taraajequee. <sup>7</sup> Seetanujuanaa nia sequeyanijia, socua maninia quiniutianiya niaaraari, janiya jaara quiaarohuanu. Janiya jaara quiaaquiyarohuanu, majaari Pueyaso Sohuanu ninu quiniutianiya niaacua, na cumaquiniuria nijaniya. Janiya jaara quiaarohua cutarani, janiyari niaacua na jiyaronutaniyani. <sup>8</sup> Mijiria na tiuquishacari, nojuajaari pueya jiuujiajinia poonijionutaniya, nojori na niishitiniuria nojoriiri seetanujuanaa sesa miijiaa. Nojori niishitiniutianiyajariuhua nojoriiri na naata sesa miyashjiacara jiyatesaanu. Naajuhuj, nojori niishitiniutianiyari Pueyasoori na naata jiyanooni nojori, maja Sesaacata nojori cojiritiasaanura mani quiquiojinia quejoonu. <sup>9</sup> Seetanujuanaa, Pueyasora, nojoriiri sesa miijiaa nojori tiuyaquiniucua cucua. <sup>10</sup> Jiyocuacaanu cua tacasacariuhua cua Queecua, majaari socua nia niquiniu quiniutianiya janiya. Naacuajitij, Pueyaso Sohuanuuri pueya niishitiniutianiya, nojoriiri saniitiosaanutaniya. Naacuajitij, nojori jiyaniija Satanás jaara tari saniitiosocoriquiano quiyacuaa, nojoriiri saniitiosaanutaniyajuhuj, cucua nojori tiuyaquiniucua.

<sup>12</sup> Janiyari queraatia jiiitajaja cua pohuatanura nijaniyani. Naajaa, majaari cua pohuatanu quiniutianiya quiarijia nijaniya. Juhuanujuaja maja nia naata na niishiniu. Pueraruhua. <sup>13</sup> Pueyaso Sohuanu tiuquishacari niaacua, nojuajaari nia niishitiniutianiya puetunujuanaa cutara. Nojuajaari seetanu rupaañanaa jiiitaja. Nojuajaari maja tama na niishishanojuajaja na niishitini quiniutianiya nijaniya. Puetunu na tojishanojuanaa janiyajinijini, cuno nia niishitiniutianiya cutaraari. Nia niishitiniutianiyajariuhua taate nio pa quishacari nuhuaji quiniutianiyani. <sup>14</sup> Niaari cua shuquiritianutaniya, nojuaja niishitiniucua nijaniya janiyajiniji. <sup>15</sup> Puetunu cua Que jiiitiasanojuanaani, cunoori cua casaajuhuj. Naaratej, janiyari nia sequereeni, Pueyaso Sohuanuuri janiyajiniji masenutaniya cua jiiitiasano niaara, na caminiujiuniuria nijaniyarajuhuj.

<sup>16</sup> Niaari saaja quiarijia cua niquiya. Na nuhuaji cutara, majaari socua nia niquiniu quiniutianiya janiya. Pasa naataja na nuhuaji, niaari cua niquiniutianihuacuahuaj.

### *Nia taraajenuuri jatanutaniya shuquiriaatia nia quiniuria*

<sup>17</sup> Jiyacaritij, noojiaqueya canaa na saquiriojosano pueyajinijioori tama nequesoree-tooreejaja:

—¿Casaa na sequenu paniyarini, nojuaja jaara sequeree: “Niaari saaja quiarijia cua niquiya. Na nuhuaji cutara, majaari socua nia niquiniu quiniutianiya janiya”? ¿Casaa na sequenu paniyaaraniuha na sequesacari: “Pasa naataja na nuhuaji niaari cua niquiniutianihuacuahuaj”, na sequesacarijuhuaj: “Cua Queecua quianutanihuanijia”? <sup>18</sup> Naajuhuj, ¿casaa na sequeyarini na sequesacari “quiarijiani”, mariyata “pasa naataja na nuhuaji”? ¡Majaari pa niishiniu casaaraqui na sequeyatejaj!

<sup>19</sup> Jesuuri tari canaa nequesotanu panishano nojuaja niishirii. Cunora naa canaa sequereeri:

—Janiyari nia sequereeni: “Niaari quiarijia cua niquiya, na nuhuaji cutara maja socua nia niquiniu quiniutianiya janiya. Pasa naataja na nuhuaji, niaari cua niquiniutianihuacuahuaj”. ¿Niaatejaara niojiniji nequesoreetoya tama nijaniyajaja? <sup>20</sup> Seetanujuanaa nia sequeyanijia, niaari nujuquenutaniya. Niaari taraajeconutaniyajuhuj. Jiyacaritij,

Pueyaso niishiyashijiacaari taquiya shuquiriaatia quiniutianiyacuaa niajanijajini. Naajaa, cuno nia taraajenuuri jatanutaniya shuquiriaatia nia quiniuria. <sup>21</sup> Naajaarihuaj, maaji ranu panishacari na mueya, jiyanoehua naquiya miyari. Naajaa, mueya na ranu nuhuaji, naquiya na miiniu niyajetaqueeri, na mueya na timitiasacari. <sup>22</sup> Quiarrijiani, niaari naa taraatia quiyajuhua. Naajaa, niaacua tacatenutaniuhuanijia. Niaari jiyanoehua shuquiriniutianiya nia niquishacari janiya. Majaari quenaaja tamasa pueya naata quiniutianiya cuno nia shuquiriniu jaariutianu.

<sup>23</sup> Jiyacaritij, majaari socua nia nequesotanu quiniutianiya janiya. Seetanujuanaa nia sequeyanijia, cua Queeri nia niqutionutaniya puetunu nia masesanujuanaa nojuaja, seetanujuanaa coojia rupuejaca nioojia quishacari. <sup>24</sup> Majaari juhuanajuaja nia secjonu Pueyaso seetanujuanaa taa cua sequeyacujani, seetanujuanaa coojia rupuejaca nioojia quishacari. Naa nia secjoretej. Niocua nia panishano niqutiosaare, seetanujuanaa shuquiriaatia nia quiniuria.

#### *Jiyaniijia Jesuuri Sesaaca shocotana*

<sup>25</sup> Janyari pueyaracaanu nia pohuataniya maatia seetanujuanaa cua Quejinijia cutarani. <sup>26</sup> Jiyacaritij, niaari cua Que secjonutaniya coojia rupuesano nia quishacari. Jiyacaritij, majaari na panishaanu quiniutianiya cua shiniujuniuria cua Que, na tojinuria niajanijia. <sup>27</sup> Cua Quejanaacuajani nia panijia, nia paniniucua janiya, nia niishiniucujuhua janyari na jiyarosanoni. <sup>28</sup> Niaacuajani niishiya, janyari cua Que shuriucujani niqiaarini pueyanora cua quiniuria mijiria. Quiarrijia saniniucua, janyari nio jiya tiujianutaniyani, cua Queecua cua quianuhua.

<sup>29</sup> Naa Jesu sequesacari canaatej, canaari na sequereeni:

—Quiarrijia cutara, quiaari maatiajanaa sequeree, maja miriqui. <sup>30</sup> Quiarrijia cutara, canaari niishiyani quiaari puetunu casaajanaa niishiya. Majaari quenaaja na panishaanu pueya nequesoreenura quiajanijia. Naacuajitij, canaari niishiyani, quiaacuajajiqui Pueyaso jiyarosanoni.

<sup>31</sup> Jesuuri canaa sequeree:

—¿Naatee? ¿Niaate shusha cucua tiyuruhua? <sup>32</sup> Tari quenaacoyari naquiya cua miishaanura. Seetanujuanaa quiarrijiaari. Niaari cucuaji cocuatasanutaniya puetunujuanaa. Niaari tamajaaja cua tiujianutaniya. Naajaa, seetanujuanaa maja cua quiniu tamajaaja. Cua Quecuajani cua cojiyani. <sup>33</sup> Janyari puetunu niojuanaa nia sequeyani, nioojia nia cajitiniuria nio cua pohuatasanoocua nia tiuushacari. Mijiria nia quishacari, niaari seetanujuanaa naquiya miiniutianiya. Naajaa, janyacuajani mijiria jiyaniijia shocotareeni. Naacuajitij, nioojia nia cumaquiri tamajaaja.

## 17

#### *Jesu secjosacari na pueyacuara*

<sup>1</sup> Naa Jesu sequenu nuhuajitij, jiyocuaaanu na mausacari, naa na Que sequereeri:

—Cua Quena, janiya nio juuca naquiya miishaanutaniyani taa quia sequequiaaricujani. Cua tojinuucua quiajanijia, quia Jiyarosanoni quia jiyatere pueya timitiasano cua quiniuria. Naacuajitij, janyacua saniniucua quia jiyatere pueya timitiasano quia quiniuriani, tojetaarucujanaa maninia mijia quia quiniucua. <sup>2</sup> Quiaacuajani quia cumaaca cua niqutioquiaari puetunu pueyajanaa cua jitianura. Naacuajitij, janyari saniniucua nojori jiyatenutaniya pueyaracaanu quijia nojori quiniuriani, teyano pojori quia niqutioquiaari janyacuajani. <sup>3</sup> Nojori niishishacari saaja quiajanijia seetanujuanaa Pueyasocujia, naajuhua, nojori niishishacari janyari quia jiyarosanoni, naacuajitij, nojori pueyaracaanu quijia quiniutianiya shuquiriaatia.

<sup>4</sup> Janyari tari tucuatere quia sequesano cua miiniuria mijiriani. Naa cua miiniucua puetunu quia panishanojanaatej, pueyari quia timitia. <sup>5</sup> Jiya shipiniyaquishacarijia, janyari jiyanoehua shuquiriaatia quijia quiquiaari quia shuriucua, jiyaniijijanaa cua quishacari. Cua Quena, naa quijara cua jiyaterohua quiarrijiani, quia shuriucua cua quiniuhua.

<sup>6</sup> Quia niqutiosano pueya janiya, quia saquiriojosano pueya quia niishiyashijiaca pueyajinijinioni, quiarrijia cutara, nojori niishiya cante quiajanijiani. Nojori quia niishiya, nojori niqiniucua cua mijiosano quia cumaacata, cua pohuatasano quiajanijinijia nojori tojinuucujuhua. Nojori quia pueya quijia. Quiaari saniniucua nojori quia niqutioquiaari. Nojori quiarrijia quia rupaa tojtiajaca cutara. <sup>7</sup> Nojori niishiya puetunu cua jitianujuanaani, cunoori quia niqutiosano janiya. <sup>8</sup> Janyari quia rupaa rootacanu nojorini, quia nishitishano janyari. Nojori seetanujuanaa nocua tiurii. Nojori seetanujuanaa niishiya, janyari quia shuriucua niqiaarini. Niishitiyajaarihuaj, janyari seetanujuanaa quia jiyarosanoni.

<sup>9</sup> Janiyari cunora nojoriicuarua quia secojiyani, seetanujuanaa quia pueya nojori quiniucua. Majaari cua secojonu quia niishiyashijiaca pueyacuarua. Saaja noo pojoriicuarua quia secojianijia, quiaa na niqutioquiaari janiyatej. <sup>10</sup> Naaratej, puetunu cua jiitiasano pueyajanaari quia pueyajuhuj. Mariyata puetunu quia jiitiasano pueyajanaari cua pueyajuhuj. Nojori tiuuniucua cucua, nojoriiri jatanishano pueya quiniutianiya. Naacujitij, queraatia pueyari cua tiimitianutaniyajuhuj, naa nojori niqishacari cua cumaaca.

<sup>11</sup> Majaari puera cua tarishiniu quiniutianiya mijiria. Cua pueya cutaraari mijiria quiniutianiyajaara, janiya jaara quiaarohua quiocuaani. Jiyanohua maninia cua Quenaa, nojori quia cojuare quia cumaacata, teyano pojori quia niqutioquiaari janiyacujani. Naa quia jiitiare nojori, jatiquni nojori quiniuria juhua niquriyatu jiuujiaraca, taa pa quiyacuaani. <sup>12</sup> Mijiria cua quishacari nojoritia, janiyari nojori cojuajani quia cumaacata, quia rupaacua tiuujiaa nojori quishacari. Majaari quenaaja niquriyatu nojorijiniio cua juurequetenu quiqiaari. Saa nojuuari juurequecanu cutara, tariucua juurequeriquiano quijiacuajatej. Naacujitij, tariucuaaanu quia rupaajinia naajotasanoni tohuatecanu.

<sup>13</sup> Quiarijiani, janiyari quiocua quianutaniyani, tee quia quiyacuaani. Niya cua quishacarijia, janiyari nio sequeya nojori niquriarani, nojori jiitianura cua shuquiriniujihuaj, tojetaarucujanaa shuquiriaatia quijiaa nojori quiniuriajuhuj. <sup>14</sup> Janiyari nojori niishitiocanu quia rupaani. Naa nojori tojishacari quia rupaatej, quia niishiyashijiaca pueyari nojori niquniu paniyaquiquiaa. Cua pueya nojori quishacari, nojoriiri maja saaja mijiria quijiaa na quiniu tari, taa janiyacuaani. Naaratej, mijiria quijiaa pueyari nojori niquniu paniyaquiquiaa. <sup>15</sup> Naa cua secojosacari quiarijia nojoriicuaratej, majaari cua sequenu quiajaniya nojori quia rijionura niquiji. Saaja quia secojia cutaranijia, nojori quia cojuanura Sesaacaacujia. <sup>16</sup> Nojoriiri maja mijiria quijiaa na quiniu tari cua pueya nojori quishacari, taa nio jiyajiniio cua quiyacuquiyacuaani. <sup>17</sup> Quia rupaa quia poonijiotere nojori jiuujiajia, tojetaarucujanaa quia tojjiaa nojori quiniuria. Quia rupaari seetanu rupaajanaa cutara. <sup>18</sup> Quiaacuajiaari cua jiyaroquiaari mijiria quiniaa pueya niqiuara cua pohuatanura quia rupaa. Naajuhuj, janiyari cua pueya jiyaramiquiyani mijiria quiniaa pueyacujuhuj. <sup>19</sup> Quia tojjiaa nojori quiniuria seetanujuanaa, janiyari tama cua cuaqueyajaaja jiyateya puetunu quia panishanojuanaa mijiaa cua quiniuriani. Naacujitij, nojori niishishacari seetanu rupaajanaa janiyajini, nojoriiri tojetaarucujanaa maninia mijiacara jatanishaanutaniya.

<sup>20</sup> Majaari saaja cua secojonu nio pojoriicuarua, tariucua quia tojtiajacacuaani. Janiyari secojiyajuhuj na nuhuaji cucua tiuuriquiano pueyacuarua, noo pojoriicuarua cante cucua tiuuniutianiya na nuhuajini, nojori tojishacari nio pojori pohuatanu janiyajini. <sup>21</sup> Cucua tiuuriquiano pueyacuarua secojianijia puetunu cucua tiuuniaajanaa cuara quiriia jatiquni, juhua rupuetootesano, taa pa quiyacuaani, cua Quenaa. Naatej, taa cua quia quioojiajiniacuaani, quiaari saniniuujia coojiajia quiyacujua. Nojori jiuujia cuara juhua rupuetootesano quiriia poojiajuhuj, mijiria quiniaa pueya niishinuria, quiaari cua jiyaroquiaari mijiria. <sup>22</sup> Janiyari nojori cumaquia quia Sohuanutani, quia niqutiosano janiyacuaa, juhua niquriyatu jiuujiaraca nojori quiniuria, naatej, taa niquriyatu jiuujiaraca pa quiyacuaani. <sup>23</sup> Quiaari coojiajia quia. Naajuhuj, janiyari nojori jiuujiajia quiyajacuhuj. Naacujitij, paari nojoritia juhua niquriyatu quiniutianiya. Naacujitij, mijiria quijiaaari niishiniutianiya, quiaari seetanujuanaa mijiria cua jiyaroquiaari. Nojoriiri niishiniutianiyajuhuj, quiaari jiyanohua cua pueya panijia, taa quia paniya janiyacuaani.

<sup>24</sup> Cua Quenaa, cuno pueya quia niqutiosano janiyani, janiyari paniyani nojori quiniuria cuata quia shruucua, nojori niquniuria cua shacantuuca cumaaca. Quiaari cuno cumaaca cua niqutioquiaari pueyaracaanu quia paniniucua janiya, jiya shipiniyaquishacarijia. <sup>25</sup> Tojetaarucujanaa sesa miyashijia cua Quenaa, mijiria quijiaa pueyari maja na niishiniu quiajaniya. Janiya cutaraari quia niishiyani. Nio cua pueyari niishiyajuhuj, janiyari seetanujuanaa quia jiyarosanoni. <sup>26</sup> Janiyari nojori niishitiocanucujani cante quiajaniyani. Janiyari naa pueyaracaanu nojori jiuujiajia niishitiniutianiya quiajaniyajini, seetanujuanaa nojori niishinuria quiajaniya. Naacujitij, taa quia paniya janiyacuaani, nojori cuara cuno paniniu jiitiaara nojori jiuujiajiajuhuj. Naa nojori niishishacari quiajaniyatej, janiyari nojori jiuujiajia quiniutianiyajuhuj.

## 18

*Na paraa quiasacari Jesu  
(Mt 26.47-56; Mr 14.43-50; Lc 22.47-53)*

<sup>1</sup> Naa Jesu secojonu nuhuaji na Quetej, nojuajaari canaa puetaaree Cedrón surocono taquijiria. Tii quiquiaari olivo cuhuariquia. Cuno cuhuariquiaari matacosano quijia puetunu na shocujanaa. Jesuuri tii tiuquitiamaa canaa, na Que Pueyaso na secojonura. <sup>2</sup> Jesuuri tii jitiiquiaari canaata na rerejonura. Naacuajitij, na paraa na quiateriquiano Judasri cuno cuhuariquia niishiquiaarijuhuaj. <sup>3</sup> Canaa quishacari tii, Judasri jiyacari soldadohua tiuquitiasee, Pueyaso Secojoua tia cojuanaa pueyano. Cuno pojoriiri pueyacuara secojonaa jiyaniijianucua jiyaramiquishano pueya quiriquiaa, Fariseocuaca jiyaramiquishano pueyano. Nojoriiri pueya na miaquetaja pooriquiaa, nocuaji na nunutaja jayoco, samarinio. <sup>4</sup> Jesuuri tari puetunujanaa niishiriquiaacuaja taa nojuaja miishaanutaniyani. Naaratej, nojuajaari cuhuariquia matacajiniji tohuatamaa, na paraa na naacunura. Na naacusacari nojori, nojori nequesotareeri:

—¿Cana nia pajeyani?

<sup>5</sup> Na paraari na riuuaree:

—Canaa Nazaret tiacajinijinio Jesu pajeyani.

Jesuuri nojori riuuaree:

—Janiyacujaja nojuajani.

Jesu tacartana Judasri cuno pojoritia quiriquiaa tii. <sup>6</sup> Jesu sequesacari, “Janiyacujaja nojuajani”, na paraari na nijiniara pojotuquee. <sup>7</sup> Jesuuri socua nojori nequesotarohua:

—¿Cana nia pajeyani?

Nojoriiri socua pacuterohua sequenu:

—Canaa Nazaret tiacajinijinio Jesu pajeyani.

<sup>8</sup> Jesuuri nojori riuuaree:

—Janiyacujaja tari nia sequereeni, janiyacujaja nojuajani. Niaa jaara cua pajeya, nareja nia niquiri nio, cua cojiniaani.

<sup>9</sup> Naacuajitij, tama Jesu sequesanojuuariria tohuatequiaari, nojuaja jaara naa na Que sequequiaari: “Majaari quenaaja niquiriyatu pueyano cua juurequetenu quiquiaari quia niquitiosano pueyajinijinio janiya”. <sup>10</sup> Jiyacaritij, Simón Pedroori tama na mueruujaaja shitiaree na shuucujaji shiyano. Nata, pueyacuara secojonaa jiyaniijia seru numoco jaateereeri, na miaquetajara na numoco. Cuno seru sesa quiquiaari Malco. <sup>11</sup> Jesuuri Pedro sequeree:

—Na co jiniacuma quia shiiriohua quia mueruu. Cua Que jaara paniya naa na miishaanura naquiyatej, ¿janiyatucua nio pojoriria tama cua cuaqueyajaaja tarinitiaaquiri naquiya cua miishaanurani? ¡Taaquiririnij!

*Anás nequesoreesacari Jesu*

(Mt 26.57-58; Mr 14.53-54; Lc 22.54)

<sup>12</sup> Jiyacaritij, na paraari Jesu quiaree. Nojoriiri quiquiaari Romano soldadohua, nojori jiyaniijiajuhuaj, Pueyaso Secojoua tiaco cojuanaa pueyano. Nojoriiri Jesu morojoturee. <sup>13</sup> Na nuhuaji, nojoriiri coteenu na jaatucutaquiaari Anáscua, canaa pueyacuara secojonaa jiyaniijia Caifás cama na quiniucua. Cuno marijiaara, Caifásri pueyacuara secojonaa jiyaniijiajanaa quiriquiaa. <sup>14</sup> Cuno Caifáscuajaari tari naa sequequiaari narta Judiocuaca camarucua: “Maniniacuajaari niquiriyatu pueyano mosaanura puetunu pueya nitijianaa, maja najuhua puetunu pueyajanaa puecoosaanura”.

*Pedro coteesacari seetanu Jesujiniji*

(Mt 26.69-70; Mr 14.66-68; Lc 22.55-57)

<sup>15</sup> Simón Pedroori cuata Jesu nuhuajiriquiaa tucuaaanuji. Janiya cutaraari pueyacuara secojonaa jiyaniijiajanaa niishishano pueyano quiquiaarini. Naacuajitij, janiyari tiuquinishaaree cutara Jesutani, jiyaniijia tia shocua mataca jiniacuma. <sup>16</sup> Saaja Pedro cutaraari tohuateyaji jateesee. Jiyaniijiajanaa niishishano pueyano cua quiniucua, janiyari tohuateyaji cojuana niyacoota pocoojoseeni, Pedro na tiuquininiuriajuhuaj. <sup>17</sup> Cuno niyacoori Pedro nequesotaree:

—¿Majate quiajaninya cuno Jesu pueyajinijiniojuhuaj?

Pedroori na riuuaree:

—¡Maja janiya!

<sup>18</sup> Shiniquiaari jiyacari jaanujiriquiaa. Nocuaji cuno jiyaniijia seyari Pueyaso Secojoua tiajinia cojuanaa pueyata mani naatequiaari. Nojoriiri na jitiuriquiaa. Pedroori nojoritia tii quiquiaajuhuj. Mani jitiuriquiaari.

*Pueyacuara secojonaa jiyaniijia nequesoreesacari Jesu*

(Mt 26.59-66; Mr 14.55-64; Lc 22.66-71)



<sup>19</sup> Jiyacaritij, pueyacuara secojonaa jiyaniijia Anásri Jesu nequesoreenu coteeree canaa na saquiriojosano pueyajiniji. Jesu niishitiojosanojiniji Jesu nequesoreereejaarihuaj.

<sup>20</sup> Jesuuri na sequere:

–Janiyacuaajaari pueyaracaanu puetunu pueya niqiarajanaa maatia niishitiojoquiaani. Janiyari pueyaracaanu tiqiyocua Pueyaso secojonuujuaca tiacajiniaqueya niishitiojoquiaa pueyani. Naajuhua, janiyari niya Jerusalén tiacajinia Pueyaso Secojoua tiajinia niishitiojoriquiaani, tee puetunu parta Judiocuacajanaa rerejoquiaacuajani. Majaari quenaaja jiyasohua cua rootanu quiquiaa pueya. <sup>21</sup> ¿Casaara quia nequesoreya janiyani? Quia nequesoreere juhuari cuno pojori, canapueete cua pohuatasano tojiqianuni. Nojoricuaajaari quia sequenutaniya casaa cua rootaquiaa nojorini.

<sup>22</sup> Jiyacaritij, Pueyaso Secojoua tiaco cojuana pueyanoori Jesu shuriucua nujuariquiaa. Naa Jesu riuucasacari jiyaniijia Anástej, Secojonuuja tiaco cojuana pueyanoori Jesu jiquioco maseteree. Naa Jesu sequereeri:

–¿Naa riuucasanote pueyacuara secojonaa jiyaniijia?

<sup>23</sup> Jesuuri na riuquaree:

–Janiya jaara sesa riuquareeni, cua sequere casaate sesa quiiriini. Saniniuuja, janiya jaara maninia sequereeni, ¿casaara quia maseteree cua jiquiococuaraarini?

<sup>24</sup> Canaa pueyacuara secojonaa jiyaniijiajanaa Caifás quiniucua, jiyacaritij, Anásri Jesu moronucua jiyarotaree Caifásua.

*Pedro pacutesacari seetanu Jesujiniji*  
(Mt 26.71-75; Mr 14.69-72; Lc 22.58-62)

<sup>25</sup> Anás nequesoreesacarijia Jesu, Pedroori tii jitiuriquiaajaa. Tii quiniaa pueyari jiyacari na nequesotaree:

–¿Majate quiajaniya cuno pueyano pueyajinijiniojuhuaj?

Pedroori saaja seetaree. Sequereeri:

–¡Maja janiya!

<sup>26</sup> Pueyacuara secojonaa jiyaniijia seruuri Pedro niquirii. Nojuajaari noo pueyano cuna quiriquiaa, Pedro jaatesano na numocotej. Nojuajaari Pedro sequere:

–¡Janiyacuaruhua quia niquirii cuno pueyanota quia quishacari olivo cuhuariquiajiniani!

<sup>27</sup> Pedroori na seetarohuacuhua. Caacarajaari jiyacari niunijioquee.

*Jiya jiyaniijia Pilato nequesoreesacari Jesu*  
(Mt 27.1-2, 11-14; Mr 15.1-5; Lc 23.1-5)

<sup>28</sup> Caifás tiajiniji, Jesuuri jaatucusaajaari Romano jiyaniijia tiajinia. Cuno tiaari jiyanhua puereetuca quiriquiase, jiyaniijiaacuaji tiasano. Cuno jiyaniijiani, nojuajaari Romano jiyaniijiajanaa César jiyatesano quiquiaari jiyaniijiajanaa na quiniuria Judea jiyajinia. Na sesa quiquiaari Pilato. Canaa Judiocuaca jaara tiuquiiioquiaari Jesuta Pilato tia carijiniacuma, shusha juhuaqueriquiaari. Nojoriiri maja na tiuquitianu quiquiaari Pilato tiaco, nojori mariqui juhua curuushiriiri Pueyaso niqiara, nojori tiuquitianuucua tahue tiajinia. Nojori jaara juhua curuutuca quiri Pueyaso niqiara, naacuajitij, nojori maara Pascuara miaquesano borrego miaqueyaquirij. <sup>29</sup> Naaratej, Pilatoori nojoriicua tohuataquiaari. Nojori nequesotareeri:

–¿Casaa nio pueyano miirucuaani, miji nia nitianura cucuani?

<sup>30</sup> Nojoriiri saaja riuquaree:

–Jaara sesa miyashijia quiriquia, ¿canaatucua casaara quiocua na nitiamani?

<sup>31</sup> Pilatoori nojori sequere:

–¡Niiquiji nia jiyatarohua! ¡Tama nia nequesoreesuhuaaja, taa nia supuetanaa rootasano sequeyacuajani!

Canaa Judiocuaca camarucuaari Pilato riuquaree:

–¡Niajaniya Romano pueyani, niaacuajaari canaa sequecanu maja canaa monura pueyano!

<sup>32</sup> Naacuajitij, naa tarijia Jesu sequesanoori tohuateeriquiano quiquiaari, nojuaja jaara sequequiaari taa na mosaanutaniya niyacutesanojiniani. Saaja Romano pueyari naa monu niishiquiaari niyacutesanojinia. <sup>33</sup> Jiyacaritij, Pilatoori na tiaco tiuquiyarohua. Jesu piiriiri nocua na niniuria. Tii Jesu nequesotareeri:

–¿Quiaate seetanujuanaa Judiocuaca jiyaniijia?

<sup>34</sup> Jesuuri Pilato sequere:

–¿Cunote tama quia niishishanojuaja naa quia nequesotanura janiyatej? ¿Tamonu soj quia pohuatacanu janiyajiniji?

<sup>35</sup> Pilatoori Jesu juaarii. Na sequereeri:

—¡Quiaa jaara Judiocuaca jiyaniijiarano quiri, janiyara naajaa! ¿Janiyateeri quiarta Judio pueyanoni? ¡Tama quiarta Judiocuacuaajaari cucua nitiamaa quiajaniya, nia pueyacuara secojonaa jiyaniijianucuaata! ¡Cua sequere casaa quia miiriucuaani!

<sup>36</sup> Jesuuri na riucuaaree:

—Janiyacuaajaari Jiyaniijiani, maja juhua mijiria jiyaniijia. Janiya jaara mijiria jiyaniijia quiriquiani, cua pueya maara cua quiatunaa cuarta Judiocuacata miaquetoore, maja nojori quiatunura janiya. Majaari jiyaniijia cua quiniu mijiria, taa quia quiyacuaani.

<sup>37</sup> Pilatoori Jesu nequesotaree:

—¿Naatee? ¿Quiaateeri jiyaniijia?

Jesuuri na riucuaaree:

—Jaa. Janiyacuaja Jiyaniijiani. Janiyacuajaari cunora rasaanquiarini. Janiyari mijiria niqiaarini seetanu rupaajanaa cua niishitiniuria pueya. Cante seetanu rupaajanaa panijiani, nojoriiri cua sequesano tojitiajaca.

<sup>38</sup> Pilatoori najuhuaana na nequesotaree:

—¿Casaateeri cuno seetanu rupaajanaani?

Naa na nequesotanu nuhuajitij, Pilatoori tohuatamohuacuhua canaa Judiocuacaacua.

*Pueya sequesacari Jesu cuara mosaaria*

*(Mt 27.15-31; Mr 15.6-20; Lc 23.13-25)*

Pilatoori jiyacari pueya sequere:

—Nio pueyano nequesoreerecuaajaniija. Nojuajaqui maja sesa na miiniu quiquianu.

<sup>39</sup> Niajaniya Judiocuacani, niaari puetunu Pascua juucarajanaa cua nenecojoquiaa cua cartenura nujuatejojuajiniji nujuatesano pueyano. Quiarijiani, ¿cana nia pania cua cartenura nio Pascua juucarani? ¿Niarta Judiocuaca jiyaniijiatee?

<sup>40</sup> Puetunu pueyajanaari naa jiyanohua nacoorohuacuhuj:

—¡Maja cuno cartenu! ¡Barrabás quia cartere cutara!

Cuno Barrabásri nohuasejojuua quijia.

## 19

<sup>1</sup> Jiyacaritij, Pilatoori na soldadohua majacuteree Jesu, coqueeca casaata. <sup>2</sup> Soldadohuari juhuacontucua maaturee Jesu nacaquera. Na nuhuaji cushitishaarohuari. Na macaatiuria, shaaruque toque cushitishaarohuari, juhua jiyaniijia toque. <sup>3</sup> Naa nojori miiniu nuhuaji Jesutej, nojoriiri nocua catecanoquiaari. Na sequetureeri:

—¡Judiocuaca jiyaniijianaa! ¡Quia timiri, Judiocuaca jiyaniijianaa!

Naa nojori sequesacari Jesutej, nojoriiri na jiquioco piquitiurii.

<sup>4</sup> Pilatoori socua tohuataquiaari canaa Judiocuacaacua. Nojori sequereeri:

—¡Nia niquiri! Janiya na tohuateya niaacuani, nia niishiniuria janiyacuaaja tari na nequesoreereeni. Janiyari quiarijia niishiyani, nio pueyanoqui maja sesa na miiniu quiriucaaa.

<sup>5</sup> Jesu muetasacari nojoriicua, juhuacontucuaajiniji nacaque cushiriquiaari, shaaruque toquenio. Pilatoori Judiocuaca sequere:

—Nia niquiri niarta pueyano.

<sup>6</sup> Canaa pueyacuara secojonaa jiyaniijianucua, Pueyaso Secojojuua tiaco cojuanaa pueyajuhaaj, nojori jaara Jesu niqiquiaari, naa nacoonu coteetureeri:

—¡Niyacutesanojinia quia teetere tii na cusonura! ¡Niyacutesanojinia quia teetere!

Pilatoori nacoyano riucuaaree saaja:

—¡Maja! ¡Janiyacuaajaari niishiyani, nio pueyano maja sesa na miiniu quiquianu! ¡Niaa jaara na monu paniri, nia teetere tama niajanijajaaja!

<sup>7</sup> Canaa Judiocuacaari Pilato riucuaaree:

—¡Canaari Pueyaso Rootasano naajione jiiitiaani! ¡Canaari cunojiniji niishiyani, nio pueyano cuara mosaaria tama na cuaqueyajaaja na jiyatenuucua Pueyaso Niyanura!

<sup>8</sup> Pilato tojishacari naa canaa Judiocuaca sequesanootej, nojuajaari socua puerequiaari.

<sup>9</sup> Pilatoori na tiaco tiuquiyarohua Jesuucua. Na nequesotareeri:

—¿Tejenotejaara quiajanijiani?

Jesuuri maja na riucuanu quirii. <sup>10</sup> Pilatoori na sequeree:

—¡Cua riucuaarejaj! ¿Quiaate niishiyaquiya, janiya jiyaniijiani? ¡Janiya jaara panirini, cua naata cua pueya sequenu na teetenura quiajaniya! ¡Janiya jaara paniaquiriijuhuaaj, cua naata quia cartenujuhaaj!

<sup>11</sup> Jesuuri saaja na riucuaaree:

—Jiyocuacaanu Quijia jaara quia jiyateyaquiquiaari jiyaniijia quia quiniuria, quiaa maara quia cumaaca paaretaaquiri cucuaaj. Naaratej, cante niyara cua nitiamaa quiocuani, nojuajaari socua jiyanohua sesa miirri quiajanijiniji.

<sup>12</sup> Naa Pilato tojishacari Jesu sequesantej, nojuajaari socua shiriiquiquiaari. Nocuari, Jesu cartenu saniniujiuriquiaa juucuaari. Judiocuacaari saa nacoorejaa. Naa Pilato sequetureeri:

—¡Cante tama na cuaqueyajaaja jiyateja jiyaniijiarani, nojuajaari pa jiyaniijia César paracara quijia! ¡Naaratej, quiaa jaara cuno pueyano cartere, majaari socua pa jiyaniijiajanaa César rupena quia quiniu quiniutianiya!

<sup>13</sup> Naa Pilato tojishacari pueya sequesano nojuajatej, nojuajaari na soldado sequeree na tohuatenuhuara Jesu pueya niquiara. Pilatoori jiyacari cajiri pueya na nequesoreesaquiji cajitiujinia. Pilato tii cajiri quiaani, na tajoji pueya nujuatusaquini, cunoori shanohua saitia shipinishano quiquiaari. Naaratej, na sesa quiquiaari “Saitia maniniushitshano”. Judiocuaca rupaajinia saniniujia, cunoori quiquiaari “Gábata”. <sup>14</sup> Jiyacariiri panacari quiriquiaa. Cuno juuca, canaa Judiocuacaari juhuacarijia jeenucuariquiaa Pascuara juucajinia. Pilatoori jiyacari tii quiniaa Judiocuaca sequeree:

—¡Nia niqiri nia jiyaniijia!

<sup>15</sup> Pueyari saa nacoorejaa:

—¡Cunoori maja canaa panishano canaa jiyaniijia na quiniuria! ¡Niyacutesanojinia quia teetere!

Pilatoori nojori sequeree:

—¿Janiyatucua nia jiyaniijia teetereni? ¡Maja!

Pueyacuara secojona jiyaniijianucuaari Pilato sequeree:

—¡Jiyaniijia César cuajaari canaa jiyaniijiajanaa! ¡Maja socua tamonu jiyaniijia canaa jitianu!

<sup>16</sup> Pilatoori socua Judiocuaca niqitioree Jesu, nojori teetesocoriquiano. Naaratej, nojoriiri na jiyataquiaari na teetenuuca.

### *Jesu teetasacari*

(Mt 27.32-44; Mr 15.21-32; Lc 23.26-43)

<sup>17</sup> Jesuuri tama na teejaranojuajaaja canujutaaree pueya puecoosaquiria. Puecoosaqui sesa quiquiaari “Pueyano nacaco tuhuananu”. Judiocuaca rupaajinia saniniujia, “Gólgota”. <sup>18</sup> Jesuuri tii teetesaaquiaari, socua caapiqui pueyano. Jesuuri cuno pojori tajinia nujuaretasaaree. <sup>19</sup> Pilatoori naa naajiotequiaarijuhuaj Jesu nacaacuma rupotasocoriquiano: “Nazaret tiacajinijinio Jesu, Judiocuaca jiyaniijia”. <sup>20</sup> Naajiosano quiriquiaari canaa Judiocuaca rupaajinia, Romano pueya rupaajiniajuhuaj, Griego rupaajinianio. Jesuuri catecaja teetesaaquiaari Jerusalén tiacajiniji. Naacuajitj, queraatia Judiocuacaari cuno naajio serojoquiaari. <sup>21</sup> Naaratej, Judiocuacaacuara secojona jiyaniijianucuaari Pilato juatiuri:

—¿Casaara naa quia naajiotereeni: “Judiocuaca jiyaniijia”? Cuaara naajiosaaria cutara: “Tama na cuaqueya sequejajaaja, Judiocuaca jiyaniijianija”.

<sup>22</sup> Pilatoori nojori riucaaree saaja:

—Janiyacuaajaari naa naajiotereeni. ¡Cuaara naa quiiriatej!

<sup>23</sup> Cuno cuatro soldadohua teetenu nuhuaji Jesu, nojoriiri Jesu toqueya seraatiaree. Socua quiriquiaari Jesu tucuaque cacojoqui. Cuno toqueeri shitiasano quiquiaari na riquiajiniji jiyocuara. Maja cusupuesano. <sup>24</sup> Naaratej, cuno soldadohuari sequetooquiaari:

—Maja pa sureenu nio toque. Coteenu pa tacuarishijiore, pa niishiniuria cante nera na panutaniyani.

Naacuajitj, tariucuacaanu Pueyaso Rupaajinia naajiotasanoori tohuateequiaari. Naa naajiotasano quiyari:

“Cua toqueeri seraatiasaaree. Cua tucuaque toqueecuara tacuarishiyonuureeri, na pasocoriquiano”.

Seetanujanaa, naa miitiquiaariiri cuno soldadohua.

<sup>25</sup> Niyacutesano shuriucua tee Jesu teeriquiaacuajani, tii nujuaturiquiaari na nucua, na nucua tarajanujuhuaj, Cleofas niquiocua Maríajuhuj, María Magdalenano. <sup>26</sup> Jiyanohua Jesu panishano pueyanoori Jesu nucua shuriucua nujuariquiaa. Cuno pueyanocuaajaari janiya. Jesu niquishacari canaa, na nucua sequereeri:

—Maajinia, cua panishano pueyano cuaara quiiria juhua quia muela cua niti.

<sup>27</sup> Na nuhuaji, cua sequereeariuhuj:

—Juanna, cua nucua cuaara quiiria juhua quia nucua.

Naaratej, janiyari María riquiaari cua tiajiniarani, tii na quiniuria canaata.

### *Jesu cusosacari*

(Mt 27.45-56; Mr 15.33-41; Lc 23.44-49)

<sup>28</sup> Na nuhuaji, Jesuuri niishiquiaari puetunu nojuajiniji naajiotasanojuanaari tari tohu-ateeree. Naajuhua, tariucuacaanu Pueyaso Rupaajinia naajiotasano tohuateenurajuhua, Jesuuri sequequiaari:

—¡Jiyamueyanijia!

<sup>29</sup> Cuniq, vino jereecaari patacojinia mishaja cajitariquiaa. Jiyacaritij, namasu casaari jereeca vinojinia shishaaree. Naajuaacua na morotatureeri. Na nuhuaji, Jesu rupaama shitiasaareeri. <sup>30</sup> Jesu ratunu nuhuaji cuno jereeca vino, naa sequerohuari:

—¡Tari tucuateree puetunujuanaacujajinjia!

Naa na sequenu nuhuajitij, naniquiiri. Cusoqueeri.

*Soldado jitasacari Jesu shuucuaji na cashanata*

<sup>31</sup> Cuno juucaari canaa Judiocuaca jeenucuasacari quiriquiaa Pascuaacuara juucajinia. Cuno marijara, Pascua juucaari Sábado juucajinia quiriquiaajuhua, samaatenu juuca. Naaratej, canaa Judiocuaca camarucuaari maja na paniniu quiquiaari samaatenu juuca macunucua jaasuconura na niyacutesanojinia. Naaratej, nojoriiri Pilato sequeree cuno teetejosano pueya cashacucua na shuniitianiurina, ritia nojori cusunuunura, na roshinijiosaanauna cuno juucaja. <sup>32</sup> Naaratej, Pilatoori na soldadohua jiyaramiquiri. Cuno soldadohuari coteenu shuniitiree niquiriyatu pueyano cashacucua. Na nuhuaji, tamonu cashacucua shuniitiatureejaariuhua. <sup>33</sup> Saniniuujia, nojori pacusacari Jesuucua, Jesuuri tariucua macu quiriquiaa cutara. Nojoriiri cunora na cashacucua shuniitaaquiri.

<sup>34</sup> Naajaa, tamonu soldadoori Jesu shuucuaji jitiaree na cashanata najuhuanaj. Ritia shooqueeri nanaca, mohuacanio. <sup>35</sup> Cuno pueyano, na naajiojinia naa nia pohuataani, cunocujajari janiya. Janiyajanaari na niquiiaarini. Naarate janiyari seetanujanaa nia pohuataani. Tama janiyajarjia niishiyani cua sequesanoori seetanujanaa, nocua nia tiuuniuria. <sup>36</sup> Jesuuri naa miishaaquiiaaritij, tariucuacaanu nojuajiniji naajiotasano tohuateenura. Naa sequeyacuajari juhuacarjia nojuajiniji naajiotasano:

“Majaari quenaaja na nucu shuniitiasaanu qiniutianiya”.

<sup>37</sup> Tamaquiiri nojuajiniji naa naajiotasano quiyajuhua;

“Cashanata na shuucuaji na jitiatusano niqitiunitianiyari”.

*Jesu quete niasacari raaco*

(Mt 27.57-61; Mr 15.42-47; Lc 23.50-56)

<sup>38</sup> Na nuhuaji, Arimatea tiacajinjini Joseeri Pilato sequeese:

—Cua niqitiore Jesu quete raaco cua niasocoriqiano.

Nio Joseeri jiyasohuaja Jesuucua tiuujia quiquiaari, na pueresacari narta Judiocuaca. Pilatoori na sequequiaari na panura Jesu quete. Naacuajitij, Joseeri quiaaree. Macu paquiaariiri. <sup>39</sup> Nicodemojuhuaj, noo pueyano Jesuucua niqiaari niucua nata pocoojonuratej, nojuajari jiyacari tiuquishii Joseecua. Nojuajari queraatia shanohua jaanutaja nitariquiaa, macucua niojosocoriqiano. Na niqiaari quiquiaari cuarenta y cinco kilo. Cuno shanohua jaanutajari quiquiaari mirra, aloeta cojitijosano. <sup>40</sup> Joseeri Nicodemota Jesu juniocoree toqeneecajinia. Nojori jiuniosacari, nojoriiri nocua nojoriquiaa cuno shanohua jaanutaja. Canaa Judiocuacari naa miitujiaa quiquiaari, na macu na niatunura raaco. <sup>41</sup> Tee Jesu teetesaaquiiaaricujani, cuniqijia na shurucua quiquiaariiri cuhuariquia. Cuno cuhuariquiajiniani, quiarinio jiuutiasano raari quiriquiaa, macunucua niojuuara. Cuno raaconi, juhuanojuaja maja macu niasaanu quiquiaari. <sup>42</sup> Macuuri cuno raaco niasaaquiiaari, cateca na qiniuucua. Naajuhua, quera puequeriquiaari canaa Judiocuaca jeenucuana juuca. Cunoori, Pascuaacuara juuca.

## 20

*Jesu samitiasacariuhua*

(Mt 28.1-10; Mr 16.1-8; Lc 24.1-12)

<sup>1</sup> Domingo, coteenujuanaa semaana juucani, María Magdalenaari tariquicuajia quiaquiaari Jesu raajinara. Ninishiquiri quiriquiaajaa. Na tiuquishacari, cuno puereetuca saajia niquishii tariucua tamocora ruutinishano, teyanota raa tiosaaquiiaaricujani. <sup>2</sup> Naa na niquishacaritij, nojuajari neterohua Simón Pedroocua, cucuanio. Canaa sequesuhuari:

—¡Pueyanaa, pa Jiyaniijiaqui na raajiniji pasaaree! ¡Majaari canaa niishiniu teeriquitijia na niasaareteja!

<sup>3</sup> Naaratej, janiyari Pedrotta netequiaari raajinarajuhua. <sup>4</sup> Canaari mariyata netecuaturiquiaa coteenu. Janiya cutaraari socua ritia netequiaari Pedrojinijini. Naacuajitij, janiyari coteenu tiuquishii raajiniani. <sup>5</sup> Janiyari raaco cuqueseeni. Janiyari saaja Jesu jiunocotaja toque niquirii maanoni tee Jesu quete niasaarucuaacujani. Majaari cua tiuquiniu quimaa raaco. <sup>6</sup> Simón Pedroori cua nuhuaji tiuquishii. Cami tiuquimaaajanaa

cutaraari. Nojuajaari Jesu jiunioctaja toque niquishii tii maanojuhuaj. <sup>7</sup> Jesu naca jiunioctaja niquiriiaariuhuaaj tamoco maano, maninia mariquiosano. Majaari na manu quiriquiaa Jesu cuaqueya jiunioctaja toqueta. <sup>8</sup> Pedro tiuquiniu nuhuaji raaco, janiyari shusha jiyacari tiuquimiaaaniuhuaaj. Cua niquishacari Jesu jiunioctaja toque, janiyari niishiquiini Jesuqui tari samiitiarohua. <sup>9</sup> Canaari juhuanajuaja maja canaa niishiniu quiriquiaa tariucuacaanu Pueyaso Rupaajinia naajiotasano Jesujiniji. Tii sequeyacuajaari Jesuuri samiitianutaniuhua macujiniji. <sup>10</sup> Na nuhuaji, canaari tiajinia quiaarohuani.

*Jesu muetasacari María Magdalenaacua*

(Mr 16.9-11)

<sup>11</sup> Canaa quiojosacariuhua raajiniji, María Magdalenaari tiijia jateequiaari. Ra shuriucua nujuqueriquiaari. Na nujuquenuta, raaco cuqueereeri. <sup>12</sup> Raaco na niquishacari, caapiqui Pueyaso seya niquiriiri, cohuajaque toqueyaraca. Nojoriiri macu niasaqui cajituriquiaa, tamonu na nacaacora, tamonu na cashacuucumara. <sup>13</sup> Pueyaso seyari María Magdalena sequereeri:

—Maajinia, ¿casaara quia nujuqueyani?

Nojuajaari Pueyaso seya riucaaree:

—Cua jiyaniijia quete niiquiji pasaarucuaa. Majaari cua niishiniu teeriquitijia na niasaarucuaatejaj.

<sup>14</sup> Naa na sequenu nuhuajitij, na nijiniara tacaterohuari. Saaja Jesu niquirii na shuriucua nujuanoori. Maja cutaraari na niishiniu quiriquiaa nojuaja Jesu.

<sup>15</sup> Jesuuri na nequesotaree:

—Maajinia, ¿casaara quia nujuqueyani? ¿Cana quia pajeyani?

Maríari na jyanirii cuno cuhuariquia cojuana pueyano naasucua. Cunora, naa na sequereeri:

—Pueyanonaa, quiaa jaara canaa macu parucuaa, cua sequere tee quia niarucuaano. Janiyacua nocua quiaare na panurani.

<sup>16</sup> Jesuuri na sequereeri:

—¡Maríanaa!

Jiyacaritij, Maríari nocua tacatequee na niishishacari nojuajaari Jesu. Hebreo rupaajinia na sequereeri:

—¡Rabunil!

Cunoori sequeya, “Cua Niishitiojonanaa”. <sup>17</sup> Jesuuri María sequereeri:

—Maja cua quianu. Juhuanajuaja maja cua tacanu quiquioo cua Queecua. Quia quiaarohua. Cua tapueyocua quia sequesuhua: “Janiya cua Que Pueyasocua tacanutanihuani. Nojuajaari nia Quejuhuaj. Nojuajaari cua Jiyaniijia, nia Jiyaniijajuhuaaj”.

Jesuuri naa na saquiriojosano pueya sequereeri na tapueyocucata, na Que Pueyaso na jiyatesacari nojori Quejuhuaj. <sup>18</sup> Jiyacaritij, María Magdalenaari nimiohua canaacua, Jesu saquiriojosano pueyacuani. Nojuajaari canaa pohuatasuhua taa Jesu na niquiriini. Naajuhuaaj, Jesu sequesano caminiujirii canaaraari.

*Jesu muetasacari na saquiriojosano pueyacu*

(Mt 28.16-20; Mr 16.14-18; Lc 24.36-49)

<sup>19</sup> Cuno domingo juucajani, shusha ninishacari, canaa, Jesu saquiriojosano pueyani, canaari jatiqui quiriquiaa tiaconi. Canaari tia tohuateya mishiquiojoquiaari cumaatiani, canaa pueresacari Jesu motenaa Judiocuaca. Naa tia tiotiu mishiquiojosano quishacaritij, Jesuuri saaja canaacua tiuquimiaa. Canashyaquiji nujuasee canaa tajiniaari. Naa canaa sequereeri:

—¿Niaate quiyajaa? Juhujaniya nia quiri.

<sup>20</sup> Naa canaa na sequenu nuhuajitij, canaa niqutijoree na juashiquiaari, na shuucujaj cashana jyanio. Canaari jyanohua timiriini canaa niquishacari canaa Jiyaniijia. <sup>21</sup> Jesuuri socua pacuterohua sequenu:

—¡Juhujaniya nia quiri! Naatej, taa cua Que jiyaroquiaari janiya mijiria na rupaa cua pohuatanuracuaani, janiyari naa nia jiyaramiquiniutianiyajuhuaaj.

<sup>22</sup> Naa canaa na sequenu nuhuajitij, canaa caco nooriiri. Sequereeri:

—Pueyaso Sohuanu nia tiuquiniri nioojiajinia. <sup>23</sup> Naa jaara pueyano jyanoori sesa na miishanojiniji, seetanujanaa jyanoooshano quiniutianiyari. Saniniujia, niaa jaara pueyano jyanoyaquiri sesa na miishanojiniji, Pueyasora, jyanoooshoo quiniutianiyajaariuhuaaj.

*Tomás niquishacari Jesu, saminio seetanujanaa*

<sup>24</sup> Majaari Tomás quiniu quiriquiaa canaata, narta saquiriojosano pueyatani, Jesu muetasacari canaacua. <sup>25</sup> Naaratej, canaari Tomás sequequiaari na nuhuajini:

—¡Caapueyanonaa, canaa pa Jiyaniijia niqiriicuaani!

Tomásri saa canaa sequereejaa:

—Majaari cua tiuuniu quiniutianiya nia sequesanoocua, janiya jaara Jesu juaashiquia-jinia niquiyaquiri clavo jiyacani. Janiya jaara cua juaashiquia shiyaquiri clavo jiyamani, janiya jaara cashana jiyama pueraaquiri na shuucujijihuhaj, janiyari nia cuaracashitiniutianiyan.

<sup>26</sup> Cuno nuhuaji, socua tamonu domingora, canaa, Jesu saquiriojosano pueyani, canaari rerejoquiaariuhuani. Tomásri jiyacari canaata quiriquiaa cutara. Tia tiootiuri maninia mishiquiojosano quiriquiaa. Naajaa, Jesuuri saaja canacua tiuquiquiaari. Canashyaquiji canaa tajinia nujuaseeri. Canaa sequereeri:

—¿Niaate quiyajaa? Juhujaniya nia quiri.

<sup>27</sup> Jiyacari Tomás sequereeri:

—Miji, Tomásnaa. Cua juaashiquia quia niquiri. Quia juaashiquia quia shiri clavo jiyama. Cashana jiyama cua shuucujij quia puerarejuhuj. ¿Casaara cucuaji quia taacanuyajani? Cucua quia tiuuri.

<sup>28</sup> Tomásri jiyacari Jesu sequereeri:

—¡Cua Jiyaniijiana! ¡Cua Pueyasonaa!

<sup>29</sup> Jesuuri na sequereeri:

—Quia niquishacari janiya, quiaari shusha cucua tiuya. Socua shuquiriaatia quiniutianiya cutaraari noo pojori, canapute cucua tiuuniutianiya saaja nojori tojishacari janiyajinjini, nojori niquiyaquishacari janiya.

*Casaara Juan naajioquiaari nio naajioneeni*

<sup>30</sup> Jesuuri jiyanohera socua queraatia casaa miqiaari na cumaacata canaa na saquiriojosano pueya niqiara. Cunoori nio nequesoreetuneejinia naajiotasoo. <sup>31</sup> Janiyari secaja saquiriojoree niya cua naajiotasocoriquianoni, nia niishiniuria Jesuuri seetanujuaanaa Pueyaso Jiyarosano, Pueyaso Niyanutuhuj. Janiyari nio naajioneeni nocua nia tiuuniuria, Pueyaso muerasura nia jiyatesaanura, pueyaracaanu rishijiaca nia quiniuria.

## 21

*Tiberias caminiajinia Jesu muetasacari na saquiriojosano pueyacua*

<sup>1</sup> Na nuhuaji, Jesuuri canaa na saquiriojosano pueyacua muetaquiaarihuha Tiberias caminiajinia. Naa quiquiaariti na muetasacari canacua. <sup>2</sup> Nio pojoriiri jiyacari mariyata quiriquiaa: Simón Pedro, Tomás (Caapueyano jiyaniishano), Natanaeljuhuj. Nojuajaari Caná tiacajinjini quiquiaari, Galilea jiyajinjini. Janiyari cua tarajanuta tii quiquiaa-jajaniuhuj. Canaari Zebedeo niqiuohuani. Socua caapiqui Jesu saquiriojosano pueyajinjini tii quiquiaajuhuj. <sup>3</sup> Simón Pedroori jiyacari canaa sequereeri:

—Sapitiaajara quejootaseera shiyaru.

Canaari na riucaareeni:

—Canaa quiata quiaajuhuj.

Naacujitij, canaari quiojijareeni. Canaari botejinia tacataseeni. Canaari puetunu cuno niucujanaa shiyaru quejootariquiaa sapitiaajara juucuan. Canaari shaa juhuaquetumaani. <sup>4</sup> Jiyacaritij, Jesuuri caminia casaqueyaji jaaquiajinia nujuariquiaa. Majaari canaa niishiniu quiquiaari cante nojuajani. <sup>5</sup> Jesuuri canaa jiiquiooree. Canaa nequesotareeri:

—¡Sanajoorinia! ¿Niaate na quiaree?

Canaari na riucaareeni:

—¡Maja! ¡Shaaqui sacaj!

<sup>6</sup> Jesuuri canaa sequereeri:

—¡Nia shiyaru nia jartare nia miaquetajara bote tamajiria! ¡Niaari cuniqui na quianutianiya cutara!

Canaari naa miiriini taa na sequereeri canaacujani. Na nuhuaji, majaari canaa naata canaa shiyaru jaatanu quiriquiaa, queraatia sapitiaajaa canaa ritiasacari. <sup>7</sup> Jiyacaritij, janiyari Pedro sequereeni:

—¡Pa Jiyaniijiaqui!

Naa Pedro tojishacari cua sequesantej, nojuajaari ritia na toque cushirii. Nojuajaari juhuasu quiquiaa. Na toque na cushiniu nuhuaji, caminiajinia jaataareeri Jesuucua na quianura. Jiritiuri quiquiaa. <sup>8</sup> Canaari na nuhuaji jaatiariquiaa shiyaru botejinijini. Jaaquiaari namitia maja tucuaaanu na quiniu quiriquiaa, saaja cien metruruhua. <sup>9</sup> Canaa rosetasacari botejiniji, canaari na mani niquishiini. Sapitiaajari tii majeeriquiaa, pannio. <sup>10</sup> Jesuuri canaa sequereeri:

—Nia sapitiaajajinjiji miji nia riri rarishocoriquiano.

<sup>11</sup> Simón Pedroori ritia botejinia tacamaa. Shiyaru tacanitiaree jaaquiajiniiaari. Queraatia sapitiaajaari quiriquiaa. Ciento cincuenta y tres sapitiaaja, saa puereetunucuaaja. Naa queraatia sapitiaaja quishacaritij, naajaa, majaari shiyaru turejetanu quirii quenaaja.

<sup>12</sup> Jesuuri canaa sequere:

–Pueyanaa, miji. Nia miaquesee.

Majaari quenaaja niquiriyatu canaajiniinio nequesotanu quiriquiaa, cantejaaranoni. Canaacuaajaari niishiriquiaani nojuacuaajaari canaa Jiyaniijia Jesu. <sup>13</sup> Jiyacaritij, Jesuuri pan rishii manijini. Canaa na serotareeri. Sapitiaaja rariquia canaa niqutiojoreejaari-uhuaaj.

<sup>14</sup> Jiyacari Jesu muetasacari canaa na saquiriojosano pueyacuatej, cunota tari quiquiaari jiuujanaraca na muetasacari canaacuaa na samiitianu nuhuaaji.

*Jesu pocojosacari Simón Pedrota*

<sup>15</sup> Canaa miaquenuunu nuhuaaji, Jesuuri Simón Pedrota pocojoriquiaa. Na nequesotareeri:

–Juan niyanu Simónnaa, ¿quiaate cua panijia socua nio quiarta saquiriojosano pueyajini?

Pedroori na riucuaaree:

–Jaa, Jiyaniijianaa, quiaacuaajaari niishiya janiyari quia paniyani.

Jesuuri na sequere:

–Cua borregohua niqiuohuaniojua cojuanara quia quiriqui.

Naa Jesu sequesacari Pedrotej, nojuajaari miriqui na sequeriquiaa maninia na jitianura narta Pueyaso muerasu. <sup>16</sup> Jesuuri Pedro nequesotarohuacuhuaaj:

–Juan niyanu Simónnaa, ¿quiaate cua panijia?

Pedroori Jesu riucuaaree:

–Jaa, Jiyaniijianaa. Quiaacuaajaari niishiya janiyari quia paniyani.

Jesuuri na sequere:

–Cua borregohua cojuanara quia quiriqui.

<sup>17</sup> Jesuuri socua camiriohua Pedro nequesotanu:

–Juan niyanu Simónnaa, ¿quiaate cua paniya?

Pedroori socua taraajequee pueyaracaanu Jesu nequesoreesacari nojuaja. Seetanujuaanaa Jesu riucuaareeri:

–¡Jiyaniijianaa, quiaacuaajaari puetunujuanaa niishijia! ¡Quiaari niishiya janiyari quia paniyani!

Jesuuri na sequere:

–Cua borregohuaniojua cojuanara quia quiriqui. <sup>18</sup> Seetanujuaanaa quia sequeyanijia, mashaja quia quishacari, tama quiajanijiaaritia quia toque cushijia, quia quianura quia panishaqui. Saniniuujia, quiaa jaara saaquiano quiri, quiaari nareja quia numatucua shitionutaniya tamasaca cushitiniuria quia toque. Na nuhuaaji, quiaari canujutesaanutaniya quia paniyaquishaquiria.

<sup>19</sup> Naa Jesu pohuatasacari miriqui Pedrotej, nojuajaari Pedro numooteriquiaa taa nojuaja mosaanutaniyani. Pedro jaara naa mosaare, nojuajaari Pueyaso timitiniutaniya na mosaanuucua. Na nuhuaaji, Jesuuri na sequere:

–¡Pueyaracaanu cua tojjia quia quiri! Pa quiaarej.

*Juanjini pohuatasano*

<sup>20</sup> Pedro tacatesacari na nijiniara, Jesu panishano pueyano niquirii na nuhuaaji sacuaanori. Nojuacuaajaari janiya. Janiyari noo pueyanocuaajani, canaa miaquenuusacari Pascuara, Jesu shuriucua cua cajishacari na nequesotaquiaaritia: “¿Cantejaara cunoni, quia quiatenutaniyani?” <sup>21</sup> Quiarijiani, Pedro niquishacari janiya saniniuujia, Jesu nequesotareeri:

–Jiyaniijianaa, janiya jaara naa mosaanutaniyacuaani, ¿nojuajaarijiaataj, taa na miishaanutaniyarini?

<sup>22</sup> Jesuuri Pedro riucuaaree:

–Janiya jaara paniri nojuaja rishiniuria pueyaracaanuni, janiya jaara jiyocuaaanuji tiuquiriohuaajitia, quiara, naajaa. Quiajaniya cutara, pueyaracaanu cua tojjia quia quiri.

<sup>23</sup> Naa Jesu sequenuucua Pedrotej, puetunu cuarta Jesu pueyajanaari jyaniriquiaa janiya naasucua shaajeyaquiriquianoni. Jesuuri seetanujuaanaa maja naa na sequenu quiquiaari janiyajini. Nojuajaari saaja naa sequequiaari Pedro: “Janiya jaara paniri pueyaracaanu na rishiniuriani janiya jaara jiyocuaaanuji tacatemohuaajitia, quiajaniyara naajaa”.

<sup>24</sup> Janiyacuajaari nojuajani, Jesucristo panishano pueyanoni. Nio cua naajiojiniani, janiyari nojuajiniji cua niquishano pohuataani. Cua pohuatasanoori seetanujuanaa.

<sup>25</sup> Jesuuri jiyano hua queraatia socua casaa miiquiaari na cumaacata mijiria. Puetunu na miishanojuanaa jaara naajiotasaare, naa naasucua nio jiyajinia maara quiquio quiyaquiri puetunu cuno nequesoreetuneecaacujijianaa.



## JESUCRISTO JIYARAMIQUISHANO PUEYA MIISHANO

*“Pueyaso Sohuanu niaacua jiyarosaanutaniya”*

<sup>1</sup> Quiocuara naajionu pacuterohuanijia, cua panisho Teófilonaa. Coteenu cua naajiosanojinia, janiyari quia pahuataquiaarini taa Jesu na poonijiosano coteequiaari mijiriani. Puetunu na miishanojuanaa naajiotaquiaarinijia, mariyata na niishitiojosano na coteenujiniji, jaara tacanishaaquiaariuhua jiyocuacaanu na Queta na quiniuhuara. <sup>2</sup> Mijiria na quishacarijia, Jesuuri na jiyaramiquishocoriquiano pueya rootaquiaari Pueyaso Sohuanu cumaacata, taa nojori miiniutianiya na nuhuajini. <sup>3</sup> Jesu cusonu nuhuaji, nojuajaari muetaquiaariuhua na saquiriojosano pueyacia. Nojoriicua mueranacujuquiaariiri. Cuarenta juuca nuhuaji tacaquiaariuhua puetunujuanaa. Na miishanota nojoriicua na mueranacujusacari, nojori niishitiriiri nojuaja seetanujuanaa saminiño quia. Nojoritia pocoojuquiaariiri taa Pueyaso jitianutaniya na muerasuni.

<sup>4</sup> Nojoritia na pocoojosacari tamonu juuca, Jesuuri nojori numotequiaari maja ritia nojori quianuhuara Jerusalén tiacajiniji. Nojori sequequiaariiri:

–Nia sashirijiaara cua Que cuaara niqutionorajaara na Sohuanu nijaniya. Nojuajaari cua sequequiaari na niqutionutaniya nijaniyana, taa cua caminiujuquiaari tari niaaracuajani. <sup>5</sup> Naa sequequiaari nijaniyacuaianijia: “Tiuquiniñion Juanri nia tiuquiniñioquiaari moojinia, Pueyaso tojjijara nia jatasacari. Pueyasoori saniniuuja na Sohuanu nioojiajinia tiuquiniñionutaniya, seetanujuanaa Pueyaso tojjijara nia quiniuria”. Quera niaacua tiuquiniñianiyacuajaari. Naaratej, nia sashiri.

*Jesu tacasacariuhua jiyocuacaanu*

<sup>6</sup> Tamonu juuca, Jesu pueyari Jesuucua rerejoquiaari. Na nequesotatureeri:

–Jiyaniñijanaa, ¿quiaate jiyaniñijara jiyatesaanutaniya quiarijia Israel pueyara, maninia pa quiniuhuara tama pa jiyaniñijataaja, taa pa supuetanaa quiquiaaricuaani?

<sup>7</sup> Jesuuri nojori riucaaree:

–Nio cutaraari maja nia niishishocoriquiano, taacari Israel pueya jiyaniñijara cua jiyatesaanutaniyani. Pa Que Pueyasoori cuno niishishano racataa tama nerajaaja. Saa nojuajaari na niishiya cutara. <sup>8</sup> Naajaa, niaari Pueyaso cumaaca masenutaniyacuaaja, Pueyaso Sohuanu jaara nioojiajinia tiuquiri. Niaari janiyatiniji pahuatanutaniya pueya niquiara Jerusalén tiacajinia, puetunu Judea jiyajiniajanaano, Samaria jiyajiniajuhuaj. Naa pahuatasaanutaniyajaariuhua puetunu jiyacajiniajanaa, socua tucuacaanu jiya puequeetujiniano.

<sup>9</sup> Jesu puecasacari pocuanu, nojuajaari tacanishaaquiaari na pueya shootiasacarijia nojuaja. Cohuajajinia shaajemaari pueya niquiyaquiniuucaaji nojuaja. <sup>10</sup> Nojori mautasacari jiya cajiniocua Jesu tacasacari, canashiyaquiji, caapiqui pueyari nojori shuriucua nujuatuquiaari. Nojori toqueeri jiyanohua cohuajaque quiriqiaa. Nojoriiri jiyocuaaanujinio Pueyaso seya quiquiaari. <sup>11</sup> Nojoriiri Jesu pueya sequeere:

–Galilea jiyajiniñinio pueyanaa, ¿casaara nia mautaa jiyocuacaanuni? Taa nia niquirii tacaanocuajani, niaari naa na niqiniutianiya tacatehuanohuajuhuj.

<sup>12</sup> Nojoriiri jiyacari Olivo nacuhua tuhananuucua quiriqiaa. Pueyaso seya nuhuaji, Jesu pueyari Jerusalén tiacajiniocua tacatequiaari. Cuniquiji, cateca naataja quiquiaari Jerusalén tiaca. Moisés Naajiotasanojiniji, Judiocuacaari naa rootasaaquiaari maja socua tucuacaanu nojori rucuanenura samaatenu juuca. <sup>13</sup> Nojori tiuquijiosacari Jerusalén tiacajinia, nojoriiri nojori quijia tijajinia tiuquitiaquiaariuhua. Nojoriiri nataco tacataquiaari na sohuacajinia, tee nojori sashiquiaari Pueyaso Sohuanucuajani. Nojoriiri quiquiaari Pedro, Juan, Santiago, Andrés, Felipe, Tomás, Bartolomé, Mateo, tamonu Santiagonio cante Alfeo niyanu quiquiaaricuaajani. Quiquiaarijaariuhua Simón, cante tari quiquiaari Romano pueya jatanu panijiacuaani. Mariyata quiriqiaari Judas, Santiago tarajanu. <sup>14</sup> Nojoriiri jiyacari pueyaracaanu Pueyaso seconuuriqiaa tii maajipohuata, mariyata Jesu nucua Mariata, Jesu tapueyocuatatanio.

*Pueya saquiriojosacari Matías Judas niti*

<sup>15</sup> Nojori sashishacari Pueyaso Sohuanu tii, tamonu juuca, Pedroori njuajaquiaari pueya niquiara na sequenura nojori. Naa naasucuatuhuj ciento veinte pueyari tii quiriqiaa puetunujuanaa. Naa nojori sequeereeri:

<sup>16</sup> –Cua tapueyocuaanaa, Pueyaso Sohuanu sequesanoori maja na naata naajaa tajiniu. Seetanujuanaa tari tohuateerucuaari Judasjiniji na pahuatanishano pa supuetanaa jiyaniñia David. Naacuajitij, Judasri Jesu monaarano niishitiqianu tee Jesu quiriqiaaani, nojori na quiatenu. Judasri cunora niqitiosaacanu cumaneeca, naa nojori na niishitiniucua

Jesu quiasaanura. <sup>17</sup> Nojuacuajaari parta Jesu saquiriojosano pueyano quiquiaarijihuaj. Nojuajaari mariyata Jesu jiyaramiquishano quiquiaaa juhua pajaniyajuahua. <sup>18</sup> Tamonu cuhuariquiaari masesaacanu sesa na miishano samitia. Na nuhuaji, tama cusoyareejaarijia. Jiyocuaaanuji tiqianu na nacaraari. Na saracaari cocuaretasee. <sup>19</sup> Jerusalén tiacajinia quiniaa jaara na niishiqianu, nojoriiri cuno cuhuariquiaa sesojoree “Acéldama”. Acéldamaari pueyano rupaajinia sequeya “Nanacha samitia masesano cuhuariquia”. <sup>20</sup> Judasjinijiiri naa naajiotasaaquiaarijuhua tariucuaaanu supuetana David jaaquequejojuajinia. Naa sequeyari:

“Na quiquio cuaara quiiria shaaco. Cuaara quiiria sanaaca, camarujuu”.

Sequeyajaariuhua:

“Tamonu pueyano cuaara jiyatesaaria na poonijosano miiriquiano na niti”.

<sup>21</sup> ‘Cuarta Jesu saquiriojosano pueyanaa, niya quiyacuaja pueya, canapuetucujaja pa tarajaquiaarini pueyaracaanu pa Jiyaniijia Jesu quishacari pata. <sup>22</sup> Nojoriiri Juan niqiuquiaarijuhua Jesu tiuquinyano moojinia, Jesu tacasacariuhua jiyocuaaanunio. Canapuetucujaja puetunu nio niqiuquiaarijanaani, niquiriyatu nojorijinijinio cuaara jiyatesaaria Jesu jiyaramiquishanora, pata na quiniuria, Jesu samiitianujiniji na pohuata-nurajuhua.

<sup>23</sup> Naaratej, pueyari caapiqui pueya saquiriojoquiaari. Cuniqiu quiquiaari José. Nojuajaari socua caapiqui sesaraca quiquiaari: Barsabás, mariyata Justo. Tamonu pueyanoori quiquiaaajuhua, Matías. <sup>24</sup> Na nuhuaji, pueyari naa secojoquiaari Pueyaso:

–Jiyaniijianaa, quiaari puetunu pueya jiuujia niishijajanaa. Canaa quia niishitiri teyano pueyano tari quia saquiriojoreeni, quia jiyaramiquishocoriquiano na quiniuria, Judas niti poonijoriqiano. <sup>25</sup> Judasri quia niquitiosano poonijosanojiniji catecanu sesa na miiniucua, naquiya miishaqui na quianura, sesa miijia na quiniucua.

<sup>26</sup> Na nuhuaji, pueyari naajosano saajia jaquerooree nojori niishiniuria teyanote Pueyaso panishano pueyanoni. Saajiaari Matíascuara tacatasee. Naacujitij, Matiasri Jesu saquiriojosano pueyanora quiquiaarijuhua. Naacujitij Jesu saquiriojosano pueyari juhua juhuanoraja quiquiaariuhua doce.

## 2

### *Pueyaso Sohanu tiuquishacari*

<sup>1</sup> Pentecostés juuca jaara quiquiaari, puetunu Jesuucua tiuniaajanaari rerejono quiquiaari tamonu tiajinia Jerusalén tiacajinia. <sup>2</sup> ¡Canashiyaquiji, paratuuri tojishaquiaari jiyocuaaanuji, juhua paratu pocuaano jyanohua cojuata! Jyanohua tojishaareeri cuno tiajinia tee Jesu pueya cajituriquiaacuajani. <sup>3</sup> Jiyacari, juhua maniiri niqushaaree pueya caco rimianuqueyano. Puetunu nojori cacojuanaa rimianacuriquiaari juhua mani. <sup>4</sup> Jiyacarijij, Pueyaso Sohanuuri puetunu tiajinia quiniaa jiuujiajiniajanaa tiuquirii. Pueyari juhuacatecara tamaatia rupaaca pocuaree. Pueyaso Sohanuuri naa nojori pocooteree puetunujanaa tamaatia rupaaca.

<sup>5</sup> Cuno quishacari, queraatia Judiocuaca puetunu jiyacajinijiniojuanaari camueenu-juriquiaa Jerusalén tiacajinia. Nojoriiri jiyacari Jerusalén tiacajinia queranacunuuriquiaa Pentecostés juuca. Nojoriiri Pueyaso tojtiajaca quiquiaari. <sup>6</sup> Nojori tojishacari cuno cojuatunenu, nojoriiri cuqueree tee Jesu pueya pocooriquiaa tamaatia rupaacacuajani. Nojori tojishacari naatej, nojoriiri jyanohua cushitirii. Naatej, puetunu rucoanaajanaari tama na jiyajinijinio rupaacajaja tojtiajiquiaa, cuno pojori pocosacari. Nojoriiri maja na niishiniu quiquiaari casaara naa nojori miiriini. <sup>7</sup> Nojoriiri jyanohua jiuujiatecoree. Tama sequetooreejaarijia:

–¡Juhuej! ¿Cuno pojoriti maja Galilea jiyajinijinio pueyacuaja naa pocoyaniquitij? <sup>8</sup> ¿Taa nojori pocuaa puetunu coteenu pa rupaacajanaani? Pajaniyacuajaari queraatia tamaatia jiyacajinijinioni, puetunu tamaatia rupaaca pocuajacajanaa.

<sup>9</sup> Seetanujanaari. Cuno pojoriiri Partiya jiyajinijinio nijiono quiquiaari, Media jiyajinijinio, Elam jiyajinijinio, Mesopotamia jiyajinijinio, Judea jiyajinijinio, Capadocia jiyajinijinio, Ponto jiyajinijinio, Asia jiyajinijinionio. <sup>10</sup> Quiquiaarijuhua Frigia jiyajinijinio, Panfilia jiyajinijinio, Egipto jiyajinijinio, África jiyajinijinionio. Cuno Africa jiyajinijinio pueyari quera Cirene tiaca shuriucuaji quiquiaari. Roma tiacajinijinio pueyari tii quiquiaarijuhua, canapueete Jerusalén tiacajinia pacunaa quiquiaaricuajani. Puetunu cuno pojorijianaari Judiocuaca quiquiaari. Noojiaqueyari rasaaquiaari Judiocuacajanaa. Tamasacaari na cararaatiuuquia co miatejosaaquiaari Judiocuacara na quiniuria, Pueyaso tojijiacara nojori quiniu panishacari. <sup>11</sup> Creta jiyajinijinio pueyari tii quiquiaaajuhua, Arabia jiyajinijinionio. Puetunu cuno jiyacajinijianaari tamaatia rupaaca pocuajaca quiquiaari. Nojoriiri socua naa sequetooquiaari:

—¿Taateni? ¡Puetunu pajaniyajaanari cuno Galilea pueya tojtiaani Pueyaso cutara miishano pohuataano, tama pa coteenu rupaajiniaaja!

<sup>12</sup> Puetunu nojorijianaari jiuujiteriquiaa nojori jiyajenenuta. Tama nojorijiaarjia nequesoreetooquiaari nojori tacaaniutia:

—¿Casaa na miitiuyajaanaronjoni?

<sup>13</sup> Tamasaca nojorijinijinoori saaja Jesu pueya macaatirii. Tama nojorijiaarjia tama sequeutooreejaacujua:

—Cuno pojoriqui mashaasequenuya shocuanacuhuata.

*Pedro pohuatasano pueya niquiara*

<sup>14</sup> Jiyacaritij, Pedroori juhuacatecara pocuaree cuno pojori niquiara. Pedroori nujuaturiquiaa narta once pueyata. Na rupaa paaretaree Judiocuaca tojiniuriaari. Naa sequereeri:

—Cuarta Judiocuacanaa, maninia nia tojtitiare casaa cua sequenutaniya niajaniani. Puetunu Jerusalén tiacajinia quiniaajanaa cuaara niishiiria cua pohuatasano. <sup>15</sup> Niaari canaa jiyaniya mashaasequenuyano. Pananucuaajaari shusha taqueejiya. Maja canaa mashaasequenuunu. <sup>16</sup> Niaari canaa tojtitiaa tamaatia rupaaca pocuaano. Niocuajaari taruacuacaanu Pueyaso sequesano caminiujunia Joel pohuatasano. Cuno niaa na niquiayani, cunocuaajaari na sequesano, shusha tohuateyani. Nojuajaari na sequequiaaritij:

<sup>17</sup> “Pueyasoori naa sequeyaquij: ‘Quera jiya puequesacari, janiyari cua Sohuanu niq- uitionutaniya puetunu pueyarajanaani. Naacuajitij, mashiquioriiri janiyajiniji pohuatanutaniya, niyacoojorinio. Cua Sohuanuuri cua niishishano niqitiniu- tianiya mashiquiori juhua na maquenujinia. Cua niishishano niishitiojonutaniya saaquiapue na maquenujiniaaariuhuaaj. <sup>18</sup> Cuno quishacari, janiyacua cua So- huanu niqitioere puetunu cua tojtianaajanaani, canuu, maajipohuanio. Nojori- iri janiyajiniji pohuatanutaniya pueya niquiara. <sup>19</sup> Puereeta cua miishanoori jiya cajiniocua niquishaanutaniya. Cua miishanoori jiyacua niquishaanutaniya- juhuaj, pueya na numootenura. Nanacaari niquishaanutaniya, mani, jyanohua najacanio. <sup>20</sup> Pananuuri ninishiquiria quiniutianiya. Racaari juhua nanacara quiniutianiyajuhaaj. Naa coteenutaniyari jiya puequenura. Na nuhuaji, Jiyani- ijjajanaari rosenutaniya mijiria quiniaa na nequesoreenura, saminiucua pueya, macunucuanio. Na rosesacari, cutara juuca quiniutianiyari, puereetajuhaaj. Jyanohua shanohua quiniutianiyari na rosesacari. <sup>21</sup> Puetunu Jiyaniijia secojonaa pueyajanaari jyanoooshaanutaniya Pueyaso pueya nojori quiniuria’”.

‘Supuetana Joelri naa naajiotaqueiaari Pueyaso sequesano tarijiatej. <sup>22</sup> Naaratej, socua cua tojtitiare cuarta Israel pueyanaa. Jesujiniji nia pohuatanutaniyanijia, Nazaret tia- cajinijinio pueyano. Pueyasocuaajaari pa niishitiquiaari, Jesuuri na jiyarosano pueyano quiquiaari. Naacuajitij, Pueyasoori na poonitijioquiaari pa niquiara jyanohua jiyajeneta casaa na miiniuria. Paacuajaari nocuaji jiuujiatequiaarini pa niquishacari Jesu miishano Pueyaso cumaacata. Na miishanoori maninia quiquiaari pa niishiniuria Jesuuri see- tanujuanaa Pueyaso Jiyarosano quiquiaari. Niajaniyacuajaari maninia niishiya puetunu maninia na miishanojuanaa. <sup>23</sup> Saniniuuja, Jesu jaara niqitiosaarucuaa nijaniya, niaari na quiarucuaa juhua sesa miijia. Na nuhuaji, niaari Pueyaso tojiyashijiaa pueya na moterucuaa maca niyacutesanojinia, taa Pueyaso paniquiaari tarijiacuajani. Pueyasocuaajaari niishiquiaari naa mosaanutaniyari Jesu. <sup>24</sup> Pueyaso cutaraari na sami- tianiriohuacuaa macujiniji. Na carterohua macujinijiri. Majaari quenaaja tamonu cumaacaraca quijia quiniu quiquianu Jesu na jiyojetenura macu quiquiojinia pueyaraca- nura. <sup>25</sup> Pueyaso Sohuanu jaara pohuataquiaari pa supuetanaa jiyaniijia David, nojuajaari juhuacarjia nia pohuataquiaari Jesu sequesocoriquianotej:

“Cua shuriucua niquiquiaa Jiyaniijianijia. Nojuajaari cua shuriucua quiya, cua miaqueta- jara, maja quenaaja casaa teteyatenura janiya. <sup>26</sup> Naaratej, coojiaari timirii. Cua niti taquiriocrateree cua shuquiriniutianijia. <sup>27</sup> Naajuhaaj, cua cusosacari, cua queteeri juhuajaniya quiniutianiya, cua niishishacari quiaari cua tarinitiaaquinutianiya macunucua quiquiojinia. Quiaari cua shu moquijiaaquinutianiya saa maninia miijiaja cua quishacari quia niquiara. <sup>28</sup> Quiaari cua niishitiojoree maninia cua miiniuria, pueyaracaanu quijara cua quiniuria. Quiaari jyanohua cua shuquiri- tianutianiya quiaata cua quishacari pueyaracaanu”.

<sup>29</sup> ‘Cua pueyanaa, paacuajaari niishiyani, pa supuetanaa jiyaniijia Davidri jamosaaquiaari na cusosacari. Na jamaari niya quiyajaa Jerusalén tiacajinia. <sup>30</sup> Nojuajaari niishiquiaari Pueyasoori tari na sequequiaaricuaaja:

“Davidnaa, tamonu pueyanoori supenutaniya quiajanijiniji, jyanohua quia nuhuaji. Cuno pueyanoori Jiyaniijiaa cua jiyatesano quiniutianiya quia niti. Nojuajaari cua

jiyarosocoriquiano Cristo. Seetanujuanaa naa quiniutianiyari Davidnaa. Maja cua sapojonu”.

’Pueyanaa, paacuaajaari niishiyani Davidri Pueyaso sequesano caminiujunia quiquiaari. <sup>31</sup> Naacuaajitij, Davidri Cristojiniji pohuatariquiaa jiyanoahua tariucuaaanujiniji, juhua tari na niquishano. Pueyaso Sohuanuuri na niishitiquiaari taa Cristo miishaanutianiyani. Naacuaajitij, Davidri Cristo samiitanujiniji pohuatariquiaa naa na sequesacari: “Pueyasoori na tarinitiaaquiniutianiya macunucua quiquiojinia”, mariyata naa na sequesacari: “Na quete moquijiaaquiniutianiyari”. <sup>32</sup> Pueyasoori nio Jesu samiitianiriohuacuaa. Na samiitanu nuhuaji, puetunu canaajanaari na niquiquianuni. Janiyari nia pohuataa seetanu canaa niquishanojuanaani. <sup>33</sup> Cutara na cumaacata, Pueyasoori na tacaniriohua na miaquetajara cajiriquiano, Jiyaniijajanaa na quiniuria. Na nuhuaji, Jesuuri Pueyaso Sohuanu maseree na Quejiniji, taa Pueyaso sequequiaari tarijiacuajani. Jesuuri saniniuujia quiarijia canaa na niquitioree. Naaratej, niaari canaa niquirii tamaatia rupaaca pocuaano. <sup>34</sup> Majaari David tacanu quiquiaari jiyocuaaanu cutara. Nojuacuaajaari Jesujiniji sequequiaari:

“Jiyaniijia Pueyasoori cua Jiyaniijia sequequiaari: <sup>35</sup> ‘Cua miaquetajara quia cajishiiijaara, janiya cuaara quia paraa shocotarejaatijia’ ”.

<sup>36</sup> Cunora, puetunu niajanijajanaa Israel pueyanaa, niaa cumaati niishiya, Pueyasocuaajaari nio Jesu jiyatecanu Jiyaniijajanaa na quiniuria. Niaacuaajaari niyacutesanojinia na mocanucuaaja. Nojuajaari Cristo, Pueyaso jiyatesano Jiyaniijiaara. Majaari canaa pohuatasanojiniji nia taacanunu pueyanaa.

<sup>37</sup> Pueya tojishacari naa Pedro pohuatasanotej, nojoriiri tetecatuquiaari. Pueyari saniniuujia Pedro nequesotaquiaari, na cojiniaanio:

–Canaa pueyanaa, ¿taa canaa miiniutianiyarinijia?

<sup>38</sup> Pedroori nojori riucaquiaari:

–Nioojia nia tacatore sesa nia miiniujiniji. Niajanija cuaara moojinia tiuquinijosaaaria Jesucristoocua nia tiuushacari, nia jiyanooshaanura sesa nia miishanojiniji. Naa nia miishacariitij, Pueyasocua nia niquitiore na Sohuanu. <sup>39</sup> Pueyaso sequesacari nojuaja na Sohuanu niqutionutianiya pueya, cunoori niaaranocuaaja, nia niquiohuanonionio, tucuaaanu quijiacarajuhuj. Pueyaso Sohuanucuaajaari puetunu pueyajanaa niqutiosaanutianiya, cana pa Jiyaniijia Pueyaso sequeya na muerasura na quiniuracuajani.

<sup>40</sup> Pedroori jiyacari pueya pohuataree queraatia socua Jesujiniji na niishishano. Jiyanoahua nojori nacasureeri. Naa nojori sequereeri:

–Nioojia nia tacatorohua Pueyasocua, maja Jesu ruuretajaca nia cojiritiasaanura quejoonu mani quiquiojinia.

<sup>41</sup> Pedro pohuatasanoocua tiuuniaari tiuquinijosaaquiaari. Cuno juuca, tres mil pueya naasucuaari coteenu Jesu tojtianaa rupuenaa quiquiaari. Pueyaso pueyari naa canequiaaritij. <sup>42</sup> Puetunu nojorijianaari maninia tojtiaquiaari pueyaracaanu Jesu jiyaramiquishano pueya niishitiojosano. Nojoriiri jatiqui quijia maninia. Majaari nojori juayonuujutanu quijia. Nojoriiri pueyaracaanu rerejojua neecaruu serotanura Jesu cusonu niishiniuria. Mariyata Pueyaso secojonuujua pueyaracaanuuri.

#### *Panitioojuaca Jesu tojtianaa quishacari juhua tapueyocuaata*

<sup>43</sup> Jesu jiyaramiquishano pueyari jiyajeneta miishano miijioriquiaa Pueyaso cumaacata. Naacuaajitij, puetunu pueyajanaari puereturiquiaa. Pueyari shiriqutiuri. <sup>44</sup> Puetunu Jesucua tiuuniaajanaari maninia rupuetooquiaari juhua tapueyocuaata. Nojoriiri maja jamuejaca quiquiaari. Casamiriaca pueyari na casami niqutiojoquiaari nareja casamiijiuniucua pueya. <sup>45</sup> Tamasacari na jiiitasano casami niqutioquiaari na cumaneeca na masenura na casami sami. Na cumaneeca na masenu nuhuaji, nojoriiri tamasa niqutioquiaarijuhuj, casamiijiuniucua jiiitanura puetunu nojori panishanojuanaajuhuj. Tamasaca pueyari na cuhuariquia niqutioquiaari nojori jiiitanura na cumaneeca, tamasa na naacunurajuhuj. <sup>46</sup> Nojoriiri jatiqui rupuetooquiaari. Nojoriiri rerejojua puetunu juucajanaa Pueyaso Secojoua tiajinia. Mariyata tama nojori tiajiniajaaja nojoriiri rerejojua, neecaruu neecasenura Jiyaniijia Jesu cusonu nojori niishiniuria, mariyata jatiqui nojori miaquenuunura nojori shuquiriniutia. Nojoriiri maninia jiuujaraca quiquiaari. Nojoriiri maja tamonu pueya shocotanu panijiaa quiquiaari. <sup>47</sup> Nojoriiri pueyaracaanu Pueyaso manihuuaqueetariquiaa nojori shuquiriniutia. Puetunu Jesucua tiuyashijiaa pueyajanaari nojori paniquiaari. Puetunu juucajanaa, Jiyaniijia Jesuuri nojori canijiariquiaa, socua pueya tiuushacari nocua.

### 3

*Sesarunocua pueyano jeeacasacari*

<sup>1</sup> Tamonu juuca, Pedroori Juanta tacatariquiaa Pueyaso Secojojua tiajinia. Tari quiquiaariiri pananu piriushacari. Nojoriiri jiyacari quiojonu jiiitiquiaari Pueyaso secjonura Secojojua tiajinia. <sup>2</sup> Jiyacaritij, tamonu sesarunocua pueyanoori tii cajitiariquiaa Secojojua tia tohuateyaji. Nojuajaari naa rasanohuanaja quiquiaari. Pueyaracaanu patoojotasaquaaariiri Pueyaso Secojojuaajiniara, pueya na mashiniquiniuria cumaneeca nojori tiuquitasacari. Na cajitiasaqui tohuateya sesa quiquiaari “Tohuateya Maniniu”. <sup>3</sup> Sesarunocua pueyano jaara niquiquiaari Pedro, Juannio, nojori tiuquitianu panishacari Secojojua tiajinia, nojori maseree juucua na cumaneecaari. <sup>4</sup> Pedroori Juanta na shootiaree tacuriitia. Jiyacaritij, Pedroori na sequeree:

–Canaa quia niquiri.

<sup>5</sup> Sesarunocuaari juucua shootiariquiaa nojori. Cumaneeca niqutiosaariquiano jiyaniriquiaa juucuaari. <sup>6</sup> Pedroori na sequequiaari:

–Shaaqui cua cumaneeca. Shaaqui tojetaarucujanaa. Naajaa, cua jiiitiasanota quia naacureera quiarijia. Quia sequeya Jesucristo sesajinianijia: “Quia sanere. Quia rucanerejuhuaj”.

<sup>7</sup> Pedroori na juashiquiaajiniji na quiaquiaari. Na nujuatereeri. Na niohuacaari jiyacari ritia jeequequiaari na sanesacari. Na sairi maniniuiaacara quiquiijuhuaaj. <sup>8</sup> Sesarunocuaari juhuacatecara rucuaneguaari. Nojoritia tiuquiquiaari Pueyaso Secojojua tiajiniaari. Maninia rucuaneriquiaari. Jaacatariquiaari. Pueyaso maniniuahuacquetariquiaajariuhuaaj. <sup>9</sup> Puetunu pueyajanaari na niquiquiaari rucuaneyano, Pueyaso maniniuahuacquetaanohuhaaj. <sup>10</sup> Puetunu pueyajanaari na niishiquiaari nojuajaari sesarunocuaaja, Secojojua tiajinia tohuateya Maniniuajinia cumaneeca mashiniquiijiojuatej. Pueyari cunora jiuujiatequiaari. Jiyanohua shirriquitiuquiaariiri.

*Pedro pahuatasacari Pueyaso rupaa pueya niquiara*

<sup>11</sup> Sesarunocuaari Pedro juashiquia carteyaquiquiaari, Juan juashiquiano. Nojoriiri Pueyaso Secojojuaajinia nujuaturiquiaa tamocora. Nojori nujuatusaquiiri pueya jiyaniquishano tariucuaaanu jiyaniijia Salomón canujuucojojua quiquiaari. Puetunu pueyajanaari nocua netecuatuquiaari na shirriquiniutia. <sup>12</sup> Pedro niquishacari nojori, pueya sequequiaariiri:

–Cuarta Israel pueyanaa, ¿casaara nia jiuujiateya nocuajini? ¿Casaara nia niqutiaa canaani? ¿Niaate jiyaniya canaa na niohuaca jeecareeni? Maja canaa. Majaari canaa cumaacata na jeequenu qiriiri. Niaa naacuaari jiyaniya canaari nio miiriini socua maninia miijia canaa quiniucua Pueyaso niquiara tamasaca pueyajiniji. ¡Maja! <sup>13</sup> ¡Jesucuaajari na jeecarohua! Nojuacuajaari na Que Pueyaso jiyatesano jiyaniijijanaa na quiniuria. Jiyaniijijanaara na jiyatenacuaajari Pueyaso, cante nio pojori pa supuetanaa jiyaniijia quiquiaaricuaajani: Abraham jiyaniijia, Isaac jiyaniijiano, Jacobo jiyaniijiajuhuaj. Tama pa supuetanaa jiyaniijia Pueyasocuaajari Neyanu Jesu jiyatequiaari jiyaniijijanaa na quiniuria. Niaa cutaraari Pueyaso Niyanu niqutiocanu jiyaniijia Pilato, nojuaja na motenura. Pilato cartenu panishacari Jesu, majaari nia paniniu quiquianu na cartesaanura. <sup>14</sup> Niaa maara maninia pueyanocuaaji tacucanu saniya cutara, niaari pueyano puecojuaacua shirriquitiurii saaja Pilato cartenura jiyano sesoriquia pueyano seque. <sup>15</sup> Niaari naa motecanu pueyano samitianijiacuajatej. Naajaa, Pueyasoori na samitianiquianuhua macujiniji. Canaari na niquiquianuni. Naacuajitij, canaari nojuajiniji nia pohanuani. <sup>16</sup> Nio sesarunocua pueyanoori Jesuucua tiuuri. Naacuajiti jeequerohuari. Nojuacuajaari sesarunocua quiquiaari taa nia niquiquiaaricuaajanoj. Jesuucua na tiuushacari, na cuaqueya cumaquiriiri. Na cuaqueyari seetanujanaa jeequerohua maninia, taa nia niquiyacuajanoj. <sup>17</sup> Cuarta Israel pueyanaa, quiarijia niishiyaniijia, majaari nia niishiniu quiquianu casaa nia miiquianuni. Majaari pa camarucua niishiniu quiquianujuhuaaj. Niaari Pueyaso Jiyarosano mocanu nia niishiyaquishacari cante nojuaja quiquianuni. <sup>18</sup> Naacuajitij, Pueyasoori na sequesano tohuateecanu, tarijia na niishitishano na rupaa caminiujunaa. Seetanujanaa, puetunu Pueyaso sequesano caminiujunaaajanaari pa supuetanaa niquiara poojotaquiaari: “Pueyaso Jiyarosanoori naquiya miishaanutaniya”. Jesuuri naa miishaacanu taritij. <sup>19</sup> Naaratej, nioojia nia tacatore sesa nia miishanojiniji. Pueyasoocua nia tacaterohua sesa nia miiniu tuusaaanura. <sup>20</sup> Naacuajitij, pa jiyaniijia Pueyasoori na naata juhua maniniushiquiariria jiyatenuhua pajaniyara, shuquiriaatia pa quiniuhuara mijiria na jiyarosacariuhua Jesu. Pueyasoori tarijia na sequequiaari pa jiyaniijia nia quiniuria. <sup>21</sup> Nojuajaari jiyocuaaanu quiniutianiya na Que shuriucua, Pueyaso cuara tucuatereajitij puetunu tariucuaaanu na pohanatishanojuanaa na sequenu panishano caminiujunaa. <sup>22</sup> Moiséscaajari naa sequequiaari pa supuetanaatej:

“Jiyaniijia Pueyasocuaajaari niaacua jiyaronutaniya nojuajiniji pohuatana tama nia niqiuohuacuajinio supuenojuaaja, taa na jiyaroquiaari janiyacuaani. Nojuaja jaara supuere, niocua puetunu na sequesanojuanaa tojiri. <sup>23</sup> Canapueete cuno pueyano pohuatasano ruuretanutaniyani, nojoriiri Pueyaso saquiriojosano pueya tajiniji shaajasaanutaniya puetunurajanaa”.

<sup>24</sup> Pueyanaa, puetunu Pueyaso sequesano caminiujiuniaajanaari Moisés nuhuaji naa Jesujiniji pohuatannuquiaarijiuhuj. Naacuajitij, Samuelri Jesucristojiniji pohuataquiaari taa na niniutianiyani. Naajuhuj, Samuel nuhuaji, puetunu Pueyaso sequesano caminiujiuniaajanaari naa pohuatannuquiaarijiuhuj. <sup>25</sup> Puetunu Pueyaso sequesano Jesujiniji-jianaani, cunoori quiarijia pajaniyara, taa Pueyaso pohuataniquiaari tariucuacaanu na sequenu panishano caminiujiuniaacuajani. Nojoriiri pa supuetanaa quiquiaari. Pajaniyara-nojaariuhuj Pueyaso sequesano pa supuetana Abraham. Pueyasoori naa sequequiaari pa supuetana Abraham:

“Quia muetusanojiniji tamonu pueyanoori supuenutaniya quia nuhuaji, cante pueya shuquiritiniutianiya puetunu jiyacajiniajanaacuajani”.

<sup>26</sup> Pueyaso jaara na tojjia Niyanu samiitianiquianu, coteenu na jiyaroree pocuaari poojia tacatoriquiano, sesa pa miiniu pa cartenura, shuquiriaatia quiijara pa quiniuria.

Pedroori naa pohuataquiaari pueya niquiaratej.

## 4

### *Judiocuaca camarucua nequesoreesacari Pedro, Juannio*

<sup>1</sup> Pedro pohuatasacarijia pueya niquiara, nocua nijioquiaariiri pueyacuara secojonaa, Pueyaso Secojoua tia cojuanaata, Saduceocucatanio. <sup>2</sup> Nojoriiri Pedro tojiquiaari pueya niishitiojiano. Nojuajaari pueya niishitiojioriquiaa macuncuaari saneecuautunaniuhua na jamacajiniji, naatej taa Jesu samiitiarohuacaani. Cuno jiyaniijianucua jaara naa tojiquiaari seqeshiyanotej, nocuaji jiyanohua juaaquoquiaariiri, na ruretasacari Pedro sequesano. <sup>3</sup> Cuno juaaquiyoanoori Pedro quiatuquiaari, Juannio. Jiyacariiri tariucua tenacari quiquiaari. Tariucua niucua nujuatejosaquiaariiri. Nojoriiri tii juhuaquequiaari nujuatejojuajinia. <sup>4</sup> Naajaa, queraatia pueyari Jesuucua tiuquiaari Pedro pohuatasacari Jesujiniji. Quera cinco mil saaja canuuri tari Jesuucua tiuuniaa quiquiaari. Maajipohuari serojosoo quiquiaari.

<sup>5</sup> Tariqui, Judiocuaca camarucuaari rerejoquiaari camarucua nacasunaata, Moisés Rootasanojiniji niishitiojonaatanio. Nojoriiri Jerusalén tiacajinia rerejoquiaari Jesujiniji pohuatanaa nojori nequesoreenura. <sup>6</sup> Anásri tii quiriqiaajuhuj. Nojuajaari pueyacuara secojonaa jiyaniijia quiquiaari. Caifásri tii quiriqiaajuhuj, tamonu Juannio, Alejandro-nio, mariyata puetunu secojonaa jiyaniijia tapueyocuaani. <sup>7</sup> Pedro, Juannio, nojoriiri nujuatejojuajiniji tohuatejosaquiaari. Nujuatejosaaree jiyaniijianucua tajiniaari. Pedro shocua, Juan shocua cajitiuniaari nojori nequesoreere:

—¿Taa nia miirucuaa noonijia, sesarunocuatej? ¿Cana cumaacata nia jecarohuacuanaoj? ¿Cante nia sequecanu naa nia miinuriiani?

<sup>8</sup> Jiyacariitij, Pueyaso Sohuanuuri Pedro jiuujia cumaquiaari Pueyaso niishitijata na pocuanura. Naacuajitij, Pedroori naa nojori riucuaquiaari:

<sup>9</sup> —Canaa camarucuaanaa, nia pohuatareera sesarunocujiniji, taa na jeequerohuacaani. <sup>10</sup> Naa canaa nequesoreetaate, nia tojitiare canaa sequesano, nia niishiniuria cua pohuatasano, puetunu Israel pueyajanaa niishiniurijuhuj. Nio pueyano niya nujuaani, nojuajaari Jesucristo cumaacata jeequerohuacuaa. Niaari Nazaret tiacajinijinio Jesu cusojuacanu niyacutesanojinia. Pueyaso cutaraari na sanacanhua macujiniji, pueyaracaanu na quiniuhua. <sup>11</sup> Niajaniyari juhua saitia tijonaa Pueyosora. Nia tiasacari, niaari maniniujajau saajia jataquiaari, nia jiyaniishacari sesaruujajau naasucua. Na camaruuri saniniuuja sequeya:

“Cuno nia jatasano saajiani, cunoori saniya cua maniniujajau saajia”.

Niaari naa Jesu jataquiaari juhua saajia sesaruujajau. Naajaa, Pueyasoori na niaquiaariuhua socua maniniushiqui. <sup>12</sup> Majaari tamonu quiniu pocuaji tacuna. Puetunu pueya tajinijiniojuanaani, maja Pueyaso tamonu pueyano sesa jiyaniquiniu quiquiaari cante pocuaji tacuriquianoni. Saaja Jesu cutaraari sequesaaquiaari pocuaji tacuriquianora.

<sup>13</sup> Judiocuaca camarucuaari jiyanohua na namijiaa riunitiuquiaari nojori niquishacari taa Pedro, Juan seetanujuanaa cumaacata pohuatariquiaa nojori niquiarani. Nojoriiri Pedro, Juan niishiquiaari nojoriiri seetanujuanaa maja puera naajionuujuaca quiquiaari. Nareja poonijionuujuaca pueyajinijinio quiquiaariiri. Naa nojori niishishacariitij, nojoriiri seetanujuanaa niishirii nojoriiri Jesu cojiniaa quiquiaari.

<sup>14</sup> Sesarunocua jeequenohuari cuniqui nojori shuriucua nujuariquiaajaacuhuj.

Naaratej, jiyaniijianucuaari socua sanaajetaquiaari. Saaja niishiriojonuuriquiaari.<sup>15</sup> Camarucuaari Pedro, Juan tohuatanijioquiaari tamocora nojori tajiniji. Jiyareta camarucuaari tama pocoojoquiaariijaaja.<sup>16</sup> Naa sequetuquiaariiri:

—¿Taa pa miya socua nio pueyarini? Puetunu Jerusalén tiacajinia quiniaajanaari nojori cutara miishanojiniji niishiya. Majaari pa naata seetanu parta Israel pueya, pa sequenura nojori, cuno sesarunocuaari jeecasoo. Nojoricuaajaari tari maninia na niishitiuya.<sup>17</sup> Nio pojori pa piriyojore juhuari, maja socua quiarijia nojori pohuatanura Jesujiniji pueya niqiuara, nojori miishano paaqueyaquiniuria socua niya pa tiacajiniani.

<sup>18</sup> Camarucuaari socua piiquiaariuhua Pedro, Juannio. Nojori nacasuree jiyanohuari, maja socua quenaaja nojori pohuatanura Jesujiniji pueya niqiuara.

<sup>19</sup> Pedroori Juanta nojori riucuaquiaari:

—¿Canaatucua casaara Pueyaso samiritiare canaa tojiniuria nijaniyani? ¿Taa nia sequyani jiyaniijianucuaanaa? <sup>20</sup> Maja cutaraari canaa naata tarinitianu pohuatanu canaa niquishano, canaa tojishanonio.

<sup>21</sup> Camarucuaari nojori piriyojoquiaari juucuhuaaj. Puetunu pueyajanaari saaja maniniuhuaqueetariquiaa Pueyaso, puetunu maninia na miishanojinijijianaa. Naaratej, camarucuaari socua Pedro tarinitiaquiaari Juannio. Majaari na mojoosaanu quirii.<sup>22</sup> Pedro jeecasanohua sesarunocua pueyanoni, nojuajaari cuarenta marijia shoocotejoquiaari tari na quishacari.

### *Jesu pueya secijosacari Pueyaso, na cumaquiniuria nojori*

<sup>23</sup> Pedro, Juan jaara cartesaaquiaari, nojoriiri narta Pueyaso pueyacia quiojoquiaariuhua. Nojori pohuatatureeri Judiocuaca camarucua sequesano nojori, camarucua nacasunaa sequesanojuhuaj.<sup>24</sup> Na tojishacari camarucua piriyojosano, puetunu nojorijianaari Pueyaso secijonu coteequiaari. Naa sequetuquiaariiri:

—Canaa jiyaniijianaa, quiaari jiya cajiniocua shipininia, jyanio. Shoniniacu caminiaari quia shipinishanojuhuaj. Puetunu casaajanaari quia shipinishano. Quiaari jyanohua maninia.<sup>25</sup> Canaa supuetanaa jiyaniijia Davidri quia seru quiquiaari. Naacuajitij, quia Sohanuuri na pohuatequiaari quia sequesano Jesujiniji juhua tariucua miishano. Quiaari naa na pohuatequiaariitij:

“¿Casaara jiyacia quiniaa pueya juayani? Pueyari najuhuana sesa niishiriojoriquiaa juucua.<sup>26</sup> Jiyajinijinio jiyaniijianucuaari na juaaquiaca sanetaree. Queraatia tiacajinijinio camarucuaari jiyaniijia Pueyasoocuaa roojotooree, na jiyarosano Cristocuaranio”.

<sup>27</sup> Pueyasonaa, naacuaaquinatejaj. Jiyaniijia Herodes, Poncio Pilatonio, nojoriiri nio tiacajinia rerejocanu narta taucucata, Israel pueyatano. Quia Niyanuucuaa roojotoocanuuri, tama quia jiyarosanoocuarajaaja.<sup>28</sup> Naa nojori miiniucuatej, nio pueyari tari quia miini panishano miiriucuaa, taa quia sequequiaari tariucuaaanucuaajani: “Cua Niyanu cuara mosaaria puetunu pueyacuarajanaa”.<sup>29</sup> Canaa Pueyasonaa, quia tojishuriucuaraj. Nojoriiri quiarijia canaa miananojiya saniniuuja. Canaacuaajaari quia seyani. Canaa jiuujia quia cumaquiri quiarijia, canaa pohuatanura socua quia rupaa canaa puereyaquiniutia.<sup>30</sup> Cusosuhua cuara naatanijiosaaria quia cumaacata. Canaa jiyaniquishacari quia Niyanu sesa, jiyajeneta casa cuara miijiiosaaria quia cumaacata pueya niquishocoriquiano. Nojuacuajaari saa maniniaja.

<sup>31</sup> Nojori puecasacari secijonu, nojori quishaqui tiaari canashiyaquiji jiuuquiuti- aquiaari. Pueyaso Sohanuuri puetunu nojori jiuujiajinia tiuquiquiaari, nojori na cumaquiniuhua. Naacuajitij, pueyari saaja maninia pohuataquiaari Pueyaso rupaa pueya niqiuara. Majaari na pueretunu quiquiaari.

### *Jamueyashijiaca Jesu tojtianaa quishacari*

<sup>32</sup> Jesuucua tiuniaari maninia juhua rpuetootesano quiquiaari puetunujuanaa. Nojoriiri juhua seetanujanaa tapueyocucataja quiquiaari. Majaari nojori sequenu quiquiaari: “Cua casami saaja quiria quiniutianiya”. Nojori jiiitasano casamiiri saniniuuja puetunu narta Jesuucua tiuniaarajanaa quiquiaarijuhuaj.<sup>33</sup> Jesu saquiriojosano pueyari Jesu samiitianujiniji poojotaquiaari jyanohua cumaacata. Naajuhuaaj, Pueyasoori puetunu Jesuucua tiuniaajanaa naacuriquiaa jyanohua, shuquiriaatia nojori quiniuria.<sup>34</sup> Puetunu Pueyaso pueyajanaari na panishano jiiitiaquiaari puetunujuanaa. Nojoriijini- jinio jaara cuhuariquia jiiitiaquiaari, tiano, nojoriiri na niqutioquiaari cumaneecara.<sup>35</sup> Jaara cumaneeca masequiaari na casa sami, nojoriiri nareja na niqutioquiaari Jesu saquiriojosano pueya. Nojoriiri saniniuuja casamiijiu Pueyaso pueya na serotaquiaari, nojori jiiitianura na panishanojuhuaj.<sup>36</sup> Nojoriijinijinio, tamonu pueyanoori quiquiaari. Na sesaari José, Levita pueyano. Jesu jiyaramiquishano pueyari na sesojoquiaari Bernabé.

Nioori sequeya “Cumanijiana”. Chipre jiyajinia na raja. <sup>37</sup> Bernabeeri cuhuariquia jiiti-aquiaari. Na cuhuariquia niqutioquiaari cumaneecaraari. Jaara masequiaari cumaneeca na cuhuariquia sami, nojuajaari nareja na niqutioquiaari Jesu jiyaramiquishano pueya, casamijiu narta Pueyaso pueya niqutiojosaanura saniniujuja.

## 5

### *Ananías, Safira sesa miishanojiniji pohuatasano*

<sup>1</sup> Tamonu pueyanoori quiquiaari. Na sesaari Ananías quijia. Necocua sesa quiquiaari Safira. Nojoriiri na cuhuariquia niqutioquiaari cumaneecarajuhuj. <sup>2</sup> Ananíasri na cuhuariquia samijiniji queyataquiaari nera. Na cureno pataquiaari Jesu saquiriojosano pueyacuuaari. Juhua papatasoo niqutioquiaari na sapojonutaari. Necocuaari na miishano niishiquiaarijuhuaj. Majaari neyacata na quiniu quiriquiaa Ananías niqutiosacari nareja na cumaneeca. <sup>3</sup> Ananías niqutiosacari na cumaneeca, Pedroori na sequere:

—Ananíasnaa, ¿Casaara quia tiuquinirii Sesaaca quioojajiniani, quia sapojonura Pueyaso Sohuanu juucuani? ¡Nojuacuajaari cua niishitiquii nio cumaneecaari maja puetunu quia masanojuanaa quia cuhuariquia samijiniji! ¡Quiaacuajaari tiji queyataree! <sup>4</sup> Quia cuhuariquia quia niqutioyaquishacarijia cumaneecara, cuno cuhuariquiaari quia casaa quiriquiaa. Na nuhuaji, quiaa jaara quia cuhuariquia niqutioree cumaneecara, quia cuhuariquia samiiri quia casaa quiriquiaajuhuj. ¿Casaara naa sesa quia niishiriojoreerini? Naa sacuraata quia miishacaritij, majaari quia sapojonu quirii parta pueyano. ¡Quiaa cutaraari Pueyaso sapojoree juucua!

<sup>5</sup> Ananías tojjishacari naa Pedro sequesantej, ¡macuuri pojoquee! Puetunu pueyajanaa jaara tojinuuquiaari nocuaji, jiyano hua shiriqutioquiaariiri. <sup>6</sup> Mashiquioriiri na jiunio-coquiaari toquejinia. Na nuhuaji, na patuquiaari na jamonuraari.

<sup>7</sup> Jiuujianaraca hora nuhuaji, necocuaari juhuajaniya tiuquiquiaari Pedroocajuhuj. <sup>8</sup> Pedroori na nequesotaree:

—Cua sequere, ¿niojuanaate nia cuhuariquia sami quiriucaaa?

Na riucaareeri:

—Jaa, niojuanaacuaaquiniatejaj.

<sup>9</sup> Pedroori na sequere:

—¿Casaara naa nia roojotoorucuaa Pueyaso Sohuanu nia sapojonurani? Quia niquiri. Cuno mashiquioriiri quia niyaca jamonu nuhuaji shusha tiuquijiohua. Nojoriiri quiarijia quia panutaniyajuhuj.

<sup>10</sup> Jiyacaritij, maajiri macu pojoquee Pedro shuriucajuhuaj. Mashiquiori tiuquijiosacarihua, nojoriiri Safira niquishuhua pojijanojuhuaj, tariucua macu. Nojoriiri na patuquiaarijuhuaj. Neyaca shuriucua na jamotuquiaariiri. <sup>11</sup> Puetunu Pueyaso pueyajanaa, tamasaca pueyano, nojori jaara tojinuuquiaari puetunu nio miishanojinijianaa, jiyano hua pueretuquiaariiri.

### *Queraatia mijiosacari Pueyaso cumaacata pueya niquiara*

<sup>12</sup> Jesu jiyaramiquishano pueyari jiyano hua cutara casaa mijioquiaari Pueyaso cumaacata. Queraatia pueya naatanijioquiaariiri. Puetunu Pueyaso pueyajanaari pueyaracaanu rerejoquiaari pueya jiyaniquishano tariucuaaanu jiyaniijia Salomón canujuucojojua-jinia, Pueyaso Secojoja tija-jinia. <sup>13</sup> Tamasaca pueyari nojori puerequiaari. Majaari nojori rupesaanu quijia. Na pueretujuacaari nojorijiniji sequetujua:

—Cuno pojoriiri maninia pueya.

<sup>14</sup> Queraatia pueyari Jiyaniijia Pueyasocua tiuquiciaari, canuu, maajipohuanio. <sup>15</sup> Naajuhuj, cusosuhuari patootasaaquiaari na maquetucujinia nuujiniara. Pueyari naa niishiriojoquiaari, Pedro jaara cusosuhua shuriuquioco tajimia, cusosuhuari naat-aconutanihua Pedro naaqui jaara nojori caco netema. <sup>16</sup> Queraatia Jerusalén tiacacajiniara. Samaruhua sesosano pueyari jaatucunuusaaquiaarijuhuaj. Puetunu pueyajanaari naatanijosaaquiaari.

### *Pedro, Juan nujuatejosacari nujuatejojuajinia*

<sup>17</sup> Naaratej, pueyacuara secojonaa jiyaniijia, nata quiniaa narta Saduceocucacano, nojoriiri juaaquicoquiaari shocotasano nojori quishacari. <sup>18</sup> Secojonaa jiyaniijiaari na pueya jiyaroquiaari Jesu jiyaramiquishano pueya nojori quioonura. Jaara na quiootucuaari, nujuatejosaaquiaariiri Judiucaaca nujuatejojuajinia. <sup>19</sup> Pueyaso seruuri niucua jiyocua-caanuji nojoriuca rosequiaari. Nujuatejojuua tohuateya riataseeri. Na tohuatejosacari Pedro, Juannio, nojori sequereeri:



<sup>20</sup> —Juhujaniya nia quiaarohua. Pueyaso Secojoua tiajinia puetunu Jesujiniijianaa nia pohuatere pueya niquiara. Nia pohuaterejuhuj taa jatanishano pueya nia quiya quiarijiani.

<sup>21</sup> Nojoriiri Pueyaso seru sequesano tojiqiaari. Nojoriiri tariquicuaji quiojoqiaari Pueyaso Secojoua tiajinia. Tii niishitiojonuuriquiaa juhuajaniya Jesujiniji pueyari. Jiyacari, pueyacuara secोजनाa jiyaniijiaari nata quiniaata saniniuujia quiojoqiaari pueya nequesoreesaqui. Puetunu Israel pueya camarucujanaa rerejotereeri, nojori nequesoreenura Jesu jiyaramiquishano pueya. Puetunu nojorijianaa jaara tari rerejoqiaari, na pueya sequeqiaariiri nojori tohuatejonura Jesu jiyaramiquishano pueya nujuatejojuajiniji, nequesoreesocoriqiano. <sup>22</sup> Na pueya jaara tiuquitiqiaari nujuatejojuajinia, majaari nujuatejosano na riuriatatu quishii nujuatejojuajinia. Nojoriiri tacaretacuhua na shaacanu nuhuaji. <sup>23</sup> Naa pohuatanuusuhua camarucua niquiaraari:

—Canaa tiuquishacari nujuatejojuajinia, canaari maninia cumaatia mishiquionucua na riuriataseeni. Tii cojuanaari maninia cojuariquiaa na tiotiu. Canaa riatasacari tohuateya, jshaacoori quiriqiaa!

<sup>24</sup> Secojoua tia cojuanaa camarnu, mariyata pueyacuara secोजनाa jiyaniijianucuaari tama sequetoqiaarijiaaja nojori shiriqiniutia:

—¿Taateerini? ¿Taariquitijia socua na nuhuaji quiniutianiyatej?

<sup>25</sup> Jiyacaritij, tamonu pueyanoori camarucuaacua tiuquishii. Naa nojori sequeeseeri:

—¡Noo pojori, niaa na nujuatejocanu nujuatejojuajiniatej, nojoriiri juhuajaniya pueya niishitiojonuya Pueyaso Secojoua tiajinia!

<sup>26</sup> Tari nojori niishishacari tee Jesu jiyaramiquishano pueya quiriqiaani, Secojoua tia camarnuuri na pueyata quiojoqiaari Jesu jiyaramiquishano pueya quioonura. Jaara na quiootquiaari, nojoriiri jacaria na jaatucunuquiaruhua. Secojoua tia camarnuuri pueya puereriquiaa. Nojori jaara caponeere Jesu jiyaramiquishano pueya na juaaniutia, pueya mariqui nojori jacure saitia saniniuujia. Nojoriiri cuno puereqiaari. Nocuaji Jesu jiyaramiquishano pueyari jacaria jaatucunuusaaqiaari. Majaari na caponeesaanu quiquiaari. <sup>27</sup> Jaara tiuquitijsaaqiaariuhua, nojoriiri Israel pueya camarucujanaa tajinia nujuatejosaaqiaari, Sanedrincuaa tajiniatuhuj. Pueyacuara secोजनाa jiyaniijiaari nojori sequeqiaari:

<sup>28</sup> —¡Majaquiri nia niishiniu tojinii! Canaacuaajaari tari nia tenujucanu juucuanii maja socua cuno Jesujiniji nia pohuatanura pueya niquiara. ¿Niaate nia numaa shama tojiqianu canaa sequesano? Naa nia niishitiojosacaritij, ipuetunu Jerusalén tiacajinia quiniaajanaari canaacua tiutianutaniya Jesu mosaanu! Canaa sequetunutaniyari: “Cuno pojoriiri Jesu motucanu”.

<sup>29</sup> Pedroori narta Jesu saquiriojosano pueyata nojori riucuaqiaari:

—Seetanujanaari, pueya cuara Pueyaso sequesano miiria coteenu, maja narta pueya sequesano. Maja cutaraari canaa tarinitianunoj. Na nuhuaji cutara, nio jiyajinia jiyaniijianucua sequesano cuara miishaaria. <sup>30</sup> Pueyasoori tariucuaaanu pa supuetanaa Jiyaniijia quiquiaarijuhuj. Cuno Pueyasojuaanaacuaajaari niyacutesanojinia nia cusojuasano samiitianiquianuhua. <sup>31</sup> Pueyasoori na tacaniquianu jiyocuaaanu. Na miacuetajara na cajitiqianuuri Jiyaniijianuuri na quiniucua, pocuaji Tacana na quiniucuaajuuhuj. Naa miiquianuuri Israel pueya tacatonuhuaa noojia Pueyasocua, Pueyaso jiyanooniuria pajaniya sesa pa miishanojiniji. <sup>32</sup> Naaratej, canaari canaa tojishano pohuataani, canaa niquishanonio. Naajuhuj, Pueyaso Sohuanuuri canaa niishitiojoqiaa maninia canaa pohuatanura pueya niquiara. Pueyasocuaajaari na tojitianaa niqitioqiaa na Sohuanu.

<sup>33</sup> Naa Judiocuaa camarucua tojishacari nojori sequesantej, juaaquioreeri. Nojori puecoonu panirii juucuaari. <sup>34</sup> Jiyacaritij, tamonu pueyanoori narta camarucua tajiniji nujuaqiaari pocuanura. Na sesa quiquiaari Gamaliel, Fariseo pueyano. Nojuajaari Pueyaso tariucuaaanu rootasano niishijia quiquiaari cutara. Naajuhuj, nojuajaari jiyanohua narta Israel pueya tojishano pueyano quiquiaari. Gamalieli Secojoua tia cojuanaa camarnu sequeqiaari Jesu jiyaramiquishano pueya na tohuatanijonura rupaqijia. <sup>35</sup> Na nuhuaji, saa camarucua quishacarijia tii nata, nojuajaari naa nojori sequeqiaaritij:

—Cuarta Israel pueyanaa, jacaria nia niishirojore taa nia miinutianiya nio pueyani.

<sup>36</sup> ¿Majateeri nia niishiniu taa Teudas miiquiaari quiari naatajani? Nojuajaari jiyaniijia quini paniquiaari juucua. Queraatia pueyari na nuhuajiquiaari, quera cuatrociento pueya. Na nuhuaji, Teudasri mosaaqiaari. Puetunu na pueyajanaari niyaquejoqiaariuhua. Naa puequeqiaariiri Teudas miiniu panishano. <sup>37</sup> Teudas nuhuaji, jiyaniijia César naajiotanishacari puetunu pueya sesacajanaa, Galilea jiyajinijinio tamonu Judasri jiyacari César ruuretaqiaari. Queraatia pueyari na nuhuajiquiaari nojori jiyaniijia na quiniuria

juucua. Nojuajaari mosaaquiaarijuhuaj. Puetunu na pueyajanaari niyaquejoquiaari-uhuajuhuaj. <sup>38</sup> Naaratej, naa nia sequeyanijia: nia tarinitiare nio canuu. Nojori niishitiojosano jaara tama nojori niishishanojuuaaja quiri, shaajenutaniyari. <sup>39</sup> Saniniuujia, nojori miishano jaara seetanujuanaa Pueyasojiniji quiri, majaari nia naata nojori tarinitiniu quiniutianiya nojori miishanojiniji. Nocuaji tama nia cuaqueyajaaja nia cojuare, majaari Pueyasota nia miaquetojonuruhua, naa nojori nia miishacaritij.

<sup>40</sup> Puetunu camarucujanaari Gamaliel sequesano tojiquiaari. Na nuhuaji, Jesu jiyaramiquishano pueyari tiuquinitiasaaruhi. Camarucuaari nojori mojooree nareja. Nojori tenjutureeri maja Jesujiniji nojori pohuatanura socua pueya niquiara. Naa nojori miishaanu nuhuajitij, Jesu pueyari carteqesaaquiaariuhua. <sup>41</sup> Jesu jiyaramiquishano pueyari camarucua rerejojuajiniji tohuareetaquiaariuhua shuquiriaatia. Nojoriiri timiquoriquiaa cararaatia nojori camarucua miiniucua nojori, Jesujiniji nojori poojotanucua maninia. Majaari nojori seetanu quiquiaari nojori Jiyaniijia Jesujiniji. <sup>42</sup> Majaari nojori pishiniu quiquiaari nojori pohuatanura Jesujiniji. Socua pueya niishitiojonura jiyacatequiaariiri. Nojoriiri pueyaracaanu pueya niquiara pohuatariquiaa Jesucristojiniji, puetunu juucajanaa, Pueyaso Secojojua tiajinia, mariyata puetunu Jerusalén tiacajini-aqueyajanaanio.

## 6

### *Mashiquiopue mianuutenaara saquiriojosacari*

<sup>1</sup> Jiyacaritij, Jesuucua tiuunaa pueyari socua canequiaari. Puetunu nio pojorijinijiojuanaani, noojiaqueyari Judio rupaa pocuanaa quiquiaari. Naajuhuaaj, noojiaqueyari Griego rupaa pocuanaa quiquiaari. Jiyacaritij, Griego rupaa pocuanaari juuaquejoquiaari Judio rupaa pocuanaata. Griego rupaa pocuanaari naa sequequiaari Judio rupaa pocuanaatej:

—¿Casaara canaa mashiquiopue nia niqutioyaquiquiaa miaquesanonijia?

<sup>2</sup> Nocuaji, Jesu jiyaramiquishano doce pueyari puetunu Jesuucua tiuunaa pueyajanaa rerejojuiaari. Naa nojori sequequiaariiri:

—Maja maninia canaa cartenura Pueyaso rupaa pohuatanu, canaa mianuutenura mashiquiopue. <sup>3</sup> Cunora canaa tapueyocuaanaa, tama nijaniyajinijinio nia saquiriojore siete maninia miiijaca pueya, niishijaca, Pueyaso Sohuanuraca cutara. Nojori nia seeratare nio poonijosano, maninia nojori mianuutenura pa mashiquiopue. <sup>4</sup> Canaacua saniniuujia saa Pueyaso secojorenijia. Naajuhuaaj, majaari canaa tarinitianu quiniutianiya Jesujiniji niishitiojonu.

<sup>5</sup> Puetunu pueyajanaari na shuquiriniutia naa riucuaquiaari:

—Taaquiriirinij, naacuaaquiniateja maniniaajaj.

Jiyacaritij, pueyari Esteban saquiriojoquiaari. Nojuajaari jiyanohua Pueyasocua tiuujia pueyanu quiquiaari. Nojuajaari Pueyaso Sohuanu cumaacaraca quiquiaarijuhuaj. Nio pojoriiri Estebanta saquiriojosaaquiaarijuhuaj: Felipe, Prócoronio, Nicanornio, Timónnio, Parmenasjuhuaj, Nicolásnio. Nicolásri tahue quiquiaari Antioquiya tiacajinijinio. Tii rasaaquiaariiri. Nojuajaari tarijia Judiocuaca niishitiojosano pueyano quiquiaari, Judio pueyanora na quiniuria. <sup>6</sup> Puetunu pueyajanaa jaara cuno siete pueya saquiriojoquiaari, nojori jiyataquiaariiri Jesu jiyaramiquishano doce pueyacua. Jesu saquiriojosano pueyari cuno siete canuu nacaacua niaquiaari na juashiquiaca. Pueyaso secojoturee nojoriicuaari Pueyaso Sohuanu cumaquiniuria nojori, miaquesano niqutiojonaa nojori quiniuria.

<sup>7</sup> Jiyacariti Pueyaso rupaari socua tojishano quiquiaari. Jesuucua tiuunaaari socua canequiaarijuhuaj. Queraatia Judiocuacaacuara secojonaa pueyari Jesuucua tiuqujaar-ijjuhuaj.

### *Jesu ruuretajaca quasacari Esteban*

<sup>8</sup> Estebanri Pueyaso cumaacaraca quiquiaari jiyanohua. Pueyasoori maninia na jiitiaquiaari. Naacujitij, nojuajaari cusosuhua pueya naatanijioquiaari Pueyaso cumaacata. Pueyari niishiquiaari Esteban pohuatasanoori seetanujuanaa Pueyasojiniji quiquiaari, nojori niquishacari jiyajeneta na miishano Pueyaso cumaacata.

<sup>9</sup> Jiyacariti, tamasaca Judiocuacaari Jerusalén tiacajinia quiriquiaa. Nojori maanuuri sesojosaaquiaari “Quioosanojiniji carteqesano pueya”. Quiquiaarijaariuhua Cirene tiacajinijinio pueya, Alejandria tiacajinijinio pueya, Cilicia jiyajinijinio pueyajuhuaaj, Asia jiyajinijinio pueyanio. Puetunu nojorijianaari Estebanua rerejojuiaari nata juayonuutanura. <sup>10</sup> Nojoriiri maja na naata Esteban shocotanu quiquiaari nojori niishishanota. Estebanri saniya nojori shocotaquiaarija. Nojuajaari Pueyaso Sohuanu niishitiojosanota saa maninia pohuataquiaarija nojori niquiara. <sup>11</sup> Maja socua

nojori rejeretasacari Esteban pohuatasano, nojoriiri tamasaca pueya niqutioquiaari cumaneeca, najuhuana nojori cuaracashiniuria camarucua niquiara Estebancuara. Cuno pueya, cumaneeca niqutiojosaquiaari na cuaracashiniuriani, nojoriiri naa sequequiaari Judiocuaca camarucua niquiaratej:

—¡Taaquiriirinij, canaacuajaari cuno pueyano tojiquianu Moisés sesacaanoni, Pueyaso sesacaanojuhuaj!

<sup>12</sup> Naa nojori sequesacariitij, puetunu pueyajanaari juaaquioree, Judiocuaca camarucua juhuaj, Moisés Rootasano niishitiojonaanio. Puetunu nojorijianaari Estebancua catecanoquiaari. Na quiatuereeri. Na nuhuaji, na jaatucutuquiaari pueya nequesoreesacariiaari, Israel pueya camarucua nequesoreesocoriquiano tii nojuaja. <sup>13</sup> Socua pajesaquiaariiri tamasaca, Estebancuara tonujuriquiano najuhuanaj, na cuaracashiniuria. Cuno pojoriiri naa sequequiaari camarucua niquiaratej:

—Nio pueyanoori pueyaracaanu sesacaquiaa Pueyaso Secojojua tia. Moisés Rootasano sesacariquihuariuhuj. <sup>14</sup> Canaari socua naa na sequesano tojiquiaajaaniuhuj: “Nazaret tiacajiniinio Jesuni, nojuajaari Pueyaso Secojojua tia niyartanutaniya”. Naa juhuaj, tariucuacaanu Moisés niishitiojosano pajaniya pa cartetenutaniyaquiaari.

<sup>15</sup> Puetunu camarucujanaari na cajitiushaqui niqutiariquiaa Esteban. Nojoriiri na jiquioco niquiquiaari shacantuua, juhua Pueyaso seru jiquioco.

## 7

### *Esteban pohuatasano*

<sup>1</sup> Pueyacuara secojonaajiyaniiaari Esteban nequesotaquiaari:

—¿Seetanutejanaa taa nio pojori sequereecuajani?

<sup>2</sup> Nojuajaari na riucaaree:

—Cua panishano pueyanaa, cua camarucua, cua tojitiare. Pueyasoori jyanohua maninia. Nojuajaari pa supuetana Abrahamcua muetaquiaari Mesopotamia jiyajinia na quishacari, na pacuyaquishacarija Harán tiacajinia. <sup>3</sup> Pueyasoori jiyacari naa na sequequiaari:

“Quia tiujiaare quia jiya, quia pueyanio. Niiquiji quia quiaare, janiya cuara quia sequerejaatijia, niya quia quishii. Quiocua tii jiyojese cutara”.

<sup>4</sup> Abrahamri Pueyaso sequesano tojiquiaari. Quiaquiaariiri Caldeo pueya jiyajiniji. Harán tiacajinia quishiiri. Tii shaajaquiaari na shipininioori. Na nuhuaji, niyara pacuquiaariiri, paa tii quiyani. <sup>5</sup> Jiyacaritij, Pueyasoori juhuanajuaja maja Abraham na niqutionu quiquiaari nio jiya. Naacuajitij, Abrahamri maja quenaaja jiya na jitianu quiquiaari tama na quijiarajaaja. Naajaa, Pueyasoori na sequequiaari:

“Janiya na nuhuaji quia niqutionutaniya nio jiyani. Quiaa jaara shaajeyare, quia niquihuara quiniutianiya saniniurijia”.

Pueyaso jaara naa sequequiaari Abrahamtej, Abrahamri jiyacari juhuanajuaja niquihuaju quiquiaari. <sup>6</sup> Pueyasoori naa pacutequiaari sequenu Abrahamtej:

“Puetunu quia jianuucuaajinio supueno pueyajanaani, nojoriiri na niishishoo pueya jiyajinia quiniutianiya. Cuno jiya pueyari nojori poonijiotenutaniya jyanohua. Naa naquiya miishaanutaniyari. Tii nojori quishacari, na shoconjunutaniyari cuatro ciento marijia”.

<sup>7</sup> Pueyasoori Abraham sequerejuhuaj:

“Janiyari saniniujia cuno taucuaa naminiutianiya quicuajinio supueno pueyacuani. Janiyari nojori saniitonutaniya saniniunijia nojori poonijiotenuucua quicuajinio supueno pueya. Na nuhuaji, nojoriiri tiji quiojonutaniuhua niyara. Nojori tiuquijiosacariuhua, nojoriiri cua secojonuujuaa quiniutianiya niya”.

<sup>8</sup> Pueyasoori naa Abraham rootaquiaarijuhuaj:

“Niocua nia cararaatiuquia co miatejore. Cunoori juhua naajiosano nia cuaqueyajinia quiniutianiya, pueyaracaanu nia niishiniuria cua sequesano niajaniya”.

Naa Pueyaso sequesanoori quiquiaari puetunu Israel pueyarajanaa. Naaratej, Abraham niyanu Isaac jaara rasaanuquiaari, na queeri neyanu cararaatiuquia co miatequiaari na camuesacari ocho juuca. Isaacri naa miiquiaari neyanu Jacobojuhuaj. Pueyasoori Jacobo sesojoquiaari “Israel”. Jacoboori naa miiquiaari necohajuahuaj. Necohuari quiquiaari doce canuu. Cuno doce canuu, Jacobo niquihuani, nojoriiri puetunu pa doce Israel pueyapue supuetanaajanaa.

<sup>9</sup> Pa supuetana Jacobo niquihuajiniinioni, tamonuuri sesojosaquiaari José. Tapueyacuacaari José juaajica quiquiaari jyanohua, puera na que panishano José quishacari. Majaari nojori niqutiuniu paniniu quijia nojuaja. Na queeri socua jyanohua José panijia quiquiaari na pueranaajiniji. Tapueyocuacaari cunora casami niqutiojona pueya

niquitioquiaari cumaneecara tarajanu José. Casami niquitiojonaari José jiyataquiaari Egipto jiyajinia, saniniuujia tii na niquitiosocoriquiano serura. Naajaa, Pueyasoori Joseeta quiriquiaa. <sup>10</sup> Pueyasoori na naacuquiaari naquiya na miishacari. Pueyasoori na jiyatequiaari niishijara. Naaratej, Egipto jiya jiyaniijia Faraónri na maniniucuaquiaari. Na jiyatequiaari puetunu Egipto jiya pueya camarnurajanaa. Na jiyateree na tia camarnurajariuhuj.

<sup>11</sup> Na nuhuaji, miaajenuuri quiquiaari puetunu Egipto jiyajinijanaa, Canaán jiyajiniano. Pa supuetanaa quishacari Canaán jiyajinia, nojoriiri quera titiacoquiaari na miyajajara. Seetanujuanaa shaaqui quiquiaari nojori miasano. <sup>12</sup> Jiyacaritij, Jacoboori caminiujuushaaquiaari: “Egipto jiyajinia quiaquinia trigo”. Naaratej, necohua jiyaroreeri trigo masenura. Jiyacari nojori quiojosacarini, cunoori shushajanaa nojori quianu quiquiaari Egipto jiyajinia. Cuno Jacobo niquiohuani, nojoriiri pa supuetanaacuaja. <sup>13</sup> Coteenu nojori masenano jaara puequequiaari, nojoriiri Egipto jiyajinia tacatequiaariuhua socua trigo nojori masenura. Jiyacaritij, Joseeri tapueyocua sequequiaari: “Janiya nia tarajanuni”. Joseeri Faraón niishitiquaari tapueyocujahuaj. Naaratej, Faraónri shusha niishiquiaari tejeno pueyanote José quiquiaarini. <sup>14</sup> Joseeri tapueyocua sequequiaari: “Pa que Jacobo nia riquioo niyara, puetunu necohuatajanaa”. Puetunu nojoriijanaari quiquiaari setenta y cinco pueya. <sup>15</sup> Jacoboori naa pacuquiaari Egipto jiyajinaratej. Na nuhuaji, saaquianoori tii shaajesequiaari. Necohuari tii pueque-sequiaarijuhuaj, tariucua saaquiapue. <sup>16</sup> Na nuhuaji, Egipto jiyajiniji pacusaaquiaariiri nojori nucuhua. Siquem tiacajinia niojosaquiaariiri na supuetana Abraham raaco. Cuno raari cuhuariquiajia quijia. Abrahamri cuno cuhuariquia masequiaari tariucuaaanu pueyajiniji raa na jiitianura necocua na niajara jaara cusoyare. Cuno cuhuariquia masequiaariiri cumaneecata Hamor niquiohuajiniji, Siquem tiacajinia.

<sup>17</sup> Pueyasocujajari tariucuaaanu Abraham sequequiaari nojuajari nio jiya na niquitionutaniya. Quera na niquitionu panishacari, Israel pueyari jiyanoohua canequiaari Egipto jiyajinia. <sup>18</sup> Jiyacaritij, tamonu pueyanoori jiyaniijia quiquiaari Egipto jiyajinia. Cunoori jiyanoohua tarijia quiquiaari José shaajenu nuhuaji. Naacuajitij majaari cuno jiyaniijia niishiniu quiquiaari José. <sup>19</sup> Cuno jiyaniijiaari taraatia miiquiaari shusha roosano pa supuetanaa niquiohua. Pa supuetanaa sequequiaariiri shusha roosano cuaara quejoosaari moojinia. Pa supuetanaari taraatia miiquioquiaari naacuatej. <sup>20</sup> Moisésri jiyacari rasaquiaari. Pueyasoori na maniniucuaquiaari. Na yaari na jiitiaquiaari rupaquijia. Jaara na shoconujuquiaari jiuujianaraca raca, conaajaari carijiniacuma niasaquiaari. <sup>21</sup> Faraón niyatuuiri na paquiaari saniniuujia. Na canashitiquiaari juhua na mueyari. <sup>22</sup> Egipto pueyari Moisés niishitioquiaari puetunu nojori niishishanojuanaa. Puetunu Moisés sequesanojuanaari jiyanoohua tojishano quiquiaari cutara. Puetunu na miishanojuanaari maninia quiquiaarijuhuaj.

<sup>23</sup> Cuarenta marijia jaara shocojoquiaari Moisés, mashaja na quishacarijia, narta Israel pueyacu rucuanenu paniquiaariiri, nojori na niquiniuria. Judiocacacujajari cuno pojori, naa sesojoshiya Israel pueyatani, maja tamonu. <sup>24</sup> Naacuajitij, Moisés jaara quiaquiaari narta Israel pueya niquiniucua, saaja Egipto pueyano niquishii narta Israel pueyano majacuyanoori. Moisésri narta Israel pueyanocua namiquiaari. Na juaaniutia moquiaari saniniuujia cuno Egipcio pueyanoori. <sup>25</sup> Moisésri juucua jiyaniquiaari narta Israel pueyari niishiniutianiya Pueyasoori na jiyaroree nojori na mashiquiniuria Egipto jiyajiniji. Majaari nojori niishiniu quiquiaari saaja. <sup>26</sup> Moisésri socua tariqui quiaquiaari narta Israel pueya niquiniucuaquiohuaj. Nojuajari saaja riuriatasee tama nojori piyotaanojuajaa. Juucua nojori ruparetanu panishiiri. Nojori sequereeri: “¿Niaateeri tamonu, niaa jaara naa miitioyaniquitij? ¿Casaara naa nia nootujutoyani?” <sup>27</sup> Cuno narta pueyano piquiriquiaani, nojuajari saaja Moisés caporee. Na sequereeri: “¿Cante quia jiyatecanu juhua canaa jiyaniijia quia quiniuriani, naa quia sequenura canaatej? ¿Cante quia jiyatecanu canaa nequesoreenarani?” <sup>28</sup> ¿Quiaateeri cua monu panijajuhuj, naatej taa quia morucuaa cuno Egipto pueyanocuaani?” <sup>29</sup> Moisés tojishacari naa cuno pueyano sequesantej, ritia mashiquiaari Egipto jiyajinijiiri. Madián jiyajinia quishiiri tamonu pueya jiyajinia. Moisés quishacari cuno jiyajinia, tii camiquiaariiri. Caapiqui canuunyojuua mueratejoquiaariiri.

<sup>30</sup> Cuniqui na quishacari, na shocojoquiaariiri cuarenta marijia socua. Tamonu juuca, Moisésri rucanejoriquiaa cariquia jiyajinia, pueya sesojosano Sinai tuhuanu shuriucua. Pueyaso seruuri tii nocua muetaquiaari nequeru casaja noshiyanojiniji. <sup>31</sup> Moisés niquishacari mani noshiyano, nojuajari shiriiquiquiaari. Jaara nocua catecanoquiaari na niquiniuria maninia, saaja jiyaniijia Pueyaso tojirii maniniji pucuaanoori. <sup>32</sup> Pueyasoori naa na sequequiaaritij:

“Janiyacuaajaari Pueyasoni: quia supuetanaa Jiyaniijia: Abraham Jiyaniijia, Isaac Jiyaniijia-ajuhuaaj, Jacobo Jiyaniijiano”.

Moisés jaara naa tojiquiaariti, tetecareeri. Majaari mani noshiyano na niquniu paniniu quiquiaari na puerenuta. <sup>33</sup> Pueyasoori na sequequiaari:

“Cuniquijia quia jocojore quia sapatu. Niya, quiaa tii nujuaani, niiori cua quishaqui. <sup>34</sup> Janiyacuajaari cua pueya niqiquiaa Egipto jiyajinia quianoni. Egipto pueyari nojori miitiaa puera. Cua pueyari noonu rejeretacoya. Janiyari nojori sariyocuatunu tojiquiaa taraatiani. Nojoriicua roseyareenijia cua mashiquiniuria nojori Egipto pueyajiniji. Cunora, janiyari quia jiyaronutaniya Egipto jiyajiniani”.

Pueyasoori naa Moisés sequequiaariti.

<sup>35</sup> Israel pueyari tarijia Moisés juaaquiaaricuaaja. Naa na sequetuquiaariiri: “¿Cante quia jiyatecanu juhua canaa jiyaniijia quia quiniuriani, canaa nequesoreenarajuhuaaj?” Naajaa, Pueyaso cutaraari seetanujuanaa na jiyaroquiaariuhua nojori jiyaniijia na quiniuria, Pueyaso seru jaara nocua pocuaquiaari nequeru casaja noshiyanonijiji. Na jiyaroquiaariiri puetunu nojori tohuatanijioriquianojuanaa Egipto jiyajiniji. <sup>36</sup> Moisés cuajaari pa supuetanaa mashiquiquiaari Egipto jiyajiniji. Nojuajaari jiyajeneta miishano mijioquiaari Pueyaso cumaacata cuno jiyajinia, mariyata nojori niutiasacari Naatunacu jiyaniishano caminijuhuaaj. Naa miiquiaari pueyaracaanu cariquia jiyajiniaariuhuaaj. Cuarenta marijiaari nojori shocojoquiaari pueyaracaanu nojori rucuanesacari tii. <sup>37</sup> Nio Moisésni, nojuajaari naa sequequiaari puetunu Israel pueyajanaa:

“Pueyasoori niaacua jiyaronutaniya tamonu pueyano, na rupaa pohuatariquiano nia niqiuara, taa na jiyaroquiaari janiyacuaani. Tama nia niqiuohuacuajiniouuaaja supuenutaniyari. Niocua saa nojuaja tojiri cutara”.

<sup>38</sup> Nio Moisésri narta Israel pueyata quiquiaari cariquia jiyajinia. Nojuajaari Pueyaso seruta pocoojoquiaari Sinaí tuhananuucua pa supuetanaa jateesacari tuhananu cari. Moisésri Pueyaso seru rootasano na tojishano niishitiojoquiaariuhua pa supuetanaa. Cuno rootasanoori samiitianijia rupaa quiquiaari pajaniyara, maninia pa quiniuria pueyaracaanu.

<sup>39</sup> Pa supuetanaari saa na ruuretaquiaarijia. Majaari nojori tojinu paniniu quiquiaari Moisés. Egipto jiyajinia tacatenu paniquiaariuhua saajaari. <sup>40</sup> Naacuajitij, Moisés tarishishacari tuhananuucua Pueyaso seru na tojishacari, pueyari socua Moisés tarajanu Aarón sequequiaari: “Puera quia shipinijiorequi pueyasohua, nojori puetariquiano pajaniya. Majaari pa niishiniu taa Moisés miishicuaani. Shaajeseecuaa naasucuajuhuanajaj, mariqui tiuqiriohua. Nojuajaari najuhuaana pa mashiquiquiano Egipto jiyajiniji”. <sup>41</sup> Naacuajitij, nojoriiri na pueyasora shipiniquiaari juhua seru juunu niyanujua niquishano. Nojoriiri na seya puecocoquiaari na shuquiriniutia na juaashiquiaata na shipiniutishano pueyasocua. Nojoriiri jiyacari sacuarataa timiquioriquiaa. <sup>42</sup> Pueyasoori socua nojoriicuaaji pishiquiaari. Nojori tarinitiaquiaariiri jiya cajiniocua nunucojuua nojori jiyatenura tama nojori pueyasohuarajaaja. Seetanujuanaa naa naajiotasano quiyajaariuhua tariucuaaanu Pueyaso sequesano caminiujuninaa naajioneenijia. Naa sequeyari:

“Israel pueyanaa, ¿canaacuara nia puecocoquiaari pueyaracaanu nia seyani cariquia jiyajinia nia camarucuneetasacari cuarenta marijia cuaara nia shocojoquiaariijaatijia? ¿Cucuarate? ¡Maja! ¿Canaacuara nia catijiaquiaari nia seyani? ¿Cucuarate? ¡Maja! Niaari puetunu cuno miiquiaarijianaa tama nia jiyatesano pueyasohuacuarajaaja. <sup>43</sup> Niaari Moloc suhuorotu pataquiaari, shoquejiniji suhuorotu, nia pueyasora nia jiyatesanoni. Cunocuaajaari nia sequesano, ‘canaa pueyaso’. Niaari Refam pataquiaarijuhuaaj, juhua rijia niquishano shipinishano. Niaari puetunu nio shipinijioquiaarijianaa nia pueyasohuara, nojori cariquimijia nia mojoquetaconura, nia shuquiritiasacari nojori. Nocuaaji, janiyari nia jiyaronutaniya tucuaaanuni, Babilonia jiya tamajiria”.

Pueyasocuaajaari naa sequequiaari pa supuetanaatej nojori miiniucua sesa.

<sup>44</sup> Estebanri socua pohuataquiaari naatej:

–Pa supuetanaari Pueyaso secuojua suhuorotu jitiaquiaarijuhuaaj, cariquia jiyajinia nojori quishacari. Nojoriiri tii racataquiaari Pueyaso niqutiosano saajianeeca. Nocua naajiotasano quiquiaariiri Pueyaso rootasano na pueyara. Pueyasoori cuno suhuorotujiniji pocuaquiaari na pueyacu. Cuno suhuorotuuri shipinishaaquiaari taa Moisés niqutishaaquiaaricuaajani Sinaí tuhananuucua na quishacari. Pueyasoori jiyacari naa sequequiaari Moisés: “Quia shipiniri taamueca cua niqutiquianu quiajanijacuaajani”. <sup>45</sup> Na nuhuaaji, pa supuetanaa, canapuate naatujoori quiriquiaa Moisés quishacarini, nojoriiri cuno suhuorotu pataquiaari. Na patatuquiaariiri Josuéta nojori pacusacari nio jiyajinia paa tii quiyani. Nojori miaquetoosacari taucacata, nojoriiri Pueyaso secuojua

suhorotu patariquiaa. Pueyasoori cuno taucuaca jataquiaari nio jiyajinjii, saniniuujia pa supuetanaa jiya na quiniuria. Cuno suhorotuuri pa supuetanaata quiquiaarijia, David jaara jiyaniijia quiquiaari. <sup>46</sup> Jacoboori pa supuetanaa jiyaniijia David supuetana quiquiaarijuhuaj. Davidri Pueyaso tojjia quiquiaarijuhuaj. Pueyasoori na shuquiriti-aquiaari. Naaratej, Davidri Pueyaso Secojoua tiara tianu paniquiaari juuca. <sup>47</sup> David niyanu Salomón cutaraari Pueyaso tiquiaari. <sup>48</sup> Naajaa, jiyocuaaanu Quijiaari maja na quiniu pueyano tiasanojiniaaco. Tariucuacaanu Pueyaso sequesano caminiujiuniaari naa naajiotaquiaari Pueyaso sequesano nojuaa:

<sup>49</sup> “ Jiyocuaaanuuri cua quiquio. Jiyari saniniuujia cua niohuaca cua niaja. ¿Taamueca tia nia tianutaniya quiriajarani? Jiyaniijiaari naa sequeyaquij. ‘¿Taa nia sequeyani: na mueecujuara pa miiri, shuquiriaatia na quijiaa? Maja. <sup>50</sup> ¿Majateeri puetunu nio jiyajinia niquishanojuanaa cua juaashiquiata cua miishanocuaaja, jiyocuaaanu-juhuaj? ”

<sup>51</sup> Estebanri socua nojori sequequiaari:

—¡Niaari tojitiaashijianucua! ¡Niaari Pueyaso sequesano ruuretaquiaa juhua nia supuetanaa! Nioojiaari maja juhua Pueyaso pueya jiuujia. Nia numaacaari maja Pueyaso rupaa na tojiniu paniniu. Niaari pueyaracaanu tojijaquiyua Pueyaso Sohuanu niishitiojosano. Niaari Pueyaso tojjiyashijianucua juhua nia supuetanaajuhua. <sup>52</sup> Nia niishiritioj, ¿nia supuetanaate quena niquiriyatujua Pueyaso sequesano caminiujiuniaa miitaaquiquiaari? Nia supuetanaari puetunu Pueyaso sequesano caminiujiuniaa-janaa miiquioquiaari naquiyua. ¿Quenaaja niquiriyatu nojorijinjiniote miitiasoo curequiaari? Maja. Nojoriiri tari puecoquiaari noo pueya, canapuate maninia miijia mijiria niriqianojiniji pohuatenuquiaaricuajani. Cuno maninia miijia jaara tiuquiquiaari, niaari sesa miijia pueya na niquitocanu nojori mosocoriqiano. ¡Niaari naa mocanu Pueyaso Jiyarosantej! ¡Niaari pueyaracaanu Pueyaso ruuretaquiaa! <sup>53</sup> Naacuajitij jiyocuaaanuji Pueyaso seya pohuatasano Pueyaso rootasano niaarani, majaari cuno nia tojiniu quiquiaajuhua.

#### *Jesu ruuretajaca mosacari Esteban*

<sup>54</sup> Pueya jaara naa tojitiuquiaari Esteban sequesantej, nojoriiri jiyanojua juaaquiooree. Na juaaniutia miaquenuuree na quiaacari. <sup>55</sup> Jiyanojua Pueyaso Sohuanu cumaquishacari Esteban jiuujia, nojuajaari jiyocuaaanu mauquiaari. Saaja Pueyaso shacantuuca niquiriiri. Jesu niquirijiaariuhua na Que Pueyaso miaquetajara nujuano. <sup>56</sup> Naa na niquishacaritij, nojori sequeere juucaari:

—¡Nia niquishuriniaja! Jiyocuaaanu niquiyua riatenonijia. ¡Pueyaso Niyanu niquiyaniijia na Que miaquetajara nujuano!

<sup>57</sup> Pueyari na numaaca mishiquiojonuuquiaari saaja, maja na tojitiuniuria Esteban sequesano. Jiyanojua sariyocuatuguaari na juaaniutiaari. Na nuhuaji, Estebancua cocuatequiaariiri. <sup>58</sup> Na caponeetuguaari Jerusalén tiacajinjiiiri. Tiacajinjii tohuatesaaree tamamaari. Na tohuatesaanu nuhuaji, ti na jacutuquiaari saitiaari. Na jacuturiqianoori na toqueya cojuatequiaari tamonu mashaja. Nojori toqueya cojuana sesa quiquiaari Saulo. <sup>59</sup> Nojori jacutusacari saitia Esteban, Estebanri Pueyaso secojoriquiaa naatej:

—Jiyaniijianaa, cua sohuanu quia riri quia shuriucuaa.

<sup>60</sup> Na nuhuaji, mojoquetareeri. Jiyanojua nacaquiaari na nuhuajiriaari:

—¡Jiyaniijianaa, majaari nio pojori saniitionu naa nojori miiniuucua janiyatej!

Naa na sequenu nuhuajitij, cusoqueeri.

## 8

### *Saulo miishacari naquiyua Jesuucua tiuunaa*

<sup>1-2</sup> Pueyaso panijiaa pueyari Esteban quete patuquiaari na jamotusocoriquiano. Nojoriiri Esteban sapuequiaari. Cuno juuca, Jerusalén tiacajinia quiniaa Judiocuaacari juhuacatecara miitianu cotequiaari puetunu Jesuucua tiuunaaajanaa. Nocuaji, puetunu nojorijianaari tiji mashiquiaari. Saaja Jesu saquiriojosano doce pueyari ti curequiaari nojori nuhuaji. Nojoriiri na mashishacari niyaquejoquiaari puetunu Judea jiyajiniajanaa, Samaria jiyajiniaranio. <sup>3</sup> Jiyacari Sauloeri socua jiyacateriquiaa miitianu Pueyaso pueya. Nojori pajequiaari puetunu tiacajiniaqueyajanaari Jerusalén tiacajinia. Na riuriatasacari, na jayoquiaari tiacojiiri, na nujatejosocoriquiano nujatejojuajinia, maajipohua, canuunio.

### *Jesujiniji pohuatasacari Samaria jiyajinia*

<sup>4</sup> Mashiyocuatuno pueyari puetunu na quiasacojuanaa Jesujiniji pohuatunuquiaari pueya niquiara. <sup>5</sup> Nojorijinjiniño quiquiaarijuhuaj Felipe. Nojuajaari mashiquiaarijuhuaj tamonu tiacajiniara Samaria jiyajinia. Cuno tiacajinia juhuacatecara pohuataquiaari Jesucristojinjijiaarihuaj. <sup>6</sup> Puetunu pueyajanaari Felipe pohuatasano tojinuucua rerejoquiaari. Pueyari sanaa na tojtiaquiaari. Nojoriiri Felipe shootiaquiaari tacuritia, na miishacari jiyajeneta casaa Pueyaso cumaacata. <sup>7</sup> Samaruhua tohuatanijioriquiaa pueyajiniiri. Samaruhua tohuareetasacari pueyajiniji, sariyocumaquiaari. Queraatia cumatacuruhuaana cusosuhuari naatanijosaaquiaarijuhuaj, sesacujuanucuanio. <sup>8</sup> Naaratej, puetunu cuno tiacajinia quiniaa pueyajanaari jiyanoehua shuquiriquiaari.

<sup>9</sup> Shimiacuuri cuno tiacajinia quiijahuaj. Na sesa quiquiaari Simón. Cuno tiacajinia quiniaa pueyari na pueretujua. Puetunu pueyajanaa sapojojuaari jiyajeneta na mijiosanota. Naa sequeja tama na cuaqueyajaariija: “Janiya cutaraari tojishano pueyanoni”. <sup>10</sup> Puetunu pueyajanaari na tojtija quiquiaari, camarucua, muerasunio. Nojoriiri sequequiaari: “Nio pueyanoqui jiyanoehua Pueyaso cumaaca jitiia”.

<sup>11</sup> Puereeta Simón miishacari pueyaracaanu, pueyari sapojosaaquiaari. Naaratej, pueyari na sequesanoocua tiuquiaari. <sup>12</sup> Na nuhuaji, nojori jaara tojiquiaari Felipe pohuatasacari Pueyaso rupaa, Jesucristojinjijiuhuaj, cuno Samaria pueyari Jesuucua tiuquiaari cutara. Canuu, maajipohuajuahuaj, nojoriiri tiuquinijosaaquiaari moojinia. <sup>13</sup> Simónri Jesuucua tiuquiaarijuhuaj. Tiuquinishaaquiaarijuhuaj. Na tiuquinishaanu nuhuaji Felipeecua sacuaquiaariiri. Felipe shootiaquiaari tacuritiaari Felipe mijiosacari jiyajeneta casaa Pueyaso cumaacata.

<sup>14</sup> Jerusalén tiacajinia Jesu saquiriojosano pueya jaara tojiquiaari taa Samaria pueya tiuiri Pueyasoocuan, nojoriiri cuniquiji jiyarotuchiaari Pedro, Juannio. <sup>15</sup> Nojori tiuquishacari Samaria jiyajinia, cuniqui quiniaa Pueyaso pueyacuara secojotureeri nojori jiuujajinia Pueyaso tiuquitiniuria na Sohuanujuhuaj. <sup>16</sup> Majaari Pueyaso Sohuanu tiuquinu quiquiaari juhuanujuhuaj nojori jiuujajinia. Nojoriiri nareja moojinia tiuquinijosano quiquiaari Jesuucua nojori tiuushacari. <sup>17</sup> Pedro, Juan, cunora na juaashiquia niojoquiaari pueyacu, nojoriicua na secojotusacari Pueyaso. Naa nojori miishacari, Pueyaso Sohuanuuri cuno pueya jiuujajinia tiuquiaari cutara.

<sup>18</sup> Simónri niquiriquiaa taa Pueyaso Sohuanu tiuquiaari pueya jiuujajinia Jesu saquiriojosano pueya niasacari na juaashiquia nojoriicuan. Naaratej nojuajaari Jesu saquiriojosano pueya niqutionu paniquiaari cumaneeca juucua, cuno cumaaca na jitiia-nurajuhua. <sup>19</sup> Simónri naa sequequiaari nojori:

—Cua niqitiotureja cuno cumaaca. Janiyacu Pueyaso Sohuanu panijiacacua niare cua juaashiquianija, Pueyaso Sohuanu nojori masenurajuhua, taa nia miyacuani.

<sup>20</sup> Pedroori na sequequiaari saaja:

—¡Quia cumaneeca cuara shaajeera quiatajuhuaj! Quiaa naasucuaari jiyaniya Pueyaso Sohuanu cumaneecata masesano. Quia niishiri, Pueyasoori na Sohuanu niqitioquiaa nareja na tojtiajaca pueya. <sup>21</sup> ¡Pueyaso Sohuanu cumaacaari maja quiarano! Quioojiaari jiyanoehua sesa quia Pueyaso niquiara, nocuaji maja na cumaaca niqitiosaanu quiniutianiya quiajaniya. <sup>22</sup> Jiyanoehua sesa quia niishiriojosanojiniji quia pishiriohua. Pueyaso quia secoje na jiyanooniuria quiajaniya naa quia niishiriojosanojiniji quioojajinatej. <sup>23</sup> Niishiyacuajanjija, quiaari juhua cartesoo quiyajaa, sesa miiniucua jitiinio quia quishacariija. Quioojaari puera najiquitishano quiyajaa jiyanoashijia quia quiniucujuhua.

<sup>24</sup> Simónri na riucuaquiaari:

—¡Pueyaso nia secojorequi cucuara, mariqui cua saniitioreeri taa nia sequeyacuajani!

<sup>25</sup> Na nuhuaji, Pedroori Juanta socua pohuataquiaari Jiyaniija Pueyaso rupaa cuno pueya niquiara. Pueya niquiara pohuataureeri socua Samaria jiya tiacajinia, cuniqui quiniaa tiuiniuria Jesuucujuhua. Maninia rupaari Pueyasojiniji pohuatasaaquiaari queraatia tiacajinia, Samaria jiyajinia. Na nuhuaji, Pedroori tacatequiaarihuua Juanta Jerusalén tiacajiniohua.

*Jesujiniji Felipe pohuatasacari Etiopie pueyano*

<sup>26</sup> Cuno nuhuaji, Pueyaso seruuri Felipeecua rosequiaari. Na sequeseeri:

—Quia sanere Felipenaa. Pananu shuucujiria nuucama quia quiaare. Quiocua tiuquishii tamonu nuujinia, Jerusalén tiacajiniji neteja Gaza tiacajiniara. Cuno nuuri cariiquia jiyacuma neteya.

<sup>27</sup> Felipe tojishacari naatej, nojuajaari ritia sanequiaari. Nuucama quiaquiaariiri. Nuujinia naacuneetoquiaari saaja Etiopia jiyajinjiniño pueyanotaari. Cuno pueyanoori riyacajajaaju quiquiaari Etiopia jiya jiyaniija naacutana na quiniucua, maaji na jiyaniija quiniucua. Na jiyaniija sesa quiquiaari Candace. Cuno maajiiri cuno pueyano

jiyatequiaari Etiopía jiya casami jitianara, na cumaneeca cojuariquiano nera. Nio Etiope pueyanoori Jerusalén tiacajinia quiaquiaari Pueyaso secojonuucua. Cuniqiji tacateyanoori Felipe naacuneetoquiaari nuujinia. <sup>28</sup> Nucucoji na tacatesacariuhua na jiyajinihuara, caballoori na jaatiariquiohua, rucuanegotajarujinia cajiyano. Pueyaso rupaa serojoriquiohuari, tariucuacaanu Pueyaso sequesano caminiujunía Isaías naajiosanoojini. <sup>29</sup> Pueyaso Sohuanuuri jiyacari Felipe sequequiaari:

—¡Ritia nocua quia catecanore! Quiocua nata quiaare.

<sup>30</sup> Jaara nocua catecanoojiaari, Felipeeri Etiope pueyano tojiquiaari Isaías naajiosano serojiyano cojuata. Felipeeri na nequesotaquiaari:

—¿Quiaate quia serojosano niishiya casaa na sequeyani?

<sup>31</sup> Etiope pueyanoori na riucaquiaari:

—¿Janiyatucua taa niishirinio, tamonu jaara cua serojosano niishitioyaquiri janiyani?

Felipe sequeereeri:

—Miji quia tacama. Cua shuriucua quia cajishii.

<sup>32</sup> Etiope pueyanoori nio serojoriquiaa tariucuacaanu Pueyaso Rupajinia:

“Juhua borrego jaatucusaquiaariiri mosocoriquiano. Naatej, taa borregocuaani sanaa niqiyari na cajaca miatejosacari, nojuajaari naa quiquiaarijuhuaj. Majaari na sariyocuanu quiquiaari quenaaja naquiya na miishacari. <sup>33</sup> Naquiya miishaaquiaari cararaatiaari. Nocua namiyaquishaaquiaariiri. Mashaja na quishacarijia, nojuajaari shaajasaquiaari nio jiyajiniji. Cunora, majaari na muetunu quiquiaari. Niquiohuajuuri mosaaquiaari”.

Etiope pueyanoori nio serojoriquiaa Pueyaso rupajiniji.

<sup>34</sup> Na nuhuaji, Etiope pueyanoori Felipe nequesotaree:

—Cua seque pueyanonaa, ¿canajiniji Isaías pahuataa niya na naajiosanojiniani? ¿Tama nojuajiniji pahuataate? ¿Tamonujiniji soj?

<sup>35</sup> Felipeeri Etiope pueyano niishitiojonu coteequiaari Jesujiniji shusha na serojosano Isaías naajiosanojiniji. Felipeeri naa na sequeere:

—Isaías naajiosacari nio, nojuajaari juhuacarijia Jesujiniji pahuataquiaari, taa quiarijia Jesu miishaacanu taraatiacuajani.

Felipeeri socua na pahuataquiaari Jesu miishanojiniji. <sup>36</sup> Nojori quiasacari nucucaco, caminiaco shuriuquico tajitiriquiaari. Etiope pueyano jaara caminiaco niquiquiaari, Felipe sequeereeri:

—¿Majate maninia cua tiuquinishaanura niya?

<sup>37</sup> Felipeeri na sequeere:

—Quiaa jaara seetanujuaanaa tiuuri Jesuucua, quia naata tiuquinishaanu.

Cuno pueyanoori na riucaaree:

—Jaa, janiya Jesucristocua tiuyani. Nojuacuajaari Pueyaso Niyanu. Na niishiyaniija.

<sup>38</sup> Etiope pueyanoori jiyamitia na seru sequeere:

—Quia nujuaretare rucuanegotaja.

Felipeta rosetamaa caminiacojiniaari. Felipeeri tii na tiuquiniquiaari Jesuucua na tiushacari. <sup>39</sup> Nojori tacatasacariuhua caminiacojiniji, Pueyaso Sohuanuuri Felipe riquiaari canashiyaquiji cuno Etiope pueyano shuriucujaji. Nojuajaari juucua tacareecuquiaari na tiuquininiaacua. Majaari socua na niqiniu quiquiaari Felipe. Tariucua tiuquinishanoori shuquiriatia quiaquiaariuhua na jiyajinihuua. <sup>40</sup> Pueyaso Sohuanuuri Felipe jataquiaari Azoto tiacajinia. Nojuajaari cuniqiji puetunu tiacajinia poojotaquiaariuhua janaa Pueyaso rupaa Jesujiniji. Naa tiuquishuhua Cesareya tiacajiniaari.

## 9

### *Saulo jatasacari Jesu tojinia na quiniuria*

<sup>1</sup> Sauloori jiyacari pueyaracaanu Jesuucua tiuunia miananajoriquiase. Nojori puecoonu paniquiaari puetunujuanaari. Naaratej, Sauloori pueyacuara secojonaa jiyani-ijaacua quiaquiaari. <sup>2</sup> Naa na sequeereeri:

—Damasco tiacajinia quianu panianijia. Quiria quia naajiore cuniqui secojojua tiaca camarucuaacuara Damasco tiacajiniani, cuno naajioneeta cua tiuquiiionura nojori rere-jojuacajinia. Jesu tojiniaa pueya morojonu paniya cuniqijinjia. Janiyari cua quioosano jaatucunutanija niyara Jerusalén tiajinarani, canuu, maajipohuanio.

<sup>3</sup> Naacuajitij, nucucaco Saulo quiasacari, tari quenaacoturiquiaa Damasco tiacajiniaraari. Jiyacaritij, ishacantuucaari canashiyaquiji nunuquiaari jiyocuaanuji!

<sup>4</sup> Sauloori juhua jatasaaquiaari na cari. Na pojosaquiji tojiquiaari rupaa na sequeyanoori:

—¡Saulonaa, Saulonaa, cua tojiri! ¿Casaara quia miitiaa puera janiyani?

<sup>5</sup> Sauloori na riucaaree:



—¿Cantequia Jiyaniijianaa?

Jiyocuaaanuji nocua pocuaanoori na riucuaquiaari:

—Janiya Jesuni. Quiaari puera cua miitiaajanaajataj, cucua tiuuniaa quia miitiasacari puera. Naa quia miishacari puera quia juaniutiateg, quiaari tama quia cuaqueya sesoyajaacujua. Quiaari juhua juajia pueyano. Quiaari quia juaniutia juhua jiohuaca patiyashijia.

<sup>6</sup> Sauloori na puerenuta na tetecasacari na sequequiaari:

—Jiyaniijianaa, ¿casaa quia paniya cua miiniuriani?

Jiyaniijaari na sequeree:

—Quia sanere. Naajaa quia tiuquishii Damasco tiacajinia. Quiaari tii sequesaanutaniya cua panishano quia miiniuria.

<sup>7</sup> Saulota quiojonaari shiriiquituquiaari nojori jaara tojituquiaari jiyocuaaanuji pocuanu. Nojoriiri juucua na niqiniu paniquiaari. Saaja shaaquiiri quiriquiaa. <sup>8</sup> Na nuhuaji, Sauloori na pojosaquiiji sanerohua juucua. Majaari na naata niqiniu quiquiaari saaja. Nata quiniaari na jaatucutaquiaari Damasco tiacajiniara. <sup>9</sup> Nojuajaari tii camueenujuquiaari jiuujianaraca juuca, cariyajuaru na quishacari. Majaari na miaquenu quiquiaari pueyaracaanu cariyajuaru na quishacari. Ratuyaquiquiaariijaariuhuj.

<sup>10</sup> Tamonu Jesuucua tiuunia pueyanoori Damasco tiacajinia quijia. Na sesa quiquiaari Ananías. Jiyaniija Jesuuri na sequequiaari juhua na maquenujina:

—¡Ananíasnaa!

Nojuajaari na riucuaquiaari:

—¿Casaate cua Jiyaniijianaa?

<sup>11</sup> Jiyaniijaari na sequeree:

—Quiaritia quia quiaare Saulo pajenuucua. Nojuajaari noo Saulo, Tarso tiacajinijinio pueyanotej. Nojuajaari Judas tiajina quiya. Judas tiaari jati tamonu nuujinia quiya. Cuno nuu sesa, Nuu Maniniu. Sauloori cuno tiajina secojiya Pueyaso. <sup>12</sup> Nojuajaari juhua na maquenujina tari niquirii quiajaniya nocua tiuquiyano. Tari quia sesa niishiyaaariuhuj. Sauloori tari quia niquirii na maquenujina. Quiaari quia juaashiquia niariquiaa nocua, na namijia jeequenuhuara, maninia na niqiniuhuara.

<sup>13</sup> Ananías jaara naa tojiquiaari Jiyaniija sequeyanotej, nojuajaari sequeree:

—¡Cua Jiyaniijianaa, queraatia pueyari cuno pueyanojiniji cua pohuatacanuni! ¡Quiocua tiuuniaa pueya miitiaquiaa taraatia Jerusalén tiacajiniara! <sup>14</sup> Pueyacuara secojonaa jiyaniija jiyarosanaaari cunohuj, quiaritia niya tiuquiriini. ¡Nojuajanaari quia secojonaa pueya quioonutaniya, morojonucua canaa na jiyatasocoriquiano Jerusalén tiacajiniara!

<sup>15</sup> Jiyaniijaari Ananías sequequiaari saaja:

—Naajaa, quia quiaare. Janiyacuajaari cuno pueyano saquiriojquiaari tarijia cua jiyaramiquishocoriquianoni. Nojuajaari tamasaca jiyacajinia poojotanutaniya janiyajiniji taucuaa niquiara. Taucuaa jiyaniijanucua poojotanutaniya janiyajinijiaariuhuj, Israel pueyano. <sup>16</sup> Janiyacuajaari Saulo niishitiojnutaniani taa jiyanojuaa naquiya pueya miitianutaniya nojuajani, janiyajiniji na pohuatasacari.

<sup>17</sup> Naarateg, Ananíasri quiaquiaari. Judas tiajina tiuquishiiri, tee Saulo quiriquiaacua-jani. Na tiuquishacari, Saulocua niasee na juaashiquiaari. Na sequereeri:

—Cua tarajanunaa, pa Jiyaniija Jesu, quiocua muetarucuaa nio tiaca nucumaji niyara quia nishacari, nojuajaari quiocua cua jiyaroreeni. Cua jiyaroreeni quia namijia jeequenuhuara maninia, Pueyaso Sohuanu tiuquiniuria quioojiajiniajuhuaj.

<sup>18</sup> Jiyacari ritia totequiaariiri juhua sapitiaaja cocua Saulo namijajiniji. Maninia niquiquiaariuhua na nuhuajiri. Na nuhuaji, Sauloori ritia tiuquinishaquiaari moojinia Jesuucua na tiuushacari. <sup>19</sup> Na nuhuaji, miacquereeri, raturohuajaariuhuj. Noojia jatarohuari. Pasaja camueenujuquiaari Damasco tiacajiniara Jesuucua tiuuniaa pueyata.

*Jesujiniji Saulo pohuatasacari Damasco tiacajinia*

<sup>20</sup> Sauloori juhucatecara coteequiaari Jesujiniji pohuatanu narta Judiocuaa secoj-juaca tiajina Damasco tiacajinia. Nojuajaari pueya niquiara na pohuatasacari sequeja:

—Jesuuri seetanujuanaa Pueyaso Niyanu!

<sup>21</sup> Naa nojori tojishacari Saulo pocuaanotej, pueyari shiriiquiquiaari. Na shiriiquitu-niutia sequetureeri:

—Nio pueyano pocuaani, ¿majate nootej, naquiya miiquiaa Jesuucua tiuuniaa pueya Jerusalén tiacajinatej? Niyara niyareejaariuhuj, Jesuucua tiuuniaa pueya na moro-jonura. Nojuajaari nojori jiyatanu paniriquiaa juucua Jerusalén tiacajinia secojonaa jiyaniijanucua na niqitiojosocoriquiano, nojori nujatejosaanura.

<sup>22</sup> Sauloori socua noojia cumaquiquiaari Pueyaso Sohuanuta, jiyanojuaa maninia na pohuatanura puetunu juucajanaa. Nocuaji pataquiaari saaja Damasco tiacajinia quiniaa

narta Judiocuacaari. Sauloori maninia pahuataquiaari tariucuacaanu Pueyaso Rupaajiniji, seetanujanaa maatia pueya niishiniuria Jesuuri Pueyaso Jiyarosano pocuaji tacuriquiiano.

*Saulo mashishacari narta Judiocuacaacuaji*

<sup>23</sup> Quiniqui Saulo camueenujusacarijia pueyaracaanu, narta Judiocuacaari nocuara roojotooquiaari na motunura juucua. <sup>24</sup> Tamonuuri Sauloocua jiyanoocuaaari. Naa na sequequiaariiri:

—¡Quiaa monu panishiya sacaj!

Judiocuacaari na sashiriquiaa tiaca tohuateyaji, na monu paniniutia juucua Saulo. Na shanacuturiquiaari juuca, niucuanio. <sup>25</sup> Damasco tiacaari puereetuuca sohuacaraca quiquiaari puetunu na shocujanaa. Jesuucua tiuuniaa pueyari saaja Saulo mashiquiaari niucua. Sohuacajiniji roshinitiasaaciaari jiyocuacaanuji puereetuuca canasatujiniaari. Sauloori naa mashiquiaariti.

*Saulo quishacarihua Jerusalén tiacajinia*

<sup>26</sup> Na tiuquishacarihua Jerusalén tiacajinia, Sauloori Jesuucua tiuuniaa pueya rupuenu paniquiaari juucua. Nojoriiri saaja na puerequiaari. Na puerenuta sequetuquiaariiri:

—Pueyasocua tiuujiaquinio naasucua jiyanotej.

<sup>27</sup> Bernabé cutaraari maja na puerenu quiquiaari Saulo. Nojuajaari Jesu saquiriojosano pueyacu na jiyataquiaari, Saulo niishiniuria puetunu nojorijianaa. Bernabeeri Jesu jiyaramiquishano pueya sequequiaari:

—Sauloori pa Jiyaniijia niquiquianu Damasco tiacaacua neteja nucuamaji. Jiyaniijiaari nata pocojocanu. Sauloori cunora juhuajaniya pahuatariquiaa Jesujiniji Damasco tiacajinia.

<sup>28</sup> Sauloori narta Jesuucua tiuuniaa pueyata jijojequiaari cuniquijia Jerusalén tiacajinia. Nojoritia rucanejojuaari, mariyata Jesujiniji pahuataja juhuajaniyari. <sup>29</sup> Saulo pocuasacari, nojuajaari seetanujanaa cumaacata pocuaquiaari Jiyaniijia Jesuucua na tiuushacari. Griego rupaa pocuanaa Judiocuacata pocojocuaariiri. Noojiaqueyari Saulota juayonuutaquiaari saaja. Nojoriiri socua na motunu paniquiaari. <sup>30</sup> Jesuucua tiuuniaa pueya jaara niishiquiaari naatej, nojoriiri Saulo jiyataquiaari Cesareya tiacajinia. Cuniquijij jiyarosaaquiaari na raja Tarso tiacajiniaari.

<sup>31</sup> Na nuhuaji, puetunu Judea jiyajinia Jesuucua tiuuniaa pueyajanaari panaatia quiquiaari quenaaja, Samaria jiyajinia, Galilea jiyajiniano. Tamasacaari maja tari naquiaa na miishaanu quijia. Nojoriiri socua Jiyaniijia tojitiacacara quiquiaari nojori pueretusacari nojori mariqui na tojiyashijara quiriohuari. Pueyaso Sohuuanu naacusacari nojori, Pueyaso pueyari socua canequiaari queraatiara.

*Pedro naatanishacari Eneas*

<sup>32</sup> Pedroori pueyaracaanu rucanejojua Jesuucua tiuuniaa pueyacu, nojori na niishitiojonura socua Jesujiniji. Tamonu juuca nojuajaari Pueyaso pueya niquiniucua quiaquiaari Lida tiacajiniajuhuaj. <sup>33</sup> Tii quiriquiaari tamonu pueyano. Na sesa quiquiaari Eneas. Cuno pueyanoori cumatacuruhuana cusosu quijia. Tari na shocojoquiaari ocho marijia pootia na matasacari na matujinia. <sup>34</sup> Pedroori cuno cusosu sequequiaari:

—Eneasnaa, ¡Jesucristo tari quia naataniriri! ¡Quia sanere! Quia matu quia jeezare.

Eneasri ritia sanequiaari. <sup>35</sup> Puetunu pueyajanaa Lida tiacajinia quiniaa, mariyata Sarón tiacajinijinio pueyajuahuaj, puetunu nojorijianaari nio miishano niquiquiaari. Nojoriiri cunora tama na supuetanaa niishitiushano casaajaaja cartequiaari. Puetunu nojorijianaari Jesuucua tiuquiaari.

*Dorcas samiitianishaanujiniji pahuatasano*

<sup>36</sup> Jiyacarijuhuaj, Jope tiacajinia quiquiaari tamonu maaji. Na sesa quiquiaari Tabita. Tabitaari griego rupaajinia sequesano “Dorcas”. Dorcasri saniniuuja pueyano rupaajinia sequeshiyacujua “nequeru”. Cuno maajiiri Jesuucua tiuujia quiquiaari. Nojuajaari maninia miijia maaji quiquiaari. Casamiijiuiniucua pueya niqitiojojua nareja na jiitiasanujinijiri. <sup>37</sup> Na nuhuaji, Pedro quishacari Lida tiacajinia, Dorcasri cusoquiaari. Na cusonu nuhuaji, pueyari macu cuaqueya jeequequiaari. Na jeequetunu nuhuaji, nojoriiri na niaquiaari cuno tijajinia nataco, tamonu sohuacajinia. <sup>38</sup> Jope tiacaari cateca quia Lida tiacajiniji. Pedroori Lida tiacajinia quiriquiaajaa Dorcas shaajesacari. Jesuucua tiuuniaa pueyari tari niishiriquiaa tee Pedro quiyani. Naaratej, caapiqui pueyano jiyarotureeri Pedro na numootenura. Nojoriiri na jiyarosano caapiqui pueyano sequequiaari:

—Niocua naa Pedro sequesee: “Quia quiaarena ritia Jope tiacajinia. Majaari tarishiniu”.

<sup>39</sup> Pedroori nojoritia tacatequiaarihua Jope tiacajiniahua. Na tiuquishacari, quiniqui quiniaari Pedro tiuquiniquiaari macuucua sohuacamara. Mashiquiopueeri Pedro shocua

rerejoquiaari na nujuquetunuta. Nojoriiri Pedro niquitijioquiaari Dorcas cusupuenusano toqeya, cacojoquiyanio. Cunoori quiquiaari na cusupuenusano saminio na quishacarijia. <sup>40</sup> Pedroori jiyacari puetunujuanaa pueya tohuatanijioquiaari sohuacama. Na nuhuaji, nojuajaari mojuquetaquiaari Pueyaso na secojonura. Na secojonu nuhuaji, macuucua tacatereeri. Na sequereeri:

—¡Dorcasnaa, quia sanere!

Macuuri juhua na maquenujiniji niucuaquiaari. Na niquishacari Pedro, cajiriiri. <sup>41</sup> Pedroori na juaashiquiaajiniji na quiaquiaari. Na nujuatereeri. Na nuhuaji sequequiaari Jesuucua tiuunaa pueyari, mashiquiopuenio:

—Miji pueyanaa, ¡nia nimia!

Nojori tiuquitasacari, saaja maaji niqutiushii nujuaanoori, tariucua saminio. <sup>42</sup> Pedro miishanoori puetunu Jope tiacajiniajanaa niishishaaquiaari. Queraatia pueyari cunora Jesuucua tiuquiaari. <sup>43</sup> Pedroori na nuhuaji janiya camueenujuquiaarijiaara Jope tiacajinia. Nojuajaari Simón tiajinia quiriquiaa cuniqui na camueenujusacari. Nio Simónri piiquia casaata shoqeya majeetejojua quiquiaari, casaara shipinishocoriquiano shoquejiniji.

## 10

### *Pedro quasacari Cornelio niquiniucua*

<sup>1</sup> Cesareya tiacajinia quiquiaariri tamonu tahue, Romano soldadohua jiyaniijia. Na sesa quiquiaari Cornelio. Na soldadohuari cien quiquiaari. Cuno soldadohua maanuuri sesojosaquiaari “Italiano”. <sup>2</sup> Cornelioori Pueyaso secojojua pueyano quiquiaari, mariyata puetunu na tiajinia quiniaatajanaano. Nojuajaari seetanujuanaa Pueyaso shuquiritiniu panijia quiquiaari. Cornelioori queraatia na cumanecajiniji niqutiojojua quiquiaari nareyajuhua, casamiijuniucua Judiocuaca niqutiosocoriquiano. Pueyaso secojojua pueyaracaanuuri. <sup>3</sup> Tamonu juuca, tariucua pananu piriushacari, Cornelioori Pueyaso seru niqiquiaari juhua na maquenujinia nocua niyano na tiajinia. Na sequeeri:

—Cornelionaa.

<sup>4</sup> Cornelioori saaja Pueyaso seru shootiaquiaari na shiriiquiniutia. Na nuhuaji na riucaereeri:

—¿Casaate jiyaniijianaa?

Pueyaso seruuri na sequeree:

—Pueyasoori quia secojosano tojiquiaa. Quia timitiaari capora quia quiniucua, quia jütiasanojiniji quia niqutiosacari nareja casamiijuniucua pueyara. <sup>5</sup> Naaratej, quia seya quia jiyaramiquiri Jope tiacajinia. Nojori cuara Simón masuunuucua quiaara. Na sesaari Pedrojuhua. <sup>6</sup> Nojuajaari na sesaanucua pueyano tiajinia quia. Tia camaruuri shoque majeetejojua piiquiajinia. Cunoori na poonijosano. Na tiaari shoniniacu caminia casaqueyaji naniya. Simón Pedroori quia sequenutaniya casaa quia miiniutianiyani Pueyaso jiyanooniura quiajaniana.

<sup>7</sup> Pueyaso seru jaara quiaquiaariuhua, Cornelioori caapiqui na seyajinijinio piiquiaari, niquiriyatu na soldadonio. Cuno soldadoori Pueyaso secojona quiquiaarijuhua. Maninia na jiyaniijia naacujua quiquiaarijiaariuhua. <sup>8</sup> Cornelio jiyarosacarijia na seya, nojori pohuataree coteenuuri puetunu Pueyaso seru sequesanojuanaa nojuaja. Na nuhuaji, nojori jiyaramiquiriri Jope tiacajiniaari.

<sup>9</sup> Tariqui, Cornelio seya quasacari nuacu, nojori quenaacotusacari tari Jope tiacajiniara, Pedroori jiyacari tacaquiaari tia cacojiria, Pueyaso na secojonura. Pananu quishacari pa nacasuhojuajinia quiquiaari jiyacari. <sup>10</sup> Nojuajaari jiyacari miaajeriquiaa. Neraari juuca sumatusaariquiaacujua. Nera sumatusacarijia, Pueyasoori casaa na niqutiquiaari juhua na maquenujinia, na quishacari tia cacojiria. <sup>11</sup> Pedro niquishacari jiyocuaaanu, saaja jiya cajiniocua niquiriri riatelyanoori. Sonaque queraque niquiriri tiji roshinitiashiyanoori, na nacatucujiniji morojotasano. Pedroocua roshinitiasaaree-janaari. <sup>12</sup> Sonaque jiniacuma quiriquiaari puetunu casaajanaa: sacocua, jiyacua rucojuacanio, jiyocuaaanu jaacuatujuaajuhua. Cuno casamiiri quiquiaari Judiocuaca pueresano casaa puetunujuanaa. Maja nojori miaquesano. <sup>13</sup> Jiyacaritij, Pedroori rupaajojiriri jiyocuaaanuji na sequeyano. Naa sequeriquiaari:

—¡Pedronaa, nocua quia sanere! Quia puecoore quia miaquesocoriquiano.

<sup>14</sup> Pedroori na riucaaree:

—¡Maja cua Jiyaniijianaa! ¿Janiyatucua taa miaquere sacuraatia cua miaquesooni? ¡Cunocujaaari tarijia quia sequesano canaa pueresocoriquiano!

<sup>15</sup> Jiyocuaaanuji rupaari socua na sequerohua:

—Pedronaa, majaaari miaquesocoriquiano Pueyaso jiyatesano soonu.

<sup>16</sup> Pueyasoori naa pacutejoquiaari sequenu Pedrotej. Na nuhuaji, sonaqueeri tacaniti-tiasaaquiaariuhua jiyocuacaanu. <sup>17</sup> Pedro tacaashacari naa na niqiniuucua juhua na maquenujinatej, jiyacari Cornelio jiyaramiquishano pueyari tia tohuatheyaji tiuquijio-quiaari, Simón tia na pajetunura. Cornelio pueyari nequesoreetariquiaa nucuacoji nojori tiuquiniuria Simón tiajinia. <sup>18</sup> Nojoriiri tohuatheyaji nacaquiaari:

—¿Niya quiyate Simón jiyaniushano pueyano? Na sesaari Pedrojuhuaj.

<sup>19</sup> Pedroori juhuanojuaja niishiriojoriquiaa na niquishanojiniji juhua na maquenujina tia cacojiria. Pueyaso Sohuanuuri jiyacari na sequeree:

—Pedronaa, jiuujanaraca pueya quia pajeya. <sup>20</sup> Tariucujaja. Quia sanerohua. Nojoriicua quia roseyarohua. Quiocua nojoritia quiaarohuajuhuj. Majaari taacanuunu. Janiyacuajaari nojori jiyaramiquiriucuaa quiocuanii.

<sup>21</sup> Pedroori Cornelio jiyarosano pueyacia rosequiaari. Nojori sequeeseeri:

—Janiyacuajaja nia pajesano pueyanoni. ¿Casaacua nia niyareecuarani?

<sup>22</sup> Nojoriiri na riucuarree:

—Canaa jiyaniijiaari Romano soldadohua jiyaniijia. Na sesa Cornelio. Nojuajaari canaa jiyarorucuaa quiocuanii. Maninia miijia pueyanoori. Jiyaniijia Pueyaso tojjijiaariuhuj. Puetunu Judiocuacajanaari maninia na miiniuucua na panitiyua. Pueyaso seruuri na sequerucuaa, nojuaja masuunura quiajaniya na tiajinia quia quianura, na tojiniuria puetunu quia sequesanojuanaa.

<sup>23</sup> Pedroori Cornelio pueya tiuquinitiaquiaari na quijia tiajinia. Nojori sequereeri:

—Niyaja nia maqueseajaara. Pocua tariqui quiaariquiani.

Jaara juhuaquequiaari, Pedroori nojoritia quiaquiaari. Nata quiojoquiaarijiaariuhua Jope tiacajiniinjo Jesuucua tiuunuaa pueya.

<sup>24</sup> Tama tariqui saniniuujia, nojoriiri Cesareya tiacajinia tiuquijioquiaari. Cornelioori na tiajinia sashiriquiaa Pedro, puetunu na tiajinia quijiacatajanaa, queraatia na rupenaatanio. Cornelioori puetunu nio pueyajanaa masuquiaari, nojori rerejonura juhuaacarijia na tiajinia Pedro tiuquiyacuishacarijia. <sup>25</sup> Pedro tiuquishacari, Cornelioori nocua tohuataquiaari. Carijiniacuma na naacuseeri. Pedroocuaa mojuquetaquiaariiri juhua Pueyasocuaa. <sup>26</sup> Pedroori saaja na sanaquiaari. Na sequereeri:

—¡Quia nujuare! Janiyari cayajuhuj, juhua quiajaniya.

<sup>27</sup> Tiaco na tiuquitasacari, pocojoriquiaa Pedrotaari. Pedro tiuquishacari, saaja queraatia pueya niquishiiri. <sup>28</sup> Pedroori nojori sequereeri:

—Taucuacanaa, niaacuajaari niishiya canaari Judiocuacani. Judiocuacaari rootasaaquiaari maja canaa rupenura taucuaa, maja quenaaja tahue tiajinia canaa tiuquiniuriajuhuaj. Saniniuujia, Pueyasoori quiarjia quia niishitiorucuaa cutara maja cua soonura tamasa. Taucuacaari maja sacuraatia quiarjia quiria. <sup>29</sup> Naaratej, cua niishishacari niaari cua masuurucuaa niyara, janiyari ritia canujiyarucuaani taacanuyaquiniutia. Cua totureja, ¿casaara nia masuurucuaa janiyani?

<sup>30</sup> Cornelioori na riucuarree:

—Cuatro juucaari tari shoconujia. Janiyari jiyacari Pueyaso secojoriquiaa juucua cua tiajiniani, pananu mueecosacari. Jiyacaritij, pueyanoori cucua muetarucuaa. Jiyacaricuaajaari quiriquiaa, tee pananu tiyanijia. Cuno pueyano toqueeri shacantugue quiriquiaa.

<sup>31</sup> Cua sequereeri: “Cornelionaa, Pueyasoori quia secojosano tojirii. Naajuhuj, niishiyari taa quia niquntiojoquiaa quia casami casamijiuuniucuanii. <sup>32</sup> Naaratej, quia seya quia jiyaramiquiri Jope tiacajinia, cuara Simón masuunuucua quiatuura. Na sesaari Pedrojuhuaj. Nojuajaari na sesaanucua tiajinia quia, shoniniacu caminia casaqueyaji. Tia camaruuri piiquiajinia shoqueya majeetejonu poonijioja. Simón Pedro jaara nimia quia tiajinia, quiaata pocojonutaniyari”. Pueyaso seruuri naa cua sequerucuaaqui Simónnaa.

<sup>33</sup> Janiyari jiyamitia ritia jiyarorucuaa cua seya Jope tiacajiniani, nojori pajenura tii quiajaniya. Quiaacuajaari maninia miirii cucua quia nishacari. Quiarjiani, puetunu pajaniyajaanaari niya Pueyaso niqiara quiyani. Naa quia pohuatere canaa tojishocoriquiano quiarjia, taa Pueyaso niishitiojorucuaa quiajaniya canaa quia pohuatanarucujani.

*Pedro pohuatasacari Cornelio tiajinia*

<sup>34</sup> Pedroori juhuacatecara pohuatanu coteequiaari. Sequereeri:

—Quiarjia niishiya seetanujuanaa cutaranijia, Pueyasoori maja rimiajata na niqiniu pajaniya. Majaari nia jiyaniinu Pueyasoori saaja Judiocuacaacua jiaatiaa, Israel pueya nojori quiniuucua. Maja. Nojuajaari tamasaacua jiaatiaajuhuj. <sup>35</sup> Tiquiyocua jiyacajinia Pueyaso secojojua pueya quishacari, nojoriiri Pueyaso jiyanooshano pueya quiyajuhuj, maninia miijia nojori quishacari. <sup>36</sup> Pueyasoori na rupaa pohuataniquiaari puetunu canaa Israel pueyarajanaa, jiyanooshano canaa quiniuria Jesucristoocua canaa tiuushacari. Nio Jesucristoori puetunu mijiria quiniaa Camarnujuanaa. <sup>37</sup> Tiuquiniujona Juanri Pueyaso

rupaa pohuataquiaari pueya tiuquinijosaanura. Na nuhuaji, Jesuuri cutara miishano miiniu coteequiaari Pueyaso cumaacata. Niaari tari niishiyacuaaja na miishano canaa Galilea jiyajinia, na nuhuaji na miishano puetunu Judea jiyajiniajanaanio. <sup>38</sup> Niaari niishiyajuhuj, Pueyasoori na Sohuanu niqutioquiaari Jesu, na cumaaca na jiiitanura. Nojuajaari maninia miiquiaari pueya, tiqiyocua na rucuanesacari. Cusosuhua naatani-jiojuuari. Samaruhua camarnu sesosano jeecaquiaariiaariuhuj. Puetunu naa miiija maniniajanaari na Que Pueyaso quiniucua nata. <sup>39</sup> Canaari puetunu na miishanojuanaa niqiuquiaarini, puetunu canaa Judiucuaa jiyajiniajanaa, Jerusalén tiacajiniajuhuaj. Janiyari seetanujuanaa canaa niqushano pohuataani. Na nuhuaji, pueyari na teetequiaari niyacutesanojinia. Tii na cusojuatquiaariiri. <sup>40</sup> Jiuujianaraca juucajinia, Pueyasoori na samiitianiquiaariuhua. Jiyacaritij, na saqiriojosano pueyacia na mueratereeri. <sup>41</sup> Majaari na muetanu quiquiaari puetunu pueyacuajanaa. Saaja canaacua muetaquiaariiri, teyano Pueyaso saqiriojoquiaari coteenu tariucuaaanucujani, Jesujiniji pohu-atanuuriquiano. Na samiitiasacariuhua, canaari nata miaquenuquiaari mariyatani. Canaari nata raruquiaarijuhuaj. <sup>42</sup> Jesu jaara canaa jiyaramiquiuciaari, nojuajaari canaa sequequiaari: “Naa nia pohuatere pueya niqiuara: ‘Pueyasoori Jesu jiyatequiaari puetunu mijiria quinia nequesoreenarajanaa, macunucua nequesoreeriquianojuhuaj’ ”. <sup>43</sup> Tariucuaaanu pueyara Pueyaso sequesano caminiujuniarini naa juhuacarijia seque-tuquiaari Jesujinijiuhuj: “Cante nocua tiuyani, nojuajaari jiyanooshaanutaniya sesa na miishanojiniji”.

*Pueyaso Sohuanu tiuquishacari taucuaa jiuujiajiniajuhuaj*

<sup>44</sup> Pedro pohuatasacarijia taucuaa niqulara, Pueyaso Sohuanuuri Pedro tojtianaa taucuaacua niqiaari, nojori jiuujiajinia na tiuquiniuria. <sup>45</sup> Pueyasocua tiuunaa Judiucuaani, Pedrota niqioquiaari Jope tiacajinijini, nojoriiri shiriqiuquiaari Pueyaso niq-uitiosacari cuno taucuaa na Sohuanu. <sup>46</sup> Cuno taucuaacari nojori niqiuara pocooriquiaa tamaatia rupaacajinia. Pueyaso maninihuaqueetariquiaari. <sup>47</sup> Naaratej, Pedroori sequequiaari:

—Nio pueyari tari jiiitia Pueyaso Sohuanu noojiajinia, taa pa jiiitacuaani. Naaratej, nojori cuara tiuquinijosaaaria quiarijia. ¿Cantucua nojori tenujura maja na tiuquinijosaa-nurani?

<sup>48</sup> Pedroori na nuhuaji sequequiaari cuno taucuaa tiuquinijosaanura Jesucristo sesajinia, nojori tiuushacari nocua. Na nuhuaji, Cornelioori Pedro sequequiaari:

—Niyaja quia camueenujura jaara canaata. Maja senota quianuhua.

## 11

*Taucuacajiniji Pedro pohuatasacari Jerusalén tiacajinia*

<sup>1</sup> Jesu jiyaramiquishano pueya, mariyata puetunu Jesuucua tiuunaa pueyajanaa Judea jiyajinia, nojoriiri naa pohuatasaaquiaaritij: “Taucuacanaari Pueyaso rupaacua tiuuri-ucuaajuhuj”. <sup>2</sup> Nocuaji, Pedro jaara tacatequiaariuhua Jerusalén tiacajiniuhua, narta Pueyaso pueyari na juaaquiaariuhua. Na juanaari taucuaa cararaatiuquia co miate-jonu panijiaa quiquiaari, taucuaa quiniuria seetanujuanaa Pueyaso pueya nojoriiri. <sup>3</sup> Nojoriiri naa juaaquiaari Pedro:

—¿Casaara quia quiaarucuaa cuno taucuaacuaani? Nojoriiri maja Judiucuaa juhua pajaniya. ¡Quiaanaari nojoritia miaquejocanjuhuj! Quia miishanoori maja maninia taa Pueyaso rootaquiaari tariucuaaanucujani.

<sup>4</sup> Pedroori suraatiaja nojori pohuataquiaari puetunujanaa tahuajiniji. Coteenu pohu-ataree na niqushano juhua na maquenujiniaari. Naa sequereeri:

<sup>5</sup> —Jope tiacajinia cua quishacari, janiyari panacari secorijiquiaani. Janiyari jiyacari juhua cua maquenujinia sonaque na natatucujiniji morojotasano niqiriini. Jiyareta cucujanaa roshinitiasaareeri. <sup>6</sup> Cua niqushacari sonaquejinia cua niishiniuria casaate mii quiriquiaani, janiyari saa puereeta casami niqiriijiaani. Janiyari niqiriini jiyacua rucojuua, sacocujuhuj, jiyocuaaanu jaacuatujucanico. Puetunujanaari pa miaque-socoriquiano pa puerasano casaa quiriquiaa. <sup>7</sup> Janiyari jiyacari jiyocuaaanu rupaa tojiriini. Cua sequereeri: “Pedronaa, nocua quia sanere. Quia puecoore quia miaque-socoriquiano”. <sup>8</sup> Janiyari saaja na riucaareeni: “¡Maja cua Jiyaniijiana! ¿Janiyatucua taa miaquere sacuaratiaa cua miaquesooni?” <sup>9</sup> Jiyocuaaanu rupaa socua cua sequero-huani: “Pedronaa, majaari miaquesocoriquiano Pueyaso jiyatesano soonu”. <sup>10</sup> Pueyasoori na pacutejocanu sequenu juucua janiyatej. Na nuhuaji, sonaque tacanitarohua jiy-ocuaaanuuri. <sup>11</sup> Jiyacaritij, jiuujianaraca canuuri cua quijia tiajinia tiuquishii. Nojori-iri Cesareya tiacajiniji jiyaramiquishano quiqianu, na pajenuunura janiya. <sup>12</sup> Nojori tiuquiyacquishacarijia, Pueyaso Sohuanuuri cua sequere: “Quiocua nojoritia quiaare.

Majaari taacanuuu. Majaari tahua soono nojori quia rupuesacari". Naa cua tojiniucuatej, janiyari cunora juhuajaniya nojoritia quiaarucuaani. Nio seis parta Jesuucua tiuunaa pueyari cuata quiojiyarucuaajuhuj. Canaari mariyata cuno tahua tijinia tiuquishiini. <sup>13</sup> Tia camaruuri canaa pohuatarucuaa taa na niqiquianu Pueyaso seru na tijinia nocua nujuaanoni. Pueyaso serunaari na sequeree: "Jope tiacajinia quia jiyarore quia seya, nojori cuara quiaara Simón masuunuucua. Na sesaari Pedrojuhuaj. <sup>14</sup> Nojuajaari quia sequenutaniya taate quia naata jiyanooshano quiniuni, Pueyaso pueyano quia quiniuria, puetunu quia tijinia quiniaajuhuj". <sup>15</sup> Saaja cua coteesacari Pueyaso rupaa pohuatanu nojori niqiara, Pueyaso Sohuanuuri nojoriicua niqianu, taa pocua coteenujuanaa na niqianucujani. <sup>16</sup> Janiyari jiyacari niishiQuii pa Jiyaniija sequesanonni. Naa na sequesantej: "Juanri moojinia tiuquiniija pueya. Pueyaso cutaraari na Sohuanu jiyaronutaniya niaacua, nioojiajini na tiuquiniuria". <sup>17</sup> Naacujitij, taucuaa tiuushacari pa Jiyaniijaacua, Pueyasoori na Sohuanu niqitiorucuaa nojoriijuhuj, taa na niqitioocanu pajaniyacuani. Cante Jesucristoocua tiuyani, Pueyasoori na Sohuanu na niqitioya. ¿Janiyatucua taa Pueyaso sequereruhuarini: "Maja cuno nojori niqitioyu quia Sohuanu"?

<sup>18</sup> Jerusalén tiacajinia quiniaa Pueyaso pueya jaara tojiqiaari naa Pedro sequesantej, nojoriiri sanaajetaquiaari. Tama nojoriijaarijia Pueyaso maniniuhuaqueetaquiaari. Naa sequetuquiaariiri:

—¡Pueyasojuhanaja jiyanoohua maninia! Nojuajaari taucuaa paniyajuhuj nojori tacatonura noojia sesa nojori miishanojiniji, jiyanooshano nojori quiniuriajuhuaj, pueyaraanu nojori rishiniuria Pueyaso.

*Antioquiya tiacajinia Jesu pueyajiniji pohuatasano*

<sup>19</sup> Esteban jaara mosaquiarucuaa, Judiocuacaari juhuacatecara Jesuucua tiuunaa miiquiaari naquiyajuhuj. Queraatia Jesuucua tiuunaa pueyari nocuaji mashiycuatucuaari. Nojoriiri tiqiyocua niaquejoquiaari. Noojiaqueyari na mashiycuatucacari tiuquijioquiaari Fencia jiyajinia. Tamasacaari tiuquijioquiaari Chipre jiyajinia. Noojiaqueyari Antioquiya tiacajinia tiuquijioquiaariijuhuj. Nojoriiri tii pohuatanuquiaari Pueyaso rupaa Jesujiniji saa Judiocuacaraja, maja taucucara. <sup>20</sup> Mashiyocuatunaa tijinia quiquiaariiri Chipre jiyajinijinio pueya, Cirene tiacajinijinio pueyajuhuj. Nio pueya jaara tiuquijioquiaari Antioquiya tiacajinia, nojoriiri Jesujiniji pohuataquiaari Griegohua niqiarajuhuj. <sup>21</sup> Jiyaniija Jesu cumaacaari nojoritia quiquiaariijuhuj. Naacujitij, queraatia Griegohuari tariucuaaanu tama nojori niishishanojuaaja cartequiaari, Jiyaniija Jesu tojiija nojori quiniuria.

<sup>22</sup> Jerusalén tiacajinia quiniaa Pueyaso pueya jaara nio niishiquiaari, nojoriiri Bernabé jiyarotucuaari Antioquiya tiacajinia. <sup>23</sup> Bernabé jaara tiuquiquiaari nojoriicua, nojuajaari jiyanoohua shuquiriquiaari na niqishacari taa Pueyaso miirucuaa maninia cuno Griegohuani, nocua nojori tiuushacari. Naaratej, nojuajaari naa rootaquiaari nojori:

—Pa Jiyaniijaacua nia tiuuri pueyaraanu. Majaari nocua tiuuniu nia cartenu. Suraa-tia na tojiijara nia quiri.

<sup>24</sup> Bernabeeri jiyanoohua maninia pueyano quiquiaari. Pueyaso Sohuanuuri noojia cumaquiquiaari jiyanoohua. Naacujitij, na pohuatasacari Jesujiniji, queraatia pueyari Jiyaniijaacua tiuquiaari.

<sup>25</sup> Na nuhuaji, Bernabeeri Tarso tiacajinia quiaquiaari Saulo pajenuucua. Jaara na riuriataquiaari, na jiyataquiaari Antioquiya tiacajiniaari. <sup>26</sup> Nojori quishacari Pueyaso pueyata cuno tiacajinia, nojoriiri tii shocotequiaari niqiriiryatu marijia. Nojoriiri queraatia Pueyaso pueya niishitiojonuquiaari. Tii Antioquiya tiacajiniani, Jesuucua tiuunaa pueyari coteenu sesojosaquiaari "Cristiano". Nioori pueyano rupaaajinia sequeshiya "Cristo tojiniaa pueya".

<sup>27</sup> Cuno quishacari, Jerusalén tiacajiniji Pueyaso sequenu panishano caminiujunaa pueyari tiuquijioquiaari Antioquiya tiacajinia. <sup>28</sup> Tamonu nojoriinjiniioni, na sesa quiquiaari Ágabo. Nojuajaari Jesuucua tiuunaa pueya rerejonaa tajiniji nujaquiaari pocuanura. Naa caminiujuquiaari Pueyaso Sohuanu niishitiosano nojuajaari:

—¡Pueyanaa, puetunu pa jiyacajinijanaani, miaajenuuri quiniutianiya!

Seetanujuanaa sequequiaariiri Ágabo. Cuno miaajenuuri quiquiaari Claudio quishacari jiyaniijaajanaa, Césarthuhaj. Nojuajaari Roma tiacajiniji jiitiaquiaari puetunu jiyacajanaa.

<sup>29</sup> Antioquiya tiacajinia quiniaa Pueyaso pueya tojishacari naa Ágabo sequesantej, nojoriiri sequequiaari:

—¡Judea jiyajinia quiniaa parta Pueyaso pueya pa naacure!

Nojoriiri naa miiquiaari. Naaratej, cante queraatia cumaneeca jiitiaquiaarini, nojoriiri queraatia niqitioquiaari. Saniniujia, cante maja puera cumaneecaraca quiquiaarini,

nojoriiri secaja niqutioquiaari na jiiatasanojiniji. <sup>30</sup> Na nuhuaji, nojoriiri nareja na niqutiojosano cumaneeca jiyarotaquiaari Bernabeeta, Saulotanio. Nojoriiri Pueyaso pueya jiiatanaa niqutioquiaari saniniuuja Judea jiyajinia.

## 12

### *Jacobo nacatasaanujiniji pohuatasano, Pedro nujuatesaanujinijinio*

<sup>1</sup> Jiyacaritij, Herodesri Pedro quietequiaari quiquiaari Judea jiyajinia. Nojuajaari Jesuucua tiu-uniaa miiquiaari naquiya. Noojiaqueya quiootequiaari na saniitosocoriquiano nujuatejojuajiniaari. <sup>2</sup> Naa Juan tarajanu Santiago motequiaaricuaajaari nijiniaquetucuaaja mueruuta. <sup>3</sup> Judiocuacaari shuquiriquiaari naa nojori jiyaniijia motesacari Santiagotej. Naaratej, Herodesri Pedro quietequiaari na soldadohuajuhuj, Judiocuaca timitianura socua nojuaja. Pedroori quiasaaquiaari Judiocuaca queranacunuusacari, nojori sasacari pan na poreetajaaju majeetesano. <sup>4</sup> Pedro quiasaanu nuhuaji, Herodesri na nujuatequiaari nujuatejojuajinia. Na tohatenu paniriquiohua juucua Pascua nuhuajiiri, na nequesoreesocoriquiano puetunu quiniquia Judiocuaca niqiarajanaa. Deciséis soldadohuari Pedro cojuariquiaa pueyaracaanu. Nocua sanitijiootooquiaariiri; coteenu cuatro, na nuhuaji socua cuatro. Nojoriiri naa sanitijiootooquiaaritij. <sup>5</sup> Pedroori maninia cojuasaaquiaari nujuatejojuajinia. Jiyacaritij, Jesuucua tiuuniaa pueyari saniniuuja nocuara secojonuuriquiaa jiyanhua, Pueyaso naacunura Pedro.

### *Pueyaso mashiquishacari Pedro nujuatejojuajiniji*

<sup>6</sup> Cuno niucujani, na juhuaqueyaquishacarjija, quera Herodes tohuatesee tariquicuajji Pedroni, na nequesoreesocoriquiano puetunu pueya niqiarajanaa. Pedroori caapiqui soldadohua tajiniocoma maqueriquiaa, maninia saatijiotasano cumayocuata na numatucua cajiniocua. Tamasaca soldadohuari nujuatejojuata tohuateyaji cojuariquiaacujua. <sup>7</sup> Jiyacaritij, Pueyaso seruuri canashiyauji coretaquiaari jiyareta Pedro shuriucujanaa nujuatejojuata jiniacuma. Na shacantuucaari jiyanhua cuhuataquiaari nujuatejojuata. Pueyaso seruuri Pedro jiuuquirri na shuucujaji. Na niucujareeri. Na niucuasacari, na sequereeri:

—¡Ritia quia sanere!

Cumayocuaari tamajaaja saacarejetaquiaari Pedro numatucuaacujaji. <sup>8</sup> Pueyaso seruuri na sequerejuhuaj:

—¡Quia cajiniocua camarucujua quia saatiri socua! ¡Quia sapatu quia cushirijuhujaj!

Pedro jaara naa miiquiaari puetunu na sequesanojuanaa, Pueyaso seruuri socua na sequerohua:

—¡Quia toque quia cushiri ritia! Majaari tarishiniu. ¡Quiocua cua nuhuaji rupaashijia!

<sup>9</sup> Pedroori ritia Pueyaso seru nuhuaji sacuariquiaajaa. Jiyanhua jiyajeneriquiaari. Majaari na niishiniu quiriquiaa puetunu na niquishanojuanaa. Nojuajaari jiyaniiriquiaa na maquenujinia niquiya naasucua. <sup>10</sup> Nojoriiri coteenu shocomaa na tacoji cojuanaa soldadohua. Socua na tacoji cojuanaa tajitiumiaajariuhuj. Naa quenaacoturee nujuatejojuata tohuateyajiiri. Nojuajaari Pueyaso seruta nujuatusee jiyareta tohuateyaji. Tohuateyaji cumueca casaata shipinishano quiquiaari. Jiyacaritij, tohuateyari tamajaaja riatequee. Nojoriiri tohuareetamaa carijiniacuma. Pueyaso seruuri Pedro jiyatariquiaa sapuenujaara tiaca jiuujiaaco. Na nuhuaji, na shuriucujaji shaajequeeri. <sup>11</sup> Pedroori jiyacari shusha niishiquii. Naa sequereeri:

—¡Seetanujuaaqui quiriquiaa! ¡Cua Jiyaniijiaquiiri na seru jiyaroree cucua, na mashiquiniuria janiya Herodescujaji, cuarta Judiocuacaacujijihujaj! Naa na jiyaroreeri maja cua miishaanura taa nojori niishiriojoriquiaa na miiniuria juucua janiyani.

<sup>12</sup> Nojuajaari naa na niishiriojonuta María tijajinia quiaquiaari. Nio Maríacuajaari tamonu Juan nucua. Cuno Juan sesaari Marcojuhuaj. Cuno tijajinia, queraatia Pueyaso pueyari Pedroocua tii secojonuuriquiaa jiyacari. <sup>13</sup> Pedroori jiyacari piquiquiaari carijiniacuma mataca tohuateyaji. Tiaco seruuri na tojiquiaari piquiyano. Nio seru sesaari quiquiaari Rode, niyacoo. Nojuajaari juucua catecanoquiaari tohuateyaji, na niquiniuria cante quiriquiaani. <sup>14</sup> Nojuajaari saaja Pedro tojishii tia camarujiyaniquiyano, na tiotiu na riatanura nocujaji. Niyacoo tojishacari seetanujuaana Pedro rupaa, majaari tiotiu na riatanu quiquiaari na shuquiriniutia. Saaja netequiaariuhua tiaco quiniaa numootenuraari. Nojori sequesuhuari:

—¡Pedrocuajajaj nooj, tohuateyaji nujuatej!

<sup>15</sup> Pueyari saa niyacoo riucuaquiaarijia:

—¿Quiaate paateya? Teyano Pedrote nujuatesaarucuaacujani.

Niyacoori nojori sequenu pacutequiaariuhua:

—¡Taaquiririnij! ¡Pedrocuaaquiniatejaj, nooj nujuatej!

Pueyari saaja sequequiaari:

—Maja nojuaja. Pedro cojuana Pueyaso seru naasucuacuja.

<sup>16</sup> Nojori nacojosacari tiaco, Pedroori tohuateyaji piquijioriquiaajaa. Tiootiu jaara socua riatasaquiaari, nojuacuajaari quiriquiaa. Pueyari na niquishacari shiriqiu-tiuquiaari. <sup>17</sup> Pedroori nojori sanaajaree jiyacari na juashiquiata. Cuniqiu quiniaa pohuatareeri taa Pueyaso tohuaterohua nojuaja nujuatejojuajiniini. Pedroori naa seque-  
quiaari nojoritij:

—Niocua naa pohuatare Santiagojuhuaj, parta Jesuucua tiuuniaanio.

Na nuhuaji, Pedroori tiji tohuatacuhua. Tamaqui quiaareeri.

<sup>18</sup> Jaara juhuaquequiaari, nujuatejojuajinia cojuanaa soldadohuari jiyanoehua shiriqiu-tiuquiaari. Majaari nojori niishiniu quiquiaari taa Pedro miirii nujuatejojuajiniini nojori tajiniini. Tama nojorijiaarijia naa sequetuquiaari na puerenuta:

—¡Pa jiyaniijia Herodesri quiarijia pa puecoonutaniya, maninia pa cojuaaquiniucua Pedro!

<sup>19</sup> Herodes niishishacari, na shuriucua nujuatunaa soldadohua jiyaroquiaariiri nujuate-  
jojuajinia nojori pajenura Pedro. Nojori jaara na riuriataaquiquiaari, Herodesri nujuate-  
jojuajinia Pedro cojuanaa soldadohua nequesoreequiaari na juaaniutia, na niishiniuria  
juucua taa Pedro juurequeree nojori shuriucujini. Na nuhuaji, Herodesri jiyanoehua na  
juaaniutia na shuriucua nujuatunaa soldadohua sequequiaari, nojori puecoonura narta  
soldadohua, nojori cojuaaquiniucua maninia Pedro nujuatejojuajinia. Naa na miiniu  
nuhuajitij, Herodesri Judea jiyajiniini pacuquiaari. Cesareya tiacajinia quishiiri.

*Herodes shaajenujiniini pohuatasano*

<sup>20</sup> Jiyacaritij, Herodesri jiyanoehua juaariquiaa Tiro tiacajinia quiniaa pueyata, Sidón  
tiacajinia quiniaatano. Nio caapiqui tiacajiniini pueyari jiyaniijia Herodes tiacajinia  
quiojoquiaari nata nojori pocoojonura juucua. Majaari cuno juuca nojori pocoojonu quirii  
jiyaniijia Herodesta. Nocuaji, nojoriiri Herodes seru sequeree:

—Quiocua quia jiyaniijia sequere, canaa nata jiyanoootoonu paniyani.

Cuno Herodes seru sesaari quiquiaari Blasto. Nojuajaari na jiyaniijia panishano  
quiquiaari. Na jiyaniijia maqueja cojuana quiquiaariijaariuhua. Tiro tiacajiniini pueya,  
mariyata Sidón tiacajiniini, nojoriiri na cumaneecata masetujua na miaquesocoriquiano  
jiyaniijia Herodes jiiitasano pueyajiniini. Nojoriiri jiyamitia jeecatoonu paniriquiaa cuno  
jiyaniijia, maninia nojori quiniuhuara nata, Herodes niqutiojotenuhuara na jiiitasano  
pueya na miajajaura Sidón tiacajiniini pueya, Tiro tiacajiniini pueyano. <sup>21</sup> Herodes  
seruuri nojori sequequiaariuhua:

—Niocua tamonu juuca nimia, jiyaniijia nia pocoojonura.

Na nuhuaji, cuno pueyari na sequesano juucajinia niquiariuhua. Jiyaniijia Herodesri  
nojoriicujia maniniushiquiaari. Na maniniuqui toque cushiquiaariiri. Jiyaniijiaacuajinio  
shipinishano cajitujinia cajiriohuari. Tiji pocuaquiaari cuno pueyacuuaari. <sup>22</sup> Puetunu  
cuniqiu quiniaa pueya tojishacari naa maninia Herodes pocuaano nojori niqiaratej,  
nojoriiri nacoonu coteequiaari. Naa sequetuquiaari na nacoosacariiri:

—¡Nio pueyano pocuaani, majaari nareja pueyano! ¡Nojuajaqui Pueyaso!

<sup>23</sup> Pueya sequesacari naa Herodestej, nojuajaari juhua shuquiuriosaaquiaari saa-  
jaruhua. Majaari quenaaja cuno pueya na sequenu quirii: “Maja naa cua sequetunutej.  
Janinya maja Pueyasoni”. Nocuaji, Pueyaso seruuri canashiyajuiji na tojetequiaari. Na  
pocuasacarijia cusomaari. Na sarapiyari na jiniacuma miaquequiaari. Naa cusotaquiaari  
tama na sarapiyajaarijia.

<sup>24</sup> Pueyaso rupaaari saniniujia socua niyacasaquiaari, tiqiyocua pohuatasacari  
puetunu pueya niquiarajanaa. Naacuajitij, Pueyasocua tiuuniaa pueyari socua queraa-  
tiara canequiaarijuhuaj. <sup>25</sup> Bernabé, Saulonio, nojori jaara niqutioquiaari cumaneeca  
Jerusalén tiacajinia Pueyaso pueya jiiitanaa, nojoriiri ritia quiojoquiaariuhua Antioquiya  
tiacajiniohua. Nojoriiri jiyacari Jerusalén tiacajiniini riquiaariuhua Juan. Juan sesaari  
quiquiaarijuhuaj Marco.

## 13

*Saulo Bernabeeta rucuanajonu coteesacari Jesujiniini pohuatanura tiqiyocua*

<sup>1</sup> Antioquiya tiacajinia Jesuucua tiuuniaa pueyajiniini, noojiaqueyari quiquiaari  
Pueyaso sequenu panishano Pueyaso pueyara caminiujia. Quiquiaariijaariuhua  
Pueyaso Rupaa niishitiojanaa. Niioori nojori sesaca: Bernabé; Simónnio, na sesa tarajanu  
quiquiaari Negro; Lucionio. Nojuajaari Cirene tiacajiniini pueyano. Quiquiaariijaari-  
uhua Manaén. Nojuajaari mariyata Galilea jiyajinia jiyaniijiarano Herodesta canashiti-  
jiosaquiaari. Quiquiaariijaariuhua Saulo. <sup>2</sup> Tamonu juuca, puetunu nojorijianaari



Pueyaso secojonuuriquiaa. Cuno juucajuhuj, majaari nojori miaquenuunu quiriquiaa socua na secojonuunura Pueyaso. Jiyacaritij, Pueyaso Sohuanuuri nojori sequequiaari:

—Bernabé Saulonio, nojori nia jiyatere cua panishano miiriquiano, taa cua sequequiaari tariucuacaanucujani.

<sup>3</sup> Nojoriiri jiyacari socua maja na miaquenuunu quiquiaari. Saaja Pueyaso secojonuuriquiaa socua jiyanohuari. Na secojonuunu nuhuaji, nojoriiri Bernabé nacaacua, mariyata Saulo nacaacua niatuquiaari na juaashiquiaa. Nojoriiri naa miishaaquiaari nojori jiyatesaanura Pueyaso jiyaramiquishano pueyara, Pueyaso rupaa pohanuuriquiano jiyanohua Pueyaso Sohuanu cumaacata.

#### *Jesujiniji pahuatasacari Chipre jiyajinia*

<sup>4</sup> Pueyaso Sohuanu jiyaramiquishano Bernabé, Saulonio, nojoriiri cuniquiji janiya quiaquiaarijaara nuucuole Seleucia tiacajiniara, shoniniacu caminia casaqueyaji. Nojoriiri cuniquiji quiaquiaari puereetuca buquejina Chipre jiyanihano jiyajiniara. Chipre jiyari jiya tucuaatijaja, shoniniacu caminia juujajinia. <sup>5</sup> Nojori tiuquijiosacari Salamina tiaca tacatajajiniji, tii Pueyaso rupaa pohanuunu coteequiaari puetunu cuniqui quiniaa Judiocuaca secujojuaca tijajiniaqueyajanaari. Juanri nojoritia quiriqiaajuhuj, nojori naacuriquiano. <sup>6</sup> Naa nojori rucojosacari Pueyaso rupaa pohanuura Chipre jiya tucuaatijajacuatej, socua tiuquijioseequiaari Pafos tiacajiniara Chipre tamajiria. Nojoriiri tii riuriatquiaari shimiacu, narta judio pueyano. Na sesa quiquiaari Barjesús. Nojuajari cuniqui quiniaa sapojoquiaari naatej: “Janiyacuaja Pueyaso sequenu panishano caminiujunia pajaniyarani”.

<sup>7</sup> Cuno shimiacuuri pueyaracaanu Sergio Paulota quiquiaari. Sergio Pauloori Chipre jiya jiyaniija quiquiaari. Cuno jiyaniijaari jiyanohua niishijia quiquiaari. Nojuajari Bernabé masuquiaari Saulonio, nojori pohanuura Pueyaso rupaa nojuaja. <sup>8</sup> Cuno shimiacu sesaari Griego rupaajinia sequesaaquiaari Elimas. Nojuajari saaja cuno jiyaniija niqiuara cuaracashitiquiaari Pueyaso rupaa. Naa sequereee cuno jiyaniijaari:

—Maja cuno pojori tojinii. Jiyanohua sesaari nojori pahuatasano. Quia samojiuyano.

<sup>9</sup> Saulo sesaari Pablo quiquiaarijuhuj. Jiyacari, Pueyaso Sohuanu cumaquishacari nojuaja, Pabloori jiyanohua shitimia shimiacu jiquioco shootiaree naa na sequesacari nojuaja:

<sup>10</sup> —;Sesaaca niyanu sequena! ¡Maninia miijiaa paracaajiana! ¿Casaara pueya quia tenujiya Pueyasocujajini? <sup>11</sup> ¡Cua Jiyaniijaari quiaritia quia saniitionutaniya! ¡Quiaari cariyojuarura quiniutianiya seetanujanaa! ¡Quiaari pasaja tarishiniutianiya cariyojuarura quia quishacari!

Jiyacaritij, juhua niniquiaari na namijajinia cajimaa. Cariyojuarura quiqiiiri. Juhua ninishiqui quiaquejoquiaari puetunu cunocojuanaari, na juaashiquiaajiniji na jaatucusaanura juucua. <sup>12</sup> Cuno jiyaniija jaara naa niquiquiaaritia, Pueyasocua tiuuriiri na niqiuara nojori pahuatasacari shanohua jiyaniija Jesujiniji.

#### *Pablo, Bernabé quishacari Antioquiya tiacajinia, Pisdia jiyajinia*

<sup>13</sup> Pabloori na cojiniaata Pafos tiacajiniji quiaquiaari buquejina Perge tiacajiniara, Panfilia jiyajinia. Juanri Perge tiacajinia cateseequiaari nojoriicuaaji. Tiji rujuuquiaariuhua Jerusalén tiacajiniohuari. <sup>14</sup> Na nuhuaji, Pabloori Bernabeeta Perge tiacajiniji quiaquiaari Antioquiya tiacajinia. Antioquiya tiacaari Pisdia jiyajinia. Tii nojori quishacari, nojoriiri samaatenu juuca quiaquiaari narta Judiocuaca secojonuujaja tijajinia. Na tiuquishacari, cajitiushiiri. <sup>15</sup> Jiyacaritij, tariucuacaanu Moisés Rootasanoori serojosaaquiaari. Tariucuacaanu Pueyaso sequesano caminiujuniaa naajiotasanoori serojosaaquiaarijuhuj. Na nuhuaji, rerejuaa tia camarnuuri naa sequequiaari Pablo, Bernabeenio:

—Cuarta Judiocuacanaa, niaa jaara Pueyasojiniji nia niishishano casaa sequenu paniri, nia niishitiojore quiaritia nia quiniaa niqiuara.

<sup>16</sup> Pabloori sanequiaari. Na juaashiquiata sanaajaree pueyari. Naa nojori sequereeri:

—Nia tojtijaree cuarta Israel pueyanaa, niajanijuhuj, canapete Pueyaso tojtijajacacujani tamasaca pueyapuejinijinio. <sup>17</sup> Paari sequequiaari: “Pueyasoori pa jiyaniija, Israel pueya pa quiniucua”. Seetanujanaa, paacuaajari Pueyaso saquiriojosano pueyacujajinioni. Tariucuacaanu, Pueyasoori maniniushiquiari pa supuetanaa saquiriojosaaquiaari na pueyara quiriquiano. Na nuhuaji, jiyanohua pa supuetanaa canetequiaariiri Egipto jiyajinia nojori quishacari. Na nuhuaji, Pueyasoori nojori mashiquiaari cuno jiyajiniji na cumaacata. <sup>18</sup> Cuarenta mariijaari pa supuetanaa shoconujuquiaari pueyaracaanu nojori rucojosacari najuhuaa cariiquia jiyajinia. Pueyasoori jiyacari nojori rejeretaquiaari na tojtiaquishacari nojuaja. <sup>19</sup> Na nuhuaji, Pueyaso cumaacata, siete tamaatiucua rupaa pocujajaca taucuaari puecoosaaquiaari Canaán jiyajiniji, saniniujia cuno jiya na niqitiosocoriquiano pa supuetanaa. <sup>20</sup> Pa supuetanaa jaara

Canaán jiya camaruhua quiquiaari tari, socua cuatrociento cincuenta marijiaari nojori shoconuquiquiaari saaja nequesoreenaa jittiasacari nojori. Na nuhuaji Samuelri nojori nequesoreenara jiyatesaaquiarrijuhua. Nojuajaari Pueyaso sequesano caminiujunia quiquiaarrijuhua. <sup>21</sup> Samuel quishacarjia, pa supuetanaari Pueyaso seconuquiquiaari na panitushacari jiyaniija, nojori jitiariquiano nequesoreenaa niti. Naacujitij, Pueyasoori nojori jiyaniijara jiyatequiaari Saúl, Cis niyanu, supuetana Benjamin niqiuohuacujinjo supueno pueyano. Saúlri nareja cuarenta marijia shocotejoquiaari pa supuetanaa jiyaniija na quishacari. <sup>22</sup> Na nuhuaji, Pueyasoori Saúl soojotaquiaariuhua Saúl tojiyaquiniucua nojuaja. Saúl niti David jiyatequiaariuhua Israel pueya jiyaniijara saniniuurjia. Pueyasoori naa sequequiaari Davidjiniji, na timitiasacari nojuaja: "Isai niyanu Davidcuaajari cua shuquiuriojua. Nojuajaari cua panishano pueyano. Nojuajaari puetunu cua panishano miiniutianiyajanaa".

<sup>23</sup> Quiari naataja, Pueyasoori na sequesano tohuateequiaari na mueratesacari pocuaji Tacuna. Nojuajaari Jesu, David niqiuohuacujinjo supuenoni. Pueyasoori na seerataquiaari Israel pueyacuaji Tacuna quiriquiano, taa na sequequiaari tariucuaacaanucujani. <sup>24</sup> Jesu coteyaquishacarjia rucuanenu na Quejiniji pohuatanura, Tiuquinijiona Juanri coteenu nocuaji pohuataquiaari Pueyasojiniji puetunu Israel pueya niqiarajanaa. Tiuquinijiona Juanri nojori sequequiaari noojia nojori tacatonuhua Pueyasoocua, naajuhua, moojinia nojori tiuquinijosaanura, Pueyaso tojiijara nojori quiniuria. <sup>25</sup> Quera Tiuquinijiona Juan shaajesacari, nojuajaari naa sequequiaari: "Janiyari maja Pueyaso Jiyarosani taa nia jiyaniquiaa najuhua janiyacujani. Na Jiyarosano cutaraari cua nuhuaji niniutianiya. Nojuajaari seetanujanaa Jiyaniijajanaa cutara. Janiya maara jiyanoohua shuquiriaatia quirini, nojuaja jaara cua sequere na serura cua quiniuria quenaaja na sapatu cua jocuanura nera. Nojuaja cutaraari saaja maninia miijia".

<sup>26</sup> 'Cuarta pueyanaa, nijaniya cante Abraham niqiuohuacujinjo pueyacuajani, cua tojitiare, nijaniyajuhua taucacanaa, canapueete Pueyaso tojiyacujani. Niaaranoori nio maninia rupaa Pueyasojiniji, nia jiyanooshaanura sesa nia miishanojiniji. <sup>27</sup> Jerusalén tiacajinia quinia, mariyata na camarucuanio, nojoriiri maja na niishiniu quijia cante Jesu quiquiaarini. Majaari nojori niishitiunio quiquiaarrijuhua Pueyaso sequesano caminiujuniaa naajiotasano tariucuaaanu. Cunoori najuhuaa nojori serojonuusano puetunu samaatenu juucajanaa. Naacujitij, nojori jaara moquiaari Jesu, maninia tohuateequiaariiri Pueyaso sequesano caminiujuniaa naajiotasano, taa Jesujiniji sequesaaquiaari tariucuaacaanucujani. <sup>28</sup> Jesuuri seetanujanaa maja na miiniu quiquiaari sesa. Tama nojoriijaarjia juhua sesa miijara na jiyatequiaari cutara. Naacujitij, Pilato sequetuquiaariiri cuara na moteeranoj. <sup>29</sup> Nojori jaara tari miiquiaari taa nojuajiniji naajiotasano quiya tariucuaaanu Pueyaso Rupaajiniacuajani, na roshintiquiaari niyacutesanojinijiiri. Raaco na niatureeri. <sup>30</sup> Naajaa, macu na quishacari, Pueyasoori saaja na samiitianiquiaariuhua. <sup>31</sup> Na samiitanu nuhuaji, Jesuuri sequeyarcua na pueyacu mueranacujuquiaari, noo pojoriicua canapueete na tarajaquiaari na quiasacari Galilea jiyajiniji Jerusalén tiacajiniaracuajani. Nojoricuaajari quiarjia nojuajiniji poojotaniuhua puetunu pueya niqiarajanaa.

<sup>32</sup> 'Canaari timiyari canaa pohuatasacari nijaniya, ¡Pueyaso pohuatasano pa supuetanaari tari tohuateecanu! ¡Pocuaji Tacunacuajari tari miiquianu puetunu pa jiyanooshaanurajanaa! <sup>33</sup> Seetanujanaa, Pueyaso sequesano pa supuetanaa Israel pueyarani, cunoori shusha pajaniyara tohuateecanu, pa supuetanaa Israel pueyacuajinjo pa quiniucua. Pueyasoori tari tohuateecanu na sequesano pajaniyara, na samiitianiishacariuhua Jesu, naatej, taa David jaaquequejonee Salmojinia na sequesano quiyacuajani. Naa naajiotasano quiyari segundo Salmojinia: "Quiaari cua Niyanucua. Janiyari quiarjia quia samiitianiirini".

<sup>34</sup> Pueyasoajari sequequiaari, nojuacuajari na samiitianiutianihua na moqueyaquiniucujani na raaco. Nioori naajiotasano quiyajuhua tariucuaaanu Pueyaso Rupaajinia. Naa sequeyari:

"Janiyari maninia niaara miiniutianiyani taa cua sequequiaari Davidcujani".

<sup>35</sup> Naa naajiotasanoori Jesujiniji quiyajuhua David jaaquequejonee Salmojinia:

"Majaari quia panishano seru cuaqueya quia shanacunu quiniutianiya na moquenura".

<sup>36</sup> Pueyanaa, paari seetanujanaa niishiyani Davidri puetunu Pueyaso panishano na miiniu nuhuajijanaa shaajequiaari. Nojuajaari na supuetanaa rupuequiaari macunucua quiquiojinia. Na cuaqueyari seetanujanaa moquequiaari cutara. <sup>37</sup> Noo Jesu saniniucua, Pueyaso cutaraari na samiitianiquiaariuhua. Majaari na moquenu quiquiaari cutara.

<sup>38</sup> Cuarta Israel pueyanaa, niaa cumaati canaa pohuatasano niishiya. Canaari Jesujiniji nia pohuataani. Niaa jaara nocua tiuuri, niaari sesa nia miishanojiniji jiyanooshaanutaniya. <sup>39</sup> Moisés Rootasanojinia, paari tariucuaaanu niishitiojosaaquiaarini pa seya

pa puecoonura Pueyasora, Pueyaso jiyanooniuria pajaniya sesa pa miishanojiniji, maja pa mosaanura saniniuujia. Majaari seetanujuanaa pa jiyanooshaanu quiquiaari naa pa miishacaritij. Quiarijia cutara, canapueete Jesuucua tiuya saniniunijia, nojoriiri puetunu sesa na miishanojinijijianaa jiyanooshiya. <sup>40</sup> Naa cutaraari cocuaatia miiniutianiya pueyanaa, nia jaara cua pohuatasano ruuretare. Pueyasoori na tojiyashijiaa saniitionuniya taa tariucuacaanu Pueyaso sequesano caminiujuninaa sequequiaaricujani. Naa sequetuquiaariiri:

<sup>41</sup> “Nia tojitiare, rerequetejacanaa. Niaari jiuujiatenutaniya najuhuanaj. Na nuhuaji, niaari shaajasaanutaniyajuhaaj. Janiyari Pueyasoni. Janiyari tarijia nia niquishoo casaa miiniutianiya. Tamasaca jaara nia pohuatate, niaari saaja na cuaracashitiniutianiya”.

<sup>42</sup> Na nuhuaji, Pabloori narta Judiocuaca rerejojua tiajiniji tohuareetaquiaariuhua na cojiniaata. Taucuacaari tii quiriquiaajuhuaaj. Nio taucuacaari Judiocuacaacua pacunaa quiquiaari, Judiocuaca nojori quiuniurajuhuaaj, Pueyaso sequesano tojitianaara na quiniuria. Nojoriiri Pablo sequequiaari, Bernabeenio:

–Niocua tamonu sábadó canaa pohuatateeruhuaaj, socua canaa tojiniuria Jesujiniji.

<sup>43</sup> Nojori quiojosacariuhua Judiocuaca rerejojua tiajiniji, queraatia narta Judiocuacaari nojori nuhuajiquiaari, queraatia taucacajinijinio Judiocuacaacua pacunaanio. Cuno pojoriiri maninia Moisés niishitiojosano tojitianaa quiquiaari. Nojoriiri Pablo, Bernabé nuhuaji sacuariquiaa. Naaratej, Pabloori Bernabeeta naa rootaquiaari nojori:

–Saaja Pueyasocua tiuujia nia quiri. Majaari nocuaji taacanuunu. Nojuacuajaari pa cumaquijia.

<sup>44</sup> Cuno nuhuaji, Sábado juuca jaara tari quiquiaari, quera puetunu cuno tiacajiniji pueyajanaari Pueyaso rupaa tojiniuucua rerejojuaari. <sup>45</sup> Judiocuaca secojojua tia camarucua jaara niquiquiaari queraatia pueya na rerejojuaajinia mishiyano, Pablo pohuatasano na tojitianura, nojoriiri juaaquiouquiaari. Nojoriiri tama sequetooquiaarijiaaja:

–Puetunu pueyajanaari cuno pojori tojitiajacara quiniutianiya. Pa tojiyaquiniutianiya saniniuuriija.

Naa sequeturiquiaa pueya niquiara Pablojinijijaariuhuaaj:

–¡Pabloori maja maninia na niishiniu Pueyaso rupaa! ¡Najuhuaana sesa pohuataano!  
¡Nojuajaari niishiyashijia!

<sup>46</sup> Pabloori saaja Bernabeeta sequequiaari na puereyaquiniutia:

–Maniniacuajaqui, cuarta Judiocuacanaa. Canaacuajaari naa panitiaja nijaniyatej, Pueyaso rupaa canaa coteetanuro pohuatanu nijaniya, Pueyaso saquiriojosano Judiocuaca nia quiniuucua. Niacuajaari saa na ruuretareejaa. ¡Majaquiiri nia rishiniu paniniu, pueyaracaanu nia quiniuria Pueyasota! Quiarijiani, canaari saniniuujia taucuacaacua quianutaniyani, Pueyaso rupaa canaa pohuatanura nojori niquiara. <sup>47</sup> Canaa Jiyaniijia jaara canaa jiyaramiquiaari, nojuajaari naa canaa sequequiaaritij: “Quia jiyatequiaari mijiria cuhuatariquianonijia. Quia pohuatasano janiyajinijiri caminiujiushaanutaniya taucuaca niquiara puetunu jiya puequetujinijianaa, Pueyaso jiyanooniuria nojorijihuaaj”.

<sup>48</sup> Cuniqú quiniaa taucuaca jaara naa tojiquiaari sequeshiyanotej, nojoriiri shuquiriquiaari. Pueyaso rupaa maniniuhuaqueetareeri. Sequetureeri:

–¡Jiyanoohua maninia pa Jiyaniijia Pueyaso rupaa!

Teyano pueya Pueyaso saquiriojoquiaari tariucuacaanu na pueyara quiriqianocujani, pueyaracaanu nata rishiniuriacuajani, jiyacaritij, nojoriiri Jesuucua tiuquiaari. <sup>49</sup> Jiyaniijia rupaari pohuatasaaquiaari puetunu cuno jiyajinijianaa. <sup>50</sup> Judiocuacaari na juaniutia Pueyaso panijiaa maajipohua shiniujuquiaari na cojitiuniuria nojori, nojori miiniuria naquiya Pablo, Bernabeenio. Naa rootatuquiaari cuno tiacajiniji camarucua-jaariuhuaaj, mariyata cuno jiyajiniji nojori taanuunura Pablo, Bernabeenio. <sup>51</sup> Naaratej, na nuhuajiria, Pablo, Bernabeenio, nojoriiri na niocuacajiniji seseeca rapijionuutaquiaari. Naacuajitij, Antioquiaa tiacajinia quiniaa pueyari niishiquiaari, Pueyaso saniitosacari nojori, majaari nojori Pabloocua, Bernabeecua na tiuutianu quiniutianiya Pueyaso jiyanoayaquishacari nojori. Na nuhuaji, Pabloori Bernabeeta cuno tiacajiniji quiaquiaari Iconio tiacajinia. <sup>52</sup> Jesuucua tiuuninaa pueyari saniniuujia shuquiriaatia jatequiaari Antioquiaa tiacajinia, nojori jütiasacari Pueyaso Sohuanu.

<sup>1</sup> Pablo, Bernabeeta naa miiquiaarijuhua Iconio tiacajinia. Nojoriiri narta Judiocuaca rerejojua tiajinia tiuquitiaquiaari. Nojoriiri tii pohuataquiaari Jesujiniji puetunu nojori niquiarajanaa. Queraatia pueyari Jesuucua tiuquiaari, Judiocuaca, taucucanio. <sup>2</sup> Noojiaqueya Judiocuacajinijiniori maja na tojiniu paniniu quiquiaari Jesujiniji pohuatasano. Cuno pojoriiri taucuaa shiniujuquiaari nojori juaaniuria Jesuucua tiuunaa pueya. <sup>3</sup> Pabloori, Bernabeeta cunora socua jyojequiaari pueyaracaanu cuniqui, Jesuucua tiuunaa nojori cumaquiniuria. Nojoriiri maja na puerenu quiquiaari Jiyaniijajiniji nojori pohuatasacari. Seetanujanaa, Jiyaniijaari nojori naacuquiaari jyanohua cutara maninia miishano nojori miiniuria, pueya naatanijionurajuhua. Jiyaniijaari nojori naacuquiaari cuno pueya niishiniuria, seetanujanaa quiquiaari Pablo, Bernabé pohuatasano. <sup>4</sup> Cuno tiacajinia quiniaa pueyari raquitiquiaari. Noojiaqueyari tama narta Judiocuaca tojiquiaarijaaja. Saniniuujia, tamasaacari Jesu jiyaramiquishano pueya tojijara quiquiaari. Nojoriiri naa quiquiaari cuno tiacajinia. <sup>5</sup> Naa nojori quishacaritij, Judiocuacaari taucucata roojotoquiaari cuno tiacajinia jiyaniijanucua. Naa roojotoquiaari nojori sesacanura Pablo, Bernabeeno, na jacutunura saitiajuhua. <sup>6</sup> Pablo, Bernabé jaara niishiquiaari naa cuno pueya miiniu panishacari nojoritij, tiji mashiyocuatquiaariiri Licaonia jiyajiniara. Nojoriiri Listra tiacajinia quiojoquiaari, Derbe tiacajinariano, cuno caapiqui tiaca shocua quijiaa tiacajiniajuhua. <sup>7</sup> Nojoriiri tii poojotaquiaari Jesujiniji nojori niishishano.

*Listra tiacajinia pueya jacutusacari Pablo saitia*

<sup>8</sup> Listra tiacajinia quiquiaariiri sesarunocua pueyano. Majaari na rucuanenu quijia. Nojuajaari naa rasaquiaarijuhuanajaj. Majaari na pooniniu quijia na cajitujiniji. <sup>9</sup> Cuno pueyanoori Pablo tojiriquiaa na pohuatasacari Jesujiniji. Pablo jaara na niquiquiaari, na niishiriiri nojuajaari seetanujanaa tiuuriquiaa na pohuatasanoocua. Naa Jesuucua na tiuuniucuatej, Pabloori niishirii cuno pueyano na naata na cashacu jeequenuhua. <sup>10</sup> Pabloori jiyamitia jyanohua na sequeree:

—¡Maninia quia nujuare! ¡Maja porequetanu!

Cuno pueyanoori ritia saquee. Rucuanenu saniriiri. <sup>11</sup> Cuno Licaonia pueya jaara niquiquiaari naa Pablo miishanotej, nojoriiri tama na rupaajiniajaaja sequetuquiaari:

—¡Cumaacaraca quijiaacari juhua pueyasohua pocua rosetareeni, juhua pueya niquis-hano!

<sup>12</sup> Naa nojori sequesacaritij, majaari Pablo, Bernabé niishiniu quiquiaari nojori sequesano tama nojori rupaajiniajaaja. Cuno pueyari Bernabé sesojoree Júpiter, juhua nojori pueyaso sesa. Pabloori sesojosaareecujua Mercurio, jyanohua pocuanu niishijia na quiniucua, juhua nojori pueyaso Mercurio. Nio sesacaari Licaonia pueyapue pueyasohua sesaca quiquiaari, nojori jiiitasano juhua na pueyasohuara cuno jiyajinia. <sup>13</sup> Júpiter secojojua tiaari Listra tiaca tohuataya shuriucua quiquiaari. Jiyacaritij, Júpiter secojojua tia cojuanaari juyaca jaatucunuquiaari, Pabloori nojori puecoosocoriquiano Bernabeecuaranio, juhua nojori pueyasohuacuara. Maniniushitijara naana shuucuaa shiyosano patootaquiaarijiaariuhua. Cuno pueyanoori puetunu pueyatajanaa Pablo, Bernabé shuquiritianu paniriquiaa juucua, juyaca na puecoosacari nojoriucara juhua Pueyasooacuara. <sup>14</sup> Pablo, Bernabé jaara niquiquiaari naa cuno pueya miiniu paniano nojoritij, nojoriiri na toqueya sutaquiaari nojori tacaaniuria. Pueya tajiniaaco netecu-atuquiaariiri nojori miiniu panishano nojori tarinitianura. Pabloori naa nacaquiaari puetunu cuno pueya tojishocoriquianojuanaa:

<sup>15</sup> —¡Pueyanaa! ¿Casaara naa nia miya canaani? ¡Canaari nareja pueyani taa nijaniy-acuaani! ¡Canaari naacua niyarucuaa niaacuatej canaa sequenura nijaniya, puetunu nio najuhuaana nia miishanojuanaa nia cartenura! ¡Saaja nia shuquiritiare cutara pueyara-caanu rishijia Pueyaso! Nojuajaari nio jiya shipiniquiaari, jiya cajiniocua. Na shipin-ishanojaariuhua shoniniacu caminia. Puetunu pa niquishanojuanaari na shipinishano. <sup>16</sup> Pueyasoori tarijia puetunu pueyajanaa tarinitiaquiaari nojori miiniuria tama nojori panishanojuaja. <sup>17</sup> Naajaa, nojuajaari pa supuetanaa niishitiquiaari cante nojuajani, maninia na miishacari nojoriiri. Nojuajaari maru nitiquiaa pajaniyara, pa nataacuaca moritianura, pa miasocoriquiano pa jiiitianura queraatia, shuquiriaatia pa quiniuria-juhua.

<sup>18</sup> Pablo, Bernabé jaara naa sequequiaari cuno pueyatej, pueyari jatarinitiaja socua tarinitiaquiaari nojoriucara na puecoonu panishano juyaca.

<sup>19</sup> Jiyacaritij, Antioquiya tiacajinijinio Judiocuacaari tii tiuquijioseequiaari, Iconio tiacajinijinio. Nojoriiri cuniqui quiniaa naso Josee Pabloori, Bernabeecuaranio. Cuniqui jacuturee saitia Pabloori. Nojori jaara jyaniquiaari Pablo naasucuaari tari cusoyaree saitia jacusano, na jaatiuquiaari tiacajiniji tamamaari. <sup>20</sup> Jesuucua tiuunaa pueya

jaara rerejoquiaari Pablo shocua, macu na quishacari, nojuajaari saaja sanequiaariuhua, saitia jacusano juucua. Na jacunaa tiacajinia tiuquiquiaariuhua saajaari. Tariqui cuno tiacajiniji quiaquiaari Bernabeeta Derbe tiacajiniaari.

<sup>21</sup> Jaara Jesujiniji pohnuataquiaari tii, queraatia pueyari Jesuucua tiuquiquiaari. Na nuhuaji, nojoriiri Derbe tiacajiniji riujuutuiaquiaariuhua. Tiuquijioquiaariuhuari Listra tiacajinia, Iconio tiacajinia, Antioquia tiacajinianio. <sup>22</sup> Pabloori Bernabeeta puetunu cuno tiacajinia quiniaa Pueyaso pueya rootaquiaari socua, maja nojori tarinitianura Jesuucua tiuuniu. Pabloori naa nojori sequequiaari:

–Canapuate Pueyaso shuriucua quiriquianoni, nojoriiri naquia miinitianiya mijiria.

<sup>23</sup> Nojoriiri maninia Pueyaso tojjiaa pueya saquiriojotquiaari, nojori jiyateso- coriquiano Pueyaso pueya jiitariquiano. Naa miitiquiano puetunu cuno tiacajini- ajanaari, Pueyaso pueya jitianura tama nojori nacasunaajaaja. Jesu saquiriojosano pueyari maja na miaquenuunu quiquiaari Pueyaso na secojonuusacari. Nojoriiri naa secojoquiaari Pueyasotej, narta Pueyaso pueya jiitariquianoocua:

–Canaa Jiyaniijianaa, nio pueya quiocua tiuujiacani, nojori quia naacure quiocua tiuunaa narta pueya nojori jitianura maninia.

*Pablo tacatasacariuhua Bernabeeta Siria jiyajinia Antioquia tiacajiniara*

<sup>24</sup> Nojori riujuuniuhua Antioquia tiacajiniohuara, Pisidia jiya shocotomuhuari. Na nuhuaji, tiuquijioquiaariuhua Panflia jiyajiniaari. <sup>25</sup> Tii Pueyaso rupaa pohnu- atatuquiaari Perge tiacajiniaari cuno pueya niqiuara. Nojori pohnuatanu nuhuaji, Atalia tiacajinia quiojoquiaariuhua. <sup>26</sup> Cuniqijij, buquejina jaaretatuquiaari Antioquia tiacajiniaraari. Cuno Antioquia tiacari quiquiaari tee cuniqui narta Pueyaso pueya niaquiaari nojoriicua na juaashiquiacuajani, Pueyaso nojori secojosacari. Nojori naa miiquiaari, Pablo, Bernabé jiyatesaanura tucacaanu nojori quiojonura Pueyaso rupaa nojori pohnuatanura taucua. Cunoori quiquiaari shushajanaa nojori coteenu pan- ishacari rucanejonu tamaquicua. Naacuajitij, nojori tohuatenu nuhuaji puetunu Pueyaso panishanojuanaa, jiyacari shusha tiuquijioriquiohuari. <sup>27</sup> Antioquia tiacajinia nojori quishacari tari, nojoriiri puetunu Jesuucua tiuunia pueya masuunujuquiaarijanaa. Cuniqij pohnuataree puetunu nojori niquiarajanaari, taa Pueyaso naacucanu maninia nojori pohnuatasacari Jesujinijini. Pohnuatanuquiaariuhua taa Pueyaso taraajete- quiaari taucua jiuujiani, Jesuucua nojori tiuuniurajuhua. <sup>28</sup> Pabloori, Bernabeeta cuniqui tarishiquiaari narta Jesuucua tiuuniaata.

## 15

*Jesuucua tiuunaa jitianaa nacoosacari Jerusalén tiacajinia*

<sup>1</sup> Jiyacariitij, Judea jiyajinijinio pueyari Antioquia tiacajinia quiojoquiaari. Nojoriiri tii sesa niishitiojonu coteequiaari cuniqui quiniaa Jesuucua tiuunaa pueya. Nojoriiri naa sequeriquiaa Antioquia tiacajinia quiniaa narta Pueyaso pueyatej:

–¡Pueyanaa, Jesuucua tiuunaa pueya cuara na cararaatuuquia co miatejoteera, taa Moisés niishitiojoquiaaricujani! ¡Jaara miatesoo quiri, majaari Pueyaso jiyanooniu quiniutianiya jiyanotej, na pueya nojori quiniuria!

<sup>2</sup> Pablo, Bernabeeno, nojori jaara tojjiaari naa cuno pojori niishitiojosanotej, nojori- iri cuno pojoritia nacojoquiaari jiyanohua. Naacuajitij, Antioquia tiacajinia quiniaa Pueyaso pueyari Pablo, Bernabé sequequiaari nojori quianura noojiaqueya cuniquijinio pueyata Jerusalén tiacajinia. Nojori jiyaroreeri na nequesotanura Jesu jiyaramiquishano pueya Jerusalén tiacajinia, mariyata Jesuucua tiuunaa pueya jitiananio. Nojoriiri jiyaramiquishaaree cuno pojori nequesotasaanura, ¿seetanutejanaa naa miishiyatena, taa cuno Judea jiyajinijinio nijiono pueya niishitiojiya canaacujani?

<sup>3</sup> Naacuajitij, Pabloori Bernabeeta jiyarosaaquiaari Jerusalén tiacajiniara. Nojori quiasacari Jerusalén tiacajiniara, Fenicia jiyacuma quiojomaquiaariiri, Samaria jiy- acumanio. Nojoriiri cuno jiyacajinia Pueyaso pueya pohnuatanuquiaari taa taucua cartequiaari tama sesa nojori miishanojuajani, Pueyaso tojjiaa nojori quiniuria. Jesu- ucua tiuunaa pueya jaara naa tojjiaariitij, nojoriiri jiyanohua shuquiriquiaari.

<sup>4</sup> Nojori tiuquijiosacari Jerusalén tiacajinia, puetunu Jesuucua tiuunaa pueyajanaari nojori rerejotaquiaari, mariyata puetunu Jesu jiyaramiquishano pueyajanaanio. Pablo, Bernabeeri jiyacari nojori pohnuataquiaari puetunujuanaa, naajuhua, taa Pueyaso naacuquiaari maninia nojorini, nojori pohnuatasacari taucua Jesujiniji. <sup>5</sup> Cuniqij quiriquiaariuhua Fariseocuaca, tariucua Jesuucua tiuujiaa. Cuno pojoriiri rerejonaa tajiniji nuuatquiaari. Naa sequetureeri:

—Cuno taucuaca Jesuucua tiuuniaani, na cararaatiuuquia co cuaara miatejosaaria Judiocuaca nojori quiyaquishacari. Na nuhuaji, nojori cuaara Moisés niishitiojosano tojjiara quiiria, taa Moisés rootaquiari tariucuacaanucujani.

<sup>6</sup> Naa nojori nacojonu nuhuajitij, saa Jesu jiyaramiquishano pueyajaari rerejoquiari jiyareta Jesuucua tiuuniaa narta pueya jiihanaata. Nojoriiri maninia niishiriojonu-uquiaari taa na miiniutianiyani. <sup>7</sup> Naa pueyaracaanu nojori pocoojosacaritij, Pedroori socua nojori tajiniji nujaquiari. Naa nojori sequereeri:

—Pueyanaa cua tojitiare. Niaacuajaari niishiya, pa Jiyaniijaari cua saquiriojoquiari na rupaa pohuatariquiano taucuaca tojishocoriquiano, nojori tiuuniuria Pueyasocua-juhuaj. <sup>8</sup> Pueyasocuaajari poojia niishijia. Nojuajaari cuno taucuaca niishitioquiari, nojuajaari nojori jiyateree na pueyarajuhuj, na Sohuanu na niqutiosacari nojori, taa na niqutioquiari pajaniyacuaani. <sup>9</sup> Majaari nia jiyaniinu Pueyasoori saaja Judiocuaca paniya. Pueyasoori maja rimiajata na paniniu. Nojuajaari puetunu pueya panijajanaa. Cuno taucuaca jaara nocua tiuquiaari, nojuajaari nojori jiuujia jeequreejuhuaj saaja Jesuucua nojori tiuushacari. <sup>10</sup> Naa nia tamacasacari taucuacajinijinio parta Pueyaso pueyatej, niaari Pueyaso miishano soojotaruhua. ¿Casaara nia tamacaa Pueyaso miishanoni? Niaari quiarijia Moisés niishitiojosano tojitiinu paniya Jesuucua tiuuniaa pueya, juhua pa tojishanocuaa. Saniniuujia, majaari quenaaja pa supuetanaa na naata na miiniu quiquiaari puetunujuanaa, taa Moisés niishitiojoquiariicujani. <sup>11</sup> Paari niishiyani pa Jiyaniija Jesuuri pa jiyanoojia. Naaratej, pa jiyanooquiari, na pueya pa quiniuria. Mariyata naa miiquianu cuno taucuacajaariuhuj. Majaari seetanujanaa maninia pa miinu quiquiaari pa jiyanooshaanura.

<sup>12</sup> Naa Pedro sequesacaritij, puetunu pueyajanaari socua sanaajetaquiari. Bernabeeri Pablota jiyacari pohuataquiari taa Pueyaso na cumaacata miitioquiari maninia taucuaca niqiarani, naajuhuj, taa nojori naatanijioquiari cusosuhujaniuhuj. <sup>13</sup> Naa nojori pohuatanu nuhuajitij, Santiagoori sequequiarijuhuaj:

—Cuarta Pueyaso muerasunaa, cua tojitiare. <sup>14</sup> Simón Pedrocuajaari tari pa pohuataree taa Pueyaso coteecanu shusha na Sohuanuta poonijionura cuno taucuaca jiuujajini-ani. Pueyasocuaajari nojorijinijinio jiyateya seetanujanaa na pueyara, nojori maniniuhuaqueetanura nojuaja. <sup>15</sup> Seetanujanaari nio. Naajuhuj, tariucuacaanu Pueyaso sequenu panishano caminiujiuniaacuajaari naa naajionuutaquiari Pueyaso sequesantej:

<sup>16</sup> “Janiyari David niquihuacuajinio mueratenutaniya tamonu pueyanoni. Davidcuajaari na supuetanarano. Nojuajaari Jiyaniijajanaa quiriqiano puetunu pueya-puerajanaa, taa David quiquiaari Israel pueya jiyaniijacuani. <sup>17</sup> Naacuajitij, puetunu taucuacajanaari cua pajenuunutaniya, noo pojori teyano cua saquiriojoquiari tariucuacaanucujani, nojori jiyatesocoriquiano na Jiyaniijara janiya’.

<sup>18</sup> Jiyaniijaari naa sequeyaquij. Nojuajaari tariucuacaanu pueya toquiari nio”.

<sup>19</sup> Naaratej pueyanaa, janiyari nia sequeyani, nareja nia niquiri cuno taucuaca, Jiyaniija Jesuucua tiuuniaani. Majaari nojori najiqutiniu Pueyasocuaaji, nia tojitiinu panishacari nojori tariucuacaanu Moisés niishitiojosano. <sup>20</sup> Nareja nojoricuara pa naajiore. Pocua pa naajioneejinia sequere nojorini, maja tari nojori miaquenuunura shipinishano pueyasocuaara na puecototusano casa, juunu, borregonio. Cuaara quitiuuria saa necocataja, maja tamonu na numuetucunura socua. Jaara shu miaquetunu paniri, cuaara na miaqueera puetunu na nanaca caatinijiasanojuanaa, naajuhuj, maja na miaquenuunura casami nanaca. <sup>21</sup> Puetunu nio cua sequesanojuanaari parta Judiocuaca tojishano. Cuno niishitiojosanoori pueyaracaanu parta Judiocuaca rerejojuaca tijaniaqueya naa serojosaquiaa Moisés naajioneejiniji puetunu samaatenu juucajanaa, puetunu tiqiyocua tiacajinijanaa.

<sup>22</sup> Naa nojori pocoojonu nuhuajitij, Jesu jiyaramiquishano pueya, puetunu tii quiniaa Jesuucua tiuuniaa pueyajanaano, nojori jiihanaajuhuj, puetunu nojorijanaari mariyata niishiriojonuucuaari. Naacuajitij, nojoriiri narta Pueyaso pueya saquiriojotucuaari na jiyarotusocoriquiano Antioquiya tiacajinia Pablota, Bernabeetanio. Jiyacari saquiriojosaareeri Judas, Silasnio. Judas sesaari Barsabás quiquiaarijuhuaj. Cuno pojoriiri Jesuucua tiuuniaa pueya tojishano quijia cutara, cuniqui Jerusalén tiacajiniani. <sup>23</sup> Nojoritia jiyarotasaquiariiri naajione. Cuno naajioneejiniaari naa sequequiari:

“Niaacuara naajionaani, canaari Jesu jiyaramiquishano pueyani, Jesuucua tiuuniaa jiihanaano, Jerusalén tiacajinia niarta Jesuucua tiuniaa pueyajuhuj. Canaari nia saruhuataani pueyanaa. Taucuaca nia quishacari, naajaa. Jesuucua tiuuniaa nia quishacari, niaari canaa tapueyocucajuhuj, tiqiyocua Antioquiya tiacajinia quijia, Siria jiyajinia quiniaano, Cilicia jiyajinia quiniaajuhuj. <sup>24</sup> Canaari nijaniyajiniji pohuataaarucuaani, niiquiji pueyanaari niaacua quiacanu. Canaa nia jiyanoori. Majaari canaa jiyaronu quiquianu nojori. Cuno pojoriniari nia taajetecanu tamaatia nojori niishitiojosacari

nijaniya. Naajuhuj, nia cushiticonuuri nojori sequesacari nia cararaatiuuquia co nia miatejonura taa Moisés niishitiojoquaaricuaajani. Nojoriniia nia shiniujuquianu nia tojtianura socua Moisés Rootasanojuhuaj. Quarijia maja naate pueyanaa. <sup>25</sup> Naaratej, saa jiyareta canaajaari niya rerejoreeni canaa niishiriojonura canapue canaa saquiriojonutaniyani niaacua jiyaramiquishocoriquiano. Canaari nojori saquiriojoree tarini canaa jiyarosocoriquiano Pablota, Bernabeetani, nojori pocojoriquiano maninia niaata. <sup>26</sup> Canaa panishano pueya Pablo, Bernabeenio, nojoriiri tama na cuaqueya panitiquiaarijiaaja Jesujiniji nojori pahuatasacari tiquiyocua. <sup>27</sup> Quarijiani, canaari niaacua jiyaroya canaajiniinio canaa saquiriojosano pueyani. Nojoriiri Judas, Silasnio. Nojoriiri nia sequenutaniya casaa nia miiniutianiyani, naatej, taa canaa pocojoree canaa rerejosacariicuaajani. <sup>28</sup> Canaa niishiriojosanoori maninia quiya Pueyaso Sohuanura. Canaari na shuquiritiaajuhuj. Majaari canaa cushitonu paniniu nijaniya puera canaa supuetanaa niishitiojosanota najuhanaj. <sup>29</sup> Canaari saaja nio nia sequenu paniyani pueyanaa. Nia tojitiare. Majaari socua nia miaquenu shipinijosano pueyasohuacuara puecoosano casaa. Majaari nanaca miaquenu. Naajuhuj, niaa jaara shu miaquenu paniri, nia miaquere maninia na nanaca caatinijiasano. Naajuhuj, saaja nia niquicohuata nia quiriquia. Majaari socua tamonu numuetucunu. Niaa jaara nio tojijia quiri, niaari maninia miyacuaja. Tariucuaja pueyanaa”.

<sup>30</sup> Naacujitij, cuno cuatro pueyari jiyarosaaquiaari Jerusalén tiacajiniji. Jaara tiuquijioquiaari Antioquiya tiacajinia, nojoriiri puetunu Jesuucua tiuuniaa pueyanaa numootejoquiaari na rerejonura. Puetunu nojorijianaa jaara tari rerejoquiaari, jiyacari niqutiosaaquiaariiri cuno naajione puetunu nojori niquiarajanaa serojosocoriquiano. <sup>31</sup> Naajione jaara serojosaaquiaari, puetunu Jesuucua tiuuniaa taucacajanaari shuquiriquiaari jyanohua. Naacujitij, nojoriiri noojia cajitiquiaariuhua tacaquoyano juucua. <sup>32</sup> Na nuhuaji, Judasri Silasta cuniqui Antioquiya tiacajinia camueenujuquiaari. Nojoriiri Pueyaso Sohuanu cumaaca jitiaquiaari, Pueyaso sequenu panishano nojori caminiujuniuria. Naacujitij, nojoriiri Jesuucua tiuuniaa pueya cumanjiaquiaari jyanohua. Na rootatuquiaariiri maja nojori tarinitianura Jesuucua tiuuniu. <sup>33</sup> Nojoriiri Antioquiya tiacajinia camueenujuquiaari pasaja. Na nuhuaji, nojori quianu panishacariuhua Jerusalén tiacajiniuhua na jiyaronaacua, Antioquiya tiacajinia quiniaa Pueyaso pueyari nojori sequequiaari:

–Maniniacuaja. Juhujaniya nia quiaarohuaqui.

<sup>34</sup> Silasri saaja na cojiniaacuaji jateequiaari cuniquijia Antioquiya tiacajinia. Naacujitij, Judasri tamajaaja tacatequiaariuhua Jerusalén tiacajiniuhua. <sup>35</sup> Pablo, Bernabeeri Antioquiya tiacajinia camueenujuquiaarijuhuaj. Nojoriiri cuniqui Jesuucua tiuuniaa pueya niishitiojoquiaari. Queraatia cuniquijinio pueyari nojori rupuequiaari niishitiojonurajuhuj. Puetunu nojorijianaari Jiyaniijia Jesujiniji pahuataquiaari tamasaca niquiarajuhuj.

*Pablo pacutenu panishacariuhua quianu Pueyaso pueya na niqiniuhua*

<sup>36</sup> Nojori jaara tari tarishiquiaari tii, Pabloori Bernabé sequequiaari:

–Noo tiacajinia pa camiquioocua socua niqiniuhua, paa tii pahuatacanu Jiyaniijia rupaatej. Naa pa miiri pa niishiniuria taa parta Jesuucua tiuuniaa pueya quiyani.

<sup>37</sup> Bernabeeri na riucaaree:

–Jajaa. Juan pa riyarecuarajaj, pa tarajariquiano.

Juan sesaari Marco quiquiaarijuhuaj. <sup>38</sup> Majaari Pablo paniniu quiquiaari Juan quianura nojoritia. Nocuai Bernabé sequequiaariiri:

–¿Paatucua casaara rupoyare pocua Marco saajaraniuhua? Nojuacuajaari pa tiujuquiaariuhua Panfilia jiyajinia pa quishacari. ¿Pueyaso rupaa pa pahuatasacari pa tarajacanu maniniatucua? Naacujajaa.

<sup>39</sup> Saa nojorijaari socua juayonuutaquiaari Juan Marcoocua. Nocuai Bernabeeri jiyacari Pabloocuai rupatequiaari. Na rupatesacari na rupena Pablojini, nojuajaari Juan riquiaari cutara na tarajariquiano. Jiyacaritij, tama nojorijaari buquejia quiaquiaari Chipre jiyajinara. <sup>40</sup> Pabloori saniniujia Silas saquiriojoquiaari na tarajariquiano. Nojori quiaaquishacarijia, Jesuucua tiuuniaa pueyari nocua Pueyaso secojotuguiaari. Naa na miituniu nuhuajitij, Pablo, Silasnio, nojoriiri panaatia quiaquiaari cutara Pueyaso rupaa pahuatanura. <sup>41</sup> Nojori quiasacari Jesuucua tiuuniaa pueya shiniujiniuhua, Siria jiyacuma tajitiumiaquiaariiri, Cilicia jiyacumano. Pabloori cuno jiyaca tiacajinia socua poojotaquiaari Jesujiniji. Naa cumaquiquiaari Jesuucua tiuuniaa pueyari.

<sup>1</sup> Pabloori Silasta tiuquiijoquiaari Derbe tiacajinia, Listra tiacajinianio. Tii riuritatatquiaari Timoteo jiyannishano pueyanoori. Cuno mashajaari Jesuucua tiuuja pueyano quiquiaari. Na nucaari Judio maaji quiquiaari, Jesuucua tiuunijuhua. Timoteo queeri tahue quiquiaari cutara. <sup>2</sup> Listra tiacajinia Jesuucua tiuunaa pueyari Timoteo maniniucuatujua. Naa sequetujuaari nojori: "Timoteori jiyano hua maninia pueyano". Iconio tiacajinijinio Jesuucua tiuunaa pueyari naa sequetujuhua. <sup>3</sup> Naaratej, Pabloori Timoteo riniu paniquiaari na tarajariquiano. Cunora, coteenu Timoteo cararaatiuquia co miatetequiaariiri, cuno jiyajinia quiniaa Judiucuaa soojotanuucujaji nojuaja. Puetunu pueyajanaari na niishijia, na queeri seetanujanaa tahue quijia. Nocujaji naa miishaareeri. Na nuhuaji, Timoteo cutaraari Pablo cojiquiaari. <sup>4</sup> Pabloori Jesuucua tiuunaa taucaaca niquiquiaari puetunu tiacajinijanaa. Nojori niqiuara caminiujuquiaari Jerusalén tiacajiniji Jesu jiyaramiquishano pueya sequesano nojoriiraari, mariyata Jesuucua tiuunaa pueya jiiitanaa sequesanojuhua. <sup>5</sup> Naa Pablo caminiujushacaritij, puetunu Jesuucua tiuunaa pueyajanaari socua noojia cumaquiquiaari jiyano hua. Tamasacaari socua Jesuucua tiuquiaarijuhua. Jesuucua tiuunaa pueyari naa canequiaari socua. Naa caneriquiaa puetunu juucajanaari.

*Pueyaso Sohuanu tosacari Pablo, Macedonia jiyajiniara na quianura*

<sup>6</sup> Na nuhuaji, Pueyaso Sohuanuuri Pablo tenujuquiaari maja nojori pohuatanura Jesujiniji Asia jiyajinia. Naacuajitij, nojoriiri Frigia jiyacuma quiojoquiaari, Galacia jiyacumanio. <sup>7</sup> Naa tiuquijioseequiaari Misia jiya shurucuaari. Nojoriiri cuniquiji quianu paniquiaari Bitinia jiyajinia juucua. Naajuhua, majaari Pueyaso Sohuanu paniniu quiquiaari tii nojori quianura. <sup>8</sup> Cunora, Pabloori na cojiniaata cuaniquiaari Misia jiyacuma. Troas tiacajinia tiuquijioseeri. Nio Troas tiacaari shoniniacu caminia casaqueyaji quiya. Tiiri buque tiuutiacojua. <sup>9</sup> Pabloori cuno niucua juhua na maquenujini niquiquiaari Macedonia jiyajinijinio pueyano nocua nujaano. Cuno pueyanoori Pablo sequequiaari: "¡Miji! Canaa quia naacutaquee Macedonia jiyajinia". Cuno Macedonia jiyari quiquiaari shoniniacu caminia taquijiria. <sup>10</sup> Naa Pablo niqiniu nuhuaji juhua na maquenujinatej, canaari jiyacari ritia pajequiaarini taa canaa quianunijia cuniquijini. Canaari sequereeni:

—¡Pa quiaarequij! Pueyasocujajari pa panitia Jesujiniji pa pohuatanura cuno pueya niqiarajuhua.

*Pablo quishacari Filipo tiacajinia Silasta*

<sup>11</sup> Canaari Troas tiacajiniji quiaquiaari buquejiniani. Canaari Samotracia jiya tucuaatijaacua tiuquishiini. Canaari cuniquiji sanequiaari tariquiniuhua, tiuquishiiri Neápolis tiacajinia. <sup>12</sup> Canaari cuniquiji quiamaa Filipo tiacajiniani. Filipo tiacaari socua panishano tiaca quiquiaari tamasaca tiacajiniji Macedonia jiyajinia. Roma tiacajinijinio pueyari tii pacuquiaari tarijia. Nojoriiri cuno Filipo tiaca jiyatequiaari nojori quiquiaari. Canaari tii camueenujuquiaari rupaquijiani. <sup>13</sup> Cuniqui canaa quishacari, canaari samaatenu juuca quiaquiaari cuno tiacajiniji moo casaqueyajiriani. Canaari soquequiaarini cuno pueyari tii jiiitiquiaari Pueyaso secojonura. Canaari tii narejashiquijia cajituuquiaari mariyatani. Jiyacaritij, maajipohuari cuniqui rerejoquiaari na secojonuunura juucua. Canaari saaja nojori niqiuara pohuataree Jesujinijini. <sup>14</sup> Cuniqui maajipohua rerejosaquini, nojori tajinia quiquiaariariuhua tamonu maaji. Na sesa quiquiaari Lidia. Nojuajaari Tiyatira tiacajinijinio quiquiaari. Shanohua quenaaruqueya naatuque toqueya niqitiojojua quiquiaari na cumaneecaraari. Nio maajiri tarijia Pueyaso secojojua quiquiaari. Tii na quishacari, Pablo pohuatasano tojiriquiaari. Pueyasoari jiyacari na tojeteree. Juhua noojia riatareeri seetanujanaa Pablo pohuatasano na tojinuria maninia. Jesuucua tiuuriiri. <sup>15</sup> Na nuhuaji, Lidiaari puetunu na tajinia quiniaatajanaa tiuquinijosaaquiaari moojinia. Canaa tiuquinijionu nuhuaji puetunu nojorijianaa, Lidiaari canaa sequequiaari:

—Niaa jaara cucujaji taacanuyaquiri, miji, nia quishii cua tiajinia. Janiyari pa Jiyaniijia tojijiajuhua.

Nojuajaari seetanujanaa canaa panitiaquiaari na tiajinia canaa quiniuria. Naacuajitij, canaari na tiajinia camueenujuquiaarini.

<sup>16</sup> Tamonu juuca, socua canaa pacutesacari quianu pueya secojonuujajiniara, canaari samaruraca niyacoo niquiquiaarini. Cuno niyacoari camaruhuaraca quiquiaari. Niyacoari "niishijia samaru" jiiitaja. Naaratej, cuno niyacoari puetunu pueya niishiniu panishanojuanaa pohuataja nojoriira. Naa na miishacaritij, na camaruhuara maseja queraatia cumaneecaari. <sup>17</sup> Cuno niyacoari canaa nuhuaji sacuariquiaa. Naa nacariquiaa canaa na nuhuajishacariiri:

—¡Nio canuu cutaraari jiyocuaanuji Jiyaniijajiniji pohuataana! Nia niishitiojiyari Pueyaso jiyanooshano nia quiniuria, pueyaracaanu nia rishiniuria nata.



<sup>18</sup> Saa naa canaa nuhuaji nacajaari, cuno tiacajinia canaa camueenujusacari. Pabloori socua na juaatiaquiaari. Nocua tacatequiaariiri. Cuno niyacoojinia quijia samaru sequereeri:

—janiyari Jesucristo sesajinia quia jiyaroyani! ¡Cuno maajijiniji quia tohuatare!

Naa Pablo sequesacaritij, samaruuri na tojiquiaari. Ritia tohuataquiaari cuno niyacoojinijiiri.

<sup>19</sup> Cuno niyacoo camaruhuari niishiquiaari maja tari nojori masenu quiniutianiya socua cumaneeca juhua coteenu, niyacoo pohuatasanojiniji. Naaratej, nojoriiri Pablo, Silas quiooquiaari na juaaniutia. Nojori jaatucunuquiaari tiaca jiuujiajinia curotasano pueya cajitiucujiniaraari. Tiaca jiyaniijianucuaari tii quijiaa pueyaracaanu, nojori jitianura pueya. <sup>20</sup> Niyacoo camaruhuari Pablo, Silas nujuatejoquiaari tiaca jiyaniijianucua tajoji, cuniqui na nequesoreesaanura. Jiyaniijianucua sequetureeri:

—¡Nio canuuri Judiocuaca! Nojoriiri niya pa tiacajinia quiniaa pueya juaatijiose.

<sup>21</sup> Nojoriiri tamaatia niishishano niishitiojonuya. Maja cumaati pa tojinunioj. ¡Paari Romano pueyani!

<sup>22</sup> Naacuajitij, puetunu cuno pueyajanaari na juaaniutia, Pablo, Silas cosequiaari ritia. Jiyaniijianucuaari nojori toqueya jaamitiquiaari jyanohua, na jocojosacari nojorijiniji. Na nuhuaji, tamasaacari seeratasaree nojori na mojoonura macata. <sup>23</sup> Jyanohua na mojoosaanu nuhuaji, nojoriiri socua na tiuquinijioquiaari nujuatejojuajinia. Na nuhuaji, nujuatejojuua tia camarnu seeratasareeri maninia na cojuatenura nojori nujuatejojuajinia. <sup>24</sup> Naacuajitij, cuno nujuatejojuua tia camarnuuri Pablo, Silas nujuatejoquiaari socua mij, nujuatejojuua cariquimiatej. Cuniqui nujuatejosaaquiaariiri tii na cojuasaanura maninia, na mashyocuatunuucuaaj. Nojori cashacucuaari suruhuateneeca quejasano tajiniocoma saatijiosaaquiaarijuhuaj.

<sup>25</sup> Cuno niucua shiyaqueya, Pabloori Silasta Pueyaso secojonuuriquiaajaa. Pueyaso maninihuaqueetaturiquiaari na jaaquequejosanota. Cuniqui nujuatejosano pueyari nojori tojtariquiaa. <sup>26</sup> Jiyacaritij, rijiaari canashiyaquiji jiuuquitiuquiaari jyanohua cuno nujuatejojuua tia. Puetunu na tiotiuhujanaari riatequequiaari. Puetunu pueya numatucuaacua morojotasano casaajanaari tamajaaja saacarejetaquiaari. <sup>27</sup> Nujuatejojuua camarnuuri ritia niucuaquiaari. Saaja niquirii puetunu tohuateya riatequenojuanaari. Cunora, na nijiniaquetucuaaja mueruu shitiaree ritia na shuucujijiir tama na cuaqueya na miquenurajaaja. Naa miiriiri na jyanishacari puetunu nujuatejosano pueyajanaa naasucuaari tari mashyocuatunuree. <sup>28</sup> Pablo jaara na niquiquiaari, nocua nacareeri:

—¡Maja najuhuaana naa miiniuti! ¡Canaacuajaari puetunujuanaa niya quiyani!

<sup>29</sup> Nujuatejojuua camarnuuri na shiriquiniutia tetecariquiaa. Tamonu sequereeri ritia samaritiu na patanura nocua. Samaritiu caaniuji netequee cutaraari nujuatejojuua jiniacumara. Pablo, Silas cariquimijiji mojoquetaseeri. <sup>30</sup> Jiyacari nojori tohuatejoree carijiniacumaari. Nojori nequesotareeri:

—¡Pueyanaa! ¿Taa cua miyarinjia, Pueyaso jiyanooshano cua quiniuriajuhuaj?

<sup>31</sup> Nojoriiri na riucaree:

—Jiyaniijia Jesucristoocua quia tiuri jiyanooshano quia quiniuria, puetunu quia tiajinia quiniaa quiniuria jiyanooshanojuhuaj.

<sup>32</sup> Naaratej, Pabloori Silasta na niquiara pohuataree Pueyaso rupaa Jesujiniji, mariyata puetunu na tiajinia quiniaajanaa niquiaranio. <sup>33</sup> Jiyacaritij, nujuatejojuua camarnuuri cuno niucuaaja Pabloocua jiyanoocquiaari, Silascuanio. Nojori cuaqueya majacyashiquia jeequejoreeri. Na nuhuaji, puetunu cuno pueyajanaari ritia tiuquinijiosaaquiaari mojinia Jesuocua nojori tiushacari. <sup>34</sup> Jiyacari na tiajinia nojori jiyataquiaariiri. Tii Pablo, Silas mianuutereeri. Cuno nujuatejojuua camarnuuri jyanohua shuquiriaatia quiriquiaa puetunu na tiajinia quiniaatajanaa, Pueyasocua tiuuniaa nojori quishacari.

<sup>35</sup> Cuno tariqui, Filipino tiaca jiyaniijianucuaari na seya jiyaroquiaari nujuatejojuua tia camarnuucua, na sequenura nojuaja cuara Pablo, Silas tohuatanijioora tari. <sup>36</sup> Nujuatejojuua camarnuuri Pablo sequesee:

—Tiaca jiyaniijianucua cucua jiyaroree na rupaani, cua cartenura quiarijia nijajaniya. ¡Juhujaniya nia quiaarohuaqui!

<sup>37</sup> Pabloori saaja jiyaniijianucua seya sequequiaari:

—¿Majateeri nia jiyaniijianucua niishiniu canaari Romano pueyajuhuaaj? Canaa mojooturiquiaacuaa puetunu pueya niquiarajanaari. Majaari coteenu canaa nequesoreesaanu quiriuucuaa. Canaari jiyanojuua nujuatejosaarucuaani. ¿Taa na mitiuniu paniya quiarijia canaariini, jiyasohuaaja tohuatejonu paniniu? ¿Jiyasohuaaja mojooturiquiaacuaa canaatuucuaa? ¡Nojorijianaa cuara niiria quiarijia, niiquiji nojori tohuatejonura canaa!

<sup>38</sup> Jiyaniijianucua seya jaara tacatequiaariuhua, puetunu Pablo sequesanojuanaa pohuataquiaari Filipino tiaca jiyaniijianucua niquiaraari. Nocuaji jiyaniijianucuaari puere-tuquiaari nojori niishishacari Pablo, Silas Romano pueya quiquaarijiuhua. <sup>39</sup> Naaratej, cuno jiyaniijianucuaari ritia quiaquiaari nujuatejojuajinia Pabloocua, Silascuanio, nojori jiyanoootionura. Jiyaniijianucuaari nojori tohuatejosee. Nojori sequereeri cuara quio-joora quenaaja nojori tiacajiniji. <sup>40</sup> Naacuajitij, Pablo, Silas jaara tohuareetaquiaari nuju-atejojuajiniji, Lidia tiajinia quiojoquiaariiri. Tii rootatuquiaari socua Jesuucua tiuuniasa pueyari, socua Pueyasocua nojori tiuuniuria. Na nuhuaji, tiji quiojoquiaariuhuari.

## 17

### *Tesalónica pueya juaashacari Pueyaso pueya*

<sup>1</sup> Pablo rucuanajosacari Silasta Jesujiniji nojori pohuatasacari, nojoriiri jiyacari shoconujutuquiaari Anfipolis tiaca, Apolonia tiacanio. Naa tiuquijioseequiaari socua Tesalónica tiacajiniaari. Cuno tiacajinia quiquaariiri Judiocuaca rerejojuia tia. <sup>2</sup> Taate Pablo quijiacuajani, nojuajaari narta Judiocuaca rerejojuia tiajinia quiaquiaari. Cuno tiacajinia na quishacari, jiuujianaraca semaana shocotejoquiaariiri. Puetunu semaana shocojosacarijianaa, samaatenu juuca, cuno pueya niquiara pohuataquiaari Pueyaso rupaari. <sup>3</sup> Pabloori nojori niishitiojoquiaari taa tariucuaacaanu Pueyaso sequesano camini-ujuniasa naajiotaquiaari Pueyaso Jiyarosocoriquianojinijicujani. Niishitiojoquiaariiri cuno naajiotasanoori tari tohuateequiaari Jesu jaara naquiya miishaaquiaari, naajuhua, Jesu jaara na cusunu nuhuaji samiitiaquiaariuhua. Naa nojori sequereeri:

—Nio Jesucujani, janiya nia pohuataani, nojuajaari Pueyaso Jiyarosano pocua.

<sup>4</sup> Jiyacaritij, noojiaqueya Judiocuacaari Jesuucua tiuquiaari. Queraatia taucuaacari Jesuucua tiuquiaarijiuhua, canapuete tari Moisés niishitiojosano tojijiaca quiquaari-cujani. Queraatia cuno tiacajinia quiniaa pueya tojishano maajipohuari Jesuucua tiuquiaarijiuhua. <sup>5</sup> Pueyasocua tiuyashijiaca Judiocuacatej, nojoriiri juaaquiogiaari juhua shocotasano nojori quiniucua. Nocuaji, nojoriiri sesa miijiaca taajecori masu-unujuquiaari. Nooj, nareja rucoojuaca tiacaacacotej. Cuno pojoriiri masuusaquiaari nojori na cojinuria, tamasaca nojori nasojonura. Na nuhuaji, puetunu cuno pojori-jianaa jaara tonujutooquiaari taa na miitiuniatianiyani, nojoriiri puetunu cuno tiacajinia quiniaajanaa juaatiquiaari Pueyaso pueyacuara. Nocuaji, puetunu cuno pojoriijianaari Jasón tiaco tiuquitiaquiaari, Pablo, Silas nojori quioonura juuca, juaaquiuyan pueya nojori niqutiosocoriquiano. <sup>6</sup> Nojori jaara na riuritaatiquiaari, noojiaqueya Jesuucua tiuuniasa pueyari Jasóna cojiritiasaquiaari quioonu. Cuno tiacajinia jiyaniijiaacuaa na jayotuquiaariiri. Naa nacatureeri:

—¡Nio canuuri puetunu jiyacajinia pueya sesojijajanaa! ¡Niya tiuquijioreejaariuhua naa na miiniuriajuhuaj! <sup>7</sup> ¡Jasónri nojori masecanu maninia na tiajinia! ¡Puetunu nojoriijianaari pa jiyaniijia César sequesano tojitiaashijiaca! ¡Nojoriiri saaja sequequiaa socua tamonu jiyaniijianaari quiya! ¡Na sesanaari “Jesu”! Naa sequetuquiaaqui nio pojori.

<sup>8</sup> Puetunu pueyajanaa, mariyata tiaca jiyaniijianucuanio, nojori jaara naa tojiquiaari sequeshianotej, nojoriiri juaaquiogiaari. <sup>9</sup> Jiyacaritij, tiaca jiyaniijianucuaari queraatia cumaneeca masequiaari Jasónjiniji, narta Jesuucua tiuuniasa pueyajinijinio. Naa seque-ture nojoriiri:

—¡Pablo jaara niiquiji quiaaquiri, majaari canaa niqutionu quiniutianiuhua nia cuma-neeca!

Naa na miishaanu nuhuajitij, Jasónri nata quioosano pueyata carteqesaaquiaariuhua.

### *Berea tiacajinia Pablo quishacari Silasta*

<sup>10</sup> Cuno niucuaa, cuno tiacajinia quiniaa Jesuucua tiuuniasa pueyari Berea tiacajiniara mashiquiaari Pablo, Silasno. Berea tiacajinia na tiuquijiosacari, cuniqui quiniaa Judiocuaca rerejojuia tiajinia quiojoquiaariiri. <sup>11</sup> Cuniqui quijiaca Judiocuaca cutaraari maninia pueya quiquaari, maja juhua Tesalónica tiacajinia quiniaa. Naacuajitij, Pablo jaara Jesujiniji pohuataquiaari nojori niquiara, nojoriiri maninia tojitiaquiaari na pohu-atasano. Na nuhuaji, puetunu juucajanaa, tama nojoriijaarijia tariucuaacaanu Pueyaso Rupaajinia naajiotasano pajenuquiaari, nojori niishiniuria seetanujuanaa quiriquiaate Pablo niishitiojosano. <sup>12</sup> Naacuajitij, queraatia Judiocuacaari Jesuucua tiuquiaari, quera-atia taucuanio, canuu, mariyata queraatia tojishano maajipohuanio. <sup>13</sup> Tesalónica tiacajinia quiniaa Judiocuaca jaara niishiquiaari Pabloori Berea tiacajinia Pueyaso rupaa

pohuataseecuhaj, nojoriiri nocua quiojoquiaari nojori taanuunura nojuaja cuniquijiji-uhaj. Na tiuquijiosacari Berea tiacajinia, cuniqui pueya naso Joseeri, Pablo na juaatiuni-uria. <sup>14</sup> Nocuaji, Jesuucua tiuuniaa pueyari cuniquiji ritia mashi quiquiaari Pablo shonini-acu camini ajiniara. Silasri Timoteota Berea tiacajinia jateequiaari saaja. <sup>15</sup> Berea tiacajini-jinio pueyari Pablo mashitia quiaari, nuu na niishitiniuria. Nojoriiri Pablo jiyata quiaari Atenas tiacajiniara. Nojoriiri cuniqui jata quiaari Pablo. Cuno pojori jaara tacaretanu paniquiaariuhua cuniquiji Berea tiacajiniuhua, Pabloori nojori seque quiaari:

–Nocua ritia jiyarosuhua Silas, Timoteonio. Nojoricua niyaja cua coqesee.

*Pablo quishacari Atenas tiacajinia*

<sup>16</sup> Pabloori Silas, Timoteo sashiquiaari Atenas tiacajinia. Cuno tiacajinia na rucanejosacari pueya na sashishacari, Pabloori ni quiquiaari tama cuno pueya shipinijiosanojuaja na pueyasohua. Nojori shipinijiosanoori puetunu cuno tiacajinijanaa quiri quiaa. Pabloori cunora jiyano hua taca quiaari. <sup>17</sup> Pabloori Jesujini Judiocuaa poojota quiaari nojori rerejonuuja ti ajinia, noo pojori taucuaquuhaj, canapueye Pueyaso tojtiajaca quiquiaaricujani. Naajuhaj, Pabloori cuno tiaca jiuujiajini pueya cajitiu-cuara curotasanoinia pohuata quiaari Jesujini cuniqui quinia niquiara. <sup>18</sup> Tamasaca niishijiaaari Pablo pohuatasacari Jesujini tojtia quiaa. Nojoriiri caapiqui maapuejini-jinio quiquiaari. Tamonu maanuuri sesojosa quiaari “Epicureohua”, Epicuro jyanishano niishijia niishitiojoso tojtiajaca nojori quiniucua. Tamonu maanuuri saniniuuja sesojosa quiaari “Rejeretajaca”. Naa sesojosa quiaari Zenón jyanishano niishijia niishitiojoso nojori tojiniucua. Pablo pohuatasacari nojori niquiara, nojoriiri maja na niishitini quiquiaari casaa na pohuatari quiaani. Nocuaji tama nojoriiaarijia seque-too quiaari:

–¿Casaariquitijia cuno paateca pohuataa pajaniyatejaj? Najuhua na pocuaa pueyara-caanuuri.

Tamasacaari saniniuuja sequetu quiaari:

–Tamasaca pueyasohuajini poojotana juhanaruhua.

Nojoriiri naa sequeriquiaa Pablo pohuatanucua Pueyaso rupaa Jesujini, mariyata taa cusonuono samiitiaconatiniuhua. <sup>19</sup> Na nuhuaji, nojoriiri Pablo jiyata quiaari tuhananujini, tee nojori jiti quiaari rerejonuuncuajani. Cuno tuhananu sesaari quiquiaari Areópago. Nojoriiri naa sequetu quiaari Pablo:

–Miji. Socua canaa tojishocoriquiano quia pohuataqueeruhaj. Canaari quia pohu-atasanoiniji socua maninia niishini paniani. <sup>20</sup> Quiaari jiyajeneta sequeriquiaa canaa niquiara quia pohuatasacari. Quarijia canaa quia tore maninia.

<sup>21</sup> Puetunu Atenas tiacajinia quinia pueyanaa, mariyata tamonu jiyacajinijinio cuniqui quiniaajuhaj, nojoriiri maja socua tamonu casaa na miitini quijia. Saaja quiarinio sequesanojiniji niishitini panijiaaari.

<sup>22</sup> Jiyacaritij, Pabloori Areópagojiniji nujuaquiaari na pohuatanura na tojtianu panijiaa niquiara. Naa coteereeri:

–Atenas tiacajinia quinia pueyanaa, janiyari quarijia niishiyani, niaaqui pueyasohuacua jiaatijaca jyanohua. <sup>23</sup> Janiyari naa nia sequeyani pueyanaa, cua ni quiniucua queraatia nia shipinijosano pueyasohua, cua rucanejosacari nia tiacajinia. Naajuhaj, janiyari saajiajiniji nia shipinishano juhua juhuacutara ni quiriucuaajuhaj. Nocua naajoori sequeya, “Niishishoo Pueyasora”. Cuno Pueyaso niaa na tojtia quiaa na ni-ishiyaquiniutiani, nojuajaari nio Pueyasocua janiya nia pohuataani.

<sup>24</sup> Cuno Pueyasoori nio jiya shipiniquiaaricua, puetunu pa ni quishanojuanaano. Nojuajaari jiyocuaaanu camarnujuhaj. Nojuajaari puetunu ti quiyocujanaa Quijia. Majaari pueya tijasano secejoja ti ajinia na quiniu. <sup>25</sup> ¿Taa nia jyaniyani pueyanaa, cutara Pueyasojanaate pa jiti asano casamijini panijajuhaj? Maja. Nojuacuaari puetunu pa jiti asanojuanaa shipiniquiaari puera. Pa rishiniuria, na Sohanujini pa ni quito quiaariuhaj, pa rijiosocoriquiano paratunio.

<sup>26</sup> Pueyasoori ni quiryatu pueyano shipiniquiaari juhuacatecara. Paari cuniquiji canequiarini, puetunu jiyacajinijanaa pa quiniuria. Pueyasoori tarijia seque quiaari tee pueya quiniutianiani. Seque quiaariuhaj taacari tii pa quiniutianiani.

<sup>27</sup> Pueyasoori naa panitia quiaaricua puetunu jiyacajinia quinia pueyanaa pajenura nojuaja. Pueyasoori pa saniya, na niishiniuria, ¿pueyate na pajenutianiani pa riuritanura nojuaja? Pueyasocuaari maja na quiniu tucuaaanu pajaniyajini. <sup>28</sup> Pueyasoori pa samiitianiya. Pa cumaquiaaariuhua pa poonijionura. Pa rishitiquiaaariuhaj. Naatej, taa nia pohuatajaca seque quiaaricujani: “Paari Pueyaso muerasuni”. <sup>29</sup> Paa jaara seetanujanaa Pueyaso muerasu quirini, majaari socua pa jyanini Pueyaso naasucuaari juhua orojini pa shipinijosano ni quishano. Majaari juhua platajiniji shipinishano, juhua

saajiajiniji shipinishanonio. Pueyaso cutaraari maja na niquishaanu juhua tama pa niishiriojosanojuaja. Majaari na niquishaanu taa pueya shipinijioquiaacuaajani, nojori jiyanihacari Pueyaso naasucuaari naa niquishanotej. <sup>30</sup> Pueyasocuaajaari pueya miiniu sesa rejeretariquiaa pueyaracaanu. Saniniuujia, nojuajaari quiarijia puetunu tiqiyocua quijiaa pueyajanaa sequeya, nojori cartenura puetunu sesa na miiquiosanojuanaa, saaja nojuaja nojori tojtianura. <sup>31</sup> Pueyasocuaajaari tari saquiriojaari tamonu juuca taacari na nequesoreenutaniya mijiria quiniaani. Maninia pa nequesoreenutaniya puetunujua-naari. Pueyasoori tari na saquiriojosano pueyano jiitiaa pa nequesoreeriquianojuhuaj. Na samiitianishacari cuno pueyano macujiniji, nojuajaari naa pa niishitiquiaari, cunocua-jaari na saquiriojosano pueyano.

<sup>32</sup> Nojori jaara tojiquiaari Pablo pahuatasacari taa macunucua samiitiaconutaniuhuani, cuno niishijiaacari na saroojotaquiaari na rerequetenuta. Tamasacaari saniniuujia Pablo sequequiaari:

—Canaacua tamacari quia tojiriirianiuhuaj.

<sup>33</sup> Na nuhuaji, Pabloori cuno pueya tajiniji quiaacuhua. <sup>34</sup> Noojiaqueya cuno pueya-jinijinoori Jesuucua tiuquuaari, Pablo pahuatasano nojori tojtiasacari. Nojorijinijin-oori quiquiaari Dionisio jiyanihano pueyano. Nojuajaari Areópago niishijiaa pueya maanujinijinio quiquiaari. Jesuucua tiuquuaariiaariuhua tamonu maaji. Dámaris na sesa. Socua tamasa pueyari Jesuucua tiuquuaarijuhuaj.

## 18

### *Pablo quishacari Corinto tiacajinia*

<sup>1</sup> Na nuhuaji, Pabloori Atenas tiacajiniji quiaquiaari Corinto tiacajinia. <sup>2</sup> Cuniquri-ri-ataseequiaari tamonu Judio pueyanoori. Na sesaari Aquila quiquiaari. Nojuajaari Ponto jiyajinia rasaanquiaari. Aquilaari necocua Priscilata shusha Italia jiyajiniji tiuquijio-quiriquiaa Corinto tiacajinia, tii Pablo tiuquishacari. Jiyacariitij, Claudioori jiyaniija-janaa quiquiaari Roma tiacajinia, Italia jiyajinia. Nojuajaari puetunu pueyapue camar-nujuanaa quiquiaari puetunu jiyacajiniajanaa. Nojori jiitiaquiaari Roma tiacajinijiiri. Nojuajaari tama na tiacajinia pueyajaaja sequequiaari puetunu Judiocuacajanaa nojori taanuunura Roma tiacajiniji. Naaratej, Aquilaari necocuata quiaquiaari Roma tiacajiniji. Corinto tiacajinia quishiiri. Pabloori nojoriicua quiaquiaari nojoritia na pocojonura. <sup>3</sup> Aquilaari necocuata suhuoronuutaja toqueya cuspuenuujua quiquiaari juhua Pablo-juhuaj. Naaratej, Pabloori nojoritia quishiiri, mariyata na poonijionuunura tii. <sup>4</sup> Pabloori maja nareja na shocotenu quijia samaatenu juuca. Nojuajaari Judiocuaca rerejojua tiajinia rucuanerjojua. Tii nojori pahuataquiaari Jesujinijiiri, taucuaca niquiaranio, noo pojori canapueje Judiocuacara jiyatesaaquiaaricuaajani, tariucuacaanu Moisés niishitio-josano nojori tojishacari.

<sup>5</sup> Silas jaara Timoteuta Pabloocua tiuquijioquiaari Macedonia jiyajiniji, Pabloori jiy-acari coteequiaari puetunu juucajanaa Jesujiniji pahuatanura Judiocuaca niquiara. No- jori sequequiaariiri:

—Jesucuaajaari nia sashishano, Pueyaso Jiyarosano seetanujanaa pocua!

<sup>6</sup> Judiocuaca jaara tojiquiaari naa Pablo sequesantej, na tojtiaaquirii saajaari nojori cuaracashitiniutia Pablo sequesano. Saaja juuaquioreeri. Sesa pocooreejaariuhuaj. Naaratej, Pabloori nojori niquiara na toque nuutojoquiaari, nojori niishiniuria Pablo tari nojori tiujiaarohua. Pabloori nojori sequequiaari:

—Majaari cucua nia tiutianu, Pueyaso jaara mijiria quiniaa saniitiore. Niaacuaajaari Pueyaso rupaa ruuretaquiaa saaja. Quiarijia taucuacaacua quiaa cutaranijia, nojori cua pohuatnura Pueyaso rupaa Jesucristojiniji.

<sup>7</sup> Na nuhuaji, Pabloori cuno Judiocuaca rerejojua tiajiniji tohuataquiaariuhua. Tamonu pueyano tiajinia quiaquiaariiri. Cuno pueyano sesaari quiquiaari Justo. Nojuajaari Pueyaso tojinia quijia. Na taari jiyareta Judiocuaca rerejojua tia shuriucua quiriqiuase.

<sup>8</sup> Crispoori jiyacari cuno Judiocuaca rerejojua tia camarnu quijia. Nojuajaari puetunu na tiajinia quiniaa pueyatajanaa Jesuucua tiuquuaari. Naajuhua, queraatia Corinto pueyari Jesuucua tiuquuaari Pueyaso rupaa nojori tojishacari. Naaratej, puetunu Jesuucua tiu- nuaajanaari moojinia tiuquinjiosaaquiaari. <sup>9</sup> Jiyacari tamonu niucua, Jiyaniija Jesuuri Pablo sequequiaari na maquenujinia:

—Maja quia puerenu Pablonaa. Socua quia pohuatere cuno pueya tojishocoriquiano. Majaari sanaajenu. <sup>10</sup> Janiyacuajaari quiaata quiyani. Majaari quenaaja tamonu pueyano jiyashiniu quiniutaniya taa na miiniu paniniuria quiajaniya. Janiyari queraatia pueya nio tiacajinia jiitiaa cucua tiuuriquianoni.

<sup>11</sup> Naaratej, Pabloori Corinto tiacajinia jiyojequiaari. Tii na quishacari, quera shocojotequiaari caapiqui marijiaari. Cuniqiu na quishacari, Pueyaso rupaa niishitiojoriquiaa cuno pueyari.

<sup>12</sup> Jiyacaritij, Galión jiyaniishano tahueri Acaya jiyajinia pueya camarnu quiquiaari. Corinto tiacaari Acaya jiyajinia quiriquiasejuhuj. Jiyacari, Judiocuacaari tii Pabloocuara rojotooquiaari. Na nuhuaji, na quiatuquiaariiri. Naa na jaatucutuquiaari cuno jiya camarnuucuaari, Pablo nequesoreesaanura. <sup>13</sup> Naa sequetusee camarnuuri:

—¡Canaa camarnunaa, nio pueyanoori pueya shiniujiya Pueyaso nojori shuquiritianura tamaatia canaa supuetana Moisés Rootasanojiniji!

<sup>14</sup> Pabloori jiyacari juuca pocuanu paniriquiaa. Galiónri saa na rupaa niyacutequeejaa senota. Cuno Judiocuaca sequereeri:

—Judiocucanaa, niaa jaara maninia miyashijiaa cucua jaatucure cutara, sesa miijiaa sequenio, janiya maara jiyano pueyanoochuara nia tonujusacari tojiri cutarani. <sup>15</sup> Naaari saaja tama nia niishishanojiniji juayonuutaajaacujua. Maja cua nequesoreenu quiniutianiya tama nia juayonuutasacarijiaaja nia sequesano tamasa shaajeceno pueya sesacajiniji, tama nia supuetanaa rootasanojinijijiaajanio. ¡Tama nia jeecatoorejaaja!

<sup>16</sup> Na nuhuaji, cuno camarnuuri nojori juaari. Na shuriucuaji na jiyaramiquiriohuari. <sup>17</sup> Naa Galión miishacari nojoritij, narta taucuacaari cuniquijiaa quiatuquiaari Sóstenes, Judiocuaca rerejojua tia cojuana. Na piqitiuri camarnu Galión niqiuara cuniquijiaari. Majaari Galión tenujunu quirii nojori. Nareja na niquiriquiaari.

*Pablo riuujiushacariuhua Antioquiya tiacajiniohua. Na nuhuaji jiuujianaraca pacutequiaariuhua quianuuri*

<sup>18</sup> Pabloori cuniqui queraatia camueenujuquiaarijiaara Corinto tiacajinia. Tari na riuujiushacariuhua cuniquiji, na nuhuajiria saruhuataarohua narta Jesuucua tiuuniaa pueyari. Buquejinia quiaarohua Siria jiyajiniohuari. Na cojiriquiaajaari Priscila, neyaca Aquilano. Nojori tacataaquishacarijia buquejiniaacuma, Cencrea tiacajiniji na quiojonura, Pabloori jiyacari na naca riuujiuquiaari caritianajara. Nojuajaari Pueyaso sequequiaari tari, maja na naca na riuujiutiniu quiniutianiya nojuaja jaara na sequesano Pueyaso tucataaquiri.

Cunora, naa quiarijia riuujiutirii na nacaari. <sup>19</sup> Nojori tiuquijiosacari Éfeso tiacajinia, Pabloori tii jatamaquiaari Priscila, Aquilano. Nojuajaari tajimiaa Judiocuaca rerejojua tiajinia. Cuniqui rerejono Judiocuaca pohuatasee Jesujiniijiri. <sup>20</sup> Nojoriiri Pablo nenecojoquiaari juucua cuniqui na camueenujunurajara nojoritia. Majaari Pablo paniniu quiquiaari. <sup>21</sup> Cuniqui quiniaa sequereeri:

—Quiohuanijia pueyanaa. Jerusalén tiacajiniara secohuanijia. Canaari tii rerejonutaniya Jesuucua tiuuniaa pueyatani. Pueyaso jaara paniri, janiyacua nia niquiniuria tacatemohuaraniuhuj.

Cuniquiji tacaquiaariuhua buquejiniaari. Éfeso tiacajiniji quiaarohuari. <sup>22</sup> Pablo tiuquishacariuhua Cesareya tiacajiniohua, cuniquiji quiamaa Jerusalén tiacajiniaari, puetunu Jesuucua tiuuniaa na saruhuatanurajanaa. Na nuhuaji, quiaarohua Antioquiya tiacajiniaari. <sup>23</sup> Cuniqui tarishiquiaari pasajaari. Na nuhuaji, socua quiaquiaariuhua cuniquijiiri puetunu jiyacajinarajanaa. Quiariquiaari na niqiniuhuara Jesuucua tiuuniaa pueya Galacia jiyajinia, Frigia jiyajinianio. Pabloori nojori niqiuara pohuataquiaari socua Pueyaso rupaaajiniji. Jesuucua tiuuniaa nacasuquiaariiri maja nojori tarinitanura Jesuucua tiuunio.

*Éfeso tiacajinia Apolo pohuatasacari Pueyaso rupaa*

<sup>24</sup> Jiyacaritij, tamonu Judio pueyanoori Éfeso tiacajinia tiuquiquiaari. Alejandría tiacajinijio pueyano. Na sesaari Apolo quijia. Nojuajaari maninia Pueyaso rupaa pohuatana quiriquiase. Tariucuaaanu Pueyaso Rupaa naajiosano niishijia quiquiaarijiaariuhuj. <sup>25</sup> Nojuajaari maninia niishitiojosaquiaari jiyaniijia Jesu niishitiojosanojiniji. Shitimia pohuataja pueya niqiuaraari. Maninia niishitiojojua Jesujiniji na pohuatasacarijiaariuhuj. Seetanujuanaa sequeja Jesujiniji puetunujuanaari. Maja cutaari na niishiniu quijia Pueyaso Sohuanute pueyano jiuujiajinia tiuquijia. Saaja moojinia tiuquinijionu niishiquiaariiri, taa Tiuquinijiona Juan niishitiojoquiaaricuani. <sup>26</sup> Apoloori na puerenu jataquiaari tii na pohuatasacari Pueyaso rupaa narta Judiocuaca rerejojua tiajinia. Aquilaari Priscilata tii quiriquiaajuhuj. Apolo pohuatasano tojtariquiaari. Apolo jaara puecaquiaari pohuatana, nojoriiri tamocora na jaatucutuquiaari na niishitiojonura taa pa jatanishaquiaa Pueyaso Sohuanutani, Pueyaso muerasu pa quiniuria cutara. <sup>27</sup> Na nuhuaji, Apolo jaara quianu paniquiaari Éfeso tiacajiniji Acaya jiyajiniara, Jesuucua tiuuniaa pueyari na cumaquiquiaari. Naajuhuj, nojoriiri Acaya jiyajinia Jesuucua tiuuniaa

pueyacuara naajioquiaari Apolo patasocoriquiano, maninia cuno pueya tojiniuria nojuaja na tiuquishacari tii. Jaara tiuquishiiquiaari Acaya jiyajinia, Apoloori Jesuucua tiuuijaca cumaquiquiaari jiyanoehua, nojori na niishitiojosacari. <sup>28</sup> Apoloori nojori niqiuara niishitiojoquiaari tariuacuacanua Pueyaso Rupaajiniji naajiotasano. Jiyanoehua maninia na niishitiojosacari Jesuuri seetanujuanaa nojori sashishano quiquiaari, naacuajitij Judiocuaca niishishano pataquiaariiri.

## 19

*Pablo quishacari Éfeso tiacajinia*

<sup>1</sup> Apolo quishacari Corinto tiacajinia, Pabloori saniniuuja Antioquiya tiacajiniji quiaquiaari nucuaco Éfeso tiacajiniara. Na quiasacari, tuhuananuhua shoconujuquiaariiri. Naa tiuquishiiquiaari Éfeso tiacajiniara. Tii riuriataquiaari Pueyaso pueya maanuuri.

<sup>2</sup> Pabloori jiyacari nojori nequesotaquiaari:

—¿Niaate Pueyaso Sohuanu tiuquiniquianu nioojiajinia, Pueyaso rupaacua nia tiuushacari?

Pablo riucatureeri:

—Majaari quenaaja canaa niishiniu quijia Pueyaso Sohuanute quiyajuhuj.

<sup>3</sup> Pabloori nojori sequequiaari:

—¿Casaara nia tiuquinijosaacuanucuaaraini?

Nojoriiri na riucuaquiaari:

—Canaari tiuquinijosaaquiaarini taa Tiuquinijona Juan niishitiojoquiaaricujani.

<sup>4</sup> Pabloori nojori riucuaaree:

—Taaquiririnij. Tiuquinijona Juancuaaquinateja pueya tiuquinioquiaarijiaj, nojori jaara noojia tacatoquiaari sesa na miitiushanoinijia. Nojori sequequiaarijiaariuhuj: “Cua nuhuaji Niriquianoocua nia tiuuri”. Naa Tiuquinijona Juan sequesacaritij, nojuajaari Jesucristojiniji sequeriquiaa.

<sup>5</sup> Cuno pojori jaara Pablo pahuatasano Jesucristojiniji tojiquiaari, nojoriiri socua tiuquinijosaaquiaariuhua Jesuucua nojori tiuushacari seetanujuanaa. <sup>6</sup> Naacuajitij, Pablo niasacari na juaashiquia nojori nacaacua Pueyaso na secosojacari, Pueyaso Sohuanuuri cuno pojori jiuujiajinia tiuquiquiaari. Naacuajitij, nojoriiri niishishoo rupaacajinia pocooere. Naajuhuj, Pueyaso Sohuanu niishitiojosano Pueyasojiniji pahuatanuquiaariiri. <sup>7</sup> Cuno pojoriiri doce canuu quiquiaari.

<sup>8</sup> Pablo quishacari cuno tiacajinia, nojuajaari tii shocotejoquiaari jiuujianaraca raca. Jiyacari, puetunu samaatenu juucajanaa quiaja Judiocuaca rerejojua tiajiniaari. Tii pahuataja Pueyaso rupaa pueya niqiuaraari. Naajuhuj, nojori niishitiojojuuuri taa Pueyaso jitianutaniya pueyaracaanu Jesuucua tiuninaa pueyani. Pueyari na tojitiaquiaari maninia, na pueyeraquiniutia na niishitiojosacari. <sup>9</sup> Noojiaqueya cuno pueyajinijinoori saaja ruuretaquiaari Pueyaso rupaa. Na rerequetequiaari saajaari. Sacuaraatia pocooquiaari Jesu rupaajiniji pueya niqiuaraari, Jesuucua nojori tiuuniu paniaquishacari. Nocujaji, Pabloori saa jiyareta Jesuucua tiuninaa pueya jiyataquiaari cuniquiji, tamaquiria serojonuuja tiajiniaari. Tirano jyanishano pueyanoori cuno serojonuuja fia camaru quiquiaari. Pabloori cuniqui puetunu juucajanaa niishitiojojuua Pueyaso rupaa Jesuucua tiuninaa pueya. <sup>10</sup> Caapiqui marijaari socua Pablo shocajoquiaari tii na poojotasacari Pueyaso rupaa Tirano serojonuuja tiajinia. Naacuajitij, puetunu Asia jiyajinia quiniaa pueyajanaari Pueyaso rupaajiniji caminiujushaaquiaari, Judiocuaca, taucacajuhuj. <sup>11</sup> Pueyasoori jiyacari Pablo cumaquiquiaari jiyajeneta casaa na miiniuria Pueyaso cumaacata. <sup>12</sup> Naacuajitij, pueyari Pablo paneyaca tuujutaqueya rijioquiaari, Pablo cooshano toqueraacuano. Cuno pueya jaara na cusosuhacuua niojoquiaariuhua cuno toqueraacua, ¡cusosuhuari naatacoquiaariuhua! Naajuhuj, samaruuari tohuareetaquiaarijuuhuj, samaruhua jiitiaja pueyacuaji.

<sup>13</sup> Tamasaca Judiocuacajinijinoori quiriquiaajuhuj, pueyajiniji samaruhua tohuatanijiojua. Nojoriiri puetunu tiacajinijanaa rucojojuaca quiquiaari. Jiyacaritij, nojoriiri juhua Pablo miiniu paniquiaarijuuhuj. Juucua naa sequetuquiaari samaruhuari:

—Pablo pahuatasano Jesu sesajinia nia sequeyanijia: “¡Nio pueyanojiniji nia tohuareetare!”

<sup>14</sup> Naa miijiaacari siete canuu quijia. Nojoriiri Esceva jyanishano pueyano niquiohua quiriquiaa. Escevaari pueyacuara secosona camarnu quiriquiasejuuhuj, Judio pueyanotuhuj. <sup>15</sup> Cuno pojori jaara saniquiaari juucua Jesu sesajinia samaruhua tohuatanijionura pueyanojiniji, samaruuri saaja nojori riucuaquiaari:

—Jesu niishiyacuajinjia. Janiyari Pablo niishiyajaniuhuj. ¿Canteerini nijanyanijia, naa nia sequenura janiyatej?

<sup>16</sup> Samaruhuaraca pueyanoori jiyacari nojoriicua jaaquee. Nojori piyoree saajaari. Maja na naata nojori nujuataaquishacari, nocuaji netecuatuquiaari tiacojiiri juhua-sunucua, jiyareta naatiquishanojuhuaj. <sup>17</sup> Puetunu Éfeso tiacajinia quiniaa Judiocuacajanaa, mariyata tii quiniaa taucucanio, nojori jaara niishiquiaari naa miishanojinijitij, jiyanohua pueretuquiaariiri. Naacuajitij, puetunu Éfeso tiacajinia quiniaa pueyajanaari sequequiaari:

—Jesuqui seetanujuanaa Jiyaniijajanaa cutara!

<sup>18</sup> Naajuhuj, queraatia Jesuucua tiuuniaa pueyari nijioquiaari, tarijia sesa na itiushano pohuatanura puetunu pueya niquiarajanaa. <sup>19</sup> Naajuhuj, queraatia pueyari juhua shimiacuro miijiojuaca quiquiaari. Nojoriiri na nequesoreetuneeeca mueratejotiaaari. Cuno nequesoreetuneeecajiniaari serojosano quijia taate pueyano cumueeca shimiadura quiniuni. Na camaruhuari jiyacari puetunu cuno nequesoreetuneeecajanaa patootaquiaari. Na catijiaquiaari puetunu pueya niquiarajanaari. Puetunu cuno nequesoreetuneeecajanaa catijiasaaquiaarini, cunoori cincuenta mil platajiniji shipinijosano cumaneecata masenan quiquiaari. <sup>20</sup> Naacuajitij, Pueyaso ruupaari socua cuno jiyajinia paaquequiaari, na cumaaca poonijosacari pueya jiuujajinia.

<sup>21</sup> Na nuhuaji, Pabloori cuniquiji naqueretoquiaari Macedonia jiyajiniarajuhuj, Acaya jiyajiniaranio. Cuniquiji ruujuuni paniriquiohua Jerusalén tiacajiniohuaraari. Sequequiaarijiaariuhuj:

—Janiya jaara tiuquishuhua Jerusalén tiacajiniohuani, janiyari Roma tiacajinia tajiriquianohuani.

<sup>22</sup> Jiyacaritij, Pabloori na naacuna jiyaramiquiquiaari Macedonia jiyajinia. Na jiyaramiquishanoori quiquiaari Timoteo, Erastonio. Nojuajaari cuniqui Asia jiyajinia jyojequiaarijaara.

*Éfeso pueya cushitiishacari na juaaquionuta najuhuanaj*

<sup>23</sup> Pablo quishacari Éfeso tiacajiniaja, Éfeso tiacajinia quiniaa pueyari jiyanohua juaaquioquiaari Pablo niishitiojonuucua Jesucristojiniji. <sup>24</sup> Naa quiquiaariiri. Demetrio jyanishano pueyanocujaari juhuacatecara narta pueya nasojoquiaari. Cuno pueyano, Demetroni, nojuajaari shiirijiaa tia platajiniji shipinijiojua quiquiaari. Cuno shiirijiaa tiacaari juhua nojori jyanishano pueyaso secuojua tia niquishano quiquiaari. Nojori pueyasoori maaji sesaanucua quijia, "Artemisa". Na shipinijosano niqutiojojua na cumaneecaraari. Naacuajitij, Demetrioori nata poonijionaa pueyata queraatia cumaneecaraa quijia. <sup>25</sup> Demetrioori jiyacari nata poonijionaa rerejotequiaari nojori nacootanura Pablo miishanojiniji nojori tiacajinia. Nojoritia rerejoquiaariiri tamasca pueya, casaa shipinijionaa platajiniji juhua nojoriujuhuaj. Puetunu cuno pueyajanaa jaara tari rerejoquiaari, Demetrioori nojori sequequiaari:

—Pueyanaa, niaacuajaari niishiya, paari puetunu pa panishanojuanaa jiitiaani pa niqutiojosacari pa cumaneecara pa shipinijosano. <sup>26</sup> Quiarijia cuno Pablo jyanishano pueyanoni, nojuajaari queraatia pueya niishitiojquiaa, pueyano shipinijosano pueyasohuanaari maja seetanu pueyasohujanaa. Niaari na niquiriquiaacuaja naa na niishitiojosacari. Niaari na tojiriquiaajuhuj. Naacuajitij, majaari tari pueya masenu quiniutianiya pa shipinijosano platajiniji casami. Queraatia nio Éfeso tiacajinia quiniaa pueyari na sequesano tojiya. Puetunu pa Asia jiyajinia pueyapuejanaari na sequesano tojtiaajuhuj. <sup>27</sup> Taa cua sequeyacuajani, pa shipinijosano jaara shocotesaare saaja, paari pa poonijosano carteriquiano socuani. Majaari pueya shocotenu quiniutianiya saa pajaniyaja, pa pueyaso Artemisa rerequetenutaniyaariuhuj. Nocuaji, majaari pueya nijionu quiniutianiya tari pa pueyaso Artemisa secuojua tajiniara, tii nojori secjonura, naa cuno Pablo niishitiojonuucua pueyaracaanu pueyatej. ¡Naacuajitij, puetunu pa Asia jiyajinijinio pueya, mariyata puetunu jiyacajinijinio pueyapuejanaari pa pueyaso Artemisa rerequetejacara jatanutaniya! ¡Puetunu pueyapuejanaari naa niyajetanutaniya socua pa pueyaso Artemisatej!

<sup>28</sup> Cuniqui quiniaa pueya jaara tojiquiaari naa Demetrio sequesantej, nojoriiri jyanohua juaaquioquiaari. Naa nacoquiaariiri:

—¡Pa timitiasano Artemisa cuara pueyaracaanu quiiria Éfeso tiacajinia quiniaa pueyaso!

<sup>29</sup> Naa nojori juaaquiosacaritij, puetunu cuno tiacajiniajanaa pueyari cushitiquiaari. Nojoriiri jiyacari quiooturee caapiqui Pablo cojiniaa pueya, Macedonia jiyajinijinio pueya. Nojoriiri quiquiaari Gayo, Aristarconio. Na jayoturee Éfeso tiacajinijinio pueya rerejojua tajiniaraari. <sup>30</sup> Pabloori cuno pueya nacoosaqui tajinia tiuquini paniquiaari juucajuhuaj. Quera na pocuasee cuno pueya tajiniani. Jesuucua tiuuniaa pueyari saa na

cosequiaarijia na tiuquiyacuiniucuaaji. <sup>31</sup> Asia jiya camarucuaari na seya jiyaroquiaari Pabloocuaajuhuaaj. Camarucuaari coteenu naa sequequiaari na seya:

—Niocua Pablo sequesee, maja cumaati jaarajaaja na tiuquiniu pueya nacoosajaqui, mariqui mosaareeri.

Cuno camarucua na seya jiyaroquiaari nocuani, nojoriiri Pablo rupueanaa quijia. <sup>32</sup> Cuno nasojosano rerejono pueyari saaja cushitiquiaari na juaaquionuta. Jiyanohua nacooreeri. Tamasacaari saniniuuja tamaatia nacooriquiaajuhuaaj. Jiyacaritij, tama cuno nojorijinijinio pueyari maja na niishiniu quiquiaari casaajiniji na nacooriquiaani. Secaja nojorijinijinoori na niishiquiaari cutara. <sup>33</sup> Jiyacaritij, Judiocuacaari Alejandro jyanishano pueyano caponeequiaari pueya nacoyano tacoji na nujuatesocoriquiano. Cuniquijinio pueyajaari tii toquiaari Alejandro casaara pueya nacoyani. Alejandro Judiocuacaari quiquiaarijuhuaaj. Naaratej, Judiocuacaacuaji tacunu paniriquiaa juucuaari. Alejandro jaara nujuaquiaari pocuajajiniji, na juashiquia shiitioquiaariiri pueya sanaajetanura. <sup>34</sup> Saniniuuja, cuno pueya jaara niishiquiaari Alejandro Judiocuacaari pueyano, puetunu pueyajaari socua jiyacatequiaari nacoonura. Nojoriiri caapiqui hora shocoteree pueyaracaanu naa na nacoosacari najuhuanaj. Naa sequeturiquiaa na nacoosacariiri:

—¡Pa timitiasano Artemisa cuara pueyaracaanu quiria Efesio tiacajinia quiniaa pueyaso!

Naa pueyaracaanu nacooriquiaari. <sup>35</sup> Cuno tiaca camarucuaara naajiona pueyano jaara na naata quiriquiaa nojori na sanaajanura, nojori sequeereeri:

—Cuarta Éfeso pueyanaa, puetunu jiyacajinia quiniaajanaari niishiya, pajaniya Éfeso tiacajinia quiniaari pa pueyaso Artemisa secojoja tia cojuanaani. Niishituyajaariuhuaaj paacuajaari cuno casaa juhua pa pueyaso Artemisa niquishano cojuaquiaani, jiya cajiniocuaji tinio pa riuriatasanoni. <sup>36</sup> ¡Canteeri nio niishiyaquianija! Shaaqui. Cunora tariucuaaja. ¡Nia sanaajetarohua! Majaari najuhuaana sesa nia miitiuniu, maninia nia niishiriojiyaquishacari. <sup>37</sup> Nio canuu niaa niyara na jayoreeni, nojoriiri maja na nohuasenu quirii casa pa pueyaso secojoja tiajiniji. Majaari na sesacatunu quiquiaa pa pueyasojuhuaaj. <sup>38</sup> Demetrio jaara nata poonijionaata cuno pueyacuara tonujunu paniri, ¿casaara na quiaaquia pa nequesoreenaa niquiara tonujunuraarini? ¿Casaara pa jiiitia nequesoreenaa pa tiacajiniaarini? ¿Najuhuanaj? Pa nequesoreenaa pa paraa tacujua pocuaji. <sup>39</sup> Niaa jaara tamonu casaacua juaaquioreja, pocua tamonu juuca na rerejotariquiani pa jyaniijianucuaata pa jeeacanura puetunu nia sequesanojuanaa. <sup>40</sup> Pueyanaa, ¿majate nia puerenu, Roma tiacajinia quijia pa jyaniiijajanaa jaara pocuara tosaare pa nacoosajonujiniji? Paa jaara sequesaa nocua quiojonurani, ¿paatucua taa pocuaji tacureni jaara pa nequesoreere pa nacoosajonujiniji?

<sup>41</sup> Tiaca camarucuaara naajiona pueyano jaara puecaquiaari pocuanu, pueya sequequiaariiri:

—Nia quiojorohua pueyanaa.

Naacuajitij, puetunu pueyajaari cuniquiji niaquejoquiaariuhua.

## 20

*Pablo rucuanesacariuhua Macedonia jiyajinia, Grecia jiyajiniano*

<sup>1</sup> Pueya jaara na juaaniutia na nacoosajonu nuhuaji sanaajetaquiaariuhua, Pabloori jiyacari Jesuucua tiuninia pueya sequequiaari tama jiyareta nojorijiaaja rerejonura. Tii nojori nacasuree maniniaari. Tari na quiasacari cuniquiji, na nuhuajiria cacanuquiaari puetunu nojorijianaari. Na nuhuaji, Macedonia jiyajinia quiaareeri. <sup>2</sup> Nojuajaari puetunu cuno jiyajinia rucuanequiaarijianaa. Jesuucua tiuninia pueya cumashitiquiaari socuaari, maja nojori tarintianura Jesuucua tiuniu. Naa na rucuanesacari cuno jiyajiniatej, socua tiuquishiiquiaari Grecia jiyajiniaari. <sup>3</sup> Pabloori tii na quishacari shocotejoquiaari jiuujianaraca raca. Juucua cuniquiji quianu paniriquiaa buquejinia Siria jiyajiniaraari. Judiocuacaari na niishiquiaari saaja. Nojoriiri jiyacari na monu paniquiaari. Naa Pablo niishishacariitij, nojuajaari nocuaji Macedonia jiyajiniara neteja nuacucohua tacatequiaariuhua saaja. <sup>4</sup> Nucuaaco na quiasacariuhua, na tarajaquiaariiri Sópater jyanishano pueyano Barea tiacajinijinio, Pirro niyanu. Na tarajaquiaarijiaariuhua Aristarco, Segundonio. Nojoriiri Tesalónica tiacajinijinio pueya quiquiaari. Nata quiaquiaarijiaariuhua Gayo, Derbe tiacajinijinio. Timoteori nojoritia quiriquiaajaacuhuaaj, Tíquiconio, Trófimojuhuaaj. Nojoriiri Asia jiyajinijinio quiquiaari. <sup>5</sup> Puetunu nio canaa tapueyocucajanaari canaa puecaquiaari. Canacuaji tiuquijioseequiaari coteenu Troas tiacajiniaari. Cuniqui



sashitiuquiaari canaari. <sup>6</sup> Jiyacariiri queranacunuusacari quiquiaari, poreetajaaju ship-inijosano pan miaquesacari. Queranacunuunu nuhuaji, canaari Filipo tiacajiniji jaaretaquiaari buquejiniani. Canaari cinco juuca camueenujuquiaari canaa tiuquiniuria Troas tiacajiniani. Canaari tii nojori coqueseeni. Canaari mariyata tii camueenujuquiaari siete juucani.

*Pablo niishitiojosacari Troas tiacajinia*

<sup>7</sup> Shusha semaana coteejajinia domingo juuca, canaari rerejoquiaarini pan neecasenura pa Jiyaniijia cusosacari niishiriojonura. Pabloori jiyacari Jesuucua tiuunaa pueya rootariquiaa niucua. Nojuajaari cuno tariqui quiariquiano quiiriquiaa cuniquiji. Naaratej, na nuhuajiria pocoojoriquiaa pueyataari. Pueyaracaanu na pohuatasacari, shiyaqueyari tari quiquiaari. <sup>8</sup> Cuno tiajinia canaa tii quiiriquiaani, canaari jiyocuaaanu tercero na nat-acojina rerejoriquiaani. Queraatia samariiri canaa caaniuji noshiquioriquiaa. Pabloori shitimia pohuatariquiaa pueya niqiara. <sup>9</sup> Jiyacaritij, tamonu mashajaari tia shuucujii tacuhajiniji cajiriquiaa. Na sesaari Eutico quijia. Pablo pohuatasacari pueyaracaanu, socua maquequiaari na cajishaquiiiri. Jiyanoehua na maquesacari, jiyocua tiquii socuaari. Cusoseejanaari. <sup>10</sup> Pabloori nata quiniaata ritia nocua netecuatiquiaari jiyocua. Pabloori nocua jacamasee na cacatanura. Narta Jesuucua tiuunaa pueya sequeereeri:

–Maja najuhuana shiriqitiuniu. Saminiocuaja.

<sup>11</sup> Na nuhuaji, puetunu nojorijianaari tiniota shuquiriaatia tacataquiaariuhua. Pabloori neecaruu neecasequiaari canaa miaquenuusocoriquiano. Pabloori socua pohuataquiaari pueya na niishitiojonura. Naa juhuaquemaajaa socuaari. Tariucua juuca quiaqueeri. Nojuajaari nucuaco quianu paniquiaari cuniquiji Asón tiacajinara. <sup>12</sup> Cuno mashajaari saminio jaatucusaquiaariuhua na tiajiniohwa. Puetunu pueyajanaari noojia cajitiquiaariuhua, saminio mashaja tacatesacariuhua.

*Pablo quiasacari Mileto tiacajiniara*

<sup>13</sup> Pabloori na quiaaquishacarijia tari canaa sequequiaari:

–Nia puetaarecuaa buqueta. Niocua cua rimia Asón tiacajiniji. Janiya nucuaco quianu paniani.

<sup>14</sup> Naacuajitij, canaari coquetoquiaari Asón tiacajiniani. Canaari cuniquiji Pablo tacanimiaquiaarini. Canaari mariyata tiji quiaaree Mitilene tiacajiniani. <sup>15</sup> Canaari tariqui shocomaa Quoío jiya tucuaatijani. Canaari tama tariqui tiuquishii Samos tiaca tacatajajinijini. Canaari rupaquijia samaatemaacuara Trogilio tiacajiniani. Canaari cuniquiji sanetaaree tariquiniuhaj. Canaari Mileto tiacajinia tiuquishiini. <sup>16</sup> Canaari naa secooriquiohwa ritiani. Majaari Pablo tarishiniu paniniu quiquiaari Asia jiyajinia. Naaratej, majaari na quianu paniniu quiquiaari Éfeso tiacajiniajuhuj. Ritia tiuquiniu paniquiaariuhua Jerusalén tiacajiniara. Pentecostés juucara quiniu paniriquiaa tiiri.

*Pablo cumashitishacari Éfeso tiacajinijinio Jesuucua tiuunaa jiitianaa pueya*

<sup>17</sup> Canaa quishacari Mileto tiacajinia, Pabloori pueyano jiyaroquiaari na masuunura Éfeso tiacajiniji Jesuucua tiuunaa pueya jiitianaa. <sup>18</sup> Nojori jaara canaacua tiuquijioquiaari, Pabloori nojori sequeere:

–Niaacuajaari maninia niishiya taa cua quishiiquiaari niaatani, cua tiuquishacari Asia jiyajinia niaacua. <sup>19</sup> Niaata cua quishacari, janiyari pueyaracaanu nia niishitiojuani, pueyaracaanu pa Jiyaniijiaara cua poonijosacari. Naa cua miishacaritij, majaari cua quiniu paniniu quijia juhua nia jiyaniijia. Janiyari niaacua cua tacaashacari nujuquejojuani. Janiyari pueyaracaanu naquiya miishanoni, cuarta Judiocuaca paracaashacari janiya. <sup>20</sup> Naajaa, majaari cua pishiniu quijia nia niqiara na pohuatanura Pueyaso rupaa. Janiyari nia niishitiojuani puetunujuanaa maninia nia quiniuria, maninia miijia nia quiniurajuhuj. Majaari cua niishitiojonu quijia jiyasohuaja. Janiyari puetunu pueya niqiaraajanaa nia niishitiojuani, tama nia tiacajiniaqueyajaajanio. <sup>21</sup> Janiyari Judiocuaca sequejani taucuacanio, nojori tacatonuhua noojia Pueyasocua, sesa nojori miishanojiniji, pa Jiyaniijiaacua nojori tiuuniuria cutara. <sup>22</sup> Quiarijiani, Pueyaso Sohuanuuri cua jiyaroya Jerusalén tiacajinia. Majaari cua niishiniu taa cua miishaanutaniya cuno tiacajiniani. <sup>23</sup> Janiyari saaja niishiya cutarani, puetunu tiacajiniajanaa cua quiasacari, Pueyaso Sohuanuuri cua sequeya: “Quiaari nujuatesaanutaniya. Quiaari naquiya miishaanutaniyajuhuj”. <sup>24</sup> Janiya jaara naa niishirini, majaari cua tacaaniu quiquiaa. Cuaraa cua motuuraqui jaara monu panitiuri. Janiyari saaja pa Jiyaniijia sequesano tucuatani pania cutarani. Pa Jiyaniijia Jesuuri cua jiyaroquiaari cua pohuatanura pueya niqiara, taa Pueyaso jiyanooni pania pueyani.

<sup>25</sup> Janiyari seetanujuanaa nia sequeyani pueyanaa. Puetunu niajanijayanaa, cana niqiuara cua pohuataquiaari Pueyaso rupaacuajani, majaari socua nia niqiniu quiniutianiya mijiria janiya. <sup>26</sup> Naaratej, janiyari nia sequeyani, majaari na nuhuaji nia sequenu: "Maja canaa pohuataसानु quiquiaari Pueyaso rupaani". <sup>27</sup> Janiyacuajaari tari nia pohuataquiaari puetunu Pueyaso sequesanojuanaa pajaniyarani. <sup>28</sup> Quiarjiani, tama nia cuaqueyajaari nia cojuare. Maninia nia cojuare Jesuucua tiuunaa pueyajuhaaj. Pueyaso Sohuanucuaajaari nia jiyatequiaari Jesuucua tiuunaa pueya jiiitanaa nia quiniuria. Nojuajaari nojori masequiaari na nanacata tama nerajaaja, pocuara na cusosacari. <sup>29</sup> Janiyari seetanujuanaa niishiyani, janiya jaara niiquiji quiaqueeni, tamasacaari cua nuhuaji nijionutaniya. Jesuucua tiuunaa pueya sesonutaniyari, sacuaaata nojori niishitiojosanota. Nojoriiri juhua marucuatuque sareya tiuquitianutaniya Jesuucua tiuunaa pueya tajinia. Taa marucuatuque sare tiuquiya borregohua tajiniacuani, puetunu na soosee-janaari, cuno pojoriiri naa miiniutianiya Pueyaso muerasutej. <sup>30</sup> Naajuhuaaj, tama niajanijajiniujuaraarija najuhuaa tamaatia niishitiojonu coteenutaniya na sapojonuta. Majaari Pueyaso panishano na niishitiojonuunu quiniutianiya tari. Naa sapojotunutaniya Jesuucua tiuunaa pueyari, pueya tojiniuria nojori saniniujuja. <sup>31</sup> Janiyacuajaari nia sequeyani, jijanohua nia cojuare tama nia cuaqueyajaaja. Naa niishirijuhuaaj, jiuujianaraca marijaari tari cua shocoree pueyaracaanu cua niishitiojosacari nijaniya. Majaari cua tarinitianu quijia rootanu niajanija, juuca, niucuanio. Janiyari naajaa cua namijiaacatenuta niishitiojioja puetunu niajanijajanaani. Majaari naa cua miishano nia niyajetanu pueyanaa.

<sup>32</sup> Naa tiujanutaniya tarinjia. Janiyacuajaari pa Jijaniija juaashiquiajinia nia jataani. Na rupaa nia tojiriquia pueyaracaanu, juhua rishimiaca pueyano nia quiniuria, cumueecara. Naa jaara naa miiritij, Pueyasoori nia rijionutaniya na shuriucua, na saquirojosano pueyata nia quiniuria. <sup>33</sup> Naaata cua quishacari, majaari tama quiriajaaja cua paniniu quijia cumaneeca, toquenio. <sup>34</sup> Naaari nia quiyano cua niqijiajuhuaj. Janiyari tama cua juaashiquiatajaaja poonijiojuani, cua panishano cua masetajara, cua cojiniaa panishano masetajarajuhuaaj. <sup>35</sup> Janiyari nia niishitiojiojuani, naa poonijiosanotej casamijuniucua pa naacunura pa jiiitiasanota. Majaari pa Jijaniija Jesu sequesano nia niyajetanujuhuaaj. Naa sequequiaariiri: "Maninia pueyano jaara na jiiitiasanojiniji niqitiotiore nareja tamonu pueyano, na niqitiosacari tamonu, nojuajaari socua shuquiriaatia quiya, niqitiosano masejajiniji".

<sup>36</sup> Naa nojori na sequenu nuhuajitij, Pabloori mojuquetaree. Puetunu nojoritijanaa secojoreeri. <sup>37</sup> Puetunu pueyajaanaari nujuqueturee. Pablo cacanuuttureeri. Na nujuu-quetureejaariuhuaaj. <sup>38</sup> Pueyari jijanohua taraajeriquiaa Pablo sequenuucua nojori, maja tari socua na niqitituniu quiniutianiya nojuaja. Nojoriiri caminiajiniaara rosetaquiaarijihuaj, Pablo na niqitituniuria buquejinia na tacasacari.

## 21

### *Pablo quiasacari Jerusalén tiacajiniara*

<sup>1</sup> Éfeso tiacajiniji canaa ruparetasacari, canaari shoniniacu caminia jiuujiaaco quiaareeni. Canaari Cos tiacajinia tiuquishiini. Cuniquiji canaa quiasacari tariqui, canaari Rodas tiacajinia tiuquishiiniuhuaaj. Tama tariqui canaa quiasacari Rodas tiacajiniji, canaari Pátara tiacajinia tiuquishiini. <sup>2</sup> Pátara tiacajinia canaa tiuquishacari, canaari tii riuriatasee tamonu buque quera Fenicia jiyajiniara ruparetaanoni. Canaari tii tacataareeni. <sup>3</sup> Canaa jaaretasacari, canaari canaa muenecara niqumiohua Chipre jiya tucuaatiajani. Canaari Siria jiyajinia tiuquishiini. Cuno buquejinia canaa tii quiariquiaani, casami pariquiaari Tiro tiacajinia jatasocoriquiano. Naaratej, canaari Tiro tiaca tacatajajiniji tiutiaseeni, casami jatanura tii. <sup>4</sup> Jesuucua tiuunaa pueyari tii quijiajuhuaj. Canaari nojoritia quishiini. Canaari siete juuca camueenujusee cuniqui nojoritiani. Pueyaso Sohuanuuri cuniqijini Jesuucua tiuunaa pueya niishitioquiaari taa Pablo miishaanutaniyani. Nocuaji nojoriiri Pablo sequetiquiaari maja na quianura Jerusalén tiacajinia. <sup>5</sup> Naajaa, siete juuca jaara tari shocjoquiaari cuniqui canaa quishacari, canaari tiji quiaquiaarini. Jiyacaritij, puetunu Jesuucua tiuunaa pueyajaanaari necocohuata, mariyata necohuata canaata quiaquiaari canaa na jatanura buquejinia. Canaari rosetaquiaari tiacajiniji tacatajajinijiriani, Pueyaso canaa seconjura jaaquajinia. Puetunu canaajanaari mojuquetacoquiaarini shoniniacu caminia casaqueyaji. <sup>6</sup> Na nuhuaji, canaari nojori cacanuuree canaa nuhuajiriani. Canaari buquejinia tacataqueeni. Nojoriiri tacatajajiniji quiojoquiaariuhua na tijajinohua.

<sup>7</sup> Canaari Tiro tiacajiniji jaaretaareeni. Canaari Tolemaida tiacajinia tiutiaseeni. Canaari cuniqui tacatasee puetunujuanaani. Canaari tii quijiaa Jesuucua tiuunaa pueya

saruhuataseeni. Canaari nojoritia quishii niquiriyatu juucani. <sup>8</sup> Tariqui saniniuuja, puetunu canaajanaari mariyata quiojoquiaari Pablotani. Canaari Cesareya tiacajinia tiuquishiini. Felipeeri cuno tiacajinia quiriquiaa. Canaari na tiajinia quishiini. Felipeeri Jesujiniji pohuatana quijia. Nojuacuajaari Jerusalén tiacajinia coteenujuanaa tamascata jiyatesaquiaari mashiquiopue mianuuteriquiano. <sup>9</sup> Felipeeri necojori jiiti-aja, saa caqueetacaneje, niyacojori. Cuno niyacoojori Pueyaso Sohuanu jiitijaca. Naacuajitij, Pueyaso Sohuanu niishitiojosano nojori jiuujiajinia Pueyasojiniji pohuatenu-jujaari. <sup>10</sup> Canaa camueenujusacari cuniqui, jiyacari tiuquishiiquiaariiri Judea jiyajini-jinio pueyano. Nojuajaari Pueyaso sequenu panishano caminiujunua quijiajuhuaj. Ágabo jiyanihano pueyano. <sup>11</sup> Nojuajaari canaacua niquiaari Felipe tiajinia. Jiyacaritij, Pablo cajiniocua camarucujua samaacataseeri. Nata morojoree tama na cashacucuaajarjia, na numatucuanio. Na nuhuaji sequerohuari:

—Jerusalén tiacajinia parta Judiocuacaari naa morojonutaniya nio cajiniocuaque camarutej. Na nuhuaji, taucuaca niquitiosaanutaniyari. Pueyaso Sohuanuuri naa cua sequereequij.

<sup>12</sup> Naa Cesareya tiacajinia quinia Jesuucua tiuuniaa pueya tojishacaritij, canaajuhua, puetunu canaajanaari juucua Pablo nenecojouiaarini maja na quianura Jerusalén tiacajinia. <sup>13</sup> Saa canaa sequereajaari:

—¿Casaara nia nujuquetiuyajaarani? ¿Niaateeri cua taraajonu paniyaruhua? Majaari saaja cua paniniu pueya morojonura janiya Jerusalén tiacajinia; janiyari tama cua cuaqueyajaaja panitiaacujua. Cuaara cua motuuraqui, cua pohuatenuucua cua Jiyaniija Jesujiniji.

<sup>14</sup> Maja canaa naata na tarinitiniu quishacari, canaari socua na tarinitiareeni.

—Cuajaquij. Pueyaso cuaara miiria taa na miiniu paniyacujani.

<sup>15</sup> Naa canaa sequenu nuhuaji nojuaja juucatej, canaari canaa jiitiasano casaa jeenu-cuareeni. Canaari Jerusalén tiacajinia quiaareejaaniuhua. <sup>16</sup> Canaata quiojoquiaariiri Cesareya tiacajiniji Jesuucua tiuuniaa pueyajuuhua. Canaata quariquiaajariuhua Mnasón jiyanihano pueyano. Nojuajaari Chipre jiya tucuaatiajajinijinio pueyano quiquiaari. Nojuajaari tariija Jesuucua tiuujia quijia. Nojuajaari canaa sequequiaari:

—Paa jaara Jerusalén tiacajinia tiuquishiini, niocua cua tiajinia quishii cuata.

#### *Pablo pocojosacari Santiagota*

<sup>17</sup> Canaa tiuquijiosacari Jerusalén tiacajinia, cuniquijinio Jesuucua tiuuniaa pueyari canaa timitiaree canaa tiuquijiosacari. <sup>18</sup> Pabloori tariqui canaata quiaquiaari Santiago niqiniuuca. Tii quiriquiaajaariuhua puetunujuanaa Jesuucua tiuuniaa jiitianaa pueya. <sup>19</sup> Canaa tiuquishacari, canaari nojori saruhuaatquiaarini. Na nuhuaji, Pabloori nojori pohuaatquiaari puetunu Pueyaso miishanojuanaa na pohuatenuucua Jesujiniji, na ru-cuanejosacari tucuaaanu taucuaca quijia jiyacajinia. <sup>20</sup> Pueya jaara naa tojiquiaari Pablo pohuatatanotej, puetunu tii quiniaajanaari Pueyaso maniniuuhuaqueetaquiaari nojori shuquiritiasacari Pueyaso.

Na nuhuaji, nojoriiri Pablo sequequiaari:

—Canaa tarajanunaa, taa quia niqiquiaacuajani, jyanohua queraatia parta Judiocuacaari Jesuucua tiuya. Puetunu nojorijianaari tariucuaaanu Moisés niishitiojosano tojitiajajuhua, nocua nojori jiaatianua jyanohua. <sup>21</sup> Nio Jerusalén tiacajinia quinia Jesuucua tiuuniaa pueyari quiocuaji tojiquianuhua. Quiaanaari tamonu jiyacajinia quijia parta Judiocuaca niishitioquiaa maja nojori miiniuria tari tariucuaaanu Moisés niishitiojosano. Quiaanaari niishitiojoquiaajuhua maja nojori necohua cararaatiuuquia co nojori miatejonura, taa pa supuetanaa niishitiojosaaquiaaricuaani. <sup>22</sup> Naacuajitij, pueya jaara niishiri quiaa tari niya tiuquiriohua, nojoriiri quia rerejotanutaniya ritia. ¿Taa pa miyarini? <sup>23</sup> Canaari naa niishiriojijani, naa quia miiri juhuari. Niya quiyari cuato pueya na naca tuquenuuteriquiano, tariija na sequetusano Pueyaso na tohuateenura. <sup>24</sup> Nojori quia jiyataare Pueyaso Secojoua tiajinia. Niocua nia cuaqueya jequejosee taa pa supuetanaa sequequiaaricujani. Naajuhua, quiocua nojoriria cumaneece niq-uitiore nojori naca riuujishaanura. Quiaa jaara naa miiritij, puetunu pueyajaari niishiniutianiya majaqui seetanujanaa quiquianu pueya sequesano quiajanijajiniji. Niishitiniutianiyajaariuhua, quiaaqui tariucuaaanu Moisés niishitiojosano miyajaa. <sup>25</sup> Majaari Jesuucua tiuunio taucuacaacia quia tacaaniu. Canaacuajaari tari nojori nacasuquiaari canaa naajioneejimiani, nojoriicuaa canaa naajiosacari. Canaari nojori sequequiaari cutarani maja tari nojori tojiniuria Moisés niishitiojosano. Canaari nojori sequequiaarijuhua, maja na miaquenuunura shipinishano pueyasohuacuara puecoosano casaa, naajuhua, maja na miaquenuunura nanaca. Canaari nojori sequequiaarijuhua maja na miaquenuunura shu na nanacataja, naajuhua, maja na numuetucunura na

camishoo maaji. Puetunu pa supuetanaa rootasanojinijijianaani, saa niojuuari taucuaa tojishocoriqiano rootasano.

*Na cojiniata Pablo quioosacari Pueyaso Secojojua tiajinia*

<sup>26</sup> Pabloori narta Pueyaso pueya sequesano tojiquiaari jaarajaaja. Naaratej, nojujaari cuno cuatro pueya jiyataquiaari tariqui. Nojoritia jeequejoquiaari na cuaqueyari taa Moisés niishitiojoquiaaricujani. Naa na miiniu nuhuajitij, Pueyaso Secojojua tiajinia tiuquitiaquiaariiri pueyacuara secojonaacua. Na sequetuquiaariiri casaa juuca na tucaatunutaniya na cuaqueya na jeequejonuununi, naajuhuj, casaa juuca nojori panutaniya Pueyasora na niqutiosocoriqianoni.

<sup>27</sup> Quera nojori tucuatascari puetunu cuno semaana juucajanaa, Asia jiyajinijinio narta Judiocuacaari Pablo niqiuquiaari Pueyaso Secojojua tiajinia. Nojoriiri puetunu pueyajanaa nasajoquiaari ritia. Jiyacari Pablo quiatureeri. <sup>28</sup> Na quiatusacari Pablo, pueya na jiiquioonuutareeri:

—¡Israel pueyanaa, miji! ¡Canaa nia naacuseeja! Nioori noo pueyanocuaa tiqiyocua na rucuanesaqui pueya niishitiojoquiaa sacuaraatia pocuaratej, nio Pueyaso Secojojua tiaacuaraajuhuj. Naajuhuj, tariucuaaano Moisés Rootasano sesacatequiaa pueyajaariuhuj. ¡Quiarijiani, pa Secojojua tiajinia sacuaraatia tiuquiniatieree taucuaacari!

<sup>29</sup> Cuno Judiocuacaari naa sequetuquiaari Pablotej, Tróximo jiyaniishano pueyanota nojori niqiniuucua nojuaja tarijia na rucanejosacari cuno tiacajiniaja. Tróximoori Jesuucua tiuunia tahue quijia, Éfeso tiacajinijinio pueyano. Naaratej, cuno Judiocuacaari jiyaniquiaari Pablo naasucuaari cuno tahue tiuquinirij Pueyaso Secojojua tiajinia.

<sup>30</sup> Puetunu Jerusalén tiacajinia quiniaa pueyajanaari juaaquioquiaari. Pablocua netecuatuquiaariiri. Na quiatureeri. Pueyaso Secojojua tiacoci na jaatiuquiaari carjiniacumaari. Pueyaso Secojojua tia tohuatayari ritia tionujusaquiaari na nuhuaji. <sup>31</sup> Pueyari tari monu paniriquiaa Pablo. Jiyacaritij, tii Jerusalén tiacajinia quijia Romano soldadohua comandanteeri numotesaaquiaari: “¡Judiocuaa na juaaniutia nacoya!” Cuno comandanteni, nojujaari soldadohua capitánucua jiyaniijia. <sup>32</sup> Jiyacaritij, comandanteeri na soldadohua rerejotequiaari ritia, na capitánucuanio. Tee pueya nacooriguiaani, nocua netecuatuquiaariiri. Judiocuaa jaara niqiuquiaari comandante na soldadohua neretaano nojoriicua, jiyacari shusha cartetuquiaari Pablo piqutiuniuuri. <sup>33</sup> Comandante tiuquishacari nojoriicua, Pablo quiaseejanaari. Na soldadohua sequereeri:

—Caapiqui cumayocua casaa nia saatjiore na numatucua cajiniocua.

Comandanteeri na nuhuaji pueya nequesoreeree:

—¿Cante nio pueyanoni? ¿Casaa na miiriini?

<sup>34</sup> Pueyari saaja jiyajeneta nacooriguiaa. Nioori tamaatia nacooriguiaacujua. Tamasacaari socua tamaatia nacooriguiaajanaajataj. Comandanteeri cunora maja na niishiniu quiquiaari casaa Pablo miiriijiarani, puera nojori cojuatunenuucua na nacoosacari. Cunora na soldadohua sequereeri:

—¡Pa quijia tiajinia nia jaatucuyarohua!

<sup>35</sup> Soldadohua tacatasacari tari nojori quijia tia tacatuhuoco Pablo nojori jaatucusacari, Judiocuacaari jiyacari quera na macaaniutia socua shiiniuquitiaquiaari Pablocua, na monu paniniuria juucua. Soldadohuuri nojoriicuai Pablo shiitioquiaari jiyocuaaano. <sup>36</sup> Pueyari soldadohua nuhuaji na cocuatesacari jiiquioonuuriquiaa:

—¡Nia more cuno sesaaca! ¡Nia more!

*Tama nocuaji Pablo tacusacarijiaaja*

<sup>37</sup> Quera soldadohua tiuquinishacari Pablo nojori quijia tiaco, Pabloori soldadohua comandante sequereeri:

—Quenaaja niquiriyatu rupaa sequereera cuno pueya.

Comandanteeri na riucaaree:

—¿Quiaaquiiri Griego rupaa pocuaja? Janiya juucua quia jiyaniriquiaa Egipto jiyajinijinio pueyanoni. <sup>38</sup> ¿Majateeri noo quiajaniya quiquianucuaaja, cariquia jiyajinia jiyatacanu cuatro mil puecoojuaca pueyatej?

<sup>39</sup> Pabloori saaja na sequereeri:

—Janiyari Judio pueyanoni, Tarso tiacajinia rasanotuhuj. Naacuajitij, janiyari Tarso tiacajinijinio pueyanoni, teyano tiacatucuaaja socua panishano tiaca Cilia jiyajiniani. Quenaaja rupaquijia cua tarishitiricuarajaj. Cuno pueya sequenu paniya niquiriyatu rupaa quenaajanijia.

<sup>40</sup> Comandanteeri socua na sequereeri:

—Quia pocuare.

Pabloori jiyacari tacatujiniji nujaquiaari. Na juaashiquia shiitioquiaari pueya na sanaajanuraari. Puetunujuanaa jaara sanaajetaquiaari, nojoriicuara pocuaree tama nojori Hebreo rupaaajiniaari. Naa nojori sequereeri:

## 22

<sup>1</sup>—Cua tapueyocucanaa, cua jiyaniijianucunaa, nia tojtitiare cua sequesano niajaniya tama cua tacusacarijiaaja cucuaji.

<sup>2</sup> Cuno pueya jaara tojiquiaari Pablo pocuasacari nojoriicuara Hebreo rupaaajinia, pueyari maninia sanaajetaquiaarijianaa. Pabloori nojori sequereeri:

<sup>3</sup>—Janiyari Judio pueyanoni. Tarso tiacajinia cua raja, Cilicia jiyajinia. Janiyari nio Jerusalén tiacajinia maashiquiaarini. Gamalielri cua niishitiojona quijia. Jiyanohua rootasaaquiaari pa supuetanaa niishitiojosanonijia. Janiyari pueyaracaanu Pueyaso panishano miiniucua jiaatiaquiaani, taa quiarijia nia miiniu paniyanijia. <sup>4</sup> Janiyari tarijia Jesuucua tiuunuaa pajejani naquiya cua miitiasocoriguano. Janiyari na mooquiaarijuhuaj. Janiyari canuu kojiritiaquiaari quioonu maajipohuatajani, cua nujuatejosocoriguano nujuatejojuajinia. <sup>5</sup> Pueyacuara secojonaa camarnuuri cua miijosano niishiyajuhua, puetunu pa jiyaniijianucujanaano. Nojoricuajaari cua niqutioquiaari nojori naajione Damasco tiacajinia quiniaa parta Judiocuacaacuara. Janiyari juucua quiariquiaa Jesuucua tiuunuaa pueya cua pajenura Damasco tiacajiniani. Quera cua quioosano cua nitiamohua niya Jerusalén tiacajiniani, saniitiojosocoriguano.

*Pablo pohuatasacari Jesuucua na tiuuniujiniji*

<sup>6</sup> Janiyari juucua nucucuo quiariquiaani. Quera cua tiuquishacari Damasco tiacajinia, panacariiri quiriquiaa. Canashiyaquiji jiyanohua shacantuuca juhua miacanaari cua nunuquiaari. <sup>7</sup> Janiyari juhua jatasaareeni. Jiyacaritij, janiyari rupaa tojiri na sequyanoni: “Saulo, Saulonaa, ¿casaara quia miitiaa puera janiyani?” <sup>8</sup> Janiyari na nequesotareeni: “¿Cantequia Jiyaniijianaa?” Cua sequereeri: “Janiyacuajaari Jesuni, Nazaret tiacajinijinio pueyano. Cunocuajaari quiaa na miitiaani”. <sup>9</sup> Cua cojiniaa pueyari cuno shacantuuca na niquishacari shiriqitituaquiaari. Majaari na tojtitiuni quiquiaari cutara jiyocuaaanuji rupaa cucua pocuaano. <sup>10</sup> Janiyari socua na sequereeni: “¿Casaa cua miyarini Jiyaniijianaa?” Jiyaniijaari cua sequereeni: “Quia sanerohua. Naajaa quia quiaare Damasco tiacajinia. Quiaari tii sequesaanutaniya puetunu cua panishanojuanaa quia miiniuria”. <sup>11</sup> Cuno shacantuuca cua nunuquiaari jiyocuaaanujini, cua namijia sesoquiaari. Janiyari cariyouaru quiriquiaani. Naacuajitij, cua cojiniaari cua jaatucutuquiaari. Naa cua tiuquiatusee Damasco tiacajiniaari.

<sup>12</sup> Tamonu pueyanoori cuniqui quijia, parta Judio pueyano. Na sesaari Ananías quijia. Nojuajaari seetanujuanaa tariucuaaanu Moisés niishitiojosano tojijia cutara. Puetunu Damasco tiacajinia quiniaa Judiocuacaari na panijia. Nojoriiri na sequetujua: “Ananías cutaraari maninia pueyano”. <sup>13</sup> Ananíasri jiyacari cua niqiniucua niquiaari. Jaara tiuquiquiaari cucua, cua sequeereeri: “Cua tarajanu Saulonaa, maninia niqijijara quia quiriouhua”. Jiyacaritij, cua namijiaari ritia jeequequee. Janiyari maninia niqiqui Ananíasri. <sup>14</sup> Cua sequereeri: “Pa supuetanaa Jiyaniija Pueyasocuaajaari quia saquirioquiaari tariucuaaanujiniji, na niishitonura quiajaniya na panishano quia miiniuria. Quia saquirioquiaarijuhuaj quia niqiniuria taquiya pocuajinio sesa miyashijia cutara, tama na camaru rupaaajiniji quia tojiniuria na sequesanojuhuaj. Nojuacuajaari pa Jiyaniija Jesucristo. <sup>15</sup> Quiaari puetunu pueyapue niquiarajanaa pohuatanutaniya nojuajiniji quia niquishano, quia tojishanonio”.

<sup>16</sup> Ananíasri socua cua sequequiaari: “¿Casaara quia tarishiyarini? Quiarijiani, quiaa cuara tiuquinishaaria. Jiyaniija Jesu quia sequere: ‘Cua jiyanoori sesa cua miishanojini’. Nocua quia tiuushacari, quia sesa miishanoori jeequesaanutaniya”.

*Pablo pohuatasano taa Jesu jiyaroquiaari nojuaja taucuaacaacuani*

<sup>17</sup> Janiya jaara riujuuquiaariuhua Jerusalén tiacajiniouhuan, janiyari Pueyaso Secojonujua tiajinia secoriquiaani. <sup>18</sup> Cua secojosacari, janiyari Jesu niqiquiaari juhua cua maquenujiniani. Cua sequereeri: “Ritia quia quiaare niqijiji. Nio pueyari maja na tojtitanu quiniutianiya quiajaniya, nojori quia pohuatasacari janiyajiniji”. <sup>19</sup> Janiyari saaja na sequereeni: “Cua Jiyaniijianaa, nojoricuajaruhua niishiya janiyari quiocua tiuunuaa pueya quioojuani puetunu rerejoju tiajinijianaa cua nujuatejosocoriguano nojori. Janiyari nojori mojujujuhuaj. <sup>20</sup> Naajuhua, quia rupaa pohuata Esteban jaara mosaaquiaaritij, janiyari catecaji saitia na jacusacari shootiaquiaarini. Janiyari na jacunaa toqueya cojuariquiaaaniuhua, nojori mosacari Esteban. Janiyari jaaraja sequequiaarini: ‘Cuara mosaaria’”. <sup>21</sup> Naa cua sequesacaritij, jiyaniijaari saaja cua

sequereeni: “¡Niiquiji quia quiaarejaj! Janiyacuajaari tucuaaanu quia jiyaronutaniya tucuaacaacuaní”.

*Comandante jítiasacari Pablo*

<sup>22</sup> Pueyari sanaa tojitiariquiaa Pablo pahuatasacari. Saniniuujia, Pablo jaara jiyaniquiaaari tucuaa, pueyari jiyacari coteequiaari nacoonu, tucuaa soojeaca nojori quiniuucua:

—¡Cuaara mosaaria cuno pueyano! ¡Majaari maninia jiyano pueyano rishiniuria socuatej! Cuno pueyari naa nacooriguiaa.

<sup>23</sup> Na juaaquionuta na nacoosacarijia, na toqueya quejootuquiaari jiyocuacaanuuri quera na macaanitua. Naa quejootuquiaari jiyajuajariuhuj. <sup>24</sup> Comandanteeri na capitáncuaca sequequiaari Pablotini:

—Nío pueyano nía tiuquiniri nía quijia tiajinia. Niocua na saniri majacununoj, cuaara sequeera casaara naa pueya nacoyani.

<sup>25</sup> Soldadohua jaara tari Pablo morojotuquiaari tiacuara na majacutusocoriquiano juucua, Pabloori capitán sequequiaari:

—¿Jiyaniijia César rootasante, naa nequesoreesoojua nía majacunura narta Romano pueyanotej?

<sup>26</sup> Capitán jaara tojiquiaari naa Pablo sequesante, ritia netequiaariiri. Na comandante sequeeeri:

—¡Quiaa cocuaatia miya! ¡Cuno pueyanona Romano!

<sup>27</sup> Comandanteeri ritia Pablocua catecanoquiaari. Na nequesotaseeri:

—¿Seetanutejanaa? ¿Quiaatena Romanotej?

Pabloori na riucaaree:

—Taaquiririni.

<sup>28</sup> Comandanteeri na sequerohuacuuhuj:

—Romano pueyano cua quiniuria, janiyari queraatia cua cumaneeca niqutioquiaarini. Pabloori saaja na sequeere:

—Janiyari Romano cutarani, nojori tiacajinia cua rasaanuucua.

<sup>29</sup> Cuno pojori, Pablo majacunura seeratasaaquiaari juucuaní, naa nojori tojitiacacarij, Pablo shuriucuaa ritia shiriqutiaquiaariiri. Comandante niishishacari Pablo seetanujuaana Romano quiquiaari, puererejaariuhuj, Pablo na morojotenuucua.

*Tama nocuaji Pablo tucacacarijiaa Judiocuaca jiyaniijianucua niquiara*

<sup>30</sup> Tariqui saniniuujia, comandanteeri maninia niishiniu paniquiaari casaara Judiocuaca nacoortariquiaacuaa naa Pabloni. Naaratej, comandanteeri Judiocuacaacuara secojona jiyaniijianucua rerejotequiaari. Puetunu Judiocuaca camarucua nacasunaa maanujanaa rerejotequiaariiaariuhuj. Nojoricuajaari Sanedrín maanu. Jiyacari Pablo numatucuaajini rupaaretaquiaari cumayocua saatijiotasanoori. Puetunu nojorijianaa jaara tari rerejoquiaari, jiyacari Pablo tohuatequiaariiri. Nojori taccoji na nujuatereeri.

## 23

<sup>1</sup> Pabloori juhuacatecara pahuatanu coteequiaari camarucua niquiara. Nojori sequeereeri:

—Cua tapueyocuaanaa, janiyari pueyaracaanu juhuajaniya quiquiaani, Pueyaso tojijia cua quishacari pueyaracaanu.

<sup>2</sup> Naa Pablo sequesacarij, pueyacuara secojona jiyaniijiajanaari juarii. Ananías na sesa. Nojuajaari Pablo jiyaniquiaari najuhuaa pocuaa naasucua. Nocuaji, Ananíasri Pablo shuriucua nujuatunaa sequequiaari ritia:

—¡Na rupaajinia nía piri naa pocuaaniquitij!

Pablo shuriucua nujuanaari jaarajaaja na piqui. <sup>3</sup> Majaari Pablo niishiniu quiquiaari casaate Ananías quiquiaarini. Naacuajitij, Pabloori juhuajaniya Ananías sequequiaari:

—¡Pueyasoori saniniuujia cucua quia naminiutianiyacujua, Moisés Rootasano tojiyashijiana! Nía jiyaniyacari janiyari Moisés Rootasano tojiyashijiani, niari coteenu cua nequesoreya maninia taa Moisés rootaquiaaricujani. ¡Quiaa sajara Moisés Rootasano tojiyashijia cutara, quia sequesacari cua pishaanura nía nequesoreyaquishacarijia maninia janiya!

<sup>4</sup> Pablo shuriucua nujuatunaaari Pablo sequequiaari:

—¿Quiaateeri saa rerequeteyajaa pueyacuara secojona jiyaniijiaruhua?

<sup>5</sup> Pabloori nojori riucaaree:

—Cua tapueyocuaanaa, cua jiyanoori. Paacuajaari naa rootasaaquiaari Moisés nequesoreetuneejiniani:

“Majaari sacuaatia rimiaaquenu nía camarnuucuaa”.

Cua pueyanaa, maja cutaraari cua niishiniu quiriquiaa nojuajate pueyacuara secojonaa jiyaniijia.

<sup>6</sup> Pabloori niishiquii cuno Judiocuaca camarucua nacasunaa cuniqui quiriquiaani, noojiaqueya nojorijinijinioori Saduceocuaca maanujiniji quiriquiaa. Tamasacaari sanini-  
uujia narta Fariseocuaca maanujiniji quiriquiaacuua. Naaratej, Pabloori jiyanoohua na  
rupaa paaretaquiaari naa na sequenura nojori:

—¡Cua tapueyocacanaa, janiyari Fariseo pueyanoni! Cua shipininioori Fariseo pueyano  
quiquiaarijihuuj. Canaari Pueyaso Rupaacua tiuujiacani. Naacuajitij canaari niishiyani  
Pueyasoori macunucua samiitianijionutaniuhua taa puetunu cuarta Fariseocuaca niya  
quiniaa tiuyanijia. ¡Niaaquiri jiyamitia cua nequesoreya!

<sup>7</sup> Pablo jaara naa sequequiaariti, Fariseocuacaari Saduceocuacata juhuacatecara juay-  
onuutaquiaari tama nojorijiaaja. Naacuajitij, nojoriiri caapiqui maapuera raqutiiquiaari.

<sup>8</sup> Saduceocuacaari jiyaniya maja macunucua samiitiaconu quiniutianihua. Nojori-  
iri sequeyajuuj: “Maja Pueyaso seya quiniu”. Pueyapuenari sohuanuujuhuuj.  
Fariseocuaca cutaraari nojori cuaracashitishanoocua tiuya. <sup>9</sup> Naacuajitij, puetunu pueya-  
janaari nacooriquiaa na juayonuutasacari. Jiyacariti, tariucuaaanu Moisés Naajio-  
tasanoiniji niishitiojona pueyari sanetaquiaari. Nojoriiri Fariseocuaca quijiajuhuuj.  
Nojoriiri naa sequetuquiaari Pablojiniji:

—¡Nio pueyanoori maja sesa na miiniu quiquianu! Maninia sohuanu jiyoteeri nocua  
muetacanu, Pueyaso seru soj. Majaari pa niishiniu. ¿Paatucua casaara tenujure Pueyaso  
panishano na miishacari?

<sup>10</sup> Pueyari socua jiyatequiaari nacoonu. Comandanteeri puerequiaari, na jyan-  
ishacari Pablo naasucua socua sureesaanutaniyaquij. Naa jiyaniquiaariiri, puerajanaa  
pueya juaaquiosacari. Nocuaji, comandanteeri ritia na soldadohua jiyaramiquiquiaari,  
na tiajinia nojori tiuquininiuhua Pablo pueya tajiniji. Naa miitiquiaariiri.

<sup>11</sup> Cuno niucujani, jiyaniijia Jesuuri Pabloocua muetaquiaari. Na sequereeri:

—Quiooia quia cumaquiri Pablona. Naatej, taa quia pohuatarucuaa janiyajiniji  
niya Jerusalén tiacajiniacuaani, quiaari naa pohuatanutaniya janiyajiniji Roma tiacajinia  
quiniaajuuj, Césarjanaa niquiarajuuj.

### *Judiocuaca roojotoosacari Pablo na motunura juucua*

<sup>12</sup> Tariqui saniniuujia, noojiaqueya Judiocuacajinijinioori Pabloocuara roojotooquiaari  
na monura. Nojoriiri naa sequetuquiaariti:

—Paa jaara Pablo moyaquirini, pocua miaqueyaquirini, pocua ratuyaquirinjianiuhuj.

<sup>13</sup> Nojoriiri cuarenta canu quiquiaari, naa sequetuquiaarini. <sup>14</sup> Na nuhuaji, cuno po-  
joriiri pueyacuara secojonaa jiyaniijianucuaacua quiaquiaari, Sanedrín maanuucuanio.  
Nojoriiri naa sequetuquiaari:

—Majaari canaa miaquenu quiniutianiya quenaaja casaa, canaa cuaara more Pablo-  
jaatijia. <sup>15</sup> Niajaniya, pueyacuara secojonaa jiyaniijianucuaanaa, puetunu Sanedrín maanu-  
juanaano, nia sequere comandante cuaara nitiaara tariqui Pablo niaacua. Niocua naa na  
sequerenoj: “Miji Pablo quia nitiaare. Canaari socua maninia na nequesoreenu paniani”.  
Canaacua jiyacari niaacua na tiuquiyaquishacarijia nuu cajiniocua na moreni.

<sup>16</sup> Tamonu pueyanoori Pablo raaquia caminiujuquiaari naa cuno pojori sequesano  
camarucatej. Pablo raaquiaari nocuaji ritia soldadohua quijia tiajinia quiaquiaari na  
cama Pablo na pohuatanura. <sup>17</sup> Jaara tari na pohuataquiaari, Pabloori jiyacari cuniqui  
cojuanaajinijinio capitán piiquiaari. Na sequereeri:

—Nio caya samijia quia jiyataare comandanteecua. Nojuajaari comandante numootenu  
paniya.

<sup>18</sup> Jiyacariti, capitánri Pablo raaquia jiyataquiaari. Na tiuquishacari, comandante  
sequequiaariiri:

—Pa quiasano Pabloori cua piiriini. Cua sequereeri cua nitianura quiocua nio caya  
samijia. Nojuajanaari casaa quia sequenu paniya.

<sup>19</sup> Jiyacariti, comandanteeri caya samijia numatujiniji quiaquiaari. Tamocora na  
jaatucureeri. Tii na nequesotaseeri:

—¿Casaa quia sequenu paniya janiyani?

<sup>20</sup> Caya samijiaari na sequereeri:

—Noojiaqueya Judiocuacajinijinioori Pabloocuara roojotoorucua. Quiaari sapojonu se-  
quesaanutaniya tariqui quia jiyatanura Pablo, puetunu Sanedrín maanujanaa niquiara  
nequesoreesocoriquiano. <sup>21</sup> Quiaa jaara sequesaa, majaari nojori tojinuu. Cuarenta  
canuuri tari nuu cajiniocua nocuaji jamaatiuya. Cuno pojoriniaari maja na miaquenuunu  
quiniutianiya, majanaari na raruunu quiniutianiyajuuj, cuaara moture Pablojaatijia.

<sup>22</sup> Comandanteeri caya samijia sequequiaari:

—Maniniacuaaja. Majaari tamasaca pohuatanu quia sequesano janiya. Tariucuaaja. Quia quiaarohua.

*Soldadohua jiyatasacari Pablo camarnu Félix*

<sup>23</sup> Comandanteeri caapiqui capitán piiquiaari. Nojori sequereeri na numootejonura dosciento soldadohua, Cesareya tiacajinia quiojoriqiano cuno niucuaaja. Mariyata cuaara quiojora setenta soldadohua caballohua nijinia cajitiuiacajuhuaaj, socua dosciento soldadohua saa cashiriacajanio. <sup>24</sup> Comandanteeri na capitáncuaca sequequiaarijuhuaj, nojori nojotanura cajitiucua tamasaca caballohua nijinia Pablo cajjiara. Nojori sequequiaarijuhuaj:

—Niocua maninia cojuare Pablo, cuaara tiuquiria camarnu Félix nequesoreesoriquiano.

<sup>25</sup> Comandanteeri na naajionee niqutioquiaari Pablo jiyatanaa. Naa naajiosanoori quiquiaari camarnu Félix:

<sup>26</sup> “Camarnu Félixnaa. Nio Claudio Lisias naajionee. ¿Taa quia quiyani cua panishano camarnunaa? <sup>27</sup> Cua jiyarotanaso pueyanonijini quia pohuatareeraj. Na sesa Pablo. Narta Judiocuacaari na motunu paniqianu. Janiyari jiyacari cua soldadohuata nocua tiuquishii namitiani. Janiya jaara niishiquianuni nojuaja Romano pueyano, janiyari cua soldadohua sequereeni: ‘Judiocuacaacuaaji nia quiare ritia cuno pueyano, mariqui na motureeri’. <sup>28</sup> Maninia cua niishiniuria casaara naa pueya nacootariquiaa Pablóni, janiyari puetunu Judiocuaca camarucua nacasunaa rerejotecanuni. Janiyari nojoriicua tohuatecanu Pablóni, nojori nequesoreenura nojuajanaa cua tojishocoriquiano. Janiyajanaa jaara Pablo tojiqianuni, casaara pueya monu paniriquiaanoj, janiyari jiyacari shusha niishiriini. <sup>29</sup> Nojoriqiiiri na nacootacanu Pablo tojiyaquiniucua tariucuaaanu tama nojori supuetanaa rootasanojuaja. Cunora na motunu paniriquiaari. Janiyari quia sequeyani, ¿maatucua cunora mosaareeri? Majaari quenaaja sesa na miini quiquianu, pueyaracaanu na njuatesaanura. <sup>30</sup> Janiyari sequesaarucuaajuhuaaj, nojiaqueya Judiocuacajiniionaa na monu panyia. Janiyari jiyamitia quiocua cua soldadohua na jiyarotareeni. Janiyari nocuara saquiriojotanaa sequerucuaajuhuaaj, cuaara quia saquiriojotatuura nocuara cutara. Cunojuanaa quia sequeyanijia cua camarnunaa. Tariucuaaja”.

<sup>31</sup> Soldadohuari naa miiquiaari taa comandante sequequiaari nojoricuajani. Nojoriiri cuno niucuaaja Pablo jiyataquiaari. Antípatris tiacajinia tiuquiiioseeri. <sup>32</sup> Na nihuacata quiojonaa soldadohuari Antípatris tiacajini tariquiiuacaji riujuutiaquiaarihua Jerusalén tiacajinihua. Caballohua nijinia cajitiuniaa soldadohua cutaraari Pablo jiyataquiaari. <sup>33</sup> Pablo jiyatanaa jaara tiuquiiioseequiaari Cesareya tiacajinia, nojoriiri comandante naajionee niqutiosee camarnu Félix. Pablo na niqutiojotanaa saquiriojotanaa serojonu nuhuaji comandante naajionee, Pablo nequesotaquiaariiri:

—¿Tee quia rasaanquiarini?

Pabloori na riucaaree:

—Cilicia jiyajinia rasanonijia.

<sup>35</sup> Camarnuuri na sequeree:

—Janiyacua quia nequesoreeriquiani quiocuara saquiriojotanaa jaara tiuquiiiore.

Jiyacaritij, camarnuuri na soldadohua sequequiaari cuaara maninia cojuatuura Pablo tariucuaaanu jiyaniijia Herodes tiaco. Herodes quishacari jiyaniijia, cuno tiaari nocuaji tiasaaquiaari na quijiaara.

## 24

*Tama Pablo tacusacari nocuajijiaaja camarnu Félix niqiaara*

<sup>1</sup> Pabloori cinco juuca camueequiaari tari Cesareya tiacajinia. Jiyacari tiuquiiioquiaariiri nocuara saquiriojotanuuriqiano pueya. Nojoriiri quiquiaari pueyacuaa secojonaa jiyaniijia Ananías, mariyata seaja Judiocuaca camarucuanio. Nojoritia tiuquiquiaariiri Tértulo jiyaniishano pueyanojuhuaaj. Jiyanhua pocuanu niishijia. Puetunu nio pojori-jianaari camarnu Félix quia tiuquiquiaari Pabloocuaa na saquiriojotanura. <sup>2</sup> Pablo jaara tohuatesaaquiaari nojoriicua, Tértulo juhuacatecara coteequiaari camarnu Félix saquiriojotanu nocuara. Naa sequequiaari camarnu Félix:

—Canaa camarnunaa, quiaari jiyanhua niishijia. Naa niishijia quia quishacaritij, quiaari maninia quia pueya jiiitia. Canaari naacua juhuajaniya quiyani, maninia canaa quia jiiitiasacari. <sup>3</sup> Canaari cunora quia timitiaani camarnunaa, maninia quia jiiitanuucua canaa pueyaracaanu, puetunu canaa jiyajiniajanaa. <sup>4</sup> Maja puera cua tarishitiniu panini quiajaniya. Quenaaja rupaquijia canaa quia tojiricuara. <sup>5</sup> Nio pueyanoori



tariucuaaanu canaa supuetanaa rootasano tamacateya queraatia cuarta Judiocuaca. Nojuajaari tamaatia niishitiojoquiaa tamonu jiyacajinia quiniaa Judiocuacajuhua. Naa sesa na niishitiojonuucua pueyatej, tamasaacari maja tari na rupuenu paniniu narta pueyano. Nio pueyano tojtiajacaari sesojosaaquiaari Nazarenocua tiuuniaa maapue. Nio pueyanocuaajaari cuno pojori jiyaniijia. <sup>6</sup> Juucua Pueyaso juaatiniu paniquianujaariuhua, tahue na tiuquininiu panishacari Pueyaso Secojojua tiajinia. Canaari jiyamitia na quiarucuaani, canaa nequesoreesocoriquiano taa tariucuaaanu canaa supuetanaa rootasaaquiaaricuaajani. <sup>7</sup> Comandante Lisiasri canaa na jaariutiarcuaa saajani. <sup>8</sup> Canaa sequerucuaajaariuhua: “Cante nio pueyanocuaara saquiriojotanu paniyani, cuara quiaara camarnu Félixua”. Naa canaa sequerucuaari. Nio pueyano quia nequesotasure, quia niishiniuria maninia. Seetanujuanaacua, canaari cunora nocuaa quia saquiriojotaani.

<sup>9</sup> Cuniqiu quiniaa Judiocuacaari jaarajaaja sequeturee:

–Taaquiririni, camarnu Félixnaa. Naacuaaquiniatej, taa Tértulo sequeyacuajani.

<sup>10</sup> Camarnuuri na juashiquia shiitioquiaari Pablo pocuanura saniniuuja. Pabloori jiyacari coteeree. Naa sequereeri:

–Taaquiririni, pocuashiyacuquiniatej. Camarnunaa, janiyari niishiyani, quiaari tari queraatia marijia shocotejiya cuarta Judiocuaca nequesoreena quia quishacari. Naaratej, janiyari juhuajaniya quia niqiuara tama cucuaji tacunu paniyani, cuarta Judiocuaca saquiriojotasacari cucuara quiajaniya. <sup>11</sup> Janiyari shusha tiuquiriohuacuaa Jerusalén tiacajini, Pueyaso cua seconura Secojonuuja tiajinia. Janiyari shusha camueesuhua doce juucani. Cucuara saquiriojotanaa quia nequesoreesureeraj. <sup>12</sup> Nojoriiri maja quenaaja na riuriatanu quiquianu janiya tamonu pueyanota juayonuutaano. Majaari na riuriatatunu quiquianu janiya pueya ruutaqueyano quenaaja Pueyaso Secojojua tiajinia. Majaari quenaaja nojori riuriatanu quiquianu janiya canaa Secojojua tiajinia juayonuutaano pueyata. Majaari quenaaja naa cua miiniu quiquiaari puetunu tiacajini-ajanaa cua rucuanesacari. <sup>13</sup> Nio pojori cucuara quia saquiriojotaani, nojoriiri maja na naata sequenu seetanujuanaa janiya sesa miijiani. <sup>14</sup> Nojori sequesacari janiyanaari Pueyaso tojjia tamaatia nojoriiniijini, cua tojiniuucua cuno Nazareno pueyano, taaquiririni. Saaja cuno nojori sequesano cutaraari seetanujuanaa. Janiyari Nazareno tojjiani seetanujuanaa cua tiuushacari puetunu Moisés naajiotasanoocujanaa, naajuhua, cua tiuushacari puetunu canaa supuetanaa caminiujiushano Pueyasojiniji naajionuutasanoocujanaano. <sup>15</sup> Janiyari juhua cucuara saquiriojotanaa pueya tiuya Pueyasocua-juhua, taa Pueyaso samiitianijionutaniuhua macunucuanu; maninia miijia, sesa miijiacano. <sup>16</sup> Naaratej, janiyari pueyaracaanu sesa miyaquiniu saniniujuquiaani, maninia cua quiniuria Pueyaso niqiuara, pueya niqiaranio. Naacuaajitij, janiya jaara samiitiarohuani, majaari cua macuhuaajenu quiniutianiya.

<sup>17</sup> Queraatia marijia cua shocotejonu nuhuaji cua rucuanesacari tamonu jiyacajinia, janiyari shusha tiuquiriohuacuaa cua jiyajini. Tamonu jiyacajiniji Jesuucua tiuuniaa niqitiojosano cumaneeca tiuquitiarohuacuaanijia. Janiyari na tiuquitiarohuani na jatanuhuaa Jerusalén tiacajinia, Jesuucua tiuuniaa casamiijuniucua niqitiojosocoriquiano, mariyata cua jiitiasanojiniji cua niqitiohuara Pueyasori. <sup>18</sup> Naa cua miiniu nuhuaji Pueyaso Secojojua tiajiniatej, Asia jiyajiniijinio Judiocuacaari cua naacutucanu tohuataano juucua Pueyaso Secojojua tiajiniji. Janiyari juucua tohuatariquiohuani cua cuaqueya cua jeequenu nuhuaji, taa canaa supuetanaa niishitiojosaaquiaaricuaajani. Cuno juuca, majaari queraatia pueya quiniu quiriqiaa Pueyaso Secojonuuja. Majaari quenaaja pueyata cua juayonuutunu quiriqiaajuhua. <sup>19</sup> ¿Teete cuno pojoricuarani? Mariqui niya nimiacuara cucuara na saquiriojotanuunura, janiya jaara sesa miiquianuni. <sup>20</sup> Cucuara saquiriojotanaa jaara nijyaquimia, naajaa, nio pojori niya quiyani, nojoriiri Judiocuaca camarucua nacasunaa nequesoreesacari janiya tii quitiuquianu jiyacarijuhua. Nojori cuara sequera, ¿cuno camarucuate cua sequencanu janiya sesa miiquianuni? <sup>21</sup> ¿Pueyateeri cucuara saquiriojotaa soj, nio cua sequenuucua Judiocuaca camarucua: “Niaari cua nequesoreya quiarijia, cua niishishacari macunucuaari samiitianijionuutaniuhua”? Janiyacuajaari naa nacacanu camarucua nequesoreesacari janiyani.

<sup>22</sup> Camarnu Félix jaara naa tojiquiaari Pablo sequesantej, nojuajaari pueya sequerucuaari:

–Comandante Lisias cuara tiuquiriajaara, janiyacu Pablo nequesoreeriquiani.

Camarnu Félixri Jesujiniji pohuatasano tari maninia niishiquiaari. Naaratej, nojuajaari Pablocua saquiriojotanaa pueya tarinitiaquiaarijaara. <sup>23</sup> Na nuhuaji, camarnu Félixri soldadohua capitán sequerucuaari:

—Pablo nia tiuquiniriohuaaara. Niocua maninia na cojuarenoj. Na rupuenaa, tapuey-ocucanio, nojori jaara Pabloocua nimiaquia, majaari nocuaji na tenujununoj. Nojori cuaara na niqutiotuura na panishano.

<sup>24</sup>Na nuhuaji, camarnu Félixri tamaqui quiaquiaari camueenujunura. Na nuhuaji, juhua shusha tiuquiquiaariuhua necocutaari. Necocua Drusilaari Judiocuacajinijinio maaji quijia. Camarnu Félixri na soldadohua sequequiaari:

—¡Pablo nia tohuatere! Janiyari cua niquiocuata na tojinu paniyani. Cuaara canaa niquiara pohuataara taate Jesuucua tiuushanojuaarani.

<sup>25</sup>Naacujitij, Pabloori Félix pohuataquiaari nojori niquiara taate pa naata maninia miijara pa quiniuni. Pohuataquiaariuhuj taate pa naata tama pa cuaqueyajaaja pa cojuanu maniniani, sesa pa miyaquiniucujaji. Naajuhaaj, Pabloori na numootequiaari Pueyasoori sesa miijaca saniitionutaniya.

Camarnu Félix jaara naa tojiquiaaritij, jiyanohua shiriiquiaariiri. Pablo sequeereeri:

—¡Tariucujaja! Quia quiaarohuacuarajaara. Janiya jaara jeya quiriqiani, janiyacua quia sequeeraniuhuj.

<sup>26</sup>Camarnu Félixri naa sequeyarucua na soldadohua sequequiaari Pablo na jiyatanura nocua, nata na pocoojonura. Nojujaari juucua jyaniquiaari Pablo naasucuaari cumaneeca na niqutionutaniya na cartesaanura. <sup>27</sup>Pablo shocojoquiaariiri caapiqui marijia, nujuatesano na quishacari Cesareya tiacajinia. Jiyacaritij, Porcio Festoori saniniujia camarnura jiyatesaaquiaari Félix niti. Majaari Félix tohuatenu quiquiaari na nuhuajiria Pablo. Naajaa na tiujiaquiaari nujuatesanoori. Naa miiquiaariiri Judiocuaca timitianura nojuaja.

## 25

### *Pablo pohuatasacari Festo niquiara Jesujiniji*

<sup>1</sup>Jiyacaritij, Festoori tiuquiquiaari Cesareya tiacajinia, Judea jiya camarnu na quiniuria. Jiuujianaraca juuca nuhuaji, Cesareya tiacajiniji quiaquiaari Jerusalén tiacajiniaari.

<sup>2</sup>Jerusalén tiacajinia na quishacari, pueyacuara secojonaajiyaniianucuaari tii Judiocuacajinijinio socua tojishano camarucua Pabloocua saquirojotaquiaari camarnu Festo.

<sup>3</sup>Nojoriiri camarnu Festo sequequiaari cuaara na soldadohua jiyaroora, Pablo na riniuria Jerusalén tiacajiniara. Nojoriiri naa sequequiaari camarnu juucuatej, na motunu panishacari Pablo nucuamaji na nishacari. <sup>4</sup>Camarnu Festoori saaja nojori riucuaquiaari:

—Nujuatesano quia Cesareya tiacajiniacujaruhua. ¿Maatucua casaara niyara rishaareni? Janiyacuajaari nocua tacatanutaniuhuanu.

<sup>5</sup>Camarnuuri nojori sequequiaarijuhuaj:

—Niajanijiniijinio socua tojishano pueya cuaara quiojohuara cuata Cesareya tiacajinia. Nojoriiri na naata Pabloocua saquirojotanu cua niquiara tii, cua niishiniuria maninia, Pablote seetanujuaana sesa miiquianujuara.

<sup>6</sup>Camarnu Festoori camueenujuquiaari Jerusalén tiacajinia ocho juuca, diez juucaruhua. Na nuhuaji, quiaquiaariuhua Cesareya tiacajiniohuari. Na tiuquiniu nuhuaji, saniniujia tariqui cajiquiaari nequesoreesaqui camarnu cajitiujiniaari, camarnu na quishacari. Jiyacari na soldado sequequiaariiri cuaara Pablo tohuateera na nequesoreeso-coriqiano. <sup>7</sup>Judiocuacaari tari tiuquijioquiaari Jerusalén tiacajinijijiuhuaj, Pabloocua na saquirojotanuunura. Pablo jaara nujuatesaaquiaari camarnu tajoji, cuno pojoriiri jaarajaaja catecanoquiaari Pabloocua. Nojoriiri jiyanohua sesa nocuara saquirojotanu- quiaari najuhuaa queraatia casa. <sup>8</sup>Jiyacaritij, Pabloori tama nocuaji na tacusacarijiaaja naa sequequiaari:

—Maja sesa cua miiniu quiquianu. Janiyari tariucuaaanu Moisés Rootasano tojiquiaa- jaaniuhuj. Majaari sesa cua miiniu quiquianu Pueyaso Secojojua tiajuhuaj. Majaari Roma tiacajinia quijia pa jiyaniijia tojiyashijia cua quiniu.

<sup>9</sup>Camarnu Festoori jaarajaaja Judiocuaca panishano miiquiaari, cuno pueya paniniuria nojuaja. Naaratej, Pablo nequesotaquiaariiri:

—¿Quiaate Jerusalén tiacajinia quianu paniya, tii cua nequesoreenura quiajanija?

<sup>10</sup>Pabloori na riucuaquiaari:

—¿Majateeri Roma tiacajiniji pa jiyaniijijajanaa quia jiyatecanu niya camarnura quia quiniuriacuaja? ¿Casaara niyaja quia nequesoreyacuia janiyarini? Roma tiacajinia quijia pa jiyaniijiacuajaari niya camarnura quia jiyatecanu. Quiaacuajaari niishiyajuhaaj, majaari sesa cua miiniu quiquianu Judiocuaca. <sup>11</sup>Janiya jaara sesa miiri seetanujua- naani, cuaara cua motuuraqui. Cucuara cuno pojori saquirojotasano jaara coriaa quiri, majaari quenaaja tamonu pueyano naata niqutionu janiya cua mosaanura. ¿Janiyatucua

casaara mosaare najuhanani? Naaratej, janiyari quia sequeyani camarnunaa: jiyaniijia Césarjanaa cuuara cua nequesoreeraqui.

<sup>12</sup> Camarnu Festo pocoojonu nuhuaji na nacasunaata, Pablo sequequiaariiri:

—Quiaacuajaari cua sequeree cua jiyaronura quiajaniya pa jiyaniijia Césarjua, nojuajanaa nequesoreenura quiajaniya. Janiyari nocua quia jiyaronutaniya cua soldadohutatani.

*Jiyaniijia Herodes Agripa niqiara Pablo pohuatasacari Jesujiniji*

<sup>13</sup> Naa Pablo sequesaanu nuhuajitij, pasaja camueenujuquiaariiri. Jiyacari jiyaniijia Agripaari Cesareya tiacajinia tiuquiquiaari Festoocua, na saruhuatanura nojuaja. Agripaari tiuquiquiaari na rimiatu Bereniceta. <sup>14</sup> Nojori camueenujusacari camarnu Festo tiajinia, Festoori socua jiyaniijia Agripa pohuataquiaari Pablojiniji. Na sequequiaariiri:

—Tamonu pueyanoori niya quia, Félix tiujiasano nujuatesano. <sup>15</sup> Jerusalén tiacajinia cua quishacari, Judiocuacuara secोजनाa jiyaniijianucuaari nocuara cua saquirojotacanu, Judiocuaca camarucuata. Nojoriiri cua sequetucanu Pablo cua motenura. <sup>16</sup> Janiyari saaja nojori riuucuanuni: “Roma tiacajiniji jiyaniijiaari maja ritia na monu pueyano. Nocuara saquirojotanaa cuara nijjoma niya nocuara saquirojotanunura-jaatijia. Monu panishano cuara rihuaneera tamajaaja quenaaja nocuaji, jaara seetanujuanaa quiaquiri nocuara saquirojotasano”. <sup>17</sup> Naacuajitij, Jerusalén tiacajinijinio pueya nocuara saquirojotanuuriquiano jaara cucua tiuquijiocanu, majaari socua cua tarishiniu quiqianu. Janiyari tariquicuaji nequesoreeja cajitujinia cajiquianuni, pueya camarnu cua quishacari. Janiyari jiyacari cua soldadohua sequereeni nojori jaatucunura cucua cuno pueyano. <sup>18</sup> Cuno pojori Pabloocua saquirojotanuucanuni, nojoriiri maja quenaaja na saquirojotanuuni quiuucuaa juhua cua niishiriojosano. <sup>19</sup> Saaja tamaatia nocuara cua saquirojotanuureeri. Pablonaari nojori supuetanaa Pueyasojiniji rootasano tamacaquiaa saaja. Cua sequetureejaariuhuj, Jesu jiyaniishano pueyanonaari mosaaquiaari. Pablonaari saaja pueya niishitiojiyacujua, cuno Jesu jiyaniishanonaari samitiaciaariuhua. Saminionaari quiari quiyajaa. <sup>20</sup> Naa cua tojihacari nocuara pueya saquirojotasotej, majaari cua niishiniu quiqianu taa cua miiniutianiyani. Janiyari cunora Pablo nequesotarucuaani: “¿Quiaate Jerusalén tiacajinia quianu paniya, tii cua nequesoreenura socua quiajaniya?” <sup>21</sup> Nojuajaari saaja cua sequecanu: “Jiyaniijia César Augustojuanaa cuara cua nequesoreera juhuari”. Janiyari cunora niyaja nujuatesano na jiiitaani, janiya cuara na jiyarore jiyaniijia César Augustoocuaajaatijia.

<sup>22</sup> Jiyaniijia Agripaari camarnu Festo sequequiaari:

—Janiyari cuno pueyano tojinii panijajaacuhuj.

Festoori na riucaquiaari:

—Quiaacuajaari tariqui na tojiniutianiya.

<sup>23</sup> Tariqui, jiyaniijia Herodes Agripaari niqiaariuhua Bereniceta. Nojoriiri tiuquiti-aciaari nequesoreeja sohuacajinia, shanohua jacaria na rucuanenuta, shanohua na toqueya maniniuquiyatajuhuaj. Puereeta niqishano. Nojori tiuquitiacacari, nojori coji-quiaariiri soldadohua camarucua, mariyata tama cuno tiacajinijinio camarucuaajaanio. Camarnu Festoori jiyacari na soldadohua seerataquiaari Pablo na rinuria, nojori tacoji na nujuatesocoriguano. <sup>24</sup> Pablo tiuquishacari, Festoori sequequiaari:

—Jiyaniijia Agripanaa, puetunu niya canaata rerejono pueyajanaanaa, cua tojitiare. Cuno pueyano niaa na niqiyani, queraatia Judiocuacuari nocuara cua saquirojotanu- quiaa, Jerusalén tiacajinia cua quishacari, niya Cesareya tiacajiniajuhuaj. Nojoriiri pueyaracaanu cua taajetequiaa. Cua sequetuquiaari: “Cuno pueyano cuara na jiyaronu- camarnunaa”. <sup>25</sup> Janiyacuajaari tari niishiyani, nio pueyanoori maja sesa na mi- niu quiqianu. Naacuajitij, janiyari niishiriojiyani, ¿pueyanotucua casaara najuhuaana mosaareni? Tama nojuajaari cua sequerucuaani, cua jiyaronura nojuaja pa jiyaniijia César Augustoocua, pa jiyaniijiajanaa nequesoreenura nojuaja. Janiyari cunora na jiyaronu- tianiyani. <sup>26</sup> Saniniuujia majaari cua niishiniu taa cua pohuatanutaniya cua jiyaniijia cua naajiojiniani. Cunora, nio pueyano nitirii niya nia nequesoreesocoriguanonijia, pueyanaa. Janiyari quia panitiaa cutara nojuajanaa quia nequesoreenurani, jiyaniijia Agripanaa. Quia nequesoreere, cua naajionura pa jiyaniijia Augustoocua casaara nio pueyano cua jiyarore nocuani. <sup>27</sup> Majaari cua naata naajaa jiyaronu quiasano pueyano, maninia nequesoreyaquishoojua.

## 26

*Pablo riuhuanesacari jiyaniijia Agripa*

<sup>1</sup> Jiyacaritij, jiyaniijia Agripaari Pablo sequequiaari:

—Quiocuaji quia rihuanereja, jaara seetanujuanaa quiyaquiri quiocuara pueya saquiriojotasano.

Pabloori na juaashi quia sana quiaaari. Naa coteequiaari pocuanuuri:

<sup>2</sup> —Timiyaniija jiyaniija Agripanaa, quia sequesacari cua pocuanura quia niqiaara, tama cua tacunura cucujijiaaja, Judiocuaca saquiriojotasanojiniji cucuara. <sup>3</sup> Quiaari puetunu cuarta Judiocuaca miijiosanojuanaa niishijajuhuj, puetunu canaa nacojotasanajuanaano. Janiyari cunora quia sequeyani, nareja cua tojiri cua pohuatasacari quiajanija.

*Pablo pohuatasacari taa na quiquiaari Jesuucua na tiuyaquishacarijiani*

<sup>4</sup> Puetunu Judiocuacajanaari niishiyajuhuj taa quijia cua quiquiaari cua naatujajiniji nojoritia cua quishacari cua jiyajiniani, Jerusalén tiacajiniano. <sup>5</sup> Cuno Judiocuaca quia nequesotasureeraj. Nojori cuara quia pohuataara jaara paniri pohuatanu. Cua mashajajiniji, janiyari seetanujuanaa Fariseo quijiani. Fariseocuacaari puetunu canaa supuetanaa rootasano Pueyasojinijijanaa tojtiaja cutara, socua tamasaca cuarta Judiocuacajiniji. <sup>6</sup> Nojorijiaari cucuara saquiriojotacanu cua tiushacari Pueyasooocua, taa na samiitianiionutaniuhua macunucuanu. Pueyasoori nojori samiitianiionutaniuhua taa na sequequiaari tariucuaaanu canaa supuetanaacujani. <sup>7</sup> Quiarijiani, canaa supuetana Israel doce niqiuohuacujinino caneno pueyari naa seetanujuanaa Pueyaso sequesano niqiniuria sashiyajaa. Naaratej, nojoriiri pueyaracaanu Pueyaso secojonuuquiaa, juuca, niucuanio, Pueyaso na tojtiasacari. Naa cua sashishacari Pueyaso sequesanojuhuaj Jiyaniija Agripanaa, nio cuarta Judiocuacaari quiarijia cucuara saquiriojotanuquiaa. <sup>8</sup> Naaateeri jiyaniya Pueyasoori maja na naata macunucua samiitianiionuhua?

*Taa Pablo miitiaquiaari Jesuucua tiuuniaa tarijiani*

<sup>9</sup> Janiyari tarija sequequiaari tamajaajani sesa cua niishiriojosacari Jesujiniji: “Nazaret tiacajinijinio pueyanooocua tiuuniaa pueya paracaariiraj”. <sup>10</sup> Janiyari seetanujuanaa taraatia nojori miitiaquiaari Jerusalén tiacajiniani. Pueyacuara secojona jiyaniijianucuaari cua jiyatequiaari nojori cua miitianura. Naacujitij, janiyari queraatia Jesuucua tiuuniaa riuniujuquiaari nujuatejojuajiniani. Nojori jaara puecoosaaquiarijihuhuj, janiyari jaarajaaja sequequiaarini: “Maniniacuaja, cuara puecoosaria”. <sup>11</sup> Janiyari sequeyarucua naa miitiaquiaari Jesuucua tiuuniaa pueyani, nojori cua pishojonura Jesuucua nojori tiuuniu.

Janiyari naa miiquiaari nojorini puetunu cuarta Judiocuaca rerejoja tiacajiniaqueyajanaa canaa jiyajinia. Janiyari jiyano hua nojori juaajia quiquiaarini. Majaari quenaaja nojori cua niqiniu paniniu quijia. Naa cua miitiasocoriquiano nojoritij, janiyari nojori pajequiaari tucuaaanu tamonu jiyaca tiacajiniani.

*Pablo pohuatasacari taa Jesuucua tiuujara na quiquiaarini*

<sup>12</sup> Naacujitij, janiyari juucua quiariquiaa Damasco tiacajiniani, pueyacuara secojona jiyaniijianucua jiyarosano. Janiyari tirara quiariquiaani cua pajenura socua Jesuucua tiuuniaa pueya cua miitiasocoriquiano. <sup>13</sup> Nucucua cua quiasacari jiyaniija Agripanaa, janiyari jiyocuaaanuji nunusaaquiarini, cuata quiojonaajuhuj. Cuno shacantuucaari socua jiyano hua shacantuuca quiquiaari pananujiniji. Panacariiri jiyacari quiariquiaa. <sup>14</sup> Cuno shacantuuca jaara canaa nunuquiaari, canaari juhua quejoosaaquiarini. Janiyari jiyacari tojiquiaari rupaani. Hebreo rupaajinia cua sequeriquiaari: “¡Saulo, Saulona! ¿Casaara puera quia miitiaa janiyani? Naa quia miishacaritij, quiaari tama quia cuaqueya miitiaajacujua. Juhua juaajia pueyano, na juaashacari saaja mocoshoco patiyashiyari”. <sup>15</sup> Janiyari na sequereeni: “¿Cantequia Jiyaniijianaa?” Cua riucuaerei: “Janiyacuajaari Jesuni, quiaa na miitiaquiaani. <sup>16</sup> Quia sanerohua. Janiyacuajaari quiocua muetareeni puetunu cua panishanojuanaa miijara cua jiyatenura quiajanija, quiarijia janiyajiniji quia niquishano quia pohuatanurajuhuj. Naajuhuj, na nuhuaji janiyari quiocua muetanutaniuhuanu janiyajiniji quia niquishanorano pohuatana quia quiniuria. <sup>17</sup> Cua jiyarosacari quiajanija, janiyari quiarta Judiocuacaacujia quia cojuanutaniyacujani, tamonu jiyacajinijinio taucuaacaacujinino, tiqiyocua quia rucuanesacari janiyajiniji quia poojotasacari. <sup>18</sup> Nojoricua quia jiyaroyaniija, janiyajiniji nojori quia pohuatana, maja juhua nimishituu nojori quiniuria pueyaracaanu. Quia pohuatasacari janiyajiniji nojori, nojori juuujaraa juhua cuhuatasaanutaniya cucua nojori tiushacari. Nojori jaara naa miiri, Sesacaari maja tari nojori jiyaniija na quiniu quiniutianiya. Naa nojori tiushacari cucuatej, Pueyasoori puetunu sesa nojori miishanojuanaa jiyanoonutianiya. Pueyasoori puetunu na saquiriojoso pueyatajanaa nojori rupuetootenutaniya, puetunu Pueyaso jiiitasanojinijijanaa nojori jiiitanurajuhuj”.

*Pablo pohuatasano Jesu tojijara na jatanujiniji*

<sup>19</sup> Naacuaajitij jiyaniijia Agripanaa, janiya jaara naa tojiquiaari sequeshiyano jiyocuaaanujini, majaari cua tarijonu quiquiaarinioj. <sup>20</sup> Janiyari jiyacari juhuacatecara Damasco tiacajinia Pueyaso rupaa Jesujiniji pohuatanu coteequiaarinini, na nuhuaji Jerusalén tiacajinia, mariyata puetunu cuno Judea jiyajiniajaaniano. Maja saaja cuarta Judiocuaca cua pohuatanu quiquiaari Jesujiniji, janiyari taucuaa pohuataquiaarijuhuaj. Nojori nacasuquiaarinijia cuara sesa nojori miishano carteera, Pueyasoocua nojori tacatonuhuaa nojori jiuujia. Janiyari nojori sequequiaarijuhuaj, cuara saaja maninia miijiaa quiiria, na niishishaanura Pueyasoori seetanujuanaa nojori jataniquianu. <sup>21</sup> Naa cua pohuatanuucuatej jiyaniijianaa, cuarta Judiocuacaari cua quiatucanu Pueyaso Secjonuujua tijania. Cua motunu paniquianuuri. <sup>22-23</sup> Naajaa, Pueyaso cumaquishacari janiya, majaari cua tarinitianu quiquiaa puetunu pueyajanaa cua pohuatanu Pueyasinijiji; poonijionuutesano pueya, tojishano pueyanio. Majaari tama cua niishishanojuaja cua pohuatanu quiquiaa. Janiyari pueya niishitiojoquiaani taa tariucuaaanu Pueyaso sequesano caminiujuninaa naajionuutaquiaaricuaajani, naajuahuaj, taa Moisés naajiotasano quiya tariucuaaanu Pueyaso Rupajiniacuajani. Nojori naajionuutasanoori seetanujanaa. Naa sequeyari:

“Pueyaso Jiyarosocoriqianoori naquiya miishaanutaniya. Na cusonu nuhuaji, nojuajaari coteenu samiitariquianohua. Jaara samiitiarohua, nojuajiniji pohuatasanoori puetunu pueyapuejanaa cuhuatanutaniya. Naacuaajitij, nojoriiri niishiniutianiya nojori jaara nocua tiuuri, nojoriiri samiitiaconutaniuahuaj; Judiocuaca, taucacanio”.

*Pablo tiutiniu panishacari jiyaniijia Agripa Jesuucua juucua*

<sup>24</sup> Pablo jaara naa sequequiaari tama nocuaji na tacusacaritij, camarnu Festoori nacaquiaari:

—¿Taa quia miyani Pablona? ¿Quia mueyocuaquui seseree puera quia niishiniucua!

<sup>25</sup> Pabloori na riucuaquiaari saaja:

—Maja cua paatenu, camarnu Festonaa. Cua sequesanoori seetanujuanaa, maja cuarcashiniu. <sup>26</sup> Jiyaniijia Agripaari puetunu cua sequesanojiniji niishiyajuahuaj. Cunora majaari cua puerenu na niquiara pocuanu. Nojuaja naasucuaari tarijia tosaaquiaaricuaaja Jesujiniji, Jesuucua tiuuninaa pueya miishanojinijijuahuaj. Puetunu canaa miishanojuanaari maja jiyasohuaja na miishaanu quiquiaa. <sup>27</sup> Jiyaniijia Agripanaa, ¿quiaate tariucuaaanu Pueyaso sequesano caminiujuninaa naajionuutasanoocua tiuyajuahuaj? Quiaacuajaari nocua tiuya. ¿Naatejaaratej?

<sup>28</sup> Jiyaniijia Agripaari na sequequiaari:

—¿Quiaateeri ritia cua jyatenu paniya Jesuucua tiuuniara?

<sup>29</sup> Pabloori na riucuaquiaari:

—Naajaa, ritia, na nuhuaji soj, taa quia paniyacuajani. Pueyaso maara seetanujuanaa naara quia jyatere taa quia sequeyacuajani; maja saaja quiajaniya, mariyata puetunu pueyajanaa niya cua tojitiaani, juhua janiya nia quiniurajuahuaj. Maja naatej, taa cumayocuata moronucua cua nujuatashuyanijia.

<sup>30</sup> Jiyacaritij, jiyaniijia Agripaari saneeque, camarnu Festojuhuj, Berenicio, puetunu cuniqui nojoritia cajitiuninaa pueyanio. <sup>31</sup> Nojoriiri cuniquiji tamaqui pacutaquiaari jiyareta nojori pocoojonura Pablojiniji. Tama nojoriiri sequetooquiaari:

—Cuno pueyanoqui seetanujuanaa maja sesa na miiniu quiquianu na mosaanura, maja quenaaja na nujuatesaanurajuahuaj.

<sup>32</sup> Jiyaniijia Agripaari camarnu Festo sequequiaari:

—Paa maara cuno pueyano cartereni nojuaja jaara quia sequeyaquiquianu pa jiyaniijiaacua quia jiyaronura nojuaja.

## 27

*Roma tiacajiniara Pablo jiyarosaanujiniji pohuatasano. Nio naajiona Lucasri nata quiriquiaa na cojiriquiano*

<sup>1</sup> Camarucua jaara sequequiaari canaa buquejnia jiyarosaanutaniya Italia jiyajiniani, Pabloori jiyacari narta quiuosano pueyata cojiritiasaaciaari niqutionu soldadohua capitán. Cuno capitán sesaari quiquiaari Julio. Na soldadohua maanuuri sesojosaaciaari “Augusto”. <sup>2</sup> Jiyacaritij, Adramitio tiacajiniji buqueeri quera ruparetariquiaa, Asia jiya tiacajinia shiiniuquitiariquiano. Canaari cuno buquejnia jaaretaquiaarinini. Canaata quiriquiaajariuhua Aristarco. Nojuajaari Macedonia jiyajinia Tesalónica tiacajinijinio pueyano quijia. <sup>3</sup> Canaa quianu nuhuaji Cesareya tiaca tacatajajiniji, canaari tariqui tiuquishiiquiaari Sidón tiaca tacatajajiniani. Capitán Juloori jiyacari cuniqui maninia

miiquiaari Pablo. Nojuajaari Pablo tarinitiaquiaari cuaara tacaara na rupuenaa puey-acua, nojori na saruhuatanura Sidón tiacajinia, naajuhuj, na rupuenaa niqutionura puetunu Pablo panishanojuanaano. <sup>4</sup> Canaa jaara jaaretaquiaari Sidón tiacajinijini, canaari canaa muenecara niqumiaa Chipre jiya tucuaatijani. Paratuuri buque nacaacoji piyarojoriqiaa saaja. <sup>5</sup> Canaari Sidón tiacajiniji niuutiaquiaari Cilicia jiyacuani, Panfilia jiyacuani. Canaari na shuriquiumia jaaretamaani. Canaari Mira tiacajinia tiutiaseeni, Licia jiyajinia.

<sup>6</sup> Capitánri cuniqui riuriataquiaari Alejandría tiacajinijinio buque. Italia jiyajinia quiariquiaari. Naaratej, canaa tacanitiaquiaari cuno buquejinaari, tii canaa quianura saniniuuja. <sup>7</sup> Canaari camueenujuquiaarini, puera jacaria canaa jaaretanuucua. Naa canaa tarishiniuucatej, canaari socua tiuquishiiquiaari Gnido tiaca taquijiriani. Paratuuri saa canaa patariquiaajaa. Naacuajitij, canaari Salmón jiya tucuaatijaniyojua shuri-uucaratamaani. Canaari Creta jiya tucuaatijaa camarucutamaajaniuhuj. <sup>8</sup> Naa puera canaa tarishiniuucua canaa jaaretasacari Creta jiya shuriquiumiatej, canaari socua tiuquishiiquiaari pueya jiyaniquishano “Tacataja Maniniujiniani”. Cunoori Lasea tiaca shuriuucua quiya.

<sup>9</sup> Canaari puera tarishiquiaari tarini. Judiocuaca miaquenuyaquiniu juucaari tari shocoquiaari. Jiyacaritij, shoniniacu caminijainiaari puereeta quijia tari buqueta jaaretanura. Pabloori juucua sequequiaari:

<sup>10</sup> –Camarucuanaa, janiya niishiyani paari cocuaatia miiniutianiyani. Paa jaara socua jaaretaareni, pa buqueeri jiaquetanutaniya socua. Pa pasano casamiiri niitiniutianiya. Paa naasucuaari cusununutanijayuhuj. ¿Casaatejaj pa toyani?

<sup>11</sup> Pablo jaara naa sequejiaaritij, majaari buque jiyatana capitán tojinu quiquiaarinioj. Saaja buque camarujananaa tojiquiaariiri, buque capitánio. <sup>12</sup> Cuno tacatajainijii canaa tii tiuutiariquiaani, majaari maninia quiquiaari shuniya canaa tajitiniuria tii. Nocujaj, puetunu pueyajanaari sequetuquiaari:

–jNiiquiji pa quiaarej! Fenice tiacajinia pa quishii shuniyacuaji.

Cuno Fenice tiaca tacatajaari pananu muetasamaji quiquiaari, cuno Creta jiya tucuaatijaacuaaja.

*Shoniniacu caminijainia paratu piyarojosacari jiyanoehua nojori*

<sup>13</sup> Jiyacaritij, paratuuri jacaria piyarojonu coteequiaari pananu shuucujaj, canaa muenecarajiniji. Naaratej, nojoriiri sequetuquiaari:

–jPa naatacuajajajui niiquiji quianu!

Canaari cuniquiji ruparetaquiaarini. Creta jiya tucuaatijaa shuriquiumia jaaretaareeri. <sup>14</sup> Na jaaretasacari shiitianiyojua, paratuuri canashiyaquiji jiyanoehua piyarojoriaari buque. Cuno paratu sesaari quijia “Noreste”. <sup>15</sup> Paratuuri buque capotariquiaa na shuucujajia saaja. Naaratej, majaari canaa naata jaaretanu quiriquiaa paratu piyarojosacaji. Paratuuri saa canaa patariquiaajaa. Nocujaj, canaari buque tarinitiaquiaarini paratu cuaara na capotara tamajaja. <sup>16</sup> Paratuuri canaa capotaquiaari tamonu jiya tucuaatijaa tamajiria. Cuno jiya tucuaatijaa sesaari quiquiaari Cauda. Majaari puera paratu piyarojonu quiriquiaa tii. Canaa rishano boteniyojuaari buque pajamaji jaasutariquiaa. Canaari jiyanoehua poonijioquiaari cuniquini, canaa tacaniniuhuaa buque cacojiria cuno boteniyojua. <sup>17</sup> Bote tacanishaanu nuhuaji, canaari buque cuaqueya morojoquiaarini na cumaquiniuria na jiaqueyaquiniuucujaj. Pueyari na puerenuta sequetuquiaari:

–jParatuuri pa capotanutaninya jaaquijainiara! jPaari tii riitianutanianiyani!

Cuno canaa pueresano jaaquiani, na sesa quiquiaari Sirte. Nocujaj, nojoriiri buque toqueya roshinitiaquiaari. Paratuuri saaja capotaquiaari buque. <sup>18</sup> Jaara juhuaquequiaari, paratuuri saaja jiyanoehua piyarojoriqiaajaa. Naaratej, nojoriiri buque pasano casami quejooonu coteequiaari moojinia. <sup>19</sup> Canaa camueenujusacari jiuujianaraca juuca naquiya canaa miishacari, canaari buque casamijanaa quejooquiaari socuani, buque namuenura quenaaja. <sup>20</sup> Tari canaa shocojoquiaariiri queraatia juuca. Majaari quenaaja canaa niqiniu quiquiaari pananu, riyanio. Paratu piyarojosacari canaacua, mohuacaari socua jiyanoehua cajiniuucuaquiaari canaacua. Nocujaj, canaari niishiriojoriqiaani canaari quiarijia cusununutanianiyani.

<sup>21</sup> Majaari tojeteruucujanaa quenaaja canaa miaquenu quiquiaari pueyaracaanu. Pabloori jiyacari nujaquiaari canaata quiniaa tajiniji. Naa nojori sequequiaariiri:

–Camarucuanaa, niaa jaara tojiquianu quenaaja cua sequesano, maja pa ruparetanura Creta jiya tucuaatijainijii, paatuma naa miya naquiyani. <sup>22</sup> Naajaa, nioojia nia cumaquiri. Maja quenaaja niqiriyatu pajaniyajinijinio cusonu quiniutianiya. Pa buque cutaraari juhua rapitiasaanutaninya puetunujuanaa. <sup>23</sup> Janiyari quiarijia cua maquenujinia cua

Jiyaniijia Pueyaso seru niquirii cua shuriucua nujuaanoni. Janiyari cuno Pueyaso toji-jiani. Janiyacuajaari na pueyanoni. <sup>24</sup> Pueyaso seruuri cua sequeree: “Majaari puerenu Pablonaa. Quiaacuajaari jiyaniijijanaa Augustoocua tiuquiniutianiya Roma tiacajinia. Quiaari na tajoji nujanutianiya quia pocuanura. Naajuhua, Pueyasoori quia secojosano tojiirucuaa. Naaratej, puetunu quiata quiniaajanaari quiata rishiniutianiyajuhua”.

<sup>25</sup> Naacuajitij camarucuaana, niooijia nia cumaquiri. Janiyacuajaari seetanujuaana niishiyani, naa quiniutianiyari taa Pueyaso seru sequeree janiyacuaajani. <sup>26</sup> Naajaa, paari tamonu jiya tucuaatiajaacua juhua niojosaanutaniyani.

Pabloori naa canaa cumanijiaquiaari.

<sup>27</sup> Pueyaracaanu canaa jaaretasacari shoniniacu caminiajinia, caapiqui semaanaari tari canaa shocoquiaari. Tamonu niucua canaa jaaretasacari, canaari Adriaajinia quiriquiaa tarini. Pueyari cuno shoniniacu caminia jiuujiajinia sesojoquiaari Adria. Paratuuri canaa niyacuneetariquiaa jiyareta. Jaara shiyaqueya quiriquiaa cuno niucua, buque jiniacuma poonijionaari niishiquiaari canaari tari jiyacua catecanoyani. <sup>28</sup> Buque jiniacuma poonijionaari jiya shanacuquiaari, na niishiniuria queroniti quiriquiaajaa. Na shanacutusacari, saaja treinta y seis metro queroni quiriquiaari. Jaara socua na tajoji shanacutuquiaariuhua, saaja veintisiete metro queroni quiriquiaari. <sup>29</sup> Nojoriiri puerequiaari buque naasucuaari shoniniacu caminia casaqueyaji pojotujua saicua cutanutaniya. Nocua, buque pajamaji sohuaneyocuata morojotasano cuatro niajaaca casaa quejootuquiaariiri, buque nujuatanura pootia. Nojoriiri cuniquijia na puerenuta sashiquiaari cuara juhuaqueera. <sup>30</sup> Jiyacaritij, buquejinia poonijionaa pueyari juucua cuno niucuaaja jiyasohuaa mashiyocuatunu paniriquiaa buquejiniji. Naaratej, nojoriiri buque nacaacoji sapojonu tinijiotariquiaa niajaaca casaa moojinia. Jiyasohuaa roshini-tiuriquiaa jiyocuaacaanu tacanishano boteeri, tii na mashiyocuatunura. <sup>31</sup> Pabloori jiyacari na jiyatana capitán toquiaari, na soldadohuanio. Naa nojori sequequiaariiri:

—Cuno nojori jaara niaa juhuaqueyaquimia pata, niaari cusonuuriquiano.

<sup>32</sup> Soldadohuari ritia jiyocuaacaanu tunusano bote neyocua jiyatajotaquiaari. Moojinia na tinitiuiri. Paratuuri na piyarojoquiaari tamoco nojorijiniiji.

<sup>33</sup> Juhuaquenu panishacari, Pabloori puetunu buquejinia quiniaajanaa sequequiaari cuara quenaaja miaquenuura. Naa nojori sequequiaariiri:

—Tari nia shocojiyari catorce juuca pueyaracaanu nia sutesacari. Majaari nia miaquenu quiquiaajuhua. <sup>34</sup> Quiarijia nia miaquerecuara, nia cuaqueya nia cumaquitajara quenaaja. Majaari quenaaja niquiriyatu niajanijianijiniio cusonu quiniutianiya quiarijia.

<sup>35</sup> Naa na sequenu nuhuajitij, Pabloori pan riquiaari. Na miaqueyaquishacarijia, coteenu Pueyaso secojeree puetunu nata quiniaa niquirarajanaari. Na nuhuaji miaque-rohuari. <sup>36</sup> Tamasaca jaara naa niquiquiaari Pablotej, puetunu nojorijianaari noojia caji-tiquiaari. Pan satureejaariuhua. <sup>37</sup> Cuno buquejinia, puetunu canaajanaari quiquiaarini doscientosenta y seis pueya. <sup>38</sup> Puetunu pueyajanaa jaara tooquioquiaari, na nuhuaji trigo quejootuquiaari moojiniaari, buque namuenura quenaaja.

#### *Buque coquesacari caminiajinia*

<sup>39</sup> Jaara juhuaquequiaari, buquejinia poonijionaa pueyari maja na niishiniu quiquiaari teyano jiya tucuaatiajatejaara cunoni, nojori na niquiriquiaani. Nojoriiri cuno jiya tucuaatiajaacua niquiriquiaari puereetuca surocohua. Jaaquiaari puetunu na shocuajanaa quiriquiaa. Naacuajitij, nojoriiri sequetuquiaari:

—Buque pa saniri shiitianiuniu cuno surocohuama.

<sup>40</sup> Buquejinia poonijionaa pueyari niajaaca sohuaneyocua jiyatajotaquiaari. Cuno niajaacaari caminia jiuujiajinia jateequiaari cuniquijia. Nojoriiri buque niqunijiotetajaa roshiniatiaquiarijuhua, buque tacutajara. Buque nacaacuaji teeja toque tacanitiaturee-jaariuhua. Buqueeri canujutaaree jaaquiajiniara, paratu piyarojosano. <sup>41</sup> Buqueeri saacariji jaaquiajini riitiseequiaari, caminia cajiniuucasacari mohuaca paatishano jaaquiajini. Buque nacaari jiyanohua tiuquishii cumaatia jaaquiajini. Majaari quenaaja na naata pooniu quiriquiaa na matasaquiji. Na pajaari maa rapuequiaarijia moo cajiniuucasacari jiyanohua nocua. <sup>42</sup> Soldadohuari nojori jiyatasano quioosano pueya pucoonu paniquiaari cuniquijia, nojori jiyaniishacari cuaconutaniya naasucua, mashiyocuatumaari. <sup>43</sup> Capitán cutaraari Pablo tiuquitiuniu paniquiaari jiyaniijia Augustoocua. Naaratej, na soldadohua sequequiaariiri:

—¡Maja quioosano pueya pucootunu!

Cuno capitánri puetunu pueyajanaa sequequiaari:

—Cante cuacojua cutarani, nojori cuara cuacoora coteenu, jaaquiajini rupaatiushicu-aari. <sup>44</sup> Cuaashijianucua saniniuuja cuara buque jiniacumaji suruhuatuneeacaaca jacamatuura na cuatajara. Tamasaca cuara buque neecaacua jacamatuurajuhua.

Naa miitiuquiaariiri. Puetunu pueyajanaari jaaquiajinia rupaatiushiiquiaari.

## 28

*Pablo quishacari Malta jiya tucuaatiajajinia*

<sup>1</sup> Puereeta canaa cuaconu nuhuaji shoniniacu caminiajinia, canaari namitia puetunu-juanaa maninia tacataseequiaari cuno jiya tucuaatiajaacuani. Canaari jiyacari shusha niishiquiaarini, cuno jiya tucuaatiaja sesaari quiquiaari Malta. <sup>2</sup> Cuno jiya tucuaatiajaacua quijia tucuaacari maninia canaacua jiyanoquiaari. Shiniquiaari quiriqiaaa. Maruuri niriqiaajuhuj. Naa canaa shiniquiosacaritij, tucuaacari canaara noshitiquiaari puereetuca mani. Na nuhuaji canaa sequetureeri:

—Miji. Nia jitiushi.

<sup>3</sup> Pabloori naanacuaa reratejoriqiaajuhuj. Manijinia na quejooriquiaari. Jiyacaritij, soconuquiri manicuaji mashiriquiaa juucua. Pablo juaashiquia saariiri. <sup>4</sup> Cuno jiya tucuaatiajaacua quijia pueyari soconu niquiquiaari Pablo juaashiquiaacuaji sohuataano. Jaara naa niqutiuiquiaaritij, tama nojorijiaaritia sequetooquiaari:

—¡Nio pueyano naasucuaari pueyano moju! Cocuaatia miiri juucua shoniniacu caminiajinia na cuasacari buquejinijiri. Pueyasoori quiaritia saniniuujia cunora soconu na sajitirii na cusonura.

<sup>5</sup> Pabloori saaja manijinia majiriataree soconu. Majaari quenaaja na sajiyashi noonu quirii. <sup>6</sup> Puetunu pueyajanaari na sashiriquiaa, taacari na porenutaniyani. Na sashituriquiaajariuhuj na jivanitushacari canashiyajuij cusonutaniya naasucua. Naa pueyaracaanu na sashitushacari juucuatej, nojoriiri socua tamaatia niishiriojonuquiaari. Nojoriiri Pablojiniji sequetooquiaari:

—¡Cuno pueyano naasucuaari pueyasojuhuanajaj!

<sup>7</sup> Cuniqii canaa quishaquini, canaari tamonu pueyano cuhuariquia shuriucua quiriqiaani. Na camaruuri cuno Malta jiya tucuaatiaja camarnu quiquiaari. Na sesaari Publio quijia, maninia pueyano. Nojuajaari canaa masuuquiaari na tiacora. Canaa mianuntequiaari maninia tiiri. Canaari jiuujianaraca juuca na tiajinia camueequiaarini. <sup>8</sup> Cuno camarnu queeri jiyacari cusosu matariqiaaa. Jijanohua naseecaari quiriqiaaa. Coriyacau rurequeriquiaajariuhuj, na jiniacuma noonunio. Pabloori nocua tiuquiquiaari na matasaqui. Pueyaso secojoree nocuaraari. Na secojosacari, nocua niaquiaari na juaashiquiaari. Pueyanoori naatarohua. <sup>9</sup> Cuno jiya tucuaatiajaacua cusosuhua jaara niishiquiaari naa Pablo naatanishanocuaa cuno pueyanotej, nojoriiri nijioquiaarijiuuhuj. Pabloori puetunujuanaa na naatanijioquiaari. <sup>10</sup> Naa Pablo miiniucuatej, cuno pueyari na jiiatasano casamijiniji canaa niqutiojoquiaari nareja. Na nuhuaji, canaa jaara quiaquiaari cuniqii tamonu buquejiniani, nojoriiri canaa jiyatajara canaa panishano niqutiojotujuiaari narejajuhuj.

*Pablo tiuquishacari Roma tiacajinia*

<sup>11</sup> Canaa sashishacari shuniya cuara tajiiria, jiuujianaraca racaari canaa shocojouquiaari Malta jiya tucuaatiajaacua canaa quishacari. Alejandria tiacajininio buqueeri tii nujuatariquiaajuhuj. Shuniyacuaij tiutiaquiaari tiquiri. Cuno buque nacatuuri juhua nojori pueyasohua Cástor nacara quejasano quiquiaari, juhua Pólux nacanjo. Canaari cuno buquejinia quiojoquiaari cuniqijini. <sup>12</sup> Canaari Siracusa tiaca tacatajajiniji tiutiseequiaarini. Canaari jiuujianaraca juuca camueenujusee tiini. Siracusa tiacaari Sicilia jiya tucuaatiajaacua. <sup>13</sup> Cuniqii canaa quiasacari, canaari cuno jiya tucuaatiaja shuriucuaataareeni. Canaari Regio tiacajinia tiuquishiini. Tariqui, paratuuri maninia piyajoriquiaa buque nijiniji. Canaari cunora tama tariqui tiuquishii Puteoli tiacajiniani. Canaari quiniqii tacatasee puetunujuanaani. <sup>14</sup> Puteoli tiacajinia Jesuucua tiuuniaa pueyari canaa masuuquiaari na tiajinia. Canaa sequetuiquiaariiri:

—¡Maja canaa shoconu pueyanaa! Canaa tiajini nia camueenujumajaara.

Naaratej, canaari siete juuca nojortia camueenujuquiaarini. Na nuhuaji, canaari cuniqii Roma tiacajiniara neteja nuucaco quiaquiaarini. <sup>15</sup> Roma tiacajininio Jesuucua tiuuniaa pueya jaara niishiquiaari canaa tari nuquamaji niyani, nojoriiri nuucocoi canaa naacunuucua nijioquiaari. Coteenu nijionaari canaa naacuquiaari Foro de Apio tiacajinia. Tamasacaari saniniuujia canaa naacuquiaari Tres Tabernas jiyanishano tiacajinia. Pablo jaara narta Jesuucua tiuuniaa niquiquiaari, nojia cumaquiquiaariiri. Naaratej, Pueyaso sequetuiquiaariiri:

—¡Paacarasho cua Pueyasona!

<sup>16</sup> Canaa jaara tiuquiquiaari Roma tiacajiniani, Pablo jiyatana capitáni puetunu quioosano pueyajanaa niqutioquiaari Roma tiacajinia quioosano cojuanaa camarnu.



Pabloori saniniuuja tarinitiasaaquiaari tamonu tiajinia na quiniuria tamajaaja, tamonu soldadota na cojuariquiano.

*Pablo pahuatasacari Jesujiniji Roma tiacajinia*

<sup>17</sup> Jiuujianaraca juuca na quishacari tari Roma tiacajinia, Pabloori puetunu tii quijiaa narta Judiocuaca camarucujanaa masuuquiaari, nata nojori rerejonura. Cuno pueya jaara rerejoquiaari, Pabloori nojori sequequiaari:

–Cua tapueyocuaanaa, majaari na miiniu quiquiaari sesa parta Judiocuacani. Majaari cua numueejushiniu quiquiaa pa supuetanaa niishitiojosanojuhuaj. Naajaa, pueyari cua quiatucanu Jerusalén tiacajinia. Cua niquitiotucanu Romano pueyari, cua morosaa-nura. <sup>18</sup> Nojori nequesoreenu nuhuaji janiya, cua cartetunu paniquianu juucuaari, nojori niishishacari maja sesa cua miiniu quiquiaari cua mosaanura. <sup>19</sup> Romano camarucua jaara cua cartenu paniquianu, parta Judiocuacaari saaja juaaquioree. Janiyari jiyamitia sequecanuni, cuaara cua jiyarotuura jiyaniijiajanaa niya Roma tiacajiniani, Césarjanaa nequesoreenura janiya. Naajaa, majaari cua saquirojotanu quiniutianiya saniniuuja nojoriucara, cuarta Judiocuaca nojori quiniucua. <sup>20</sup> Janiyari cunora nia niqiniu paniriquiaani, cua pahuatanura niajaninya taa puetunujanaa parta Israel pueya niishiy-acuajani, niajanijahuaj; macunucuaari samiitianijiosaanutanihua. Janiyari cunora cumayocuata moronucua niya quiyani.

<sup>21</sup> Judiocuaca camarucuaari Pablo riucuaquiaari:

–Maja quenaaja canaa masetanu quiquianu Judea jiyajiniji naajionee, canaa pahuatasaanura quiajanijajiniji. Cuniqijinio parta Judiocuacaari niya tiuquijiocanujuhuj. Naajaa, nojoriiri maja quenaaja sesa na pahuatanuunu quiquianu canaa quiajanijajiniji. <sup>22</sup> Canaari saaja niishiyani, puetunu tiqiyocujanaa sesacasaquiaaquiniaari Jesujiniji pahuatasano. Quiaa mariqui cunojiniji canaa pahuatare, canaa niishiniuria socua.

<sup>23</sup> Jiyacaritij, Judiocuacaari Pablo sequetuquiaari:

–Canaacua tamonu juuca quia tojiqiiquiani.

Na nuhuaji, nojoriiri na sequetusanu juuca nijioquiaari. Pablo quijia tiajinia mishitiquiaariiri. Pabloori nojori niquiara pahuatanu coteequiaari tariquicuaji. Naa niniyareejaari. Juucua nojori niishitiojoquiaariiri, Jesuuri seetanujanaa Pueyaso Jiyarosano quiquiaari. Nojori sequequiaarijuhuaj taa Pueyaso jittiaa na jiyanooshano pueyani. Naajuhuj, tariucuaaanu Moisés naajiotasano Jesujiniji niishitiojoquiaariiri, Pueyaso sequesano caminiujuniaa naajionuutasanonio. <sup>24</sup> Noojiaqueya nojorijinijinoori Pablo sequesano tojiquiaari cutara. Tamasacaari saaja na cuaracashitiquiaari saniniuuja. <sup>25</sup> Nojorijinijinio jaara Pablo niishitiojosano tojiquiaari cutara, tamasaari nojoritia juayonuutano coteequiaari. Naa na juayonuutasacaritij, tohuareetaquiaariiri na quiojonuhua. Pabloori jiyacari nojori sequequiaari:

–Pueyaso Sohuanuquiri seetanujanaa tariucuaaanu Pueyaso sequenu panishano caminiujunia Isaiás pahuataniquiaari parta Israel pueya niquiara, jaara na sequequiaari:

<sup>26</sup> “Quia quiaare cuno pueyacu. Quiocua nojori sequesee: ‘Niaari cua rupaa tojiniutianiya. Majaari nia niishiniu quiniutianiya casaa nia tojiyani. Niaari cua cumaacata cua miishano niqiniutianijahuaj. Majaari quenaaja nia niishiniu quiniutianiya’. <sup>27</sup> Cuno pueyari noojia cumantaree maja na tojtianura cua rupaa. Naaratej, saaja sesa tojtiaquiaari. Nojori namijiaari mishiqiojosanojuhuaj, na niq-uitiaaquinuucujaji, maja na numaata na tojtianura, noojiata na niishituyaquini-uriano. Naa jiyatecanu nojorinjia, maja na niishituniuria janiya, mariqui cucua tacateturohuari, nojori cua naarajonura”.

<sup>28</sup> Pueyanaa, nia niishiri. Naa jaara ruuretare cua pahuatasano Jesujiniji, taucuaacari saniniuuja pahuatasaanutaniyacujua, taa Pueyaso jiyanooni panija pueyani, maninia na jitianura nojori. Taucuaacari na tojtianutaniya cutara.

<sup>29</sup> Pablo jaara naa sequequiaari nojoritij, Judiocuacaari quiojiyarohua. Tama nojorijiaarija juayonuutaarohua na quiojosacarihua.

<sup>30</sup> Caapiqui marijaari Pablo shocojoquiaari rupaquijia na masano tiajinia moronucua na quishacari Roma tiacajinia. Puetunu pueyajanaa jaara nocua niquiaari na niqiniuria, nojuajaari maninia na masequiaari na quijia tiajinia. <sup>31</sup> Majaari jiyasohuaja na pahuatanu quijia taa Pueyaso jittiaa na jiyanooshano pueyani. Jiyaniijia Jesujiniji niishitiojojuajaari-uhuj. Majaari na sanaajasaanu quijia.

## **PABLO NAAJIONEE ROMA TIACAJINIA QUINIAA PUEYASO PUEYACUARA**

*Pablo saruhuatascari Pueyaso pueya*

<sup>1</sup> Janiyari Pabloni, Jesucristo seru. Nojuajaari cua saquirojoquiaari saa neraja cua poonijionura. Nojuajaari cua jiyatequiaari na jiyaramiquishano cua quiniuria, seetanu rupaajanaa cua pohuatanura pueya niquiara, Pueyaso pueyara nojori jatanishaanura. Janiyari cunora nio naajioteya niaacuarani.

<sup>2</sup> Pueyasocujaari tariucuaaanu na sequenu panishano caminiujiunaa pueya niishi-tiquiaari, nojori naajiotanura Pueyaso Rupaa, pa niishiniuria taa Neyanu na miiniu-tianiya pocuarani. <sup>3</sup> Pueyano na quiniuria mijiria, Neyanu Jesucristoori rasaanquiaari. Na supuetanaari quiquiaari Israel pueya jiyaniijia David. <sup>4</sup> Jesu sohuanuuri sanini-uujia pueyaracaanu Pueyaso Niyanujuhanajaj. Paa cutaraari quiari naataja niishi-tishaaquiaarini, nojuajaari seetanujanaa Pueyaso Niyanu. Paari quiarjia na niishiya seetanujanaa cutarani, Pueyaso Sohuanu samiitianiniucua nojuaja macujiniji. Nojuajaari tari jiyatesaquiaari Jiyaniijiajanaa na quiniuria, puetunu cumaacajanaa na jitianurajuhujaj. Nojuajaari pa Jiyaniijia Jesucristo.

<sup>5</sup> Nocua canaa tiuuniucua, Pueyasoori canaa jiyatequiaari na jiyaramiquishano pueya canaa quiniuria, Neyanujiniji canaa pohuatanura. Canaa cumaquiriiri puetunu jiyacajinjini pueyajanaa canaa tiutiniuria Neyanuucua, na tojtiajaca nojori quiniuria. <sup>6</sup> Nijaniyajuhujaj, Roma tiacajinia quiniaa Pueyaso pueyanaa, Pueyasoori nia saquirojoquiaari Jesucristo pueya nia quiniurajuhujaj. <sup>7</sup> Puetunu Pueyaso panishano pueyajaana, canapue Pueyaso saquirojoquiaari saa maniniaja nojori quiniuricajani, janiyari niaacuara naajioteyani. Pa Que Pueyaso, pa Jiyaniijia Jesucristojuhujaj, nojori cuara cumaquiriia nijaniya, maninia na tojijia nia quiniuria. Naajuhujaj, nojori cuara nioojiaa cajitiiria shuquiriaatia nia quiniuria pueyaracaanu.

*Pablo naquerejosacari Roma tiacajiniana*

<sup>8</sup> Coteenu nia sequenu panianijia, janiyari nia timitiaquiaani, maninia nijaniyajiiniji pueya pohuatanuucua puetunu jiyacajiniajanaa. Nojoriiri pohuataquiaa, niaanaari maninia tiuujia pa Jiyaniijia Jesucristoocua. Naa Jesucristo miiniuucua nijaniyatej, janiyari cua Pueyaso sequequiaani: "¡Paacarasho! Quiaari jiyanoohua maninia". <sup>9</sup> Janiyari pueyaracaanu cua Pueyasora poonijioquiaani puetunu cua cumaacatajanaa, Neyanujiniji cua pohuatanura. Pueyasocujaari niishiya, pueyaracaanu cua secojosacari nojuaja, janiyari niaacuara secojoquiaajuhujaj. <sup>10</sup> Naa cua secojosacari nojuajatej, janiyari na sequequiaani cuara cua tiuquitiiria niaacua, rupaquijia cua quiniuria niaata, nojuaja jaara naa paniri. <sup>11</sup> Janiyari nia niquiniucua jiaatiaani, cua cumaquiniuria socua nijaniya na Sohuanu cumaacata, socua jiyanoohua Pueyasooocua tiuujia nia quiniuria. <sup>12</sup> Majaari cua cumaquini paniniu saa nijaniyaja. Janiyari paniyani nia cumaquiniuria janiyajuhujaj. Naacaujiti, mariyata pa tiuushacari Jesucristoocua, paari mariyata cumaquitiiojonutaniyani.

<sup>13</sup> Cuarta Pueyaso muerasunaa, janiyari nia sequenu paniyani nia niishiniuria, janiyari sequeyarucua niaacua naquerejoquiaa juucuanu. Majaari juhuanujuaja cua naata quianu niaacua. Janiyari Jesucristojiniji pohuatanu paniya tii Roma tiacajiniani, tee nia quiyacuajani, cuno taucuaa tiuuniuria Jesucuaajuhujaj. Tamonu jiyacajinia taucuaari tari Jesucristoocua tiuujiaa quiyacuaa, cua pohuatanuucua Jesucristojiniji nojori niquiara. Janiyari naa miiniu paniya nia tajiniajuhujaj. <sup>14</sup> Cua Jiyaniijiaari cua jiyatequiaari na rupaa pohuatanara. Janiyari cunora na rupaa pohuataquiaani. Majaari na tojijashijia cua quini paniniu. Naaratej, janiya cuara pohuataara na rupaa puereetuca tiacajinia pueya niquiara, mariyata tiquiyocua quijiaa pueya niquiarajuhujaj. Janiya cuara na rupaa pohuataara niishijiaa pueya, niishiyashijiaa pueyano. <sup>15</sup> Janiyari cunora quianu paniya Roma tiacajiniani, cua pohuatanura Jesucristojiniji nijaniya.

*Pueyaso Rupaari cumaacaraca na jataniniuria pajaniya*

<sup>16</sup> Maja cutaraari cua caririquniu Jesucristojiniji cua pohuatanura. Jesucristo ru-paacujaari Pueyaso cumaacaraca, pueya na jataniniuria Pueyaso muerasu nojori quini-uria, nocua nojori tiuushacari. Puetunu Jesuucua tiuunaa pueyapuejanaari Pueyaso pueyara jatanishaanutaniya, taa Judiucua jatanishaaquiaa Pueyaso pueyaracaani. <sup>17</sup> Jesucristo pohuatasanojiniji paari niishiyani, Pueyasoori pa jiyanooquiaa sesa pa miishanojiniji, saaja Jesucristoocua pa tiuushacari. Saaja nocua pa tiuuniucua, paari

Pueyaso pueyara jatanishaaquiaani. Cunora, naa naajiotasano quiyacuajaari tariucuaa-  
caanu Pueyaso Rupaajinia:

“Pueyaso jiyanooshano pueyanoori pueyaracaanu shuquiriaatia quijia quiniutianiya,  
saaja Pueyasooqua na tiuushacari”.

*Pueyasora, puetunu pueyajanaari sesa miijiaca*

<sup>18</sup> Pueyasoori jiyocuacaanuji na tojiyashijiaca pueya saniitioquiaa. Naa nojori na  
saniitosacaritij, Pueyasoori nojori numootequiaa, nojuajaari puetunu na tojiyashijiaca  
pueyajanaa saniitionutianiya jiyanoohua na juaaniutia. Naa saniitosaanutaniyajaari-  
uhua, puetunu sesa miijiaca pueyajanaa. Naa sesa miijiaca pueya quishacaritij, nojoriiri  
Pueyasojiniji niishishano ruuretaquiaa saaja. <sup>19</sup> Nojori jaara Pueyaso niishiniuucua jiaa-  
tariquia, nojori maara na niishirij. Pueyasocuaajaari tari nojori niishitiquiaari taamuecate  
nojuajani. Nojoricuaajaari tari maninia nojuajiniji niishiya. <sup>20</sup> Majaari pa naata Pueyaso  
niquiniu pa namijiata, pa niishiniuria taamuecate nojuajani. Naajaa, Pueyaso shipinini-  
uucua jiya, maatia niishishiyacuajaari nojuajaari Pueyaso, pa niquishacari puetunu na  
shipinishanojuanaa. Na shipinishanojiniji niishishiyajaariuhua, majaari na cumaaca  
puequenu quiniutianiya. Pueyaracaanu quiriquianoori. Naacuajitij, Pueyaso saniitonu  
panishacari na tojiyashijiaca pueya, nojoriiri maja na naata sequenu quiniutianiya  
Pueyaso: “Maja canaa niishiniu quijia quiajanijajiniji”. <sup>21</sup> Nojoricuaajaari Pueyaso niishijia  
najuhanaj. Na niishijia nojori quishacari, nojoriiri saaja na rerequetaja. Nojoriiri  
na tojtiaaquiiaajuhua. Pueyaso miiniuucua maninia pueyaracaanu nojori, nojoriiri  
maja quenaaja na seguetunu quijia: “Paacarasho Pueyasonaa”. Tama nojoriijaarijia  
jiyanohua cushitiquiaa sesa nojori niishiriojonuusacari najuhanaj. Naa mosanucua  
nojori quishacaritij, nojori jiuujajaari juhua ninishiquiria quiquiaa. <sup>22</sup> Nojori jiyanihacari  
nojori cutaraari seetanujuanaa niishijia, naacuajitij nojoriiri socua niishiyashijiacara  
quiquiaa. <sup>23</sup> Nojoriiri Pueyaso shuquiritiaquiquiaa tama nojori shipinishano casaa-  
jaaja nojori shuqiritianura. Pa shipininia Pueyaso cutaraari jiyanoohua cumaacaraca,  
pueyaracaanu quijiajuhanaj. Nojoriiri Pueyaso niti shuqiritiaquiquiaa tama nojori ship-  
inijosanojuaja. Cuno, nojori shipinijosano Pueyaso niti na shuqiritiasocoriquianoni,  
cunoori quiquiaa juhua shaajeja pueya niquishano, juhua jaacuatujuaca niquishano-  
juhuaj, juhua nacujiniaaco canujuucuatujuaca niquishanojuhuaj, juhua roshiyocuat-  
juaca niquishanonio.

<sup>24</sup> Naaratej, Pueyasoori nojori tarinitiaquiaa sacuaaratia casaa nojori miiniuria tama  
na cuaqueyatajaaja, taa nojori miiniu paniquiaacuajani. Nojoriiri socua jiyacatequiaa  
sesa miiniuria. Naacuajitij, pueyari tama na cuaqueyajaaja miiquiaa sesa, cararaatia  
nojori miitioosacari narta pueyanota. <sup>25</sup> Naa sesa miijiaca nojori quishacaritij, pueyari  
seetanu casaajanaa Pueyasojiniji niishishano ruuretaquiaa, sajonuunu nojori tojinuria  
saniniujia. Naaratej, pueyari Pueyaso shipinijosano casami shuqiritiaquiaa, saniya na  
Shipininia niti. Nojuajaari pa Pueyasojanaa cutara. Nojuaja cuara shuqiritiasaaria  
pueyaracaanu cutara.

<sup>26</sup> Pueya jaara Pueyaso cartequiaa, Pueyasoori nojori tarinitiaquiaajuhua, cararaatia  
casaa nojori miiniuria, taa nojori jiaatiaquiaa miiniuriacuajani. Naacuajitij, maajipohuari  
maja na caminiu paniniu quiquiaa. Saaja narta maajipohuata cararaatia casaa miiquiaari  
juhua canuu. <sup>27</sup> Naajuhua, canuuri maajitia quiniu paniaquiquiaa, sacuaaratia na  
jiaatiasacari narta canuucua. Canuuri jiyanoohua cararaatia miitiooquiaa. Naa nojori  
miiniuucuatej, nojoriiri tama na cuaqueyajaaja miitiquiaa naquiya na miishaanura.

<sup>28</sup> Nojori niishiniu paniaquiniuucua Pueyaso, Pueyasoori nojori tarinitiaquiaa nojori  
miiniuria tama nojori niishiriojosano sesajaaja. Nojoricuaajaari niishiya, nojori miis-  
hanoori sesa. Naajaa, nojoriiri saaja na miijiaca quiquiaa, cararaatia miiniu niishiriojonu-  
ujuaca nojori quiniuucua. <sup>29</sup> Naacuajitij, nojoriiri puetunu tamaatia sesa miishanojuanaa  
miiniu niishijia. Jaara sesa miiri, timiquioyari. Nojoriiri nio miijiaca: puera casamiriaca  
quiniuucua jiaatiajaca. Sesa miiquiaari na panishano nojori jitianura. Nojoriiri tamasa  
pueya jitianu casamiica jiaatiajaca. Nojoriiri pueya puecojuaca. Nojoriiri pueya  
ruutaqueja. Nojoriiri na panishano casami nohuasenujuaca jiyasohua. Nojoriiri narta  
pueya miitianu panijia. Rimiaacaturijaariuhua. <sup>30</sup> Nojoriiri sacuaaratia sequejoju  
narta pueya. Nojoriiri Pueyaso niquiniu paniyashijia. Nojoriiri tamasa soojeaca.  
Nojoriiri tama na cuaqueyajaaja jiyatequiaa juhua socua maninia pueyara tamasacajiniji.  
Nojoriiri najuhua sequeja: “Janiya maninia miijiani”. Nojoriiri jiyanoohua niishijia,  
niishishoo sesa casaa na miiniuria. Nojoriiri na queya tojiyashijia. <sup>31</sup> Nojoriiri see-  
tanujuanaa mosanucua Pueyaso na tojtiaaquiniuucua. Nojoriiri saaja tama na rupaa-  
jaaja jataja. Majaari na sequesano na miiniu. Nojoriiri narta pueya paniyashijia.

Majaari nojori niishiniu jiyanooni. Majaari nojori niishiniu taraajenu narta pueyacu. <sup>32</sup> Nojoricuajaari tariucuacaanu naa Pueyaso sequesano niishiya: “Cante naa sesa miijiacani, cuaara puecoosaaria”. Naajaa, nojoriiri saaja sesa miiquiaa juhuajaniya. Majaari nojori quiniu shuquiriaatia saaja tama nojori miishacarijaaja sesa, nojoriiri shuquiriquiaajuhuaq tamasa jaara sesa miiri juhua nojori.

## 2

### *Pueyasoori sesa miijiaci saniitionutaniya sesa nojori miiniuucua*

<sup>1</sup> Naacuajitij pueyanaa, niaa jaara tamonuucua tonujuua quiriquia, majaari nia jyaniniu niaari sesa miyashjiaca cutara. Niaa jaara tamonuucua tonujure sesa na miishano, niaari tama niaacuarajaaja tonujiya naa sesa miini niishjiaca nia quishacarijuhuaj. <sup>2</sup> Paacuajaari niishiyani, Pueyasoori puetunu sesa miijiacajanaa saniitionutaniya, maninia na niishshacari nojori miijosano. <sup>3</sup> Quiajaniya saniniuuja, quiarta pueyacuara tonujujanaa, majaari quenaaja quia jyaniniu quiaa saniitioyaquishaanutaniya. Quiaari saniitosaanutaniyajuhaaj. Quiaacuajaari juhua nojori, sesa miijiajuhuaj. <sup>4</sup> ¿Majateeri quia niishiniu, Pueyasocuajaari pueyaracaanu quia sashiquiaa juucua, quioojia quia tacatonuhua nocua? Naaratej, nojuajaari pueyaracaanu maninia quia miiquiaa. Quia rejeretaquiaajaariuhuaq. ¿Quiaateeri jyaniquiaa Pueyasoori naa maninia quia miiquiaa, maninia quia quiniuucua na niquiara? ¡Maja! <sup>5</sup> Quiaari quioojia tacatonu paniyaquiquiaa, sesa quia miishanojiniji quia taraajeyaquishacari. Cunora, quiaari puetunu sesa quia miishanojinijijianaa saniitosaanutaniya jiya puequesacari. Jiyacaritij niishishaanutaniyari, Pueyasoori seetanujujanaa maninia saniitioja. <sup>6</sup> Pueyasoori puetunu pueyajanaa miiniutianiya taa nojori miishano quiquiaari mijiriacuajani. <sup>7</sup> Naacuajitij, Pueyasoori maninia miijiaci jiyatenutaniya pueyaracaanu rishijiacara. Nojoriiri pueyaracaanu maninia miijiaci quiquiaari mijiria, Pueyaso timitiasano nojori quiniuria, shaajeyashjiaca nojori quiniuriajuhuaj. <sup>8</sup> Saniniuuja, Pueyasoori na tojiyashjiaca saniitionutaniya jyanohua na juaaniutia. Naa saniitosaanutaniyajaariuhua noo pojori, canapuate saaja sesa miini panjiaca quiquiaarini. <sup>9</sup> Puetunu sesa miijiaci pueyapuejanaa naquiya miishaanutaniya, taa Pueyaso tojiyashjiaca cuarta Judiocuaca miishaanutaniyacuani. <sup>10</sup> Saniniuuja, Pueyasoori puetunu maninia miijiaci pueyapuejanaa miiniutianiya maninia, taa maninia miijiaci Judiocuaca miishaanutaniyacuani. Pueyaso timitiasano pueya nojori quiniuucua, nojoriiri jyanohua shuquiriaatia quijiaci quiniutianiya pueyaracaanu. Naacuajitij, nojoriiri juhuajaniya quiniutianiya Pueyasota pueyaracaanu.

<sup>11</sup> Pueyasoori maja rimajata na miiniu quiniutianiya taucua, Judiocua. Puetunu maninia pueyajanaa maninia miishaanutaniya. Sesa pueyari saniitosaanutaniyacuua. <sup>12</sup> Naacuajitij, pueya jaara Pueyaso rootasano Moisés niishiyashjiaca quiriquia, naajaa, nojori jaara sesa miijiaci quiri, nojoriiri saniitiosocoriquiano. Naajuhuaq, pueya jaara Pueyaso rootasano Moisés niishjiaca quiriquia, nojori jaara na tojiyashjiaca quiquiaarjuhuaj, nojoriiri cuno Moisés Naajioneejiniji nequesoreesaanutaniya na tojitiaaquiniuucua. <sup>13</sup> Majaari nia jyaniniu niaari jyanoooshaanutaniya sesa nia miishanojiniji nareja najuhua nia tojishacari Moisés Rootasano. Niaari jyanoyaquishaanutaniya maja seetanujujanaa na tojiyacua nia quiniuucua. Noo pojori cutaraari jyanoooshaanutaniya, canapuate seetanujujanaa na tojiyacua. <sup>14</sup> Moisés Rootasano jiitiaashjiaca pueya jaara tamajaaja maninia miini niishjiaca quiriquia, naacuajitij, niishshiyari, nojoriiri tamajaaja maninia miini niishjiaca cutara. <sup>15</sup> Naa maninia miini niishjiaca nojori quiniuucuatej, niishshiyari, Pueyaso rootasano Moisésri juhua nojori jiuujiajinia naajiotasano quiya. Naaratej, nojori jaara sesa miiri, tama nojori jiuujiajaarijia nojori niishitiya: “Sesa miiriinjia”. Naajuhuaq, nojori jaara maninia miiri, tama nojori jiuujiajaarijia nojori niishitiya: “Maninia miiriinjia”. <sup>16</sup> Naacuajitij, cuno juuca, Pueyaso nequesoreetesacari Neyanu Jesucristo puetunu mijiria quiniaa pueyajanaani, jiyacaritij, tama pueya jiuujiaari nojoriicuara tonujunutaniya sesa nojori miishanojiniji jiyasohua. Naaratej, janiyari pueyaracaanu pueya numotequiaacuajani cua pohuatasacari Pueyaso rupaa Jesucristojiniji.

### *Pablo nacasusacari Judiocuaca nojori tojitiaaquiniuucua Moisés Rootasano*

<sup>17</sup> Cuarta Judio pueyananaa, quiaari jyaniya quiaa Pueyaso pueyano cutara, na saquiriojosano Israel pueyajinijinio quia quishacari, Moisés Rootasano niishijia quia quishacarijuhuaj. Cunora, quiaari sequequiaa: “Janiya cutaraari Pueyaso pueyanoni. <sup>18</sup> Janiyari niishiyani casaa Pueyaso paniya cua miiniuriani. Moisés Rootasano niishijia cua quishacari, janiyari niishiyani teyano casaate socua tojishocoriquiano rootasanoni Pueyaso cua shuqiritiniuria”. <sup>19</sup> Quiaari sequequiaajuhuaq: “Janiyacuajaari seetanu rupaaajanaa niishiyashjiaca pueya niishitiojonani. Janiyari juhua ninishiqui quijiaci

pueya cuhuatanani. <sup>20</sup> Janiyari niishiyashijiaca niishitiojojuani, naatujoorinio, maninia cua niishishacari seetanu rupaajanaa Moisés Naajioneejiniji”. <sup>21</sup> Naa tamasaca niishitiojona quia quishacaritij, tama quia cuaqueyajaaja quia niishitiojore coteenu, maninia mijia quia quiniuria. Quiaa jaara tamasaca niishitiojoquiaa maja na nohuasenuunura, ¿casaara nohuasejojua quia quiyacuaraarini? <sup>22</sup> Quia rootasacari tamasaca, maja nojori numuetucunura niyacaraca maaji, ¿casaara saniniujia naa quia miiquiaacuaraarini? Quiaacuajaari sequeja: “Janiyari pueya shipinijosano casaa soojeani, nojori shipinijosano na secojonuusocoriquiano juhua Pueyasoni”. Naa quia soosacari nojori shipinijosano casaatej, ¿casaara quia nohuasejoquiaa cuno casaa nojori secojonuujuua tiacajinjicuaraarini? <sup>23</sup> Quiaari sequequiaajuhua: “Moisés Rootasanoori jiyanohua maninia. Na timitiaanijia”. Naajaa, quiaari Pueyaso rerequetequiaa quia tojiyaquishacari Moisés Rootasano. <sup>24</sup> Cunora, tariucuacaanu Pueyaso Rupaajinia naajiotasanoori seetanujuanaa naa sequeya:

“Pueyaso niishiyashijiaca taucuacaari Pueyasocuara rimiaaquequiaa sacuraatia, Pueyaso tojiyashijiaca nia quiniuucua nojori niquiara”.

<sup>25</sup> Cuarta Judiocuacanaa, Pueyasocuajaari pa supuetanaa rootaquiaari pa cararaatiuuquia co cuaara miatesano quiriira, na saquiriojosano pueya pa quiniuucua. Naacuajitij, nia cararaatiuuquia co jaara miatesano quiri, cunoori maniniacuaja, nia jaara seetanujuanaa Moisés Rootasano tojiijica quiri. Saniniujia, niaa jaara Moisés Rootasano tojiyashijiaca quiri, niaari juhua miatesoo quiyajaa Pueyaso niquiara. Nia cararaatiuuquia coiri najujuana miatesano quiya. <sup>26</sup> Saniniujia, taucuaca jaara maninia mijia quiri taa Moisés rootasano sequeyacuajani, miatesoo nojori cararaatiuuquia co quishacari, naajaa. Pueyasora, nojoriiri juhua miatesano quiya, na muerasu nojori quiniuria. <sup>27</sup> Naacuajitij, na cararaatiuuquia co miatesoo tahue jaara maninia mijia quiri, taa Moisés Rootasano sequeyacuajani, nojuajaari jiyanooshaanutaniya, Pueyaso muerasu na quiniuria. Quiajaniya saniniujia Judio pueyanonaa, quiaari Moisés Rootasano niishijiacuaja. Quiaacuajaari quia cararaatiuuquia co miatesanoraca. Naajaa, quiaa cutaraari saniitiosaanutaniya quia tojiyaquiniuucua Moisés Rootasano. Naacuajitij, cuno tahueri quiocuara tonujuriquiano saniya, Judio pueyanonaa. <sup>28</sup> Pueyasocuajaari Judiocuaca saquiriojoquiaari na muerasu nojori quiniuria juucua. ¿Cante seetanujuanaa Judio pueyano Pueyasorani? ¿Na cararaatiuuquia co miatesano pueyanotee, Judio pueyacuajinino supueno pueyanotejuhuaj? Maja. <sup>29</sup> Noo pojori cutaraari seetanujuanaa Judio pueyano Pueyasora, noojia jatanishano pueyanotej. Pueyaso Sohuanu jaara pueyano jiuujia jataniri Pueyaso tojiijia na quiniuria, cunoori juhua na cararaatiuuquia co miatesano cutara, seetanujuanaa Pueyaso muerasu na quiniuria. Jiyano pueyatej, nojori cutaraari Pueyaso timitiasano, maja narta pueya timitiasano. Pueyanoori maja na naata pueyano jiyatenu Pueyaso pueyano na quiniuria. Saaja Pueyaso Sohuanu cutaraari na naata.

### 3

<sup>1</sup> Naa cua sequesacari niajanijatej, niaa naasucuaari sequeya: “Taucuaca jaara naa maninia miishaanutaniya nojori quiyaquishacari Pueyaso saquiriojosano Judiocuaca, naatej, taa pajaniyacuaani, ¿casaara pa cararaatiuuquia co miatejosaaquiaaricuaraarini? ¿Paateeri najuhuana Pueyaso saquiriojosano Judiocuacani?” <sup>2</sup> Maja, Judiocuacanaa. Maniniacuajaari pa quishacari Judiocuaca. Pueyasocuajaari Judiocuacaacia tiuquuaari nojori jiiitanura na rupaa. <sup>3</sup> Noojiaqueya Judiocuacajinijino jaara Pueyaso Rupaacua tiuyashijiaca quiya, ¿Pueyasoteeri cunora na rupaa jatanutanijajuhua? ¡Majal! <sup>4</sup> Puetunu pueyajanaa jaara sapojonuujuaca quiri, quia, naajaa, Pueyaso cutaraari tojetaarucujanaa sapojiyashijia. Naaratej, nojuajinijiri naa naajiotasano quiya tariucuacaanu na Rupaajinia:

“Puetunu pueyajanaari niishiniutianiya puetunu quia sequesanojuanaari seetanujuanaa cutara. Naajuhua, pueya jaara quiocuara tonujure juucua, puetunu nojorijianaari sanaajasaanutaniya, saa maninijia quia miiniuucua pueyaracaanu”.

<sup>5</sup> Pa supuetanaa tiuyaquiniuucua seetanu Pueyaso rupaacuajanaa, naacuajitij, mijiria quiniaa pueyari niishiya, Pueyasoori socua jiyanohua maninia pueyajiniji. Sesa pa miiniujiniji, paari niishiyani Pueyaso cutaraari jiyanohua maninia. Naacuajitij, nojuaja jaara pa saniitiore sesa pa miiniuucua, ¿taa nia sequeyani? ¿Nojuajate sesa, jaara pa saniitiore sesa pa miiniuucua? ¡Jua! Juhua niishiyashijia pocuareenijia. <sup>6</sup> ¡Seetanujuanaa, Pueyasoori sesa miyashijia! Nojuaja jaara sesa mijia quiri, quiajuhua, ¿maatucua taa mijiria quiniaa nequesoreereni?

<sup>7</sup> Tamasaca naasucuaari sequequiaa: "Sapojoua cua quishacari, pueyari Pueyaso timitiaquiaa socua, nojori niishishacari saaja nojuaja cutaraari seetanu rupaajanaa jitiiaja. Naaratej, ¿Pueyasotucua casaara cua saniitioreni?" <sup>8</sup> Teyano pueyanote naa sequejani, nojuaja naasucuaari naa sequejajuhua: "Socua sesa pa miiri, Pueyaso jiyanooniuria pajaniya. Naacujitij, pocua Pueyaso shuquiritiare socuani, nojuaja jaara pa jiyanoori". Tamasacaari canaacuara tonujuquiaa najuhuanaj, canaanaari naa niishitiojoquiaani. Canapuate naa sapojonuuquiaa canaacuarani, nojoriiri saniitiosaanutaniya, nojori sesacanuucua canaa.

*Pueyasora, puetunu pajaniyajanaari sesa miijiacani*

<sup>9</sup> Quiarijia, jaara naa quiriritij cuarta Judiocuacanaa, ¿paateeri socua maninia miijiaca taucacajiniji Pueyasoari? Maja. Janiyacuajaari shusha nia pohuatariquiaani, puetunu mijiria quiniaa pueyajanaari sesa miijiaca; Judiocuaca, taucucanio. <sup>10</sup> Tariucuacaanu Pueyaso Rupaajiniacuajaari naa naajiotasano quiya:

"Majaari quenaaja niquiriyatu maninia miijia quiniu. Shaaqui tojetaarucujanaa. <sup>11</sup> Majaari quenaaja maninia niishiriojoua pueyano quiniu. Majaari quenaaja Pueyasocua jiaatija pueyano quiniujihua. <sup>12</sup> Puetunu pueyajanaari Pueyasocua tashuquiorucuaa. Puetunu nojorijianaari seserucuaa. ¿Cante maninia miijiani? Shaaqui. Shaaqui tojetaarucujanaa. <sup>13</sup> Nojoriiri miananajonu maniniu. Nojori rupaari saa monujua. Nojoriiri na niti taquiriocateja saa sapojonuraja. Cuno pojoriiri juhua soconu noonacu jitiiaa na rupaama, rimiaacatujuri nojori quiniucua. <sup>14</sup> Nojori jaara pocuare, saaja tamasa sesacaquiaari, puera juaajia nojori quishacari. <sup>15</sup> Nojoriiri puecojuaca. Puereeta nanaca shootejaca. <sup>16</sup> Puetunu mijiria nojori miishanojuanaari casaa sesoja, narta pueya taraajetejajuhua. <sup>17</sup> Majaari nojori niishiniu jiyanooni. <sup>18</sup> Nojoriiri juhujaniya miiquiaa sesa saaja. Majaari na pueretunu Pueyaso".

<sup>19</sup> Paacujaari niishiyani, puetunu Pueyaso Rupaajinia naajiotasanojuanaari Pueyaso saquiriojosano Judiocuaca quiquiaari, nojori niishiniuria, puetunu pueyajanaari sesa miijiaca. Naacujitij, puetunu mijiria quiniaajanaari sanaajetanutaniya, nojori niishishacari puetunu nojorijianaari sesa miijiaca; Judiocuaca, taucucanio. <sup>20</sup> Naacujitij, pueya tojishacari Moisés Rootasano juucua, cuno rootasanoori maja na naata nojori na jiyatenu sesa miyashijara. Moisés Rootasanojiniji, paari saaja cunojiniji niishiyani, puetunu pajaniyajanaari sesa miijiacani.

*Paari Pueyaso jiyanooshano cutarani, Jesuucua pa tiuushacari*

<sup>21</sup> Pueyasoori quiari naataja pa niishitiquianu cutara, taate pa naata maninia miijia pa jatanishaanuni. Moisés Rootasanojinia, tariucuacaanu Pueyaso sequenu panishano caminiujunaa naajionuutasanojiniaari naa sequeyajuhua. Tiiri maatia sequeya taa Pueyaso jiyanooniutianiya pueyani, naajaa, pueya jaara Moisés Rootasano tojiyashijiaa quiri. <sup>22</sup> Quiarijiani, Pueyasoori pa jiyanooquiaa cutara, saaja Neyanu Jesucristoocua pa tiuushacari. Judiocuaca, taucacajuhua, Pueyasoori puetunujanaa jiyanooquiaa Neyanuucua nojori tiuushacari. Majaari rimiajata na jiyanooni. <sup>23</sup> Puetunu pueyajanaari sesa miijiaca; Judiocuaca, taucucanio. Naacujitij, nojoriiri juhua tucacaanu quiya Pueyasojiniji. Sesa miijiaca pueya quiniucua, nojoriiri soosano pueyara jataquiaari. Naacujitij, pueyari Pueyaso timitiasoo quiquiaari. <sup>24</sup> Naajaa, jiyanohua panijia Pueyaso quiniucua, nojuajaari pa jiyanooquiaari Jesucristo cusonucua pocuara. Naacujitij, Pueyasoori pa jiyatequiaari juhua sesa miyashijara. <sup>25</sup> Pueyasoori Neyanu Jesucristo jiyatequiaari pueyacuaji Tacuna na quiniuria, Neyanu nanaca shoonucua niyacutesanojinia. Naacujitij, pueya jaara niishiriquia Jesucristo nojori niti cusoquiaari, saaja naa nojori tiuushacari nocuatej, nojuajaari na Que Pueyaso jiyanootiquiaa pueya. Najuhua, Pueyaso saniitioyacuishacari tariucuacaanu nocua tiuijaca pueya Jesu cusoayacuishacari, majaari najuhua puera jiuujiaajia na quiniu quiquiaari. <sup>26</sup> Pueyasoori niishiquiaari Neyanu Jesucristoori nojoriicuara mosocoriquiano, sesa nojori mijiosano tuujasaanura seetanujanaa. Naaratej, nojuajaari pueyaracaanu sesa nojori mijiosano rejeretaquiaari saaja. Jesucristo cusonucua quiari naataja pocuara, paari niishiyani, Pueyasoori seetanujanaa maninia miijia. Nojuajaari maja najuhua na jiyanooni pajaniya. ¡Neyanu motequiaari pocuaraari!

<sup>27</sup> ¿Teyano nijaniyajinijinote tojetaarucujanaa saaja maninia miijiani? Shaaqui. Naacujitij, maninia miyashijia pa quishacari, puetunu pueyajanaari sanaajasaanutaniya Pueyaso nequesoreesacari pueya. Saniniujia, paa jaara puetunu Moisés Rootasanojuanaa tojitajaca quiriquia maniniani, paa maara tama pa cuaqueyajaaja shuquiritajaca quiriquia cutarani. Saniniujia, Pueyasoori pa jiyanooquiaa saaja pa tiuushacari Jesucristoocua. Naacujitij, majaari pa jitiianu tama pa miishanojuaja pa

shuquiritiasocoriguano. <sup>28</sup> Naacuajiti paari niishiyani, Pueyasoori pa jiyanoojia puetunu sesa pa miishanojinijijianaa saaja Jesucristoocua pa tiuushacari. Majaari na jiyanooniu pajaniya, Moisés Rootasano pa tojishacari.

<sup>29</sup> ¿Niaateeri jiyaniya, Pueyasoori saaja Judiocuaca Jiyano? ¡Maja! Pueyasocuaajaari puetunu mijiria quiniaa pueyapuejanaa Jiyano. <sup>30</sup> Pueyasoori maja caapiqui. Nojuajaari saaja niquiriyatu. Naacuajitij, majaari niquiriyatu Pueyasoo quiniu Judiocuacaca, socua tamonu Pueyasoo taucuacaca. Naaratej, puetunu pueyapuejanaari jiyanooshaaquiaa saaja Jesucristoocua nojori tiuushacari; tariucuacaanu na saquiriojosano Judiocuaca, taucuacano. <sup>31</sup> Pueyasoo muerasu pa quishacari saaja Jesuucua pa tiuushacari, ¿paateeri Moisés Rootasano shocoteyani? Maja. Paacuajaari Moisés Rootasanojiniji niishiyani, paari sesa miijiacani. Naacuajitij, Moisés Rootasanoori panishiya, pa niishiniuria paa cuaara Jesucristoocua tiuuria, jiyanooshano pa quiniuria.

#### 4

*Pueyasoo jiyatesacari Abraham juhua sesa miyashijiaari*

<sup>1</sup> Naaratej cuarta Judiocuacanaa, ¿taa nia sequeya pa supuetana Abrahamjinijini?

<sup>2</sup> ¿Casaara Pueyasoo jiyatequiaari nojuaja juhua sesa miyashijiarani? Abrahamri maja na jiyanooshaanu quiquiaari maninia na miiniuucua. Pueyasoo jaara nojuaja jiyanooquiaari maninia na miiniuucua, nojuaja maara tama na cuaqueyajaaja timitiaja quiquiaari. <sup>3</sup> Saniniuujia, tariucuacaanu Pueyasoo Rupaajinia naa naajiotasano quiyari Abrahamjiniji: “Abrahamri Pueyasooocua tiuquuaari. Naaratej, Pueyasoori na jiyatequiaari juhua sesa miyashijiaari”.

<sup>4</sup> Cua tojiri pueyanaa. Pueyasoo jaara poonijiore tamonura, na poonijiotenaari na poonijionujiniji na cumaneeca niquitiojua. Jaara niquitiosaare, cuno cumaneecaari maja nareja niquitiosano. Cunoori seetanujuanaa na poonijosanojiniji. <sup>5</sup> Saniniuujia, maninia miyashijia jaara Pueyasooocua tiuuri, Pueyasoori na jiyatenutaniya juhua sesa miyashijiaari saaja nocua na tiuiniuucua. <sup>6</sup> Pa supuetanaa jiyaniijia Davidcuajaari naa pohuataquiaari taa shuquiriaatia pa quiyani, Pueyasoo jaara pa jiyatere juhua sesa miyashijia pa quiniuria na niqiuara, maninia miyashijia pa quishacarija. Naa naajiotasaaquiaariiri David sequesano:

<sup>7</sup> “Shuquiriaatia quijiaa cutaraari noo pueya, canapue Pueyasoo jiyanooya sesa na miijiosanojinijicuaajani, Pueyasoo jaara tuujure sesa nojori miijiosanojuhuaj.

<sup>8</sup> Shuquiriaatia quijiaaari noo pueyajuhua, puetunu sesa nojori miishanojuanaa Pueyasoo saneyaquishootej”.

<sup>9</sup> Janiyacuajaari tari sequeereni, Pueyasoori Abraham jiyatequiaari juhua sesa miyashijia na quiniuria, saaja nocua na tiuushacari. Pueyasoo jaara naa jiyanooquiaaricuaa Abrahamtej, ¿Pueyasote saaja Judiocuaca jiyanooniu panijia, noo nojori canapue te na cararaatiuuquia co miatesano jiiitaani, taa nojori supuetana Abrahamcuaani? ¿Taa nia sequeyani? ¿Taucuacaarijiaataj? ¿Nojoriti jiyanooshiyajuahuaj? ¡Taaquiririnij! <sup>10</sup> ¿Taa nia sequeyanijia? ¿Abrahamte tari na cararaatiuuquia co miatesano quiquiaari Pueyasoo jiyanooshaacari nojuaja? Maja. Pueyasocuaajaari na jiyanooquiaari miatesoojua na quishacari. <sup>11</sup> Na tiuuniu nuhuaji Pueyasooocua, Pueyasoori shusha jiyacari na niishitiquiaari na cararaatiuuquia co na miatenura. Cunoori quiquiaari na niyajetaaquishaanura, saaja Pueyasooocua na tiuushacari, Pueyasoori na jiyatequiaari juhua sesa miyashijiaari, miatesoojua na quishacari. Naacuajitij, miatesoo taucuaca tiuushacari Jesucristoocua, taa Abraham tiuquuaaricuaani, Pueyasoori nojori jiyateya juhua sesa miyashijiaa nojori quiniuriajuhuaj, mariyata juhua Abraham niqiuohua nojori quiniuria. Naacuajitij, puetunu Pueyasoo sequesano Abrahamjanaani, cunoori nojoririjahuaj. <sup>12</sup> Naajuhua, pueya jaara na cararaatiuuquia co miatesano quiri Judiocuaca nojori quiniuria, naajaa. Nojori jaara Jesucristoocua tiuuri taa Abraham tiuquuaaricuaani miatesoo na quishacarija, Pueyasoori nojori jiyateya juhua Abraham niqiuohua nojori quiniuriajuhuaj.

*Pueyasoo sequesano Abrahamni, cunoori Jesucristoocua tiuujicarajuhua*

<sup>13</sup> Pueyasocuaajaari Abraham sequequiaari, nojuajaari nio jiya camaru quiniutianiya, puetunu necohuatajanaa. Pueyasoori naa sequequiaari Abrahamtej, saaja nocua na tiuushacari. Majaari naa Abraham sequesaaanu quiquiaari Moisés Rootasano tojjia na quiniuucua. Jiyacariitij, Moisés Rootasanoori maja na quiniu quiquiaari juhuanujuaja. <sup>14</sup> Pueyasoo sequesano Abraham jaara saaja Moisés Rootasano tojjiacara quiri quia, na sequesano maara najuhua quiri Pueyasooocua tiuujia pueyara. Naajuhua, pueya maara najuhua Pueyasooocua tiuujia quiri quiajuhuaj. Seetanujuanaa Pueyasoo sequesano Abrahamni, cunoori puetunu Pueyasooocua tiuujicarajanaa. <sup>15</sup> Cunoori maja saaja Moisés

Rootasano tojjiiacara. Pueyasocuaajari niishiquiaari, pueyari maja na naata Moisés Rootasano tojiniu quiniutianiya puetunujuanaa. Moisés Rootasanojiniji, paari niishiyani, paari saniitosaanutaniyani pa tojtiaaquiniuucua cuno rootasano. Saniniuujia, Moisés Rootasano jaara quiyaquiriquia, pueya maara sequeyaquishaare: “Niaari sesa miijiaca”.

<sup>16</sup> Pueyasoori tariucuaaanu na sequesano Abraham nareja niqutionu paniquiaari, puetunu necohuarajanaano. Naaratej, seetanujuanaa pa masenura na sequesano Abraham, Pueyasoori sequequiaari, nojuajaari nareja na niqutionutaniya nocua tiuujia. Naacuajitij, Pueyaso sequesanoori maja saaja Moisés Rootasano tojjiiacara. Cuno sequesanoori puetunu pueyapuerajanaa, canapuate Pueyasocua tiuujiaa quiyani, taa Abraham quiquiaari Pueyasocua tiuujiaa. Naa Pueyasocua tiuujiaa pa quishacari taa Abraham tiuquuaari Pueyasocuaaani, paari Abraham niqiuohuani. Naaratej, Pueyasora, Abrahamri pa que. <sup>17</sup> Pueyasocuaajari naa sequequiaari Abrahamtej nojuajaari queraatia niqiuohuaraca quiriquiano. Naacuajitij, Pueyaso sequesanoori naa naajiotasano quiya:

“Abrahamnaa, janiyari quiarijia quia jiyateree queraatia tamaatia rupaaca pocujaca que quia quiniuriani”.

Abrahamri Pueyaso sequesanoocua tiuquuaari. Nojuajaari niishiquiaari Pueyasoori macunucua samiitianiija. Niishiquiaariijaariuhuj, Pueyasoori cumaacaraca na panishano na shipiniuria shaaquijiniija.

<sup>18</sup> Abrahamri niishiquiaari, nojuajaari maja na naata necocua na muetutenu, puera saaquiano na quishacari tari. Naajaa, Abrahamri saaja Pueyaso sequesanoocua tiuquuaari. Naacuajitij, nojuajaari seetanujuanaa queraatia tamaatia rupaaca pocujaca pueyapue que, taa Pueyaso sequequiaari nojuacuajani. Pueyasoori naa na sequequiaari: “Quia niqiuohuari tojetaarucujanaa queraatia quiriquiano”.

<sup>19</sup> Naa Pueyaso sequesacari nojuajatej, nojuajaari tari cien marijia shocotejoquiaari. Naa saaquiano na quishacariitij, necocua Saaraajuhuj, naajaa, majaari na tarintianu quiquiaari Pueyaso sequesanoocua tiuuniu. <sup>20</sup> Saaja Pueyasocua sequesanoocua na tiushacari, nojuajaari maja noojia na niquijotenu quiquiaari. Majaari Pueyaso sequesanojiniji na taacanunu quiquiaarijuhuaj. Saaja Pueyasocua na tiushacari, nojuajaari noojia cumaquiquiaari socua. Naacuajitij, nojuajaari naa maninihuaqueetaquiaari Pueyaso: “Paacarasho cua Pueyasonaa. Niishiyaniija quiaari canaa muetutenutaniya taa quia sequecanu janiyacujani. <sup>21</sup> Quiaacuajari cumaacaraca quia miiniuria puetunu quia sequesanojuanaa”. <sup>22</sup> Naa Abraham tiuuniuucua Pueyasocuatej, Pueyasoori na jiyatequiaari juhua sesa miyashijia pueyanora.

<sup>23</sup> Jaara naa naajiotasaaquiaari Abrahamjiniji: “Pueyasoori na jiyatequiaari juhua sesa miyashijia”, cunoori maja saaja Abrahamra sequesano. <sup>24</sup> Cunoori pajaniyara sequesanojuhuaj. Cunora, Pueyasoori pa jiyateya juhua sesa miyashijiarajuhuj, nocua pa tiushacari, pa niishishacarijuhuaj nojuacuajari pa Jiyaniija Jesucristo samiitianiijaariuhua macujiniija. <sup>25</sup> Pueyasocuaajari mijiria na jiyaroquiaari sesa pa miishanoocura mosocoriquiano. Nojuajaari na samiitianiijaariuhua, Jesu jaatianura nocua pajaniya, juhua tariucua sesa miyashijiaa.

## 5

### *Jesuucua tiuunaa pueyari jiyanooshano*

<sup>1</sup> Naacuajitij, paa jaara tari jiyanooshano quiyani Jesucristoocua pa tiushacari, paari juhuajaniya quiya Pueyaso niquiarani. Jesucristoori na Que pa jiyanootiquiaari, pocuara na cusosacari. <sup>2</sup> Jesucristoocua tiuujiaa pa quishacari, Pueyasoori pa timitiaquiaa. Pa cumaquiuaajariuhuj maninia necohua pa quiniuria. Paari shuquiriyajaacuhuj, pa niishishacari paari jatanishaanutaniyani, shacantuca quijiaa pa quiniuria juhua nojuajuhuj. <sup>3</sup> Majaari saa cunojua. Paari shuquiriquiaajuhuj, paa jaara taraatia miishaareni. Paacuajari niishiyani, paa jaara naquiya miishaareni, paari socua juhuajaniya rejeretajaca quiniutianiyani. <sup>4</sup> Naa rejeretajaca pa quishacariitij, paari cumueeca Pueyaso muerase quiniutianiyani. Naa cumueeca Pueyaso muerasu pa quishacariitij, paari juhua-janiya sashijiaa quiniutianiyani, pa niishishacari Pueyasoori seetanujuanaa maninia miiniutianiya pajaniya, taa na sequequiaaricujani. <sup>5</sup> Naa pa niishishacariitij, majaari sapojosano pa quiniu quiniutianiya. Pueyasocuaajari tari jiyaroquiaari na Sohanu, poojajinia quiriquiano, seetanujuanaa Pueyaso paniniu pa jiitianura poojajinia.

<sup>6</sup> Pueyaso tojjiyashijiaa pa quishacariija, majaari pa naata quiquiaari Pueyaso jiyanootiniu tama pa cuaqueyajaaja. Jesucristoori jiyacari namitia pocuara cusoquiaari na Que na jiyanootiniuria pajaniya. <sup>7</sup> Sesa miyashijia pueyano jaara monu panishiya juucua, çtamonu maninia pueyanoteeri quiya na sequenura: “Janiya cuara mosaaria juhuari



cuno pueyano niti”? Majaruhua. Monu panishano pueyano jaara seetanujuanaa maninia pueyano quiri, na rupena pueyano jaara jiyanohua na panijia quiri, nojuuaa maara sequere: “Janiya cuaara na niti mosaaria juhuari”.<sup>8</sup> Saniniuujia, sesa miijiac pa quishacarijia, Jesucristoori pa niti cusoquiaari cutara. Naacuajitij, paari niishiyani, Pueyasoori jiyanohua pa panijia.<sup>9</sup> Quiarijia, paari sesa miyashijia quiya Pueyaso niqianari, Jesucristo cusonuuca pocuara. Naacuajitij, paa cutaraari niishiyani, Pueyaso saniitiosacari na tojiyashijia pueya, Cristoori pocuaji tacunutaniya cutara, tariucua na jatanishano pueya pa quiniucua.<sup>10</sup> Na paraa pa quishacarijia, Pueyasocuaajaari pa jiyanoquiaari, Neyanu cusonuuca pocuara. Quiarijia, nata jeecatoono pa quishacari, Neyanuuri saminio quiya pueyaracaanu pocuaji na tacunura.<sup>11</sup> Majaari saaja cunora shuquiriaatia pa quiniu. Paari shuquiriyajuhua, pa Jiyaniijia Jesucristo rupuetootenuucua pajaniya na Que Pueyasota.

*Pa supuetana Adánri maja juhua pa Jiyano Cristo*

<sup>12</sup> ¿Casaara pa cusonuuquiaani? Juhucatecara pa supuetana Adán miiniucua sesa, naaratej puetunu pueyajanaari sesa miijiacajuhua. Pueyasocuaajaari tari sequequiaari: “Cante sesa miijiani, cuaara shaajeera”. Seetanujuanaa naari. Puetunu pajaniyajanaari shaajeriquianoni, sesa miijiac pa quiniucua.<sup>13</sup> Moisés Rootasano quiyaquishacarijia, pueyari tari sesa miiniu niishijia quiquiaari. Jiyacaritij, pueya miishacari sesa, majaari nojoriucara saquiriojotasaanu quijia sesa nojori miishacari.<sup>14</sup> Cuno pojori, Moisés niyacari quiquiaarini, nojoriiri maja na tojiyaquiniu quiquiaari Pueyaso sequesano taa Adán tojiyaquiquiaari Pueyaso sequesano cunaan. Naajaa, puetunu nojorijianaari cusonuuquiaarijuhua sesa miijiac nojori quiniucua, sesa miijia Adáncaujinio nojori supenuucua. Quiarijia saniniuujia, nia pohuatareera Adán miishanojiniji, Jesucristo miishanojinijinio.

<sup>15</sup> Adán miishanoori jiyanohua tamaatia Jesu miishanojiniji. Coteenu shipinishano pueyano miiniucua sesa, puetunu pueyajanaari shaajenu niishiya. Saniniuujia, Jesucristo miiniucua maninia, Pueyasoori queraatia pueya jiyatequiaa pueyaracaanu rishijia nojori quiniuria cutara.<sup>16</sup> Pueyaso miishano maninia pajaniyarani, cunoori sesa Adán miishano shocotaa jiyanohua cutara. Naa niquiriyatu sesa casaa Adán miiniucuatej, puetunu pueyajanaari saniitiosocoriquiano. Saniniuujia, maninia Jesucristo miiniucua pajaniyarani, Pueyasoori pa jiyanoquiaa puetunu sesa pa miishanojinijianaa.<sup>17</sup> Niquiriyatu pueyano miiniucua sesa, puetunu pueyajanaari cusonuujuacara quiquiaari. Saniniuujia, niquiriyatu pueyano miiniucua maninia pajaniyara, cunora, Pueyasoori pa jiyateya juhua sesa miyashijia pa quiniuria. Cunoori, Jesucristoocua pa tiushacari. Majaari saaja cuno, naajuhua, paari shuquiriaatia quijia jiyaniijianucua quiniutianiya maniniushiquini, Jesucristo rupuesano pa quishacari.

<sup>18</sup> Naa Adán miiniucua sesatej, nojuajaari puetunu nocuajinio supueno pueyajanaa jiyatequiaari sesa miijiacara, saniitiosano nojori quiniuria. Naajuhua, Jesucristo miiniucua maninia, puetunu pueyajanaari na naata jiyanooshaanu, nojori saniitioyaquishaanucua, pueyaracaanu quijia nojori quiniuria.<sup>19</sup> Adán tojiyaquiniucua Pueyaso sequesano, puetunu pueyajanaari sesa miijiacara jiyatesaaquiaarijuhua. Saniniuujia, Jesucristo tojiniucua Pueyaso sequesano, puetunu nocua tiuujiacajanaari juhua sesa miyashijianucua jiyatesaaquiohua.

<sup>20</sup> Moisés Rootasano jaara niishishaquiaari, pueyari socua sesa miijiacara jiyacatequiaari. Naa socua sesa miijiacara pa quishacarijia, naajuhua, Pueyasoori socua jiyacatequiaari pocua taraajenujuhua.<sup>21</sup> Sesa miiniu tarinitianu niishiyashijia pa quiniucua, puetunu pueyajanaari csonuuriquiano quiquiaari. Saniniuujia, Pueyaso taraajenuucua pocua, nojuajaari Neyanu Jesucristo motequiaari pa niti, pa jiyanooshaanura. Naacuajitij, nojuajaari juhua pa samiitianijioquiaariuhua, pueyaracaanu rishijia pa quiniuria pa Jiyaniijia Jesucristota.

## 6

*Pablo niishitiojosano moojinia tiuquinijonujiniji*

<sup>1</sup> Pueyaso jaara naa pa jiyanoquiaa pocua na taraajesacari, ¿taa nia sequeyani pueyanaa? ¿Paate socua pueyaracaanu sesa miijia quiniutianiya, pueyaracaanu Pueyaso jiyanooniuria pajaniya, pueya niishiniuria, Pueyasocuaajaquijiyanohua maninia na jiyanooniuria pajaniya? <sup>2</sup> ¡Maja pueyanaa! ¡Maja naa nia niishiriojonu! Pueyaso jaara tari poojia sesoriquia seque jataniquiaari Neyanu Jesucristo na rupuetesacari pajaniya, ¿paatucua casaara socua sesa miijia quirini? Pueyasora, paacuajaari tari csonuuquiaari Jesutani. <sup>3</sup> ¿Niaateeri cuno niishiyaquiyajaa? Naajuhua, paa jaara moojinia tiuquinishaare

Jesucristoocua pa tiuushacarini, Pueyaso niquiara, paari Jesu rupuequiaari niyacutesanojiniani. Nojuacuajaari pa niti saniitiosaaquiaari. <sup>4</sup> Naacuajitij, paa jaara moo cariquimia shishaareni, jiyacaritij, paari juhua Jesuta jamoshiyajuhua. Naa juhua macu pa quishacaritij, paari samiitianijiosanohuani, taa Jesucristo samiitianishaaquiaariuhua macujiniji jiyanohua Pueyaso cumaacatacuani. Naa samiitianijiosanohua pa quishacaritij, maninia miijiaca pa quiri juhua quiarinio pueya.

<sup>5</sup> Paa jaara Jesucristo rupuetesaaquiaari sesa pa miishanoocuara na cusosacarin, naajuhua, paa cutaraari tari samiitianijiosanohua juhua nojuajani, maninia quijiaca pa quiniuria. <sup>6</sup> Tariija, majaari pa naata tarinitianu quijia sesa pa miiniu, sesa jiuujiaraca pa quishacarijia. Sesoriquia poojia sequeeri Jesuta cojiritiasaaquiaari monu, nocua pa tiuushacari, maja socua cumaaca na jitianura, sesa na miitiniuria pajaniya. <sup>7</sup> Naacuajitij, sesoriquia poojia seque jaara tari jatanishano quiya, majaari tari sesa miijiaca pa quiniu. <sup>8</sup> Paa jaara tari naa cojiritiasaaquiaari monu Jesuta nocua pa tiuushacarin, paari quiarijia niishiya cutarani, paari pueyaracaanu nata quiriqiano saminioni. <sup>9</sup> Cristocuaaari samiitiaquiaariuhua. Paari niishiyajuhua, majaari socua na pacutenu quiniutianihua cusonu. Nojuacuajaari tari cusoquiaari puetunu sesa pa miishanoocuarajanaa. Naaratej, nojuajaari maja na naata socua cusajuasaanuhua. <sup>10</sup> Majaari socua Jesucristo pacutenu quiniutianihua cusonu, sesa pa miishanoocuara. Nojuacuajaari tari cusoquiaari, Pueyaso jiyanooniuria puetunu mijiria quiniaa sesa miishanojuanaa. Nojuaja jaara samiitiaquiaariuhua, nojuajaari seetanujuanaa pueyaracaanu rishiriquiano Pueyasora cutara. <sup>11</sup> Naajuhua pueyanaa, tama nia cuaqueyajaaja nia jiyatere juhua macura, maja socua nia miiniuria sesa. Naa niishirijuhua, niaacuajaari Jesucristota samiitiaconohua, Pueyaso tojjijaca nia quiniuria.

<sup>12</sup> Naaratej pueyanaa, majaari nia shanacunu sacuaraatia nioojia seque niishiriojosano nia miiniuria. Seetanujuanaa nia niyaretare tama nia cuaqueya panishanojuaja nia miyaquiniuria. <sup>13</sup> Majaari nia cuaqueya nia panitianu sesa nia miiniuria, taa na pania nia miiniuria juucuacuajani. Saniniuujia, nia cuaqueya nia jiyatere cutara saaja Pueyaso panishano miijia na quiniuria. Niaacuajaari tari samiiticoquiaariuhua juhua macunucua nia quiniujiniji. Naacuajitij, nia cuaqueya nia jiyatere saa maninia miijia na quiniuriaja. <sup>14</sup> Naa jaara nioojajinia cuno sesa niishiriojosano ruuretajaca quiri, niaari na shocotanutaniya, Pueyaso cumaquishacari nijaniya. Naa niishiri, niaari quiarijia Pueyaso tojjitajaca cutara, maja tari Moisés Rootasano tojjijaca.

*Pueyaso tojyashijia pueyani, nojoriiri Sesaaca pueya*

<sup>15</sup> Cua sequesacari nijaniya, pajaniya maja tari Moisés Rootasano tojjiacani, ¿niaateeri cunora sesa miiniutianiya, Pueyaso quishacari pa jiyanoojia? ¡Maja naa nia miiniu pueyanaa! <sup>16</sup> Niaacuajaari niishiya, paa jaara tama pa cuaqueyajaaja jiyatere tamonu camarnu seru pa quiniuriani, naacuajitij, paari pueyaracaanu na tojjia quiniutianiyani. Naajuhua, niaa jaara sesa miijiaca quiriuhua, niaari Sesaaca tojjijaca. Naa sesa miijiaca nia quishacaritij, niaari cusonutaniya. Saniniuujia, niaa jaara Pueyaso tojjiacara quiri, niaari sesa miyashijia quiniutianiya. <sup>17</sup> Tariija, niaari Sesaaca tojjijaca quijia, juhua na seya, sesa miijiaca nia quishacari. Quiarijia, janiyari Pueyaso timitiaani nia tojiniucua Jesucristo rootasano puetunu nioojiatajanaa, taa nia niishitiojosaaquiaaricujani. <sup>18</sup> Jesucristo rupaa nia tojjishacari, Pueyasoori nia jiyatequiaari na muerasu nia quiniuria, maja Sesaaca seya nia quiniuria socua. Naacuajitij, niaari Pueyaso tojjiacara jatanishano, saaja maninia miijiaca nia quiniuria. <sup>19</sup> Janiyari naa pahuataa serujiniji nijaniyani, maatia nia tojiniuria cua niishitiojosano. Majaari juhuanojuaja nia naata puera jiyajeneta niishitiojosano niishiniu, cumueeca Pueyaso muerasu nia quiyaquishacarijia. Tariija, niaari tama nia cuaqueyajaaja jiyatequiaari Sesaaca panishano nia miiniuria. Naacuajitij, niaari jiyanohua sesa miijiacara jiyatequiaari. Naajuhua, quiarijia saniniuujia, tama nia cuaqueyajaaja nia jiyatere Pueyaso panishano nia miiniuria. Naa jaara naa miiri, niaari tojetaarucujanaa maninia miijiaca quiniutianiya Pueyasora.

<sup>20</sup> Naa jaara sesa miijiaca quiquiaari Sesaaca tojjijaca nia quishacarijia, niaari juhuajaniya Pueyaso tojyashijia quiquiaari. <sup>21</sup> ¿Sesaacate maninia nia miiquiaari sesa nia miiniucua nera? ¡Maja! Naa cutaraari saaja caririquiquiaa sacuaraatia casaa nia miiniucua tariija. Niaari quiarijia niishiyajuhua, cante sesa miijiaca quiquiaani, nojoriiri shaajasaariquiano. <sup>22</sup> Naa sesa miyashijia nia quishacari quiarijia saniniuujia, niaari Pueyaso tojjiacara jiyatesaaquiaari, saaja na panishano nia miiniuria cutara. Naa Pueyaso tojjijaca nia quishacaritij, nojuajaari nia jiyatenutaniya seetanujuanaa maninia miijiaca nia quiniuria. Naacuajitij, niaari pueyaracaanu shuquiriaatia rishijia quiniutianiyajuhua. <sup>23</sup> Saniniuujia, sesoriquia pueya miiniucua sesa saaja, nojoriiri naa na miiniucua shaajasaanutaniya. Saniniuujia, saaja Jesucristoocua tiujujia pa quishacari,

Pueyasoori saa cunoraja pa jiyatequiaa pueyaracaanu rishijiaa pa quiniuria, pa Jiyaniijia Jesucristo rupuejaca pa quishacari.

## 7

### *Paari juhua camishanoni*

<sup>1</sup> Pueyanaa, niaacujaari Moisés Rootasano niishijiaa. Niaari niishiyajuhuj, paa jaara shaajequeeni, paari jiyacari Moisés Rootasano cartequue shushani. <sup>2</sup> Naajuhuj, paacujaari rootasaaquiarini, maaji jaara camishano quiri, cuaara tamonu cayata quiyaaquiria, neyaca jaara saminio quiyajaa. Neyaca jaara cusoyare, caminio pueyara Moisés rootasanoori maja tari na quiniu cuno mashiquio tojishocoriquiano. <sup>3</sup> Saniniuujia, maaji jaara tamonu pueyanota quiri quia neyaca quishacaribia saminio, cuno maajiiri sequeshiya paanatuta, naa na quiniuucua tamonu pueyanota. Saniniuujia, neyaca jaara cusoyare, mashiquio camishacari tamonu pueyanota, naajaa, majaari Moisés Rootasano tojiyashijia na quiniu cunora. Nojuajaari maja paanatu, naa na miishacari.

<sup>4</sup> Niaari naajuhuj pueyanaa. Jesucristo cusuucua pa niti, niaari juhua cusuucuaarijuhuaj, maja Moisés Rootasano tojiijiaa nia quiniuria socua. Naacuajitij, niaari tamonu tojiijiaa quiya cutara. Nojuajaari pa Jiyaniijia Jesucristo, nooj, macujiniji samiitiaquiarihuatej. Naacuajitij, quiaribia pa Jiyaniijia Jesucristo tojiijiaa pa quishacari, paari maninia miijiaa Pueyasorani. <sup>5</sup> Tarijia, Pueyaso tojiyashijiaa pa quishacaribia, Moisés Rootasano pa niishishacari maja quenaaja pa miiniuria sesa casaa, cuno rootasanoori saaja juhua socua pa shiniujuquiaari sesa pa miiniuria. Naacuajitij, tama sesa pa miishacaribiaaja, paari tama pa cuaqueyajaaja jiyateriquiaa saniitosano pa quiniuria maquesaashijia mani quiquiojiniani. <sup>6</sup> Tarijia, paari juhua quioosano pueya Moisés Rootasano tojitishaaquiarini. Saniniuujia, Jesucristota pa cusuucua, nojuaja jaara pocuara cusoquiaari, paari tari Moisés Rootasano tojinu cartequiarini. Moisés Rootasano pa tojiyaquishacari quiaribia, naacuajiti pa naata Pueyasojuanaa tojinu shitimia cutara, na Sohanu cumaquishacari pajaniya. Majaari juhua tarijia pueya miishano. Tarijia, paari Moisés Rootasano tojtiajaca quiquiaari maniniani, pa puerenuta paa mariqui saniitosaaereeri pa tojiyaquiniuucua niquiriyatu queraatia na rootasanojiniji.

### *Poojiaari saa sesa miiniu niishijiaa*

<sup>7</sup> Tamasaca naasucuaari jiyaniya janiyari Moisés Rootasano soojeani. Maja. Quiria, jiyano hua maniniacujaari Moisés Rootasano. Moisés Rootasanojiniji, paacujaari niishiyani paari sesa miijiacani. Moisés Rootasano jaara quiyaaquiquia, janiya maara niishiyaaquiquiaarini, cua jiaatiasacari tamasaca jiiitasano casamiicua, cunoori sesa Pueyasora. <sup>8</sup> Saniniuujia, Moisés Rootasanojiniji cua niishishacari maja tamasaca casamiicua cua jiaatianura, janiyari saaja juhua shiniujuushaaquiarini casamiicua jiaatiaja cua quiniuria socuani. Naacuajitij, Moisés Rootasano cua niishiyaaquishacaribia, coojiaari juhuajaniya quiquiaari juhua maqueja. Saniniuujia, janiya jaara Moisés Rootasano niishiquiaarini, coojia sequeeri juhua niucuaquiaari, puetunu sesa casaajanaa na miiniu paniniuria. <sup>9</sup> Moisés Rootasano cua niishiyaaquishacaribia, janiyari juhuajaniya quijia quiquiaarini. Saniniuujia, Moisés Rootasano cua niishishacari, janiyari jiyano hua taraajequiarini, cua niishishacari janiyari jiyano hua sesa miijia Pueyaso niquiarani. <sup>10</sup> Naa sesa miijia cua quishacaritij, janiyari niishiquiaarini, janiyari quera jatashiya saniitosocoriquianoni. Janiya jaara Moisés Rootasano tojiquiaari shushajanaani, janiyari jiyaniquiaarini, janiya jaara cuno rootasano tojrini, janiya naasucuaari pueyaracaanu rishijia quiniutianiyani. Saniniuujia, Moisés Rootasanoori saaja cucuara tonujuquiaari puetunu sesa cua miishanojinijianaa. <sup>11</sup> Naacuajitij, janiyari jiyano hua jiyajenequiarini, cua jiyaniishacari cua naatacuaja Moisés Rootasano tojinu maninia, Pueyaso jiyano niuria janiya. Jaara maja cua naata quiquiaari Moisés Rootasano cua tojinuria maninia, janiyari niishiquiaarini Pueyasoori cua jiyano yaquiniutianiya.

<sup>12</sup> Seetanujuanaa nia sequeyanijia pueyanaa, Moisés Rootasanoori jiyano hua maninia. Tojetaarucujanaa maninia rootasano. Cunoori seetanujuanaa rupaa maniniu Pueyasojiniji. <sup>13</sup> Moisés Rootasano jaara naa maninia quiri, ¿janiyateeri nia sequeyani cuno na rootasanoori pa cusojuaja? Maja. Janiyari nia sequeyani, Moisés Rootasanojiniji, paari niishiyani sesa pa miishano cutaraari jiyano hua sesa Pueyasora. Naacuajitij, paari Moisés Rootasanojiniji niishijiani, paari puetunujuanaa jatasocoriquiano quijia juucuanu, seetanujuanaa sesa miijiaa pa quiniuucua.

<sup>14</sup> Paacujaari niishiyani, Moisés Rootasano, cunoori maja nareja pueyano niishitiojosano. Pueyaso niishitiojosano cuajaari pa tojishocoriquiano puetunu poojiatajanaa. Saniniuujia, coojiaari Pueyaso tojiyashijia. Janiyari tamajaaja juhua coojia seruni, na panishano cua miiniuria. Naa sesa juujiaraca cua quishacaritij, majaari cua naata Moisés

Rootasano tojiniu. <sup>15</sup> ¿Casaara naa sesa cua miiquiaani? Janiyari saaja cua niishishano sesa casaa miiquiaani. Majaari maninia cua miiniu quiquiaa, taa cua paniyacuajani. <sup>16</sup> Janiya jaara cua panishoo sesa casaa miirini, naacujitij, janiyari sequequiaani, Moisés Rootasanoori seetanujuanaa maninia. <sup>17</sup> Naa cua panishoo sesa casaa cua miishacaritij, cunoori maja tama cua miishanojuaja. Cuno sesa cua miishanoori coojiajiniji supueno tamajaaja. <sup>18</sup> Quiaririja niishiya cutaranijia, coojaari tojetaarucujanaa sesa miiniu niishijia. Naacujitij, janiyari juucua maninia miiniucua jiaatiaquiaani. Naajaa, majaari cua naata quiquiaa maninia cua miiniuria tamajaaja. <sup>19</sup> Naacujitij, cua miishanoori maja maninia, taa cua miiniu paniquiaa juucacuajani. Cua miishanoori saaja cua miiniu paniyaquishoo quiquiaa. <sup>20</sup> Naacujitij, janiya jaara cua panishoo sesa casaa miirini, janiyari niishiyani, cunoori tama coojiajiniji supuenojuaja, majaari tama cua miiniu panishanojuaja.

<sup>21</sup> Quiaririja niishiya cutaranijia, janiyari naa sesa miijiani: janiya jaara maninia casaa miiniu paniyani, janiyari saaja sesa miiquiaani. <sup>22</sup> Janiya cutaraari niishiyani Pueyaso rootasano Moisésri seetanujuanaa maninia cua tojishocoriqiano. Na tojiniucua jiaatiaquiaa juucuanijia. <sup>23</sup> Janiyari niishiyajaniuhua, coojaari juhua cua niishitaja paraca quiya. Naacujitij, cua niishiriojosacari, “Maninia miiniutianianijia”, coojaari saaja sesa cua miitiquiaa. Naacujitij, tama janiyajaaririja juhua coojia seruni, cua miishacari puetunu sesa na panishanojuanaa.

<sup>24</sup> ¿Taa cua miiniutianiya socuaarini? ¡Tojetaarucujanaa taraatia quijianijia! Pueyaraaanu sesa miijianijia. Majaari cua naata tamajaaja maninia miijia cua quiniu. Naa sesa miijia cua quishacaritij, cua cuaqueyari macu quiriquiano. ¿Cante na naata cua jataniniuni, naa sesa miijia cua quishacaritij? <sup>25</sup> ¡Pueyaso shuquiritiaanijia cua niishishacari, nojuacuajari cua jiyaniijia Jesucristota cua jataniniutianiya tojetaarucujanaa maninia miijia cua quiniuria! Naacujitij, mijiria cua quishacaririja, janiyari Pueyaso tojjia quiniu paniyani. Saniniuujia, naa coojia quiniucua sesatej, saaja sesa cua miitiniu paniquiaari.

## 8

### *Pueyaso Sohuanu pa tojishacari, paari maninia miijia quiniutianiyani*

<sup>1</sup> Pa rupuesacari Jesucristo, nocua pa tiuushacari, Pueyasoori pa jiyanooquiaa. Naacujitij, paari tojetaarucujanaa jiyanooshano quiyani. <sup>2</sup> Puetunu pueyajaarari cusonuuriqiano quijia, sesa miijica nojori quishacari. Saniniuujia, Jesucristo pa rupuesacari, Pueyaso Sohuanuuri pa jiyatequiaa saaja maninia miijica pa quiniuria. Naacujitij, majaari tari sesa miijica pa quiniu pa saniitiosaanura. <sup>3</sup> Moisés Rootasano pa tojishacari juucua, majaari pa naata quiniu jiyanooshano. Cunoori saaja sesa miijica pa quiniucua. Naaratej, Pueyasoori Neyanujuanaa jiyaroquiaari mijiria, pueyano na quiniuria juhua pajaniya, pa niti na mosaanura. Naacujitij, Jesucristo jiiitiasacari juhua pa cuaqueyajuhaaj, Pueyasoori juhua sesa miijara na jiyatequiaari, pa niti na saniitiosocoriqiano. <sup>4</sup> Naacujitij, Pueyaso Sohuanu pa jiiitiasacari quiaririja, pa naata maninia miijica quiniu, taa Moisés Rootasano sequeyacuajani. Pueyaso Sohuanu tojjia pa quishacari, majaari tari pa quiniu sesa miijica, taa pa quiquiaari tarijacujani.

<sup>5</sup> Canapuate tama na panishanojuaja miiquiaani, nojoriiri tama na cuaqueyajaaja shuqiritiniuria jiaatiaquiaa. Saniniuujia, canapuate Pueyaso Sohuanu tojjia cutarani, nojoriiri saaja Pueyaso shuqiritiniuria jiaatiaquiaa. <sup>6</sup> Tama na cuaqueyajaaja shuqiritiniuria jiaatiajacaari saaja shaajecoriqiano cutara. Saniniuujia, Pueyaso shuqiritiniuria jiaatiajacaari pueyaracaanu rishiriqiano cutara. Nojoriiri juhujaniya shuqiritiatia quijiacajuhua. <sup>7</sup> Cante tama na cuaqueyajaaja shuqiritiniuria jiaatiaquiaani, nojuajaari Pueyaso paraca. Majaari Pueyaso tojjia na quiniu paniniu. Seetanujuanaa majaari na naata Pueyaso tojjia na quiniujuhua. <sup>8</sup> Naacujitij, canapuate saaja tama na cuaqueyajaaja shuqiritiniuria jiaatiaquiaani, cuno pojoriiri maja na naata Pueyaso shuqiritiniu.

<sup>9</sup> Nijaniya cutaraari maja nia quiniu juhua cuno pojoriirija, tama na cuaqueyajaaja shuqiritiniuria jiaatiajacani. Naa cutaraari Pueyaso shuqiritijia, Pueyaso Sohuanu cumaquishacari nijaniya, nojuaja jaara seetanujuanaa noojiajinia quiya. Cante Pueyaso Sohuanu jiiitaaquiyani, nojuajaari maja Pueyaso pueyano. <sup>10</sup> Cristo quishacari poojiajinia, pa sohuanuuri tari jatanishano quiya maninia miijica pa quiniuria, pueyaracaanu rishijia pa quiniurajuhaaj. Pa cuaqueya cutaraari shaajasocoriqiano, sesa miijica pa quiniucua. <sup>11</sup> Naajaa, Pueyaso Sohuanu jaara poojiajinia quiya, nojuajaari pa cuaqueya samiitianiionutaniuhua, taa na samiitianiiquaariuhua macujiniji Jesucuaani.

<sup>12</sup> Naa Pueyaso miishacari maninia pajaniyatej, maninia miijiaca pa quiri Pueyaso Sohanu cumaquishacari pajaniya. Maja cumaati tama pa cuaqueyajaaja pa shuquiri-tiniuria pa jiaatianu tari, taa pa miiquiaari tarijiacuajani. <sup>13</sup> Cante naa miijiaca quiya-jaani, nojoriiri shaajasaariquiano. Saniniuuja, niaa jaara Pueyaso Sohanu cumaacata rejeretariquia saaja tama sesa nia cuaqueya miiniu panishanojuaaja, niaa cutaraari pueyaracaanu shuquiriaatia quijiaca quiniutianiya.

<sup>14</sup> Canapuate Pueyaso Sohanu tojtiajacani, nojoriiri Pueyaso niquiohua cutara. <sup>15</sup> Pueyaso Sohanucuaajaari pa jiyatequiaari Pueyaso muerasuniyojua pa quiniuria. Naacujitij, cuno pa jiiitasano Sohanuuri Pueyaso pa sequetequiaa, "cua Quenaa". Naa Pueyaso muerasuniyojua pa quishacaritij, majaari tari pa puerenu paari saniitiosaanutaniyani, Moisés Rootasano pa tojiyaquiniucua. <sup>16</sup> Pueyaso Sohanuuri pa sohanu rupuequiaa, na niishitiniuria pajaniya, paari Pueyaso muerasuni. <sup>17</sup> Naa Pueyaso muerasu pa quishacaritij, puetunu Pueyaso jiiitasanojuaanaari pa jiiitasano quiniutianiya-juhuaj. Pueyasoori Neyanu Jesucristota pa cojiritianutaniya naa maninia na miiniuria pajaniya, paa jaara naquiya miiniu rejeretajaca quiririni, Jesucristoocua tiuuijaca pa quiniucua. Paa jaara naquiya miishaare nocuara mijiriani, paari jiyanojua maninia quijiacara jiyatesaanutaniyani juhua nojuajuhuaaj.

*Pueyasoori maninia miiniutianiya na muerasu*

<sup>18</sup> Quiarijia mijiria naquiya pa miiniuni, cunoori saaja rupaquijia. Janiyara, naa-jaaj, cua niishishacari naa naquiya pa miiniu nuhuajitij, paari jiyanojua maninia miishaanutaniyani, pueyaracaanu shuquiriaatia pa quiniuria. <sup>19</sup> Quiarijiani, puetunu Pueyaso shipinishano casaajanaari pa niquiniucua jiaatiaa paa jaara quiariniora jatanishaareni. Na niishiniu paniyari taamueca quijiacara Pueyaso jataniniutianiya pajaniya na cumaacatani, tojetaarucuaajanaa maninia jeenucuasano na muerasu pa quiniuria. <sup>20</sup> Coteenujuanaa pa supuetana pueyano jaara juhuacatecara sesequiaari, jiyacaritij, puetunu Pueyaso shipinijosano casaajanaari sesequiaarijuhuaj. Majaari na sesenu quiquiaari tama na panishacarijiaaja. Pueyasocuaajaari naa paniquiaari sesa na quiniuria, na shipinishano pueya sesenucuajuhuaaj. Naajaa, majaari pueyaracaanu sesa na quiniu quiniutianiya. <sup>21</sup> Pueyaso muerasu jaara jatanishaare shacantuuca quijiaca pa quiniuria, jiyacaritij, puetunu Pueyaso shipinijosano casaajanaari pata cojiritiasaanutaniya jeecanujuhuaaj. Naacujitij, puetunu Pueyaso shipinijosano casaajanaari maniniera quiniutianihua, maja na sesenura socua. <sup>22</sup> Quiarijiani, puetunu Pueyaso shipinijosano-juanaari jiyanojua noojia niojija taraatia na quishacari. Quiatojiyari juhua maaji noyano, cuara quiariniora jatanishaarejaatijia. <sup>23</sup> Majaari saaja puetunu Pueyaso shipinishano casaajanaa quiatotojua, poojiaari juhua quiatotojijuhuaaj, na panishacari tojetaarucua-janaa jatanishano quijiaca pa quiniuria. Paacuaajaari tari jiiitaa Pueyaso Sohanu poojiajiniani, pa niishiniuria, paari seetanujuanaa Pueyaso muerasuni. Saaja pa cuaqueya cutaraari juhanuojua jatanishoojua. Paari cunora quiatotojijajaani. <sup>24</sup> Paacuaajaari tari Pueyaso muerasu quiani. Jesucristo cutaraari pa saquiriojoquiaari shacantuuca quijiacara pa jatanishaanura. Paari naa na jataniniuria pajaniya sashiyajaani. Pa cuaqueya jaara tari jatanishano quiriquia, paa maara na jataniniucua jiaatiaaquiririni. Paa jaara tari jiiitariquia pa panishanoni, ¿paatucua casaara nocua jiaatiare socuani? Pa cuaqueya cutaraari juhanuojua jatanishoojua. <sup>25</sup> Naajaa, paacuaajaari niishiyani pa cuaqueyari jatanishaanutaniya, jiyocuacaanu pa rupenura pa jiyaniijia. Cunora, paari mijiria taraatia pa quishacari juhuajaniya rejeretaquiaani pueyaracaanu pa sashishacari.

<sup>26</sup> Naa rejeretajaca pa quishacari mijiria pa sashishacari pueyaracaanutej, Pueyaso Sohanuuri pa cumaquiquiaa, cumueca pa quiaquishacari. Naacujitij, Pueyaso pa secojosacari, pa niishiyacquishacari casaacuara pa secojonutaniyani, Pueyaso Sohanucuaajaari poojiajiniji Pueyaso secojoquiaa pocuara. Jiyanojua na secojosacari pocuara, jiyasohua quiatotojija poojiajiniaari. <sup>27</sup> Poojia niishijia Pueyasoni, nojuajaari niishiyacuaja casaa na Sohanu secojija nojuaja pocuarani. Na Sohanucuaajaari maninia secojojua cutara, taa Pueyaso miiniu paniya na muerasuracuajani.

*Jesucristo pa shocotanjia cutara*

<sup>28</sup> Paacuaajaari niishiyani, paa jaara maninia miishaareni, paa jaara sesa miishaare-juhuaj, Pueyasoori puetunu cuno miishanojuanaa jiyatequiaa saaja maninia na quiniuria na panijiacara. Nojuacuajaari pa saquiriojoquiaari na muerasuniyojua pa quiniuria. <sup>29</sup> Naajuhuaaj, jiya shipiniyaquishacarijia, Pueyasoori tari niishiquiaari na panishano pueyarano. Pueyasoori jiyacari sequequiaari cuno pojoriiri juhua Neyanu Jesucristo quiriquianojuhuaj. Naa sequequiaariiri Jesucristo quiniuria pa puerana, queraatia tapueyocucaraca na quiniuria. <sup>30</sup> Naacujitij, canapue Pueyaso saquiriojoquiaari na muerasu nojori quiniuracuajani, juhua Jesucristo nojori quiniurajuhuaaj, Pueyasoori

cuno pojori niishitiquiaa nojori tiuuniuria Neyanuucua. Jesucristoocua nojori tiushacari, Pueyasoori nojori jiyatequiaa juhua sesa miyashijiacara. Jiyanooshano nojori quishacari, Pueyasoori nojori niqutioquiaa na Sohuanu, na Sohuanu jataniniuria nojori shacantuuca quijiaca nojori quiniuria juhua Neyanu.

<sup>31</sup> Naa Pueyaso miishacari maninia pajaniyatej, ¿taa pa sequeyani? Pueyaso jaara pa jiyano quiya, ¿tamonute na naata sesonu pajaniya? ¡Maja! <sup>32</sup> Pueyasoori jiyanoohua pa panijia. Nojuajaari Neyanuniyojua jiyaroquiaari pocuara mosocoriquiano. Nojuaja jaara Neyanu jamueyaquiquiaaricuaa, ¿maatucua casaara quiarijia niqutioyaquiri puetunu pa panishanojuanaani? <sup>33</sup> ¿Cantucua Pueyaso saquiriojosano pueyacuara saquiriojotare sesa nojori miishanoni? Pueyasojuanaacuaajaari pa jiyatequiaari juhua sesa miyashijiaca pa quiniuria. <sup>34</sup> Jesucristocuaajaari tari cusoquiaari pa niti. ¿Cantucua saniniuuja quiarijia Pueyaso sequeriquia pocuarani: “Cuno pojori quia shaajare”? Pocuaji Tacunacuaajaari samitiiaquiaruhua. Quiarijia na Que Pueyaso miaquetajara cajiyari, pocuara na Que na secojonura pueyaracaanu. <sup>35</sup> Nojuajaari jiyanoohua pa panijia. ¿Tamonu casaate na naata Cristo tarinitiniu maja na paniniuria pajaniya? ¡Majaari quenaaja casaa quiniu na tarinitiniuria nojuaja! Naaratej, majaari nia jyaniniu Cristo pa paniyaquiya, paa jaara taraatia miishiyani, paa jaara casaacua tacayani, tamasa jaara naquiya miya pajaniyani. Naajuhua, paa jaara quera titiacoya pa miaajenutani, majaari nia jyaniniu Cristo pa paniyaquiyani, naajuhua, paa jaara toqueju quiyani, paa jaara cocuaatia miyani, paa jaara miananajoshiya monurajaniuhua. Puetunu niojuanaari maja na tarinitiniu Jesucristo, na paniyaquiniuria pajaniya. <sup>36</sup> Paacuajaari taraatia miishocoriquianoni, naatej, taa tariucuaaanu Pueyaso Rupaajinia naajiotasano quiyacuajani. Naa sequeyari:

“Canaa Pueyasonaa, canaari puecooshiya pueyaracaanuni, quia tojitiajaca canaa quiniucua. Nojoriiri juhua miaquesocoriquiano borregohua canaa puecoquiaa juhua-janiya”.

<sup>37</sup> Paari naa miishaquiaajaaniuhua. Naajaa, naa taraatia pa miishacarij, Jesucristo panishacari pajaniya, nojuajaari shocotajacara pa jiyatequiaa. Naacuajitij, majaari saaja pa rejeretanu naquiya pa miishacari. Jesucristoori seetanujanaa cuno naquiya pa miiniu jiyatequiaa maninia na jecanura pajaniya, juhua nojuaja pa quiniuria socua. <sup>38</sup> Seetanujanaa niishyanijia, Pueyaso panishacari jyanohua pajaniya, majaari quenaaja tamonu casaa na naata rupatanu pajaniya Nojuajiniji. Paa jaara quiri saminiujuani, macu soj, naajaa, pa panijia Pueyasocuaajaari pata quiyajaa. Naajuhua, Pueyaso seya, samaruhanio, puetunu cunoujanaari maja na naata pa rupatanu Pueyasocuaaji. Naajuhua, majaari quenaaja tamonu cumaacaraca quijiaca na naata pa rupatanu Pueyasocuaaji. Pueyaso paniniu pajaniyani, cunoori maja na puequenu quiniutianiya quiarijia, tamacarinio. <sup>39</sup> Naajaariuhua, tee pa quiyani, jiyocuaaanu, jiya cariquimia soj, naajaa. Pa panijia Pueyasoori tii quiya patajuhua. Naacuajitij, pa Jiyaniijia Jesucristota rupuetootesano pa quishacari, puetunu Pueyaso shipinijosano casaajanaari maja na naata pa rupatanu Pueyasojiniji.

## 9

### *Pueyasojanaari pueya saquiriojojua na pueyara*

<sup>1-3</sup> Naa Pueyaso pueyano cua quishacarij, janiyari jyanohua cuarta Israel pueyacuara taraajequiaani, nojori tiyaquiniucua pa Jiyaniijia Jesucristoocua. Janiyari pueyacaanu nojoricua taraajequiaa jyanohuani, maja cua naata quishacari cuarta Israel pueya tiutiniu Jesucristoocua. Seetanujanaa nia sequeyanijia, Pueyaso jaara na naata quiri mani quiquiojinia na jatanura janiya nojori niti, janiya maara sequereni, maniniacuaajaari naa cua miishaanura. Nojori jaara na naata quiri Jesucristoocua rupuetesaanu cua niti, janiya maara Pueyaso sequereni: “Cua rupatare cutara Jesucristojiniji, saniya cuarta Israel pueya jiyatesaanura Pueyaso muerasura cutara”. Naa cua sequesacari niajaniatej, janiyari coojiajinia niishiyani, seetanujanaari cua sequesano. Pueyaso Sohuanuuri cua niishitijuhua majaari cua sapojonu. <sup>4</sup> Cuarta Judiocuaaari pa supuetana Israel niqiohuacuajinio supueno pueyacuaja. Pueyasoori nojori jiyatequiaari na muerasu nojori quiniuria, nocua nojori tiushacari. Pueyasoori nojori niqutioquiaari shacantuuca na cumaaca, tariucuaaanu nojoritia na quishacari. Pueyasoori nojori sequequiaari: “Janiyacuaajaari Pueyasoni. Niaari cua pueya quiniutianiya niaa jaara cucua tiuuri”. Naajuhua, Pueyasoori Moisés niqutioquiaari caapiqui saajianecua na naajiosano, saniniuuja Moisés niishitiojonura tiji nojori. Pueyasoori nojori niishitiquiaarijihuua taa nojori miiniutianiyan, tariucua jiyanooshano nojori rerejonura na niqiara. Pueyasoori

nojori sequequiaarijuhuaj, nojuajaari puetunujuanaa na sequesano Abraham tohua-teenutaniya nojoriria. <sup>5</sup> Israel pueya supuetanaari quiquiaari Abraham, Isaac, Jacobonio. Pa Jiyaniijia Cristoori cuno pojori niquiohuacuajinio supuequiaari. Nojuajaari tari jiyatesaaquiaari Jiyaniijijajanaa na quiniuria, puetunu casamijijanaa jiitiana na quiniuriajuhuaj. Nojuajaari Pueyasojuhuanajaj, juhua na Quejuhuaj. ¡Nojuaja cuara pueyaracaanu maniniuhuaqueetasano quiiria! ¡Cuara naa quiiria pueyaracaanutej!

<sup>6</sup> Quiarrijiani, queraatia parta Israel pueyajinijinio pueyari maja Pueyaso muerasu. Naa cua sequesacari nijaniyatej, majaari nia jiyaniniu tariucuacaanu Pueyaso sequesano pa supuetanaari tohuateyaquiniutianiya. Maja pueyanaa. Tohuateenutaniyanocujaja. Jaara naa quiriritij, ¿casaara puetunu Israel pueyajanaa maseyaquiniutianiya Pueyaso sequesano nojoririarinari? Cua tojitiare pueyanaa. Puetunu pa supuetana Israel niquiohuacuajinio supueno pueyajanaari maja seetanujuanaa Israel pueya Pueyasora. <sup>7</sup> Naajaariuhua Abraham niquiohua. Puetunu Abraham niquiohuajanaari maja seetanujuanaa Abraham niquiohua na quiniu quiquiaari Pueyasora. Pueyasocujajaari naa sequequiaari Abraham: “Cua sequesano quiajanijari saaja quia niyanu Isaaccuajinio supueno pueyarano quiniutianiya cutara”.

<sup>8</sup> Naa Pueyaso sequesacari Abrahamtej, naacuajiti paari niishiyani, majaari puetunu Pueyaso saquiriojosano pueyacuajinio supueno pueyajanaa seetanujuanaa Pueyaso muerasu. Saniniuujia, seetanujuanaa Pueyaso muerasu cutaraari noo pojori, Pueyaso sequesanoocua tiuujiacatej, taa pa supuetana Abraham tiuquiquaari Pueyaso sequesanoocuaacuaani. Pueyasora, nojori cutaraari Abrahamcuajinio supueno pueya. <sup>9</sup> Abrahamri Pueyaso sequesanoocua tiuquiquaari, Pueyaso jaara naa na sequequiaari: “Abrahamnaa, janiyari quiocua tacatenutaniuhua tamacarini. Janiyari jiyacari quia niqiuo Saara riuriatanutaniuhua tariucua mueyaracani”.

Naacuajitij, Isaac jaara rasaaquiaari, Pueyaso sequesanoori tohuatteequiaari. Naacuajitij, puetunu Abraham niquiohuajinijiojuanaani, saaja Isaacri Pueyaso saquiriojosano pueyano quiquiaari.

<sup>10</sup> Naa quiquiaariijaariuhua Isaac niquiohua. Isaac jaara neco Rebeca manajoquiaari, Rebecaari caapueya manajequiaari. <sup>11-13</sup> Cuno caapueya royaquishacarijia, juhuanojuaja nojori niishiyaquishacari maninia miiniu, sesa soj, jiyacariti Pueyasoori na nucua sequequiaari:

“Janiyari quia jiyapueranu jiyatenutaniya na nuhuajishana tojijiarani”.

Naa Pueyaso sequesacaritij, cunoori juhua Pueyaso sequesano tariucuacaanu. Naa sequequiaari cuno royaquishoojua caapueyajinijiiri:

“Jacoboori cua panishano quiniutianiya. Esauuri saniniuujia cua soosano quiniutianiyacuaja”.

Naa Pueyaso sequesacaritij, paari niishiyani, Pueyasoori saquiriojoquiaa cana na saquiriojonu paniyacuajani, tama na miiniu panishanojuaja na tohuateenura. Naacuajitij, Pueyaso jaara saquiriojore pueya, nojuajaari maja na niishiriojonu nojori miishanojiniji; maninia, sesa soj.

<sup>14</sup> Naa Pueyaso miishacari tama na panishanojuajatej, ¿taa pa sequeyani? ¿Pueyasote sesa miya, naa rimiajata na saquiriojosacari pueyatej? Maja. <sup>15</sup> Pueyasocujajaari naa Moisés sequequiaari:

“Janiyari pueya jiyanoonutaniyani teyano pueyano cua jiyanooniu paniyacuajani. Naajuhuaaj, janiyari pueyanoocua taraajenutaniyani, teyano pueyanoocua cua taraajenu paniyacuajani”.

<sup>16</sup> Naacuajitij paari niishiyani, pueyano maja na naata tama na cuaqueyajaaja jiyatenu Pueyaso pueyano na quiniuria. Pueyasocujajaari tama saquiriojoquiaajaaja cana na jiyanooniu panijani. <sup>17</sup> Naajuhuaaj, tariucuacaanu Pueyaso sequesano Egipto jiyaniijiaaraari naa naajiotasano quiyajuhuaaj:

“Faraónnaa, janiyari quia jiyatequiaari Egipto pueya jiyaniijia quia quiniuriani, cua cumaacata cua mijiosano cua niqutinuria quiajanija. Naacuajitij, puetunu jiyacajinia quiniaa pueyapuejanaari niishiniutianiya, janiyari Pueyasojanaa cutarani”.

<sup>18</sup> Naacuajitij, paari niishiyani, Pueyasoori taraajaja teyanocua na taraajenu panijani. Naajaariuhuaaj, nojuajaari na tojiyashijia pueyano jiuujia jiyateja cumajiuujiaacara, teyano pueyano jiuujia na jiyatenu paniya naaracuajani.

<sup>19</sup> Naa cua sequesacari nijaniyatej, tamonu naasucuaari sequenutaniya: “Pueyaso jaara naa miiquiaa taa na miiniu paniquiaacuajani, ¿maatucua casaara sesa pa miiniuucua pa saniitioreni? ¿Canteeri na naata Pueyaso tarinitiniu na miiniu panishanojinijini?”

<sup>20</sup> Majaari naa sequenu pueyanonaa. ¿Canteeri quiajanijani, naa quia juaaniuria Pueyasotej? Paacuajaari na shipinishano pueyani. ¿Taa nia sequeyani? Marau jaara pocuanu niishiriquia, ¿nojuajate na naata na paninia juaani: “Juashiquiaracanaa, ¿casaara quia

panirii conatura janiyani?"? <sup>21</sup> Paniyojojuacuajaari na naata paniniu maraujiniji na panishano casaa, shanohua pataconiyojua, mashaca quiquiora manijinia cajitiriQuiano conatunio.

<sup>22</sup> Naajuhua, ¿taa pa sequenutaniyani, Pueyaso jaara niishitini paniya na juaaniu, na cumaacanio, na saniitiosacari sesa miijiaca? Naajaa, Pueyasoori jiyanoohua rejeretaquiaa sesa miijiaca, cante tari saniitiosocoriquiano quiyacuajani. <sup>23</sup> Pueyasoori naa tarishiyajaara na sanitionura na tojitiashijiaca pueya. Naa na tarishishacaritij, nojuajaari pueya niishitiquiaa na shacantuuca cumaca, maninia na miishacari na jiyanooshano pueya, cante tari saquiriojosano quiya na shuriucua quiriQuianocujani. <sup>24</sup> Paacuajaari cuno jiyanooshano pueyani, canapue tari Pueyaso saquiriojoquiaaricujani Judiocacajinijinio, taucuacajinijinio. <sup>25</sup> Naa naajiotasano quiyacuajaari Pueyaso sequesano supuetana Oseas naajioneejinia:

“Cante cua pueya quiyacuajiaarini, janiyari nojori sequenutaniyani: ‘Niaari cua quiquihuaniyojua’. Naajuhua, cante cua shuquiritiasoo pueya quiquiarini, nojoriiri cua timitiasano pueyara quiniutianiya”.

<sup>26</sup> Naa naajiotasanoori quiyajuhua:

“Tee cuniqui naa pueya sequesaaquiaaricujani: ‘Niaari maja cua pueya’, nojoriiri cuniquijia jiyaniquishaanutaniya: ‘Niaari Pueyaso niquihujanaa cutara’ ”.

<sup>27</sup> Saniniuujia, supuetana Isaíasri naa sequequiaari Jacobo niquihucuaajinio supueno pueyajiniji:

“Israel pueyari jiyanoohua canenutaniya, juhua shoniniacu caminia shuriuquioco paajia jaaquia, serojosoo. Saniniuujia, saaja secaja nojorinjiniioori Pueyaso pueyara jatanishaanutaniya. <sup>28</sup> Pueyasoori mijirira na sequesano tohuateenutaniya. Majaari na tarishiniu quiniutianiya”.

<sup>29</sup> Supuetana Isaíascuajaari naa sequequiaari tarijiajuhua:

“Pa Jiyaniujia Pueyaso jaara Israel pueya niquihua jiyanoaquiquiaari, Israel pueya maara quiaritia quiyaquiri. Maara tari shaajasaacanu tojetaarucujanaa, naatej, taa Sodoma tiacajinia quiniaa pueya puecoosaaquiaaricuaani, Gomorra tiacajinia quiniaa pueyano”.

#### *Judiocuaari Pueyaso rupaacua tiuyashijiaca saaja*

<sup>30</sup> Naa cua pohuatasacari niajaninya tariucuaaanu Pueyaso Rupaajinijitij, paari quiaritia nio niishiyani: taucuacaari maja quenaaja na tacaaniu quijia taate nojori naata Pueyaso jiyanooshano quiniuni. Nojoriiri juhuajaniya quijia saaja. Naajaa, quiaritia, Pueyasoori nojori jiyatequiaa juhua sesa miyashijacara, saaja Jesucristoocua nojori tiushacari.

<sup>31</sup> Israel pueyari saniniuujia jiyanoohua Moisés Rootasano tojijiaa juucua, nojori jiyaniishacari Pueyaso naasucuaari naa nojori miishacari nojori jiyanooniutianiya. Majaari Pueyaso jiyanooni quijia nojori. <sup>32</sup> ¿Niaate niishiya casaara Pueyaso jiyanoaquiquiaari nojorini? Pueyasoori nojori jiyanoaquiquiaari nojori tiyacuquiniucua nocua. Nojoriiri jiyaniquiaari tama nojorijiaaritia na naata tama nojori cuaqueyajaaja jiyatenu juhua sesa miyashijacara, Moisés Rootasano nojori tojishacari. Naaratej, majaari nojori tiuuni quiquiaa Jesucristoocua. Nojoriiri saaja na sooquiaa. Naacuajitij, Jesucristoori juhua saaja nojoriria, nocua nojori tiuriiniuria. <sup>33</sup> Jesucristojiniji miriqui Pueyaso sequesano cuajaari naa naajiotasaaquiaari tariucuaaanu, Jesucristo niyacarija:

“Cua tojitiare. Janiyari Sión tuhananuucua nianutaniya saajiani, pueya tiuriiniuria nocua. Saniniuujia, cante nocua tiyani, nojoriiri puetunu Pueyaso sequesanojuanaa na muerasurano masenutaniya”.

## 10

<sup>1</sup> Cuarta Pueyaso muerasunaa, janiyari jiyanoohua Pueyaso secojoquiaani parta Israel pueyacuara, Jesucristoocua nojori tiuiniuria, Pueyaso pueya nojori quiniurajuhua. Janiyari jiyanoohua nojoriicua tacayani. <sup>2</sup> Janiyacuajaari seetanujanaa niishiyani, Israel pueyari seetanujanaa Pueyaso panishano miini panijiaa juucua, na mueraso nojori quiniuria. Nojoriiri naa miiquiaa najuhuanaj, nojori niishiyaquishacari maninia. <sup>3</sup> Nojoriiri saaja sequequiaa, majana Pueyaso naata pueya jiyanooni saaja nojori tiushacari nocua. Naaratej, nojoriiri jiyanoohua saniniuujiquiaa maninia nojori quiniuria Pueyaso niquiara tama nojori miishanotajaaja. Naacuajitij, nojoriiri Jesucristoocua tiyacuquiaa Pueyaso jiyanooniuria nojori. Pueyasojuanaari Cristo jiyatequiaari pa niti mosocoriquiano. <sup>4</sup> Naacuajitij, Cristo jaara mosaaquiaari, nojuajaari Moisés Rootasano tojinu tohuateequiaari cutara. Naacuajitij, Pueyasoori puetunu nocua tiuuniaajanaa jiyatequiaa juhua sesa miyashijacara. <sup>5</sup> Moisés cuajaari naajioquiaari taa na rootasano



tojjiaca miiniutianiyani, juhua sesa miyashijiaca nojori quiniuria. Nojuajaari naa naajioquiaari:

“Cante puetunu cua rootasanojuanaa tojjiani, nojuajaari pueyaracaanu rishijiara jiyatesaanutaniya”.

<sup>6</sup> Saniniuujia, saaja Jesucristoocua pa tiuushacari, paari juhua sesa miyashijiacara jiyatesaaquiaani, pueyaracaanu rishijiaca pa quiniuria. Naacuajitij, majaari naa nia niishiriojonu nioojiajinia nia taacanusacari: “¿Cante na naata jiyocuacaanu tacanu Jesucristo na roshiniuria Pueyaso pueyara na jataniniuria pajaniyani?” <sup>7</sup> Naajuhuaaj, majaari naa nia niishiriojonu: “¿Cante na naata macunucua quiquojinia quianu, Jesucristo na tacaniniuria pocuani?” ¡Pueyanaa, majaari quenaaja naa nia niishiriojonutej! <sup>8</sup> Pueyaso Rupaacuajaari tari naa naajiotasaaquiaari pajaniyara:

“Niaacuajaari cua rupaa jiiitiaa. Niaari na niishiyajuhuaaj, Nioojiajinia quiyacuajaari”.

Cuno rupaa canaa na pohuataquiaa nijaniyani, cunocuajaari Jesucristoocua nia tiuuniuria. <sup>9</sup> Naacuajitij, Pueyasoari pueya jiyatequiaa na pueya nojori quiniuria, Jesucristoocua tiuujia jaara pueya niquiara pohuatare: “Jesucristoori seetanujuanaa Jiyaniijajanaa cutara”, noojiajinia na niishishacarijuhuaaj Pueyasoari Jesu samitiianiquiaariuhua macujiniji. <sup>10</sup> Seetanujuanaa naari: pojiata pa tiuushacari Neyanucua, Pueyasoari pa jiyateya juhua sesa miyashijia pa quiniuria. Naajuhuaaj, pa rupaata pa pohuatasacari: “Janiya Jesucristoocua tiuujiani”, jiyacaritij, Pueyasoari pa jataniquiaa na pueya pa quiniuria cutara.

<sup>11</sup> Tariucuaacaanu Neyanujiniji Pueyaso sequesanoori naa naajiotasano quiyajuhuaaj:

“Puetunu nocua tiuniaajanaari puetunu cua sequesanojuanaa cua muerasurano masenutaniya”.

<sup>12</sup> Naacuajitij Judiocuaca, mariyata taucacanio, nojori jiyanooshaanutaniya nojori jaara sequere: “Jiyaniijanaa, cua jiyanoori”. Pa Jiyaniijiaari maja rimiajata na jiyanooni nocua tiuujiaa pueya. Nojuajaari jiyanoohua capora. Jiyaniijajanaa cutaraari.

<sup>13</sup> Tariucuaacaanu Pueyaso Rupaajiniaari naa naajiotasano quiyajuhuaaj:

“Puetunu pueyajanaari Pueyaso pueyara jatanishaanutaniya nojori jaara Jiyaniijia sequere: ‘Jiyaniijanaa, cua jiyanoori’”.

<sup>14</sup> Jaara naa quiriritij, ¿pueyatucua taa Jiyaniijia secojonuureni, nojori jaara nocua tiuyaquiyajaa? Naajuhuaaj, ¿pueyatucua taa nocua tiuurini, nojori jaara nojuajiniji pohuataaquishoo quiyajaa? ¿Nojoritiucua taa nojuajiniji niishijia quirini, tamasaca jaara quenaaja nojori pohuataaquiri? <sup>15</sup> ¿Pueyaso Rupaa pohuataanaatucua taa cuno pojoricua quiaareni, nojori jaara jiyaramiquiyaaquishaare? ¿Pueyaso rupaa pohuataanaate jiyaramiquiyaaquishaaquiaari? ¡Maja! Jiyaramiquishaaquiaaricuaaja. Naaratej, naa naajiotasano quiyari tariucuaacaanu Pueyaso Rupaajinia:

“Jiyanoohua timitiasano pueya cutaraari, noo pojori canapuede tamasacaacua quiajani, nojori na pohuatanura Pueyaso rupaa”.

<sup>16</sup> Naajaa, majaari puetunu pueyajanaa tojiniu quiquiaa, Pueyaso Rupaa jaara nojori niquiara pohuatasaaare. Naacuajitij, supuetana Isaíasri naa sequequiaari na taraajenuta: “Jiyaniijanaa, majaari pueya tojiniu paniniu canaa pohuatasano quiajanijiniji”.

<sup>17</sup> Naacuajitij pueyanaa, paa jaara Jesucristo rupaa pohuatasaaareni, paari na numaata na tojjiani. Paa jaara pa tojjishanoocua tiuurini, Pueyasoari pa jiyatenutaniya na pueya pa quiniuria.

<sup>18</sup> Pa jaara Pueyaso pueyara jiyatesaaquiaa saaja pa tiuushacari Pueyaso rupaacua, jaara naa quiriritij, ¿casaara puetunu Israel pueyajanaa Pueyaso pueyara jiyateyaquishaaquiaariirini? ¿Cristo rupaateeri nojori niquiara pohuataaquishaaquiaari? Maja. Nojori niquiaracuajaari pohuatasaaquiaari. Naa naajiotasano quiyacuajaari tariucuaacaanu Pueyaso Rupaajinia:

“Pueyaso Rupaacuajaari puetunu jiyacajiniajanaa pohuatasaaquiaari. Na rupaari tojjishaaquiaari puetunu tiquiyocujanaa, jiya puequeetujinia”.

<sup>19</sup> Jaara naa pohuatasaaquiaaritij, ¿Israel pueyateeri Pueyaso rupaa niishiyaaquiquiaari nojori tojjishacari? Maja. Nojoricuajaari na niishijiaa quiquiaari. Nojoriiri saaja na ruuretajaca quiquiaari. Supuetana Moisésacuajaari naa naajiotaquiaari Pueyaso sequesano Israel pueyara, tariucua na tojjishijiaa nojori quishacari:

“Maninia cua miishacari tiquiyocua quijiaca taucuaa nia niti, janiyari nia juaatiniutianiyani. Niaari jiyanoohua juaaniutianiya cua jiyanoosacari mosanucua taucuaa”.

<sup>20</sup> Na nuhuaji, supuetana Isaíasri naa maatia sequequiaari Pueyaso niishitiosano nojuaja: “Cucua jiaataashijiaa taucuaa cutaraari cua riuritaquiaa, cua tojjijiaa nojori quiniuria cutara. Naajuhuaaj, janiyari cua pajeyashijiaa taucuaacua muetaquiaani”.

<sup>21</sup> Saniniuujia, Isaíasri naa Pueyaso sequesano Israel pueyajiniji naajiotaquiaari:

"Janiyari puetunu juucajanaa Israel pueyacuaji masequiaa juucuan, maninia cua miiniu panishacari nojori. Nojoriiri saaja cua shocotequiaa, cua tojiyashijiaca pueya nojori quishacari".

## 11

### *Israel pueyajiniji cureenoori Pueyaso saquiriojosano*

<sup>1</sup> Israel pueya jaara naa Pueyaso tojiyashijiaca quiya, ¿Pueyasote seetanujuanaa nojori tarinitiacanu, na tojiyashijiaca nojori quiniuucua? ¡Maja pueyanaa! Janiyacuajaari Israel pueyanojaniuhuj. Abrahamri cua supuetana. Janiyari na jinianu Jacobo niyanu Benjamincujajinio supuenoni. <sup>2</sup> Naacujitij, janiyari niishiyani, Pueyasoori maja na cartenu quiquianu puetunu tariucuacaanu na saquiriojosano Israel pueyajanaa. ¿Niaateeri supuetana Elíasjiniji naajiotasano niishiyaquiya? Tariucuacaanu Pueyaso Rupaajinia naa naajiotasano quiyacuajaari Elías sequesano Pueyaso, na tacaashacari Israel pueya quiniuucua sesa:

<sup>3</sup> "¡Cua Jiyaniijianaa, cuarta Israel pueyari puetunu quia sequesano caminiujuunaa pueyajanaa puecoorucuaa! ¡Saa janiyajaari cureyani! Naajuhuj, nojoriiri puetunu juhucutucujajanaa niyarequetarucuaa, tee quia tojtiajaca pueya catijiaquiaa na seya quiociaracuajani. ¡Nojoriiri quiarjia cua pajenuyajuhuj, na motunura janiya!"

<sup>4</sup> Pueyasoori naa Elías riucuajiaari saaja:

"Janiyari siete mil pueya jiiitiajaani. Nojoriiri cua tojtiajaca. Nojoriiri maja na mojoquetaconu quiquiaa cuno sacuaratia shipinishano Baalcuara cua niti, taa narta Israel pueya miiquiaacuani".

<sup>5</sup> Quiarjiaari naajuhuj, Pueyasoori secaja na saquiriojosano Israel pueyajinijinio jiiitiaa, jyanootio na quiniuucua. <sup>6</sup> Naa Pueyaso muerasu nojori quishacari saaja Pueyaso jyanooniuucua nojori, naacujiti paari niishiyani, majaari Pueyaso saquiriojonu quiquiaari nojori, maninia nojori quiniuucua. Nojori jaara maninia miijiaa quiriquia, nojori maara paniyaquiri na jyanoooshaanura.

<sup>7</sup> Naacujitij, paari niishiyani, Pueyasoori saaja na saquiriojosano pueya jiyatequiaa na muerasura. Israel pueya saniniuujia, nojoriiri saaja maninia quiniuria saniniuujia juuca. Naajaa, majaari nojori naata tama na cuaqueyajaaja jyatenu quiquiaari Pueyaso muerasu nojori quiniuria. Cuno pojori jiuujiaari saaja cumajiuujiaacara quiquiaari, tojetaarucujajanaa niishiyashijiaca nojori quiniuria. <sup>8</sup> Tariucuacaanu Pueyaso Rupaajiniacuajaari naa naajiotasano quiya:

"Pueyasoori nojori jiyatequiaari niishiyashijiacara, maja nojori niishiniuria nojuaja. Naaratej, majaari nojori niishiniu quijia, nojori niquishacari Pueyaso miishano. Majaari nojori niishiniu quijiajuhuaj, nojori tojishacari na rupaa. Israel pueyari naa Pueyaso tojiyashijiaca quiyajaa quiarjiani".

<sup>9</sup> Supuetana David sequesanoori nojorijiniji naa naajiotasano quiyajuhuj:

"Pueyasonaa, Israel pueyari puetunu nojori panishanojuanaa jiiitiaa, maninia quia miishacari nojori. Saniniuujia, nojori tojiyaquiniuucua quiajaniya, nojori shuquiritasano casaa cuara quiiria juhua norijia tama nojoririjaaja, nojori saniitiosaanura.

<sup>10</sup> Nojori jiuujia cuara jataara juhua cariyajuururiria, maja nojori niishiniuria seetanu Pueyaso rupajanaa. Nojori cuara porequetacoora socua, pueyaracaanu taraatia nojori miishacari".

### *Pueyaso jyanoooshaacari taucuaca, Israel pueya niti*

<sup>11</sup> ¿Niaateeri jiyaniya Pueyasoori Israel pueya cartequiaarijanaa, tojiyashijiaca nojori quiniuucua? Maja. Pueyaso tojiyashijiaca nojori quiniuucua, taucuacaari saniniuujia Pueyaso muerasura quiquiaa, nojori tiushacari Jesucristoocua. Cunoori Israel pueya jiaatianiquiaa taucuacaacua, Pueyaso muerasu nojori quiniurijuhuj. <sup>12</sup> Quiarjia, puetunu jiyacajinijajanaa taucuacaari shuquiriaatia quiya, Pueyaso muerasu nojori quishacari Israel pueya tiuyaquiniuucua Jesucristoocua. Saniniuujia, Israel pueya jaara Pueyaso muerasura quirohua Jesucristoocua nojori tiushacari, jiyacaritij, socua jyanohua maninia quiniutianiyari puetunu pueyapuerajanaa, puetunu jiyacajinijajanaa.

<sup>13</sup> Taucuacajinijinio cuarta Pueyaso muerasunaa, cua tojiri. Nia sequenu paniyanijia. Janiyari seetanujuanaa jiyaramiquishaaguiaari Jesucristo rupaa cua pohuata-nura taucuaca niquiarani. Naaratej, janiyari puetunu cua cumaacatajanaa pahuataquiaa Jesucristojiniji taucuaca niquiarani, nojori quiniuria Pueyaso muerasujuhuj. <sup>14</sup> Janiyari seetanujuanaa naa miiquiaani cuarta Israel pueya jiaatianura niaacua, nojori tiuniuria Jesucristoocujuhuj, noojiaqueya nojorijinijinio Pueyaso jyatenu na pueyara. <sup>15</sup> Pueyasoori juhua taanuquiaari Israel pueya nocuaji, nojori tiuyaquishacari Neyanuucua. Naajaa, naacujiti Pueyasoori puetunu mijiria quiniaa pueyapuejanaa

jiyanooquiaa, na muerasu nojori quiniuria. Saniniuuja, Israel pueya jaara jiyanooshaoruhua, jiyacaritij, jiyanohua maninia quiniutianiyari puetunu pueyapuerajanaa. Israel pueya tiushacari Jesucristoocua, nojoriiri juhua macujiniji samiitaconutaniuhua. <sup>16</sup> Seetanujuanaa maninia nia niishiniuria nio miriqui cua pohuatasanoni, maatia nia pohuatareeraj. Nia tojiri. Coteenujanaa pa jiunocotasano neecaruu jaara maninia quiri Pueyasora pa niqitiosocoriguano, tariquiaari puetunujuanaa maniniajuhua Pueyasora. Naajuhua, naana nujuaca jaara maninia quiri puetunujuanaa, na cashacucuaari maniniquiucujuhua. Nio miriqui cua pohuatasanoori nia niishitiya cutara Israel pueyajiniji. Naacujitij, Pueyaso jaara Abraham jiyanooquiaaricuaa nocua na tiushacari, naacujiti paari niishiyani, Pueyasoori puetunu Israel pueyajanaa jiyanooniutianiyajuhua, nojori jaara tiuuriquia Jesucristoocua.

<sup>17</sup> Supuetana Abrahamri juhua Pueyaso panishano olivo naana nujuaca. Saniniuuja, na jinianuucujinino supueno Israel pueyari juhua na cashacucua. Cuno na cashacucujinijinio jaara Jesucristoocua tiuyaquiquiaari, Pueyasoori na piyotakuiaari. Niajaniya saniniuuja taucacanaa, niaari panishoo quiquiaari, juhua nacujiniaacoji olivo naana cama, maja natau. Naajaa, Jesucristoocua nia tiushacari, Pueyasoori nia rupotakuiaari na panishano naanaacua nia moritianura. Naa Pueyaso panishano naanaacua nia moritiasacaritij, cuno naana nujuacaari nia nujuacajuhua. Naacujitij, niaacujajiti puetunu Pueyaso sequesanojuanaa supuetana Abrahamra masequiaa tari. <sup>18</sup> Naa Pueyaso rupotanuucua niajaniya na panishano naanaacuatej, majaari tama nia cuaqueyajaaja nia shuquiritianu. Majaari nia jiyaniinu niaa cutaraari socua maninia pueya, Pueyaso cartesano Israel pueyajiniji. Naa jaara jiyaniya niaari socua maninia pueya nojoriiniji, nia niishiri, niaari maja nia nujuaca rishitija. Naa nujuaca cutaraari nia rishitiya.

<sup>19</sup> Naa naacucuaari sequeya: “Taaquiriirinij. Cuno olivo cashacucuaajaari canaacuaji piyotasaquiaari, saniniuuja canaa rupotasaanura nocua nojori niti”. <sup>20</sup> Taaquiriirinij, seetanujuanaacuaquiniateja nia sequesanojuaj. Saniniuuja nia niishiri, nojoriiri Pueyaso panishano naanajiniji piyotasaquiaari, nojori tiuyaquiniucua Jesucristoocua. Naaari saniniuuja cuno naanaacua rupotasano quiya, saaja Jesucristoocua nia tiuniucua. Naacujitij, maja tama nia cuaqueyajaaja nia shuquiritianu nia jyanishacari niaari socua maninia pueya cuno Israel pueyajiniji. Saaja puerejaca nia quiri cutara, cua panishano taucacanaa, niaa mariqui piyotasaarohuari, niaa jaara Pueyaso tojiyashijiacara quiriuhua. <sup>21</sup> Pueyaso jaara jiyanoyaquiquiaari na saquiriojosano pueyacuaa, nojori tiuyaquiniucua nocua, ¿maatucua casaara jyanoori niajanianijia? Naaacujajiti taucacua. Naaacujajiti maja na saquiriojosano Israel pueyacujinino. <sup>22</sup> Naacujiti pueyanaa, nia niishiri. Pueyasoori jyanohua maninia. Naajuhua, nojuajaari saniitonu niishitiya cutara. Naaratej, nojuajaari na tojtiaashijiaca Israel pueya jiyanoyaquiquiaari. Saniniuuja, nojuajaari jyanohua maninia miiquiaa niajaniya na jyanooshano pueya nia quishacari, niaa jaara pueyaracaanu nocua tiuujiaa quiriquia. Niajaniya taucacanaa, niaa jaara nocua tiuyashijiacara quiriuhua, niaari nocuaji rupatasanutaniuhua. <sup>23</sup> Saniniuuja, Israel pueya jaara Jesucristoocua tiuujiaacara quiriuhua, Pueyasoori nojori rupotanutaniuhua na panishano olivo naanaacua. Pueyasoori jyanohua cumaacaracucua nia rupotanutaniuhua na panishano naanaacua. <sup>24</sup> Niajaniya taucacanaa, niaari maja seetanujuanaa Pueyaso saquiriojosano Israel pueya. Naaari juhua nacujiniaacoji olivo naana cashacucua. Naajaa, nia tiushacari Cristoocua, Pueyasoori nia rupotakuiaari na panishano olivo naanaacujanaa. Naaratej, majaari jiyajeneta Pueyasora, na piyotasano olivo cashacucua na rupotanutaniuhua tama neyonaacujajaaja, nojori jaara Jesucristoocua tiuujiaacara quiriuhua.

*Pueyaso jatanishacari puetunu Israel pueyajanaa na pueyara*

<sup>25</sup> Taucacujinijinio cuarta Pueyaso pueyanaa, tariucuaaanu pueyari niishiyaquijia taa Pueyaso miiniutianiya Israel pueyani. Quarijia cutara nia niishiri Pueyaso niishitishano janiya, maja nia jyaniniuria Pueyasoori nia paniya socua Israel pueyajiniji. Naarate na tojtiaare. Quera puetunu Israel pueyajanaari Pueyaso tojiyashijiaca quiya. Nojoriiri naa quiniutianiya, puetunu Pueyaso saquiriojosano taucacujinijinio pueyajanaa cuara Jesucristoocua tiuurijiaatija. <sup>26</sup> Jiyacaritij, puetunu Israel pueyajanaari jiyatesanutaniya Pueyaso pueyarajuhua, taa tariucuaaanu Pueyaso Rupaajinia naajiotasaquiaricuaani. Naa sequeyari:

“Sión tiacajinia supuenutianiyari pueyacujiti Tacuriquiano. Nojuajaari puetunu sesa casaajanaa jaariutianutaniya Jacobo niqihuacujinino supueno pueya jiuujiajiniji. <sup>27</sup> Naa cua jiyanoosacari puetunu sesa nojori miishanojuanaatej, janiyari jiyacari tohuateenutaniya tariucuaaanu cua sequesano nojori supuetanaani”.

<sup>28</sup> Quiarijia Israel pueya tiuyaquishacari Jesucristo rupaacua saniniuujia, nojoriiri juhua Pueyaso paraa, Pueyaso jiyanooniuria nijaniya saniniuujia, taucuacanaa. Naajaa, Pueyasoori cuno Israel pueya paniyajaa, nojori supuetanaa quiniuucua na saquiriojosano pueya. <sup>29</sup> Pueyasoori maja na jaariutianu quijia na niquitiosano. Na saquiriojosano pueya jiyanoojaari. Majaari nojori na ruuretanu. Pueyasocuaajari Israel pueya saquiriojo- quiaari na pueya nojori quiniuria, maninia na miiniuria nojori. <sup>30</sup> Maniushiquiari, nijaniya taucuacanaa, niaari Pueyaso tojiyashijiaca quijia. Israel pueya tojiyaquini- uucua Pueyaso quiarijia saniniuujia, Pueyasoori niaacua taraajequiaa. <sup>31</sup> Nojoriiri Pueyaso tojiyashijiaca quiya quiarijia, Pueyaso taraajenura nojoriicua taa na taraajeya niaacuacuaani. <sup>32</sup> Naacuajitij, Pueyasora, puetunu pueyajanaari na tojiyashijiaca quiya, Israel pueya, taucuacano. Naacuajitij, Pueyasoori na naata jiyanooni nojorijihuhaj, nojori tiushacari Jesucristoocua. Pueyasoori maja rimiajata na jiyanooni.

<sup>33</sup> ¡Pa Pueyasoori jiyanhua niishijia, maninia na miiniuria! ¡Nojuajaari puetunu niishi- jiajanaa cutara! ¿Cante niishiquiaarini casaa Pueyaso miiniutianiyani? Na miishanoori jiyanhua jiyajeneta. ¿Cante na naata na niishiniuni? Shaaqui. <sup>34</sup> Naaratej, seetanujua- naari nio tariucuacaanu sequesano:

“¿Cante na naata Pueyaso niishiriojosano niishiniuni? ¿Tamonuteeri na naata Pueyaso rootanu, maninia na miiniuria? ¡Maja! <sup>35</sup> ¿Pueyasoteeri na panishano jiiti- aaquiquiaari tamonu niquitionura nojuaja na panishano, na nuhuaji na niqui- tionuhua? ¡Maja!”.

<sup>36</sup> Seetanujuaanaa puetunu casaajanaacuaajari Pueyaso shipinishano. Na camaruuri na rishitiquiaa na cumaacata. Puetunu cunojuanaari nerano. ¡Pueyaracaanu pa shuquiritiare pa Que Pueyaso! ¡Nojuajaari jiyanhua maninia! ¡Cuaara naa quiriartej!

## 12

### *Saaja Pueyasora pa quiri*

<sup>1</sup> Cuarta Pueyaso niquiuhuaanaa, jiyanhua maninia Pueyaso jiyanooshacari pajaniya, tama nia cuaqueyajaaja nia jiyatere tojetaarucujanaa saa neraja nia quiniuria. Naacu- ajitij, niaari Pueyaso shuquiritiniutianiya, pueyaracaanu na tojijiaca nia quishacari.

<sup>2</sup> Majaari socua nia quiniu taa Pueyaso tojiyashijiaca quiquiaacuaani. Saniya Pueyaso Sohanu tojijiaca nia quiri cutara, seetanujuaanaa quiariniora jatanishano pueya nia quiniuria. Naacuajitij, niaari niishiniutianiya casaa Pueyaso paniya nia miiniuriani. Nia niishitiaja jaara jatanishano quiri, naacuajiti niaari niishiniutianiya casaate maninia nia miiniuriani, Pueyaso nia shuquiritiniuria. Naa nia miishacari Pueyaso panishanotej, niaari niishiniutianiya, cunoori tojetaarucujanaa jiyanhua maninia.

<sup>3</sup> Jiyanooja Pueyaso quiniuucua, nojuajaari cua jiyatequiaari Neyanujiniji pohuatana cua quiniuria. Naaratej, puetunu nijaniyajanaa cua tojitiare quiarijia. Naa jaara Pueyaso cumaaca masequiaari nocua nia tiushacari, nojuajaari puetunu nijaniyajanaa jiyatequiaari tamaatia poonijosano miijiaca nia quiniuria. Naaratej, majaari tama nia cuaqueyajaaja nia jiyatenu paniniu socua maninia quijia nia quiniuria tamasaajiniji. Saaja jacaria niishiriojojuaca nia quiri, maninia nia miiniuria nia poonijosano, teyano Pueyaso sequequiaari nia miiniuracuajani. <sup>4</sup> Pa cuaqueyajiniacuaa, paari queraatia tamaatia casaa jitiiaani. Puetunu cunojuanaari tamaatia miiniu niishijia, maninia pa quiniuria. <sup>5</sup> Paari naajuhuj, taa pa jiniacuma casaacuaani. Queraatia Pueyaso muerasu pa quishacari, naajaa, paari juhua niquiriyatu cuaqueyani, Cristota rupetootesano pa quishacari, maninia pa miitioonura.

<sup>6</sup> Naatej, taa pa cuaqueyajiniacuma casaa tamaatia poonijosano miiniu niishiyacuaani, naajuhuj, Pueyasoori puetunu na muerasujanaa na cumaaca niqutioquiaa, tamaatia miiniu niishijia pa quiniuria. Naaratej, cante Pueyaso cumaaca jitiiaani, Pueyaso niishitishano nojuaja na pohuatanurani, nojuaja cuaara seetanujuaanaa pueya niquiara pohuataara na taacanuyaquiniutia. <sup>7</sup> Naajuhuj, cante Pueyaso cumaaca jitiiaa pueya na naacunurani, nojuaja cuaara maninia naacuura pueya. Naajuhuj, cante Pueyaso cumaaca jitiiaa Pueyaso rupaa niishitiojona na quiniuriani, nojuaja cuaara maninia niishitiojora Pueyaso rupaa pueya niquiara. <sup>8</sup> Cante Pueyaso cumaaca jitiiaa pueya na shiniujiunuriani, nojuaja cuaara pueya shiniujiuuria, maja pueya cartenura Pueyaso rupaa. Cante na jitiiasanojiniji nareja niqutiojojuaca casamijuniucua pueyani, nojuaja cuaara juhujaniya niqutiojoora nareja, nojori na paniniutia. Naajuhuj, cante Pueyaso pueya jitiianani, nojuaja cuaara jitiiaara Pueyaso pueya nojoriicua na tacaaniutia. Cante taraatia miishano pueya naacujuani, nojuaja cuaara shuquiriaatia na naacuuranaj.

*Pueyaso tojijiaca nia quiri, taa Pablo rootacuajani*

<sup>9</sup> Seetanujuanaa panitioojuaca nia quiri. Puetunu sesa casaajanaa soojea nia quiri. Majaari maninia miiniu nia tarinitianu cutara. <sup>10</sup> Jiyanoehua panitioojuaca nia quiri, taa nia paniquiaa nia tarajanucuaani. Niarta Pueyaso muerasu nia jiyatere juhua socua maninia pueya niajanijajiniji. Majaari nojori nia rerequetenu.

<sup>11</sup> Tama nia cuaqueyajaaja nia cumaquiri maninia nia poonijionura pa Jiyaniijara. Majaari taajecori nia quiniu.

<sup>12</sup> Shuquiriaatia nia quiri pueyaracaanu, nia niishishacari taa Pueyaso miiniutianiya jiyanoehua maninia na muerasuni. Saaja juhuajaniya nia rejeretare niaa jaara naquiya miishaare. Pueyaracaanu Pueyaso nia secojore. Majaari quenaaja nia tarinitianu na secojonu.

<sup>13</sup> Niarta Pueyaso pueya jaara na panishano jittiaaquiri, nareja nia niqutiore nojori nia jittiasanojiniji. Naacujitij, nojori jaara rucoonaa quiri, nojori nia masuure nia tiacora.

<sup>14</sup> Naa jaara naquiya miishaariquia, majaari nia miitianaa nia sesacanu. Saaja nia secojore Pueyaso nojoriicuaa, Pueyaso taraajenura nojoriicua.

<sup>15</sup> Cante shuquiriaatia quiyacuaani, nojoritia nia shuquiririjihuhaj. Saniniuujia, cante nujuqueyacuana, nojoritia nia nujuquerejuhuj.

<sup>16</sup> Jyanootioojuaca nia quiriquia, jatiqui nia quiniuria maninia. Majaari tama nia cuaqueyajaaja nia jiyatenu juhua socua maninia quijiaca pueya tamasacajiniji. Majaari pueya rerequeteja nia quiniu. Saniniuujia, tama nia cuaqueyajaaja nia mueyashitiri cutara, maninia nia rupenura paniyaquishoo pueyajuhuj. Majaari tama nia cuaqueyajaaja nia jiyatenu juhua socua niishijiaca pueya nia quiniuria tamasacajiniji.

<sup>17</sup> Naa jaara sesa miishaariquia, majaari nia paraa nia naminiu saniniuujia. Puetunu nia miishanojuanaa cuaraa quiria maninia puetunu pueya niqiarajanaa. <sup>18</sup> Maninia nia quiri puetunu pueyatajanaa, majaari nojori ruutaquenu niaacuara. <sup>19</sup> Socua cua tojitiare cua panishano cuarta Pueyaso pueyanaa. Naa jaara sesa miishaariquia, majaari nojori nia naminiu. Juhujaniya nia rejeretare saaja. Pueyasocuaajari niaacuana naminiutianiya nojori. Pueyaso sequesanojuajari naa naajiotasano quiya na rupaajinia:

“Quiria nia tarinitiare puetunu sesa nojori miishanojuanaa niajaninya. Janiyacuajaari nojori naminiutianiya niaacuani”.

Cua tojiri. Pueyasojuaanaacuajaari naa sequequiaari. <sup>20</sup> Naaratej pueyanaa, majaari nia paraca nia naminiu. Saaja maninia nia miiri nojori taa tariucuacaanu Pueyaso Rupaajinia naajiotasaaquiaricuaajani. Naa sequeyari:

“Quia paraca jaara miaajeya, quia miaqueterenoj. Jaara jiyamueyajuhuj, quia raatorenoj. Quiaa jaara naa na miiritij, tama nojuajaarijia jiyanoehua caririqiniutianiya noojiajinia”.

<sup>21</sup> Naacujitij, niaa jaara sesa miishaariquia, majaari nia juaaniu, niaa mariqui sesa mijijara quirijiaariuhuj. Saaja maninia nia miiriquia nia paraca. Naacujitij, niaari Sesaaca shocotanutaniya.

## 13

### *Pa jiya jiyaniijianucua tojiijaca pa quiri*

<sup>1</sup> Pueyanaa, mijiria nia jiyaniijianucua tojitiijaca nia quiri. Nojoricuaajari Pueyaso jiyatesano, nia jiya jiyaniijianucua nojori quiniuria. Majaari pueyano na naata jiyatesaanu jiyaniijia na quiniuria, Pueyaso jaara paniyaquiri. <sup>2</sup> Naacujitij, cante mijiria jiyaniijianucua tojiyashijiani, nojuajaari jiyaniijara Pueyaso jiyatesano tojiyashijia. Cante naa mijiria jiyaniijianucua tojiyashijiani, nojuajaari saniitiosaanutaniya. <sup>3</sup> Paa jaara maninia miijiacu quirini, ¿paatucua casaara pa jiyaniijianucua puereriquiani? Jiyaniijianucuaari maja na pueretenu maninia miijiacu. Sesa miijiacu cuara na pueereera cutara, sesa miijiacu nojori quiniucua. Saaja maninia miijiacu nia quiri. Naacujitij, nia jiyaniijianucuaari maninia poojotanutaniya niajanijajiniji. <sup>4</sup> Nojoricuaajari Pueyasora poonijionaa, maninia nojori jittianura niajaninya. Saniniuujia, niaa jaara sesa miiri, nia puerere cutara. Jiyaniijianucua pueyari maja najuhuanaj. Nojoricuaajari jiyaniijianucua cumaacaraca, sesa miijiacu nojori saniitionura. <sup>5</sup> Naacujitij, nia jiyaniijianucua tojiijaca nia quiri maja nia saniitiosaanura, naajuhuj, maja Pueyaso tojiyashijiaca nia quiniuria. <sup>6</sup> Naajuhuj, nia cumaneecajiniji nia niqutiore nia jiyaniijianucua, taa nojori sequequiaa nia niqutionuracuajani. Nojoricuaajari Pueyasora poonijioquiaa pueyaracaanu, maninia nojori jittianura niajaninya. Naaratej, nojoriiri cumaneeca masequiaa niajanijajiniji.

<sup>7</sup> Naaratej, puetunu nojorijanaa nia niqutiore, taa nojori sequequiaa nia niqutionuracuajani. Naacujitij, niaa jaara sequesaa nia cumaneecajiniji nia niqutionura nia jiya jiyaniijara, nareja nia niqutiore. Naajuhuj, cumaneeca jaara jiya jiyaniijara masenu cojiritiasaare, casami nia masesacari, majaari nia juaaniu. Naajuhuj, majaari

nia jiyaniijia nia sesacanu, jiyaniijianucuaara na jiyatesano pueyano. Majaari nojori nia rerequetenu. Naajuhuaaj, nia jiyaniijianucuaa tojjiaca nia quiri, nojori quiniucua Pueyaso jiyatesano nia jiyaniijianucuaara.

<sup>8</sup> Pueyanaa, majaari najuhuaana casami nia poonu, niaa jaara cumaneecaaju quiri. Saniniuuja pueyanaa, maja cutaraari niarta pueya paniniu nia puecanu. Pueyaracaanu nojori panijaca nia quiri cutara. Naacuaajitij, cante narta pueya panijiani, nojuajaari Moisés Rootasano tojjia cutara. <sup>9</sup> Supuetana Moiséscaajaari naa naajiotajuquiaari puera, Pueyaso sequesano nojuaja:

“Maja niyacaraca maaji numuetucunu. Maja pueyano monu. Maja nohuasejonu. Maja tamasaca jittiasano casamiicua jiaatiaja nia quiniu”.

Socua queraatia na rootasanoori quiya. Niocuaajaari socua pa tojishocoriquiano na rootasano:

“Quiarta pueyano panijia quia quiri, taa quia paniya tama quia cuaqueyacuani”.

Paa jaara saaja nio Moisés rootasano tojjia quirini, paari tari puetunu na rootasanojuanaa tojjia quiyani. <sup>10</sup> Cante seetanujuanaa pueyano panijiani, nojuajaari maja sesa na miiniu narta pueyano. Naaratej, paa jaara panijia quiriquiani, paari puetunu Moisés Rootasano tojjia cutarani.

<sup>11</sup> Pueyanaa, nio nia niishiri. Pa Jiyaniijia rijionu juuca pajaniyari tari quenaacoya. Cuno juucaari quiarijia socua cateca quiya paa jaara nocua tiuuquiaarini. Naaratej, cante juhua maqueyajaani, nojuaja cuara niucuaara, pa Jiyaniijia na poonijonura. <sup>12</sup> Mijiria pa quishacari juhua ninishiqui. Paari juhua quera juhuaqueya tarini. Janiyari naa nia sequeyani, pa Jiyaniijiaari quera tiuquihua. Nojuaja cutaraari na cumaacata pa cuhuatanutaniya. Naaratej, puetunu sesa pa miinijuanaa pa cartere. Majaari juhua ninishiqui quijiaa pa quiniu socua. Taa pueya cushiquiaa na toque tariquicuaji na poonijionuracuaani, naa nia cushiri Pueyaso cumaacajuhuaaj. Naa nia miiritij, nera nia poonijionura, puetunu mijiria sesa casaajanaa rejeretajaca nia quiniurajuhuaaj. <sup>13</sup> Seetanujuanaa juhua Pueyaso pueya nia quiri. Majaari juhua ninishiqui quijiaa pueya nia quiniu. Niaacuaajaari cuhuashiqui quijiaa. Naaratej, majaari mashaasequenuucua nia quiniu. Majaari nia queranacunuunu, cararaatia casaa nia miiniuria. Majaari nia camishoo maaji numuetucunuucua jiaatiajaca nia quiniu. Majaari sacuaraatia casaa miiniucua nia jitiiniu. Majaari juayonuujutajaca nia quiniujuhuaaj. Naajuhuaaj, majaari tamonu pueyano jittiasano casaacua nia jiaatianu. Naajuhuaaj, majaari nia juaaniu tamonu jaara nia shocotare. <sup>14</sup> Naacuaajiti pueyanaa, majaari nia niishiriojonu nia cuaqueya nia shuquiritiniuria taa nia paniya sacuaraatia nia miiniuriacuajani. Saniniuuja, maninia cutaraari Jiyaniijia Jesucristo niishitaja nia jitiianura, na cumaacanu. Naa nia miishacaritij, niari juhua soldadohua miaquetoojotaja toque cushiyojua, maja Sesaaca miitiniuria sesa nijaniya.

## 14

### *Maja quiarta Pueyaso pueyacuara nia rimiaaquenu sacuaraatia*

<sup>1</sup> Pueyaso pueyajinijinio pueyano jaara Pueyaso rootasanojiniji taacanuujua quiriquia pueyaracaanu, naajaa, na rupuejaca nia quiri. Majaari nata nia juayonuujutanu tamaatia na niishiriojosacari Pueyaso rootasanojiniji. <sup>2</sup> Naacuaajitij, Pueyaso rootasano niishijia nia quishacari cutara, niaa naasucuaari niishiya nia naata puetunu miaquesanojuanaa miaquenu cutara. Saniniuuja, cante Pueyaso rootasanojiniji taacanuujuaani, nojuaja naasucuaari jiyaniya na naata saaja na natau miaquenu, na shuquiritiniuria Pueyaso. <sup>3</sup> Cante puetunu casaajanaa miaqueja cutarani, nojuaja cuara soyaquiiiria narta Pueyaso pueyano, cante na miaquesano miaqueyashijia saniniunijia. Naajuhuaaj, cante puetunu casaajanaa miaqueyashijiani, nojuaja cuara sesacaquiiiria puetunu casaa miaquejacajanaa. Cuno nojori, shu miaquejaca cutarani, nojoricuaajaari Pueyaso jiyatesano na muerasu nojori quiniurajuhuaaj. <sup>4</sup> ¿Canteeri pajaniyani, tamonu pueyanora poonijionaa pueya sesacaja pa quiniuriani? Tama nojori camarnucuaajaari nojori sequenutaniya, nojori miishanote maninia, sesa soj. Naajuhuaaj, pa Jiyaniijia Jesucristocuaajaari cumaacaraca, na muerasu na jiyatenura maninia quijiaa nojori quiniuria.

<sup>5</sup> Cua tojiri pueyanaa, noojiaqueya Pueyaso muerasujinijinioori niquiriyatu juuca seamanajiniji jiyatequiaa nojori maniniuhuaqueetanura Pueyaso. Tamasacaari saniniuuja sequequiaa, puetunu juucajanaanaari maninia, Pueyaso pa maniniuhuaqueetanura. Puetunu nijaniyajanaa cuara taacanuuyaquiiiria tama nia miishanojinijijaaja, maja nia macuhuajetenura nioojia. <sup>6</sup> Cante niquiriyatu juuca seamanajinia jiyatequiaa samaatenu juucara Pueyaso na maniniuhuaqueetanurani, maniniacuajaari. Nojuajaari naa miiquiaa

Pueyaso na shuquiritiniuria. Naajuhuaaj, cante puetunu casaa miaqueyajanaani, manini-acuajaari. Pueyaso na shuquiritiniuria, nojuajaari na miaquequiaa nocuara na secojonu nuhuaji. Naajuhuaaj, cante shu miaqueyaquijia Pueyaso na shuquiritiniuriani, cuaara naa miiria. Nojuajaari Pueyaso shuquiritijuhuaaj na secojosacari Pueyaso, na natau na miaquenura.

<sup>7</sup> Seetanujuanaa pueyanaa, majaari pa quiniu tama pajaniyarajaaja. Naajuhuaaj, majaari quenaaja pa shaajenu tama pajaniyarajaaja. <sup>8</sup> Paa jaara mijiria quiyani, paari pa Jiyani-ijia rishiquiaani. Paa jaara cusoyareni, paari pa Jiyaniijia cusoqueeni. Naaratej, paa jaara saminio quiyajaani, naajuhuaaj, paa jaara tariucua macu quiyani, paari pa Jiyaniijia jiiiasanoni. <sup>9</sup> Jesucristocuaari cunora cusoquiaari, macunucua Jiyaniijia na quiniuria. Nojuajaari samiitiaquiaarihua saminiucua Jiyaniijia na quiniurijuhuaaj. Naacuajitij, nojuajaari pa Jiyaniijiajanaa cutara.

<sup>10</sup> Naaratej, saaja niquiriyatu Jiyaniijia pa jiiiasacari, ¿paatucua casaara parta Pueyaso muerasu soojeaca quirini, nojori miaqueyaquiniucua shuni? Naajuhuaaj, ¿paatucua casaara parta Pueyaso pueya sesacajaca quirini, nojori miaquenuucua puetunu casaa-janaani? Nia niishiri pueyanaa. Puetunu pajaniyajanaari nujuatejosaanutaniya Pueyaso tacojini, Pueyaso nequesoreenura pajaniya. <sup>11</sup> Tariucuaacaanu pa Jiyaniijia sequesanoori naa naajiotasano quiya na rupaajinia:

“Seetanujuanaa sequeyanijia, puetunu pueyajanaari cucuara mojuquetaconutaniya, nojori niishacari janiyari seetanujuanaa Jiyaniijiajanaa cutarani. Puetunu nojori-janaari sequenutaniya: ‘Jiyaniijianaa, quiaari Pueyasojuanaa cutara! Puetunu quia miishanojuanaari maninia’ ”.

<sup>12</sup> Naacuajitij, paari niishiyani, puetunu pajaniyajanaari Pueyaso rihuanenutaniya tama-jaajani, na nequesoreesacari pajaniya.

#### *Maja sesa pa miitiniu parta Pueyaso pueya*

<sup>13</sup> Naacuajitij cuarta Pueyaso pueyanaa, maja cumaati pa sesacatoonu, paa jaara tamaatia miiniu niishijaca quiri parta Pueyaso pueyajiniji saniniunijia. Tama nia cuaqueyajaaja nia cojuare maja niarta Pueyaso pueya niqiuara nia miiniuria nojori jiyaniushano sesa casaa. Nojori jaara saniri miiniu nia miishanocuaa, naacuajitij, niaari tari sesa miitirij nojori Pueyaso niqiuara. <sup>14</sup> Janiyacuajaari niishiyani, majaari quenaaja tamonu sumatuu quiniu pa miaquesacari sesa miijiacara na jiyatenura pajaniya Pueyaso niqiuara. Janiyari naa niishiyani cua Jiyaniijia Jesu rupaacua tiuuja cua quiniucua. Saniniuuja, cante jiyaniyanijia tamonu sumatuu na naata na jiyatenu sesa miijiaara nojuaja jaara na miaquere, nojuaja cuaara miaqueyaquirianoj. Jaara na pueresano saniri miaquenu, nojuajaari tama noojiajaaja macuhuanutaniya. <sup>15</sup> Naacuajitij, paa jaara parta Pueyaso pueyano macuhuaajetere pa miaquenuucua na miaqueyaquishoo casaani, majaari seetanujuanaa parta Pueyaso pueyano panijia pa quiniu. Jesucristocuaari tama na cuaqueyajaaja panitiaquiaari nocuaji na ritianura Sesaaca. ¿Paateeri na sesonutaniya saniniunijia, na miaquesoo casaa pa miaquesacari na niqiuarani? <sup>16</sup> Naacuajitij, majaari nia shanacunu Pueyaso tojiyashijia pueya sesacanura Pueyaso rupaa, nia miaquesano casaacua nia juayonuujutanucua niarta Pueyaso pueyata. <sup>17</sup> Seetanujuanaa nia sequeyanijia, majaari Pueyaso muerasu pa quiniu casaa pa miaqueyaquiniucua, casaa pa ratuyaquiniucuanio. Pueyaso muerasu pa quishacari, nojuaja cutaraari panijia maninia miijia pa quiniuria, jatiqiu pa quiniuria juhuajaniya. Pa panitiaquiaarihua shuquiriaatia quijia pa quiniuria. Paacuajaari na Sohuanu jiiiaani, naa maninia pa quiniuria. <sup>18</sup> Paa jaara naa quijia quiriqiuani Cristora pa poonijiosacari, Pueyasoori pa shuquiritiaa. Naacuajitij, Pueyaso tojiyashijia pueyari maja na rerequetenu quiniutaniya pajaniya.

<sup>19</sup> Naarate cuarta Pueyaso pueyanaa, jiyanojua nia saniniujiuri taate nia naata maninia rupetoosano quiniu puetunu niarta Pueyaso pueyatajanaani. Naacuajitij nia naata tama cumaquitioonujuaaja maninia Pueyaso muerasu nia quiniuria. <sup>20</sup> Majaari nia sesonu Pueyaso miishano niarta Pueyaso pueya jiuujiajinia, saaja nia miaquenuucua nojori niqiuara nojori pueresano casaa. Seetanujuanaa, Pueyasora, puetunu miaquesano casaa-janaari maninia pa miaquesocoriguano. Saniniuuja, tama nia cuaqueyajaaja nia cojuare cutara, maja niarta Pueyaso pueya niqiuara nia miaquenura nojori miaquesoo casaa, niaa mariqui nojori cushioreeri. Naacuajitij, majaari nia naata maninia rupetoosano quiniu niaa jaara nia miishanota taraajoriquia niarta Pueyaso pueya. <sup>21</sup> Naacuajitij, socua maninia juhuari maja pa miaquenura parta Pueyaso pueya pueresano casaa. Naajuhuaaj, majaari pa ratunu jereeca mashaca nojori niqiuara, cuno naa pa miishano jaara quiri nojori shiniujuniuria sesa nojori miiniuria. Naajuhuaaj, pa cartere puetunu parta Pueyaso

pueya jyanishano sesa miiniu casaajanaa, maja nojori pa taraajonura nojori ruparetanura pocuaji. <sup>22</sup> Naacujitij, Pueyaso Rupaacua nia tiushacari seetanujuanaa, niaa jaara niishiya nia miishanoori maja sesa, tamajaaja nia miirinioj saaja Pueyaso niquiara. Shuquiriaatia quijia cutaraari noo pueyano, cante niishiyani na miishocoriguiano casaari maninia Pueyasora, maja noojia na macuhajetenura na miiniu nuhuaji. <sup>23</sup> Saniniuujia, cante niishiriojiyani na miaquenu panishano casa naasucuaari sesa quiniutianiya Pueyasora, jaara naa niishiriojiya, seetanujuanaa naa sesa quiniutianiyari taa na niishiriojiyacuajani. Paa jaara casaa miaquere seetanujuanaa pa tiyacuiniutia Pueyasocuaani, pa miaquesacari, paari tari sesa miirii Pueyaso niquiarani. Seetanujuanaa, puetunu pa miishanojuanaari sesa, paa jaara pa taacanunuta na miiriquiani. Naaratej poojiaari macuhajenutianiya.

## 15

### *Parta Pueyaso pueya pa shuquiritiri, maja tama pa cuaqueyajaaja*

<sup>1</sup> Noojiaqueya parta Pueyaso muerasuuri juhuanouaja seetanujuanaa Pueyaso Rupaacua tiyashijiaca. Naacujitij cuarta Pueyaso pueyanaa, pajaniya, cante tari seetanujuanaa Pueyaso Rupaa tojjijiacuaani, pajaniya cuaara nojori rejeretaara juhuajaniya. Paa jaara socua Pueyaso Rupaa niishijiacuaani, nojori pa cumaquiri. Majaari pa niishiriojonu tama pa cuaqueyajaaja pa shuquiritiniuria tamajaaja. <sup>2</sup> Puetunu pajaniyajanaa cuaara niishiriojora taate pa naata parta Pueyaso pueyano cumaquiniuni, shuquiriaatia na quiniuria, maninia Pueyaso tojjia na quiniuriajuhuaj. <sup>3</sup> Paacuaajari niishiyani, majaari quenaaja pa Jiyaniijia Jesucristo niishiriojonu quijia tama na cuaqueyajaaja na shuquiritiniuria. Saniniuujia, nojuaja cutaraari taraatia miiniu rejeretaquiaari na rupenura mijiria quiniaa pueya, nojori na jaariutianura Sesaaca. Naacujitij, nojuajaari nio tariucuaaanu tama nojuajiniijiaaja naajiotasano tohuateequiaari:

“Cua Quena, cuno pojori, canapute quia sesacajacani, nojoriiri cua sesacajuhuj, cua miiniuucua quia panishano”.

<sup>4</sup> Seetanujuanaari pueyanaa, puetunu tariucuaaanu Pueyaso Rupaajinia naajiotasanojuanaani, cunoori pajaniyara naajiotasaaquiaari. Cunoori pa niishitiojiya maninia pa rejeretanura puetunu sesa casaajanaa. Pa cumaniijaajariuhuj. Naacujitij, paari juhuajaniya sashiya pa Jiyaniijiani. <sup>5</sup> Pueyasocuaajari pa cumaquini, maninia rejeretajaca pa quiniuria, cumaniijasano pa quiniuriajuhuaj. Nojuaja cuaara nia jiyateara jyanoojiaca nia quiniuria taa Cristo quiquiaari jyanoojiacuaani, rupuetoojuaca nia quiniuria niarta Pueyaso pueyata. <sup>6</sup> Naacujitij nia naata pa Que Pueyaso, mariyata pa Jiyaniijia Jesucristo maninuhuaqueetanu, juhua niquiriyatu pueyano, maninia rupuetoojuaca nia quishacari.

### *Pueyaso rupaari maja saaja Judiocuacara*

<sup>7</sup> Pueyanaa, jyanootoojuaca nia quiriquia, taa Jesucristo jyanooquiaa pajaniyacuaani, maninia rupuetosano nia quiniuria. Naacujitij, pueyari Pueyaso timitianutaniya nojori niquishacari Judiocuaca taucacata Pueyaso maninuhuaqueetaano jatiqui. <sup>8</sup> Janyari seetanujuanaa nia sequeyani, Cristoori mijiria niquiaari Judiocuacaacua, na tohuaatenura Pueyaso sequesano nojori supuetanaa. Tariucuaaanu Pueyaso sequesanoori seetanujuanaa. Nojuajaari maja na sequesano na jatanu. <sup>9</sup> Judiocuacara Cristo miishanoori taucacara quiquiaarijuhuaj, nojori maninuhuaqueetanura Pueyaso, na jyanooniuucua nojori juhuaj. Tariucuaaanu Pueyaso Rupaajinia supuetana David naajiotasanoori naa quiyajuhuj:

“Maninia quia miiniuucua janiya Pueyasonaa, janyari quiajaniyajiniji poojotanutaniya maniniani taucaca jiyacajinia. Maninia quia miiniuucua janiya, janyari quia timitianutaniya cua jaaquequejosanotani”.

<sup>10</sup> Tamaqui Pueyaso Rupaajinia naa naajiotasanoori quiyajuhuj:

“Pueyaso niishiyashijiaca taucacanaa, Pueyaso saquiriojosano pueya nia cojiri, mariyata jatiqui nia shuqiritianura pa Pueyaso”.

<sup>11</sup> Pueyaso Rupaajinia, supuetana David naajiotasanoori naa sequeyajuhuj:

“Pa Jiyaniijia Pueyaso nia maninuhuaqueetare, puetunu nijaniyajanaa, tamaatia rupaaca pocuajaca taucacanaa. Pueyasora nia jaaquequenuure puetunu jiyacajinia quiniaa pueyajanaanaa, maninia na miiniuucua pajaniya”.

<sup>12</sup> Supuetana Isaías naajiotasanojinijijuhuj, paari niishiyani Pueyasoori taucaca jitianu panijia pueyaracaanu, maja saaja Judiocuaca. Naaratej, Isaíasri naa naajiotaquiaari:

“Supuetana Isai niyanujiniji supenutaniyari pueya jitianu. Nojuajaari puetunu mijiria quiniaajanaa jiyaniijia quiriqiano. Puetunu jiyacajinijinio taucacajanaari nocua tiujiaca quiniutianiya”.



<sup>13</sup> Pueyasocuaajaari poojiajinia poonijiojua, juhuajaniya pa sashiniuria pueyaracaanu, nojuaja cuaara miirrijaatijia puetunu na sequesanojuanaa pajaniyara. Pueyanaa, Pueyaso cuaara nia timitiiria jiyanojua. Naajuhuj, nojuaja cuaara nia jiitiaara juhuajaniya, canapete nocua tiuujiacacuaajani. Naacuaajitij, mijiria nia sashishacari, niaari shuquiriaatia rejeretajaca quiniutianiya Pueyaso Sohuanu cumaquishacari nijaniya, seetanujuanaa nia niishishacari pa jiyaniijaari pa rijionuucua tacatenutaniuhua.

<sup>14</sup> Cua panishano Pueyaso niqiuohuanaa, naa cua naajiojinia cua nacasusacari jiyanojua nijaniyatej, majaari nia jyaniniu janiyari niaacuaji taacanuyajaani. Maja. Janiyacuajaari niaacua tiuyani niaacuajaari seetanujuanaa maninia quijiaca. Niaacuajaari Pueyaso rupaa niishijiacajuhuj. Naacuaajitij, nia naata tama nacasutoojonujuaa maninia, maninia rupuetoojuaca nia quiniuria Pueyaso niquiara. <sup>15</sup> Naajaa, quiarjia janiyari niaacuara naajiyani cua niishifiniuhua niajaniya tarijia nia niishishano. Cua jyanootiuri, nio cua naajiojinia jiyanojua cua nacasunuucua nijaniya. Naa nia rootaanijia Pueyaso jyatenuucua janiya Neyanu Jesucristo jiyaramiquishano, taucuaa cua pohuatanura na rupaa. <sup>16</sup> Pueyaso jyatenuucua janiya nera poonijionara, janiyari cunora Jesucristo rupaa pohuataquiaa taucuaani. Naacuaajitij, Pueyaso Sohuanu poonijionuucua nojori jiuujiajinia, nojoriiri Pueyaso shuquiritiasano muerasu quiniutianiyajuhuj.

<sup>17</sup> Pueyasora cua poonijosacari, janiyari jiyanojua timitiaa Jesucristoni, cua niquishacari taa taucuaa tiuquuaa na rupaacuani. <sup>18</sup> Majaari cua timitianu tama cua miishanojuaaja. Janiya cutaraari Jesucristo miishano timitiaani. Nojuacuajaari taucuaa tiuutiquiaa na rupaacua. Nojoriiri nocua tiuquuaa nojori niquiara cua pohuatasacari na rupaa, naajuhuj, Pueyaso Sohuanu cumaacata cua miiniucua nojori niquiara. <sup>19</sup> Nojori niquishacari Pueyaso Sohuanu cumaacata cua miijiosano, nojoriiri niishiquiaa cua pohuatasanoori seetanu rupaajanaa. Janiyari pocuaji Tacuna Jesucristojiniji tari pohuataquiaari puetunu tiquiyocujanaani, Jerusalén tiacajiniji, puetunu Iliria jiyajiniarajanaano. <sup>20</sup> Naa cua pohuatasacari pa Jiyano Jesucristojiniji puetunu cuno jiyacajinijanaatej, janiyari pueyaracaanu pohuataquiaari cuniquini, tee Jesucristojiniji tojiyaquishaaquiari juhuanojuajacuajani. Majaari cua pohuatanu paniniu quiquiaari tee tamasaca pohuataquiaari tari Jesucristojiniji. <sup>21</sup> Naa cua pohuatasacari Jesucristojiniji cuno pueya niquiaratej, janiyari nio tariucuaaanu Pueyaso Rupaajinia naajiotasano tohuateeriquiaani. Naa sequeya Jesucristojinijiiri: "Nojuajiniji pohuatasoojua pueyari nojuajiniji pohuatasaanutaniya. Nojoriiri jiyacari niishiniutianiya cante nojuajani".

*Pablo naquerejosacari Roma tiacajiniara*

<sup>22</sup> Pueyaracaanu nio jiyacajinia cua pohuatasacari Jesucristojiniji, majaari jeya cua quini quiriquiaa nia niquiniucua cua quianura. <sup>23</sup> Quiarjia cutara, janiyari Jesucristojiniji pohuatanu tucatarucuaa tarini, tee Jesucristo rupaa tojiyaquishaaquiari juhuanojuajacuajani. Janiyari Espania jiyajinia pohuatanu paniya Jesucristojinijijuhuj. Queraatia marijaari tari cua shocojocanu pueyaracaanu cua naquerejosacari niaacua cua quianura. <sup>24</sup> Naacuaajitij, Espania jiyajiniara cua quiasacari, janiyacua nia tiacajinia jateemani. Janiya jaara pasaja camueenujusee niaata shuquiriaatiani, na nuhuaji, janiyari paniniutianiyani nia naacunura janiya, cua quianura Espania jiyajiniara. <sup>25</sup> Janiyari coteenu Jerusalén tiacajinia tacatenutaniuhua tii quiniaa parta Pueyaso muerasu cua niqutionuhua cumaneecani, niya quiniaa parta Pueyaso pueya niqutiojosano nojoriiri. <sup>26</sup> Puetunu parta Pueyaso pueya maapuejanaa Macedonia jiyajinia, mariyata niya Acaya jiyajiniani, nojoriiri jiyanojua maninia miya. Nojoriiri tama niishiriojonuucuanujuaaja nareja na cumaneeca niqutiojonura Jerusalén tiacajinia quiniaa casamijjuniucua Pueyaso pueyara. Cunora, nojoriiri quiarjia na rerateya cuata na jiyarosocoriquiano. <sup>27</sup> Nojoriiri naa miya nojori niishiriojosacari, maniniacuajaari nojori naacunura narta Pueyaso pueya. Seetanujuanaa maniniacuajaari nojori miishano. Judiocuacaari maja na jamuenu quiquiaari Pueyaso rupaa pohuatasaanura taucuaa niquiara. Naaratej, taucuaa cuaara saniniujia quiarjia naacuara casamijjuniucua Judiocuaca, nojori jitasano cumaneecata. <sup>28</sup> Naacuaajitij pueyanaa, janiyari nojori jiyarosocoriquiano cumaneeca niqutionutaniya Jerusalén tiacajinia parta Pueyaso pueya jitianaaani. Na nuhuaji, janiyari Espania jiyajiniara quianutaniya cutarani. Cua quiasacari, janiyari nia tiacajinia tacanutaniya cua niquiniuria nijaniya. <sup>29</sup> Janiyari seetanujuanaa niishiyani, Cristoori cua naacunutaniya maninia pa shuquiriniuria jatiqii, niaacua cua tiuquishacari.

<sup>30</sup> Cuarta Pueyaso pueyanaa, cua Jiyaniija Jesucristo nia jitianuucujuhuj, mariyata Pueyaso Sohuanu panitiootesacari pajaniya, janiyari jiyanojua paniyani nia cojiniuria janiya, Pueyaso nia secojonuta cucuara. <sup>31</sup> Cucuara nia secojore Pueyaso, na cojanura janiya Jesucristo rupaa paraa Judiocuacaacuaji, Jerusalén tiacajinia cua quiasacari.

Naajuhuaaj, nia secojore Pueyaso, Jerusalén tiacajinia quiniaa Pueyaso pueyacuara. Nojoriicuarua nia secojore, nojori masenura shuquiriaatia narta Pueyaso pueya taucuaa jiyarosocoriquiano cumaneeca nojoriria. <sup>32</sup> Naajuhuaaj, quiria nia secojore, niaacua Pueyaso tiuquitiniuria shuquiriaatia janiya, nojuaja jaara naa paniri. Tii cua quishacari niaata, janiyacua tii samaatesee nia shuriucuanii. <sup>33</sup> Pa jiyanoojia Pueyaso cuaara maninia jittiaara puetunu niajanijajanaa. Cuaara naa quiriitej.

## 16

### *Nata quiniaata Pablo sarhuatasacari nojori niishishano pueya*

<sup>1</sup> Cuarta Pueyaso pueyanaa, nio maaji niaacua tiuquiniutianiyani, nojuajaari maninia maaji, Pueyaso tojjia. Na sesaari Febe. Nojuajaari Cencrea tiacajinia Pueyaso pueya maanu naacujua maninia. <sup>2</sup> Pa Jiyaniijia panijia nia quishacari, nia paniniutia nia masure nia tiacora nio parta Pueyaso muerasu naacuna maaji. Niocua nia tiaco jittiarenoj, taa nia jittiaquiaacuaa parta Pueyaso muerasuni, maninia na quiniuria na camueenujusacari nia tiacajinia. Nojuaja nia naacure maninia, puetunu na panishanotajanaa. Nojuajaari queraatia parta Pueyaso pueya naacujuaacuaa. Cua naacujuaaariuhuaaj.

<sup>3</sup> Quiria nia sarhuatatare Priscila, neyaca Aquilano. Nojoriiri cua cojiniaa pa Jiyaniijia Jesucristora poonijionura. <sup>4</sup> Nojoriiri tama nojori cuaqueyajaaja panitiaquiaari cucuara, nojori tacunura cucuaji cua moyaquishaanura. Janiyari cunora jiyanohua nojori timitiaani, naa nojori jiyanootiuniucua cucuatej. Majaari saa janiyaja nojori cua timitianu. Seetanujuanaa puetunu parta Pueyaso muerasu taucacajiniujuaanaari nojori timitiaajuhuaaj, naa nojori miiniucua. <sup>5</sup> Quiria nia sarhuatatarejuhua parta Pueyaso pueya, noo pojori Priscila, Aquila tiajinia rerejoquiaa Pueyaso secokonunuratej. Quiria nia sarhuatatarejuhua cua rupueña Epéneto. Nojuajaari coteenujuanaa Jesucristoocua tiuquiaari Asia jiyajinia. <sup>6</sup> Maria nia sarhuatatare quiriajahuaaj. Nojuajaari jiyanohua poonijioquiaari niaara. <sup>7</sup> Quiria nia sarhuatatarejuhua Andrónico, Juniasnio. Nojoriiri cuarta Judiocuaca. Nojoriiri cuata nujuatejosaquiaari nujuatejojuajinia, canaa pohuatanuucua Jesucristojini. Puetunu cuarta Jesucristo jiyaramiquishano pueyajanaari nojori panijiaajuhuaaj. Andrónico, Junias, nojoriiri socua coteenu janiyajini tiuquiaari Jesucristoocua.

<sup>8</sup> Nia sarhuatatarejuhua Ampliato. Nojuajaari cua panishano pueyano, Jesucristoocua na tiuuniucua. <sup>9</sup> Naajuhuaaj, quiria nia sarhuatatare Urbano. Nojuajaari pa Jiyaniijia Cristora poonijionuhuaaj. Cua rupueña Estaquis nia sarhuatatarejuhuaaj. <sup>10</sup> Apeles nia sarhuatatare quiriajahuaaj. Nojuajaari puetunu casaajanaa rejeretaja cutara, Jesucristoocua tiujia na quiniucua. Aristóbulo tiajinia quiniaa pueya nia sarhuatatare quiriajahuaaj. <sup>11</sup> Naajuhuaaj, quiria nia sarhuatatare Herodión, parta Judio pueyano. Naajuhuaaj, Narciso tiajinia quiniaa pueya nia sarhuatatare quiria, noo pojori pa Jiyaniijiaacua tiuujia pueyatej. <sup>12</sup> Trifena nia sarhuatatare quiria, Trifosajuhuaaj. Cuno maajipohuari pa Jiyaniijia poonijionujuaca. Naajuhuaaj, pa panishano maaji Pérsida nia sarhuatatare quiria. Nojuajaari jiyanohua poonijiojua pa Jiyaniijia. <sup>13</sup> Rufo nia sarhuatatarejuhuaaj. Nojuajaari maninia tojjia pa Jiyaniijia. Na nucua nia sarhuatatarejuhuaaj. Nojuajaari juhua cua nucua quiquiaari quiria. <sup>14</sup> Nio pojori quiria nia sarhuatatarejuhuaaj, Asíncrito, Flegonte, Hermes, Patrobas, Hermasnio, mariyata nojoritia quiniaa parta Pueyaso pueyano. <sup>15</sup> Naajuhuaaj, nio pojori nia sarhuatatare quiria, Filólogo, necocua Julianio, Nereo, na rimitatunio, Olimpasjuhuaaj, mariyata nojoritia quiniaa parta Pueyaso muerasunio.

<sup>16</sup> Niarta Pueyaso pueya nia sarhuatatare seetanujuanaa nia paniniutia nojori. Puetunu niiquijinio parta Pueyaso pueya maapuejanaari cua sequecanuni cua sarhuatanura niajanija.

<sup>17</sup> Cuarta Pueyaso pueyanaa, nia numooteyanijia, jiyanohua nia cojuare tama nia cuaqueyajaaja najuhuaana tamaatia niishitiojonujuaca pueyacuaji. Nojoriiri Pueyaso pueya maapue cushitiojoquiaa, sesa nojori niishitiojosanota. Naacujajitj, Pueyaso pueyari juaatiojoquiaa. Majaari nojori niishitiojonu pueya taa coteenujuanaa nia niishitiojosaaquiaari seetanu rupaajanaa cutarani. Naa sesa niishitiojonujuacaacuaji nia rupa-tere. <sup>18</sup> Nojoriiri maja seetanujuanaa na poonijionu pa Jiyaniijia Jesucristora. Nojoriiri poonijioquiaa tama nojori panishanojuajaaja nojori masenura. Najuhuaana shanohua nojori pohuatasanota, nojoriiri niishiyashijia pueya sapojoquiaa. <sup>19</sup> Puetunu tamonu jiyacajiniujio parta Pueyaso pueyajanaari niishiya, niaari seetanujuanaa Jesucristo rupa tojjitajaca cutara. Naaratej, janiyari jiyanohua nia timitiaani. Naajuhuaaj, janiyari paniyani niishijia nia quiniuria, saaja seetanu rupaajanaa tojjia nia quiniuria, maninia miijia nia quiniurajahuaaj. Saniniuujia, sesa niishitiojosano niishiyashijia

nia quitiriquiani, maja sesa miijiacua nia quiniuria. <sup>20</sup> Naacujajitij, poojia cajitijia Pueyasoori nia cumaquiniutianiya, Satanás nia shocotanura na sapojosacari niajaniya juucua. Niaari juhua na tanacunutaniya jiyocuara, Pueyaso tojjijiacua nia quiniucua. Pa Jiyaniijia Jesu cuaara nia cumaquiiria, shuquiriaatia nia quiniuria.

<sup>21</sup> Timoteo, cuata poonijiona Jesucristorani, nojuajaari cua sequeya nera cua saruhuata-nura niajaniya. Cuarta Judiocuaca Lucio, Jasón, Sosípater, nojoriiri nia saruhuataajuhuaaj.

<sup>22</sup> Cuarta Pueyaso pueyanaa, janiyari Tercioni. Janiyari Pablora nio naajiyani, niaacua jiyarosocoriquiano. Janiyari nia saruhuataajaaniuhuaaj Cristoocua tiujia cua quishacarijihuaj. Niojuanaa, pueyanaa.

<sup>23</sup> Parta Pueyaso pueyano Gayoori nia saruhuataajuhuaaj. Nojuajaari na tiajinia cua quiniuria cua masuucanu. Nojuajaari puetunu parta Pueyaso pueyajanaa masuujua, na tiajinia nojori maquenura, nojori tiuquijiosacari nio tiacajinia. Parta Pueyaso pueyano Erastoori nia saruhuataajuhuaaj. Nojuajaari jiyatesaacanu nio tiacajinia jiyaniijia cumaneeca cojuana na quiniuria. Parta Pueyaso pueyano Cuartoori nia saruhuataajuhuaaj.

<sup>24</sup> Pa Jiyaniijia Jesucristo cuaara cumaquiiria puetunu niajaniyajanaa.

*Pablo maniniuhuaqueetasacari Pueyaso, quera na tucuatasaacari na naajio*

<sup>25</sup> ¡Pueyanaa, jiyanohua pa maniniuhuaqueetare pa Pueyaso! Nojuajaari na naata cumaquiniu niajaniya, seetanujuanaa na muerasu nia quiniuria na rupaacua nia tiushacari. Janiyari naa rootaquiaa niajaniyacujani, cua pohuatasacari Jesucristojiniji. Pueyasojuanaacujaari tarijia cua niishitiquiaari Neyanu Jesucristojiniji cua pohuata-nura. Jiya shipiniyaquishaacarijiyojua, Pueyasoori jiyasohua tamajaaja na niishishano jiiitaja Neyanu Jesucristojiniji. <sup>26</sup> Saniniuuja, quiari naataja, paari niishiquiaarini, Jesucristocujaari mijiria niquiaari puetunu pueyajanaa na jaariuutianura Sesaaca. Tariucua-caanu Pueyaso sequesano caminiujiuniaa naajionuutasanojiniji paari quiarijia seetanujuanaa na niishiya cutarani. Pueyaracaanu Quijia Pueyasocujaari naa paniquiaari quiar-ijia pa niishiniuria Neyanujiniji. Quiarijiani, Pueyasoori Neyanujiniji pohuataniquiaa puetunu jiyacajinjinio pueya niquiarajanaa, Neyanuucua nojori tiuuniuria. Naa na pohuataniquiaariiri Neyanu Jesu tojjijiacua nojori quiniuria, Judiocuaca, taucucanio.

<sup>27</sup> Pa Pueyasoori jiyanohua niishijia cutara. ¡Pueyaracaanu pa maniniuhuaqueetare nojuaja, maninia na miiniucua pajaniya, Neyanu Jesucristoocua pa tiuushacari! Cuaara naa shuquiritiasaaria pueyaracaanutej.

## COTEENU PABLO NAAJIONEE CORINTO TIACAJINIA QUINIAA PUEYASO PUEYACUARA

*Pablo sarhuatasacari Corinto pueya*

<sup>1-2</sup> Corinto tiacajinia quiniaa Pueyaso muerasunaa, ¿niaate quiyajaa? Janiya, pa tarajanu Sóstenesjuhuaj, canaari nia saruhuataani. Janiya Pablóni, Jesucristo jiyarosano na rupaa cua pohuatanura taa Pueyaso paniquiaaricujani. Canaa niaacuara naajiyani, socua canaa niishitiojonura nijaniya, Pueyaso saquiriojosano pueya nia quiniuucua. Niaari maninia quiya Pueyaso niquiara, Jesucristo nia rupuesacari. Niaari seetanujanaa Pueyaso muerasu, puetunu jiyacajinia pueyatajanaa, canapueete Jesucristoocua tiuujia-cacuajani. Jesucristocuaajari nojori Jiyaniijia, pa Jiyaniijiajuhuaj. <sup>3</sup> Pa Que Pueyaso, pa Jiyaniijia Jesucristo cuaara cumaquiiria nijaniya, juhuajaniya nia quiniuria.

*Paari maninia miishaaquiaani Cristo pa rupuesacari*

<sup>4</sup> Maninia nia quiniuucua, janiyari pueyaracaanu Pueyaso sequequiaani “Paacarasho”. Pueyasocuaajari jiyanoehua maninia miiquiaari nijaniya, nia rupuesacari Jesucristo. <sup>5</sup> Nia rupuesacari Jesucristo, Pueyasoori puetunu cumaquiiaarijianaa nijaniya na cumaacata, nia poojotanura puetunu na rupaajanaa, puetunu na rupaajanaa nia niishiniuriajuhuaj. <sup>6</sup> Maninia nia tojtiasacari Cristojiniji pohuatasano, niaari maninia miishaaquiaari taa canaa sequequiaari nijaniyacujani. <sup>7</sup> Naacujitij, niaari tari masequiaari puetunu Pueyaso niqutionu panishanojuanaa, maninia na muerasu nia quiniuria, nocua nia jiaatianuta nia sashishacari pa Jiyaniijia Jesucristo tiuquishacari-uhua. <sup>8</sup> Pueyasoori nia cumaquiniutianiya pueyaracaanu, maja quenaaja niaacua casaa tiutiasoo quiniuria, sesa nia miishanojiniji. Naacujitij, pa Jiyaniijia Jesucristo jaara tiuquiriohua na ruuretajaca na saniitionura, niaa cutaraari juhuajaniya quiniutianiya. <sup>9</sup> Pueyasocuaajari maninia tohuateequiaa na sequesano. Nojuacuajaari pa sequequiaari pa cojiniuria Neyanu, maninia pa miishaanura Neyanutajuhua. Cuno Neyanuni, nojuacuajaari pa Jiyaniijia Jesucristo.

*Pueyaso muerasu juhua tamasaca niqutiooquiaari*

<sup>10</sup> Cuarta Jesuucua tiunuaanaa, cua tojitiare. Pa Jiyaniijia Jesucristoori cua sequeteya nio. Maninia nia niishiriojore. Maja juhua tamasaca nia niqutioonu. Maja tamasaca nijaniya. Maninia nia niishiriojore, maja tamaatia. Nia jiuujiaatioorejuhuaj. <sup>11</sup> Naa nia sequeyanijia cuarta Jesuucua tiunuaanaa, Cloe niquiohua pohuatanucua janiya nijaniyajiniji. Nojoriiri cua sequerucuaa niaana juayonuujutaquiaa. <sup>12</sup> Naa pohuatasaarucuaa nijaniyajinijini: puetunu pueyajanaana tama sequequiaajaaja: “Canaari Pablo pueyani”. Tamasacanaari saniniujia sequequiaacujua: “Canaari Apolo pueyani”. Tamasacanaari sequequiaajaacuhua: “Canaari Pedro pueyani”. Tamasacanaari sequequiaajuhua: “Canaari Cristo pueyani”. ¿Naatee pueyanaa? ¿Casaara tamajaaja naa nia raquitiijiquianuni? <sup>13</sup> ¿Majateeri nia niishiniu? Paari Jesucristo cuaqueyani. ¿Pa Jiyaniijia cuaqueyateeri neequeresetanocuaa? ¿Janiyateeri niaacuara cusoquiaari niyacutesanojiniani, cua pueya nia quiniuria? ¿Niaateeri cua sesajinia tiuquinijosaaquiaari moojinijuhua? ¡Maja, cuarta Pueyaso pueyanaa! <sup>14</sup> Janiyaquiiri namitia nia tiuquinijiaquiiciaari moojiniani. Naacujitij, majaari nia naata sequenu niaa cua sesajinia tiuquinijosaaquiaari. Janiyari niishiya cutarani, janiyari saaja Crispo tiuquiniquiaarini, Gayonio. <sup>15</sup> Naacujitij, majaari quenaaja tamona na naata sequenu janiyari na tiuquiniquiaarini. <sup>16</sup> Quera niyajetaanjia. Janiyari Estéfanas tiuquinijioquiaarijuhua necohuatajani. Majaruhua socua pueya cua tiuquinijionu quiquiaari.

<sup>17</sup> Jesucristoori maja na jiyaronu quiquiaari janiya pueya cua tiuquinijionura. Cristo cutaraari cua jiyaroquiaari na rupaa cua pohuatanura. Majaari cua maniniushitiniu na rupaa cua pohuatasacari, pueya mariqui shanohua cua pohuatasanoocua tiuuri najuhuaanaari. Cuaara tiuutiuria cutara Jesucristoocua, na miiniuucua maninia pocuara. Pueyasoori pa jiyanoocua saaja Jesucristo cusonuucua niyacutesanojinia pocuara.

*Cristoori Pueyaso cumaaca jitiiaa, Pueyaso niishitijajuhua*

<sup>18</sup> Canaa pohuatasano Cristo cusonujiniji niyacutesanojinia pocuarani, cunoori juhua mosanucua pohuatasano shaajecoriquiano pueyara. Naajaa, Jesucristo rupaari Pueyaso cumaacaracacua nia tojtianaara, Pueyaso muerasura na jataniniuria pajaniya. <sup>19</sup> Pueyaso sequesanoocuaajari naa naajiotasaaquiaaritij: “Janiyari niishijaca niishishano cushionutaniani. Mijiria pueya niishishano jiyatenu-taniya najuhuanaranijia”.

Naacuaajitij, cante mijiria pueya niishishanoocua tiuyani, nojuajaari maja na jiyanooshaanu quiniutianiya.

<sup>20</sup> ¿Pueyanoteeri jiyanoohua niishitiajaraca Pueyaso muerasura na jataniniuria pajaniya? ¡Maja! Niishijiajanaa jaara jyanohua niishiriojore, ¿pa naatate na sequesanoocua tiuuniu, Pueyaso na jyanootiniuria pajaniya? Maja. ¿Niishitiojona rootasanote na naata Pueyaso pueyara jyatenu pajaniya nocua pa tiuushacari? Maja. Naacuaajitij, puetunu mijiria niishishanojuanaari najuhua quiya Pueyasora. <sup>21</sup> Pueyari maja na naata Pueyaso niishiniu quiquiaari tama nojori niishitiajataaja. Pueyasoori tama sequequiaarijiaaja na niishitiajata cutara:

“Jaaja. Maninia naatej. Pueya jiyanooriiria saaja nojori tiuushacari cua Niyanuucua”. Pueyari saniniuujia jiyaniya Jesucristo rupaari nareja sequesanojuhanajaj, tojishoo. <sup>22-23</sup> Naaratej, cuarta Judiocuacaari maja Jesucristoocua tiuuniaara na quiniu ritia. Nojoriiri Pueyaso cumaacata miishano niqiniuu paniquiaa coteenu saaja. Cunora, nojoriiri canaa tojtiaaquiquiaa canaa pohuatasacari Jesucristo mosaanujiniji niyacutesanojinia teetasano. Nojoriiri saaja sequequiaa: “¿Pa Jyanijiaranotucua casaara naa cararaatia mosaareni?” Griego pueyari naajuhuj. Majaari ritia nojori quiniu paniniu Jesucristoocua tiuuniaara. Nojoriiri saaja niishiniuucua jiaatijaca. Nojoriiri jiyaniya Jesucristoori najuhua cusoquiaari juhua moseeca. Naacuaajitij, canaa pohuatasacari Jesucristo niyacutesanojinia mosaaquiaari, Judiocuacaari jiyaniya Jesucristoori cumaacaju quiquiaari. Nojoriiri jiyaniyajuhaaj Pueyaso Jiyarosocoriguanoori ritia Judiocuaca jyanijiaara quiniutianiya cutara. Majaari na niishitiumiu quijia Cristo cuara coteenu miishaaria naquiya, jiyanooshano nojori quiniuria sesa nojori miijosanujiniji. Griego pueyari canaa pohuatasano tojiaquiquiaajuhuj. Nojoriiri jiyaniya Pueyasoori niishiyashijia quiquiaari Neyanu na motenura. <sup>24</sup> Paa cutaraari niishiyari Cristoori pocuara cusoquiaari. Naacuaajitij, Pueyasoori cumaacaraca cutara na saquiriojosano pueya na jaariutianura Sesaaca, na muerasura na jataniniuria pajaniya, Judiocuaca, Griegohanio. ¡Pueyasoori jyanohua niishijia cutara! <sup>25</sup> Pueyari jiyaniya Pueyasoori niishiyashijia quiquiaari. Cunora Neyanu cusojuaquiaari niyacutesanojiniaari. Naajaa, naacuaajiti Pueyasoori pa jyanooquiaari. Pueyasoori jyanohua socua niishijia cutara mijiria niishijiacajiniji. Pueyari jiyaniyajuhaaj, Pueyasoori cumuecaaju quiquiaari Cristo cusosacari niyacutesanojinia. Naajaa, naacuaajitij, ¡Cristoori Sesaaca shocotaquiaaricuaaja! Pueyasoori jyanohua socua cumueeca pajaniyajiniji.

<sup>26</sup> Cuarta Jesuucua tiuuniaanaa, niaacuaajaari niishiya taamueca pueya nia quiquiaari pueya niqiarani, Pueyaso sequesacari niajaniya na muerasu nia quiniuria. Saaja secaja niajaniyajinijinoori niishijiaaca quiriqiaa. Saaja secaja niajaniyajinijinoori tojishano pueya quiriqiaajuhuj. Saaja secaja niajaniyajinijinoori jyanijianucua niquihuacujinijo supeno quiriqiaa. <sup>27</sup> Mijiria quiniaa pueyara, Pueyasoori socua niishiyashijiaaca pueya saquirioquiaari, na muerasu nojori quiniuria. Naacuaajitij, mijiria niishijiaacari tamajaaja caririqiniutianiya nojori jaara saquiriojiaquishaare. Pueyasoori tojishoo pueya saquiriojiaarijihuaj, na muerasu nojori quiniuria, mijiria tojishano pueya caririqiniuria nojori jaara saquiriojiaquishaare. <sup>28</sup> Pueyasoori soosano pueya saquiriojiaarijihuaj, tojishoo pueyano. Pueyasoori naa saquiriojiaari najuhua quijiaaca. Canapueete tama na cuaqueyajaaja jiyaniya cutara pueyanoni, cuno pojoriiri saniniuujia quejoosaanutaniya. <sup>29</sup> Naacuaajitij, majaari quenaaja jyanohua pocuaja cureenu quiniutianiya Pueyaso niqiarani. Tojetaarucujanaa shaaquiiri pocuajaca quiniutianiya. <sup>30</sup> Pueyasojuanacuajaari nia rupequequiaari Jesucristo. Naacuaajitij, niaari Pueyaso niishitiaja jitiaa. Nia rupesacari Jesucristo, niaari maninia miijia quiya Pueyasora. Pueyasoori nia jataniya saa na tojjiacaraja nia quiniuria, juhua Neyanu nia quiniuriajuhuaj. Niajaniyari puetunu jecasaanutaniyajanaa. Paari naa miishiyani Jesucristo pa rupesacari. <sup>31</sup> Seetanujunani nio sequesano tariucuaaanu Pueyaso Rupaajiniji: “Cante shuquiriaatia quiniu paniani, nojuaja cuara shuquiritaara pa Jyanijiaa”.

## 2

### *Jesucristo mosaanujiniji pohuatasano*

<sup>1</sup> Cuarta Jesuucua tiuuniaa pueyanaa, janiya jaara niaacua tiuquiquiaarini, niaacuaajaari niishiya taa cua pohuataquiaari Pueyasojiniji Jesucristo rupaa niajaniyani. Majaari jiya-jeneta cua pohuatanu quiquiaari niishijiaaca niishishano rupaacata. Cua pohuatasanoori niishishaatia quiquiaarijia, maja juhua cutara pueyano pohuatasano. Janiyari jacaria pohuataquiaari Pueyaso rupaa niajaniyani. <sup>2</sup> Janiyari tari tama sequequiaarijianija: “Janiyari saaja Jesucristojiniji pohuatanu paniya Corinto pueya niqiarani, naajuhuj, taa na cusoquiaari pocuara niyacutesanojiniani”. <sup>3</sup> Cua pohuatasacari Jesucristo rupaa nia

niquiara, janiyari sasaca quiriquiaa cua puerenutani. Janiyari tetecariquiaani. <sup>4</sup> Majaari cua paniniu quiquiaari cua tiutiniuria nijaniya Jesucristoocua tama cua niishitiajata-jaaja. Naaratej, majaari cua pohuatasano quiniu quiquiaari juhua shanohua pohuataja sequesano. Naacuajitij, cua pohuatasacari Jesucristo rupaa nia niquiara, Pueyaso So- huanu cutaraari nooijacajinia poonijioquiaari Pueyaso cumaacata cutara. <sup>5</sup> Naacuajitij, niari Jesucristoocua tiuquiaari Pueyaso cumaaca mishacari maninia nooijajinia. Maja cutaraari nia tiuuniu quiquiaari saaja pueya niishishanoocua.

*Pueyaso Sohuanucuaajari pa niishitiya Pueyaso*

<sup>6</sup> Naajaa, canapueete Pueyasoocua tiuujia seetanujuanaa cutarani, nojoriiri niishiya canaa pohuatasano Jesucristojiniiri seetanu niishishanojuanaa cutara. Nio niishishanoori maja saa pueya niishishanojua. Maja mijiria jiyaniijianucua niishishano. Mijiria niishijiaaari shaajconutaniya. Nojori niishishanoori najuhuaa quiniutianiya. <sup>7</sup> Canaa pohuatasano cutaraari Pueyaso niishishano tarjia, jiya shipinishaacarijiyojua. Pueya-soori jiyacari niishiriojioquiaari jiyanoohua maninia na miiniuria pajaniya, shuquiriaatia pa quiniuria pueyaracaanu pa Jiyaniijia Jesucristo shuriucua. Nio rupaari maja pueya niishishano tari. Pueyasoori maja nio na niishitonu quiquiaari pueya tari. <sup>8</sup> Mijiria jiyaniijianucuaari nio niishiyaquiquiaari. Nojori jaara na niishiquiaari tarjia, nojori maara pa Jiyaniijia moyaquiquiaari niyacutesanojinia. ¡Na Shipininia motuquiaarijiaari, pueyaracaanu shacantuuca quijia! <sup>9</sup> Naa naajiotasano quiyacuajaari tariucuaaanu Pueyaso Rupaajinia:

“Pueyasoori jiyasohuaja casa jeenucuasano jiitiaa na panijiaa pueyara. Cunoori maja pueya niquishano quenaaja. Majaari cunojiniji nojori tojishano quenaajajuhujaj. Majaari quenaaja pueya niishiriojonu quiquiaari jiyano casaate na naata quiniu nojoriria”.

Quiarijiani, canaari saniniuujia pueya niquiara na pohuataani. <sup>10</sup> Pueyasocuaajari quiarjia canaa niishitiquiaari canaa jiuujajinia na miiniu panishano pajaniyara. Canaa niishitiquiaariiri na Sohuanuta. Na Sohuanuuri puetunu Pueyaso niishiriojosanojuanaa nooijajinia niishiya. <sup>11</sup> ¿Cante pueyano niishiriojosano nooijajinia niishiyani? ¿Majate saa na camaru sohuanujua niishiniu? Taaquiriirinij. Naajuhujaj, saaja Pueyaso Sohuanuuri Pueyaso niishiriojosano nooijajinia niishiya. <sup>12</sup> Naaratej, Pueyasoori na Sohuanu niquitioquiaari pajaniya, pa niishiniuria Pueyaso niishishano. Naacuajitij, majaari pa jiiitanu saaja tama pa sohuanujuaaja Pueyaso niishishano pa niishiniuria. Paa cutaraari Pueyaso Sohuanuracajaniuhujaj. Naacuajitij, Pueyaso Sohuanu cumaquishacari pajaniya, pa naata puetunu Pueyaso niquitiosano pajaniyarajanaa niishiniu. ¡Jiyanoohua capora Pueyaso! <sup>13</sup> Naacuajitij, canaa pohuatasanoori maja saaja mijiria pueya niishishano. Pueyaso Sohuanujuanaari canaa niishitiojioquiaari Pueyaso rupaa canaa niishiniuria canaa jiuujajinia. Naacuajitij, canaa naata Pueyaso Sohuanu jiitanaa niishitiojonu seetanu Pueyaso rupaajanaa, mariyata taa Pueyaso Sohuanu niishitiojioquiaa canaacuaani.

<sup>14</sup> Mijiria quiniaa pueyari Pueyaso Sohuanu niishitiojosano niishiniu paniyaquiquiaa. Nojoriiri saaja juhua tama mijiria niishiriojosanojuaja na jiyatequiaa. Seetanujuanaa, nojoriiri maja na naata na niishiniu. Saa Pueyaso Sohuanutaja pa naata Pueyaso Sohuanu niishitiojosano niishiniu. <sup>15</sup> Cante Pueyaso Sohuanu jiitiaani, nojuajaari na naata puetunu niishishanojuanaa saniniuujituni. Saniniuujia, tamasaca pueyari maja na naata Pueyaso Sohuanu jiitanaa miishano niishiniu nocuara na rimiaaquenura. <sup>16</sup> Tariucuaaanu Pueyaso Rupaajinia naa naajiotasaaquiaarijiuhujaj:

“¿Cante pa Jiyaniijia jiuujajinia na niishiriojosano niishiyani, socua na niishitiojonura nojuajani? Shaaqui”.

Paa cutaraari Jesucristo niishishano niishiyani Pueyaso Sohuanuraca pa quishacari. Naacuajitij, majaari pa niishiniu saa mijiria pueya niishishanojua.

### 3

*Pueyasora poonijionaa pueya cuaara poonijionuuriquia nojori panitioonuta*

<sup>1</sup> Cuarta Jesuucua tiuuniaanaa, cua quishacari niaata, majaari cua naata jiyajeneta Pueyaso niishishano cua niishitiojonu quiquiaari nijaniya. Niaari quera juhua Pueyaso Sohuanuuju quiriquiaajaa. Niaari juhua Cristo conaaja quiriquiaajaa, maja Pueyaso tojjijia seetanujuanaa. Nocuaji, janiyari nia niishitiojoriquiaa jacariani, juhua Pueyaso niishiyashijia pueya nia quishacarijia. <sup>2</sup> Cua niishitiojosano nijaniyari niishishaatia quiquiaarijia, maja jiyajeneta. Majaari cua naata Pueyaso cutara niishishano cua pohuatanu quiquiaari nijaniya. Cuno niishishanoori cumueeca Pueyaso pueyara, naatej, taa shu quiaa tariucua puereetuca pueyaracaani. Juhua naatujoori nia quishacarijia,

majaari nia naata na tojiniu quiquiaari. Juhuanajuajaari maja nia naata na tojiniu quiarijiani. <sup>3</sup> Niaari juhua Pueyaso Sohuanuuju quiyajaa, juhua Pueyaso niishiyashijiaca pueya. ¿Naatejaaratej? Niaana niarta Pueyaso muerasu shocotanu paniquiaa juucua. Niaanaari juayonuujutaquiaa. Naa nia quishacaritij, niaari juhua Pueyaso Sohuanuuju quiyajaa pueyaracaanu, juhua Pueyaso niishiyashijiaca pueya. <sup>4</sup> Niaana sequequiaa: “Canaari Pablo pueyani”. Tamasacanaari sequequiaajuhuj: “Canaari Apolo pueyani”. Naacuajitij, puetunu nijaniyajanaari saaja juhua Pueyaso niishiyashijiaca pueya quiyajaa.

<sup>5</sup> Nia sequeretoj: ¿casaate Apoloni? ¿Casaate janiyani? Canaari nareja Pueyasora poonijionaajuhuanani. Canaari saa Pueyaso panishano miiquiaajaani, Jesucristo rupaa nia tojitianura. Canaari panishano miiquiaarini taa na sequequiaari canaa miiniuriacuajani. <sup>6</sup> Naacuajitij, janiyari Pueyaso rupaa nia pahuataquiaarini, naatej, taa casaa jajau pueyano natojoquiaacuani. Apoloori saniniuujia socua Pueyaso rupaa nia niishitioquiaari na cumaquiniuria nijaniya, naatej, taa pueyano na natau shijioya mohuacacuani, maninia na maashiniuria. Pueyaso cutaraari na rupaa maashitiquiaari nioojiacajinia, na muerasu nia quiniuria cutara. <sup>7</sup> Naaratej, ¿casaateeri canaani; Apolo, janiyano? Canaari Pueyasora poonijionaa narejani. Saa Pueyasojua cutaraari cumaacaraca. Saaja nojuaja cutara na naata pa tojitini na rupaa, seetanujuanaa na muerasu pa quiniuria. <sup>8</sup> Naacuajitij, paari niishiyani, cante natojonani, cante mohuacacuani, canaari mariyata saaja Pueyaso poonitijiosanoni. Pueyasocujaari canaa niqutionutaniya na jiišanaso, nera canaa poonijionuucua. Cante socua poonijioereni, Pueyasoori socua na jiišanasojiniji na niqutionutaniya taajecori pueyajiniji. <sup>9</sup> Canaari mariyata Pueyasora poonijionaani. Niaari juhua Pueyaso nataacuaca nera. Niaari na muerasu cutara, maja canaa muerasu. Naajuhuj, Pueyasoori juhua nia tiaa saitia, na quiqiorano. Saitia tiasacari, sairi coteenu cumaatia niojoshiya na morijiuria, maja tia matanura. <sup>10</sup> Pueyaso jaara jiyaroquiaari janiya, janiyari Jesucristo rupaa pohuatunu coteequiaari maninia nijaniyani, Pueyaso muerasu nia quiniuria nia tiuushacari cua pohuatasanoocua. Naacuajitij, janiyari juhua Pueyaso tiara shipininiu coteequiaarini. Cua niishitiojosano nijaniyani, cunoori juhua morijiu nujuatejosano quiquiaari. Cua nuhuaji, tamasacaari nia niishitiojoriquiaa socua Jesucristo rupaa, juhua Pueyaso tia tu-cuatasaanura. Nojori cuara niishiiria maninia, maninia nojori niishitiojonura nijaniya, juhua maninia tiasano nia quiniuria.

<sup>11</sup> Majaari socua tamonu rupaa quiniu nocua pa tiuniuria Pueyaso pueya pa quiniuria. Saaja Jesucristo rupaa cutaraari pa jatanijia Pueyaso pueya pa quiniuria. Janiyacujaari na rupaa pohuataquiaari nijaniyani. Saa na rupaacuaja nia tiuushacari, niocua maninia quiri, juhua maninia morijiucaacuacua tiasano tia, maja na matanura. <sup>12-13</sup> Cante socua Jesucristo rupaa niishitiojia nijaniyani, cuno cuara niishitiojora jyanohua maninia. Cuara niyajetaaquiria cutara, nojuajaari na niishitiojosanojiniji nequesoreesaanutaniya Jesucristo muetasacarihua pocua, pa miishano na saniniuuniuria juhua manitia. Puetunu niishishaanutaniyajanaari taa canaa niishitiojoriquiaa Jesucristo rupaani, maninia, sesa soj. Pa naata sequenu, canaa niishitiojosanoori juhua pueyano tiasano. Pueya jaara tiare orota, platatanio, shanohua saitanio, maniiari maja na naata na catijianu. Cante saniniuujia tiaree macacatani, tucurutajuhuj, turequenacatanio, cunoori taraatia quiniutianiya na tia jaara sanishaare catijianu. Naaratej, pa niishiriojore, ¿pa rootasanote seetanujuanaa maninia? <sup>14</sup> Tamonu jaara maninia miiija quiquiaari Pueyaso cumaacata, na miishanoori maja najuhuaa quiniutianiya Pueyasora. Pueyasoori cuno pueyano niqutionutaniya na jiišanasojiniji. Cuno pueyanoori niishijia quiquiaari, juhua maninia tiana pueyano. Maninia casaata tiaquiaariiri, maja na tia catenura jaara sanishaare senu. <sup>15</sup> Cante saniniuujia tiaquiaari cateja casaatani, na tiasanoori catenutaniya. Puetunu na jiišanasojuanaari juurequenutaniya. Saaja nojuajaari Sesaaca jaariutiasaanutaniya juhua manijiniji jaashano. Naa miishaanutaniyari Jesuucua tiuninaa, canapuee maninia miyashijia quiquiaari mijiriani. Nojuajaari jatarinitiaja Sesaaca jaariutiasaanutaniya, juhua manijiniji jaashano.

<sup>16</sup> ¿Majateeri nia niishiniu pueyanaa? Niaacuajaari Pueyaso quiquio, juhua na tia. Na Sohuanuuri nioojiacajinia quijia. <sup>17</sup> Tamonu jaara Pueyaso quiquio sesore, Pueyasoori cuno pueyano saniutionutaniya saniniuujia. Puetunu Pueyaso muerasujuanaari juhua na tia quiya. Pueyaso quiquio cuara quiri tojetaarucujanaa maninia, saa neraja, maja raquiriojotasano. Niaacuajaari na quiquio.

<sup>18</sup> Tama nia cuaqueyajaaja nia cojuare tamonu mariqui nia sapojoreeri. Cante tama na cuaqueyajaaja jiyaniya niishijiani, nojuaja naasucuaari niishijia saaja Pueyaso niishiyashijiaca niqiuara. Cuno pueyano cuara jataara cuno na niishishano juhua niishiyashijia na quiniuria narta pueya niqiuara. Na nuhuaji, cuara maseera Pueyaso niishitijaa, seetanu niishijia na quiniurijanaa. <sup>19</sup> Mijiria pueya niishishanoori juhua

paateca sequesano Pueyasora. Tariucuacaanu Pueyaso Rupaajinia naa naajiotasanoori quiya:

“Pueyasoori mijiria quiniaa pueya cushiriquitianiniutianiya, tama nojori niishitiushanoocuaajaaja nojori tiuushacari najuhuanaj”.

<sup>20</sup> Naa naajiotasanoori quiyajuhuaaj:

“Pueyasocuaajari mijiria niishijiaca niishiriojosano niishiya. Naa sequeyari: ‘Najuhua-naari cuno pojori niishiriojonuusano’ ”.

<sup>21</sup> Naaratej, maja shuquiriaatia nia quiniu saaja niquiriyatu Pueyaso rupaa pohuatana nia tojishacari. Pueyasoori tamasaca pueya jiyaramiquiquiaa nia cumaquiniuriajuhuaj, maja saa niquiriyatu niishitiojonaja. Puetunu casaajanaari niara, maninia nia quiniuria. Naaratej, majaari saa niquiriyatu pueyanoocuaaja nia jiaatianu. <sup>22</sup> Pueyasoori canaa jiyaramiquiquiaari canaa cumaquiniuria niajaniya. Naacujitij, janiya, Apolo, Pedro, canaari niara quiyani, maninia canaa miiniuria niajaniya Pueyaso rupaata. Nio jiyari niara quiyajuhuaaj. Pueyaso shipinishanocuaajari niara. Naajuhuaaj, mijiria nia quishacari, cunoori niara quiya, socua maninia quijiara nia quiniuhuaa. Taa nia miishiya quiarijiacuajani, taa nia miishaanutaniyani, puetunu cunajuanaari niara, cumueeca Pueyaso muerasu nia quiniuria. Nia shaajesacariiri maninia quiniutianiya niaarajuhuaaj. Pueyasoori nia shaajeteya na shuriucua nia quianura. Naacujitij, puetunu casaajanaari niara quiya. <sup>23</sup> Niajanitari Cristora quiya saniniuuja. Cristoori saniniuuja Pueyasora quiyacujua.

## 4

### *Jesucristo jiyaramiquishano poonijiosano*

<sup>1</sup> Naaratej pueyanaa, niajaniya cuaara niishiiria canaari saaja Jesucristo seyani. Canaari maja cutara pueyani. Pueyasoori canaa jiyatequiaari na rupaa canaa niishitiojonura niajaniya, Pueyaso niishitiojosano canaa. Cunoori tarijia pa niishishoo. <sup>2</sup> Cante Pueyaso niishitijaa jiiitiaani, cuno cuaara quiiria seetanujanaa Pueyaso miiniu panishano panijia, na rupaa na pohuatanura puetunu maniniajanaa. <sup>3</sup> Niajaniya, tamasaca pueyajuhuaaj jaara sequenu paniya taamueca pohuatanate janiyani, quiria, naajaa. Mijiria nequesoreena jaara cua nequesoreere cua niishitiojonujiniji, naajaa. ¿Janiya sesa niishitiojoquiaani? Johuaaj. Maja cua niishiniu. <sup>4</sup> Janiya jaara sesa miiriquiaa cua Jiyaniijiaara cua poonijiosacarini, majaari cua niishiniu. Majaari coojia macuhujenu quijia. Naajaa, maja cua naata tama cua cuaqueyajaaja sequenu janiya cutara maniniani. Saa cua Jiyaniijiaa na naata sequenu taa cua quiquiaarini. <sup>5</sup> Naaratej, maja nia rimiaaquenu tamonuucuaa, Jesucristo tiuquiyaquishacarihua pocua. Nia sashiri. Pa Jiyaniijia jaara tiuquiriohua, puetunu jiyasohua pa miishanojuanaari niishishaanutaniya. Niishishaanutaniyaajariuhuaaj casaara pa miiquiaari puetunu pa miishanojuanaani. Cuno quishacari, pa Jiyaniijiaari maninia pohuatanutaniya cante maninia miijia quiriquiaa mijiria na quishacarini.

<sup>6</sup> Cua tojitiare cuarta Jesucuaa tiuuniaanaa. Janiyari nareja nia pohuatariquiaa Apoloinijini, janiyajiniijihuaaj, maninia nia niishiniuria casa cua niishitiojiya niajaniani. Naacujitij, nia niishitiojoriquiaanijia saa Pueyaso rupaa nia tojitanura suraatiaja. Majaari socua tamonu niishitiojosano nia tojiniu. Naajuhuaaj, maja nia sequenu tamonu niishitiojonajiniji: “Cuno niishitiojonaari sesa pohuataja. Tamonu niishitiojona cutaraari shanohua pohuataja. Na tojiriiriaj, na shuquiritiniucua janiya”. Maja naate pueyanaa. Mariyata nia tojitiare puetunu Pueyaso jiyaramiquishano pueyajanaa, seetanujanaa nojori pohuatasacari Pueyaso rupaa. <sup>7</sup> ¿Niajanitariuhuaaj? ¿Taa nia sequeya tama nia cuaqueyajiniijiaajani? ¿Niaateeri socua maninia pueya tamasacajiniji, socua niishijiacajuhuaaj? Majaruhua. Naajaa, niaa jaara seetanujanaa socua niishijiaca quiri tamonujiniji, ¿taa jiyanohua niishijiacara nia quiquianuni? ¿Tamajaate? ¡Maja tamajaaja! Niaacuajari Pueyaso niishitijaa jiiitiaa. Naaratej, maja nia jyaniniu niaa socua maninia pueya tamasaca pueyajiniji, tama nia niishishanotajaaja.

<sup>8</sup> Naa jiyoteeri jiyaniya niaa tari cutara niishijiacara quirii. Naa jiyoteeri jiyaniyajuhuaaj, niaa tari jiiitiaa puetunu Pueyaso niqutionu panishanojuanaa niajaniya. Naajuhuaaj, niaa jiyoteeri jiyaniya Pueyasoori nia jiyateree jiyaniijanucua nia quiniuria. Naa naasucuaari canaa shocotaree tari. ¿Naatejaaratej? Seetanujanaa naara nia jiyateriquiani, canaa quiniuria niarta jiyaniijanucuaajuhuaaj, shuquiriaatia pa quiniuria mariyata. <sup>9</sup> Janiyari cuarta Jesucristo jiyaramiquishanoocua niishiriojoriquiaani, Pueyaso naasucuaari canaa jiyatequiaari juhua najuhuaa quijiacara, saa puecosocoriquianojua. Canaa naasucuaari naa quiya mijiriani, puetunu pueyajanaa shootianura canaa,



Pueyaso seya shootianura canaajuhua. <sup>10</sup> Canaa tojtiasacari Cristo, canaa naasucuaari niishiyashijiaca quiya tamasacarani. Niajanitari saniniuuja niishijiaca quiya tamasacara, Jesucristo nia rupuesacari. Canaa naasucuaari Pueyaso muerasu sasaca quiya saajani. Niaari saniniuuja Pueyaso muerasu cumueeca quiya tama nia niquiarajaaja. Pueya jiyoteeri nia shuqiritiaa. Canaari saniniuuja saaja rerequetesano quiyani, pueya soosanojuhuaj. <sup>11</sup> Canaari pueyaracaanu miaajequiaa saajani. Canaari jiyamuequiaaaniuhua. Canaa cushishano toqueniyojaari jiyareta sesaruqueniyojua. Pueyari canaa miiquiaa taraatiani. Shaaquiiri canaa tia, canaa rucojonuucua pueyaracaanu. <sup>12</sup> Canaari samareequiaani pueyaracaanu canaa poonijosacari tama canaa juaashiquiatajaaja. Pueyari canaa sesacaquiaani. Canaari maninia na riucaquiaa saajani. Canaa jaara naquiya miishaareni, canaari na rejeretaquiaa juhuajaniya saajani. Majaari canaa naminiu quiquiaa saniniuuja nojori. <sup>13</sup> Pueya jaara tamasaca niquiara rimiaaquequiaa canaajiniji, canaari nojoritia jeecatoonu saniquiaa juucuanu. Pueyari canaa jiyatequiaa juhua rucucuarani. Canaari naa quiyajaa nojoririani.

<sup>14</sup> Naa cua naajiosacari niaacuaratej, majaari cua cararonu paniniu niajaninya. Janiyari saaja nia niishitiojonu paniya cutarani. Janiyari nia rootaa juhua cua muerasuniyojuani. <sup>15</sup> Naa naasucuaari queraatia Jesucristo rupaa niishitiojonaaraca. Naajaa, saa janiyajaari juhua nia queni. Nia tojtiasacari Jesucristo rupaa cua pohuatasacari niajaninya, niaari Pueyaso muerasura quiquiaari. <sup>16</sup> Juhua nia que cua quishacari, nia nacasureenijia pueyanaa. Naate taa maninia muerasu na queecua jiaatiaacuaani, naa cucua nia jiaatiarejuhuaj, juhua janiya nia quiniurajuhua.

<sup>17</sup> Naaratej, janiyari niaacua jiyaroya cua panishano Timoteoni. Nojuajaari juhua cua nianyura quiquiaari na tojishacari Jesucristo rupaa. Timoteori pa Jiyaniijia Jesucristo tojiquiaa maninia. Nojuajaari nia niishitiojonutaniuhua taa cua niishitiojoquiaacuaa puetunu Pueyaso maapuejanaa puetunu jiyacajiniajanaacuaani. Naa nia rootanutaniyari nia niishiniuhua maninia cua niishitiojosano niajaninya tarijia. Nojuajaari nia pohuatanutaniyajuhaaj taa quijia cua quiyani cua tojishacari pa Jiyaniijia Jesucristo, naa maninia nia miiniurajuhua.

<sup>18</sup> Noojiaqueya niajanijiniinooori shuquiriaatia quiya, juhua jiyaniijianucua nojori jiyatesacari tama na cuaqueyajaaja. Nojoriiri naa miiriqiu nojori jyanishacari maja naasucuaari cua tacatenu quiniutianihua, cua niquiniuhua niajaninya socua. <sup>19</sup> Janiyacuaajaari niaacua naquerejiya tarini, cua Jiyaniijia Jesucristo jaara paniri niaacua cua quianura. Cua tiuquishacari niaacua, janiyari cuno niishijiaca pueya saniniujuiniutianiyani, cua niishiniuria casaate nojorini, maja naa sacuraatia nojori quiniuriatej. ¿Cumaacaracate nojori, saaja pocujaca soj? <sup>20</sup> ¿Canteeri seetanujanaa Pueyaso pueyanoni? ¿Saaja pocujatej? ¡Maja pocujaj! Cante Pueyaso Sohuanu jitiata na cumaquiriqianano Jesucristo na tojiniriani, cunoori seetanujanaa Pueyaso pueyanu cutara. <sup>21</sup> Nia niishiriojore, cuarta Jesucristo tiuniananaa. ¿Taa nia paniya cua miiniuria niajaninya cua quiasacari niaacuani? ¿Niaateeri paniya cua saniitionura niajaninya, jacaria cua niishitiojonura niajaninya cua paniniutia soj? ¿Taa nia paniyani?

## 5

### *Na que niquiocuata quiijajiniji pohuatasano*

<sup>1</sup> Niajanijajiniji pohuatasaarucuaa taraatianijia. Tamonu niajanijajinijionaaari jyanohua sesa miya. ¡Na que niquiocuata quiyaquiniaari! ¡Pueyanaa, cuno miishanooori socua jyanohua cararaatia Pueyaso niishiyashijiaca miishanojiniji! Pueyaso niishiyashijiaca pueyani, majaari quenaaja nojori naa sesa miiniu niishiniutij. <sup>2</sup> Naa cuno pueyano miishacari sesa nia tajiniatej, ¿niaateeri saaja juhuajaniya cuniqui na jitiaruhua? ¡Naa cuara na tacaatiaara! Cuno sesa mijia cuara taanusaaria nia tajiniji, maja na cojinuria socua niajaninya nia rerejosacari. <sup>3</sup> Cua tojiri taa pa miiniutianiyani. Janiyari maja cua quiniu niaata. Naajaa, coojaari niaata quiya cua niishiriojosacari niajaninya. Naacuajitij, janiyari juhua nia tajinia quiyani. Naacuajitij, janiyari tari cuno sesa mijia saniniujiiriini. <sup>4-5</sup> Naaratej pueyanaa, cua tojitiare. Nia rerejore cuno sesa mijia nia tarinitianura Sesaacara. Coojaari niaata quiniutianiya naa nia miishacari pa Jiyaniijia Jesucristo cumaquishacari niajaninya. Naacuajitij, Sesaacari naquiya na miiniutianiya; na cusojuanura naasucua, maja soj. Naajaa, na cuaqueyari naa naquiya miishaanutaniya noojia na tacatonuhua, Pueyaso tojijia na quiniuhua. Naacuajitij, pa Jiyaniijia Jesucristo muetasacariuhua pocua, nojuajaari samiitanishaanutaniuhua juhua puetunu Pueyaso muerasutajanaa.

<sup>6</sup> Cuarta Jesucua tiuuniaanaa, ¿taate nia naata shuquiriaatia quiniu tamajaani, naa sesa miijia quishacari nia tajiniatej? ¿Majateeri nia niishiniu? ¡Niaa jaara cojiya sesa miijia saniniujiushoojua, socua pueyari mariyata naa sesa miiniutianiyaquij! Sesa miijia niishishanoori tamasaacuaa paaquenutaniya. Niaacuajaari niishiya, shiitianiyojua pan poreeteja jaara niasaare cashojuajinia, ritia poreeteja puetunu cashojua miniquootasanojuanaari. Naajuhuaaj, sesa miijia jaara sequeyaquishaare na miishano, sesa na miishanoori socua paaquenutaniya.

<sup>7</sup> Tariija, Pueyasoori pa supuetanaa Judiocuaca rootaquiaari puetunu na pan poreetejajanaa nojori jatanura puetunu marijarajanaa. Nojoriiri naa rootasaaquiaari saaja poreetesoo pan nojori miaquenura siete juuca, shuquiriaatia nojori quiniuria Pueyaso niquiara. Pueyasoori naa nojori niishitiojoquiaari miriquitij, nojori cartenura puetunu sesa nojori miitiushanojuanaa, nojori rupenura Pueyaso. Naajuhuaaj quiarijiani, nia taanuure cuno sesa miijia nia tajiniji, seetanujuanaa sesa miyashijiaca nia quiniuria Pueyaso niquiara. Pueyaso jiyanooniuria pajaniya, Cristoori tari mosaaquiaari pocuara, taa borregohua puecoosaaquiaari Pascua juucacuaani. Tariucuaanuuri naa miishano quijia, Pueyaso jiyanooniuria pa supuetanaa Judiocuaca, sesa nojori miishanojiniji. <sup>8</sup> Naa Pueyaso pa cojishacari quiarijiatej, tojetaarucujajanaa sesa miyashijiaca pa quirij, shuquiriaatia pa quiniuria pa Jiyanoonia niquiara. Pueyaso pueya maanu pa cojuare puetunu maninijajanaa, maja sesa miijiacata cojitishano. Seetanujuanaa maninia pa quiri puetunu pajaniyajanaa.

<sup>9</sup> Pueyanaa, janiyari tari niaacuara naajiocanuni cua sequenura niajaniya, maja nia cojiniuria sesoriquia pueya, cuno pojori canapue te na camishoo maaji numuetucuquiaani. <sup>10</sup> Naa cua sequesacari niajaniyatej, majaari cua sequenu nia rupeyaquiniuria puetunu sesoriquia pueya sequejanaa mijiria. Saa nia shaajesacarijia cutara nia naata puetunu sesoriquia pueyacuajijianaa rupatenu. Nio jiyacua, pueyari naa sesa miijiacua quiya: nojoriiri sesa miiquiaa tama na niishiriojosanotajaaja. Nojoriiri tama nerajaaja paniquiaa socua casami pueyaracaanu. Nojoriiri nohuasenuquiaa. Nojoriiri tama na panishanoocuajajaaja jiaatiaquiaa puera, maja Pueyasooqua. <sup>11</sup> Cua tojitiare casaa cua sequecanu tari niajaniyani. Cante tama na cuaqueyajaaja sequejani: “Janiya Pueyaso muerasuni”, maja cunota nia cojitianu, cuno jaara na camishoo maaji numuetucujuquiaa. Naajuhuaaj, majaari nia cojiniu nooj cante casamiriacara quiniucua jiaatiaquiaani. Majaari nia cojiniu nooj cante tama na panishanoocuajajaaja jiaatiaquiaajaaniuhuaaj, maja Pueyasooqua. Majaari nia cojiniu narta pueya sesacaja. Majaari nia cojiniu mashaasequejoja. Majaari nia cojiniu nooj, cante tamonu casami nohuasejoquiaa na sapojonutani. Janiyacuajaari tari naa nia sequecanuni maja jiyano pueyata nia cojitianura. Majaari jiyano pueyanota nia miaquenu quenaaja. <sup>12-13</sup> Naa cua sequesacari niajaniyatej, majaari cua sequenu quiriquiaa tamasa pueyajiniji, canapuetucuaja maja Pueyaso muerasuni. ¿Paate nojori nequesoreenaani? Maja. Pueyasocujaari nojori saniniujiuniutianiya. Pajaniya cumaati parta Pueyaso pueya saniniujiuniaani, nojori jaara sesa miiriquia. Naaratej, nia jatere cuno sesa miijia nia tajiniji, noo cante sacuraatia na que niquicuata quiyacuajani.

## 6

### *Sesa miijia cuaara nequesoreesaaria narta Pueyaso muerasu niquiara*

<sup>1</sup> ¿Seetanutejanaa naa niajaniyajiniji pueya pohuatasanojuhuaaj? Niarta Jesucua tiuunia jaara sesa miiri niajaniya, niaanaari Pueyaso niishiyashijiaca nequesoreena tonujuquiaa nocuara. ¿Casaara tamajaaja niarta Pueyaso muerasu niquiara nia jecatoyaquiquiaani? <sup>2</sup> ¿Niaate niishiyaquiya, Pueyaso muerasu niquiara Pueyaso niishiyashijiaca nequesoreeriquianocuaa, Pueyaso saniniujiushacari nojori? Pueyaso jaara naa nia nequesoreetenutaniya na ruuretajaca, ¿majate nia naata quiarijia niarta Pueyaso muerasu nequesoreenu tamajaaja, nojori jaara sesa miiri shiitianiyojua? <sup>3</sup> ¿Majate nia niishiniujihuaaj, paari Pueyaso seya nequesoreeriquianojuhuaaj? Pueyaso jaara pa nequesoreetenutaniya na seya na tojiyashijiaca, ¿majate quiarijia nia naata maninia nequesoreenu niarta Pueyaso muerasu mijiria? <sup>4</sup> Niaa jaara nia tapueyocuaacuara tonujunu paniya sesa na miishacari, ¿niaateeri Pueyaso ruuretajaca tonujunutaniya nojoriicuara? ¡Maja maninia naatej! Cuno pojoriiri maja Pueyaso muerasu jiiitanaa. <sup>5</sup> Naa nia sequeyanijia cua cararonura quenaaja niajaniya, cua niishiriojotenura niajaniyajuhuaaj. ¿Seetanujuanaa tojetaarucujajanaa shaaquiti niishijia niajaniyajinijinio, cante na naata nia tonujutoosacari nequesoreenu niajaniya maniniani? ¡Quiya jiyotucuajaari! <sup>6</sup> Niajaniyanaari tama niarta Jesucua tiuuniaacuaraajaaja tonujutojoquiaa Pueyaso niishiyashijiaca nequesoreena niquiara. Naa nia miishacaritij, ¡niaari sesa miiquiaa pueyanaa!

<sup>7</sup> Niaari jiyanoehua jiyajeneya nia juayonuujutasacari. Niaa jaara sesa miishaare, niaa cuara jiyanootoora saniniujia, nia casami jaara nohuasesaarejuhuj. <sup>8</sup> Niajanijarijataj, iniaari saaja sesa miiquiaacujua! iniaanaari niarta Pueyaso muerasu miiquiaa sesa! Niaanaari tama niarta Jesucua tiunuaajaaja nohuasejoquiaa, sesa miijaca nia quiniucua.

<sup>9-10</sup> Maja tama nia cuaqueyajaaja nia sapojonu, pueyanaa. iniaateeri niishyaquia Pueyasoori maja na rijionu quiniutianiya sesa miijaca na shuriuca nojori quiniuria? Jiyano pueyari puetunu quejoosaanutaniyajanaa. Quejoosaanutaniyari noo pojori canapue te na camishoo maajipohua numuetucujuquiaani, naajuhuaq, noo pojori, canapue te tama na panishanoocuaajaaja iaatiaquiaani, maja Pueyasocua. Quejoosaanutaniyajaariuhua noo pojori, canapue te narta pueyano niqiuocua numuetucujujuaani, naajuhuaq, canapue te maajishuriutia quijia juhua maajitiani. Nohuasenuujuaaari quejoosaanutaniyajuhuaq, noo pojori juhuaq canapue te pueyaracaanu soca casami paniquiaa tama nerajaajani. Mashaasequenuujuaaari puetunu quejoosaanutaniyajuhuaq, tamasa sesacajacanio, tamasaacuara rimiaaquejacajuhuaq. Naa quejoosaanutaniyajaariuhua noo pojori, canapue te nohuasejoquiaa na sapojonutani. Puetunu jiyano pueyajanaari maja Pueyaso muerasu na quini quiniutianiya, Pueyasota nojori quiniuria shuquiriaatia pueyaracaanu. <sup>11</sup> Noojiaqueya niajanijiniiniori jiyano sesa miijaca pueya quiquiaari tarija. Na nuhuaji, sesa nia miishanoori jeequesaaciaari Jesucristoocua nia tiushacari. Pueyaso Sohuanuuri nioojiajinia tiuquiquiaari, Pueyaso na tojitiuria niajanija. Naacua-jitij, nia rupesacari Jesucristo, Pueyasoori nia jiyanoocuaari. Nia sequeereeri: "Niaari saa maninija quiya cua niqiuara".

#### *Pa cuaqueya cuara quiria saa Pueyasoraja*

<sup>12</sup> Queraatia pueyari sequequiaa: "Pueyaso jiyanooshacari pajaniya, paari tariniti-asaaree puetunu pa miiniu panishanojuanaa pa miiniuriani". Seetanujuanaa naacuaq. Saniniujia, majaari puetunu pa miiniu panishanojuanaa maninia na quini pajaniyara. Seetanujuanaa cua naata miiniu puetunu cua miiniu panishanojuanaa. Naajaa, maja cutaraari cua miiniu puetunu cua miiniu panishanojuanaa, janiya mariqui puera nocua jiyartuureeri. Naa pa jiyartuusacariitij, na nuhuaji majaari pa naata pa jitiishano casaa pa tarinitianu. <sup>13</sup> Pueyari sequequiaa: "Pueyasoori miaquesano shipiniquiaari pa seecora. Pa seeco shipiniquiaari sumatuucuaqi saniniuurija, shuquiriaatia pa quiniuria". Seetanujuanaari cuno sequesano. Naajaa, majaari nio pa niyjetanu, na nuhuaji, Pueyasoori na shaajanutaniya puetunujanaa. inPa cuaqueyariuhuaq? inPueyasoteeri pa cuaqueya shipiniquiaari pa numuetucunura pa camishoo maajipohua? inMaja! Pa cuaqueya cutaraari shipinishaquiaari pa jiyaniijara, na panishano pa miiniuria. Naajuhuaq, pa jiyaniijaari pa cuaqueyara quiyacujua, na cumaquiniuria pajaniya, maninia pa quiniuria pueyaracaanu. <sup>14</sup> Naajuhuaq, taa Pueyaso samiitiani quiaaricuaa pa jiyaniija Jesu na cuaqueyatani, nojuajaari macujiniji naa pa samiitianiutianihua na cumaacatajuhuaq.

<sup>15</sup> inNiaateeri niishyaquiyajuhuaq, Pueyaso Sohuanu quiniucua poojiajinia, pa cuaqueyari seetanujuanaa pa jiyaniija cuaqueya quiya? Naaratej, Jesucristo cuaqueya pa quishacari, maja cumaati pa curuushojonu pa cuaqueya, maaji paanatu pa numuetucunuta. inCunoori jiyanoehua sesa! <sup>16</sup> Pueyasocuaaari coteenujanaa na shipinishano pueyano sequequiaari:

"Quia camishacari maaji, niaari niquiriyatu cuaqueyara quiniutianiya".

inNiaateeri nio niishyaquia, cante paanatu numuetucureeni, Pueyasora, nojoriiri niquiriyatu cuaqueyaracara quiqui? <sup>17</sup> Naajuhuaq, paa jaara Jesucristo rupuereni, pa sohuanuuri rupuetoooree na Sohuanuta, niquiriyatu sohuanuraca pa quiniuria Jesucristota.

<sup>18</sup> Naaratej, nioojia nia tacatoree maja nia numuetucunura tamasaqa, cante quia camishoo maajini. Puetunu tamaatia sesa pa miishanojuanaani, cunoori maja pa cuaqueya sesojua. Saniniujia, cante na camishoo maajipohua numuetucujuani, nojuaja cutaraari tama na cuaqueyajaaja sesoya. <sup>19-20</sup> inMajateeri nia niishiniu, nia cuaqueyari Pueyaso Sohuanu quiquio? Pueyasoori na Sohuanu jiyaroquiaari poojiajinia na quiniuria. Pueyasoori nia masequiaari tama nerajaaja nia quiniuria. inJiyanoehua naquiya na miiniutia nia masereeri Neyanu na motesacari pocuara! Naacua-jitij, Pueyasoori quiarijia pa camarnu quiya. Naaratej, quiarijia maja pa quiniu tama pa cuaqueya camarujuaaja. Naaratej, pa shuqiritiri pa Pueyaso pa cuaqueyata, pa sohuanutajuhuaq. Nojuacuaajaari pa cuaqueya camaru, pa sohuanu camarujuhuaq.

## 7

<sup>1</sup> Quiarijiani pueyanaa, cucuara nia naajosanojinia nia nequesotasano riucaareeraj. Cante niquiriyatu quiniu paniya tamajaajani, cuno pueyanoori maninia miya, maaji na camiyaquishacari. <sup>2</sup> Saniniuujia, quiarijiani, pueyari puera sesa miiniu niishiquiaa. Nocuaij pueya cuara camiriia. Maajipohua cuara camiriiajuhuaj. <sup>3</sup> Pueyano jaara camiri, necocua cuara na cuaqueya jamueyaquiiria neyaca numuetucunu panishacari. Naajuhuj, neyaca cuara na cuaqueya jamueyaquiiria necocua panishacari na numuetucusaanura. <sup>4</sup> Necocuaari maja tari tama na cuaqueya camarujuaaja na quiniu. Neyacaari na cuaqueya camaru cutara. Naajuhuj, neyacaari maja tama na cuaqueya camarujuaaja na quiniujuhuaj. Necocuaari neyaca cuaqueya camaru cutara. <sup>5</sup> Naacujiti maajipohuanaa, maja nia niyacaacuaji nia jamuenu nia cuaqueya, na panishacari numuetucunu niajaniya. Naajuhua niajaniya canuunaa, maja nia niquiocua nia tarijionu na panishacari na numuetucusaanura. Saniniuujia, jiyanoohua Pueyaso nia secojonu panishacari, jiyacari cutara nia naata tarinitianu numuetucunu rupaquijia, Pueyaso nia secojonura, niaa jaara mariyata naa miiniu paniri. Na nuhuaji cutara, nia numuetucurohua nia niquiocua, Sesaaca mariqui sesa nia miitiriiri tamonu maaji nia paniniuria, nia camueenujusacari puera. <sup>6</sup> Nioori quiarijia maja niaara Pueyaso rootasano janiya. Janiyari nareja naa sequeya niajaniani socua panaatia nia quiniuria. <sup>7</sup> Naaratej, nia jiyateriquiani taa cua quiyacuaani, niquiocuaaju. Naajaa, Pueyasoori puetunu pa cumaquiquiaajanaa tamaatia pa quiniuria, taa Pueyaso paniyacuajani. Camishoo, camishano soj, naajaa. Taa pa quiyani, paari shuquiriaatia quiquiaa Pueyaso cumaquishacari pajaniyani.

<sup>8</sup> Camiyojua pueyanaa, mashihiopuena, cua tojitiare: niaa jaara juhuajaniya quiya taa camiyojua cua quiyacuaani, niaari maninia quiniutianiya. <sup>9</sup> Cante saniniuujia maja na naata tama na cuaqueya panishanojuaaja rejetenu maninia tamajaajani, cuno cuara camiriia. Socua maninia cutaraari nia caminiuria, maja maajicua nia jiaatianura pueyaracaanu. <sup>10</sup> Camiyono pueyanaa, nio nia tojitiare cutara. Nioori pa Jiyaniijia Jesucristo sequesano cutara, maja saa cua sequesanojua. Maajipohuanaa, maja nia cartenu nia niyaca. <sup>11</sup> Cante neyaca carteyani, nojori cuara jyanootioora, na rupuetoonuhua. Jaara maja na naata jyanootioonu, cuara quiiria tamajaaja pueyaracaanu. Cuara camiyaquiiria socua. Canuunaa, pa Jiyaniijia Jesucristo sequesanoori mariyata niaarajuhuj. Naa sequeyari: "Maja nia cartenu nia niquiocua".

<sup>12</sup> Quiarijiani, socua nia niishitiojoreeraj. Nioori tama cua niishitiojosanojuaaja, maja niaara Jesucristo rootasano. Pueyano jaara Pueyaso tojiyashijia niquiocuaraca quiri, cuara jitiaraa maninianoj. Quia niquiocua jaara quiata quiniu panijajaa, majaan na cartenu. <sup>13</sup> Naajuhuj, maaji jaara Pueyaso tojiyashijia niyacaraca quiri, cuara maninia jitiaraa neyaca. Majaari na cartenu, quia niyaca jaara quiata quiniu panirijia. <sup>14</sup> Cuarta Pueyaso muerasunaa, Pueyaso tojiyashijia pueya nia jyanoori, nojori jaara Jesuucua tiuuniaata caminio quiya. Nojoriiri seetanujuaanaa maja Pueyaso muerasu. Naajaa, necocuaari Pueyaso pueyano quiya cutara. Naaratej, niajaninya cuara neyaca jyanooria necocua quiniucua niarta Pueyaso pueyano. Nareja nia niquirinij, niaata na rerejonu panishacari. Naajuhuj, nia jyanoori niarta Pueyaso pueyano niquiocua, naajaa, Jesuucua tiuyashijia na quishacarijia. Naa Pueyaso pueyano neyaca quishacarij, necocua cuara nareja niquishaariajuhuaj, na rerejosacari niaata. Naajuhuj, maja rimiajata nia niquiniu necohua. Necohuari maniniacuaja Pueyasora, maja juhua tama maaji muetusanujuaaja. <sup>15-16</sup> Pueyaso muerasunaa, canuu, maajipohuanio, Pueyaso tojiyashijia jaara nia cartenu paniri, nia tarinitiare. Pueyaso tojiyashijia cartesacari niajaninya, niaari juhua camishoo quiriohua. Majaari socua nia tojinu coteenu nia niyaca, coteenu nia niquiocuanio. ¡Maja cutaraari nia cartenunoi! Nia niishiriojore pueyanaa, nia niquiocua jaara Pueyaso tojiyashijia quiri, nia naatate na tojitiniu Pueyaso rupaa, Pueyaso muerasu na quiniuria, jaara quiata quiyajaa? Maja pa niishiniu. Naajuhuj, maja niishishano quia naatate quia niyaca quia tojitiniu Pueyaso rupaa. Naaratej, maja nia cartenu Pueyaso tojiyashijia. Nareja carteshiya cutaraari tama na panishacarijiaaja na cartenura quiajaninya. Naatej, Pueyasoori paniquiaa juhuajaniya pa quiniuria, camishano, cartesano soj.

<sup>17</sup> Cuarta Jesuucua tiuuniaanaa, taa nia quiquiaari Pueyaso sequesacari niajaninya na muerasu nia quiniuriacuajani, naajaa, naa nia quiri Pueyasora. Janiyari naa nia sequeyani, taa cua rootaquiiaacuaja puetunu Pueyaso pueya maapuerajanaani. Taa nia quiquiaarini, naajuhuj casaate quia poonijosano quiquiaarini, cunocujaaari Pueyaso panishano quiquiaari niaara. <sup>18</sup> Naacujitij, cante tarijia na cararaatiuquua co miatesano quiquiaari Judio pueyano na quiniuriani, naajaa, cuno pueyano cuara naa quiiria pueyaracaanutej, Jesucristoocua na tiuushacari quiarijia. Naajuhuj, cante miatesoo quiquiaari Pueyaso sequesacari na pueyano na quiniuriani, cuno cuara quiiria naajuhuj. <sup>19</sup> Cante Judio pueyano na quiniuria miatesaquiiaarini, naajaa. Cante miate-

soo quiyani, naajaa. Saaja maninia cutaraari pa tojtianura Pueyaso niishitiojosano pajaniya. <sup>20</sup> Naarate nia sequeyanijia, nia quiri taa nia quiquiaaricuaiani shushajanaa Pueyaso sequesacari na muerasu nia quiniuria. <sup>21</sup> Cante poonitijiotasusano pueyano quiquiaari Pueyaso sequesacari na muerasu nia quiniuriani, naajaa, maja nia niishiriojonu nocua. Juhuaiani nia poonijiore saaja. Saniniuuja, jaara nia naata quiriquia cartesano pueyano nia camarnujini, maniacuajaari. <sup>22</sup> Cante poonitijiotasusano pueyano quiquiaari Pueyaso sequesacari niajaniya na muerasu nia quiniuriani, naajaa, niaari seetanujanaa cartesano pueya quiya pa Jiyaniijia. Naajuhua, cante camarnuuju quijia quiquiaari Pueyaso sequeyaquishacari nia muerasu nia quiniuriani, quiarijiani, niaari pa Jiyaniijia poonitijosano pueya quiya cutara. <sup>23</sup> Pueyasoori jiyano nia quiyani miqiuiaari na cusojuasacari Neyanuniyojua, na masenura niajaniya, na muerasu nia quiniuria. Nia masequiaari tama nerajaaja nia quiniuria. Naaratej, majaari juhua tamonu camarnu poonitijosano nia quiniu socua. Quiarjia saa Pueyasoraja nia quiri maninia. <sup>24</sup> Naaratej cuarta Pueyaso muerasunaa, taa nia quiquiaari tarijia Pueyaso muerasu nia quiyaquishacarijiani, naa nia quiri quiarjia Pueyaso cumaquishacari pueyaracaanu niajaniya.

<sup>25</sup> Quiarjia nia sequereera cua niishiriojosano, taa camishoo pueya miiniutianiyani. Nioori maja pa Jiyaniijia rootasano janiya. Majaari na sequenu quiquiaari cunojini. Naajaa, pa Jiyaniijiaari cucua tiuuquiaa na sequenu panishano cua caminiujuniuria niajaniya, na Sohuanu cumaquishacari janiya. <sup>26</sup> Naacuajitij, naa nia sequeyanijia: niaacuajaari niishiya, quiarjiani, jiyano nia puereeta quishacari. Nocuai niajaniya cuaara quiiria taa nia quiyacuajani. <sup>27</sup> Cante niquiocuaracani, maja nia paniniu na cartenu. Cante niquiocuaaju quiyani, majaari nia niquiocuaani paniniu. <sup>28</sup> Naajaa, mashaja jaara camiri, cunoori maja sesa. Naajuhua, niyacoo jaara camiri, majaari sesa na miishano. Saniniuuja, camishano pueyari socua taraatia miishaanutaniya camishoo pueyajini, puereeta quishacari quiniuucua mijiria quiarjiani. Majaari cua paniniu taraatia nia miishaanura. Nocuai janiyari naa nia niishitiojiani puera sesa quishacari quiniuucua quiarjiani.

<sup>29</sup> Cuarta Pueyaso muerasunaa, niajaniya cuaara niishiiria nio jiyari puequenutaniya. Majaari mijiria pa quiniu quiniutianiya pueyaracaanu. ¿Taariquitijia mijiria pa tarishiniutianiya socuatejaj? Maja pa niishiniu. Majaruhua puera pa tarishiniu quiniutianiya. Naaratej mijiria pa quishacarijia, jiyano nia pa tojtiane pa Jiyaniijia. Naacuajitij, cante niquiocuaraca quiyani, majaari nocua nia niishiriojonu puera. <sup>30</sup> Cante na shaajasanocua sapueyani, naajaa, majaari nia tarinitianu Pueyasora nia poonijionu. Cante queranacuyani, naajaa, Pueyasora pa poonijiorejuhua. Cante casami niquitiojojua quiquiaani, naajaa, maja casami nia niishiriojonu puera. Socua nia niishiriojore cutara Pueyasocua. <sup>31</sup> Canapueete niishijiacani, queraatia casami na masejonura mijiriani, nojori cuaara niishiiria maja casami panijia nojori quiniuria puera. Nio jiyari tari puequeya puetunu pa niquishano casaatajanaa. Naaratej, maja casami nia niishiriojonu. Saaja Pueyaso nia tojiri cutara.

<sup>32</sup> Janiyari paniani mijiria casaacua tacayashijia nia quiniuria. Pueyaso nia tojtiane juhuaiani cutara. Camishoo pueyano na naata saaja pa Jiyaniijia nia niishiriojonu na tojiniuria maninia, pa Jiyaniijia na shuquiritiniuria. <sup>33</sup> Cante niquiocuaraca saniniunijia, nojuajaari niishiriojoquiaa mijiria casaacua, necocua na shuquiritiniuria. <sup>34</sup> Naacuajitij, noojia niqijitoyari. Naajuhua, camishoo maajiri pa Jiyaniijia nia niishiriojoquiaa maninia, tama na cuaqueya na cojuasacarijaaja Jesucristora, nera na poonijionura puetunu nojiatajanaa. Saniniuuja, cante niyacaraca quiyani, nojuajaari mijiria casaacua niishiriojoquiaa neyaca na shuquiritiniuria. Naacuajitij, majaari puera jeya na quiniu Pueyaso panishano na miiniuria.

<sup>35</sup> Janiyari naa nia sequeyani socua shuquiriaatia nia quiniuria. Maja cua taajetenu paniniu niajaniya puera cua rootasanota. Janiyari nareja naa nia niishitiojiani, maninia nia quiniuria, pa Jiyaniijia nia tojtianura maninia. Naa jaara cua niishitiojosano tojiri, nia naata pa Jiyaniijia tojiniu maninia. Naacuajitij, niaari nioojia niqijitoyequiniutianiya.

<sup>36</sup> Pueyano jaara naa niishiriojore: “Majaari maninia cua miiniu cua jamuesacari cua niyatu pueyaracaanu na camiyaquiniuria”, cuno pueyano cuaara miiria taa na miiniu paniyacuajani. Camishocoriquiano maaraja, cuaara camitioora. Quia niyatu jaara camiri, majaari sesa. <sup>37</sup> Cante saniniuuja maja noojia niqijitoyequiyani na niishiriojosacari neyatucuanu, cunoori maninia miiniutianiya na camitiyaquishacari, jaara na naata neyatu cojuanu maninia. <sup>38</sup> Naacuajitij, cante neyatu camitiriini, maninia miyari. Cante neyatu camitiyaquiyajaniuhua, nojuajaari socua maninia miya. Naacuajitij, cuno neyatuuiri na naata Pueyaso panishano miiniu socua, camishoo na quishacari.

<sup>39</sup> Camishano maaji cuaara carteyaquiiria neyaca, saminio neyaca quishacarijia. Pueya-soori naa sequequiaarittij. Neyaca jaara cusoyare, na mashiquioori maja tari na quiniu juhua camishano. Na panishacari, cuaara camiriia cana na caminiu paniyacuajani. Jaara caminiu paniri, cuaara camiriia Pueyasocua tiuujia pueyanota cutara. <sup>40</sup> Naajaa, mashiquio jaara camiyaquiriohua, socua shuquiriaatia quiniutianiyari, Pueyaso panishano na miiniuria. Janiyari naa niishiriojiyani pueyanaa. Pueyaso Sohuanu naasucuaari cua sequeteree nio.

## 8

*¿Maniniate cuno shu pa miaquenura, seya jaara puecoosano quiri nareja shipinishano casaacuaara, juhua Pueyasocuarajanaa?*

<sup>1</sup> Cuarta Jesucua tiuuniaa pueyanaa, janiya quiarijia nia niishitiojonutianiyani teyano pa miaquesanojinijiti puereshiyani. Pueyaso niishiyashjiacaari na miaquesocoriquiano seya puecoonu niishijia shipinishano casaacuaara juhua Pueyasocuaara. Pueyari nequesotaquiaa, ¿maniniate cuno shu, Pueyaso muerasu miaquesocoriquianojuhuj, cuno seru jaara taucuaa jyanishano cumaacaraca quijiaacuara mosano quiri? ¡Janiya cutaraari maja cua miaquenunoj! Nia pohuatereera casaara cua miaqueyaquiquiaanoj. Cua tojitiare. Paacuaajaari niishiyani cuno shipinishano casaari nareja pueyano shipinishano najuhuanaj, nojori jyanitiushano na pueyasoni. Naa pa niishishacari, paari maninia niishijiani. Naajaa, maja cutaraari maninia pa niishiriojonu paa jaara nocuaa puecoosano miaqueriquiani. Naa niishijiaari shuquiriaatia quiya tamajaaja. Saniniuujia, majaari na niishiriojonu narta Pueyaso pueyanocua. Cante narta pueya paniquiaani, cunoori narta pueyaca niishirioquiaa cutara, nojori juujia na cumaquiniuria maninia. Jiyano pueyanoori cumueeca Pueyaso pueyano quiniutianiya. <sup>2</sup> Naacuajitij, cante tama na cuaqueyajaaja jyaniya niishijiani, cunoori juhuanajuaja maja niishijia seetanujuanaa. <sup>3</sup> Cante Pueyaso panijia saniniunijia, cunoori narta Pueyaso muerasuucua niishirioquiaa. Cunoori Pueyaso panishano pueyano cutara. Seetanujuanaa niishijia cutaraari cuno.

<sup>4</sup> Juhuanajuajaari maja cua riuuanu nia niishiniu panishano: “¿Maniniatenaari cuno shu pa miaquenu, seru jaara pueya jyanishano pueyasocuaara mosano quiri?” ¿Casaatejaara cuno nojori jyanishano pueyasoni? Paacuaajaari niishiyani cuno shipinishano casaari maja saminio. Pueyano shipinishano casaari maja cumaacaraca quijia. Naaratej, nojori jyanishano pueyasoni, cunoori maja seetanujuanaa Pueyaso. Niquiriyatu Pueyasoori quiya cutara. Jiyocuaaanu Quijia. Maja socua tamonu quiniu juhua nojuaja. <sup>5</sup> Tamasaca pueyari jyaniya queraatia cumaacaraca quijiaacari quiya juhua Pueyaso, jiya cajiniocua, mijiriano. Nojoriiri na jiyatequiaa nojori cojuanara, nojori cumaquiriquianojuhuj. <sup>6</sup> Naajaa, paari niishiyani saa niquiriyatu Pueyasojuaari quiya. Nojuacuajaari pa Que Pueyaso, pa shipininia. Puetunu casaajanaa shipiniquiaariiri. Pa shipiniquiaariiri tama nerajaaja pa quiniuria. Niquiriyatujua Jyaniiijaari quiyajuhuj. Cunoori pa Jyaniiija Jesucristo. Na Queeri na shipiniquiaari puetunu na shipinishanojuanaa. Pajaniyajuhuj, paari rishiyani saaja na cumaquishacari pajaniya.

<sup>7</sup> Noojiaqueya Pueyaso pueyari saniniuujia jyaniyajaa taucuaa shipinijosano casaari seetanujuanaa cumaacaraca quijiaa juhua Pueyasojuhuj. Nojoriiri najuhuaana sesa niishiriojonuujuaca. Jiyano pueya jaara Pueyaso muerasura quiri, juhuanajuaja maja na niishiniu maninia. Majaari tarijia na niishishano na tarinitianu juhuanajuaja. Naacuajitij, nojori jaara shu miaquere teyanote mosaaree nojori jyanishano cumaacaraca quijiaacuuarani, nojori miaquenu nuhuaji, noojia niquijitoteyari. Nojoriiri tama sequeyajaaja: “¡Janiya naasucuaari sesa miirri Pueyaso niquiriani!” Naacuajitij, nojoriiri noojia macuhujetequiaa. <sup>8</sup> Pueyanaa, paacuaajaari niishiyani, casaa pa miaquequiaani, naajaa. Pa miaquesanoori maja na naata Pueyaso jyanootiniu pajaniya. Cante cuno shu miaqueyaquiquiaani, naajaa, majaari socua maninia pueyanora na quiniu Pueyasora. Naajuhuj, cante na miaquequiaani, majaari socua sesa pueyanora na quiniujuhuj. <sup>9-11</sup> Niaacuajaari jyanohua tiuquiaa Pueyasocua. Naacuajitij, niaa naasucuaari na naata juhujaniya tiuquiniu cuno shu miaquenura nojori jyanishano pueyaso quiquojinia. Niaacuajaari niishiya, cuno, nojori sequesano pueyasoni, majaari seetanujuanaa Pueyaso cuno. Naacuajitij, nia naata nocuaa mosano seru miaquenu juhujaniya. Saniniuujia, nia cajishacari cuno miaquenuujajinia, niarta Pueyaso pueyanoori nia niquiniutianiya na pueresano shu miaquenuyano. Na niquishacari nijaniya, tamajaaja sequenutianiyari: “¡Jaj! ¡Nojoriqui cuno shu miaquenuyacuaa! Saniriirajataj”. Naa sequejatej, nojuajaari jyaniyajaa cuno miaquesanoori mosaaree seetanujuanaa tamonu

cumaacaraca quijiaacuara. Naacuaajitij, na sanishacariuhua cuno shu miaquenu, tama-jaaja noojia macuhuanutaniyari. Naacuaajitij, niaari niarta Pueyaso pueyano sesoya, na niquiara nia miaquesacari cuno shu. Na niqiniuucua niajaniya cuno shu miaquenuyano, nojuajaari cunora na miaquereejuhua. Saniniuuja, nojuajaari juhuanajuaja maja jyanohua Cristoocua tiuuniu na niishiniu. Cristo cutaraari nocuara cusoquiaari, sesa na miishanojiniji na jiyanooshaanura. Niajanitari saniniuuja quiarijia na sesorohuacuhua nia niishishanota. Nocuaaji janiyari nia sequeyani, maja socua nia miaquenu cuno shu, cuno shu miaqueyaquijia mariqui na pueresano shu miaquerohuariuhua, na rupuesacari niajaniya. <sup>12</sup> Nia miaquesacari, niaari na pueresano shu na miaqueteya. Naacuaajitij, noojiaari macuhuanutaniya. Naacuaajitij, niaari sesa miya niarta Pueyaso pueyano. Niaari pa Jiyaniijia Cristo miya sesajuhua, naa nia sesosacari tama na pueyanojuaja. <sup>13</sup> ¿Taa nia sequeyani pueyanaa? ¿Maninate shu pa miaquenu, seya jaara taucuaca jyanishano pueyasocuaru puecoosano quiri? Janiya cutaraari maja socua cuno shu cua miaquenu quiniutaniya, cuarta Pueyaso pueyano mariqui sesereeri cua miishanojiniji. Saaja maninia miijiacara nia jiyateriquiani, taa cua miiquiaa saaja maniniacuani.

## 9

### *Taa quijia Pablo quiquiaarini, Jesucristo jiyaramiquishano na quishacari*

<sup>1</sup> Janiya jaara cuno shu miaquenu paniyani, cua naata miaquenu cua panishano. Naajuhuaq cua naata puetunu cua panishanojuanaa miiniu taa cua Jiyaniijia sequequiaari na jiyaramiquishano pueyacuajani. Janiyacuajaari Jesucristo jiyaramiquishanojaaniuhuaq. Seetanujuanaa cua namijiata Jesucristo niqiquiaarinijia. Nojuajaari cua jiyatejiaari na jiyaramiquishano cua quiniuria. Naajuhuaq, cua pohuatasacari Jesucristojiniji nia niquiara, niaari na muerasura quiquiaari cua pohuatasanoocua nia tiuushacari. Naacuaajitij niishishiyari janiyari Jesucristo jiyaramiquishanojaaniuhuaq. <sup>2</sup> Tamasaca jaara jiyaniya janiya maja Jesucristo jiyaramiquishanoni, naajaa. Niaacuajaari na niishiya. Niaacuajaari Jesuucua tiuuquiaari nia tojishacari cua pohuatasano nojuajiniji. Naacuaajitij, niaacuajaari niishiya janiyari Jesucristo jiyaramiquishanoni. Na jiyaramiquishano cua quiniuucua, cua naata miiniujuhuaq taa cuarta Jesu jiyaramiquishano pueya miiquiaacuani.

<sup>3</sup> Tamonu jaara cua nequesoreere taa cua miiquiaani, janiyari saaja naa na ricuaquiaani: <sup>4</sup> “Pueyasoori sequequiaari, na jiyaramiquishano pueya cuara niqitiosaarria na miaquesocoriqiani”. Naaratej, canaa jaara naa miiniu paniriquiani, canaa maara nia sequereni canaa nia niqitiojonura canaa panishano. Naajaa, majaari canaa masenu quiquiaa canaa panishano niajanijajiniji, janiya, Bernabeenio. <sup>5</sup> Naajuhuaq, canaa jaara niquiocaraca quiriqiani, canaa maara canaa niquiocua rupojoriquia canaacuani, taa cuarta Jesucristo jiyaramiquishano pueya miiquiaacuani. Pa Jiyaniijia Jesu tapueyocuaari nia miiquiaajuhuaq. Pedrojuanaari necocuata rucuanajoquiaajuhuaq, Jesucristo rupaa na poojotasacari. Naajaa, majaari naa canaa miiniu quiquiaaqui. <sup>6</sup> Jesucristoori sequequiaarijuhuaq: “Cua jiyaramiquishano pueya cuara niqitiosaarria cumaneeca, na panishano nojori masetajara”. ¿Niaateeri jiyaniya cuno sequesano maja quiria, maja Bernabeerajuhuaq? ¿Cunocuaajari naa sequesaaquiaari canaarajuhuaq! Naaratej, canaa jaara naa paniriquiani, canaa maara canaa panishano masere niajanijajinijini, canaa niishitiojonuucua niajaniya. Naajaa, canaari tama canaa juashiquiatajaaja poonijioquiaani, canaa panishano canaa masetajara.

<sup>7</sup> ¿Soldadoteeri tamonu poonijosano jitiata, na miaquesano na masetajara? ¡Maja! Soldadohua jiyaniijiaari na niqitiojua puetunu na miaquesanojuanaa. ¿Pueyanoteeri na cuhuariquia nataja najuhuanaj? ¡Maja! Na nuhujia na natau mianutaniyari na poonijosanojiniji. ¿Majateeri seru juunu camaru ratunu na seru quitiaaca, jaara na paniri? ¡Taaquiririnij! Na ratuyacuaaquiniatejaj. ¿Maatucua casaara najuhuaa seesaareerini? ¿Canaarjijiataj? Canaa jaara naa paniriquiani, canaa naata nia masenu canaa panishano niajanijajiniji. Naajaa, majaari canaa mashiniquijionu quiquiaa quenaaja canaa panishano niajanijajiniji. Canaari nareja poonijioquiaa tama canaa juashiquiatajanijia, Jesucristo rupaa canaa pohuatasacari niajaniya.

<sup>8</sup> Nio cua pohuatasano niajanijani, majaari tama canaa niishirijosanojuaja. Nio niishitijosanoori tariucuaaanu Pueyaso Rupaa naajijosanojinia quiyajuhuaq, taa cua sequeriquiaacuajani. <sup>9</sup> Supuetana Moisés caminiujuushano Pueyasojinijiiiri naa naajio-tasaquiaaritij:

“Maja quia juunu rupaa quia seecutanu maja na miaquenura quia carojotasano, quiaa jaara na rapijioteya na coreetanura”.

¿Pueyasoteeri saa juyacaacua niishiriojoriquiaajaa naa na sequenuratej? ¡Maja!  
<sup>10</sup> Pueyasoori naa sequeriquiaaqui na niishitiojonura puetunu pajaniyajanaa. Naaratej, Pueyasora poonijionaani, na niishitiojosano pueya cuaara nojori niqutiojoora na panishano. ¿Taa nia sequeyani? ¿Pueyanote shuquiriaatia cuhuataja na cuhuariquiara? Taaquiririinj. Na camaruuri niishiya na poonijiosanojiniji mianutaniya na nuhuajiiri. ¿Majateeri pueyano carojotanu shuquiriaatia na natajuhuaj? Jaa. Niishiyacuajaari na mianutaniyari. <sup>11</sup> Naajaa, niaata cua quishacari, canaari naa poonijioriquiaa Pueyasorani, nioojiaca canaa cumaquiniuria maninia. Naacuajitij, canaa cuaara niqutiojosaaria saniniuujia canaa panishano. Naajaa, majaari canaa paniniu canaa panishano nia niqutionura canaa. <sup>12</sup> Tamasaca pueya niishitiojosacari nijaniya, niaa cutaraari nojori niqutiojoquiaa nojori panishano. Canaari saniya coteenujuanaa pohuataquiaari Jesucristo rupaa nijaniyani. ¿Majateeri coteenu canaa niqutioosaanu canaa panishanojuhuaj? Naajaa, majaari canaa masenu quijia nia casami. Niaata canaa quishacari, canaari sanaa poonijiojaa tamajaajani, canaa masetajara canaa panishano. Canaa jiitiaaquishacari canaa panishano, canaari sanaa rejeretaja saajani. Majaari canaa taajetenu paniniu quijia nijaniya, canaa jiitiaaquishacari canaa panishano. Canaari naa miiquiaaritij, niaa mariqui Jesucristo rupaa tojinuu paniyaquiriiri canaa taajetesacari nijaniya, pueyaracaanu canaa mashiniquijosacari canaa panishano nijaniyajiniji.

<sup>13</sup> Niaacuajaari niishiyajuhuj, Jerusalén tiacajinia Pueyaso Secojoua tiajinia, cuarta Judocuaca miaquesocoriquianoori puecoosaquiaa Pueyasocuara, taa Pueyaso rootaquiaari canaa supuetanaacuajani. ¿Niaateeri niishiyaquijuhuj, shu camaruuri secojouiinia poonijionaa niqutioquiaa nojori miaquesocoriquianojuhuaj? Naacuajitij, Pueyaso secojoui tiajinia poonijionaari miaquesanoraca quiquiaajuhuj. <sup>14</sup> Pa Jiyaniijia Jesucristoori na rupaa pohuatanaara naa sequequiaarijuhuj: “Cua rupaa pohuatanaa cuaara niqutiojosaaria na panishano pueyaracaanu”. <sup>15</sup> Naacuajitij, cua naata puetunu na panishanojuanaa sequenu nia niqutiojonura janiya, juhuajaniya cua quiniuria, taa cuarta Jesucristo jiyaramiquishano pueya miiquiaacuaani. Naajaa, majaari cua masenu quijia nijaniya cua panishano cua masetajara. Niaa naasucuaari jiyaniya janiyari quiarijia niaacuara naajioree nioni, cua shiniujuniuria nijaniya nia niqutiojonura janiya cua panishano. ¡Maja! Majaari cua paniniu nia niqutionura janiya cua panishano. Janiya jaara titiaare cua miaajenutani, naajaa. Janiyari tama cua juashiquiatajaaja poonijionu paniyani. Jesucristo rupaa nia tojitianura, cua panishano cua maseyaquiniutia nijaniyajiniji. Naacuajitij, janiyari tamajaaja shuquiriaatia quiya Pueyaso niqiarani.

<sup>16</sup> Cua tojitianaa jaara niqutiore janiya cua panishano, maja cua naata shuquiriaatia quiniu tamajaaja, cua pohuatasacari Jesucristo rupaa. Janiya jaara pohuataaquiri Jesucristo rupaani, cua Jiyaniijia mariqui cua saniitioreeri cua tojiaquiniuuca nojuaja. Cua pohuatasacari na rupaa, janiyari saaja na tojiyani. Nojuacuajaari cua jiyaroquiaari na rupaa cua pohuatanura. Cunoori maja tama cua niishiriojosano cua miiniurijaaja. <sup>17</sup> Majaari cua sequenu quiquiaari cua Jiyaniijia: “Cua Jiyaniijianaa, quia rupaa pohuatatareera quiajanijara”. Janiya jaara naa na sequequiaarini, cua Jiyaniijia maara cua niqutiore cua poonijiosanojiniji nera, na shuquiritasacari janiya. Saniniuujia, tama na panishacarijiaaja cua Jiyaniijianaacuajaari cua jiyaroquiaari na rupaa cua pohuatanura. Cunora, majaari cua naata na tarjionu. Janiyacuajaari na seruni. <sup>18</sup> Naacuajitij, ¿taa cua miya socuani, cua Jiyaniijia cua shuquiritiniuria socuani? Naa miiquiaacuajanijia, nareja poonijioquiaanijia tama cua juashiquiatajaaja cua panishano cua jiitianura, na rupaa cua pohuatasacari. Naaratej, majaari cua sequenu quiquiaa cua tojitianaa, nojori niqutiojonura janiya cua panishano. Jesucristocuaajari sequequiaari na rupaa pohuatanaa cuaara niqutioosaaria na panishano. Naajaa, majaari naa cua sequenu quiquiaa nijaniya. Naacuajiti cua naata pa Jiyaniijia shuquiritini socua, cua pohuatasacari na rupaa cua maseyaquishacari cua panishano cua tojitianaajiniji. Naacuajitij, janiyari shuquiriaatia pohuataquiaa Pueyaso rupaa pa Jiyaniijiarani.

<sup>19</sup> Majaari pueya niqutionu quiquiaa janiya na jiitiasanojiniji cua niishitiojonuucua nojori. Naacuajitij, janiyari maja juhua nojori seruni. Pueyanoori maja cua jiyarana. Naajaa, janiyari tama cua cuaqueyajaaja jiyatequiaari juhua puetunu pueya serujuanaa cua quiniuriani, socua pueya quiniuria pa Jiyaniijia Jesucristo tojitianaara. <sup>20</sup> Jesucristo rupaa cua pohuatasacari cuarta Judocuaca niqiuara, janiyari juhua Judio pueyanora quiquiaani. Janiyari naa miiquiaani nojori mariqui cua tojiaquiriiri, janiya jaara juhua tahue quiri nojori niqiarani. Naacuajitij, socua Judocuacaari Jesucristo rupaa tojitiaa. Jesucristoocua cua tiuushacari, janiyari maja socua cua quiniu juhua cua supuetanaa Judocuaca rootasano tojijia. Naajaa, na tojiquiaajaanijia cua quishacari cuarta Judocuacata, noo pojoritiatej cante cuno rootasano tojitiaaani. Naacuajitij, cua quishacari juhua nojori, nojoriiri socua cua tojitiaa cua pohuatasacari Jesucristojiniji. <sup>21</sup> Naajuhuj, cua



quishacari tamasaca pueyata, janiyari juhua nojori quiquiaani, nojori tojiniuria maninia janiya. Nojoriiri maja Judiocuaca supuetanaa rootasano tojiniu niishiniu. Naaratej, janiyari na tojiaquiquiaajuhua, nojoritia cua quishacari. Janiyari naa miiquiaani nojori mariqui cua sooreeri, janiya jaara juhua tamaatia quijia quiri nojori niquiarani. Naajaa, Pueyaso rootasano tojiquiaa pueyaracaanu cutaranijia. Naajuhua, puetunu Jesucristo niishitiojosojuanaa tojiquiaanijia. <sup>22</sup> Noojiaqueya Pueyaso muerasuuri maja na naata tarinitianu najuhuana na supuetanaa rootasano. Cuaara tarinitiaara najuhuana na supuetanaa rootasano. Naajaa, janiyari mariyata cuno najuhuana rootasano tojiquiaajuhua nojoritia cua quishacari. Nojori jyanishacari tamonu casaa sesa quiya, janiyari mariyata maja cua miiniu nojori pueresano casaa. Naacujitij, cua naata nojori cumaquiniu maninia Pueyaso rupaata, nojori tojtiasacari janiya, juhua nojori cua quishacari. <sup>23</sup> Janiyari puetunu naa miiquiaajanaani, socua pueya cua tojtiniuria Jesucristo rupaa. Naa maninia poonijioquiaa cua Jiyaniijaranijia, cua masenura puetunu maninia na sequesanojuanaa na maserasura.

<sup>24</sup> Niaacuaajari niishiya taa pueya tacuarishiyajoquiaacujani. Pueya netecuatusacari, puetunu pueyajanaari jyanohua netecuatujuu jaarajaaja. Cante narta netecuatusanaa shocotajani, shanohua casaa niqutioshiyari. Ritiuquua pueyanoori jyanohua shuquiriaatia quijia na shocotanjini na masacari casaa. Naajuhua pueyanaa, jyanohua nia poonijiore Pueyasora mijiria, shuquiriaatia nia masenura nia poonijosanojiniji na jitasanojiniji jiyocuacaanu. <sup>25</sup> Naajuhua, pueya jaara tacuarishijionu paniri, cante shocotanu paniyani, cuno pueyanoori puetunu najuhuana na miiniu panishanojuanaa tarinitiaja, na cuaqueya quiniuria cumueeca. Naa miiquiaari narta pueya na shocotanura, shuquiriaatia na quiniuria. Saniniuujia, na masesano na shocotanuucuanu, cunoori saaja shanohua nacaque jaamasujiniji shitasano. Majaari na rishiniu. Pajaniyari saniniuujia pueyaracaanu shuquiriaatia quiniutianiyani Pueyaso niqutiosanota pajaniya, paa jaara maninia miiri mijiria pa quishacari. Naaratej, pa tarinitiare puetunu najuhuana tama pa miiniu panishanojuanaa, pa shuqiritiniuria pa Pueyaso.

<sup>26</sup> Pueya netecuatusacari, netecuatusanaa cuaara niishiiria tee netenu puequeetu quiyani. Majaari najuhuana na camaruncuneejonu. Naajuhua, cua poonijosacari Pueyasora, majaari cua niqijiotenu cojia.

Mocoritia piyotoosacari, pueyanoori namitia piquiquiaa narta pueyano. Majaari najuhuana na piquiniu capa. Naajuhua, pa cartere najuhuana pa miijosano. Saaja pa niishiriojore Pueyasocua, maninia pa tojiniuria nojuaja. <sup>27</sup> Janiyari jyanohua saniniuujia quiquiaa maja cua miiniuria tama cua cuaqueya miiniu panishanojuajani. Janiyari cua cuaqueya jiyartuutenu paniquiaani saa Pueyaso cua tojiniuraja. Janiyari tari queraatia pueya niishitiojioquiaari Pueyaso rupaani. Janiya jaara tama cua niishitiojosanojuaja tojiaquirini, Pueyaso mariqui cua cartereeri, maja na rupaa cua pohuatanura socua.

## 10

*Supuetanaa Israel pueya miishanoori pajaniyara naajiotasaaquiaari pa niishiniuria maninia*

<sup>1</sup> Cuarta Pueyaso pueyanaa, nia niishiri taa pa supuetanaa Judiocuaca miishaquiaricuaani nojori rucuanijosacari pueyaracaanu cariquia jiyajinia. Majaari nia niyajetanu niaa mariqui Pueyaso tojijashijara quirihoajuhua. Nojori mashishacari Egipto jiyajiniji, Pueyasoori cohuaja najaca shipiniquiaari nojori na cojuanura, nojori puetariquianojuhua. Pueyasoori puereetuca shoniniacu caminia raquitiaquiaari nojori nuura caminia cajiniocua. Naacujitij, puetunu pueyajanaari niutiiaquiaari joojuashiquio. <sup>2</sup> Naaratej, puetunu nojorijianaari juhua Moisés muerasura jiyatesaaquiaari, nojori nuhujishacari Moisés puereetuca caminia tajiniaaco, cohuaja najaca cariquiano. Majaari socua na quituiniu quiquiaari Egipto pueya seya. <sup>3</sup> Puetunu nojorijianaari jiya cajiniocuaji casaa miaquenuujia, Pueyaso tinishano nojori miaquesocoriquiano pueyaracaanu cuno cariquia jiyajinia nojori rucuanijosacari. <sup>4</sup> Naajuhua, nojori jiyamuetusacari, Pueyasoori mohuaca pojuartaniquiaari saajiajiniji. Puetunu pueyajanaari cuno mohuaca ratuquiaari. Pueyasoori cuno saajiajiniji naa raatequiaari nojoritij, na niishitiojonura cuno pueya, nojuajaari nojori nuhujiriquiaa jiyasohuaja, pueyaracaanu nojori na cojuanura. ¡Nojuacuajari pa Jiyaniijia Cristo quiquiaari! <sup>5</sup> Puetunu cuno supuetanaa Israel pueyajanaari naa maninia cojuasano quiquiaari cariquia jiyajinia. Naajaa, quera puetunu nojorijianaari Pueyaso tojtiaashijia quiquiaari saaja. Pueyasoori cunora nojori shuqiritiaaquiquiaari. Naaratej nojori cusojuanuuriquiaari cuno cariquia jiyajinia nojori camaruncunetasacari pueyaracaanu, cuaara puequequiaarijiaatijia puetunu cuno tojijashijiacajanaa.

<sup>6</sup> Naa miishaaquiaariti cua supuetanaa Judiocuaca, sesa casaacua nojori jiaatianuucua. Nojorijiniiri puetunu naajiotasaaquiaarijianaa pajaniyara, pa niishiniuria maja sesa casaacua pa jiaatianurajuhua. <sup>7</sup> Shushajanaa nojori coteesacari rucuanenu cariiquia jiyaco, noojiaqueya nojorijiniiniori caapiqui casaa shipiniquiaari orojiniji juhua juunu niquisano. Nojoriiri tama nojori shipinijosano casaajaaja sequequiaari: “Nioori pa Pueyashohua, pa mashiquiniaa Egipto jiyajinia pa camarucuaacujaji”. Naacujitij, nojoriiri na shipinishano casaa shuquiritiaquiaari sacuaraatia. Jiyacari nojori miishanoori naa naajiotasaaquiaaritiij:

“Pueyari cajitiriij queranacunura. Na nuhuaji, nujuatuquiaariiri na shipinishano juyaca tacoji na jiareyocuatunura. Socua sacuaraatia casaa miitiquiaariiri”.

¡Maja naa pa miiniuti pueyanaa! Maja pa timitianu tamonu casaa Pueyaso niti. Saaja Pueyaso pa timitiare cutara.

<sup>8</sup> Na nuhuaji, tamacari, noojiaqueya nojorijiniiniori sesa miiquiaari taaturitia, cararaatia taucua miishacari nojori shuquirishacari na shipinishano casaa tacoji. Pueyasoori nocuaji naa sequequiaari: “¡Cuaara puecoosaaria cuno sesa miijica!” Cunora, veintitres mil Judiocuacaari puecoosaaquiaari cuno juuca. Cunojiniji pa niishiri maja pa miiniuria sesajuhua, taa nojori miiquiaaricuaa taaturitiani.

<sup>9</sup> Na nuhuaji, noojiaqueya nojorijiniiniori Pueyasota juaaquoquiaari, tamonu mi-aguesanoocua nojori jiaatiasacari, puera nojori jishacari nojori miaguesano. Nocujaji Pueyasoori sacocua satejoquiaari cuno pueya. Queraatia pueyari cusonuquiaari. Naaratej pueyanaa, maja cumaati pa juaaniu, Pueyaso jaara pa saniniujiuri. Maja naa pa miiniutij paa mariqui Pueyaso juaatiriiri.

<sup>10</sup> Tamacari, noojiaqueya cuno pueyajiniiniori Moisésta juayonutaquiaari. Moiséscajaari nojori jitianara Pueyaso jiyatesano quiquiaari. Nocujaji Pueyasoori na seru jiyaroquiaari cuno juaajica na cusojuanura. Queraatia pueyari cusonuquiaari jiyacari. Naaratej pueyanaa, majaari pa juaatianu pa jyanijianucua.

<sup>11</sup> Puetunu pa supuetanaajiniij naajiotasanojuanaari tariucuaaanu naajiotasaaquiaari, pa numootesaanura quiarijiani, quera pa Jyanijia muetasacariuhua. <sup>12</sup> Naaratej pueyanaa, tama nia cuaqueyajaaja nia cojuare nia jyanishacari niaari Pueyaso tojjia seetanu cutarajanaa, niaa mariqui sesa miiriiri, juhuajaniya nia quishacari tamajaaja. <sup>13</sup> Niaari mariyata saniniujushaaquiaajuhua, taa puetunu parta Pueyaso pueyajanaa saniniujushaaquiaacuaani. Naajaa, nia naata Pueyasocua tiunuu maja puera nia saniniujushaanura. Pueyasocujaaari niishiya taate nia naata rejeretanuni. Majaari puera pa saniniujushaanu quiniutianiya. Pueyasocua nia niishitiojore taate nia naata cartesano quiniuhuaani taraatia nia miiniuucujaji. Naacujitij pa naata rejeretanu, Pueyaso jaara Sesaaca saniniujutiri pajaniya.

*Maja pa cojiniiu tamasaca, na miaquenuusacari na jyanitiushano na pueyasocuuara na puecootusano*

<sup>14</sup> Cua panishano Pueyaso muerasunaa, maja nia tiuquitianu tamasaca pueya jyanitiushano pueyaso quiquiojinia, na tojtianaa nia cojinioria, nojori shuquiritiasacari juaashiquiata shipinishano casaa Pueyaso niti. Maja nojori cojiniiu, niaa mariqui sanitiosaareeri. <sup>15</sup> Niaacuajaari niishijiaca. Naaratej, nia niishiriojore cua sequesanoocua.

<sup>16</sup> Paa jaara rerejore pa Jyanijia cusonu juuca pa niishiniuriani, pa ratunu panishacari, paari sequequiaani: “Paacarasho canaa Jyanijijanaa, quia nanacaari puetunu canaacuarajanaa shooquiaari”. Naa pa ratusacari cuarta Pueyaso muerasunaa, puetunu pajaniyajanaari pa Jyanijia rupuesano quiquiaani, na nanaca shoonuucua puetunu pocuarajanaa. Naajuhua, pa miaguesacari, paari sequequiaani: “Canaa Jyanijijanaa, quiaari quia cuaqueya nootnequequiaari puetunu canaacuarajanaa”. Naa pa miaguesacari, puetunu pajaniyajanaari jatiqui pa Jyanijia cojiquiaani, na cuaqueya cusonuucua pocuara. <sup>17</sup> Cuno pan pa miaguesacari, puetunu pajaniyajanaari niquiriyatu panjiniji neecasequiaani. Naacujitij, paari niishiyani puetunu pajaniyajanaari rupuetoono quiya pa Jyanijiatani, juhua niquiriyatu cuaqueyaja.

<sup>18</sup> Nia niishiriojoriquiaa taa Israel pueya miiquiaacuaani. Nojori miaguesacari Pueyasocuuara na mosano Pueyaso niquiara, na niti nojori mosano seruuri juhua tama nojorijiaaja, Pueyaso jyanooniuria nojori. Naacujitij, nojoriiri na naata Pueyaso rupueno, nojori secjonura nojuaja. <sup>19</sup> Jaara naa quiriritij, ¿taateerini, pueya jaara shipinijosano casaacuara mosano shu miaguere? ¿Casaate pueya jyanishano pueyasocuuara mosano shuni? Nareja shucujaaari. ¿Cumaacaraca quijiate cuno, pueya shipinishano casaa juhua Pueyasorani? ¡Maja! <sup>20</sup> Naajaa, nia tojtiare casaa cua sequenutaniyani. ¡Pueyaso niishiyashijiaca pueyari na miaguesocoriquiano na seya puecooquiaa samarhuacuara! Naa nojori miishanoniquitij, cunoori maja Pueyasora. Naacujitij, nojoriiri samaruhua rupuequiaa,

maja Pueyaso. ¡Majaari cua paniniu nia rupuenura samaruhua! Nocuaji, maja Pueyaso niishiyashijia nia cojiniu cuno shu nia miaquenura. <sup>21</sup> Majaari pa naata pa Jiyaniijia rupuetoonu, samarhuata pa rupuetosacarijuhuaj. ¿Pueyasote samarhuata cojitishiya? Pa Jiyaniijia cusonu juuca pa niishiniuria, ¿paateeri na sequesano miaquenutaniyani, samarhuacuara mosano casaajuhua? ¿Cojitishiyaate? ¡Maja pueyanaa! <sup>22</sup> ¿Paateeri pa Jiyaniijia paraca cojiniu paniyani, pa Jiyaniijia pa juaatiniuriani? ¿Pajaniyate socua cumueeca pa Jiyaniijiajinijini? ¿Majateeri nia puerenu pa Jiyaniijia saniitounu?

### *Taa pa miiniutianiyani*

<sup>23</sup> Tari sequereecuajaniijia, pa naata miiniu puetunu pa miiniu panishanojuanaa. Naajaa, majaari puetunu pa miiniu panishanojuanaa maninia pajaniyara. Puetunu pa miiniu panishanojuanaari maja na cumaquiniu quiniutianiya parta Pueyaso pueya. <sup>24</sup> Naaratej, majaari pa niishiriojonu saaja maninia pa quiniuria tamajaaja. Pa niishiriojore parta pueyacu, maninia nojori quiniurijuhua. <sup>25-26</sup> Seetanujuanaari nio naajiosano: “Nio jiyari pa Jiyaniijia jiya, puetunu ti quijia casaajanaanio”. Naaratej, niaa jaara shu masere shu niqitiojosaquiji cumaneecata, majaari nia nequesotanu: “¿Nio shujiyo casaacuara mosano?” Maja naa nia nequesotanutej. Nia panishano nia masere nareja, nia miaquesocoriquiano juhuajaniya. Pa Jiyaniijia shipinishanocuaajaari. Pa miaquesanoori maja na naata na sesonu pajaniya Pueyasora.

<sup>27</sup> Pueyaso niishiyashijia jaara nia masuure nata nia miaquenura, nia quiaare, niaa jaara quianu paniri. Juhuaaniya nia miaguere na rupojosano niaara. Majaari nia nequesotanunoj: “¿Nio shuti casaacuara mosaarucuaa?” Majaari naa nia nequesotanu niaa mariqui nioojia macuhajetereeri niaa jaara niishiri nia miaquesanoori shipinishano casaacuara mosano juhua Pueyasocuaari. Juhuaaniya nia miaguere nareja. Puetunujuanaari pa Jiyaniijia shipinishanocuaaja. <sup>28</sup> Saniniuujia, nia cojinia jaara numootere nijaniya: “Nio shuuri mosaaree shipinishano casaacuara juhua Pueyasocuaara”, majaari nia miaquenunoj, niaa jaara naa sequesaaere. Maja nia miaquenunoj, nia cojinia mariqui na miqwerejarijuhuaj na cojishacari nijaniya. Nia tarajana jiyoteeri jiyaniyajaa cuno shipinishano casaari seetanujuanaa cumaacaraca quijia. Naacuajitij, na miaquesacari nocuara mosano shu, noojia macuhajanutaniyani. <sup>29</sup> Majaari nio cua sequenu niaara. Niaacuajaari tari niishiya nia naata cuno shu miaquenu. Nia sequeya nio cutaraniijia nia cojiniaa pueyara, maja nia miaquenura cuno shu nojori niquiara, nia cojinia mariqui noojia macuhajareeri cuno shu na miaquesacari niaata.

Niaa naasucuaari cua nequesotanu paniya: “¿Paatucua pa panishano shu miaqueyaquirini saaja tamonu pueyano pueresacari pa miaquenu panishano shu? <sup>30</sup> Paa jaara Pueyaso sequerene ‘paacarasho’ cuno sumatuurani, ¿majateeri maninia pa miaquenura? ¿Tamasacatucua casaara pa sesacare cuno miaquesano pa miaquesacarin?” <sup>31</sup> Cua tojitiare quenaaja cuarta Pueyaso muerasunaa. Nia miaquesacari, nia ratusacari, casaa nia miishacarinio, pueyaracaanu puetunu maninia nia miirijianaa Pueyaso nia shuquiritiniuria. <sup>32</sup> Puetunu nia miishanojuanaa cuara quiri maninia Judiocuaca niquiara, taucuaca niquiarajuhua, parta Pueyaso pueya niquiaranio. Jiyanohua taraatia cutaraari, pueya jaara tojiyaquiya Pueyaso, juhuajaniya pa miishacari nojori jiyantiushano sacuraatia casaa. <sup>33</sup> Naaratej, janiyari pueyaracaanu maninia miiniu paniquiaa puetunu pueya niquiarajanaani, nojori cuara tojitiara Pueyaso, Pueyaso pueyara nojori jiyatesaanura. Majaari cua niishiriojonu tama cua panishanojuaja cua miiniuria. Janiyari socua niishiriojoquiaa tamasaacuani, maninia cua miiniuria nojori niquiara.

## 11

<sup>1</sup> Naaratej cucua nia jiaatiare, juhua janiya nia miiniuria maninia saaja, naatej, taa Cristoocua cua jiaatiaquiaacuani, juhua nojuaja cua quiniuria. Mijiria na quishacari, nojuacuajaari pueyaracaanu maninia miiquiaari pueyacuua.

### *Maajipohuatucua taa quiriqiani Pueyaso pueya rerejosacari*

<sup>2</sup> Cuarta Jesuucua tiunuaanaa, janiyari nia shuquiritiiani, pueyaracaanu nia niishishacari janiya, naajuhua, maninia nia tojitiyacari puetunu cua niishitiojosanojuanaa Pueyasojiniji. <sup>3</sup> Janiyari paniya cutarani socua nio nia niishiniuria: Cristocuaajaari caya camarnu. Cayari saniniuujia necocua camarnu, taa pa Que Pueyaso pa Jiyaniijia Cristo camarnu quiyacuani. <sup>4-5</sup> Naaratej, nia secojosacari Pueyaso, nia caminiuujishacari Pueyaso sequenu panishano Pueyaso pueya maanu niquiarajuhua, jiyacaritij, canuu cuara jocuaara na nacaque na pocuasacari. Saniniuujia, maajipohua pocuanura, nojori cuara mishiquioora na naca toquerauta. Cararaatia cutaraari caya jaara pocuare Pueyasora, Pueyasotajuhua, na naca mishiquiosano. Cararaatiaarijuhuaj, maaji pocuasacari Pueyasota, Pueyasoranio, na naca mishiquiosoo. Maaji jaara caririquiyashijia quiri,

¿casaara na naca na tuquetyaquiya puetunujuanaacuaraarini? ¿Maajiti juhua cayara quiniu paniya? Maja naasucua. <sup>6</sup> Maaji jaara na naca mishiquionu paniyaquiri pueya niqiuara na pocuanura Pueyasora, Pueyaso na secojonuranio, cuno tojiyashijia cuara tuqueteera na naca. ¿Cararaatiatee, maaji jaara na naca tuquesano quiri juhua caya? Taaquiririni. Cararaatia quiyajaarihuaj, na secojosacari Pueyaso, na caminiujiushacari Pueyaso sequenu juhua Pueyaso na quiniuria, Pueyaso shipinishano casami camarnura na quiniurijahuaj. Cayari Pueyaso shuquiritiya Pueyaso tojjia na quishacari. Naaratej, maaji cuara mishiquioora na naca na secojosacari Pueyaso, pueya niqiuara, maja neyaca na rerequetenura. Canuuri shipinishaquaaari juhua Pueyaso na quiniuria, Pueyaso shipinishano casami camarnura na quiniurijahuaj. Cayari Pueyaso shuquiritiya Pueyaso tojjia na quishacari. Naaratej, nia rerejosacari, canuuri maja nacaque na cushiniu na caminiujiushacari Pueyaso rupaa, na secojosacari Pueyasojuhuaj.

<sup>8</sup> Pueyaso jaara coteenujuanaa caya shipiniquiaari, majaari maajijiniji na shipiniu quiquiaari caya. Maaji cutaraari caya riuquiocujiniji shipinishaquaaari. <sup>9</sup> Naacuajitij, maajiri cayara shipinishaquaaari. Majaari caya shipinishaanu quiquiaari maajiria. Naaratej, maaji cuara caya tojjia cutara. <sup>10</sup> Naacuajitij, maaji secojosacari Pueyaso, na caminiujiushacari Pueyaso sequenu panishano pueya niqiuara, cuno maaji cuara mishiquioora na naca. Naacuajitij, pueyari niishiniutianiya cuno maajiri maja neyaca rerequeteja. Naa maninia quiya Pueyaso seya niquiarajaarihuaj. <sup>11</sup> Naajaa, puetunu pajaniyajaanari mariyata Pueyaso muerasuni, Jesucristoocua pa tiuushacari, canuu, maajipohuanio. Naaratej maja pa rerequetenu tamonu. Caya, maaji, nojoriiri mariyata panishano. Maajiri maja na naata tamajaaja supueno cayaju. Naajuhua, cayari maja na naata supueno tamajaaja maajijiu. <sup>12</sup> Seetanujuanaari, maajiri coteenu shipinishaquaaari caya cuaqueyajiniji. Na nuhuaji, puetunu canujuanaari saniniujia supuequiaa maajijiniji. Naajaa, puetunu pajaniyajaanari Pueyasiniji supuequiaani. Naacuajitij, caya, maajinio, nojoriiri mariyata panishano pa naacutoojonura.

<sup>13</sup> ¿Taa nia sequeyani pueyanaa? ¿Maninateeri, maaji jaara Pueyaso secojore na naca mishiquiooso pueya niqiuara? Maja maninia. <sup>14</sup> Naajuhua, quera puetunu pueyajaanari sequeja, cararaatia niquishanoori caya jaara tucuumuejaru quiya juhua maaji. <sup>15</sup> ¿Maajiriijiataj? Jaara tucuumuejaru quiri, cunoori maninia niquishano cutara. Pueyasoori naa maninia shipiniquiaari maaji, tucuumuejaru na quiniuria, na naca mishiquioriquiano na muecacata. <sup>16</sup> Tamonu jaara naacoonu paniyajaa socua pa muesujiniji, niocua na seque: “Pablocuajaari tari pa niishitiojore puetunu na niishishanojuanaa. Naajuhua, puetunu Pueyaso pueya maapejanaanari tamaquiciaa naa miiquiaa taa Pablo pohuataree pajaniyacuajani. Majaari socua pa niishiniu tamaatia quiniu”. Niojuanaari cua rootasano cunojiniji, pueyanaa.

*Corinto pueyari sesa miiquiaari na miaquenujuajinia, pa Jiyaniija cusonu nojori niishishacari*

<sup>17</sup> Cuarta Jesuucua tiuuniaanaa, nio, janiya niaacuara na naajiyani, nioori maja cua shuqiritianura nijaniya. Nia rerejosacari pa Jiyaniija cusosacari nia niishiniuria, niaanaari saaja sesa miiquiaa. Nia rerejonuni, cunoori nia cumaquitioonura juucua. Nia rerejosacari saniniujia, niaari saaja socua seseyaree. <sup>18</sup> Janiyari naa pohuataaarucuaa nijaniyajiniji: “Corinto pueyari sesa na niishiriojonuta nojori jiuujiajinia raquirijitiquiaa nojori rerejosacari”. ¿Seetanutejanaa nio pohuatasano nijaniyajiniji? Naa naasucua. ¿Casaate cua toyani? <sup>19-20</sup> Seetanu naasucujanaa niaari nioojiajinia naa niaaquejoquiaaquij. Paacuajaari tari niishiquiaarini noojiaqueya pueyari Pueyaso pueya maapeecuaji rupatenutaniya. Naa niishishanote canaputeje maja Pueyaso muerasuni. Cante seetanujuanaa Pueyasocua tiujiani, majaari na rupatenu quiniutianiya narta Pueyaso muerasuucuj. Cuarta Pueyaso muerasunaa, niaacuajaari Pueyaso pueya maanu. Naaratej, niaa jaara rerejore nia miaquenura pa Jiyaniija cusonu nia niishiniuria, maja sesa nia niishiriojonu juhua niaaquejono nia quiniuria. Niaa jaara naa niaaquejoriquiatej, majaari pa Jiyaniija cusonu nia niishiniu quiquiaa seetanujuanaa. <sup>21</sup> Nijaniyanaanari tama nia patasanojuaja coteetaquiaa miaquenu. Niaanaari nia miaquesano serotaaquiquiaa. Naacuajitij, casamijuniucuananari miaajecoquiaacujua. ¿Saniniujia casamiriacaanari juhuajaniya mashaasequenuquiacujua! <sup>22</sup> ¿Jianohua cararaatiaari naa nia miishanotej! Niaa jaara naa jamuejaca quiriquiatej, ¿majate nia naata tama nia tiajiniajaaja nia miaquenuunu, ratunonio? ¿Niaateeri niarta Pueyaso muerasu sooquiaa? Naa nia miishacari casamijuniucuatej, niaacuajaari nojori cararoquiaa, casamijuniucua nojori quiniucua. ¿Taa nia sequeyani pueyanaa? ¿Janiyate nia maninihuaqueetaani? ¿Majal Jyanohua tacayanija. Majaari cunora cua shuqiritianu nijaniya.

*Pa Jiyaniijia rootasano na cusunu pa niishiniuria*

<sup>23</sup> Janiyacuajaari nia rootacanu tari pa Jiyaniijia Jesu pohuatasano janiyani, taa na miaquequiaari na saquiriojosano pueyatani. Cuno niucujaja, Judasri pa Jiyaniijia quiateriquiano quiriquiaa taucuaca mosocoriquiano. Cua tojtitarohuacuara pueyanaa. <sup>24</sup> Judas quiateyaquishacarijia nojuaja, pa Jiyaniijia Jesucristoori pan riquiaari. Na Que Pueyaso sequereeri: “Paacarasho cua Quenaa”. Na nuhuaji, na neecaserohuari na serotanura na pueya. Nojori sequereeri: “Nioori cua cuaqueya, niaacuara cua panitiaca nia jiyanooshaanura. Nia miaquere. Niocua naa miiriquia pueyaracaanutej, nia niishiniuria cua miishano niaacuara”.

<sup>25</sup> Naajuhuaaj, nojori miaquenu nuhuaji, Jesuuri raatonuque pataquiaari na pueya na serotanura. Coteenu na Que secorejereeri. Na nuhuaji, na pueya sequerohuari: “Pueyaracaanu nia ratuacari nio, nia niishiriquia, cua Queeri cua nanaca seera nia jiyanooquiaa, na muerasu nia quiniuria. Seyari maja socua niaacuara na moonu quishaanutaniya, sesa nia miiniu jiyanooshaanura juucua. Janiya cutaraari nia niti mosaanutaniyani”. Pa Jiyaniijiaari naa sequequiaari. <sup>26</sup> Naa nia miaquesacaritij, nia ratuacarijijuhuaaj, pueyari niishiniutianiya niaari Pueyaso jiyanooshano pueya, pa Jiyaniijia Jesu cusonuucua pa niti. Naa nia miaqueriquia pueyaracaanu na sequesano pan, pa Jiyaniijia cuara tiuquiriohuajaatjia.

*Nia niishiri taate pa naata miaquenu pa Jiyaniijia cusunu pa niishiniuria*

<sup>27</sup> Naaratej, niaa jaara sesa miiri, Pueyaso nia secoreje ritia na jiyanooniuhuara niajaniya, nia miaquenuhuara pa Jiyaniijia cusunu nia niishiniuria. Naa jaara pa Jiyaniijia pan miaquere jiyanooshoo nia quishacarijia, niaa jaara na cusunu mashacaturate jiyanooshoo nia quishacarijijuhuaaj, niaari na cusunu rerequeteya! Niaari juhua sequeruhua, pa Jiyaniijia najuhuaana cusoquiaari. Naa nia miishacaritij, niaa cutaraari saniitiosaanutaniya.

<sup>28</sup> Naaratej, tama nioojajiniaajaaja nia niishiriojore taa nia quiquiaani, casaa nia miqiuani sesani. Naa nia miiri coteenu, niaa mariqui sesa nia miishano miaquetareeri Pueyaso jiyanoaquiashacarijia niajaniya. Naa nia miiniu nuhuajitij, niocua shuquiriaatia juhuajaniya miaquerohua pa Jiyaniijia pan. Niocua juhuajaniya raturohua pa Jiyaniijia raatonuquejiniji cutara. <sup>29</sup> Cante juhuajaniya miaquereeni, cante juhuajaniya ratoree najuhuanani, jiyanooshoo na quishacarijia, cuno pueyanoori Pueyaso saniitiotenutaniya tama na cuaqueyajaaja. <sup>30</sup> Naacuajitij, jiyanooshoo nia quishacarijia nia miaquesacari, queraatia niajanijajinijinoori cunora cusosuhua quiya. Noojiaqueya niajanijajinijinio cutaraari tari cusonuucanujuhuaaj, Pueyaso saniitiosacari nojori. <sup>31</sup> Nocujaji tama nia cuaqueyajaaja nia jeezare suraatia, pa Jiyaniijia mariqui saniniuujia nia saniitoreeri. <sup>32</sup> Pa Jiyaniijia jaara pa saniniuujuri, canapueete sesa quiyani, Pueyasoori na saniitioquiaa na muerasu nojori quiniucua, maninia nojori quiniuhuara juhua maninia na muerasu. Naacuajitij, juhuacarijia na saniitiosacari na muerasu, majaari pa saniitiosaanu quiniutianiya na ruuretajacata jiya puequesacari, Pueyaso jaqueroosacari na tojijashijiaa.

<sup>33</sup> Naaratej cuarta Jesuucua tiuniananaa, niaa jaara pa Jiyaniijia pan sanu paniriquia na cusunu niishiniuria, nia sashiri niarta Pueyaso muerasu, jatiqiu nia miaquenura maninia. <sup>34</sup> Miaajeyano maaraja, cuara miaqueera coteenu tama na tijajinjiaaja, Pueyaso mariqui nia saniitoreeri, sesa nia miiniuucua nia rerejosacari nia jamuenuta.

Socua nia nequesotasanojiniji janiya, janiyari nia sequenutaniyani cua tiuquishacari niaacua.

## 12

*Pueyaso Sohuanu cumaquishacari puetunu Pueyaso muerasujanaa*

<sup>1</sup> Cuarta Pueyaso muerasunaa, niaacuajaari tari niishiya Pueyasoori na Sohuanu niqitioquiaa puetunu pajaniyajanaa, na cumaaca pa jitianura. Quiarijiani, socua nia niishitiojonu paniya cunojinijinia. <sup>2</sup> Niaacuajaari niishiya taa nia quiquiaari tarini, Pueyaso niishiyashijia nia quishacarijia. Niaari puetunu sapojosaaquiarijianaa, pueya shipinishanocua nia tiuniuucua najuhuanaj. Sesaacaari naa nia tojtiquiaari najuhuaana pueya shipinishano, nia jyanishano pueyasohuani. <sup>3</sup> Naaratej cua pueyanaa, maja sapojosano nia quiniu socua. ¿Taate pa naata niishiniuni, cante seetanujanaa Pueyaso Sohuanu cumaacata pohuataa Pueyasojinijini? Naa nia saniniuujuritij: Pueyaso Sohuanu pohuatesacari pueyano, nojuajaari maja na naata Jesucristo sesacano. Naajuhuaaj, saaja Pueyaso Sohuanu cumaquishacari pueyano na naata sequenu: “Jesuacuajaari Jiyaniijijanaa”. Naacuajitij, maja nia tojiniu na rupaa, cante Jesucristo sesacajani.

<sup>4</sup> Pueyaso Sohuanuuri niquiriyatujua. Naajaa, Pueyaso Sohuanuuri puetunu Pueyaso muerasujanaa cumaquiquiaa tamaatia miishano pa miiniuria na cumaacata. <sup>5</sup> Queraatia

tamaatia poonijiosanoori Pueyasora quiya. Naajaa, puetunu pajaniyajanaari niquiriy-atujua Jiyaniijiara poonijioquiaani. <sup>6</sup> Puetunu pajaniyajanaari tamaatia miiquiaa pa poonijiosanoni. Saniniuujia, Pueyasojunaari na panishano miiquiaa puetunu pueya jiuujiajiniajanaa. <sup>7</sup> Pueyasoori puetunu na muerasujanaa cumaquiquiaa na Sohuanuta, maninia pa miitioonura, Pueyaso muerasu maapue cumaquishaanura puetunujua-naa. <sup>8</sup> Pueyasoori pa cumaquiquiaa tamaatia miishano pa miiniuria. Naacujitij, Pueyaso Sohuanuuri tamonu pueyano pohuataniquiaa Pueyaso niishishano na muera-sura. Pueyaso Sohuanuuri tamonu pueyano niishitiquiaajuhua Pueyaso sequenu panishano pajaniya. <sup>9</sup> Pueyaso Sohuanuuri tamonu cumaquiquiaa Pueyasooocua na tiu-niuria jiyanoehua, na shiniujiuniuria Pueyaso miini panishano pa miiniuria. Pueyaso Sohuanuuri tamonu cumaquiquiaajuhua cusosuhua na naatanijionura Pueyaso cumaa-cata. <sup>10</sup> Pueyaso Sohuanuuri tamonu pueyano jiyajeneta miishano miitijuhua Pueyaso cumaacata. Tamonuuri niishitishaquiaa Pueyaso sequenu panishano na pohuatanura pueya niqiuara. Pueyaso Sohuanuuri tamonu niishitiquiaa teyano sohuanute tamonu pueyano cumaquiyani, Pueyaso Sohuanu, sapojona samaru soj. Pueyaso Sohuanuuri tamonu pueyano pocuatequiaa tamaatia rupaaca, na niishishoo rupaa. Pueyaso Sohuanu-urii tamonu pueyano niishitiojoquiaa tamaatia rupaajinia sequesano na pacunura pueya rupaajiniajuhua, pueya tojiuria maninia tama nojori rupaajiniajaaja. <sup>11</sup> Naacujitij, Pueyaso Sohuanujunaari puetunu pa cumaquiquiaajanaa, tamaatia pa miiniuria. Naa pa poonitijioquiaari taa na paniyacuajani, cana na paniyajaniuhua.

*Puetunu Pueyaso pueyajanaari juhua niquiriyatu cuaqueya quiya*

<sup>12</sup> Tamaatia poonijiosano puetunu pajaniyajanaa jiitiasacari, paari juhua niquiriyatu cuaqueya quiyani. Mijiria pa cuaqueyari jiyanoehua maninia shipinishano jiyanoehua Pueyaso niishitiajata. Pa cuaqueyari maja saaja shu na quiniu. Pa cuaqueyari quera-atia tamaatia casaaraca. Puetunu pa cuaqueya casaajanaari jatiqui poonijioquiaa pa cuaqueyajinia, maninia pa quiniuria. Puetunu pa cuaqueya casaajanaari saa niquiriyatu cuaqueyaja quiya. Jiyano pa cuaqueyatej, Pueyaso muerasuuri naa quiyajuhua. Naacua-jitij, Cristota rupueotoesano pa quishacari, puetunu pajaniyajanaari juhua niquiriyatu cuaqueyaja quiyani, pa Jiyaniijiara pa poonijionura jatiqui. <sup>13</sup> Pueyasoori pa rupueotoe-quiaa na Sohuanuta, puetunu jatiqui pa quiniurijanaa. Pueyasoori puetunu na muera-sujanaa samiitianiquiaari na Sohuanuta. Pueyaso Sohuanu pa jiitiasacari, puetunu pajaniyajanaari rupueotoesano quiya niquiriyatu Sohuanutani. Naacujitij, paari juhua niquiriyatu cuaqueya quiyani: Judiocuaca, taucucanio, poonitijiosano pueyajuhua, camarnuuju pueyano.

<sup>14</sup> Pa cuaqueyajiniji pohuatereeraj. Pa cuaqueyajinia, majaari saa niquiriyatu casaaja quiniu. Queraatia casaari quiya pa cuaqueyajinia. <sup>15</sup> ¿Taa nia sequenyani pueyanaa? Pa niohuaca jaara sequere: "Janiyari maja juaashiquiani. Naaratej, janiyari maja pueyano cuaqueyajinijini". ¿Taa nia sequenyani cuarta Pueyaso muerasunaa? ¿Pa niohuacate maja pa cuaqueyajiniji, maja juaashiquia na quiniuucua? Maja. Naajuhua, majaari na soonu tamaatia poonijiosano pa jiitiasacari Pueyasora. <sup>16</sup> Naajuhua, pa numaa jaara sequere: "Janiyari maja namijiani. Naaratej, janiyari maja pueyano cuaqueyajinijini". ¿Taa nia sequenyani pueyanaa? ¿Pa numaate maja pa cuaqueyajiniji, maja namijia na quishacari? ¿Sooshiyatee? Maja. <sup>17</sup> Paa jaara saaja puereetua namijia quirini, shaaqui pa cuaqueya, ¿paatucua tojirini? Maja pa naata. Paa jaara saaja numaa quirini, shaaqui pa najuhua, ¿paatucua nujuuriquiani? Maja pa naata.

<sup>18</sup> Pueyasoori namitia pa cuaqueya shipiniquiaari puetunu pa panishano casaatajanaa. Puetunu pa cuaqueya casaajanaari rupueotoesaquiaari tee Pueyaso paniquiaari nianucujani. Naajuhua, Pueyasoori puetunu na muerasujanaa cumaquiquiaa mariyata, tamaatia poonijiosano pa jiitianura taa na paniyacuajani. <sup>19</sup> Pa cuaqueya jaara quiriquia saa namijia puetunujanaa, ¿pa cuaqueyatuma tee quiriquia socuani? <sup>20</sup> Puetunu pa cuaqueya casaajanaari namitia saaja niquiriyatu cuaqueya quiya.

<sup>21</sup> ¿Taa nia sequenyani pueyanaa? Pa namijia jaara pa juaashiquia sequere: "Juaashiquianaa, niaari najuhua quijiaca. Maja nia naata niquinuu", ¿majate pa juaashiquia pa panishanojuhua? Taaquiririnij. Naajuhua, pa naca jaara pa niohuaca sequere: "Niohuacanaa, niaari najuhua quijiaca. Maja cua paniniu niya nijaniya", ¿majate pa niohuaca pa panishanojuhua pa rucuanetotajara? Taaquiririnij. Pueyanaa, naa pa quiri jatiquijuhua puetunu parta Pueyaso muerasutajanaa, taa puetunu pa cuaqueyajinia pa jiitiasano casaajanaa quiya jatiquicuaani. Naaratej, puetunu parta Pueyaso muerasujanaari pa panishano quiya, pa cumaquitionura maninia. <sup>22</sup> Teyano casaate pa cuaqueyajinia socua sasaca quiya pa niqiarani, cunoori socua pa panishano. Maja pa naata rishiniu cunooju. <sup>23</sup> Naajuhua, teyanote maja puera

maninia niquishano pa cuaqueyajiniani, paari toque cushiquiaani pa cararaatiuuquia pa mishiquionura, maninia pa niquishaanura. Paari caririquijia cutarani, juhuasu pa quishacari. <sup>24</sup> Saniniuujia, maninia niquishano casaa pa cuaqueyajiniani, majaari cuno pa mishiquionu quiquiaa toqueta. Pueyasoori naa puetunu pa cuaqueya casaajanaa shipiniquiaari maninia pa cojuanurajuhua teyanote maja maninia niquishano pa cuaqueyajiniani. <sup>25</sup> Naacujitij, pa cuaqueya casaari maja rimiajata cojuasano na quiniu. Puetunu pa cuaqueya casaajanaari maninia miitiooquiaa, puetunu maninia pa cuaqueya quiniurijanaa. Naatej, taa pa tacaquiaa pa cuaqueyaracuaani, naa pa miiri parta Pueyaso muerasujuhuj. <sup>26</sup> Pa niohuaca jaara noore, puetunu pa cuaqueyajanaari na tacaatiaa. Pa niohuaca jaara shaaterohua, pa cuaqueyari jaarajaaja puetunujuanaa shuquiriaatia quiriohua. Naajuhuj, parta Pueyaso muerasu jaara taraatia miishaare, naa nojori pa taraajetarejuhuj. Naajuhuj, parta Pueyaso muerasu jaara maninia miishaare, nojoritia pa timirijuhuj.

<sup>27</sup> Puetunu pajaniyajanaari juhua Cristo cuaqueya quiyani. Naaratej, Pueyasoori puetunu na muerasujanaa rupueteya Cristo cuaqueyajinia, saa niquiriyatu cuaqueyaja pa quiniuria, pa camarnura pa poonijionura. <sup>28</sup> Cristo cuaqueya pa quishacari, Pueyasoori coteenujanaa canaa jiyatequiaari Jesucristo jiyaramiquishano pueya canaa quiniuria. Na nuhuaji, Pueyasoori tamasaca jiyatequiaari na rupaa pohuatanaa nojori quiniuria, nojori caminiujiuniuria Pueyaso sequenu panishano pueya niquiarajuhuj. Naajuhuj, Pueyasoori tamasaca jiyatequiaari na rupaa niishitiojanaa nojori quiniuria. Pueyasoori tamasaca jiyatequiaari jiyajeneta casaa nojori miijionura na cumaacata. Tamasacaari jiyatesaaquiaari cusosuhua naatanijionaa nojori quiniurijuhuj, Pueyaso Sohuanu cumaquishacari nojori. Tamasacaari jiyatesaaquiaarijuhuj Pueyaso muerasu naacunaara nojori quiniuria. Tamasacaari jiyatesaaquiaarijuhuj Pueyaso muerasu jiiitianaa nojori quiniuria. Tamasacaari pohuataesaaquiaari tamaatia rupaacajuhuj. Naacujitij, queraatia tamaatia poonijosanoori quiya. <sup>29</sup> ¿Puetunu Pueyaso muerasujanaateeri jiyaramiquishaaquiaari Jesucristojiniji nojori pohuatanura tamasaca niquiara? Maja. ¿Puetunu Pueyaso muerasujanaateeri Pueyaso rupaa pohuatanaa? Maja. ¿Puetunu Pueyaso muerasujanaateeri Pueyaso rupaa niishitiojanaa? Maja. ¿Puetunu Pueyaso muerasujanaateeri jiyajeneta miishano miijiaca? Maja. <sup>30</sup> ¿Puetunu Pueyaso muerasujanaateeri cusosuhua naatanijionaa? Maja. ¿Puetunu Pueyaso muerasujanaateeri tamaatia rupaaca pocujaca? Maja. Tamaatia rupaajinia pohuatasana jaara quiriquia, ¿puetunu Pueyaso muerasujanaateeri na naata na pacunu tama nojori rupaajinijaaja? Maja. <sup>31</sup> Naaratej, nijaniya cuaara jiaatiaara socua maninia poonijosano nia jiiitianura Pueyaso Sohuanujiniji, niarta Pueyaso muerasu nia cumaquiniuria maninia.

Cuarta Jesucua tiuunianaana, quiarijiani nia niishitiojoreera casaate socua panishanoni, Pueyaso shuquiritianura pajaniya.

## 13

### *Panijiaca pa quirij*

<sup>1</sup> Pueyaso Sohuanu jaara cua pohuatare queraatia cua niishishoo rupaaca, Pueyaso seya rupaajuhuj, naajaa, janiya jaara pueya paniyashijia quirini, janiya maara saaja cojuatuneja quirini Pueyasorani. <sup>2</sup> Naajuhuj, janiya jaara Pueyaso cumaacaraca quirini Pueyaso sequenu panishano cua caminiujiuniuria, naajaa, cua paniaquishacari pueya, janiya maara najuhuana quijia quirini. Naajuhuj, janiya jaara niishiri puetunu Pueyaso miiniu panishanojuanaani, puetunu Pueyaso niishishanojuanaanio, naajaa, janiya jaara pueya paniyashijia quirini, janiya maara najuhuana quijia quirini Pueyasorani. Naajuhuj, janiya jaara Pueyaso cumaacaraca quirini, tuhuananuhua cua jatanura tamocora Pueyasocua cua tiuuniucua jiyanohuani, naajaa. Cua paniaquishacari pueya, janiya maara najuhuana quijia quiriquia Pueyasorani. <sup>3</sup> Naajuhuj, janiya jaara puetunu cua casamijianaa nareja niqutiore casamijiuniucua cua paniaquiniutiani, cua Jiyaniijia maara cua shuquiritiaaquiri. Naajuhuj, janiya jaara tama cua cuaqueyajaaja panitiare Pueyaso rupaa cua pohuatanurani, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini. Naajuhuj, janiya jaara mosaare Pueyaso rupaa cua pohuatanuucuan, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini.

<sup>4</sup> Cante pueya panijiani, nojuajaari panaatia sashijia. Cante pueya panijiani, nojuajaari maninia miijia puetunu pueyarajanaa. Cante pueya panijiani, nojuajaari tamonu pueya jiiitiasanocua jiaatiaashijia. Cante pueya panijiani, majaari tama na cuaqueyajaaja na jiyatenu juhua cutara pueyanora. Naajuhuj, cante pueya panijiani, majaari pueya rerequeteja na quiniu. <sup>5</sup> Cante pueya panijiani, majaari pueya na cararajonu. Cante pueya

panijiani, majaari saaja nera niishiriojowa tamajaaja. Cante pueya panijiani, majaari ritia juaajia. Majaari na niishiniu naminiujuhuaj, tamonu jaara sesa na miiri. <sup>6</sup> Cante pueya panijiani, nojuajaari pueyacua taraajeja, nojori miishacari sesa. Saniniuujia, nojuajaari shuquiriaatia quiya pueya miishacari Pueyaso panishano. <sup>7</sup> Cante pueya panijiani, juhuajaniya pueyaracaanu rejeretaari, tamasaca miishacari sesa nojuaja. Majaari na taacanuuu Pueyaso sequesanojiniji, tamonu sequesanojinijinio. Naajuhuj, majaari na tarinitianu maninia miiniu pueyaracaanu. Pueya panijaari naa puetunu rejeretajanaa, taraatia na miishacari.

<sup>8</sup> Panijia pa quiniuni, cunoori pueyaracaanu panishaanutaniya, maja saa mijiria pa quishacarijia. Naaratej, socua cutara panijara pa quirij. Mijiria pa quishacari, Pueyaso Sohuanuuri pa cumaquiya Pueyaso sequenu panishano pa caminiujuniuria, pa niishishoo rupaaca pa pocuanurajuhuj, Pueyaso niishitishano pajaniya pa pohu-atanurano. Puetunu nio niishishanojuanaari puequenutaniya Jesucristo tiuquishacariuhua pocua. Paniniu cutaraari puequeyaquiniutianiya. <sup>9</sup> Mijiria pa quishacari, paari saaja shiitianiyojowa Pueyaso niishishano jiitiaani. Pa niishishano Pueyasojiniji pa pohu-atasanoni, cunoori saaja shiitianiyojowa Pueyaso niishishanojiniji. <sup>10</sup> Naacujitij, mijiria pa niishishanoori najuhuaana quiniutianiya paa jaara Pueyaso shuriucua quirini. Pueyasoori jiyacari pa niishitiojonutaniya maninia cutara. Paari jiyacari puetunu maninia niishiniutianiyaajanaani.

<sup>11</sup> Janiya jaara naatujua quiquiaarini, juhua naatujua pocuaquiarinijia. Juhua naatujua niishiriojoquiarinijia. Saaja naatujua niishitijaa jiitiquiaarinijia. Saniniuujia, janiya jaara cumantumaca quiquiaarini, janiyari cua naatujua quiniu niyajetaquiarini. Naajuhuj mijiria pa quishacari, paari juhua naatujoori quiyajaa Pueyaso niquiarani. Pa Jiyaniijia tiuquishacariuhua, paa cutaraari cumueeca Pueyaso pueya quiniutianiyan. <sup>12</sup> Mijiria pa quishacarijia, paari shiitianiyojowa niishiyani. Paari juhua ninitia niqiya jariyani, juhua sesarunee niqitiujinia. Pueyaso shuriucua pa quishacari, paari maatia niishiniutianiyan. Quiarijiani, saa shiitianiyojuaari pa niishishano. Na nuhuaji, Pueyasota pa quishacari, paari puetunu maniniajanaa niishiniutianiyan, naatej, taa Pueyaso niishiya puetunu pajaniyaajanaacuaani. <sup>13</sup> Quiarijiani, paari Pueyaso rupaacua tiuumiu niishiyani. Naajuhuj, paari juhuajaniya sashiniu niishiyani, maatia pa niishishacari nojuajaari maninia miiniutianiya pajaniya. Nioori maniniacujaja. Naajaa, pa panishacari Pueyaso, pueyano, cunoori socua maninia cutara Pueyasora, puetunu tamonu casaajini-jinjojuanaa.

## 14

### *Niishishoo rupaaca pocuanujiniji niishitiojosano*

<sup>1</sup> Naarate cua panishano Pueyaso muerasunaa, nia jiaatiare socua jyanohua pueya panijia nia quiniuria, Pueyaso panijiacajuhuj. Naajuhuj, nia jiaatiare Pueyaso Sohuanu cumaaca nia jitianura maninia nia miiniuria. Panishano cutaraari Pueyaso Sohuanu niishitijaa nia jitianura, Pueyaso sequenu panishano nia caminiujuniuria Pueyaso pueyara. <sup>2</sup> Cante niishishoo rupaa pocuaa pueya niquiarua Pueyaso Sohuanu cumaacatani, cunoo pueyanoori maja na cumaquiniu narta Pueyaso pueya. Na pohu-atasanoori saaja Pueyaso tojishano, maja pueya tojishano. Cuno pueyanoori jiyasohujaja Pueyaso Sohuanu niishitishano pohuataa pueya niquiarua najuhuanaj. Majaari pueya niishiniu casaa na sequeyani. <sup>3</sup> Saniniuujia, cante Pueyaso sequenu panishano camini-ujuijia pueya rupaajiniani, cunoori narta Pueyaso muerasu cumaquiya. Na numooteyari. Na cumanijiajaariuhuj. <sup>4</sup> Na pohuatasanoori maja najuhuaana na quiniu pueyara. Pueyaso pueya maanu tojishacari na pohuatasano, nojoriiri socua cumaquishaanutaniya. Saniniuujia, cante niishishoo rupaajinia pocuaa Pueyaso pueya maanu tajiniani, najuhuaana pocuaari. Saa tama noojia cumaquiyajaarijia. <sup>5</sup> Puetunu nijaniyaajanaa jaara niishishoo rupaaca pocuanu niishijiaa quiriquia, janiya maara shuquiriaatia quirini. Naajaa, janiya maara socua shuquiriaatia quirini puetunu nijaniyaajanaa jaara Pueyaso sequenu panishano caminiujunianaa quiriquia Pueyaso cumaacata. Cante Pueyaso rupaa pohuatanani, cunoo pueyanoori socua tojishano pueyano niishishoo rupaa pocuanajiniji. Naajaa, niishishoo rupaa pocuaanaari mariyata panishano quiya, na sequesano jaara pueya rupaajinia pacusaare pueya tojishocoriquano. Naacujitij, Pueyaso maapueeri cumaquishaanutaniyajuhuj, maatia Pueyaso sequesano nojori tojishacari.

<sup>6</sup> Cuarta Pueyaso muerasunaa, ¿niaatucua taa sequereni, janiya jaara Pueyaso rupaa pohuataasee nijaniya nia niishishoo rupaajiniani? ¿Niaatucua cumaquishaare cua pocuasacari najuhuaana naa nia niquiaratej? Maja. Niaa cutaraari cumaquishano quiniutianiya, janiya jaara nia pohuatare nia rupaajiniajanaa Pueyaso niishitiojosano janiyani.



Maniniajaarihuaj janiya jaara nia niishitiojore Pueyaso rupaa nia rupaajiniani. <sup>7</sup> Nia niishiriojore. Jiuujiaaju casamiiri rupaaracajuhuaaj. Naaratej, paari shuquiriaatia tojtijaa naajuaa jonesesarini, jaaquequejotaja taquiniosacarijuhuaj. Saniniuujia, pueyano jaara naajuaa jonejenu saniniuujia na niishiyaquishacarijia, saaja nareja cojuatuneyari. Naacuajitij, cante na tojiyani, majaari na niishinu casaa na jonenenu paniya juucuaani. <sup>8</sup> Naajuhuaaj, trompeta jaara sesa jonesesaare, ¿soldadohuate na naata niishiniu casaa na miiniutianiyani? Maja. <sup>9</sup> Mariyata naajaarihuaj, niaa jaara niishishoo rupaa pocuaa pueya niquiara, ¿pueyatucua taa niishirini casaa nia sequeyani? Niaari saaja nia niti taquiriocateya najuhuana nojori niquiara. <sup>10</sup> Niaacuajaari niishiya queraatia rupaacaari mijiria quiya. Puetunu maniniajanaa cutaraari na niishiniaara. <sup>11</sup> Saniniuujia, janiya jaara niishiyaquiya tamonu rupaani, janiyari tahue quiya cuno rupaa pocuanarani. Cuno rupaa pocuaanari tahue quiya quiriajuhuaj. <sup>12</sup> Cuarta Jesuucua tiuuniaanaa, niaacuajaari Pueyaso Sohuanuucua jiaatiaquiaa, na cumaaca nia jitianura. Maniniacuaja. Naajaa, nijaniya cuaraa jiaatiaara Pueyaso Sohuanu cumaquiniuria nijaniya, puetunu tamaatia poonijosanojuanaa nia miiniuriajuhuaj, maja saaja tamaatia rupaacajinia nia pocuanura. Naacuajitij, nia naata niarta Pueyaso pueya cumaquiniu maninia puetunu nia miishanotajanaa, Pueyaso Sohuanu cumaquishacari nijaniya.

<sup>13</sup> Naaratej, cante niishishoo rupaajinia pocuaquiaa pueya niquiara Pueyaso Sohuanu cumaacatani, cuno cuaraa secojora Pueyaso, Pueyaso Sohuanu cumaquiniuria nojuaja, na sequesano na pacutenura pueya rupaajiniajuhuaj. <sup>14</sup> Pa secojosacari Pueyaso pa niishishoo rupaajinia, Pueyaso Sohuanuuri pa sohuanu secoteyaja Pueyaso. Majaari pa niishitiaja niishiniu cutara casaa pa sequeyani. <sup>15</sup> Cunora, ¿casaa pa miiniutianiya Pueyaso pueya maapue tajiniani? Naa pa miiritij: pa sohuanu cuaraa secojora Pueyaso pa niishishoo rupaajinia. Pueyaso pa secorejehuaa tama pa rupaajiniaajaaja. Naajuhuaaj, pa sohuanu cuaraa jaaquequejora Pueyaso niquiara pa niishishoo rupaajinia. Pa jaaquequejorejuhuaa tama pa rupaajiniaajaaja. <sup>16</sup> Pueyaso Sohuanu jaara nia sohuanu secotere niishishoo rupaajinia, nia tojtianaari maja na naata sequenu: “Jaa, cuaraa naa quiriataej”. Majaari nojori niishiniu tamaatia rupaajinia nia secojosano. <sup>17</sup> Niaa naasucuaari jiyanohua maninia secojiya Pueyaso. Naajaa, saaja najuhuana quiyari tamasaara, nojori niishiyaquishacari cuno rupaa. Cuno niishishoo rupaajinia secojosanoori maja na naacunu tamasaara. <sup>18</sup> Pueyanaa, shuquiriaatia quianijia Pueyaso niquiara, Pueyaso Sohuanu pocuatesacari janiya cua niishishoo rupaacajinia, tamajaaja cua quishacari. Janiyari tamaatia rupaacajinia pocuaaja socua nijaniyajiniji cutarani. <sup>19</sup> Naajaa, janiya jaara pueyaracaanu pocuariquia niishishoo rupaajinia Pueyaso pueya maapue niquiarani, cuno maara najuhuana quiriquiaj. Rupaquijia pohuatasano tama pueya rupaajiniaajaajani, cunoori jiyanohua socua maninia tucuyocua pohuatasanojiniji niishishoo rupaajinia. Saaja pueya niishishano rupaajinia cutara cua naata nojori cumaquiniu.

<sup>20</sup> Cuarta Pueyaso muerasunaa, niaari najuhuana shuquiriya niishishoo rupaajinia nia pocuasacari pueya niquiara, naatej, taa naatujoori shuquiritiaquiaa quiarinio tacuarishijiotajacuaani. Niaa jaara juhuaa naatujoori quiniu panijajaa, sesa niishiriojiyashijiacua nia quiri, taa naatujoori quiyacuaani. Saniniuujia, majaari seetanujuanaa naatujoori nijaniya. Naaratej, cumantumaca nia quishacari, nia niishiriojore maninia nia cumaquitioonura nia rerejosacari. <sup>21</sup> Tariucuacaanu, tama Pueyaso sequesanojaarijia naajiotasaquiaari. Naa sequeyari:

“Janiyari taucuaca jiyaramiquiniutianiya cua saquiriojosano Israel pueyacuani, cua sequenu panishano nojori pohuatanura cua pueya. Cua pueya niishiyaquishoo rupaacajinia pohuatanutaniyari. Naajaa, niishiyaniija, tahuu pohuatasacari cua rupaa, cua pueyari saa cua ruuretanutaniyajaa, taa nojori ruuretaquiaa cua rupaacuaani jaara tama nojori rupaajiniaajaaja pohuatasariquiaa”.

<sup>22</sup> Naa Pueyaso sequesacarijij, paari niishiyani, Pueyasoori tamaatia rupaacata na tojiyashijiaa tojtiniu saniniuujia nia rupaa juucua. Paari saniniuujia tari na rupaa tojtijajaca cutarani. Naaratej, majaari socua panishano Pueyaso sequenu pajaniya pa niishishoo rupaajinia, na tojtiniuria pajaniya nojuaja. Pueyaso sequenu panishano caminiuujushano cutaraari pajaniyara. Cunocuaajaari tama pa rupaajiniaajaaja. Cunoori maja Pueyasoocua tiuyashijiacara. <sup>23</sup> Naaratej, Pueyaso pueya maapue rerejosacari, saaja secaja nijaniyajinijinio cuaraa pocuaara niishishoo rupaacajinia. Naa pocuanu nia tariniitire quenaaja, tamasaara Jesuucua tiuyashijiaa quishacari nia rerejojuajinia, nojori mariqui jiyaniiri: “¡Nio pueyaqui puetunu paatecoorijuhuanajaj!” <sup>24</sup> Saniniuujia, puetunu nijaniyajanaa jaara Pueyaso sequenu panishano caminiuujia tama nia rupaajiniaajaaja, tamonu pueyano jaara niaacua tiuquiri, nojuajaari maninia niishiniutianiya nia pohuatasano. Puetunu nia pohuatasanojuanaari noojia tacaatinutianiya sesa miijia

na quiniucua. Tama nojuajaarjia niishiniutianiya: “¡Janíyaqui sesa miijia Pueyaso niquiarani!”<sup>25</sup> Nia pahuatasano Pueyasojinijiri puetunu sesa na miishanojuanaa na niishitiniutianiya noojiajinia. Nocuaji, nojuajaari Pueyaso tojjijara quiniutianiya. Sequenutaniyari: “¡Pueyasoqui seetanujuanaa nia tajinia niya quíya!”

*Puetunu nia miirijianaa maninia. Majaari nia riutiocojonu tamonu pocuasacari*

<sup>26</sup> Naaratej, cua tojitiare taa nia miiniutianiyani cuarta Pueyaso muerasunaa. Naa nia miiri nia rerejosacari. Puetunu nia miishanojuanaa cuara quíria nia cumaquitioonura, socua maninia Pueyaso tojtianaara nia quiniuria. Naacuajitij, Pueyaso Sohuanu cumaacata, tamonu naasucuaari jaaquejejonutaniya. Tamonu naasucuaari Pueyaso Sohuanu niishitiojonutaniya. Tamonu naasucuaari Pueyaso Sohuanu niishitiojosano noojiajinia caminiujiuniutianiya. Tamonu naasucuaari niishishoo rupaajinia pocuanutaniya. Na nuhuaji, tamonu cuara na pacuura nia rupaajinia, maninia nia tojiniuria. Naa nia miiri maninia. Niquiriyatujua cuara pocuaara coteenu, na nuhuaji tamonu, na nuhuaji socua tamonu. Naate nia miiri. Majaari nia riutiocojonu tamonu pahuatasacari.<sup>27</sup> Níaa jaara niishishoo rupaajinia pocuanu paniri, cuara pocuaara saa querajaa pueyaja, maja socua. Cuaara pocuaara niquiriyatujua, na nuhuaji tarajanu, na nuhuaji socua tarajanu. Naate maninia. Maja nia pocuanu tamonu pocuasacari. Na nuhuaji, tamonu cuara pacuura pueya rupaajinia, niishishoo rupaajinia nia sequesano, pueya tojiniuria maninia.<sup>28</sup> Niishishoo rupaa pacuna quíyaquishacari, cuara pocuaquíria cante tamaatia rupaajinia pocuanu paniriquíaa nia niquiarani. Na naata sanaa pocuanu noojiajinia tamajaaja, saa Pueyaso niquiarani.

<sup>29</sup> Naajuhuj, níaa jaara Pueyaso Sohuanu niishitiojosano nioojiajinia pahuatanu paniri, cuara pocuaara saa querajaa pueyaja, maja socua. Na nuhuaji, Pueyaso Sohuanu cumaaca jíitianaa cuara saniniujiuria nia pahuatasano, nia niishiniuria, cunote seetanujuanaa Pueyaso Sohuanu niishitiojosano, maja soj.<sup>30</sup> Nia pahuatasacari Pueyaso rupaa, tamonu jaara pahuatanu paniya shusha Pueyaso Sohuanu niishitiojosano noojiajinia, cante pahuataajaani cuara sanaajeera, na tarajana pocuanura.<sup>31</sup> Naacuajitij, puetunu Pueyaso niishitiojosano jíitianaajanaari na naata na pahuatanu. Naaratej, niquiriyatujua cuara pahuataara, na nuhuaji tamonu, na nuhuaji socua tamonu. Naacuajitij, puetunu niajanijajanaa na naata pahuatanu nia niishishano Pueyasojiniji. Naacuajitij, puetunu Pueyaso muerasujanaari maninia niishitiojosano quiniutianiya, maninia cumaquis-hanojuhuaj, maninia nia miiniuria.<sup>32</sup> Maja timia pocuanu jaarajaaja tamonu pocuasacari. Majaari Pueyaso Sohuanu pocuatenu tari niajaníya, tari tamonu pocuasacari. Níaa naata cutaraari sashini nia pocuanura.<sup>33</sup> Pa Pueyaso cutaraari maninia miijiajanaa. Maja cushitiojua. Naarate pueyanaa, maja tamasa pocuasacari pa riutiocojonu. Saaja maninia pa miiriquia pueyaracaanu.

Cua tojitiare socua. Puetunu Pueyaso pueya maapuejanaa cuara naa miiria na rerejosacari.<sup>34</sup> Maajipohua cuara sanaa tojtiaara Pueyaso rupaa pahuatasacari. Maajipohua cuara niishitiojijaquíria pueya niquíara. Maajipohua cuara tojjijara quíria, taa pa niishitiojosaaquíari Moisés Rootasanojinijicuaani.<sup>35</sup> Maajipohua jaara niishiniu paniya socua pahuatana niishitiosanojiniji, nojori cuara nequesotohuara neyaca tama na tiajiniajaaja, na que maaraja. Cararaatia cutaraari maaji jaara nequesoretare caya pahuatasacari, Pueyaso muerasu rerejojuajinia.<sup>36</sup> Nia tojiri nio cua rootasano pueyanaa. Níaaacuaari niishiya, Pueyaso rupaari supueyaquíquiaari niajanijajiniji. Naajuhuj, majaari Pueyaso rupaa pahuatanaa jíyaramiquíniu quishaaquíari saa níaacuaa. Tamonu jíyacajinia, queraatia Pueyaso pueya maapueeri cua niishitiojosano tojtiaquíaa maninia cutara.<sup>37</sup> Níaajanijinjino, noojiaqueya pueyari Pueyaso Sohuanu cumaaca jíitiaa, nia niishiniuria cana cumaacata tamonu pueyano niishitiojijani. Naacuajitij, ¿taa nia sequeyani? ¿Majate Pueyaso Sohuanu niishitiojosano cua sequesano niajaníya? <sup>38</sup> Cante nio niishiniu paniyaquíyani, cuno jíyoteeri maja Pueyaso Sohuanu cumaacaraca quíja. Cuno pueyano cuara tojijaquishaaria saniniujuja.

<sup>39</sup> Naacuajitij cuarta Pueyaso muerasunaa, nia jiaatiare Pueyaso Sohuanu cumaaca nia jíitianura, pueya níquiara nia pahuatanura Pueyaso Sohuanu niishitishano niajaníya. Naajuhuj, majaari nia tenujuno noo pojori, canapuee niishishoo rupaacajinia pocuanu paniyani, Pueyaso Sohuanu cumaquishacari nojori.<sup>40</sup> Nareja maninia nia miiriquia puetunujuanaa. Naacuajitij, niquiriyatu cuara pocuaara coteenu, na nuhuaji tamonu, na nuhuaji socua tamonu.

<sup>1</sup> Cuarta Jesucua tiuniaanaa, Jesucristo rupaa nia niishiriohua, tarijia cua pohu-atasano nijaniya, nia jiyanooshaanurani. Niaari nocua tiuquaaari maninia. Niaari quiarijia maninia na tojitiaajaa. <sup>2</sup> Naacuaajitij, Jesucristoori niaacuaaji tacuquiaa quiarijia, maninia nia tojitiyacari na rupaa, taa cua pohuataquiaari nijaniyacuaajani. Niaacuaajaari Pueyaso pueyara jatanishano quiaa niaa jaara maja najuhuana na rupaa tojiyaquiquiaari. <sup>3</sup> Janyari niaara caminiujuquiaari Jesucristo rupaani, taa cua tojiyaacuaani. Nio cutara rupaa nia coteetaquiaari pohuatanunijia: Cristoori pocuara cusoquiaari niyacutesanojinia, sesa pa miiniuucua. Tariucuaaanu Pueyaso sequenu panishano caminiuju- niaari naaajiotaquiaari, taa Cristo miishaanutaniya naquiyani. Seetanujuanaa naa miishaaquiaariiri. <sup>4</sup> Jesucristo cusonu nuhuaji, raaco niasaaquiaariiri. Jiuujanaraca juuca jaara na shoconujuquiaari macu na quishacari, na raaco samiitiaquiaariuhuari. Naa tohuateequiaariiri puetunu tariucuaaanu Pueyaso Rupaajanaa, taa nojuajinjini na- jiotasaaquiaaricuaajani. <sup>5</sup> Na nuhuaji, Jesucristoori Pedroocua muetaquiaariuhua. Na nuhuaji, na jiyaramiquishocoriquiano pueyacu muetaquiaarijiaariuhuari. <sup>6</sup> Na nuhuaji, muetaquiaarijiuhua na tojitianaa rerejosaquiiri. Socua quiniento pueyari na niquti- aquiaari jiyacari. Queraatia jiyacari na niquniaajinjini pueyari saminio quiyajaa. Noo- jiaqueyari tari shaajecocanu. <sup>7</sup> Na nuhuaji, pa Jiyaniijaari Santiagocua muetaquiaar- ijiuhua. Na nuhuaji, muetanu pacutequiaariuhua na doce jiyaramiquishocoriquiano pueyacuari.

<sup>8</sup> Puetunu cuno pojori nuhuaji, Jesucristoori socua cucua muetaquiaarijiuhua, nocua tiujia cua quiyaquishacarijia. Naa na paraca cua quishacarijiatej, Jesucristoori cucua muetaquiaari na jiyanooniuria janiya. Ritia cua jiyatequiaariiri na jiyaramiquishano cua quiniurijuhua. <sup>9</sup> ¿Casaaraqitijia na saquiriojoquiaari janyatejaj, na jiyaramiquishano cua quiniurijuhua? Janyari puera sesa miijia quiquiaarini cua niishiyaquishacari Jesucristo. Cucua na muetaaquishacarijia, janyari Pueyaso saquiriojosano pueya mi- itiaquiaarini. Cuarta Jesucristo jiyaramiquishano pueyari maja naa sesa miijiaa na quitiuniu quiquiaari. <sup>10</sup> ¡Pueyasoori jiyanoohua maninia! Cua jiyanooquiaariiri Jesucristo jiyaramiquishano cua quiniurijuhua, taa cua quiaa quiarijiacuaajani. Naa quiyanjia Pueyaso jiyanooniucua janiya. Majaari najuhuana na jiyanooni quiquiaari janiya. Na jiyanoosacari janiya, janyari socua jiyanoohua nera poonijiocanu cuarta Jesucristo jiyaramiquishano pueyajinjini. Naajaa, maninia cua poonijosanoori maja tama cua miishanojuaaja na quiniu. Pueyasocuaajaari cua cumaquiquiaa na Sohuanuta, maninia cua miiniuria na panishano.

<sup>11</sup> Naacuaajitij, naa sequeriquiaa nijaniyanijia: cante nia pohuataquiaari Jesucristo rupaani, naajaa. Janyari Jesucristo rupaa pohuataquiaaacuahuaj, mariyata taa cuarta Jesucristo jiyaramiquishano pueya pohuataquiaacuaani. Majaari rimiajata canaa pohu- atasano. Niaari cuno rupaacua tiuquaaari maninia.

#### *Pueyaso muerasu macunucua samiitiasacariuhua*

<sup>12</sup> Cuarta Jesucua tiuniaanaa, canaa jaara pohuatariquiaa taa Cristo samiitiaquiaar- iuhua macujinjini, ¿casaara noojiaqueya nijaniyajinjini sequequiaani: “Macunucua maja na samiitiaconu quiniutianihua”? <sup>13</sup> Macunucua jaara samiitianiyaquishaanu- taniya taa nia sequequiaacuaajani, Jesucristo jiyoteeri macu quiyajaacuahuaj. ¿Cristoteeri macu quiyajaa? ¡Maja! <sup>14</sup> Cristo jaara macu quiriquiaaja, canaa maara najuhuana pohuataa na rupaani. Naajuhua, niaa najuhuana Jesucristoocua tiuya, na pueya nia quiniu paniniuria juucua. <sup>15</sup> Canaacuaajaari pohuatanuquiaani Pueyasoori Jesucristo samiitian- iquiaariuhua. Macunucua jaara samiitianiyaquishaanutaniya taa nia jiyaniquiaacuaajani, canaa jiyoteeri sapojonujuaca Pueyaso jiyaramiquishano pueyani. Naacuaajitij, nia se- quesano jaara seetanujuanaa quiri, maja jiyoteeri Pueyaso samiitianini quiquiaariuhua Jesu. Saniniujia, ¡niaari jiyajeneya cutara! ¡Pueyasocuaajaari seetanujuanaa Jesu samiitian- iquiaariuhua! <sup>16</sup> Macunucua jaara samiitianiyaquishaanutaniya taa nia sequequiaacua- jani, Cristo maara samiitiaaquiaariuhua. <sup>17</sup> Cristo jaara samiitiaaquiaari, niaa jiyoteeri Cristoocua tiuya najuhuanaj, Pueyaso na jiyanooniuria juucua nijaniya. ¿Macuteeri na naata pocuaaji tacunu? Maja na naata. Niaa jiyoteeri jiyanooshoouja quiaa. Sesa nia miishano jiyoteeri tuujusoouja quiyajuhua. ¿Naatejaaratej? <sup>18</sup> Cristo jaara macu quiriquiaaja, tariucua shaajecono nocua tiuniaa pueya maara taraatia quiriquiaaj. Nojori maara taraatia shaajeconu puetunurajanaa, maja quenaaja nojori samiitianuhua. <sup>19</sup> Pajaniyajuhua, canapute saminio quiyajaani, paa maara jiyanoohua taraatia quiyani, pueyaracaanu najuhuana naquiya pa miishacari mijiria. Jaara naa quiriritij, pa Jiyaniija Je- sucristo jaara macu quiriquiaaja, paa maara najuhuana poonijioriquia pa shuquiritiniuria nojuaja juucuanu.

<sup>20</sup> ¡Namitia naa quiyaaquiyari! ¡Cristoori seetanujuanaa samiitianishaaquiariuhua! ¡Canaari na niqutiaquiariini! Naacuaajitij canaari niishiyani Jesucristoori saminio quiyacuaja. Pueyaracaanu saminio quiniutianiyari. Naa pa Jiyaniijia Jesu samiitiasacariuhua coteenu pocuajicuaatej, naacuaajitij paari niishiyani puetunu shaajecono nocua tiuuniaajanaari samiitianishaanutaniuhuaaacuaja. <sup>21-22</sup> Paacuajaari niishiyani, pa supuetana Adánri coteenujanaa shaajequiaari, Pueyaso na paacuajiniucua. Naacuaajitij, puetunu nojuajiniji supuenaajanaari shaajecoquiaajuhuj. Adán nuhuaji, parta pueyano Jesucristoori saniniuujia Pueyaso tojjia quiquiaari cutara. Naacuaajitij, nojuajaari samiitiaquiariuhua. Naaratej, puetunu nocua tiuuniaajanaari samiitianishaanutaniuhua, pueyaracaanu saminio pa quiniuhua pa Jiyaniijia. <sup>23</sup> Pa Jiyaniijia Jesucristoori coteenu samiitiaquiariuhua. Cristo nuhuaji, puetunu nocua tiuuniaajanaari samiitiaconutaniuhua, pa naacuneetonura nata, na nishacariuhua pocua. Paari naa samiitiaconutaniuhua Pueyaso panishacarini. <sup>24-26</sup> Na nuhuaji, nio jiya puequesacariiri quiniutianiya. Pa Jiyaniijia Jesucristoori mijiria tiuquiniutianihua, na tucuataniuhua puetunu na Que panishanojuanaa. Na Queeri na jiyaronutianiya puetunu na paraajanaa na pueconura. Jesucristoori Jiyaniijiajanaa quiniutianiya, na Que cuara puecoorejaatijia puetunu Neyanu paraajanaa. Jesuuri puetunu mijiria jiyaniijianucua quejoonutaniyajanaa, mariyata puetunu jiya cajiniocua cumaacaraca quijiacajanaano. Sesaacaari jataaanutaniyajuhuj, puetunu na seyatajanaa. Majaari tamonu Pueyaso ruuretaja cureenu quiniutianiya quenaaja. Pa Jiyaniijia jatanu nuhuaji puetunu na paraajanaa, jiyacari pueya cusojuana shaajanutaniyaariuhuj. Majaari cusonu niishishaanu quiniutianiya socua, shaajenunio. Puetunu casaajanaa jaara maninia jiiitiasano quiriohua, Jesucristoori na Que na niqutionutaniuhua, na Que jiiitianuhua puetunujuanaa.

<sup>27</sup> Na Que Pueyasoori Jesu jiyatequiaari Jiyaniijia na quiniuria jiyanohua na cumaacata. Naacuaajitij, nojuajaari na naata puetunu casaajanaa na tojitaniniu. Nojuajaari Jiyaniijiajanaa. Saa na Que Pueyasoojuaari socua Jiyaniijiajanaa, maja tamonu. Pueyasoojuanaari Neyanu jiyaroquiaari puetunu na shipinishanojuanaa na jeenucanura na cumaacata. <sup>28</sup> Na tucuatasacari, pa Jiyaniijia Jesucristoori na Que sequenutianiya: “Cua Quena, tari tucuataree quia panishanonijia. Puetunu quia paraajanaa quejooree tarinijia. Majaari socua sesa na miiniu quiniutianiya. Saa quiajanijiaari pueyaracaanu Jiyaniijiajanaa quiniutianiya cutara, maja socua tamonu”. Naacuaajitij, pa Que Pueyasoori Jiyaniijiajanaa quiniutianiya pueyaracaanu, puetunu na shipinishanojuanaa na jiiitianura maninia.

<sup>29</sup> Socua nia niishiriojore pueyanaa. Niaa jaara jiyaniyajaa macunucuaari maja na samiitianishaanu quiniutianihua, ¿casaara pueya tiuquiniijosaaquiaa moojinia macu nitini, cuno macu jaara na shaajeyaquishacarijia Jesucristoocua tiuurii? Paa jaara tiuquiniijosaaquiaa Jesucristoocua pa tiushacarini, paari miriqui miyani taa pa Jiyaniijia Jesucristo miishaaquiariicuaani. Nojuajaari raaco niasaaquiaari na cusosacari. Na nuhuaji samiitiaquiariuhuari. Naajuhuj, paari mariyata samiitianishaanutaniuhuaani. Niaari sequenea macunucuaari maja na samiitianishaanu quiniutianihua. ¿Naatejaaratej? Macunucua jaara samiitianijiaquishaanutaniuhua taa nia jiyaniyacuaani, ¿casaara pueya tiuquiniijosaaquiaa shusha shaajeno macu niticuaarini?

<sup>30</sup> Paa jaara samiitianiyaquishaanutaniyani taa nia sequequiaacuajani, canaquiiri najuhuaana tama canaa cuaqueyajaaja panitiaquiaani, pueyaracaanu canaa poonijosacari pa Jiyaniijia. <sup>31</sup> Seetanujuanaa nia sequeyanijia, janiyari jiyanohua shuquiriaatia quiyani, Jesucristoocua nia tiushacarini, cua pohuatanucua na rupaa niajanijia. Seetanujuanaajariuhuj, pueyari cua monu paniquiaa pueyaracaanuni, maja socua cua pohuatanura Jesujiniji. Naajaa, janiyari tama cua cuaqueyajaaja panitiaquiaa puetunu juucajanaani, cua niishishacari janiyari samiitianishaanutaniuhuaani. <sup>32</sup> Pa Jiyaniijia jaara macu quiya taa nia sequequiaacuajani, janiyaqui najuhuaana Jesucristo rupaacuaji tacuriquiaani nio sesaaca pueya tajinia cua quishacari niya Éfeso tiacajiniani. Nojoriiri juhua puereta sayoru quiriquiaa cucuaji. Janiyaqui najuhuaana Jesucristo shuquiritiriquiaa juucuaani, nojuaja jaara samiitianiyaquishaaquiariuhua. Paa jaara samiitianiyaquishaanutaniyani, pa miriqui taa Pueyaso tojiyashijiaa sequequiaacuajani: “Pa shuquiriri saminio pa quishacarijia. Pa queranacunuure. Pa mashaasequenuurejuhuj. Naajaa, pa shaajesacari, pocua puetunu shaajequeejanaani”. Naa sesa miiquioquiaari noo pojori, canapute jiyaniyani macunucuaari maja na samiitianishaanu quiniutianiya.

<sup>33</sup> Pueyanaa, tama nia cuaqueyajaaja nia cojuare, niaa mariqui sapojosaareeri naa sesa nia niishiriojonurajuhuj. Tamonu pueyanoori naa sequequiaari seetanujuanaatej: “Maninia miijiaari sesa miijiaa jatanishaaree na cojinuucua sesa miijiaa”. Naaratej, majaari nia cojinu sesoriquia pueya, niaa mariqui seserejaariuhuj. <sup>34</sup> Niishiriojuara

nia quiri. Sesa nia miini nia cartere. Noojiaqueya nijaniyajiniinioori Pueyaso ni-shiyashijiaca quiyajaa. Naa nia sequereenijia pueyanaa, quenaaja nia caririquniuria.

*Taamueca pa quiniutianiuhuani pa samiitiasacariuhua*

<sup>35</sup> Tamonu nijaniyajiniini naasucuaari niishiriojija: “¿Taa macunucua samiitiani-jiosaanutaniuhuajaarani? ¿Taamuecate na cuaqueya quiniutianiyani?” <sup>36</sup> Maninia nia niishiriojore pueyanaa. Maja niishiyashijia nia quiniu. ¿Majateeri nia jamosano naana jajau co moquenu, neyona moritianura? Naacuaaquinatejaj. Saa na co moquesacarijia na naata moritanu. <sup>37</sup> Naajuhujaj, niaa jaara saaco natate, tamaatia jajajuhujaj, nia natasano jajauri maja juhua neyonarano niquishano. Nia natasanoori saaja shiitianiyojua jajau quiya. Na moritiasacari, jiyanoehua tamaatia niquishiyari. <sup>38</sup> Pueyasoori na maashitiya puetunu na jaamasucuatajanaa, taa na paniyacuajani. Pueyasoori puetunu jajajuhua moritianiijia tamaatia niquishano na quiniuria. Naa quiniutianiyajaariuhua macunucua samiitiasacariuhua. Majaari pa cuaqueya quiniutianiya taa na quiya quiarijiacuajani. ¡Pa cuaqueyari jiyanoehua maninia quiniutianiuhua!

<sup>39</sup> Majaari puetunu cuaqueyaraca casaajanaa mariyata na quiniu. Naacuajitij, pueyano cuaqueyari tamaatia quiya casa cuaqueyajini. Shuhua cuaqueyari tamaatia quiyajuhujaj. Sapitiaaja cuaqueyari tamaatia quiyajuhujaj, moojinia na quiniuria. <sup>40</sup> Jiyocuaaanu quijiacaari tamaatia cuaqueyaraca, maja juhua mijiria quiniaa cuaqueya. Pueyaso seya cuaqueyari shanohua niquishano. Nojori cuaqueyari tamaatia niquishano mijiria quiniaa cuaqueyajini. <sup>41</sup> Naajuhujaj, pananuuri jiyanoehua shacantuuca quijia. Raca shacantuucaari tamaatia niquishano pananu shacantuucajiniji. Riya shacantuucaari socua tamaatia niquishano. Naajuhujaj, puetunu riyajanaari tamaatia niquishano narta riyajiniji. Puetunu Pueyaso shipinishanojuanaari naa tamaatia quiya.

<sup>42</sup> Naajuhujaj, Pueyaso muerasuuri samiitianishaanutaniya tamaatia cuaqueyata. Moquejacaari jamojiosaanutaniya. Moqueyashijiacaari saniniuujia samiitianishaanutaniuhua, pueyaracaanu na quiniuria. <sup>43</sup> Jamosano pa quete sequeeri samiitianishaanutaniuhua, jiyanoehua shanohua niquishano na quiniuria. Cumaacaaju jamosanoori samiitianishaanutaniuhua jiyanoehua cumaacaraca na quiniuria. <sup>44</sup> Pa cuaqueya jamosanoori saaja jiyacua rucuanajaca quiquiaari. Paari samiitianishaanutaniuhuaani tamaatia cuaqueyata, jiyocuaaanu quijiaca pa quiniuria. Naaratej, Pueyaso jaara maninia cuaqueya shipiniquiaari pajaniyara, mijiria pa rucuanefonura, ¿majateeri Pueyaso niishiniu tamaatia cuaqueya shipininiu na muerasura, na shuriucua pa quiniuria? Taaquiririniji.

<sup>45</sup> Pueyasoori coteenu na supuetana shipiniquiaari marajiniji. Na nuhuaji, na samiitian-iqiaariiri. Moisés Naajioneenjiaari naa naajiotasaaquiaritij: “Adánri saminiora quiquiaari Pueyaso nooshacari na jiquioco”.

Jesucristoori saniniuujia jiyatesaaquiaari juhua pa supuetanara na quiniuria pa supuetana Adán niti. ¡Jesucristoori jiyanoehua socua cutara Adánjiniji! Adánri samiitianishaaquiaari saminio na quiniuria. Jesucristo cutaraari pa samiitianijajanaa na Sohuanuta. <sup>46</sup> Coteenujanaa pa supuetanani, majaari na shipinishaanu quiquiaari jiyocuaaanu quijiarano. Cunora, coteenu pa cuaqueyari saaja mijiria quijia. Na nuhuaji, pa cuaqueyari jiyocuaaanu quijia jatanishaanutaniya mariyata juhua Jesucristo cuaqueyara. <sup>47</sup> Adánri saaja mijiria quiriqiano quiquiaari. Marajiniji shipinishaaquiaariiri. Jesucristoori saniniuujia jiyocuaaanujinio. <sup>48</sup> Puetunu Adáncaujinio supuenojuanaari saaja mijiria quijia. Naaratej, puetunu pajaniyajanaari saaja cusonuujacani, juhua pa supuetana Adánjuhujaj. Jesucristo muerasuuri saniniuujia juhua pa Jiyaniijia Jesucristo quiniutianiya, jiyocuaaanu quijiaca pa quiniuria. <sup>49</sup> Mijiria pa quishacari, pa cuaqueyari juhua pa supuetana Adán cuaqueya quiya, marajiniji shipinishano. Majaari pa cuaqueya quiarijia socua maninia Adán cuaqueyajini. Pa samiitiasacariuhua, pa cuaqueya cutaraari quiniutianiya mariyata juhua cuno jiyocuaaanu Quijia cuaqueya. Nojuacuajaari pa samiitianinia Jesucristo.

<sup>50</sup> Cuarta Pueyaso muerasunaa, maja pa naata Pueyaso rupeenu nio pa cuaqueyataja. Pa rishiyashijia cuaqueyari maja na naata cuno pueyaracaanu Quijia rupeenu. <sup>51</sup> Naajaa, cua tojitiare. Nia pohuatareera pueya niishishoo. Majaari puetunu pajaniyajanaa cusonuuriquianoni. Puetunu pa cuaqueyajanaa cutaraari jatanishaanutaniyani, maninia cuaqueya pa jitianura, juhua Jesucristo cuaqueyajuhujaj. <sup>52</sup> Jiyocuaaanuji trompeta jonesesacari, pa cuaqueyari ritia jatanishaanutaniya, naatej, taa pa nimishiniuquiya ritiaacuani. Pa Jiyaniijia naacuneetoonu panishacari pajaniyata, Pueyaso trompetaari tojishaanutaniya joneseshiyano, na muerasu na jiiquioonura. Canapueete macu quiyani, quiarinio cuaqueyata ritia samiitianutaniuhuari. Pajaniyajuhujaj, canapueete saminio quiyajaani, pa cuaqueyari ritia jatanishaanutaniyajuhujaj, quiarinio cuaqueya pa jitianurajuhujaj, shaajeyashijiaca pa quiniuria. <sup>53</sup> Cusunuuja cuaqueya cuaara jatanishaaria,

rishijia cuaqueya pa jitianura saniniuuja. Nio moqueja pa cuaqueyani, jataniniu panishiyari, maninia cuaqueya pa jitianura, pueyaracaanu pa quiniuria Pueyasota.

<sup>54</sup> Moqueja pa cuaqueya jaara maninia cuaqueyara jatanishaarohua; pa rishiyashijia cuaqueya jaara rishijia cuaqueyara jatanishaarohua; jiyacaritij pocua niishirini tariucacaanu sequesanoori tari tohuateeree. Naa naajiotasaquiaari tariucacaanu Pueyaso Rupaajiniatej:

“¡Jejeel! ¡Pa Jiyaniijiaari na muerasu mashiquirii macunucua quiquojiniji!  
<sup>55</sup> Cusojuananaa, ¡quiaaqui tari shocotasaaree! ¡Quiaari shocotasaaree! Sesacanaa, quia cusojuatajaari juhua mohuacara quiquii cumaacaaju. ¡Shaajeconoori samiitiacoree!”

<sup>56</sup> Pueyanaa, puetunu pajaniyajanaari cusonuuquiaa sesa miijiaa pa quiniucua mijiriani. Paari sesa quiquiaani pa tojiyaquishacari tariucacaanu Moisés Rootasano Pueyosojiniji. Naaratej, puetunu pueyajanaari cusonu niishiya. <sup>57</sup> Naajaa, pa Jiyaniijia Jesucristo miishnota pocuara, Pueyasoori pa mashiquiquiaa pa cusoyajiniucuaaji. Naaratej, paari Pueyaso sequequiaani: “¡Paacarasho canaa Pueyasonaa! Quiaacuaajaari canaa shocotaniniutianiya cusonu, quia Niyanu cusonucua canaacuara, pueyaracaanu canaa quiniuria quia shuriucua. ¡Jiyanhua paacarasho!” Paari naa maniniuhuaqueetaa pa Que Pueyasoni.

<sup>58</sup> Naaratej cua panishano pueyanaa, nia numaama nia racatare cua niishitiojosano niajaniya. Saa Pueyaso rupaaja nia tojitiare, maja tamaatia niishitiojosano. Pa Jiyaniijia nia poonijiore socua jiyanhua, na panishano nia miiniuria saaja. Pa Jiyaniijia nia poonijosanoori maja najuhuana na quiniu.

## 16

### *Casamijiuniucua Pueyaso pueyara cumaneeca reratesacari*

<sup>1</sup> Quiarijiani, nia riucaareera taa nia miiniutianiya, cumaneeca nia reratanura casamijiuniucua. Cuno cumaneecani, paari na jiyaronutaniya parta Pueyaso muerasura Jerusalén tiacajiniani. Naa cuuara maninia miiria, mariyata taa cua rootacanucuaaja Pueyaso pueya maapue Galicia jiyajiniani. <sup>2</sup> Naa nia miiritij. Puetunu domingo juucajanaa, puetunu pueyajanaa cuara racataara tama na niqutiosocoriquiano cumaneeca, teyano nia niqutionutaniya niarta Pueyaso muerasuracuaaji. Naa nia racatare juhutaja nia niqutiosocoriquiano cumaneeca puetunu seamaanajanaa, maja na reratesaanura shusha cua tiuquishacari niaacua. <sup>3</sup> Niocua maninia pueya saquiriojore, nia niqutiojosano cumaneeca nojori patanura Jerusalén tiacajinia. Naacuajitij, cua tiuquishacari niaacua, janiyari cua naajioneeca jiyarotanutaniya nojorini. Naajioreera parta Jesuucua tiunuaa pueyacuara Jerusalén tiacajinia, nojori cuara shuquiriaatia maseera cumaneecata nia jiyarotasano pueya. <sup>4</sup> Janiya jaara Jerusalén tiacajinia quianu panirini, cumaneeca jiyatanaari na naata cuata quianujuhuaj.

### *Pablo naquerejosacari*

<sup>5</sup> Cua quiasacari niaacua, janiyari Macedonia jiya tajiniu paniyani. Na nuhuaji, janiyari niaacua tuquiniutianiya. <sup>6-7</sup> Janiyari maja ritia cua tajiniu paniniu niajaniya. Niaata camueenujunu paniya pueyaracaanunijia, pa Jiyaniijia jaara naa panijahuaj. Janiyari shuniya shocotenu paniya niaatani. Na nuhuaji, nia naata cua naacunu cua jitianura cua panishano, cua pasocoriquiano tee Pueyaso jiyaronu paniya janiyacuaaji. <sup>8-9</sup> Janiyari niya Éfeso tiacajinia camueenujijajaarani, Pentecostés juuca cua sashishacari. Queraatia pueyari Jesucristo rupaa tojtianu paniya niya. Naajuhuaaj, queraatia pueyari Jesucristo rupaa ruuretaa saniniuuja. Naaratej, janiyari jiyanhua socua Jesucristo rupaa pohuatanu panijajaa Éfeso pueya niquiarani. Naajaa, janiyari niaacua quianutianiya Pentecostés juucara queranacunuunu nuhuaji.

<sup>10</sup> Timoteo jaara niaacua tiuquishii, niocua na cumaquiri Pueyaso rupaa na pohuatanura na puereyaquiniutia. Timoteocuaajaari pa Jiyaniijia poonijioquiaa mariyata taa cua poonijioquiaacuaani. <sup>11</sup> Naaratej, maja Timoteo nia rerequetenu. Niocua na naacere saniniuuja, cucua na tiuquiniuhuaa shuquiriaatia, maninia nia miiniucua nera. Janiyari niya na sashiya parta Pueyaso muerasutani. <sup>12</sup> Janiyari Apolota pocoojoriquiaani. Janiyacuajaari na nenecojoriquiaa juucuanu, niaacua na quianura parta Pueyaso muerasuta quiarijiani. Nojuajaari saaja cua sequeree majana na quianu paniniu quiarijiani. Tamacari niaacua quianutaniyaquiniaari, jaara na naata quiri.

### *Pablo sequesano, naajionu na puecasacari*

<sup>13</sup> Cuarta Jesuucua tiunuaanaa, niishiriojuuca nia quiri. Jesucristo rupaa nia niishiri maninia, seetanujanaa na tojtianaara nia quiniuria. Juhua cumueeca mashaja nia

quiri Pueyaso Sohanu cumaacata, pa Jiyaniijia panishano nia miiniuria. <sup>14</sup> Puetunu nia miishanojuanaa cuara quiiria seetanujuanaa nia paniniutia.

<sup>15</sup> Pueyanaa, niaari niishiya Estéfanasri necohuata coteenu Jesucristo tojitianaara quiquiaari cuniqui Acaya jiyajiniani. Nojoriiri Pueyaso muerasu naacuquiaa pueyara-caanu nojori paniniutia. <sup>16</sup> Naarate nia sequenu paniyanijia, nijaniya cuara qui-iria juhua nojori seya, nia cumaquiniuria nojori, maninia nojori miishacari. Naa nia cumaquiriti puetunu jiyano pueyajanaa, noo pojori canapuate naa maninia miiquiaa Pueyaso muerasucuajani.

<sup>17</sup> Jiyanhua shuquiririucuaanijia Estéfanas tiuquishacari nijaniyajiniji Fortunatota, Acaicotajuhua. Nojoriiri cua shuquiriritiucuaa nia niti, cua jiaatiasacari cua niqiniuria nijaniya juucua. <sup>18</sup> Nojoriiri coojia cajitiriucuaa puera cua niishiriojiaquiniucuaaji niaacua. Nojori naasucuaari nioojia cajitiquianujuhua, nojori pohuatasacari nijaniya janiyajiniji. Nijaniya cuara shuquiritiaara nojori, naa nojori miishacari maninatej.

<sup>19</sup> Pueyaso muerasu maapue niya Asia jiyajiniaari cua sequerucuaa, cua saruhuanura nijaniya. Aquila, Prisciliano, nojoriiri jiyanhua nia saruhuataajuhua, narta Jiyaniijia muerasu nia quiniucuaajuhua. Pueyaso pueya maanuuri nia saruhuataajuhua, nooj, teyanote Aquila tijinia rerejoquiaacuajani. <sup>20</sup> Puetunu parta Pueyaso muerasujanaari niya nia saruhuataajuhua. Nia saruhuatatoosacari, nia saruhuatatoore seetanujuanaa Pueyaso paniniutia.

<sup>21</sup> Quiarijiani, tama cua juaashiquiatajaaja saaja nioniyojua naajioreeraj, cua saruhuanura nijaniya. Naacujitij, niocua niishiri nio naajioneeri seetanujuanaa janiyajiniji.

<sup>22</sup> Cante maja pa Jiyaniijia panijia quiyani, Pueyaso cuara jataara cuno, saniitioso-coriqiano.

jjiyaniijianaa, quia nimiohua!

<sup>23</sup> Pa Jiyaniijia Jesu cuara cumaquiiria nijaniya na Sohanuta. <sup>24</sup> Janiyari puetunu nijaniyajanaa paniyani Jesucristo paniniutia. Tariucuaa, cua panishano pueyanaa.

## **TANEE PABLO NAAJIONEE CORINTO TIACAJINIA QUINIAA PUEYASO PUEYACUARA**

*Pablo saruhuatasacari Pueyaso pueya maanu Corinto tiacajinia*

<sup>1</sup> Janiyari Pablóni. Pueyaso panishacari, janiyari Jesucristo jiyaramiquishanora jiyatesaaquiaari na rupaa cua poojotanurani. Janiyari Timoteota naajiyá nio niaacuarani. Nojuajaari parta Pueyaso pueyano. Canaari Corinto tiacajinia quiniaa Pueyaso pueya maanuucuaa naajiyani, puetunu Acaya jiyajinia Pueyaso tojtijajaca pueyacuara janaanio. <sup>2</sup> Pa Que Pueyaso, mariyata pa Jiyaniijia Jesucristo cuaara cumaquiiria niajaniya. Nojori cuaara jiyateera niajaniya juhuajaniya quijijaca nia quiniuria.

*Pablo miishacari naquiya*

<sup>3</sup> Pa Jiyaniijia Jesucristo Que pa shuquiritiare. Nojuajaari pa Quejuhuaj, pocua taraajeja cutara. Nojuajaari pa Pueyaso, pueyaracaanu pa cumanijiana. <sup>4</sup> Nojuajaari pueyara caanu pa cumanijaquiaa naquiya pa miishacari. Naacuajiti pa naata cumanijianu tamanacajuhuaaj, naquiya nojori miishacari, taa Pueyaso cumanijaquiaa pajaniyacuaani. <sup>5</sup> Seetanujuanaa, Cristo rupējaca pa quishacari, paari naquiya miishaaquiaajuhuaaj, taa naquiya na miishaaquiaaricuaani. Naajaa, nojuajaari pa cumanijaquiaa shuquiriaatia pa quiniuria. <sup>6</sup> Naacuajitij, canaa jaara naquiya miishaaquiaa Cristojiniji canaa pohuatanuucuaani, Pueyasoori canaa cumaquiiquiaa saaja canaa rejeretanura. Naacuajitij, majaari canaa tarinitanu Pueyaso Rupaa pohuatanu nia niquiara, seetanujuanaa Pueyaso pueya nia quiniuria, nia cumanijiasaanurajuhuaaj. Naajuhuaaj, Pueyaso jaara canaa cumanijiarecuaa, naacuajitij, canaa naata nia cumanijianujuhuaaj. Canaari nia cumanijiaani, maninia rejeretajaca nia quiniuria naquiya nia miishacari, taa canaa rejeretaquiaacuaani naquiya canaa miishacari. <sup>7</sup> Canaari seetanujuanaa niaacua tiuyani, niaari cumanijiasaanutaniya, maninia rejeretajaca nia quiniuria. Niaari naquiya miiquiaa Pueyaso muerasu nia quiniucuaajuhuaaj, taa canaa miiquiaa naquiyacuaani. Naacuajitij, Pueyasoori nia cumanijianutanijajuhuaaj, taa na cumanijaquiaa canaacuaani.

<sup>8</sup> Canaa panishano Pueyaso pueyanaa, canaari paniyani nia niishiniuria taa canaa tacaacuaianuni, jiyano huaa naquiya canaa miishacari Asia jiyajinia. Canaari puera jiyano huaa taraatia miiquianuni. Jiyacari, majaari tari canaa jitianu quiriquiaa cumaaca canaa rejeretanura socua. Canaari jyaniriquiaani maja naasucua tari canaa rishiniu quiniutianiya. <sup>9</sup> Seetanujuanaa, canaari jyanijiani Pueyaso naasucuaari nareja canaa shanacunutaniya canaa cusonuunura. Naajaa, naacuajitij, Pueyasoori jiyacari canaa niishitiriquiaa maja canaa tiuuniuria tama canaacuaajaaja, saaja nocua canaa tiuuniuria cutara. Nojuacuajaari macunucua samiitianijiojua. <sup>10</sup> Nojuajaari canaacua taraajecanu. Cocuaatia canaa miishacari, canaa cojuacanuuri maja canaa cusonuunura. Nojuacuajaari socua canaa cojuanutaniya nocua canaa tiuuniucua, niaa jaara canaacuara secojorejuhuaj. <sup>11</sup> Naacuajitij, Pueyaso miishacari maninia canaa, queraatia pueya seconuucua canaacuarajuhuaaj, queraatia pueyari Pueyaso sequenutaniya, “paacarasho”.

*Pablo pohuatasano casaara na quiaaquiiaari Corinto pueyacuani*

<sup>12</sup> Canaari shuquiriaatia quiyani canaa niishishacari canaari maninia quijijaca quiquiaari canaa quishacari niaatani, Pueyaso niishiyashijaca niquiarianio. Majaari canaa sapojonu quijia niajaniya. Canaari seetanujuanaa niaacua taraajejani Pueyaso jiyatenuucua canaa nia panijijaca canaa quiniuria. Canaari naa maninia quiquiaari niaatani, saaja Pueyaso cumaquishacari canaa, maja tama canaa niishitijatajaaja. <sup>13</sup> Cunora, janiyari nia nequesotaani, ¿casaara nia cushitiiquianu canaa naajione nia serojosacarini? Puetunu canaa naajioneecajiniajanaa majaari canaa naajionu quiquiaa jiyajeneta casa, nia cushitiiniuria. Puetunujuanaacuajaari maatia niishishaatia quiquiaa nia serojosocoriquiano. <sup>14</sup> Niacuajaari tari secaja niishiya taa canaa paniya jiyano huaa niajaniyani. Pa Jiyaniijia Jesucristo tiuquishacarihua, niaari jiyacari seetanujuanaa canaa timitianutaniya, maatia nia niishishacari canaari seetanujuanaa nia panijijaca quiquiaarini. Naajuhuaaj, niajaniyari canaa timitiasano quiniutianijajuhuaaj.

<sup>15-16</sup> Cua jyanishacari niaa naasucuaari seetanujuanaa cua panijijaca, taa cua paniquiaa niajaniyacuaani, janiyari cunora naquerejocanu niaacua juucuaani. Niiquiji cua quiasacari Macedonia jiyajiniara, janiyari nia niquiniu paniriquiaa juucua nia tiacajiniani. Janiyari Pueyaso rupaata nia cumaquiniu paniriquiaa juucua cunoco cua tajishacari. Naacuajitij, janiyari niishiriojoriquiaani cua naata naasucua nia shuquiritiniu Pueyaso rupaata, cua quiasacari Macedonia jiyajiniara, naajuhuaaj, cua



tacatesacariuhua cunocojiuhua. Janiyari niishiriojoriquiaani nia naata naasucua cua naacunu cua panishanotajuhua, Judea jiyajinia cua quianuhua. <sup>17</sup> ¿Niaateeri jiyaniquianu janiyari nareya nia sequecanuni, naa cua sequesacari coteenujuanaa cua naajiojiniatej? ¿Niaateeri jiyaniya, naa cua naquerejosacaritij, janiyari tama cua panishanojuaja miiniu paniquianuni, maja Pueyaso panishano? Seetanujuanaa, majaari coojia cua niqijiotenu quiquianu naa cua sequesacari niajanivatej. <sup>18</sup> ¿Janiyateeri coojia niqijiotejani? Maja. Canaa pohuatasacari Pueyaso rupaa nia niquiara, ¿canaateeri na jataniquiaani? Pueyasocuaajari niishiya, na rupaa canaa pohuatasacari, majaari canaa jataniniu quiquiaa. Pueyaso rupaacuajaari seetanujuanaa. <sup>19</sup> Naajuhua, Neyanu Jesucristoori jataashijia. Silvano, Timoteo, janiyajuhua, canaari nojuajiniji nia niquiara pohuataanaani. Paari nojuajiniji niishiyani puetunu Pueyaso sequesanojuanaari seetanu rupaajanaa cutara. <sup>20</sup> Jesucristocuaajari tari tohuateequiari puetunu tariucuaaanu Pueyaso sequesanojuanaa pajaniyara. Naacuajitij, pa tiuushacari Jesucristocua, paari niishiyani, Pueyaso sequesanoori seetanujuanaa. Naaratej, pa shuquiristasacari Pueyaso, paari na sequequiaani: “Seetanujuanaari canaa quia sequesano, Pueyasonaa”. <sup>21</sup> Jesucristo rupuejaca pa quishacari, Pueyasocuaajari pa cumaquiquiaa, socua maninia na tojjiaa canaa quiniuria, niajanijuhua. Pueyasoori pa niqitioquiaari na Sohanu, seetanujuanaa na muerasu pa quiniuria. <sup>22</sup> Pueyaso Sohanu pa jittiasacari poojajinia, naacuajitij, paari tari Pueyaso sesa jittiaa juhua naajiotasano poojajiniani, saa neraja pa quiniuria. Na Sohanu pa jittiasacari poojajinia, paari niishiyani, paari puetunu na sequesanojuanaa maseriquianoni.

<sup>23</sup> Niaari cua jiyaniquianu janiyari najuhua coojia niqijiotejani, niaacua cua quiaaquiinuucua taa cua sequecanu coteenu niajaniyacuajani. Pueyasocuaajari niishiya, majaari cua quianu quiquianu niaacua Corinto tiacajinia, maja cua tacaatiniuria niajanija, janiya jaara nia nacasuse jiyanoahuani. <sup>24</sup> Canaari maja nia jiyaniijiani canaa shiniujiniuria puera niacunia, Jesuucua nia tiuuniuria. Niaacuajari tari maninia Jesuucua tiuujiaa. Canaari saaja niarta Pueyaso pueyani, canaa cumaquiniuria niajanija, socua pa Jiyaniijia tojjiaa nia quiniuria, seetanujuanaa shuquiriaatia quiijia nia quiniuria.

## 2

<sup>1</sup> Janiyari tama sequecanujuanijia, maja juhua niaacua cua quianu quiniutianiya, maja cua taraajetenura niajanija. <sup>2</sup> Janiya jaara nia taraajetere cua nacasusacari niajaniani, ¿cantucua cua timitiri quenaajani? ¿Cua taraajetesano pueyateeri cua shuquiritiniutianiya? Maja. <sup>3</sup> Naaratej, janiyari niaacuara naajiocanuni, cua nacasunura juhuacarijia niajanija, cua taraajeyaquiniuria niaacua cua tiuquishacari. Janiya jaara sashiri cua nacasunura niajanija cua tiuquishacari niaacuani, janiya maara jyanohua nia taraajetereni, jecatoojua nia quishacari. Saniniuujiya, niaa jaara juhuacarijia jecare puetunu sesa nia miishanojuanaa, naacuajitij, cua tiuquishacari niaacua, niaari cua cojiniutianiya maninia, shuquiriaatia pa quiniuria jatiqui. <sup>4</sup> Janiya jaara niaacuara naajiocanu coteenu cua naajioneeni, janiyari jiyacari jyanohua tacaariquiaa niaacuani. Coojiaari jyanohua taraajeriquiaa. Janiyari jiyacari nujuqueriquiaaajaniuhua. Majaari cua naajionu quiquianu cuno naajionei cua taraajonura niajanija. Cunoori seetanujuanaa quiquianu cutara cua niishitiniuria niajanija, taa cua panija jyanohua niajanijani.

*Cuno sesa miijia cuaara jiyanooshaaria jaara tari pishiri sesa na miiniujiniji*

<sup>5</sup> Cuno sesa miijiaari maja na taraajetenu quiquianu saa janiyaja. Quera puetunu niajanijajanaa naasucuaari taraajecanu cuno pueyano miiniuucua sesa. Seetanujuanaa, majaari puetunu niajanijajanaa taraajenu quiquianu. Janiya jaara sequereni: “Puetunu niajanijajanaa taraajecanu”, janiya maara puera na maateyani. <sup>6</sup> Puetunu niajanijajanaa jyatenuucua nojuaja saniitosano na quiniuria, nojuajaari tari noojia tacatorohua sesa na miiniujiniji. Tariucuaa. Majaari socua na saniitionu. <sup>7</sup> Quiarijiani nojuaja nia jyanooriohua. Nia cumanijiarohua, nojuaja mariqui puera tacaariiri jyanohua na taraajesacari. <sup>8</sup> Nocuaari janiyari jyanohua nia rootaani, maninia nia miiriohua cuno pueyano, na niishiniuria niaaqui na panijajaa. <sup>9</sup> Janiyacuajaari cunora niaacuara naajiocanu tarini, taa nia miiniutianiya cuno pueyanoni, cua niishiniuria niaate seetanujuanaa pa Jiyaniijajiniji cua rootasano tojjiaa. <sup>10</sup> Cua tojjiare, cana nia jyanooriicuaani, janiyari na jyanoyajuhua. Naacuajitij, pueyano jaara sesa miiriquia, janiyari Cristo niquiara na jyanooquiaajuhua, jatiqui nia quiniuhua. <sup>11</sup> Naaratej, niarta Pueyaso pueya nia jyanooriquia, Sesaaca mariqui pocua riutiocoreeri, juaajia na jyatenuura pajaniya, pa jyanootioyaquiniuucua. Paacuajaari maninia niishiyani taa Sesaaca niishiriojiquiaa sesa miijiacara na jyatenuura pajaniyani, paa jaara jyanoyashijia quiquiani.

*Pablo tacaashacari Troas tiacajinia na quishacari*

<sup>12</sup> Jani yaara Troas tiacajinia tiuquiquiuanu Jesujini cuu pohuatanurani, cuno pueyari jiyanhua tojtianu paniriquiaa Jesujiniji cuu pohuatanura juucua. Jiyacaritij, seetanujuanaa nojori niquiara pohuatasaaia quiriquiaari. Pa Jiyaniijia Jesuuri juhua tootiu riatacanu cucuaji juucua, cuu pohuatanura nojuajiniji tii. <sup>13</sup> Janiyari saaja nojori tiujia-canuhuanu puera cuu tacaashacari, cuu riuritaaguiniuucua pa tarajanu Tito. Janiyari juucua paniriquiaani cuu pohuatasaanura niajanijajiniji. Janiyari cunora tacaariquiaa jiyanhuanu. Naaratej, janiyari Macedonia jiyajinia quiaarohuani, Tito cuu pajenuhuara tii.

*Pa Jiyaniijia Cristoori pa paraa pa shocotanijia*

<sup>14</sup> Janiyari jiyanhua shuquiritiaa Pueyasoni. Nojuajaari pueyaracaanu pa shocotaniquiaa pa paraca segue, pueyaracaanu pa sacuanuucua pa Jiyaniijia Cristoocua. Pueyasoori na rupaa pohuataniquiaa canaa. Naacuajitij, canaa niishishano Jesucristojinijiiri juhua shanhua jaanutaja jaanujuquiaa pueya tajinia puetunu tiqiyocujanaa. <sup>15</sup> Pueyasora, canaari juhua shanhua jaanutajani, Cristo quishacari canaa jiuujajinia. Nojuajiniji canaa pohuatanuusacari, canaari puetunu pueyarajanaa jaanuuquiaani: Pueyaso muerasurano, saniitosaariquiano pueyaranio. <sup>16</sup> Saniitosaariquiano pueyara, Jesucristo rupaari mocuaatia jaanujua saniniuuja. Naa nojori soonuucua Jesucristo rupaatej, nojoriiri shaajasaariquiano cutara. Pueyaso jiyanooshocoriquiano pueyara saniniuuja, Jesucristo rupaari shanhua jaanuuquiaa. Naa nojori paniniuucua Jesucristo rupaatej, nojori cutaraari pueyaracaanu quijacara jiyatesaanutaniya. ¿Canapueeteri seetanujuanaa Pueyaso jiyaramiquishanoni, na rupaa nojori pohuatanura, pueya na tiuutiniuria Jesucristoocuanu? <sup>17</sup> ¿Noo pojoritii, najuhuaa Pueyaso rupaa pohuatanuuquiaa, pueyajiniji na masejonura cumaneeca na sapojonuunutatej? Maja. Majaari canaa pohuatanu quiquiaa Pueyaso rupaani, pueyajiniji canaa masejonura cumaneeca. Canaa cutaraari seetanujuanaa Pueyaso jiyaramiquishano pueyani, na rupaa canaa pohuatanura. Canaari seetanujuanaa pa Jiyaniijia rupaa pohuataquiaa Pueyaso niquiarani, Cristo rupesano canaa quishacari.

### 3

*Quiarinio rupaa Jesucristojiniji*

<sup>1</sup> Naa canaa naajiosacari niaacuaratej, niaa naasucuaari jiyaniya canaari tama canaa cuaqueyajinijiaaja nia pohuatohuanihuaj, canaacua nia tiuuniuria. ¿Niaateeri pa niishishano pueyanojiniji naajionee paniya, canaajiniji na pohuatanura coteenu niajaninya, canaacua nia tiuuniuria cutara? Tamasaca cutaraari naa miiquiaa. Niacuajaaari canaa niishijiaa cutara. Puetunu tiqiyocujanaa quijiaa pueyari canaajiniji niishiyacuaja, canaari seetanujuanaa Pueyaso jiyaramiquishano pueyani, na rupaa canaa pohuatanura. Naacuajitij, majaari quenaaja canaa paniniu, canaa nia niqutionura nia naajionee, canaa patasocoriquiano, tamasa tiuuniuria canaacua. <sup>2</sup> ¿Naajioneetucua casaara panishaareni? Puetunu pueyajaari na naata niishiniucuaa canaari seetanujuanaa Pueyaso jiyaramiquishano pueyani, nojori niishishacari taa canaa paniya jiyanhua niajaniani. <sup>3</sup> Cristocuajaaari nioojajinia naajiotaquiaari na rupaa, nojuajiniji canaa pohuatanuucua nia niquiara. Majaari na rupaa na naajiotanu quiquiaari nioojajinia minianata. Seetanujuanaa na Sohanuta na naajiotaquiaariiri. Majaari na naajiotanu quiquiaari saajaneecua. Seetanujuanaa nioojajinijanaa naajiotaquiaari na rupaari. Naa jatanishano pueya nia quishacaritij, puetunu pueyajaari niishiya niaari seetanujuanaa Pueyaso pueya, nojuajiniji canaa pohuatanuucua niajaninya.

<sup>4</sup> Naacuajitij, canaari seetanujuanaa niishiyani canaari Pueyaso jiyaramiquishanoni. Cristocuajaaari naa canaa niishitiquiaa maninia. <sup>5</sup> Majaari canaa niishirojonu canaa miijiosanoori tama canaa cumaacata canaa miishanojuaja. Maja. Canaari saaja Pueyaso cumaacata poonijioquiaani. <sup>6</sup> Na cumaacata, nojuajaari canaa jataniquiaari quiarinio na rupaa pohuataanaa canaa quiniuria. Quiarinio na rupaaari seetanujuanaa Pueyaso Sohanu cumaacaraca cutara, pueya na jataniniuria seetanujuanaa Pueyaso niquihua nojori quiniuria. Tariucuaaanu, Pueyaso rupaari naajiotasano quiquiaari pueya tojishocoriquiano juucua. Cuno rootasanojiniji, pueyari niishiquiaari nojoriiri shaajeriquiano na numaa shama nojori tojiniuucua saaja. <sup>7</sup> Naajaa, cuno rootasano saajaneecaacia quejasanoni, cunoori jiyanhua maninia quiquiaari. Naacuajitij, Moisés jaara cuno rootasano niishitiojosaariquiaa Sinaí tuhuananuucua, Pueyaso shacantuucaari nocua pacuriquiaa. Naacuajitij, na rosesacariuhua Israel pueyacu, na jiquicoori puera shacantuuca quiquiaarija. Naaratej, narta Israel pueyari maja na naata na jiquicoo niqiniu quiquiaari. Na nuhuaji, cuno shacantuucaari jacaria maquesaquiaariuhua.

<sup>8</sup> Quiarijiani, Pueyaso Sohanuuri poonijioquiaa pueya jiuujiajinia saniniuuja, nojori tiuuniuucua canaa pohuatasanoocua. Cunoori socua shanohua shacantuuca cutara Moisés jiquiocojiniji. <sup>9</sup> Moisés pohuatasano Pueyaso rootasano nojuajani, cunoori seetanujuanaa jiyanohua maninia quiquiaari. Naaratej, Moisés jiquioocori shacantuuca quiquiaari. Naajaa, na pohuatasanojiniji, Israel pueyari saaja niishiquiaari, Pueyasora, nojoriiri sesa miijiaa quiquiaari. Saniniuuja, quiarijaari socua jiyanohua maninia. Canaa pohuatanuucua quiarinio Pueyaso rupaa Jesucristojiniji, pueyari nocua tiuquuaa seetanujuanaa sesa miyashijacara nojori jiyatesaanura Pueyasora. <sup>10</sup> Pueyaso jiyatenuucua Moisés tariucuacaanu na rupaa pohuatana na quiniuria, Moisésri shacantuucara jataquiaari. Quari naataja saniniuuja, Pueyasoori canaa niishitiqiaari socua jiyanohua maninia rupaa canaa pohuatanura Moisés pohuatasanojiniji. <sup>11</sup> Moisés shacantuuca maquesaquiariuhuani, cunoori maja na jataniniu quiquiaari Israel pueya. Quiarijia saniniuuja, Pueyaso Sohanu cutaraari pa jataniquiaa seetanujuanaa pueyaracaanu shacantuuca quijiaa pa quiniuria.

<sup>12</sup> Quiarijiani, canaari niishiyani paari pueyaracaanu shacantuuca quijiacarano cutarani. Canaari cunora canaa timiniutia pohuataquiaa Pueyaso rupaa canaa puereyaquiniutiani. <sup>13</sup> Majaari canaa miiniu taa Moisés miiquiaaricuaani. Nojuajaari quenaaruque toqueta na jiquico mishiquioquiaari narta Israel pueya niquiyaquiniuria na shacantuuca maquesaano. <sup>14</sup> Israel pueya jiuujiaaari juhua toqueta mishiquiosano quiquiaarijuhuaj. Cumajiuujiaa nojori quiniuucua, majaari Israel pueya niishiniu quijia Moisés caminiujushano nojoriria. Cuarta Israel pueyari naa quiyajaa. Majaari nojori niishiniu quiquiaa nojori serojosacari tariucuacaanu Pueyaso sequesano nojoriria. Cuno, juhua toque nojori jiuujia mishiquioyajaani, cunoori juhuanujuaja tii quiyajaa. Saaja Jesucristo cutaraari na naata pueya jiuujia riatanu, pueya niishiniuria maninia na rupaa cutara. <sup>15</sup> Quiarijaari naajuhujaj. Moisés naajioneeca jaara serojosaariquia Israel pueya niquiara, nojori niishitiajari juhua toqueta mishiquiosano quiyajaa, maja nojori niishiniuria nojori tojishano. <sup>16</sup> Quiarijiani, pueyano jaara pa Jiyaniijiaa tiuuri, cuno toqueeri juhua na niishitiajajini jaariutiasaquiaa, maninia na niishiniuria Pueyaso Rupaa. <sup>17</sup> Pa Jiyaniijaari Pueyaso Sohanujuhanajaj. Pa Jiyaniijia Sohanu jaara poojiajinia quiya, paari Sesaacijiniji jaariutiasanoni, maja pa camarnu na quiniuria socua. Naajuhujaj, majaari tari poojia quiniu juhua toqueta mishiquiosano. <sup>18</sup> Naacuajitij, puetunu pajaniyajanaari juhua niquitiu nenecuaquiaani, pa Jiyaniijia shacantuuca pacusacari pocua. Cunoori pa sohanu rupuetoosacari nata. Naacuajitij, nojuajaari pueyaracaanu pa jataniquiaa jacaria, socua shacantuuca quijiaa pa quiniuria juhua nojuaja, na Sohanu poonijosacari poojiajinia.

#### 4

<sup>1</sup> Naa pa Jiyaniijia poonijosacari canaa jiuujiajinatej, majaari canaa pishiniu quiquiaa canaa poonijosacari nera. Pueyaso jiyanooniuucua canaa, nojuajaari canaa jiyatequiaari na rupaa pohuatanaa canaa quiniuria. <sup>2</sup> Majaari canaa miiniu quiquiaa cararaatia casaa, taa tamasaca miiquiaacuaa jiyasohuani. Majaari canaa pohuatanu quiquiaa Pueyaso rupaa canaa cuaracashiniutia. Naajuhujaj, canaa pohuatasacari, majaari canaa jataniniu quiquiaa Pueyaso rupaa. Canaari seetanujuanaa maatia pohuataquiaa Pueyaso Rupaani, puetunu pueyjanaa niishiniuria nojoriiri na naata canaacua tiuuniu. <sup>3</sup> Teyano pueyate canaa pohuatasano Jesucristojiniji niishiyaquiyani, cuno pojoriiri shaajasaariquiano. Nojoriiri niishiyaquiya, juhua toqueta mishiquiosano nojori jiuujia quishacari. <sup>4</sup> Pueyaso rupaacua tiuyashijaca nojori quishacari, nojori jiyaniijia Sesaacaari nojori jiuujia jiyatequiaa juhua cariyouarura, Pueyaso Rupaa mariqui nojori jiuujia cuhuatareeri. Nojori jaara Pueyaso rupaacua tiuuriquia, nojori maara niishiri, Cristoori seetanujuanaa shacantuuca quijia cutara, juhua na Que Pueyasojuhujaj. <sup>5</sup> Canaa pohuatasacari Pueyaso rupaa nijaniya, majaari tama canaajiniijiaaja canaa pohuatanu quiquiaa nia timintianura canaa. Canaari saaja nia pohuataquiaa cutarani, Jesucristoori seetanujuanaa Jiyaniijiajanaa cutara. Canaari tama canaa cuaqueyajaaja jiyatequiaa juhua nia seya canaa quiniuriani, canaa panishacari pa Jiyaniijia Jesu. <sup>6</sup> Canaari naa maninia miijiacani, Pueyaso cuhuatanuucua canaa jiuujia. Jiya shipinishacari, nojuajaari sequequiaari: “Cuhuashiqui cuara coretaara ninishiquiji”.

Quiarijaari naajuhujaj, nojuajaari poojia cuhuataquiaajuhujaj, pa niishiniuria nojuajaari tojetaarucujanaa maninia quijia. Paari cuno niishiyani, Jesucristojiniji pa niishishacari. Nojuajaari seetanujuanaa shacantuuca quijia cutara, Pueyaso Niyanu na quiniuucua.

*Paari maninia quijiaa quiniutianiyani saaja Pueyaso rupaacua pa tiuushacari*

<sup>7</sup> Cuno cumaaca canaa na jiitiaani, cunoori Pueyaso cumaaca cutara. Saniniuuja, canaa cuaqueyari cumaacaaju, saaja juhua maraujiniji panishano pataco. Naacujiti niishishiyari, cuno cumaaca pueya jatanijiani, cunoori seetanujuanaa Pueyaso cumaaca, maja tama canaa cumaacajaaja. <sup>8</sup> Naacujitij, canaa paraa cosejosacari canaa, majaari canaa tarinitianu quiquiaa Pueyaso rupaa pohuatanu, cuno cumaaca canaa jiitiasacari. Jiyanoohua canaa tacaashacari, naajaa, majaari canaa tarinitianu quiquiaa Pueyasora poonijionu. <sup>9</sup> Canaari naquiya miishaaquiaaaniuhua. Naajaa, majaari Pueyaso cartenu quiquiaa canaa. Naajuhua, canaari juhua quiaquesano jiyocuara jaqueroosaquiaajaa-niuhua. Naajaa, majaari canaa cusojuasaanu quiquiaani. <sup>10</sup> Puetunu tiqiyocuajanaa canaa quishacari, canaari pueyaracaanu tama canaa cuaqueyajaaja panitiaquiaani, taa pa Jiyanijia Jesu panitiaquiaa tama na cuaqueyajaaja pocuaracuaani. Naacujitij, canaa na niqutiosano cumaaca poonijosacari canaa rishiyashijia cuaqueyajinia, pueyari niishiquiaa, Jesuuri seetanujuanaa saminio. <sup>11</sup> Mijiria canaa quishacarijia, pueyari pueyaracaanu canaa pueconu paniquiaani, Jesujini canaa pohuatanuucua. Naacujitij, saminio na jiitiasacari canaa, Jesu cumaacaari niquishaaquiaa rishiyashijia canaa cuaqueyajinia. <sup>12</sup> Canaari juhua piriuguiniuuquiaani, canaa pohuatanuucua Pueyaso rupaa nia niqiara. Naaari pueyaracaanu rishijacara quiriquiano saniniuuja, canaa pohuatanuocua nia tiunuuucua.

<sup>13</sup> Tariucuacaanu Pueyaso Rupaajinia, supuetana David naajiotasanoori naa sequeya: "Pueyasooocua cua tiunuuucua, janiyari pocuareeni". Canaari naajuhua. Pueyasooocua canaa tiunuuucua, canaari na rupaa pohuataquiaani. <sup>14</sup> Canaa jaara puecoosaariquia na rupaa canaa pohuatanuucua, naajaa. Canacuajaari niishiyani, pa Jiyanijia Jesu Samiitaniniacuajaari canaa samiitanijionutaniuhuaajuhua, Neyanu Jesu rupuesano canaa quiniuuucua. Pueyasoori canaa rijionutaniya puetunu niajanijatajanaa, pueyaracaanu na shuriucua pa quiniuria. <sup>15</sup> Naacujitij, canaa jaara rejeretaquiaa naquiya canaa miishaanu Pueyaso rupaa canaa pohuatanuucua, puetunu cunojuanaari niaacuara, maninia nia quiniuria Pueyasora. Naa Pueyaso jiyanooniucua niajanijacuaatej, socua queraatia pueyari na timiniutia na sequenutaniya, "paacarasho". Pueyasoori jiyanoohua shuquiritiasaanutaniya, queraatia pueya na jiyanooniucua.

<sup>16</sup> Naaratej, majaari canaa pishiniu na rupaa canaa pohuatanura. Canaa cuaqueyari saaquianoshiya. Naajaa, canaa jiuujiaari saniniuuja puetunu juucujanaa socua mashajashiyacujua. <sup>17</sup> Janiyara, puetunu naquiya canaa miishacarijianaa mijiria, cunoori secaja, rupaquijiajuhua. Cuno naquiya miiniu canaa rejeretanuucua, ¡Pueyasoori cunora jiyanoohua maninia miiniutianiya canaa! Cunora, canaari shacantuaa quijijacara jatanishaanutaniyani, pueyaracaanu rishijia canaa quiniuria. <sup>18</sup> Naaratej, majaari canaa jiaatianu quiquiaa canaa jiitianura mijiria canaa niquishano casa. Canaa cutaraari Pueyaso jiitiasano niquishoo casaacua jiaatiaquiaani. Mijiria niquishano casaari saaja shaajeja casa. Pueyaso jiitiasano pa niquishoo casa saniniunijia, cuno cutaraari shaajeyashijia.

## 5

<sup>1</sup> Mijiria pa quishacarijia, nio pa cuaqueyari saaja juhua suhuorotu quiya pa sohuanura, nareja juhua ruconaa pa quishacari mijiria. Mijiria pa jiitiasano pa shoque jaara cusoque, paacuajaari niishiyani, paari tari jiitiaa tamonu cuaqueya jiyocuacaanuni. Cuno cuaqueyari juhua shanohua tia, Pueyaso shipinishano pajaniyara. Cuno cuaqueyari pueyaracaanu rishiniutianiya pa sohuanu quiquora. Cunoori maja pueyano shipinishano. <sup>2</sup> Mijiria canaa quishacarijia nio canaa sohuanu suhuorotujiniani, canaari taraatia miishaaquiaani. Cunora, canaari juhua quiatojoquiaani, canaa jiaatiasacari canaa sohuanu pacusaanura jiyocuacaanu. Tii quiyacuajaari canaa sohuanuucuaaji tiasano quiquora. <sup>3</sup> Canaari cuno quiarinio cuaqueya cushiyonutaniya juhua toqeni, maja juhuasu canaa sohuanu quiniuria. <sup>4</sup> Nio cuaqueyajinia canaa quishacari mijiria juhua suhuorotujinia, canaari quiatojoquiaani taraatia canaa miishacari mijiria. Maja cutaraari canaa quini paniniu cuaqueyaju, juhua juhuasunucua. Canaa cutaraari canaa quiarinio cuaqueya cushiniu paniyani, Pueyaso shipinishano canaarani. Naacujitij, nio shaajeja canaa cuaqueyari puetunu maninia jatanishaanutaniyajanaa Pueyaso cumacata, pueyaracaanu rishijia cuaqueyaraca canaa quiniuria. <sup>5</sup> Pueyasojanaacuajaari na muerasura pa saquirojoquiaari, naa na jataniniuria pajaniyatej. Naaratej, nojuajaari na muerasu niqutioquiaa na Sohuanu, pa niishiniuria nojuajaari seetanujuanaa naa pa miiniutianiya.

<sup>6</sup> Naa canaa niishishacarijij, majaari canaa tacaaniu quiquiaa. Canacuajaari niishiyani nio cuaqueyajinia canaa quishacarijia, majaari juhuanuujaja pa quiniu pa Jiyanijia shuriucua. Naacujitij, paari tucuaaanu quiyajaani pueyaracaanu pa quijiarano

quiquiojiniji. <sup>7</sup> Cunora, mijiria canaa quishacarijia, majaari canaa quiniu tama canaa niishitiajatajaaja. Canaa cutaraari canaa jiyaniijiaacua canaa tiuuniutia quiquiaani. <sup>8</sup> Naacujitij, canaari shuquiriaatia quiya mijiriani, nocua canaa tiuushacari. Naajaa, canaari nio canaa cuaqueya tarinitianuucua jiaatiaani, canaa pacunura pa Jiyaniijia shuriucua, tii canaa quiniuria nata. <sup>9</sup> Naacujitij, canaa jaara nio cuaqueyajinia quiyajaa mijiriani, naajuhuaaj canaa jaara na cartequeni, canaari saaja pa Jiyaniijia shuquiritiniuucua jiaatiaani. <sup>10</sup> Puetunu pajaniyajanaacuajaari Jesucristo taccoji na nequesoreesaqui nujuatejosaariquianoni. Cuniqui, puetunu mijiria pueya miishanojuanaari maatia niishishaanutaniya, maninia pa miishano, sesa pa miishanonio. Na nuhuaji, pa Jiyaniijiaari maninia miiniutianiya maninia miijiaa. Saniniuujia, sesa miijiaaari taraatia miishaanutaniyacujua.

*Pueyasoori pueya jiyanooniu panijia cutara*

<sup>11</sup> Naaratej, canaa niishishacari jiyanoohua puereeta quiniutianiari pa Jiyaniijia sanitiosacari na tojtiaashijiaa, canaari cunora saniniuujiaacua pueya tojtiniuria Pueyaso Rupaani. Pueyasocuaajaari niishiya canaari seetanujuanaa nera poonijionaani. ¡Seetanujuanaa naa nia niishitiriqiaaanihuaj! <sup>12</sup> Majaari nia jiyaniiniu canaari tama canaajiniijiaaja nia pohuatanu coterohuanihuua, canaacua nia tiuuniuria. Canaari saaja naa nia pohuataani nia niishiniuria casaarate nia naata timitianu canaani. Canaa nia timitiare cutara, seetanujuanaa Pueyasora poonijionaa canaa quiniuucua. Naacujiti nia naata cuno pueya tacunu canaacuaji, cuno pojori canapue te sapuenu juhua maninia quijiaa niquishano pueya najuhuanacuajani. Majaari nojori niishiniu tacaaniu taameca jiuujiaracateja nojorini. <sup>13</sup> Noojiaqueya niajanijiniimio naasucuaari jiyaniya canaari juhua paateca pocuaquiaani. Naajaa, canaa jaara seetanujuanaa paateca quirini, canaari paateca quiya Pueyasorani. Saniniuujia, canaa jaara maninia niishiriojuaca quiriquiani, canaari naa quiya niaarani, maninia canaa niishitiojonura niajanija. <sup>14</sup> Cristo paniniuucua canaa, cuno na paniniuuri canaa shiniujuquiaa nera canaa poonijionura. Naaratej, canaari pueyaracaanu nojuajiniji pohuataquiaani. Canaacuaajaari niishiyani, nojuajaari puetunu pueyacuarajanaa cusoquiaari. Naa na cusonuuca puetunu pueya nitijianaatej, Pueyasora, puetunu pueyajanaari tari cusonuuquiaari Cristota. Naacujitij, Pueyasoori na naata jiyanooniu puetunu Neyanuucua tiuuniaajanaa. <sup>15</sup> Cristocuaajaari puetunu pueyacuarajanaa cusoquiaari, na samiitianishano pueya quiniuria saa neraja. Pocuara cusoquiaariiri. Nojuajaari pocuara samiitiaquiaarihuajuhuaaj. Naaratej, paa cuaraa miiria saa na panishanojua. Majaari socua pa miiniu tama pa panishanojuaaja. <sup>16</sup> Tarijia, canaari saaja canaa panishano pueyacia taraajejani. Quiarijia saniniuujia, Pueyaso jatanishano pueya canaa quishacari, majaari rimiajata canaa paniniu pueya. Tarijia, canaari Cristo jyanijiani nojuaja naasucuaari nareja pueyano, juhua pajaniyajuhaaj. Quiarijia cutara, majaari naa canaa niishiriojonu nojuajiniji. <sup>17</sup> Naajuhuaaj, cante Cristo rupuesanoni, nojuajaari quiariniora jatanishano pueyano. Tariucuaaanu sesa na quiniuuri tari jatasanocuaaja. Saniniuujia, puetunujuanaari quiarinio quiya.

<sup>18</sup> Puetunu cunojuanaari Pueyaso miishano. Nojuajaari Neyanu Cristo cusojuaciaari pocuara, na jiyanooshano pueya pa quiniuria. Na nuhuaji, nojuajaari canaa jiyaramiquiaari puetunu pueyajanaa canaa pohuatanura, nojori jiyanooshaanurajuhuaaj. <sup>19</sup> Naacujitij, Pueyasoori mijiria quiniaa jiyanoocuaa saaja Neyanu Cristocua nojori tiuushacari. Naa na jiyanooshacari pueyatej, majaari quenaaja sesa nojori miishano na saneenu quiniutianihuua socua. Nojuajaari canaa jiyatequiaari na rupaa pohuataanaa canaa quiniuria, pueya canaa tiuutiniuria Neyanu Jesucristocua, jiyanooshano nojori quiniurijuhuaaj. <sup>20</sup> Naacujitij, canaari Jesucristo jiyaramiquishanononi, canaa caminiujuniuria niaara na sequesano canaa. Naa canaa caminiujushacari Jesucristo rupaatej, Pueyasojuaanaari nia masuya na muerasu nia quiniuria, Neyanuucua nia tiuushacari. Naacujitij, canaari Cristo niti nia secojijyani, ¡tama nia cuaqueyajaaja nia jiyanootiri Pueyaso! <sup>21</sup> Pa Jiyaniijiarano Jesucristoni, nojuajaari tojetaarucuaajanaa sesa miyashijajuhuanajaj. Naajaa, na Que Pueyasoori nocua tiutiaquiaari puetunu sesa pa miishanojuanaa, pa niti na saniitiosocoriquiano. Naacujitij, Neyanuucua pa tiuushacari, Pueyasoori pa jiyatequiaa juhua sesa miyashijia pa quiniuria.

## 6

<sup>1</sup> Naa Pueyasora poonijionaa canaa quiniuucuatej, canaari jiyanoohua nia secojijyani cuarta Pueyaso muerasunaa, saa Pueyasoraja nia quiri, nia jiyanoojia na quiniuucua. Maninia na muerasu nia quiri. <sup>2</sup> Tariucuaaanu na sequesanojuaajaari naa naajiotasano quiya na rupaajinia:

“Quiaari namitia cua secojocanu, pueya cua naacunu panishacari. Pueya cua jiyanooshacarihua, janiyari quia naacucanujuhua”. Cua panishano pueyanaa, quiarijiaari Pueyaso jiyanooshacari pueya. Nojuajaari quiarijia pueya jiyatequiaa na muerasu nojori quiniuria.

<sup>3</sup> Cunora, canaari tama canaa cuaqueyajaaja cojaquiaani, maja canaa miiniuria sesa tamasaca niquiara. Canaari naa maninia miiquiaani, nojori mariqui Jesucristoocua tiuyaquiriiri, nojori mariqui Pueyasora canaa poonijiosano sesacarejaariuhua. <sup>4</sup> Canaa cutaraari saaja maninia miiquiaa pueya niquiarani, puetunu pueya niishiniurijanaa canaari seetanujuanaa Pueyasora poonijionaani. Naaratej, canaari juhuajaniya rejere-taquiaa naquiya canaa miiniuni, canaa panishano canaa jiiitaquishacarijuhuaj. Naajuhua, canaari rejere-taquiaani puera canaa tacaashacari, canaa niishyaquishacari taa canaa miiniutianiya socuani. <sup>5</sup> Naajuhua, canaari juhuajaniya rejere-taquiaa canaa jaara majacujusaquiaani, canaa jaara nujuatejojuajinia nujuatejosaquiaaaniuhua. Nasojosano pueya jaara miitianu paniquiaa canaani, canaari na rejere-taquiaajuhua, pueya tiuiniuria canaa pohuatasanooocua. Naa Pueyaso jiyaramiquishano pueya canaa quishacaritij, canaari jiyanoohua poonijioquiaa nerani. Canaari sequeyarucua sutequiaani. Canaari miaajequiaajuhua. <sup>6</sup> Naajuhua, pueyari na naata niishiniu canaari seetanujuanaa Pueyaso seyani, sesa miyashijiaa canaa quiniucua, maninia canaa niishiniucua Pueyaso rupaajuhua. Niishishaatiacuaajari, canaari Pueyaso seyani, jacaria pocuajaca canaa quishacari juaajiaa pueyata, naajuhua, maninia canaa miishacari puetunu pueyajanaano. Naa niishishaatiacuaajari canaari Pueyaso seyani Pueyaso Sohuanu cumaquishacari canaa, seetanujuanaa canaa panishacari pueyajuhua. <sup>7</sup> Niishishaatiacuaajariuhua canaari Pueyaso seyani seetanu rupaajanaa canaa pohuatanoocua pueya, naajuhua, casaa canaa miiniucua Pueyaso cumaacata. Canaari Sesaaca nujuataquiaa cumaatiani, Pueyaso jiyanooshano pueya canaa quiniucua. Pueyaso rupaata, canaa cutaraari saaja Sesaaca jiyatequiaa canaacuajini. <sup>8</sup> Naa Pueyasora canaa poonijiosacaritij, noojiaqueya pueyari canaa shuquiriaquiaani. Tamasacaari canaa rerequetequiaa saniniujia. Naajuhua, noojiaqueya pueyari maninia pohuatanoocua tamasaca niquiara canaajini. Tamasacaari canaa sesacaciaa saniniujia. Noojiaqueya pueyari canaa sequequiaa sapojonuujacatani. Tamasacaari saniniujia maninia tojitaquiaa canaa, seetanu rupaajanaa canaa pohuatasarani. <sup>9</sup> Noojiaqueya pueyari canaa niiquiaa juhua najuhua quijiaa pueyani. Tamasacaari saniniujia, canaari tojishano pueya cutarani. Canaari sequeyarucua quera puecoosaquiaani. Naajaa, canaari samini quiyajaani. Canaari jiyanoohua miitiasaquiaani. Naajaa, majaari canaa puecoosaanu quiquiaani. <sup>10</sup> Taraatia canaa quishacari, naajaa, canaari pueyaracaanu shuquiriaatia quiquiaani, Pueyaso pueya canaa quiniucua. Canaari seetanujuanaa casamiijiuniucuaajuhua. Naajaa, canaari queraatia pueya jiyatequiaa queraatia casamiriaca nojori quiniuria Pueyaso casaatani. Canaari juhua casamiijiuniucua niquishanoni. Naajaa, canaari puetunu canaa panishanojuanaa jiiitaacuajani.

<sup>11</sup> Corinto tiacajinia quiniaa cuarta Pueyaso pueyanaa, canaa nia tojitiare. Canaa jiaatiasacari niaacua, canaari seetanujuanaa puetunu canaa jiuujiajinia canaa niishiriojosanojuanaa nia sequereeni. <sup>12</sup> Majaari canaa tarinitianu canaa paniniu jiyanoohua nijaniya. Nijaniya sajaraj, majaari nia paniniu canaa, taa canaa paninya nijaniyacuaani. <sup>13</sup> Janiyari nia nenecojiyani, naatej, taa pueyano nenecojoquiaa necohuacuaani, ¡majaari canaacuaji nia taacanunu! Seetanujuanaa canaa nia paniri, taa canaa paniquiaa nijaniyacuaani, seetanujuanaa panitiojuaca pa quiniuria.

### *Paari Pueyaso quiquioni*

<sup>14</sup> Saniniujia, maja Pueyaso tojiyashijiaa pueya nia paniniu, nojori nia cojiniuria. Naajuhua, maja cutaraari nia caminiu Pueyaso tojiyashijiaa, niaa mariqui rimiajata quijiaa quiriiri. ¿Maninia miijiatucua shuquiriaatia quijia quiriquia, sesa miijiaa na quishacari? Maja. Cua riucaareto pueyanaa. ¿Cuhushiqui quijiateeri na naata juhuajaniya jatiqui quiniuni ninishiqui quijiaa? Maja na naata. <sup>15</sup> Seetanujuanaa pueyanaa, Cristoori maja Sesaaca rupena. Naajuhua, Pueyasooocua tiujia pueyanoori maja na naata maninia rupetoonu Pueyasooocua tiuyashijia pueyanota. <sup>16</sup> Paa jaara Pueyaso quiquo quirini, ¿paateeri Pueyaso quiquojinia shanacunutianiya samaruhua tiuquitanura tiini? ¡Maja! Paacuajari pueyaracaanu Quijia Pueyaso quiquioni. Na pueyara na sequesanoocuaajari naa naajiotasano quiya:

“Janiyari nojorijinia quiriquianoni. Janiyari nojori tajinia rucuanenonutaniyani. Janiyari nojori Jiyaniijajanaa quiniutianiyanoni. Nojoriiri cua pueya quiniutianiycua”.  
<sup>17</sup> Cunora, pa Jiyaniijiaari na pueya sequeya:

“¡Cua tojtitaashijiaca pueya tajiniji nia pacure! Nia shiriquiri tamocora nojoriicuai. Majaari sesa casaa nia saniniu paniniu. Naa jaara cua tojjijaca quiri, janiyari nia jiyatenutaniya quirianoni. <sup>18</sup> Janiyari nia Que quiniutianiyani. Naacuajitij, niaari cua niqiuohua quiniutianiya. Naa sequeyanijia, puetunu cumaacaracajanaa cua quiniuucua”.

## 7

<sup>1</sup> Naacuajiti canaa panishano pueyanaa, paacuaajaari naa seetanujuanaa pa Jiyaniijia sequesano pajaniyarano jitiiaani. Naaratej, pueyaracaanu tama pa cuaqueyajaaja juhua jeequesano pa jitiariquia, poojijuhua. Majaari pa shanacunu juhua curuushojosano pa quiniuria sesa pa miishanota. Pueyaso puerejaca pa quiriquia, tojetaarucujanaa sesa miyashijiaca pa quiniuria, saa neraja pa quiniurijuhua.

*Corinto pueya tacatosacari nojori jiuujia, maninia nojori qiniuhuara*

<sup>2</sup> Pueyanaa, ¿taa nia miiquianuni? ¡Canaa panijia nia quiriuhua! Majaari canaa miiniu quiquianu sesa nijaniya. Majaari quenaaja niquiriyatu nijaniyajinijio canaa sesonu quiquianu canaa niishitiojosanota. Majaari canaa sapojonu quijia nijaniya. <sup>3</sup> Naa cua sequesacari nijaniyatej, majaari cua sequenu cua cararonura nijaniya. Janiyacuajaari tari nia sequereeni, canaari jyanohua nia paniyani. Naacuajitij, canaari shuquiriaatia quiniutianiyani canaa jaara puecoosaare canaa cumaquiniuucua nijaniyani, seetanujuanaa Pueyaso muerasu nia quiniuria. Naacuajitij, niaa jaara shaajerejuhua, paari pueyaracaanu jatiqui quijia quiniutianiya Pueyasotani. <sup>4</sup> Janiyari seetanujuanaa naa nia sequeyani cua panishacari nijaniya. Quiarijiani, janiyari jyanohua nia timitiaani, maninia cua tojiniuucua nijaniyajiniji. Canaari seetanujuanaa naquiya miiquiaani. Naa-ja, maninia canaa tojiniushacari nijaniyajiniji, cunoori cua cumanijacanu. Cunora, janiyari jyanohua nia shuquiritiaani.

<sup>5</sup> Canaa jaara tiuquiquianu niya Macedonia jiyajiniani, majaari quenaaja rupaquijia canaa quiniu quiquianu juhuajaniya. Canaari puetunu taraatia miishaacanjuaana. Pueyasocua tuyashijiacaari canaa juaariquiaa. Canaa jiuujiaari niaacu tacaariquiaa saniniuujia. <sup>6</sup> Jiyacaritij, Pueyasoori canaa cumanijacanu Tito tiuquishacariuhua canaacua. ¡Pa Pueyasocuaajaari tacaajia cumanijana! <sup>7</sup> Canaa jiuujia canaa cajitishacari, cunoori maja saaja canaa niquishacari Tito canaacua tiuquihuano. Canaa cutaraari canaa jiuujia cajitiquianuni, nojuaja jaara canaa pohuatacanu nijaniyajiniji jyanohua na timiniutia. Nojuajaari canaa pohuatacanu, niaanaari canaa niquiniuucua jiaatia. Niaanaari cucua taraajeya, jyanohua nia taraajetenuucua janiya. Niaanaari cucua tacaya jyanohua, cua rootasano tojjijaca nia quiniuria quiarijia cutara. Naa cua tojishacari niaacuajitij, janiyari jyanohua shuquiriquianuni.

<sup>8</sup> Niaacuara cua naajioneeri nia taraajetecanu. Janiyari taraajecanjuhua, naa cua taraajetenuucua nijaniyatej. Quiarijia cutaraari maja cua taraajenu. Cua naajioneecua-jaari saaja rupaquijia nia taraajocanu. <sup>9</sup> Quiarijiani, ¡shuquiriaatia quiyani! Majaari nia jyaniniu janiyari shuquiriaatia quiyani naa cua taraajonuucua nijaniyatej. Shuquiriaatia quiya cutaranijia, cua niishishacari, naa cua taraajonuucua nijaniyatej, niaari nioojia tacatorohuacuaa Pueyasocua, Pueyaso tojtiajaca nia quiniuhuara. Naacuajitij, janiyari quiarijia niishiyani, majaquiri cua sesonu quiquianu nijaniya, naa cua taraajonuucua nijaniyatej. Pueyasocuaquiri maninia poonijioriquiaa nioojiacajinia, naa nia taraajesacaritij. <sup>10</sup> Pueyasojuaana jaara pa taraajetere, cunoori maninia, poojia pa tacatonuhuara nocua, na jyanooniuria pajaniya. Na nuhuaji, paari shuquiriaatia quiya cutarani. Saniniuujia, tama pa taraajesacarijiaaja, cunoori tama poojia pa shaajanurajaaja. <sup>11</sup> Nia taraajesacari cua nacasusacari nijaniya cua naajioneejiniani, cunoori seetanujuanaa Pueyaso taraajetesano quiquianu nijaniya. Naa nia taraajenuucuatej, nia niquishuriirij, majaari nia tarishiniu quiquianu maninia nia miiniuria. Niaari ritia cua niishitiniu paniriquiaa juucua, maja niaacu na tiuutiasaanura cuno pueyano miishano sesa. Niaacuajaari maninia miiquianu nia juaashacari cuno sesa miijia. Niaari na naaqui puerecanujuhua, niaa mariqui nata cojiritiasaare saniitionuuri. Niaari cua jaqueroojocanu. Niaari ritia miiquianu cua naajiojinia cua sequesano nijaniya. Naacuajitij, niaari ritia cuno sesa miijia taanuucanu nia tajiniji, maja socua nia rupesano na quiniuria. Naa nia miiniuucua puetunu maninijanaatej, janiyari quiarijia niishiyani, majaquiri nia maniniucuanu quiquianu naa sacuaatia cuno pueyano miishanotej. <sup>12</sup> Pueyanaa, niaari maninia canaa tojjijaca. Seetanujuanaa, cua naajiosacari niaacuara, majaari cua naajionu quiquianu saaja cuno sesa miijia pueyanojiniji, sesa miishano pueyanojinijio. Janiya cutaraari niaacuara naajiocanuni tamajaaja nio nia niishiniuria Pueyaso niquiara:

niaacuajaari seetanujuanaa canaa panijaca quiyajaa, nia tojishacari canaa. <sup>13</sup> Naaratej, canaari canaa jiuujia cajitiquianuni, canaa tojishacari Tito pohuatasano nijaniyajinjiji.

Majaari saaja Tito pohuatasano cumanijianu quiquianu canaa. Canaari Tito timitia-canujuhuj, canaa niquishacari nojuajaari shuquiriaatia tiuquiriohua canaacua. Puetunu nijaniyajanaari na naacucanu, noojia na cajitiniuhua, najuhua na tacaaniucua niaacuajuhuj. <sup>14</sup> Tito quiaaquishacari niaacua, janiyacuaajari juhuacari nia pohuatacanu nijaniyajinjijini, maja puera na taacanunura niaacuaji. Naa maninia nia quishacari Tito tiuquishacari niaacuatej, majaari cua caririquiniu quiquianu nijaniyajinjiji. Puetunu cua pohuatasanojuanaa Tito nijaniyajinjijiri seetanujuanaa quiquianu Titora. Naajuhuj, puetunu cua pohuatasano nijaniyajanaari pueyaracaanu seetanu rupaajanaa quijia. <sup>15</sup> Quiarijia Tito niishiriojosacari nijaniya, nojuajaari socua jiyano hua nia panijia quiya, nia tojiniucua maninia nojuaja. Niaacuajaari tetecatucanu nia puerenuta na tiuquishacari niaacua. Majaari nia rerequetenu quiquianu nojuaja. <sup>16</sup> Jianiayahuj, jiyano hua shuquiriaatia quiyanjia, cua niishishacari quiarijia cutara cua naata niaacua tiuuni seetanujuanaa.

## 8

### *Capora pa quiriqiaa*

<sup>1</sup> Quiarijiani pueyanaa, canaari nia pohuatanu paniyani, taa Pueyaso cumaquiya jiyano hua na muerasu maapue niya Macedonia jiyajinjiani. <sup>2</sup> Nojoriiri jiyano hua taraatia miqiuoquiaa. Naajaa, nojoriiri saaja jiyano hua shuquiriaatia quiya. Naajuhuj, casamijiuucua nojori quishacari, naajaa, nojoriiri caporatu juri. Nojoriiri na cumaneecajinjiji nareja niqutiojoquiaa queraatia, Judea jiyajinia casamijiuucua Pueyaso pueyara. Nojori niqutiojosanoori juhua casamiriaca pueya niqutiojosano. <sup>3</sup> Seetanujuanaa narta Pueyaso pueyaca nojori taraajenuta, nojoriiri naa na cumaneecajinjiji niqutiojocanu queraatia. Nojoriiri puetunu na jiiatasano cumaneecajanaa niqutiojonuucanu. Naacua-jitji, janiyari jiyaniquianuni, maja naasucuaari nojori naata niqutiojonu quiniutianiya socua. Naajaa, na nuhuaji, nojoriiri socua niqutiojocanu! Seetanujuanaari cua sequesano nijaniya. Janiyacuaajari nojori miishano niquiniani. <sup>4</sup> Niya Macedonia jiyajinia quiniaa parta Pueyaso pueyani, nojoriiri nijaniyajinjiji tojiquianu. Niaanaari cumaneeca reratenu paniriqiaacuaa, nia jiyarosocoriguiano Judea jiyajinia quiniaa casamijiuucua parta Pueyaso pueyara. Naaratej, nojoriiri jiyano hua canaa neneco jocanu canaa masenura nojori niqutionu panishano cumaneecajuhua, parta Pueyaso muerasa. <sup>5</sup> Seetanujuanaa Pueyaso tojjijia nojori quiniucua, nojoriiri maja saaja na cumaneeca na niqutiojonu quiquianu. Nojoriiri coteenu tama nojori cuaqueyajaaja jiyatecanu seetanujuanaa nojori quiniuria saaja pa Jiyaniijara, taa Pueyaso paniya pa miiniuricajani. Naajuhuj, nojoriiri tama na cuaqueyajaaja jiyatecanu canaa tojjijia nojori quiniurijuhuj. Cunora, canaari nojoriicuaaji jiuujiatecanuni. <sup>6</sup> Naa capora niqutiojonaa nojori quiniucuatej, canaari Tito sequerucuaani, niaacua na quianuhua quiarijia. Nojuacuajaari tarijia naacucanu nijaniya, nia reratenu nia niqutionu panishano cumaneeca. Niaacuajaari maninia niqutiojocanu juhua capora pueya. Naaratej, nojuaja cuaara nia naacuura, nia tucuatunura reratenu puetunu nia niqutionu panishano cumaneecajanaa. <sup>7</sup> Nijaniya, Corinto tiacajinia quiniaanaa, niaacuajaari jiyano hua maninia Pueyaso muerasa. Niaari Pueyasocua tiuujia jiyano hua. Naajuhuj, niaari jiyano hua maninia Pueyaso rupaa niishitiojonuuuaca. Niaari Pueyaso niishitiaja jiiiaajuhuj. Niaari mariyata shitimia poonijionuuuaca, tamasa nia naacunura. Naajuhuj, niaari canaa panijia jiyano hua. Naatej, taa maninia miijiacatucuaa nijaniyani, capora nia quiriuhuj, nia cumaneeca nia niqutiojonura nareja parta Pueyaso pueyara.

<sup>8</sup> Majaari juhua nia jiyanjia cua sequenu nijaniya, nia cumaneeca cua niqutiojotenura nijaniya. Janiyari nareja nia pohuatariquiaa capora Macedonia pueyajinjijini, tama nia niishiniurijajaaja, niaate seetanujuanaa canaa panijiacajuhuj, taa Macedonia jiyajinjijini pueya paniya canaacuaani. <sup>9</sup> Niaacuajaari pa Jiyaniijia Jesucristojinjiji nishiya; na Que Pueyaso shuriucua na quishacarijia, nojuajaari puetunu maninia casaa-janaa jiiitaja quiquiaari. Naajaa, nojuajaari juhua casamijiuurua quiquiaari, mijiria na rosesacari pocua. Nojuajaari naa taraatia quijia quiquiaari, saniniuuja jiyano hua shuquiriaatia quijia na jiyatenura pajaniya, juhua jiyano hua queraatia casamiriaca pueya pa quiniuria. Naa jaa seetanujuanaa panijia quiriqiaa, naa nia miirijuhuj, taa pa Jiyaniijia miiquiaaricuaani.

<sup>10</sup> Janiyari niishiriojoriqiaani, taate socua maninia nia naata miiniu parta casamijiuucua Pueyaso pueyarani, shuquiriaatia nia quiniurijuhuj. Cua tojiri. Niaacuajaari nishiya, noo marijara pa shococanutej, niaacuajaari juhuacatecara cumaneeca reratejonu



cotecanuu. Naaari naa maninia miiquianu tama nia tacaashacarijiaaja niarta Pueyaso pueyacuua. <sup>11</sup> Naaari shitimia juhuacatecara nia cumaneeca niqutiojonu cotecanucuaja. Naaratej, quiarjia nia sequeyanijia, niaa cuaara naa shitimia niqutiojonu tucataara puetunu nia niqutiojonu panishano cumaneecajanaa. Naa jiiatiasano cumaneecajinjii nia niqutiojore, taa cumaneeca nia niqutiojonu paniyacuajani. <sup>12</sup> Naa tojiri. Paa jaara seetanujanaa nareja niqutiojonu paniriqira pa cumaneecajinjijini, Pueyasoori pa niqutiosano shuqiritiaja, paa jaara juhua capora niqutiojore pa jiiatiasanojinijini. Maja cutaraari Pueyaso paniniu pa niqutiojonura, pa jaara na jiiatiaquiyani.

<sup>13</sup> Majaari Pueyaso paniniu cutara puera nia niqutiojonura nia cumaneeca, tamasaca quiniuria casamiriaca, saniniuuja nia jiiatiaquiniuria nia panishano. <sup>14</sup> Maninia cutaraari puetunu Pueyaso muerasujanaa jiiatiana nia panishano. Naaratej, quiarjiani, niaa cuaara niqutiojora nia jiiatiasanojinijii, nojori jiiatiana nia panishanojuhuaj. Tamacari saniniuuja, nojoriiri saniniuuja nia jiiatiaquishoo casaa nia niqutiojonutaniyacuua, niaa jaara na jiiatiaquiri. Naacuajitij, puetunu Pueyaso muerasujanaa na panishano jiiatiantaniya mariyata, maja rimiajata. <sup>15</sup> Naajuhuaaj, tariucuacaanu Pueyaso Rupaajinjiani, jiyocacaanuuji Pueyaso tinishano Israel pueya miaquesocoriquiano panjiniijiiri naa naajiotasano quiya:

“Cante queraatia reratequiarini, majaari quenaaja na cureenu quiquiaari. Naajuhuaaj, cante secaja reratequiarini, majaari nojoriria na pueetanu quiquiaari”.

Naaratej, Pueyasooocua tiuujiaca nia quiri. Naa jiiatiasanojinijii nia niqutiojore nareja, nia jamueyaquiniutia.

*Pablo pohuatasano Titojinjii, Tito cojiniaajinjijinio*

<sup>16</sup> Tiiitori jiyanoohua niaacua jiaatiaja, taa cua jiaatiaa niaacuacuuaani. Pueyasocuaajaari na jiyatequiaari nia panijia na quiniuria. Janiyari cunora Pueyaso sequequiaani: “jPaacarasho Pueyasanaa!” <sup>17</sup> Naacuajitij, janiya jaara Tito sequerucuuaani nia niquniuucua na quianura, nojuajaari cua timitiriucuaa. Tama nojuajaarijia nia niquniuucua jiaatiaa. Naacuajitij, nojuajaari quiarjia quianutaniya niaacua.

<sup>18</sup> Canaari tamonu parta Pueyaso pueyano jiyaroya Titotani, na tarajariquiano. Cuno pueyanoori puetunu Pueyaso muerasu maapuejanaa shuqiritiasano pueyano, maninia na pohuatanuucua pa Jiyaniijia Jesucristojinjii. <sup>19</sup> Macedonia jiyajinia quiniaa Pueyaso muerasu maapueeri tari na saquiriocjanu na tarajanura canaa, pa niqutiojosano cumaneeca canaa jiyatanura nata, Judea jiyajiniara. Naa pa niqutiojonuucua pa cumaneeca parta Pueyaso muerasuratej, queraatia pueyari pa Jiyaniijia timitiantaniya socua. Naajuhuaaj, parta Pueyaso pueya Judiocuacaari niishiniutianiya, narta Pueyaso pueya taucuacaquiiri nojoriicua taraajecajuhuaaj. <sup>20</sup> Maniniacuajaari parta Pueyaso pueya maapue saquiriijosano pueyano quianura canaata. Naacuajitij, majaari pueya jiyaniinu quiniutianiya canaari nio queraatia canaa reratesocoriquiano cumaneecajinjii nohuasenuutaniyani. <sup>21</sup> Canaari pueyaracaanu maninia miiniu paniquiaani puetunu pueya niquiarajanaa, maja saaja Pueyaso niquiaraa.

<sup>22</sup> Quiarjijiani, niaacua canaa jiyarosocoriquiano pueyata, canaari niiquijinjio tamonu parta Pueyaso pueyano jiyaronutaniyani. Pueyaracaanu na poonijiosacari pa Jiyaniijiaari, janiyajanaari na niquiquianuni. Nojuajaari seetanujanaa pueya panijia, Pueyaso panijia na quiniuucua. Quiarjia cutara, seetanujanaa niaacua na tiuushacari, janiyari niishiyani, nojuajaari jiyanoohua maninia Pueyaso pueyano. <sup>23</sup> Tamonu jaara nia nequesotare cante Titoni, niocua na riuacure: “Nojuacuajaari Pablota poonijiona, na cumaquiniuria pajaniya”. Naajuhuaaj, Tito cojiniaari niiquiji Pueyaso muerasu maapue jiyarosano niaacuajuhuaaj. Pa Jiyaniijia Jesucristoori socua maninihuuaqueetasano, maninia na tojtiajaca nojori quiniuucua. <sup>24</sup> Naaratej, nio pojori jaara niaacua tiuquiiijisee, niocua puetunujanaa maninia miiri nojoriria, nia paniniutia nojori. Naacuajitij, puetunu Pueyaso muerasu maapuejanaari niishiniutianiya niaaqui seetanujanaa panijia. Naajuhuaaj, puetunu Pueyaso pueyajanaari niishiniutianiya, majaari cua sapojonu quiquianu, maninia cua pohuatasacari nojori niajanijinjijii.

## 9

*Pablo shiniujiushacari pueya, cumaneeca nojori reratenura narta Pueyaso pueyara*

<sup>1</sup> Janiyaruhua najuhuaana niaacuara naajiyani, cua sequenura niajanijia, nia cumaneecata nia naacunura Judea jiyajinia quiniaa parta Pueyaso pueya. <sup>2</sup> Janiyacuajaari niishiyani, niaari tarijia na naacunu paniquianucuaja. Cua shuqiritiasacari cunora niajanijia, janiyari pueyaracaanu niya Macedonia jiyajinia quiniaa parta Pueyaso pueya niquiaraa pohuataquiaa niajanijinjijini. Janiyacuajaari nojori pohuataquiaani, niajanijia

Acaya jiyajinia quiniaa pueyani, niaari nia cumaneeca niqutionu paniquianu noo mar-  
 ijjara pa shococanutej. Naaratej, queraatia niya Macedonia jiyajinia quiniaa Pueyaso  
 pueyari cunora jaarajaaja na cumaneeca niqutionu panijajuhuaaj, naa nojori cua po-  
 huatanuucua nijajaniyajiniitij. <sup>3</sup> Janiyari niaacua tiuya seetanujuaanaani, niaacuaajaari  
 canaacuaji tariucuaa reratesano jiitianutaniya nia cumaneeca, taa cua pohuataquiaa  
 niya nijajaniyajiniicuaarani. Naajaa, janiyari nio parta Pueyaso pueya jiyaronutaniya  
 niaacuani, seetanujuaanaa juhuacarijia nia reratenura nia niqutiojosocoriquiano cuma-  
 neeca. Majaari cua paniniu cutara cua pohuatasano nijajaniyajiniji cuaracashitishaa-  
 nura. <sup>4</sup> Macedonia jiyajiniinjio parta Pueyaso pueya naasucuaari cuata tiuquiniutianiya  
 niaacua. Nojori jaara cuata tiuquishii niaacua, canaa jaara nia riuriatasee nia cuma-  
 neeca rerateyojuani, canaari caririquiniutianiyani. Niaari caririquiniutianiyajuhuaaj.  
<sup>5</sup> Naaratej, janiyari Tito sequereeni, parta Pueyaso muerasuta na quianura coteenu  
 niaacua cucuaji, nia niqutiojonu panishano cumaneeca cuara tari reratesano quiriia  
 canaacuaji. Naacuajitij, nia niqutiojosano cumaneecaari seetanujuaanaa nareja nia niq-  
 uitionu panishano quiniutianiya, maja canaa niqutiojotesano nijajaniya.

<sup>6</sup> Pueyanaa, nio sequesano nia niishiriquia. Naa sequeyari: “Cante secaja natajani, se-  
 caja senoonutaniyajaariuhuaaj. Saniniuujia, cante queraatia natajani, queraatia senoonu-  
 taniyajaariuhuaaj”. Naajuhuaaj, paa jaara capora quiriquiani, Pueyasoari saniniuujia socua  
 queraatia pa niqutionutaniya pa niqutiojosojiniji. <sup>7</sup> Naaratej, puetunu nijajaniyajanaa  
 cuara niqutioora taa nioojajinia nia niishiriojoree nia niqutiojonuracuajani. Majaari  
 nia cumaneeca nia niqutiojonu nia jamuenuta, nocua nia taraajenutano. Naajuhuaaj, ma-  
 jaari nia niqutionu nia cumaneeca saaja tamasaca shiniujiushacari nijajaniya. Pueyaso  
 cutaraari shuquiriaatia niqutiojuaca timitiaja. <sup>8</sup> Pueyasocuaajaari cumaacaraca na niq-  
 uitionura nijajaniya puetunu nia panishanojuanaa nia jiitiasocoriquiano pueyaracaanu.  
 Naacuajitij, niaari pueyaracaanu socua queraatia jiitiajaca quiniutianiya, tamasaca nia  
 niqutiojonurajuhuaaj, nojori jaara jiitiaquiriquia nojori panishano. <sup>9</sup> Naa jaara naa  
 capora quiriquiatej, niaari nio tariucuaacaanu Pueyaso Rupaa naajiotasano tohuateenu-  
 taniya. Naa sequeyari:

“Maninia pueyanoori juhua capora nareja niqutiojojua na casamijiniji casamiiuniucua  
 pueya. Na miishanoori pueyaracaanu maninia quiniutianiya Pueyasora. Majaari  
 Pueyaso niyajetanu quiniutianiya”.

<sup>10</sup> Pueyano natasacari casaa jajau na cuhuariquiajinia, Pueyasoari na canijiaquiaa.  
 Naacuajitij, na camaruuri socua jiitianutaniya tamacari na natasocoriquianohua, na  
 miaquesocoriquianonio. Naajuhuaaj, juhua capora nia niqutiojosacari nia jiitiasanojiniji,  
 niaari juhua nia cuhuariquiajinia nataa. Naacuajitij, Pueyasoari nia jiyatenutaniya socua  
 queraatia jiitiajaca nia quiniuria, pueyaracaanu maninia nia miiniuria tamasarajuhuaaj.

<sup>11</sup> Naa capora nia quiniucua nia casaatatej, Pueyasoari juhua capora nia niqutiojonu-  
 taniya puetunu na jiitiasanojinijijianaa, queraatia nia jiitianura, tamasaca nia niqutio-  
 jonura pueyaracaanu. Naacuajitij, canaa jaara nia niqutiojosano cumaneeca tiuquitiasee  
 Judea jiyajiniani, parta Pueyaso pueyari Pueyaso timitianutaniya. Capora nia quiniuu-  
 cua, nojoriiri Pueyaso sequenutaniya, “paacarasho”. <sup>12</sup> Naacuajitij, nojori jaara masere  
 nojoririano nia jiyarosano cumaneeca, majaari saaja nojori jiitanu quiniutianiya nojori  
 panishano. Cunoori saniya nojori shiniujiuniutianiya nojori shuqiritiniuria Pueyaso,  
 queraatia nojori sequesacari: “Paacarasho Pueyasonaa”. <sup>13</sup> Nojori jiitiasacari puetunu no-  
 jori panishanojuanaa, nojoriiri Pueyaso maniniuhuaqueetanutaniya jiyanoohua. Nojoriiri  
 naa maniniuhuaqueetanutaniya Pueyaso, nojori niishishacari niaaqui seetanujuaanaa  
 Jesucristo Rupaa tojitiajacajuhuaaj, naajaa, taucua nia quishacari nojoriria. Nojoriiri  
 Pueyaso maniniuhuaqueetanutaniyajuhuaaj jiyanoohua capora nia quiniucua nojoriria,  
 tamasaranio. <sup>14</sup> Nojoriiri Pueyaso secojonutaniya niaacuarajuhuaaj, jiyanoohua nojori  
 paniniutia nijajaniya, Pueyaso jyatenuucua nijajaniya nojori panijia nia quiniuria.  
<sup>15</sup> Naajuhuaaj, janiyari jiyanoohua Pueyaso sequeyani, “paacarasho”, jiyanoohua maninia na  
 miiniucua nijajaniya, Neyanu Jesucristo jataniniucua nioojia.

## 10

*Pablo cuaara tojishaaria, Jesucristo jiyatenuucua nojuaja na rupaa pohuatanara*

<sup>1</sup> Janiyacuajaari Pabloni. Quenaaja cua tojitiare. Cua Jiyaniijia Cristoori jiyanoojia  
 quiquiaaricuaa, jacaria pocuajajuhuaaj. Janiyari naa quiniu panijajuhuaaj. Naaratej, jani-  
 yari quiarijia nia nenecojiyani, cua tojitiare quenaaja. Tamasacanaari cua pocuaquiaa,  
 janiyanaari jacaria pocuaja quiquiaa juhua puerejani, nia tajinia cua quishacari. Sanini-  
 uujia, tucuaacaanu cua quishacari, janiyanaari jiyanoohua nia nacasuquiaa cua naajione-  
 jiniani, juhua nia pueresano jiyaniijia. <sup>2</sup> ¿Seetanutejanaa, janiyate naani? Janiya jaara naa

quiya niaarani, naajaa. Quiarijia tucuaaanu cua quishacarijia, janiyari nio cua naajiojini nia nenecojiyani, nia tojiniuria janiya. Saniniuuja, niaacua cua tiuquishacari, janiyari noo pojori nacasunutaniya jiyano huani, sacuaratia cucuara rimiaaquenuuquiiaani. Janiyari naa miinitianiya nojorini, nojori jaara tarinitiaquiyajaa naa sacuaratia na pocoojonutej. Cuno pojoriiri jiyaniya canaari saaja juhua mijiria quiniaa pueya miqiuiaani, maninia canaa quiniuria nia niqiuara. <sup>3</sup>Seetanujuanaacuaaquiniatejaj, canaari nareja pueyani. Naajaa, majaari canaa miaquejonu quiqiuiaa canaa paraa, ta pueya miaquetoojoquiacuaani. <sup>4</sup>Mijiria quiniaa pueyari miaquetoojoquiaa cutara tama nojori shipinishano casaatajaaja. Canaa miaquetoojotaja saniniuuja, cunoori Pueyaso cumaacajanaa cutara. Naacuajitij, canaa naata Sesaaca niishishano shocotanu. <sup>5</sup>Pueyaso cumaacata, canaari mijiria niishijiaca niishishano shocotaquiaani. Cuno niishishanoori Pueyasojiniji niishishano jataniquiaa juucua, maja pueya niishiniuria Pueyaso. Naajaa, Pueyaso cumaacata, canaari puetunujuanaa najuhuana pueya niishiriojosano jataniquiaani, Cristo tojjijaca nojori quiniuriajuhuaj. <sup>6</sup>Canaacuajaari Pueyaso jeenucasano pueyani, canaa nacasunura puetunu tojiyashijiacajanaa. Naacuajitij, niaa jaara puetunu Pueyasojiniji canaa niishitiojosanojuanaa tojtiajacara quiriohua, na nuhuaji cutara canaa naata puetunu cureeno tojiyashijiacajanaa saniitionu.

<sup>7</sup>Niaari tama cushitiquiaajaacujua nia tiuushacari cuno sapojonuujuaa pohuatasanoocua. Nojoriiri sapuenu juhua Jesucristo jiyaramiquishano niqushiya najuhuanaj. Maninia nia niishiriojore pueyanaa, nijaniya cante sapojosaacanucujani. Niaa jaara niishiri niaari seetanujuanaa Cristo saquirojosano pueya, naacuajitij, nijaniya cuara niishiiria canaari Cristo saquirojosano pueyajanihuaj. <sup>8</sup>Niaa jaara jiyaniya janiyari juhua pueya shocotaja nia sequeyani: "Canaari nia jitianaaani", naajaa, majaari cua caririqini nia cua sequesacari nijaniyatej. Pa Jiyaniijia Cristojunaacuaajaari canaa jiyatequiaari nia jitianaa canaa quiniuria. Canaari naa jiyatesaaquiarini, canaa cumaquiniuria nijaniya na rupaata, seetanujuanaa Cristo pueya nia quiniuria. Majaari canaa jitianu najuhuana na cumaaca, canaa sesonura nijaniya. <sup>9</sup>Naa cua naajiosacari niaacuaratej, majaari nia jiyaniyu janiyari nia piriyojiyani nia puerenura janiya. <sup>10</sup>Tamasaca nijaniyajinijinio pueyanaari cua sequequiaajuahuaj: "Pabloori puera jiyano huana pa nacasuquiaa na naajioneejinia. Naajaa, pa tajinia na quishacari, nojuajaari juhua tojishoo pueyano niqushano quiqiuiaa. Naajuahuaj, na pohuatasacari pa niqiuara, na pohuatasanoori maja shanohua tojishano". <sup>11</sup>¿Seetanutejanaa? Cante naa pocuaquiaani, nojuaja cuara niishiiria quiarijia, ta canaa naajiocanu niaacuaracujaja tucuaaanu canaa quishacarijiani, canaari naa miinitianiyan niaacua canaa tiuquishacari.

<sup>12</sup>Cuniqui niaata quiyajaarihuua tamasa pueya, canapue te nia sequequiaacujani, nojoriniiaari socua maninia Pueyaso rupaa pohuatanaa tamasaajiniji, canaajinijihuaj. ¿Nojoriitiri seetanujuanaa socua maninia Pueyaso rupaa pohuatanaa canaajiniji? Johuaj. Naajaa. Majaari canaa tacaaniu quiqiuiaa juhua nojori canaa quiniuria. Cuno pojoriiri tama na cuaqueya timitiacoquijaajaacujua, nojori soosacari narta Pueyaso rupaa pohuatanaa. Nojoriiri naa quijiatejaj, nojori jiyanihacari nojori cutaraari socua tojishano pueya tamasaajiniji. Naa nojori miishacarijij, nojori cutaraari seetanujuanaa mosanucua. <sup>13</sup>Canaa cutara, majaari tamasa poonijosano canaa jiyatenu quiqiuiaa juhua canaa poonijosano Pueyasora. Canaa cutaraari saaja canaa miishano shuquiritiaquiaani, tee Pueyaso jiyaroquiaari canaacujani. Nojuacuajaari canaa jiyaramiquiiaari niaacua Corinto tiacajinia, nia niqiuara canaa pohuatanura na rupaa. Naacuajitij, niaari na muerasura quiqiuiaari. <sup>14</sup>Majaari najuhuana canaa timitianu nijaniya, Pueyaso muerasu nia quiniuuca. Niaacuajaari Pueyaso muerasura quiqiuiaari canaa pohuatanucua nia niqiuara seetanu rupaaajanaa Jesucristojiniji. Canaa cutaraari seetanujuanaa Pueyaso rupaa pohuatanu coteetanaa nia niqiuarani. <sup>15</sup>Majaari canaa shuqiritianu najuhuana nijaniya. Canaa cutaraari nia tiuutiqiuiaari Jesucristoocuan, niaacua Pueyaso jiyaronucua canaa. Naajaa, canaari socua nia pohuatanu pania Pueyaso rupaani, seetanujuanaa Jesucristo rupaaacua tiuujia nia quiniuria. Naacuajitij, niaa jaara seetanujuanaa Pueyaso rupaa tojjijaca quiri, niaari saniniuuja na naata canaa cumaquiniu. <sup>16</sup>Niocua canaa cumaquiri canaa quianura tamaqui, tee Jesucristojiniji pohuatasoojua quiyacuajani, ti canaa pohuatanura nojuajinijihuaj. Majaari canaa quiniu paniniu pootia tamasa poonijosaqui, ta cuno rimiaacoori quiqiuoia shuquiriaatia canaa poonijosaquicuaani. ¿Nojori shuqiritiasanoteeri tama nojori poonijosanojuaja? Maja. Niaacuajaari Pueyaso muerasura quiqiuiaari canaa nia tojtianuucua.

<sup>17</sup>Pueyanaa, nio tariucuaaanu naajiotasanoori niaara, nia niishishocoriqiano. Naa sequeyari: "Cante shuquiriaatia quijia quiniu paniani, nojuaja cuara pa Jiyaniijia shuqiritiaara cutara". <sup>18</sup>¿Taa nia sequeyani pueyanaa? ¿Cana Pueyaso sequenutaniya

socuaarini: “Quiaa cutara maninia cua pueyanoniyojua”? ¿Cunotee, tama na cuaqueyajaaja sequejani: “Quiaa cutaraari maninia Pueyaso pueyanoni”? Maja. Pueyaso shuquiritiasano cutaraari noo pueyano, cana pa Jiyaniijiajanaa sequenutaniyacujani: “Quiaa cutaraari maninia cua pueyanoniyojua”.

## 11

### *Pablo pohuatasano na paraajiniji*

<sup>1</sup> Pueyanaa, cua tojitiuri nareja. Juhua paateca tama cua cuaqueyajiniijiaaja nia pohuatanu paniyanijia. Naajaa, quenaaja nia rejeretare janiya. <sup>2</sup> Janiyari jiyanoehua nia tacaatiaquiaani, saaja Jesucristora nia quiniuria. Niaacuajaari niishiya, naatej, taa pueyano cojuaacuaa neyatunijojua canuucujani, saaja na camiriquiano pueyanora na quiniuria, naajuhuj, janiyari nia cojuanu paniyani sesosoo nia quiniuria nia Jiyaniijiaara. Cristocuajaari juhua nia niyacarana. Nia jiiitana cua quishacari, janiyari juhua nia queni. <sup>3</sup> Tariija, niaacuajaari saaja Cristo tojtiajaca quiquiaari, na panijiaa nia quishacari. Quiarijia saniniuuja, janiyari Sesaaca nia pueretaani, nojuaja mariqui nia sapojoreeri Cristocuajani nia rupatenura, taa cuno Susanacu sapojoquiaari Eva tariucuaaanucuaani. <sup>4</sup> Cuno sapojonuujuaa tiuquijiosacari niaacua, tamaatia nojori pohuatasara Jesujiniji niajaniya, niaari jaarajaaja ritia na tojiquiaa. Nojori niishitiojosanoori tojetaarucujanaa tamaatia canaa niishitiojosanojiniji niajaniya. Nojori nia tojishacari, niaari juhuajaniya samaruhua niishishano tojtiaquiaajuhuj. Niaacuajaari tari tiuquiaari Jesucristoocua, Pueyaso jiyanoehua niajaniya. Saniniuuja, cuno pojori pohuatasara tamaatia, taa nia miiniutianiya Pueyaso pueya nia quiniuriani, niaari jaarajaaja ritia nojori tojiquiaajuhuj. <sup>5</sup> ¿Cuno sapojonuujucateeri socua tojishocoriguiano janiyajiniji, niaa na jiyatecanu juhua seetanujanaa Pueyaso jiyaramiquishano pueyarani? ¡Janiyara maja! <sup>6</sup> Seetanujanaa, majaari cua niishinu maniniuhuaqueenu cua pohuatasara Pueyaso rupaa, taa cuno pojoricuaani. Naajaa, Pueyasojiniji cua niishishano cutaraari seetanu rupaajanaa, tojishocoriguiano cutara. Maja najuhuanaj. Niaacuajaari cuno niishiya, pueyaracaanu saaja maninia cua miishacari nia niquiara, cua pohuatasanojinijinio.

<sup>7</sup> ¿Casaara nia tojtiaa cuno pojori quiarijianijia, majaari saniniuuja nia tojtianu janiya? ¿Janiyateeri sesa miiquianu niajaniyani, cua masejoaquiniuuca nia cumaneeca cua pohuatanuuca Pueyaso rupaa, Pueyaso pueyara nia jatanishaanura? Janiyacuajaari tama cua cuaqueyajaaja mueyashitiquiaarini cua cumaquiniuria niajaniya. Naa cua miiniuucaatej, ¿cunoteeri sesa niaara? <sup>8</sup> Janiyari tamonu jiyacajinia Pueyaso pueya maapuejiniji masejoquiaari cumaneecani, cuno cumaneecata cua quianura niaacua, nia niquiara cua pohuatanura Pueyaso Rupaa. <sup>9</sup> Saniniuuja, nia tajinia cua quishacari, cua jiiitaaquishacari cua panishano, naajaa, maja cutaraari cua mashiniquijionu quijia nia cumaneeca. Naa cua jiiitaaquishacari cua panishanotej, Macedonia jiyajinijinio parta Pueyaso pueyari namitia tiuquijioquiaari. Nojori cutaraari cumaneeca cua niqutioquiaari, cua panishano cua masetajara. Janiyari naa pueyaracaanu tama cua cuaqueyajaaja cojuaquiaani, maja cua taajetenura niajaniya cua panishano cua jiiitaaquishacari. Janiyari naa miiniutianiya pueyaracaanuni. <sup>10</sup> Cua Jiyaniijia Cristocuajaari niishiya, majaari quenaaja cumaneeca cua masejonu quiquiaari Acaya jiyajinia quiniaa parta Pueyaso pueyajiniji. Naacuajitij, majaari quenaaja niquriryatu pueyano Acaya jiyajinijinio naata sequenu janiya: “Pablocuajaari cumaneeca mashiniquijiojua canaajiniji”. <sup>11</sup> Pueyanaa, ¿niaate niishiya casaara pueyaracaanu cua sequequiaani, maja cumaneeca cua masejonu quiquiaa Acaya jiyajinia quiniaa Pueyaso pueyajiniji? Naa cua sequesacariitij, ¿janiyateeri nia panyaquiyani? ¡Maja! Pueyasocuaajaari niishiya, janiyari jiyanoehua nia panijiani.

<sup>12</sup> Nia sequereera casaara cua mashiniquijiaquiquiaa nia cumaneecani, cua pohuatasara Pueyaso rupaa nia niquiara. Cuno pojori, nia jiyanihano Pueyaso jiyaramiquishano pueyani, nojoriiri nia jiyajenetenu paniquiaa. Nojoriniiaari seetanujanaa Cristo jiyaramiquishanojuhuj, taa canaacuaani. Saniniuuja, nojori mashiniquijosacari nia cumaneeca, nojori nia niqutiojonura nareja, naacuajiti maatia niishishiyari, ¡nojoriiri jiyanoehua tamaatia canaajiniji! Naaratej, majaari quenaaja canaa mashiniquiniu quiniutianiya nia cumaneeca, canaa pohuatanuuca Pueyaso rupaa niajaniya. <sup>13</sup> Seetanujanaari, ¡nojoriiri maja Cristo jiyaramiquishano pueya! Nojoriiri tama nojori cuaqueyajaaja jiyatecanu sapuenu juhua Cristo jiyaramiquishano pueya nojori quiniuria. Naacuajitij, nojoriiri nia sapojia. Nojoriiri sapuenu juhua Cristo jiyaramiquishano pueya niquishano najuhuanaj. <sup>14</sup> Cunoori maja jiyajeneta naa nojori miiniuriatej. Satanásacuajaari tama na cuaqueyajaaja jatanijia shacantuucara, juhua Pueyaso seru na niquishaanura, pueya na sapojonura. <sup>15</sup> Naaratej, majaari cua jiuujiatenu cuno pojori jaara tama na cuaqueyajaaja jiyatecanu juhua seetanujanaa maninia miijiaa pueya

nojori quiniuria. Nojoriiri naa miiquiaa, Satanás seya nojori quiniuucua. Naajaa, ¡nojoriiri saniitiosaanutaniya sesa nojori miiniuucua!

*Pablo pohuatasacari naquiya na miiniujiniji, Cristo jiyaramiquishano na quiniuucua*

<sup>16</sup> Socua nia sequenu pacuteyanijia, majaari nia jiyaniinu janiyari paatecani cua pohuatasacari tama janiyajiniijiaaja. Naa jaara jiyaniya janiyari seetanujuanaa paatecani, naajaa, rupaquijia cua tojtitiare quenaaja. Janiyari juhua paateca tama janiyajiniijiaaja niaara pohuatanu panyajaanihuaj, taa nia tojishano pueya miiquiaacuani. <sup>17</sup> Naa cua pohuatasacari tama janiyajiniijiaajatej, cunoori maja cua Jiyaniijia Cristo pohuatesano janiya. Cunoori tama cua pohuatasanojuaja, juhua paateca cua quishacari. <sup>18</sup> Naatej, taa queraatia Pueyaso rupaa pohuatanaa tama nojoriijiniijiaaja pohuatanuuquiaacuani, janiyari quiarijia naa tama janiyajiniijiaaja pohuatanu panyajuhuj. <sup>19</sup> Jiyanhua niishijia nia quishacari, niaari cunoo paatecoori tojtitaquiaa juhuajaniya. Naatej, taa nia tojtitaquiaa cunoo pojoricuaani, quiarijia cua tojtitiarejuhuaj. <sup>20</sup> Naajuhuj, niaanaari juhuajaniya rejeretaquiaa cunoo pojori, nojori jaara nia poonijio-tequiaa juhua nojori seya. Niaanaari nojori rejeretaquiaa nojori jaara nia jitiiasano casami riutiocojoquiaa niaacuaji. Juhua nia jiyaniijia nojori quishacari, niaanaari nojoriicua shiiniuquiquiaa saaja, naajaa, nojori soosacari niajaniya. Niaanaari juhuajaniya nojori rejeretaquiaa-juhuaj, nojori jaara nia jiquioco maseteriquia. <sup>21</sup> ¡Nojoriquiiri jiyaniijianucujanaa cutara! Saniniujia, janiyari nojori naaqui caririqiyani juhua nojori cua quiyaquiniuucua, maja naa canaa miiniuucua niajaniya, taa nojori miiquiaa sesa niajaniyacuani.

Naajaa, quiarijia cutara, janiyari tama janiyajiniijiaaja pohuatanutaniyani, taa nojori pohuataquiaa juhua paateca tama nojoriijiniijiaajacuani. <sup>22</sup> ¿Taa nojori sequequiaani? ¿Nojoritiniiaari Hebreo pueya, Hebreo rupaa pocuajacajuhuj? Janiyajuhuj. Janiyari Hebreo pueyanojuhuaj, Hebreo rupaa pocuajani. ¿Nojoritiniiaari Pueyaso saquiriojosano Israel pueyajiniijio? Janiyacuajari Israel pueyacuajiniio supuenojuhuj. ¿Abrahamtenaari nojori supuetana? Abrahamcuajari cua supuetanajuhuj. <sup>23</sup> ¿Nojoritiniiaari Cristo jiyaramiquishano pueya? Janiya cutaraari seetanujuanaa Cristo seruni. Janiyari jiyanhua soyani, juhua paateca naa cua pohuatasacari tama janiyajiniijiaajatej. Naajaa, janiyari seetanujuanaa nia sequeyani. Janiya cutaraari socua jiyanhua nojoriijiniiji poonijio-quiaari Cristorani. Janiya cutaraari pueyaracaanu caminiujijushaaquiaari nujuatejojuajini nujuatejonuni, Jesucristojiniji cua pohuatanuucua. Naajuhuj, janiyari pueyaracaanu caminiujijushaaquiaari majacununi. Naajuhuj, janiyari pueyaracaanu cocuaatia miiquiaarini, pueya monu panishacari janiya. <sup>24</sup> Cuarta Judiocuacaari cua caminiujiquiaari majacunu puetunu niquiriyatu pa juaashiquiajanaa. Cuarta Judiocuaca majacuacari, nojoriiri na majanu serojoua. Nojori majasano jaara treinta y nueve qiri, nojoriiri jiyacari carteja na majacusano pueyano. <sup>25</sup> Naajuhuj, janiyari jiuujianaraca caminiujijushaaquiaari macata piquiniuni. Tamacari, janiyari saitia jacusaquiaarini. Shoniacu caminajinia cua jaaretasacari buquejinia, jiuujianaraca buqueeri tiuquiti-aquiaari. Naa tamacari buque tiuquitiacarijuhuaj, janiyari na raucua cuataquiaarini puetunu niucujanaa, niquiriyatu juucanio. Cunoori quiquiaari puereeta shoniacu caminia jiuujiajinia. <sup>26</sup> Janiyari pueyaracaanu tiquiyocua rucanejojua quiquiaarini. Naacuajitij, moocua cua niuuniujishacari, janiyari cocuaatia miiquiaarini. Naa cua rucanejosacari, janiyari pueyaracaanu puereeta nohuasenujuaca quishaqui shoco-quiaarini. Naajuhuj, tama cuarta Judiocuacajarijia pueyaracaanu cua miitanu panijia, taucucanio. Puereetaari quiquiaarijuhua cua rucanejosacari tiacajinia, tiquiyocua pueya quiyaquishaqui, shoniacu caminajinianio. Naajuhuj, puereetaari quiquiaari janiyara, cua jyanishacari janiyari cuarta Pueyaso muerasu tajinia quiyani, saaja cua paraa nojori quishacari. <sup>27</sup> Jiyanhua cua poonijosacari cua Jiyaniijiaara cua samareenuta, janiyari pueyaracaanu sutequiaarini. Janiyari miaajequiaarini. Janiyari jiyamequiaar-ijuhuj. Janiyari noojiaqueya miaqueyaquiquiaarijuhuaj, jeya cua quiyaquishacari. Janiyari naquiya miiquiaari cua rucanejosacari shiniquijianiajuhuaj, toqueju cua quishacarijuhuaj.

<sup>28</sup> Janiyari naa naquiya miishaaquiaarini, mariyata tamaatia naquiya miiniujuhuj. Naajuhuj, janiyari puetunu juucujanaa niishiriojoquiaani, taariquitijia Pueyaso muerasu maapue quiya puetunu jiyacajinijanaatej. Janiyari jiyanhua nojoriicua tacaquiaani. <sup>29</sup> Naacuajitij, tamonu cuarta Pueyaso pueyano jaara rejeretaquiquia Sesaa saniniujishacari nojuaja, janiyari jiyanhua taraajeja nocuani. Tamonu jaara sesa miitishaare, janiyari na naaqui caririqiyajuhuj. <sup>30</sup> Naa jaara pania socua cua pohuatanura nia-janiya tama janiyajiniijiaaja, nia pohuatareeraqui pueyaracaanu taraatia cua miishaanujini. Tama janiyajaaja, janiyari maja cumueecani. <sup>31</sup> Pa Jiyaniijia Que Pueyasocujari

niishiya janiyari seetanujuanaa sequeyani. Nojuajanaa cuaara pueyaracaanu manini-uhuaqueetasaaria cutara, maja nojuajiniji pohuatanaa. <sup>32</sup> Tariija, Damasco tiacajinia cua quishacari, tamonu pueyanoori Damasco tiaca jiyaniijia quiriquiaa. Nojuajaari cuno jiya jiyaniijia Aretas jiyatesano quiquiaari, Damasco tiaca jiyaniijia na quiniuria. Cuno jiyaniijiaari na soldadohua nujuatejoquiaari tiaca shocua sohuaca tohuatayaji, nojori qianura juucua janiya. Nojoriiri cua quiatunu paniriquiaa Jesucristojiniji cua pohu-atanuucua. <sup>33</sup> Naajaa, cuarta Pueyaso pueyari namitia cua roshinitiaquiaari shuquiri-aaia, puereetuua canasatujinia, cuno tiaca sohuaca tacuhua shuucujaji. Janiyari naa mashiquishaaquiaari cua paraacuajini.

## 12

### *Pablo pohuatasano Pueyaso niquitishanojiniji nojuaja*

<sup>1</sup> Paa jaara tama pajaniyajiniji pohuatariquia juhua paatecani, cunoori najuhuanaj. Naajaa, socua nia pohuatareeraj. Nia pohuatareera taa cua niquitishaaquiaari pa Jiyani-ijia casaa jiyocuaaanuni. <sup>2</sup> Tariucua Jesucristoocua tiuujia cua quishacari, janiyari jiya cajiniocua cacojiria tacanishaaquiaari Pueyaso quiquojianirani. Naa cua tacan-ishaanujinijitij, tari shocorucuaari catorce marijia. Majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohuuanu soj. Johuaj. Saaja Pueyasocuaajaari na niishiya. <sup>3</sup> Cua tojitiare, seetanujuanaa majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohuuanu soj. Pueyasocuaajaari na niishiya. <sup>4</sup> Janiyari saaja niishiya cutarani, janiyari shuquiriaatia quishaqui Pueyaso shuriucua tiuquinishaaquiaarini. Janiyari tii casaa tojiquiaarini. Cunoori maja quenaaja na naata pohuatasaanu mijiria quiniaa rupaaajinia. Pueyasoori cua tenujuquiaari maja cua caminiujiniuria jiyocuaacaanu cua tojishano mijiria quiniaa pueyara. <sup>5</sup> Naa Pueyaso niquitiniucua janiyatej, janiya maara tama janiyajinijijiaaja poojotariquia cua timiniutiani, juhua tamasaca shocotaja cua quishacari. Naajaa, ma-jaari cua timitianu tama cua cuaqueyajaaja. Saaja shuquiriaatia quiya cutaranijia, cua niishishacari majaari cua naata tama cua cumaacatajaaja rejeretanu taraatia cua miiniu. <sup>6</sup> Naajuhuaaj, janiya jaara tama janiyajinijijiaaja pohuatanu paniriquiani, cuno maara seetanujuanaa pohuatasano quiriquiaa, maja juhua paateca pohuatasano. Seetanujuanaa majaari naa cua pohuatanu paniniu, pueya mariqui cua pohuatasanojiniji cua jiyaniiriiri janiya jiyanoehua maninia pueyanoni. Pueya cuaara niishiiria cutara taamuca pueyan-ote janiyani, saaja nojori namijiata nojori niquishacari cua miishano, tama nojori nu-maatajaaja nojori tojishacari cua niishitiojosanojuhuaj. <sup>7</sup> Pueyaso niquitishano janiyani, na niishitishano janiyajuhuaaj, cunoori puera jiyanoehua maninia quiquiaari. ¡Cunoori jiyanoehua cua timitiquiaari! Naaratej, janiyari cua cuaqueyajinia nootusaquiaari juhua jiohuacatani, janiya mariqui pueya shocotajara quiriiri. Cuno taajeta noonuuri Sa-tanás miishano quiquiaari, na tacaatiniuria janiya. <sup>8</sup> Janiyari jiyanoehua secojoquiaari pa Jiyaniijiani, nojuaja cuaara shaataara cua nootunenu. Janiyari jiuujianaraca pa-cutejoquiaari secojonuni. <sup>9</sup> Cua Jiyaniijiaari saaja cua sequequiaari: “Janiyacuaajaari quia cumaquiniutianiyani, cua panishano pueyano quia quiniucua. Saaja cunocua-jaari quiara. Cua naatacuajaari socua jiyanoehua poonijiotenu cua cumaaca sasaca cua pueyajinia, tamasaca niishiniuria cunoori seetanujuanaa cua cumaaca, maja pueyano cumaaca”. Naa cua Jiyaniijia riucuasacari janiyatej, janiyari shuquiriaatia quiyani cumaacaaju pueyano cua quiniucua pueyaracaanu. Naacuajitij, Cristo cumaacaari socua janiyajinia niquishaaquiaa poonijiyano. <sup>10</sup> Naacuajitij, janiyari shuquiriquiaani cuma-aaju pueyano cua quiniucua, Pueyaso cumaquiniuria janiya. Naacuajitij, tamasaca jaara sacuaaraatia casaa sequeriquia janiya na juaashacari, janiyari Pueyaso cumaacata juhuajaniya na rejeretaquiaani. Naajuhuaaj, janiya jaara cua panishano jitiaaquiriquiani, naajaa. Pueyaso cumaquishacari janiya, janiyari juhuajaniya rejeretaquiaani. Naa-juhuaj, janiya jaara naquiya miitiasaquiaani, taraatia cua miishacarijuhua Cristora cua poonijionuucua, naajaa. Pueyaso cumaacata, janiyari juhuajaniya rejeretaquiaa saajani. Naacuajitij, janiya jaara tojetaarucuaajanaa cumaacaaju quiquiaani, janiyari jiyacari socua jiyanoehua cumaacaraca quiquiaani, Pueyaso cumaquiniucua janiya.

### *Pablo tacaashacari Corinto tiacajinia quiniaa Pueyaso muerasu maanuucua*

<sup>11</sup> Janiyari seetanujuanaa juhua paateca tama janiyajinijijiaaja pohuatareeni, juhua pueya shocotaja. Niaacuajaari naa cua pohuaterree, niaacuaja naara cucujaji tacuyaquiquianu cua sesacaja pueyatej. Janiyanaari najuhuana quijia pueyanoni. Naajaa, niaacuajaari niishiya, janiyari maja socua najuhuana quijia cuno pojorijinijini. Cuno pojori nia tojishano pueyani, nojoriiri tama na cuaqueyajaaja jiyatecanu juhua seetanujuanaa Jesucristo jiyaramiquishano pueyara cutara. <sup>12</sup> Juhuaajaniya

cua rejeretasacari naquiya cua miiniu nia tajinia cua quishacari, naajaa, janiyari pueyaracaanu jiyajeneta casaa miijioquiaari Pueyaso cumaacata nia niquiarani. Niaari nocuaji jiuujiatecoquiaari. Naacujitij, niaa cutaraari niishiquiaari janiyari seetanujuanaa Cristo jiyaramiquishano pueyano cutarani. <sup>13</sup> ¿Janiyateeri sesa nia jiitiaquiaarini, Pueyaso rupaa cua niishitiojosacari nijaniya? ¡Maja! Janiyari nia miiquiaari maniniani, naajuhua, taa cua miiquiaari tamasaca jiyacajinia quiniaa Pueyaso pueya maapuecuaani. Majaari rimiajata cua miiniu quiquiaari nijaniya, niaata cua quishacari. Maja cutaraari cua mashiniquijionu quiquiaari cumaneeca nijaniyajiniji. ¡Cua jiyanoori cunora, jaara sesa quiquiaari nijaniyara!

<sup>14</sup> Quiarijiani, janiyacuaajari quera quiaa niaacuani. Janiya jaara niaacua quiaareni, cunota quiniutianiyari jiuujianaraca cua pacutenu niaacua cua quianu. Majaari nia jiyaniniu janiyari nia cumaneeca mashiniquijionuucua quianutaniyani. Janiya cutaraari maja cua jiaatianu nia jiiitasano casamiicua. ¡Janiyari saaja niaacua jiaatiaa cutarani! Niaacuaajari juhua cua muerasuniyua. Niaacuaajari maninia niishiya, muerasuniyua maja na reratenu cumaneeca na quera. Na que cutaraari saniya cumaneeca rerateja necohuara. Naacujitij, cua mashiniquijiyaquishacari cumaneeca nijaniyajiniji, janiyari seetanujuanaa juhua nia queni. <sup>15</sup> Janiyari shuquiriaatia tama cua cumaneecajaaja puecanutaniyani cua quishacari niaata, socua cua niishitiojonura nijaniya. Naacujitij, janiyari tama cua cumaacajaaja puecanutaniyajuhua, nioojia cua cumaquiniuria. Janiyara, nioori taraatia: janiya jaara socua nia paniquiaani, niaari socua jiyacatequiaa secaja nia paniniuria janiya.

<sup>16</sup> Niaacuaajari niishiya, majaari quenaaja nia niquitionu quijia nia cumaneeca janiya. Naajaa, tamasaca nijaniyajinijionaaari soquecuya, janiya naasucuaanaari jiyasohuaaja nia cumaneeca nohuasejoquiaani, cua sapojonuta nijaniya. <sup>17</sup> ¿Seetanutejanaa pueyanaa? ¿Janiyateeri nia sapojoquiaari niaacua cua jiyaramiquishano pueyatani? ¿Nojoritiri nia cumaneeca masequiaari? ¡Maja! <sup>18</sup> Janiyacuaajari Tito jiyaroquiaari niaacua na quianurani, na cumaquiniuria nijaniya. Janiyari nata jiyaroquiaari tamonu Pueyaso pueyanoyuhua. ¿Titoteeri jiyacari nia cumaneeca mashiniquiquiaari? ¡Majaruhua! Niaacuaajari niishiya, Titocuaajari cumaneecaacua jiaatiaashijia, juhua janiyajuhua. Janiya Titota, canaacuaajari jiyanoohua nia paniquiaani.

<sup>19</sup> Sacuaraatia canaacuara nia rimiaquenuucua pueyanaa, naajaa, majaari nia jiyaniniu canaa tama canaacuaajiaaja tacuyani, juhua canaa nequesoreenaa nia quishacari. Saniniuujia, canaari niya Pueyaso niquiara nio naajiyia niaacuarani, Cristo pueya canaa quiniucua. Naajuhua, puetunu cua sequesanojuanaa nijaniya nio cua naajiojiniani, cunoori cua cumaquiniuria nijaniya cua panishano pueyanaa. Janiyari naa nia nacasuyani, seetanujuanaa Jesucristo tojjijia nia quiniuria. <sup>20</sup> Janiyari puereyani, niaacua cua tiuquishacari, janiyari niaacua taraajenutaniyani cua riuriatasacari nijaniya sesa quiyanojua, maja maninia taa cua paniriquiaacuajani. Janiya jaara nia riuriatasee naa sesa quiyanojuani, jecatoojua, niaari saniniuujia taraajenutaniya nia niishishacari taa cua miiniutianiya nijaniyani. Janiyari puereyani niaa naasucuaari juayonuujutaajaa. Niaa naasucuaari niarta pueyano jiiitasanoocua jiaatiajaca quiyajaa. Niaa naasucuaari juaanu porocua quiyajaa. Niaa naasucuaari tama nia panishanojuaja miijiaa quiyajaa. Niaa naasucuaari niarta pueyacuara coriaacoojuaca quiyajuhua. Naajuhua, niaa naasucuaari niarta pueyacuara rimiaaquenuujuaa quiyajaa. Naajuhua, niaa naasucuaari tama nia cuaqueyajaaja jiyaniya niaa socua maninia pueya tamasaca pueyajiniji. Niaa naasucuaari jatiqui quiyashijiacajuhua, pueyaracaanu nia juayonuujutanuucua. <sup>21</sup> Naacujitij, janiyari puereyani janiya naasucuaari Pueyaso niquiara caririquiniutianiya nia naaquini, niaa jaara naa sesa miijiaa quiyajaa. Janiyari puereyajaanuhua, janiya naasucuaari nujuquentaniya cua taraajenuta noo sesa miijiaa pueyacuani, cuno pojori jaara sesa na miishano tarinitiaaquianujua. Noojiaqueya nijaniyajinijioori sacuaraatia miijiaa quiquianujua: cararaatia miijiaa sacuaraatia, na camishoo maaji numuetucunu porocujuhua, naajuhua, majaari tama nojori cuaqueya panishanojuaja nojori rejetenu quiquiaa.

## 13

### *Socua Pablo nacasusacari Pueyaso pueya*

<sup>1</sup> Nioori quiniutianiya jiuujianaraca cua pacutesacari quianu niaacua. Tariucuaaanu Pueyaso rupaajinia, paari nio niishitiojosaaquiaarini: querajaa pueya jaara mariyata pohuatatare nojori niqishanojiniji, pa naata seetanujuanaa na pohuatatanuocua tiuuniu

cutara. Naajuhuaaj, niaacua cua tiuquishacari, janiyari naa miiniutianiyanii cua nequesoresacari cuno sesa miijiaca. <sup>2</sup> Pueyanaa, janiya jaara pacutequiaariuhua niaacua quianutej, janiyacuaajaari puetunu niajanijajinijinio cuno sesa miijiacajanaa piriyojoquiaarini. Quiarijiani, tucuacaanu cua quishacarijia, janiyari puetunu cuno sesa miijiacajanaa socua piriyojijiani. Naacuajitij, janiya jaara niaacua tiuquishiini, cuno pojori jaara noojia tacatoyaquiyajaa, majaanori cua jiuujiaani quiniutianiya, narta sesa miijiacanio. <sup>3</sup> Cua nequesoresacari cuno sesa miijiaca, niaari jiyacari niishiniutianiya janiyari seetanujuanaa Cristo sequesano caminiujumiani, taa nia niishiniu paniriquiaacua-jani. Niaacuajaari tari niishiya, pa Jiyaniijia Cristoori maja na jitianu niajanijia juhua cumaacaaju pueyano. Niaacuajaari na cumaaca niquiquiaa tama niajanijajinijaaja na saniitiosacari niajanijia. <sup>4</sup> Seetanujuanaa, Cristoori juhua cumaacaaju quiquiaari jaara niyacutesanojinia teetesaaquiaari. Saniniuujia, Pueyaso samiitianishacari nojuaja, nojuajaari quiarijia puetunu Pueyaso cumaacajanaa jiiitiaa. Naajuhuaaj, canaa, na rupaa pohuatanaani, canaari naacuiani miishaaquiaajaaniuhua saaja mijiria quiniaa canaa quini-uucua, taa nojuaja quiquiaaricuaani. Saniniuujia, Cristo rupuesano canaa quishacari quiarijiani, canaa cutaraari Pueyaso cumaacaracani, maninia canaa jitianura niajanijia.

<sup>5</sup> Naarate pueyanaa, jacaria nia niishiriojore, ¿niaate seetanujuanaa Jesucristoocua tiuujia, maja soj? ¿Niaate maninia miijiaca taa Pueyaso muerasu niiquiaacuaani? ¿Majateeri nia niishiniu, niaa jaara seetanujuanaa Jesucristoocua tiuujia quiri, nojuajaari nioojia-jinia quiya? <sup>6</sup> Naajuhuaaj, jacaria nia niishiriojore canaajiniji. Nia niishitiriquiani, canaari seetanujuanaa Jesucristo jiyaramiquishano pueyani, maja sapojonuujuaca. <sup>7</sup> Canaari Pueyaso secojoquiaa naacuarani, tojetaarucujanaa sesa miyashijia nia quiniuria, maninia Pueyaso muerasu nia quiniuria. Majaari naa canaa secojonu quiquiaa saaja pueya niishiniuria canaa seetanujuanaa Jesucristo jiyaramiquishano pueyani. Canaari saaja nia panitiaa cutarani, maninia miijiaca nia quiniuria Pueyasora. Niaa jaara naa maninia miijiacara quiriohua, majaanori canaa saniitionu quiniutianiya niajanijia Pueyaso cumaacata. Naacuajitij, majaanori pueya niquiniu quiniutianiya Pueyaso cumaaca canaa jiiitiasano. Naajaa, pueya jaara jiyaniya canaa najuhuaa quijia pueyani, naajaa. <sup>8</sup> Canaa jiiitiasano cumaacaari maja canaa saniitotajara seetanujuanaa Pueyaso rupaa tojtiajaca. Canaa cumaaca cutaraari canaa cumaquiniuria niajanijia, socua maninia Pueyaso Rupaa tojtiajaca nia quiniuria. <sup>9</sup> Naacuajitij, canaari shuquiriquiaani niaacua canaa paaretaaquishacari canaa cumaaca, canaa saniitionura niajanijia niaa jaara Pueyaso tojtiaashijia quiri quia. Naacuajitij, canaari juhua cumaacaaju pueya niquis-hano quiniutianiyanii, cumueeca Pueyaso muerasu nia quishacari saniniuujia. Canaari cunora Pueyaso secojoquiaani, tojetaarucujanaa maninia miijiaca Pueyaso muerasu nia quiniuria seetanujuanaa. <sup>10</sup> Janiyari nio cua naajioneejinia jiyanoehua nia nacasuyani tucuacaanu cua quishacarijia, maja jiyanoehua cua nacasunura niajanijia, niaacua cua tiuquishacari. Pa Jiyaniijiacuaajaari cua jiyatequiaari juhua nia jiyaniijia cua quiniuria, na cumaacata cua canashitijionura niajanijia, seetanujuanaa cumueeca na muerasu nia quiniuria. Pueyaso niquitiosano na cumaaca janiyari maja cua sesonura niajanijia.

<sup>11</sup> Cua tucuatunura nio cua naajioni cua panishano pueyanaa, janiyari nia panitiaani shuquiriaatia nia quiniuria pueyaracaanu. Saaja maninia quiniucua jiaatiajaca nia quiri. Nioojia nia cumaquiri, maninia cua rootasanota. Naajuhuaaj, nia jiyanoootooriquia maninia rupuetootesano nia quiniuria. Naa nia quishacarijia, Pueyasoori nia rupueja quiniutianiya. Nojuajaari pa panijia, pa jiyanoojiajuhuaj. <sup>12</sup> Pueyanaa, Pueyaso tojijia nia quiniucua, nia saruhuaajotooriquia nujuunuta, seetanujuanaa nia paniniutia niarta Pueyaso pueya. <sup>13</sup> Puetunu niiquijinio parta Pueyaso muerasujuaanaari cua sequeya cua saruhuaatanura niajanijia.

<sup>14</sup> Pa Jiyaniijia Jesucristo cuara cumaquiri niajanijia pueyaracaanu. Niajanijia cuara quiri pa Que Pueyaso panishano pueyaracaanujuhuaaj. Naajuhuaaj, niaa cuara quiri Pueyaso Sohuanu rupuesano pueyaracaanu. Puetunu niajanijajanaa cuara naa quiri.



## PABLO NAAJIONEE GÁLATA JIJAJINIA QUINIAA PUEYASO PUEYACUARA

### *Gálata pueyacuara naajione*

<sup>1</sup> ¿Niaate quiyajaa pueyanaa? Janiyari Pablóni, pa Que Pueyaso jiyaramiquishano. Janiyari maja nareja pueyano jiyaramiquishanoni. Mijiria quiníaa pueyari maja na jiyatenu quiquiaari janiya Pueyaso jiyaramiquishano cua quiniuria. Jesucristojuanaacuaajaari cua jiyatequiaari na jiyaramiquishano cua quiniuria. Nojuacuajaari na Que samiitianishanohua macujiniji. <sup>2</sup> Niya cuata quiníaa parta Pueyaso pueyatani, janiyari nio naajiyani. Nio cua naajioneeri puetunu Galacia jiyajinia quiníaa Pueyaso pueya maapuerajanaa. <sup>3</sup> Pa Que Pueyaso, mariyata pa Jiyaniijia Jesucristoni, nojori cuaara cumaquiiria nia-janiya, nioojia cajitishano nia quiniurijahuaj. <sup>4</sup> Jesucristoori tama na cuaqueyajaaja panitiaquiaari pocuara na mosaanura. Naacuajitij, nojuajaari pa jeequequiaari puetunu sesa pa miishanojinijianaa. Nojuajaari naa miiquiaari sesa miiniucua jiaatianu pa cartenura. Nojuajaari naa cusoquiaari pocuaratej, taa pa Que Pueyaso paniquiaaricua-jani, na muerasu pa quiniuria. <sup>5</sup> Naaratej, pa Que Pueyaso cuaara maninuhuaqueetasano quiiria. Cuaara naa quiiria pueyaracaanutej.

### *Maja tamonu maninia rupaa quiniu socua Jesucristo rupaajiniji*

<sup>6</sup> ¿Taa nia miiquianuni pueyanaa? Quiarijiani, janiyari jiyanohua tacaya niaacuani. ¿Ni-aateeri ritia carteanu Jesucristo rupaa, tamaatia niishitiojosano tojitiajaca nia quiniuria? Pueyasocuaajaari Neyanutaja nio cojiritiaquiaari paniniu, Jesucristo miiniucua maninia niaara, na panishano pueya nia quiniuria. <sup>7</sup> Seetanujuanaa, majaari socua tamonu rupaa quiniu Pueyaso pueyara pa jatanishaanura. Noo juhuari nia cushitiojoquiaa saajatejaj, najuhuaana tamaatia nia niishitiojonuuquiaatej. Nojoriiri Jesucristo rupaa cushitiojoquiaa niaara, nojori tacarajosacari najuhuanaj, mariyateyacato nojori quiniucua. <sup>8</sup> Cua tojiri pueyanaa, tamonu pueyano jaara pocuaji Tacuna rupaa niishitiojoriquia niajaniya tamaatia canaa niishitiojosanojiniji niajaniya, Pueyasoori na saniitionutaniya. Naajuhuaaj, janiya jaara tamaatia pohuatere Jesucristojiniji niajaniyani, jiyocuaacuaji roseno Pueyaso serujuhuaaj, Pueyasojuaanaari canaa saniitionutaniya. <sup>9</sup> Janiyacuajaari naa sequeja niajaniyani. Quiarijia socua pacuterohuacuara sequenu nia niishishocoriquiano. Cua tojiri pueyanaa. Níaa jaara tamaatia pohuataasaariquia Jesucristojiniji, maja naate taa tari cua pohuataquiaari niajaniyacuajani, Pueyaso cuaara saniitiooranuaj.

<sup>10</sup> ¿Niaateeri jiyaniya janiya pueya timitiasano quiniu paniyani? Maja. Janiya cutaraari Pueyaso timitiasano quiniu paniyani. Janiya jaara saaja pueya timitiasano quiniu paniriquiani, janiya maara pa Jiyaniijia Jesucristo seru quiyaquirini.

### *Taa Pablo jatanishaquiaari Jesucristo jiyaramiquishano na quiniuriani*

<sup>11</sup> Cuarta Pueyaso pueyanaa, nia pohuatereera cante cua niishitiojoquiaari Jesucristo rupaanu, cua pohuatasano niajaniyani. Pueyanaa, nio rupaa janiya na pohuataa nia-janiyani, nioori maja mijiria quiníaa pueya niishitiojosano janiya. <sup>12</sup> Taa cua sequeya niajaniyacuajani, majaari nio rupaa cua niishiniu quiquiaari tamasaca pueyajiniji. Jesucristojuanaacuaajaari na rupaa cua niishitiquiaari.

<sup>13</sup> Níaa naasucuaari janiyajiniji tojinuujiacuaja tarijia. Seetanujuanaa cuarta Judiocuaca miishano miijia cua quishacarijia, janiyari Pueyaso saquiriojosano pueya pueconu panijia puetunujuanaani. Janiyari jiyanohua paracaajia nojorini. <sup>14</sup> Janiyari seetanujuanaa canaa supuetanaa niishitiojosano tojjia quijia cutarani, socua cuarta Judiocuaca mashiquiorijiniji. <sup>15</sup> Naajaa, jiyanohua panijia Pueyaso quiniucua, cua supueyaquishacarijia, ¡nojuajaquiiri tari cua saquiriojoquiaari na pueyano cua quiniuria! <sup>16</sup> Naacuajitij, tama na panishacarijiaaja, nojuajanaari Neyanu cua niishitiquiaari, Neyanujiniji cua pohuatanaura taucuaa. Neyanu na niishitiniu nuhuaji janiya, majaari quenaaja tamasaca nequesotanucua cua quianu quiquiaari, cua niishiniuria seetanutejanaa na niishitishano janiya. Pueyasocuaajaari maninia cua niishitiquiaari puetunujuanaa Neyanujiniji. <sup>17</sup> Naajuhuaaj, majaari cua quianu quiquiaari Jerusalén tiacajinia, tii cua niquiniuria cuarta Jesu jiyaramiquishano pueya. Nojoriiri coteenujuanaa Jesu jiyaramiquishano pueya quijia. Jiyacaritij, majaari quenaaja cua tarishiniu quiquiaari Damasco tiacajinia. Janiyari ritia quiaquiaari pueya quiyaquishaqui Arabia jiyajiniani. Na nuhuaji, janiyari tacatequiaarihuua Damasco tiacajiniohuani.

<sup>18</sup> Jiuujanaraca marijia cua shocotejonu nuhuaji Damasco tiacajinia, janiyari shusha jiyacari quiaquiaari Jerusalén tiacajiniani, Pedro cua niishiniuria shushajanaa. Nata

cua quishacari, quince juucaari cua shocojoquiaari tiini. <sup>19</sup> Jiyacaritij, majaari socua Jesu saquiriojosano pueya cua niqiniu quiquiaari. Janiyari saaja Santiago niqiquiaari cutarani. Nojuacuajaari pa Jiyaniijia Jesu tarajanu. <sup>20</sup> Pueyanaa, Pueyasocujaari niishiya, janiyari nio cua naajiojinia seetanujuanaa nia pohuataani.

<sup>21</sup> Na nuhuaji, janiyari quiaquiaari Siria jiyajinianio, Cilicia jiyajinianio. <sup>22</sup> Saniniuujia, Judea jiyajinia Jesu tojtiajaca maapueeri juhuanojuaja maja na niishitiuniu quijia janiya. <sup>23</sup> Nojoriiri saaja naa poojotasaaquiaari janiyajiniitij: “Noo pueyano tarijia pa miitijaja naquiya Jesujiniji pa pohuatasacaritij, nojuajanaari quiarijia pa Jiyaniijiajiniji pohuataa pueya niqiuarajuhuaaj”. <sup>24</sup> Naa nojori tojiniuushacari janiyajiniitij, nojoriiri Pueyaso maniniuhuaqueetaquiaari nojori paraca na jataniniuucua Jesu rupaa pohuatana na quiniuria.

## 2

*Jesu jiyaramiquishano pueya niishishacari, Pablo seetanujuanaa Jesu jiyaramiquishano pueyanohuhuaaj*

<sup>1</sup> Catorce marijia jaara shocojoquiaari, janiyari Bernabeeta Jerusalén tiacajinia pacutequiaariuhua quianuni. Janiyari jiyacari Tito rupoquiaari cucuajuhuaaj. <sup>2</sup> Pueyasocujaari cua toquiaari cua quianura Jerusalén tiacajinia. Janiyari cunora quiaquiaarini. Tii cua quishacari, janiyari Jesu tojtiajaca jiiitanaa pueyata rerejoquiaarini. Maja seetanu puetunu nojoritijajanaa, saaja nio pojoritia: Santiago, Pedro, Juannio. Janiyari saaja cuno pojori niqiuara pohuataquiaarini taa cua pohuataquiaa Jesujiniji puetunu taucuacajanaacuajani. Na nuhuaji, janiyari nojori nequesotareeni: “¿Taa nia sequeyani pueyanaa? ¿Janiyate najuhuana sesa niishitiojiya taucuacani?” Cua sequetureeri: “Maja. Quiaacuaja seetanu rupaaajanaa niishitiojiya taucuaca, naa Jesucristojiniji quia pohuatasacari nojori”. <sup>3</sup> Naajuhuaaj, parta Pueyaso pueyano Titoni, cuata quiquiaari tiini, nojuajaari Grecia jiyajiniinino tahue. Naajaa, majaari na sequesaanu quiquiaari na cararaatiuuquia co miatesaanura, seetanujuanaa Pueyaso pueyano na quiniuria. Nojuajaari maja naa na sequesaanu quiquiaari. Canaa rerejosacari Pueyaso pueya jiiitanaata, nojoriiri Tito niqiquiaari nareja, nojori na rupuenurajuhuaaj. Nojoriiri niishiquiaari nojuajaari seetanujuanaa Pueyaso pueyanohuhuaaj, saaja Jesucristoocua na tiuuniuucua. <sup>4</sup> Saniniuujia, noojiaqueya canaa Judiocuacajiniinioori tama nojori cuaqueyajaaja jiyatequiaari juhua Jesu tojtijaca pueyara, nojori cojinuria canaa. Nojoriiri naa canaa rupuequiaari na sapojonuta. Canaata nojori quishacari, nojoriiri canaa shanacutajia nojori niishiniuria canaate seetanujuanaa Pueyaso muerasuni, saaja Jesuucua canaa tiuushacari. Nojoriiri juucua canaa jiyatenu paniquiaari tariuacuacaanu Moisés Rootasano tojtijaca canaa quiniuhuaa. <sup>5</sup> Canaari nojori niishitiojosano pataquiaari saajani. Majaari quenaaja shiitianiyojua nojori rootasano canaa tojiniu quiquiaari. Canaari naa miiquiaarini seetanu Jesucristo rupaaajanaa canaa cojuanura niaara, seetanujuanaa Pueyaso muerasu nia quiniuria saaja Jesucristoocua nia tiuuniuucua. Majaari canaa cojitiniu paniniu quiquiaari Jesucristo rupaa, tariuacuacaanu niishitiojosanota.

<sup>6</sup> Cuno pojori Pueyaso pueya maapue jiiitanaa Jerusalén tiacajinianio, nojoriiri jiyanohua tojishano pueya quijia. Janiyara naajaa. Pueyasocujaari najuhuana quijia jiyanoocuaajuhuaaj, taa na jiyanoocuaa tojishano pueyacuani. Naajaa, cuno tojishano pueya jaara tojiquiaari taa cua pohuataquiaa Jesucristo rupaani, majaari quenaaja niqiriyaatu rupaa nojori sequenu quiquiaari, nojori niishitiojonura janiya socua. <sup>7</sup> Nojori cutaraari niishiquiaari Pueyasocujaari seetanujuanaa cua jiyatequiaari na rupaa pohuatana cua quiniuria taucuacaa, taa Pedro na jiyatequiaari Judiocuaca niqiuara pohuatana na quiniuriacuani. <sup>8</sup> Pedro Jiyatena Judiocuaca niqiuara Jesucristojiniji pohuatariquianoni, cuno Pueyasojuaanaacuajaari cua jiyatequiaarijuhua taucuaca niqiuara pohuatana cua quiniuria. Naacuajitij, canaari mariyata Pueyaso jiyaramiquishano pueyani.

<sup>9</sup> Santiago, Pedro, Juannio, nojoriiri socua tojishano quijia puetunu Jesuucua tiuunaa cuarta Judiocuacajiniiniojuanaa. Nojoriiri seetanujuanaa puetunu Pueyaso muerasu jiyaniijianucuaajanaa quijia. Naajaa, nojoriiri seetanujuanaa niishiquiaari Pueyasoori maninia cua jiyanoocuaari, na jiyatenura janiya Neyanujiniji pohuatana cua quiniuria taucuaca niqiuara. Naaratej, nojoriiri na juaashiquia niqitiojoquiaari canaani, janiya, Bernabeenio. Nojoriiri cunota juhua canaa sequeturiquiaa canaari seetanujuanaa nojori cojiniaani. Naa canaa sequetuquiaariariuhuaaj: “Maniniacuaja. Nia quiojiyare taucuacaacua tii nia pohuatanura Jesujiniji nojorijuhuaaj. Canaari saniniuujia parta Judiocuaca tajinia poonijionutaniyanijia, nojori niqiuara canaa pohuatanura Jesujinijihuaaj”. <sup>10</sup> Nojoriiri canaa sequetquiaarijuhuaaj: “Canaa panishano pueyanaa, majaari

nia niyajetanu casamijuniucua pueya naacunu". Naaratej cuarta Pueyaso pueyanaa, puetunu tiqiyocuajanaa cua rucuanesacari, janiyari naa miiquiaa seetanujuaani.

*Antioquiya tiacajinia Pedro nacasusaanujiniji pohuatasano*

<sup>11</sup> Tamacari, canaa quishacari Antioquiya tiacajinia, Pedroori canaacua niqiaarijihuaj, canaata na quiniuria tii. Tii na quishacari canaata, Pedroori sesa miiquiaari cua niqiaara. Cunora, janiyari jiyanohua na nacasuquiaarini. Cuno na miishanoni, cunoori seetanujuaanaa sesa quiquiaari Pueyasora. Naa na miishacaritij, tamajaaja miiriqiaa cocuaatiaari. <sup>12</sup> Pedroori naa miiquiaaritij. Coteenu canaa cojiqiaari maniniaari tariucua Jesuucua tiuujiaa taucacata, canaata na miaquejonura jatiqui. Jiyacaritij, canaacua tiuquijioquiaariiri socua cuarta Judiocuaca Jerusalén tiacajiniji. Nojoriiri Santiago jiyarosano pueya quiquiaari. Cuno Judiocuaca quishacari tii canaata, Pedroori canaacuaji rupatequiaari. Majaari tari na miaquenu paniniu quijia canaata, tariucua Jesuucua tiuujiaa taucacata. Narta Judiocuaca puerequiaariiri maja na sequesaaanura: "Cunoqui sacuaaraatia miaquejoja taucacata". <sup>13</sup> Tii quiniaa Jesuucua tiuujiaa Judiocuaca jaara niqiuquiaari naa Pedro miishanocuaatej, nojoriiri jaarajaaja canaacuaji rupatequiaarijihuaj, Pedro na cojitiuniuria. Naajuhuaaj, ¡Bernabeeri jaarajaaja canaacuaji rupatequiaarijihuaj cuno mosanucua na cojiniuria! <sup>14</sup> Naaratej, janiya jaara naa nojori niqiuquiaari tariucua Jesuucua tiunio taucaca tamacatiuyanoni, janiyari niishiquini, cuno pojoriiri maja maninia na miituniu quiriquiaa. Cunoori maja na quiniu quiriquiaa taa nojori rootasaaquiaari Pueyaso rupaacuajani. Cunora, janiyari puetunu Pueyaso pueya maanu niquiarajanaa naa sequequiaari Pedroni: "Quiaari Judio pueyano. Naajaa, majaari seetanujuaanaa juhua Judio pueyano quia quiniu quiquiaa. Quiarijia saniniuujia, quiaari Jesuucua tiunio taucaca shiniujiya nojori quiniuria seetanujuaanaa juhua Judiocuaca, nojori rupuenura pajaniya. ¿Casaara naa quia shiniujiya nojoriiri? <sup>15</sup> Paacuaajaari Moisés Rootasano tojjijaca cutarani, Judiocuaca pa quiniucua. Paari maja tahuani, Pueyaso tojjiyashijia. <sup>16</sup> Naajaa, paacuaajaari niishiyani, majaari Pueyaso jiyanooniu pajaniya Moisés Rootasano tojjijaca pa quiniucua. Maja. Pueyaso cutaraari pa jiyanoojia, Neyanu Jesucristoocua pa tiuushacari. Paari cunora Jesucristoocua tiuquiaani, nojuaja jiyanooniuaria pajaniya puetunu sesa pa miishanojinijijanaa. Sesa pa miishanoori maja na jiyanooshaanu quiquiaa Moisés Rootasano pa tojjishacari. Maja. Naajuhuaaj, majaari quenaaja niquiriyatu pueyano jiyanooshaanu quiniutianiya Moisés Rootasano tojjijaca pa quiniucua. Maja.

<sup>17</sup> Paacuaajaari Jesucristoocua tiuquiaarini, jiyanooshano pa quiniuria, maja socua Moisés Rootasano tojjijaca pa quiniuria. Na nuhuaji, paa jaara jiyaniyani paa sesa miijiaa quiriohuani Moisés Rootasano pa tojjiaquishacari tarini, saaja Jesucristoocua pa tiuushacari, paari jiyanoohua jiyajeneyani. Naa pa jiyaniishacaritij, paari juhua sequeyani Cristoori pa jiyaterohua sesa miijiaa pa quiniuhuaa nocua pa tiuuniucua. ¿Quiaateeri naa sequenu paniya Pedronaa? ¡Maja! <sup>18</sup> Paacuaajaari maninia miiquiaarini pa tarinitiasacari tojjini Moisés Rootasano, jiyanooshano pa quiniuria saaja Jesucristo rupaacua pa tiuushacari. ¿Paateeri socua maninia miijiaa quiniutianiya Pueyaso niquiarani, paa jaara Moisés Rootasano tojjijaca quiriohuani? ¡Maja! Paa jaara naa niishiriojiyani, paari jiyanoohua jiyajeneyani. Paacuaajaari seetanujuaanaa pohanuquiaa puetunu pueya niquiarajanaani, nojoriiri jiyanooshaanutaniya saaja Jesuucua nojori tiuushacari. Naa pa pohanuusuano jaara sapojosano quiriquia, paa maara jiyanoohua sesa miijiaa quiriquiani. Saniniuujia, Pueyaso cutaraari seetanujuaanaa pa jiyanooquiaa saaja Neyanucua pa tiuushacari".

Janiyari naa nacasuquiaari Pedroni puetunu tii quiniaa Pueyaso pueya niquiarajanaa. <sup>19</sup> Pueyanaa, cua niishishacari maja cua naata Moisés Rootasano tojjini maninia puetunujuanaa, janiyari niishiquiaarini Pueyasoori cua shaajanutaniya na shuriucuaaji. Naaratej, janiyari tama cua cuaqueyajaaja jiyatequiaari juhua tariucua macuni, maja Moisés Rootasano tojjijaca quiniuria socua. Naacujitij, janiyari quiarijia saaja Pueyasora quiaa cutarani. Janiyara, janiyari tari cojiritiasaaquiaari monu Cristota niyacutesanojiniani. <sup>20</sup> Naacujitij, quiarijiani, majaari nio janiya quiyani. Jesucristocuaajaari nio, cojiajinia quiyani. Majaari tamajaaja saminio cua quiniu. Jesucristo cua rupuesacari, naacujitij janiyari saminio quiyani. Naa saminio cua quishacari puetunu cua cuaqueyatajanaatej, janiyari rishiyani Pueyaso Niyanuucua tiuujia cua quishacari. Nojuajaari cua paniquiaari. Naaratej, tama na cuaqueyajaaja tarinitiaquiaariiri cucuara na mosaanura. <sup>21</sup> Majaari cua ruuretanu Pueyaso jiyanooniu panishacari janiya. Jaara pa naata quiriquia tama pa cuaqueyajaaja jiyanooniu Pueyaso, Moisés Rootasano tojjijaca pa quiniucua, Jesucristo maara najuhuaanaa cusoquiaari pocuara.

## 3

*¿Teyano tojjia pa quishacari pa jiyanooshaaquiaani, Moisés Rootasano, Jesucristoocua tiuuniu soj?*

<sup>1</sup> Mosanucua Gálata pueyanaa, ¿cante nia shimiojocanuni, naa pa Jiyaniijia Jesuucua tiuuniu nia tarinitianuratej? Canaa jaara shushajanaa nia niquiara pohuataquiaari Jesucristojinijitij, canaacuajaari maatia nia nishitiquiaarini, nojuajaari pocuara mosaaquiaari pa jiyanooshaanura. ¿Quiarijiaarihuaj, cante tari nia sapojocanuni, Jesucristoocua tiuuniujini nia pishiniuriani? Naa nia miishacarij, ¿niaateeri jiyaniya niaa tama nia cuaqueyajaaja jiyanootiniutianiya Pueyaso? Maja nia naata pueyanaa. <sup>2</sup> Quiarijiani pueyanaa, janiya saaja nio nia nequesotanu paniyani. Cua riucature. ¿Niaateeri Pueyaso Sohuanu tiuquiniquiaari nioojiajinia Moisés Rootasano nia tojiniuucua, Jesucristo rupaaca nia tiuuniuucua soj? ¿Taa nia sequeyani? Niacuajaari niishiya, niaari Pueyaso Sohuanu tiuquiniquiaari nioojiajinia Jesucristoocua nia tiuushacari, niaa jaara na rupaa tojiquiaari. <sup>3</sup> ¡Niaaquiiri tojetaarucujanaa mosanucujuhuanajaj! Nia niquishuririiaj, niacuajaari Pueyaso muerasura quiquiaari Pueyaso Sohuanu nia shanacunuucua nioojiajinia na tiuquiniuria, Jesucristoocua nia tiuushacari. Quiarijia saniniujia, ¿niaateeri jiyaniya nia naata Pueyaso jiyanootiniu tama nia cuaqueyajaaja Moisés Rootasano nia tojishacarihuua juucua, tama nia cumaacatajaaja? ¡Maja! <sup>4</sup> Pueyasocujaari jiyanohua maninia miiriquiaa nijaniya, saaja Neyanuucua nia tiuushacari. Naa Pueyaso miishano niaarani, ¿cunoteeri najuhuaana quiquiaarijuhuaj? <sup>5</sup> Pueyanaa, Pueyaso jaara na Sohuanu niqutioquiaa nijaniya, na nuhuaji na cumaacata miiquiaa nia niishishoo casaari, nia sequeretaj, ¿casaara naa na miiquiaarini? ¿Pueyasoteeri naa maninia miiquiaa nijaniyatej, Moisés Rootasano tojjia nia quiniuucua? Maja. Nojuajaari naa maninia miiquiaa nijaniyatej, saaja na rupaaca tiuujia nia quiniuucua, canaa pohuatasano nijaniyani.

<sup>6</sup> ¿Niaate niishiya, casaara Pueyaso jiyanooquiaari canaa supuetana Abrahamni? Abrahamcuajaari Pueyaso sequesanoocua tiuquiaari. Naaratej, Pueyasoori na jiyatequiaari juhua tojetaarucujanaa sesa miyashijia pueyanora. Naa na jiyatequiaari saaja nocua na tiuuniuucua. <sup>7</sup> Naacuajitij pueyanaa, quiarijia nia niishiri cutara, cante Pueyasooocua tiuujiani taa supuetana Abraham tiuquiaaricuaani, nojoriiri seetanujanaa canaa supuetana Abraham niquihuajanaa cutara. <sup>8</sup> Pueyaso jaara na sequenu panishano naajiotaniquiaari tariucuacaanu, nojuajaari tari niishiquiaari taa taucuaca na jiyanooniutianiyajanihuaj, nojori jaara nocua tiuuri. Naaratej, nojuajaari naa sequequiaari supuetana Abrahamtej: “Quiaacuajaari cua sequesanoocua tiuuri, Abrahamnaa. Naaratej, quia jinianuucujinio supueno pueyanoori jiyanohua maninia miiniutianiya puetunu pueyapuerajanaa. Noo pojori shuquiritiniutianiyari, puetunu jiyacajinijiniojuanaa nocua tiuuriquiano pueyatej”. <sup>9</sup> Naaratej, cante Jesucristoocua tiuujiani, Pueyasoori na jiyanooniutianiyajuhuaaj, taa supuetana Abraham na jiyanooquiaaricuaani, na sequesanoocua Abraham tiuushacari. Cunora, Pueyasoori maninia miiquiaa Jesucristoocua tiuujia, taa na miiquiaari Abrahamcuaani.

<sup>10</sup> Saniniujia, cante jiyaniyani Pueyasoori na jiyanooniutianiya Moisés Rootasano tojjia na quiniuucua, nojuajaari pueyaracaanu saniitiosaanutianiya. Naa naajiotasano quiyacuajaari tariucuacaanu Pueyaso Rupaajinia:

“Moisés Rootasano tojjia cuara tojiiria puetunu Pueyaso naajiotanishanojuanaa. Cante niquiriyatu na sequesano tojiyaquijiani, nojuajaari pueyaracaanu saniitiosocoriquiano”.

<sup>11</sup> Naacuajitij, niaari niishiyacuja, majaari quenaaja niquiriyatu pueyano jiyanooshaanu quiniutianiya, Moisés Rootasano na tojiniuucua. Saniniujia, naa naajiotasano quiyacuajaari Pueyaso Rupaajinia:

“Pueyaso jiyanooshaano pueyanoori pueyaracaanu rishiriquiano cutara, Pueyasooocua na tiuuniuucua”.

<sup>12</sup> Saniniujia, Moisés Rootasani, cunoori maja na niishitiojonu Pueyasooocua pa tiuuniuria, jiyanooshaano pa quiniuria. Maja. Saaja naa sequeyari:

“Cante puetunu nio naajionejinia rootasanojuanaa tojjiani, nojuajaari cuno na tojiniuucua rishiniutianiya”.

<sup>13</sup> Maja maninia pa tojiyaquiniuucua Moisés Rootasano, paari Pueyaso puecoosocoriquiano quiquiaarini. Naajaa, Pueyasoori pa Jiyaniijia Jesucristo jiyatequiaari na sesacasano pueyanora pa niti, pocuara na cusonura. Naa sequeyajaarihuua tariucuacaanu Pueyaso Rupaa:

“Pueyaso sesacasanoori cuno, niyacutesanojinia teetasani”.

<sup>14</sup> Naa Jesucristo csonuucua pocuaratej, saaja nocua nia tiuushacari, Pueyasoori na naata shuquiritini niajaniya taucuacajuhuaaj, puetunu na sequesanojataanaa canaa supuetana

Abraham. Naajuhuaq, saaja pa tiuuniucua Jesuucua, puetunu pajaniyajanaari Pueyaso Sohuanu masequiaani, taa seetanujuanaa Pueyaso sequequiaari tariucuaacaanucujani.

*Moisés Rootasanoori maja na naata Pueyaso sequesano Abraham jataniniu*

<sup>15</sup> Cuarta Pueyaso pueyanaa, maatia nia pohuatereera maninia nia niishiniuria cua pohuatasano. Cua tojiri. Pueyano jaara maninia miiniu paniri narta pueyanora, naa miiji-aari: na sesa naajiotajaari naajioneeginia, tee cuniqui na miishocoriquiano naajiotasano quiyacuajani. Jaara naa miiritij, majaari quenaaja tamonu na naata cuno naajioneeginia naajiotasano jataniniu, socua na maatenunio. <sup>16</sup> Tariucuaaanu, Pueyasoori naa sequequiaari Abrahamtej:

“Janiyari seetanujuanaa maninia quia miiniutianiyani, quia jinianuucujainio superiquiano pueyanonio”.

Nia niishiri pueyanaa, tariucuaaanu Pueyaso Rupaajinia naajiotasanoori maja na sequenu: “Abraham jinianuucujainio supueno pueyara”. Maatia sequeyacuajaari: “Abraham jinianuucujainio supueno pueyanora”. Niquiriyatu pueyano sequeyari, maja queraatia. Nojuajaari pa Jiyaniijia Cristocuaja. <sup>17</sup> Cunora pueyanaa, janiyari seetanujuanaa nia sequeyacuajani, Pueyasoori seetanujuanaa sequequiaari Abraham taa nera na miiniutianiyani. Seetanujuanaa Pueyaso sequesanoori maja na naata jatanishaanu. Naacujitij, Moisés Rootasanoori maja na naata Pueyaso sequesano Abraham jataniniujihuaq. Seetanujuanaa Pueyaso sequenu nuhuaji Abraham, taa nera na miiniutianiyani, cuno nuhuaji, shocojoquiaarijaaraari cuatrociento treinta marijia. Cuatrociento treinta marijia shocojonu nuhuaji, Pueyasoori jiyacari shusha Moisés niqutioquiaari na rootasano, saajianeecaacua na quejasano. Moisésri saniniuuja pueya na niishitiojoquiaari. Naacujitij, Moisés Rootasanoori maja na naata Pueyaso sequesano Abraham jataniniu, najuhua na quiniuria pajaniyara. <sup>18</sup> Pueyaso niqutionu panishano pajaniya jaara pa niqutiosaariquia saaja pa tojiniucua Moisés Rootasano, na niqutiosocoriquiano pajaniya maara nareja niqutiosoo quiri. Saniniuuja, Pueyasocujajaari seetanujuanaa naa Abraham sequequiaari:

“Janiyari nareja quia niqutionutaniya cua sequesano”.

<sup>19</sup> Nia naasucuaari sequeya: “Jaara naa qiritij, ¿casaarano socuateeri Moisés Rootasano?” Nia sequereera pueyanaa. Jiyanoahua Abraham nuhuaji, Pueyasoori Moisés caminiujutiquiaari na rootasano, pueya niishiniuria nojoriiri seetanujuanaa Pueyaso tojiyashijaca. Cunora quiquiaariiri Moisés Rootasano. Cuno Rootasanoori quiquiaari Abraham jinianuucujainio supueno pueyano cuaara tiuquiquiaariijaatijia, taa Pueyaso sequequiaari Abrahamcujani. Nojuajaari pa Jiyaniijia Jesucristocuaja. Naacujitij, Jesucristocuajaari Pueyaso jiyaniquishano quiquiaari, na sequesacari Abraham, “quia jinianuucujainio superiquiano pueyano”. Cristocuajaari puetunu Pueyaso sequesano Abrahamjanaa masequiaari pajaniyarajuhuaq, taa Pueyasojuanaa sequequiaari Abrahamcujani. Saniniuuja, Moisésri saaja pueya niishitiojoquiaari Pueyaso seya caminiujushano nojuaja. <sup>20</sup> Abrahamra saniniuuja, majaari quenaaja tamonu pueyano quiniu quiquiaari nera na caminiujiuriquiano. Pueyasojuanaacujajaari nocua muetaquiaari, na sequenura seetanujuanaa taa Neyanuucua tiuujiaca na miiniutianiya maniniani. Cunora, Pueyaso rupaa Jesucristojiniji pa tojishano, cuno cutaraari socua pa tojihocoriquiano Moisés Rootasanojiniji.

*Casaarante Moisés Rootasano*

<sup>21</sup> Naa cua sequesacarij, ¿niaateeri jiyaniya, Moisés Rootasano naasucuaari pajaniyarano Pueyaso sequesano paraca? Majaari naa cua sequenutej. Janiyari saaja sequeyani, Moisés Rootasano jaara na naata quiriquia Pueyaso jiyanooniniuria pajaniya, paa maara Moisés Rootasano tojtijajaca quiriqiani, Pueyaso jiyanooniniuria pajaniya. <sup>22</sup> Saniniuuja, tariucuaaanu Pueyaso Rupaajiniini, paari niishiyani puetunu pajanyapuejajanaari Sesaaca pueya. Naaratej, majaari pa naata tarinitianu quiquiaari sesa miiniu. Naacujitij, paari maatia niishiyani, puetunu pueyajanaa cuaara tiuuria Jesucristoocua, Pueyaso sequesano Abraham nojori masenura.

<sup>23</sup> Pa niishiyaquishacarijia Jesucristoocua pa tiuuniuria, paari juhua Moisés Rootasano jittiasano pueya quijiani. Paari naa quijia taraatia pueyacuani, paa jaara tojiquiaari Jesucristojinijiaatijia, nocua pa tiuuniuria. <sup>24</sup> Naacujitij, Moisés Rootasanoori juhua pa jittiana quiquiaari. Juhua naatujooriniyojua pa pueratejojua Jesuucuaari. Naa na miishacari pajaniyatej, juhuacarijia Jesujiniji pa niishitiojojuuari. Naacujitij, paa jaara Jesuucua tiuquiquiaari, paari puetunu sesa pa miishanojinijianaa jiyanooshaaquiaarini. <sup>25</sup> Naa Jesuucua tiuujiaca pueya pa quishacari quiarijiatej, majaari socua pa tojiniu tariucuaaanu pa canashitijona. Moisés Rootasanoori juhua pataaco seru quiquiaari, Pueyasora na canashitijonura pajaniya, juhua naatujoori pa quishacarijia. <sup>26</sup> Quiarijia

cutara, puetunu niagianiyajanaari Pueyaso pueya, Jesuucua nia tiuuniuucua. <sup>27</sup> Naacuaajiti pueyanaa, niaa jaara moojinia tiuquinishaacanu, seetanujuanaa nioojiata nia tiuushacari Jesuucua, niaari na coquetesaaquiaa. Naa nia quishacari natatej, na Que niqiuara, niaari juhua nojuaja niquishano, na panishano muerasuniyojua nia quiniuucua juhuaj. <sup>28</sup> Naa Pueyaso muerasu pa quiniuucuatej, majaari Pueyaso niqiniu rimiajata pajaniya. Tamonu jaara Judio pueyano quiri, naajaa. Tamonu jaara tahue quiri juhuaj, naajaa. Poonijjotesano pueyano maaraja, camarnuuj pueyanonio, cunoori maja rimiajata Pueyasora. Naajuhaaj, caya, maaji, cunoori maja rimiajata Pueyasora. Jesucristoocua tiu-ujiaa pa quishacari, Pueyasora, puetunu pajaniyajanaari juhua niqiriyaatu pueyanoni. <sup>29</sup> Naajuhaaj, niaa jaara seetanujuanaa Jesucristo pueya quiri, niaari seetanujuanaa canaa supuetana Abraham jihuacuajinio supueno pueya cutara. Naacuaajitij, niaari Pueyaso sequesano Abrahamrano maseriquianojuhuaj.

#### 4

<sup>1</sup> Nia sequenu paniya socuanijia pueyanaa. Cua tojiri. Mijiria, pueyano jaara jiyaniijia quiri, na shaajesacari, neyanuuri camarnura jiyatesano na que niti. Shaajeno pueyano niyanu jaara naatujua quiri, neyanuuri juhuanojuaja maja na naata na que casami jiiitanu. Nojuajaari saaja juhua pataaco seru, naatujua na quishacarijia. <sup>2</sup> Naacuaajitij, tamsaacari cuno mueya canashitijia, cuaara mashajara quiriiaatijia, jiyaniijara jiyate-socoriquiano, taa na shipininio sequequiaaricuaani. Juhucarijia niishitiojoshiyajaari-uhua, maninia na jiiitanura nerano na que riuriotaca. <sup>3</sup> Paari naajuhaaj. Pueyaso pueya pa quiaquishacarijia, paari juhua naatujoori quiquiaarini. Paari mijiria niishishano tojiti-shaaciaarini, pa supuetanaa niishishanonio. Paari naa taraatia jiiitiasaaciaarini. <sup>4</sup> Na nuhuaji, Pueyaso jaara tari na sequesano tohuateenu paniquiaari, nojuajaari Neyanu jiyaroquiaari pocua, mijiria na rasaanura maninia maajijiniijianaa, pueyano na quiniuria. Mijiria na quishacari, nojuajaari puetunu Moisés Rootasanojuanaa tojiquiaari pa niti. <sup>5</sup> Naacuaajitij, nojuajaari na naata Moisés Rootasano tojijiaa jiyanooni, maja socua pa tojitihaanura Moisés Rootasano. Naaratej, Pueyasoori na naata pa jiyatenu na muerasu pa quiniuria cutara. <sup>6</sup> Seetanujuanaa na niishitiniuria pajaniya paari necohuanu, nojuajaari Neyanu Sohanu jiyaroquiaari pocua, poojiajinia na quiniuria. Naa poojiajinia na quishacarijia, nojuajaari Pueyaso pa sequetequiaa, "cua Quenaa". <sup>7</sup> Naacuaajitij pueyanaa, majaari tari nia quiniu Moisés Rootasano tojijiaa, juhua pataaco seru. Niaacuajaari seetanujuanaa Pueyaso niqiuohua cutara. Naa na muerasu nia quishacarijia, niaari tariuacuanaa Pueyaso sequesano Abrahamrano maseriquianojuhuaj, taa na muerasurano niqitikonu na sequequiaaricuaani.

#### *Pablo tacaashacari Galacia jiyajinia quiniaa Pueyaso pueyacua*

<sup>8</sup> Pueyaso nia niishiyaquishacarijia pueyanaa, niaari juaashiquiaata shipinijosano nia pueyasohua tojijiaa quiquiaari taraatia. Cuno casaari maja seetanujuanaa Pueyaso. <sup>9</sup> Quiriiaa saniniujia, niaari Pueyasojanaa niishiya. Pueyasojanaa cutaraari saniya nia niishiya. Naa Pueyaso panishano muerasu nia quishacarijia, ¿casaara najuhuaa supuetanaa pueya niishishano miiniuria nia paniuhua socuani? Cuno, canaa supuetanaa Judiocuaca rootasanoni, cunoori maja na naata cumaquiniu niagianiya. Niaari najuhuaa na tojijiaa quiniutianiya. <sup>10</sup> Niaanaari puetunu juucajanaa niishijiaa quiaa, juhua canaa supuetanaa Judiocuaca. Niaanaari sequetequiaa: "Cuno juuca, majaari pa miaquenu quiniutianiya. Cunoori pueresano juuca, Pueyaso jiyanooniuria pajaniya". Niaanaari naa miiquiaa puetunu shuniyarajanaa, puetunu marijarajanaano. ¿Casaara naa miijiacara nia quirihoacuuarini cuarta Pueyaso pueyanaa? <sup>11</sup> Naa nia miiniuucuatej, janiyari jiyanoohua tacaya quiriiaa niacuani. Janiyari tama sequequiaajaajua: "Cuno pueya tajinia Pueyaso rupaa cua pohuatasanoquiri najuhuaa quiquiaari".

<sup>12</sup> Cuarta Pueyaso pueyanaa, janiyari seetanujuanaa nia sequenu paniyani. Nia miirio-huarohua taa cua miiquiaaricuaani, shusha cua tiuquishacari niaacua. Moisés Rootasano niishiyashijiaa nia quishacari, janiyari na tarinitiaquiaari tojiniuni, juhua niagianiya cua quiniuriajuhuaj. Saaja Jesucristo rupaa nia tojirihohua cutara taa cua miiquiaaricuaani. Cua panishano pueyanaa, niaari maninia cua jiiitiquiaari niaata cua quishacari. <sup>13</sup> Niaacuajaari niishiya, cusosu cua quiniuucua, janiyari shushajanaa Jesucristojiniji pohuataquiaari nia niqiarani. <sup>14</sup> Naa cusosu cua quishacari niaatatej, naajaa, majaari nia ruuretanu quiquiaari janiya, naa sacuaaraatia cusosu cua quishacarijia. Majaari quenaaja nia soonu quiquiaari janiya. Saniniujia, niaari cua tojitiacquiaari juhua Pueyaso serujanaa, nia niqiuara cua pohuatasacari Jesucristojiniji. Naa cutaraari seetanujuanaa cua tojiquiaari juhua Jesucristojanaa. Niaari naa timitiaquiaari janiyatej, Jesujiniji cua pohuatanuucua niagianiya. <sup>15</sup> Quiriiaariuhua pueyanaa, ¿casaa nia tojetacuanu? ¿Casaara

nia tarinitiarohuacuaa shuquiriaatia nia quiniuurini, taa nia quiquiaari coteenucua-jani? Janiyacuajaari niishiquiaarini, jiyanoehua nia paniniucuaa janiya, jaara nia naata quiquiaari, niaa maara nia namijia samiriootaquiaari nia niqutiosocoriquiano janiya, cucua nia taraajesacari. <sup>16</sup> Quiarijia naa cua sequesacari seetanujuanaa nijaniyatej, ¿ni-ateeri cunora cua niqunutiianiya juhua nia paraca? <sup>17</sup> Cuno pueya, najuhuaa tamaatia nia niishitiojoquiaa Pueyaso rupaani, quiarijia nojoriiri maninia miiquiaa nijaniya na sapojonuta. Nojoriiri nia shuquiritiya, nojoriicua nia tiuuniuria. Nojoriiri naa miya, canaa nia cartenura, saniniuuja nojori tojjijaca nia quiniuria. Naacuajitij, majaari tari cua rootasano tojtiajaca nia quiniu quiniutianiya. Niaari cua cartenutaniyajuhaaj. <sup>18</sup> Quiarijiani, cuno pojoriiri nia shuquiritiyacuaa. Majaari nia jyaniniu janiya nia sequeyani, maja maninia parta pueya pa shuquiritiyuuria. Taaquiririinj, maniniacua-jaari parta pueya pa shuquiritiyuuria, seetanujuanaa pa naacunura nojori. Niaacuajaari niishiya pueyanaa, janiyari jyanohua nia tojishano pueyano quiquiaarini, Jesucristojiniji cua pohuatanuucua nia niqiuara. ¡Naa seetanujuanaa pueyaracaanu pa panijiacara nia jiyateriquiani, maja saaja nia shuriucua cua quishacari! <sup>19</sup> Quiquiohuaniojuanaa, jyanohua cua tacaashacari niaacua, coojiaari jyanohua noonu pacuterohuacuhuaaj, naatej, taa maaji nooquiaacuaa na manajani, quera na ranu panishacari. Naajuhuaaj, janiyari naa pueyaracaanu miijionutaniya naquiya niaacuani, niaa cuara jatanishaajeajia, quiarinio pueya nia quiniuria. Niaari naa quiniutianiyaquij, seetanujuanaa Jesucristo quishacari nioojiacajinia, juhua nojuaja nia quiniuria. <sup>20</sup> ¡Seetanujuanaa nia shuriucua cua jatariquiani, maninia cua niishitiojonura nijaniya! Naa cua quishacari tucuaaanu nijaniyajinijitij, majaari cua niishiniu taa nia quiya seetanujuanaani. Niaanaari Moisés Rootasano tojjijacara quiriohuacuaa. ¿Niaateeri seetanujuanaa Jesucristo rupaa cartecanu, maja soj?

*Miriqi pohuatasano Agarjiniji, Saaranijinijio*

<sup>21</sup> Moisés Rootasano tojtiajacanaa, cua tojiri. ¿Majateeri tariucuaaanu Pueyaso Rupaajinia nia serojonu quiquiaacuaja, taa Abrahamjiniji na pohuataani? <sup>22</sup> Moisés Rootasanocuaajaari Abrahamjiniji sequeya, nojuajaari caapiqui nianuraca quiquiaari, caapiqui nucuaacuajinijuhuaaj. Abrahamri neco seru muetequiaari. Na sesojoquiaari-iri Ismael. Na nuhuaji, saniya necojuanaari nera muetuquiaarijuhuaaj. Na sesojoquiaari-iri Isaac. <sup>23</sup> Pueyanaa, Agar jaara Abrahamra muetuquiaari, cunoori tama Abraham miishanojuaja quiquiaari, mueya na panishacari. Maja cutaraari Pueyaso panishano. Saniniuuja, saniya necocujanaa jaara nera muetuquiaari na nuhuaji, cunoori Pueyaso panishano quiquiaari cutara, na camishano maajijianaa muetusacari nera. Naacuajitij, Pueyasoori tarijia na sequesano Abraham tohuateequiaari. Naa na sequequiaariiri: “Abrahamnaa, quiaari nianuraca quiniutianiya”. Naa Pueyaso sequenucuatej, necocua Saaraari muetuquiaari, motaja na quishacari. Cunoori maja tama nojori cumaacatajaaja. Cunora, Isaacri Pueyaso sequesanojuanaa mueya cutara, maja juhua Ismael, seru mueya. <sup>24</sup> Nio caapiqui maajipohuani, Agar, Saaranio, nojoriiri juhua caapiqui seetanujuanaa Pueyaso sequesano na pueyara. Naacuajitij, Agarri miriqui juhua Moisés Rootasano, Sinaí tuhuananujinia Pueyaso niishitiojosano Moisés. Naaratej, Moisés Rootasano tojtiajacaari juhua seya quiquiaa, taa Agar quiquiaari serucuaani. <sup>25</sup> Seetanujuanaari, Agarri miriqui juhua Sinaí tuhuananu Arabia jiyajinia. Saniniuuja, nio pa quishacarinia, Jerusalén tiacaari juhua Sinaí tuhuananu, cuno tiacajinia quiniaa pueya quiniucua Moisés Rootasano tojjijaca. Cunora, Moisés Rootasanoori juhua nojori jiiatiana quiya, juhua poonijiotasano seya nojori quiniuria. <sup>26</sup> Saniniuuja, quiarinio Jerusalén tiacani, jiyocuaaanu Pueyaso racatasano pa quiquioranoni, cunoori seetanujuanaa Pueyaso muerasurano cutara. Cunoori maja Moisés Rootasano tojjijacara. Cuno tiacaari miriqui juhua Saara. Paacuajaari juhua Saara niquiohua cutarani. Majaari tari pa quiniu seru niquiohua. <sup>27</sup> Tariucuaaanu Pueyaso sequesanoajaari naa naajiotasano quiyajuhaaj: “Niyajaru maajinia, shuquiriaatia quia quiri. Quiaacuajaari mueya noonu saniyashijia. Naajaa, majaari quia taraajenu. Quia shuquiriniutia quia jaaquequejoro cutara. Quiaacuajaari cartesaquiaari niyajaru quia quiniucua. Naajaa, quiaacuajaari socua queraatia niquiohuaraca quiriquiano cuno niyacaraca maajijiniji”.

<sup>28</sup> Cuarta Pueyaso pueyanaa, paacuajaari juhua Isaacni. Na nucuarano Saara tiuuniucua Pueyaso sequesanoocua, taa na muetunutaniyani, naacuajiti nojuajaari neyanu Isaac raquiaari. Quiarijiani, paari naajuhuaaj. Jesucristo rupaacua pa tiushacari, Pueyasoori na cumaacata pa jataniquiaari seetanujuanaa na muerasu pa quiniuria. <sup>29</sup> Maninia nia niishiri nio pohuatasano, pueyanaa. Abraham jaara mueya paniquiaari, nojuajaari neco seru manajoquiaari tamajaaja. Saniniuuja, saniya necocujanaa jaara nera muetuquiaari, cunoori Pueyaso Sohanu cumaacata raaquiaari cutara. Na nuhuaji,

seru niyanuuri Pueyaso Sohanu cumaacata rasano miitiaja quiquiaari. Quiariijaari naajuhua, Pueyaso ruuretajaca pueyari Pueyaso Sohanu jatanishano pueya miitiaquiaa.<sup>30</sup> Quiariija nia niishiri cutara, naa naajiotasaaquiaaricuaajaari tariucuaaanu Pueyaso sequesano Abraham:

“Quia niquiocua seru quia taanuure neyanuta puetunujuanaa. Cuno, janiya seetanujuanaa quia sequequiaari niqutionuni, cunoori maja Agar niyanurano. Cunoori seetanujuanaa quia niquiocua muetusanorano, cua Sohanu cumaacata rasano mueyaranotuhua.”

<sup>31</sup> Paari naajuhua, cuarta Pueyaso pueyanaa. Paari maja seru niquiohuani. Paari Jiyaniija niquiohuajanaa cutarani.

## 5

### *Saaja Jesucristoocua tiuujiaca pa quiri*

<sup>1</sup> Jesucristo cusunucua pocuara, nojuajaari Pueyaso niquiohuara pa jiyatequiaari, maja socua Moisés Rootasano tojiija pa quiniuria. Naarate pueyanaa, jiyanohua nia cojuare tama nia cuaqueyajaaja saaja Jesucristoocua nia tiuuniuria, Pueyaso jiyanooshano pueya nia quishacari tari. Majaari supuetanaa rootasano tojiijaacara nia quiniuhua. ¿Moisés Rootasano tojiijicateeri jiyanooshaanutaniya? ¡Maja! Maja pa naata tama pa cuaqueyajaaja jiyanoootini Pueyaso, Moisés Rootasano pa tojinuucua. <sup>2</sup> Cua tojitiare pueyanaa. Janiyari Pablóni. Janiyajanaari seetanujuanaa nia sequeyani, niaacuajaari Jesucristoocua tiuujiaca, Gálata jiyajinia quiniaa pueyanaa. Cunora, Pueyasoori nia jiyatequiaari na muerasu nia quiniuria. ¿Niaateeri jiyaniya niaa seetanujuanaa Pueyaso pueyara quiniutianiya cutara, nia cararaatiuuquia co miatejosaanuucua? ¡Maja! Niaa jaara naa niishirojiya, niaari Jesucristo cusunu jiyatenutaniya najuhua na quiniuria nijaniyara. ¡Pueyanaa, majaari nia tojinu cuno Judiocuaca, canapue nia shiniujuquiaa nia cararaatiuuquia co miatejosaanuracuajani, seetanujuanaa Pueyaso pueya nia quiniuria! <sup>3</sup> Janiyari socua sequenu paniya noo pojoririani, cararaatiuuquia co miatejonujuacatej, nojori jiyaniuuquia naa nojori miishacarij, nojori cutaraari seetanujuanaa Pueyaso muerasu. Cante naa miijiani, nojuaja cuaara tojiiria puetunu Moisés Rootasanojuanaa. ¿Niaateeri jiyaniya nia naata puetunu Moisés Rootasanojuanaa tojinu, Pueyaso jiyanooniuria nijaniya? ¡Maja! <sup>4</sup> Naa tama nia cuaqueyajaaja nia jiyanoootiniu panishacari Pueyasotej, Moisés Rootasano nia tojinuucua, niaari Jesucristojiniji carejerucuaa. Majaari Pueyaso naata maninia miiniu nijaniya socua, taa maninia na miijuiaacuua na panishano muerasuni. <sup>5</sup> Pajaniya saniniuujia, paari Pueyaso Sohanuraca cutarani, Jesucristoocua pa tiuuniucua. Naacuajitij, paari niishiyani paari tojetaarucujanaa sesa miyashijiacara jiyatesaanutaniyani. <sup>6</sup> Quiarijiani, Jesucristo rupesano pa quishacari nocua pa tiuuniucua, paa jaara pa cararaatiuuquia co miatesano quirini, maja soj, naajaa. Cunoori najuhuanaj. Socua maninia cutaraari Jesuucua tiuuniu, Pueyaso panijia pa quiniuria, parta pueya pa paniniurajuhua.

<sup>7</sup> Cuarta Pueyaso pueyanaa, niaacuajaruhua Jesuucua tiuujiaca quijia seetanujuanaa. ¿Quiariijaariuhua, cante nia tarinitiriohuacuaa seetanu rupaacuajanaa nia tiuyaquiniurani? <sup>8</sup> Cuno pojori niishitiojosano Jesuucua tiuuniu nia tarinitianurani, cunoori maja Pueyaso niishitishano nojori. <sup>9</sup> Cunora, seetanujuanaari nio sequesano: “Shiitaniyojua jereca mashaca jaara shoqueeca mashacajinia shuushaare, cuno shiitaniyojuuari puetunu cuno mashacajanaa jereteja”. Naajaariuhua, shiitaniyojua sesa niishitiojosanoori puetunujuanaa pa sesojuajuhua. <sup>10</sup> Naajaa, janiyacuaajaari pa Jiyaniijaacuua tiuya seetanujuanaani, majaari nia tojinu quiniutianiya tamaatia cuno pojori niishitiojosano. Saniniuujia, Pueyasoori noo pojori saniitioriquiano, tamaatia na niishitiojonuusanota nia cushitiojoquiaani. Cante nia niishitiojiya sesani, jaara quiri cuarta Jesucristo jiyaramiquishano pueyano, tama janiyajaaja soj, naajaa, nojoriiri saniitiosariquiano.

<sup>11</sup> Cuarta Pueyaso pueyanaa, majaari cua niishitiojonu quiquiaa taucacajinjimio Jesucristoocua tiuujiaca, nojori miatejonura na cararaatiuuquia co, seetanujuanaa Pueyaso muerasu nojori quiniuria. Janiya jaara naa seetanujuanaa niishitiojoriquiaani, cuarta Judiocuaca maara naquiya cua miitiaaquiriquiani. Saniniuujia, Jesucristo cusunucua niyacutesanojinia pocuara, paari saaja naacua jiyanooshaaquiaani. Naa cua niishitiojonuucatej, Judiocuacaari jiyanohua cua juaaquiaani. <sup>12</sup> Majaari nojori nia tojinu, nojori niishitiojosacari nia cararaatiuuquia co miatejosaanura. Maninia juhuari cuno miatejonuunu porocua jayosaanura nia tajiniji, maja socua nojori cushitiojonura nijaniya.

<sup>13</sup> Cuarta Pueyaso pueyanaa, Pueyasocuaajaari nia sequequiaari na muerasuniyojua nia quiniuria, Neyanu Jesucristoocua nia tiuuniucua. Naacuajitij, majaari tari nia quiniuhua poonijotesano pueya, taa nia quiquiaaricuaani Moisés Rootasano nia tojishacari



pueyaracaanu. Naa Moisés Rootasano tojjiaca nia quiyaquishacari taritij, naajaa, majaari nia jiyaniinu nia naata miiniu puetunu nia cuaqueya miiniu panishanojuanaa. Maja. Maninia cutaraari niarta Pueyaso pueyata nia cumaquitioojonura, seetanujuanaa nia panitioonuta. <sup>14</sup> Naa jaara naa miijiaca quiriquiatej, niari puetunu Moisés Rootasanojuanaa tojiyacujaja, taa na rootasanojinia naajiotasano quiyacuajani. Naa sequeyari: “Panijia quia quiriquia, taa quia paniyacuaa tama quia cuaqueyajaajani”.

<sup>15</sup> Naarate pueyanaa, tama nia cuaqueyajaaja nia cojuare. Majaari pueyaracaanu nia juayonuujutatanu, naatej, taa sareya sayonuujutaquiaacuaani. Naa jaara naa quiriquiatej, niari socua puecotoonutaniyaquij.

*Taa quiijate tama na panishanojuaja miijia pueyanoni, Pueyaso Sohuanu tojijia pueyanonio*

<sup>16</sup> Janya nia sequeya cutarani pueyanaa. Cua tojiri. Pueyaso Sohuanu tojjiaca nia quiri pueyaracaanu. Naacuajitij, majaari sacuaraatia tama nia panishanojuaja nia miiniu quiniutianiya. <sup>17</sup> Nio nia niishiri cutara. Cuno, poojiajinia sesa casaa pa panishanoni, cunoori Pueyaso Sohuanu paraca. Naajuhuaaj, Pueyaso Sohuanuuri poojiajinia sesa casaa pa panishanojuaja nia miiniu puetunu. Naacuajitij, cuno pojori miaquetoojosacari poojiajinia, cunora, majaari pa naata miiniu taa pa miiniu paniyacuajani. <sup>18</sup> Saniniuujia, Pueyaso Sohuanu jaara nia cumaquitioojuaja saaja Pueyaso nia tojiniuria maninia, cunora, Moisés Rootasanoori tojini paniyacuashaanutaniya tari. Naacuajitij, niaacuajaari maninia miiniutianiya saa Pueyaso Sohuanutaja.

<sup>19</sup> Maatia niquishanocujajaari taa pueya miiquiaani, noo pojori, canapuate tama na panishanojuaja miijiacaani. Nojoriiri juhuajaniya na camishoo maajipohua numuetucunujuaca, sacuaraatia miitioojua narta canuutajaarihuaj. Maajipohuari naa sacuaraatia miitioojua narta maajipohuatajuhuaj. Pueyari saaja naa miiniuucua jiaatiyacari sacuaraatiatej. <sup>20</sup> Naajuhuaaj, nojoriiri tama nojori pueyasorajaaja nojori shipinishano casaa secojonuujuaca. Nojoriiri shimiacurijuhuaaj, narta pueyano shimiojonuujuaca. Narta pueyano niqiniinu paniyashijiacarihuaj. Nojoriiri juaatioojuacajuhuaaj. Nojoriiri narta pueyano jiihtasanoocua jiaatiyacajuhuaaj. Cunora, nojori niqiniinu paniyacuajiaari. Nojoriiri maja na niishiniu rejetenu na juaaquiaa. Ritia juaajiaaari. Pueya nasojoua narta pueyanocuarajaarihuaj. Naacuajitij, nojoriiri narta pueya raquiriojotaquiaa narta pueyajiniji. Nojoriiri saaja tama nojori panishano pueyajaaja panijiaa, canapuate maninia miiquiaa nojoricuajani. <sup>21</sup> Cuno pojori, naa sacuaraatia miijiaa pueyaracaanu Pueyaso niqiarani, nojoriiri maja na niqiniinu paniniu quijia narta pueyano, cante taquiya maninia miishaaree nocuajicuaani. Nojoriiri sacuaraatia mashaasequenujuacajuhuaaj. Nojori mashaasequenuusacari, puetunu sacuaraatia casaa miijioquiaaajanaari. Jiyanoohua miaquenu porocua. Nojori queranacusacari, nojoriiri socua tamaatia sesa casaa miiniu niishijiacajuhuaaj. Niajaniya saniniuujia cuarta Pueyaso pueyanaa, cua tojiri. Cante naa sacuaraatia casaa miijiojuani, nojuajaari maja Pueyaso jiihtasano na quiniu quiniutianiya, pueyaracaanu rishijia na quiniuria shuquiriaatia.

<sup>22</sup> Saniniuujia, paa jaara Pueyaso Sohuanu shanacure poojiajinia na poonijionurani, nojuajaari parta pueya panijiaa pa jiyateja. Poojia jiyateja shuquiriaatia quijiaaari. Poojia cajitijajaarihuaj. Jacaria pocuajara pa jiyateyajaarihuaj, juhuajaniya sashijiano. Pueyaso Sohuanuuri maninia pueyanora pa jiyatequiaa, jiyanoojiano. Pa sequesano miijiaa pa jiyateyajaarihuaj, pueya tiuniuria pocua. <sup>23</sup> Pueyaso Sohuanuuri pa jiyateja pueya shocoteyashijiarajuhuaaj. Pa niishitiquiaaajarihuuaa tama sesa casaa pa cuaqueya panishanojuaja pa rejetenura. Paa jaara naa miijiaca quiriquia Pueyaso Sohuanu cumaacatani, majaari quenaaja niqiriyaatu Moisés Rootasanojininio sesacanu quiniutianiya pajaniya. <sup>24</sup> Seetanujuanaari, paa jaara Jesucristo pueyanora quiquiaarini, pa rupuesacari nojuaja, paari tari poojia sesoriquia seque cusojuaquiaari Cristotani, puetunu sesa pa jiaatianujuanaano. <sup>25</sup> Pueyaso Sohuanu jaara nia samiitianiijioquiaari Pueyaso muerasu nia quiniuria, quiarjia seetanujuanaa pueyaracaanu na tojjiaca nia quiri cutara. <sup>26</sup> Majaari tama pa cuaqueyajaaja pa jiyaniinu, paa socua maninia pueyano parta pueyajinijini. Paa jaara pueya shocotejaca quiriquiani, paari parta Pueyaso pueya juaatiniutianiyan. Maja maninia, paa jaara juaatishaareni tamonu jaara socua tojishano pueyano quiri pajaniyajiniji, naajuhuaaj, tamonu jaara socua maninia miishaare pajaniyajiniji. Majaari naa miijiaa nia quiniu Pueyaso pueyanaa. Saaja maninia quijiaa pa quiri cutara.

## 6

*Niarta Pueyaso pueyata nia cumaquitioojoriquia*

<sup>1</sup> Cuarta Pueyaso pueyanaa, naa jaara parta Pueyaso pueyano niquiriquia sesa miyano, jacaria nia nacasure. Cuno niajanijajinijinio canapuate Pueyaso Sohuanu niishitijaraca

cutarani, nojori cuaara jacaria na nacasuuranooj, sesa miiniu na tarinitanuuhuaa. Cante cuno sesa miijia nacasuyani, nojuaja cuaara na nacasuura seetanujuanaa na paniniutia narta pueyano. Naajuhuaaj, jiyanohua nia cojuare tama nia cuaqueyajaaja Sesaaca mariqui nia saniniujiurijaariuhuaaj, sesa nia miiniurijuhuaaj. <sup>2</sup> Maninia cutaraari nia cumaquitoojonura niarta Pueyaso pueyata, niaa jaara taraatia miishaare. Naa pa cumaquishacari parta Pueyaso pueyatej, paari naa pa Jiyaniijia Cristo rootasano pajaniyarano tohuateenutaniyani.

<sup>3</sup> Najuhuaana quijia jaara jiyaniya nojuaja cutara niishijia pueyano, pueya tojishano pueyanotuhuaaj, naa niishiriojojaari tama na cuaqueya sapojiyajaacujua. <sup>4</sup> Puetunu nijaniyajanaa cumaati tama niishiriojoquiaaajacujua, taamueca pueyanote nijaniyani, maninia miijia, sesa miijia soj. Niaa jaara seetanujuanaa maninia miijiaa quiriquia, tama maninia nia miishanojuaja nia timitiare. Niarta Pueyaso pueyano jaara socua maninia miijia quiri nijaniyajinjia, socua sesa miijia soj, niaara, naajaa. Maja cunora taraajenu, maja cunora shuquiriaatia quiniujiuhuaaj. Saaja shuquiriaatia nia quiri, niaa jaara maninia miiquiaa taate nia naata miiniucujani. <sup>5</sup> Puetunu pajaniyajanaari tamaatia poonijiosano jiiitiaani. Tama nijaniyajaaja cumaati na miiquiaa maninia, Pueyaso shuqiritianura nijaniya, seetanujuanaa shuquiriaatia nia quiniuria.

<sup>6</sup> Canapete Pueyaso rupaa niishitiojosaquiaani, cuno pojori cuaara na niishitiojonaa niqitiojoora nojori casamijinjia saniniuuja, nojori niishitiojonaa jiiitianura nojori panishanojuhuaaj.

<sup>7</sup> Pueyanaa, maja tama nia cuaqueyajaaja nia sapojonu nia jyanishacari niaari sanitiyoaquihsaanutaniya sesa nia miiniucua. Majaari quenaaja tamonu pueyano na naata Pueyaso rerequetenu. Pueyasoori sanitiojua cutara. Naaratej, nio miriqui sequesano nia niishiri: "Casaa jajau pa natareeni, paari juhua cuno jajau senoonutaniyajaaniuhuaaj". Nio miriqui sequesanoori nio niishitiojia: cante maninia miijiani, nojuajaari maninia miishaanutaniyajaacuhuaaj. Naajuhuaaj, cante sesa miijiani, nojuajaari sesa miishaanutaniyajaacuhuaaj sesa na miiniucua. Cunoori maja rimiajata. <sup>8</sup> Naacuajitij, canapete tama na cuaqueyajaaja shuqiritijiaa sacuaraatia casaa na miishacari mijiriani, Pueyasoori cuno pojori quejoonutaniya cutara, pueyaracaanu na saniitiosocoriquiano. Saniniuuja, cante Pueyaso Sohuanu tojjiani, Pueyaso panishano na miiniuria puetunujuanaa, nojuajaari pueyaracaanu rishijara jiyatesaanutaniya cutara. Nojuajaari shuquiriaatia quiniutianiya pueyaracaanu. <sup>9</sup> Cunora pueyanaa, niaa jaara maninia miijiaa quiri, majaari maninia miiniuria nia taajenu. Pueyaracaanu maninia miijiaa nia quiri. Niacuajaari niishiya, pueyano jaara na cuhuariquia natate, nojuajaari na sashijia. Majaari ritia na senoonu. Nio miriqui sequesanoori pa niishitiya, paa jaara Pueyaso Sohuanu tojinu tarinitiaaquirini, paa cuaara sashiirijuhuaaj. Na nuhuaaj cutara paari jyanohua shuquiriaatia quijiaara jiyatesaanutaniyani, maninia pa miiniucua. <sup>10</sup> Naacuajitij, jaara pa naata quiriquia, maninia pa miiriquia puetunu pueyajanaa. Saniya maninia cutaraari puetunu parta Pueyaso pueyajanaa pa miiniuria maninia.

*Pablo nacasusacari pueya, quera na tucuatasaacari na naajio*

<sup>11</sup> Nia niquiri cua naajio pueyanaa. Naa quera namijiaaca cua naajiosacari niaacuaratej, nia niishiri janiyajanaari nio naajiaa tama cua juaashiquiatajaajani. <sup>12</sup> Socua cua tojiri pueyanaa. Cuno pojori, nia shiniujiuquia nia cararaatiuquia co nia miatejonurani, nojoriiri naa nia miitini paniya saaja narta Judiocuaca timitianura nojori. Nojoriiri narta Judiocuaca puerequiaa. Nojoriiri niishiya narta Judiocuacaari nojori miiniutianiya naquiya, miatesoo nia cararaatiuquia co quiniucua. Majaari nojori tiuuni quiquiaa saaja Jesucristoocua, Pueyaso pueya nojori quiniuria. Cunora, nojoriiri jyanohua paniya nia cararaatiuquia co miatesano pueya nia quiniurijuhuaaj, taa puetunu Judiocuacajanaacuaani. <sup>13</sup> Cuno pojori, canapete na cararaatiuquia co miatesanocuaani, nojorijanaari maja nojori tojinu quiquiaa puetunu Moisés Rootasanojuanaa. Naajaa, nojoriiri nia panitiaa nia cararaatiuquia co miatesano nia quiniurijuhuaaj. Niaa jaara miatejosaare, nojoriiri tama timiquionutaniyajaaja, nojori tojitiajaca nia quiniucua. <sup>14</sup> Janiya saniniuuja, Pueyaso cuaara cojuara janiya maja cua shuqiritianura tama cua miishanojuaja. Janiyari saaja pa Jiyaniijia Jesucristo shuqiritianu paniquiaani, pocuara na cusonuucua niyacutesanojinia. Naacuajitij, janiyari mijiria niishishanoocua jiaatiaashijara jatanishaaquiaarini. Mijiria casaari maja na naata shiniujiuniu janiya, nocua cua jiaatianura socua. <sup>15</sup> Pueyanaa, pa cararaatiuquia co jaara miatesano quiri, naajaa. Naajuhuaaj, pa cararaatiuquia co jaara miatesoo quiri, naajaa. Majaari rimiajata pa quiniu Pueyaso niqiara cunora. Saaja panishano cutaraari, quiarinio pueyanora pa

jatanishaanura Pueyaso Sohuanu cumaacata. <sup>16</sup> Puetunu nio sequesanoocua tiuujiaa-janaani, Pueyasoori nojori jiuujia cajitiquiaa, na jiyanooshacari nojori. Cuno pojoriiri seetanujuanaa Pueyaso saquiriojosano pueya.

<sup>17</sup> Tariucujaari cua rootasano nio naajioneejinia. Quiarijiani, tamonu cuaara socua cua taajeteyaquiiria sesa na niishitiojosanota nijaniya. Janiya cutaraari pa Jiyaniijia Jesucristojiniji niishitiojonani. Cua cuaqueyajinia nio majacuyashiquiajinijini, cunojiniji maatia niishishiyari, janiya seetanujuanaa Jesu seruni.

<sup>18</sup> Cua panishano cuarta Pueyaso pueyanaa, nioojia cuaara jiitiaara pa Jiyaniijia Jesucristo cumaaca, na niishitiajanio. Cuaara naa quiiriatej.

## PABLO NAAJIONEE ÉFESO TIACAJINIA QUINIAA PUEYASO PUEYACUARA

*Pablo saruhuatasacari Jesucristo tojtijajaca*

<sup>1</sup> ¿Niaate quiyajaa cuarta Pueyaso pueyanaa? Janiyari Pablóni, Jesucristo jiyaramiquis-hano na rupaa cua pohuatanura, taa na Que Pueyaso paniquiaaricuajani. Niaacuara naajianijia, canapue Pueyaso saquiriojoquiaari tama neracuajani, canapueete Jesucristo tojtianaacuajani. <sup>2</sup> Pa Que Pueyaso, mariyata pa Jiyaniijia Jesucristo cuaara taraajeera niaacua, maninia na miiniuria niajaninya. Nojori cuaara cajitiiria nioojia pueyaracaanu-juhuaj.

*Taa Pueyaso miiquiaa pajaniyani Cristo rupuesano pa quishacari*

<sup>3</sup> Pa Jiyaniijia Jesucristo Queeri Pueyaso. Nojuaja pa shuquiritiare. Neyanu Jesucristo pa rupuenuucua, Pueyasoori capora pajaniyara. Nojuajaari jiyanoehua maninia miiquiaa pajaniya, puetunu jiyocuacaanu na jiiitasano cumaacatajanaa. <sup>4</sup> Pueyaso niishishacari taa Neyanu miiniutianiya pocuarani, jiya shipiniyaquishacarijia, nojuajaari tari pa saquirio-joquiaari na shuriucua quijiaca pa quiniuria. Pa saquiriojoquiaarijiaariuhua na tojijiaca pa quiniuria, tojetaarucujanaa sesa miyashijia pa quiniuriajuhuaj. <sup>5</sup> Panijia na quini-ucua, nojuajaari pa saquiriojoquiaari na muerasura na jiyatenura pajaniya, Jesucristo jaara maninia miiri pajaniyara. Pueyasoori naa miiquiaa pajaniyatej, taa tariucuaaanu na niishiriojoquiaari na miiniuria pajaniyacujani. <sup>6</sup> Jiyanoehua maninia na panishano Niyanuniojua miiniucua pocuara, nojuajaari pueyaracaanu jiyanooquiaa pajaniya. Nojuajaari jiyanoehua capora. Naa maninia na miiniucua pajaniyatej, paari cunora pueyaracaanu na maniniuhuaqueetaquiaani. <sup>7</sup> Niyacuasanoinjia Neyanu shootenuucua na nanaca pocuara, Pueyasoori pa jiyanooquiaari na muerasu pa quiniuria. Naaratej, majaari Pueyaso saniitionu quiniutianiya pajaniya. Puetunu sesa pa miishanojinijijianaa pa jiyanooquiaariiri. <sup>8</sup> Pueyasoori na paniniu niishitiquiaari pajaniya, na niquitiosacari na niishitijaja pajaniya, puetunu casaa niishijijajanaa pa quiniuria. <sup>9</sup> Nojuajaari jiyanoehua tariucuaaanu niishiriojoquiaari taa na miiniutianiya puetunu na shipinishanoocuarajanaani. Quiari naataja saniniujia, nojuajaari jiyasohua na miiniu panishano niishi-tiquiaari pajaniya. <sup>10</sup> Pueyanaa, nia niishiri casaa Pueyaso miiniutianiyan. Nojuajaari Cristo jiyatenutaniya Jiyaniijijajanaa na quiniuria. Naacuajitij, puetunu jiyocuacaanu quijiacajanaa, mariyata puetunu mijiria quijiacajanaari na tojjiacara quiniutianiya. Nojuajaari naa tohuateenutaniya tamacari, taa tamajaaja na niishiriojoquiaaricuajani.

<sup>11</sup> Pueyasoori tariucuaaanu pa saquiriojoquiaari Neyanutaja na cojiritianura pajaniya, maninia na miiniuria pajaniya. Pueyasojuaanaari tariucuaaanu naa niishiriojoquiaari maninia na miiniuria pajaniya. Nojuajaari pueyaracaanu tohuateequiaa taa na miiniu paniquiaaricuajani, niishijia na quiniucua. <sup>12</sup> Nojuajaari pa saquiriojoquiaari maninia quijiacara na jataniniuria pajaniya. Cuarta Judiucacajinijinio pueyani, canaari coteenu-juanaa Jesucristoocua tiuquiarini. Naa jiyanoehua maninia Pueyaso miiniucua canaa, nojuaja cuaara maniniuhuaqueetasaria jiyanoehua. <sup>13</sup> Quiari naataja nia tojishacari Jesucristo rupaa, niaari cunoro seetanu rupaacuajanaa tiuquiaarijuhuaj, Pueyaso muerasura jatanishano nia quiniuria. Naa nocua nia tiuuniucuatej, Pueyasoori Neyanu nia rupueetequiaari. Na Sohanu niquitioquiaari niajanijiaarijuhuaj taa na sequeequiaar-icuajani. Naacuaji niishishaaquiaari, niaari seetanujuanaa Pueyaso muerasu. <sup>14</sup> Pueyaso Sohanuraca pa quishacari, paacuajaari niishiyani, paari puetunu Pueyaso sequesano Neyanuranujuanaa masenutaniya Neyanutajuhua. Pueyaso Sohanu pa jiiitasacari, paari niishiyani, Pueyasoori pa rijionutaniya puetunu na saquiriojosano pueyatajanaa, na muerasu pa quiniuria na shuriucua. Jiyacaritij, paari tojetaarucujanaa jatanishaanu-taniya juhua Neyanu pa niquishaanurajuhua. Cunora, Pueyasoori jiyanoehua manini-uhuaqueetasano quiniutianiya, jiyanoehua maninia na miiniucua pajaniya.

*Taa Pablo secojoquiaari Pueyaso pueyacuarani*

<sup>15</sup> Janiyari niajanijajinijij tojiriucuaani, taa pa Jiyaniijia Jesucristo tiuujia nia quiyani, taa parta Pueyaso pueya panijia nia quiyajaniuhua. <sup>16</sup> Cunora, pueyaracaanu cua secojosacari niaacuara, majaari cua tarinitianu quiquiaa Pueyaso cua sequenura “paacarasho”, maninia na muerasu nia quiniucua. <sup>17</sup> Pa Jiyaniijia Jesucristo Queeri shacantushiqui quijia na cumaacajinia. Janiyari niaacuara na secojoquiaani, nojuaja niquititionura niajaninya jiyocuacaanuji niishitijaja. Naacuaji nia naa niishiniu na niishitiniu

panishano niajaniana, maninia nia niishiniuria nojuajuhua. <sup>18</sup> Janiyari niaacuara secojoquiaajaaniuhua, Pueyaso cuaara cuhuataara nioojia, maninia nia niishiniuria casaara Pueyaso saquiriojoquiaari niajanianiana, casaa na miiniutianiana niaarajanuhua. Janiyari niaacuara secojoquiaajuhua, maninia nia niishiniuria taa Pueyaso muerasu jiyatesaanutianiana shacantuuca quijiaa nojori quiniuriani. <sup>19</sup> Janiyari secojoquiaajuhua, Pueyaso cuaara niishitiiria na cumaaca niajaniana, cuno, nioojiajinia poonijianiana. Na cumaacaari jiyanojua, puequeyashijia. <sup>20</sup> Pueyasocuaajaari cuno na cumaaca poonitijioquiaari Cristo quetejinia, nojuaja jaara na samiitianiquiaariuhua macujiniji. Jaara na samiitianiquiaari, cuno na cumaacata na cajitiquiaariiri Jiyaniijajanaa cajitujinia na miaquetajara jiyocuaaanu. <sup>21</sup> Tii na cajitiquiaariiri puetunu tamasa cumaacaraca quijiaa Jiyaniijajanaa na quiniuria. Majaari tamonu socua cumaacaraca quijiaa quiniu pa Jiyaniijajiniji. Nojuajaari puetunu tamasa jiyaniijianucujanaa Jiyaniijia. Puetunu mijiria quijiaa jiiitiasanojuanaari na casaa. Nojuajaari puetunu casaajanaa camaru. Pueyaso jaara quiarinio jiya shipiniriohua, Jesucristoori jiyacari Jiyaniijajanaa quiniutianiyajuhua, taa quiarijia na quiyacujani. <sup>22</sup> Naacujitij, Pueyasoori puetunu na shipinishanojuanaa jiyatequiaari Jesucristo jiiitiasocoriquiano. Naajuhua, Pueyasoori Jesucristo jiyatequiaari na saquiriojosano pueya jiiitariquiano, canapue te nocua tiuujacacujani. <sup>23</sup> Pueyaso saquiriojosano pueyari juhua Jesucristo cuaqueya. Nojuajaari juhua poojia saniniujia, pa jiiitiana na quishacari. Puetunu Pueyaso saquiriojosano pueyajanaa jaara Cristo cuaqueyajinia rupetesaa, Cristo cuaqueyari tucateenutianiana seetanujanaa maninia jeeacanamitishano na quiniuria. Na cuaqueya pa quishacari, nojuajaari puetunu poojiajinijanaa quiya. Naajuhua, nojuajaari puetunu tiquiyocujanaa quijiajuhuanajaj.

## 2

### *Panijia Pueyaso quiniucua, nojuajaari pa jiyanooquiaari*

<sup>1</sup> Sesa miijia nia quiniucua tarijia, Pueyaso tojiyashijiacajuhua, niaari macunucua quijia Pueyasora. <sup>2</sup> Naa jaara naa sesa miijia quiquiaaritij, niaari juhua puetunu mijiria quiniaa Pueyaso tojiyashijiacajanaa quiquiaari. Niaari samaruhua jiyaniijia tojiijia quiquiaari, cuno, paratu pyarajosaqui quijiani. Nojuajaari Pueyaso tojiyashijiaa shiniujia, nojori miiniuria sesa, taa Sesaaca seque paniyacujani. <sup>3</sup> Tarijia, puetunu pajaniyajanaari Pueyaso tojiyashijiaa quiquiaarini. Paari tama pa miiniu panishanojuaja miijiaa quiquiaarini. Naacujitij, paari puetunu pa cuaqueya miiniu panishanojuanaa miijiaa quiquiaarini, puetunu sacaraatia pa niishiriojosanojuhua. Naa sesa miijiaa pa quiniucuatej, paari tojetaarucujanaa jiyanojua Pueyaso saniitiosocoriquiano quiquiaari juucuan, juhua tamasaajuhua. <sup>4</sup> Saniniujia, Pueyasoori pocua taraajeja cutara. Jiyanojua pa paniquiaariiri. <sup>5</sup> Cunora, macunucua pa quishacarijia nera, sesa miijiaa pa quiniucua, nojuajaari naa cojiritiaquiaari Jesucristota pa cojiritianijionucua. Jyanootio Pueyaso quiniucua, nojuajaari nia jiyanooquiaari. <sup>6</sup> Naa na samiitianijionucua pajaniya Cristoojia pa tiuuniucuatej, Pueyasoori tari pa tacanijioquiaari Cristota jiyocuaaanu, tii Cristo cajitianura pajaniya. <sup>7</sup> Naa Cristota na cojiritianucua maninia miiniu pajaniyatej, cunoori jiyanojua maninia! Nojuajaari naa pa miiquiaaritij, puetunu quijiacajanaa nio pa quishacari nuhuaji niishiniuria maatia, Pueyasoori jiyanojua pa panijia. Maatia niishishaanutianiyari Pueyasoori tojetaarucujanaa jyanootio cutara, na jyanooniucua pajaniya, Neyanuucua pa tiuuniucua. <sup>8</sup> Naa Pueyaso quiniucua jyanootiojia, nojuajaari nia jyanooquiaari saaja Jesuucua nia tiushacari. Majaari tama nia miishanotajaja Pueyaso nia jyanootiniu quiquiaari tama niajanijajaaja. Pueyasojuanaacujajaari nia jyanooquiaari niaacua na taraajenuucua. Naajuhua, nojuacujajaari nia tiuutiquiaari Neyanuucua. <sup>9</sup> Majaari Pueyaso jyanooniu quiquiaari pajaniya, maninia miijiaa pa quiniucua. Paa jaara maninia pa miiniucua Pueyaso jyanootiquiaari tama pa cuaqueyajaajani, paa maara tama pa cuaqueyajaaja timitiareni juhua najuhuaa pocujaja. <sup>10</sup> Shushajanaa Jesucristoojia pa tiushacari, Pueyasoori jiyacari pa jataniquiaari quiarinio pueyano pa quiniuria, maninia miijiaa pa quiniuria. Nojuacujajaari tari naa niishiriojoquiaari, maninia miijiacara na jataniniuria pajaniya.

### *Jesucristoori pa jiyateja jyanootiojuacara*

<sup>11</sup> Éfeso tiacajinia quiniaa pueyanaa, quiarijia nia niishiriohua taa nia quiquiaari tariucuaaanu, Pueyaso muerasu nia quiyaquishacarijia. Niaari cuarta Judiocuaa soosano taucuaa quiquiaari, nia cararaatiuquia co mialesoo quiyaquiniucua. Canaa cutaraari canaa cararaatiuquia co mialesanoni. <sup>12</sup> Naa niishirijuhua, naa nia quishacaritij, niaari Cristooju quiquiaari. Majaari nia naata rupeenu quijia Pueyaso saquiriojosano Israel pueya. Puetunu Pueyaso sequesanojuanaa Israel pueyaranoni, cunoori maja niaarano

quiquiaari. Majaari nia niishiniu quiquiaari Pueyasoori pueyacuaji Tacuriquiano jiyaronutaniya mijiria. Majaari quenaaja tamonu quiniu quiquiaari nocua nia tiuniuria, Pueyaso na jiyanoootiniuria niajaniya. Niaari saaja taraatia shaajeriquiano quiquiaari. ¿Cantucua niaacua taraajereni? Niaari seetanujuanaa tojetaarucujanaa Pueyasoju quiquiaari mijiria. <sup>13</sup> Tariija, niaari seetanujuanaa tucuaaanu quijiaca quiquiaari Pueyasojiniji. Quiarijia saniniujia, Jesucristo shootenuucua na nanaca niyacutesanojinia, niaari nata rupetootesaaquiaari, nocua nia tiuushacari. Naacuajitij, niaari canaa rupuejacajuhuaaj. <sup>14</sup> Cristocuaajaari pa jiyanoootiootequiaari. Moisés Rootasanoni, cunoori juhua jiyaconaja sohuaca quiquiaari pa tajinia, maja nia cojiniuria canaa, maja nia rupenuera canaajuhuaaj, taucuaa nia quiniucua. Jesucristocuaajaari canora tama na cuaqeyajaaja tarinitiaquiaari na mosaanura pa niti, cuno jiyaconaja sohuaca niyartasaanura, pa juaaquiaa tajiyatenura. Naacuajitij, nojuajaari pa jiyatequiaari juhua niquriyatu queecuajinio supeno pueya, Judiocuaa, niajaniya taucuaacani. <sup>15</sup> Naa pa niti Jesucristo cusonuucatej, nojuajaari puetunu Moisés Rootasanoni, niaari canaa niyacutesanojinia, na sesacanura pajaniya. Tariija, paari juhua caapiqui tiaca quiquiaarini. Paari pueyacaanu paracaatiojua quijiani. Quiarijia saniniujia, Jesucristo cusonuucua, nojuajaari pa jiyanoootiootequiaari jatiqui pa quiniuria juhua niquriyatu tiaca, mariyata na rupuejaca pa quishacari. <sup>16</sup> Naaratej, janiyari socua camia nia sequenuni. Cristo cusonuucua niyacutesanojinia, nojuajaari Pueyaso jiyanoootiquiaari pajaniya, na panishano muerasu pa quiniuria puetunujuanaa, niajaniya taucuaa, canaajuhuaaj. Naacuajitij, Jesucristocuaa pa tiuushacari, paari juhua niquriyatu tiaca nerani.

<sup>17</sup> Niajaniya taucuaacanaa, niaari juhua tucuaaanu quijiaca quiquiaari Pueyasojiniji. Canaa cutaraari juhua cateca quijia nojuajinjini. Jesucristoori mijiria niqiaari, na niishitiniuria puetunu pajaniyajanaa taa Pueyaso jiyanooni pania pajaniyani. <sup>18</sup> Cristo jiyanoootiniucua na Que Pueyaso pajaniya, naacuajitij, pa naata pa Que Pueyaso rupenu pa secijosacari nojuaja, mariyata na Sohuanuraca pa quishacari, niajaniya, canaajuhuaaj. <sup>19</sup> Jesuucua tiuujia nia quishacari quiarijia cua panishano pueyanaa, majaari tari nia quiniu tahue canaara. Majaari nia quiniu juhua tamonu tiacajinjini rucoonaa. Quiarijiani, niaari seetanujuanaa Pueyaso pueya cutara. Pueyasoori maninia nia jiitaaajuhuaaj, taa na jiitiaquiaa puetunu na saqiriojosano pueyacaani. <sup>20</sup> Pueyaso pueya nia quiniucua, niaari rupuetesano puetunu Pueyaso muerasutajanaa, juhua shanohua tia pa quiniuria Pueyaso quiquiora. Jesucristo jiyaramiquishano pueya na rupaa pohuatariquianoni, mariyata na sequenu panishano caminiujunaa pueyani, nojoriiji juhua cuno tia pacaariana. Saniniujia, Jesucristoori juhua cuno tia morijijiana cutara, cuno tia nujuatana. <sup>21</sup> Pueyasoori naa saqiriojoquiaa Neyanuucua tiurriquiano pueya, na quiquiorano na tucuatunura. Cuno tia tucuateesacari, tojetaarucujanaa maninia jeenucasano quiniutianiya pa jiyaniijaari. <sup>22</sup> Niaari naajuhuaaj, Cristo nia rupuesacari, niarta Pueyaso pueya nia rupuesacarijuhuaaj, Pueyasora, niaari juhua riana, tucurunico. Nojuajaari nia morojotaquiaa na tia na tucuatunura, na Sohuanu quiquiorano.

### 3

#### *Pabloori Pueyaso jiyaramiquishano taucuaacua*

<sup>1</sup> Jesucristojiniji cua pohuatanucua niarta taucuaa, janiyari cunora nujuatesano quiya nujuatejuijiniani. <sup>2</sup> Naa naasucuaari niishiyacuaja Pueyasoori cua jiyaramiquiquiaari Jesucristojiniji cua pohuatanura taucuaa, jiyanooshano nojori quiniuriajuhuaaj. <sup>3</sup> Tariucuaaanu, majaari pueya niishiniu quijia, Pueyasoori taucuaa jiyanooniutianiyajuhuaaj, taa na jiyanooquiaacua Judiocuaani. Pueyasojuanaacuaajaari naa jiyasohuaa na miiniu panishano cua niishitiquiaaritij, taa shusha nio cua naajio coteejajinia cua pohuataa niajanuyacuajani. <sup>4</sup> Naa jaara cua naajionee serojore, niaari jiyacari seetanujuanaa niishiniutianiya, janiya cutaraari Jesucristo rupaa niishijiani. Naacuajitij, janiyari niishiyani taa jiyanoohua maninia nia miishaanutaniyani nocua nia tiuushacari. <sup>5</sup> Tariucuaaanu, majaari quenaaja tamonu pueyano niishiniu quijia nio jiyasohuaa Pueyaso miiniu panishano. Quiari naataja saniniujia, Pueyasoori na jiyaramiquishano pueya niishitiquiaari cuno, jiyasohuaa na miiniu panishano taucuaani. Na sequenu panishano caminiujunaa pueya na niishitiquiaarijuhuaaj. Pueyaso Sohuanucuaajaari cuno canaa niishitiquiaari. <sup>6</sup> Niajaniya taucuaacanaa, niocuaajaari Pueyaso miiniu panishano jiyasohuaa niajaniya: Jesucristocua nia tiuniucua, Pueyasoori puetunu Judiocucarano na sequesanojuanaa jiyatenutaniya niaarajuhuaaj. Canaari Judiocuaani. Naajaa, Jesucristocua nia tiuniucua, Pueyasoori canaa rupetequiaa niajaniya, juhua niquriyatu pueyano pa quiniuria nera. Naajuhuaaj,

cunora, Pueyasoori nia niqutioquiaa na Sohuanujuhuaj, taa na sequequiaari Neyanu Jesucristoocua tiuujiacacujani.

<sup>7</sup> Janiyari Jesucristo ruuretaja quiquiaarini. Naajaa, jyanohua cumaacaraca Pueyaso quiniuucua, nojuajaari cua jataniquiaari Neyanu Jesucristojiniji pohuatana cua quiniuria. <sup>8</sup> Jesucristo paraca cua quiniuucua tarijia, janiyara, janiya cuaara socua rerequetesano pueyano quiiria puetunu cuarta Pueyaso pueyajiniijianaa. Saniniujia, jyanohua jyanootio Pueyaso quiniuucua, nojuajaari cua jyanooquiaari. Cua jiyatequiaariiri seetanu rupaajanaa Neyanu Jesucristojiniji pohuatana cua quiniuria taucacara. Janiyari cunora Pueyaso shuqiritiaa jyanohuani. Cristo jiiitasano pajaniyaranoni, puetunu cuno casaajanaari pa niishishoojua. <sup>9</sup> Tariucuacaanu, Pueyasoori puetunu casaajanaa shipiniquiaari. Na shipinyaquishacarijia, Pueyasoori tari niishiriojoquiaari casaa na miiniutianiya puetunu pajaniyarajanaani. Naajaa, tariucuacaanu, majaari na niishitiniu quiquiaari pueya. Nio pa quishacari saniniujia, nojuajaari cua seerataquiaari puetunu pueyajanaa cua niishitiniuria jiyasohuaja na miiniu panishano. <sup>10</sup> Pueyasoori tariucuacaanu pajaniyara na niishiriojosano racataquiaari pueyaracaanu tama na niishitajajiniijaaja. Saniniujia, nio pa quishacari, nojuajaari na niishitiquiaari. Quiar-ijiani, jyanohua maninia Pueyaso miishacari puetunu na saquirojosano pueyajanaa, puetunu jiyocuacaanu cumaacaraca quijiacajanaari niishiya, Pueyasoori seetanujanaa jyanohua niishijia cutara. Naacuajitij, Pueyaso seya, Satanás, samaruhuanio, nojori-iri tacuritia shootiaquiaa pajaniya, Pueyaso miiniuucua maninia pajaniya, niishijia na quiniuucua. <sup>11</sup> Quiari naataja, Pueyasoori tariucuacaanu na miishocoriquiano na niishiriojosano tohuateequiaari pa Jiyaniijia Jesucristo cusosacari niyacutesanojinia. <sup>12</sup> Naacuajitij, Jesucristoocua pa tiuniuucua, pa naata juhuajaniya rupuenu na Que Pueyaso pa puereyaquiniutia. <sup>13</sup> Naa Pueyaso miiniuucua pajaniyaratej, majaari nioojia nia niquijotenu Pueyasoocujaji nia puerenuta naquiya cua miishacari. Naa naquiya cua miishacari Jesucristojiniji cua pohuatanuucua nijaniyatej, shuquiriaatia nia quiri juhuari. Naa naquiya cua miishacari, cuno cuaara shiniujuuria nijaniya, socua pa Jiyaniijia tojiijaca nia quiniuria.

*Pablo secojosano Éfeso tiacajinia quiniaa Pueyaso pueyacuara*

<sup>14</sup> Naa Pueyaso muerasu nia quiniuucujahuaj, janiyari mojoquetaquiaani pa Que Pueyaso cua seconjura niaacuara. <sup>15</sup> Nojuacuajaari Que cutara. Puetunu queyajanaari na sesaatiaacuaja. Nojuajaari puetunu parta Pueyaso muerasujanaa Que, mijiria quiniaa, tariucua jiyocuacaanu quiniaa Pueyaso muerasunio. <sup>16</sup> Naa nia Que na quini- uucujahuaj, janiyari niaacuara secojoquiaani, nojuaja cuaara cumaquiiria jyanohua nijaniya na Sohuanuta nioojiajinia. Na Sohuanuuri puetunu pa panishanojuanaa jiti- tiana. <sup>17</sup> Naajuhua, niaacuara secojoquiaanijia, seetanujanaa nia niishiniuria Jesu- cristojuaacuajaari nioojiajinia quijia. Nojuajaari nioojiajinia quiya quiarinio pueyara na jataniniuria nijaniya, nocua tiuujiaca nia quishacari. Naacuajitij, niocua niishiri taa Jesucristo paniya jyanohua nijaniyani. Naacuajitij, majaari nioojia nia niquijotenu quiniutianiya socua. <sup>18</sup> Naa Jesucristo paniniu nia niishishacari taritij, niaari puetunu Pueyaso pueyatajanaa niishiniutianiya taamuecate Cristo paniniuni. Naajuhua, ni- aari seetanujanaa niishiniutianiya tee na paniniu pueetaani. Jesucristo paniniu jaara shanacujusaatia quiri shanacujutajata, paa maara nocua puequeetejore najuhuanani. Seetanujanaa, majaari pa naata shanacujununoj. Paa jaara na jamatu, na tucuanee, na queroni, na jyaconaja shanacujunu paniriquiani, majaari na puequeeja pa riuriatanu quiniutianiya. <sup>19</sup> Seetanujanaa, majaari pa naata niishiniu taa jyanohua na paniya pajaniyani. Naajaa, janiyari niaacuara secojoquiaa Pueyasoni, seetanujanaa nioojia nia niishiniuria cuno, na paniniuni. Naa jaara na paniniu niishiri, Pueyasojuanaari nioojiajinia quiniutianiya. Naacuajitij, niaari tojetaarucujanaa panijia quiniutianiya taa Pueyasocuaani.

<sup>20</sup> Naa Pueyaso miiniuucua maninatej, nojuaja cuaara shuqiritiasaaria. Naa jyanohua na cumaacata na poonijiosacari poojajinatej, nojuajaari na naata miiniu socua jyanohua queraatia pa masesanoinijini nojuaja, pa niishiriojosanojinijinio. <sup>21</sup> Puetunu qu- ijiacajanaa cuaara niishiria Pueyasoori jyanohua maninia. Nojori cuaara naa niishiria nojori niqushacari Pueyaso jatanishano na saquirojosano pueya, Jesucristo miishanonio. ¡Cuaara naa shuqiritiasaaria pueyaracaanutej!

## 4

*Pueyaso Sohuanu pa jiiitasacari, paari rupuetootesano quijiani*

<sup>1</sup> Janiyari niya nujuatesano quiyani pa Jiyaniijiajiniji cua poojotanuucua. Cunora, cua tojtiaare. Janiyari nia sequeyani, saaja pa Jiyaniijia tojiijaca nia quiri, seetanujanaa

maninia na muerasu nia quiniuria. Pueyasocuaajaari nia saquiriojoquiaari naa maninia na muerasu nia quiniuria. <sup>2</sup> Majaari niarta Pueyaso pueya rerequetajaca nia quiniu. Maninia miitiojuaca nia quiriqia. Puetunu casaajanaa rejeretajaca nia quirijihuhaj. Naa jiuujiaatiojuaca nia quiri nia panitioosacari. <sup>3</sup> Naa Pueyaso jiyanoootiootesacari nijaniyatej, pueyaracaanu nia jyanootioore, juhuajaniya noojia quiniuria juhua rupuetootesano. Pueyaracaanu naa nia miiri Pueyaso Sohanu cumaquishacari nijaniya. <sup>4</sup> Naa quijiaca nia quiri pueyanaa, niquiriyatu cuaqueyaraca pa quishacari pa Jiyaniijiaara, mariyata niquiriyatu Sohanuraca pa quishacarijuhuj. Naa Jesucristoocua tiuujiaa pa quishacarij, Pueyasoori puetunu pajaniyajanaa rijionutaniya, pueyaracaanu na shuriucua pa quiniuria. <sup>5</sup> Puetunu pajaniyajanaari niquiriyatu Jiyaniijiaracani. Nojuajaari Jesucristo. Naajuhuj, puetunu pajaniyajanaari saaja Jesucristo rupaacua tiuujiacani, maja tamonu rupaacua. Naajuhuj, puetunu pajaniyajanaari moojinia tiuquinijosaaquiaarini, Jesucristo pa jiyatesacari pa Jiyaniijiaara. <sup>6</sup> Naajuhuj, saa niquiriyatujua Pueyasoori quiya. Nojuajaari puetunu Neyanuucua tiuujiacajanaa Que. Nojuajaari puetunu na tojjijiacajanaa Jiyaniijia. Nojuajaari puetunu na pueyajanaa poonijioteya na panishano nojori miiniuria. Puetunu na muerasu jiuujiaajanaari na quiquio.

<sup>7</sup> Saniniuujia pueyanaa, puetunu pajaniyacuaajaari tari jiiitiaa tamaatia poonijosano pa miiniuriani, teyano Cristo niqitionu paniquiaari pajaniyacujani. Naacujitij, puetunu pajaniyajanaari maja pa niishiniu miiniu saa niquiriyatu casaaja. <sup>8</sup> Tariucuaaanu Pueyaso Rupaa naajiotasanoinijia, paari niishiyani Pueyasoori na Sohanu niqitionu paniquiaari na pueya. Cunora naa sequeya Jesucristojiniijiri:

“Na quioosano pueya tacataquiaariuhua jiyocuaaanuuri. Nareja na niqitionu panishano casaa serotaquiaari na pueyari”.

<sup>9</sup> Jaara sequeya “tacaquiaariuhua”, cunoinijia paari niishiyani nojuaja jiyocuaaanuji rosequiaari coteenu, taraatia mijiria na mosaanura pocuara. <sup>10</sup> Nojuajani, jiyocuaaanuji rosequiaarini, nojuajaari tojetaarucujanaa jiyocuaaanu tacaquiaariuhua, Jiyaniijiajanaa na quiniuria na Que shuriucua. Tacaquiaariiri puetunu jiaa cajiniocujanaa na mishininiuria na cumaacata, puetunu jiyajanaano. Naacujitij, nojuajaari puetunu tiquiyocujanaa quijia. <sup>11</sup> Nojuacuaajaari noojiaqueya na saquiriojosano pueyajiniijio jiyatequiaari na jiyaramiquishano pueya nojori quiniuria. Saniniuujia, tamasa jiyatequiaariiri Pueyaso sequenu panishano caminiujunaa nojori quiniuria. Saniniuujia, tamasa jiyatequiaariiri Jesucristo niishiyashijiaa niqiara poojotanaa nojori quiniuria, Pueyaso jyanooiniuria nojorijuhuj, Jesucuaa nojori tiushacari. Tamasa jiyatequiaariiri na tojtiajaca pueya jiiitanaa nojori quiniuria. Tamasa jiyatequiaariiri na rupaa niishitiojanaa nojori quiniuria narta Pueyaso pueyara. <sup>12</sup> Naacujitij, Jesucristoori na Sohanuta cumaquiquiaa cana na paniyani, puetunu tamaatia na miiniu panishanojuanaa nojori miiniuria. Naa na pueya cumaquiquiaa na Sohanutaari na saquiriojosano pueya tiuuniuria nocua, nojori cumaquishaanurajuhuj. Naa Jesucristoocua tiuujiaa pueya canesacari socatej, Jesucristo cuaqueyari canequiaa. <sup>13</sup> Jesucristora poonijioanaa pueyari naa poonijioquiaatej, paa cuaara tojetaarucujanaa pa Jiyaniijia tojjiaa quiri-jaatijia, juhua rupuetootesano pa quiniuria. Cristo pueyari naa poonijioquiaa Pueyaso Sohanu cumaacata, paa cuaara seetanujanaa Pueyaso Niyanu niishijiaa quirijiaatijia. Naacujitij, paari tojetaarucujanaa jeenucasano quiniutianiyani, seetanujanaa juhua Jesucristo pa quiniuria. <sup>14</sup> Naacujitij, majaari tari pa quiniu quiniutianiya juhua naatujua. Niaacuaajaari niishiya naatujooriiri na niishiriojosano jatanijia ritia. Nojia niqijiotejajariuhuj. Naa juhua tariucua cumueca mashaja pa quishacarij, majaari quenaaja tamasa naata sapojonu quiniutianiya pajaniya, tamaatia nojori niishitiojosanota. Cuno pojori naa tamaatia niishitiojonuujuaca tariucua pa niishishanojinijini, nojoriiri jyanohua sapojonu niishijiaa, nojori tojtiajaca na tashuquootenura Pueyasojiniijia. <sup>15</sup> Nocujia pueyanaa, Pueyaso Rupaata pa cumaquioojore seetanujanaa pa panitioonuta, Cristo rupetajaca pa quiniuria socua. Nojuacuaajaari juhua poojia. <sup>16</sup> Pueyanaa, niaacuaajaari niishiya, puetunu pa cuaqueyajiniacuma casaa pa jiiitianojuanaari maninia rupuetootesano. Puetunu cunojanaa jaara maninia poonijioquiaa jatiqui, paari maninia qiyani. Pueyaso muerasuuri juhua pa cuaqueya jiiitiano casaa. Naacujitij, puetunu Pueyaso muerasujanaa jaara tama na poonijosanojuaja miiquiaa maninia taa pa Jiyaniijia paniyacujani, pa Jiyaniijia cuaqueyari maninia canenutaniya, jatiqui rupuetesano pa quishacari, seetanujanaa panitiojuaca pa quiniuria.

*Cristoocua tiuujiaaari quiarinio pueya*

<sup>17</sup> Jesucristo jiyaramiquishano pueyano cua quiniuucua, cua tojiri pueyanaa. Pueyaso saquiriojosano pueya nia quishacari, maja socua nia quiniu taa Pueyaso niishiyashijiaa pueya qiyacuaani. Nojoriiri najuhuaa quijiaca, najuhuaa nojori niishiriojonuucua.



Naajuhuaaj, nojoriiri tama na panishanojuuaaja miijiaca, najuhuana casaacua nojori jiaatianuucua. <sup>18</sup> Nojoriiri naa quijiacatej, juhua ninishiqui nojori niishitiaja quiniuucua. Nojoriiri seetanujuanaa niishiyashijiaca, nojori tojiyaquiniuucua Pueyaso, juhua cumueeca jiuujiaraca nojori quishacari. Majaari nojori jiyatesaanu quiniutianiya Pueyaso muerasura, pueyaracaanu shuqiriiaatia quijiaaca nojori quiniuria. <sup>19</sup> Naa pueyaracaanu sesa nojori miijionuucatej, nojoriiri maja tari na niishiniu caririquiniu, sesa nojori miishacari. Nojoriiri puetunu tama na miiniu panishanojuuaaja miijiaca. Nojoriiri puetunu sacuaraatia casaajanaa miiniuucua jiyartuucuno. <sup>20</sup> Niajaniya saniniuujia, majaari naa nia niishitiojosaanu quiquiaari Cristojiniji, naa sacuaraatia miijiaca nia quiniuria. <sup>21</sup> Naa jaara Jesujiniji tojiqiaari, niaacuajaari niishiquiaari na rupaari seetanu rupaajanaa cutara. Naaacuajaari na rupaajiniji niishitiojosaquaaari maninia miijiaca nia quiniuria, sesa nia miiniu nia tarinitianurajuhuaaj. <sup>22</sup> Pueyanaa, pa toque mocua jaara mocuaatia jaanure, paari ritia na jocuajani. Naa nia jatarejuhua sacuaraatia miiniu nia niishishano. Sesa nia miiniu panishanoori tama nia sapojoquiaarijia nia sesa miijiaca nia quiniuriatej. <sup>23</sup> Quiarijia saniniuujia, sesa nia niishitiaja nia jatare, maninia niishitijaraca nia quiniuria, maninia jiuujiaracanio. <sup>24</sup> Seetanujuanaa juhua quiarinio pueyano nia quiri, quiarinio jiuujiaraca, Pueyaso niquitosano niajaniya. Naa quiarinio jiuujiaraca nia quishacaritij, seetanujuanaa juhua Pueyaso pueya nia quiriqia, maninia miijiaca, tojetaarucujanaa sesa miyashijiaca. Naa maninia nia quiniuni, cunoori seetanujuanaa Pueyaso Rupaa nia tojinuuca.

<sup>25</sup> Naacuajitij pueyanaa, majaari socua cuaracashijionuujuaca nia quiniu. Pueyaso pueya pa quishacari, puetunu pajaniyajanaari juhua pa Jijaniijia cuaqueyani. Cunora, puetunu nia sequesanojuanaa niarta Pueyaso pueyano cuara quiri seetanujuanaa.

<sup>26</sup> Naa jaara juaatishaare, tama nia cuaqueyajaaja nia cojuare maja nia juaaniutia sesa nia miiniuria niarta pueyano. Naajuhuaaj, nia jaara juaari, majaari nia juaaquiaca nia nianitanu. <sup>27</sup> Ritia nia jeecatoore, Sesaaca mariqui sesa nia miitiriiri nia jijanoyquishacari.

<sup>28</sup> Nio nia tojirijuhuaaj. Cante nohuasejoju quiyajaani, cuara tarinitiaara nohuasejonu. Saniniuujia cuara poonijioora tama na numatucujataaja cutara. Naacuajitij, nojuaja na naata na jitasanojiniji nareja niquitonun tamasaca, cante na panishano jiiitiaaquiyani.

<sup>29</sup> Naajuhuaaj pueyanaa, majaari sacuaraatia casaa nia pocuanu quenaaja. Majaari cararaatia nia puenujutoonujuhuaaj. Saaja maninia pocujaca nia quiri cutara. Naacuajitij, nia naata niarta Pueyaso pueya niishitiojonu. Nia naata nojori cumaquiniu. Nia naata nojori nacasunujuhuaaj. Naacuajitij, nia naata nojori shiniujuniu saaja Pueyaso tojiijaca nojori quiniuria. <sup>30</sup> Majaari sesa miijiaca nia quiniu, niaa mariqui nioojiajinia quijia Pueyaso Sohuanu taraajoreeri. Pueyasocujaari juhua na sesa naajiotaquiaari poojiajinia na Sohuanuta. Naacuajitij, na rijionu juuca pajaniya, nojuajaari niishiniutianiya paari na saqiriojosano pueyani.

<sup>31</sup> Pueyanaa, majaari jijanoyashijia nia quiniu. Seetanujuanaa jijanoojiaca nia quiri cutara. Majaari tamasaca shanacunu niaacua, na nasojonura niajaniya. Majaari nia juayonuujutanu. Majaari nia juaaniutia nia nacajonu. Majaari niarta pueyano paracaajia nia quiniu, nia juaaniutia nia sesacanura nojuaja. Naacuajitij, puetunu juaaniujianaa nia tarinitiare, puetunu sesa nia miiniujianaanio. <sup>32</sup> Saniniuujia, maninia miitiojuaca nia quiri. Taraajetoojuaca nia quiriujuhuaaj. Naajuhuaaj, jijanootiojuaca nia quiriujuhuaaj, taa Pueyaso jijanooquiaari pajaniyacuaani, Neyanuucua pa tiuushacari.

## 5

### *Seetanujuanaa juhua Pueyaso pueya nia quiri*

<sup>1</sup> Pueyanaa, niaacuajaari Pueyaso panishano muerasuniyojuu. Cunora, pueyaracaanu juhua nojuaja nia quiniuria nia saniniuujiri. <sup>2</sup> Puetunu nia miishanojuanaa nia miiri nia paniniutia, taa Jesucristo paniquiaari pajaniyacuaani. Jijanohua na paniniuucua pajaniya, nojuajaari tama na cuaqueyajaaja tarinitiaquiaari pa niti na mosaanura. Naa na miiniuucatej, nojuajaari Pueyaso shuqiritiquiaari jijanohua. Na miishanoori juhua shanohua jaanutaja quiquiaari Pueyasora.

<sup>3</sup> Pueyaso pueya maanujinijinio nia quiniuucua, majaari nia camishoo maaji nia numetucunu, maajishuriu, casaanio. Cunoori jijanohua sacuaraatia Pueyasora. Majaari quenaaja jijano sacuaraatia casaajiniji nia pocoojonu. Naajuhuaaj, majaari tamasaca jiiitiasanoocua jiaatiajaca nia quiniu. <sup>4</sup> Majaari najuhuana sacuaraatia pocujaca nia quiniujuhuaaj. Majaari najuhuana nia niti nia taquiriocuatenu juhua maninia pocujaja. Naajuhuaaj, majaari sacuaraatia puenujunuujuaca nia quiniu. Puetunu cuno sesa pocuanujanaari sesa Pueyaso pueyara. Saniya nia pocoojore cutara Pueyaso miishanojiniji, socua

pueya maniniuhuaqueetanura Pueyaso. <sup>5</sup> Niacuajaari tari niishiya, cante juhuajaniya na camishoo maajipohua numuetucujuuani, maajishuriuhuanio, nojoriiri jiyanhua tارااتيا quiniutianiya. Pueyaso jiiitasano na tojjijaca pueyaranoni, majaari na quiniu quiniutianiya naa miijica pueyara. Naa taraatia miishaanutaniyajaariuhua puetunu tamasaca jiiitasanooocua jiaatiajacajanaa. Pueyasora, jiyano pueyari jiyanhua sesa, juhua juashiquiata shipinjiosano pueyasohua secojonujuaca. <sup>6</sup> Naacujitij pueyanaa, majaari nia shanacunu tamasaca sapojonura niajaniya na sequesacari naa sacuaraatia miishanoori maja sesa, sacuaraatia pocuanunio. Naa pueya miiniuucua sesatej, Pueyasocua-jaari juaatishaare. Tari saniitioya na tojjiyashijica pueyari. <sup>7</sup> Cunora pueyanaa, majaari quenaaja naa sacuaraatia miijica nia cojinu.

<sup>8</sup> Pueyaso niishiyashijica nia quishacarija tarija pueyanaa, niaari ninishiqui quijica quiquiaari. Quiarjia saniniujia, pa Jiyaniijia rupuejaca nia quishacari, Pueyasoori nia jiyatequiaari cuhuashiqui quijica nia quiniuria. Cunora, seetanujanaa maninia miijica nia quiri, juhua cuhuashiqui quijica. <sup>9</sup> Paa jaara seetanujanaa cuhuashiqui quijica quirini, paari maninia miijica quiniutianiya. Naajuhua, paari tojetaarucujanaa sesa miyashijica quiniutianiya. Paari seetanujanaa Pueyaso Rupaa tojjijaca quiniutianiya-juhuaj. <sup>10</sup> Naajuhua pueyanaa, niaa cumaati niishiya, <sup>11</sup> puetunu nia miishanojuanaate pa Jiyaniijia maniniucuasano, maja soj? <sup>11</sup> Majaari niishiqui quijica nia cojinu. Nojori jaara sesa miya. Saniya nojori nia nacasure juhuari. Maninia nia miishanojiniji, nojoriiri niishiniutianiya nojori miishanoori tojetaarucujanaa sesa. <sup>12</sup> Jiyasohua nojori miijosano sacuaraatiaari tojetaarucujanaa jiyanhua cararaatia. Pahuataaquishoo. <sup>13</sup> Saniniujia, pa nacasacari nojori Pueyaso Rupaata, paari nojori jiuujia cuhuataquiaa, nojori niishiniuria nojori miishanoori seetanujanaa sesa. <sup>14</sup> Pueyaso Rupaacujaari nojori jiuujia cuhuataquiaa na cumaacata, cuhuashiqui quijicara nojori na jataniniuria. Cunora, naa naajiotasano quiyari tariucuaaanu Pueyaso Rupaajinia:

“¡Maqueyanonaa, quia niucure! ¡Macunucua tajiniji quia sanere, Pueyaso Jiyarosano cuhanura quiajaniya!”

<sup>15</sup> Naacujitij cua panishano pueyanaa, tama nia cuaqueyajaaja nia cojuare jiyanhua, seetanujanaa maninia miijica nia quiniuria. Majaari juhua niishiyashijica nia quiniu juhuajaniya. Seetanujanaa niishijica nia quiri, maninia miijica nia quiniuria. <sup>16</sup> Nio pa quishacari, sesa miiniuri socua caneya puetunu juucajanaa. Majaari pa niishiniu taate tariqu quiniutianiya. Naaratej, jaara pa naata quiri quia maninia pa miiniuria, maninia pa miiri puetunu juucajanaa. <sup>17</sup> Majaari moseeca nia quiniu. Maninia nia niishiri casaa pa Jiyaniijia paniya nia miiniuriani. <sup>18</sup> Naajuhua, majaari nia mashaasequejonunu. Niaa jaara mashaaseca quiri quia, majaari nia rejetenu quiniutianiya sesa nia miiniu panishacari. Saniya Pueyaso Sohuanu nia shanacure niaacua cutara, nioojia na mishininiuria na cumaacata, seetanujanaa cumaacaraca nia quiniuria, shuquiriaatia quijica nia quiniurijuhua. <sup>19</sup> Naa Pueyaso Sohuanuraca nia quishacari, tariucuaaanu Pueyaso Rupaajinia naajiotasanojiniji jaaquequejonu nia naminiujitioore. Naajuhua, quiri naataja Pueyaso Sohuanu niishitiojosano nia jaaquequejotoore. Naa jaaquequejosacari, pa Jiyaniijia nia shuquiritiare puetunu nioojitajanaa. <sup>20</sup> Pueyaracaanu puetunu casaarajanaa pa Que Pueyaso nia sequere “paacarasho” pa Jiyaniijia Jesucristoocua tiuujica nia quiniuucua.

*Taa quijia pa quiyani Pueyaso tojjia pa quishacari*

<sup>21</sup> Pueyanaa, maninia tojtiojuaca nia quiri, taa pa Jiyaniijia Cristo paniyacujani. Nojuajaari pa Jiyaniijia cutara.

<sup>22</sup> Maajipohuanaa, nia niyaca tojjijaca nia quiri, taa pa tojiquiaa pa Jiyaniijiacuaani.

<sup>23</sup> Naa niyacaari juhua nioojia quia niaara, taa Jesucristo quia na saquirojosano pueya jiuujiacuaani. Nojuajaari pocuaji Tacuna, juhua na cuaqueya pa quiniuucua nera.

<sup>24</sup> Naacujitij, taa Jesucristo saquirojosano pueya na tojtijaca quiyacuaani, maajipohua cuara naa pueyaracaanu neyaca tojtijaca quiri juhuaj.

<sup>25</sup> Canuunaa, nia niquiocohua nia paniri taa Jesucristo na saquirojosano pueyarano paniquiaaricuaa jiyanhuanu. Nojuajaari cunora tama na cuaqueyajaaja tarinitiaquiaari na mosaanura. <sup>26</sup> Nojuajaari naa miiquiaariti seetanujanaa nerano pa quiniuria. Tojetaarucujanaa maninia pa quiniuria, nojuajaari poojia jeequequiaa na rupaata, naatej, taa pa jeequequiaacuaa pa cuaqueyani.

<sup>27</sup> Paa jaara tojetaarucujanaa tari jeequejosano quirini, pa Jiyaniijajanaari pa tiuquintianutaniya tama nocuajaaja, tariucua jatanishano shacantuucara. Jiyacaritij, paari tojetaarucujanaa sesa miyashijia quiniutianiya. Paari seetanujanaa shanhua niquishano quiniutianiya, juhua camishocoriquiano maniniushitishano niyaco, tojetaarucujanaa jiyanhua cohuajaque toqueraca. <sup>28</sup> Pueyanaa, taa nia paniyacuaa tama nia cuaqueyajaajani, naa nia paniri

nia niquiocuajuhuj. Cante necocua panijiani, nojuajaari juhua tama na cuaqueyajaaja paniya. <sup>29</sup> Majaari quenaaja tamonu pueyano quiniu tama na cuaqueya soojeajaaja. Paacuaajaari maninia cojuaja pa cuaqueyani. Paari maninia na mianuutequiaani, naatej, taa Jesucristo cojuaquiaa na saquiriojosano pueyacuani. <sup>30</sup> Puetunu na saquiriojosano pueyajanaari juhua na cuaqueya nera. Paacuaajaari na cuaqueyajinijiononi. Naaratej, nojuajaari maninia pa cojuaquiaa. <sup>31</sup> Cunora naa naajiotasano quiyari tariucuaaanu Pueyaso Rupaajinia. Naa sequeyari:

“Pueyano jaara camiri, nojuaja cuara shiriqiiiria na que, na nucua shuriucuaaji, necocuta na quiniuria. Jaara camiri, nojoriiri juhua niquiriyatu cuaqueyaraca quiniutianiya”.

<sup>32</sup> Pueyasojuaacuaajaari pa niishitiojoquiaari, pueyanoori juhua niquiriyatu cuaqueyaraca quijia jaara camiri necocuara. Cunoori miriqui pa niishitiojiya, puetunu Pueyaso saquiriojosano pueya maanujuaanaari juhua pa Jiyaniijia niquiorano quiya, juhua niquiriyatu cuaqueyaraca pa quiniuria nata. <sup>33</sup> Pueyanaa, cunojuanaari cua pohuatasano pa Jiyaniijia cuaqueyajiniji. Saniniuuja, puetunu cuarta Pueyaso pueyanaa, nia niquiocua panijia nia quiri juhua tama nia cuaqueyajaaja. Naajuhuj, puetunu maajipohujanaa cuara neyaca tojjijia quiriia.

## 6

<sup>1</sup> Muerasunaa, pa Jiyaniijia tojjijia nia quishacari, nia queya tojjijia nia quirijihuj. Naa jaara naa miiritij, cunoori jiyanoohua maninia Pueyasora. <sup>2</sup> Tariucuaaanu Pueyaso Rootasanojiniji Moisésni, naa sequeyajaariuhua tamonu rootasano:

“Nia que tojjijia nia quiri, nia nucuanio. <sup>3</sup> Naa nia miiritij, pueyaracaanu shuquiriaatia nia quiniuria, pueyaracaanu nia rishiniuria mijiria, niaa cuara saaqianoshirijiaatijia”.

Nio rootasanoori coteenujanaa rootasano tee Pueyaso sequeyacuajani taa na tojjitajaca na miiniutianiya maniniani.

<sup>4</sup> Niajaniya saniniuuja pueyanaa, majaari nia niquiuhua nia juaatijionu najuhuanaj. Nojori nia canashitijore maninia. Nia niishitijore maniniajuhuj. Nojori nia nacasurejuhuj. Jaara nia tojjitaaquiri, na pishiniuria, nia majacuriquianoj nojori nia paniniutia, maja nia juaaniutia. Naa nia miiritij taa pa Jiyaniijia paniyacuajani.

<sup>5</sup> Niajaniya poonitijosano pueyanaa, mijiria nia camaruhua tojjitajaca nia quiri. Majaari nojori nia rerequetenu. Puetunu nojori sequesanojuanaa njajaniya nia miiri nia puerenuta, niaa mariqui saniitiosaareeri nojori sequesano nia miyaquiniuuca maninia. Nojori sequesano nia miiriquia maninia, juhua pa Jiyaniijia Jesucristora. <sup>6</sup> Majaari maninia nia poonijionu saaja nojori niquishacari njajaniya, nojori shuquiritianura njajaniya. Maninia nia poonijiore pueyaracaanu puetunu nioojlatajanaa, seetanujuaanaa juhua Cristora. Naa jaara naa maninia poonijionuujuaca quiriqiatej, niaari Pueyaso panishano miyajuhuj. <sup>7</sup> Puetunu nia poonijosanojuanaa nia poonijiore shitimia, juhua Pueyasora. Majaari nia miishano nia poonijionu nia taajenuta, juhua niarta pueyanora. <sup>8</sup> Niaacuajaari tari niishiya, pa Jiyaniijia Jesucristoori puetunu pajaniyajanaa niqutiontianiya maninia pa miiniuuca mijiria, poonijiotasano pueya, camarnuuju pueyano.

<sup>9</sup> Nijaniyajuhuj seya jiitajacanaa, nio sequesano nia tojiri. Maninia nia jiitiare nia poonitijosano pueya. Majaari na miananajonu. Nia niishirijuhuj, niaari mariyata niquiriyatu Jiyaniijiaraca, njajaniya, nojoriijuhuj. Nojuajaari jiyocuaaanu quijia. Naaratej, tamonu pueyanoori maja rimajata nera, narta pueyanojiniji.

### *Taate pa naata Sesaaca nujuatanuni*

<sup>10</sup> Quiarjia cua panishano cuarta Pueyaso pueyanaa, seetanujuaanaa pa Jiyaniijia rupuejaca nia quiri, jiyanoohua cumueeca nioojia quiniuria jiyanoohua na cumaacata. <sup>11</sup> Puetunu Pueyaso niqutiosano casaajanaa nia cushiyore juhua toqueya, Sesaaca sapojiaquiniuucaaji njajaniya. <sup>12</sup> Pueyaso pueya pa quishacari mijiria, majaari pa quiaquetojonu quiquiaa pueyanota. Pa coopueeri maja pueya. Nojoriiri cumaacaraca quijiaa jiya cajiniocua. Sesaacaari cuno na samaruhua jiyatequiaari jiyaniijianucua nojori quiniuria mijiria. Naacuajitij, nojoriiri cumaacaraca, ninishiqui quijiaa pueya nojori jiitiana. Nojoriiri Pueyaso paraajuhuj. <sup>13</sup> Naaratej Pueyaso pueyanaa, puetunu Pueyaso niqutijosanojuanaa nia paracata nia miaquetojotaqueya nia cushiyore. Naacuajitij, sesashiquari niocua na nujuatare, Sesaaca saniniujiushacari njajaniya. Naa jaara naa nioojia jeenucuare juhuacarijia puetunu Pueyaso casaatajanaatej, niaari nia paraa nujuatajaca quiniutianiya.

<sup>14</sup> Pueyanaa, niaacuajaari niishiya taa miaquetooyojuate pueyani. Na miaquetoonu panishacari, nojoriiri shoquejiniji casaa na cajiniocua morotaja. Na turtuconee cushiyonuujuuajaari, puetunu na jiriqiajanaa na mishiquiojonura cashiicuaaji. Naajuhuaaj, na sapatuhua cushiyonuujuuajaariuhuaaj. Na nareenee pootujuuajaari, nocuaji na nujutajara cashi. Naajuhuaaj, na naca na cojuatajara, cumoco casaa cushiyonuujuuajaari. Na nijiniaquetucuaaja mueruu pootujuuajaariuhuaaj.

Pueyaso pueya pa quishacari saniniujia, tama nia cuaqueyajaaja nia jeenucuare Pueyaso casaata. Naacuajitij, seetanujuanaa Pueyaso Rupaa niishijiaca nia quiri maja nia sapojosaanura. Cunoori juhua pa cajiniocua camarucujua casaa saniniujia. Pueyaraacaanu nia cushishano miijiaca nia quiri, nioojia nia cojuanura Sesaacaacuaji, nojuaja mariqui nia cararoreeri niaa jaara sesa miiri. Cunoori juhua nia turtuconee nia cushishano.

<sup>15</sup> Pueyaraacaanu jeenucuasano nia quiriqia juhua tariucua sapatu cushinio. Naa tariucua pueca nia quiriqia nia quianura, pueya nia pohuatanura Jesujiniji. Naa nia pohuataretej nojori niishiniuria Pueyasoori nojori jiyanooni panijajuhuaaj. <sup>16</sup> Naajuhuaaj, pueyaraacaanu nia tiuri Jesucristoocua. Naa Jesucristoocua nia tiuniuni, cunoori juhua nia nareenee Sesaaca cashi nishitiumiacaca nia nujutajara niaacuaji. <sup>17</sup> Naa niishishacari niaacuajaari Pueyaso jiyanooshano pueya, cunoori seetanujuanaa juhua cumoco nia cushishano nacaque, maja nioojia nia niqijiotenura Pueyasooacuaji. Naajuhuaaj, Pueyaso Rupaa nia niishiri maninia. Cunocuaajaari Pueyaso Sohuanu nijiniaquetucuaaja mueruu, pueya jiuujiajinia na poonijonura. <sup>18</sup> Naajuhuaaj Pueyaso pueyanaa, majaari nia tarinitianu Pueyaso secojonuunu. Na Sohuanu cumaacata Pueyaso nia secojonuuriquia pueyaraacaanu, naajuhuaaj, na Sohuanu niishitishacari niajaninya casaacuara nia secojonutaniyani. Majaari secojonu nia tarinitianu nia taajenuta. Juhua sutejaca pueyaraacaanu nia secojonuuriquia puetunu niarta Pueyaso pueyacuarajanaa. <sup>19</sup> Naajuhuaaj, cucuara nia secojonuure, Pueyaso niqutionura janiya na niishitaja, maninia cua pohuatanura Jesujiniji cua puereyaquiniutia. Cucuara nia secojorejuhuaaj, maatia nia niishitiniuria pueya, Pueyasoori puetunu pueyajanaa jiyanooni paninya saaja Jesucristoocua nojori tiushacari. <sup>20</sup> Pueyasojuaaari cua jiyatequiaari na jiyaramiquishano cua quiniuria, na niti cua pohuatanura na rupaa pueya niqiuara. Janiyari cunora niya nujuatejojuajinia morotasano quiyani. Naaratej, cucuara nia secojore seetanujuanaa, Jesucristojiniji cua pohuatanura cua puereyaquiniutia.

*Pablo pohuatasano Tiquicojiniji*

<sup>21</sup> Pa panishano Tiquicoacuajaari niaacua quianutaniya, puetunujuanaa na pohuatanura janiyajiniji, naajuhuaaj, casaa cua miyani. Nojuacuajaari shamaatia poonijiojua pa Jiyaniijara. <sup>22</sup> Janiyacuajaari cunora niaacua na jiyaroyani, nioojia nia cumanijanura canaajiniji nia tojishacari, taa canaa quiya niyani.

<sup>23</sup> Pa Que Pueyaso, mariyata pa Jiyaniijia Jesucristota, nojori cuara cuniqui quinaa parta Pueyaso pueya jiuujia cajitiiria, juhuajaniya nia quiniuria. Nojori cuara nia jiyateera panitiojuacarajuhuaaj, seetanujuanaa Jesucristoocua tiuujiaca nia quiniuriajuhuaaj. <sup>24</sup> Naajuhuaaj, Pueyaso cuara puetunu pa Jiyaniijia panijiacajanaa cumaquiiira na Sohuanuta, shuquiriaatia nojori quiniuria, cuno pojori, canapute seetanujuanaa Jesucristo panijiacuajani.

## PABLO NAAJIONEE FILIPO TIACAJINIA QUINIAA PUEYASO PUEYACUARA

*Pablo saruhuatasacari Pueyaso pueya*

<sup>1</sup> Janiyari Pablóni. Janiyari Timoteota nia saruhuataani, Filipo tiacajinia quiniaa Pueyaso pueyanaa. Canaari Jesucristo poonitijosano pueyajuhua. Canaari nio naajiyani puetunu Pueyaso jatanishano pueyacuaraanaa, nojori tiuuniucua Neyanu Jesuucua. Canaari cuniqui nia jiitianaa pueyacuara naajiyajuhua, nia cumaquiniaa pueyacuara. ¿Niaate maninia quiyajaa pueyanaa? <sup>2</sup> Pa Que Pueyaso, pa Jiyaniijia Jesucristonio, nojori cuara cumaquiiria niajaniya na Sohanuta. Nojori cuara cajitiiria nioojiajuhua.

*Pablo secosano, Filipo tiacajinia quiniaa Pueyaso pueyacuara*

<sup>3</sup> Pueyaraaanu nia niishirijosacari niajaniya, janiyari pa Pueyaso sequequiaani “paacarasho”, maninia na muerasu nia quiniucua. <sup>4</sup> Cua secosajacari, janiyari pueyaraaanu puetunu niacuaraanaa nia shuquiriniutia masequiaa Pueyasoni. <sup>5</sup> Niaa jaara shushajanaa Jesucristoocua tiuquiaari, niaari jiyacari coteequiaari nia naacunura, Jesucristojiniji nia poojotanura tamaquiucua. Quiarijiani, niaari nia nia naacuyajaquij. Janiyari cunora nia timitiaani. <sup>6</sup> Majaari nia taacanuunu niacuaji. Naatej, nia Pueyaso coteequiaari maninia na miiniuria nioojiajiniaacuaani, nojuajaari nia nia jeenucuanu tuccatanutaniya, Jesucristota pa naacuneetosacarihua. <sup>7</sup> Majaari nia jiyajenenu nia nia taacanuyaquishacari niaacuaji. Jiyacuajaari tari nia niishiyani, jiyanoohua nia paniniucua niajaniya. Naajuhua, niaari nia cojiritiasaaquiaa cumaaca niqutiosaanujuhua. Naacuajiti nia naata Jesucristojiniji pohuatanu niya nio nujuatejojuajinia, naajuhua, janiya jaara jiyaniijanucua tajoji neqesoreesaareni. Naa Pueyaso cumaquishacari janiyatej, nia naata Pueyaso Rupaacuaji tacunu na cuaracashitijiaca. Pueyaso Rupaacuajiiri nia tacusano maatia, nojori niishiniuria, Jesucristoocua nojori tiuushacari, Pueyasoori nia naata nojori jiyanoonijuhua. Naa nioojia rupuesacari cojiatej, cunoori jiyanoohua nia shiniujuquiaa Jesucristojiniji nia pohuatanura. <sup>8</sup> Pueyasocujaari niishiya nia nia pania jiyanoohua niajaniyani, Jesucristo paniniu nia jiitiasacari cojiajinia. <sup>9</sup> Janiyari niaacuara secujoquiaa Pueyasoni, socua niishijiaca nia quiniuria, socua Pueyaso niishitija nia jiitanurajuhua, seetanujuanaa maninia panitiojuaca nia quiniuria. <sup>10</sup> Naacuajitij, niaari niishiniutianiya teyano casaate seetanujuanaa maninia niaarani, saniniujia, teyano casaate sesani. Naacuajitij, pa Jiyaniijia Cristo jaara tiuquiriohua, niaari seetanujuanaa maninia miijiaca quiniutianiya, tojetaarucujanaa sesa miyashijiaca. <sup>11</sup> Naacuajitij, puetunu maninia nia miishanojuanaa Jesucristo cumaquishacari niajaniyani, cunoori juhua queraatia nia senoosano quiniutianiya, Pueyaso shuquiriti-asaanura. Naacuajitij, maninia nia miiniucua, pueyari Pueyaso timitianutaniya.

*Pabloori saaja Jesucristora quinia panijia*

<sup>12</sup> Cuarta Pueyaso pueyanaa, majaari cucua nia taraajenu nujuatejojuajinia taraatia nia miishacari. Nio nia niishiri cutara: nujuatejojuajinia nujuatesocoriquiano nia quiasaanuucua, naquiya nia miishacarijuhua, cunoori seetanujuanaa pueya naacuya Jesucristojiniji tojishaanura socua. <sup>13</sup> Naacuajitij, puetunu jiyaniijia César tiajinia quiniaa soldadohujanaari niishiya, janiyari cumayocua casaata morotasano quiya niyani, Jesucristojiniji nia pohuatanuucua. Majaari saaja soldadohua niishiniu cuno, mariyata puetunu pueyajanaari nia niishiyajuhua. <sup>14</sup> Parta Pueyaso pueyari namitia niishiyajuhua, janiyari cumayocua casaata morotasaarucuaani. Naacuajitij, cunoori quera puetunu nojorijianaa shiniujiriucuaa Jesucristojiniji nojori pohuatanura na puereyaquiniutia, pa Jiyaniijiaacua nojori tiuushacari socua.

<sup>15</sup> Seetanujuanaa, noojiaqueya nojorijinijinoori Cristojiniji pohuatanuquiaa socua tojishano pueya nojori quiniuria janiyajiniji, nojori shocotanura janiya. Janiyara, naajaa. Tamasaca saniniujia, nojori cutaraari seetanujuanaa Cristojiniji pohuatanuquiaa nojori shuquiritiniuria Pueyaso. <sup>16</sup> Nojoriiri nia pohuatanuquiaaqui, Jesucristo panijia nia quiniucua. Nojoricujaari niishiya, Pueyasocujaari niya nia nia canu, nia tacunura Jesucristo rupacuaji. <sup>17</sup> Tamasacaari saniniujia Jesucristojiniji pohuatanuquiaacujua nojori shocotanu paniniutia janiya. Naa nojori miishacarijij, nojoriiri socua nia tacaatinu pania juucua. Majaari nojori pohuatanuunu quiquiaa seetanujuanaa nojori paniniutia pa Jiyaniijia Jesucristo. <sup>18</sup> Naa nojori pohuatanuucacari seetanujuanaa nojori paniaquiniutia pa Jiyaniijiatej, naajaa. Nojoricujaari Jesucristojiniji pohuatanuquiaa. Janiyari cunora shuquiriaatia quiyani.

<sup>19</sup> Socua shuquiriniutianiyanjiaa cúa niishishacari Pueyasoori puetunu cuno pojori mi-shanojuanaa jataniniutianiya quiria saa maniniaraja. Naa miiniutianiyari nia secojonu-unuucua cucuara, naajuhuaaj, Jesucristo Sohuanu cumaquiniuucua janiya. <sup>20</sup> Naacuaajitij, janiyacuaajaari Pueyasocua tiuyani, nojuajaari cúa cojuanutaniya maja cúa cararoy-aquishaanura janiya jaara nequesoreesaareni. Janiyari Pueyasocua tiuyajaanuhua na cumaquiniuria janiya, cúa puereyaquiniutia cúa pohuatana Jesucristojiniji puetunu pueya niquiarajanaa, taa cúa miiquiaacuajani. Janiya jaara rishiriqiuani, janiya jaara mosaariquiajuhuaj, naajaa, janiyari jiyanoehua paniyani cúa Jiyaniijia Jesucristo timiti-asaanura. <sup>21</sup> Mijiria cúa quishacarija, janiyari saaja Jesucristora quiyani. Saniniuujia, janiya jaara mosaareni, cunoori socua maninia janiyara, na shuriucua cúa naata socua, nata cúa quiniuria shuquiriaatia. <sup>22</sup> Naajaa, janiya jaara mijiria rishiriqiuajani, cúa naata socua poonijionu cúa Jiyaniijia. Naacuaajitij, quiarijia, majaari cúa naata saquiriojonu; rishiniu, shaajenu soj. <sup>23</sup> Naaratej, janiyari coojia niquijioteyajaani. Majaari cúa ni-ishiniu teyano cúa saquiriojonutaniyani. Janiyara maara socua maninia quiri janiya jaara cusoqueeni, Cristo shuriucua cúa quianura nata cúa quiniuria. <sup>24</sup> Saniniuujia, socua maninaruhua mijiria cúa rishiniurijaa, pa Jiyaniijia cúa shiniujuiniuria socua nijaniya. <sup>25</sup> Naa cúa niishiriojosacaritij, janiyacuaajaari tari seetanujuanaa niishiyani, janiyari juhanouaja mijiria niaata rishiniutianiyani. Naacuaajitij, cúa naata nia naacunu, socua pa Jiyaniijia cúa nia tiuniuria. Cúa naata nia naacunujuhuaj, socua shuquiriaatia quijiaa nia quiniuria nocua nia tiushacari. <sup>26</sup> Naa cúa rishishacari mijiriatej, janiyari niaacua quianutaniyani cúa niquiniuria nijaniya. Naa cúa quishacariuhua niaatej, niaari Jesucristo timitianutaniya maninia na miiniucua janiya.

<sup>27</sup> Pueyaso pueyanaa, nio nia sequenu panianijia, seetanujuanaa maninia miijiaa nia quiri taa Jesucristo rootaacuajani. Janiya jaara niaacua quiaareni, janiya jaara quiaaquiyarejuhuaj, naajaa. Saaja nijaniyajiniji pohuataaariquiani, taa jiyanoehua Jesucristo tojjiaa nia quiyajaani, jiyanoehua panitiojuacuahuaj. Naajuhuaaj, jatiqui Jesucristora nia poonijioteriquiani, na rupaa nia pohuatanuucua. <sup>28</sup> Naajuhuaaj, Jesucristo Rupaa paraa puereyashijacara nia jiyateriquiani. Nojori priyojosacari nijaniya, majaari nojori puerenu quenaaja. Naa jaara naa nojori puereyashijaca quiriritij, nojoriiri cunojiniji niishiniutianiya, nojoriiri seetanujuanaa saniitiosocoriquiano taa nia pohuatanuuquiaa nojori niquiaracuajani. Saniniuujia, Pueyaso cajitishacari nioojia, nojori miananajosacari puecoonu nijaniya, niaari cunojiniji niishiniutianiya, niaaqui Pueyaso rijiosocoriquiano cutara. Pueyasocuaajaari naa cumaquijia na pueyatej, puereyashijianucua nojori quiniuria. <sup>29</sup> Pueyasocuaajaari nia tiuutiquiaari Neyanuucua, na muerasu nia quiniuria. Naajuhuaaj, Neyanu rupuejaca nia quishacari quiarijia, Pueyasoori nia jiyatequiaari Neyanuucua naquiya nia miitishaanurajuhuaaj, taa Neyanu miiquiaari naquiya pocuaracaani. <sup>30</sup> Naa niishiri, janiya, nijaniyajuhuaaj, paari mariyata naquiya miiniu rejeretaquiaani, pa Jiyaniijia pa poonijosacari. Naaacuaajaari tari niquiquiaari naquiya cúa miiniu. Majaari cúa tarinitianu quiquiaari Jesucristojiniji pohuatanu. Quiarijiani, niaari janiyajiniji tojinutianiyajuhuaaj, taa cúa tarinitiaaquiaa Jesucristojiniji pohuatanuni, naajaa naquiya cúa miishacari.

## 2

### *Juhua Cristo pa quirij, taa na quiquiaaricaaani*

<sup>1</sup> Naacuaajitij pueyanaa, naquiya nia miishacari, nia niishiri taa Cristo shiniujuquiaa pueyaracaanu nijaniyani, maja nia tacaaniuria. Naa niishirijuhuaaj taa na paniniu cumaniijaquiaa nijaniyani, naajuhuaaj, taa Pueyaso Sohuanu jiuujiaatiootequiaa nijaniyani. Naa niishirijuhuaaj taa Cristo taraajequiaa jiyanoehua niaacuani. Naa panitiojuaca nia quirijihuaaj. <sup>2</sup> Jiuujiaatioojuaca nia quirijihuaaj, seetanujuanaa panitiojuaca nia quishacari. Naajuhuaaj, nareja nia shanacure Pueyaso Sohuanu niaacua, nojuaja cuaara puetunu nijaniyajanaa rupeteera, jatiqui nia poonijionura pa Jiyaniijia. Naa jaara naa puetunu nio cúa sequesanojuanaa miijia quiriritij, niaari tojetaarucujanaa shuquiriaatia quijiaa cúa jiyatenutaniya. <sup>3</sup> Maninia nia miishacari, majaari na miiniu juhua tamasaca nia shocotanura, nia jyanishacari nia naasucuaari socua maninia miijiaa tamacajiniji. Puetunu maninia nia miishanojuanaa nia miiri tamasaca nia rerequeteyaquiniutia. Puetunu niarta Pueyaso pueyajanaa nia jiyatere juhua socua maninia miijiaa nijaniyajiniji. <sup>4</sup> Naa jaara maninia miijiaa quiriquiacuaa, majaari tama maninia miijiacajaaja nia quiniu. Niarta Pueyaso pueyacua nia taraajerejuhuaj, maninia quijiaa nojori quiniurajuhuaaj.

<sup>5</sup> Tama nia cuaqueyajaaja nia tarinitiare niarta pueyacua nia taraajesacari, taa Jesucristo tarinitiaquiaari tama na cuaqueyajaaja pocuaracaani. <sup>6</sup> Nojuajaari naa miiquiaar-itij: tariucuaaanu, nojuacuajaari Pueyaso quijiajuhanajaj, juhua na Que. Naajaa,

nojuajaari maja na cuaqueya na jiyatenu quiquiaari seetanujuanaa juhua na Que Pueyaso na quiniuria. <sup>7</sup> Nojuajaari jiyanohua cumacaraca Jiyaniijia na quiniu tarinitiaquiaari, juhua nareja poonijioesano pueyano na quiniuria. Naaratej, mijiria rasaaquiaariiri seetanujuanaa pueyano na quiniuria. <sup>8</sup> Naa pueyano na quishacari mijiriatej, nojuajaari juhua nareja pueyanora tama na cuaqueyajaaja jiyatequiaari. Pueyaracaanu na Que tojjia na quishacari, nojuajaari tama na cuaqueyajaaja tarinitiaquiaari na mosaanura. Seetanujuanaa cararaatia cusoquiaariiri niyacutesanojinia teetesano, juhua sesa mijia pueyano. <sup>9</sup> Naaratej, Pueyasoori seetanujuanaa Jiyaniijiarajanaa na jiyatequiaari puetunu jiyaniijianucuaajiniijijianaa. Na sesojoquiaariiaariuhuj “Jesu”. Nioori sequeya “pocuaaji Tacuna”. Majaari socua tamonu pocuaaji tacuna quiniu mijiria, jiyocuaaanunio. <sup>10</sup> Puetunu pueyajaanaari niishiniutianiya Jesuuri Jiyaniijiajanaa. Maja tamonu. Cunora, nocuara mojuquetaconutaniyari puetunu jiyocuaaanu quijiicajanaa, puetunu mijiria quijiicajanaajuhuj, puetunu jiya cariquimia quijiicajanaano. <sup>11</sup> Puetunu tamaatia rupaca pocuajacajanaari niishiniutianiya Jesucristoori Jiyaniijiajanaa cutara. Naa Pueyaso miiniucua Neyanutej, puetunu nojorijianaari niishiniutianiya, Pueyasoori tojetaarucujanaa maninia mijia.

*Pueyaso pueyari juhua ninishiqui cuhuataja mijiria*

<sup>12</sup> Quiarijiani cua panishano cuarta Pueyaso pueyanaa, cua rootasano tojtiajaca nia quiri. Naatej, taa pueyaracaanu cua tojtiajaca nia quiquiaaricujani niaata cua quishacari, quiarijia socua cua tojtiajaca nia quiri, tucuaaanu cua quishacari nijaniyajini. Naacuajitij, seetanujuanaa pa Jiyaniijia tojtiajaca nia quiri nia niishiniuria niaari seetanujuanaa Pueyaso pueya. Majaari na rupaa ruuretano. Jiyanohua puereeta quiniutianiyari na tojiyashijianucuaru. <sup>13</sup> Pueyasojuaanaacuaajari nioojiajinia poonijioquiaa maninia nia miiniu paniniuria. Na cumaaca nia niqitioquiaajaariuhuj maninia nia miiniuria nera nia panishano, taa na paniyacujani.

<sup>14</sup> Cunora, puetunu nera nia miishanojuanaa nia miiri shitimia, maja nia ririjiotanuta. Majaari nocua juyonuujuatanujuhuj. <sup>15</sup> Naa jaara naa maninia miijiaa quiritij, majaari Pueyaso niishiyashijiaa pueya naata quiniutianiya sesa na saquirojotanura niaacuara. Naaratej, tojetaarucujanaa sesa miyashijiaa Pueyaso niqiuohua nia quiri, mijiria sesa miijiaa pueya niqiuara. Nojoriiri seetanujuanaa sacuaratia, Pueyaso tojiyashijiaa. Cuno juhua ninishiqui quijiaca pueya tajinia nia quishacari, niaari juhua riya nojoriria, naatej, taa riya cuhuataquiaa ninishiquicuaani. <sup>16</sup> Pa samiitianijia rupaa Jesucristojini nia jiiitianononi, niaari cunota cuhuataquiaa mijiria quiniaa. Naa maninia Pueyaso pueya nia quiniucuaatej, Cristo jaara tuquirohua na rijonuhuara pajaniya, janiyari jiyanohua nia timitianutaniyani. Janiyari naa nia timitianutaniya cua niishishacari puetunu cua poonijosanojuanaari maja najuhuana na quiniu quiquiaari. Naajuhuj, majaari najuhuana naquiya cua miiniu quiquiaarijuhuaj. <sup>17</sup> Niaacuajaari maninia miijiaa Pueyasocua tuujiaca nia quiniucua, Jesucristojini nia pohuatanuucua nijaniya. Cuno maninia nia miishanononi, cunoori juhua shanohua jaanutaja Pueyasora. Janiya jaara nacatasaare Jesucristojini nia pohuatanuucua nijaniyani, cua nanacaari shoonutaniya juhua Pueyasora niqitiosocoriquiano. Janiya jaara naa miishaareni, janiyari cua nanacata tucuanutaniya puetunu cua miishanojuanaa Pueyasoranoni. Janiya jaara naa miishaareni, janiyari seetanujuanaa shuquiriaatia quiniutianiyani. Janiyari puetunu nijaniyatajanaa jiyanohua timiniutianiyani. <sup>18</sup> Shuquiriaatia nia quiriuhuj, janiya jaara mosaareni, cua Jiyaniijia tojjia cua quiniucua. Cua cojitiuri shuquiriniuhuj.

*Pablo pohuatasano Timoteojini, Epafroditojinijinio*

<sup>19</sup> Janiyari niaacuaji tojiniu paniyani taa nia quiyani, shuquiriaatia cua quiniuriajuhuaj janiya jaara niaacuaji tojirini. Janiyari cunora Timoteo jiyaronutaniya niaacuani. Naacuajitij, cuniquini na tacatesariuhua, nojuajacua cua pohuatasuhua nijaniyajini saniniuuja. Janiyari cua Jiyaniijia Jesuucua tiuyani na rishitiniuria janiya, nijaniyajini nia tojiniuria. <sup>20</sup> Janiyari Timoteo jiyaronutaniya niaacuani. Saa nojuaja cutaraari seetanujuanaa niaacua tacaaja juhua janiyajuhuj, na naacunura nijaniya, maninia nia quiniuria. <sup>21</sup> Tamasacaari saniniuuja saaja tama nojori panishano casaacuajaaja tacaajia, maja Jesucristo casaacua. <sup>22</sup> Niaacuajaari tari na niishiya, taamuecate Timoteoni. Nojuajaari pueyaracaanu cuata poonijioquiaa juhua quiyani, Jesucristojini mariyata canaa pohuatanura. <sup>23</sup> Janiya jaara niishirini taa cua miishaanutaniyani, janiyari Timoteo jiyaronutaniya ritia niaacuani. <sup>24</sup> Naajaa, janiyacuaajari cua Jiyaniijiaacua tiuyani cua cartesaanura niqijii, niaacua cua quianura ritiajuhuaj.

<sup>25</sup> Cua sashishacari Timoteo cua jiyaronura niaacua, maniacuajaruhua ritia cua jiyaronura niaacua Epafrodito, parta Pueyaso pueyano. Niacuajaari nojuaja jiyarotaquiaari cumaneeca quiriano, nojuaja cumaquiniuria janiyajuhuj. Nojuajaari maninia

cua naacquiaa. Cuata miiquiaa naquiya jaaraajariija Jesucristojiniji cua pohuatanura. <sup>26</sup> Nojuajaari puetunu nijaniyajanaa niquniuucua jiaatiaa. Na niishishacari niaari jiyanoherua nocua tacaquioya nia niishiniuucua nojuaja cusosu quiquianu, cunora, nojuajaari ritia nia niquniuria tacaya. <sup>27</sup> Seetanujuanaa nojuajaari cusosu quiquianu. Quera cusocanujuanaari. Pueyaso cutaraari nocua taraajecanu. Cucua taraajecanujaarihuaj, maja cua taraajenu jiyacatenura socua. <sup>28</sup> Janiyari cunora ritia niaacua na jiyaroyani, nia shuquiriniuria nia niquishacari nojuaja niaacua tiuquihuano. Naa shuquiriaatia nia quishacarihuatej, janiyari coojia cajitiniutianiyajaacuhuj. <sup>29</sup> Niarta Pueyaso pueyano na quiniuucua, seetanujuanaa juhua nia tarajanu nia timitiarenoj, niaacua na tiuquishacarihuua. Puetunu jiyano pueyajanaa panijiaa nia quiri, noo pojori pa Jiyaniijara poonijionuuacatej taa Epafroditocuaani. <sup>30</sup> Nojuacuaajaari quera shaajeyarucuaa Cristora na poonijosacari. Cocuaatia miijiocanujaarihuaj. Nojuajaari tama na cuaqueyajaaja tarinitiacanu, na naacunura janiya nia niti. Tucuaaanu nia quiniuucua janiyajiniji, majaari nia naata naacunu janiya.

### 3

#### *Nio rootasano tojjiaa pa quiri cutara*

<sup>1</sup> Quiarjia saniniujia, cuarta Pueyaso pueyanaa, pa Jiyaniijia nia shuquiritiare, pocuaji Tacuna na quiniuucua. Janiyara, maja taajeta cua pacutenuhuara socua cua sequenura nijaniya tari cua sequesano nijaniya. Cunoori seetanujuanaa maninia niaara. <sup>2</sup> Tama nia cuaqueyajaaja nia cojuare cuno sacuraatia niishitiojonuujuaca pueyacuaji, cuno pojoriicujaji, sesa miijiacani. Nojoriiri pueya cararaatiuuquia co miatejonuujuaca najuhanaj, nojori jyanishacari nojori miatesano pueyari seetanujuanaa Pueyaso pueya. <sup>3</sup> Paa cutaraari seetanujuanaa Pueyaso pueyani, Pueyaso Sohanu jiyatenuucua pa janiya Pueyaso tojjiaa pa quiniuria. Paari timiquiaajaanihuaj Jesucristo rupesano pa quishacari. Taa pa cararaatiuuquia casaa quiyani, naajaa. Jesucristoocua pa tiuushacari, paari seetanujuanaa Pueyaso pueyani. <sup>4</sup> Tamasaca jaara tama na cuaqueyajaaja jiyaniya nojuaja seetanujuanaa Pueyaso pueyano, maninia Judio pueyano na quiniuucua, janiya cutaraari nojori shocotaani. Janiyari tari naa jiyaniquiaarijihuaj. <sup>5</sup> Naatej, janiya jaara raaquaaarini, ocho juuca jaara cua shocoquaaarini, cua cararaatiuuquia coori miatesaaquaaari. Janiyari naa miishaaquaaarini taa canaa rootasaaquaaari Moisés Rootasanojinijicuaani, seetanujuanaa Judio pueyano na quiniuria. Naajuhuj, janiyari Israel pueyanoni, cua supuetana Benjamín jinianuucuaajinio supueno pueyano. Na queeri quiquiaari Jacobo, Pueyaso saquiriojosano pueyano. Naa cua supuetana quiniuucua Pueyaso saquiriojosano pueyatej, janiyari naajuhuj, nojoriicuaajinio cua supenuucua. Naajuhuj, janiyari Hebreo rupaa pocuajani taa cua supuetanaacuaani. Cua que, cua nucuaari mariyata Hebreo rupaa pocuajaca quiquiaarijihuaj. Mashaja cua quishacari, janiyari Fariseo pueyanora quiquiaarini. Cuarta Fariseocuaacari socua jyanohua supuetana Moisés Rootasano tojjiaa puetunu cuarta Judiocuacajinjinojuanaa. <sup>6</sup> Jiyacaritij, janiyari cua niishitiojonaa tojjia quiquiaari jyanohuani. Majaari cua taajenu quiquiaari nojori sequesano na miiniuria. Naaratej, janiyari Jesucristo tojjitajaca miijia naquiyani, cua jyanishacari nojori naasucuaari Pueyaso paraa. Naajuhuj, maninia cua tojjiniuucua Moisés Rootasano, janiyari sesacasoo quiquiaarini Moisés Rootasano niishitiojonaara. <sup>7</sup> Puetunu nio cua sequesanojuanaa, janiyari jyanohua na timitiaquaaarini cua jyanishacari janiya naasucuaari naa seetanujuanaa Pueyaso pueyanoni. Quiarjia saniniujia, Jesucristoocua cua tiuushacari, tarijia cua jyanishano maninia casaani, puetunu cuno casaajanaari quiarjia najuhuana janiyara. <sup>8</sup> Quiarjiani, janiyari socua cua Jiyaniijia Jesucristo niishiniuria jiaatiaa jyanohuani. Naaratej, puetunu tariucuaaanu cua timitiasano casaajanaari najuhuana janiyara quiarjia. Cristo pueyano cua quiniuucua, janiyari juhua taanusaquaaari puetunu cuarta Judiocuacajinjijianaani. Naa Cristo tojjijara cua quiniuucuatej, cua shipinijojiniji cua casaarano maseyaquiquiaarinijia. Naajaa, puetunu cuno casaajanaari juhua rucuaa quiya janiyara. Janiyari seetanujuanaa saaja cua Jiyaniijia Jesucristo niishiniu paniya socuani, nata rupuetootesano cua quiniuria seetanujuanaa. <sup>9</sup> Majaari cua jyaniniu janiya sesa miyashijiani, Moisés Rootasano cua tojjiniuucua. Saniniujia, Jesucristoocua cua tiuushacari, Pueyasoori puetunu sesa cua miishanojuanaa tuujuquiaa. Cua niishishacari Jesucristoori mosaaquaaari cua niti, Pueyasoori cua jyanooquaaari, maja na sesacanura janiya, Neyanuucua cua tiuuniuucua. <sup>10</sup> Janiyari Jesucristo niishiniu paniya jyanohua socuani, seetanujuanaa nata rupuetootesano cua quiniuria. Janiyari na samiitanitajaja cumaaca paniyajaanihuaj, coojiajinia na poonijionura, seetanujuanaa quiarinio pueyanora cua jatanishaanura juhua Cristora. Nojuajaari jyanohua taraatia miishaaquaaari mijiria na quishacari, na Que tojjiaa na



quiniuucua. Janiya cuaara naa miishaariajuhuaj cua tojiniuucua nojuaja, juhua nojuaja cua quiniuria. Tama nojuajaarjia na cuaqueya tarinitiaquiaari na mosaanura. Naajuhua, tama janiyajaarjia cua cuaqueya tarinitiaja quiniu paniyani, cua miiniuria puetunu cua Jiyaniija sequesanojuanaa janiya. <sup>11</sup> Janiyari tojetaarucujanaa maninia miija quiniuucua jiaatiaquiaani, juhua quiarinio pueyano cua quiniuria, juhua tariucua macujinjinio samitianishano pueyano.

*Maninia pueya pa quirij, Pueyaso muerasu pa quishacari*

<sup>12</sup> Juhuanajuaja majaari cua quiniu tojetaarucujanaa maninia miija. Sesa miiniu niishiyajaanija. Jeecasoojuaanija. Naajaa, majaari cua tacaaniu. Jesucristocujaaari cua jiyatequiaari na pueyano cua quiniuria. Naaratej, janiyari jiyanojua saniniuquiciaani maninia na pueyano cua quiniuria. <sup>13</sup> Cua panishano cuarta Pueyaso muerasuna, janiyari niishiyacuajani, juhuanajuaja maja maninia cua quiniu taa cua Jiyaniija quiyacuuaani. Naajaa, majaari cua tarininiu. Janiyari juhua ritia netena miiquiaani na shocotanura narta netecuatunaa pueya. Maninia netenaari na nijinaria niqiyashijia. Naajuhua, majaari cua niishiriojonu maninia cua miishano tariucuacuaa. Janiyari saaja cua tajoji niqiyacuiaani, socua maninia miija cua quiniuria tari cua quiniujiniji. <sup>14</sup> Pueya tacuarishijosacari, netena jaara narta netecuatunaa shocotare, nojuajaari shanohua casaa niqitiosaaquiaa. Majaari najuhuaana na netenu jyanohua. Janiyaraari naajuhua. Majaari najuhuaana jyanohua cua saniniuuniu quiquiaa, maninia cua quiniuria juhua Cristojuhua. Mijiria cua quiniu cua tucuatascari, Pueyasoori cua jataniniutianiya juhua Cristo cua quiniuria, Cristoocua tiuuja cua quiniuucua.

<sup>15</sup> Pueyanaa, nijaniya, cante seetanujanaa Pueyaso tojjijaa quiyani, mariyata naa nia niishiriojore taa cua niishiriojiyacuuaani. Naatej, jyanohua nia saniniujiuri juhua Cristo nia quiniuriajuhuaj. Cante tama na cuaqueyajaaja jiyaniya nojuaja tariucua tojetaarucujanaa sesa miyashijiani, Pueyaso cuaara na niishitiiria maninia. <sup>16</sup> Paa jaara maninia miiniu niishijiaa quirini, majaari pa jiyacateni saaja sesa miiniuucua. Saniya maninia miijiacara pa quiri socua.

<sup>17</sup> Cuarta Pueyaso pueyanaa, maninia miijiaa nia quiri taa canaa nia niqiyacuiaari maninia miyanocuaani. Naajuhua, maninia miijiaa nia niquiri, cante maninia miiquiaani taa canaa niishitiquiaari nijaniyacuajani, maninia canaa miishacari. Nojorijiniji nia niishiriquia, maninia nia miiniuriajuhuaj. <sup>18</sup> Jesucristocujaaari pocuara cusoquiaari niyacutesanojinia teetesano, maninia miijiacara pa jatanishaanura. Saniniuujia, queraatia pueyari juhuajaniya miiquiaa sesa. Janiyacuajaari nojorijiniji pohuatanu pacutejoquiaari nijaniyani, maja juhua nojori nia quiniuria. Quiarijia cua nujuquenuta, janiyari nia pohuatarohuanihuua jiyano sesa miijiacajiniji. Nojoriiri pa Jiyaniija cusonu soojeaca. Nojoriiri maja na paniniu naquiya na miishaanura Cristo tojjijaa nojori quiniuucua. <sup>19</sup> Nojoriiri puetunu quejoosanutaniyajanaa mani quiquiojinia. Nojoriiri tama nojori panishanojuaja jiyatecanu juhua nojori pueyasora. Naa sesa miijiaa nojori quishacaritij, majaari nojori niishiniu caririquiniu. Saaja sesa na miitushano timitiatiuyari. Nojoriiri saaja mijiria casaacua jiaatiajaca. <sup>20</sup> Pajaniya saniniuujia, paa cutaraari tari jiyatesaaquiaari jiyocuacaanu quijiacaranoni. Paari cuniquiji pocuaji Tacuna niniuria sashiyani. Nojuacuajaari pa Jiyaniija Jesucristo. <sup>21</sup> Jyanohua na cumaacata, nojuajaari pa cuaqueya seque jataniniutianiya, shacantuuca quijia pa quiniuria juhua na cuaqueyajuahuaj. Nojuajaari cumaacaraca puetunu casaajanaa na tojtiniuria nojuaja. Naacuajitij, nojuajaari na naata moqueja pa cuaqueya jataniniu, pueyaracaanu rishijiaa pa quiniuria.

## 4

*Pueyaracaanu pa Jiyaniija pa shuquiritiare*

<sup>1</sup> Cunora, cua panishano cuarta Pueyaso pueyanaa, pueyaracaanu pa Jiyaniija tojjijaa nia quiri. Janiyari jyanohua nia niqiniuucua jiaatiaani. Nia niquiara cua pohuatanuucua Pueyaso rupaa, niaquiiiri seetanujanaa na tojjijaa quiquiaari. Naa jyanohua maninia Pueyaso muerasu nia quiniuucuatej, cunoori jyanohua cua timitiquiaa.

<sup>2</sup> Janiyari Evodia sequeya cutarani, narta maaji Sintiquenio, nojori cuaara jyanootioora juhua seetanujanaa Pueyasocua tiuujiaca maajipohua. <sup>3</sup> Quiajaniya saniniuujia Sicigona, quiaacuajaari cuata poonijiojua jaarajaaja. Cunora, janiyari quia sequenu paniyani, cunoo maajipohua quia jyanootiooterohua, nojori rupetoonuhua. Cuno maajipohuacuajaari jaarajaaja cuata poonijionuuquiaari, Clementejuhua, pa Jiyaniijajiniji cua pohuatasacari. Naa cuata poonijionuuquiaariiaarihuua tamasa, canapete cuata quiquiaaricujani. Nojori sesacacuajaari tari naajiotasano quiya Pueyaso nequesoreetuneejinia, tee cuniqui pueyaracaanu rishijiacarano sesaca naajiotasano quiyacuajani.

<sup>4</sup> Cua panishano pueyanaa, pueyaracaanu pa Jiyaniijia nia timitiare. Nia sequero-huacuaraj, pueyaracaanu nia timiri. <sup>5</sup> Puetunu pueyajanaa cuaara niishiiria niaari seetanujuanaa maninia pueya, maja juajiaa. Pa Jiyaniijiacuaajaari quera tiuquiuhua.

<sup>6</sup> Majaari quenaaja nia tacaaniu. Saniniuujia, nia tacaashacari, Pueyaso nia pohuatere puetunujuanaa, nia secojosacari nojuaja. Nia secojosacari, nojuaja nia masere nia panishano. Jiyacariitij, nojuaja nia sequerejuhuaj “paacarasho”. <sup>7</sup> Naa nia miishacariitij, Pueyasoori nioojia cajitiniutianiya. Naa Pueyaso cajitiniucua nioojiatej, majaari socua nioojiaa tacaaniu quiniutianiya, nia niishitiajanio. Naacuaajitij, niocua juhuajaniya panaatia quiri Jesucristo cojishano nia quiniucua. Naa Pueyaso miishano pajaniyani, cunoori jiyanoehua jiyajeneta. Nocuaji jiuujiatesano.

*Saaja maninia casaacua niishiriojuaca nia quiriquia*

<sup>8</sup> Naajuhua cuarta Pueyaso pueyanaa, nio tojijiaa nia quirijihuaj. Pueyaraaanu saaja seetanujuanaa rupaacua niishiriojuaca nia quiriquia. Naajuhuaaj, saaja requeteyaquishoo casaacua nia niishiriojore. Saaja maninia casaacua niishiriojonujuaca nia quiri, maja cararaatia casaacua. Naajuhuaaj, saaja Pueyaso shuquiritiasano casaacua nia niishiriojore, maja Pueyaso sesacasano casaacua. Naacuaajitij, puetunu maninia casaacujanaa nia niishiriojore, casaajinijiti pueya naata Pueyaso shuquiritianuni.

<sup>9</sup> Maninia nia miiriquia pueyaracaanu, taa cua niishitiojuquiaari niajaniyacuajani. Niaacuajaari cua rootasano tojiquiaari. Naajuhuaaj, niaacuajaari cua niquijia taa miijia cua quiquiaarini. Naa jaara nia miijiaa quirijihuaj, poojia cajitinia Pueyasoori niaata quiniutianiyajuhuaaj.

*Pablo pohuatasano, Filipo tiacajinia quiniaa Pueyaso pueya jiyaronuucua cumaneeca nera*

<sup>10</sup> Janiyari jiyanoehua cua Jiyaniijia timitiaani juhua shusha nia niishiniuuquiohuhua janiya, cucua nia jiyaronuucua nia reratesano cumaneeca. Naa cua sequesacari niajaniyatej, majaari nia jyaniniu janiya nia sequeyani niaari cua niyajetacanu. Maja. Janiyacuajaari niishiyani, majaari tarijia nia naata cua naacunu quijia nia cumaneecata, nia juuretasacari niaatucua canta cucua na jiyaroriquiani. <sup>11</sup> Majaari naa cua sequenu niajaniyatej cua panishano cua jiiitiaaquiniucua. Maja. Janiyacuajaari tari jiyartuunoni, juhuajaniya cua quiniuria cua jiiitiasanoniyojuata. <sup>12</sup> Naajuhuaaj, janiyari niishiyani juhuajaniya cua quiniuria cua panishano cua jiiitiaaquishacari. Naajuhuaaj, janiyari niishiyani taa quishanote puetunu cua panishanojuanaa cua jiiitiasacari. Janiyari tariucua saniniujishanoni puetunu casaajanaa cua rejeretanura. Juhuaajaniya quiniu niishiyani nia miaajaaraca cua quishacari, miaajeeju cua quishacarijuhuaj. Cua naata juhuajaniya quiniu casamijiu cua quishacarijuhuaj, maja saaja casamiriaca cua quishacari. <sup>13</sup> Cua naata rejeretanu puetunujuanaa, Cristo cumaquishacari janiya. <sup>14</sup> Naajaa, niaari maninia miirucuaa nia cumaneeca nia jiyarosacari cucua, naquiya cua miishacari niya. Niaari niarta pueyanocua taraajeja cutara.

<sup>15</sup> Naajuhuaaj, Macedonia jiyajiniji cua quiasacari nia shuriucuaaji Filipo tiacajiniji, tamonu jiyacajinia cua pohuatanura Pueyaso rupaa, saaja niajaninya cutaraari cucua jiyanooquaaari. Cunoori quiquiaari shushajanaa Jesucristoocua tiuujiaa nia quishacari. Jiyacariitij, niaari nia reratesano cumaneeca jiyaroriquiaari cucua, shuquiriaatia nia quishacari cua pohuatanuucua nia niquiara Jesucristojiniji. <sup>16</sup> Juhuanujuaja nia Macedonia jiyajinia cua quishacarijia, Tesalónica tiacajinia, niaari cucua pacutejoquaaari jiyaronu nia cumaneeca, cua panishano cua masetajara. <sup>17</sup> Majaari saaja cua paniniu pueyaraaanu nia niqitiojonura nia cumaneecajiniji janiya. Janiya cutaraari nia panitiaani capora pueya nia quiniuria. Naacuaajitij, Pueyasoori saniniuujia socua queraatia nia niqitiojonutaniyacujua. <sup>18</sup> Epafroditocuaajaari puetunu nia jiyarosano cumaneecajanaa cucua tiuqitiasecuaa. Janiyari cunota puetunu cua panishanojuanaa maserucuaa tarini. Cureyajaari nia jiyarosano cumaneecajiniji. Cuno cumaneeca cucua nia jiyarosani, cunoori juhua Pueyasora niqitiosano casa. Nera, cunoori juhua shanohua jaanutaja catijiasano nocuara. Na shuquiritiriiri. <sup>19</sup> Naaratej, cua Jiyaniijia Pueyasoori puetunu nia jiiitiaaquishoo casaajanaa nia niqitiojonutaniya. ¿Pueyasoteeri casamijiu? ¡Maja! Nia rupuesacari Neyanu Jesucristo, puetunu na jiiitiasanojuanaari niaaranujuhuaj. <sup>20</sup> ¡Pa Que Pueyasoori jiyanoehua maninia! Saaja nojuaja pa shuquiritiare pueyaracaanu. Cuaara nia quiriiriatej.

*Nata quiniaata Pablo sarhuatasacari narta Pueyaso pueya*

<sup>21</sup> Quiria nia saruhatare puetunu Jesucristo jiyanooshano pueyajanaa. Niya cuata quiniaa Pueyaso pueyari nia saruhuataajuhuaaj. <sup>22</sup> Naajuhuaaj, Jesucristoocua tiuujica jiyaniijia Césarra poonijionaa pueyari nia saruhuataajaacuhuaaj, puetunu niya Jesucristoocua tiuujiacajanaanio.

<sup>23</sup> Pa Jiyaniijia Jesucristo cuaara cumaquiiria puetunu nioojiajanaa. Tariucuja pueyanaa.

## **PABLO NAAJIONEE COLOSA TIACAJINIA QUINIAA PUEYASO PUEYACUARA**

*Pablo Colosa tiacajinia Pueyaso pueya maanuucuaa naajioquiaari*

<sup>1</sup> ¿Niaate quiyajaa, Colosa tiacajinia quiniaa cuarta Pueyaso pueyanaa? Janiyari Pabloni, Jesucristo jiyaramiquishano na rupaa pohuatariquiiano taa na Que Pueyaso paniquiaaricuajani. Pa tarajanu Timoteota naajiya nionijia. <sup>2</sup> Niaacuara naajiyaniijia, canapue Pueyaso saquiriojoquiaaricuajani tama nerajaaja nia quiniuria. Niajanियacuajaari maninia tiuquuaa Pueyasooocua, Cristo rupuesano nia quishacari. Pa Que Pueyaso cuuara cumaquiriia niajaninya, shuquiriaatia nia quiniuria, juhuajaniya nioojia quiniurijahuaj.

*Pablo secijosano Jesuucuaa tiuuniaa pueyacuara*

<sup>3-4</sup> Canaari pohuatasacaanuni taa nia tiuquuaa Jesucristoocuaani, naajuhuj, taa nia paniya puetunu niarta Pueyaso muerasujuaanaani. Naaratej, pueyaracaanu canaa secijosacari Pueyaso niaacuara, canaari na sequequiaani: “Paacarasho canaa Quena”. <sup>5</sup> Niaari naa maninia quiyatej, nia niishishacari Pueyasoori jiyanoohua maninia pa miiniutianiya na niqutiosacari pajaniya jiyocuacaanu na jitiiasanojiniji. Niaacuajaari naa pohuatasaaquiaari tarijiatej, shushajanaa nia tojishacari seetanu Pueyaso rupaajanaa. <sup>6</sup> Cuno maninia rupaari puetunu jiyacajiniyajanaa paaqueyaree, mariyata taa na paaquecanucuaa na pohuatasacari nia tiacajiniacuuaani. Pueyaso Rupaari maninia caneyaree queraatia pueya jiuujiajinia, mariyata taa na caneya nioojiacajiniacuuaani. Naa caneyari nia niishishacari Pueyasoori seetanujuaanaa pa paniya, taa nia pohuatasaaquiaaricuajani. <sup>7</sup> Pa panishano Epafrasri naa pohuataquiaari niajaniyatej. Nojuajaari Pueyasora poonijona, juhua canaa. Nojuajaari canaa niti poonijoriqiuuaa niaara. <sup>8</sup> Nojuajaari canaa pohuatarucuaa niajaniyajiniji, naajuhuj taa Pueyaso Sohuuanu panitiooteya niajaniani.

<sup>9</sup> Naaratej, canaa jaara tojiqiuuanu niajaniyajinijini, majaari canaa tarinitianu quiriqiuua Pueyaso secijonu niaacuara. Canaari Pueyaso secijoquiaani, nojuaja cuuara nia jataniiria niishijia nia quiniuria na Sohuuanu cumaacata. Canaari naa secijoquiaani, maninia nia niishiniuria nia Pueyaso paniya maninia nia quiniuriani, maninia nia miiniuria-juhuj. <sup>10</sup> Naa jaara Pueyaso panishano niishijiaa quiri, naacuajitij, niaari maninia quiniutianiya taa pa Jiyaniijia paniya na pueya quiniuriacuajani, nojuaja shuquiritianura niajaninya, pueyaracaanu maninia nia quishacari. Niaari puetunu maninia casaajanaa miiniutianiya. Naajuhuj, niaari socua maninia niishiniutianiya Pueyaso. <sup>11</sup> Canaari Pueyaso secijoquiaa niaacuuarajuhuj, Pueyaso cumaquiniuria niajaninya puetunu na cumaacatajanaa. Jiyanoohua maniniaari na cumaaca, shuquiriaatia nia rejeretanura juhuajaniya puetunu casaajanaa. <sup>12</sup> Canaari Pueyaso secijoquiaajuhuj niaa cuuara pueyaracaanu sequeera nia shuquiriniutia “paacarasho”, pa Que Pueyaso miishanojiniji. Nojuacuajaari pa jataniquiaari maninia na muerasu pa quiniuria, puetunu na muerasutajanaa pa masenura na jitiiasanojiniji pajaniyara, cuhuashiqui quiquiojinia pa quishacari. <sup>13</sup> Pueyasoori ninishiquiji pa jayoquiaari, maja Sesaaca jitianura socua pajaniya. Pa jiyateereeri cuhuashiqui quijiaa pa quiniuria, Neyanuniojua jitiiasano pa quiniuria maninia cutara. <sup>14</sup> Tama Neyanu cusonutajaaja pa jiyanooriiri sesa pa miishanojiniji. Naacuajitij, paari na pueyara jatanishaareeni.

*Paari maninia quiya Pueyasotani, Cristo cusonuucuaa pa niti*

<sup>15</sup> Pueyasoori maja niquishano quijia. Cristo cutaraari niquishano. Nojuajaari mariyata juhua na Que Pueyaso. Nojuaja cutaraari coteenujuanaa quiquiaari Pueyaso shipiniyaquishacarijia puetunu casaajanaa. <sup>16</sup> Na Que Pueyasoori na shipiniquiaari puetunu casaajanaa jiya cajiniocua, mijiriano; niquishano casaa, niqiuayquishoo casaanio. Naacuajitij, Cristoori puetunu tamonu cumaacaraca quijiacajanaa shipiniquiaari tama nerajaaja. Nojori shipiniquiaariiri nojori jitianura nera jiyocuacaanu casaa, jiyocuacaanu quijiacanio, mariyata mijiria casaa, mijiria quijiacanio. Nojuajaari puetunujuanaa shipiniquiaari. Tama nerajaaja na shipiniquiaariiri. <sup>17</sup> Puetunu shipinishano casaajanaa jaara shipinishoojua quiquiaari, Cristo cutaraari tari quiquiaari. Nojuajaari puetunu na shipinishanojuanaa cojuaa, maninia na quiniuria. <sup>18</sup> Cristoori Pueyaso muerasu Jiyaniijia-juhuj, taa poojia quiya pa cuaqueya jiyaniijiacuaani. Puetunu Pueyaso muerasujuaanaari juhua Cristo cuaqueya quiya, pa miiniuria na panishano mijiria. Nojuajaari juhua poojia. Nojuajaari pa samitianiijia, juhua na cuaqueya pa quishacari. Nojuajaari coteenu samitiquiaariuhua macujiniji, juhua Pueyaso jiyapueranu na quiniuria. Naacuajitij, Cristoori coteenu quijia. Nojuajaari Jiyaniijiajuhuanaj. <sup>19</sup> Pueyasoori paniquiaari Neyanu Cristo

jiitianura puetunu tama na cumaacajanaa, juhua nojuaja na quiniuriajuhuaj. Naacaujiti, Cristoori maja rimiajata quenaaja na quiniu na Quejiniji. <sup>20</sup> Naajuhua, Pueyasoori paniquiaari Cristo rupuetenuhara nocua puetunu casaajanaa, maja socua tari juhua na paraa na quiniuria. Naaratej, Cristoori na Que Pueyaso jiyanootiquiaari puetunu casaajanaa tama na cusonutajaaja niyacutesanojinia. Na Que rupetequiaariuhua puetunu casaajanaari, jiyocuaaanu casa, mijiria casaanoo.

<sup>21</sup> Tariija, niaari Pueyaso paraa quiquiaari, juhua taanuusano pueya Pueyasojiniji, sesa mijiaca nia quiniucua. <sup>22</sup> Saniniujia quiarijiani, Pueyasoori nia rupetequiaariuhua nocua, Cristo cusonuucua pocuara, cuaqueyaraca na quishacari mijiria. Naacaujiti, Pueyasoori na naata nia tiuquininiu nocua, tojetaarucuaajanaa jeequesano nia quishacari sesa nia miishanojiniji. Majaari niaacuara tonujusaanu quiniutianiya quenaaja sesa nia miishanojiniji. Majaari quenaaja shiitianiyojua sesa nia quiniu quiniutianiya na niquiara. <sup>23</sup> Niaari naa quiniutianiya maninia, niaa jaara cumaatia rupaaquiaa Cristoocua, nocua nia tiuushacari, nioojia nia niqijioteyaquiniutia. Majaari nia niishiriojonu Pueyaso naasucuaari maja na miiniu quiniutianiya puetunu na sequesanojuanaa niaara, taa nia tojiqiaaricuaajani. Nia tojishano Pueyaso rupaacuajaari tari pohuatasaaanuu puetunu jiyacajiniaajanaa. Janiya, Pabloni, janiyari na pohuatanu naacutaajaniuhua.

*Pablo Pueyaso pueya maanu cumaquiniara jiyatesaaquiaari*

<sup>24</sup> Cristoori naquiya miishaaquiaari pocuaji na tacunura. Juhua na cuaqueya pa quishacari, naquiya pa miiniu pa rejeretarejuhua na rupaa pa pohuatasacari, puetunu na saquirojosano pueyajanaa tiuuniuria nocuajuhua. Naaratej, janiyari shuquiriaatia quiya niyani, naquiya cua miishacari niaacuara. Naa naquiya cua miishacari Cristojiniji cua pohuatanuucua tiquiyocuate, janiyari Cristo naquiya miiniu tucataa tama cua cuaqueyajiniaajani. <sup>25</sup> Pueyasocuaajari cua jiyatequiaari na saquirojosano pueya cua jiitianura, cua cumaquiniuria nijaniya puetunu na rupaatajanaa. <sup>26</sup> Cuno rupaari saaja Pueyaso jiyasohua niishishano quiquiaari tariija. Majaari na pohuatanu quiquiaari supuetana pueya, tariucuaaanu quijiaca. Quiari naataja cutara. Pueyasoori jiyasohua na rupaa niishitiquiaari tama na saquirojosano pueyarajaaja. <sup>27</sup> Pueyasoori pa niishitiniu paniquiaari taa jiyanojua shacantuuca na cumaaca quiya nijaniyarani, canapueje maja na saquirojosano Judiocuaca quiquiaaricuaajani. Niocuajaari jiyasohua Pueyaso miiniu panishano tariija: ¡Cristoori nioojiajinia quiya! Nia jiitiasacari Cristo, niaari niishiya niaari shacantuuca quijiara jatanishaanutaniyajuhua.

<sup>28</sup> Naaratej, Cristocuaajari canaa pohuatasano. Canaari puetunu pueyajanaa nacasuquiaani. Canaari nojori niishitiojquiaani puetunu canaa niishishanotajanaa, maninia Pueyaso muerasu nojori quiniuria, juhua tojetaarucuaajanaa maninia canashitishano pueya, Cristo rupesano nojori quishacari. <sup>29</sup> Naaratej, puetunu Cristo niqutiosano cumaacatajanaa jiyanojua poonijioquiaanijia, na cumaquishacari janiya.

## 2

<sup>1</sup> Pueyanaa, janiyari paniyani nia niishiniuria taa jiyanojua cua poonijioquiaa Pueyaso cua secojonuta niaacuarani, Pueyaso muerasuucua Laodicea tiacajiniajuhuaj, puetunu juhuanajuaja cua niqiyaquiniaa pueyacuaraajanaano. <sup>2</sup> Jiyanojua secojquiaa niaacuaranijia, nioojiaa cumaquishaanura, nioojiaa rupuetoonura jatiqijiuhuaj, jiyanojua nia panitioosacari. Naajuhua, secojquiaanijia maninia niishijiacara nia quiniuria, maninia nia niishiniuria tariucuaaanu Pueyaso niishishano tamajaaja, taa Neyanu seera maninia na miiniutianiya pajaniyani. <sup>3</sup> Neyanu Cristocuaajari puetunu niishijiajanaa. Majaari tamonu niishijia quiniu juhua nojuaja. Jiyanojua maninia mijia puetunu na niishishanotajanaari. <sup>4</sup> Janiyari nio sequeya nijaniyani, tamonu mariqui nia sapojoreeri najuhuaana tamaatia na pohuatasano. <sup>5</sup> Majaari cua quiniu quiquiaa niaata. Naajaa, cua sohuanuuri niaata quiquiaa. Nia shuquiritiaanijia, maninia jatiqui nia quishacari, mariyata seetanujuanaa maninia nia tiuushacari Cristoocua, maja jatasano nia quiniuria.

<sup>6</sup> Niaacuajaari pa Jiyaniijia Jesucristo masequiaari, nia jiyaniijia na quiniuria. Naaratej, pueyaracaanu maninia nia ruperenoo, maninia nia quiniuria mijiria na cumaacata. <sup>7</sup> Maninia nia rupetooore Cristota, naatej, taa naana cumaatia nujuacuuaani, jaara tu-cuamaaca nujuacaraca quiri. Naacaujiti, majaari nia naata jatasano quiniu, maninia nia tiuushacari nocua, taa nia niishitiojsoaquiiaaricuaajani. Cunora, pueyaracaanu nia sequeriquia Pueyaso: "Paacarasho canaa Quena".

*Niaari quiarinio pueya, Cristo quishacari nioojiajinia*

<sup>8</sup> Tama nia cuaqueyajaaja nia cojuare, tamasa mariqui nia sapojoreeri tamaatia nojori niishishanota najuhuanaj. Naa jaara nojori niishitiojosano tojitiariquia, niaari juhua

nojori quioosano pueya quiniutianiya. Nojori niishishanoori maja Cristojiniiji. Nojori niishishanoori saaja mijiria niishishano, supuetanaa pohuatasano najuhuanajuhua.

<sup>9</sup> Nocuaji saaja Cristo nia tojiri. Tama Cristo cutarajaariija puetunu Pueyaso cumaacajanaa jiiitaja, puetunu na niishitiajajanaano. <sup>10</sup> Naajuhua, niaari Pueyaso cumaaca jiiitaa, na niishitiajano, nia rupesacari Cristo. Naacuajitij, niaari puetunu nia panishanojuanaa jiiitaa tari, maninia quijiaca nia quiniuria. Cristojuaanaari Jijaniijajanaa. Cristo jaara na jiyarore, puetunu tamonu cumaacaraca quijiacajanaari na tojitiaa: jiyocuaaanu camarnu, mijiria camarnunio. <sup>11</sup> Cristo nia rupesacari, niaari seetanujuanaa jatanisharee maja sesa nia quiniuria socua. Majaari nareja nia cararaatiuuqia co miatesaanu quiquiaari, taa Judiocuaa miiquiaacuaani. Nojori miatesaquiiaa nojori niishiniuria nojori cuaraa quiriira saa Pueyasoraja, maja sesa miijia nojori quiniuria socua. Cuno, miatenuni, majaari pueyano na jataniniu sesa na miiniujiniiji. Cristo cutaraari sesa nioojia jataquiiaari, seetanujuanaa sesa nia quiniu jatasaanura puetunujuanaa. <sup>12</sup> Puetunu sesa nia quiniujanaari juhua jamosaquiiaari Cristota, niaa jaara moojinia tiuquini-jiosaare. Nia tohuatasacariuhua, niaari juhua samiitianishaarohua Cristota, Pueyaso cumaacaacia nia tiushacari. Niaari samiitianishaarohua taa Pueyaso samiitianiquiaariuhua Cristocuaani. <sup>13</sup> Niaari juhua macu quiquiaari tariija, sesa miijia nia quishacariija, sesa jiuujiaraca nia quishacarijianio. Jiyacaritij, Pueyaso nia samiitianiquiaari Cristota, na jiyanooshacari nijaniya puetunu sesa nia miishanojiniijijanaa. <sup>14</sup> Pa tojiyaquishacari tariucuaaanu Pueyaso rootasano, paari puecoosocoriquiano quiquiaari juucuanu. Sesa pa miishanoori juhua naajiotasano quiquiaari Pueyasora. Pueyaso cutaraari sesa pa miishano naajiotasano tuujuquiiaari puetunujuanaa. Pueyasoori puetunu sesa pa miishanojuanaa tiuutiaquiiaari Cristoocua. Cristo teetesacari niyacutesanojinia, puetunu sesa pa miishanojuanaari cuniqui puequequiiaari. Naa Cristo miishacari pocuaratej, majaari sesa pa miishano tiuutiasaanu pocua. <sup>15</sup> Na cusosacari niyacutesanojinia, Cristoori puetunu tamasaca sesa cumaacaraca quijiacajanaa shocotaquiiaari. Nojori cumaaca jaariutiareeri. Nojori rerequetereeri, naatej, taa quioosano pueya jaatucunuusaquiiaacuaani, pueya niqiuara macaatiishocoriquiano.

#### *Saaja Pueyaso casaacua nia jiaatiariquia*

<sup>16</sup> Naaratej, majaari nia tojiniu noo pojori, canapute nia tojitiniu saniniujiya supuetana niishitiojosanocujani. Nojori nia najuhua niishitiojoquiiaa casaa sumatuute puereshiyani, ratusanonio. Nojori niishitiojoquiiaajuhuaq teyano juucate poonijiyaquishiyani, naajuhuaq, Pueyaso niqiuara pa queranacunuunura raca macura. Nojori nia niishitiojonuquiiaa nojori jiyaniishacari paa jaara naa miyaquirini, Pueyaso mariqui pa saniitioreeri. <sup>17</sup> Puetunu cuno supuetanaa niishitiojosanojuanaari tariucuaaanu quiquiaari, miriqui na niishitiojonura pueya taate seetanujuanaa quiniutianiyanu Niriquiano jaara tiuquiri. Cuno Niriquianocuaajaari Cristo. Tari tiuquiquiaari. Nojuaari pocuaji Tacuna. Naaratej, majaari socua pa tojiniu cuno miriqui niishitiojosano. Quiaari saaja Cristo pa tojiri cutara. <sup>18</sup> Tama nia cuaqueyajaaja nia cojuare, tamonu niishitiojonaa mariqui nia sapojoreeri, niaa mariqui Pueyaso niqutionu panishano nijaniya maseyaquiriiri. Nojori nia nia na cuaqueyajaaja shuquiritiaquiiaa na jiyaniishacari nojori maja Pueyaso shocotaja na quiniu nojori secojosacari Pueyaso seya, maja Pueyasojuaana. Nojori nia nia na maquenujinia na niquishanoocuaajaaja tiuujiaa, maja Pueyaso rupaacua. Naacuajitij, nojori tiushacari tama na niishiriojosanoocuaajaaja, nojori seetanujuanaa pueya shocotajaca quiya. <sup>19</sup> Nojori nia nia na rupeanu Cristo, juhua poojia Cristo quishacari, na cuaqueya pa quishacarijuhuaq. Paa jaara maninia ruquetesano quiri poojatani, poojaari maninia maashitiya puetunu pa cuaqueyajanaa, paa jaara maninia rupettoonu quiya puetunu pa nucuhatajanaani, pa cusorohuatano. Pueyasoori nia pa maashitiniu panijajuhuaq Cristota rupettootesano pa quishacari.

<sup>20</sup> Niaari juhua tari cusoquiiaari Cristota, maja socua juhua mijiria quijiaca nia quiniuria. ¿Macutuacua taa supuetana rootasano tojirini? Maja na naata. ¿Nijaniyariuhuaq? ¿Casaara nia tojitiaajaa cuno tariucuaaanu rootasanoni? Niaari juhua nareja mijiria quiniaa quiyajaa, nia tojishacariija cuno rootasano. <sup>21</sup> Supuetanaari naa piriyojouaariitij: “Maja pa quianu cuno. Maja pa miaquenu cunojuhuaq. Maja cuno pa cooniu”. Pa supuetanaari naa sequejatej. <sup>22</sup> Naajaa, puetunu cuno pueresano casaajanaari saaja shaajeja pa seecojinia. Majaari poojia na miini sesa. Cuno tariucuaaanu rootasanoori saaja tama pueya niishishanojuaja quiquiaari. <sup>23</sup> Paa naasucuaari jiyaniyani cuno rootasanoori maninia quiya Pueyaso shuquiritanura pajaniya socua. ¿Paatucua socua maninia pueya quiri nia paa jaara casaa sumatu puerereni, naajuhuaq, paa jaara naquiya miiri tama pa cuaqueyajaajani casaa pa puerenutani? Maja. Pa pueresacari casaa, cunoori najuhuaa Pueyasora. Cunoori maja na naacunu pajaniya sesa casaacua pa jiaatiaquiniuria.

## 3

<sup>1</sup> Níaa jaara samiitianishaaquiaari Cristota, jiyocuaaanu Pueyaso jiitiasanoocua nia jiaatiare, tee Cristo cajiya na Que Pueyaso miaquetajaracuajani. <sup>2</sup> Pueyaso casaacua nia niishiriojore saaja, maja mijiria casaacua. <sup>3</sup> Puetunu tarijia sesa nia quiniujianaari tari juhua jamosaaciaari, niaa jaara Cristo cusonu jiyatere tama nia nitijiaaja. Quiarijiani, niaari saminió quíya nia rupuesacari Pueyaso, Neyanu Cristota. Nojuacuajaari pa samiitianijia. Saniniuuja, juhuanouaja maja niishishano taamueca quíjiaca pa cuaqueya quiniutianiyani. <sup>4</sup> Cristo jaara muetarohua pocua mijiria, shacantuuca cumaacaraca quíjiaca pa quishacari, jiyacaritij, paari jatanishaanutaniyani shacantuuca cumaacaraca quíjiaca pa quiniuria nata, juhua nojuajuhuj.

*Maninia rootasano Pueyaso muerasura*

<sup>5</sup> Naaratej, nia cuaqueya cuaara quíria juhua macu tama nia níquiarajaaja, nia cuaqueya nia ruuretánura na jiaatiasacari sesa miiniucua. Naaratej, maja nia numuetucunu nia camishoo maaji. Maja sesa nia miiniu niarta canuuta, niarta maajitianio. Níaa cartere puetunu sesa miiniucua nia jiaatiasanojuanaa. Maja sesa casaacua nia jiaatianu. Maja puera casamiicua nia jiaatianu. Casaacua jiaatijaari juhua Pueyaso ruuretaja quíya, tama na jiitiasano casaacuajaaja na tiuushacari juhua Pueyasooacua. <sup>6</sup> Pueyasoori jiyanoohua saniitionutaniya na tojiyashijia, canapueete naa sesa quíjiacacuajani. <sup>7</sup> Pueyaso tojiyashijia nia quishacari tarijia, niaari naa sesa miíjiaca quíquiaari. <sup>8</sup> Quiarijiani, nia tarinitiare puetunu naa sesa nia quiniujianaa. Maja juaaja nia quiniu. Maja naseeca pueyano nia quiniu. Maja jiyanooyashijia nia quiniu. Maja sesa miíjiaca nia quiniu. Maja pueya sesacaja nia quiniu. Maja sacuaraatia najuhuaa nia níti taquíruocateja nia quiniu. <sup>9</sup> Maja nia cuaracashijiootunu. Níaaari tari jatanishaaquiaari tarijia sesa nia quiniujinijí, sesa jiuujiaraca nia quishacarijia, sesa miiniucua jiiitnio nia quishacarijuhuaj. <sup>10</sup> Níaaari quíarinió jiuujiaraca quíjiaca tari. Quiarijiani, tama nia cuaqueyajaarijia tari jataa juhua nia Shipinínia Pueyaso nia quiniuria, seetanujuanaa Pueyaso niishijia nia quiniuria. <sup>11</sup> Pueyaso jatanishano pueya pa quishacari quíarijiani, majaari tari rimíajata pa quiniu, paa jaara Judiocuaca quíyani, tamasaaca pueyano; na cararaatiuuquia co míatesano pueya, míatesoo pueyano. Paa jaara tahue quíyani, juhua mococori, poonijíotesano pueya, camarnuuju pueyano, naajaa. Cristo pa rupuesacari, puetunu pajaniyajanaari mariyata na muerasu quíyani. Nojuajaari puetunu poojajinia quíyajuhuaj.

<sup>12</sup> Pueyasoori nia saquíriojoquiaari saa maniníaja nia quiniuria nera. Níajaniyari na panishano muerasu. Naaratej, pueyaca taraajeja nia quíri. Maninia miíjiaca nia quíri. Majaari nia jiyaniinu tama nia cuaqueyajaarijia socua maninia tamonujinijí. Maja juaaja nia quiniu. Jacaria pocuaja nia quíri. <sup>13</sup> Jacaria nacasutooja nia quíri. Maninia nia jiyanoori cante sesa miíri níajaniyani. Taa pa Jiyaniíjiaca jiyanooquiaari pajaniyacuaani, naa nia jyanootioorejuhuj. <sup>14</sup> Seetanujuanaa pueya paníjiaca nia quírijuhuaj. Cunoori socua jiyanoohua panishano. Panitioojuaca nia quishacari, puetunu nia miishanojuanaari jiyanoohua maninia quiniutianiyani, jatiqui nia quiniuriajuhuaj. <sup>15</sup> Naajuhuj, Pueyaso nia shanacure níoojia na cajitiniuria pueyaracaanu. Nojuacuajaari nia saquíriojoquiaari juhuaníya quíjiaca nia quiniuria, maninia rupuetootesano. Pueyaso muerasu cuaara jatiqui poonijionuujuaca quíria, naatej, taa pa cuaqueyajiniacua casaa puetunujuanaa jatiqui quíyacuaani. Majaari nia juaatíoojonu. Naajuhuj, Pueyaso nia shuquíritiare pueyaracaanu, puetunu maninia na miishanojiníjiacua niaara.

<sup>16</sup> Níoojia cuaara quíria míshaja Cristo rupaata, jiyanoohua na tojjiaca nia quiniuria. Pueyaso Rupaa nia niishitiojootore nia jaaquequejisanota. Naa nia cumaquítiojore puetunu Cristo niishishanotajanaa. Níaa jaaquequejionuere Pueyaso Rupaa naajiosanojinijí, pueya naajiosanojiníjiuhuj, Pueyaso Sohuanu niishitiojosano níajaniyano. Naa nia jaaquequejore Pueyasora, nia shuquíritianuta nojuaja. <sup>17</sup> Jesucristocuaajaari nia jiyaniíjiaca quíya. Naacajitij, níaaari na sesaanucua. Naaratej, nia sequesano, nia miishanojuhuaj, puetunu cunojuanaa cuaara quíria maninia nera. Naa nia miíriquia pa Que Pueyaso nia sequenuta "paacarasho", Neyanu cumaquiniucua níajaniya.

*Maninia miíjiaca pa quíri Pueyaso muerasu pa quishacari*

<sup>18</sup> Maajipohuaanaa, nia níyaca tojtiájaca nia quíri. Pa Jiyaniíjiaca tíuujiaca cumaati naa miíquiaaquíj. <sup>19</sup> Pueyanaa, nia níquíocua nia paníri. Majaari na juaaníu. <sup>20</sup> Mueraasapueanaa, nia queya tojjiaca nia quíri, nia shuquíritiniuria pa Jiyaniíjiaca. <sup>21</sup> Pueyanaa, maja nia juaatíniú nia níquíohua, nojori maríqui maninia miiniucuaaji pishiriíri, puera nia juaashacari nojori. <sup>22</sup> Poonitijiosano pueyanaa, puetunu nia camarnu sequesanojuanaa nia tojiri. Maja na tojjiaca nia quiniu saaja na shootiasacari níajaniya, na shuquíritianura níajaniya. Majaari saaja na níquishacari nia poonijionu nia sapojonura

nojuaja. Seetanujuanaa maninia nia poonijiore pueyaracaanu nia puerenuta saniya nia camarnujuanaa Pueyaso. <sup>23</sup> Puetunu nia miishanojuanaa nia miiri shitimia, juhua pa Jiyaniijia Cristora. Naa nia miiritij, maja juhua nareja pueyara. <sup>24</sup> Maja nia niyajetanu, pa Jiyaniijiaari nia niqutionutaniya jiyocuacaanu niaara na jitiisanonijini. Mijiria camarnura nia poonijosacari, niaa cutaraari Cristora poonijiya. Nojuacuajaari nia camarnujuanaa. <sup>25</sup> Pueyasoori sesa mijia saniitionutaniya cutara, sesa nojori miishanojinijini. Pueyasoori maja rimiajata saniniuujia. Mijiria camarucua, poonitijosano pueyano, naajaa, nojoriiri maja rimiajata Pueyasora.

#### 4

<sup>1</sup> Camarucuaana, pueyaracaanu maninia nia miiriquia nia poonitijosano pueya. Majaari nojori nia miiniu sesa. Maja nia niyajetanu, niaari jiyocuacaanu Camarnuracajuhua.

<sup>2</sup> Pueyanaa, Pueyaso secojoja nia quiri pueyaracaanu. Nia secojoriquia maninia nia niishiniutia. Pueyaracaanu Pueyaso nia secojosacari, nia sequerenoj, "paacarasho". <sup>3</sup> Naajuhua, canacuara nia secore Pueyaso, nojuaja cuara canaa pohuataniiria pueya niqiara na rupaa Cristojinijini. Majaari pueya niishiniu quiquiaari tarjia Pueyaso miiniu panishano pajaniyara Cristo seera. Cua pohuatanuucua Cristojinijini, cunora nujuatesano nia quiyani nio nujuatejojuajinia. <sup>4</sup> Pueyaso nia secore cucuara, maninia nia pohuatanura Cristojinijini, pueya niishiniuria maninia nia pohuatasano, taa Pueyaso paniya nia pohuatanuracuajani.

<sup>5</sup> Maninia nia niishiriojore taa nia miiniutianiya noo pojorini, canapuetucuaja maja Pueyaso muerasuni. Maninia nia miiri nojori, mijiria nia quishacarjia. <sup>6</sup> Nia pocoojosacari nojoritia, maja najuhua nia pocuanu. Pueya nia cumaquiri nia sequesanota. Nia niishiriojore taa nia riucuanutaniya tamasa pueyani, nojori jaara nequesotariquia niajaniya Pueyasocua nia tiuuniujinijini.

*Nata quiniaata Pablo saruhuatasacari pueya, naajionu na puecanura*

<sup>7</sup> Pa panishano pa tarajanu Tiquicoori nia pohuatanutaniya janiyajinijini. Nojuacuajaari nia cumaquinia maninia. Nojuacuajaari cuarta Pueyaso seru, pa Jiyaniijia canaa poonijionura. <sup>8</sup> Niaacua na jiyaroyanjia nia pohuatanura niajaniya taa canaa quiyani, naajuhua, na cumanijianura niajaniya. <sup>9</sup> Pa panishano Onésimoori nata quianutaniyajuhaaj. Nojuacuajaari niajanijini nio pueyano. Maninia poonijioja Pueyasora. Nojoricuajaari nia pohuatanutaniya puetunu niqijijianaa.

<sup>10</sup> Aristarco, cuata nujuatesano pueyanoni, nojuajaari nia sequeya nia saruhuatanura niajaniya nera. Marcoori nia sarhuataajuhua. Nojuajaari Bernabé cuna. Niaacuajaari tari rootasaacuan Marcojinijini. Nojuaja jaara niaacua quiaare, niocua maninia nia tiuquiniri nia tiajinia. <sup>11</sup> Jesu sesaanucua pueyanoori nia sarhuataajuhua. Na sesaari Justojuhua. Saa nio pojorijia Judiocuacajinijinoori cuata poonijioquia Pueyasora, canaa niishitiojona Cristojinijini pueya niqiara. Nojoriiri nia cumanijiana quiquiaa. <sup>12</sup> Epafrasri nia sarhuataajuhua. Nojuajaari Cristo seru niajanijini niojuhuaj. Nojuajaari pueyaracaanu niaacuara secojoquia queraatia, jiyano nia cumaatia Pueyasocua tiuujia nia quiniuria. Secojoquiaaariuhua ritia Pueyaso tojjia nia quiniuria, puetunu Pueyaso panishanojuanaa nia miiniuria maninia. <sup>13</sup> Seetanujuanaa, Epafrasri jiyano nia tacaquiaa niaacuara, Laodicea tiacajinia quiniaa Pueyaso muerasuucujuhua, Hierápolis tiacajinia Pueyaso muerasuucuanio. <sup>14</sup> Pa panishano naarajona Lucasri nia sarhuataa. Demas nia sarhuataajuhua.

<sup>15</sup> Canaara nia sarhuataare Laodicea tiacajinia quiniaa parta Pueyaso muerasu. Ninfas nia sarhuataarejuhuaj, na tiajinia rerejonaa Pueyaso pueya maanujuhua. <sup>16</sup> Naa jaara nio naajione serojorecua nia rerejosacari, Laodicea tiacajinia nia jiyarotarejuhuaj, cuara serojosaaria Pueyaso pueya maanu niqiara tiijuhua. Naajuhua, nia naajione Laodicea pueyacuara nia serojore, niaacua nojori jiyarotasacari Laodicea tiacajinijini. <sup>17</sup> Naa Arquipo nia sequere quira: "Tama quia cuaqueyajaaja quia cojuare quia tu-cuatanura quia poonijosano pa Jiyaniijia. Nojuajaari quia jiyatequiaari nera poonijiriquiano".

<sup>18</sup> Janiyari Pabloni. Quiarijiani, tama nia juashiquitatajaaja naajianijia saaja nia sarhuatanura niajaniya. Nia niishiriquia, janiyari moronucua nujuatesano quiyani. Pueyaso cuara cumaquiri niajaniya nia cumaacata jiyano nia. Tariucuaja.



## COTEENU PABLO NAAJIONEE TESALÓNICA TIACAJINIA QUINIAA PUEYASO PUEYACUARA

*Pablo saruhuatasacari Pueyaso pueya*

<sup>1</sup> Janiyari Pabloni. Janiyari nio naajiya Tesalónica tiacajinia quiniaa Pueyaso pueya maanuucuarani. Niaacuajaari pa Que Pueyaso rupuejaca, pa Jiyaniijia Jesucristo rupuejancano. Canaari mariyata nia saruhuataani, Silvano, Timoteonio. Pueyaso cuaara maninia jiitiaara na cumaacata nijaniya, maninia nia quiniuria. Cuaara nioojia cajitiirijahuaj, juhuajaniya nia quiniuria.

*Tesalónica pueyanaari Jesuucua tiuujiaqui quiquiaari seetanujuanaa*

<sup>2</sup> Maninia nia quiniucua, canaari pueyaracaanu Pueyaso sequequiaani, “paacarasho”. Canaa secojonuusacari, canaari pueyaracaanu niaacuara secojonuucuaani. <sup>3</sup> Pa Que Pueyaso canaa secosacari, canaari pueyaracaanu niishiquiaa nijaniyani, taa pueyaracaanu nia poonijioquiaa Pueyasorani, Neyanuucua nia tiuuniucua. Canaari niishiquiaa-juhuj taa nia paniniutia nia naacuquiaa niarta pueyani. Naajuhuj, niaari maninia rejeretaquiaa taraatia nia miiniu, nia niishiniucua pa Jiyaniijia Jesucristoori pocua niniutianihua. <sup>4</sup> Pueyaso panishano pueyanaa, canacuajaari niishiyani, nojuajaari nia saquiriojquiaari na panishano muerasu nia quiniuria. <sup>5</sup> Canaa jaara nia niquiara pohuataquiaari Pueyaso rupaa Jesucristojinijini, cunoori maja najuhua pohuatasano quiquiaari. Canaa pohuatasanoori jiyano hua Pueyaso cumaacaraca quiquiaari. Pueyaso Sohuanuuri jiyano hua poonijiorquiaa nioojiaquinia. Naacuajitij, niaari niishiquiaari canaa pohuatasanoori seetanu rupaajanaa. Niaacuajaari niishiya taa quijia canaa quiquiaari canaa quishacari niaatani, maninia Pueyaso muerasu nia quiniuria.

<sup>6</sup> Niaari canaacia jiaatiaquiaari, juhua canaa nia quiniurijahuaj, juhua pa Jiyaniijia Jesu nia quiniurijahuaj. Niaari seetanujuanaa naa miijicara quiquiaari, Pueyaso tojjijia nia quiniurijahuaj taa canacuana. Pueyaso rupaa nia tojjishacari, niaari jiyano hua na timitiaquiaari. Cunora, niaari jiyano hua naquiya miishaaquiaari. Naajaa, Pueyaso Sohuanuuri nia cumaquiquiaari saaja, shuquiriaatia nia quiniuria. <sup>7</sup> Naa shuquiriaatia Pueyaso tojjijia nia quiniucuatej, niaari niarta Pueyaso pueya shiniujuquiaari, seetanujuanaa Pueyaso tojjijia nojori quiniurijahuaj. Niaari naa shiniujuquiaari puetunu niarta Pueyaso pueyanaa Macedonia jiyajinia quiniatej, Acaya jiyajinia quiniaanio. <sup>8</sup> Pa Jiyaniijia rupaari najaniyajiniji tucuaanu paaquequiaari, maja saaja Macedonia jiyajinia, Acaya jiyajinianio. Cuno rupaari puetunu tiqiyocua janaa poojotasaquiaari. Naacuajitij, puetunu tiqiyocua quijia pueyajanaari tari niishiya taa Pueyasocua tiuujia nia quiya seetanujuanaani. Naacuajitij, ¿canaatucua casaara niishitiojore Jesujiniji socuani, tee cuniqui pueya niishiya tari nojuajinjicuaajani? <sup>9</sup> Tee cuniqui canaa tiuquiquiaani, pueyari canaajiniji poojotanuya tari, taa Jesujiniji canaa pohuataquiaaricua nia janiyani. Nojoriiri niishiyajuhuj taa canaa nia tiuquinitiaquiaari maninia nia tiacajiniaqueyani, canaa pohuatasano nia tojinuria. Naajuhuj, niaanaari pueya shipinjiosano nia jiyatesano nia pueyasora cartequiaari, pueyaracaanu rishijia seetanu Pueyasojuaanaa tojtiajaca nia quiniuria. <sup>10</sup> Naajuhuj, niaanaari Neyanu sashiya, jiyocuaanuji na tiuquinihuara, teyano Pueyaso samitiani quiaari hua macujinjicuaajani. Pueyari najaniyajiniji niishiyajacuhuj, Jesuuri pocuaji Tacuna, maja mani quiquiojinia pa quejoosaanura, Pueyaso saniitiosacari na tojtiaashijia.

## 2

*Pablo niishitiosacari hua pueya, taa na quiquiaari nojoritiani*

<sup>1</sup> Cuarta Pueyaso pueyanaa, niaacuajaari niishiya, majaari najuhua canaa quini quiquiaari, niaata canaa quishacari. <sup>2</sup> Niaacuajaari niishiya, Filipo tiacajinia canaa quishacari, niaacua canaa tiuquiyacquishacari, canaari cuno tiacajinia sesacasaaquiaarini. Canaari jiyano hua taraatia miishaaquiaarijuhuaj. Naajuhuj, nia tiacajinia canaa tiuquijiosacari, pueyari canaa pohuatasano ruuretaquiaari saaja. Naajaa, Pueyasoori canaa cumaquiquiaari juhua jiuujiaaju canaa pohuatanura Jesucristojiniji nia niquiarajuhuj. <sup>3</sup> Canacuajaari niishiquiaarini canaa pohuatasanoori seetanu rupaajanaa. Majaari canaa pohuatanu quiquiaari canaa miiniuria sesa nijaniya, canaa sapojonura najaniyajuhuj. <sup>4</sup> Pueyasojuaanaari canacuua tiuquiquiaari. Cunora, canaa jiyatequiaariiri Neyanujiniji pohuataanaa canaa quiniuria. Naacuajaari taa canaa poojotaquiaa pueya tiuuniuria nocuacuajani, Pueyaso jiyanooniuria nojori. Canaari

seetanujuanaa Pueyaso timitiniu paniyani, maja saaja pueya. Pueyasocuaajaari canaa jiuujia niishijia. <sup>5</sup> Niaacuaajaari niishiyajuhuj, majaari canaa sapojonu quiquiaari nijaniya shanohua canaa sequesana, canaa nia maniniucuanura. Naajuhuj, majaari canaa cuaracashijionu quiquiaari nijaniya, canaa nia niqutiojonura nia cumaneecajiniji. Pueyasoori na niishiyacuja. <sup>6</sup> Majaari quenaaja canaa niishiriojonu quiqia pueya timitiasano canaa quiniuria, nia timitiasano pueya canaa quiniurajuhuj. Maja. <sup>7</sup> Canaacuaajaari seetanujuanaa nia jiyaniijianucuanu, Jesucristo jiyaramiquishano pueya canaa quiniucua. Naajaa, niaata canaa quishacari, majaari naa canaa miiniu quiquiaari nijaniya, juhua canaa seya nia quiniuria. Saniniuujia, canaari tojtaarucujanaa juhua naatujoori quiquiaarini, niaata canaa quishacari. Naatej, taa maaji jitiiaa maninia necohuacuaani, canaari naa nia jitiiaquiaarijuhuaj. <sup>8</sup> Jiyanohua canaa paniniucua nijaniya, majaari saaja Pueyaso rupaa canaa pohuatano quiquiaari nijaniya. Canaa cutaraari tama canaa cuaqueyajaaja panitiaquiaari niaacuarani, naajaa, canaa cuaraa puecoosaariaqui. Canaari naa jitiiaquiaari nijaniyani, jiyanohua canaa paniniucua nijaniya. <sup>9</sup> Cuarta Pueyaso pueyanaa, niaacuaajaari niishiya taa canaa poonijioquiaari jiyanohuani, tama canaa panishanojuaaja canaa masetajara. Canaari naa poonijionuquiaarini juuca, niucuanio, canaa pohuatanaa Pueyaso rupaa nijaniya. Canaari naa miiquiaarini maja canaa taajetenura nijaniya canaa mashiniquijionuta nia cumaneeca.

<sup>10</sup> Naacuaajitij cuarta Pueyaso pueyanaa, nijaniya, Pueyasojuhuaj, niaacuaajaari niishiya canaari saaja maninia miiquiaarini, niaata canaa quishacari. Majaari quenaaja canaa miiniu quiquiaari sesa. Naacuaajitij, tamasacaari maja na naata canacuara saquiriojotanu, canaa jaara tojtaarucujanaa sesa miyaquiaarini. <sup>11</sup> Niaari niishiyajuhuj taa canaa shiniujuquiaari nijaniyani Pueyaso nia tojiniuria. Niaari niishiyajuhuj taa canaa cumaniiaquiaari puetunu nijaniyajanaani taraatia nia quishacari, naatej, taa pueyano miiquiaa na panishano niquihuacuaani. <sup>12</sup> Naajuhuj, canaacuaajaari jiyanohua nia nacasuquiaarini maninia miijiaa nia quiniuria juhua seetanujuanaa Pueyaso pueya. Pueyasocuaajaari nia saquiriojoquiaari pueyaracaanu nata nia quiniuria, jiyaniijianucua nia quiniurajuhuj, juhua nojuajuhuj. Nojuacuajaari na shacantuca cumaacajinia quijia.

<sup>13</sup> Canaa jaara Pueyaso rupaa pohuataquiaari nia niquiarani, majaari nia jiyaniinu quiquiaari cunoori saaja pueyajiniji canaa tojiniushano. Maja. Niaari seetanujuaana na tojtiajacara quiquiaari, nia niishishacari cunoori seetanujuanaa Pueyaso rupaa cutara. Canaari cunora canaa timiniutia sequequiaa Pueyasoni, "paacarasho". Canaa pohuatasanoori seetanujuanaa Pueyaso rupaa. Naacuaajitij, na rupaari noojiajinia poonijioquiaa, maninia miijiacara na jataniniuria nijaniya, Jesuucua tiuujiaa nia quiniucua. <sup>14</sup> Naa Jesucristoocua tiuujiaa nia quiniucuatej, niarta pueyari nia miiquiaari naquiya, taa Judea jiyajinia parta Pueyaso pueya maapue miishaaquiaaricuaani. Tama narta Judiocuacajaarija nojori miiquiaari naquiya, Jesucristo tojjiaa nojori quiniucua. <sup>15</sup> Nio cuarta Judiocuacani, nojori supuetanaajuhuj, nojoricuaajaari pa Jiyaniijia Jesucristo motuquiaari. Nojori supuetanaari naa tariucuaaunu puecooquiaarijuhua Pueyaso sequesano caminiujuiniaa pueyatej. Naajuhuj, Jesuucua tiyashijiaa cuarta Judiocuacari canaa taanuuquiaari canaa Judea jiyajiniji. ¿Cuno pojoritiiri Pueyaso timitiasano? ¡Maja! Cuno pojoricuaajaari juhua puetunu mijiria quinaa paraajanaa. <sup>16</sup> Naacuaajitij, canaa jaara taucuaa pohuatano paniriquia Jesucristojinijini, Pueyaso pueyara nojori jiyatesaanurajuhuj, Judiocuacari canaa tenujuquiaa juucuanu. Naacuaajitij, Pueyasora, sesa Judiocuaca mijiosanoori tari tojtaarucujanaa puera. Cunora, Pueyasoori nojori saniioquiaa jiyanohua.

*Pablo naquerejosacari juucua Tesalónica tiacajinia quiniaa Pueyaso pueyacua*

<sup>17</sup> Cua panishano pueyanaa, canaacuaajaari rupaquijia nia shuriucuaaji quiaquiaariuhuanu. Jiyacari canaa niquiyaquishacari nijaniya, naajaa, canaacuaajaari juhua niaata quiqiaajaani, pueyaracaanu canaa niishiriojosacari nijaniya, niaacuara canaa secosacari. Canaari juucua jiyanohua nia niquiniu paniriquiaani. <sup>18</sup> Cunora, canaari niaacua naquerejoquiaari juucuanu. Janiyari niaacua naquerejonu pacutejoquiaarini. Satanásri canaa cushitioquiaari saajani. <sup>19</sup> ¿Janiyatucua casaara nia niquiniu paniyaquiririni? Niaacuaajaari jiyanohua cua timitiasano pueya. Pa Jiyaniijia Jesucristo tiuquishacariuhua, janiyari niishiyani, nojuajaari canaa shuquiritanutaniya maninia na tojjiaa nia quishacari canaa niishitiojonuucua na rupaa nijaniya. Pa Jiyaniijia pa quishacari, jiyacari, canaari jiyanohua nia timitianutaniyani, maninia na tojtiajacara nia quiniucua mijiria. <sup>20</sup> Taaquiririni, canaacuaajaari tari shuquiriaatia quiyani, maninia na tojtiajacara nia quiniucua. Niaacuaajaari seetanujuanaa canaa timitiasano pueya.

## 3

<sup>1</sup> Naa jiyanoohua canaa niishiniu panishacari juucua niajanijajinijitij, majaari socua canaa sashiniu paniniu quiriquiaa. Cunora, canaari niishiriojoquiaarini, maniniacuaajaari canaa jateenura tamajaaja Atenas tiacajinia. <sup>2</sup> Naacuajitij, canaari saaja parta Pueyaso pueyano Timoteo jiyaroquiaari niaacuani. Nojuacuajaari jaarajaaja cuata poonijiona Pueyasora, Jesucristojiniji canaa pohuatnura. Janiyari niaacua na jiyaroquiaarini na cumaquiniuria niajanija, mariyata socua na shiniujuniuria niajanija Jesuucua nia tiuuniuria saaja. <sup>3</sup> Na jiyaroquiaarinijia na cumaquiniuria niajanija maja quenaaja niquiriyatu niajanijajinijinio pishiniuria Pueyasocuaaji, naquiya nia miishacari. Niaacuajaari tari niishiquiaari, paari naquiya miishiyani Jesucristoocua pa tiuuniuucua. <sup>4</sup> Canaa quishacari niaataja, canaacuaajaari tari nia numootequiaarini, puetunu pajaniyajanaari naquiya miishaanutaniyani Jesucristo tojtiajaca pa quiniuucua. Niaacuajaari niishiya, seetanujanaa naa tohuatecanuuri cua sequesano. <sup>5</sup> Cua niishishacari niajanijajiniji, niaanaari naquiya miishaquiaa, janiyari puereriquiaani Sesaaca naasucua nia miitiriucuaa sesa. Jaara naa quiriritij, puetunu canaa miishanojuanaa niaara maara najuhuana quiquianu. Naa cua tacaashacaritij, majaari socua cua tarishiniu paniniu quiquianu, niajanijajiniji cua niishiniuria. Cunora, janiyari ritia jiyarocanu niaacua Timoteoni, saniniujia nojuaja pohuatanuhuaa janiya, niaate Jesuucua tiuyajaa.

<sup>6</sup> Timoteocuaajaari tari niajanijajiniji tiuquiriohuacuaa. Nojuajaari canaa pohuatasuhuacuaa, niaanaari Jesuucua tiuyajaa. Niaanaari panitiojuaca quiyajaa. Canaa pohuatasuhuacuaajaarihuaj, niaanaari canaa niishiriojoquiaa jiyanoohua nia paniniutia canaa. Niaanaari canaa niquiniuucua jiaatiaa, naatej, taa canaa jiaatiaa canaa niquiniuria niajanijajinijia. <sup>7</sup> Cuarta Pueyaso pueyanaa, seetanujanaa canaari taraatia miishiya niyani. Canaari tacayajuhuj. Naajaa, canaa niishishacari niaanaari seetanujanaa Jesuucua tiuyajaa, canaari canaa jiuujia cajitiriucuaani. <sup>8</sup> Naa canaa tojishacari niaacuajitij, canaari juhua samiitiacorohuani, pa Jiyaniijia tojtiajaca nia quiniuucuaaja. <sup>9</sup> Cunora, canaari jiyanoohua nia shuquiritiaa Pueyaso niqiarani. Naacuajitij, majaari canaa niishiniu taate canaa naata sequenu nojuajani "paacarasho". Naa maninia nia quiniuucuatej, canaari jiyanoohua shuquiriaatia quiyani. <sup>10</sup> Naajuhuj, canaari juuca, niucua secojoquiaa Pueyasoni, nojuaja cuara canaa tiuquitihuara niaacua. Canaari maninia nia niishitiojonu tucatanu paniyani, seetanujanaa maninia jeenucuaasano Pueyaso pueya nia quiniuria.

<sup>11</sup> Canaari paniyani pa Que Pueyasojanaa, pa Jiyaniijia Jesucristonio, nojori cuara canaa naacuura niaacua canaa tiuquiniuria. <sup>12</sup> Pa Jiyaniijia cuara nia jiyateera socua jiyanoohua panitiojuaca nia quiniuria, tamasaca panijaca nia quiniuriajuhuaj, taa canaa panija niajanijajinijia. <sup>13</sup> Naa panijaca na jiyatesacari niajanijatej, niaari nioojia niqijoteyashijaca quiniutianiya cutara. Naajuhuj, niaari tojetaarucujanaa sesa miyashijaca quiniutianiya, pa Jiyaniijia Jesucristo tiuquishacarihuua puetunu na jiyanooshano pueyatajanaa.

## 4

*Taate pa naata Pueyaso shuquiritiniuni*

<sup>1</sup> Quiarijiani cuarta Pueyaso pueyanaa, pa Jiyaniijia Jesu jiyaramiquishano pueya canaa quiniuucua, canaa sequesano nia tojiri. Quiarijiani, canaari nia shiniujijani socua maninia miijaca nia quiniuria. Canaari nia niishitiojoquiaari maninia miijaca nia quiniuriani, Pueyaso nia shuquiritiniuria. Niaacuajaari naa maninia miya.

<sup>2</sup> Niaacuajaari canaa rootasano pa Jiyaniijia Jesujiniji niishiya tari. <sup>3</sup> Canaacuajaari nia rootaquiaarini, Pueyasoori nia panitiaa saaja nera nia quiniuria, tojetaarucujanaa maninia jeequesano nia quiniuria sesa nia miishanojiniji. Majaari nia numuetucunu nia camishoo maaji. <sup>4</sup> Puetunu mashiquorijianaa cuara niishiiria maninia na cojuanura necocharano, maja ritia na numuetucunura, nata na camiyaquishacarijia. Cuaara na cuaqueya panishano rejetenu niishiiria. <sup>5</sup> Majaari sacuaraatia nia miiniu taa Pueyaso niishiyashijaca pueya miiquiaacuani, jiyanoohua nojori jiaatiasacari maajicua. <sup>6</sup> Naajuhuj, majaari quenaaja jiyasohuaja niarta pueyano niquiocua nia numuetucunu, neyaca nia sapojonuta. Cuno maajicuaajaari saa neyacaraja, maja tamonura socua. Pueyasocuaajaari naa miijaca saniitnutaniya jiyanoohua, taa canaa numootequiaari tari niajanijajinijia. <sup>7</sup> Pueyasoori maja na saquirojonu quiquiaari pajaniya sacuaraatia miijaca pa quiniuria. Pa saquirojoquiaari tojetaarucujanaa sesa miyashijaca pa quiniuria, saa neraja. <sup>8</sup> Naacuajitij, cante nio rootasano ruuretajani, nojuajaari maja saaja na rerequetenu nio rootasanojiniji pohuatana. Nojuajaari Pueyasojanaa rerequeteya cutara, cante na Sohanu niqitioquiaari niajanijajinijia.

<sup>9</sup> Quiarjiani cuarta Pueyaso pueyanaa, janiyara, najuhuanaruhua niaacuara cua naajionura cua niishitiniuria nijaniya, panitioojuaca nia quiniuria. Pueyasocuaajari tari nioojiajinia nia niishitiquiaari panitioojuaca nia quiniuria. <sup>10</sup> Niaacuajaari seetanujuaanaa puetunu Macedonia jiyajinia niarta Pueyaso pueya panijiaca quiyacuaja. Naajaa, cuarta Pueyaso pueyanaa, canaa nia tojiri. ¡Socua panijiaca nia quiri! <sup>11</sup> Tama nia cuaqueyajaaja nia cumaquiriquia juhuajaniya quijiaca nia quiniuria. Tama nia poonijosanjiniaaja nia cojeriquia, tama nia juaashiquiatajaaja nia poonijosacari, taa canaa rootaquiaari nijaniyacuajani. <sup>12</sup> Naacuajitij, Pueyaso niishiyashijiaca pueyari nia rerequeteyaquiniutianiya. Naajuhuaaj, niaari puetunu nia panishanojuanaa jitianutianiya.

*Taa pa Jiyaniijia tiuquishacariuhua quiniutianiya*

<sup>13</sup> Cuarta Pueyaso pueyanaa, canaari juhuacarijia nia tonu paniyani taa Jesuucua tiuujiaa shaajecono pueya niishaanutianiya. Canaari nia niishitiniyu paniyani maja nia taraajenura juhua Jesuucua tiuyashijiaca pueya. Nojoriiri maja nia jitianu nojori Jiyano, nojori na samiitianijionuhua. <sup>14</sup> Paacuajaari niishiyani Jesuuri cusoquiaari. Na nuhuaji samiitiaquiaariuhua. Naajuhuaaj, paari niishiyani, Pueyasoori Jesuucua tiuujiaa shaajecono pueya samiitianijionutaniuhua, nojori na rijionura Jesuta, Jesu tiuquishacariuhua.

<sup>15</sup> Canaajanaacuajaari nia sequeyani, niocuajaari pa Jiyaniijia niishitishano canaa: pajaniya, canapue te pa Jiyaniijia tiuquishacariuhua saminiucua quiniutianiyaajaani, majaari macunucua pa puetanu quiniutianiya pa Jiyaniijiaata pa naacuneetonura jiya cajiniocua. <sup>16</sup> Naa quiniutianiyaari. Pa Jiyaniijia nacanuari tojishaanutianiya, Pueyaso seya jiyaniijia nacanujuhuaaj, Pueyaso trompeta jonenenumio. Jiyacaritij, pa Jiyaniijiajanaari jiyocuaaanuji rosenutaniya cohuaja najacajiniara. Jiyacarijihuaaj, puetunujuanaa Jesuucua tiuujiaa shaajecono pueyari samiitiaconutaniuhua coteenu. <sup>17</sup> Na nuhuaji pajaniya, canapue te saminiucua quiyajaani, paari nojoritia ritia rijiosaanutianiya cohuaja najacajiniarani. Paari tii coquetoanutianiya pa Jiyaniijiaata paratujiniani. Jiyacaritij, paari tari pueyaracaanu nata quijiacarano quiniutianiya. <sup>18</sup> Cua panishano pueyanaa, nio cua pohuatasanta nia cumanijiatooriquia.

## 5

<sup>1</sup> Majaruhua maninia cua naajionura niaacuara cua niishitiniuria nijaniya socua, taacari pa Jiyaniijia tiuquiniutianiuhuani. Niaacuajaari tari na niishiya, naajuhuaaj, taate mijiria quiniutianiya nia tiuquiyaquishacarijia. <sup>2</sup> Niaacuajaari maninia niishiya, pueya jiyaniishacari juhuanojuajaaja maja pa Jiyaniijia tiuquiniyu quiniutianiuhuua, nojuajaari jiyacari tiuquiniutianiya. Nojuajaari canashiyaquiji tiuquiniutianiya, taa nohuasejojua tiuquiquiaa niucua tiajiniaacocuaani, juhuajaniya tia camaru maquesacari. <sup>3</sup> Naajuhuaaj, quera pa Jiyaniijia tiuquishacariuhua, mijiria quinaa pueyari naa sequejaca quiniutianiya: "Paacuaja maninia quiyani. Shaaquicuaaja miaquetojonu". Canashiyaquiji jiyacari, Pueyaso saniitosacari na tojiyashijiacaari quiniutianiya. Naa quiniutianiyaari taa maaji nooquiaa juhuacatecara canashiyaquiji na manajacuaani. Majaari quenaaja niquiriyatu curosaanu quiniutianiya saniitosoo. <sup>4</sup> Nijaniya saniniujia cuarta Pueyaso pueyanaa, niaari maja juhua ninishiqui quijiaca, pa Jiyaniijia cariyatunura nijaniya. <sup>5</sup> Puetunu nijaniyajanaacuajaari cuhuashiqui quijiaca. Pueyasojuaanaacuajaari nioojiaa cuhuataquiaari. Majaari tari juhua ninishiqui quijiaca pueya pa quiniyu. <sup>6</sup> Cunora, pa Jiyaniijia sashijiaca pa quirij. Maja juhua tamasaaja, juhuajaniya quiquioyari. Nojoriiri juhua maquetiuya. Pajaniya saniniujia cuarta Pueyaso pueyanaa, juhua sutejaca pa quirij, maninia niishiriojojuacajuhuaaj. <sup>7</sup> Maquetujuacaari niucua maquetuquiaa. Naajuhuaaj, mashaasequenujuacaari niucua mashaasequenuquiaa. Naa mijiaacari Pueyaso tojiyashijiaca. Majaari na maniniucuanu cuhuashiqui. <sup>8</sup> Pajaniya saniniujia, paari cuhuashiqui quijiaca cutarani. Naaratej, pueyaracaanu maninia niishiriojojuaca pa quirij. Romano pueya miaquetoosacari, nojoriiri turtuco cushiyonuujuua, nocuaji na nujutajara cashi. Cumueeca casaa cushiyonuujuajaariuhuaaj, na naca na cojuatajara. Naajuhuaaj, naa poojia pa cojuare, saaja Jesuucua pa tiuuniuta, seetanujuaanaa panijiaca pa quishacarijihuaaj. Seetanujuaanaa pa niishiri, Pueyasoori pa saquirojoquiaari na muerasu pa quiniuria pueyaracaanura. Naacuajitij, pocua pa niishitija cojuareni, maja poojia pa niquijiotenura najuhanaj. Naacuajitij, Sesacaari maja na naata shocotanu quiniutianiya pajaniya. <sup>9</sup> Pueyasoori maja na saquirojonu quiquiaari pajaniya na saniitosocoriquiano. Pa saquirojoquiaari cutaraari na jiyanooniuria pajaniya, na muerasu pa quiniuria, Neyanu Jesucristoocua tiuujiaa pa quishacari. <sup>10</sup> Neyanucuaajaari pocuara cusoquiaari, nata rishijiaca pa quiniuria pueyaracaanu. Naacuajitij, naajaa, paa jaara cuso-yareni, paa jaara saminio quiyajuhuaaj, pa Jiyaniijia tiuquishacariuhua, puetunu nocua tiuujiaajanaari pueyaracaanu saminio quiniutianiya nata. <sup>11</sup> Naaratej, pueyaracaanu nia

cumaquitioojoriquia Pueyaso rupaata. Nia shiniujiutooriquiajuhuaj, seetanujuanaa pa Jiyaniijia tojjijaca nia quiniuria, taa nia miiquiaacuaja tarini.

*Socua Pablo rootasacari Pueyaso pueya*

<sup>12</sup> Cuarta Pueyaso pueyanaa, canaa nia tojiri. Cuniqui nia jiitianaa tojjijaca nia quiri. Majaari nojori rerequetenu. Nojoriiri jiyanoehua poonijioquiaa pa Jiyaniijia nojori niishitiojonura nijaniya, na nacasunura nijaniyajuhua. <sup>13</sup> Cunora, jiyanoehua nojori nia paniri. Majaari na rerequetenu. Nojoriiri pa Jiyaniijia poonijioquiaa na cumaquiniuria nijaniya. Maninia nia quiri pueyanaa. Majaari juayonuujatanu.

<sup>14</sup> Nio nia tojirijihuaj cuarta Pueyaso pueyanaa. Taajecori nia nacasura. Noojia niqijiotejaca nia shiniujiuri, seetanujuanaa cumueeca Pueyaso pueya nojori quiniuria. Noo pojori nia cumaquiriquiajuhuaj, Satanás saniniujiushacari na cuaqueya miiniu panishano rejeretaashijiacatej. Majaari cuno pojori cartenu. Nia juaaniu nia rejeteriquia, maja quenaaja nia juaaniuria tamasacata.

<sup>15</sup> Naajuhua, tama nia cuaqueyajaaja nia cojuariquia maja nia naminiuria niarta pueyano, nojuaja jaara sesa miiriquia nijaniya. Saniniujia, pueyaracaanu maninia nia miitiooriquia niarta Pueyaso pueyata. Naa nia miiriquia puetunu pueyajuhua.

<sup>16</sup> Pueyaracaanu nia shuquiririquia, Pueyaso pueya nia quiniucua. <sup>17</sup> Naajuhua, pueyaracaanu nia secojoriquia Pueyaso. <sup>18</sup> Naa jaara maninia miishaare, naa jaara sesa miishaarejuhuaj, naajaa, puetunu naa nia miishaanuucujanaa Pueyaso nia sequeriquia, "paacarasho". Pueyasojuanaacuajaari naa paniya pa miiniuria, Jesucristo Sohuanu pa jiitanuucua poojiajinia. <sup>19</sup> Majaari Pueyaso Sohuanu nia ruuretanu, nojuaja jaara nioojiajinia nia shiniujiya maninia nia miiniuria. <sup>20</sup> Naajuhua, majaari nia soonu Pueyaso sequesano caminiujiuniaa pohuatasano. <sup>21</sup> Coteenu nia saniniujiuri cutara, nia niishiniuria seetanutejanaa nojori pohuatasano. Teyano nojori pohuatasanojinijiniote maniniani, cuno tojjijaca nia quiri. <sup>22</sup> Puetunu sesa niishishano casaajanaa soojeaca nia quiri.

<sup>23</sup> Poojia cajitinia Pueyasojuanaa cuaara nia jeenucuaara juhuacaribia, tojetaarucujanaa sesa miyashijia nia quiniuria pa Jiyaniijiaacuaji. Nojuaja cuaara naa cojuara nia sohuanu, nioojia, nia cuaqueyano, tojetaarucujanaa soosoo nia quiniuria pa Jiyaniijia Jesucristo cuaara tiuquiriohuaatijia. <sup>24</sup> Cante nia saquiriojoquiaaricuaa na pueya nia quiniuriani, nojuajaari puetunu shusha cua sequesanojuanaa nijaniya miiniutianiya niaara. Nojuajaari maja na niishiniu na rupaa jatanu. Nojuaja cutaraari na sequesano miijia pueyaracaanu.

*Pablo sequesano na naajionee na tucuatasaari*

<sup>25</sup> Cuarta Pueyaso pueyanaa, Pueyaso nia secojonuuriquia canaacuarajuhua.

<sup>26</sup> Canaara nia saruhuatare cuniqui quiniaa parta Pueyaso pueyajuhua nojori nia nujuunuta, seetanujuanaa Pueyaso paniniutia.

<sup>27</sup> Pa Jiyaniijia jiyaramiquishano cua quiniucua, cua tojitiare pueyanaa. Nio cua naajionee nia serojore puetunu Pueyaso pueyarajanaa.

<sup>28</sup> Pa Jiyaniijia Jesucristo cuaara cumaquiiria nioojia. Cuaara naa quiiriatej.

## TANEE PABLO NAAJIONEE TESALÓNICA TIACAJINIA QUINIAA PUEYASO PUEYACUARA

*Pablo sarhuatasacari Jesucristoocua tiuujiaa*

<sup>1</sup> Janiyari Pablóni. Silvano, Timoteonio, canaari nio naajiya niaacuarani, puetunu Tesalónica tiacajinia quiniaa parta Pueyaso pueyarajanaa. Nio naajioneeri niaara, canapue te pa Que Pueyaso rupuejacacuajani, pa Jiyaniijia Jesucristo rupuejacanio. <sup>2</sup> Pa Que Pueyaso, pa Jiyaniijia Jesucristojuhuj, nojori cuaara nioojia cumaquiiria. Cuaara nia jiyateera juhuajaniya quijiacarajuhuj.

*Pueyasoori na tojtianu paniyashijiaa saniitioriquiano Jesucristo tiuquishacariuhua*

<sup>3</sup> Cuarta Pueyaso pueyanaa, canaari jyanohua nia timitiaani jyanohua Pueyasooocua tiuujiaa nia quiniucua socua, panitioojuaca nia quiniucua socuajuhuj. Cunora, canaa secojosacari Pueyaso, canaari pueyaracaanu na sequequiaani, “paacarasho”. <sup>4</sup> Naa maninia nia quiniucuatej, canaari shuquiriaatia poojotaquiaa nijaniyajiniiji Pueyaso pueya maapue niqiuara tamaquiicua canaa rucuanesocarini. Canaari nojori poojotaquiaani taa nia rejeretaquiaa juhuajaniya naquiya nia miiniuni, taraatia nia miiniujihuj, Pueyasooocua tiuujiaa nia quiniucua. <sup>5</sup> Pueyaso saquirojionuucua niajaninya pueyaracaanu shuquiriaatia quijiaa nia quiniuria na shuriucua, cunoori maja najuhuaana quiquiaari. Niaacuajaari seetanujuanaa na pueya. Cunoori maatia niishishiyacuaja juhuajaniya nia rejeretasacari naquiya nia miiniu, Pueyasooocua nia tiuuniucua. Pueyaso niishiyashijiaa pueyari naa naquiya miiquiaa nijaniyatej, Jesucristoocua tiuujiaa nia quiniucua.

<sup>6</sup> Naajaa, Pueyasocuaajaari tojetaarucujanaa sesa miyashijia. Nojuajaari niaacua naminiutianiya noo pojori, naquiya miitajaca nijaniyatej. <sup>7</sup> Nijaniya saniniujia, naquiya mijiosaaquiaarini, niaari canaata samaraatasaanutaniyajuhuj, Jesucristo tiuquishacariuhua pocua. Jiyacaritij, nojuajaari niquishaanutaniya mani rimianuqueyano tiuquitiohuano, jyanohua cumaacaraca na seyata jiyocuaaanuji. <sup>8</sup> Tiuquiniutianihuari na saniitionura noo pojori, canapue te Pueyaso niishiniu paniyaquiquiaani, noo pojorijihuj, pa Jiyaniijia Jesu rupaa ruuretajacatej. <sup>9</sup> Puetunu cunoo pojorijianaari pueyaracaanu saniitiosocoriquiano jiyatesaanutaniya. Nojoriiri tucuaacaanura quejoosaanutaniya pa Jiyaniijia shuriucujaji. Naacuajitij, majaari nojori niqiniu quiniutianiya na jiquico, shacantuuca na cumaacanio, nojuaja jaara mijiria tiuquiriohua pa shuqiritianura nojuaja. <sup>10</sup> Jiyacaritij, puetunu na jeenucuasano pueyajaanaari jyanohua na timitianutaniya. Puetunu nocua tiuujiaa pueyajaanaari jyanohua jiuujiateconutaniya, pa Jiyaniijia na shootiatasacari. Niaari na niqiniutianiyajuhuj, nojuajiniiji canaa pahuatasanoocua nia tiuuniucua.

<sup>11</sup> Canaari cunora pueyaracaanu niaacuara secojoquiaa Pueyasoni, maninia na pueya nia quiniuria, maja nojuaja caririquiniuria na saquirojionuucua nijaniya. Canaari niaacuara secojoquiaajaaniuhuj, Pueyaso cuaara nia tucuataniiria na cumaacata puetunu maninia casaa nia miiniu panishanojuanaa. Cuaara nia tucuataniiriajuhua puetunu nia miishanojuanaa, cunoo, Pueyasooocua nia tiuuniutia nia poonijiosanoni. <sup>12</sup> Naacuajitij, pa Jiyaniijia Jesuuri socua timitiasaanutaniya naa nia miiniucua maniatej. Naajuhuj, nojuajaari nia timitianutaniyajuhuj. Naa maninia quiniutianiyari pa Pueyaso pa Jiyaniijia Jesucristota na cumaquishacari nijaniya.

## 2

*Maatia pahuatasano, taate mijiria quiniutianiyani, pa Jiyaniijia tiuquishacariuhua*

<sup>1</sup> Quarijiani cuarta Pueyaso pueyanaa, socua nia pahuatarohuacuara pa Jiyaniijia tiuquiniujiniiji, taa pa coquetoonutaniya natajanihuuj. <sup>2</sup> Canaa sequesano nijaniya nia tojiri, pueyanaa. Majaari nia niyajetanu tariucuaaanu canaa niishitiojosano nijaniya, nia jiyajeneyaquiniucujaji tamasaca sapojosacari nijaniya. Majaari nia shiriiquiniu tamasaca jaara sequere nijaniya: “Pueyaso Sohanuuri cua niishitirii, pa Jiyaniijia tiuquishacariiri quarijia”. Tamasaca jaara naa nia pahuatate, majaari na sequesano tojiniu. Naajuhuj, tamasaca jaara naajionuure tamajaaja, niaara na jiyatesocoriquiano juhua canaa naajione, majaari nojori tojiniu. Nojoricuaajaari nia sapojiya. <sup>3</sup> Pueyanaa, majaari niaacua nojori nia shanacunu nojori sapojonura nijaniya. Naa niishiri, pa Jiyaniijia tiuquiyaquishacariuhua, queraatia pueyari Pueyasooocujaji pishiniutianiya.

Jiyacarijuhuaj, Pueyaso rootasano Ruuretajajanaari supuenutaniya. Nojuacuajaari tariucua Pueyaso saniitiosocoriquiano na riuriotaca. <sup>4</sup> Nojuacuajaari Pueyaso paraca. Nojuajaari puetunu pueyajanaa tenujunutaniya maja nojori tojiniuria Pueyaso, pueya shipinijiosano nojori pueyasohuara nojori tarinitianurajuhuaaj. Nojuaja cutaraari tama na cuaqueyajaaja jiyatenutaniya juhua Pueyasora. Pueyaso Secojojuu tajiinia cajiniutiani-yari, Jiyaniijijanaa cajitiujijani. Jiyacari sequenutaniyari: “Janiyacuaajaari Pueyasoni”.

<sup>5</sup> Pueyanaa, ¿majeeri nio nia niishiniucuaaja? Janiyacuajaari nojuajiniji nia pootajani niaata cua quishacari. <sup>6</sup> Niaa naasucuaari niishiyacuaja canteeri juhua na quiaajaani, maja juhuanojuaja mijiria na miiniuria tama na panishanojuaja, Pueyaso paniyaquishacarijia. <sup>7</sup> Seetanujuanaa, Sesaaca cumaacaari tari mijiria pooniija jiyasohuaja. Naajaa, Pueyaso paracaari juhuanojuaja maja na naata muetanu, pueya niishiniuria nojuaja, na tenujuna cuara niiquiji rishaarejaatijiaj. <sup>8</sup> Na tenujuna jaara rishaare niiquiji, jiyacarijij cuno sesaaca sequeeri muetanutaniya, jiyanojua sesa na miiniuria. Naajaa, pa Jiyaniijia tiuquishacarihuua na shacantuca cumaacajinia, nojuajaari cuno sesaaca seque muetanutaniya saaja na rupaata na noonutia, na shaajanura puetunujuanaa. <sup>9</sup> Cuno sesa mijia sequeeri muetanutaniya Satanás cumaquishacari nojuaja. Naacujitij, nojuajaari jiyanojua cumaaca jitianutaniya jiyajeneta casaa na miiniuria, pueya jiuujiatenura nocuaji. Queraatia niishishoo casaa miiniutianiyajaarihuuaj, pueya na sapojonura. <sup>10</sup> Nojuajaari puetunu tamaatia sesa miiniu niishishanojuanaa miiniutianiya na sapojonura noo pojori, canapuate saniitiosocoriquiano pueyacuajani. Nojoriiri sapojosaanutaniya, Pueyaso Rupaa ruuretajaca nojori quiniucua. Nojoriiri maja na tojinu paniniu quiquiaari seetanu rupaajanaa, Pueyaso jiyanooniuria nojori. <sup>11</sup> Naaratej, Pueyasoori nojori tarinitianutaniya nojori sapojosaanura, nojori tiuuniuria seetanujuanaa sapojonuunuucua. <sup>12</sup> Naacujitij, puetunu noo pojorijijanaari saniitiosaanutaniya, canapuate seetanu rupaacuajanaa tiuuniu paniyaquijiani, sesa miiniu maniniucuaaja nojori quiniucua.

*Pueyaso muerasuranoori tariucuaaanujiniji saquiriojosano*

<sup>13</sup> Nijaniya saniniujia, niaari pa Jiyaniijia panishano pueyacuaja. Jiya shipinijaquishacarijia, niaacuajaari tariucua Pueyaso saquiriojosano pueya quiquiaari. Niaari Pueyaso pueyara quiquiaaricuaaja, na Sohanu jataniniucua nijaniya quiarinio pueya nia quiniuria, seetanu rupaacuajanaa nia tiuuniucua. Cunora, canaari pueyaraaanu Pueyaso sequequiaa niaacuarani, “paacarasho”. <sup>14</sup> Canaa pohuatasacari Pueyaso rupaa nia niquiara, niaari Jesucristoocua tiuquiaari. Naacujitij, Pueyasoori nia jiyatequiaari na pueya nia quiniuria, shacantuca quijiacara nia jatanishaanura, taa pa Jiyaniijia Jesucristo quiyacuani.

<sup>15</sup> Naaratej cuarta Pueyaso pueyanaa, majaari nioojia nia niquijiotenu Pueyasoocuaaji. Naajuhuaaj, nia numaama nia racatare canaa niishitiojosano nijaniya niaata canaa quishacari, canaa naajioneecajinia canaa rootasano nijaniyajuhuaaj. <sup>16</sup> Jiyanoojia pa Jiyaniijia Jesucristo quiniucuaa, pa Que Pueyasojuhuaj, nojoriiri pa paniquiaa. Naajuhuaaj, poojia cajitiquiaa pueyaraaanuraari. Na rupaacua pa tiuutiquiaariiri, pa niishiniuria paari jiyanojua maninia miishaanutaniya pueyaraaanuni. <sup>17</sup> Naajuhuaaj, nojori cuara nioojia shiniujiiria, maninia nojori tojtiaajaca nia quiniuria pueyaraaanu. Nojori cuara cumaquiiiria nijaniya, tojetaarucuaajanaa maninia nia sequesano quiniuria, nia miishanonio.

### 3

*Pueyaso rupaa pohuatanaacuara pa secojore*

<sup>1</sup> Pueyanaa, socua nia sequerohuacuaraaj. Canaacuara nia secojore, pa Jiyaniijia rupaa paaquetesaanura puetunu tiquiyocuajanaa. Nia secojorejuhuaj, cuno rupaa pueya tojishacari, nojori jatanishaanura, naatej, taa na jataniquiaari nijaniyacuani. <sup>2</sup> Canaacuara nia secojorejuhuaj, Pueyaso cojuanura canaa na tojiyashijia pueyacuaji, maja nojori miiniuria sesa canaa. Niacuaajaari niishiya, puetunu pueyajaari maja na tiuuniu Pueyasoocua. Cuno pojoricuaajaari canaa paracaajia. <sup>3</sup> Naajaa, paacuajaari niishiyani pa Jiyaniijiacuaajaari na sequesano miiquiaa. Nojuacuajaari nia cumaquiniutianiya, maja nioojia nia niquijiotenu nocuaji. Sesaacaacuaaji nia cojuanutaniyajaarihuuaj. <sup>4</sup> Pa Jiyaniijiaacuaa canaa tiushacari, majaari canaa taacanunu niaa naasucuaari canaa rootasano tojtiaaquiniutianiya. Maja. Niaa naasucuaari na tojtiaacuaja. <sup>5</sup> Pa Jiyaniijia cuara niishitiria nioojijinia, panijia nia quiniuria taa Pueyaso paniyacuaani. Naajuhuaaj, cuara nia niishitiria naquiya miiniu rejeretajaca nia quiniuria, Jesucristo cumaquishacari nijaniya.

*Poonijiojuaca pa quiri*

<sup>6</sup> Cuarta Pueyaso pueyanaa, pa Jiyaniijia Jesucristo jiyaramiquishano pueya canaa quiniuucua, canaa nia tojitiare. Majaari noo pojori nia rupeenu: taajecoritij, noo pojorijuhuj, canaa rootasano tojiyashijiacatej. <sup>7</sup> Niaacuaajaari niishiya taa quijiaca canaa quiquiaari niaata canaa quishacarini. Naa quijiaca nia quirijuhuj. Majaari canaa taajeyaca canaa matanu quijiani. <sup>8</sup> Majaari najuhuaana canaa miaquenu quijia nia miaquesano. Canaa cutaraari pueyaracaanu canaa samareenuta poonijionuujuaca juucani, niucuanio. Canaari naa poonijionuuquiaarini canaa panishano canaa jiitia-nura, maja quenaaja canaa taajetenura nijaniya, maja nia tacaatianura canaajuhuj. <sup>9</sup> Pueyaso jiyaramiquishano pueya canaa quiniuucua, canaa naata quiquiaaricuaajaari canaa panishano canaa mashiniquiniuria nijaniyajiniji. Naajaa, majaari naa canaa miiniu quiquiaari. Canaari tama canaa juaashiquiacatajaaja poonijioquiaarini, canaa niishitiojonura nijaniya, poonijionuujuaca nia quiniuria juhua canaajuhuj. <sup>10</sup> Canaa quishacari niaata jiyacarijuhuj, canaari nio nia niishitioquiaarini: “Cante poonijionu paniyaquiyani, cuaara miaqueteshiyaquiiriajuhuj”. <sup>11</sup> Canaari pohuataaarucuaajaani-uhuj, noojiaqueya nijaniyajinijionaaari juhujaniya quiquiaa. Majanaari na poonijionuunu quiquiaa. Nojoriniaari noo pojori cushitioquiaa, poonijionuujuaca cutaratej. <sup>12</sup> Pa Jiyaniijia Jesucristo jiyaramiquishano pueya canaa quiniuucua, canaari cuno taajecori sequeyani, nojori cuaara poonijionuura, nojori panishano nojori jiitianura.

<sup>13</sup> Cuarta Pueyaso pueyanaa, teyano nijaniyajinijiniote maninia miijiacacuaani, majaari maninia miiniu nia tarinitianu. <sup>14</sup> Saniniuujia, cante nio naajioneejinia canaa sequesano tojiniu paniyaquiyani, nojuaja nia niishiri cantenononi. Majaari na rupeunonon, na caririquiniuria quenaaja. <sup>15</sup> Maja cutaraari nojuaja nia jiyatenu juhua nia paracara. Saaja nia nacasure cutara nojuaja, niarta Pueyaso pueyano na quiniuucua.

*Pablo sequesano na naajio na tucuatasaacari*

<sup>16</sup> Poojia cajitijia pa Jiyaniijiani, nojuajanaa cuaara nioojia cajitiria pueyaracaanu, naajaa, niaa jaara taa miishaariquia. Pa Jiyaniijia cuaara pueyaracaanu jiitiaara puetunu nijaniyajanaa.

<sup>17</sup> Janiyari Pabloni. Cua saruhuanura nijaniya, janiyari tama cua juaashiquiatajaaja nio naajiyani. Nia niquiri cua naajiosano, taamuecatenononi. Janiyari naa puetunu cua naajioneecajanaa tucuatiquiaani, cua sesa cua naajionuta. <sup>18</sup> Pa Jiyaniijia Jesucristo cuaara cumaquiiria puetunu nijaniyajanaa. Cuaara naa quiiriatej.



## COTEENU PABLO NAAJIONEE TIMOTEOCUARA

*Pablo saruhuatasacari Timoteo*

<sup>1</sup> Janiyari Pabloni, Jesucristo jiyaramiquishano. Pa Jiyanoojia Pueyaso, pa Jiyaniijia Jesucristonio, nojoriiri nera poonijionara cua jiyatequiaari. Paari Jesucristoocua tiuujiacani, nojuaja jataniniuria pajaniya juhua nojuaja pa quiniuriajuhuaj. <sup>2</sup> Timoteonaa, janiyari nio naajiya quiarani. Quiaari juhua quiyanura quiquiaari, Pueyaso pueyanora quia jatanuucua, quia niquiara cua pohuatasacari Pueyaso rupaa. Pa Que Pueyaso, pa Jiyaniijia Jesucristojuhua, nojori cuara cumaquiiria quiajaniya. Nojori cuara quioocua taraajerajuhua. Nojori cuara pueyaracaanu quioojia cajitiirijuhua.

*Pablo sequesacari sesa niishitiojonuujuaca cuara sanaajasaaria*

<sup>3</sup> Janiya jaara Macedonia jiyajiniara quiaquiaarini, janiyacuaaari quia sequequiaarini Éfeso tiacajiniaja quia jiyojenura. Janiyari naa quia sequequiaarini, quia tenujunura cuno pojori, najuhuana tamaatia niishitiojonuya pueyani. <sup>4</sup> Janiyari quia sequequiaarijuhuaj, nojori quia sequenura, maja nojori niishiriojonura najuhuana nojori supuetanaa pohuatanuusanojinia. Janiyari quia sequequiaarijuhuaj, maja nojori niishiriojonura nojori supuetanaa sesacajinia, cuno, najuhuana tucayocuara naajionuutasanoni. Pueya niishiriojonuusacari pueyaracaanu cuno najuhuana casaajinia, nojoriiri cunooocua juay-onuujutaquiaa saaja. Saniniuuja, nojori cuara Pueyaso rupaacua niishiriojoora cutara. Nocua pa tiuushacari, paari cumaquishaanutaniyani Pueyasora pa poonijionura maninia.

<sup>5</sup> Naa cua sequesacari Éfeso tiacajiniaja quia jiyojenuratej, janiyari quia sequenu paniriquiaani, pueya quia niishitiojonura panitiojuaca nojori quiniuria. Nojori cuara shitimia panitiojuaca quiiira, juhua jeequesano nojori jiuujia quishacari. Seetanujuanaa Pueyasooocua nojori tiuushacari, nojori cuara panitioora maja noojia macuhajenuta sesa nojori miishanojiniji. <sup>6</sup> Noojiaqueya cuno pojorijiniinooori tari tarinitiacanu tojiniu nio maninia niishitiojosano. Nojoriiri cushitiquiano na pocojonuucua, na nacojonuucua najuhuana tama nojori niishishanojinijiaaja. <sup>7</sup> Nojoriiri Moisés Rootasanojiniji niishitiojonaara quiniu paniya juucua. Majaari quenaaja nojori niishiniu tama nojori sequesanojuaja, nojori shiniujushacari pueya, pueya tojiniuria najuhuana capa nojori niishitiojosano.

<sup>8</sup> Paacuajaari niishiyani, Pueyaso rootasano Moisésni, cunoori maniniacuaja, paa jaara niishirini casaara naa Pueyaso rootaquiaari pa supuetanaani. <sup>9</sup> Paacuajaari niishiyani, Moisés Rootasanoori maja na pueretenu maninia miijica pueya cutara. Pueyasoori maja na rootasano na nishitiniu quiquiaari maninia miijiacara. Na niishitiquiaari cutaraari na tojitiaashijiacara, tama na panishanojuaja miijiacara, Pueyaso soojeacarajuhua, sesa miijiacarano. Moisés Rootasanoori Pueyaso rerequetecacara, Pueyaso casaa rerequetecacarajuhua, noo pojorirajuhua, tama na que tacartaja monutej, na nucuanu, pueya puecojuacarajuhua. <sup>10</sup> Moisés Rootasanoori na camishoo maajipohua numuetucunujuacacara, maajishurihuara, na numuetucunujuacaranio. Moisés Rootasanoori pueya nohuasenujuacacara juhua casami na niqutiojosocoriguiano tamasaca seyara; sapojonuujucarajuhua; na sapojonuta na sequesano maatejacerano, nocua na tiuushaanura; puetunu noo pojorirajanaano, maninia niishitiojosano tojiyashijiacatej. <sup>11</sup> Cuno maninia niishitiojosanoni, cunocuaaari cua pohuatasano Jesucristo rupaajiniiji, pueya jatanura Pueyaso pueyara. Pueyasoori jyanohua maninia, cuno rupaa pohuatanara na jiyatenuucua janiya.

*Pablo shuquiritiasacari Pueyaso, na rupaa pohuatanara na jiyatenuucua nojuaja*

<sup>12</sup> Pa Jiyaniijia Jesucristoori cucua tiuuquiaari nera cua poonijionura maninia. Cunora, na rupaa pohuatanara cua jiyatequiaariiri. Nojuajaari cua cumaquiquiaa. Cunora, janiyari na sequequiaani, "paacarasho". <sup>13</sup> Tariucuacaanu, janiyari nocuara rimiaaqueja quiquiaari sacuaraatiani. Janiyari naquiya na miijiaarijuhuaj, nocua tiuujiaca cua mititiasacari. Janiyari jyanohua na paracaajia quiquiaarijuhuaj. Naajaa, Jesucristoori saaja cucua taraajequiaarini cua niishiyaquiniuucua casaa cua miiriquiaani, nocua tiuyashijia cua quishacarija. <sup>14</sup> Naa cucua na taraajenuucuatej, nojuajaari seetanujuanaa cua jyanooquiaari. Na jiyanooshacari janiya, nojuajaari cua jataniquiaari nocua tiuujiaca cua quiniuria, panijia cua quiniuriajuhuaj.

<sup>15</sup> Timoteonaa, noori seetanujuanaa. Puetunu pueyajanaa cuara niishiiria nio. Cua tojiri. Jesucristoori mijiria niquiaari na Que Pueyaso na jyanootiniuria sesa miijica. Janiyacuajaari tojetaarucuajanaa cuno sesa miijica pueyajiniinoo na jiyanooshanoni. <sup>16</sup> Janiyari naa jiyanooshaaquiaarini puetunu pueyajanaa niishiniuria taa jyanohua

jiyanootiote Jesucristoni, pueyaracaanu na rejeretanuucua cua juaaniu. Naa Jesucristo jiyanooniucuaacuaa janiya, sesa miijia cua quishacarijiatej, Jesucristoocua tiuujiacarano cuaara niishiiria, nojoriiri na naata jiyanooshaanujuhuj Jesucristoocua nojori tiuushacari. Naacuajitij, nojoricua pueyaracaanu quijiacara jiyatesaarejuhuj. <sup>17</sup> Naa jiyanootio pa Jiyaniijia quiniucuatej, nojuaja pa tijitiatej pueyaracaanu. Nojuajaari Jiyaniijiajuhuanajaj. Nojuajaari Pueyasocua, shaajeyashijia, namijiata niquiyaquishoo. ¡Jiyanoohua maniniaari pa Jiyaniijia! ¡Naa seetanujuanaari!

<sup>18</sup> Timoteonaa, quiaacuaajaari niishiya taa Pueyaso cumaquiquiaari quiajanियacuajani, nera quia poonijionura. Cunoori quiquiaari Pueyaso pueya jiiitanaa jaara caminiujiquiaari Pueyaso sequenu panishano quiaara, nera poonijiona quia quiniuria. Naacuajitij quiyunuaa, cua tojiri. Pueyaso cumaaca quia jiiitasacari, quioojia quia cumaquiri maninia quia poonijionura Pueyasora. Seetanujuanaa juhua quiaquejojua pueyano quia quiri, senota samareyashijia. <sup>19</sup> Naa quia quiri Pueyaso rupaa quia pohuatasacari, seetanujuanaa na rupaacua tiuujia quia quishacari, seetanujuanaa na rupa tojjia quia quishacarijuhuj. Naa quijia quia quiritij, quioojia mariqui quia macuhuaajereeri quiaa jaara sesa miiri quia. Noojiaqueya pueyari tari Pueyasocua tiuuniu tarinitiacanu nojori ruuretanuucua Pueyaso Sohanu numootesacari nojori jiuujiajinia, sesa nojori miishacari. <sup>20</sup> Naa miitiquianuuri Himeneo, Alejandroni. Janiyari cunora Pueyaso secojorucuaani, Pueyaso cuaara nojori tarinitiaara Satanásra, Satanás miiniuria naquiya nojori. Naacuajitij, nojori cuaara niishiiria maja socua sacuaraatia nojori rimiaaquenura Pueyasocuaara.

## 2

### *Secojonuunura niishitiojosano*

<sup>1</sup> Cua tojiri Timoteonaa, niaa jaara Pueyaso secojnuuri quia, nia secojnuure puetunu pueyacuara janaa. Nia panishano casaacuara nia secojori quiajuhuj. Naajuhuj, Pueyaso nia sequeriquia “paacarasho”, pueyaracaanu maninia na miiniucua. <sup>2</sup> Jiya jiyaniijianucuaacuara nia secojnuuri quiajuhuj, puetunu pueya camarucuaacuara juhuj. Nojoricua nia secojnuuri quia, juhujaniya pa quiniuria panaatia, juhujaniya pa tojiniuria Pueyaso, maninia pa quiniuria parta pueyatajuhuj. <sup>3</sup> Pa Jiyanoojia Pueyasoori naa paniquiaa pa secojnuratej. Naa pa secojosano maniniucua quiaari. <sup>4</sup> Nojuajaari paniya puetunu pueyanaa tiuniuria Neyanuucua, na pueyara nojori jatanishaanura, puetunu seetanu rupaajanaa niishijia Jesu nojori quiniuriajuhuj. <sup>5</sup> Pa Que Pueyasoori niquiriyatujua. Majaari tamonu Pueyaso quiniu socua. Naajuhuj, niquiriyatujua pueyanoori quia Pueyaso Jiyanootijia pueya. Nojuajaari Jesucristocua. <sup>6</sup> Puetunu pueyanaa quishacari saniitiosocori quano, Jesucristoori tama na cuaqueyajaaja tarinitiaquari na mosaanura narta pueya niti. Naacuajitij, na Que Pueyasoori na naata jiyanooni pajiya saniniujia. Quiarijacuaajaari Pueyaso panishacari Neyanujiniji pohuataaanura pueya niquiara, nojori jiyanooshaanura. <sup>7</sup> Nio rupaa cua pohuatanurajuhuj, Pueyasojanaari cua jiyatequaiari Jesucristojiniji pohuataa cua quiniuria. Cua jiyaramiquiaariiri taucuaa cua niishitiniuria Jesu nojori tiuniuria, seetanu rupaajanaa nojori niishiniuriajuhuj. Nio cua sequesanoori seetanujuanaa. Majaari cua sapojonu.

<sup>8</sup> Cunora, cua tojiri. Janiyari paniyani puetunu tiqiyocujanaa pueya secojnuunura Pueyaso. Jiyocuaanu nojori shiitiosacari nojori juashiquia nojori secojnuura, nojori jiuujia cuaara quiri jeequesano sesa nojori miishanojiniji. Naajuhuj, cuaara quiaquiri nia niquitishano, maja sesa niishiriojonutajuhuj. <sup>9</sup> Naajuhuj, janiyari paniyani maajipohua cuaara cushiyaquiri puera maniniquiya toqueya, narta maajipohua na shocotanura. Cuaara cushiyaquiri cararaatia niquishano toqueyajuhuj. Maniniacuaajari nojori maniniushiniuria. Sesu cutaraari nojori maniniushiniuria puera, pueya shootianura nojori. Nojori cuaara jiyaniyaquiri nojoriiri seetanujuanaa shanohua niquishano, nojori mueca jeeacasano quishacari puera, nojori cushishacari orojiniji shipinishano casaanio. ¿Maajitiiri seetanujuanaa shanohua niquishano maaji, na cushiantuucua queraatia cumaneecata masesano noturu shipinijosano sai tiujiau, queraatia cumaneecata masesano maniniquiya toqueyano? Maja. <sup>10</sup> Nojori cuaara maniniucuaari quia cutara, maninia miijia maajipohua nojori quiniucua. Nojori cuaara quiri juhua noo maajipohua, canapuetucuaa tama nojori cuaqueyajaaja jiyatecanu Pueyasora na quiniuria seetanujuanaani. <sup>11</sup> Pueyaso rupaa niishitiosacari, maajipohua cuaara tojitiari quia sanaa, maja Pueyaso rupaa pohuataana na rejetenuta. <sup>12</sup> Maja cutaraari cua shanacunu maajipohua niishitiojonura Pueyaso rupaa pueya niquiara. Naajuhuj, majaari cua shanacunu maajipohua jiyatesaanura narta Pueyaso pueya jiiitana na quiniuria. Nojori cuaara sanaa tojitiari quia cutara, narta Pueyaso pueya rerejosacari.

<sup>13</sup> Quia niishiri Timoteonaa, casaara naa cua sequeyani. Pueyasocuaajari coteenu Adán shipiniquiaari. Na nuhuaji Adán niquiorano Eva shipiniquiaariiri. <sup>14</sup> Quia niishirijuhuj, Soconurano jaara sapojoquiaari Evatej, majaari na sapojonu quiquiaari neyaca Adán. Eva cutaraari sapojosaaquiaari. Naacujitij, na sapojosaanuucua, Evaari Pueyaso tojiyashijara quiquiaari. <sup>15</sup> Naaratej, maajipohua cuara maninia canashitijioora necohua. Cuaara panijiaa quiriujuhuj. Cuaara maninia miijiaca quiriujuhuj, maninia niishirio-jojuaca nojori quishacari. Naa maajipohua miishacaritij, Pueyasoori nojori jitianutaniya maninia, Jesucristoocua tiuujiaca nojori quishacari.

### 3

#### *Pueyaso pueya jitianatucua taamueca pueyano quiriqiuani*

<sup>1</sup> Nio sequesanoori seetanujuanaa: cante Pueyaso pueya jitianara quiniu paniyani, nojuajaari maninia poonijiosano miiniuucua jiaatiaa. <sup>2</sup> Naaratej, cante Pueyaso pueya jitianani, nojuaja cuara quiriia sesacasoo pueyano. Nojuaja cuara quiriia saaja niquiriyatu maaji niyaca. Cuaara quiriia noojia niquirioteyashijia, maninia niishirio-jojuajuhuj, pueya rerequeteyaquishoonio. Cuaara quiriia maninia pueyano, ru-coojuaca pueya tiuquinitiaja na tijinia. Cuaara quiriia Pueyaso rupaa niishitiojua maninia. <sup>3</sup> Naajuhuj, nojuaja cuara quiyaquiriia mashaasequejoru. Cuaara quiyaquiriia ritia juaajia, pueya na piniuria. Cuaara quiriia pueya riuhaneyashijia, pueya juaashacari nojuaja. Cuaara quiriia shiniquijuhuj. Cuaara cumaneeaca jiaati-aashijia quiriujuhuj. <sup>4</sup> Naajuhuj, nojuaja cuara na tijinia quiniaa jitiiaja quiriia maninia. Cuaara necohua niishitiojua quiriia maninijuhuj, tojtiajaca nojori quiniuria, pueya rerequeteyashijianio. <sup>5</sup> Naacujitij, pueyano jaara maninia casaa necohua niishitiojyashijia quiriqiuia, ¿maatucua taa maninia jitiariqiuia Pueyaso pueya maanuni? <sup>6</sup> Naajuhuj, Pueyaso pueya maanu jitiariquiano cuara quiriia seetanujuanaa Pueyaso tojjijia pueyano cutara. Cuaara quiyaquiriia shusha Pueyasooocua tiunio pueyano, nojuaja mariqui jiyaniiri nojuaja tojishano pueyano cutara. Nojuaja jaara jiyaniiri nojuaja socua maninia pueyano narta Pueyaso pueyajiniji, nojuajaari cocuaatia miya taa Satanás miiquiaricuaani. Pueyaso panishano seru Satanás quishacarijia, nojuacuajaari taanuusaquiaari Pueyaso shuriucujaji, na jyanishacari nojuaja na naata na Jiyaniijia Pueyaso shocotanu. <sup>7</sup> Naajuhuj, Pueyaso pueya maanu jitiariquiano cuara quiriia maninia miijiaca pueyano, Jesuucua tiuyashijia pueya mariqui na sesacareeri maninia miyashijia na quishacari. Nojuaja jaara naa rerequetesano quiriritij, nojuajaari juhua Sesaaca norijosano quiniutianiya. Naacujitij, pueya tojiyaquishano quiniutianiya.

#### *Narta Pueyaso pueya naacunaatucua taamueca pueya quiriqiuani*

<sup>8</sup> Naajuhuj, parta Pueyaso pueya naacunaa cuara quiriia tojishano pueya, rerequetesoo. Cuaara quiriia na sequesano miijiaca. Cuaara quiyaquiriia puera mashaca jereca ratunuucua jitiinio. Cuaara quiriia cumaneeaca jiaatiashijia, jiyasohuaja na nohuasejonura, na sapojonuta na masenurano. <sup>9</sup> Naajuhuj, nojori cuara seetanujuanaa Pueyaso rupaa tojjijia quiriia, teyanooocua tiuujiaca pa quiyacuajani. Naacujitij, nojori jaara naa miijiaca quiriritij, ¿nojoritiucua casaacua cararosaariquiani? <sup>10</sup> Cunora, pueya cuara senota jiyateyaquishaaria Pueyaso pueya naacunaa nojori quiniuria. Cuaara coteenu maninia niishishiiria nojoriiri seetanujuanaa Pueyaso tojtiajaca. Nojori jaara maninia miijiaca pueya quiri, na nuhuaji cutara, nojori cuara jiyatesaaria narta Pueyaso pueya naacunaa nojori quiniuria. <sup>11</sup> Naajuhuj, Pueyaso pueya naacunaa niquicohua cuara quiriia tojishano maajipohua, maja rimiaacatujuri. Cuaara quiriia niishirio-juaca, na sequesano miijiaca pueyaracaanunio. <sup>12</sup> Cante Pueyaso pueya naacunaani, nojori cuara jitiiaara saa niquiriyatu niquicouaja. Cuaara quiriia necohua niishitiojua maninia casaa, na tojtiajaca necohua quiniuria. Naajuhuj, cuara quiriia maninia jitiiaja na tijinia quiniaa pueya. <sup>13</sup> Naacujitij, Pueyaso pueya naacunaa jaara maninia poonijioquiaa na naacusacari narta Pueyaso pueya, nojoriiri seetanujuanaa pueya tojishano pueya quiniutianiya. Naajuhuj, nojoriiri socua jyanohua Jesucristoocua tiuujiacara jatanutaniya, na puereyaquiniutia nojori poonijionura pa Jiyaniijara.

#### *Jesucristojiniji Pueyaso niishitishano pueyani, paari nocua tiuujiacani*

<sup>14-15</sup> Timoteonaa, janiyari quioqua naquerejiyani. Naajaa, janiyari quiara naajijia nioni. Naacujitij, janiya jaara tarishirini, janiyari paniyani juhuacarijia quia niishinuria taa quijia quia quiniutianiya, Pueyaso pueya maanujinia quia quishacari. Pueyaso pueya maanucuaajari pueyaracaanu rishijia Pueyaso quiquio. Na saquiriojosano pueya nojori quiniucua, nojoriiri na rupaa jitianacuaja, nocuaji tacunaajaariuhuj. <sup>16</sup> Seetanujuanaa nocuaji jiuujiatesanoori Pueyaso niishitishano Jesucristojiniji pajaniya. Paari nio sequesanoocua tiuujiacani:



quia tarinitianu miiniu cua sequesano quiajaniya. Naacuajitij, quiaa jaara naa maninia miijia quiri, quiaari tama quia cuaqueyajaaja jiyateya maninia Pueyaso pueyanora. Quia tojtiajaca pueyari Pueyaso pueyara quiniutianiyajuhuaaj.

## 5

### *Paatucua taa jitiariquia parta Pueyaso pueyani*

<sup>1</sup> Majaari quia saaqiapue quia nacasunu quia juaaniutia, Pueyaso rupaa nojori tojiyaquiniuucua. Nojori quia nacasure jacaria, juhua quia que. Mashiquiori quia nacasure jacariajuhuaaj, juhua quia tapueyocuaca. <sup>2</sup> Naajuhuaaj, motajoori quia nacasure juhua quia nucua. Niyacoojori quia nacasure juhua quia rimiatuhuaajuhuaaj, maja nojoriicua quia jiaatianuta.

<sup>3</sup> Mashiquiopue jaara tojetaarucuajanaa niquiohuaju quiri, jianianuhuajunio, Pueyaso pueya cuaara nojori naacuura. <sup>4</sup> Saniniuujia, mashiquio jaara niquiohuaraca quiriquia, jianianuhuaraca soj, cuno pojori cuaara coteenu tama na nucuaajaaja cojuatunu niishiiria, na jiiuhuaaj. Naacuajitij, necohua cuaara na queya cojuaaara, taa na queya cojuaquiaari nojoricuaani, naatujoori nojori quishacari. Pueyasoori naa na queyacuara taraajejaca timitiaja. <sup>5</sup> Noo mashiquio, cante seetanujuanaa jiyopueejuni, nojuajaari saaja Pueyasoocua tiuuquiaa. Majaari na tarinitianu secojonu juuca, niucuanio. <sup>6</sup> Noo mashiquio saniniuujia, tama na cuaqueyajaaja shuquiritijiatej, nojuajaari tariucua juhua macu Pueyasora, saminio na quishacarijia. <sup>7</sup> Parta Pueyaso pueya quia niishitiojore nio cua rootasanojuhuaaj, sesacasoo nojori quiniuria. <sup>8</sup> Canapuate na queecua, na nucuaacua taraajejajuijiani, tama na tiajinia quijia pueyacuajuhuaaj, naa miijiacatej, nojoriiri Pueyaso Rupaa tojyashijiacara jiyaterohua tari tama nojori cuaqueyajaaja. Naacuajitij, nojoriiri socua tojetaarucuajanaa sesa, Pueyasooocua tiuyaquijia pueyajiniji.

<sup>9</sup> Mashiquio jaara Pueyaso pueya jitianaa naacunara jyatenu panishaare, cuno mashiquiopue cuaara quiriaria tariucua sesenta marijia shocotejono. Cuaara quiriaria noo mashiquio, cante saaja na camishano pueyanota quiquiaari maninia pueyaracaanuni. <sup>10</sup> Cuno mashiquio cuaara niishishano maaji quiriaria, maninia miijia na quiniuucua. Cuaara quiriariajuhuaaj, cante maninia canashitijioquiaari necohuani. Cuaara rucoojuaacaara taraajeja quiriariajuhuaaj, na tiajinia na maquiojojua. Cuaara maninia miijia quiriariajuhuaaj, narta Pueyaso pueya niohuaca jeequejojua. Cuaara taraatia miishano pueyacuara taraajeja quiriariajuhuaaj, nojori cumanijianajuhuaaj. Cuaara puetunu maninia na miiniuujianaa tarinitiaaquijia quiriariajuhuaaj.

<sup>11</sup> Saniniuujia, noo mashiquio, teyanote juhuanajuaja maja na shocotejonu sesenta marijiani, nojori cuaara jiyateyacuishaaria Pueyaso pueya jitianaa naacunaara. Nojori na naata Cristo samiritianu, niyacaaniuucua nojori jiaatiasacari. <sup>12</sup> Naacuajitij, nojori camishacariuhua, nojoriiri tari sesa miirii, nojori jatanuucua nojori sequesano saaja Jesucristora na poonijionura. <sup>13</sup> Naajuhuaaj, niyacoo naata mashiquio nojori quishacarijia, nojoriiri saaja rucuanecojonu maniniucuaaja, na tiuquijionura puetunu tiacojuanaa. Naa tama na poonijiosanojuaja na jitiiaaquishacariitij, nojoriiri taajecatujuriria quijia. Majaari saaja taajecara na quiniu, juura tojijajaa pueya sequesanoori, tariucua na caminiuujiniu tamasacaraj. Naajuhuaaj, sacuaraatia neteyocojiyari juhua paateca, na taajetenura pueya, na caminiuujishacari jiyasohuaaja niishishano casaa. <sup>14</sup> Naaratej, janiyari cunora paniyani niyacoojori naata mashiquiopue cuaara camiyora neyacaara. Cuaara muetuuarajuhuaaj. Cuaara na tia camarucua quiquioora. Nojori jaara naa maninia miiritij, nojori miishanoori maja quenaaja na quiniu quiniutianiya pa paraa rimiaaquenura Pueyaso pueyacuara. <sup>15</sup> Noojiaqueya niyacoojori naata mashiquiopueeri Pueyaso tojiniu tarinitiacanu tari, Satanás tojijiaa nojori quiniuria saniniuujia.

<sup>16</sup> Pa Jiyaniijiaacua tiuujiaca maajipohuajinijinio jaara tama na pueyajinijiniojuaja jitiare mashiquiopue, nojori cuaara na naacuura tamajaaja. Naacuajitij, majaari Pueyaso pueya cojetanu quiniutianiya nojori, jiyopueraca nojori quishacari. Naacuajitij, Pueyaso pueyari na naata naacunu cutara noo mashiquiopue, canapuate tojetaarucuajanaa jiyopueejuni.

<sup>17</sup> Pueyaso pueya jitianaa, noo pojori canapuate maninia jitianaa narta Pueyaso pueyani, nojori cuaara narta Pueyaso pueya tojishano quiriaria. Naajuhuaaj, nojori cuaara nareja niquitiosaaria, na panishano nojori jitianura. Pueyaso pueya maanu jitianaa-jinijinio, canapuate Pueyaso rupaa pohuatanaacuajani, Pueyaso rupaa niishitiojonaanio, nojori cutara cuaara socua queraatia niquitiosaaria, maninia poonijiosano nojori miiniuucua. <sup>18</sup> Tariucuaaanu Pueyaso Rupaa jinia naajiotasanoori naa niishitiojijuhuaaj, naa na sequesacari miriqui:

“Majaari quia juunu rupaa mishi quionu na miaqueyaquiniuria quia casaa, quia rapijioetesacari quia natau, na jocuanura na sucua jiniji”.

Naa sequeyajaarihuuaj:

“Poonijioetesano pueyano cuaara niqutiosaarua na poonijionu sami”.

<sup>19</sup> Pueyano jaara saquirojotariquia Pueyaso pueya maanu jitianacuara, majaari na tojinu, jaara nocuara cojtiaaquiri saquirojotanu. Querajaa pueya jaara nocuara cojtiare saquirojotanu, cuno pojori sequesano cutaraari seetanujuanaa. <sup>20</sup> Naacuajitij, Pueyaso pueya maanu jitianaa jinijinio jaara sesa miiriquia, Pueyaso pueya maanu niqiuara quia nacasurenoj, puetunu narta Pueyaso pueyanaa puerenura, maja sesa nojori miiniuriajuhuaj. <sup>21</sup> Timoteonaa, janiyari nio quia sequeya Pueyaso niquiarani, Jesucristo niquiarajuhuaj, na saquirojosano seya niquiaranio. Nio cua rootasano quia tojiri. Majaari maninia, paa jaara ritia nacasure parta Pueyaso pueyani, seetanujuanaa maninia pa niishiyaquishacari na miishano. Naajuhuaj, majaari pa naata jiuujiaaniu pa panishano pueyano, nojuaja jaara sesa miiri. Naacuajitij, majaari rimiajata miijionu sacuraatia. <sup>22</sup> Naajuhuaj, majaari senota quia juaashiquia quia nianu quia niishishoo pueyanoocua, nojuaja quia jiyatenura Pueyaso pueya jitianara. Maninia cutaraari coteenu quia niishiniuria taamueca pueyanotenojoni, maja sesa miijia pueyano quia jiyatenura Pueyaso pueya jitianara. Quiaa jaara naa Pueyaso pueya jitianara jiyatere quia niishiyaquishoo pueyanotej, Pueyasoori quiocua tiuutianutaniya cuno pueyano miishano sesa. Cunora quia sequeyanijia, tama quia cuaqueyajaaja quia cojuare, tojetaarucujanaa sesa miyaquijia quia quiniuria.

<sup>23</sup> Timoteonaa, naa quia seeco nojionuucatej, majaari saaja mohuaca ratunu. Sequeyarucua cusosu quia quiniucua, secaja vino quia raturiquiajuhuaj quia jiniacuma na jeecanura.

<sup>24</sup> Noojiaqueya pueya, sesa nojori miishanoori maatia niishishanocua, Pueyaso sanitionu juuca quiaquishacarijia. Tamasacara saniniuujia, sesa nojori miishanoori maja na niishishaanu quiniutianiya juhanouaja, Pueyaso cuaara nojori nujuatejore na tacojiaatijia, na nequesoreesocoriquiano. <sup>25</sup> Naajaarihuuaj, maninia pa miishanoori maatia niishishano mijiria. Jiyasohuaja maninia pa miishanojuhuaj, cunoori na nuhuaji niishishaanutaniya maatiajuhuaj.

## 6

<sup>1</sup> Parta Pueyaso pueyatinijinio, canapueete poonijioetesano pueyani, nojori cuaara na camarucua tojtiajaca quiiria. Nojori cuaara rerequeteyaquiiria na camarucua, na camarucua mariqui Pueyaso sesacareeri, pa niishitiojosanonio, na tojiyashijia na seru quiniucua. <sup>2</sup> Poonijioetesano pueyano camarnu jaara Pueyaso pueyano quiri quia, juhua na serujuhuaj, na seru cuaara na tojijia quiiria. Cuaara na rerequetēja quiaquiiria, narta Pueyaso pueyano na camarnu quiniucua. Nojuaja cuaara seetanujuanaa maninia poonijioora nera, na niishishacari na camarnucua jaari narta panishano Pueyaso pueyano.

### *Cante seetanujuanaa shuquiriaatia quiijacani*

Timoteonaa, nio cua sequesano quia niishitiojore pueya. Nojori quia shiniujiuri na tojtianurajuhuaj. <sup>3</sup> Tamonu jaara tamaatia niishitiojori quia cua niishitiojosanojiniji, nojuajaari tojetaarucujanaa moseeca. Pa Jiyaniijia Jesucristo rupaari jiyano hua maninia. Na niishitiojosano pa tojishacari, cunoori pa naacuquuaa juhua Pueyaso pa quiniuria socua. <sup>4</sup> Cante cuno niishitiojosano ruuretaja tama na niishishanojuaja na niishitiojonurani, nojuajaari tama na cuaqueyajaaja jiyaniya nojuaja niishijia cutara. Nojuajaari juaatioonu porocua juhuaj, Pueyaso rootasanojiniji na taacanuasacari. Naa quiijaca pueya quishacaritij, nojoriiri juaajiacara jataquuaa, nojoritia juayonuujutajaca shocotanucua nojori. Nojoriiri juhuacatecara ruutaquetoquuaa na juayonuutanura. Sesacatoquuaajaarihuuaj. Naajuhuaj, nojoriiri najuhuana soquequuaa, narta Pueyaso pueya naasucua sesa miiquiaa. <sup>5</sup> Nojoriiri juayonuujutanu tarinitiaaquiijaca. Nojoriiri maja na naata maninia niishiriojonu socua. Nojoriiri maja na niishiniu seetanu rupaajanaa Pueyasojiniji. Nojoriiri Pueyaso pueya jitiajacara quini panyiya, nojori jiyanihacari nojoriiri naacuaji jiyano hua casamiriacara quiniutianiya. <sup>6</sup> Taaquiriirinij, Pueyasoocua tiuujia pa quishacari, paacuaaquinatej seetanujuanaa juhua queraatia casamiriaca quiijacani. Paacuaajaari shuquiriaatia quiijaca Pueyaso rupaacua tiuujia pa quishacarinu, juhuajaniya quiijaca pa quishacarijuhuaj pa jitianasano casaaniyojuata. <sup>7</sup> Paacuaajaari juhuasunucua roosaquuaari mijiriani. Naajuhuaj, paari juhuasunucua tacateriquianohuani. <sup>8</sup> Naaratej, paa jaara pa miaquesocoriquiano jitiariquiani, paa jaara pa cushishocoriquiano jitiariquiajuhuaj, saa cunotaja shuquiriaatia pa quirij. <sup>9</sup> Saniniuujia, noo pojori, jiyano hua casamiriaca quiniucua jiaatiajacatej, nojoriiri maja

na niishiniu rejetenu, na panishano na miyaquiniuria. Naacuajitij, nojoriiri cocuaatia miiquiaa. Nojoriiri juhua norijosaaquiaa, najuhuaana casamiicua nojori jiaatiasacari, sesa casaacuanio. Puetunu cuno sesa casaajanaari pueya sesoquiaa, nojori saniitiosaanura taraatia. <sup>10</sup> Cumaneecaacua jiaatianu jiyanoahuani, cuniquiji supuejaari puetunu sesa casaa pa miiniurijanaa. Naacuajitij, noojiaqueya parta Pueyaso pueyajiniinioori Pueyaso rupaa tojiniu tarinitiacanu tari. Nojoriiri tama nojori cuaqueyajaaja miitiquiaa naquiya, naa cumaneecaacua jiaatiajaca nojori quishacaritij. Naaratej Timoteonaa, majaari cumaneecaacua jiaatiaja quia quiniu.

*Pablo shiniujishacari Timoteo, Pueyaso tojjia na quiniuria pueyaracaanu*

<sup>11</sup> Quiajanu Timoteonaa, quiaacuajaari Pueyaso saquiriojosano pueyano. Naaratej, puetunu sesa casaajanaa miyashijia quia quiri. Tojetaarucuajanaa saaja maninia miijia quia quiri, juhua pa Jiyaniijiaja. Pueyasocua tiujia quia quiri socua. Socua panijia quia quirijihuaj. Puetunu casaajanaa rejeretaja quia quirijihuaj. Jacaria pocuaja quia quirijihuaj, maja pueya rerequeteja. <sup>12</sup> Pa paraca nujuataja quia quiri quia, jiyanohua quia tiuuniutia Pueyaso rupaacua. Pueyasocuaari saquiriojoquiaari na pueyano quia quiniuria. Cunora, quiaari queraatia pueya niquiara pohuataquiaari Jesucristoocua quia tiuuniujiniji. Naa pueyaracaanu rishijiarano quia quishacaritij, cunora, majaari Pueyaso niqutiojonu panishano quiajanu jaaretenu. <sup>13</sup> Quiaacuajaari niishiya taa Jesucristo seetanujanaa pohuataquiaari Poncio Pilato niquiaracuajani, nojuajaari seetanujanaa Pueyaso Niyanu. Naajaa, nojuajaari niishiquiaari nojuajaari cunora mosaanutaniya. Na Que Pueyasocuaari na samitiianiquiaariuhua. Pueyasocuaari saminiora jiyateja puetunu saminio casaajanaa. Naa quia niishishacaritij Timoteonaa, janiyari nio quia sequeya Pueyaso niquiarani, pa Jiyaniijia niquiarajuhaaj. Cua tojiri. <sup>14</sup> Puetunu cua rootasano quiajanijajanaa quia tojiri. Majaari na jataniniu quenaaja, pa Jiyaniijia mariqui quia niishitiojosano tamacareeri. Taa cua rootaa quiajanijacuajani, na tojjia quia quiri pueyaracaanu, pa Jiyaniijia Jesucristo cuaara tiuquirohuajaatijia, Jiyaniijiajanaa na quiniuria. <sup>15</sup> Na Que Pueyasoori na tiuquiniutianiano na panishacari, taa na sequequiaaricuajani. Pueyasocuaari jiyanohua pa timitiasano, saaja maninia na quiniucua. Nojuajanaari Jiyaniijia. Nojuajaari puetunu tamasa jiyaniijianucuajanaa Jiyaniijia. Nojuajaari camarucuajiniji Camarnujanaa cutara. <sup>16</sup> Saaja nojuajaari pueyaracaanu quijiajuhanajaj. Majaari na supueni quiquiaari. Majaari na shaajenu quiniutianijahuaj. Nojuajaari jiyanohua na shacantuuca cumaacajinia quijiajuhanajaj. Cunora, majaari quenaaja tamonu pueyano na naata nocua catecanonu. ¿Canteeri na niquiquiaari quenaajani? Shaaqui. Pueyanoori maja na naata na niquiniu. ¡Nojuaja cuaara pueyaracaanu timitiasaari! ¡Nojuajaari namitia na cumaaca jitianajuhuanajaj! Cuaara naa quiri pueyaracaanutej.

<sup>17</sup> Timoteonaa, parta Pueyaso pueya quia tojitiri nio, noo pojori, queraatia casamiriacatej. Nojori cuaara niishiiria maja pueya shocotejaca nojori quiniuria, casamiriaca nojori quiniucua. Nojori cuaara niishiirijahuaj, maja na casamiicua nojori tiuuniuria, nojori jiyaniishacari nojoriiri pueyaracaanu shuquiriaatia quijia quiniutianiya casamiriaca nojori quiniucua. Pa jitianasano casamiiri shaajeriquiano. Nojori cuaara Pueyasocua tiuuri cutara. Nojuajaari capora cutara, na niqutionura puetunu pa panishano casaajanaa, shuquiriaatia pa quiniuria. <sup>18</sup> Cunora, nojori quia niishitiojore, pueyaracaanu maninia miijia nojori quiniuria. Naatej, taa queraatia casamiriacatucua nojorini, maninia nojori miishano cuaara naa queraatia quiriujahuaj. Nojori cuaara ritia niqutiojojuaca quiri nojori jitianasanojiniji, narta Pueyaso pueyano jitiaaquishacari na panishano. <sup>19</sup> Naa capora nojori quishacaritij, nojoriiri juhua tari jiyocuaanu racataa nojori casaa. Naacuajitij, nojoriiri seetanujanaa shuquiriaatia quijia quiniutianiya pueyaracaanu, mijiria, jiyocuaanunio.

*Pablo rootasano Timoteo, naqionu na tucuatascari*

<sup>20</sup> Timoteonaa, Pueyasocuaari quia jiyatequiaari na rupaaajiniji pohuatana quia quiniuria. Maninia quia cojuare seetanu Pueyaso rupaajanaa. Majaari najuhuaana tama pueya niishitiojosanojuaaja tojjia quia quiniu. Noo niishishanojuhuaj, pueya sequesano: "Seetanu niishijiajanaa niishishano cutaratej", majaari cuno tojinu. Cuno niishishanoori seetanu niishishanojanaa paraca, najuhuaanaari. <sup>21</sup> Noojiaqueya parta Pueyaso pueyari Pueyaso rupaa tojiniu tarinitiacanu tari, cuno najuhuaana niishishanoocua nojori tiuuniucua. Niojanaa Timoteonaa.

Pa Jiyaniijia cuaara quia cumaquiriia.

## TANEE PABLO NAAJIONEE TIMOTEOCUARA

### *Pablo sarhuatasacari Timoteo*

<sup>1</sup> Janiyari Pabloni, Jesucristo jiyaramiquishano, taa Pueyaso paniquiaaricuajani. Naacuajitij, janiyari Jesucristojiniji pohuatanaa jiyatesaaguiaarini, pueya niishiniuria seetanujuanaa, nojoriiri pueyaracaanu rishijiacara jiyatesaanutaniya Jesucristoocua nojori tiuushacari. <sup>2</sup> Naaratej quiyanu Timoteonaa, janiyari nio naajiya quiarani. Janiyari quia panitiaani pa Que Pueyaso, pa Jiyaniijia Jesucristojuhuj, nojori cuara cumaquiiiria quiajaniya. Naajuhuj, nojori cuara taraajeera quiocua, nojori cuara pueyaracaanu quioojia cajitiirijuhuj shuquiriaatia quia quiniuria.

### *Jesucristojiniji quia pohuatariquia tamasaca*

<sup>3</sup> Pueyaso cua secojosacari pueyaracaanu, juuca, niucuanio, janiyari quiocuara secojoquiaani. Cua niishiriojosacari quiajaniya, maninia Pueyaso tojjia quia quiniucua, janiyari Pueyaso sequequiaani, "paacarasho". Janiyari nera shitimia poonijioquiaa coojia najiquitishooni, taa pa supuetanaa tojjitiquiaari Pueyasocuaani. <sup>4</sup> Majaari cua niyajetanu quiquiaa quia nujuquenu cucua, janiya jaara quia shuriucuaji quiaquiaarini. Janiyari cunora jyanohua jiaatiaa cua niquiniuria quiajaniyani, shuquiriaatia cua quiniuria quia shuriucua. <sup>5</sup> Janiyacuajaari niishiyani quiaari seetanujuanaa pa Jiyaniijiaacua tiuujiacuaja. Quia ji Loida, quia nucua Eunicienio, nojoriiri coteenujuanaa quiocuaji Pueyasocua tiuujiaca quiquiaari. Majaari cua taacanuunu quiaari seetanujuanaa Jesucristoocua tiuujiaca quiquiaaricuaani.

<sup>6</sup> Pueyasocuaajaari na cumaaca niqutioquiaari quiajaniya, cua secojosacari quiocuara, cua juaashiquia cua niasacari quiocua. Naacuajitij, quiaacuajaari Pueyaso Sohuanu cumaacaraca quioojiajinia. Naaratej, Pueyaso Sohuanu quia shanacure quiocua, na cumaaca na poonijiotenura socua quioojiajinia. <sup>7</sup> Pueyasoori maja na niqutionu quiquiaari na Sohuanu, puereja pa quiniuria. Na Sohuanu niqutioquiaari pajaniya cutaraari, cumaacaraca pa quiniuria, panjiaca pa quiniurijuhuj, maninia niishiriojojuacarano. <sup>8</sup> Naacuajitij, majaari quia caririqiniyu pa Jiyaniijia Jesucristojiniji quia poojotanura. Naajuhuj, majaari cua naaqui quia caririqiniyu, nujuatejojuajinia cua nujuatesaanuucua Jesucristojiniji cua pohuatanuucua. Pueyaso cumaquishacari quiajaniya, juhuajaniya quia rejeretare, quiaa jaara naquiya miishaariquiajuhuj, Jesucristojiniji quia pohuatasacari. <sup>9</sup> Pueyasocuaajaari pa jiyatequiaari na pueyara. Nojuajaari pa saquiriojoquiaari saa neraja pa quiniuria. Na jyanooniu pajaniyani, majaari na quiniyu quiquiaari maninia miijiaa pa quiniucua juucua. Maja. Nojuacuajaari naa pa jyanooquiaari saaja naa na miiniu paniniucua, jyanoojia na quiniucuaquijuhuj. Jiya shipiniyaquishacarijia, Pueyasoori jiyacari niishiriojoquiaari taa na jyanooniutianiya pajaniyani, Jesucristo cusosacari pa niti. <sup>10</sup> Quiari naataja pocuaji Tacuna Jesucristo niniucua, Pueyasoori pa niishitiquiaari taate na naata jyanooniu pajaniyani. Cunora, Jesucristoocua pa niti cusoquiaari. Na samiitiasacariuhua, nojuajaari cusonu shocotaquiaari. Naacuajitij, nocua pa tiuushacari, paari pueyaracaanu rishijiaa jiyatesaanutaniyani.

<sup>11</sup> Pueya niishiniuria nio rupaa, Pueyasoori cunora na jiyaramiquishano pueyanora cua jiyatequiaari, pueya cua niishitiojonura Jesucristojiniji. <sup>12</sup> Naacuajitij, janiyari niya naquiya miya nujuatejojuajiniani. Naajaa, majaari cua caririqiniyu. Janiyacuajaari niishiyani canaacua cua tiuuquiaarini. Nojuacuajaari pocuaji Tacuna Jesucristo. Cunora, janiyari seetanujuanaa niishiyani, nojuajaari cumaacaraca na cojuanura janiya, nojuaja cuara tiuquiriohuajaatijia. Naajuhuj, nojuacuajaari cumaacaraca na jataniniuria pajaniya, tojetaarucujanaa quiarinio pueya pa quiniuria na tiuquishacariuhua pocua.

<sup>13</sup> Timoteonaa, maninia niishitiojosano tojjia quia quiriquia taa cua niishitiojoquiaari quiajaniyacuajani. Naa quia miiriquia Pueyaso rupaacua tiuujiaca quia quishacari, pueya panijia quia quiniucuaquijuhuj, Jesucristo rupesano pa quiniucua. <sup>14</sup> Pueyasocuaajaari quia niishitiquiaari seetanu rupajanaa. Pueyaso Sohuanu quiniucua poojiajinia na cumaquiniuria pajaniya, cuno niishitiojosano quia jiiitare maninia, maja tamaatiara na jatanishaanura.

<sup>15</sup> Quiaacuajaari tari niishiya, puetunu Asia jiyajinjiniyo parta Pueyaso pueyari cua tiujiatuquiaari tamajaaja. Majaari na naacutunu paniniyu quiquianu janiya. Nojorijinjiniyo quiquianujuhua Figelo, Hermógenesio. <sup>16-17</sup> Saniniuuja, Onesíforo cutaraari cucua tiuquitasucanu. Cunora, pa Jiyaniijia cuara nocua taraajeera, puetunu na tiajinia quijiacacuajuhuj. Nojuaja jaara Roma tiacajinia tiuquiquianu, nojuajaari ritia coteecanu na pajenura janiya, cuara cua riuriaterejaatijia. Jaara cua riuriatatanu, nojuajaari coojia



cajitiquianu. Nojuajaari pueyaracaanu cucua tiuquiijiocanu niya nujuatejojuajinia, na naacunura janiya. Majaari cucuaji na caririqiniu quiqiuianu nujuatesano cua quishacari. <sup>18</sup> Quiaacuaajaari niishiyajuhuaaj taa nojuaja naacuquiaari pajaniyacuaajani, Éfeso tiacajinia pa quishacari. Naa maninia na miiniucua pajaniyacuaatej, pa Jiyaniijia tiuquishacariuhua pocua, nojuaja cuara maninia miiria Onesiforo saniniuuja.

## 2

### *Jesucristora poonijojua quia quiri quia puereyaquiniutia*

<sup>1</sup> Quiajaniya saniniuuja quiyanunaa, quioojia quia cumaquiriquia Jesucristo niqutiosano cumaacata. <sup>2</sup> Nocua tiuushano pueya quiarta Pueyaso pueyajinijinio quia niishitiojore Pueyaso rupaa, nojori niishitiojonura tamasaca saniniuuja. Cuno maninia pueya quia niishitiojore puetunu Pueyaso rupaajanaa, taa quia tojiqiaari queraatia pueya niqiuara cua pohuatasacariucajani.

<sup>3</sup> Juhuaajaniya naquiya miiniu rejeretaja quia quiri quia juhua pa Jiyaniijia Jesucristo soldado, puereyashijia. <sup>4</sup> Pueyano jaara soldadora saquiriojosaare, cuno pueyanoori maja na naata tama na panishanojuaja miiniu socua. Nojuajaari pueyaracaanu na camarnu tojjia, na camarnu timitianura nojuaja. Naa pa Jiyaniijia tojjia quia quiri quia juhuaaj Timoteonaa. <sup>5</sup> Naajuhuaaj, pueya tacuarishijosacari, nojori cuara quiiria tacuarishijionu camarnu tojjia. Tamonu jaara shocotare na tojiyaquiniutia camarnu, cuno na shocotanuuri najuhuanaj. Naacuajitij, majaari na niqutiosaanu casaa, sesa na miiniutia na shocotasacari. <sup>6</sup> Nio quia niishirijuhuaaj: cante cuhuariquia cuhuatajani, nojuaja cuara coteenu na senoosanojinijia racataara na panishano. Na nuhuaji cutara, nojuaja na naata tamasaca niqutiojonu na senoosanojinijia. <sup>7</sup> Nio miriqui cua sequesanoocua quia niishiriojore. Pa Jiyaniijiacuaajaari quia niishitiniutianiya puetunujuanaa.

<sup>8</sup> Majaari nio niyajetanu: Jesucristoori macujinijia samiitianishaa quiaariuhua, Pueyaso Niyanu na quiniucua. Pueyano quiqiaarijaariuhuaaj. Nojuacuajaari pa supuetanaa Jiyaniijia David niqiuohuacuajinijio supueno pueyano quiqiaari. Naacuajitij, nojuajaari Pueyaso Jiyarosano quiqiaari mijiria quinia pueya niti na mosaanura. Cuno cuajaari cua pohuatasano Pueyaso Rupaa. <sup>9</sup> Naa cua poojotanuucaatej, janiyari naquiya miyani. Janiyari cumayocuta moronucua quiyajaaniuhuaaj, juhua sesa mijia. Naajaa, Pueyaso rupaa cutaraari maja na naata sanaajasaanu. <sup>10</sup> Cunora, janiyari puetunu naquiya miiniujianaa rejeretaquiaani, Pueyaso saquiriojosano pueya tojinuria Jesucristojinijia. Naacuajitij, nojoriiri na naata nocua tiuuniu, Pueyaso pueyara nojori jiyatesaanurajuhuaaj, taa na jatanishano pueya pa quiyacuaani. Naacuajitij, paari mariyata shacantuuca quijiacara jatanishaanutianiya, Jesucristota pa quiniuria pueyaracaanu.

<sup>11</sup> Nio sequesanoori seetanujuanaa:

Jesucristoocua pa tiushacari, Pueyasoori Neyanu mosaanu jiyateya pa niti na quiniuria sesa pa miishanojinijia. Naacuajitij, Jesucristo mosaanu jaara pocuara quiqiaari, na samiitianuhuari pajaniyara quiyajuhuaaj, pueyaracaanu rishiriquiano pa quiniuria. <sup>12</sup> Naajuhuaaj, paa jaara naquiya miitiasaariquia nocua pa tiuuniucuaani, nojuajaari camarucuaa pa jiyatenutianiya narta jiyaniijanucua pa quiniuria. Saniniuuja, pa jaara pa Jiyaniijia tamacariquia Pueyaso niishiyashijia pueya niqiarani, nojuajaari pa tamacanutaniyajuhuaaj. <sup>13</sup> Paa jaara na sequesano tojiyashijia quiqiuani, naajaa, nojuajaari pueyaracaanu na sequesano mijia. Pueyasoori na sequesano jataniyashijia cutara.

### *Taamueca quiijate Pueyaso shuquiritiasano nera poonijionani*

<sup>14</sup> Parta Pueyaso pueya quia niishitiojorohuarohua maja najuhuaana nojori juayonuujutanura tamaatia niishitiojosanoocua. Jiyanojua quia nacasure nojori Pueyaso niqiuara, maja naa nojori nacojonura najuhuaana supuetanaa niishitiojosanoocua. Naa tamaatia niishitiojosanoocua juayonuujutanuni, cunoori maja na cumaquiniu na tojiniaa. Socua nojori sesoya cutaraari. <sup>15</sup> Tama quia cuaqueyajaaja quia cojuare, saa maninia quia niishitiojonura Pueyasojinijia cuno seetanu rupaajanaa. Naacuajitij, Pueyasoori quia timitianutianiya nera poonijiona maniniu quia quiniucua. Majaari capa quia niishitiojonu, quiaa mariqui tamajaaja caririqiriiri. <sup>16</sup> Naaratej, majaari najuhuaana tama mijiria pueya niishishanojuaja quia tojinu. Pueya tojishacari cuno, nojoriiri socua jiyacatenutianiya Pueyaso tojiyashijia nojori quiniuria. <sup>17</sup> Cuno najuhuaana niishitiojosanoori jiyanojua puereeta. Cunoori Pueyaso pueya tajinia paaqueja, na sesonura puetunu Pueyaso pueya maanujuanaa. Naa nojori tajinia paaqueyari taa pueyano cusojuaja sapueja pueyano cuaqueya moquijia quiaacuaani, na camaru na cusojuanura. Himeneo, Filetonio, nojoriiri

naa miiquioya quiarijia. <sup>18</sup>Nojoriiri seetanu rupaajanaa jataniquianu tamaatiara. Nojoriiri pueya niishitiojija, paanaari tari tojetaarucujanaa samitiianishanocujani. Naacua-jitij, majanaari pa cuaqueya jatanishaanu quiniutianiya, shacantuuca cuaqueyaraca pa quiniuria taa pa Jiyaniijiacuaani. Naa nojori niishitiojosacari najuhuanatej, nojoriiri noo-jaqueya Pueyaso pueya cushitiojija, nojori tiuyaquiniuria pa Jiyaniijia sequesanoocua. <sup>19</sup>Naajaa, Pueyasojuanaacuaajari pa niishitiquiaari na rupaari seetanujanaa. Majaari na naata jatanishaanu. Naa naajiotasano quiyacuaajari:

“Pa Jiyaniijiaari na saquiriojosano pueya niishiyacuaaja”.

Naa naajiotasanoori quiyajuhuaaj:

“Canapuate pa Jiyaniijia Jesucristoocua tiuujiacani, nojori cuaara sesa na miijionu tarini-tiaara”.

<sup>20</sup>Sanajanaa, cua tojiri. Jiyanoehua queraatia casamiriaca pueyano tiajinia, cuno tiajiniaari maja saaja orojiniji shipinijosano coshiquia quiniu, miacoujaanio, platajiniji casaanio. Puetunu tamaatia casaajiniji shipinijosano casamijianaari quijia. Quijiajaari-uhua mati, suruhuatu numajiniji quejasano. Quijiajaariuhua maraujiniiji panishano patacocua, conaanio. Puetunu cuno casamijinijiniojuanaani, noojiaqueyari racatasano saaja masu miaquetejarano quiya, na raatojotajaranonio. Quiyajaariuhua rucucuaacuaaji casaa, rucucua cajitiaja. <sup>21</sup>Paari naajuhuaaj. Paa jaara tama pa cuaqueyajaaja co-juariquia tojetaarucujanaa sesa pa miiniucuaajini, saaja pa Jiyaniijia pa quiniuria-juhuaaj, naacuaajitij, pa naata juhua pa Jiyaniijia timitiasano tohuatashiniyoyua quiniu. Naacuaajitij, pa Jiyaniijia na naata poonijiotenu pajaniya puetunu maninia casaajanaa pa miiniuria.

<sup>22</sup>Sanajanaa, quiaacuaajari niishiya, casaa miiniucua jiaatijacate mashiquiorini. Puetunu cuno sesa niishiriojosanojuanaa quia tarinitariquia. Saniniuujia, saaja maninia miijia quia quiriquia. Saaja Pueyaso rupaacua tiuuji quia quiriquia, pueya panijiajuhuaaj. Jiyanoojia quia quiriquiajuhuaaj. Naa quia quiriquia, taa puetunu Pueyaso jiyatesano sesa miyashijia pueyajanaa miiquiaacuaani, pa Jiyaniijiaocua nojori tiuniuucua. <sup>23</sup>Pueya jaara nacojoriquia nojori niishiyaquishoo casaajiniji najuhuanaj, nojori quia ruuretare saaja, nojori jaara quia nequesoretare cuno casaajiniji. Quiaacuaajari niishiya, pueyari jiyano casaacua paracaatiojua. <sup>24</sup>Pueyasora poonijiojua pueyano cuaara quiaquiriia pueya paracaajia. Saniya cuaara quiriia cutara puetunu pueya panijiajanaa. Cuaara quiriiajuhua maninia niishitiojua. Cuaara juhuajaniya rejeretaja quiriia, tamasaca jaara na taajetere. <sup>25</sup>Cuaara Pueyaso rupaa tojiyashijia nacasuura jacaria, nojori na paniniutia, maja nojori na juaniutia. Naa quia miishacari, Pueyaso naasucuaari nojori jiuujia tacatonutaniya seetanu rupaajanaa niishijia nojori quiniuria. <sup>26</sup>Naacuaajitij, nojoriiri maninia niishiriojua quiniutianiya, nojori jaaretenura Sesaacuaajia, maja Sesaaca miitiniuria nojori taa na paniyacujani.

### 3

*Taa quijiaa mijiria quiniaa quiniutianiya quera jiya puequesacarinii*

<sup>1</sup>Quia niishirijuhua Timoteonaa, jiya puequenu panishacari, pueyari socua jiyacatenu-taniya sesa miijiacara. <sup>2</sup>Pueyari saa tama nerajaaja niishiriojua quiniutianiya. Majaari tamonura na niishiriojonu quiniutianiya. Pueyari queraatia cumaneeca jitianuucua jiaatijaca quiniutianiya juhuaaj. Naajuhuaaj, pueyari najuhuaana narta pueya niquiara pocuajaca quiniutianiya, na jyanishacari nojori cutara socua niishijia narta pueya-jiniji, socua shanohua niquishano tamasacajinijinio. Pueyari Pueyaso sesacajaca quiniutianiya, narta pueya sesacajacajuhuaaj. Pueyari na queya tojiyashijia quiniutianiya. Majaari quenaaja pueya timitianu quiniutianiya maninia na miijia. Pueyari maninia miyashijia quiniutianiya, Pueyasojiniji maninia casaa rerequetejaca nojori quiniucua. <sup>3</sup>Naajuhuaaj, majaari quenaaja na queya panijia pueya quiniu quiniutianiya, tapueyocua, tama necohuaajaanio. Pueyari tojetaarucujanaa jiyanoashijia quiniutianiya. Sacuaraatia rimiaacaturji quiniutianiyaariuhuaaj. Naajuhuaaj, majaari quenaaja tama nojori cuaqueya panishanojuaaja rejetejaca pueya quiniu quiniutianiya. Pueyari naquiya narta pueya miijia quiniutianiya, nojoriicua na taraajeyaquiniutia. Pueyari puetunu maninia miijiacajanaa soojeaca quiniutianiya juhuaaj. <sup>4</sup>Pueyari tama na cojiniaajaaja tacartajaca quiniutianiya. Pueyari cocuaatia casaa miijia quiniutianiya, mosanucua nojori quiniucua. Pueyari juhuajaniya quijia quiniutianiya, tama nojori cuaqueyajaaja shuquiritajaca nojori quishacari. Shuquiriaatia pueya miishacari tama na panishanojuaaja pueyaracaanu, majaari jeya nojori quiniu quiniutianiya nojori shuquiritianura Pueyaso. <sup>5</sup>Pueyari sapuenu juhua Pueyaso pueya niquishaanutaniya. Naajaa, nojori miishanojiniji, maatia niishishaanutaniyari, nojoriiri Pueyaso cumaaca

maseyaquiquiaari seetanujuanaa jatanishano pueya nojori quiniuria. Cunora cua tojiri Timoteonaa. Majaari jiyano pueya quia rupenutej.

<sup>6</sup> Tamasaca cuno pueyajinijioni, nojoriiri tiaco tiuquitiacaja, noo maajipohua na sapojonura, najuhuana pueya pohuatasanoocua ritia tiuujiacatej. Cuno maajipohuari tama na cuaqueya miiniu panishanojuaaja rejetyashijiaca. Naa sesa miijiaca nojori quiniucuatej, nojoriiri najuhuana tacaquioquiaa. Cunora, nojoriiri cuno sapojonuujuaa tojtiaquiaa. <sup>7</sup> Cuno maajipohuari najuhuana pueyaracaanu tojtiaquiaa cuno sapojonuujuaa niishitiojosano. Saniniuujia, majaari Jesucristojiniji seetanu rupaajanaa niishijiacara nojori quiniu quiquiaa, Pueyaso jiyanooniuria nojori. <sup>8</sup> Cuno sapuenu juhua Pueyaso rupaa niishitiojonaari seetanu rupaajanaa ruuretaquiaa, taa nio shimiacuri, Janes, Jambres ruuretaquiaari supuetana Moisésuaani. Naacujitij, nojori niishitijaari juhua ninishiqui, sesa nojori miishano timitiajaca nojori quiniucua. Seetanu rupaajanaa nojori tojiyaquiniucua, pueya cuaara tojiyaquiria nojori saniniuujia. Nojoricuajaari Jesucristoocua tiuyashijiaca. <sup>9</sup> Naajaa, majaari queraatia pueya tiuuniu quiniutianiya nojoriicua. Ritia niishishaanutaniyacujaari, nojoriiri seetanujuanaa niishiyashijiaca, taa pa supuetanaa niishiquiaaricuaani cuno shimiacuriiri sapojonuujuaa.

*Pablo tucuatascari naajionu, socua rootaa Timoteori*

<sup>10</sup> Timoteonaa, quiaacujaari pueyaracaanu cua cojiquiaari maninia quia niishiniuria puetunu cua niishitiojosanojuanaa. Quiaacujaari niishiya taa miijia cua quiquiaarini, pa Jiyaniijia cua shuquiritiniuria. Quiaari niishiyajuhuaaj taa seetanujuanaa pa Jiyaniijiacua tiuujia cua quiquiaarini, jacaria pocuajajuhuaaj, pueya panijiano. Quiaari niishiyajuhuaaj, majaari cojia cua najiquitiniu quijiani, pueya miishacari naquiya janiya. <sup>11</sup> Quiaari niishiyajuhuaaj taa cua miitiasaaquiaari Antioquia tiacajiniani, Iconio tiacajiniajuhuaaj, Listra tiacajiniani. Seetanujuanaa, janiyari naquiya miishaquiaarini. Naajaa, pa Jiyaniijiaari cucua taraajequiaari maninia na rishitiniuria janiya. <sup>12</sup> Seetanujuanaa naquiya miishaanutaniyari puetunu noo pueyajanaa, tama na cuaqueyajaaja jiyatejaca saaja Jesucristo tojijiaca nojori quiniuriatej. <sup>13</sup> Saniniuujia, sesa miijiaca pueya, sapojonuujucanio, nojoriiri socua sesa miiniuria jiyacatenutaniya. Nojori sapojonuusacari tamasaca, nojoriiri naa tama na cuaqueyajaaja sapojonutaniyajaacujua.

<sup>14</sup> Quiajaniya saniniuujia Timoteonaa, majaari quia cartenu puetunu maninia niishitiojosanojuanaa, taa quia niishitiojosaaquiaaricujani. Quiaacujaari niishiya, cuno niishitiojosanoori seetanu rupaajanaa. Quiaari niishiyajaacuhuaaj canapuate quia niishitiojoquiaarini. <sup>15</sup> Quiaacujaari quia naatujujiniji tariucuaaanu Pueyaso Rupaa niishijia. Cunoori quia niishitiquiaari Jesucristoocua quia tiuuniuria, Pueyaso jiyanooshano pueyano quia quiniuria. <sup>16</sup> Puetunu Pueyaso Rupaajanaacujaari Pueyaso naajiotanishano na pueya. Cunora, puetunu cuno rupaajanaari maninia pajaniyara. Cuno rupaari cumaacaraca na niishitiojonura pajaniya, na niishitiniuria pajaniyajuhuaaj pa miishanoori sesa, na nacasunura pajaniya maninia miijiaca pa quiniuhua. Pa rootajaariuhuaaj tojetaarucujanaa maninia miijiaca pa quiniuria. <sup>17</sup> Naacujitij, Pueyaso Rupaari Pueyasora poonijionaa pueya jeenucujaja tojetaarucujanaa, puetunu maninia casaa miijiacajanaa nojori quiniuria.

## 4

<sup>1</sup> Quiaacujaari niishiya, Jesucristo tiuquishacariuhua mijiria, Jiyaniijijanaa na quiniuria, nojuajaari puetunu na tojtiajacajanaa nequesoreenutaniya mijiria pa miishanojiniji, saminiucua, macunucuanio. Cunora, janiyari na niquiara, pa Que Pueyaso niquiara quia sequeya seetanujuanaani. Cua tojiri. <sup>2</sup> Majaari pueya niquiara Pueyaso rupaa pohuatunu quia tarinitianu. Pueyaracaanu quia pohuatariquia, naajaa, quia jiyaniachari jiyacari naasucuaari maja maninia quia pohuatanura. Pueyaso rupaata quia niishitiri sesa miijiaca nojori miishanoori sesa Pueyasora. Pueyaso rupaa tojiyashijiaca quia nacasuriquia. Pueya quia shiniujiriquia Pueyaso rupaacua nojori tiuuniuria seetanujuanaa. Puetunu cunojuanaa quia miiriquia jacaria quia pocuanuta, maja juaanutia. <sup>3</sup> Naa quia poojotariquia pueya niquiara, nojori tojinu panishacarijia Pueyaso rupaa. Na nuhuaji, pueyari seetanu rupaajiniji niishitiojosano tojinu paniyaquiniutianiya. Saaja na ruuretanutaniyaaariuhuaaj. Naa Pueyaso rupaa nojori tojinu paniyaquishacariitij, nojoriiri queraatia tamaatia niishitiojonuujuaa rerejotenutaniya, cuno pojori shuquiritiniuria nojori najuhuana pohuatasano. <sup>4</sup> Nojoriiri seetanu Pueyaso rupaajanaa tarinitianutaniya, najuhuana sapojonuusano tojtiajaca nojori quiniuria saniniuujia. <sup>5</sup> Quiajaniya saniniuujia, maninia niishiriojua quia quiriquia, maja quia sapojosaanurajuhuaaj. Naquiya miiniu rejeretaja quia quiriquia. Pueyaso rupaa Jesucristojiniji pohuatanuucua cojeja quia

quiriquia, pueya tiuuniuria Jesucristoocua. Puetunu quia poonijiosanojuanaa Pueyasora quia tucuatere maninia, taa pa Jiyaniijia sequequiaari quiajanianyacuajani.

<sup>6</sup>Janiya saniniuujia, janiyari quera quianutaniya jiyocuacaanu cua quiniuria pa Jiyani-ijiatani. Cua nanaca jaara shootesaare, janiyara, cunoori juhua Pueyasora cua niqutiosano quiniutianiya. <sup>7</sup>Majaari cua taajenu quijia, pueyaracaanu cua poonijiosacari cua Jiyaniijia. Janiyari tari tucuataganu miiniu puetunu na sequesanojuanaani. Pueyaracaanu cua poojotasacari Pueyaso rupaa, majaari cua jataniniu quiquiaari quenaaja. <sup>8</sup>Naacujitij, shanohua tuhuajaari quiriano jiyocuacaanu racatasano quiya tari, maninia miijia cua quiniucua. Cua Jiyaniijiaari cuno tuhuaja cua niqutionutaniya na samiitianishacariuhua janiya. Pa Jiyaniijiaari jiyanohua maninia. Na jiyanooshano pueya pa quiniucua, majaari socua na saneenu quiniutianiya sesa pa miishano. Majaari saaja janiya na niqutionu quiniutianiya cuno tuhuaja. Puetunu noo pojorijiana niqutionutaniyaariuhua, canapue te nojuaja na paniniutia sashiyajaani, cuara tiuquihuara shacantuuca na cumaacatajaatijia.

*Pablo sequesano Timoteo miishocoriquiano*

<sup>9</sup>Majaari puera tarishiniu. Quia secoore, cucua quia tiuquiniuria ritia. <sup>10</sup>Demasri cua tiujiaarucuaani. Tesalónica tiacajinia quiaarucuaari. Nojuacuajaari tama na panishanojuaja miiniu panijiaara jatarohuacuaa. Crecenteeri saniniuujia Galacia jiyajinia quiaarucuaa. Titoori Dalmacia jiyajinia quiaarucuaajaacuhua. <sup>11</sup>Saaja Lucasri niya cuata quiya. Quiaa jaara cumaji niyare, quiocua Marco rupoyare quiocua. Nojuajaari na naata cua naacunu niya, pa Jiyaniijiaari cua poonijiosacari. <sup>12</sup>Janiyari saniniuujia Tiquico jiyarorucuaa Éfeso tiacajiniani. <sup>13</sup>Taa cua sequeya quiajanianyacuajani, quiaa jaara cumaji niyare, quiocua cua tucuaque toque paare quiria, Carpo tiajinia cua tiujiasano, Troas tiacajinia. Quiocua quiria patootaare cua nequesoreetuneeacajuhua. Janiyari socua noo pania quia patootanurani, shoqueecua naajionuutasano Pueyaso Rupatej.

<sup>14</sup>Noo Alejandro, cumueeca casaajiniji shipinijiojua casamitij, nojuajaari jiyanohua cua paracaajiaa quiquianu. Naajaa, pa Jiyaniijiaacuajaari saniniuujia cucua na naminiutianiyacuajua, naa na miiniucua janiyatej. <sup>15</sup>Tama quia cuaqueyajaaja quia cojuare maja na miiniuria sesa quiajanijuhua. Nojuajaari pa pohuatasano cuaracashitiya saaja, Pueyaso rupaa ruuretaja na quiniucua.

<sup>16</sup>Janiya jaara shushajanaa nuuatesaacanu jiyaniijianucua tacojitij, nojori nequesoreenura janiya, majaari quenaaja tamonu Pueyaso pueyajinijinio quiniu quiriquiaa tii, cucuaji na tacunura quenaaja. Puetunu cua cojiniaajanaari cua cartecanu tamajaja. Naa nojori tarinitianuucua tamajaja janiyatej, Pueyaso cuara jiyanooria nojori. <sup>17</sup>Naajaa, pa Jiyaniijiaari cua cojiqianuni. Cua cumaquiquianujaariuhua, nojuajiniji cua pohuatanura puetunu cuniqui quiniaa Pueyaso niishiyashijiaa pueyajanaa. Pa Jiyaniijiaari cocuaatia cua miinujiniji juhua nojori juaashiquiajiniji cua jaaquianu, maja nojori monura janiya. <sup>18</sup>Janiyari nocua tiuyani, nojuajaari cua mashiquiniutianiya puetunu sesa casaacuajijiana. Cua cojuanutaniyajaariuhua, pueyaracaanu rishijia cua quiniuria na shuriucua jiyocuacaanu, Jiyaniijijanaa na quishacari. ¡Jiyanohua maniniaari pa Jiyaniijia! ¡Nojuaja cuara shuquiritiasaaria pueyaracaanu! Cuaara naa quiriatelye.

*Pablo sequesano na naajione na tucuatasaari*

<sup>19</sup>Quiria quia saruhuatare Prisca, neyaca Aquilano, puetunu Onesíforo pueyajanaa-juhua, na tiajinia quiniaa. <sup>20</sup>Erastoori Corinto tiacajinia jateecanu. Janiyari saniniuujia Trófito tiujiacanu Mileto tiacajiniani, cusosu na quiniucua. <sup>21</sup>Cucua quia niniuria quia secoore, shuniya coteyaquishacarijia quia tiuquiniuria cucua. Niya cuata quiniaa parta Pueyaso pueyari cua sequereeni, nojoriria cua saruhuatanura quiajaniya. Nojoriiri Eubulo, Pudente, Lino, Claudio, puetunu parta Pueyaso pueya maanujuaanao.

<sup>22</sup>Pa Jiyaniijia cuara quioojajinia quijia quiria pueyaracaanu. Pueyaso cuara cumaquiria puetunu nijaniyajanaa.

## PABLO NAAJIONEE TITOCUARA

### *Pablo naajiosacari Titoocuara*

<sup>1</sup> Janiyari Pabloni, Pueyaso seru. Jesucristoori cua jiyaroquiaari na Que Pueyaso saquirojosano pueya cua tiutiniuria Jesuucua, Pueyaso pueya nojori quiniuria. Cua jiyaroquiaariiaariuhua Jesuucua tiuuniaa cua niishitiniuria seetanu rupaajanaa Pueyasojiniji, nojori jatanishaanura maninia quijiacara. <sup>2</sup> Nojori tojishacari cuno rupaa, nojoriiri niishiquiaa nojori cutaraari samiitianishaanutaniuhua Pueyaso muerasu nojori quiniuucua, pueyaracaanu quijiacu nojori quiniuria Pueyasota. Cunocuaajaari tariucuaacaanu Pueyaso sequesano, jiyanoehua tarijiatej, jiya shipinishaacarijiojua. Nojuajaari maja na naata sapojonu. <sup>3</sup> Quiari naataja, Pueyasoori na rupaa niishitiniu paniquiaari pueya, taa na paniquiaari jiyasohuaja tariucuaacaanucujani. Naaratej, pa Jiyanoojia Pueyasoori cua jiyatequiaari na rupaa pohuatanarani, pueya cua tiutiniuria nocua. <sup>4</sup> Quiarijiani, quiocuara naajiyaniija Titonaa, juhua cua niyanuniyojua quia quishacari. Quiaari Pueyaso pueyanora quiquiaari quia tiushacari Cristojiniji cua pohuatasanoocua, taa cua tiuquuaaricuani. Naacuajitij, paari mariyata nocua tiuujiacani. Pa Que Pueyaso, pocuaji Tacuna Jesucristonio, nojori cuara cumaquiria quiajaniya. Nojori cuara jitiiaara quioojia maninia, shuquiraatia quia quiniuria pueyaracaanu.

### *Titora Pablo sequesano, Creta jiya tucuaatiajajinia na miishocoriquiano*

<sup>5</sup> Janiyari quia tiujiaquiaari Creta jiya tucuaatiajajiniani, quia tucuatunura cua poonijosano cureeno. Naaratej, quia sequesunanijia quia jyatunura jiyaniijianucua, Pueyaso muerasu maapue jitiianaa quiniuria puetunu cuno jiya tiacajinijanaa, taa cua sequequiaari quiajaniyacuajani. <sup>6</sup> Pueyaso pueya jitiariquiano cuara quiria maninia pueyano, sesa miyashijia, maja pueya pocuanura sesa nojuajiniji. Cuaara jitiiaara niquiriyatujua niquiocua. Necohua cuara quiria Pueyaso muerasujuhua, maja sesa miijia, maja tojiyashijiacajuhua. <sup>7</sup> Cante Pueyaso muerasu jitiianani, nojuajaari Pueyasora poonijiojua. Naaratej, nojuaja cuara quiria maninia quijia, sesacasoo, maja tojiyashijia. Cuaara quiaquiria ritia juaajia, mashaasequejoja, piyojotaja. Cuaara quiaquiria cumaneeca panijia sesa na miishanota na masenura. <sup>8</sup> Naajuhua, Pueyaso pueya jitiiana cuara quiria rucoonaacua taraajeja. Cuaara quiria maninia miijia, maninia niishiriojua. Cuaara quiriujuhua seetanujuanaa Pueyaso rootasano tojijia, maja rimiajata maninia miijia. Cuaara quiriujuhua Pueyaso panijia cutara, tama na cuaqueyajaaja jitiia maninia, maja sacuaraatia casaa porocua. <sup>9</sup> Cuaara quiria Pueyaso rupaa tojijia cutara, taa na niishitiojosaaquiaaricuajani. Naacuajitij, nojuaja na naata pueya cumaquiniu, maninia na niishitiojosanota Pueyaso Rupaajiniji. Naacuajituhua, nojuaja na naata pueya tacatonuhua Pueyasocua sesa nojori niishishanojiniji, noo pojori canapuate Pueyaso Rupaa ruuretajaca quiyacuajani.

<sup>10</sup> Naa quia sequereenijia, queraatia tojiyashijia pueya quiniuucua, canapuate juhua niishiyashijia niishitiojquiaa najuhuaana niishitiojosanocuajani. Nojoriiri Pueyaso muerasu sapojia. Queraatia cuno pojoriiri cuarta Judiocuaca. Nojoriiri pueya niishitiojia pueya cararaatiuquia co miatesaanura, taa Moisés niishitiojquiaari tarijiacuajani, seetanujuanaa Pueyaso muerasu nojori quiniuria juucua. <sup>11</sup> Nojoriiri queraatia niquiohuaraca pueya jiyajeneteya sesa na niishitiojosanota, puetunu tapueyocacatajanaa nojori juayonuujutanura. Cuno niishitiojonaa cuara sanaajasaaria. Nojoriiri niishitiojquiaa saaja cumaneeca nojori masenura sesa na niishitiojonuunujiniji.

<sup>12</sup> Creta jiya tucuaatiaja pueyajinijinio tamonu shimiacuuri tama na pueyajinijiaaja na sequequiaaritij: "Creta pueyari pueyaracaanu saaja sapojonuujua. Nojoriiri jiyanoehua juaajia juhua sayoru. Nojoriiri puera miaquenuujuaca. Nojoriiri taajecorijuhua". <sup>13</sup> Seetanujuanaari cuno shimiacu sequesano. Nocuaji, jiyanoehua quia nacasure nojori, nojori cuara Pueyaso tojijia quiria, maninia quijia nojori quiniuria. <sup>14</sup> Quia rootare nojori maja na tojtianura Judiocuaca nareja najuhuaana pohuatasano, naajuhua, maja nojori tojiniuria pueya rootasano, canapuate Pueyaso seetanu rupaajanaa tojiyashijia quiyacuajani.

<sup>15</sup> Pueyano jaara maninia jiuujiaraca quiri, puetunu casaajanaari maninia quia nera. Saniniuujia, pueyano jaara sesa jiuujiaraca quiri Pueyaso rupaacua tiyashijia na quiniuucua, majaari quenaaja niquiriyatu casaa maninia quiniu nera. Na niishitijaari juhua cuuruucua, noojiano. <sup>16</sup> Nojoriiri tama na cuaqueyajaaja sequeya: "Pueyaso niishiyaniija". Naa nojori sequesacaritij, najuhuaana sequeyari. Nojori miishanojiniji, paari niishiyani nojori maja seetanujuanaa Pueyaso muerasu. Nojoriiri jiyanoehua soosano pueya, puera

sesa na quiniuucua. Nojoriiri jiyanhua sesa, tojiyashijacajuhua. Majaari na naata quenaaja maninia miiniu.

## 2

### *Maninia niishitiojosano cutara*

<sup>1</sup> Nocuaji, pueya quia niishitiojore maninia nojori quiniuria taa pa niishitiojosaaquiaaricujani. <sup>2</sup> Naaratej, socua saaquiapue quia niishitiojore nojori cuaara quiaquira miaquejoru, mashaasequejorunio. Nojori cuaara quiria tojishano pueya cutara, maja rerequetesano. Nojori cuaara quiria maninia niishiriojojuaca. Cuaara quiria maninia quijiacajuhua, na tojishacari puetunu Pueyaso niishitiojosanojuanaa, na panishacari pueyano. Nojori cuaara quiriajuhua maninia rejeretajaca taraatia na miishacari, juhuanjaniya nojori sashishacari pa jiyaniija. <sup>3</sup> Naajuhua, socua motaja maajipohua quia niishitiojore nojori quiniuria maninia Pueyaso niquara pueyaracaanu, maja rimiaacaturjuri, maja mashaasequenujuaca. Nojori cuaara pueyaracaanu miiria maninia tamasaca niquara, tamasaca miiniuria juhua nojori miishanojuhua. <sup>4</sup> Nojori cuaara niishitiojora niyacaraca maajipohua, maninia na paniniuria neyaca, necohuanio. <sup>5</sup> Cuno jiyaniyacua cuaara niishitiojora narta maajipohua, maninia niishiriojojuaca nojori quiniuria, saaja neyaca panijaca nojori quiniuria, maja tamonu caya panijacara. Nojori cuaara niishitiojosaariajuhua, maninia poonijiojuaca na tiajinia nojori quiniuria, caporatujuri nojori quiniuria, neyaca tojitajacanio. Nojori cuaara naa miiria, Pueyaso Rupaa mariqui rerequetesaareeri.

<sup>6</sup> Naajuhua, mashiquiori quia niishitiojore maninia niishiriojojuaca nojori quiniuria. <sup>7</sup> Puetunu quia miishanojuanaa cuaara quiria maninia nojori niquara, nojori jiaatianura quiocua, juhua quiajaniya nojori quiniuriajuhua. Quia niishitiojosacari nojori, tama quia cuaqueyajaaja quia cojuare, tama quia niishitiojosanojuaja tojijia quia quiniuria. Majaari puenujuua quia quiniu quia niishitiojosacari. <sup>8</sup> Maninia quia niishitiojore Pueyaso Rupaa, taa quia niishitiojosaaquiaaricujani. Naacuajitij, tamasaari maja na naata ruuretano quiniutianiya quia niishitiojosano pueya niquara. Naa maninia quia niishitiojosacaritij, quia niishitiojosano rerequetejacaari caririquiniutianiya. Naacuajitij, nojoriiri maja tari na naata pocuanu quiniutianiya sesa pajaniyajiniji. Nojoriiri sanaajetanutaniya.

<sup>9</sup> Poonitijosano pueya quia rootare, puetunu na camarucua sequesanojuanaa nojori tojiniuria, na camarucua shuquiritianura nojori. Cuaara quiria na camarucua panijaca, maja riuhuanejaca. <sup>10</sup> Cuaara nohuaseyaquira na camarucua casami. Cuaara quiria seetanujuanaa maninia miijica, pueya niishiniuria pa jiyanojia Pueyaso rootasanoori jiyanhua maninia cutara. Poonitijosano pueya jaara maninia quiriquia, Pueyaso Ru-paari juhua maniniushitishano quia tamasaca niquara.

<sup>11</sup> Paacuajaari niishiyani Pueyasoori jiyanhua jiyanojia seetanujuanaa, Jesu cusonucua puetunu pueyacuaraanaa, sesa pa miishanojiniji pa jiyanooshaanura. <sup>12</sup> Pueyaso jiyanooshacari pajaniya, cunoori pa niishitiojiya pa cartenura puetunu sesa pa miishanojuanaa, maja mijiria casaacua pa jiaatianura sacuraatiajuhua. Naajuhua, Pueyaso jiyanooniucua pajaniya, cunoori pa shiniujiya maninia niishiriojojuaca pa quiniuria mijiria pa quishacarijia, maninia miijiacajuhua, Pueyaso tojjiano pa paniniutia nojuaja. <sup>13</sup> Naa Pueyaso jiyanooshacari pajaniya na muerasu pa quiniuriatej, cunora paari na sequesanoocua tiuquiaajuhua. Nojuacuajaari pa sequequiaari pa Pueyaso Cristoori pocua muetanutanihua, shacantuca na cumaacajinia. Naacuajitij, paari shuquiriaatia sashiya pa jyanoni. <sup>14</sup> Nojuajaari tama na cuaqueyajaaja panitiaquiaari pocuara, sesa pa jiiitishano casaacua na tarinitiniuria pajaniya. Pocuara cusoquiaariiri poojia sequejeequesano quiniuria puetunu sesa pa quiniujinijijianaa. Naa miiquiaariiri saaja tama na pueyarajaaja pa quiniuria, jiyanhua maninia miiniucua jiaatijaca pa quiniuriajuhua.

<sup>15</sup> Naa quia niishitiojore pueya Titonaa. Pueyaso pueya quia niishitiojore, quia shiniujiuri, quia nacasure. Naa quia cumaquiniuria nojoritij, quia cumaaca quia paaretare juhua cutara jiyaniija, tojishano pueyano quia quiniuria. Saaja maninia quia miiriquia pueyaracaanu, tamonu mariqui quia rerequetereeri.

## 3

### *Maninia rootasano Pueyaso pueyara*

<sup>1</sup> Quia pueya quia niishitiojorohua jiya jiyaniija tojjijica nojori quiniuria, jiyaniijanucua na jiyatesano pueya nojori tojiniuriajuhua. Nojori cuaara cuno pojori naacutaara jaara sequesaaare maninia casaa nojori miiniuria. <sup>2</sup> Pueya quia niishitiojore nojori cuaara pueya sesacaashijica quiriiajuhua. Nojori cuaara quiria juhuanjaniya quijica, maja

juaajiac. Cuaara quiiria jiyanoojiaca. Cuaara maninia niqiiiria puetunu pueyajanaa, juhua socua maninia pueya nojorijiniji, maja rimiajata na miiniuria tamasaca.

<sup>3</sup> Tariija, paari mariyata mosanucua quiquiaarini, Pueyaso tojiyashijiacanio. Paari juhua tashucua quiquiaarini, sapojosano pa quishacari. Paari sesa miiniucua jii-tiquiaarini. Majaari pa naata sesa pa miiniu tarinitianu quiquiaari. Paari pueyaracaanu shuquiriaatia quiniucua jiaatijaca quiquiaarini sesa pa niishishanota. Paari sesa miijiac quiquiaarini. Paari tamasaca jiiitiasanoocua jiaatijaca quiquiaarini, juhua nojori pa quiniuriajuhuaj. Paari pueya soosano quiijaca quiquiaarini. Paari niqutitiojuaca quiaquiquiaarini. <sup>4</sup> Naajaa, pa Jiyanoojia Pueyaso cutaraari maninia miiquiaari paja-niya. Naacujitij, paari niishitishaaquiaarini taa Pueyaso paniya puetunu pueyajanaani, na jiyaronuucua Neyanuniyojua pocuara na cusonura. <sup>5</sup> Na muerasura pa jiyatequiaariiri saaja pocua na taraajesacari, maninia miyashijia pa quishacariija. Sesa miyashijiacara na Sohuanuta pa jataniquiaariiri, na Sohuanu jeequesacari poojia, maninia jiuujiaraca pa quiniuria. Pueyaso Sohuanuuri pa jataniquiaa juhua quiarinio pueya pa quini-uria. <sup>6</sup> Pocuaji Tacuna Jesucristo miiniucua maninia, Pueyasoori jiyanojua queraatia na Sohuanu niqutitioquiaari pajaaniya. Juhua pocua totasaareeri na Sohuanu. Maja shiitianiyojua quenaaja. <sup>7</sup> Naacujitij, pa jiyatereeri maninia quiijaca pa quiniuria na jiyanooshacari pajaaniya. Naa pa jiyatequiaariiri na muerasu pa quiniuria, pa masenura puetunu na jiiitiasanojuanaa puera, jiyocuacaanu na racatasano. Naaratej, paari juhua-janiya sashiquiaani, pa niishishacari paari pueyaracaanu quiijaca quiniutianiya natani.

<sup>8</sup> Nio cua sequesanoori seetanu rupaajanaa. Nio rupaata quia nacasure Pueyaso tojitiijaca puetunu quiojiiatajanaa, nojori cuaara niishiriojora, maninia nojori miini-uria pueyaracaanu. Nio rootasanoori jiyanojua maninia. Maninia cutaraari puetunu pueya cumaquitiatarajanaa. <sup>9</sup> Maja cutaraari quia rupeenu cuno pueya, noo pojori canapute najuhuaana nacojoquiaani, naajuhuj, noo pojori canapute pueyaracaanu na supuetanaa sesaca serojoquiaa najuhuanani, juhua pueya shocotajaca nojori quini-uria. Naajuhuj, maja quia rupeenu noo pojori canapute juaatitioquiaani, canapute tariucuaacuano Moisés Rootasanoocua juayonuutaquiaacuajani. Puetunu cuno nojori niishishanojuanaari najuhuanaj. Majaari na naacunu nojori.

<sup>10</sup> Quia piriyojore cuno, cante Pueyaso muerasu maanu raquirijitiaani, capa na niishi-tiojosanota najuhuanaj. Nojuaja jaara quia tojiyaquiri coteenu quia sequesacari nojuaja, quiocua socua na camiriohua piriyojonu. Jaara tojiyaquiri quiajaniya jiyacaritij, nojuaja cuaara quiiriaqui juhua taanusano. <sup>11</sup> Naa na tojiyaquishacari quiajaniyatej, quiocua niishiri cuno pueyano tari seseree. Tama sesa na miishanojuaarijia juhua nocuara saquiriojataa.

*Pablo sequesano Titora*

<sup>12</sup> Janiya jaara Artemas jiyarore quiocuani, jiyanojua quia saniniujiuri cucua quia niniuria Nicópolis tiacajinia. Janiyari quiniqui shuniya tajitiniu paniyani. Janiya jaara Artemas jiyaroyaquiri quiocuani, janiyari Tiquico jiyaronutaniya quiocuani. <sup>13</sup> Zenas, Apoloori quiocua tiuquiniutianiya. Nojori quia naacutare quia jiiitiasanota, nojori jiiitia-nura puetunu na panishanojuanaa nojori quianu panishacari quia quiijajiniji. Zenasri pueyacuaji tacuna pueya nequesoreenaa.

<sup>14</sup> Parta Pueyaso muerasu cuaara niishiiria maninia miijiac nojori quiniuriajuhuaj, maja najuhua quiijaca na quiniuria. Maninia cutaraari nojori naacutanura na panis-hano jiiitaaashijiac.

*Naajione sequesacari saruhuatasano*

<sup>15</sup> Puetunu cuata quiniaajanaari cua sequeya cua saruhuatanura quiajaniya. Canaara quia sarhuatere parta Pueyaso muerasujuhuj, canapute canaa panijiacacuajani. Pueyaso cuaara cumaquiiria puetunu niajaniyajanaa. Cuaara naa quiiriatej. Tariucujaja Titonaa.

## PABLO NAAJIONEE FILEMÓN CUARA

### *Pablo saruhuatascari Filemón*

<sup>1</sup> ¿Quiaate quiyajaa canaa panishano Filemónnaa? Janiyari Pablóni. Quiasano pueyanonijia, Jesucristojiniji cua pohuatanuucua. Janiyari parta Pueyaso pueyano Timoteota nio naajiya quiarani, jaarajaaja pa Jiyaniijiaara poonijiona quia quiniuucua. <sup>2</sup> Canaara quia saruhuatatare pa rimiatucua Apia, Arquiponio, jaarajaaja pa Jiyaniijiajiniji pohuatanani. Canaara quia saruhuatatarejuhua parta Pueyaso pueya maanu, noo pojori, quia tiajinia rerejoquiaa Pueyaso secojonuunuratej. <sup>3</sup> Pa Que Pueyaso, pa Jiyaniijia Jesucristonio, nojori cuara cumaquiiria nijaniya, jiyanoojiaa nojori quiniuucua. Nojori cuara cajitiiria nioojiajuhuaj, juhuajaniya nia quiniuria.

### *Filemón paniniujiniji pohuatasano, Pueyasoocua na tiuuniujinijina*

<sup>4</sup> Pueyaso cua secojosacari, janiyari quia seera pueyaracaanu Pueyaso sequequiaani, “paacarasho”. <sup>5</sup> Janiyari naa sequequiaa Pueyasoni, quiajanijianiji cua tojinuucua taa quia paniquiaa pa Jiyaniijia Jesuni, puetunu na pueyajanaano. Quiaanaari seetanujanaa pa Jiyaniijiaacua tiuujia. Janiyari cunora quia timitiaani. <sup>6</sup> Janiyari quiocuara secojoquiaani, seetanujanaa quiarta Pueyaso pueya jiyanoojia quia quiniuria, nojoriicua quia taraajenura. Naacujitij, nojori quia cumaquishacari, quiaari maatia niishiniutianiya puetunu quioojiajinia quia jiiitiasanojuanaa Jesucristojiniji, Jesucristoocua tiuujia quia quiniuucua. <sup>7</sup> Parta Pueyaso pueya panijia quia quiniuucua, quiaanaari nojori cumanijiacanu, nojoriicua quia taraajesacari. Naa cua niishishacari quia miishanojinijitij, janiyari coojia cumanijiacanujuhuj. Cunora, shuquiriaatia quiyaniija.

### *Pablo sequesacari Filemón, nojuaja jiyanooniuhuaa tama na seru Onésimojuaja*

<sup>8</sup> Jesucristo jiyaramiquishano pueyano cua quiniuucua, cua naata sequenu quiajanija quia miiniuria cua sequesano. <sup>9</sup> Naajaa, majaari cua sequenu paniniu quiajanija juhua quia jiyaniija. Saniniuujia, panijia quia quiniuucua, janiyari quia sequenu paniyani quia miiniuria nio cua sequesano quiarijia. Jesucristojiniji cua pohuatanuucua, janiyari quiarijia moronucua quiyani tariucua saaquiano. Naajaa, quia rupena Pablo cua quiniuucua, cua tojiri Filemónnaa. <sup>10</sup> Cucua quia taraajere quenaaja. Quia nenecojiyanijia cua niyanunijojua Onésimoocua. Nojuajaari seetanujanaa juhua quianura quiriucuaa Jesucristoocua na tiuuniuucua, na tojishacari cua pohuatasano Jesucristojiniji, moronucua cua quishacari.

<sup>11</sup> Tariija, Onésimoori sesa seru quiquiaari quiara. Quiarijia saniniuujia, nojuajaari na naata maninia quiniu quiara, taa quiria na quiyacuaani. <sup>12</sup> Janiyari quiarijia quioocua jiyaroya quianuni. Quiocua na maserohua quia timiniutia, taa quia masequiaa janiyacuaani. <sup>13</sup> Moronucua cua quishacari Jesucristo rupaa cua pohuatanuucua, janiyari niyaja na jiyojetenu paniriquiaa juucuan, na naacunura janiya quia niti. <sup>14</sup> Naajaa, majaari naa cua miiniu paniniu quiriquiaa jiyasohuaa, coteenu cua nequesotaaquishacari quiajanija. Janiya jaara quia sequereni janiya niya na jiiitianutianiya na naacunura janiyani, quiaa maara cua ruuretaaquiri. Naajaa, janiyari seetanujanaa saaja quia panishano miiniu paniyani. Cunora, janiyari na jiyaroya quiocuan. <sup>15</sup> Onésimo jiyoteeri quioquaji rupatecanu rupaquiraja, quiarijia quiara na quiniuhuaa pueyaracaanu cutara. <sup>16</sup> Quiarijiani, nojuaja naasucuaari socua quia panishano pueyano quiniutianiya serujiniji, seetanujanaa quia tarajanu na quiniuucua quiarijiani, Jesuucua tiuujia na quishacarijuhuaj. Nojuajaari jiyanohua cua panishano parta Pueyaso pueyano. Naajaa, quiaa cuara jyanohua na panijia quiiiria socua janiyajiniji, maja juhua nareja quia panishano seru. Seetanujanaa nojuaja quia paniri cutara, quiarta Pueyaso pueyano na quiniuucua.

<sup>17</sup> Naacujitij, janiya jaara seetanujanaa quiarta Pueyaso pueyano quiri quiarani, Onésimo tiuquishacari quioocua, nojuaja quia miiri maninia, taa quia miiquiaacuaa janiyani. <sup>18</sup> Onésimo jaara sesa miiquiaari quiajanija, jaara quia casaa nohuasequiaarijuhuaj, nojuaja quia jyanoori. Saniniuujia cucua quia tiuutiare puetunu sesa na miishanojuanaa quiajanija. <sup>19</sup> Janiyacua saniniuujia cua cumanecajiniji quia niqutioreni puetunu sesa na miishanojinijijianaa quiajanija. Janiyari Pablóni. Janiyari tama cua juaashiquiatajaaja nio naajiyan, cua sequesanoocua quia tiuuniuria. Janiyari quia niishitiniu panijajuhuj, Jesucristojiniji cua pohuatasanoocua quia tiushacari, quiaacuajaari pueyaracaanu quijiaa jatanishaaquiaari. Naacujitij, cua naata sequenu quiajanija, cua serura quia quiniuriajuhuaj. Naajaa, janiyari saaja quia sequenyani Onésimoocua



quia taraajenura. <sup>20</sup> Naa quiria quia miiri quenaaja, mariyata Jesuucua tiuujiaa pa quiniuucua, cua panishano Filemónnaa. Quiaa jaara Onésimo jiyanoori, Cristo panijia quia quiniuucua, quiaari seetanujuanaa coojia cumanijianutaniya.

<sup>21</sup> Janiyari naa quiocuara naajiyani, cua niishishacari quiaacuaajaari cua sequesano miiniutianiya. Janiyari niishiyajaaniuhuj, quiaari socua maninia na miiniutianiya cua sequesanojiniji. <sup>22</sup> Naajuhuj, janiyari juhuacarijia quia sequeyani, cua maquejara quia jeenucuare cucuaji quia tiajinia. Naa pueyaracaanu cucuara nia secojosacari Pueyaso niiquiji cua cartesaanuratej, nojuajaruhua niaacua cua tiuquitiniutianiya, niaata cua quiniuria.

*Pablo sequesano na naajio na tucuatasaari*

<sup>23</sup> Epafraasi cua sequeree cua saruhuatanura nijaniya. Nojuajaari cuarta moronucua-juhuj, Jesucristojiniji canaa pohuatanuucua. <sup>24</sup> Jaarajaaja cuata Jesucristojiniji pohu-  
atanaa pueyari nia saruhuataajuhuj. Nojoriiri Marco, Aristarco, Demas, Lucasnio.

<sup>25</sup> Pa Jiyaniijia Jesucristo cuaara cumaquiiria nijaniya.

## HEBREO PUEYACUARA NAAJIONEE

*Pueyasoori pajaniyara na rupaa pohuataniquiaari Neyanujiniji*

<sup>1</sup> Tariucuacaanu, Pueyasoori pueyaracaanu na sequenu panishano caminiujiuniaa pueya poojotaniquiaari pa supuetanaara. Nojuajaari nojuajiniji caminiujiuniaa miijitequiaari queraatia tamaatia casaa, nojori na niishitiniuria casaa nojuaja sequenu paniriquiaa nojorini. <sup>2</sup> Quiari naataja saniniuujia, Pueyasoori tama Neyanujuaaja pohuataniquiaari na sequenu panishano pajaniyara. Nio Neyanu shipinitiquiaari puetunu casaajanaacuajaari; nio jiya, jiya cajiniocuajuhua, puetunu pa niqiyaquishoo casaajanaano. Naajuhua, Pueyasoori Neyanu jiyatequiaari puetunu tama na shipinishanojuanaa jitianaa quiriquiano. <sup>3</sup> Neyanuuri tojetaarucujanaa maninia, juhua na Quejuhua, juhua na Que niquishanojuhua. Naacujitij, nojuajaari jiyanohua shacantuuca cumaacaracajuhua. Naacujitij, nojuajaari puetunu na shipinijosano casaajanaa rucuanetequiaa maninia, saa na rupaa cumaacataja. Nojuaja jaara cusoquiaari puetunu sesa pa miishanojuanaa na tuujunura, na nuhuaji, jiyocuacaanu tacaquiaarihuuari, na Que Pueyaso miaquetajara na cajiniuria Jiyaniijajanaa quiquiojinia.

*Pueyaso Niyanuuri Jiyaniijajanaa cutara Pueyaso seyajiniji*

<sup>4</sup> Naacujitij, Pueyaso Niyanuuri Jiyaniijajanaa quiquiaari Pueyaso seyajiniji. Nojuajaari na Que sesaanucua. <sup>5</sup> ¿Pueyasoteeri quenaaja tamono na seyajinijinio sequequiaari: “Nioori cua Niyanu”? ¡Maja! Neyanu sequequiaari cutaraari:

“Quiaari quiyanu. Janiyari pueyanora quia muerateree jiyacuani, cua saquiriojosano pueya Jiyaniijia quia quiniuria”.

Neyanujiniji sequequiaarihuuarihuaj:

“Nera, janiyari na Queni. Quiria saniniuujia, nojuajaari quiyanu”.

Pueyasoori maja quenaaja niquiriyatu na seyajinijinio naa na sequenu quiquiaari.

<sup>6</sup> Tariucuacaanu Pueyaso Rupaajinia, naa naajiotasaquiaari casaa Pueyaso sequenutaniyani, Neyanu na tiuquitishacariuhua mijiria, Jiyaniijajanaa na quiniuria:

“Puetunu cua seyajanaa cuaara Quiyanu tojtiaara, Jiyaniijajanaa na quiniucua”.

<sup>7</sup> Pueyaso seyajiniji saniniuujia, naa naajiotasano quiyari tariucuacaanu Pueyaso Rupaajinia:

“Pueyasoori na seya jataniquiaa juhua paratura, juhua maniriano, na panishano nojori miiniuria”.

<sup>8</sup> Neyanu sequeya saniniuurijia:

“Quiyanunaa, quiaacuajaari Pueyasojuhuanajaj. Quiaari Jiyaniijia. Quiaari naa quiniutianiya pueyaracaanutej. Quiaari cumaacaracajuhua, maninia quia jitianura puetunu pueyajanaa. <sup>9</sup> Quiaari maninia miiniu porocua. Quiaari sesa miiniu soojea saniniuujia. Cunora, Pueyasonaa, janiyari quia jiyatequiaari Jiyaniijajanaa quia quiniuriani, quia Jiyaniijia cua quiniucua. Janiyari quia jiyatequiaarijuhua socua shuquiriaatia quijia quia quiniuria puetunu quia cojiniaajinjijianaa”.

<sup>10</sup> Pueyasoori naa sequequiaari Neyanujuhua:

“Jiyaniijianaa, quiaacuajaari coteenujanaa casaa shipinijia. Quiaari jiya shipiniquiaari, puetunu jiya cajiniocua niquishano casaajanaano. <sup>11</sup> Puetunu quia shipinishanojuanaari shaajeriquianohua. Quiajaniya saniniuujia, quiaari pueyaracaanu quiriquiano cutara. Puetunu quia shipinishano casaajanaari tariucuashiriquiano juhua toqueja. <sup>12</sup> Naa na tariucuashishacaritij, quiaari juhua toque mocua na jiu-niocoriguiano, quia jatasocoriguiano. Quiaari naa miiniutianiyaquij taa pueyano jocuaquiaacuaa na toque mocuacuaani, quiariqui toque na cushiniuria saniniuujia. Quiajaniya saniniuujia, majaari quia jatanu quiniutianiya tamaatiara. Quia quiniuuri maja puequeriquiano”.

<sup>13</sup> Pueyasoori Neyanu sequequiaarihuuarihuaj:

“Miji, cua miaquetajara quia cajishii, janiya jaara quia paraa shocojotare puetunujuanaajaatijia, maja quenaaja niquiriyatu curenura na miananajonura quiajaniya”.

Majaari naa Pueyaso sequenu quiquiaari quenaaja niquiriyatu na seyajinijinio.

<sup>14</sup> Puetunu nojorijianaacuajaari Pueyasora poonijionaa. Pueyasoori nojori jiyaramiquiquiaa Jesuucua tiuriquiano pueya nojori cojuanura.

## 2

*Maja cumaati Jesucristo tojyashijacara pa quiniu*

<sup>1</sup> Naaratej, Jesucristojiniji pa tojishano tojjiaca pa quiriqia socua, paa mariqui Pueya-soocuai rupatereeri. <sup>2</sup> Tariucuacaanu, Pueyaso seya caminiujuushano Pueyaso rootasano pueyarani, cuno rootasanoori seetanujuanaa pueya tojishocoriqiano cutara. Cuno rootasano ruuretajaca, na miyashijiacajuhua, nojoriiri saniitiosaaquiaari. <sup>3</sup> Pueyaso seya caminiujuushano tojyashijiaa jaara saniitiosaaquiaaricuaa, ¿paateeri jiyaniyani Pueyaso pa jiyanoonutianiya juhuajaniya Neyanu rupaa tojyashijiaa pa quishacari? ¡Maja! Cuno rupaa nocua pa tiuushano pa jiyanooshaanurani, cunoori pa Jiyaniijajanaa pohuatasano. Pa Jiyaniijia nuhuaji, cuno pojori, canapuet pa Jiyaniijajanaa tojiquiaari pueyaracaanuni, nojoriiri saniniuujia cuno rupaa caminiujuquiaari pajaniyara. Canaa sequetuquiaariiri nojori tojishanoori seetanu rupajanaa. <sup>4</sup> Naajuhua, nojori pohuatasacari Jesucristojiniji, Pueyasoori nojori miitiquiaari jiyajeneta casaa jyanohua na cumaacata, maatia pueya niishiniuria nojori pohuatasanoori seetanujuanaa. Pueyari cunora jyanohua shiriqitiquiaari queraatia Pueyaso cumaacata miishano nojori niquishacari. Naajuhua, Pueyasoori Jesuucua tiuujiaca niqitioquiaa na Sohanu, tamaatia pa miiniuria na cumaacata, taa na paniyacuajani. Cunora, paa cumaa ti seetanujuanaa Pueyaso rupaa Jesucristojiniji tojtijajaca quiyani.

*Jesucristo mijiria rasaanquiaari pa puerana na quiniuria*

<sup>5</sup> Cuno quiarinio jiyaranojiniji teyano pa sequeriquiaacuajani, Pueyasoori maja na seya na jiyatenu quiquiaari cuno quiarinio jiya jiyaniijanucuarano nojori quiniuria. <sup>6</sup> Naajaa, tariucuacaanu Pueyaso Rupajinia naa naajiotasaaquiaariiri pueyano nequesotasano Pueyaso:

“Pueyasonaa, ¿casaateeri pueyanoni, nocua quia niishiriojonurani? ¿Casaara quia taraajeya pueyacuan? <sup>7</sup> Quiaacuajari na shipiniquiaari rupaquijiaa socua cumaacaju na quiniuria quia seyajiniji. Naajaa, quiaari na jiyatequiaari jiyaniijia na quiniuria, cumaacaraca quijia na quiniurijuhua. <sup>8</sup> Quiaari na sequequiaari puetunu quia shipinishano casaajanaa jiyaniijia na quiniuria”.

Naa Pueyaso sequesacari pueyanotej, puetunu na shipinishano casaajanaa jiyaniijia na quiniuriatej, naacuajitij, majaari quenaaja niquiriyatu casaa cureenu quiniutianiya na jitiasoo. Saniniuujia, paacuajari niishiyani, pueyanoori juhuanouaja maja seetanujuanaa cumaacaraca na quini puetunu casaajanaa na tojtiniuria tama nojuajaaja. <sup>9</sup> ¿Jesuurijataj? Pueyano na quiniuria, na Que Pueyasoori rupaquijiaa na miiquiaari socua cumaacaju na quiniuria na seyajiniji. Naacuajitij, pueyano na quishacari, Pueyaso taraajenuucua puetunu pueyacuajanaa, Neyanuuri mosaaquiaari pocuara. Naa na cusonuucua pocuaratej, Pueyasoori na jiyatequiaari Jiyaniijajanaa na quiniuria, jyanohua cumaacaraca na quiniurijuhua.

<sup>10</sup> Jamueyashijia Pueyaso quiniuucua, nojuajaari puetunu na muerasuranujuanaa panitiquiaari na cojiniaa nojori quiniuria. Paniquiaariiri jatiqiu nata shuquiriaatia pa quiniuria, puetunu tama nerajaaja na shipinishano casaatjanaajuhua. Jeenucasano pa quiniuria pa cojinuria Pueyaso, nojuajaari jyanohua maninia miiquiaari pocuara, Neyanu na miitishacari naquiya pa niti. Naacuajitij, Neyanuuri tojetaarucujajanaa maninia quiquiaari Pueyaso muerasuranocuai Tacuna na quiniuria. <sup>11</sup> Jesucristo jeequenuucua pajaniya sesa pa miishanojiniji, jatanishano pueya pa quiniuria, paari cunora seetanujuanaa Pueyaso muerasuni. Naacuajitij, Pueyasoori pa Que, taa pocuaji Tacuna Que na quiyacuani. Cunora, Jesucristoori maja na carriquinu na Que na sequenura pajaniyajiniji, “cua tapueyocucata”. <sup>12</sup> Tariucuacaanu Pueyaso Rupajinia naa naajiotasano quiyacuajari na sequesano na Que:

“Cua Quena, janiyari cua tapueyocuca pohuatanutaniyani taamuecate quiajaniyani. Janiyari quia saquiriojosano pueya niqiara quia jaaquequejotanutaniyani cua shuquiritasacari quiajaniya”.

<sup>13</sup> Tamaqui, Jesu sequesanoori naa naajiotasano quiyajuhua:

“Janiyari cua Queecua tiuuja quiniutianiyani”.

Naacuajitij, mijiria na quishacari, Jesuuri na Que Pueyasoocua tiuquiaricuaa taa pa tiuquiaa nocuanijia. Socua naa naajiotasano quiyari tamaqui taa Jesu sequenutaniyani, jiyocuaanu na tiuquitasacari pajaniya na shuquiriniutia:

“Nio pojoriiri cua Que jiyatesano cua tapueyocucara, nojori tojtianuucua janiya”.

<sup>14</sup> Cuaqueyaraca pa quiniuucua, Sesaacari cumaacaraca quiquiaari na shaajanura pajaniya, Pueyaso tojtiaashijiaa pa quiniuucua. Naaratej, Jesuuri cuaqueyaraca na quiniuria jataquiaarijuhuaj, taa pajaniyacuani. Naacuajitij, nojuajaari na naata mosaanu quiquiaari pa niti. Naacuajitij, nojuajaari Sesaaca jaariuutiaquiaari pajaniya. <sup>15</sup> Naacuajitij, nojuajaari juhuajaniya quijiacara jiyatequiaari pajaniya, nocua pa tiuuniuucua. Paari niishiyacuajani, pa cusosacari, paari pa Jiyaniijata quiniuria quianutaniyani.

Cunora, majaari tari pa puerenu pa cusonura. Nocua tiuyashijiaca pueyari seetanujuanaa cusonu puerejaca cutara. <sup>16</sup> Seetanujuanaa, majaari Jesucristo niniu quiquiaari Pueyaso seya na naacunura. Niquiaari cutaraari pueyacuaji na tacunura, noo pojoriicua, nocua tiuujacate taa supuetana Abraham quiquiaari Pueyasocua tiuujacuaani. <sup>17</sup> Maninia pa naacuna na quiniuria, Jesucristoori puetunu naquiya miiniujuanaa rejeretaquiaari mariyata taa narta pueya miishaquiaacuaani. Naacujitij, nojuajaari pocua taraajeja, pocuaji na tacunura Pueyaso. Taraatia pa miiniu niishijia na quiniucua, pa naata nocua tiuuni pueyaracaanu na Que Pueyaso na jyanootiniuria pajaniya, sesa pa miishanojiniji. Na cusonuucua, naacuajiti Pueyasoori na naata pa jyanooniu puetunu sesa pa miishanojinijianaa. <sup>18</sup> Mijiria na quishacari, nojuajaari pueyaracaanu taraatia miishaquiaari. Nojuajaari jyanohua saniniuujushaaquiaari sesa na miiniuria juucujuhua. Naacuajitij, nojuacuajaari jyanohua niishijia na cumaquiniuria pajaniya, paa jaara sesa miiniuria saniniuujushaariquiani, paa jaara taraatia miishaariquajuhua.

### 3

#### *Jesucristo cutaraari Jiyaniijijanaa Moisésjiniji*

<sup>1</sup> Cuarta Pueyaso pueyanaa, niaacuajaari Pueyaso saquiriojosano tama na pueyajaaja nia quiniuria. Nojuajaari Neyanu Jesu jiyaroquiaari na rupaa na niishitiniuria pajaniya, Pueyaso pueyara pa jatanishaanura. Neyanuuri na jyanootijia pajaniya, nocua pa tiushacari. Cunora, jacaria pa niishiriojore socua Jesucristojiniji. <sup>2</sup> Mijiria na quishacari, Jesuuri na Jiyarona tojjijia quiquiaari pueyaracaanu, taa Moisés quiquiaari Pueyaso tojjijiacuaani, Israel pueya jiiñana na quishacari. <sup>3</sup> Naajaa, Jesucristo cutaraari Jiyaniijijanaa Moisésjiniji. Moisésri saaja narta Pueyaso pueyajinijinio pueyano quiquiaari. Saniniuujia, Jesucristoori puetunu Pueyaso pueyajanaa shipininia cutara. Naaratej, Jesucristo cuara tojishaaria socua cutara. <sup>4</sup> Puetunu pueyapuejanaari supuetanaaraca. Naajaa, Pueyasajuanaari nojori shipininia seetanujuanaa. <sup>5</sup> Naacuajitij, Moisésri pueyaracaanu Pueyaso sequesano caminiuujiquiaari Pueyaso saquiriojosano narta Pueyaso pueyara, maninia Pueyaso seru na quiniucua. <sup>6</sup> Saniniuujia, Jesucristoori Pueyaso Niyanujuanaa cutara. Nojuajaari Pueyaso saquiriojosano pueya Jiyaniijijanaa. Nojuajaari nojori jiiñia saa maninijaa, taa na Que paniyacuajani. Naaratej, majaari pa cartenu Jesucristo rupaa. Paa jaara Jesucristocua tiuquuaani, naajuhua, paa jaara shuquiriaatia na sashiquiaa na rionura pajaniyani, naacuajitij, paari niishiyani paari seetanujuanaa Pueyaso muerasuni.

#### *Pueyasoori na pueya samaraataja*

<sup>7</sup> Pueyaso pueya pa quishacari, Pueyaso Sohanu sequesano pa tojiri, maja pa rupatenura Pueyaso Rupaacuaji. Na sequesanoori naa naajiotasano quiaa tariucuacaanu Pueyaso Rupaajinia pajaniyarajuhua:

“Pueyanaa, niaa jaara quiarjia tojiriquia Pueyaso sequesano nijaniya, majaari na sequesano ruuretajaca nia quiniu. <sup>8</sup> Majaari naa nia quiniu taa nia supuetanaa quiquiaaricuaani, cariquia jiyajinia nojori camarucuneejotasacari pueyaracaanu. Nojoriiri Pueyaso juaatijiojuaca quiquiaari, pueyaracaanu na tojiyashijiaa nojori quishacari. <sup>9</sup> Nojoricuajaari pueyaracaanu cua cumaacata cua miijosano niquitiquiaari. Cuarenta marijaari shocojoquiaari, pueyaracaanu jiyajeneta casaa cua miijosacari cua cumaacata, maninia cua jiiñiasacari nojori. Naajaa, nia supuetanaari cua juaatijioquiaari, pueyaracaanu nojori taacanusacari cucuaji. <sup>10</sup> Janiyari cunora seetanujuanaa juaaquiaari puetunu cuno pojoritajanaani. Naaratej, janiyari sequequiaarini: ‘Nojoriiri juhua cucuaji tashuquioono rucoojia tamajaaja. Nojoriiri cua niishitiojosano ruuretaquiaa saaja’. <sup>11</sup> Janiyari cunora jyanohua cua juaaniutia naa sequequiaarini: ‘Majaari nojori rupenu quiniutianiya janiya, shuquiriaatia cua quishaqui, cua samaraatanura nojori, pueyaracaanu shuquiriaatia quiijaca nojori quiniuria cuata’ ”.

<sup>12</sup> Naarate cuarta Pueyaso pueyanaa, tama nia cuaqueyajaaja nia cojuare jyanohua, niaa mariqui Pueyaso Rupaacua tiuyashijiacara quirohuari, Pueyasocuaaji nia rupatenura puetunujuanaa. Pa Pueyasocuaajaari quijijuhuanajaj. Nojuajaari na tojiyashijiacaa sanitiojua. <sup>13</sup> Cunora, seetanujuanaa Pueyaso Rupaa tojtiaajaca nia quiniuria, puetunu juucajanaa nia shiniuujitiooriquia pueyaracaanu. Naa nia miiriquia nio pa quishacari Pueyaso jyanooniu puequeyaquishacarijaa taa na Rupaa sequeyacuajani. Naa nia shiniuujitiooriquiatej nia jiiñiaquiniucuaaji sesa miiniuria. Saniniuujia, niaa jaara sesa miijiacaa quiriquia, tama sesa nia miiniujaarjia nia sapojonutaniya Pueyaso tojiyashijiacara nia jatanuhua. <sup>14</sup> Jesucristocua pa tiuuniucua, paari na cojiniara jiyatesanoni. Naacuajitij, puetunu na jiiñiasanojuanaa puera quiriqianojuhua, paa

jaara nocua tiuquuaa pueyaracaanuni, taa shushajanaa seetanujuanaa nocua tiuujiaca pa quiriquiaacuajani.

<sup>15</sup> Cunora, naa naajiotasano quiyari tariucuacaanu Pueyaso Rupaajinia: “Pueyanaa, niaa jaara quiarijia tojiriquia Pueyaso sequesano niajaniya, majaari na sequesano rejetejaca nia quiniu, taa nia supuetanaa quiquiaaricuaani. Nojoriiri Pueyaso juaatijiojuaca quiquiaari, pueyaracaanu na tojitiaashijaca nojori quishacari”.

<sup>16</sup> ¿Canaputeeri cuno pojorini, Pueyaso tojitiaashijiacani? ¿Secaja pueyatee? Maja. Puetunu noo pojoricuajaari Egipto jiyajiniji Moisés mashiquishano pueyatej. Nojorijianaacuajaari Pueyaso tojiqiaaari pocuaano. Naajaa, nojoriiri saaja na ruuretajaca quiquiaari. <sup>17</sup> Nia niishiritioj, ¿canapute cuno pojorini, Pueyaso juaatijiojuaarini, pueyaracaanu nojori camarucuneejotasacari cariiquia jiyajiniani? Noo pojoricuajani sesa miijiacatej. Nojoriiri cunora cusonuquuaari nojori quiojosacari nucuaco cariiquia jiyaco. Na cusonuusaquijia jamojosaaquiariri. <sup>18</sup> Nia niishirijihuaaj, ¿canapue naa Pueyaso sequequiaari seetanujuanaa na juaaniutiani: “Majaari nia tiuquitianu quiniutianiya niaarano cua niqution panishano jiyajinia, tii juhuajaniya shuquiriaatia nia quiniuria cuata”? Puetunu Pueyaso tojitiaashijiacajanaacuajaari naa sequesaaquiaritij. <sup>19</sup> Naacuajitij, paacuajaari quiarijia maatia niishiyani, Pueyasocua tiuyashijaca nojori quiniucua, majaari nojori tiuquitianu quiquiaari Pueyaso niqutionu panishano jiyajinia.

#### 4

<sup>1</sup> Pueyasocuaajaari pa masuyajaa panaatia pa quiniuria nata. Cunora, jiyanohua pa cojuare tama pa cuaqueyajaaja Pueyaso sequesanoocua pa tiuuniuria, tamonu pajaniyajinijinio mariqui jiyanoyaquishaareeri. Na sequesanoocua tiuyashijiacari maja na rupenu quiniutianiya Pueyaso, shuquiriaatia na quiniuria Pueyasota. <sup>2</sup> Pueyaso rupaacuajaari tari pa niqiara pohuatasaaquiarijihuaaj, nocua pa tiuuniuria, taa pa supuetanaa niqiara na pohuatasaaquiaricuaani. Nojoriiri Pueyaso rupaa tojiqiaaari najuhuanaj. Majaari nocua na tiuutiunu quiquiaari. <sup>3</sup> Cunora, Pueyasoori pa supuetanaajiniji naa sequequiaari:

“Cua sequesanoocua nojori tiuyaquiniucua, janiyari cunora seetanujuanaa naa sequequiaari cua juaaniutiani: ‘Majaari nojori tiuquitianu quiniutianiya cua niqutionu panishano jiyajinia, cuata nojori quiniuria shuquiriaatia’ ”.

Pajaniya saniniuujia, Jesuucua tiuujiaca pa quiniucua, paa cutaraari panaatia quijiacara jatanishanoni, pueyaracaanu Pueyaso rupuejaca pa quiniuria. Pueyasoori naajuhuaaj: jiya shipininiu na tucuatanu nuhuaji, nojuajaari panaatia quiya. <sup>4</sup> Cunora, tamaqui tariucuacaanu Pueyaso Rupaajinia, naa naajiotasaaquiariri:

“Seis juucajinia Pueyaso tucuatatasacari puetunu na poonijiosanojuanaa, na nuhuaji nojuajaari séptimo juucajinia samaatequiaari”.

<sup>5</sup> Pueyaso sequesanoori tariucuacaanu na Rupaajinia naa pacutejosaquiaari naajiotanu: “Majaari cua tojitiaashijaca rupenu quiniutianiya janiya, panaatia nojori quiniuria cuata”.

<sup>6</sup> Naa sequesanojinijitij, maatia niishishiyari Pueyasoori pueya masuyajaa, nojori rupuenura nojuaja, panaatia nojori quiniuria nata. Noo pojori, coteenujuanaa Pueyaso Rupaa pohuatasaaquiaritij, nojoriiri maja panaatia quijiacara na jatanishaanu quiquiaari, Pueyaso tojitiaashijaca nojori quiniucua. <sup>7</sup> Naa Pueyaso panitianucua pueya, shuquiriaatia nojori quiniuria natajuhuaj, nojuajaari quiarijia masuyajaa pueya. Cunora, jiyanohua Moisés nuhuaji, Pueyasoori supuetana David naajiotaniquiaari pajaniyara saniniuujia. Naa sequeyari:

“Niaa jaara quiarijia tojiri Pueyaso rupaa, Pueyaso sequesano niaarano, majaari na ruuretanu”.

<sup>8</sup> Supuetana Moisés shaajenu nuhuaji, supuetana Josué cutaraari Israel pueya tiuquitianiquiaari nojoririano Pueyaso niqutionu panishano jiyajinia. Naajaa, nojori tiuquitiasacari cuno jiyajinia, majaari seetanujuanaa panaatia quijiacara nojori jatanishaanu quiquiaari. Cunoori quiquiaari Pueyasocua tiuyashijaca nojori quiniucuaquihuaj, taa nojori supuetanaa quiquiaaricuaani. Naacuajitij, cuno jiyajinia Josué tiuquitiasacari nojori, majaari panaatia quijiacara nojori jatanishaanu quiquiaari. Nojori jaara panaatia quijiacara tari jatanishano quiriquia, ¿Pueyasotucua casaara quiarijia pa masuriquiaja Jesuucua pa tiuuniuriani, seetanujuanaa panaatia quijiacara pa quiniuria natani?

<sup>9</sup> Naacuajitij, paacuajaari niishiyani, Pueyaso pueyaranoori panaatia quijiacara jatanishaanutaniya, shuquiriaatia pa quiniuria Pueyasota pueyaracaanu. <sup>10</sup> Naacuajitij, cante Jesucristoocua tiuujiani, nojuajaari panaatia quijiacara jatanishaanutaniya. Majaari socua na tacaaniu quiniutianiya taa tama na cuaqueyajaaja na jiyanootiutianiya Pueyasoni.

Naacuajitij, nojuajaari juhuajaniya quijia quiniutianiya, tarijia najuhuaana na poonijiosanojiniji, naatej, taa Pueyasojuanaa samaatequiaari na poonijionu nuhuajicuaani. <sup>11</sup> Naaratej, panaatia pa quiniuria Pueyasota, seetanujuanaa na Rupaa tojjiiacara pa quiriquia quiarijia. Naa na rupaa tojjiiaca pa quiri paa mariqui saniitiosaaereeri taa pa supuetanaa Israel pueya saniitiosaaquiaaricuaani, Pueyaso sequesano tojjiyashijiaa nojori quiniuucua.

<sup>12</sup> Pueyaso Rupaari samiitianijia, cumaacaracajaariuhua pueya jiuujiajinia na poonijionura. Pueyaso Rupaari jiyanoehua socua shamatucuaaja nijiniaquetucuaaja mueruujiniji. Nijiniaquetucuaaja mueruuri saaja na naata pa cuaqueya jiyatanu. Pueyaso Rupaa cutaraari pa sohuanu tohuariquijia, pa niishitijia tohuariquijianio. Na naata cuhatatanu poojiajinia jiyasohuaja pa niishiriojosano casaa, poojiajinia pa niishishoo casaanio. Naacuajitij, Pueyaso Rupaari poojiajinia sesa casaa pa niishiriojosano nequesoreeja, jiyasohuaja pa miiniu panishano poojiajinia pa niishiriojosanonio. <sup>13</sup> Puetunu Pueyaso shipinishano casaajanaani, majaari na cureenu quiniutianiya na nequesoreyaquishoo. Majaari quenaaja niquiriyatu jamaaniu quiniutianiya nocuaji, nequesoresoo na cureenura. Nojuacuajaari maatia niishiya puetunu pa miishanojuanaa, puetunu pa niishiriojosanojuanaanio.

#### *Jesujuanaari Pueyaso jyanootijia pueya*

<sup>14</sup> Pueyaso Niyanu Jesuni, nojuajaari na Que jyanootijia pajaniya. Nojuajaari jiya cajiniocua tohuariquiquiaari na Queecua na tiuquiniuria. Nojuajaari quiarijia tii pocuara secojija na Que. Naacuajitij, Jesucristoocua tiuujiaa pa quiniuucua, maja cumaati pa pishiniu nocuaji. Paacuajaari na muerasuniyojuani. <sup>15</sup> Jesu, Pueyaso pa jyanootijiani, nojuacuajaari pocua taraajenu niishijia paa jaara saniniuujushaariquia sesa pa miinuriani. Nojuacuajaari naa saniniuujushaariaarijuhua sesa na miiniuria juucua, naate taa pa saniniuujushaariaacuaani. Maja cutaraari sesa na miiniu quiquiaari quenaaja. <sup>16</sup> Cunora, pa jyanoojia Pueyaso pa rupueriquia pa puereyaquiniutia. Nojuacuajaari pa tojjiquiaa pa secojosacari nojuaja, na jyanooniuria pajaniya sesa pa miishanojiniji. Ritia pa cumaquiquiaajaariuhua, pa rejeretanura paa jaara sesa miiniuria saniniuujushaariquiani.

## 5

<sup>1</sup> Puetunu pueyacuara secojonaa jyaniiijajanaari pueyaracaanu narta pueyajinijinio saquiriojosano pueyano quiquiaa, taa Pueyaso niishitiquiaari supuetana Moisesucuaajani. Nojuajaari jiyatesaaquiaa pueyacuaji na tacunura Pueyaso. Naacuajitij, nojuajaari nareja pueya niqutiojosano Pueyasorano masejojua. Naajuhua, pueya jaara sesa miiri, pueyacuara secojonaari pueya seya nanaca shootequiaa, Pueyaso jyanooniuria nojori, sesa nojori miishanojiniji. <sup>2</sup> Pueyacuara secojona quiniuucua pueyanohuaj, nojuajaari sesa miijiajuhua. Naacuajitij, nojuajaari na naata narta pueyacuara taraajenu, sesa nojori miishacari, nojori niishiaquishacari maninia miiniuujuhua. <sup>3</sup> Naacuajitij, nojuajaari tama nocuarajaaja seya nanaca shootequiaa sesa na miiniuucua, taa na miiquiaacuaa narta pueyacuariani, sesa nojori miishacari. <sup>4</sup> Niaacuajaari niishiya, majaari quenaaja tamonu pueyano na naata tama na cuaqueyajaaja jiyatenu pueyacuara secojona na quiniuria. Pueyasojuanaacuajaari tamajaaja saquiriojojua na panishano pueyano, cuno pueyano quiniuria pueyacuara secojona. Pueyasocuaajaari naa saquiriojoquiaaricuaa Moises tarajanu Aaron, pueyacuara secojonaa jyaniiijia na quiniuria. <sup>5</sup> Naajuhua, Jesucristoori maja tama na cuaqueyajaaja na jiyatenu quiquiaari pueyacuara secojona na quiniuria, Pueyaso na jyanootiniuria pajaniya. Tama Pueyasojuaarjia na jiyatequiaari pueyacuara secojona na quiniuria. Nojuajanaacuajaari naa sequequiaari Jesu:

“Quiaari quianu. Janiyari pueyanora quia muerateree jiyacuanii cua saquiriojosano pueya Jyaniiijia quia quiniuria”.

<sup>6</sup> Pueyaso sequesanoori tamaqui tariucuaaanu na Rupaajinia naa naajiotasano quiyajuhua:

“Pueyaracaanu rishijia quia quiniuucua, quiaari pueyaracaanu pueyacuara secojoriquiano cutara, taa Melquisedeccuaani”.

<sup>7</sup> Naa pueyano na quishacari mijiriatej, Jesucristoori jyanohua saniniuujushaariaari. Naquiya na miyaquishaanuucuaaji juucua, nojuajaari na Que Pueyaso secojoquiaari jyanohua na nujuquenuta. Jyanohua martequiaariiri na Que na secojosacari, maja na mosaanura. Nojuajaari niishiquiaari na Que na naata nocua taraajenu, maja na mosaanura. Naajaa, na Que tojjia na quiniuucua, na Que sequequiaariiri: “Naajaa, quia miiri quia panishano cua Quena, taa quia panitiaquiaari miiniu janiyacuaajani”. Na Queeri na tojjiquiaari. <sup>8</sup> Jesucristoori seetanujuanaa Pueyaso Niyanu quiquiaari

mijiria na quishacarijuhuaj. Naajaa, na niishishacari nojuajaari jiyanoohua naquiya miishaanutaniya nojuaja jaara na Que tojiri, naajaa, nojuajaari saaja na tojiquiaari. <sup>9</sup> Naacuajitij, tojetaarucujanaa maninia miijia na quiniuucua, nojuajaari pueyacuaji Tacunara quiquiaari, puetunu na tojtiajacajanaa na jiyatenura pueyaracaanu rishijiacara. <sup>10</sup> Cunora, na Que Pueyasoori na jiyatequiaari pueyacuara secojona na quiniuria pueyaracaanu, juhua Melquisedec.

*Jiyanoohua puereetaari Jesu tojinu tarinitianu*

<sup>11</sup> Janiyari queraatia socua nia niishitiojonu paniya Jesucristojinijini, nia niishiniuria nojuajaari seetanujuanaa juhua Melquisedec. Cunoori puera jiyajeneta, maatia cua niishitiojonura niajaniya, juhua niishiyashijiacara nia quiniuuquiohua. Niaacuajaari tari niyajetarucuaa tariucuaaanu nia tojishano. <sup>12</sup> Tariucuaaanujiniji Pueyaso rupaa tojijiaa nia quiniuucua, ¿taateni? Naa mariqui na niishitiojonuujuaca quiquiaari tari. Saniniuujia, niaari quiarijia paniya socua nia niishitiojosaanuhuaa maatia niishishaatia casaa Pueyasojiniji. Naaari juhua naatujooriria quiriohuacuaa, juhua shipiyataaquishoojua. Naacuajitij, majaari nia naata jiyajeneta niishitiojosano casaa niishiniu. <sup>13</sup> Naa maatia niishitiojosano niishijiaa nia quishacari saajatej, niaari juhua conaaja quiyajaa, saaja quiitiaacuaa naata. Majaari Jesucristo niishitiojosano tojtiajaca nia quiniu, maninia miijiaa nia quiniuria. <sup>14</sup> Juhua tariucua mashiquioriria nia jiyateriquiani. Mashiquiori cutaraari puetunu casaajanaa miaquenujuaca. Naajuhuj, puetunu Jesucristo niishitiojosanojuanaa niishijiaa nia quiquiaari. Naa jaara na niishitiojosano tojijiaa quiquiaari, saaja maninia miijiaa nia quiniuria, niaari maninia niishiniutianiya teyano casaate maniniani, teyano casaate sesa saniniunijia.

## 6

<sup>1</sup> Naacuajitij, majaari juhua naatujoori nia quiniu pueyaracaanu. Seetanujuanaa socua Pueyaso rupaa tojtiajaca nia quiquiaari, juhua tariucua cumantumaca mashaja nia quiniuria, cumueeca. Niaacuajaari tari coteenujanaa Jesucristojiniji niishitiojosano niishijiaa. ¿Niaatucua casaara socua niishitiojosaarohua nioojia nia tacatonurani, maja nia tiuuniuria maninia nia miishanoocua najuhuananij? Niaacuajaari tari niishiya, majaari nia naata maninia nia miishanota tama nia cuaqueyajaaja jiyanootiniu Pueyaso. Cunora, niaari Jesucristoocua tiuujiacara quiquiaari tari, Pueyaso jiyanooniuria niajaniya. <sup>2</sup> Naajuhuj, niaacuajaari tari niishitiojosaaquiiaari moojinia nia tiuquinishaanura Pueyaso pueya nia quiniuucua. Naaari niishitiojosaaquiiaarijuhua Pueyaso pueyacu nia nianura nia juaashiquia nojoriicuaa nia secojosacari, Pueyaso cumaquiniuria nojori. Naaari niishiyajuhuj, macunucuaari samiitiaconutaniuhua. Nojorijinijinio saniniuujia, Pueyaso tojijashijiaacari pueyaracaanu saniitiosocoriquiano jiyatesaanutaniya. <sup>3</sup> Quiarijiani, majaari socua na niishitiojonu quiniutianiya niajaniya nio shusha cua sequesanojiniji niajaniyani. Pueyaso cumaquishacari janiya, janiyari socua jiyajeneta casaa Jesucristojiniji niishitiojonutaniya niajaniyani.

<sup>4-5</sup> Pueyano jaara Pueyaso Rupaa tojijashijiaa quiriohua, najuhuaanari na niishitiojonu pacutenuhua, nojuaja jaara tari Pueyaso Sohanu cuhuatasano jiuujiaraca quiquiaari. Najuhuaanari nojuaja jaara tari jiyanooshano quiquiaari, nojuaja jaara tari Pueyaso Sohanu cumaaca niishijia quiquiaari. Najuhuanajaariuhua nojuaja jaara tari Pueyaso Rupaa shuquiritiaja quiquiaari, nojuaja jaara tari Pueyaso cumaacaraca quijia quiquiaarijuhuj. <sup>6</sup> Jiyano pueyanotej, majaari tari na naata sesa miijia na quiniuucua taraajetesaanuhua, Jesucristoocua na tiuuniuhuaa seetanujuanaa. Nojuajaari juhua Pueyaso Nyanu teetenu pacuteya niyacutesanojinia, naa na ruuretajaca na quiniuucua. Naa Jesucristo tacartaja na quiniuucuatej, tamasaacari Jesu rerequetequiaajuhuj. <sup>7-8</sup> Naacuajitij, cuno pueyanoori juhua noo cuhuariquia tee cuniqui sesa jiyasocua maniniucuaa moritianoocujani, riyocuaanio. Pueyasoori najuhuaana maru niyotequiaa. Majaari cuno cuhuariquiajinia nataacuaca muetunu. Jiyano cuhuariquiatej, na camaru cuara catijataaranoj. Pueyasoori naa saniitionutaniya nocuaji ruparequeno pueyajuuhuj. Saniniuujia, Jesucristo rupaa tojijiacani, nojoriiru juhua maninia cuhuariquia. Pueyasoori maru niyotequiaa nocua, maninia na muetutenura tii natoosano casaa. Naacuajitij, na camaruuri queraatia miajajauraca quiniutianiya. Naajuhuj, Pueyasoori na tojtianu tarinitiaashijiaa shuquiritiniutianiya pueyaracaanura.

*Pa niishishacari Pueyasoori maninia pa miiniutianiya, paari cunora na tojinu tarinitiaaquiiaani*

<sup>9</sup> Miriqui cua pohuatasano sesa cuhuariquiajinijini, cunoori maja niajaniya cua panishano pueyanaa. Majaari cua taacanunu niajanijajiniji. Niaacuajaari pa Jiyaniujia

tojitiajaca quiquiaa. <sup>10</sup> Pueyasocuaajaari jiyanoehua maninia. Nojuajaari maja na niyaje-tanu quiniutianiya maninia nia miishano niarta Pueyaso pueya, Pueyaso panijia nia quiniuucua, taa quiarijia nia miyajaacujani. <sup>11</sup> Naatej, taa shitimia niarta Pueyaso pueya naacuijacatucua niajaniani, naajuhuj, janiyari nia panitiaani pa Jiyaniijia nia sashini-uria nia timiniutiajuhuaj, nojuaja jaara pa rijionuucua tiuquiriohuajaatijia. Nia niishi-tiriquiajaanihuaj, Pueyasoori jiyanoehua maninia miiniutianiya pajaniya. <sup>12</sup> Majaari nia macuhuajeconu juhua taajecori nia quiniuria pa Jiyaniijia. Saniya nia quiriquia cutara juhua tariucuaaanu parta Pueyaso pueya. Nojoriiri shamaatia Pueyasocua tiuujia quiquiaari pueyaracaanu. Naquiya miiniu rejeretajacaari quiquiaarijuhuaj. Naaratej, Pueyasocuaajaari tari maninia miiquiaa nojori, taa seetanujuanaa na sequequiaari na pueyarano na miiniuriacujani.

<sup>13</sup> Pueyasoori seetanujuanaa saaquiano Abraham sequequiaari taa na miiniutianiya maninia nojuajani. Majaari na naata sequenu, tamonu cuara na saniitiooranog, nojuaja jaara miyaquiri na sequesano saaquiano Abraham. ¿Cantucuaa cumaacaraca Pueyaso na saniitionurani? Shaaqui. Nojuajanaacuaajaari Jiyaniijiajanaa. <sup>14</sup> Naaratej, Pueyasoori naa sequequiaari saaquiano Abraham:

“Janiyari seetanujuanaa maninia miiniutianiya quiajaniani. Janiyari quia juhua mue-tutenutianiya jiyanoehua queraatiarani”.

<sup>15</sup> Naa Pueyaso sequenu nuhuaji saaquiano Abrahamtej, Abrahamri juhuajaniya sashiquiaari Pueyaso cuara na sequesano miiquiaariijaatijia. <sup>16</sup> Pueyanaa, niaacuajaari niishiya taa pa miiquiaani, parta pueyano niishiniuria paari nojuaja pa sequesano miiniutianiya seetanujuanaani. Paari naa sequequiaani: “Seetanujuanaa quia sequeyanijia. Majaari cua sapojonu. Pueyaso cuara saniitioora janiya, janiya jaara cua sequesano miyaquirini”. Naa pa sequesacariitij, parta pueyanoori juhuajaniya pocua tiuujia. Majaari tari na taacanuunu pocuaji. <sup>17</sup> Naajuhuj, Pueyaso sequesacari taa seetanujuanaa na miiniutianiya na pueyarani, nojuajaari jiyanoehua panitiaquiaari pajaniya, na sequesanoocua pa tiuniuria seetanujuanaa. Majaari na paniniu quiquiaari pa taacanuunura quenaaja na sequesanojiniji. Cunora, nojuajaari naa sequequiaari: “Janiyacuajaari Pueyasoni. Majaari cua niishiniu sapojonu. Cua sequesanoori seetanujuanaa”. <sup>18</sup> Naacuajitij, Pueyasoori maatia sequequiaari taa na miiniutianiya nocua tiuujiacarano pueyarani. Majaari saaja cuno na sequenu quiquiaari. Nojuajaari sequequiaarijuhuaj: “Cua sequesanoori seetanujuanaa”. Pueyaso sequesanoori maja na naata jatanishaanu. Naacuajitij, pajaniya, nocua tiuujia pueyani, paari poojia cajitiquiaani maatia pa niishishacari, pocuaji Tacunaari puetunu na sequesanojuanaa miiniutianiya pajaniyara. Naacuajitij, majaari pa taacanuunu quenaaja. <sup>19</sup> Naa Pueyaso sequesanoocua tiuujia pa quishacariitij, paari juhuajaniya naquiya miiniu rejeretajaca quiquiaani. Sesaacaari maja na naata Pueyaso jaariutianu pajaniya. Naacuajitij, paari juhua buqueni, pootioyaquishoo, niiquia casaacua na jaasatanuucua. Cuno niiquia casaari niquishoo, moo cariquimia pojiyari. Naajuhuj, nocua pa tiushanoni, nojuajaari jiyocuaaanu quiya, niquishoojaariuhua na Que Pueyaso shuriucua na quiniuucua. <sup>20</sup> Nojuajaari na Queecua quianu pa puetaquiaari. Nojuajaari ti pueyaracaanu secojoquiaa na Que pocuara, na Que jiyanooniuria pajaniya. Naacuajitij, Pueyasoori na jiyatequiaari pueyaracaanu secojona na quiniuria pueyacuara, taa Melquisedec quiquiaaricuaani.

## 7

*Jesuuri pueyacuara secojona, taa Melquisedec quiquiaaricuaani*

<sup>1</sup> Cuno Melquisedecni, nojuajaari Salem tiaca jiyaniijia quijia. Nojuajaari Pueyasojua-naa secojona pueyacuara. Pa supuetana Abraham tacatesacariuhua na naminiu nuhuaji na paraa, tamasaca tiacajinijinio jiyaniijianucuaani, Melquisedecni nocua tohuataquiaari Salem tiacajiniji. Naa na sequequiaariiri: “Abrahamnaa, quiaari Pueyaso timitiasano. Pueyasoori quia miiniutianiya jiyanoehua maninia”. <sup>2</sup> Jiyacaritij, Abrahamri na paraa casami nitiariquiohua na quiquojiniohuara. Naacuajitij, nojuajaari puetunu cuno casamijinijiniojuanaa Pueyasora na riuriosano niqutioquiaari Melquisedec. Abrahamri naa miiquiaari na niishishacari Melquisedecni Pueyaso secojona pueyacuara quiquiaari. Pueyanaa, nio Melquisedecjiniji nia niishiri. Pueyano rupaajinia, na sesaari sequeya, “Saaja maninia miijia jiyaniijia”. Naajuhuj, na tiaca sesa Salemi, cunoori pueyano rupaajinia sequeya, “Juhujaniya quijia pueya tiaca”. Na sesaari naa quiquiaari na pueya jiuujia cajitijia na quiniuucua. <sup>3</sup> Majaari tojetaarucujanaa na niishishaanu, ¿queraca quiquiaariti, nucuaracajuhuj, supuetanaaracano? Majaari quenaaja na pohuataaanu-juhua na rasaanujiniji, na shaajenujinijinio. Naacuajitij, pajaniyara, Melquisedecni juhua



pueyaracaanu quijiajuhuanajaj. Majaari na niishishaanujuhuaaj, tamonute na niti jiyatesaquaiaari pueyacuara secojona na quiniuria. Maja. Naacujitij, nojuajaari juhua Pueyaso Niyanu, pueyacuara secojona na quiniuria pueyaracaanura.

<sup>4</sup>Pueyanaa nia niishiri, Melquisedecquiiri seetanujanaa tojishano pueyano quiquiaari socua pa supuetana Abrahamjiniji. Naaratej, pa supuetana Abrahamri nareja na niqitioquiaari na paraa na shocotasano casamijinjinio. Secaja niqitioquiaariirri taa Pueyaso rootaquiaari pa supuetanaacujani, nojori niqitiojonura nera. Tariucuacaanu, Pueyasoori pa supuetanaa niishitiojquiaari nojori niqitiojonura secaja, puetunu nojori jiti-asano casaajinijijianaa. Naacujitij, pueyano jaara diez casaa jitiare, cuaara Pueyasora niqitioora niqiriyatujua. <sup>5</sup>Pueyasocujajaari supuetana Levi niqiuoacuajinjio supueno pueya jiyatequiaari narta Israel pueyacuara secojonaa nojori quiniuria. Nojoriiri jiyatesaquaiaari Pueyasorano pueya niqitiojosano masejojua nojori quiniurijuhuaaj. Naa Pueyaso sequesanoacujajaari Moisés Rootasanojinia naajiotasaquaiaari. Abrahamcujajaari puetunu Israel niqiuoahuajanaa supuetana quiquiaari, maja saaja Levi supuetana. Naajaa, Levi niqiuoacuajinjio supueno pueyari Pueyasora narta Israel pueya niqitiojosano masejojua. <sup>6</sup>Melquisedecri pueyacuara secojona quiquiaarijuhuaaj. Maja cutaraari Levi niqiuoacuajinjio na supueno quiquiaari. Naajaa, seetanujanaa pueyacuara secojona na quiniucua, Abrahamri Pueyasorano na riuriotaca na niqitioquiaari. Abrahamri seetanujanaa Pueyaso timitiasano pueyano quiquiaari. Naaratej, Pueyasojanaacujajaari tari Abraham sequequiaari, nojuajaari maninia na miiniutianiya. Naajuhuaaj, Melquisedecri pa supuetana Abraham sequequiaari Pueyasoori jiyanohua maninia miiniutianiya nojuaja. <sup>7</sup>Paacujajaari niishiyani, Pueyaso jaara maninia miiniutianiya tamonu pueyano, na sequesano caminiujunua pueyanoori socua tojishano pueyano maninia na miishocoriquiano pueyanojiniji. Naacujitij, paari niishiyani Melquisedecri socua tojishano pueyano quiquiaari Abrahamjiniji. <sup>8</sup>Quarijiani, Pueyasorano pueya niqitiojosano masejojucani, puetunu nojorijianaari shaajecaja pueya. Saniniujia, tariucuacaanu Pueyaso Rupaajinia pa serojosacari Melquisedecjiniji, juhua saminiujiniji pohuatashiyari. <sup>9-10</sup>Nia niishirijuhuaaj, Levi niqiuoacuajinjio pueyacuajaari Pueyasorano pueya niqitiojosano masejojua, pueyacuara secojonaa nojori quiniucua. Cua tojiri pueyanaa, Melquisedec naacuneetosacari Abrahamta, Abrahamri jiyacari tari na cuaqueyajinia jitiariquiaa puetunu nocuajinjio superiquiano pueyajanaa. Naacujitij, Abraham niqitiosacari Pueyasorano na riuriotaca Melquisedec, pa naata sequenu Levi quiriquianojuanaari jiyacari Melquisedec niqitioquiaari, Abraham quiniucua na jiyasorano tari.

<sup>11</sup>Leviucujinjio supueno pueyari pueyacuara secojonaa quiquiaari, nojori miiniuria taa Moisés Rootasanojinia sequequiaaricujani. Naacujitij, narta Israel pueya jaara sesa miiquiaari, nojoriiri sesa miijica seya puecoquiaari pueyaracaanu tama na camaruhacuaraajaja, nojori na jiyanoootiniuria Pueyaso. Naa nojori miishano jaara pueya jiyateriquia tojetaarucujanaa sesa miyashijiacara, paa maara tamonu pocuara secojoriquiano paniyaquiriquiani. ¡Tamonu pocuara secojoriquiano cutaraari panishaaquiaari! Juhua pueyaracaanu rishijia Melquisedec panishaaquiaari cutaraari, maja juhua Aarón saniniujia, nocuajinjio supueno pueyano. Nojoriiri shaajecaja cutara. <sup>12</sup>Aarón cuajaari narta pueyacuara secojonaa jiyaniijiaari jiyatesano quiquiaari, taa Moisés Rootasanojinia sequeyacuajiani. Naacujitij, tamonu pueyano jaara jiyatesaarecuaa pueyacuara secojona na quiniuria, tamonu rootasanoori panishijuhuaaj, Moisés Rootasano niti na quiniuria. <sup>13</sup>Tariucuacaanu Pueyaso Rupaajinia, maatia sequeyacuajaari, Pueyasoori tamonu pueyano jiyatenutianiya pocuara secojoriquiano. Nojuacuajaari pa jiyaniijia Jesu. Nojuajaari maja Levi niqiuoacuajinjio supueno. Nojuajaari supuetana Israel niyanuacuajiniocujaja, saniniujia tamonu neyanuacuajinioaaruahuaaj, teyanooacuajinjio quenaaja niqiriyatuu pueyacuara secojona supueyaquiquiaaricujani. <sup>14</sup>Maatia niishishiyacuajaari, pa jiyaniijiaari Judá niqiuoacuajinjio supueno quiquiaari. Judaari Levi tarajanucujaja. Moisés pohuatasacari pueyacuara secojonaajinjini, majaari quenaaja Judá na jiyaniquiniu quiquiaari.

<sup>15</sup>Quarijiani, quiarinjio pocuara Secojona quishacari juhua Melquisedec, paari maatia niishiyani Levi niqiuoacuajinjio supueno pueyacuara secojonaari sanitishaaquiaari.

<sup>16</sup>Nojoriiri pueyacuara secojonaa quiquiaari saaja Levi niqiuoacuajinjio supueno pueya nojori quiniucua. Jesucristo cutaraari pocuara secojonaari jiyatesaquaiaari pueyaracaanu rishijia na quiniucua. <sup>17</sup>Cunora, Pueyasoori naa sequequiaari nojuajinjij: “Quiaari pueyacuara secojona quiniutianiya pueyaracaanura, juhua Melquisedec”.

<sup>18</sup>Naacujitij, puetunu Moisés rootasanojuanaa pueyacuara secojonaa pueya miishocoriquianoori tari jatasaquaiaari, najuhua na quiniucua. Cuno miishanoori cumacaaju quiquiaari pueya na jataniniuria. <sup>19</sup>Seetanujanaari, Moisés Rootasanoori

maja na naata quiquiaari saaja maninia miijiacara na jataniniuria na tojitiajaca. Quiaritia saniniuuja, paari Pueyaso rupaa Jesucristojini jiiitiaani. Nocua pa tiuushacari, Jesucristoori pueyaracaanu pa jiyanootiquiaa na Que, juhuajaniya pa rupuenura nojuaja.

<sup>20</sup> Na Que sequesacari Neyanu quiniuria pocuara secojona pueyaracaanura, nojuajaari naa sequequiaari seetanujuanaa. Naacuajitij, paari panaatia quiquiaani pa niishishacari Jesucristoori na Que shuriucua quiya, pueyaracaanu pocuara na secojonura na Que. Saniniuuja, majaari naa Pueyaso sequenu quiquiaari Leví niqiuohuacuajinio supueno pueya, seetanujuanaa pueyaracaanu pueyacuara secojonaa nojori quiniuria. <sup>21</sup> Saniniuuja, Neyanujini na sequesaroni, cunoori seetanujuanaa. Majaari na sequesano jatanishaanu quiniutianiya. Naacuajitij, naa naajiotasano quiyari tariucuacaanu Pueyaso Rupaajinia:

“Jiyaniijia Pueyasoori seetanujuanaa sequeree na miishocoriquiano. Majaari na sequesano na jatanini quiniutianiya. Neyanu sequereecuajaari: ‘Quiaari pueyacuara secoriquiano pueyaracaanu’ ”.

<sup>22</sup> Naacuajitij, pueyaracaanu na Que shuriucua Jesu quiniuucua pocuara na secojonura, paari seetanujuanaa niishiyani paari Pueyaso pueyani, Neyanuucua pa tiuuniuucua. Naacuajitij, Pueyaso rupaa Jesujiniijiri socua jiyanoohua maninia Moisés Rootasanojinijini. Cunoori pueyaracaanu rishijia Jesu quiniuucua. <sup>23</sup> Saniniuuja, Leví niqiuohuacuajinio supuenoni, queraatia pueyacuara secojonaari quiquiaari pueyaracaanu rishiyashijia nojori quiniuucua. <sup>24</sup> Jesu cutaraari shaajeyashijia. Naa pocuara secojona na quishacaritij, majaari quenaaja tamonu sanitiniu quiniutianiya nojuaja. <sup>25</sup> Naacuajitij, nocua pa tiuushacari, nojuajaari pueyaracaanu pocuara secojoquiaa, tojetaarucujanaa maninia miijiacara na jatanishaanura, Pueyaso pa rupuenura. Majaari pocuara na Que na secojonu na tarinitianu quiniutianiya, shaajeyashijia na quiniuucua.

<sup>26</sup> Jesuuri namitia pocuara secojona na Que. Majaari tamonu quiniu juhua nojuaja. Nojuajaari tojetaarucujanaa maninia miijiajuhanajaj, juhua na Que Pueyaso. Majaari quenaaja sesa miinu na niishiniu. Sesa miijiaa tajiina na quishacari mijiria, naajaa, majaari sesa na miinu quiquiaari quenaaja. Saaja maninia miijia na quiniuucua, nojuajaari tojetaarucujanaa tamaatia quijia mijiria quiniaa pueyajini. Naaratej, Pueyasoori jiyocuacaanu quijia na jiyatequiaari, Jiyaniijijanaa na quiniuria na shuriucua, tii na secojonura na Que pocuara. <sup>27</sup> Leví niqiuohuacuajinio supueno pueyacuara secojonaa jiyaniijianucuaari pueyaracaanu tama sesa nojori miishanoocuarajaaja seya puecootujua coteenu, Pueyaso jiyanooniuria nojori. Naa nojori miinu nuhuajitij, nojori jiyacari narta Israel pueya seya puecooquiaari sesa cuno pojori miishanoocuaru saniniuuja. Maja cutaraari naa Jesu miinu quiquiaari. Nojuaja jaara tama na cuaqueyajaaja tarinitiaquiaari pocuara na mosaanura juhua borregoniyojua sesa pa miishanoocuaru, cunoujanaari na cusonu quiquiaari. Majaari socua na caminiu quiniutianihua cusonu. Naa na cusonuucua pocuaratej, puetunu sesa miijiacajanaari na naata jiyanooshaanu puetunu sesa na miishanojinijijanaa. <sup>28</sup> Moisés Rootasanojinia, Pueyasoori tii sequeyacuaja canapute pueyacuara secojonaa jiyaniijiaari jiyateshiyani. Puetunu cuno pueyacuara secojonaa jiyaniijianucujanaari sesa miijiaa quiquiaari, juhua puetunu pueyajuhaaj. Jiyanoohua Moisés nuhuaji, Pueyasoori saniniuuja tama Neyanujaja jiyatequiaari pocuara secojonajanaa na quiniuria pueyaracaanu. Na Que tojijia na quiniuucua pueyaracaanu, naquiya miinu rejeretaja na quiniuucujuhua, naacuajitij, nojuajaari tojetaarucujanaa maninia, pocuara secojonara na jiyatesaanura.

## 8

*Quiarinio Pueyaso Rupaacua pa tiuushacari, Jesuuri pa jiyanootiquiaa na Que*

<sup>1</sup> Nio, janiya na pacutenutaniuhua sequenuni, cunoori socua panishano nia niishiniuria. Cua tojiri. Pueyaso Niyanu quiniuucua pocuara secojona, nojuajaari na Que miaquetajara cajiquiaari jiyocuacaanu. <sup>2</sup> Nojuajaari tii na Que secojoquiaa pocuara Pueyaso Quishaquijanaa. Cunoori Pueyasojuanaa shipinishano quiqiuo, maja pueyano tiasano.

<sup>3</sup> Puetunu pueyacuara secojonaajanaari jiyatesaquiaari nojori masejonura narta pueya poosano casaa, Pueyasora nojori niqitiojosano. Naajuhua, nojori seya puecoojuaca, Pueyaso nojori jiyanootiniuria. Naacuajitij, Jesucristo quiniuucua pueyacuara secojonajuhua, nojuaja cuara casaa jiiitaara, Pueyaso na niqitiosocoriquianojuhuaj. Cuno casaacuajaari tama na cuaqueyajaaja quiquiaari, pocuara na mosaanura, Pueyaso jiyanooniuria pajaniya. <sup>4</sup> Leví niqiuohuacuajinio supueno pueyacuara secojonaacuajaari pueya nitiasano nojoriicua masejoquiaaja, Pueyasora nojori niqitiojosocoriquiano taa Moisés Rootasanojinia sequeyacuajani. Naacuajitij, Jesucristo jaara mijiria quiriquiaja, nojuaja maara pueyacuara secojona quiyaquiriqiaaj. Pueyacuara secojonaacuajaari

queraatia quiya. <sup>5</sup> Pueyacuara secojonaa jeecajosano casaa Pueyaso Secojojuua tijainia nojori jitiisanoni, nojori miishanonio, puetunu cunojuanaari saaja juhua jiyocuacaanu casaa naaqui. Cunora, Moisés jaara tari shipiniriqiaa Pueyaso Secojojuara suhuorotu, puetunu na casamitiajanaanio, jiyacaritij, Pueyasoori naa Moisés sequenu pacutequiaari: “Moisésnaa, cua tojiri. Maninia quia miiri jacaria puetunujuanaa, naatej, taa cua niqiu-tiquianucuaja quiajaniani, Sinaí tuhananuua quia quishacari”.

<sup>6</sup> Pocuara Secojonajanaa miishanoori jiyanhua maninia socua pueyacuara secojonaa Leví niqiuohuacuajinio supueno miiijosanojiniji. Pocuara Secojona cutaraari tama na cusonutajaaja pa jiyanootiquiaari Pueyaso. Naacuajitij, Pueyaso rupaa Jesucristojinijiiri jiyanhua socua maninia Moisés Rootasanojiniji.

<sup>7</sup> Pueya jiuujia jaara na naata quiriquia seetanujuanaa sesa miyashijiacara jatanishano Moisés Rootasano tojjijaca nojori quiniucua, Pueyaso maara quiarinio rupaa niishi-tiyaquiquiaari pajaniya. <sup>8</sup> Saniniuujia, Pueyasoori niishiquiaari Israel pueyari maja na naata quiquiaari puetunu Moisés Rootasanojuanaa tojinu. Cunora, tariucuaaanu pueyara Pueyaso sequesano caminiujunia sequesanoori naa naajiotasano quiya:

“Jiyaniijia Pueyasoori sequeya: ‘Tamacari, janiyari quiarinio rupaa niishitiniutianiya Israel jiyajinijinio pueyani, Judá jiyajinijinio pueyanio. Teyano pojoriti nocua tiuyani, nojoriiri seetanujuanaa cua pueya quiniutianiya. <sup>9</sup> Quiarinio cua ru-paari tamaatia quiniutianiya Moisés cua niishitiojosano rupaajiniji puetunu Is-rael pueyarajanaa. Jiyacaritij, janiyari nojori mashiquiquiaari Egipto jiyajinijini. Juhua nojori que, janiyari nojori jaatucunuuriquiaa juucuan nojori cua niqiu-tiosocoriquiano jiyajinara. Saniniuujia, nojoriiri Moisés cua rootasano nojoriria tojinu paniaquiquiaari saaja. Janiyari cunora nojori cartequiaarini’. Jiyaniijia Pueyasoori naa sequeree. <sup>10</sup> Socua sequeyari: ‘Nio pa quishacari nuhuaji, janiyari naa miiniutianiya cua saquiriojosano pueyarani: janiyari coojia nianutianiya no-jori jiuujiajiniani. Naacuajitij, cua rootasanoori juhua naajiotasano quiniutianiya nojori niishitiajajinia, seetanujuanaa cua tojtiajaca nojori quiniuria. Naacuajitij, janiyari nojori Jiyaniijiajanaa quiniutianiyani. Nojoriiri saniniuujia cua pueya quiniutianiyacuua. <sup>11</sup> Jiyacaritij, pueyano jaara janiyajiniji pohuatanu paniri narta pueyano, na cojiniajuhuaj, tapueyocucanio, cunoori najuhua quiniu-tianiya. Puetunu pueyapuejanaacuajaari tariucua cua niishijaca quiniutianiya; jiyaniijianucua, poonijiotasano pueyanio. <sup>12</sup> Janiyari nojoriicua taraajeja quiniu-tianiyani. Majaari cua saniitionu quiniutianiya nojori, sesa nojori miishanojiniji. Naa cua jiyanooshacari nojoritij, majaari socua cua saneejonu quiniutianiya sesa nojori miishano. Janiyari puetunujuanaa na niyajetanutianiyani’”.

<sup>13</sup> Naa Pueyaso sequesacaritij, taa nojuaja quiarinio na rupaa niishitiniutianiya pa-janiyani, nojuajaari tariucuaaanu Moisés na rootasano jiyatequiaari tariucuaaneera. Naacuajitij, Moisés Rootasanoori quera shaajasaanutianiya puetunujuanaa.

## 9

*Tariucuaaanu Moisés suhuorotesano Pueyaso quiquiranoni, cunoori juhua jiyocua-caanu Pueyaso quiqiojuhuaj*

<sup>1</sup> Tariucuaaanu, Pueyasoori Moisés sequequiaari mijiria na quiquirano na suhuorotenura. Na niishitiojoquiaarijuhua taa pueyacuara secojonaa poonijionutianiya cuno na quiqiojiniani. <sup>2</sup> Pueyaso Secojojuua suhuorotuuri caapiqui sohuacaraca quiquiaari. Samari nujuatacojuaari coteenu sohuacajinia quiquiaari, miaquejania, tee Pueyaso tacoji pan niojosaaquiaari pueyaracaanucujani. Cuno sohuaca sesa quiquiaari “Pueyaso Shuriucua Quiquo”. <sup>3</sup> Cuno coteenu sohuaca puequeetujiniani, tii tunusano quiquiaariiri shiquiaruque toque. Cuno toque tamajiria quiquiaariiri Pueyaso quiqiojuanaa cutara. Naaratej, na sesa quiquiaari “Pueyaso Quishaquijianaa”. <sup>4</sup> Pueyaso Quishaqui tacoji nujuatajaari juhuacutu, orojiniji shipinishano. Cuniqii catejaari shanhua jaanutaja Pueyasora. Pueyaso Quishaquijianaa cutarani, tii nujuatajaari puereetuuca casaa, juhua caaja niqishano. Naananeecajiniji shipinishaquiaariiri. Puetunu na cuaqueyajaari orota mishiquiosano quiquiaari. Na jiniacuma, casamiiri mii racatasano quiquiaari. Pataconiyojua orojiniji shipinishanoori tii cajitiaquiaari “maná”. Manaari quiquiaari Pueyaso tinishano casaa, Israel pueya miaquesocoriquiano cariquia jiyajinia nojori camarucuneejotasacari. Mii matariquiaaariuhua Aarón nataca catuutianohua, puetunu na jajautajanaa. Mii maturiquiaaariuhua sai neeca quejasano, nocua Pueyaso naajiotasano na rootasano, Moisés na niqutiojosano. <sup>5</sup> Cuno caaja tiootu caco nujuatejosano quiquiaariiri caapiqui shipinishano casaa, nesuharaca, juhua Pueyaso seya niquishano. Nojori nesuhuari

coqueetesano quiquiaari. Teecojuuari, teje Pueyaso shacantuuca mueranacujuquiaari Moisésacuajani. Cuno caaja tiootiuri seya nanaca majiriutiasaquijjuhuaj, Pueyaso jiyanooniuria puetunu Israel pueyajanaa. Tariucuaja puetunu cuno casaajiniijianaa cua pohuatasano niajaniya.

<sup>6</sup> Pueyaso Secojoja tia jaara tari naa maninia tiasano quiquiaari puetunu na casamitiajanaa, na nuhuaji, pueyacuara secोजनाari pueyaracaanu tiuquiijoquiaari Pueyaso Shuricuua quiquiojinia. Nojoriiri tii tiuquiijoquiaari nojori miiniuria taa Moisés Rootasanojinia sequeyacuajani. Maja cutaraari nojori tiuquitianu quiquiaari Pueyaso Quishaquijianaa sohuacamara. <sup>7</sup> Saaja nojori jiyaniijia cutaraari tii tiuquiquiaari saaja rupaquijia puetunu marijarajanaa. Na tiuquishacari Pueyaso Quishaqui, seya nanaca pataquiaariiri Pueyaso jiyanooniuria nojuaja, narta Israel pueyano, sesa nojori miishanojiniji. <sup>8</sup> Naa Pueyaso Quishaqui quiniucua mishiquionucua pueyacuajitij, Pueyaso Sohuanuuri pa niishitiya, pueyari juhuanojuaja maja na naata rupenu quiquiaari Pueyaso. <sup>9</sup> Naacuajitij, puetunu cunojuanaari quiquiaari juhua miriqui miishano, saniniuuja nio pa quishacari pa niishiniuria pocuara Secojonajanaa miishano pocuara. Puetunu pueyacuara secोजनाa catijiasano casaajanaari miriqui miishano quiquiaari saaja. Naajuhuj, pa supuetanaa niqutiojosano casaa Pueyaso jiyanooniuria nojorini, puetunu naa miishanojuanaari miriqui miishano quiquiaari. Naacuajitij, cunoori maja na naata cuno pueya jiuujia jeecanu seetanujanaa, juhuajaniya nojori rupenura Pueyaso. <sup>10</sup> Naaratej, cuno tariucuacaanu rootasanoori saaja panishaaquiaari Pueyaso cuaara na sanitiquiaariijaatiija quiarinio rupaata. Cuno tariucuacaanu rootasanoori pueya niishitiquiaari teyano sumatuuteja miaqeshiyani, teyano mashacateja ratushiyani. Naajuhuj, nojoriiri niishitishaaquiaari taacari pueya jeequeya na cuaqueyani, nojori casaanio, juhua maninia jeequejosano nojori quiniuria Pueyaso niqiara. Puetunu naa pueya miishanojuanaari maja na naata pueya jiuujia jeecanu sesa nojori miishanojiniji.

<sup>11</sup> Quiari naataja saniniuuja, Jesucristoori pocuara Secojonajanaara jiyatesaaquiaari, Pueyasojiniji na masenura Pueyaso jiiitasano pajaniyarano. Cuno quiquio, tee na secjoquiaa na Que pocuaracuajani, cunoori seetanujanaa Pueyaso quiquio jiyocuacaanu, maja pueyano tiasano. <sup>12</sup> Naa Cristo tiuquishacari na Que quiquiojinia Pueyaso na jyanootiniuria pajaniyatij, nojuajaari maja na tiuquitianu quiquiaari cabra nanaca, juunu niquiohuananacanio. Nojuaja cutaraari tama na nanacatajaaja Pueyaso jyanootiquiaari pajaniya. Nojuajaari maja pueyaracaanu na tiuquiiijionu na Queecua, taa mijiria pueyacuara secोजनाa jyaniijianucua miiquiaaricuaani. Maja. Nojuajaari na Queecua tiuquiquiaari puetunujanaa. Naa pocuara na cusonuucuatej, na Queeri Neyanuucua tiuujiaa jyanooquiaa puetunujanaa. Naacuajitij, majaari Pueyaso shuricuajaji pa taanuusaanu quiniutianiya. <sup>13</sup> Pueyasoori Moisés niishitiquiaari, pueyano jaara macu masaqui tiuquimia, jaara na quiarejuhuaj, jiyacaritij, nojuajaari juhua curuutuuca Pueyasora. Naacuajitij, cuno pueyanoori maja na naata narta pueya rupenu. Majaari na naata Pueyaso Secojoja tiajinia tiuquiniujjuhuaj. Naajaa, nojuajaari na naata jeequesano quiniuhua, seru nanaca jaara nocua majiriutiasaaquiaari. Cabra nanaca, juunu nanaca, niyacoo juunu catijiasano juacani, puetunu cunojuanaari maninia quiquiaari pueyara, juhua jeequesano nojori quiniuhuara Pueyasora. <sup>14</sup> Naa pueya cuaqueya quiniucua juhua jeequesano saaja seya nanacatacuatej, Cristo nanaca cutaraari seetanujanaa cumaacarua pueya jiuujia na jeequenura seetanujanaa, puetunu sesa casaajiniijianaa. Naatej, taa pueyacuara secोजनाa jyaniijianucua tiuquitiquiaari seru nanaca Pueyaso Quishaquicuaani, pueya jyanooshaanura, Jesucristoori naa miiquiaarijuhuaj. Pueyaracaanu quiija na quiniucua, Jesucristojuanaari tama na nanacajaaja tiuquitiquiaari Pueyasoocua, pa jyanooshaanura puetunu sesa pa miishanojinijianaa. Nojuajaari tojetaarucujanaa sesa miyahshija quiquiaari. Naacuajitij, na nanacaari poojia cajitiquiaa, nocua pa tiuushacari. Majaari socua pa jyaniniu na naata tama pa cuaqueyajaaja jyanootiniu Pueyaso tama pa miishanotajaaja. Naacuajitij, quiarijia cutaraari pa naata pa Pueyasora poonijionu shitimia, seetanujanaa jyanooshano pa quishacari.

<sup>15</sup> Jesucristo cusonuucua pocuara, nocua pa tiuushacari, nojuajaari pa jyanootiniara quiquiaari taa quiarinio Pueyaso rupaa sequeyacuajani. Naajuhuj, noo pojori, Pueyasooocua tiuujiaa mijiria Jesu niyacarijiani, sesa nojori miishanoori jyanooshaquiaari Jesu cusonuta quiari naatajuhuaj. Naacuajitij, puetunu Pueyaso saquiriojosano pueyapuejanaari na naata puetunu Pueyaso niqutiojonu panishanojuanaa masenu, taa na sequequiaari niqutionu seetanujanaacuajani, pueyaracaanu shuquiriaatia jatiqui pa quiniuria nata. <sup>16</sup> Pueyanaa, pa shaajeyaquishacarijia, paari pa miiniu panishano naajiotanu niishijiani. Paari naa mijiani pa casami serotasaanura maninia, teyano pueya pa panitiaa nojori jiiitanura pa casamicuajani pa shaajenu nuhuaji. Naacuajitij, paa jaara tari jamosaareni, pueyari maninia miiquiaa taa pa naajiotaquiaaricuaajani, saminio pa

quishacarijia. <sup>17</sup> Naacuaajtij, saminio pa quishacarijia, najuhuaanaari pa naajiotasano. Pa shaajesacari, jiyacari cutara pa casamiiri niqutiojosano. <sup>18</sup> Tariucuaacaanu naajuhujaj, seya nanacaari shootesaaquiaari, Israel pueya niishiniuria Moisés Rootasanoori seetanujuanaa, nojori tojishocoriquiano. <sup>19</sup> Naa quiquiaariiri: Moisésri puetunu Pueyaso rootasanojuanaa nojuaja caminiujuquiaari puetunu Israel pueya niquiarajanaa. Na nuhuajaj, Moisésri juunu niqiuohua nanaca, cabra nanaca cojitiquiaari mohuacata. Cunojinia shitiaquiaari borrego cajaca naatusu hisopo cashacucuaataari. Cunota, mohuacanacu majiriutuiaquiaari Pueyaso Rupaa na naajiotasanoocuaari, puetunu Israel pueyacua-janaanio. <sup>20</sup> Jiyacaritij, nojori sequequiaariiri: “Nio nanacaari pa niishitiya Pueyasoori seetanujuanaa pajaniyara miiniutianiya puetunu na sequesanojuanaa, paa jaara na rootasano tojijiaa quirini”. <sup>21</sup> Moisésri Pueyaso Secojojua tiaacua majiriutuiaquiaari nanacajuhujaj, puetunu Pueyasora poonijiotajara shipinijosano casamiicujajanaanio. <sup>22</sup> Moisés Rootasanojiniji niishishiyacuaajari, quera puetunu casaajanaari saaja nanacata juhua jeequesano juhua Pueyaso. Pueya miishano sesani, cuno cutaraari maja na naata jiyanooshaanu nanaca jaara shooteyaquishaare.

*Sesa pa miiniuri jiyanooshaaquiaa Cristo cusunucua pocuara*

<sup>23</sup> Mijiria Pueyaso Secojojua tia, puetunu na casaatajanaa quiniucua juhua jiyocuaacaanu casaa naaqui, seya nanacaari maninia quiquiaaricuaaja cuno mijiria casami quiniuria jeequesano. Saniniuuja, jiyocuaacaanu casaa quiniuria jeequesano, socua maninia nanacaari panishaaquiaari seya nanacajiniji. <sup>24</sup> Majaari Cristo tiuquitianu quiquiaari seya nanaca mijiria pueyano tiasano Pueyaso Quishaquijianaa. Cuno quiquioori saaja juhua jiyocuaacaanu Pueyaso quiquio naaqui. Cristo cutaraari seetanujuanaa Pueyaso Quishaquijianaa tiuquiquiaari. Nojuajaari tii na Que Pueyaso secojoquiaa pocuara. <sup>25</sup> Mijiria pueyacura secojonaa jiyaniujanucuaari puetunu marijijarajanaa pueyaraacaanu tiuquijioquiaari Pueyaso Quishaqui saaja seya nanacata, pueya na jiyanootiniuria Pueyaso. Jesucristo cutaraari maja naa na miiniu quiquiaari. <sup>26</sup> Jesu jaara Pueyaso pa jiyanootiriquia puetunu marijijarajanaa taa pueyacura secojonaa jiyaniujanucuaa miiquiaaricuaani, nojuaja maara jiya shipinishaanujiniji mosaariquia puetunu marijijarajanaa. Quiari naataja saniniuuja, Jesucristoori mijiria rasaaquiaari tama na cuaqueyajaaja na tarinitianura pocuara na mosaanura, pueya jiyanooshaanura puetunu sesa nojori miishanojinijianaa. Majaari socua na pacutesaanu quiniutianihua monu. Naa na mosaanuucuatej, cunoori tariucuaaja puetunu nocua tiuujiaa pueyajanaa jiyanooshaanura. <sup>27</sup> Naatej, taatucuaa pueyani, nojoriiri shaajecoriquiano. Majaari nojori samitiaconuhua mijiria nojori quiniuhua, socua na cusunuhua juhua coteenu na cusu. Nojori shaajenu nuhuajaj, nojoriiri saaja sashiya Pueyaso nequesoreenura nojori. <sup>28</sup> Naajuhujaj, naa Jesucristo mosaanuucua jiyacaritij, saaja cunojuanaari na mosaanu quiquiaari, queraatia pueya jiyanooshaanura sesa nojori miishanojiniji. Naacuaajtij, pocua na muetasacariuhua, majaari jiyacari socua na mosaanu quiniutianihua pueya jiyanooshaanura sesa nojori miishanojiniji. Jiyacaritij, nojuajaari saaja nocua tiuujiaa rijionuucua tiuquiniutianihua, noo pojoriria canapuate na sashiycuaajani.

## 10

<sup>1</sup> Moisés Rootasano pueya miishocoriquianoni, pueyacura secojonaa miishocoriquianojuhujaj, puetunu cunojuanaari juhua seetanujuanaa Pueyaso jiyocuaacaanu casaa naaqui, Pueyaso racatasano Jesucristoocua tiuujiaa pueyarano. Moisés Rootasano tojtiaajaca pueya cutaraari puetunu marijijarajanaa na seya puecootequiaari, Pueyaso jiyanooniuria nojori juucua. Naajaa, majaari na naata seetanujuanaa maninia miijiaa pueyara na jatanishaanu seya nanacata. <sup>2</sup> Naajuhujaj, pueya miishacari puetunu Moisés Rootasanojuanaa, naajaa, nojoriiri maja seetanujuanaa tama nojori jiuujiaaja na cajitiniu quiquiaari. Cunora, majaari nojori tarinitianu quiquiaari nojori seya puecootenu tama sesa nojori miishanoocuarajaaja. Seya nanacaari maja na naata tuujunu quiquiaari sesa nojori miishano, seetanujuanaa juhuajaniya nojori quiniuria. <sup>3</sup> Naa seya puecoosacari puetunu marijijarajanaa Pueyaso jiyanooniuria pueyatej, cunoori saaja nojori niishitiquiaariuhua tarijia nojori miishano sesa. <sup>4</sup> Paari seetanujuanaa niishiyacuaajani, juunu nanaca, cabra nanacanio, cunoori maja sesa pa miishano tuujujua seetanujuanaa.

<sup>5</sup> Cunora, tariucuaacaanu Pueyaso Rupaajinia, mijiria Jesucristo nishacari na sequesocoriquianoori juhuacarijia naajiotasano quiquiaari. Naa sequeyari:

“Cua Pueyasonaa, janiyacuaajari niishiyani, majaari quioojia quia cajitiniu quiquiaa seya puecoosacari quiocuara, puetunu nataacuacajiniji pueya niqutiojosacari quiarajuhujaj. Saniniuuja, quiaari cuaqueyaraca cua quiniuria cua jiyateree, quiocuara

cua mosaanura. <sup>6</sup> Majaari quia timiniu quiquiaa seya catijiasacari quiocuara, naajuhuaq pueya shootesacari na seya nanaca, quia jiyanooniuria nojori sesa nojori miishanojiniji. <sup>7</sup> Naaratej, janiyari quia sequeyani: 'Niya quiyacuajanijia cua miiniuria quia panishano cua Que Pueyasonaa, taa janiyajiniji tariucuacaanu naajiotasaaquiaricujani' ”.

<sup>8</sup> Moisés Rootasanojiniji pueyari maatia niishitiojosaaquiaari nojori puecootenura tama na seyajaaja Pueyasooocuara, na nataacuacajinijinio nojori niqutiojonura nerajuhuaq. Nojoriiri niishitiojosaaquiarijuhuaq nojori catijianura na seya Pueyasooocuara, tama nojori seya nanacajaaja shootesaanurajuhuaq, sesa nojori miiniucua. Naajaa, Jesucristo sequesanojiniji, paari quiarijia niishiyani, puetunu naa pueya miishanojuanaari maja na timitiniu quiquiaari Pueyaso. <sup>9</sup> Nocuaij, Jesucristoori naa sequequiaari na Que: "Niya quiyacuajanijia, cua miiniuria quia panishano". Naacuajitij, Jesucristojuanaari mijiria niqiaari pocuara na mosaanura, seetanujuanaa jiyanooshano pa quiniuria cutara, maja najuhuaana seya puecoosaanura socua. <sup>10</sup> Pueyaso tojjia na quiniucua, Jesucristoori tama na cuaqueyajaaja tarinitiaquiaari pocuara na mosaanura, tojetaarucujanaa jiyanooshano pa quiniuria pueyaracaanu. Naacuajitij, na Que Pueyasoori juhua tojetaarucujanaa sesa miyashijacara pa jiyatequiaari, seetanujuanaa na pueya pa quiniuria tama nerajaaja.

<sup>11</sup> Israel pueyacuara secojonaa pueya poonijosacari Pueyaso Secojoja tiajinia, nojoriiri pueyaracaanu seya puecooquiaa narta pueya miishanoocuara sesa. Naajaa, naa nojori miishanoori maja seetanujuanaa na tuujunu pueya miishano sesa. <sup>12</sup> Saniniuujia, Jesucristoori tama na cuaqueyajaaja tarinitiaquiaari pocuara na mosaanura niyacutesanojinia. Cunojuanaari na mosaanu quiquiaari. Majaari socua na pacutesaanu quiniutianuhua monu. Na cusonuucua pa niti, puetunu nocua tiuujia pueya sesa miishanojuanaari tojetaarucujanaa jiyanooshaaquiaa. Naa na tucuatano nuhuaji Pueyaso miini panishano pueratej, nojuajaari na Que miaguejara cajijiaari. <sup>13</sup> Quiarijia tii sashiyari, Pueyaso cuara na paraa shocotare puetunujanaajaatijaj. <sup>14</sup> Naa niquiriyatu pueyano mosaanuucuatej, puetunu nocua tiuujia pueyajaanaari maninia miijacara jatanishaaquiaa, tojetaarucujanaa maninia pa quiniuria, Pueyaso rupuejaca pa quiniuria pueyaracaanu. <sup>15</sup> Pueyaso Sohuanucuaari naa pa niishitijuhuaq naa Pueyaso sequesacari tariucuacaanu na rupaajinia:

<sup>16</sup> "Pa Jiyaniijia Pueyasoori naa sequeya: 'Nio pa quishacari nuhuaji, janiyari tamaatia miiniutianiya cua saquirojosano pueyani, quiarinio cua rupaacua nojori tiuushacari. Janiyari quiarinio cua rupaa nianutaniya nojori jiuujajiniani, na tojjiaa nojori quiniuria. Naajuhuaq, janiyari juhua na naajiotanutaniya nojori niishitijajiniani. <sup>17</sup> Janiyari puetunu sesa nojori miishanojuanaa niyjetanutaniya seetanujuanaani' ”.

<sup>18</sup> Naacuajitij, sesa pa miishano jaara tari seetanujuanaa jiyanooshano quiya, cunora, majaari tari na panishaanu seya puecoosaanura, sesa pa miishanojiniji pa jiyanooshaanura.

*Pueyaso pa ruquere jeequesano poojiata*

<sup>19</sup> Naacuajiti cua panishano cuarta Pueyaso pueyanaa, quiarijia cutara pa naata pa puereyaquiniutia tiuquijionu Pueyaso Quishaquijianaa, Jesucristo shootenuucua na nanaca pocuara. <sup>20</sup> Nojuajaari quiarinio nucuaco pa jaatiaquiaa na Quecua. Nojuajaari juhua pocuaij nuunuquiaari Pueyasooocua. Mijiria Pueyaso Secojoja tiajiniani, Pueyaso Quishaquiri shiquiaruque toqueta mishiquionucia quiquiaari, pueya tiuquitiaaquiniuria Pueyasooocua. Cuno shiquiaruque toque cutaraari sutequiaari Jesu cusosacari. Cunocuaari pa niishitiya, pocujiri juhua nuunusano quiya Pueyasooocua. Neyanu Jesucristocuaari cuno quiarinio nuu. Nocua pa tiuushacari, paari pueyaracaanu rishijacara jatanishaaquiaani juhua nojuajuhuaq. <sup>21</sup> Nojuacuajaari pocuara Secojonajanaa cutara. Na Que Pueyaso secojoquiaari puetunu Pueyaso muerasuucuarajanaa. <sup>22</sup> Cunora, Pueyasooocua pa catecanoriquia seetanujuanaa pa paniniutia nojuaja. Nojuaja pa secojoriquia, seetanujuanaa nocua pa tiuuniutia, maja quenaaja nocuaij pa taacanunuta. Naa pa rupueriquia nojuaja, jatanishano jiuujiaa, juhua poojiaacua Jesu nanaca majiriuutiasano quishacari. Naajuhuaq, puetunu sesa pa miishanojuanaa cuaara jiyanooshano quiiria, naatej, taa pa cuaqueyacuani, pa nanasacari maniniuniacu mohuacata. <sup>23</sup> Naa jaara moojinia tiuquinijosaaquiaari, niaari maninia pohuataquiaari pueya niqiaara Jesuucua nia tiuuniujiniji. Nocua nia tiuushacari, niaacuajaari niishiya puetunu Pueyaso sequesanojuanaari pajaniyara tohuateenutaniya, pueyaracaanu shuquiriaatia pa quiniuria nata. Majaari nia taacanunu nocuaij. <sup>24</sup> Parta Pueyaso pueyaca tacaajiaa pa quiriqia. Panijiaa pa quiniuria pa shiniujitiooriquia, maninia miijiaa pa quiniuriajuhuaq. <sup>25</sup> Noojiaqueya parta Pueyaso pueyari tari jitiquiocanu na rerejonura narta

Pueyaso pueyata. Majaari naa nia miiniujuhuaj. Maninia cutaraari pueyaracaanu pa rerejonura parta Pueyaso pueyata, pa shiniujiutionura. Naa pa miiriquia pueyaracaanu cutara, pa niishishacari pa Jiyaniijia tiuquiniuuri tari catecanoya.

<sup>26</sup> Naa niishiri pueyanaa, maatia pa niishiniu nuhuaji seetanu Pueyaso rupaaajanaa, paa jaara saaja sesa miijioquiaa tama pa panishacarijaajani, ¿cantucua socua pocuara cusionu pacuterohua saajaniuhua? Shaaqui. <sup>27</sup> Naa sacuraatia miijiacani, nojori cuara niishiiria, nojoriiri cocuaatia miya. Nojori jaara nojori jiuujia tacatoyaquiri sesa nojori miiniujiniji, nojoriiri jiyanoehua saniitiosaanutaniya. Narta Pueyaso paraata cojiritiasaanutaniya quejooonu mani quiquiojiniiaari pueyaracaanura. <sup>28</sup> Pueyano jaara Moisés Rootasano tojiaquiquiaari, querajaa pueya jaara nocuara saquirojotaquiaari, nojori sequesanoori seetanujuanaa quiquiaari. Naacuajitij, majaari nocua na taraajenu quishaaquiaari na mosaanura. <sup>29</sup> Moisés Rootasano tojijashijiaca jaara naa miishaaquiaaricuaa, ¿paateeri jiyaniyanijia Pueyaso Niyanu soojeaca jiyanooshaanutaniya, na nanaca shootesaanu jiyatejaca juhua najuhuanarate? ¿Noo pojoritiiri jiyanooshaanutaniyajuhaaj, Pueyaso Sohuanuucura rimiaaquejaca sacuraatiate? ¡Maja! Pueyaso Sohuanuuri nojori cumaquiniu paniriquiaa juucua. Jesu nanacacuaajaari Pueyaso jiyanootiquiaari nojori, Pueyaso pueya nojori quiniuria juucua. Naacuajitij, Pueyaso Niyanu soojeaca pueyari socua jiyanoehua saniitiosaanutaniya Moisés Rootasano tojijashijiaca pueyajiniji. <sup>30</sup> Paacuajaari tari tojiquiaari naa Pueyaso sequesanoni: “Janiyacuaajaari naminiani. Janiyari sesa miijiaa saniitionutaniyani”. Naa naajiotasaaquiaarijuhuaj: “Pa Jiyaniijia Pueyasoori na pueya nequesoreenutaniya”. <sup>31</sup> ¡Jiyanoehua puereeta quiniutianiya cutaraari Pueyaso jiyanooni ruuretajaca pueyara, Pueyaso nequesoreesacari nojori!

<sup>32</sup> Pueyanaa, tariucuacaanu naquiya nia miishaanu nia niishiri quia, niaa jaara shushajanaa Jesuucua tiuquiaari. Naa pueya miitiasacari naquiya nijaniyatej, niaari juhuajaniya rejeretaquiaari saaja. <sup>33</sup> Noojiaqueya nijaniyajinijinoori cararaatia macaatishaaquiaari. Niaari pueya niquiara naquiya miishaaquiaarijuhuaj. Niarta Pueyaso pueya niquishacari naa nia miishaanutej, nojoriiri na puereyaquiniutia nia cojiquiaari saaja, niaacua nojori taraajesacari. <sup>34</sup> Naajuhuaaj, niarta Pueyaso pueyajinijinio jaara nujuatejosano quiquiaari nujuatejojuajinia, Jesu tojitajaca nojori quiniuucua, niaari nojoriicua tiuquijioquiaari, nojori nia cumanijanura nocua nia taraajenuucua. Naajuhuaaj, nia paraa jaara nia jiiitasano casami riutiocojoquiaari tama nojoririjaaja, nojori soosano Jesu pueya nia quiniuucua, niaari juhuajaniya nojoriria tarinitiaquiaari saaja. Niaari saaja shuquiriaatia quiquiaari nia niishishacari niaari jiyocuacaanu jiiitaa socua maninia casaano casamijiniji, pueya jaariuutiasano nijaniyajinijini. Cuno, Pueyaso jiiitasano niaaranoni, cunoori shaajeyashijia casami cutara. <sup>35</sup> Naatej, taa juhuajaniya naquiya miiniu rejeretajaca nia quiquiaaricuaajani, Pueyaso sequesanoocua tiuujia nia quiniuucua, naa Pueyaso sequesanoocua tiuujia nia quiquiquia pueyaracaanu. Pueyasocuaajaari jiyanoehua maninia miiniutianiya nocua tiuuniu tarinitiaashijiaca. <sup>36</sup> Naquiya nia miishacari pueyaracaanu, juhuajaniya nia rejeretariquia saaja, maninia nia tucuatunura puetunu Pueyaso panishano nia miiniurijanaa. Naacuajitij, niaari puetunu Pueyaso sequesanojuanaa masenutaniya, pueyaracaanu shuquiriaatia nia quiniuria. <sup>37</sup> Tariucuacaanu Pueyaso sequesanoocuaajaari naa naajiotasano quiya:

“¡Niaaj! ¡Quera tiuquiya pueyaca Niriquiano! Maja na tarishiniu. <sup>38</sup> Cua jiyanooshaano pueyari pueyaracaanu rishijiacara jatanishaanutaniya saaja Quiyanuucua nojori tiushacari. Saniniujia, tamonu pueyano jaara nocua tiuuniu tarinitiare, nojuaajaari cua soosano pueyano quiniutianiya”.

<sup>39</sup> Cuno pojoriiri saniitiosocoriquiano seetanujuanaa. Pajaniya saniniujia, paa cutaraari maja jiyano pueyajinijioni. Paacuajaari pa Jiyaniijiaacua tiuujiacani, pueyaracaanu nata pa quiniuria shuquiriaatia.

## 11

### *Pueyasooocua tiuuniujiniji pahuatasano*

<sup>1</sup> Pueyaso sequesanoocua pa tiushacari, paari niishiyani paari puetunu Pueyaso sequesanojuanaa masenutaniyani. Nocua pa tiushacari, paari maatia niishiyani puetunu na sequesanojuanaa pajaniyarano pa niquishoo casaani, cunoori seetanujuanaa quiya. <sup>2</sup> Noojiaqueya pa supuetanaajinijinoori seetanujuanaa Pueyaso sequesanoocua tiuujiaa quiquiaari. Naaratej, Pueyasoori nojorijiniji naa sequequiaari: “Cuno pojorini, nojoriiri maninia cua pueya, cua sequesanoocua nojori tiuuniuucua seetanujuanaa”.

<sup>3</sup> Pajaniyara naajuhua. Tariucuacaanu Pueyaso Rupaacua pa tiuushacari, paari ni-shiyani Pueyasoori jiya shipiniquiaari saaja na pocuanuta. Naacujitij, puetunu pa niquishano casaajanaari shipinishaaquiaari niquishoo casaajiniji.

<sup>4</sup> Supuetana Abel tiuuniuucua Pueyasooocua, Pueyasooocua na catijiasanoori socua maninia quiquiaari Pueyasora tarajanu Caín catijiasanojiniji. Naa Abel tiuuniuucua Pueyasooocuatej, Pueyasoori na jiyatequiaari maninia na pueyano na quiniuria. Pueyasoori Abel catijiasano timitiaquiaari, nocua Abel tiuuniuucua. Cunora, tarajanu Caínri Abel moquiaari. Naajaa, naa macu na quishacaritij, nojuajaari pa niishitiojiyajaa Pueyasooocua pa tiuuniuria taa nojuaja tiuquiaaricuaani.

<sup>5</sup> Supuetana Enoc quiniuucua Pueyasooocua tiuujia, Pueyasoori puetunujuanaa na riquiaari jiyocuaaanu, mijiria na shaajeyaquiniuucua. Narta pueya pajesacari nojuaja, majaari tari na quiniu quiquiaari. Pueyasoori tari na riquiaari. Tariucuaaanu Pueyaso Rupaajinia, nojuajinjiiiri pohuatashiyacuaja, Enocnaari Pueyaso timitijia pueyano quiquiaari mijiria na quishacarijia. <sup>6</sup> Seetanujuanaari, paa jaara Pueyasooocua tiuyashijia quirini, majaari pa naata timitiniu Pueyaso. Naacujitij, cante Pueyaso niishiniuucua jiaatiaani, nojuaja cu meta tiuuria Pueyasoori seetanujuanaa quijia. Nojuaja cu meta tiuuriajuhuaj, Pueyasoori na secojonuujuaca tojiquiaa. Nojori panishano miiquiaa nojoririaarijuhuaj.

<sup>7</sup> Pueyasoori supuetana Noé numootequiaari nojuajaari nio jiya pajaashitianiniutianiya, puetunu mijiria sesa mijiacajanaa na shaajanura. Pueyasoori na sequequiaarijuhuaj puereetuca buque na shipininiuria tii na tacatajara pajaacuaji. Jiyacaritij, Noeri maja na niishiniu quijia pajaa. Naajaa, Pueyaso sequesanoocua na tiuuniuucua, nojuajaari Pueyaso tojiquiaari. Naacujitij, nojuajaari necocuata, puetunu necohuatajanaa cureequiaari, necohua niquicohuatajuhuaj. Puetunu narta mijiria quijia pueyajanaari consonuquiaari pajaajinia, nojori tiuyaquiniuucua Noé pohuatasanoocua Pueyasojiniji. Noé cutaraari juhua sesa miyashijara jiyatesaquiaari pueyaracaanu Pueyasota rishijara na quiniuria, Pueyasooocua tiuujia na quiniuucua.

<sup>8</sup> Abrahamri Pueyasooocua tiuquiaarijuhuaj. Pueyaso sequesacari nojuaja tamonu jiyajiniara na pacunura, Abrahamri na tojiquiaari. Tama na jiyajinjijiaa na quiasacari, majaari na niishiniu quiquiaari tee cuniquiria na quiaani. Nojuajaari saaja niishiquiaari Pueyasoori na quijia na niqutionutaniya tama na jiyaranojuaja. <sup>9</sup> Pueyaso niqutionosocoriquiano jiyajinia na tiuquishacari, Abrahamri cuno jiyajinia quiquiaari juhua rucuanajoja pueyano. Abrahamri juhuanujuaja maja cuno jiya camaru na quiniu quiquiaari. Naajaa, Pueyaso sequesanoocua tiuujia quiquiaari pueyaracaanuuri. Nojuajaari saaja seya cajacajiniji shitiasano suhuorotujinia quijia quiquiaari pueyaracaanu. Abraham niyanu Isaacri naa quijia quiquiaarijuhuaj, Isaac niyanu Jacobonio. Pueyasoori cuno pojori sequenu pacutequiaarijuhua coteenujuanaa na sequesano Abraham. Naacujitij, nojoriiri Pueyaso sequesanoocua tiuujia quiquiaari pueyaracaanujuhuaj. <sup>10</sup> Pueyaso jaara Abraham sequequiaari, nojuajaari pueyaracaanu na quijiarano quiquio na niqutionutaniya, Abrahamri niishiquiaari Pueyasoori miriqui sequeriquiaa tama na shipinishano tiacajinjijiaa. Cuno pueyaracaanu rishijia tiacaari Pueyaso niishiriojosano tiaca na saquirojosano pueyarano. Abrahamri cuno tiacara sashijia quiquiaari pueyaracaanu, Pueyaso sequesanoocua na tiuuniuucua.

<sup>11</sup> Naajuhua, seetanujuanaa Pueyaso sequesacari Abraham, nojuaja na muetutentaniya, Abrahamri jiyacari tariucua saaquiano quiquiaari. Neco Saaraari puera motaja quiquiaarijuhua na manajenura. Naajaa, Abrahamri niishiquiaari Pueyasoori cumaacaraca quijia na sequesano na tohuateenura. Naa Pueyasooocua na tiuuniuucuatej, Pueyasoori na cumaquiquiaari neco na manajonura. <sup>12</sup> Naacujitij, mueya shipiniyashijia saaquianoori mueya mueratequiaari. Cuno neyanuucujinino supueno pueyari queraatiara canequiaari, queraatiara juhua riya, serojiaquishoo, juhua shoniniacu caminia shuriuquico paajia jaaquia.

<sup>13</sup> Puetunu cuno pa supuetanaajanaari Pueyasooocua tiuujiaaja shaajecoquiaari. Nojoriiri juhuanujuaja maja na jiiitanu quiquiaari seetanujuanaa Pueyaso sequesano nojori na niqutionosocoriquiano. Naajaa, seetanujuanaa nojori tiuushacari Pueyasooocua, nojoriria, Pueyaso sequesanoori juhua tariucua tucuaaanuji nojori niquishano quiquiaari. Nojoriiri na timitiaquiaari juhua tariucua nojori jiiitasano. Naacujitij, nojoriiri juhuanujia quiquiaari juhua rucojuaca nojori quishacari mijiria. Nojoriiri niishiquiaari, mijiria nio jiyani, majaari seetanujuanaa nojori quiquiorano. <sup>14</sup> Naacujitij, paari ni-shiyani nojoriiri tamonu jiya jiiitanuucua jiaatiariquiaa, pueyaracaanu nojori quiquiorano cutara. <sup>15</sup> Nojori jaara saaja mijiria jiya camaruhua quiniuria panijiaa quiquiaari, nojori maara na supuetujia jiyajiniara rujiuquiaarijuhua. <sup>16</sup> Saniniuujia, nojori cutaraari socua maninia jiya jiiitanuucua jiaatiaquiaari, pueyaracaanu nojori quiquiorano



cutara. Cunoori jiyocuacaanu quiquiu, Pueyaso jeenucasano nojoriria. Naaratej, majaari Pueyaso caririquiniu quiquiaari nojori sequesacari: “Pueyasoori canaa Jiyaniijia”. Nojuacuajaari tari jeenucasano tiaca jiiitiaa nojoririano jiyocuacaanu.

<sup>17-18</sup> Pueyaso sequesano Abraham na mueratesano mueya jaara tari mashajaniyojua quiquiaari, Pueyasoori Abraham saniquiaari, na niishiniuria nojuajate seetanujuanaa na tojjia. Naacuajitij, na sequequiaariri cuaara na panishano niyanu moora, nocuara na catijasocoriquiano. Cuno neyanu Isaaccuajaari Pueyaso sequesano quiquiaari, nojuajiniji canenutaniyari queraatia pueya. Naajaa, Pueyaso sequesacari Abraham, neyanu na monura, nojuajaari maja na ruuretanu quiquiaari Pueyaso. Nojuajaari tari Pueyaso sequesanoocua tiuuriquiaa saaja. <sup>19</sup> Seetanujuanaa Abraham tiuuniucua Pueyasooocua, nojuajaari niishiquiaari Pueyaso na naata neyanu Isaac samiitianiniuhua, nojuaja jaara na more. Naacuajitij, quera Abraham mosacari neyanu Isaac, Pueyasoori nocuaji na tenujuquiaari, tari maatia na niishishacari Abrahamri seetanujuanaa na tojjia. Naacuajitij, Abrahamri neyanuniyojua jaatucuquiaariuhua shuquiriaatia na quiquiojiniohuara, juhua macu samiitianishanohua. Naa Abraham miishanoni, cunoori miriqui quiya pajaniyara taa Pueyaso miiquiaari Neyanu quiari naatajucuani.

<sup>20</sup> Isaac tiuuniucua Pueyasooocujuhua, nojuaja jaara saaquiano quiquiaarijuhuaj, nojuajaari necohua sequequiaari, Jacobo, Esaúnic: “Pueyasoori jiyanohua maninia miiniutianiya niaara, niaacuajinio supueno pueyano, taa na sequequiaari janiyacuajani”.

<sup>21</sup> Jacoboori Pueyaso sequesanoocua tiuujia quiquiaarijuhuaj. Naacuajitij, quera na cusonu panishacari, nojuajaari neyanu José niquiohua sequequiaari: “Pueyasoori jiyanohua maninia miiniutianiya niaara, niaacuajinio supueno pueyano”. Naa na sequenu nuhuaji na jiuhuatej, nojuajaari na natacaacua tanishiquiaari. Pueyaso secojoquiaari na timiniutiaari, na niishishacari Pueyasoori pueyaracaanu miiquiaa puetunu na sequesanojuanaa.

<sup>22</sup> Jacobo niyanu Joseeri Pueyaso sequesanoocua tiuujia quiquiaarijuhuaj. Naacuajitij, quera na cusocari, nojuajaari niishiquiaari Pueyasoori tamacari Israel pueya mashiquiniutianihua Egipto jiyajiniji. Naacuajitij, nojuajaari narta Israel pueya sequequiaari nocua nojori taraajenura. Nojuajaari nojori sequequiaari maja nojori tiujianura na nucuhua Egipto jiyajinia, nojori jaara quiojorohua Pueyaso niquitiosocoriquiano jiyajiniara.

<sup>23</sup> Moisés queya quiniucua Pueyasooocua tiuujia, nojoriiri Moisés jamoquiaari jaara shusha rasaquiaari, mueya maniniuniyojua na quiniucua. Naa na shocojoquiaariiri jiuujianaraca raca, pueyaracaanu jamosano na quishacari. Egipto jiyaniijia Faraónri tarijia sequequiaari, puetunu Israel pueya niquiochua shusha roosano canujuanaa cuaara moojinia quejoosaaria. Naajaa, nojoriiri cuno sequesano tojiyaquiquiaari nojori puereyaquiniutia saaja, Pueyasooocua tiuujia nojori quiniucua.

<sup>24</sup> Naajuhua, Moisés quishacari tariucua cumantumaca, Pueyasooocua tiuujia na quiniucua, nojuajaari na canashitinia Faraón niyatu tamacaquiaari. Nojuajaari tama sequequiaarijaaja: “Majaari Faraón jinianu cua quiniu paniniu. Janiyacuajaari Israel pueyanoni”. <sup>25</sup> Egipto jiyaniijia jinianu na quiniucua, Moisésri na naata juhuajaniya miiniu quiquiaari puetunu na miiniu panishanojuanaa, shuquiriaatia na quiniuria. Naajaa, nojuajaari niishiquiaari cuno shuquiriaatia quiniuri saaja rupaquijia mijiria. Nocuaji, majaari na tamacanu quiquiaari narta Israel pueya, shuquiriaatia na quiniuria tamajaaja. Nojuaja cutaraari narta Israel pueyacua taraajequiaari, Egipto jiya jiyaniijia poonijiotenuucua nojori puera. Cunora, nojuajaari niishiriojquiaari nojuaja cuaara cojiritiasaaria naquya miishaanu narta Israel pueyatajuhuaj. <sup>26</sup> Pueyaso sequesanoocua tiuujia na quiniucua, nojuajaari niishiquiaari Pueyasoori na tojtiajaca miiniutianiya maninia pueyaracaanu cutara. Nocuaji nojuajaari saquiriojquiaari narta Israel pueyata soosano na quiniuria mijiria, maja puetunu Egipto casami jiiitiaja na quiniuria mijiria, Faraón jinianu na quiniucua.

<sup>27</sup> Pueyaso sequesanoocua tiuujia Moisés quiniucua, na nuhuaji, nojuajaari Israel pueya jaatiaquiaari Egipto jiyajiniji. Majaari na puereu quiquiaari Egipto jiya jiyaniijia juaashacari jiyanohua. Seetanujuanaa Moisés tiuushacari na niquyaquishoo Pueyasooocua, nojuajaari Pueyaso niquiquiaari noojiata, juhua na shuriucua quiyano pueyaracaanu. Naacuajitij, Moisésri tama na cuaqueyajaaja cumaquiquiaari maja na tarinitianura miiniu Pueyaso sequesano nojuaja. <sup>28</sup> Quera Israel pueya mashishacari Egipto jiyajiniji, Pueyasoori Moisés sequequiaari: “Janiyari niucua cua seru jiyaronutaniyani, cua tojiyashijia jiyapueranuhua na pucoonura puetunujuanaa. Nocuaji Israel pueya quia numootere, borrego nanaca nojori shuquijutianura na tia tohuatayaji, maja nia jiyapueranuhua cusojuasaanurajuhua”. Moisésri Pueyaso sequesanoocua tiuquiaari. Naacuajitij, puetunu Israel pueya jiyapueranuhajiniujiojuanaani, majaari quenaaja niquiriyatu niyanu mosaanu quiquiaari cutara.

<sup>29</sup> Israel pueya mashishacari Egipto pueyacuaji juucua, Naatunacu jiyanihano camini-aari nojori ritiaquiaari saaja. Nocuaji, Pueyasoori caminia raquitiaquiaari nojori nuura. Na nuhuaji, Pueyasoori Moisés sequequiaari puetunu nojorijianaa cuaara niuutiaara caminia taquijiria. Israel pueya tiuuniuucua Pueyaso sequesanoocua, nojoriiri joo-juashiquio niuutiaquiaari juhua puereetunu nucuaco. Egipto jiya jiyaniijia soldadohua jaara juhua nojori niuutianu paniquiaarijuhuaj, nojoriiri saaja shushiniuquiaari.

<sup>30</sup> Israel pueya tiuquishacari Pueyaso niquitiosocoriguiano jiyajinia, nojoriiri na paraa Jericó tiaca shocua camarucuneetaquiaari siete juuca, naatej, taa Pueyaso rootaquiaari nojori miiniuriacuajani. Naa nojori tiuuniuucua Pueyaso sequesanoocuatej, Jericó tiaca shocua sohuacaari puetunu pojotaquiaarijianaa. <sup>31</sup> Puetunu Pueyaso tojtiaashiji-acajanaari puecoosaaquiaari. Rahab cutaraari jiyanooshaaquiaari. Rahabri naa jiyanooshaaquiaari Israel pueyajinijinio namuenujuna na jamojonuucua tarjia narta pueyacuaji. Rahabri naa maninia miiquiaari Pueyasooocua tiuujia na quiniuucua. Naaratej, Israel pueyari cuno paanatu jiyanooquiaari.

<sup>32</sup> ¿Teyano pa supuetanaajiniji cua pohuatanutaniya nijaniya socuani? Socua queraatia pa supuetanaari Pueyasooocua tiuujiaa quiquiaari. Tariucuaja cua pohuatasano, maninia nia niishiniuria Pueyasooocua tiuujiaa pueyari Pueyaso jiyanooshano. Naajuhuaaj, ma-jaari jeya cua quiniu cua pohuatanura maninia nio pojorijiniji: Gedeón, Barac, Sansón, Jefté, David, Samueljinijinio, socua narta Pueyaso sequesano caminiujiniuaa pueyajini-jinio. <sup>33</sup> Pueyasooocua tiuujiaa nojori quiniuucua, nojoriiri tamasaca jiyaniijianucua miaquejoquiaari na jiyajiniji. Pueyasooocua tiuujiaa nojori quiniuucua, nojoriiri maninia jiyaniijianucua quiquiaari, maninia na jiitianura narta Israel pueya. Pueyaso seque-sanoocua tiuujiaa nojori quiniuucua, nojoriiri Pueyaso sequesano nojori na niquitioso-coriguiano masequiaari. Pueyasooocua tiuujiaa nojori quiniuucua, juuruu sareya ru-paari juhua seecujutasaaciaari saaja, maja na soonura nojori. <sup>34</sup> Pueyasooocua nojori tiu-uniuucua, nojori jaara manijinia quejoosaaquiaari, nojoriiri maja na catenu quiquiaari. Pueyasooocua tiuujiaa nojori quiniuucua, nojoriiri na paraacuaji mashiquiaari saaja, maja na puecoosaaquiaari nijinaquetucujia mueruuta. Pueyasooocua tiuujiaa nojori quiniuucua, sasaca pueyari jiyanohua cumaacaraca quijiacara quiquiaari. Pueyasooocua tiuujiaa nojori quiniuucua, nojoriiri jiyanohua cumaquishaaquiaari na paraa nojori miaquejonura, na paraa nojori mashiquiniuria nojori jiyajinijijuhuaaj. <sup>35</sup> Naajuhuaaj, Pueyasooocua tiuujiaa maajipohua quiniuucua, nojori macuuri samiiticoquiaariuhua nojoriria.

Tamasacaari jiyanohua taraatia miishaaquiaari Pueyasooocua tiuujiaa nojori quiniu-ucua. Cunora, nojori paraa jaara nojori quiooquiaari, nojoriiri puecoonura mianana-josaaquiaari nojori jaara Pueyaso tojinu tarinitaaquiri. Nojori jaara na paraa sequesano tojiquiaari, nojori maara cartesaaquiaariuhua. Pueyasooocua tiuujiaa nojori quiniuucua, nojoriiri saaja paniquiaari nojori cuaara puecoosaaquiaari, naajaa, jiyanohua naquiya na miiniutia. Nojoricuajaaari niishiquiaari, Pueyasoori nojori samiitianijionutaniuhua, jiyanohua shuquiriaatia nojori quiniuria pueyaracaanura cutara. <sup>36</sup> Tamasaca quiniu-ucua Pueyasooocua tiuujiacajuhuaaj, nojoriiri cararaatia macaataishaaquiaari, jiyanohua majacusaquiaarijiaariuhuaaj. Naajuhuaaj, tamasacaari cumayocua shipinishano casaata morojosaaquiaari. Nujuatejojuajinia nujuatejosaaquiaariiri. <sup>37</sup> Tamasacaari saitia jacusaquiaari na puecoosaaquiaari. Tamasacaari na cajiniocua rashiquiojosaaquiaari jacaria jiyaratajata juhua juhuana, socua jiyanohua naquiya na miishaanura. Naajuhuaaj, tamasacaari nijinaquetucujia mueruuta puetujusaquiaarijianaa piyonu. Naajuhuaaj, tamasaca quiniuucua Pueyasooocua tiuujiacajuhuaaj, nojoriiri juhua taanuusano rucoojo-quiaari puetunu tiquiyocujanaa. Casamiijiuucua nojori quiniuucua, nojoriiri saaja borrego shoque, cabra shoque cusupuequiaari nojori cushishocoriguiano. Nojoriiri taraatia miitiasano quiquiaari, naquiya miishanojuhuaj. <sup>38</sup> Juhua taanuusano nojori quiniu-ucua, nojoriiri juhua tashuquioono rucoojoquiaari cariquia jiyajinia, tuhuananuhajini-anio. Tiaajunucua nojori quiniuucua, nojoriiri saaja raaco maquiyonuucua quiquiaari. Mijiria quijiaa pueyari nojori jiyatequiaari juhua najuhuaa quijiaa pueyara. Naajaa, nojori cutaraari seetanujanaa Pueyaso timitiasano pueya quiquiaari, nocua tiuujiaa nojori quiniuucua.

<sup>39</sup> Pueyasocujaaari nojori jiyanooquiaari, seetanujanaa nojori tiuuniuucua nocua. Naajaa, nojoriiri juhuanojuaja maja nojori masenu quiquiaari seetanujanaa Pueyaso se-quesano nojori na niquitiosocoriguiano. <sup>40</sup> Pueyasoori nio pa quishacari nojori sashitiya-jaara, jiyanohua maninia na miishacari pajaniya na Sohuanuta, Neyanu Jesucristooocua pa tiuuniuucua. Na nuhuaji, Pueyasoori puetunu nojoritajanaa pa cojiritianutaniya jataniniu tojetaarucujanaa maninia miijiaa pa quiniuria, na shuriucua na rijiosacari puetunu pajaniyajanaa.

## 12

*Jesu miishano pa niishiriojoriquia, naquiya rejeretajaca pa quiniuriajuhuaj*

<sup>1</sup> Naa pa niishishacari taa queraatia pueya maninia miiquiaari Pueyasoooca tiuujiaca nojori quiniuucuaaani, cunora, tama pa cojetasano najuhuaana casaa pa tarinitiariquia. Tarinitiasiyari puetunu najuhuaana casaajanaa, teyanoooca pa cojequiaa Pueyaso panishano pa miyaquiniuriacuajani. Naajuhuj, puetunu sesa miiniujianaa pa tarinitiare, puetunu pa cumaacajanaa pa jiitianura, juhuajaniya rejeretajaca pa quiniuria. Naacuajiti pa naata maninia puetunu puetunu Pueyaso panishanojuanaa pa miiniuria. <sup>2</sup> Jesu miishano pa niishiriojoriquia pueyaracaanu. Nojuajaari tojetaarucuajanaa na Que Pueyasoooca tiuuji quiquiaari. Nojuajaari niishiquiaari, naquiya na miiniu nuhuaji, na Queeri jiyanohua shuquiriaatia quijara na jiyatenutaniya. Naaratej, nojuajaari juhuajaniya rejeretaquiaari naquiya na miiniu niyacutesanojinia, cararaatia na miishaanujuhuj. Cunora, nojuajaari na Que miaquetajara cajiya, Jiyaniijajanaa na quishacari.

<sup>3</sup> Majaari nia niyajetanu taa Jesu rejeretaquiaari juhuajaniyacuani, pueyaracaanu sesa miijica paracaashacari nojuaja. Nocua nia niishiriojoriquia, niaa mariqui Pueyaso tojinu tarinitianu paniriiri nia taraajenuta naquiya nia miishacari. <sup>4</sup> Niaacuajaari naquiya miishaquiaa, Jesucristoooca tiuujiaca nia quiniuucua. Naajaa, majaari pa Jiyaniijia nia tacartanu, naquiya nia miyaquishaanuucujai. Nia rejeretariquia saaja. Majaari juhuanojuaja nia puecoosaanu quiquianu na tojitajaca nia quiniuucua. <sup>5</sup> ¿Niateeri Pueyaso rootasano niyajetarucuaa tari, na rootasano pajaniya juhua necohuaja? Naa seqeyari:

“Quiyanunaa, majaari cua rootasano quia soonu, janiya jaara quia niishitiojia naquiya cua miitshacari quiajaniyani. Janiya jaara quia nacasure socua maninia miijia quia quiniuriani, majaari cucujai pishiniu. <sup>6</sup> Quia Jiyaniijia cua quiniuucua, janiyacuajaari cua panishano pueyano jiuujiayashijiani sesa na miishacari. Naajuhuj, janiyari cua niyanura cua jiyatesano pueyano saniitiojuani jaara sesa miiriquia”.

<sup>7</sup> Naaratej, juhuajaniya na rejeretajaca nia quiriquia. Pueyasoori juhua necohua nia niishitiojia, maninia na canashitiniuria nijaniya, seetanujuanaa necohua nia quiniuucua. ¿Pueyanoteeri nareja niqijia neyanu, neyanu jaara na tojiyashijia quiriquia? ¡Maja! <sup>8</sup> Naajuhuj, Pueyasoori puetunu necohuarajanaa na jiyatesano pueya saniitioquiaa sesa nojori miishacari. Naacuajitij, Pueyaso jaara nareja niqiriquia nijaniya sesa nia miishacari, cuno maara quiri maja seetanujuanaa necohua nia quiniuucua, juhua tamonu queecuajinio nia quishacari. <sup>9</sup> Naajuhuj, naatujoori pa quishacari, pa queyari pa majacujua, nojori pa tojiyaquishacari. Majaari cunora nojori rerequetejaca pa quiniu quiquiaari. Naacuajitij, pa Que Pueyaso jaara pa saniitioriquia, ¿paateeri na rerequetenutaniyani? ¡Maja! Nojuacuajaari seetanujuanaa pa sohuanu Que, pueyaracaanu rishijia pa quiniuria. <sup>10</sup> Pa queyari pa canashitiojiaari taa nojori paniquiaaricuajani. Nojori rootasacari pajaniya, nojori saniitiosacari pajaniya, cunoori quiquiaari saaja mijiria pa quiniuria maninia. Pa Que Pueyaso saniniujia, nojuajaari pa saniitioquiaa seetanujuanaa maninia miijica pa quiniuria, juhua nojuaja pa quiniuriajuhuaj. <sup>11</sup> Seetanujuanaa, puetunu sanitionujuanaari taraatia pajaniyara. Majaari pa timiniu paa jaara majacusaareni. Naajaa, na nuhuaji, paa jaara na ruuretaquirini, paari socua maninia miijia jatanishaaquiaani, socua Pueyaso tojiijara pa quiniuria juhuajaniyajuhuj.

*Jiyanohua cocuaatiari Pueyaso pa tojiyaquishacari*

<sup>12</sup> Naacuajitij, majaari nia pishiniu pueyanaa, Pueyaso saniitiosacari nijaniya. Nocua nia tiuuri saaja. Nioojica nia cumaquiriohua. <sup>13</sup> Saaja Jesucristo rupaa tojiijica nia quiri, jatarinitiaja Pueyasoooca tiuujiaca mariqui noojia niquijiotereeri. Nojori cuara saniya cumaquishano quiriia cutara.

<sup>14</sup> Tama nia cuaqueyajaaja nia cumaquiriquia, juhuajaniya quijica nia quiniuria puetunu pueyatajanaa. Majaari juayonuujutanu. Nia saniriquia seetanujuanaa sesa miyashijia nia quiniuria. Saaja noo pojori cutaraari pa Jiyaniijia niquniutianiya, seetanujuanaa maninia miijicara jatanishano pueyatej. <sup>15</sup> Pueyasocujaari pa jiyanojia. Tama nia cuaqueyajaaja nia cojure niaa mariqui Pueyaso ruuretareeri na naacunu panishacari nijaniya. Nojuajaari cumaacaracacuaja na cumaquiniuria nijaniya nia panishacari. Naacuajitij, niarta Pueyaso pueyano jaara juaatishaare tamonu miiniuucua sesa nojuaja, nojuaja nia naacure na jiyanooniuria sesa na miinia. Jaara naa miyaquititij, cuno pueyano juaaquiaacari narta pueyacu paaquenutaniya na sesonura queraatia pueya. <sup>16</sup> Naajuhuj, tama nia cojuatooriquiaaja. Naa nia miitiooriquia tamonu nijaniyajinjinio mariqui Pueyaso sequesano na niquitiosocoriquiano pajaniya soojera quiriiri, saniya tama na cuaqueyajaaja na shuqiritiniuria mijiria. Supuetana Jacobo puerana Esauacuajaari naa miiquiaaritij. Tamacari na miaajesacari, nojuajaari Jacobo

sequequiaari: “Cua tarajanunaa, pa que niqutiosocoriquiano janiya, na jiyapueranu cua quiniucuanu, cuno cuara quiria quiaa, quiaa jaara quia sumatuujiniji rupore quiria. Jiyanhua miaajeyanjia”.<sup>17</sup> Niaacuajaari niishiya, na nuhuaji, Esauuri paniquiaari na que secojonura nocuara, jiyanhua maninia Pueyaso miiniuria nojuaja, na que jiyapueranu na quiniucua. Na queeri na ruuretaquiaari saaja. Esauuri jiyanhua na que nenecojoquiaari na nujuquenuta. Naajaa, na queeri maja na naata jataniniu quiquiaari tariucua neyanu Jacobo na sequesano Pueyaso niquiaari.

<sup>18</sup> Nio pa quishacari, pajaniyara, Pueyasoori maja juhua tariucuaaanu na quishacari pa supuetanaa Israel pueyata. Jiyacaritij, Pueyaso jaara Moisés tacaniquiaari Sinaí tuhuananucua, Moisés na niishitiojonura na rootasano na pueyara, tuhuananuuri jiyanhua puereeta niquishano quiquiaari. Tuhuananuuri puereeta noshiriquiaa. Na najacaari tacariquiaa mueruacatej. Jiyanhua ninishiquiri nenuriquiaajuhuj. Paratuuri jiyanhua piyarojoriquiaa puereetajuhuj.<sup>19</sup> Trompeta jonenenuunuuri jiyanhua tojishaariquiaa. Pueyaso pocuanuuri jiyanhua tojishaariquiaajuhuj. Israel pueya tojishacari Pueyaso pocuaano, nojoriiri jiyanhua pueretuquiaari. Naaratej, nojoriiri Moisés sequetuquiaari maja socua Pueyasojuanaa pocuanura nojoriicuaa.<sup>20</sup> Nojoriiri maja socua na rejere-tanu quiquiaari puera puereeta Pueyaso sequesacari nojori. Pueyasoori jiyacari naa sequeriquiaa nojoritij, cuno tuhuananucua nojuajanaa quiniucua:

“Cante nio tuhuananu rupueyani, cuno pueyano cuara mosaaria saitia jacusano, cashanata soj. Naa mijia seru cuara naa puecoosaariajuhuj”.

<sup>21</sup> Puetunu Israel pueya niquishanojuanaari jiyanhua puereeta quiquiaari seetanujanaa. Moisésjanaari na puerequiaarijuhuj. Nojuajaari na puerenuta sequequiaari: “Cua puerenuta teteaanijia”.

<sup>22</sup> Nio pa quishacari saniniuujia, majaari pa catecanonu quiquiaa cuno tariucuaaanu pueya pueresano tuhuananucua. Jesucristo cusonuucua pocuara, paari Pueyaso quiquiojinijanaa tiuquitiaquiaani. Cuno na quiquio sesaari miriqui sequeshiya “Sión tuhuananu”. Na pueya pa quiniucua, nojuajaari jiyocuacaanu pueyaracaanu pa quijiarano tiaca jiiitia. Cunoori seetanujanaa jiyocuacaanujinio Jerusalén tiaca. Naacuajitij, paari jiyanhua queraatia Pueyaso seya rupuequiaani, Pueyaso pa maninihuaquetanura nojoritiajuhuj.<sup>23</sup> Paari tii rerejonutaniya puetunu parta Pueyaso pueyatajanaani. Pueyaso saquiriojosano pueya pa quiniucua, pa sesacaari jiyocuacaanu Pueyaso nequesoretuneejinia naajiotasano quiaa. Paari Pueyasooica catecanoquiaani. Nojuajaari puetunu pueya nequesoreenajanaa. Jesucristo niyacarijia Pueyasooica tiuujiaca sohuanuhuari tii quiyajuhuj, canapue Pueyaso jiyatequiaari tojetaarucujanaa sesa miyashijiacaracujani.<sup>24</sup> Jesucristoori tii quiyajuhuj. Nojuajaari tama na cusonutajaaja Pueyaso jyanootiquiaari nocua tiuujiaca. Tama na nanacajaaja na shootenuucua pocuarajuhuj, paari cunota jeequejosaaquiaari tojetaarucujanaani. Naacuajitij, Jesu nanacaari jiyanhua socua maninia Abel nanacajiniji. Caín monucua tarajanu Abel, Abel nanacaari Pueyaso shiniujiya na mona cuara mosaariajuhuj. Jesucristo nanaca saniniuujia, cunoori Pueyaso pa jyanootiquiaacujua.

<sup>25</sup> Cunora pueyanaa, tama nia cuaqueyajaaja nia cojuare maja nia ruuretatura Jesucristo Rupaa. Tariucuaaanu, pueyari jyanoyaquishaaquiaari nojori ruuretasacari Pueyaso sequesano, nojuaja jaara nojori piriyojouquiaari Sinaí tuhuananujiniji. Nojoriiri jyanoyaquishaaquiaari nojori tojiyaquiniucua mijiria Pueyaso quishacari na sequesano. Nojori jaara naa jyanoyaquishaaquiaaricuaa, nio pa quishacari saniniuujia, çpaatucua taa jiyanooshaariquia pa ruuretasacari Pueyaso quiarijiani, jiyocuacaanuji na piriyosacari pajaniyani?<sup>26</sup> Pueyaso pocuasacari Sinaí tuhuananujiniji, jiyari na pocuasacari teteaquiaari. Quiarijia saniniuujia, Pueyasoori seetanujanaa sequeya: “Janiyari socua caminiutianihua jiya jiuuquiutianuni. Maja saa jiyaja. Jiya cajiniocuanio. Jiyacunojuanaari quiniutianiya naa cua miiniu”.<sup>27</sup> Naa na sequesacari taa socua na caminiutianihua jiya jiuuquiutianuni, naacuajiti paari niishiyanu, puetunu na shipinishano casaajanaari shaajeyaquishaquiji shaajenutaniya. Saaja noo casaari cureenutaniya, maja na naata pootiosano casaatej.<sup>28</sup> Quiarinio quiquio, Pueyaso shipinishano na niqutiosocoriquiano pajaniyani, cunoori maja na naata shaajasaanu quiniutianiya cutara. Paari jyanijianucua quiniutianiya tii pueyaracaanuni. Pa Pueyasoori jiyanhua maninia miiniutianiya pajaniya. Cunora pa shuquiritiare nojuaja. Paari na shuquiritiyani pa timitiasacari nojuaja. Naacuajitij, nojuaja pa timitiare jiyanhua pa paniniutia nojuaja, pa puerenutano.<sup>29</sup> Nojuajaari puereeta mani, Neyanu ruuretajaca shaajaja, sesa pa miishano catijajuhuj.

## 13

*Taa pa miyani Pueyaso pa timitiniuria*

<sup>1</sup> Majaari panitioonu nia tarinitianu. Naa Pueyaso pueya nia quiniucuatej, pueyaraanu panitiojuaca nia quiriquia. <sup>2</sup> Naajuhuaaj, majaari rucoojuaca ruuretanu, niaacua nojori tiuquishacari. Nojori panijia nia quiriquia. Noojiaqueya pa supuetanaajinijin-iocuajaari Pueyaso seya masuuquiaari na tiacora, nojori jiyanihacari nareja pueyano naasucua.

<sup>3</sup> Nujuatejosano pueyacua taraajejaca nia quiriquia. Tama nia cuaqueyajaaja nia jiyatere juhua nojoritia nujuatejosanojuhuaj, nojoriicua nia taraajenura seetanujuanaa. Naquiya miitiasano pueyacua taraajeja nia quiriquiajuhuaj. Nia niishiriquia, niaari na naata naa miitiasaanujuhuaj.

<sup>4</sup> Pueyasojuanaacuajaari pa niishitioquiaari pa camitioonura. Cunora, camitioonu pueya cuaara saaja neyacata, necocuata quijia quiiria. Cante camiojuani, nojuaja cuaara tama na cuaqueyajaaja cojuara maja narta pueyano niquiocua na numuetucunura, na camishoo maajinio. Nia niishiri, Pueyasocuajaari naa sacuaraatia miijiaa saniitionutaniya.

<sup>5</sup> Majaari cumaneeca porocua nia quiniu tama niaarajaaja nia jitianura. Juhua-janiya quijia nia quiriquia nia jiiitiasanota. Nia niishiri, Pueyasocuajaari sequequiaari: "Majaari cua cartenu quiniutianiya nijaniya juhua japueyojua nia quiniuria. Majaari quenaaja cua tiujianu quiniutianiya nijaniya". Cunora pueyanaa, maja nia tacaaniu. <sup>6</sup> Naa seetanujuanaa na sequesanoocua pa tiuushacaritij, pa naata sequenu taa supuetana David naajotaquiaari na sequesanoaujani. Naa sequequiaariiri:

"Jiyaniijia Pueyasocuajaari cua naacuna. Naacuajitij, majaari cua puerenu quiniutianiya. Majaari pueyano na naata taa miiniu janiya".

<sup>7</sup> Coteenujuanaa nia jiiitianaa pueya nia niishiriojoriquia, noo pojori canapueete shushajanaa nia tojtioquiaari Pueyaso rupaacuajani. Nojoriiri seetanujuanaa Pueyaso tojjijiaa quiquiaari, Jesucristoocua tiuujiaa nojori quiniucua. Juhua nojori quiniucua jiaatiajaca nia quiriquiajuhuaj, taa nojori quiquiaaricuaani.

<sup>8</sup> Taa quijia Jesucristo quiquiaari tariucuaaanuni, nojuajaari naa quiyajaa. Naa quiniutianiya pueyaracaanuuri. Majaari na jatanu. <sup>9</sup> Naaratej, majaari tamaatia niishitiojosano nia tojiniu. Miaquenu pueresanojiniji niishitiojosano cutaraari najuhanaj. Cunoori maja quenaaja na cumaquiniu quiquiaari na tojtiajaca. Naajuhuaaj, majaari pueyacuara secojonaa jiuujia cumaquishaanu quiquiaari nojori miaquesacari Pueyasoro pucoosano seya shujiniji. Pueyaso Sohuanu cutaraari poojia cumaquiquiaa, panijiaa pa quiniuria. <sup>10-11</sup> Saniniuujia, pueyacuara secojonaa jiyaniijiaari maja noo shu na miaquenu quiquiaari cutara, Israel pueya jiyanooshaanura pucoosaaquiaritij. Pueyacuara secojonaa jiyaniijiaari cuno seya nanaca tiuquitiaquiaari Pueyaso Quishaquijianaa puetunu marijarajanaa, cuno nanaca na majiriuutianura tii. Na nanaca shootesano seruuri saniniuujia tiacajiniji jiyatasaaquiaari mij, tii na catijiasaanura puetunujuanaa. Pueyacuara secojonaa jiyaniijiaari tojetaarucujanaa tenujusaquiaari maja na miaquenura cuno shu. Nio pa quishacari saniniuujia, paari jiyanohua cumaquishaquijiaani Jesucristo cusonuucua pocuara. Cunojiniji, paari seetanujuanaa Pueyaso rupuesano quiyacuajani. <sup>12</sup> Naajuhuaaj, Jesucristo mosaanura pocuara, nojuajaari Jerusalén tiacajiniji jiyatasaaquiarijuhuaaj, naatej, taa na nanaca shootesano seya jiyatasaaquiaari tamaquiri-cuaani. Nojuajaari naa tama na cuaqueyajaaja tarinitiaquiaari na mosaanura, tojetaarucujanaa jeequesano pa quiniuria puetunu sesa pa miishanojinijijianaa. <sup>13</sup> Nojuajaari jiyanohua cararaatia teetsaaquiaari niyacutesanojinia pa niti. Naa Jesu miiniuucua pocuaracuataj, Pueyaso niishiyashijiaa jaara cararaatia miiriquia pajaniya Jesuucua pa tiuuniucuaani, juhuaajaniya na rejertajaca pa quiriquiajuhuaj. <sup>14</sup> Pajaniyara, Jesuucua tiuujiacani, nio jiyari maja pa quiquio. Mijiria, shaaquiri pueyaracaanu rishijia quiquio pajaniyarano. Cunora, paari jiyocuaaanu pajaniyarano Pueyaso shipinishano tiacaacua jiaatiaani. <sup>15</sup> Naa Pueyaso jitianuucua pueyaracaanu rishijia quiquio pajaniyarantej, nojuaja pa timitariquia pueyaracaanu. Neyanu Jesucristo quiniucua pocuara Secejona, nojuajaari pa tiuquitiaquiaa na Queecua. Nio pa quishacari quiarijiani, majaari Pueyaso paniniu pa seya nanaca. Nojuacuajaari paniquiaa pa shuquiritianura nojuaja cutara. Naacuajitij, pa rupaa pa jiyatere Pueyasora na quiniuria saaja, pueyaracaanu nata pa manihuahuaqueetanura nojuaja. Cunocuajaari na panishano. <sup>16</sup> Naajuhuaaj, majaari nia niyajetanu maninia nia miiniuria niarta Pueyaso pueya. Nojori jiiitaaquishacari nojori panishano, nia jiiitasano casaajiniji nia niqutiojoriquia nareja nojori. Paa jaara naa miijiaa quirini, paari juhua Pueyasora pa casa niqutioyani. Cuno cutaraari na timitiquiaa.

<sup>17</sup> Cuarta Pueyaso pueyanaa, nia jiitianaa tojitiajaca nia quiriquia. Majaari nojori niishitiojosano nia ruuretanu. Nojoricuajaari nioojiaca cojuaquiaa pueyaracaanu, nojori niishishacari Pueyasoori nojori nequesoreenutaniya nia jiitiajaca nojori quiniuucua. Naaratej, shamaatia nojori tojitiajaca nia quiriquia maninia, Pueyaso nojori pohuata-nura shitimia niajanijajini. Naa jaara nojori tojitiaashijiaca quiri, nojoriiri Pueyaso pohuatanutaniya na taraajenuta niajanijajini. Jaara naa quiriritij, niaa cutaraari taraatia quiniutianiyajuhujaj.

<sup>18</sup> Canaacuara nia secojonuuriquia. Canaacuajaari saaja maninia miiniuria saniniuji-uquiaa pueyaracaanuni. Naacujitij, canaa jiuujiaari panaatia quiya Pueyaso niquiara. <sup>19</sup> Janiyari jiyanhua paniyani cucuara nia secojonura, Pueyaso tiuquitiniuhuara ritia janiya niaacua.

*Nio naajiona panishacari maninia Pueyaso miiniuria pueya, na saruhuatasacari pueya-juhujaj*

<sup>20</sup> Jesucristo shootenuucua na nanaca pocuara, paari niishiyani puetunu Pueyaso seque-sanojuanaari seetanujuanaa pajaniyarano quiniutianiya pueyaracaanu. Naa Jesucristo miishanoocua pa tiuushacaritij, na Que Pueyasoori pa jiyanoocuaa, juhuajaniya pa rupuenura nojuaja. Pueyasojuaanaacuajaari pa Jiyaniijia Jesucristo samiitianiquiaariuhua macujini. Nojuacuajaari pa cojuana, na panishano pueya pa quiniuucua. jiyanhua maninia pa Pueyaso! <sup>21</sup> Neyanu Jesucristoocua nia tiuuniuucua, nojuaja cuaara jataniiria niajanija tojetaarucujanaa jeenucuasano nia quiniuria, taa na paniyacuajani. Nojuaja cuaara naa miiria niajaniyatej, maninia nia tucuatnura puetunu na panishanojuanaa. ¡Pa Jiyaniijia Pueyaso cuaara pueyaracaanu shuquiritiasaaria jiyanhua maninia na quiniuucua! Cuaara naa quiiratej.

<sup>22</sup> Cuarta Pueyaso pueyanaa, jiyanhua nia secojijaniijia maja nia ruuretanura secaja rupaata cua shiniujiushacari niajanija nio cua naajiojina. <sup>23</sup> Naa niishiri pueyanaa, parta Pueyaso pueyano Timoteori nujuatejojuajini tari tohuatesaarohuacuaa. Nojuaja jaara tarishiyaquiri cucua na tiuquiniuria, janiyari cucua na ruponutaniyani nia niquiniuucua cua quiasacari.

<sup>24</sup> Naajuhujaj, quiria nia saruhuatate puetunu nia jiitianaa pueyajanaa, puetunu cuniqui quiniaa parta Pueyaso pueyajanaa. Italia jiyajinijinio parta Pueyaso pueyari nia saruhuataajuhujaj.

<sup>25</sup> Pueyaso cuaara na Sohuanuta cumaquiiria puetunu niajanijajanaa.

## SANTIAGO NAAJIONEE

### *Santiago naajiosano niyaquejeno pueyacuara*

<sup>1</sup> Janiyari Santiagoni, Pueyaso seru, Neyanu Jesucristo serujuhuj. Nia saruhuataanijia puetunu tiqiyocua jiyacajinijanaa niyaquejeno Israel doce niqiuhuacuajinio caneno pueyanaa.

### *Niishitiaja Pueyasojiniji masesano*

<sup>2</sup> Cuarta Pueyaso pueyanaa, shuquiriaatia nia quiriquia niaa jaara taraatia miishaare, niaa jaara naquiya miishaarejuhuj. <sup>3</sup> Niaacuajaari niishiya, niaa jaara Pueyasooqua nia tiuuniuucua saniniujiushaare, niaari socua juhuajaniya sashijiacara quiniutianiya. Naaaraari naa miishaanutaniyaqui nia sashishacari Pueyaso cuaraa puetunu maninijanaa miiria niaarajaatijia. <sup>4</sup> Nia rejeretare seetanujuanaa maninia sashijiaa nia quiniuria, majaari quenaaja nia taacanuunu. Niaa jaara naa miijia quiriritij, niaari maninia jeenucuaasano quiniutianiya, pueyaracaanu maninia miijia nia quiniuria.

<sup>5</sup> Tamonu nijanyajinjiniio jaara niishiyaquiri taa na miiniutianiyani, nojuaja cuaraa Pueyaso maseara, Pueyaso na secjosacari. Pueyasoori na niishitiaja niqutionutaniya. Nojuajaari puetunu pueyajanaa niqutioquiaa, capora na quiniuucua. Majaari na juaaniu niaa jaara na masere. <sup>6</sup> Nia masesacari, seetanujuanaa nia tiuuri Pueyasooqua, majaari quenaaja nia taacanuunu. Cante na masesacari taacanuujani, nojuajaari juhua paratu piyarojosano mohuaca, naatej, taa paratu tacaroyiaa mohuaca na piyarojosacariuaani. <sup>7</sup> Jiyano pueyanotej, Pueyasoori maja na masesano na niqutionu quiniutianiya, noojia niqijijoteja na quiniuucua. <sup>8</sup> Noojia niqijijoteja pueyanoori quiarijia maseya na panishano. Tariqui na secjosacari saniniuujia, tamonu casaa maseyari, na paniyaquishacari coteenu na masesanocuaa. Jiyano pueyanoori noojia niqijijoteja pueyaracaanu. Majaari quenaaja na miiniu panishano na tucuatunu quiniutianiya.

<sup>9</sup> Cua panishano Pueyaso muerasunaa, niaa jaara casamijiu quiru, naajaa, shuquiriaatia nia quiriquia. Pueyasocujaari nia jiyatequiaari na muerasura, na jitiisanoinijia nia jitianurajuhuj. <sup>10</sup> Saniniuujia, niaa jaara casamiriaca pueyano quiru, shuquiriaatia nia quiriquia Pueyaso jiyanooshano nia quishacari. Niaacuajaari niishiya niaari tojetaarucuaajanaa saniitosocoriquiano quiquiaari juucua sesa miijia nia quiniuucua tarijia. Casamiriaca pueyanoori seetanujuanaa juhua naana shuu, majaari na rishiniu. Saaja rupaquijia niqishiya shanohuari. <sup>11</sup> Pananu jaara nasaatia jama, neyonaari sorequee. Na shuuri tiqii. Shanohua niqishanoori shaajequejuhuj. Casamiriaca pueyanoori naajuhuj. Na casami na niqutiojosacarijia na canijianura juucua, canashyaquiji shaajenutaniyaariuhuj.

### *Naquiya pa miishacari*

<sup>12</sup> Shuquiriaatia quijia cutaraari Pueyasooqua tiuujia, cante taraatia na miishacari rejeretaja saajani. Naa taraatia na saniniujiushaanuucuatej, nojuajaari juhua cutara jiyaniijia tuhuaja niqutiosaanutaniya, pueyaracaanu rishijia pa quiniuria. Cunoori Pueyaso niqutionu panishano na panijiaa, taa na sequequiaaricuaajani. <sup>13</sup> Naa jaara sesa miiniuucua jiaatjaa, majaari sequenu: "Pueyasoqui sesa cua miitini paniya". Pueyasoori maja sesa miijia. ¿Pa Jiyaniijiatucua casaara sesa miitiri pajaniyani? <sup>14</sup> Saniniuujia, tama poojia sequejaarijia pa shiniujuquiaa sesa pa miiniuria. Naajuhuj, tama pa niishitiajajaarijia pa sapojuquiaa sesa pa panishano pa miiniuria. <sup>15</sup> Naa sesa miiniuucua pa jiaatiasacarijij, cunora paari sesa miiquiaani. Naa sesa miijia pa quishacaritij, paari cunora shaajasaanutaniyani.

<sup>16</sup> Cuarta Pueyaso pueyanaa, maja tama nia cuaqueyajaaja nia sapojonu. <sup>17</sup> Puetunu maninia casaajanaa pa masesanoni, cunoori Pueyaso niqutiosano jiyocuaaanuji. Nojuajaari puetunu jiyocuaaanu pa niquishano casaajanaa shipinijioquiaari, mijiria pa cuhatariquiano. Pueyasoori pueyaracaanu maninia quijia. Majaari na jatanu tamaatia na quiniuria, na cojuaaquiniuria pajaniya. <sup>18</sup> Pueyasocujaari pa sohanu samiitianijioquiaariuhua na rupaacua pa tiuushacari. Nojuajaari pa jiyatequiaari quiarinio na muerasu pa quiniuria. Naacuajitij, taa pueyano tutaacuaa na shuquiriniutia na saaco rishishacariuaani, Pueyasoori naa juhua pa tutaquiaari na shuquiriniutiajuhuj, coteenujanaa na jiyapueranuhua pa quiniuucua. Nojuajaari tariuacuaanujiniji naa pa riurioquiaaritij.

### *Seetanujuanaa Pueyaso tojitiajaca*

<sup>19</sup> Naacuaajiti cua panishano cuarta Pueyaso pueyanaa, cua tojitiare. Puetunu nia-janiyajanaa cuaara quiriia ritia tojjia, jacaria pocuaja. Cuaara quiriia shiniquiajuhuaj, maja ritia juaajia. <sup>20</sup> Pueyanoori maja na naata Pueyaso panishano miiniu na juaaniutia. <sup>21</sup> Naaratej, nia cartere puetunu sacuaraatia nia miiniuianaa, puetunu sesa nia niishiriojosanojuanaano. Nio pa quishacarini, puera sesa miiniuuri quiquiaa. Naajuhua pueyanaa, juhua maninia naatujua nia tojiri Pueyaso rupaa, taa nia niishitiojosaquiaar-icuaajani. Majaari na ruuretano. Pueyaso rupaacuajaari cumaacaraca tojetaarucujanaa sesa miyashijiacara na jiyatenura pajaniya.

<sup>22</sup> Pueyaso rupaa tojjia nia quiri seetanujuanaa. Majaari nia numaa shama nia tojtianunoj. Niaa jaara Pueyaso rupaa tojijaquiri, niaari tama nia cuaqueyajaaja sapojija. <sup>23</sup> Pueyano jaara Pueyaso rupaa tojiquiaa saaja na numaa shama, nojuajaari juhua noo pueyanojua, na jiquioco niquirii niqutiujinia narejaari. <sup>24</sup> Jaara tacateyaro-hua, na jiquioco niyajetaseequiohuari taamuecate na jiquioco quiriqiaani. <sup>25</sup> Pueyaso rootasanoori jiyanooria maninia, maja quenaaja sesa. Sesa miiniuucua jiiitnio pueyano jaara na tojjia quiri, nojuajaari na naata sesa na miiniu tarinitianu. Cante na numaama na racatajani, nojuajaari shuquiriaatia quijia quiniutianiya cutara. Puetunu na miishanojuanaari maninia quiniutianiya pueyaracaanujuhua.

<sup>26</sup> Cante na niti rejetyashijiani, nojuaja jaara tama na cuaqueyajaaja jiyaniya: “Janiya cutaraari Pueyaso tojjiani”, cunoori tama na cuaqueyajaaja sapojijajaacujua. Saaja sacuaraatia pocuaja quiya pueyaracaanuuri. Nojuajaari najuhua Pueyaso rupaa tojjia. <sup>27</sup> Cante seetanujuanaa pa Que Pueyaso rupaa tojjiani, nojuaja cuaara japueyojuaca niquniuucua rucuanera, nojori na naacunura. Cuaara naa miiria mashiquopuerajuhua, nojori taraajenucusacari nojori na cumanijianura. Naajuhua, cuaara tama na cuaqueyajaaja cojuara, narta pueya na miyaquiniuucujia sesa. Naa miijia pueyanotej, nojuajaari Pueyaso pueyano cutara.

## 2

### *Maja cumaati rimiajata pa paniniu pueya*

<sup>1</sup> Cuarta Pueyaso pueyanaa, pa Jiyaniijia Jesucristoori shacantuca cumaacajinia quijia. Nojuacuajaari tojetaarucujanaa maninia quijia. Nocua tiuujia nia quishacari, majaari rimiajata nia niquniu tamasa. ¿Pa Jiyaniijiateeri pa sooquiaaricuaa, ninishi quijia pa quishacarijiani? Maja. <sup>2</sup> Cunora cua sequesanojinia nia niishiriojore: casamiriaca pueyano jaara nia secojonuujua tiajinia tiuquimia, maniniuqu toqueraca, jaaniishoracaju-hua, ¿taa nia miiniutianiya? <sup>3</sup> Niaari naa sequeja: “Niya quia cajishii pueyanonaa, cajitit maniniuujiani”. Saniniuujia, toqueeju pueyano jaara jiyacari tiuquimajuhua, jiyareta curuutuquenaniojuua, niaari na sequerecujua: “Cuniquijia quia nujuare”. Casaa maaraja: “Cuniquijia quia cajiri quiaa tii nujaani”. <sup>4</sup> Niaa jaara naa miiritij, niaari tama nia cuaqueyajaaja jiyateree juhua niarta pueya nequesoreenara. Niaari casamiriaca pueyano jiyaniya nojuaja naasucua socua maninia pueyano casamijiu pueyanojiniji. Naaratej, niaari casamiriaca pueyano shuquiritini panija.

<sup>5</sup> Cua tojitiare cuarta Pueyaso pueyanaa, ¿majateeri nia niishiniu, Pueyasocuaajaari casamijiuucua pueya saquirojoquiaari nocua tiuujia nojori quiniuria? Nocua tiuujia nojori quishacari, nojori juhua jiyano hua casamiriaca Pueyasora. Naajuhua, Pueyasoori nojori jiyatenutianiya jiyaniijianucua nojori quiniuria, puetunu Pueyaso jii-tiasanojuanaa nojori jiiitianura. Naa miiniutianiya na panijiaacari taa na sequequiaari seetanujuanaacuajani. <sup>6</sup> Nijaniyarijiatat, niaari nojori cararojoquiaacujua. ¿Majateeri nia niishiniuujuhua, cuno casamiriaca pueyacuajaari nia nohuasejoquiaa na sapojonuta? Nojori nia jaamitiquiaa nequesoreenaacua, niaacuara na saquirojotanura. Nojori nia miitiquiaaqui nia jiiitiasano casaanijoyua na jaariuutianura puetunujuanaa. <sup>7</sup> ¿Majateeri nia niishiniu, nojoricuajaari pa shuquiritiasano Jiyaniijia sesacuaiaajuhua? Pa Jiyaniijia sesa jiyaniquitiquiaa na soonutaari.

<sup>8</sup> Puetunu Pueyaso rootasanojinijianaani, nioori socua tojishocoriquiano. Naa naajio-tasano quiyari:

“Pueya nia paniri taa nia paniya tama nia cuaqueyacuaaani”.

Pueyanaa, niaa jaara cuno rootasano miijia quiriqia, niaacuajaari maninia miijia. <sup>9</sup> Saniniuujia, niaa jaara rimiajata paniri pueya, niaari sesa miya. Niaari sanitiocoriquiano, Pueyaso niishitiojosano tojiyashijia nia quiniuucua. <sup>10</sup> Pueyano jaara puetunu Pueyaso rootasanojuanaa tojiquiaa maninia, saniniuujia, jaara niquiriyatu cuno rootasanojiniji tojiyashijia quiri, cuno pueyanocuaajaari Pueyaso tojiyashijia. <sup>11</sup> Pueyasojuaacuajaari sequequiaari: “Maja nia camishoo maaji nia numuetucunu”. Sequequiaarijiaariuhua: “Maja monu”. Naacuajitij, pueyano jaara na camishoo maaji



numuetuqueyaquijia quiri, saniniuujia narta pueyano moyari, cuno pueyanoori Pueyaso rootasano tojiyashijiajuhuaj. <sup>12</sup> Niaa cumaati niishiya, Pueyasoori na muerasu nequesoreenutaniya taa nojori tojtiaquiaari na rootasanocujani. Nocuaji tama pa cuaqueyajaaja pa cojuare taa pa miiquiaani, taa pa pocuaquiaani. Nia niishiri, paari nequesoreesaanutaniya pa miishanojinijini, taa pa miiquiaari parta pueyani. Cante pueya panijia quiyani taa Pueyaso rootaquiaaricujani, nojoriiri jiyanooshaanutaniya taa nojori jiyanooquiaaricuaa tamasaani. <sup>13</sup> Saniniuujia, canapuate narta pueyano jiyanooyashijia quiquiaarini, Pueyaso nequesoreenu juuca puetunu pueyajanaa, nojoriiri jiyanooyaquishaanutaniyajuhuaaj. Canapuate jiyanoojia cutarani, nojoriiri jiyanooshaanutaniya cutara, taa tamasa nojori jiyanooquiaaani. Nojoriiri shuquiriaatia quiriqiano cuno juuca, Pueyaso nequesoreesacari nojori.

*Pueyasoocua tiuujiaaari maninia miijiaa*

<sup>14</sup> Cuarta Pueyaso pueyanaa, ¿maninate pueyano jaara sequere: “Janiyacujaaari Pueyasoocua tiuujiani”, nojuaja jaara maninia miyashijia quiyajaa? Nojuaja jaara maninia miijiaa jatanishoo quiyajaa, najuhuaa sequeyari: “Pueyasoocua tiuujianijia”. <sup>15</sup> Naacuajitij, tamonu parta Pueyaso pueyano jaara pa sequesee: “Maja cua jiitianu toque. Maja quenaaja cua miaquesocoriquiano cua jiitianujuhuaaj”, ¿taa pa miyani? <sup>16</sup> ¿Maninateeri paa jaara na sequereni: “Juhujaniya quia quiaarohua. Quia miaquesuhua. Toque quia cushishuhujuhuaaj”? Maja. Paa jaara quenaaja na niqitioyaquiri na panishanoni, pa sequesanoori najuhuanaj. <sup>17</sup> Naajuhuaaj, pueyano jaara sequere: “Jesucristoocua tiuujianijia”, jaara seetanujanaa Pueyaso rootasano tojiyaquiri, na sequesanoori najuhuanajuhuaaj. Jiyano pueyanoori maja seetanujanaa Jesuucua tiuujia. Paa jaara seetanujanaa Jesuucua tiuujia quirini, pocua maninia miijiaa quiriujuhuaaj. Maninia miyashijiaari maja seetanujanaa Pueyasoocua tiuujia.

<sup>18</sup> Pueyano jaara tamonu sequeriquia: “Quiaari sequeya quiaa Jesuucua tiuujia cutara. Janiyari saniniuujia maninia miijiani. ¿Taa cua niishiniutianiyan quiaari seetanujanaa Jesuucua tiuujia, quiaa jaara maninia miyaquiri? Maja cua naata na niishiniu. Janiya cutaraari quia niishiniutianiyan janiyari seetanujanaa Jesuucua tiuujia cutarani, maninia cua miishacari”. <sup>19</sup> Pueyaso Rupaacua quia tiuuniucua, quiaari niishiyacuja Pueyasoori jiyaniijajanaa. Cuno quia tiuuniuuri maniniacujaa. Naajaa, nia niishiri, samaruhuari cuno niishiyajuhuaaj. Na puerenuta nocuaji tetcatiuyari. <sup>20</sup> Mosanucuananaa, ¿majateeri nia niishiniu? Jesuucua tiuujiaa nia quishacari, niaa jaara maninia miyashijiaa quiyajaa, Jesuucua nia tiuuniuuri najuhuanaj, nia tojiyaquishacari Pueyaso. <sup>21</sup> Niaacuajari niishiya taa Pueyaso saniquiaari pa pupetana Abrahamni, na niishiniuria seetanujanaa nocua tiuujiatee. Pueyasoori naa na saniquiaari: na sequequiaari: “Abrahamnaa, quia niyanuniyojua quia more cucuara quia catijiasocoriquiano”. Majaari Abraham ruuretanu quiquiaari Pueyaso sequesano nojuaja. Naaratej, Pueyasoori naa sequesquiaari: “Jiyanohua maninia Abraham, cua tojjiaa cutara”. <sup>22</sup> Naacuajiti cuarta Pueyaso pueyanaa, naa Abraham tojiniucua Pueyasotej, paari maatia niishiyani nojuajaari seetanujanaa Pueyasoocua tiuujia quiquiaari. Naajuhuaaj, Pueyaso sequesano na miishacari, nojuajaari Pueyasoocua tiuujia quiquiaari tojetaarucujanaa. <sup>23</sup> Naa Abraham miiniucuatej, nojuajaari tariucuaaanu Pueyaso rupaajinia nojuajinjiji naajiotasano tohuateequiaari. Naa sequeyari:

“Abrahamri Pueyasoocua tiuujiaari. Naa na tiuuniucua Pueyasoocuatej, Pueyasoori na jiyatequiaari juhuaa tojetaarucujanaa sesa miyashijia na quiniuria”. Naa Abraham quiniucua Pueyaso tojjiatej, nojuajaari sequesaaquiaari Pueyaso rupenata.

<sup>24</sup> Naacuajiti pueyanaa, Pueyasocujaaari na sequesano miijia jiyanooquiaa. Maja cutaraari na jiyanooni noo pojori, nocua tiuuniu sequeja najuhuanatej. <sup>25</sup> ¿Niaate niishiyajuhuaaj taa Pueyaso jiyanooquiaari Jericó tiacajinjini paanatucuaani, nooj, Rahab jiyanihanotej? Pueyasoori na jiyanooquiaari neyatu na quiniuriajuhuaj. Na jiyanooquiaari maninia na miiniucua caapiqui pueyano Israel pueyajinjini. Rahabri cuno pueya jamojoquiaari na tiaco. Na nuhuajij, nojori mashiquiquiaariuhua tamocoori, narta Jericó tiacajinjini pueya puecyaquiniucujaj cuno pojori. Rahabri naa maninia miiquiaaritij Pueyasojinjini na tojishanoocua na tuushacari. Niishiquiaari Pueyasoori Israel pueya cumaquina quiquiaari. <sup>26</sup> Nio pohuatanoori pa niishitiojia, naatej, taa pa cuaqueya macu quiya sohuanuucuaani, naajuhuaaj, paa jaara Pueyaso sequesano miyashijia quirini, paari najuhuaa sequeyani: “Jesuucua tiuujianijia”.

### 3

<sup>1</sup> Cuarta Pueyaso pueyanaa, maja cumaati puera nijaniyajinijinio jiaatianu Pueyaso rupaa niishitiojonaa nia quiniuria. Niaacuaajaari niishiya, Pueyaso rupaa niishitiojonaari socua jiyanoehua saniitiosaanutaniya tamasacajiniji, nojori tojtiaaquiniuucua tama nojori niishitiojosanojuaaja. <sup>2</sup> Puetunu pajaniyajanaari sequeyarucua miiquiaa sesani. ¿Teyano pueyanote tojetaarucujanaa narta pueyano najiquititiquijia na pocuasacariní? Shaaquí. Pueyano sequesano jaara puetunu maninijanaa quiri pueyaracaanu, cuno pueyano maara seetanujuanaa maninia pueyano quiri cutara. Cuno pueyano maara na naata puetunu tama na cuaqueyajaaja jiiitanu niishiriquiajuhua sesa na miyaquiniuucua. <sup>3</sup> Niaacuaajaari niishiya, caballo rupaama jaara niasaare na niqutitijotaja, na camaru na tojiniuria, na netesacari, na camaruuri puetunu na caballo cuaqueyajanaa niqutitijotaa na panishaco. <sup>4</sup> Puereetuca buqueeri naajuhua. Shiitaniyojua na niqutitijotaja jiiitaaariuhua. Jiyanoehua paratu piyarojosacari, naajaa, na camaruuri saa cunotaja na niqutitijotaa na panishaco. <sup>5</sup> Pa nitiiri naajuhua, shiitaniyojua casaaniyojuaari pa cuaqueyajinia shipinishano. Naajaa, jiyanoehua pocuanu niishijaari. Sesa pa miitiyari. Nojuajaari juhua maniyashi. Maniyashi jaara jaare puereetuca cuhuariquiajina, cuno maniyashiiri puereetuca maniria pacusee. Cuhuariquiaari puetunu catemaajanaa. Pa nitiiri naajuhua. <sup>6</sup> Pa nitiiri seetanujuanaa juhua mani quiya pa cuaqueyajinia. Paa jaara sesa pocuareni, paari puetunu pa cuaqueyajanaa sesoyani. Pa nitiiri puetunu sesa niishijajanaa. Paa jaara sesa pocuare pueya niquiarani, puetunu pueyajaanaari pa sequesano caminiujuquiaa tamasaca niquiarana. Pa nitiiri Sesaaca poonijitotesano. Naacuajitij, sesa pa pocuasacari, paari puetunu mijiria pa quiniujianaa sesoquiaani. <sup>7</sup> Pueyanoori na naata jiyartuutenu puetunu casaajanaa: jaacuatujuaca, roshiyocuatujuacajuhua, moojinijinio casaanio. Seetanujuanaari, pueyari tari naa na jiyartuutejoquiaa. <sup>8</sup> Maja cutaraari pa naata jiyartuutenu pa niti seque, saa maninia pa pocuanuraja. Pueyaracaanu sesa taquiriocuaa saajaari. Nocua quiyari juhua soconu noonacu, puetunu pueyajanaa na sesonura. <sup>9</sup> Paari jiyano pa nitiitaja pa Que Pueyaso maninihuacetaquiaani. Naajuhua, paari Pueyaso shipinishano parta pueya sesacquiaa natajuhua. <sup>10</sup> Naacuajitij, pa rupaamaji tohuataari maninia sequesano, sacuaraatia sequesanojuhua. Cuarta Pueyaso pueyanaa, ¡maja cumaati naa pa quiniutij! Maja maninia naatej. <sup>11</sup> Samo nacajiniji pueyaracaanu pacaretajaari shocuanacu mohuaca. ¿Jataquiaate soj? ¿Pianacute saniniuuja pacaretaquiaacujua? Maja. Samo nacaari pueyaracaanu maniniuniacu quijia. <sup>12</sup> Cuarta Pueyaso pueyanaa, ¿mariyajate na naata muetunu shucuenajara? ¿Natecate sacamanajara muetujuajuhua? Maja. Naajuhua, maja pa naata pianacu mohuaca taquitianu cuari maniniujiniji. ¿Mohuacacua casaara jatara tamaatiunacurani? Naajuhua, paa cuara pueyaracaanu maninia pocuara saaja. Maja cumaati pa pocuasano pa cojitiniu sesa pocuasanota.

#### *Niishijia pueyano*

<sup>13</sup> Tamonu nijaniyajinijinio jaara niishijia quiri, nojuaja cuara juhujaniya maninia mijia quiri nareja, maja pueya shocoteja. Jaara naa maninia quijia quiri, pueyari niishiniutianiya nojuaja seetanujuanaa niishijia. <sup>14</sup> Saniniuuja, nioojia jaara najiquitishano quiri, niishijia nia quiyaquiniuucua juhua niarta Pueyaso pueyano, niaari seetanujuanaa mosanucua. Naajuhua, nia miishano jaara quiri nia shocotanura niarta Pueyaso pueya saaja shuquiriaatia nia quiniuria tamajaaja, majaari nia jiyaniuria niaari niishijia. Naa mijia nia quishacaritij, niaa jaara tama nia niishitijajaaja shuquiritari, niaari mosanucua saaja. Nia sequesacari: “Niishijia cutaranija”, niaari sapojiya. <sup>15</sup> Cuno nia niishitijaari maja jiyocuaacuanu Pueyaso niishitija. Cuno niishitijaari tama nia niishishanojuaaja, mijiria niishishanojuhua, Sesaajanaa niishishanonio. <sup>16</sup> Pueyanaa, tee Pueyaso pueya juaatishano quiya tamasaca jaara na shocotane, naajuhua, pueya miishacari saaja tama na panishanojuaaja, tii quiyari juayonuujutanu, puetunu sesa miniuujianaanio. <sup>17</sup> Saniniuuja, cante Pueyaso niishitija jiiitaa cutarani, nojuajaari maninia mijia pueyano cutara. Jiyano pueyanoori maninia quijia puetunu pueya niquiarajanaa, jyanootio, jacaria pocuaja. Majaari na niishiniu ritia juaniu. Pueyacuara taraajejaari. Majaari na niishiniu cuaracashijionu pueyacuara. Pueyaracaanu seetanujuanaa sequeyari. <sup>18</sup> Naajuhua, cante juaatoyano jyanootiootajani, nojuajaari jiyanoehua shuquiriaatia quiniutianiya Pueyaso shuquiritishacari nojuaja maninia na miiniuucua.

## 4

#### *Mijiria casaacua jiaatijacajiniji pohuatasano*

<sup>1</sup> ¿Niaate niishiya casaara nia juayonuujutaquiaa tamajaaja pueyaracaanuni? Niaari naa quiyaquij sesa miiniuucua nia jiaatiasacari. Nioojiaari najiquitishano quiquiaa nia panishanoocua nia jiaatiasacari sacuaraatia. <sup>2</sup> Naaratej, nia panishano nia maseyaquishacari,

niaari na casamiicuaaji pueyano moquiaa. Niaari naa miiquiaa puera nia jiaatiasacari nia panishanoocuatej. Nia panishanoocua nia jiaatiasacari jiyanoohua, niaari cunora miriyojotaquiaa. ¡Niaari socua piyotaariquiaaqui! Niaari naa quiyacui Pueyaso nia secojiyaquiniucua nojuaja niqutionura nijaniya nia panishano. <sup>3</sup>Naajuhua, niaa jaara na secojore, majaari nia masenu quiquiaa nia masesano. ¿Casaara nia maseyaquiuaanoj? Nia sequereeraj. Niaari sesa nia jiaatianuta na masequiaajuhuanajaj. Niaari nia jiaati-asanoocua masequiaa juucua, tama nia cuaqueyajaaja nia shuquiritiniuria. <sup>4</sup>¡Pueyanaa, niaacui Pueyaso rootasano ruuretatacujuhuanajaj! ¿Majateeri nia niishiniu? Cante mijiria sesa miijiaa miishano timitijacani, nojuajaari Pueyaso paracara quirii. Niaa jaara naa miijiaa quiniu panijajuhua, niaari tari Pueyaso paracara quirii. <sup>5</sup>Tariucuaanu Pueyaso Rupaajinia nia naajiotasanoori quiyacuij:

“Pueyasoori na Sohanu niaquiaari poojajinia, nera na cojuanura pajaniya. Jiyanoohua na paniniutia pajaniya, Pueyaso Sohanuuri pa jamuequiaa juucua saaja Pueyasora pa quiniuria”.

<sup>6</sup>Naajuhua, Pueyasojuanaari jiyanoohua maninia naacuquiaa pajaniya, jyanootio na quiniucua. Na Rupaajiniaari nia naajiotasano quiyajuhua:

“Pueyasoori noo pueya paracaajia, narta pueyajini juhua socua cutara pueyano quiniu panijatej. Saniniujia noo pojori maniniucuaarjia, nia sequeracatej: ‘Maja cua naata miiniu maninia tamajaaja. Pueyaso cuaara cua naacuura’”.

<sup>7</sup>Naarate pueyanaa, seetanujuanaa Pueyaso tojtijacara nia quiriqia. Cumaatia nia nujuatare Sesaaca, maja na shocotanura nijaniya. Niaa jaara naa miiritij, niaacuaji mashiniutianiyari. <sup>8</sup>Niaa jaara Pueyaso rupere, Pueyasoori nia rupenuitijajuhua. Sesa miijiacanaa, cua tojtiate. Taa curuutucojuanucua shuquirioyacuana, nia tama nia cuaqueyajaaja nia jeequejorejuhua sesa nia miishanojiniji. Noojiaqueya Pueyaso panijiaacari mijiria sesa miishano paniquiaajuhua. Cuno pueya cuaara noojia jeequejoora maja socua noojia na niqijiotenura najuhuanaj. Cuaara saaja Pueyaso panijiacara quiriia cutara. <sup>9</sup>Sesa nia miiniucua nia nujuqeture, nia taraajerejuhua. Nia sapiyonuure. Sesa miishano nia saroojotanu nia jataniri namijiaacatenuucua. Sesa miiniujiniji nia shuquirini nia jataniri taraajenuucujuhua. <sup>10</sup>Niaa jaara nioojajinia sequeriquia Pueyaso niqiaara: “Maja cua naata tamajaaja maninia miiniu”, Pueyasoori nia naacutaa maninia nia quiniuria mijiria. Nojuajaari nia jiyatenutaniya jiyaniijianucua nia quiniuria.

#### *Parta Pueyaso pueyacuara rimiaaqueyashijia pa quiriqiaj*

<sup>11</sup>Pueyanaa, maja sacuraatia nia rimiaaquenu niarta Pueyaso pueyacuara. Maja maninia naatej. Cante narta Pueyaso pueya sesacaani, Pueyaso Rupaajinia naajiotasano tojijashijiaari jyanotej. Niaa jaara naa miiritij, niaari Pueyaso Rupaajinia naajiotasano sesaca. Naajuhua, niaari tama nia cuaqueyajaaja jiyateya juhua jiyaniijiaara, niarta pueya nequesoreena nia quiniuria. Naa nia miishacaritij, niaari Pueyaso rupaa tojijashijiacara quiqui. <sup>12</sup>Pueyasojuanaari tamajaaja Jiyaniijijanaa. Nojuacuajaari na rootasano niishitijia pajaniya. Nojuajaari niquiriyatujua pa nequesorena, pa sanini-ujuriquianojuhua. Nojuajaari cumaacaraca pocuaji na tacunura, na shaajanura pajaniyajuhua. ¿Canteeri quiajanianijia, quia saniniujuniuria tamasaca, juhua nojori jiyaniijiani?

#### *Majaari pa niishiniu tariquiria*

<sup>13</sup>Pueyari naa sequeracatej: “Canaari tariqui quianutaniya tamonu tiacajiniani. Canaari cuniqui shocotenutaniya niquiriyatu marijiani canaa niqutiojosacari tii canaa casami. Canaari queraatia cumaneeca masenutaniya canaa casami samini”. Cua tojtiate nia sequeracanaa. <sup>14</sup>Majaari nia niishiniu taa nia juhuaquenuitaniyani. ¿Niaatucua taa sequereni niaa jaara macu juhuaquema saaja? Nocuaji majaari nia sequenute pueyanaa. Pa quiniuri juhua shushiquiani. Naatej, taa shushiquiacuaani rupaquijia niqishiyari, na nuhuaji tajimiohuari, paari naajuhua. <sup>15</sup>Naaratej, niaa nia sequere cutara: “Pueyaso jaara paniri, canaari tariqui quianutaniya poonijionuucuan”. Naa cutarate maninia sequenu. <sup>16</sup>Niaari saniniujia sequeriquiaacujua: “Janiyari tariqui quianutaniyani cua miiniu panishano cua miiniuria”. Naa nia sequesacaritij, niaari jiyaniya nia naata tamajaaja miiniu puetunu nia panishanojuanaa. Naa nia sequesacari juhua nia miishocoriquianotej, niaari najuhua nia rupaa riuticoneetequiaa puera, juhua niishijia pueyano. Niaa jaara tama nia cuaqueyajaaja nia jiyateya juhua tariqui miishocoriquiano niishijiatej, cunoori jiyanoohua sesa. <sup>17</sup>Naajuhua pueyanaa, niaa jaara maninia miyaquiri, maninia miiniu niishijia nia quishacari, niaari tari sesa miijiaa.

<sup>1</sup> Nia tojitiare, casamiriaca pueyanaa. ¡Juhucarijia nia sapuere! ¡Nia sariyocature! ¡Niaari naquiya miiniutianiya taraatia! <sup>2</sup>Niaari jiyanoehua casamiriaca. Cuno nia jiiitasano casamini, najuhuana moqueyari. Surequeyari nia maniniuquiya toqueya miaqueya-juhuj. Naacuajitij, puetunu nia jiiitasanojuanaari moquenutaniya. <sup>3</sup> Nia paatijosano oroni, nia cumaneecanio, najuhuana tiyarashiyari. Naacuajitij, pa Nequesoreenaari maatia niishiniutianiya niaari sacuraatia jamuejaca quiquiaari. Naa miijiaa nia quiniuucuatej, niaari saniitosaanutaniya. Niaari socua shaajasaanutaniyaquij. Niaari najuhuana queraatia casami paatijiya shuquiriaatia nia quiniuria tamajaaja mijiria. Saniniuujia, nio pa quishacariiri quera pa Jiyaniijia tiuquishacariuhua na saniniuujuniuria pajaniya. <sup>4</sup> ¡Jiyaniijiajanaari nia poonijotesano pueya tojiquiaa! Nojoriiri sariyocuatuiya nia cumaneecajiniji nia niquitioyaquiniuucua nojori poonijionuunujiniji, niaara na senoonuucua nataacuaca nia cuhuariquiajiniji. <sup>5</sup> Mijiria nia quishacarijia, niaari shuquiriaatia quiquiaa puetunu nia panishanojuanaa nia jiiitasacari. Naa shuquiriaatia nia quishacaritij, niaari juhuajaniya shiyoshiya juhua puecoosoriquiano cushiari. Niaari naa miishaanutaniya-juhuj. <sup>6</sup> Niaari maninia miijiaa puecooquiaa. Majaari nojori nujuatanu quiquiaa nia-janiya, nocuara nia tonujusacari nia cuaracashiniutia najuhanaj. Naacuajiti casamiriaca pueyanaa, niaa cumaati puetunu nio niaara sequesanojuanaa tojitiaa.

*Juhuajaniya pa sashiri pa Jiyaniijia*

<sup>7</sup> Naacuajiti cuarta Pueyaso pueyanaa, juhuajaniya nia sashiri pa Jiyaniijia cuaara tiuquihuua. Cuhuariquia camaruuri na natanu nuhuaji naa sashiquiaa marujuhuaj, maninia na natau moritianura. Maru sashiyajaariuhua cuaara niiria, na natau jajau na querajaacaatiniuria. <sup>8</sup> Naa nia sashirijuhuj. Majaari pa Jiyaniijiaacuaji nia pishiniu. Nojuacuajaari quera tiuquiniutianihua. <sup>9</sup> Cuarta Pueyaso pueyanaa, majaari niarta pueyacuara nia rimiaaquenu nojori nia soonuta, niaa mariqui saniitosareeri. Nia niishiri, pa saniniuujinia Pueyasoori pocua catecanoya. Tari juhua pa tohuateyaji nujuuari. Nojuajaari seetanujuanaa pa saniniuujunia cutara. Nocuaji maninia pa quirij. <sup>10</sup> Pueyanaa, juhuajaniya pa rejeretarejuhuaj, paa jaara naquiya miishaaren. Naatej, taa tariucuacaanu Pueyaso sequesano caminiuujinia rejeretacoquiaari taraatia nojori miishacaricuani, naa nia rejeretarejuhuaj. <sup>11</sup> Paari niishiyacuajani, Pueyasoori naquiya miiniu rejeretajaca pueya shuquiritiaja. Maninia na miiniutianiyari. Niaacuajaari tari pohuatasaaquiarijuhuj taa supuetana Job rejeretacuajiaari naquiya nia miishacaricuani. Na nuhuaji cutara, Pueyasoori jiyanoehua maninia na miiquiaariuhua, jiyanoehua pueyacuara taraajeja na quiniuucua, jiyanoojiaariuhuj.

<sup>12</sup> Cuarta Pueyaso pueyanaa, nia tojitiare. Nia pocoojosacari, tamonu jaara quia sequesanoocua tiyaguiri, naajaa, majaari najuhuana sesa pocuanu. Maja cutaraari sequenu: “Cua sequesanoori seetanujuanaa juhua jiya cajiniocuaja. Majaari na shaajenu quiniutianiya”. Majaari sequenujuhuaj: “Cua sequesanoori juhua nio jiya. Majaari na shaajenu quiniutianiya”. Majaari naa pocuanu sacuraatiatej. Nia sequesano jaara seetanujuanaa quiri, nareja nia sequere: “Taaquiririnij”. Naajuhuj, nia sequesano jaara quiri “maja”, cuaara naa quiria seetanujuanaa. Majaari nia sequesano nia maatenu socua, Pueyaso mariqui nia saniitioreeri.

<sup>13</sup> Tamonu niajaniyajinijinio jaara naquiya miishiya, nojuaja cuaara Pueyaso secojoora. Shuquiriaatia nia quishacari saniniuujia, Pueyasora nia jaaquequejore. <sup>14</sup> Cusosu nia quishacari, Pueyaso pueya jiiitanaa nia sequere nojori cuaara secojoora niaacuara. Nojori cuaara shiyocua cojuata cusosu quiaara, pa Jiyaniijia sesajinia nojori secojosacari. <sup>15</sup> Nia secojosacari Pueyaso seetanujuanaa nocua nia tiuuniutia, cusosuuri naatanutaniuhua. Nojuaja jaara sesa miiquianu, Pueyasoori na jiyanooniutianiya sesa na miishanojiniji. <sup>16</sup> Cunora, sesa nia miiniu nia sequetoore nia jiyanooshaanura. Majaari sesa nia miishano nia seetanu. Na nuhuaji Pueyaso nia secojore tama niaacuaraaja. Pueyasocua nia naatanijiorohua. Maninia pueyano secojosacari jiyanoehua, cunoori jiyanoehua cumaacaraca. Pueyasoori na secojosano tojijia. <sup>17</sup> Tariucuacaanu pueyara Pueyaso sequesano caminiuujinia Eliasni, nojuajaari nareja pueyano quiquiaarijuhuaj taa pajaniyacuaani. Naajaa, nojuaja jaara Pueyaso secojoquiaari maja maru niiniuria, majaari maru niiniu quiquiaari juuujanaraca marijia cuaara shocojoquiaarijiaatijia, socua seis racanio. Majaari maru niiniu quiquiaari tojetaarucuajanaa. <sup>18</sup> Elias jaara pacutequiaariuhua secojonu maru na panishacari, maruuri shusha niqiaariuhua. Pueya nataacuacaari jiyacari shusha moritiaquiaariuhua.

<sup>19</sup> Cuarta Pueyaso pueyanaa, tamonu niajaniyajinijinio jaara Pueyaso rootasano tojijashijara quiriuhua, tamasaaca jaara na niqiri, cuaara na rootaaranaj, maninia miijia na quiniuhua. <sup>20</sup> Nia niishiri, cante sesa miijia tacatorohua Pueyasocua sesa na miiniuujinijini, nojuajaari cuno sesa miijiaacuaji tacuya maja senota na shaajasaanura.

Pueyaso na jiyanootiyajaariuhua puetunu sesa na miishanojinijijianaa. Tariucuaja cua panishano pueyanaa.

## COTEENU PEDRO NAAJIONEE

*Pedro saruhuatascari narta Pueyaso pueya*

<sup>1</sup> ¿Niaate quiyjaa cuarta Pueyaso pueyanaa? Janiyari Pedroni, Jesucristo jiyaramiquishano na rupaa pohuatanua cuna quiniuria. Janiyari nio naajiyja niaacuarani, noo pojori-icuara canapueete tiquiyocua niayaquecojoquiaaricujani: Ponto jiyajinia, Galacia jiyajinia, Capadocia jiyajinia, Asia jiyajinia, Bitinia jiyajinianio. <sup>2</sup> Tariucuaacaanu, pa Que Pueyaso cuajaari nia saquiriojoquiaari na pueyarano nia quiniuria. Naaratej, nojuajaari na Sohuanu jiyaroquiaari nioojiajinia na poonijionura, Jesucristoocua nia tiuniuria. Naacuajitij, Jesucristo shootenuucua na nanaca, Pueyasoori nia jiyanoocua, juhua tojetaarucujanaa jeequesano nioojia quiniuria. Na Sohuanuuri nia jataniquiaa tojetaarucujanaa maninia miijia nia quiniuria, seetanujanaa Jesucristo tojjia nia quiniuriajuhuj. Naa Pueyaso panishano pueya nia quiniuria, nojuaja cuara cumaquiria jiyanhua niajanija. Cuara nioojia cajitiiria pueyaracaanujuhuj.

*Pa niishiri, paari jiyanhua maninia miishaariquianoni*

<sup>3</sup> Pa Jiyaniijia Jesucristo Que Pueyaso pa maninihuaqueetare, jiyanhua maninia na miiniucua pajaniya. Jiyanhua na taraajenuucua pocua, na pueya pa quiniucuajuhuj, nojuajaari pa niishitiquiaari paari juhua quiariniora samiitianijiosaanutanihuani. Paari naa samiitianijiosaanutanihuani, naatej, taa Jesucristo samiitiaquiaarihuacuaani. Naa pa niishishacari taa pa miishaanutaniyani, paari shitimia sashiquiaani pa miishaanura taa Pueyaso miini panija pajaniyacujani. <sup>4</sup> Naacuajitij, niaari niishiya niaari seetanujanaa masenutaniya puetunujanaa niaarano Pueyaso jiiatasano jiyocuaacaanu. Cuno, Pueyaso racatasano niaaranoni, cunoori maja na naata shaajasaanu. Majaari na naata sesosaanu. Maja na naata tariucuashiniujuhuj. <sup>5</sup> Pueyasooocua nia tiuniucua, nojuajaari na cumacata nia cojuaquiaa. Pueyaracaanu nia cojuanutaniyani nojuaja cuara nia rijiorejaatijia mijiria taraatia nia quiniujiniji, tojetaarucujanaa jatanishano quijia nia quiniuria. Jiyanhua maninia Pueyaso miini panishano na pueyarani, shusha jiyacari niquishaanutaniyani.

<sup>6</sup> Cunora niaari shuquiriaatia quiya. Saniniujia, niaa naasucuaari taraajeya rupaquijia nia miijiosacari naquiya mijiria. Naajaa, niaa jaara naquiya miishaare, cunoori maja najuhuanaj. <sup>7</sup> Naquiya pa miiniuni, cunoori pa saniniujishaanura paate seetanujanaa Pueyasooocua tiuujiacani. Niaacuajaari niishiya, pueyari jiyanhua oro panijia. Saniniujia, Pueyasooocua pa tiuniuni, cunoori jiyanhua socua panishano orojiniji. Niaacuajaari niishiya, pueyari oro catijia, na sanishaanura maninia oro seetanutejanaa. Naajaa, seetanujanaa maninia oroori shaajajuhuj. Saniniujia, paa jaara mijiria naquiya pa miini rejeretajaca quirini, Pueyasooocua tiuujia pa quiniucua, cunoori socua jiyanhua maninia cuno shaajaja orojiniji. Pueyasooocua nia tiuniu jaara saniniujishaare juhua orojuhuj, jaara seetanujanaa maninia quiri, Pueyasoori nia timitianutaniya. Naacuajitij, Jesucristo muetasacari pocua, Pueyasoori jiyanhua maninia miiniutaniya niajanija. Jiyaniijianucua nia jiyatenutaniyani.

<sup>8</sup> Majaari juhuanujuaja Jesucristo nia niqiniuni. Naajaa, niaacuajaari na panijia. Nia niquishoo na quishacarijia, naajaa, niaari nocua tiuquua. Niaari na timitiaquiaa jiyanhua. Tojetaarucujanaa jiyanhua nia timini quiniucua nioojiajinia, majaari nia naata na pohuatanu nia rupaata. <sup>9</sup> Niaari naa timiquiaa, tariucua jatanishano nioojia quiniucua, Jesucristoocua nia tiuushacari.

<sup>10</sup> Tariucuaacaanu, pueyara Pueyaso sequesano caminiujunaa pueyari poojotaquiaari taa Pueyaso jiyanoonutaniya nio pa quishacari pueyani, na pueya nojori quiniuria. Nojoriiri tama nojori naajiotasanojuaja suraatia serojojuaca quiquiaari, Pueyaso Sohuanu niishitishano nojori naajiotasanoni. Nojoriiri jiyanhua niishini paniquiaari taa Pueyaso jiyanoonutaniya pueyani. <sup>11</sup> Jesucristo Sohuanucuaari juhucarijia nojori niishitiquiaari taa Pueyaso jiyarosocoriquiano Pueyano miishaanutaniya naquiya coteenuni. Nojori niishitiquiaarijiaariuhuj, naquiya na miini nuhaji saniniujia, nojuajaari Jiyaniijarajanaa jiyatesaanutaniya, shacantuca quijia na quiniuria. Naaratej, nojoriiri maninia na niishiniuria saniniujiquiaari juucua, cantejaara cuno quiniutaniyani, Pueyaso Jiyarosocoriquianoni, naajuhuj, taacari na muetanutaniyani. <sup>12</sup> Pueyasoori saaja nojori niishitiquiaari, na Sohuanu poojotanishano nojorini, cunoori maja tama nojorirajaaja na quini quiquiaari. Cuarta Pueyaso pueyanaa, ¡cunoori niaarano quiquiaari seetanujanaa! ¡Tariucuaacaanu poojotasano Pueyaso Jiyarosocoriquianojiniijiri tari tohuateequiaari! Jiyocuaacaanuji jiyarosano Pueyaso Sohuanuuri

Pueyaso rupaa pohuatanaa cumaquiquiaa, taa na cumaquiquiaari Pueyaso Jiyaroscorigianojiniji pohuatanaacuaani. Naacujitij, quiari naataja nia tojishano Jesucristojinijini, cunoori supuetanaa pohuatasano quiquiaaricuaaja. Pueyaso seyajanaacuaajaari pueyarano Pueyaso miishocorigianoocua maatia niishiniuucua jiaatiajuhuaj.

*Pueyasoori paniya saaja maninia miijiaca pa quiniuria*

<sup>13</sup> Cunora, cuarta Pueyaso pueyanaa, jeenucuasano nia quiriquia. Jesucristo muestasacari pocua, Pueyasoori jiyanoohua maninia miiniutianiya pajaniya. Cunora, saaja naa nia miiniu panishaanuucua jiaatiajaca nia quiri. Majaari nioojia niqijijotejaca nia quiniu. Maninia niishiriojojuaca nia quiriquia. <sup>14</sup> Tarijia, niaari tama nia cuaqueya panishanojuaja miijiaca quiquiaari, Pueyaso niishiyashijiacua nia quishacarijia. Quiarijia saniniuuja, niaari na tojjijaca cutara. Naaratej, na muerasu nia quiniuucua, majaari naa quijiacua nia quiniu socua. <sup>15</sup> Saniniuuja, saa maninia miijiaca nia quiriquia. Pueyasocuaajaari nia saquiriojoquaaari naa tojetaarucujanaa maninia miijiaca nia quiniuria, juhua nojuajuhua. <sup>16</sup> Tariucuacaanu Pueyaso sequesanoori naa naajiotasano quiyajuhua:

“Tojetaarucujanaa sesa miyashijiacua nia quiri, taa janiyacuaani”.

<sup>17</sup> Nia secojosacari, niaari Pueyaso sequequiaa, “cua Quenaa”. Cunoori maniniacuaaja. Naajaa, majaari nia niyjetanu cutara, nojuajaari puetunu pueyajanaa nequesoreenutaniya sesa pa miishanojiniji, maninia pa miishanojinimio. Majaari rimijata na sanitionu quiniutianiya. Cunora, mijiria nia quishacarijia, nia puerenuta tama nia cuaqueyajaaja nia cojuare, niaa mariqui na tojyashijiacara quirohuari. <sup>18</sup> Pa supuetanaa quiniuucua sesa miijiaca, paari naa miijiacara quiquiaarijuhuaj. Pueyaso cutaraari naa sesa pa quiniujiniji pa jataniquiaari maninia na muerasu pa quiniuria. Niaacuaajaari niishiya, majaari Pueyaso masenu quiquiaari pajaniya orota, platatanio, shaasteja casaata. <sup>19</sup> Nojuajaari pa masequiaari tama Neyanuniyojua nanacatajaaja. Jesucristoori tama na cuaqueyajaaja tarinitiaquaaari pocuara na mosaanura, na nanaca shoonuucua pa jiyanooshaanura. Tariucuacaanu, borrego jaara Pueyaso niqiuara mosaaquiaari na camaru niti, cuno borregoori tojetaarucujanaa borrego maniniu quiquiaari. Naajuhua, Jesucristoori tojetaarucujanaa maninia miijia quiquiaari. Naacujitij, nojuajaari tojetaarucujanaa maninia pueyano quiquiaari pa niti na mosaanura. <sup>20</sup> Jiya shipiniyaquishacarijia, Jesucristoori tariucua pueya niti mosocorigiano sequesaaquaaari, sesa miijia jiyanooshaanura. Saniniuuja quiari naataja, nojuajaari shusha mijiria muetaquaaari pocuara na mosaanura, taa Pueyaso miiniu paniquiaari pajaniyaracujani. <sup>21</sup> Naa Jesucristo miiniuucua pocuaratej, niaari Pueyasocua tiuuquiaa. Pueyasocuaajaari Neyanu samiitianiquiaariuhua. Na jiyatequiaariiri Jiyaniijajanaa na quiniuria, shacantuca cumaacaraca quijia na quiniuria. Naacujitij, niaari quiarijia Pueyasocua tiuya, na samiitianiniuria nijaniyajuhua. Naaratej, niaari juhujaniya sashiya, shacantuca quijiacara nia jatanishaanurajuhua.

<sup>22</sup> Seetanu rupaajanaa tojjitajaca nia quiniuucua, nioojiaari tari jeequejosaaquaaari, niarta Pueyaso pueya panijiacua nia quiniuria seetanujuanaa. Naaratej, seetanujuanaa panitiojuaca nia quiriquia puetunu nioojitajanaa, maja sesa nia niishiriojonuta que-naaja. <sup>23</sup> Naa panijiacua nia quiri, jatanishano pueya nia quiniuucua. Pueyaso rupaacua nia tiushacari, niaari juhua roosaaquiaariuhua, pueyaracaanu quijiacua nia quiniuria seetanujuanaa. Pueyaso Rupaacuaajaari pueyano samiitianijia, saminio na quiniuucua. Naacujitij, niaari shaajeyashijiacara jatanishaaquaaari pueyaracaanu Quijia rupaacua nia tiuuniuucua. <sup>24</sup> Tariucuacaanu Pueyaso Rupaajinia naajiotasanoacuaajaari naa sequeya: “Puetunu pueyajanaari rishiyashijiacua juhua jiyasocua. Na cumaaca, puetunu na jiti-asanojuanaajuhua, cunoori soreja, juhua naana shuu. Jiyasocuaari soreja. Naana shuuri tijia. <sup>25</sup> Saniniuuja, Pueyaso Rupaa cutaraari pueyaracaanu quijia”.

Cuno rupaacuaajaari nia niqiuara pohuatasaaquaaari pueyaracaanu quijiacara na jataniniuria nijaniya.

## 2

<sup>1</sup> Naaratej, nia tarinitiare puetunu sesa nia miiniujanaa. Seetanujuanaa nia tarinitiare cuaracashijionu. Naajuhua, majaari sapuenu juhua maninia pueyano niqishano nia quiniu najuhuanaj. Majaari tamasa jitiisanooocua jiaatiajaca nia quiniujuhua. Majaari coriaacojojuaca nia quiniu socua. <sup>2-3</sup> Naa jaara tari niishiyacuaaja pa Jiyaniijiaari seetanujuanaa maninia, na rupaacua jiaatiajaca nia quiricuarajaj. Naatej, taa shusha rasano conaaja jiaatiaa supenucuacuaani, naa Pueyaso Rupaacua jiaatiajaca nia quiriquiajuhuaj, cumueeca Pueyaso muerasu nia quiniuria seetanujuanaa. Naacujitij, niocua tojetaarucujanaa jatanishano pueya quiri.

*Cristoori juhua saminio saajia, Pueyaso quiquiorano tiataja*

<sup>4</sup> Sajiniji shipinishano tiari pueyaracaanu rishijia. Naaratej, pa Jiyaniijaari miriqui seqeshiya juhua saminio saajiata Pueyaso quiquiora. Mijiria Pueyasora tijonaari jyaniquiaari cuno saajiari sesarujuajau. Naaratej, nojori jiyajenetasacari cuno saajia, nojoriiri na jataquiaari na ruuretasacari. Nojuaja cutaraari Pueyaso saajia maniniu, tama na saquiriojosanojuaja. Naaratej, nocua pa tiuuri. <sup>5</sup> Naajuhujaj, puetunu Jesuucua tiuujiaca pueyaranojuanaari pueyaracaanu rishijia quiquiorano Pueyasora. Naacuajitij, Jesuucua pa tiuushacari, paari juhua maniniujiaca sai Pueyasorani, na quiquiora na tiatajara. Naajuhujaj, Pueyaso quiquio pa quishacari Neyanuucua pa tiuuniuucua, Pueyasoori pa jiyateya pueyacuara secojonaa pa quiniuria na tacoji. Majaari seya pa niqitiojonu quiquiaa Pueyasoni, taa tariucuaacaanu pueyacuara secojonaa pueya miiquiaaricuaani. Paa cutaraari tama pa cuaqueyajaaja jiyatequiaa Pueyasora pa quiniuriani, puetunu pa miishanojuanaano. Puetunu naa pa miishanojuanaa Jesucristoocua pa tiuuniuucuaani, cunoori Pueyaso timitiquiaa. <sup>6</sup> Cunora, tariucuaacaanu Pueyaso Rupaajinia, miriqui Pueyaso seqesano Jesucristojiniijiiri naa naajiotasano quiya:

“Janiyari Sión tuhuananuucua jyanohua cua panishano saajia nianutaniyani. Cuno saajiari tama cua saquiriojosanojuaja. Maniniujiajau saajia seetanujuanaari. Cante nocua tiuyani, nojuajaari maja na carosaaanu quiniutianiya”.

<sup>7</sup> Cua panishano pueyanaa, cuno saajiaacua tiuujiaca nia quiniuucua, cuno saajiari jyanohua nia timitiasano. Nocua tiuyashijia cutaraari carosaaanutaniya. Nio tariucuaacaanu Pueyaso Rupaajinia naajiotasanoori tari tohuatecanu nojoriria. Naa miriqui sequeyari:

“Tijonaa jatasano saajia, nojori jyanishacari cuno saajia naasucua sesarujuajau, cuno saajiacuajaari socua jyanohua panishano saajiara jiyatesaaquiaariuhua”.

<sup>8</sup> Tamaqui, nojuajiniijiiri naa miriqui naajiotasano quiyajuhujaj:

“Pueyari cuno saajiaacua tiuriinutianiya. Nocua jiriatanutaniyaariuhua na tiuriinuria”.

Nojoriiri nocua tiuriiquiaa, nojori tojiyaquiniuucua Pueyaso rupaa Jesucristojiniji. Pueyasocujaari tariucuaacaanu sequequiaari Neyanuucua tiuyashijiaacari tiuriinutianiya puetunurajanaa.

<sup>9</sup> Nijaniya saniniuujia, niaari tama Pueyaso saquiriojosano pueyajaaja. Nojuajaari puetunu nijaniyajanaa jiyatequiaari nojuaja secojonaa nia quiniuria pueyacuara, pueyaracaanu na panishano mijijia nia quiniurijuhujaj. Puetunu nijaniyajanaari tamasa pueypuejinijinio saquiriojosaquiaari saaja Pueyaso pueya nia quiniuria. Neyanu cusonuta, Pueyasoori naa pa masequiaari tama nerajaaja, maninia Pueyaso miishano pa pohuatanura tamasa niqiuara. Tariija, niaacuajaari juhua ninishiqui quijiaa quiquiaari. Pueyaso cutaraari niojia cuhuataquiaari, seetanujanaa shacantuuca cumaaajinia quijia nia quiniuria nata. <sup>10</sup> Tariucuaacaanu, Jesucristoocua tiuyashijia nia quishacarija, niaari juhua soosano taucuaa quiquiaari Pueyasora. Quiarija saniniuujia, niaari Pueyaso panishano pueya. Tariucuaacaanu, majaari Pueyaso taraajenu quijia niaacua. Quiarija cutara, niaacua taraajeyari. Cunora, nia jyanooquiaari.

*Pueyaso panishano mijijia pa quiriqiaaj*

<sup>11</sup> Cua panishano cuarta Pueyaso pueyanaa, nia tojiri cua sequesano. Niaari juhua rucoonaa mijiria. Nio jiyari maja pueyaracaanu pa quijia. Naaratej, majaari tama nia cuaqueya miiniu panishanojuaja mijijia nia quiniu, saaja shuquiriaatia nia quiniuria mijiria. Sesa casaacua pa cuaqueya jiaatianuni, cunoori poojia sesojua. <sup>12</sup> Saaja maninia mijijia nia quiriqiaa Pueyaso niishiyashijia niqiuara. Naacuajitij, nojori jaara niaacuara rimiaaqueeriquia juhua sesa mijijacara nojori jiyatesacari nijaniya, naajaa. Jiya puequesacari, Pueyasoori puetunu pueyajanaa nequesoreenutianiya. Jiyacari, niaacuara rimiaaquejacaari niishiniutianiya, Pueyasoori tojetaarucujanaa maninia mijijia na sanitiiosacari nojori, maninia na miishacari nijaniya saniniuujia.

<sup>13</sup> Pa Jiyaniija tojijia nia quiniuucua, puetunu mijiria pa jiiitanaa jiyaniijianucua tojitiata nia quiriqiaajuhujaj. Naacuajitij, nia jiya jiyaniijijanaa tojijia nia quiri. Nojuacuajaari jiyaniijijanaa cutara. <sup>14</sup> Cunora, na jiyatesano jiyaniijianucua tojijia nia quiriqiaajuhujaj. Nojoricujaari na jiyaramiquishano, sesa mijijia saniitiosaanura, maninia mijijia maninuhuaqueetasaanura saniniuujia. <sup>15</sup> Naacuajitij, saaja maninia mijijia nia quishacari, niaari niishiyashijia sesa mijijia sanaajanutianiya, najuhuaana nojori sesacasacari nijaniya. Cunora, Pueyasoori paniya maninia mijijia nia quiniuria.

<sup>16</sup> Tariucuaacaanu, Moisés Rootasanoori juhua nia jiyaniija quijia puetunu niaarajanaa nia tojishocoriquiano. Quiarija saniniuujia, Jesu cusonuucua nia niti, nojuajaari Moisés Rootasano tohuateequiaari. Naacuajitij, nojuajaari Moisés Rootasano sanaajaquiaari



niaara. Naacuajitij, Moisés Rootasano tonujiyaquishacari niaacuara tari, naajaa, majaan, majaan nia jyaniniu naacuajiti nia naata tama nia panishanojuuaja miiniu. Pueyasojuanaacuajaari nia Jiyaniijajanaa cutara. Naaratej, seetanujuanaa na tojtiajaca seya nia quiriqvia cutara. <sup>17</sup> Majaan quenaaja niquriyatuu pueyano rerequeteteja nia quiniu. Niarta Pueyaso pueya panijaca nia quiriqvia cutara. Seetanujuanaa Pueyaso tojjiaca nia quiriqvia. Majaan jiya jiyaniijajanaa rerequeteteja nia quiniu.

*Naquiya pa miishacari, sanaa pa rejeretariquia juhua Cristo*

<sup>18</sup> Poonijotesano pueyanaa, seetanujuanaa maninia nia camarnu tojjiaca nia quiriqvia. Nia camarnu jaara juuajiaca quiriqvia, naajaa, saaja na tojjiaca nia quiriqvia. Majaan saaja maninia nia jitiijaca tojjiaca nia quiniu, nia jyanoojiacanio. <sup>19</sup> Naa jaara juhuajaniya rejeretariquia najuhuaana nia camarnu saniitosacari najaniya, cunoori jyanohua maninia Pueyasora. <sup>20</sup> Pueyaso cutaraari maja na timiniu niaa jaara juhuajaniya rejeretare nia camarnu saniitosacari najaniya seetanujuanaa sesa nia miiniuu-cua. Saniniuuja, nia camarnu jaara saniitiore najaniya maninia nia miiniuu-cua, nia jaara na rejeretare juhuajaniya, Pueyasoori cunoo timitiaja cutara. <sup>21</sup> Pueyasocuaajaari nia saquriujoquaaari naquiya rejeretateja nia quiniuria maninia nia miiniuu-cua. Cristojuanaacuajaari naquiya miishaaquaaari maninia na miiniuria pajaniya. Nojuajaari naa miiquaariitij, pa niishiniuria juhua nojuaja pa miiniurijahuaj. <sup>22</sup> Cristoori maja quenaaja sesa na miiniu quiquaaari mijiria na quishacari. Majaan na cuaracashijionu quiquaaari quenaajahuaj. <sup>23</sup> Jaara sesacasaquaaari, nojuajaari maja quenaaja nojori na riucuanu quijia na juaniutia. Jaara miitiasaaquaaari, majaan quenaaja nojori na miananajonu quiquaaari. Nojuajaari saaja na Que Pueyasocua tiuuquaaari, na niishishacari nojuajaari seetanujuanaa maninia nequesoreena cutara. <sup>24</sup> Cristo jaara niyacutesanojinia cusojuasaaquaaari, nojuajaari tari puetunu sesa pa miiniujianaa cusotaquaaari. Naa pa niti Cristo cusuucuatej, cunoori quiquaaari maninia miijiac pa quiniuria saniniuuja, maja socua sesa miijiac pa quiniuria. Naajuhua, nojuajaari pa niti nootusaaquaaari, pa naatanijiosaanura saniniuuja. <sup>25</sup> Tariija, niaari juhua tashuquooono borregohua rucoojuaca quiquaaari. Quiarija saniniuuja, niaari nia cojuana Cristoocua tiuquijioquaaari. Nojuacuajaari nioojia jitiiana maniniu.

### 3

*Camiyono pueyara rootasano*

<sup>1</sup> Camishano maajipohuanaa, nia niyaca tojtiajaca nia quiriqvia maninia. Naacuajitij, nia niyaca jaara Pueyaso rupaacua tiuyashijia quiriqvia, naajaa, nojori tojtiajaca nia quiniuu-cua nojoriiri niishiniutianiya Pueyaso Rupaari seetanujuanaa. Nojoriiri naa niishiniutianiya saa maninia miijiacaja nia quishacari, nojori nia pohuataaquishacariija Pueyaso Rupaa. <sup>2</sup> Nojori niquishacari tojetaarucujanaa maninia miijiac nia quishacari, nojori tojtiajahuaj, saa cunotaja nojoriiri maatia niishiniutianiya Pueyaso Rupaari seetanujuanaa. <sup>3</sup> Maajipohuanaa, majaan nia tacaaniu saaja nia maniniushiniuria, maninia nia niquishaanura. ¿Maajitiri maniniucuasano, saaja na muecaca na canuusacari maninia, na cushitiasacari orojiniji shipinishano tuhuajashiquia, na cushishacari shanohua toquejuhuaj? ¿Jiyano maajitiri maniniucuasano jaara juaanuu maniniu quiriqviajuhuaj? Maja. <sup>4</sup> Naaratej, maninia cutaraari nia tacaaniuria nioojia nia maniniushitiniuria. Cunora, saaja maninia maaji quiniuu-cua jiaatijaca nia quiriqvia cutara, jacaria pocuajahuaj, maja juuajia. Jiyano maajitij, cunoori seetanujuanaa maninia niqishano Pueyasora cutara. Naa jaara nioojia maniniushitiri cutara, cunoori seetanujuanaa shaajeyaquiriqviaano. <sup>5</sup> Naajuhua, Pueyasocua tiuujiaca tariucuaaanu maajipohuari neyaca tojjiaca quiquaaari. Naa nojori miiniucuatej, nojori jiuuajaari seetanujuanaa shanohua maniniushitishano quiquaaari Pueyasora cutara. <sup>6</sup> Supuetana Abraham niquiocua Saaraari naa neyaca tojjiaca quiquaaari. Seetanujuanaa neyaca tojjiaca nia quishacari, nojuajaari na jyaniquijia na jyanijiaata. Naacuajitij, niaa jaara maninia miijiac quiriqvia, niaa jaara nia puereyaquiniutia nia niyaca tojjiaca quiriqviajuhuaj, Pueyasora, niaari Saara niquiojori.

<sup>7</sup> Najaniyarijiaata canuunaa, nia niquiocua nia jitiariquia maninia, nia niishishacari maajiri maja cumueeca juhua cayaja. Majaan na rerequetenu. Maajipohuacuajaari Pueyaso jyanooshanohuhua, taa na jyanooquaaari najaniyacuaani. Pueyasoori niaata nojori cojiritianutianiya samiitianijionu, pueyaracaanu rishijiac nojori quiniurijahuaj. Naacuajitij, maninia nia jitiariquia nia niquiocua, Pueyaso mariqui nojuaja nia secosano tojiyaquiriiri.

*Paatucua taa miiriquia parta pueyani*

<sup>8</sup>Pueyanaa, cua sequesano quiarrijiani, nioori puetunu Pueyaso pueyarajanaa. Pueyaraacaanu jiuujiaatiojuaca nia quiri. Majaari juayonuujutanu. Niarta Pueyaso pueya nia cojiriquia taraatia nojori quishacari, shuquiriaatia nojori quishacarijuhuaj. Seetanujuanaa panitiojuaca nia quiri juhua nia tapueyocucata. Taraajetoojuaca nia quirijjuhuaj. Naajuhuj, majaari tama nia cuaqueyajaaja nia jiyatenu juhua socua tojishano pueyano nia quiniuria tamonu pueyanojiniji. <sup>9</sup>Niaa jaara sesa miishaariquia, majaari na naminiu. Naajuhuj, niaa jaara sesacasaariquia, majaari nojori nia riucuanu nojori nia sesacanurajuhuj. Saaja maninia nia rihuanere nojori. Tariucuaacaanu, Pueyaso paraca nia quishacarijia, nojuacuaajaari nia saquirojojuacaari maninia na miiniuria nijaniya. Naaratej, saaja maninia nia miiriquia nia paracajuhuj. <sup>10</sup>Tariucuaacaanu Pueyaso Rupaajiniacuaajaari naa naajiotasano quiyajuhuj:

“Cante pueyaracaanu mijiria rishiniuucua jiaatiaani, shuquiriaatia na quiniuriajuhuaj, nojuaja cuara na niti cojuaraa maja sesa na pocuanura. Cuaara na rupaa cojuaraajuhua maja na cuaracashijionura. <sup>11</sup>Naajuhuj, cuara sesa na mijionu tarinitiaara saaja maninia na miiniuria. Nojuaja cuara pueya jiyanoootooteja quiiria. Cuaara naa maninia na miniu tarinitiaaquiiria. <sup>12</sup>Cante naa maninia mijiani, Pueyasoori na cojuaja, na secojosano tojjijiaariuhuj. Saniniuujia, Pueyasoori sesa miijiaa samiritiaa saaja”.

<sup>13</sup>¿Cantucua sesa nia miiriquiani niaa jaara saaja maninia miijiaa quiriquia? <sup>14</sup>Naajaa, niaa jaara saaja maninia nia miiniuucua miitiasaare, nia timiquiore. Pueyasocuaajaari jiyanojua maninia miiniutianiya nijaniya saniniuujia. Mijiria quiniaa miananajosacari nijaniya, majaari puereu, majaari nioojia nia niqijiotenu. <sup>15</sup>Saniniuujia, nioojijinia Cristo nia jiyatere nia Jiyaniijajanaara, seetanujuanaa na tojjijiaa nia quiniuria. Juhucarijia nia niishiriojoriquia, jeenucuasano nia quiniuria, maninia nia pohuatanura Jesucristojiniji. Naacuajitij, niaari jeenucuasano quiniutianiya, maninia nia riucuanura tamasa jaara nequesotare nijaniya, casaara juhuajaniya naquiya naquiya miiniu rejeretajate nijaniyani. <sup>16</sup>Jacaria nia pohuatere nia paniniutia nojori, maja nia rerequetenuta nojori. Pueyaracaanu maninia miijiaa nia quiriquia, sesa nia miiniu mariqui nioojia macuhujareeri. Naacuajitij, pueyaracaanu shitimia maninia miijiaa nia quishacari Jesucristoocua tiuujiaa nia quiniuucua, niaacuara rimiaaquejacaari tama sesa na pocuanuucuaajaaja caririquiniutianiya.

<sup>17</sup>Nio nia niishiri pueyanaa. Pueyaso jaara paniri naquiya nia miishaanura, socua maninia cutaraari naquiya nia miishaanura maninia nia miiniuucua, maja sesa nia miiniuucua. <sup>18</sup>Cristojuanaacuaajaari mosaaquiiaari sesa miijiaa pa quiniuucua. Majaari socua na pacutenu quiniutianiya cusonu. Nojuajaari tojetaarucujanaa maninia miijia quiquiaari. Naacuajitij, nojuajaari sesa miijiaacuara cusoquiiaari, Pueyasooocua na jiyatanura nijaniya. Pueyano cuaqueyaraca na quishacari, mosaaquiiaariiri. Pueyaracaanu rishijia sohanuraca na quiniuucua, nojuajaari samiitiaquiiaariuhua. <sup>19</sup>Naa sohanu na quiniuucuatej, nojuajaari macunucua quiquiojinia rosequiiaari tii tama nojuajiniijiaaja na pohuatanura macunucua sohanu. Cuno pojoriiri nujuatejojuajinia mishiquionucua quiya. <sup>20</sup>Cuno pojoriiri, noo pojoricuaja tariucuaacaanu supuetana Noé tojiyashijiaa quiquiaaritij, pueyaracaanu Noé poojotasacari Pueyaso rupaa nojori niquiara juucua. Pueyaracaanu Noé tarishishacari na puereetuuca buque na shipinishacari, pajaacuaji na tacajara, Pueyasoori jiyacari cuno sesa miijiaa sashiquiaari juucua. Pueyaracaanu sashiquiaariiri nojori tacatonuhuaa nojiaa nocua juucua. Puetunu mijiria quijiaa pueyajinijiojuanaani, saaja ocho pueyari cureequiaari, buquejiniaacua nojori tiuquitianuucua. Puetunu pueya shushiniuushacari pajaajinia, cuno pajaari saniniuujia Pueyasooocua tiuujiaa cuataniquiaari na buquejinia. <sup>21</sup>Quiarijia pajaniyara saniniuujia, cuno pajaari miriqui pa niishitiojia taa Pueyaso miiquiaa pajaniyani, paa jaara moojinia tiuquinishaareni Jesuucua pa tiuushacari. Naatej, taa Noé juhuajaniya cuataquiiaari pajaajiniacuaani, Pueyasooocua tiuujia na quiniuucua, pueraari naajuhuj. Naacuajitij, paa jaara moojinia tiuquinishaareni, paari pa timiniutia moojiniji tohuataquihuani, poojia cajitishano seetanujuanaa pa niishishacari paari tari jiyanooshanoni, pocuaji Tacuna Jesucristo samiitianuucua macujiniji. Majaari pa tiuquinishaanu quiquiaa pa seca pa jatanura. <sup>22</sup>Jesucristo samiitiasacariuhua, nojuajaari jiyocuaacaanu tacaquiiaariuhua. Quiarijia cajia Pueyaso miaquetajaraari. Jiyaniijajanaa na quiniuucua, nojuajaari cumaacaraca, tama nojuajaaja na tojtiniuria Pueyaso seya, puetunu cumaacaraca quijia-cajanaa, samaruhanio.

#### 4

*Maninia miijiaa pa quiriquia, Pueyaso cumaaca pa jiitianuucua*

<sup>1</sup> Naacuaajiti pueyanaa, naatej, taa Cristo rejeretaquiaari naquiya miiniu mijiria na quishacaricaaani, naa rejeretajaca nia quiriquiajuhuaj, niaa jaara naquiya miishaariquia. Naquiya pa miishacari, cunoori sesa pa miiniu pa tarinitijia. <sup>2</sup> Naacuaajitij, paa jaara naa naquiya miishaariquiiani, na nuhuaji paari saaja Pueyasora quiniu paniyani. Paari saaja na panishano miiniu paniyani, maja tama pa cuaqueya panishanojuuaa pa miiniuria socua. <sup>3</sup> Tarijia, Pueyaso tojjiyashijaca nia quishacarijia pueyanaa, niaari jiyanohua sesa miijiaca quiquiaari, taa Pueyaso niishiyashijaca miiquiaacuaani. Niaari saaja nia cuaqueya miiniu panishanoocua shiiniuquijia quiquiaari. Niaari queraatia tamaatia sesa miiniuucua jiaatijaca quiquiaari. Niaari saaja mashaasequenuujuaca quiquiaari. Naa queraacunuusaqui, niaari tojetaarucujanaa sacuaaraatia miijiaca quiquiaari. Naaari rerejojuajuhua puera nia ratunura, jiyanohua nia mashaasequenuunurajuhua. Naajuhua, niaari juaashiquiata shipinishano nia pueyasora nia jiyatesano shuquiri-tijaca quiquiaari. Naaari na taccoji sacuaaraatia pueresano casaa miiquiaarijuhuaj. <sup>4</sup> Quiarijia saniniuuja, Pueyaso niishiyashijaca nia cojjiyaquishacari naa sacuaaraatia nia miiijonuratej, nojoriiri jiuujiatequiaa nojori shaacasacari niajaniya. Nojoriiri cunora nia sesacaquiaa. <sup>5</sup> Cuno pojori cuaara niishiiria nio, Pueyasoori nojori nequesoreenu-taniya na nequesoreesacari puetunu pueyajanaa, saminiucua, macunucuanio. Jiyacaritij, nojori cuaara tama nojoriicuaaji riucuaarajaaja. <sup>6</sup> Cunora, pa Jiyaniijia Jesucristoori macunucua niquiara pohuataquiaari Pueyaso rupaa tama nojuajiniijiaaja, nocua tiuujia-cara na jiyatesocoriquiano. Nocua tiuujiaacari pueyaracaanu rishijiacara quiriquiano, taa Pueyasocuaani. Sesa miijiaca mijiria nojori quiniuucua, nojoriiri pajaajinia cusonuucuaari taa puetunu pueyajanaa shaajecoquiaacuaani. Naajaa, Jesuucua tiuujiaa cutaraari samiitianijiosaanutaniuhua.

<sup>7</sup> Nio pa quishacarini, paari socua quenaacoya jiya puequesacariicuarani. Naaratej, niishiriojuuaca nia quiriquia. Maninia nia jiitariquia tama nia cuaqueyajaaja, saaja Pueyaso secojuuaca nia quiniuria pueyaracaanu. <sup>8</sup> Jiyanohua panitiojuuaca nia quiriquiajuhuaj. Cunoori socua panishano cutara. Paa jaara panijiaa quiriquiani, paari queraatia sesa miishano jiyanoojia quiniutianiyan. Naaratej, seetanujanaa panijiaa nia quiriquia. <sup>9</sup> Niarta Pueyaso pueya jiitiaaquishacari na maquejara, na miaqueso-coriquianojuhuaj, nojoriicua taraajeja nia quiriquia. Nojori nia tiuquinitariquia nia tiajinia nia timiniutia. Majaari nojori nia ririjiotanu nia taajenuta. <sup>10</sup> Pueyasocuaajari na Sohanu niqutioquiaa puetunu na pueyajanaa, tamaatia maninia casaa miiniu niishijia-pa pa quiniuria. Naaratej, puetunu niajanijajanaa cuaara maninia miiria niarta Pueyaso pueya pueyaracaanu, taa Pueyaso cumaquiquiaa niajaniya maninia nia miiniuriacua-jani. Maninia nia poonjioteriquia Pueyaso cumaaca, nojuaja niqutiojosano niajaniani. <sup>11</sup> Naacuaajitij, nia pocuasacari, Pueyasocua nia tiuuri nojuaja cumaquiniuria niajaniya na panishano nia sequenura. Naajuhua, niaa jaara casaa miiriquia niarta Pueyaso pueya nia naacunura, nojori nia miiriquia maninia Pueyaso niqutiosano cumaacata. Naa nia miiriquiatej, Pueyaso timitiasanura socua, Jesucristoocua tiuujia nia quiniuucua. Nojuaja cuaara maniniuhuaqueetasaaria pueyaracaanu, tojetaarucujanaa maninia miiji-a na quiniuucua, puetunu cumaacaracajanaa na quiniuucujuhua. Cuaara naa quiiriatej.

*Juhuaajaniya pa rejeretare naquiya miiniu, Pueyaso pueya pa quiniuucua*

<sup>12</sup> Cua panishano cuarta Pueyaso pueyanaa, majaari nia shiriiquiniu niaa jaara jiyanohua naquiya miishaariquia. Majaari nia jiyaniniujuhuaj saa niajanijaja naa miishiya. <sup>13</sup> Naa jaara naa naquiya miishaariquiatej, nia timiri. Jesucristoocua tiuujiaa nia quiniuucua, niaacuaajari naa miishiya taa Jesucristo miishaaquiari naquiyaacuaani. Naa naquiya miiniu nia rejeretasacariitij, niaari jiyanohua timitianutaniya Jesucristo, shacantuuca na cumaacata na tiuquishacariuhua, na jataniniuria niajanijia juhua nojuaja nia quiniuriajuhuaj. <sup>14</sup> Naajuhua, niaa jaara sesacasaariquia Jesucristo tojjijaca nia quiniuucua, shuquiriaatia nia quiriquia. Pueyari naa nia sesacaquiaa, shitimia maninia miijiaca nia quishacari, Pueyaso Sohanuraca nia quiniuucua. <sup>15</sup> Naa jaara naquiya miishaariquia pueyanaa, cuno cuaara quiiria maninia miijiaca nia quiniuucua, maja sesa miijiaca nia quiniuucua. Naa caara caririqiiira cutara niaa jaara moju quiri, nohuase-jojua, sesa miiji, timia niishiniu panijia tamasa casa. <sup>16</sup> Saniniuuja, maja cutaraari nia caririqiniyu niaa jaara naquiya miishaariquia Jesuucua tiuujia nia quiniuucua. Saaja Pueyaso nia shuquiritariquia cunora.

<sup>17</sup> Quiarijiani, Pueyasoori tama na pueyajaaja saniitioquiaa na tojtiaaquishacari na rupa. Paa jaara naa saniitosaaquiaacuaani, ¿taariquitijia noo pojori miishaanutaniya socu-atejaj, Jesucristojiniji pohuatasano ruuretatejatej? <sup>18</sup> Naacuaajitij, Pueyaso jiyanooshano

pueya jaara queraatia naquiya miiquiaacuaa, ¿taariquitijia Pueyaso tojiyashijia miishaanutaniyatej? ¡juhuej! Puereeta miishaanutaniyari Pueyaso ruuretajaca, sesa miijiacanio. Nojoriiri jiyanoehua socua naquiya miishaanutaniya, Pueyaso saniitosacari nojori. <sup>19</sup> Naacuajitij, Pueyaso jaara naa naquiya nia miishaanura paniya, juhuajaniya nia rejeretariquia naquiya nia miiniu. Majaari nia tarinitianu maninia nia miiniu, naquiya nia miishacari. Saaja Pueyasocua nia tiuuriquia nioojia na cojuanura maninia. Nojuacuajaari na Shipinina. Nojuacuajaari saa maniniaja. Naquiya pa miitiquiaacuajaari socua na jeenucuanura pajaniya.

## 5

### *Socua rootasano Pueyaso pueyara*

<sup>1</sup> Quiarijia saniniuujia cuarta pueyaso pueyanaa, janiyari nia jitianaa nacasuyani. Niajaniya, Pueyaso pueya maapue jitiananaa, cua tojitiare. Janiyacuajaari Pueyaso pueya maanu jitianajuhua, juhua niajanijajuhua. Janiyacuajaari pa Jiyaniijajanaa niquni-ani, nojuaja jaara naquiya miijioquiaari mijiria na quishacarijia canaata. Naajuhua, nojuajiniji cua pohuatanuucua, janiyari naquiya miishaacuaaiajanijuhua. Naacuajitij, pa Jiyaniijia muetasacariuhua na shacantuuca cumaacajinia, janiyari jaarajaaja niaata cojiritiasaanutaniya jatanishaanuni, juhua nojuaja pa quiniuria mariyata. <sup>2</sup> Cunora Pueyaso pueya jitiananaa, shamaatia nia cojuare Pueyaso pueyaniyojua, teyano jitianara Pueyaso jiyatequiaari niajanijacuajani. Maninia nia cojuariquia nojori, seetanujuanaa nojori nia paniniutia, taa Pueyaso paniya nojori nia cojuanuracuajani. Majaari nojori nia jitianu nia taajenuta saaja nojori jitianaa nia quiniuucua. Naajuhua, majaari nojori jitianaa nia quiniu saaja cumaneecaacua nia jiaatianuta. Saniniuujia, seetanujuanaa nojori nia paniniutia nia jitiariquia niarta Pueyaso pueya. <sup>3</sup> Majaari niarta Pueyaso pueya nia jitianu juhua tama nia seyajaaja. Niajaniya saniya cuaara maninia miijiaa quiiria nojori niquiara, nojori niishiniuria naa quiijacate Pueyaso pueya, naa nojori miiniurijuhua. <sup>4</sup> Naacuajitij, pa Jitianajanaa tiuquishacariuhua jiyocuacaanuji, niari shacantuuca quiijacata jatanishaanutaniya, pueyaracaanu rishijia nia nia quiniurijuhua.

<sup>5</sup> Niajaniya mashiquiorinia, Pueyaso pueya jitianaa tojijia nia quiriqiajuhua. Puetunu niajanijajanaa Pueyaso pueyanaa, tama nia cuaqueyajaaja nia jiyatere niarta Pueyaso pueyano cumaquenia nia quiniuria jaarajaaja. Tariucuacaanu Pueyaso Rupaajniacuajaari naa naajiotasano quiya:

“Pueyasoori na juaniutia niqijia narta pueya shocoteja. Saniniuujia, narta pueyano shocoteyashijia naacujua cutaraari”.

<sup>6</sup> Naarate pueyanaa, puetunu niarta Pueyaso pueyajanaa nia jiyateriquia tojishano pueya nojori quiniuria niaara. Majaari quenaaja nojori nia rerequetenu. Naa juhuajaniya niarta Pueyaso pueya tojijia nia quishacarijia, pa Jiyaniijia Jesucristo jaara tiuquirioh-ua, Pueyasoori na cumaacata nia jiyatenutaniya jiyaniijianucua nia quiniurijuhua. <sup>7</sup> Pueyanaa, puetunu nia tacaaniujuana nia niqitiore Pueyaso. Nojuacuajaari niaacua taraajequiaa.

<sup>8</sup> Pueyanaa, nia Paraca sequeeri nia shanacujuquia, juhua sare, taa sare shanacujia na sanura casaacuaani. Cunora, soquejaca nia quiriqia pueyaracaanu. Juhua sutejaca nia quiriqia, pueyaracaanu nia seconjura, Sesaaca mariqui juhua sare nia sareeri. <sup>9</sup> Cumaatia nia nujuatariquia nojuaja, seetanujuanaa Pueyasocua tiuujia nia quishacari. Majaari Pueyaso Rupaacuaji nia taacanunu. Naa nia miiriquiatej, nia niishishacari niarta Pueyaso pueyari puetunu tiquiyocujanaa naa naquiya miquioyaju-uhua. <sup>10</sup> Naa jaara pupaqijia naquiya miishaariquia mijiria, Pueyasoori na nuhuaji nia jataniniutianiya tojetaarucujanaa maninia pueya nia quiniuria. Tojetaarucujanaa pa jyanoojia na quiniuucua, nojuacuajaari nia saquiriojia nia nata nia quiniuria shacantuuca na cumaacajinia, Neyanu Jesuucua nia tiuumiucua. Naaratej, nojuacuajaari nia jiyatenutaniya seetanujuanaa nioojia niqijieteyashijia nia quiniuria, socua jyanohua na cumaaca jitiata nia quiniuria, maja quenaaja Sesaaca poptionura niajaniya. <sup>11</sup> ¡Jyanohua maniniaari pa Que Pueyaso! Nojuacuajaari puetunu cumaacaracajanaa pueyaracaanura. ¡Cuaara naa quiiriatej!

### *Pedro sequesano quera na naajio na tucuatasaari*

<sup>12</sup> Cuarta Pueyaso pueyanaa, janiyari parta Pueyaso pueyano Silvano naajioteree nio posunee naajioneeni. Nojuajaari shamaatia poonijiojua pa Jiyaniijia. Janiyari niaacuara naajiotereeni, cua nacasunura niajaniya, cua shiniujuniuria niajanijajuhua maja nia pishiniuria Pueyasocua. Seetanujuanaa jyanoojia na quiniuucua, naarate nojuajaari nia jitiata maninia, naquiya na miitishacari niajanijajuhua. Cunora, nocua nia tiuuriquia, pueyaracaanu na cumaquiniuria niajaniya.

<sup>13</sup> Babilonia tiacajinia quiniaa parta Pueyaso pueyari nia saruhuataa. Nojoriiri Pueyaso saquiriojosano na pueyaranojuhuaj, taa na saquiriojosanotucuaa niajaniyani. Marcoori nia saruhuataajuahuaj. Nojuajaari juhua quiyanu. <sup>14</sup> Nia saruhuatasacari niarta Pueyaso pueya, seetanujuanaa nia paniniutia nia nujuutoore.

Pueyaso cuara nioojia cajitiiria, canapueete Jesucristoocua tiujujacacujani.

## TANEE PEDRO NAAJIONEE

### *Pedro saruhuatasacari narta Pueyaso pueya*

<sup>1</sup> Janiyari Simón Pedroni, Jesucristo seru, na jiyaramiquishanojuhuaj. Janiyari cunora niaacuara naajiyani. Pa Que Pueyasoori nia tiuutiqiaaari pocuaji Tacuna Jesucristoocua, taa nocua canaa tiuquaaaricuani. Nocua nia tiuuniuni, cunoori jiyanoehua panishano. Naacuajitij, Pueyasoori nia jiyanooquiaa juhua sesa miyashijiaca nia quiniuria na niqiyara, taa canaa quiyacuani. <sup>2</sup> Seetanujuanaa maatia nia niishitiriqia Pueyasoni, pa Jiyaniijia Jesunio. Naacuajitij, niaari socua jiyanoehua cumaquishaanutaniya. Nioojaari cajitishaanutaniyajuhua, juhuajaniya quijiaca nia quiniuria.

### *Pueyaso pueya cuara nio niishitiojosano miijiaca quiriia*

<sup>3</sup> Jesucristojuanaacuajaari pa sequequiaari na pueya pa quiniuria. Paari na maunu tojiqiaarini, pa niishishacari nojuajaari seetanujuanaa Pueyaso Niyanu, tojetaarucujanaa maninia miijia. Seetanujuanaa maatia pa niishiniuucua nojuaja, paari Pueyaso cumaacaraca sesa miyashijiaca pa quiniuriani, seetanujuanaa na tojiijaca pa quiniurijuhua. <sup>4</sup> Naa jiyanoehua maninia miijia Jesucristo quiniuucuatej, nojuajaari pa niishitiquiaari casaa na miiniu paniya pajaniyarani. Pajaniyarano na sequesanoori seetanujuanaa maninia, tojishocoriqiano. Paa jaara na sequesano tojitiajaca quiri seetanujuanaani, paari jatanishaanutaniyani juhua nojuaja pa quiniurijuhua. Naacuajitij, paari quiariniora jatanishaaquiari na cumaacatani maja pa sesenura. Paa jaara Pueyaso tojiyashijiaca quiriqiani, paa maara tojetaarucujanaa seseriquiani, taa mijiria quinia pueya sesequiaacuani, tama nojori panishano miijiacajaaja nojori quiniuucua. <sup>5</sup> Cunora, tamajaaja nia saniniujiuriquia tojetaarucujanaa maninia quijiaca nia quiniuria, juhua Pueyaso. Niaacuajaari tari nocua tiuujaca. Naa nocua tiuujaca nia quiniuucuatej, jiyanoehua nia saniniujiuri maninia miijiaca nia quiniuria pueyaracaanu. Naa maninia miijiaca nia quishacaritij, jiyanoehua nia saniniujiuri socua quiniurijuhua, sesa miiniu nia ruuretanura. <sup>6</sup> Naa niishijiaca nia quishacaritij, jiyanoehua nia saniniujiuriquia tama nia cuaqueya miiniu panishanojuaja rejetejaca nia quiniuria, maja nia miiniuria sacuraatia casaa nia panishano. Naa tama nia cuaqueyajaaja rejetejaca nia quishacaritij, jiyanoehua nia saniniujiuriquia juhuajaniya sashijiaca nia quiniurijuhua. Naa juhuajaniya sashijiaca nia quishacaritij, jiyanoehua nia saniniujiuriquia seetanujuanaa Pueyaso panijaca nia quiniuria. <sup>7</sup> Naa Pueyaso panijaca nia quishacaritij, jiyanoehua nia saniniujiuriquia niarta Pueyaso pueya panijaca nia quiniuria socua. Naa niarta Pueyaso pueya panijaca nia quishacaritij, jiyanoehua nia saniniujiuriquia tojetaarucujanaa panijaca nia quiniuria.

<sup>8</sup> Naa jaara puetunu nio niishitiojosanojuanaa tojiijaca quiriqia seetanujuanaa, majaari najuhua na Jiyaniijia Jesucristo niishijiaca nia quiniu quiniutianiya. Naajuhua, majaari najuhua quijiaca nia quiniu quiniutianiya. <sup>9</sup> Nio rootasano tojiyashijiaca saniniuujia, nojoriiri juhua cariyajuaru, niishiyashijiaca. Naa nojori quiniuucuatej, nojoriiri niyajetaquiaa nojoricuajaari juhua jeequejosaaquiari sesa nojori miishanojiniji. <sup>10</sup> Cuarta Pueyaso pueyanaa, Pueyasocuajaari nia sequequiaari na pueya nia quiniuria. Nojuajaari nia saquiriojuqiaari. Cunora, puetunu nio cua rootasanojuanaa tojiijaca nia quiriqia seetanujuanaa. Naacuajitij, niocua niishiri niaari seetanujuanaa Pueyaso pueya. Majaari quenaaja nocuaji nia rupatenu quiniutianiya. <sup>11</sup> Naa maninia quijiaca nia quiniuucuatej, niaari shuquriaatia tiuquinitiasaanutaniya jiyocuacaanu pocuaji Tacuna Jesucristoocua, pueyaracaanu nata nia quiniuria, pueyaracaanu Jiyaniijiajanaa na quiniuucua.

<sup>12</sup> Niaacuajaari maatia niishitiojosaaquiari Pueyaso rupaa Jesucristojiniji. Niaari cunoo seetanujuanaa rupaacua tiuujaca. Naajaa, janiyari pueyaracaanu nia niishitiniutianiyan, maninia nia racatanura nia numaama. <sup>13</sup> Mijiria cua rishishacarijia, Jesucristo jiyaramiquishano cua quiniuucua, maniniacuajaari pueyaracaanu cua shiniujiuniora nijaniya, maja tariucua nia niishishano Jesucristo rupaajiniji nia niyajetanura. <sup>14</sup> Pa Jiyaniijia Jesucristoori tari cua niishitiriucuaa janiyari quera mosaanutaniyani. <sup>15</sup> Cunora, janiyari nio naajiyani niaarani. Naacuajitij, janiya jaara mosaareni, niaari nio cua naajionee jiiitianutaniya cua nuhuaji nia serojosocoriqiano. Maniniacuajaari nia jiiitanura cua naajionee maja nia niyajetanura puetunujuanaa cua niishitiojosano nijaniya.

### *Shacantuuca Jesucristo cumaaca niqiniaajiniji pahuatasano*

<sup>16</sup> Canaa niishitiojosano nijaniya pa Jiyaniijiajinijini, cunoori maja canaa tojishano tamonujiniji. Naajuhua, cunoori maja tama niishijiacajaaja pahuatasano na sapojonura

pueya. Jesucristo cumaacajiniji canaa pohuatasanoni, naajuhuj, taa na tiuquiniuti-niuhuan, puetunu cunोजनाari maja tama canaa niishishanojuaja. Canaajanaacua-jaari canaa namijiatajanaa na niquiquiaarini nojuaja jaara shacantuucara jataquiaari canaa niquiara. <sup>17</sup> Jiyacaritij, na Que Pueyasoori jyanohua na timitiariquiaa canaa niquiara. Canaari na tojiquiaarini naa na sequesacari Neyanujinijitij: “Nojuajaari Quiya-nuniyoja. Jyanohua cua timitiasano”. <sup>18</sup> Canaa quishacari pa Jiyaniijata shacantuucara na jatasacui tuhananuucua, canaajanaari naa Pueyaso tojiquiaari jiyocuaaanuji pocuaanoni.

<sup>19</sup> Canaa tojiniucua Pueyaso sequesanojuanaa Neyanujiniji, canaari cunora seetan-juanaa niishiyani, tariucuaaanu nojuajiniji pueyara Pueyaso sequesano caminiujiuniaa sequesanoori seetanjuanaajuhuj. Naaratej, maniniacuaajaari nia tojiniuria nojori naajiotasano Pueyaso Jiyarosocoriquiano Pueyanojiniji. Nojori naajiotasano, cunoori poojiajinia cuhuataquiaa, naatej, taa samaritiu cuhuataa ninishiquicuaani, cuaara juhuaque-majaatijia. Pananuuri saniniujia muetanutaniyacujua, seetanjuanaa na cuhuatanura pajaniya. Naa quiniutianiyajaariuhua pa Jiyaniijia muetasacariuhua pocua. <sup>20</sup> Maninia nia niishiri nio, pueyanaa. Puetunu tariucuaaanu Pueyaso sequesano caminiujiuniaa naajiotasanojuanaari maja na naata niishishaanu maatia tama pa niishitiajatajaaja. <sup>21</sup> Tariucuaaanu Pueyaso sequesano caminiujiuniaa naajionuutasano, cunoori maja tama nojori niishishanojuaja. Pueyaso Sohuanujuanaacuaajaari nojori niishitiquiaari nojori pohuatanura Pueyaso sequenu panishano pueyara.

## 2

### *Sacuaraatia miijica niishitiojonaajiniji pohuatasano*

<sup>1</sup> Tariucuaaanu, noojiaqueya Israel pueyajinijinoori tama na cuaqueyajaaja jiyate-quiaari juhua Pueyaso sequenu panishano caminiujiuniaa nojori quiniuria. Naacuajitij, nojoriiri narta Israel pueya sapojonuucuaari. Naajuhua cua panishano pueyanaa, sapo-jonuucuaari nia tajinia supuenutaniyajuhuj. Nojori niishitiojosacari sacuaraatia tama nojori niishishanojuaja, nojoriiri nia sapojonutaniya. Nojori niishitiojosanoori Pueyaso pueya sesoja cutara. Naacuajitij, nojoriiri tama nojori Camarnujuaja tamacanutaniya, cante nojoricuara mosaaquiaaricuaani, na pueya nojori quiniuria juucua. Cunora, nojoriiri canashiyaquiji niiquiji puetunu shaajasaanutaniyajanaa saniitiosocoriquiano. <sup>2</sup> Queraatia pueyari sacuaraatia miijica quiniutianiyajuhuj, sacuaraatia cuno pojori ni-shitiojosano tojjijaca nojori quiniucua. Naa nojori miiniucuatej, Pueyaso niishiyashiji-acaari seetanu rupaajanaa sesacanutaniya. <sup>3</sup> Cuno sacuaraatia niishitiojonuujaacaari jyanohua casamiriaca quiniucua jiaatijaca quiniutianiya. Naaratej, nojoriiri na-juhuana shanohua nojori niishitiojosano nia sapojonutaniya, nareja nia niquitiojonura nojori nia cumaneeca, nia casaminio. Naajaa, naa sacuaraatia miijica nojori quiniu-ucuatej, nojoriiri tariucuaaanujiniji Pueyaso riuriosanocuaa na saniitiosocoriquiano. Majaari Pueyaso jyanooniu quiniutianiya nojori.

<sup>4</sup> Naajuhuj, Pueyaso seya jaara sesa miiquiaari, majaari Pueyaso jyanooniu quiquiaari nojori. Pueyasoori puereeta nojori quejooquiaari ninishiqui. Tii nujuatejosano quiyari, nojori saniitiosaanu juuca cuaara quirijiaatijia. <sup>5</sup> Naajuhuj, Pueyasoori Noé quishacari sesa miijica pueya jyanoyaquiquiaarijuhuaj. Cuno sesa miijica pajaashitiani-quiaari-iri nojori cusununura puetunjuanaa. Saaja Noé curoquiaariiri Pueyaso tojjia na quiniucua, socua siete pueyano. Noeeri pueyaracaanu cuno sesa miijica pueya numotequiaari juucua, nojori tacatonura noojia Pueyasocua, sesa nojori miiniujiniji. <sup>6</sup> Naajuhuj, Sodoma tiacajinia quiniaa pueya quiniucua jyanohua sesa miijica, Pueya-soori cuno tiaca catijiatquiaari tojetaarucujanaa juacara. Naa catijiatquiaari Gomorra tiacajaariuhuj. Cuno caapiqui tiaca naa catijiatasaaquiaarini, cunoori quiquiaari cuno nuhuaji quiriquiano pueya na numootenura maja naa sesa miijica nojori quiniuria-juhuaj, nojori mariqui saniitiosaarejaariuhuj. <sup>7</sup> Sodoma tiaca Pueyaso catijiatasacari, saaja Lot curoquiaariiri maninia pueyano na quiniucua. Sodoma tiacajinia quijia Lot quiniucua, nojuajaari jyanohua taajequiaari tari, cuno pueya miijionuucua sacuaraatia casa, tariucua nojori jiidishano casaacua.

<sup>8</sup> Puetunu juucajanaa, Lotri narta Sodoma tiacajinia quiniaa niquiquiaari cararaatia miitioojiyano. Sacuaraatia nojori pocoojonu tojiquiaarijaariuhuj. Maninia pueyano Lot quiniucua, nojuajaari jyanohua naquiya miiquiaari noojiajinia. Cunora, quera Pueyaso saniitiosacari cuno pojori, Pueyasoori Lot mashiquiquiaari cuno pueya tajiniji. <sup>9</sup> Naacuajiti pueyanaa, paari niishiyani, Pueyasoori na tojtiajaca pueya cojuaja, maja

nojori miitishaanura sesa. Saniniuujia, Pueyasoori sesa miijiaca racatajajaara nujuatejosano, nojori saniitiojosaanu juucara. <sup>10</sup> Pueyasoori socua jiyanoehua nio pojori saniitoriquiano: na camishoo maajipohua numuetucunuucua jiaatiajacani, maajishuriu numuetucunuujacuajuhua, noo pojorijuhua, pa Jiyaniijia rootasano ruuretajaca saajatej. Naa sacaraatia miijiacani, nojoriiri tojetaarucujanaa tojiyashijiaca. Majaari na pueretunu quiquiaa sacaraatia tama nojori panishanojuaaja nojori miiniuria. Naajuhua, nojoriiri maja na pueretunu quiquiaa jiyocuaaanu cumaacaraca quijiaca na sesacanura. <sup>11</sup> Saniniuujia, Pueyaso seya cutaraari jiyanoehua socua cumaacaraca cuno sesa miijiaca pueyajiniji. Naajaa, majaari nojori rutioconu quiquiaa Pueyaso, cuno jiyocuaaanu cumaacaraca quijiaca nojori sesacanura.

<sup>12</sup> Cuno pojori, saaja sacaraatia miiniuria niishitiojanaani, nojoriiri niishiyashijiaca. Nojoriiri juhua nacujiniaaco quijiaca casami, teyanote saaja puecoosocoriquiano roosaaquiaacuajani. Tojetaarucujanaa niishiyashijiaca nojori quiniuucua, nojoriiri maninia quijiaca pa quiniuria pa Jiyaniijia rootasano sesacquiaa. Cunora, nojoriiri juhua puecoosocoriquiano nacujiniaacoji casaa. <sup>13</sup> Naacuajitij, nojoriiri naquiya mishocoriquianojuhua, naquiya nojori miitianoocua narta pueya. Nojoriiri jiyanoehua timiquiaa nojori jaara naata quiriquia sesa miiniu juucajuhua taa nojori miiquiaa niucuaaani. Cuno pojoriiri sacaraatia miijiaca. Majaari na niishiniu caririqiniu. Nojori sapojonuucua nijaniya, nojoriiri jaarajaaja nia cojiquiaa nia queranacunuusaqui. Naa nojori quishacari nia tajiniatej, nojoriiri jiyanoehua timiquiaa tariucua nojori jiiitishano sesa casaacua nojori niishiriojosacari. <sup>14</sup> Naacuajitij, nojoriiri maja nareja na niqiniu quiquiaa maajipohua. Puetunu maajipohujanaa niqitiquiaa nocua na jiaatianutaari. Nojoriiri maja na taajenu sesa na miiniuria pueyaracaanu. Canapue te jatarinitiaja pa Jiyaniijia tojjiani, cuno pojoriiri nojori shiniujuquiaa na sapojonuta, sesa nojori miinuriujuhua. Naajuhua, cuno pojoriiri tariucua jiiitino puetunu nojori panishanojuanaa nojori jiiitanura, jaara na naata quiriquia. Nojoriiri tariucua Pueyaso jiyatesano na saniitiosocoriquiano. <sup>15</sup> Pueyaso rootasano tojiyashijiaca nojori quiniuucua, nojoriiri juhua tashuquioono Pueyasocua neteja nuujiniji. Nojoriiri casamiriaca quiniuucua jiaatiajaca juhua supuetana Beor niyanu Balaam. Jiyacaritij, Moab jiya jiyaniijaari Israel pueya paraca quiquiaari. Naaratej, nojuajaari Balaam sequequiaari, nojuajaari jiyanoehua queraatia casami na niqitio nutaniya, nojuaja jaara nocua quiaare, Israel pueya na shimiojonura nera. <sup>16</sup> Casamiicua jiaatiaja na quiniuucua, Balaamri na seru ninjina cajiquiaari. Quiaareeri. Nucuaco na quiasacari, Pueyasoori Balaam seru pocuatequiaari pueyano rupaa, Balaam na nacasunura. Naacuajitij, pocuaashijia seruuri Balaam tarinitiquiaariuhua, juhua moseeca sesa na miiniu panishacari juucua.

<sup>17</sup> Cuno pojori, pueya sapojoua na niishitiojosanotani, nojoriiri juhua cuari joojequetano. Naajuhua, nojoriiri juhua niqitioocua paratu piyarojosano, tamoco quia-maa saajaari. Nojori niishitiojosanoori naajuhua. Majaari na tojjitajaca na naacunu. Pueyasoori jiyanoehua ninishiqui quiquo tari jiiitiaa nojoriicuaaji, pueyaracaanu nojori quiquiorano. <sup>18</sup> Nojori pohuatasanoori najuhua shanohua tojishano. Saaja sapojonuri. Naacuajitij, nojoriiri shusha Jesuucua tiuujiaca shiniujuquiaa nojori miinihuara tama nojori cuaqueya panishanojuaaja. Cuno Jesuucua tiuujiacacuaaja shusha naataja sesa miijiaca pueyajinijinio jatanishaariquiaa juucua, Pueyaso tojjijia nojori quiniuria juucua. <sup>19</sup> Sapojonuujaca cuno niishitiojonuujaca quiniuucua, nojoriiri pueya niishitiojoquiaa sacaraatia. Pueya niishitiojoquiaari, nojoriniaari seetanujuanaa juhuajaniya quijiaca quiniutianiya shuquiriaatia, nojori jaara nojori niishitiojosano tojjijia quiriquia. ¿Nojori niishitiojosano pueyatucua taa juhuajaniya quijiaca quiriqiani, tama nojorijiaaja jaara sesa miiniuucua jiiitino qiyajaa? Seetanujuaari, pueyano jaara maja na naata quiriquia sesa casaa na miijionu tarintianu, cuno pueyanoori seetanujuanaa juhua tama sesa na miijiosano serujuaaja. Majaari na naata na tarintianu. <sup>20</sup> Pueyanaa, niacuajiaari niishiya, pueyano jaara pocuaji Tacunaacua tiuujiara quiri, pa Jiyaniijia Jesucristoori na cumaquijia na tarintianura sesa miiniuria na jiiitishano. Saniniuujia, cuno pueyano jaara sesa miijiaa quiriuhua, nojuaja jaara sesa miijionura jiiitirohua socua, neraari socua pueereeta quiniutianiya Pueyaso niishiyashijiaca pueyajiniji. <sup>21</sup> Naacuajiti pueyanaa, pueyano jaara seetanu rupaaanaa niishijia quiriquia, nojuajaari cocuaatia miya jaara na samiritiarohua sesa miijia na quiniuhua. Cuno pueyanora maara socua maninia quiquiaari maja na niishiniuria Jesucristo rupaa, teyanote na niqiuara pohuatasaaquiaaricujani, jatanishano pueyano na quiniuria. <sup>22</sup> Naa pa Jiyaniijia samiritiajaca pueya quiniuucuatej, sesa miijiaa nojori quiniuhua, nojoriiri nio tariucuaaanu Pueyaso Rupaa-jinia naajiotasano tohuatequiaa. Naa miriqui sequeyari: "Sareeri coteenu macayoree. Na miaquerohuari". Naajuhua: "Cushiiri nanatosaree juucua. Saaja na coquiojinia neeneecasuhuariuhua".



## 3

*Pa Jiyaniijia tiuquiniuhua cuaracashitishacari*

<sup>1</sup> Cua panishano cuarta Pueyaso pueyanaa, nioori tanee cua naajionee niaacuara. Coteenu cua naajiojina, janiyari nia nacasuquiaarini socua cua shiniujuniuria niajaniya maja nioojia niqijjotejaca nia quiniuria Pueyaso rootasanojiniji. Janiyari naa miya quiar-ijia nio cua naajiojiniajuhua. <sup>2</sup> Maninia nia numaama nia racatariquia tariucuaaanu pueyara Pueyaso sequesano caminiujuninaa pohuatasano, pa Jiyaniijia jiyaramiquishano pueya pohuatasanonio. Cunocuaajaari pocuaji Tacuna rootasano pajaniyara.

<sup>3</sup> Nio nia niishiriquia cutara pueyanaa. Quera nio jiya puequesacari, pa Jiyaniijia soojeacaari supenutaniya. Nojoriiri tama na cuaqueya miiniu panishano miijiacajaaja. Na macaatiuria niajaniya, nojoriiri nia nequesotanutaniya: <sup>4</sup> “¿Taa nia Jiyaniijia miiquiaarini? Nojuacuajaari nia sequequiaari: ‘Tacatenutaniuhuanijia’. Majaari na tiuquiniu. Tariucuaaanu na niquiniaa pa supuetanaacuajaari tari puequecanu. Nio jiyajinia, puetunu casaajanaari quiyajaa, juhua shusha na shipinishaanujiniji. Majaari quenaaja tamonu casaa jatanu quiquiaa tamaatiara”. <sup>5</sup> Majaari naate pueyanaa. Cuno pojoriiri tariucuaaanu Pueyaso miishanojiniji niishiniu paniyashijiaca. Jiyanojia tariucuaaanu, Pueyasoori jiya cajiniocua shipiniquiaari saaja na pocuanuta. Na sequesacarijii-uhua, jiyari mohuacajiniji muetaquiaari, mohuaca jiuujajinia na quiniuria. <sup>6</sup> Na nuhuaji, Pueyasoori cuno mohuacaja pajaashitiquiaari puetunu mijiria quijiacajanaa na cusojuanura. <sup>7</sup> Quiarijia saniniujia, jiya cajiniocua, nio jyanio, Pueyasoori na cumaacata nojori jiiitaaajara. Na nuhuaji cutara, puetunujaanari catenutaniya, Pueyaso saniitiosacari puetunu na ruuretajaca pueyajanaa.

<sup>8</sup> Naajuhuaq cua panishano cuarta Pueyaso pueyanaa, pueyaracaanu nio nia niishiriquia. Pa Jiyaniijia, niquiriyatu juucaari juhua mil marijia. Naajuhuaq, mil marijiaari juhua niquiriyatu juuca nera. <sup>9</sup> Majaari nia jyaniniu maja pa Jiyaniijia tacatenu quiniutianuhua. Majaari na tarishiniu najuhuanaj, taa tamasaca jiyaniyacuaajini. Maja. Maja cutaraari na paniniu pueya quejoosaanura mani quiquiojina. Naacuajitij, nojuacuajaari pueya sashiyajara nojori tacatonura nojori jiuujia sesa nojori miiniujiniji, Pueyaso pueya nojori quiniuria.

<sup>10</sup> Naajaa, nojuacuajaari tiuquiniutianuhua. Pueya jyanishacari Jesucristo maja na tiuquiniu quiniutianuhua, jiyacaritij, canashiyajiqi tiuquiniutianuhuari. Juhua nohuasejojua tiuquiniutianuhuari, sesa miijiacaa na saniitionura. Na nuhuaji, jiya cajiniocuaari shaajenutaniya. Jiyanojia cojuatunenutaniyari na shaajesacari. Casaajiniji jiya shipinishaacuaarini, cunoori puetunu catenutaniyajanaa. Naacuajitij, jiyari puetunu mijiria na jiiitiasano casaatajanaa shaajasaanutaniya jyanohua naseeca manijinia.

<sup>11</sup> Quiarijia pa niishishacari taa pa jiya shaajasaanutaniyani, cunora, seetanujanaa Pueyaso panijiacaa nia quiriqia saa maninia miijiacaja nia quiniuria. <sup>12</sup> Naa maninia miijiacaa nia quiriqia, Pueyaso cuaraa pa Jiyaniijia mueraterohua pocuaaatijia. Pa Jiyaniijia sequesano tojjijiacaa nia quiriqia, na tiuquiniu juera nia seecootenura. Jiyacaritij, Pueyasoori jiya cajiniocua setanutaniya. Naacuajitij, casaata na shipiniquiaari puetunu casaajanaani, cunoori manijinia mohuaquenutaniya. <sup>13</sup> Naajaa, Pueyaso cutaraari seetanujanaa sequequiaari pajaniya, nojuajaari quiarinio jiya cajiniocua shipininiutianiyari pajaniyara, quiarinio jyanio. Cunora, paari shuquiriaatia na sashiyani. Jiyacaritij, majaari quenaaja sesa miiniu niishishaanu quiniutianiyaa socua. Puetunu casaajanaari tojetaarucujanaa maninia quiniutianiyaa.

<sup>14</sup> Naa nia niishishacari casaa pa sashiya nio pa quishacarini, cunora, jyanohua nia saniniujiriquia saaja maninia miijiacaa nia quiniuria. Tojetaarucujanaa jyanoooshano nia quiriqiajuhuaj, juhuanijaniya nia quiniuria pa Jiyaniijia tajoji, na nequesoreesacari pajaniya. <sup>15</sup> Naacuajiti pueyanaa, nio nia niishiriquia: pa Jiyaniijiaari tarishiyajara pueyacua na taraajenuucua, nocua nojori tuuniuria, Pueyaso jyanooniuria nojori. Tarishiyajariuhuaq tojetaarucujanaa jeenucuasano pa quiniuria nera. Pa panishano parta Pueyaso pueyano Pabloori naa naajioquiaari niaacuaraajuhuaq, Pueyaso niishitijaa na jiiitianuucua. <sup>16</sup> Nojuacuajaari puetunu na naajioneecajinijanaa mariyata nio cua pohuatasano pohuataa. Noojiaqueya na pohuatasanoori seetanujanaa jiyajeneta pueyara. Naacuajitij, mosanucua, noojia niqijjotejacanio, nojoriiri Pablo niishitiojosano jataniquiaa tamaatiara, nojori niishiyaquishacari cuno rootasano. Nojoriiri naa jataniquiaa puetunu Pueyaso Rupaajanaa. Naacuajitij, nojoriiri tama na cuaqueyajaaja jiyatequiaa Pueyaso saniitiosocoriquiano nojori quiniuria.

<sup>17</sup> Cunora cua panishano Pueyaso pueyanaa, niaacuajaari tari niishiya cuno Pueyaso rootasano tojiyashijiacajiniji. Nocuaji jyanohua nia cojuariquia tama nia cuaqueyajaaja

maja nia sapojosaanura sesa mijiaca nia quinihuara. Saaja Pueyaso rupaacua tiuujiaca nia quiriqvia cutara, taa nocua tiuujiaca nia quiyacuajani, cuno pojori mariqui nioojia niqijiotereeri. <sup>18</sup> Naajuhuj, socua pocuaji Tacuna niishiniucua jiaatijaca nia quiriqvia. Naa maninia nia niishiri pa Jiyaniijia Jesucristo, socua na panijiacua nia quiniuria, socua na cumaaca nia jitianurajuhuj. ¡Pa Jiyaniijiaari jyanohua maninia! ¡Nojuaja cuaara shuquiritiasaaria quiarjia, pueyaracaanujuhuj! Cuaara naa quiiriatej.

## COTEENUJUANA A JUAN NAAJIONE E

### *Pueya samiitianija rupaa*

<sup>1</sup> Jiya shipinishaacarijiyojua, Jesucristoori quijiajuhuanajaj. Canaari niaara naajiyani, canaa niishitiniuria nijaniya nojuajiniji canaa tojishano, canaa niquishanojuhuaj. Pueyanaa, canaari seetanujuanaa na niquiquiaari canaa namijiatani, pueyaracaanu nata canaa quishacari mijiria. Canaari na cooquiarijuhuj canaa rupuesacari nojuaja. Nojuajaari pueyaracaanu quijia cutara, pa Samiitianijiaariuhuj, pueyaracaanu quijia pa quiniuriajuhuaj, na sequesanoocua pa tiushacari. <sup>2</sup> Cuno pueyaracaanu Quijiani, nojuajaari pueyanora jataquiaari. Canaari na niquiquiaarini. Naaratej, canaari pueya pohuataquiaarini, nojuajaari seetanujuanaa pa Samiitianijia. Canaari quiarijia cuno pueyaracaanu Rishijiajiniji nia pohuataajaaniuhuj. Coteenu na Queta quijia jiyocuaaanuuri. Na nuhuaji, canaacia muetaquiaariiri. <sup>3</sup> Canaari seetanujuanaa nia pohuataa canaa niquishanoni, canaa tojishanojuhuaj. Canaa pohuatasanoocua nia tiushacari, pocua rupuetooteni, taa canaa quiya pa Que Pueyaso rupuesanocuaani, Neyanu Jesucristo rupuesanonio. <sup>4</sup> Naa jaara nio naajiojinia canaa sequesano tojiri, niaari seetanujuanaa shuquiriaatia quijiaa quiniutianiya. Canaa jaara niaacuaji tojiriqiani, canaari shuquiriniutianiyaacuahuaj.

### *Pueyaso pa cuhuatana*

<sup>5</sup> Jesucristocuaajaari nio rupaa canaa niishitioquiaari, canaa nia pohuataani. Nojuajaari naa canaa sequequiaari: "Pueyasoori Cuhuatana cutara. Nojuajaari maja ninishiqui quijia quenaaja". <sup>6</sup> Naacuaajitij, paa jaara sequereni: "Pueyaso rupueja cutaranijia", na rupaa pa tojiyaquishacari, paari saaja najuhuaa sapojiyani. Paari juhua ninishiqui quijia quiyajaani. <sup>7</sup> Paa jaara seetanujuanaa cuhuashiqui quiyani, taa Pueyaso quiya cuhuashiquicuaani, paari juhua rupuetootesano quiya parta Pueyaso muerasuta cutarani. Naa juhua rupuetootesano pa quishacaritij, Neyanu Jesucristo nanacaari puetunu sesa pa miishanojuanaa tuujuquiaa poojiajiniji.

<sup>8</sup> Paa jaara sequereni: "Janiya sesa miyashijiani", paari tama pa cuaqueyajaaja sapojiyani naa pa sequesacaritij. Majaari Pueyaso rupaa tojijia pa quiniu. <sup>9</sup> Paa jaara sesa pa miishano pohuatare saniniunijia, Pueyasoori jiyanootio cutara, na jiyanooniuria pajaniya, taa na sequequiaaricuaajani. Poojiajiniji jeequenutaniya puetunu sesa casaa-janaari. <sup>10</sup> Paa jaara saniniuujia sequereni: "Maja sesa cua miiniu", paari Pueyaso jiyateya juhua sapojuaranani. Paa jaara naa quirini, majaari seetanujuanaa na rupaa quiniu poojiajinia.

## 2

### *Jesucristo pocuaji tacuna*

<sup>1</sup> Quiquihuaniojuanaa cua tojitiare. Nio naajiya niaaranijia, maja juhujaniya nia miiniuria sesa. Paa jaara sesa miirini, paacuajaari pa Que Pueyaso shuriucua jiiitiaa pocuaji Tacunani, na Que Pueyaso na jiyanootiniuria pajaniya. Nojuajaari Jesucristo, pueyaracaanu maninia mijia cutarani. <sup>2</sup> Sesa pa miishanoori jiyanooshaaquiaa Jesucristo cusonucua pocuara. Majaari saaja jiyareta pa sesa miishano jiyanooshaanu quiquiaa, mariyuca puetunu mijiria quiniaa sesa miishanojuanaari jiyanooshaaquiaajuhuj.

<sup>3</sup> Paa jaara pa jiyaniijia rootasano tojirini, paari niishiyani paa tari Pueyaso niishirii cutarani. <sup>4</sup> Jesu rootasano tojiyashijia jaara sequeriquia: "Pueyaso niishiyani", jiyano pueyanoori sapojoua. Majaari na jiiitanu Pueyaso rupaa noojiajinia. <sup>5</sup> Cante saniniuujia pa jiyaniijia sequesano tojijia cutarani, nojuajaari seetanujuanaa pa Que Pueyaso panijia cutara. Naacuaajitij, paari niishiyani paari jatiqui quiya natani. <sup>6</sup> Cante sequejani: "Janiyari Pueyaso rupuejani", nojuaja cuuara quiriia juhua Jesucristo, taa na quiquiaari maniniacuaani, mijiria na quishacari.

### *Quiarinio Pueyaso rootasano pajaniyara*

<sup>7</sup> Cuarta Pueyaso muerasunaa, majaari quiarinio nio rootasano, janiya niaara na naajiyani. Niocuaajaari tariucuaaanu nia tojishano, majaari quiarinio. Niaacuajaari tari na tojiquiaari, Pueyaso rupaa jaara shushajanaa nia niquiara pohuatasaaquiaari. <sup>8</sup> Naajaa, nio rootasano quiarinijia cua naajiosanoni, niiori seetanujuanaa juhua quiarinio niaara. Niaari tari na tojiquiaa, pueya panijia nia quishacari, taa Jesucristo quiquiaari pueya panijiacuaani mijiria na quishacari. Na rootasano nia tojishacari, niniquiaari tari quiamacuaa nioojiajiniji. Pueyasoori nioojiajinia cuhuataa nia panitiosacari quiarijia.

<sup>9</sup> Niaa jaara sequeriquia: “Pueyasoori coojia cuhuatarucuaani na rupaa cua niishishacari”, na nuhuaji majaari nia niqiniu paniniu niarta Pueyaso pueyano, niaari niishiqui quiyajaa. <sup>10</sup> Cante narta Pueyaso pueya panijia cutarani, nojuajaari cuhuashiqui quijia cutara. Tamasacaari maja na naata sesa na miitiniu, naajuhua, tama nojuajaarijia maja sesa na miiniu quiniutianiya, pueya panijia na quishacari. <sup>11</sup> Cante narta Pueyaso pueya niqiniu paniyashijiani, cuno pueyanoori niishiqui quiyajaa, juhua niishiqui canujuucuaajaariuhua. Majaari na niishiniu tee na quiaani. Naa na quiniuucua juhua niishiquitij, nojuajaari juhua cariojuaru quiya. Majaari na niishiniu Pueyaso casaa.

<sup>12</sup> Quiquihuaniyojuanaa, niaara naajiya nionijia, Pueyaso jiyanooshano muerasu nia quiniuucua, Neyanu Jesucristo mosaanuucua pocuara. <sup>13</sup> Queyanaa, niaara naajiyaniija nia niishiniuucua pueyaracaanu Quijia, cante tari pocuaji quiquiaari jiya coteyaquishacarijiaacujani. Mashiquioriniaa, janiya niaara naajiyajaniuhua cua timishacari nia shocotanuucua Sesaaca.

Janiyari niaara naajiocanuni quiquihuanaa, nia niishiniuucua pa Que Pueyaso, Neyanu Jesucristoocua nia tiushacari. <sup>14</sup> Janiyari niaara naajiocanujuhua queyanaa, nia tiuuniuucua tariucua pocuaji Quijiaacua, nio jiya coteyaquishacarijia. Janiyari niaara naajiocanujuhuaq mashiquioriniaa, seetanujuanaa maninia nia tojiniuucua Pueyaso rupaa, niaa jaara na masequiaari nioojiajinia, Sesaaca nia shocotanuucujuhuaq.

<sup>15</sup> Majaari mijiria sesa miiniuucua nia jiaatianu, mijiria casamiucanio. Cante mijiria casaacua jiaatiajani, cunoori maja pa Que Pueyaso panijia. <sup>16</sup> Mijiria niishijiaa coretanijosano tama nojori niishishanojinijiaajani, puetunu cunujuanaari maja pa Que Pueyaso niishitishano. Cunoori sacuraatia tama mijiria pueya niishishanojuaja. Naacuajitij, pueya pa quishacari, paari sesa pa jiaatianuta pueyaracaanu casaa paniquiaani tama pa cuaqueya pa shuqiritiniuriajaaja. Paari pa niquishano pa maniniucasano casaa paniquiaa pueyaracaanuni. Naajuhuaq, paari pueyaracaanu timiquiaani tamasaca timitiasacari pajaniya. Puetunu naa sacuraatia pa niishishanojuanaani, cunoori mijiria niishishano. Majaari Pueyaso niishitiojonu naa pajaniyatej. <sup>17</sup> Nio jiyari tari tariucashiyaree. Socua shaajasaanutaniya puetunujuanaari. Puetunu sesa pa jiaatianujuanaari cojiritiasaanutaniya shaajanu puetunu nio jiyatajanaa. Cante Pueyaso panishano miiquiaa saniniunijia, nojuaja cutaraari pueyaracaanu rishiniutianiya Pueyasota.

### *Jesucristo paraa*

<sup>18</sup> Quiquihuanaa, quiarijiaari quera jiya puequesacari tari. Niaacuajaari tari pohuatasaaquiaari Cristo Paracaari niniutianiya. Quiarijiani, queraatia na paraari tari supueree. Naacuajitij, paari niishiyani nio pa quishacariiri jiya puequesacari quera. <sup>19</sup> Cuno Cristo paraani, nojoriiri pajaniyajinijinio pueya quiquianucuaaja. Pocuaji rupate-tucanuuri maja seetanujuanaa Pueyaso muerasu nojori quishacari. Jaara seetanujuanaa Pueyaso muerasu quiqiuani, mariqui pata quiyacuaateni. Naa nojori miiniuucuatej, paari niishiyani majaari puetunu pata rerejonaajanaa seetanujuanaa parta Pueyaso muerasu.

<sup>20</sup> Saniniuujia niajaniya Pueyaso muerasunaa, Jesucristoori nia niqutioquiaari na Sohuanu. Naaratej puetunu niajaniyajanaari Pueyaso niishitijaraca. <sup>21</sup> Majaari niaacuara cua naajionuni nia niishiyaquishacari Pueyaso rupaa. Niaacuajaari na niishiya cutara. Niaari niishiyajuhuaq, sapojoua sequesanoori maja Pueyasojiniji.

<sup>22</sup> Pueyano jaara sequere: “Jesuuri maja Pueyaso Jiyarosano”, cunoori sapojoua. Cante sequejani: “Pueyasoori maja Jesu Que”, cunocujajari Cristo paraa. Jaara sequerejuhuaj: “Jesuuri maja Pueyaso Niyanu”, cunoori Cristo paracajuhuaq. <sup>23</sup> Cante Pueyaso Niyanu Cristo tamacajani, majaari Pueyaso na jitianu na Querajuhuaq. Cante Pueyaso Niyanu Cristo jiiitiaa cutarani, pa Que Pueyaso jiiitiaa na Querajariuhuaq.

<sup>24</sup> Naaratej, Pueyaso rupaa nia racatare nia numaama taa nia tojiquiaari tariucuaacuanucujani jaara shushajanaa pohuatasaaquiaari nia niqiuara. Niaa jaara naa racatariquia na rupaa nioojiajiniate, seetanujuanaa nocua nia tiushacari, niaari jiatiqui quiya pa Que Pueyasota, Neyanu Jesucristotanio. <sup>25</sup> Jesucristocujajari na Sohuanu niqutioquiaari pajaniya, pueyaracaanu pa rishiniuria. Nojuajanaari naa pa sequequiaari.

<sup>26</sup> Nio naajioree niaranijia cua niishitiniuria niajaniya, nia niishiniuria taa Jesu paraa niishitiojonuquiaa sesa najuhua na cuaracashiniuuniani. <sup>27</sup> ¿Casaara nojori nia tojiquiaani? Niaacuajaruhua tari Pueyaso Sohuanu jiiitiaa, Jesucristo niqutiosano niajaniyani. Naacuajitij, majaari tari panishaanu tamasaca niishitiojonura socua niajaniya. Pueyaso Sohuanucujajari nia niishitiojoquiaa puetunu casaajanaa. Puetunu na niishitiojosanojuanaari seetanujuanaa cutara, maja sapojonu. Naaratej, pueyaracaanu jiatiqui nia quiqiuia Jesucristota, taa Pueyaso Sohuanu niishitiojoquiaa nia quiniuriacujani.

<sup>28</sup> Quiarijiani quiquiohuaniyojuanaa, jatiqúi nia quiri Cristota, seetanujuanaa juhuaniani nia quiniuria pa Jiyaniijia jaara tiuquiriohua pocua. Naa nia quirítij maja nia caririquiniuria nojuaja jaara pa jitiiasuhua. Na rupaa tojiyashijiacaari caririquiniutianiya cutara. <sup>29</sup> Niaacuajaari seetanujuanaa niishiya, Jesucristoori tojetaarucujanaa sesa miyashijia cutara. Níaa cumaati niishiyajuhua, puetunu maninia miijiacajanaari Pueyaso muerasu.

### 3

#### *Pueyaso muerasu*

<sup>1</sup> Pueyanaa, pa Que Pueyasoori jiyanoehua pa panijia. Pa sequeyari, “cua niquiohua”. Seetanujuanaa, paari necohuani. Naaratej, majaari mijiria quinia pueya niishiniu pajaniya. Pa niishitiyaquiyari nojori niishiyaguiniuucua pa Que Pueyaso. <sup>2</sup> Cua panishano Pueyaso muerasunaa, paari tari Pueyaso muerasucujani. Maja cutaraari pa niishiniu taamuecaquitijia pa quiniutianiya na nuhuajitijaj. Paari saaja niishiya cutarani, Jesucristo jaara nimiohua, paari juhua nojuaja quiniutianiya. Na tiuquishacariuhua, paari na niquiniutianiya nia na quiyacuajani. <sup>3</sup> Puetunu na sashijiacajanaari tama na cuaqueyajaaja jeequequiaa sesa nojori miishanojiniji saaja maninia nojori quiniuria, taa Jesucristocuaani sesa miyashijia tojetaarucujanaa.

<sup>4</sup> Cante sesa miijiani, cunoori Pueyaso rootasano na rupaajinia tojiyaquijia. Puetunu sesa miiniujanaari Pueyaso rootasano tojiyaquiniu. <sup>5</sup> Niaari niishiyajuhua, Jesuuri mijiria pocua niqúiaari poojia seque na jataniniuria. Nojuajaari tojetaarucujanaa sesa miyashijia cutara. <sup>6</sup> Naacuajitij, cante jatiqúi quíya pa Jiyaniijatani, nojuajaari maja sesa na miini quiquiaa cutara. Cante saniniujia sesa miijiani, majaari na niishiniu Jesu. Majaari nojuaja na niquiniu quiquiarijihua. <sup>7</sup> Quiquiohuaniyojuanaa, tama nia cuaqueyajaaja nia cojuare niaa mariqui sapojosaareeri. Cante maninia miijiani, nojuajaari maninia pueyano cutara, taa pa Jiyaniijia Jesucuaani, pueyaracaanu maninia quijia cutara. <sup>8</sup> Saniniujia, cante sesa miijiani, nojuajaari Sesaaca pueyano. Shusha jíya coteenujiniji, Sesaacuajaari tari sesa miijia quiquiaari. Pueyaso Niyanuuri cunora niqúiaari puetunu sesa na miijosanojuanaa na shaajanura.

<sup>9</sup> Puetunu Pueyaso pueyajanaari maja sesa miiniuucua na shiiniuquiniu, quiarinio pueyara Pueyaso rootesano nojori quiniuucua. Nojoriiri quiarinio pueyara jatanishano quíya Pueyaso Sohuanu nojori jitiiasacari. Naacuajitij, seetanujuanaa Pueyaso muerasu nojori quishacari, majaari na naata sesa miijia nojori quiniu pueyaracaanu. <sup>10</sup> Naacuajitij, maatia niishishanocujaaari cante Pueyaso muerasuni. Saniniujia, cante maninia miyashijiani, nojuajaari maja Pueyaso pueyano. Naajuhua, cante narta pueya panijaquijiani, nojoriiri Sesaaca pueya. Naa niishishanoori cante Pueyaso muerasuni, cante Sesaaca muerasujaniuhua.

#### *Panitoojuaca pa quirij*

<sup>11</sup> Pueyanaa, shushajanaa Pueyaso rupaa nia tojishacari, niaacuajaari naa niishitiosaaquiaritij: “Panitoojuaca nia quiri”. <sup>12</sup> ¡Maja cutaraari pa quiniu juhua Caín! Nojuajaari tama tarajanujuaaja moquiaari, Sesaaca tojijia na quiniuucua. Níaa niishiritio casaara Caín moquiaari tarajanuni. Nojuajaari tama tarajanujuaaja tacartaquiaari monu, tarajanu miishano quiniuucua maninia. Saniniujia, tama na miishanojuariajia sesa quiquiaari. Cunora tarajanu moquiaariiri.

<sup>13</sup> Cuarta Pueyaso muerasunaa, majaari nia jiyajenenu Pueyaso ruuretajaca jaara niquiniu paniyaquiriquia niajaniya. <sup>14</sup> Paacuajaari juhua macu samitiianijosaaquiar-iuhuanu, seetanujuanaa saminiuucua pa quiniuria. Paari seetanujuanaa na niishiyani panitoojuaca pa quishacari parta Pueyaso pueyata. Cante tapueyocua paniyaquijiani, nojuajaari juhua macu quiyajaa. <sup>15</sup> Naajuhua, narta pueyano niquiniu paniyashijiacani, nojuajaari juhua pueya mojuua Pueyasora. Niaacuajaari niishiya, pueyano mojuuaari Pueyaso samitiianiyaquishoojua pueyaracaanu na rishiniuria. <sup>16</sup> Paacuajaari niishiyani, Cristoori jiyanoehua pa panijia na cusunuucua pocuara. Naacuajiti paari niishiyani taamuecate seetanujuanaa paniniuni. Paa cuara naa panijia quiirijuhua, tama pa cuaqueyajaaja pa tarinitianura parta Pueyaso pueyacuara, jiyanoehua pa paniniutia nojori. <sup>17</sup> Níaa jaara nareja niqúiaari niarta Pueyaso pueya casamijuniuucua, puetunu nia panishanojuanaa nia jitiiasacarihua, niaari najuhuaana sequeya: “Pueyaso panijianijia”. ¿Pueyaso panijia pueyanoteeri jiyano pueyano, narta Pueyaso muerasu niqúitioyaquijia na jitiiasanojiniji? ¡Maja! <sup>18</sup> Quiquiohuaniyojuanaa, majaari najuhuaana pa sequenu: “Cuarta Pueyaso pueya panijianijia”. Paa jaara seetanujuanaa nojori panirini, nojoricua pa taraajere, taraatia nojori miishacari. Pueyaracaanu maninia pa miiri, seetanujuanaa pa paniniutia pueya. Majaari najuhuaana pa sequenu: “Nojori panijianijia”.

*Pueyaso tojijaari juhuajaniya quijia Pueyaso niquiara*

<sup>19</sup> Naacuaajitij, paa jaara pueya panijia quirini, paari niishiyani paa seetanujuanaa Pueyaso tojijiani. Paari niishiyani paa pueyaracaanu rishiriquiano Pueyasotani. Majaari pa shaajenu quiniutianiya. <sup>20</sup> Pueyaso muerasu pa quishacari, poojia jaara pa taacanutere saaja nocuaji, naajaa, Pueyaso cutaraari jiyanoohua maninia niishijia socua poojia niishishanojiniji. Nojuacuajaari pa niishiya cutara. <sup>21</sup> Cua panishano Pueyaso muerasunaa, poojia jaara pa macuhajaaquiri, paari shuquiriaatia quiya Pueyaso niquiaraani. <sup>22</sup> Nojuajaari puetunu pa masesano niqutionutaniya pajaniya, na rupaa pa tojishacari, puetunu na panishanojuanaa pa miishacarijuhuaj. <sup>23</sup> Pueyaso sequesano pueraari nio: Neyanu Jesucristoocua pa tiuuniuria, pa panitioonurajuhuaaj taa na sequequiaaricuaajani. <sup>24</sup> Canapuate Pueyaso rootasano tojijiacani, nojoriiri Pueyasota rupuetootesano quijiaaca. Naajuhuaaj, Pueyasoori nojoriinia quiyacuaja. Nojuacuajaari na Sohuanu niqutioquiaari pajaniya. Naa na Sohuanu pa jiiiasacaritij, paari maatia niishiyani Pueyasoori poojiajinia quiya.

## 4

*Pueyaso Sohuanujiniji pahuatasano, Cristo Paraca sohuanujinimio*

<sup>1</sup> Cuarta Pueyaso pueyanaa, quarijiani, queraatia Pueyaso sequenu panishano caminiujuninaa pueyari supueya. Majaari ritia nia tiuuniu puetunu nojoriicuaajanaa. Coteenu nojori nia saniniujiuri, nia niishiniuria nojori caminiujishanote seetanujuanaa Pueyaso Sohuanujiniji, tamonujiniji soj. Mijiria, queraatia sapojonuujuaacari caneya. Nojoriiri najuhuaana cuaracashiniuya na sequesacari: "Janiyacuaajaari Pueyaso sequenu panishano caminiujuniani: Pueyaso Sohuanu niishitishano janiya". <sup>2</sup> Niaari naa niishiniutianiya cante seetanujuanaa Pueyaso Sohuanu niishitishano caminiujuniani: Pueyaso Sohuanu jiiitajaari naa sequeja: "Pueyaso jiyarosano Jesucristoori pueyanora quiquiaari, mijiria pocuara cusoriquiano". <sup>3</sup> Cante saniniuuja jiyaniyani Jesu maja pueyanora na quiniu quiquiaari, cunoori maja Pueyaso Sohuanu na jiiitanu. Saaja Sesaaca sohuanu jiiitaa noojiajinia cutaraari. Nojuacuajaari Jesucristo Paraca. Niaacuajaari tari pahuatasaaquiaari, Cristo Paraca sohuanuuri ninutiianiya. Nojuacuajaari tari mijiria quiya.

<sup>4</sup> Quiquihuanijojuanaa, niaacuajaari Pueyaso muerasu. Naacuaajitij, niaari cuno sapojonuujuaaca shocotacanu Pueyaso cumaacata. Nioojiajinia Quijiaari socua cumaacaraca nojori jiiitasano Sesaaca cumaacajiniji. <sup>5</sup> Cuno sapojonuujuaacari saaja Pueyaso niishiyashijia, maja Pueyaso muerasu. Naacuaajitij, nojoriiri saaja mijiria casaajiniji puhatanuuquiaa. Naarate narta Pueyaso ruuretajacaari nojori tojtiaquiaa. <sup>6</sup> Paa cutaraari Pueyaso pueyani. Naacuaajitij, cante Pueyaso tojtiajacani, nojoriiri pa tojtiaquiaa. Canapuate saniniuuja maja Pueyaso pueyani, nojoriiri maja na tojtianu quiquiaa pajaniya. Naacuaajitij, pa naata niishiniu cante seetanujuanaa Pueyaso Sohuanu jiiitaa cutarani, cante saniniuuja sapojoua sohuanu jiiitaanijia.

*Pueyaso pa panijia cutara*

<sup>7</sup> Cua panishano Pueyaso pueyanaa, jiyanoohua panitioojuaca pa quirij. Pueyasocuaajaari pa panijia. Nojuajaari pa panitijia na Sohuanuta, jiyanoohua panijia pa quiniuriajuhuaj. Canapuate puetunu pueya panijiacajanaani, nojoriiri Pueyaso muerasu cutara, seetanujuanaa Pueyaso niishijiacajaarihuaj. <sup>8</sup> Canapuate pueya paniyashijiacani, nojoriiri maja na niishiniu Pueyaso. Pueyasocuaajaari panijia cutara. <sup>9</sup> Nojuajaari pa niishitiquiaari taa na paniquiaa jiyanoohua pajaniyani, Neyanunijojua na jiyarosacari mijiria pa samiitianijioriquiano, pocuara na cusosacari. <sup>10</sup> Naa cutarate seetanujuanaa paniniu sequesano: Pueyasoori pa panijia. Paari maja pa coteetanu quiquiaari Pueyaso paniniuni. Nojuajaari saniya coteetaquiaari na paniniuria pajaniya. Neyanu jiyaroquiaari pocuara mosocoriquiano, sesa pa miishano jiyanooshaanura. Naa cutarate seetanujuanaa paniniu.

<sup>11</sup> Cua panishano Pueyaso muerasunaa, Pueyaso jaara naa pa paniquiaaricuaa, ¿casaara pa panitioyaquiyarinijia? Naa panitioojuacara pa quirijjuhuaj. <sup>12</sup> Majaari quenaaja pa niqiniu quiquiaari Pueyaso, taamuecatejanojoni. Naajaa, paa jaara tamascata panitioojuaca quirini, Pueyasoori poojiajinia quiyacuaja. Naacuaajitij, paari tojetaarucuaajanaa panijiacara quiniutianiyan, na paniniu quishacari poojiajinia. <sup>13</sup> Nojuajaari na Sohuanu pa niqutioquiaari poojiajinia na quiniuria. Naacuaajitij, paari niishiyani paacuajaari nata rupuetoojuu quiyani. <sup>14</sup> Canaajanaari seetanujuanaa canaa niquishano pahuataani: Pueyasoori Neyanu jiyaroquiaari mijiria, mijiria quiniaa niti mosocoriquiano, nocua tiuujiaca jiyatesaanura Pueyaso pueyara. <sup>15</sup> Cante pueya niquiara sequejani: "Jesuuri seetanujuanaa Pueyaso Nyanu", Pueyasoori noojiajinia quiya. Nojuajaari Pueyasota rupuetoojuu quiyajuhuaaj.

<sup>16</sup> Naacuaajitij, paari niishiyani Pueyasoori jiyano hua pa panijia. Paari na niishiyajaanihua na rupaacua pa tiushacari. Pueyaso cutaraari panijia. Paa jaara pueyaracaanu panijia quirini, paari seetanujanaa Pueyaso rupuejani. Naajuhua, Pueyasoori poojiajinia quiya. <sup>17</sup> Naa Pueyaso quishacari poojiajinatej, paari pueya panijara jiyacatequiaa socuani. Naa seetanujanaa panijia pa quishacari, paari juhuajaniya quiniutianiya Pueyaso nequesoreesacari puetunu pueyapuejanaani. Majaari pa puerenu quiniutianiya panijia pa quishacari taa panijia nojuaja quiyacuaani. <sup>18</sup> Cante seetanujanaa Pueyaso panijiani, majaari na niishiniu puerenu. Naa pa paniniuuri puetunu pa puerenu jatajanaa. Cante puereja quiya saniniunijia, majaari juhuanojuaja na paniniu Pueyaso puetunu noojiatjanaa. Puerejaari niishiriojiya: “Saniitosaanutaniyanijia”.

<sup>19</sup> Niaacuajaari niishiya, Pueyasoori coteenujanaa pa paniquiaari, naarate paari saniniuuja na paniyani. <sup>20</sup> Saniniuuja, cante sequejani: “Janiyari Pueyaso panijiani”, narta pueya niqiniu paniaquiya saajaaraarihuaj, jiyano pueyanoori sapojoja. Naa na paniaquishacari tarajana na niqishano na namijata cutarate, <sup>21</sup> maatucua taa Pueyaso panirini, na niqishoo socuani? <sup>21</sup> Pueyasocuaajaari naa pa rootaquiaari: “Cante cua panijiani, cuara paniria narta pueyajuhua”.

## 5

### *Taa pa shocotanuniya mijiria niishishanoni*

<sup>1</sup> Naa jaara Jesuucua tiuuri nojuaja seetanujanaa Pueyaso Jiyarosano quiquiaari, niaari Pueyaso muerasu. Mijiria, cante muerasu que panijiani, necohua panijaaarihuaj. <sup>2</sup> Naacuaajitij, pa panishacari Pueyaso, pa tojishacari na rootasanojuhuaj, jiyacariti paari niishiyani paari parta Pueyaso muerasu panijaaacuahuaj. <sup>3</sup> Paa jaara Pueyaso panijia quiri seetanujanaani, paari na sequesano tojijia quiyajaanihua. Na rootasano pajaniyani, majaari jiyajeneta na quiniu pajaniyara. <sup>4</sup> Cante seetanujanaa Pueyaso muerasuni, nojuajaari mijiria sesa niishishano shocotaa. Paari na shocotajani Pueyasocua pa tiushacari. <sup>5</sup> Cante Jesu jiyateya seetanujanaa Pueyaso Niyaturani, saaja jiyano pueyano na naata mijiria niishishano shocotanu cutara.

### *Pueyaso Niyaturani pohuatasano*

<sup>6</sup> Pueyasoori canaa niishitiquiaari Jesuuri seetanujanaa Neyanujuhanaj, Jesu jaara moojinia tiuquinishaacuaari. Canaa niishitiquiaariiaarihuaj Neyanu jaara niyacutesanojinia naatequiaari. Jesuuri maja saaja moojinia na tiuquinishaanu quiquiaari canaa niishiniuria nojuaja. Maja. Naajuhua, janiyajanaari na niqiquiaari na nanaca shooteyano na shuucujani. Naajuhua, poojiajinia quijia Pueyaso Sohuanuuri pa niishitiquiaa cunoori seetanujanaa Pueyaso Niyaturani quijiajuhanaj. Pueyaso Sohuanu cutaraari maja na niishiniu sapojonu. <sup>7</sup> Jiuujanaraca jiyocuaaanu quijiaacari pa niishitiya Jesucristoori mijiria niqiaari pueyano na quiniuria seetanujanaa. Cuno pojoriiri nio: Pueyasojanaa, na Rupaa, na Sohuanunio. Nio jiuujanaraca quijiacani, nojoriiri Pueyasojuhanaj. <sup>8</sup> Paari mijiria jiiitaa Jesujiniji pa niishitijacajuhua. Cunoori jiuujanaraca quiyajuhua. Cuno pojoriiri nio: poojiajinia quijia Pueyaso Sohuanu, jiyocuaaanu tojishano rupaa Jesu tiuquinishacari moojinia, naajuhua, na nanaca, pueya niqishano na shuucujani shoyano. Puetunu cunojanaari mariyata pa niishitiya Jesuuri seetanujanaa Pueyaso Niyaturani. <sup>9</sup> Paa jaara tojiriquia pueya pohuatanusanoni, <sup>10</sup> casara saniya Pueyaso sequesano pa tojiyaquiyarini? Pueyaso sequesano Neyanujiniji socua seetanu rupaajanaa cutara pueya pohuatanusanonijini. <sup>11</sup> Cante Pueyaso Niyaturani tiuujiiani, Pueyaso Sohuanuuri noojiajinia na niishitiya Jesuuri seetanujanaa Pueyaso Niyaturani. Saniniuuja, cante Pueyaso sequesano Neyanujiniji ruuretaja saniniunijia, nojuajaari Pueyaso jiyateya sapojoja, na tiyaquishacari tama Pueyaso sequesanoocuaaja Neyanujiniji. <sup>12</sup> Cante Pueyaso Niyaturani jiiitaa noojiajiniani, nojuajaari tari samitianishaarohua pueyaracaanu rishijia na quiniuria. Pueyaso Niyaturani jiiitaaashijiaari saniniuuja maja na rishiniu quiniutianiya.

### *Nio naajiya puequenu panishacari rootasano*

<sup>13</sup> Nio naajiya niaaranijia nia niishiniuria, Pueyaso Niyaturani nia tiushacari niaari tari samitianijosaarohua pueyaracaanu nia rishiniuria.

<sup>14</sup> Paari Pueyasocua tiuquianaani, pa niishishacari nojuajaari pa tojiquiaa pa secosacari nojuaja, pa masasano jaara quiri taa na paniaacuajani. <sup>15</sup> Naatej, taa pa niishiyacuaani Pueyasoori pa secosano tojiquiaa, paari naa niishiyajuhua paari nojuaja pa masasano maseree tarini.

<sup>16</sup> Cante narta Pueyaso pueyano niqiyaa sesa miyanoni, cuara Pueyaso secojoora nocuara, sesa na miishano jaara na cusojuaashijia quiri. Naacuaajitij, Pueyasoori cunoo sesa

miijia naataniniutianihua, sesa na miishano jaara cusojuashijia quiri. Quiyajaariuhua tamonu sesa casa miiniu. Paa jaara cuno sesa casa miirini, paari cusoqueeni. Naa cua sequesacari nijaniyatej, majaari cua sequenu nijaniya nia secojonura jiyano sesa miishanoocaratej. <sup>17</sup> Seetanujuanaa, puetunu sesa miishanojuanaari sesa Pueyasora. Naajaa, majaari puetunu sesa miishanojuanaa cusojuanu quiniutianiya pajaniya.

<sup>18</sup> Paacuaajaari niishiyani pueyanaa, cante Pueyaso jiitiaa juhua na Que cutarani, nojuajaari sesa miyaquiquiaa, Pueyaso Niyanu cojuasacari nojuaja. Naacuajitij, Sesaacaari maja na naata sesa na miitiniu. Majaari na naata sesa na miiniujiuhuj.

<sup>19</sup> Paari niishiyani paa cutaraari Pueyaso muerasuni. Sesaacaari saniniuujia puetunu mijiria quiniaa Pueyaso niishiyashijiacajanaa jiitiaacujua. Nojuajaari nio jiya camarnu.

<sup>20</sup> Paari niishiyajuhuj Pueyaso Niyanuuri mijiria pocua niquiaari. Nojuajaari na niishitaja niqutioquiaari pajaniya, maninia pa niishiniuria na Que, na Que quiniuria pa Quejuhuj. Nojuajaari Pueyasojuanaa cutara. Paari nata quiya jatiquni, Neyanu Jesucristota pa rpuetoosacari. Nojuajaari Pueyasojuhuanajaj, pa Samiitianijiaariuhuj, pueyaracaanu rishijiaa pa quiniuria. <sup>21</sup> Quiquiohuaniojuanaa, saaja Pueyaso pa paniri. Tama pa cuaqueyajaaja pa cojuare, maja tamonu casaacua pa jiaatianura socua Pueyasojiniji. Paa jaara tamonu casaacua jiaatiareni, paari Pueyaso shocoteya nocuarani. Niojuanaa pueyanaa. Tariucujaja.



## TANEE JUAN NAAJIONEE

### *Pueyaso Rupaa seetanujuanaa panijjara pa jiyateja*

<sup>1</sup> ¿Quiaate quiyajaa cua panishano cua rimiatucuaana? Quiaacuaajaari Pueyaso saquiriojosano, neyatu quia quiniuria. Quiocuara naajjyanijia, quia panishano muerasucuaranio.

Janiyari saaquiano Juanni, Pueyaso muerasu jiihana. Seetanujuanaa nia panianijia, taa puetunu Pueyaso rupaa tojiniaa pueya paniya niajanianyacuani. <sup>2</sup> Pueyasojiniji seetanu rupaajanaari poojjajinia quiya. Naaratej, canaari nia paniyani. Cuno rupaari poojjajinia quiniutianiya pueyaracaanu. <sup>3</sup> Nia tojishacari seetanu Pueyaso rupaajanaa, nia panitioosacarijuhuaj, naacuaajitij, pa Que Pueyasoori Neyanu Jesucristota nia cumaquiniutianiya. Niaacua taraajenutaniyajaariuhuj. Nioojia jiyatenutaniya juhuajaniya quijiacarajaariuhuj.

<sup>4</sup> Noojiaqueya quia niquiohuajininio niquiquianunijia. Nojori timitiacanunijia nojori tojtianuucua maninia seetanu rupaajanaa, taa pa rootasaaquiaari pa Que Pueyasojinijicuaajani. <sup>5</sup> Quiocuara naajjya quiarijianijia cua panishano cua rimiatucuaana, cua sequenura quiajaniya: “Jiyanohua pa panitioore”. Majaari quiarinio rootasano nio, cua naajiosano quiocuarani. Nio rootasanocuaajaari pa jiihasano pueyaracaanu Jesucristojiniji. <sup>6</sup> ¿Taate pa naata paniniuni? Paari pueya panijjaca quiyani Pueyaso rootasano pa tojishacari. Niocuaajaari na rootasano: puetunu pa miishanojuanaa cuaara quiiira Pueyaso pa paniniutia poojjajinia.

### *Cristo paraari sapojonuujuaca*

<sup>7</sup> Quiarijiani, queraatia sapuenu juhua Pueyaso sequenu panishano caminiujuniaari mijiria quiya. Nojoriiri pueya niishitiojquiaa: “Majaari Jesucristo rosenu quiquiaari jiyocuacaanuji, cuaqueyaraca na quiniuria, seetanujuanaa pueyano na quiniuria”. Canapue te naa sequejacani, nojoriiri sapojonuujuaca. Nojoricuaajaari Cristo paraa. <sup>8</sup> Tama nia cuaqueyajaaja nia cojuare cuno pueyacuaji, maja nia tojiniuria nojori, niaa mariqui Pueyaso niquitionu panishano pajaniya maseyaquiriiri, pa Jiyaniijjara nia poonijionujiniji na niquitionu panishano. Suraatiaja nia tojiriohuarohua seetanu rupaajanaa, nia masenura puetunu Pueyaso jiihasanojuanaa niaara. <sup>9</sup> Cante tama na cuaqueyajaaja jiyateja Pueyaso casaa niishijjara socua Jesucristo jiyaramiquishano pueya niishitiojosanojinijini, cuno shocotajaari Pueyasoojura quiquii, na shocotanucuaa Cristo rupaa. Cante saniniujjia seetanu rupaajanaa tojitiaquiaa maniniani, taa pa rootasaaquiaari Cristo rupaacuajani, Pueyasocuaajaari na Que, Neyanuuri nocuaji Tacunajuhuj. <sup>10</sup> Seetanu rupaajanaa jiihiaashijia jaara niaacua tiuquiniu paniya tamaatia na niishitiojonura niajaniya, majaari niaacua na shanacununoj. Majaari quenaaja na saruhatanujuhuj nia cumaquiniuria nojuaja. <sup>11</sup> Cante na sequeyani: “Pueyaso cuaara cumaquiiira quiajaniya”, naa sequejaari cuno sapojojua cojiritiasaaree tari sesa na miishanotaja.

### *Juan puecasacari naajionu*

<sup>12</sup> Socua queraatia sequenu paniya niajanianijia. Naajaa, majaari cua naajionu panini. Janiyacuajaari niaacua naquerejyani, maninia pa pocoojonura, shuquiriaatia pa quiniuria seetanujuanaa. <sup>13</sup> Quia tarajanu niquiohuari cua sequeree nojoriria cua saruhatanura quiajaniya. Nojuacuajaari Pueyaso saquiriojosano maajijuhuj. Tariucuaaja.

## SOCUA TANEE JUAN NAAJIONEE

### *Juan maninia pohuatasaaquiaari Gayojiniji*

<sup>1</sup> ¿Quiaate quiyajaa cua panishano Gayonaa? Janiyari saaquiano Juanni, Pueyaso muerasu jiitiana. Seetanujuanaa quia paniyanijia, Pueyaso rupaa quiniuucua coojiajinia.

<sup>2</sup> Quiocuara secojoquiaanijia, puetunu quia miishanojuanaa cuara quiiiria maninia. Janiyari quiocuara secojoquiaaaniuhuj, maninia quia cuaqueya quiniuria, maja cusosu, taa quioojia quiya maniniacuaani, Pueyaso tojjia quia quishacari maninia.

<sup>3</sup> Parta Pueyaso muerasujinijinio pueyari cucua tiuquiquianu quia quijia tiacajiniji. Janiyari jiyanohua shuquiriaatia quiquianuni nojori pohuatasacari quiajanijajiniji. Quiaanaari seetanujuanaa maninia miijia quiquiaa taa pa rootasaaquiaari Jesucristo rupaacujani. Quiaacuaajaari maninia tojiquiaa seetanu rupajanaa, sanajanaa. <sup>4</sup> Jiyanohua timiquiaanijia cua tojishacari cua muerasuuri maninia miya, taa cua rootaquiaari Jesucristo rupaa nojoricujani. Naa cua tojishacaritij, cunoori jiyanohua cua timitiquiaa socua tamonu casaajiniji.

<sup>5</sup> Sanajanaa, quiaacuaajaari maninia miijia, maninia quia miishacari parta Pueyaso muerasu. Quiaa cutaraari maninia miiquiaa, quia tiuquitishacari quia tiajinia quia niishishoo tamaquiicujinijo Pueyaso muerasu. <sup>6</sup> Pueyaso muerasu rerejosacari niya, Pueyaso rupaa pohuatanura rucoojuacaari canaa niqiiara pohuatacanu maninia quia miishanojiniji nojoriria, quia paniniutia nojori. Quiaarijiani, nojori quia niqiiitioere nareja nojori panishano na jiyatajara, socua nojori quianu panishacari cuniquiji. Naa quia miiri quenaaja, Pueyaso quia shuquiritiniuria. <sup>7</sup> Nojoriiri Jesucristojiniji pohuatanura rucoojia. Majaari nojori panishano na masetunu paniniu quiquianu Pueyaso niishiyashijiacajiniji. <sup>8</sup> Naaratej, pajaniya cuara naacuura jiyano pueya, noo pojori canapueete pa Jiyaniijia rupaa pohuatanura rucoojiyacuajani. Naa pa miiriti Pueyaso rupaa pohuatanu naacuna pa quiniurijuhuj.

### *Sesa Diótfrefes miishanojiniji pohuatasano*

<sup>9</sup> Janiyari quia quijia tiacajinia Pueyaso pueya maanuucua naa naajioquiaarijihuj. Janiyari nojori sequequiaarini nojori cuara Pueyaso Rupaa pohuatanura rucoojuaca naacuura, cunoo pojori jiitianura na panishano. Diótfrefesri saaja tama na cuaqueyajaaja shuquiritiaja, Pueyaso pueya maanu jiitiana na quishacari. Nocuaji cua sequesano ruuretacanuuri. Cua rerequetequiaajaariuhuj. <sup>10</sup> Naajaa, janiya jaara niaacua quiaareni, janiyari naa sacaraatia na miiniuucua na nacasunutaniyani. Nojuajaari tamasaca niqiiara canaa sesacaquiaa na sapojonuta. Naa socua sesa miiquiaajaariuhuj: majaari na tiuquinitianu quiquiaa Pueyaso Rupaa pohuataanaa na tiajinia. Canapueete saniniuuujia nojori tiuquitini paniquiaa nojori tiajiniani, Diótfrefesri nojori tenujuquiaa saaja. Canapueete Pueyaso rupaa pohuatanura rucoojuaca tiuquinitianu paniquiaajaa na tiajiniani, Diótfrefesri puetunu nojori tenujuquiaajanaa, maja socua nojori rerejonura narta Pueyaso muerasuta.

<sup>11</sup> Sanajanaa, majaari quia jiaatianu cunoo sesa miijiaacua, quiaa mariqui juhua nojuaja quiriijaariuhuj. Saaja quia jiaatiare cutara maninia miijiaacua, juhua nojuaja quia quiniuria. Cante maninia miiquiaani, cunocuaajaari Pueyaso pueyano. Sesa miijia saniniuuujia, nojuajaari Pueyaso niishiyashijia.

### *Maninia Demetrio miishanojiniji pohuatasano*

<sup>12</sup> Puetunu pueyajanaari saniniuuujia maninia pohuatanuquiquiaa Demetriojiniji. Tama Demetrio miijosanojinijiaaja, pueyari niishiya Demetrioori maninia pueyano. Seetanujuanaa, nojuajaari maninia pueyano, taa tamasaca sequequiaacuajani. Niaacuajaari niishiya canaari seetanujuanaa sequequiaani, naa canaa sequesacari Demetriojiniji.

### *Naajio puequesacari*

<sup>13</sup> Janiyari queraatia sequenu paniyajaa quiajanijani. Naajaa, majaari cua sequenu paniniu saaja cua naajiojinia. <sup>14</sup> Janiyacuaja quioqua naquerejijani. Jiyacaritij, pocua maninia pocojore cutarani.

<sup>15</sup> Pueyaso cuara quioojia jiitiaara maninia, juhujaniya quia quiniuria. Niya pa rupuenari cua sequeturee cua saruhuatanura quiajanijia. Puetunu cuniqui pa rupuenajanaa quia saruhuatate canaarajuhuj. Tariucuaja.

## JUDAS NAAJIONEE

### *Judas naajiosano Pueyaso saquiriojosano pueyacuara*

<sup>1</sup> Janiyari Judasni, Jesucristo seru, Jacobo tarajanu. Niaacuara naajiyaniija canapuate pa Que Pueyaso panishano muerasucujani. Nojuajanaari nia saquiriojoquiaari nera nia quiniuria. Niajaniyari Neyanu Jesucristo cojuasano, nia rupuesacari nojuaja. <sup>2</sup> Pueyaso cuara nia jiuujiaaria. Cuaara nioojia cajitiirijahuaj. Cuaara paniiria niajanijahuaj. Pueyaso cuaara naa miiria jiyanohua niajanijatej.

### *Sapojonuujacuajiniji pohuatasano*

<sup>3</sup> Cua panishano pueyanaa, janiyari niaacuara naajionu paniriqiaa jiyanohuani, cua pohuatanura niajanija taa maninia pa miishaanutaniyani, Pueyaso saquiriojosano pueya pa quiniucua: niajanija, canaajuhua. Saniniuujia, quarijiani, socua maninia cutaraari cua naajionura niaacuara, cua nacasunura niajanija seetanujuanaa Pueyaso tojiijaca nia quiniuria. Jiyanohua nia tiuuri pueyaracaanu Pueyaso rupaacua, cumueeca Pueyaso pueya nia quiniuria. Pueyasocujaari na rupaa pohuataniquiaari maninia pa niqiara. Maja cumaati na jatanishaanu. Cuaara pueyaracaanu maninia pohuatasaaia, taa pa pohuatasaaquiaaricuaani. <sup>4</sup> Naa nia sequeyanijia Pueyaso rerequetejaca supuesacari jiyasohua nia tajinia. Tariucuaaanu Pueyaso Rupaajiniacuajaari cuno sesoriquia pueyajiniiji naajiotasaaquiaaricuaaja. Nojoriniaari quejoosaanutaniya pueyaracaanu saniitiosocoriquiano. Nojoriiri sequequiaa: “Shuquiriaatia juhuajaniya pa miiri tama pa cuaqueya miiniu panishanojuaja, pa jyanoojia Pueyaso quishacari. Paa jaara sesa miirini, naajaa, majaari Pueyaso saniitonu quiniutianiya pajaniya”. Nojoriiri naa sequetuquiaa sesatej. Nojoriiri pa Jiitanajanaa jiyatequiaa juhua saniitioyashijia, pa Jiyaniijajanaa Jesucristoni.

<sup>5</sup> Niaari niishiyacuja, Pueyasoori Israel pueya supuetanaa mashiquiquiaari Egipito jiyajiniji, Egipito pueya seya nojori quishacari. Socua nia niishitiorohuaraj. Na nuhuaji, Pueyasoori na pueyajinijinio nocua tiuyashijiaa puecooquiaari. <sup>6</sup> Naajuhua, Pueyasoori tama na seyajaaja nujuatejoquiaari na nujuatejojuajinia, noo pojori canapuate na shuriucua quijiaa quiquiaari jiyocuaaanucujani. Nojoriiri Pueyasora na poonijiosano tiujiaquiaari. Nojori poonijiosaqi tiujiatuquiaariiaariuhua. Cunora, cumayocuaa morojosaaquiaariiri, pueyaracaanu niishiqui nojori quiniuria, cuaara quirijiaatijia Pueyaso saniitiojonu juuca cutara. Cuno juuca, Pueyasoori puetunu na tojiyashijiacajanaa saniitiojonutaniya. <sup>7</sup> Nia niishirijihua Sodoma tiacajinia quijia pueya, Gomorra tiacajinia quijia pueyano, nojori tiaca shocua quinaa pueyajuhua. Puetunu nojorijianaari maninia miiniu ruuretaquiaari tama nojori cuaqueya panishanojuaja nojori miiniuria, jyanohua sacuaatia. Nojoriiri maajishuriu numuetucujuaca quiquiaari. Cayashuriuuri narta maaji numuetucujuaca quiquiaarijuhua. Pueyasoori maja na shipiniuu quiquiaari naa pueya quiniuriatej. Naa Pueyaso tojiyashijiaa nojori quishacari, mariyata taa tama Pueyaso seyajaaja na tojiyashijiaa quiquiaaricuaani, Pueyasoori nojori quejojoquiaari mani quiquiojinia, tii naquiya nojori miishaanura pueyaracaanu. Naa nojori saniitiosaanuucuaatej, cunoori quiquiaari puetunu pueyajanaa niishiniuria maja Pueyaso tojiyashijiaa pa quiniuria taa nojori quiquiaaricuaani.

<sup>8</sup> Cuno pojori, sacuaatia niishitiojonaa nia tajinia quiyani, nojoricuajaari Pueyaso saniitiojunijini niishiya. Naajaa, nojoriiri juhuajaniya miiquiaa puetunu sesajanaa taa noojajinia nojori niishiyacujani. Nojoriiri tama nojori jiuujiacajaaja curuushojoquiaa nojori miishacari tama nojori niqishanojuaja na maquenujinia. Pa Jiyaniijia sootiuyajaariuhua. Nojoriiri jyanohua cumaacaraca quijiaa sesacaquiaajuhua, jiyocuaanu quijiacani. <sup>9</sup> Supuetana Moisés shaajesacari, Pueyasoori na seya jiyaniijia Miguel jiyarocuaari Moisés quete na jamonura. Sesaacaari Moisés quete paniquiaari juuca. Nocua Miguelta juayonuutaquiaariiri. Miguel cutaraari seetanujuanaa cumaacaraca quijia. Naajaa, majaari na saarjionu quiquiaari Sesaaca. Na sequeere saajaari: “Pueyasojanaa cuaara juaaria cutara quiajanija”. <sup>10</sup> Saniniuujia cuno sesa niishitiojonaa nia tajinia quiyani, nojoriiri na niishishoo cumaacaraca casaa sesacquiaa. Naajuhua, nojoriiri tama nojori cuaqueyajaaja sesoquiaa sesa na miishanota, taa nacujiniaacoji casaa miiquiaa sesa juhuajaniyacuuaani, maja na niishiniutia. Naaratej, nojoriiri saniitiosocoriquiano puetunurajanaa.

<sup>11</sup> Nojoriiri jyanohua cocuaatia miiquioquiaa. Nojoriiri narta pueya niquiniu paniyaquiquiaa, taa supuetana Caín niquiniu paniyaquiquiaari tarajanucuaani. Nojoriiri sesa pueya timitiquiaa casamiriaca nojori quiniurijahuaj, naatej, taa supuetana Balaam

miiniu paniquiaari juucucuaani. Nojoriiri mariyata puetunu quejoosaanutaniyajanaa nojori ruuretanuucua Pueyaso, taa supuetana Coré cusoquiaaricuaani na ruuretascari Moisés. <sup>12</sup> Nia queranacuscari Pueyaso niquiara nia panitioonuta, cuno sacuaraatia niishitiojonuujuacaari jiyanoehua cararaatia nojori miaquesacari niaata. Majaari nojori paniniu tamasaca. Nojoriiri saaja tama na cuaqueyajaaja shuquiritiniu niishijiaa. Puera miaquenujuaca nojori quishacari, cunoori cararaatia. Jiyano pueyari maja na cumaquiniu njajaniya. Nojoriiri najuhuana quijiaa, juhua niqutioocuaari tajimiaquiaa paratu piyarojosacari. Majaari maru ninuu. Nojoriiri najuhuana quiya, juhua muetuhuo naana. Nojoriiri tariucua macu Pueyasora, naatej taa naana sorenocuaani, juhua puetunu na nujuacatajanaa majaratasano. <sup>13</sup> Nojori nuhuaji, pueyari saaja taraatia quiquiaa, cararaatia nojori miishanojiniji. Sesa nojori miishanoori juhua jiyanoehua shoniniacu caminia queyocuasacari cushau, curuutuua. Nojoriiri shanohua niquishiya rupaquija, juhua rijia tyano. Na nuhuaji, nojoriiri ninishiqui quiniutianiya pueyaracaanu Pueyasoju. <sup>14</sup> Pa supuetana Adánri coteenujanaa shipinishano pueyano quiquiaari mijiria. Enocri séptimo jiyaniijia quiquiaari Adán nuhuaji. Enocri Pueyaso niqutishano nojuaja pohuataquiaari taa nio sesa mijiaa pueya miishaanutaniyani. Nojuajaari naa sequequiaariti: “Janiyari Jiyaniijia niquirii cunocoji niyano jiyanoehua queraatia na pueyatani. <sup>15</sup> Nijioriquiaari sesa mijiaa na saniitionura. Rerequetejacaacia tiutianutianiya puetunu sesa nojori miishanojuanaari. Puetunu na soojeacajanaari saniitosaanutaniya puetunu nojori sesacanuucujanaa pa Jiyaniijia”. <sup>16</sup> Cuno sesa niishitiojonuujuacaari naa miiquioquiaa nia tajinia. Nojoriiri saa juayonuutaquijaa. Majaari shuquiriaatia nojori quiniu quiquiaa na jiiitasanota. Nojoriiri tama na cuaqueya panishanojuaja miiquiaa. Puera pocuajaca quiyajarihuaj. Nojoriiri na sajononuta maniniuhuaqueetaquiaa narta pueya, maninia nojori miishaanura. Majaari naa nia quiniu pueyanaa.

*Pueyaso pueyara rootasano*

<sup>17</sup> Cua panishano pueyanaa, nia niishiriohua pa Jiyaniijia Jesucristo jiyaramiquishano pueya sequesano njajaniya. <sup>18</sup> Nojoricuajaari nia pohuataquiaari taate quera jiya puequesacari quiniutianiyan. Nojoriiri naa sequetuquiaariti: “Quera jiya puequesacari, Pueyaso sesacajaca pueyari Pueyaso casaa sojeaca quiniutianiya, na rupaa sojeacajuhua. Nojoriiri sesa miiniutianiya tama nojori cuaqueyajaaja nojori shuquiritiniuria”. <sup>19</sup> Naa cuno pueya miiniucuatej, nojoriiri Pueyaso muerasu jiuujia niyaquejotequiaa maja rupuetoosano nojori quiniuria. Nojoriiri saaja tama sesa nojori niishishano miiquiaajaacujua, Pueyaso Sohuanuuju nojori quishacari.

<sup>20</sup> Cua panishano Pueyaso muerasunaa, Jesucristo rupaacia nia tiuri jiyanoehua socua, seetanujanaa na pueya nia quiniuria maninia. Pueyaso nia secore Pueyaso Sohuanu cumaacata. <sup>21</sup> Naacuajitij, niocua Pueyaso panishano pueya quiri pueyaracaanu. Juhua-janiya nia sashiri pa Jiyaniijia Jesucristo, nojuaja cuara pueyaracaanu quijiacara pa jiyaterejaatijia, shuquiriaatia pa quiniuria na shuriucua pueyaracaanu. Naa pa miiniutianiyan maninia jiyanojia na quiniucua.

<sup>22</sup> Canapuate pa Jiyaniijiaacuaji taacanuyajaani, nojori nia niishitiojore jacaria, seetanujanaa nojori tiuniuria maninia pa Jiyaniijiaacua. <sup>23</sup> Tamasaca nia piriojorejuhuaj Pueyaso pueya nojori quiniuria, nojori mariqui manijinia puetunu quejoosaarejanaari. Tamasacaari jiyanoehua sesa mijiaa. Naajaa, nojori nia naacure, Jesucristo nojori niishiniurijuhua. Saniniuuja, tama nia cuaqueyajaaja jiyanoehua nia cojuare niaa mariqui sesa miitishaarejarihuaj nia cojishacari nojori. Jiyano pueyacu nia taraajere. Saniniuuja, puetunu sesa nojori miishanojuanaa nia soore cutara.

*Naajio puequesacari Pueyaso maniniuhuaqueetasaanu*

<sup>24</sup> Pa Que Pueyasoori pa cojuaquiaa maja pa catenura nocuaji. Nojuacuajaari cumaacaraca na tiuquinitianura pajaniya nocua, puetunu tari maniniushitishanojuanaa pa quishacari, shanohua na cumaaca pa shootianura pueyaracaanu. Pa niquishacari nojuaja, paari jiyanoehua na timitianutaniyani.

<sup>25</sup> ¡Jiyanoehua maniniaari pa Que Pueyaso! Nojuajaari niishijajanaa. Pa jiyatequiaari na muerasuraari pa Jiyaniijia Jesucristo cusonuucua pocuara. ¡Jiyanoehua shanohua na cumaaca! ¡Nojuajaari Jiyaniijajanaa! ¡Jiyanoehua maninia pa Jiitiana! ¡Nojuajaari puetunu cumaacaracajanaa cutara! ¡Nojuacuajaari pa Que Pueyaso! Jiya shipinishaacarijiyojua, nojuajaari quijiajuhanajaj. Naa quiyajaari. Naa quiniutianiya pueyaracaanuuri. Taaquiririni, naacuaaquinatejaj.

## JESUCRISTO NIQUITISHANO JUAN

### *Jesucristo niqutishano pajaniyara*

<sup>1</sup> Janiyari Pueyaso seru Juanni. Niya naajiotaa Pueyaso niqutishano Jesucristonijia, saniniujia nojuaja niishitiniuria na tojtiajaca, taa quiari naataja Pueyaso miiniutianiya mijiria quijiacani. Jesucristoori jiyocuaaanuji na seru jiyaroquiaari cucua, na niishitiojonura janiya taa mijiria quijiaca miishaanutaniyani. <sup>2</sup> Janiyari puetunu na niqutishanojuanaa caminiujia niajaniya seetanujuanaani. Niocujaari seetanujuanaa Pueyaso rupaa, Jesucristojiniji cua caminiujiushano niaara.

<sup>3</sup> Shuquiriaatia quijiaca cutaraari noo pojori, canapue te nio cua caminiujiushano Pueyasojinijini serojonutaniya Pueyaso pueya maapue niquliarani. Na tojtiajacaari shuquiriaatia quijiaca quiniutianiyajuhua, nojori tiuuniucua nio naajiojinia cua pohuatasanoocua. Nio pohuatasano tohuateenuraari tari catecanoya.

### *Juan naajiosano siete Pueyaso pueya maapuecuara*

<sup>4</sup> Janiyari Juanni. Asia jiyajinia quiniaa siete Pueyaso pueya maapuecuara naajianijia. Pueyaso cuaara cumaquiria niajaniya, cuaara nioojia cajitiirijuhua. Pocua niriqiuano pa Que Pueyasoori jyanohua maninia. Nojuajaari pueyaracaanu quijiacuaja. Quiarijia quiyajaariuhua. Na Sohuanuuri juhua siete saminio casaa niquishano, puetunu tiqiyocujanaa quijia na quiniucua. Nojoriiri Pueyaso cajishaqui taceji quitiuya. <sup>5</sup> Pueyaso Niyanu Jesucristoori seetanujuanaa puera caminiujia puetunu na Que Pueyaso Rupaa-janaa. Nojuajaari quiarinio na cuaqueyata pa coteetaquiaari samiitanuhua macujiniji. Nojuacuajaari puetunu mijiria jyanijianucujanaa Jyanijia. Nojuacuajaari pa panijia. Tama na nanacajaaja shootequiaariiri sesa pa miiniujiniji na jayonura pajaniya, tojetaarucujanaa sesa miyashijiacara na jataniniuria pajaniya. <sup>6</sup> Nojuajaari pa jiyatequiaari jyanijianucua pa quiniuria, na Que Pueyaso secojonaa pa quiniuria pueyacuara, nojuaja pa shuqiritianurajuhua. ¡Pa Jyanijiaari jyanohua maninia! ¡Pa Jyanijia cuaara shuqiritiasaaria pueyaracaanu! ¡Nojuacuajaari puetunu cumaacaracajanaa pueyaracaanura! Cuaara naa quiriataje.

<sup>7</sup> ¡Nia maure! ¡Pa Jyanijia Cristoori cohuajajinia tari cunocojiuhua! Puetunu pueyajaanaari na niquniutianiya, noo pojorijuhua, na motenaatej. Puetunu mijiria quijiaca pueyapuejajaari nocuaji nujuquenutaniya nojori martenua. Taaquiriirinij. Naa quiniutianiyacuaaquiniateja na tiuquishacariuhua.

<sup>8</sup> Pa Jyanijia Pueyasoori tama nojuajinijiaaja sequeya:

“Janiyacuajaari puetunu casaajanaa coteetanani, na shaajariquianojuhua. Puetunu cumaacaracajanaanijia. Janiyacuajaari pueyaracaanu quijiani. Majaari cua supuenu quiquiaari. Janiyari niaacua tiuquiri-quianohuani”.

### *Juan niquishacari Cristo puereeta na shacantuuca cumaacajinia quiyano*

<sup>9</sup> Janiyari niarta Pueyaso pueyano Juanni. Pa Jyanijia Jesuucua tiujia cua quiniucujuhua, janiyari jaarajaaja niaata cojiritiashiya naquiya miiniuni. Naaratej, paari mariyata jyanijianucuaari jiyatesocoriguianoni. Cunora, paari juhujaniya naquiya miiniu rejeretaquiaani Jesucristo cumaquishacari pajaniya. Pueyaso rupaa Jesucristojiniji cua poojotanucua, janiyari shoniniacu caminia jiuujajinia jatasano quiyani jiya tucuaatiajaca. Nio jiya tucuaatiaja sesaari Patmos. <sup>10</sup> Tamonu juuca, pa Jyanijia samiitanuhua pa niishiniu juucani, Pueyaso Sohuanuuri cucua niqiuano jyanohua na cumaacata. Janiyari jiyacari rupaa tojirii nacaano cua nijiniarani, juhua trompeta jonenenu. <sup>11</sup> Cua sequeriquiaari:

–Casaa cua niqutiniutianiya quiajaniani, cuno quia naajiotare nequesoreetuneerano. Quiocua na nuhuaji na jiyarore Asia jiyajinia nio siete cua saquiriojosano pueya maapuecuara. Nojoriiri Éfeso tiacajinia quiniaa, Esmirna tiacajinia, Pérgamo tiacajinia, Tiyatira tiacajinia, Sardis tiacajinia, Filadelfia tiacajinia, Laodicea tiacajiniano.

<sup>12</sup> Janiyari cua nijiniara tacatequeeni cua niquniuria cante cucua pocuariquiaani. Cua tacatesacari, janiyari siete samari nujuatacojua niqiriini, orojiniji shipinijosano. <sup>13</sup> Cuno samari nujuatacojua tajiniani, janiyari pueyano niqiriini, juhua Pueyaso Niyanu niquishano. Tucuaque toque cushiriquiaari. Na niouuacaacuma puecariquiaari. Na jiriqiajinia camarucuteriquiaa orojiniji shipinishano casaari. <sup>14</sup> Pueyaracaanu quijia na quiniucua, na muecacaari tojetaarucujanaa jyanohua cohuaja quiriqiaa juhua sohuanatu. Maatia pueya jiuujia niqijia na quiniucua, na namijiaari juhua mani rimianacuriqiaa. <sup>15</sup> Na niouuacaari nenecuriqiaa juhua jyanohua naseeca casaajinia

mohuaquishano bronce. Naa shacantuuca niquishano quiriquiaari puetunu sesa casajaanaa paracaajia na quiniuucua. Cumaacaraca Jiyaniijia na quiniuucua, na pocuasacari, jiyanoehua tojishaariquiaari juhua sararojua, jiyocuaaanuji mohuaca tijia. <sup>16</sup> Na miaquetajata siete riyaa muetujuriquiaari. Naajuhuaaj, nijiniaquetucuaaja mueruuri na rupaamaji mueranacuriquiaa, na rupaa ruuretajaca na puecoonura. Na jiquicoori jiyanoehua shacantuuca quiriquiaa juhua jiyanoehua pananu jasacari panacari.

<sup>17</sup> Cua niquishacari nojuaja, janiyari cua puerenuta na pajama pojijaree juhua macuni. Nojuajaari saaja na miaquetaja niaree cucua. Cua sequereeri:

—Maja puerenu. Janiyacuaja Jesuni. Janiyari puetunu casaajanaa coteetejani, na shaajariquianojuhuaj. <sup>18</sup> Janiyari pueyaracaanu quijiani. Macu quiquiaarinijia. Naajaa, janiyari samiitiaquiaarihuani pueyaracaanu saminio cua quiniuria. Janiyari macunucua quiqiuo riatataja camaruni. Naacuajitij, janiyari cumaacaracani cua tojiyashijia cua quejoonura macunucua quiqiuojinia. <sup>19</sup> Pueya niishishocoriquiano, quia niquishano quia naajiotare Juannaa, taa na quiyacujani, naajuhuaaj taa mijiria quijia miishaanutaniya na nuhujani. <sup>20</sup> Quiaritia quia pohuatareera maatia quia niishiniuria cua niquitishano quiajanija. Cuno siete riyaa quia niquishano cua miaquetajata cua muetujanoni, cunoori siete cua seya. Nojoriiri siete cua saquiriojosano pueya maapue jitianaa. Cuno siete samari nujuatacojua orojiniji shipinijosano quia niquishanojanihuaj, cunoori siete cua saquiriojosano pueya maapue.

## 2

*Éfeso tiacajinia quinia Pueyaso pueya maanuucua naajione*

<sup>1</sup> Juhuacatecara naa cua sequereeri:

—Éfeso tiacajinia quijia cua seruucua quia naajiore, Pueyaso pueya maanu jitianani. Naa quia sequere nojuaja: “Nojuaja, cante siete riyaa cacaa na miaquetajatacujani, cante siete samaritu nujuatacojua tajinia rucuanejojuacuajani, nojuajaari naa quia sequeya: <sup>2</sup> ‘Janiyari puetunu quia miishanojuanaa niishiyani. Quiaari jiyanoehua poonijioquiaa quiria. Naajuhuaaj, quiaari puetunu casaajanaa rejeretaquiaa juhujaniya. Janiyari niishiyajuhuaaj, majaari quia shanacunu quiquiaa sesa miijia nia tajinia. Naajuhuaaj, quiaari cuno sapojonuujuaa nequesorecanu, noo pojori canapue tama sequeriquiaa-jaajani: “Canaari Jesu jiyaramiquishanoni”. Naa quia nequesoreacari nojoritij, quiaari niishiquiano nojoriiri sapojonuujuaa seetanujuanaa. <sup>3</sup> Quiaari puetunujuanaa taraatia quia miiniu rejeretaquiaa, cucua tiuujia quia quiniuucua. Quiaari pueyaracaanu quiria poonijiojua maninia. Quia samareesacari, naajaa, majaari quia tarinitianu quiquiaa. <sup>4</sup> Puetunu naa quia miishanojuanaani, cunoori maninia. Saniniuujia, cua sequesano quia tojiri. Majaari panijia quia quiniu tari, juhua coteenujua. Majaari cuno cua maniniucuanu cutara. <sup>5</sup> Cunora, quia niishiri taa jiyanoehua cua panijia quia quiquiaarini. Quioojia quia tacatorohua cucua, maninia miijia quia quiniuhuaa, taa quia quiquiaari coteenucuajani. Quiaa jaara quioojia tacatoyaquiri, janiyari quioqua niniutianiyani, Éfeso tiacajiniji cua patanura quia samaritu nujuataja. <sup>6</sup> Quiaari maninijuhuaaj, sacuaaratia casaa Nicolás niishitiojosano tojiijaa miishano soojea quia quiniuucua. Janiyari cuno pojori miishano soyajuhuaaj. Nio cua sequesano quiajanijani, cunoori puetunu cua pueyarajanaa. <sup>7</sup> Cante numaacarani, nojori cuara tojiiria Pueyaso Sohanu sequesano Pueyaso pueya maapuera. Pueyaso quishaqui, samiitianijia naanaari nujuataa. Cante puetunu sesa casajaanaa nujuataja cumaatiani, janiyari nojori jiyatenutaniya cuno naanajiniji miojuarani, pueyaracaanu rishijiaa nojori quiniuria’ ”.

*Esmirna tiacajinia quinia Pueyaso pueya maanuucua naajione*

<sup>8</sup> Jiyaniijia Jesucristoori naa cua sequerejuhuaj:

—Esmirna tiacajinia quijia cua seruucua quia naajiore, Pueyaso pueya maanu jitianani. Naa quia sequere nojuaja: “Naa sequeyari cante puetunu casaajanaa coteetenacuajani, na tucuatajanio. Nojuacuajaari cusoquiaari, na nuhuaji samiitiaquiaarihuari. Janiyacuajaari nojuajani. <sup>9</sup> ‘Janiyacujaari niishiyani, quiaari naquiya miishaaquiaa. Quiaari casamiijiujuhuaj. Naajaa, quiaari jiyanoehua casamiriacuajaja nija cua shuriucuanu. Janiyari niishiyajuhuaaj, cuno Judiocuaari quia sesacuaquiaa. Nojoriiri tama sequequiaaajuua nojoriniari Pueyaso pueya cutara, Judiocuaa nojori quiniuucua. Maja naatej. Nojori cutaraari Satanás pueya maanu. Satanásujaari samaruha jiyaniijia. <sup>10</sup> Quiaari naquiya miishaanutaniya. Naajaa, majaari puerenu. Satanási noojiaqueya niajanijinijinio nujuatejotenutaniya nujuatejojuajinia nia sanishaanura, niaate cucua tiuujia seetanujuanaa. Naajaa, niaari saaja rupaquijia miishaanutaniya naquiya. Quia rejeretariquia saaja. Cua tojiijia quia quiriquia pueyaracaanu, quiaa cuara shaajeyarejatijia. Quiaa jaara naa miiritij, janiyari quia jiyatenutaniya jiyanoehua

shuquiriaatia quijia quia quiniuria pueyaracaanuni. Nio cua sequesano quiajaniani, cunoori puetunu cua pueyarajanaa. <sup>11</sup> Cante numaaracani, nojori cuaara tojiiria Pueyaso Sohuanu sequesano Pueyaso pueya maapuera. Cante cucua na tiuuniucua naquiya na miishaanu rejeretaja pueyaracaanuni, nojuaja cutaraari maja quenaaja naquiya na miishaanu quiniutianiya Pueyaso saniitiosacari na ruuretajaca. Na ruuretajaca cutaraari quejoosaanutianiya mani noshijia caminiajini' ”.

*Pérgamo tiacajinia quiniaa Pueyaso pueya maanuucua naajione*

<sup>12</sup> Jiyaniijia Jesucristoori socua cua sequere:

—Pérgamo tiacajinia quijia cua seruucua quia naajiorejuhuaj, Pueyaso pueya maanu jitianani. Naa quia sequere nojuaja: “Nijiniaquetucua mueru jitianani naa sequera: <sup>13</sup> ‘Janiyari niishiyani, cuno tiaca quiaa tii quiyani, cunoori Satanás quiquiojuhuaj. Naajaa, quiaari cua tojijia quiquiaa. Majaari cucua quia tiuuniujiniji quia seetanu naquiia. Cua seru Antipas cutaraari mosaaquiiaari janiyajiniji pohuatanu na tarinitiaquiniucua, cuniqui nia tajinia Satanás quishaquini. Naajaa, majaari quenaaja jiyacari quia seetanu quiquiaari cucuaji. Puetunu naa quia miishanojuanaari jiyano hua maninia. <sup>14</sup> Saniniujia, maja pueyari Israel pueya mianuutequiiaari noo shu, teyanote juaashiquiata shipinijosano casaacua puecosano quiquiaaricua jani juhua Pueyasocua. Naa sacuaatia nojori queranacujasacari nojori paraatatej, Israel pueyari cuniquijia cuno taatujuri numuetucujiaarijuhuaj. <sup>15</sup> Naajuhua, majaari nio cua maniniucuanu: nojiaquie niajanijiniujinijioori maja na tarinitianu paniniu sesa na miijionu. Nojoriiri supuetana Balaam niishitiojosano tojijia quiyajaa. Balaamcuaari Israel pueya paraca Balac niishitiojiaari na pueya cuaara shiniujiaari Israel pueya, jaarajaaja Israel pueya miinuria sesa nojoritia. Naaratej, Balac pueyari Israel pueya mianuutequiiaari noo shu, teyanote juaashiquiata shipinijosano casaacua puecosano quiquiaaricua jani juhua Pueyasocua. Naa sacuaatia nojori queranacujasacari nojori paraatatej, Israel pueyari cuniquijia cuno taatujuri numuetucujiaarijuhuaj. <sup>15</sup> Naajuhua, majaari nio cua maniniucuanu: nojiaquie niajanijiniujinijioori maja na tarinitianu paniniu jiyano hua sacuaatia casa Nicolás niishitiojosano. <sup>16</sup> Quiaari nareja niquiquiaa sacuaatia nojori miijionu. Cunora, quioojia quia tacatorohua cucua, janiya mariqui quioqua quiaareeri cuno sacuaatia miijia quia miquejonura cua rupaamaji mueranacujia mueruuta. <sup>17</sup> Cante numaaracani, nojori cuaara tojiiria Pueyaso Sohuanu sequesano Pueyaso pueya maapuera. Cante tama na cuaqueya miiniu panishanojuaja rejetejani, janiyari na mianuutenutianiya jiyocuaaanu cua racatasano cua pueyarano cua riuriotacajinijini. Janiyari na niqutionutianiya cohuajajau saajiajuhuaj, teyanocua quiarinio sesa naajiotasano quiniutianiyacajani. Majaari tamonu niishiniu quiniutianiya cuno sesa. Saaja na camaruuri na niishinutianiya, cana cua niqutionutianiya cuno saajiacuajani’ ”.

*Tiyatira tiacajinia quiniaa Pueyaso pueya maanuucua naajione*

<sup>18</sup> Jiyaniijia Jesucristoori socua cua pacuterohua sequenuhuaj:

—Tiyatira tiacajinia quijia cua seruucua quia naajiore, Pueyaso pueya maanu jitianani. Naa quia sequere nojuaja: “Pueyaso Niyanu, juhua mani rimianacuyano namijiaaracani, juhua bronce mohuaquishano shacantuca nihuacaracajuhua, nojuajaari naa quia sequera: <sup>19</sup> ‘Janiyari puetunu quia miishanojuanaa niishiyani. Janiyacuajaa niishiyani, quiaari Pueyaso panijia, pueya panijiano. Quiaacuajaa Pueyasocua tiuujia. Quiaari maninia poonijia Pueyasora, pueya quia naacunura. Naajuhua, quiaari juhuajaniya rejeretaquiia quiaa jaara taraatia miishaariquia. Janiyari niishiyajuhua, puetunjuanaa quia miishano quiria quiarijiani, cunoori socua queraatia coteenu quia miishanojiniji. <sup>20</sup> Saniniujia, nio cutaraari cua maniniucuaquishano: cuno Jesabel niaata quiyani, tama na cuaqueyajaaja sequequiaani, nojuajanaari Pueyaso sequesano caminiujunua pueyara. Quiaari juhuajaniya na shanacuaquiia saaja, sacuaatia na niishitiojosanota na sapojonura cua pueya. Naa sacuaatia na niishitiojosanotatej, cuno maajiri cua pueya shiniujia quia juhuajaniya nojori numuetucujunura na camishoo maajipohua. Cua pueya shiniujiaquiaarijuhuaj nojori miquenuunura noo shu, teyanote juaashiquiata shipinijosano taucua pueyasohuacua puecosano quiquiaacuajani. <sup>21</sup> Janiyacuajaa tari cuno maaji sashiquianu juucuani, nojia na tacatonura cucua. Majaari na tarinitianu paniniu paanatu na quiniu. <sup>22</sup> Cunora, cua tojiri. Cua saniitionura nojuaja, janiyari na cusotenutianiya na maquetujinia na matanura. Naajuhua, na numuetucunujuaca jaara nojia tacatoyaquiri sesa nojori miinujiniji, janiyari jiyano hua naquiya miinutianiya nojorini. <sup>23</sup> Noo maajipohua juhuaj, paanaturiria quiniuni, cuno paanaturjuanaa niishitiojonucua nojori juhua necojorini, janiyari puetunu nojorijiana pueconutianiya. Naacuajitij, puetunu Pueyaso pueya maapuejanaari niishinutianiya, janiyari puetunu nojori jiuujajinijiana nojori niishiriojosano niishijiani, nojori panishanocua nojori jiatianunio. Naacuajitij, janiyari maninia miijia niajanijiniujinijio maninia miinutianiya. Niajanijiniujinijio sesa miijia saniniujia, nojoriiri saniitiosaanutianiyacua. <sup>24</sup> Tiyatira tiacajinia quiniaa nojiaqueya niajanijiniujinijio

saniniuuja, niari sacuaraatia cuno maaji niishitiojosano ruuretaquiaa saaja. Naajuhuaaj, majaari nia niishiniu paniniu quijia cuno sacuaraatia casaa jiyasohuaaja niishishano, sacuaraatia miijiaa jiyaniquishanoni "jiyajeneta casaa, Satanásjiniji niishishano". Naa nia ruuretannuucua puetunu cuno sesa niishitiojosanojuanaani, cunoori maniniacuaja. Cunora, majaari socua cua nacasunu quiarjia niajanija. <sup>25</sup> Saaja tama nia cuaqueyajaaja nia cojuare jiyanhua, maja nia tarinitianura maninia nia miiniu taa nia miiquiaacuajani. Naa nia miiriquia pueyaracaanu, janiya jaara niaacua tiuquiriohuajaatijia. <sup>26</sup> Cante cua panishano miiquiaa pueyaracaanuni cuaara shaajeyarejaatijia, janiyari cuno pueyano jiyatenutaniya tamasaca pueyapue jiyaniijia na quiniuriani, taa cua Que jiyatequiaari janiya jiyaniijia cua quiniuriacuani. <sup>27</sup> Jiyaniijianuucua cua jiyatesano pueyani, nojori-iri cumaacaraca quiniutianiya na jiiatasano pueya na tojitiniuria nojuaja. Na tojtiaashijia na saniitiosacari saniniuuja, nojori piyonutaniya jacanauraaari, juhua cumamacata pishano conatu. <sup>28</sup> Naajuhuaaj, janiyari joojea na niqutionutaniyani, juhuaquetaja rijiani, shacantuuca quijia na quiniuria juhua janiyajuhaaj. <sup>29</sup> Cante numaaracani, nojuaja cuaara tojiiria Pueyaso Sohuanu sequesano puetunu Pueyaso pueya maapuerajanaa'".

### 3

#### *Sardis tiacajinia quiniaa Pueyaso pueya maanuucuaa naajione*

<sup>1</sup> Jiyaniijia Jesucristoori socua cua sequeree:

—Sardis tiacajinia quijia cua seruucuaa quia naajiorejuhuaaj, Pueyaso pueya maanu jiiitanani. Naa quia sequere nojuaja: "Naa sequeyari cante Pueyaso Sohuanu jiyaramiquiquiaa cuno sietie Pueyaso pueya maapueecuacuajani, nojori jiuujajinia na poonijnura. Nojuacuajaari cuno sietie Pueyaso pueya maapue jiiitanaa Jiiitanajanaa. Janyacuajaari cunoni. 'Janiyari puetunu quia miishanojuanaa niishiyani. Pueyari quia jiyaniya quiaari saminio. Janiya cutaraari niishiyani quiaari juhua macu. <sup>2</sup> ¡Quia maquenu quia jatate! ¡Suteja quia quiri! Quia cumaquiri noo pojori canapute jatarinitiaja rishiyajaani. Quera cusonuyari. Janiyari Pueyasora quia miishano niqiuquiaani. Majaari maninia na quiniu cua Pueyasora. <sup>3</sup> Quiaacuajaari maninia niishitiojosaaquiaari Pueyaso rupaa. Taa quia niishitiojosaaquiaricuajani, cuno quia niishiriohua. Quioojia quia tacatorohua Pueyasocua, seetanujuanaa na rupaa tojjia quia quiniuria. Quiaa jaara suteja quiniu paniaquiri, janiyari canashyaquiji quiocua niniutianiya juhua nohuase-jojuani, quia jyanishacari maja naasucua juhuanujuaja cua tiuquiniu quiniutianihua. <sup>4</sup> Quia jiiatasano pueyajinijinio cuniqui Sardis tiacajiniani, secaja nojorijinijinioori sesa miiniu ruuretajaca saaja. Naa sesa miiniuria nojori na cojijaquiniuucuatej, nojori-iri juhua curuushojijaquishano janiyara. Naaratej, janiyari nojori cushiyotenutaniya cohuaajaqueya toqueni, cuata nojori rucanejonura, cua rupueanaa nojori quiniuucua. Cunoori seetanujuanaa sesa miiniu ruuretajaca nojori quiniuucua, cucua tiujujaca nojori quishacari. <sup>5</sup> Canapute naa sesa miiniu ruuretajacani cua tojtiajaca nojori quiniuucua, nojoriiri naa cohuaajaqueya toqueya cushiyotesocoriquianojuhuaaj. Cunoori quiniutianiya tojetaarucujanaa sesa miyashijiacara cua jiyatesacari nojori. Naajuhuaaj, majaari cua tuujunu quiniutianiya nojori sesaca cua naajionejiniji, tee cuniqui pueyaracaanu rishijiacarano cua saquirojosano pueya sesaca naajiotasano quiyacuajani. Naajuhuaaj, janiyari nojori jaatianutaniya cua Queecuani, na seya tacojiriano, cua sequenura nojoriiri cua timitiasano pueyaniojuja. <sup>6</sup> Cunora, cante numaaracani, nojuaja cuaara tojiiria Pueyaso Sohuanu sequesano Pueyaso pueya maapuera'".

#### *Filadelfia tiacajinia quiniaa Pueyaso pueya maanuucuaa naajione*

<sup>7</sup> Jiyaniijia Jesucristoori socua cua sequeree:

—Filadelfia tiacajinia quijia cua seruucuaa quia naajiorejuhuaaj, Pueyaso pueya maanu jiiitanani. Naa quia sequere nojuaja: "Cua tojiri. Janyacuajaari tojetaarucujanaa maninia miijiani, cua Que tojjia quia quiniuucua. Puetunu cua sequesanojuanaari seetanujuanaa. Jiyaniijijanaa cua quiniuucua cua supuetana David niti, janiyari cua Que tiootiu riatataja jiiitanani, cua saquirojosano pueya cua tiuquinitianura cua Queecua. Janiya jaara cuno tiootiu riatareni, tamonuuri maja na naata na tionuhua. <sup>8</sup> Janiyari puetunu quia miishanojuanaa niishiyani. Naajuhuaaj, janyacuajaari juhua tiootiu riatarucuaa quiocuajini, cua rupaa quia poojotanura. Naacuajitij, tamasacaari maja na naata tenujunu quiajanija. Quiaacuajaari saaja secaja cumaacaraca. Naajaa, quiaari cua rootasano tojjiacuaja. Naajuhuaaj, majaari cua soojeaca pueya niquiara quia tamacanu quiquianu janiya. <sup>9</sup> Naa maninia quia miiniuucua janiyaracuatej, janiyari naa maninia miiniutianiya quiarajuhuaaj. Janiyari noojiaqueya Satanás pueya maanujinijinio mojuquetaninutaniya quiocuarani. Cuno pojoriiri tama na cuaqueyajaaja sequēja, nojoriniiaari



seetanujuanaa Pueyaso pueya, Judiocuaca nojori quiniuucua. Naa nojori sequesacaritij, nojoriiri sapojonuya. Nojoriiri maja Pueyaso pueya. Nojori cutaraari niishiniutianiya janiyari quia panijia cutarani. Quiaacuajaari Pueyaso pueyano, cucua tiuuja quia quiniuucua. <sup>10</sup> Janiyari quia sequequiaarini maja quia tarinitianura quiria poonijionu, quiaa jaara naquiya miishaariguia. Quiaari seetanujuanaa naa miiquianu. Naaratej, Pueyaso saniniujushacari puetunu mijiria quiniaajanaa puereeta naquiya na niiniutia nojori, janiyacuaajaari jiyacari nia cojuanutaniyani. <sup>11</sup> Quia niishiri: janiyari quera tiuquihuani. Majaari quia tarinitianu cua rupaa tojiniu, quiaa mariqui sapojosaareeri cucuaji quia rupatenura. Naacuajitij, quiaa jaara cucuaji catere, majaari Pueyaso niq- uitionu quiniutianiya quiarano na racatasano. <sup>12</sup> Cante sesa miiniu samiritiaja saajani, cua rupaa tojjia na quiniuucua, janiyari jiyocuacaanu Pueyaso Secojojuu tiajinia na nju- atenutaniya juhua morijiumi Pueyaso quishaquijianaa, tii cua Que Pueyaso na shuquiri- tianura pueyaracaanu. Majaari socua cuniquiji na pootiosaanu quiniutianiya. Na- juhuaj, janiyari cuno pueyanocua naajiotanutaniya cua Que Pueyaso sesani, quiarinio cua sesajuhua, cua Que Pueyaso tiaca sesanio. Cuno tiacacuajaari quiarinio Jerusalén tiaca, jiyocuacaanuji roshinitiasaariquiano. <sup>13</sup> Cante numaaracani, nojuaja cuaara tojiiria Pueyaso Sohuanu sequesano Pueyaso pueya maapuera”.

*Laodicea tiacajinia quiniaa Pueyaso pueya maanuucua naajione*

<sup>14</sup> Jiyaniijia Jesucristoori socua naa cua sequere:

–Laodicea tiacajinia quijia cua seruucua quia naajiorejuhuaj, Pueyaso pueya maanu jitianani. Naa quia sequere nojuaja: “Cua tojiri. Naa sequeyari noo pueyano cana sequesante seetanu rupaajanaacuajani. Puetunu na caminiujushanojuanaa Pueya- sojiniji quiarani, cunoori seetanujuanaa. Pueyasoori na shipinitiquiaari puetunu na shipinishano casaajanaa. Cunocuaajaari janiya. Cunora, cua tojiri. <sup>15</sup> ‘Janiyari puetunu quia miishanojuanaa niishiyani. Quiaari najuhua quijia, quia miyaquiniuucua cua sequesano. Seetanujuanaa cua tojiaquiniu panijia quia quishacari, maara socua maninia quiquiaari cutara maja quia niishiniuria janiya. <sup>16</sup> Quiaa jaara cua niishiyashijia quiriquia, janiya maara quiocua taraajereni. Saniniuuja, quiaa jaara seetanujuanaa cua tojjia quiriquia, janiya maara quia timitiaren. Saniniuuja, najuhua cua pueyano quia quiniuucua, janiyari quia soyani. Naa quia quiniuucuatej, janiyari quera quia saniitioyani. <sup>17</sup> Quiaari tama sequequiaajaacujua: ‘Janiyari casamiriacani. Janiyari puetunu cua panishanojuanaa jitianani maninia mijia cua quiniuucua’. Maja cutaraari quia niishini quioojaari cusosu. Janiyara, quiaari tojetaarucujanaa casamijiu, cariy- ojuaru, juhuasunio. Quiaa jaara na niishiri quia, quiaa maara tama quia cuaqueyajaaja taraajetaja quiriquia. <sup>18</sup> Cunora, janiyari quia numooteyani moseeca pueyanonaa, cua rupaa tojjia quia quiri, seetanujuanaa casamiriaca quia quiniuria. Naajuhua, maninia mijia quia quiriquia cua cushitiniuria quiajaniya cohuajaque toque, maja cararaatia quia quiniuria juhuasu. Naajuhua, cua niishitaja quia masere cutara, quiooja namijia riatenura, seetanujuanaa maninia niquijia quia quiniuria. <sup>19</sup> Janiyari puetunu cua pan- ishano pueyajanaa nacasujani, nojori saniitiojuahuaj. Cunora, quiooja quia tacatore cucua. Tama quioojiaaja quia shiniujurijuhua shamaatia cua tojjia quia quiniuria. <sup>20</sup> Cua tojiri. Janiyari quiooja tootiuujini jiiquioonuujiyani. Cante cua tojiyani, nojuaja cuaara na tootiu riataara cucuaji. Janiyacu noca tiuquiumiani, nata cua miaquenura, shuquiriaatia cua pocojonura nata. <sup>21</sup> Janiyari cua Paraca shocotaquiaarini cua Que tojjia cua quiniuucua. Naaratej, cua Queeri cua cajitiquiaari na shuriucua, jiyaniijajanaa cajitijinia. Naajuhua, janiyari Sesaaca shocotajaca cajitijionutaniya cua shuriucuan, jiyaniijianucua nojori quiniuriajuhuaj. <sup>22</sup> Cante numaaracani, nojuaja cuaara tojiiria Pueyaso Sohuanu sequesano Pueyaso pueya maapuera”.

## 4

*Juan niquishacari jiyocuacaanu Quijaari maniniuhuaqueetasaariquiaa*

<sup>1</sup> Na nuhuaji, janiyari mauquiaarini. Janiyari saaja jiya cajiniocua tootiu niquiquiaari riatasanoni. Shushajanaa cua tojishano rupaa juhua trompeta jonenenuni, cuno rupa- jaari cua pacutequiaariuhua sequenu. Naa cua sequereeri:

–Miji quia tacama. Janiyari quia niqitiniutianiyan taa nio pa quishacari nuhuaji mijiria quinia miishaanutaniyani.

<sup>2</sup> Jiyacaritij, Pueyaso Sohuanuuri cucua niquiaari. Cua sohuanu tacaniquiaari jiyocua- caanuuri. Janiyari jiyacari jiyaniijajanaa cajitiu niquiriini. Pueyanoori tii cajiri quiaa.

<sup>3</sup> Nojuajaari shanohua niquishano quiriquiaa, jiyano hua shacantuca juhua jaspe saajia, jiyano hua naatucajuhuaj, juhua cornalina saajia. Naashiiri na cajitiu caco nujuari quiaa. Jiyano hua shacantuca quiriquiaari neeruca, pocojuanaque juhua esmeralda saajia.

<sup>4</sup> Jyaniyari socua veinticuatro cajitiucua niquirii Jyaniijijajanaa cajitiu shocuanii. Tii cajitiuriquiaari veinticuatro niishijiaca jyaniijianucua. Cohuajaque toqueya cushiy-  
onuuriquiaari, orojiniiji shipiniijosano nacaqueyano. <sup>5</sup> Jyaniijijajanaa cajitiujiniiji, mi-  
acanaari nunujuriquiaa. Jyanohua majacuriquiaajaariuhua. Jyaniijijajanaa cajitiu  
tacoji, tii noshiquioriquiaari siete samari. Cunocuaajaari siete Pueyaso Sohuanu, puetunu  
tiqiyocujajanaa quijia na quiniucua. <sup>6</sup> Jyaniijijajanaa cajitiu tacoji, juhua jyanohua  
puereetuca caminiaari quiriquiaajuhua, juhua cohuaja motiiquio maatia niquishiyari  
na tamajiria.

Jyaniijijajanaa cajishaqui, cuatro saminio casaari quiriquiaajuhua, puetunu na shocua-  
janaa. Nojoriiri jyanohua queraatia namijiaaraca quiriquiaa, na jiriquiaacumaji, na  
nijiniaacumajinio. <sup>7</sup> Cuno cuatro saminucua casaari tamaatia niquishano quiriquiaa ta-  
monujiniiji. Niquiryatuuri juhua juurunu sare niquishano quiriquiaa. Tamonuuri juhua  
seru juunu caya niquishano quiriquiaa. Tamonu casaajiquiocoori juhua pueyano jiquioco  
niquishano quiriquiaa. Tamonuuri juhua surohua miooru jaano niquishaariquiaacujua.  
<sup>8</sup> Puetunu cuno cuatro saminio casaajanaari seis nesuhuaraca quiriquiaa. Puetunu nojori  
cuaqueyacumajanaa quiriquiaari na namijiaa, nocuaji na niquitija, na nijiniara na ni-  
quitiajanio. Nojoriiri pueyaracaanu Pueyaso maniniuhuaqueetariquiaa, juuca, niucuanio.  
Majaari nojori tarinitiano quiriquiaa naa na sequetunu:

—jyaniijijajanaanaa, quiaari saa maniniaja, jyanohua maninia, tojetaarucujajanaa  
maninia miijia! Quiaacuaajaari Pueyaso, puetunu cumaacaracajanaa. Quiaari quijiajuhua-  
najaj. Majaari quia supueni quiquiaari. Quiaari quia pueyacia tacateriquianohua.

<sup>9</sup> Cuno cuatro saminio casaari naa pueyaracaanu maniniuhuaqueetariquiaa Jyaniijia-  
janaa, na cajitiujinia cajiyano, pueyaracaanu Jyaniijijajanaa quiriquiano na quiniucua.  
<sup>10</sup> Naa pueyaracaanu cuno cuatro saminio casaa timitiasacari Jyaniijijajanaacuaatej, cuno  
veinticuatro niishijiaca jyaniijianucuaari jaarajaaja mojoquetacoqueequiaa Jyaniijia-  
janaacuaa. Nojoriiri na tuhuajaa jartaqueequiaa Jyaniijijajanaa cajitiu pajama, naa na  
sequenuta:

<sup>11</sup> —Nioori quiara, Jyaniijijanaa. Quiaa cutaraari Jyaniijijajanaa, maja canaa. Quiaacua-  
jaari canaa Pueyaso. Quiaa cuara timitiasaaria pueyaracaanu, jyanohua maninia  
shacantuca quijia quia quiniucua, puetunu cumaacaracajanaa quia quiniucuaajuhua.  
Quiaacuaajaari puetunu casaajanaa shipiniquiaari. Tama quia paniniucuaajaaja, quiaari  
na shipiniquiaari.

## 5

### *Rupanacujusano naajioneejiniiji pahuatasano, Borrego Niquiojuajiniijinio*

<sup>1</sup> Na nuhuaji, janiyari Jyaniijijajanaa cajitiujinia cajinia juaashiquiajinia niquirii naa-  
jioneeni. Na miaquetajara na cacariquiaari. Cuno tucuanee naajioneeri jniucosano  
quiriquiaa. Naajioori nocua quiriquiaa, na nijinia, na jiniacumano. Cuno naajioneejinia,  
siete naajioori tii naajiotasano quiriquiaa. Cuno siete naajio coteejajiniani, juhua roshitia  
rupanacujutasanoori quiriquiaa. <sup>2</sup> Jiyacaritij, janiyari jyanohua cumaacaraca Pueyaso  
seru niquiriini. Naa nequesoreeriquiaari jyanohua na nacanuta:

—¿Cante seetanujuanaa maninia miijia cutarani? Cuno cuara rupartaara rupanacu-  
tasano, na riatanura cuno naajionee.

<sup>3</sup> Jiyacaritij, majaari quenaaja maninia miijia quiniu quiquiaari jiyocuaaanu, jiya-  
jinia, jiya cariquimiano na riatanura cuno jniucosano naajionee. Tojetaarucujajanaa  
shaaqui quiquiaariiri cuno naajionee serojoriquiano. <sup>4</sup> Naaratej, janiyari jyanohua nuju-  
queriquiaani, tojetaarucujajanaa shaaqui maninia miijia quiyaquiniucua cuno naajio na  
riatanura, na serojonuranio. <sup>5</sup> Cua nujuquesacari, tamonu cuno veinticuatro niishijiaca  
jyaniijianucujiniijinoori cua sequeree:

—Maja nujuquenu. Quia cumantare. Quia niquiri. Pa Jyaniijijajanaacuaajaari jyanohua  
cumaacaraca. Tariucuaaanu Pueyaso Rupaajinia, nojuacuajaari miriqui sequeshiya  
Juurunu saretu, Judá niquiohuacujiniano supueriquiano, Jyaniijijajanaa na quiniuria na  
supuetana David niti. Nojuacuajaari pa paraca Satanás shocotana, tojetaarucujajanaa  
Jyaniijia Pueyaso tojjia na quiniucua. Naaratej, nojuaja na naata cuno siete naajio  
coteeja rupanacujutasano rupareetanu na serojosocoriquiano.

<sup>6</sup> Jiyacaritij, janiyari Borrego Niquiojua niquiriini Jyaniijijajanaa cajitiu tacoji nujuano,  
cuno cuatro saminio casaa tajiniano. Cuno veinticuatro niishijiaca jyaniijianucuaari  
na shocua quiriquiaajuhua. Borrego Niquiojuuari seetanujuanaa juhua mosano sami-  
tianohua niquishaariquiaa. Nojuajaari siete jyaniijia tuhuajaaraca quiriquiaa, puetunu  
cumaacaracajanaa na quiniucua. Naajuhua, siete namijiaaraca quiriquiaari. Cuno  
na siete namijaani, cunocuaajaari Pueyaso Sohuanu, Pueyaso jiyaramiquishano puetunu

mijirijajanaa. <sup>7</sup> Cua niquishacari, Borrego Niquiojuaari Jiyaniijajanaa cajitujinia cajiyano juaashiquaijiniji jiuniososano naajionee masetaree. <sup>8</sup> Nojuaja jaara cuno naajionee cacariquiaa tari, cuno cuatro saminio casaari nocuara mojoquetacoquiaari, cuno veinticuatro niishijiaa jiyaniijianucuanio. Puetunu nojorijianaari taquiniojosano casaa jitiariquiaa. Naajuhuj, orojiniji shipinijosano suhuococua mueetacoriquiaari, mishaja shanohua jaanutajata. Nojori mueetacosano shanohua jaanutajani, cunoori nio jiyajiniji Pueyaso muerasu secojonuusano Pueyaso. <sup>9</sup> Nojoriiri Borrego Niquiojua jaaquequejotariquiaa nio quiarinio jaaquequejosano:

—Saaja quiajanijari seetanujanaa maninia mijia. Naaratej, quia naata cuno naajionee patanu quia rupareetanura na rupanacujusano. Quiaari jiyano hua maninia. Naaratej, quiaari jiyajinia quiniaacuara mosaaquiaari. Quiaari quia nanacata pueya masequiaari Pueyasora puetunu tamaatiuucua pueyapuejinijiniojuanaa, puetunu tamaatia rupaa pocuajacajinijiniojuanaa, puetunu tiacajinijiniojuanaa-juhuj, puetunu jiyacajinijiniojuanaano. <sup>10</sup> Quiaari nojori jiyatequiaari tama quia pueyarajaaja, puetunu nojorijianaa quiniuria jiyaniijianucua, pueyacura seconajanaa, pueyaracaanu nojori maniniuhuaqueetanura pa Pueyaso. Nojoriiri jiyacua jiyaniijianucua quiriquianojuhuj.

<sup>11</sup> Na nuhuaji janiyari tojetaarucujanaa jyanohua jyanohua queraatia Pueyaso seya niquiriini. Jiyaniijajanaa cajituu shocua mariquiaari, cuno cuatro saminio casaa shocujuhuj, niishijiaa jiyaniijianucua shocuanio. Nojoriiri jyanohua queraatia quiquiaari, juhua jaaquia, serojiaquishoo. Janiyari nojori tojirii pa Jiyaniijia Jesu maniniuhuaqueetaanoni. <sup>12</sup> Nojoriiri naa na sequeturiquiaa na nacanuta:

—¡Pa Jiyaniijiaari jyanohua maninia! Pueyacura mosaaquiaariiri juhua borrego niquiojua. Naaratej, saaja nojuaja cuara quiriia Jiyaniijajanaa pueyaracaanura. Saaja nojuaja cuara jitiiaara puetunu casamijianaa. Saaja nojuajaari tojetaarucujanaa niishijia. Nojuajaari puetunu cumaacaracajanaa. Cuara naa quiriia pueyaracaanutej. Puetunu quijiaa casaajanaa cuara tojtiaara pa Jiyaniijia. Saaja nojuaja cuara quiriia jyanohua timitiasano. Puetunu quijiacajanaa cuara na maniniuhuaqueetaara.

<sup>13</sup> Naajuhuj, janiyari puetunu Pueyaso shipinishano saminio casaajanaa tojiriini, jiyacuacaanu quijiaa, jiyajinia quijiaa, jiya cariquimia quijiacajuhuj, shoniacu camini-jinia quijiacanio. Puetunu nojorijianaari jyanohua na timiniutia sequeturiquiaa:

—¡Cuno, na shacantuuca cumaacajinia cajiyani, Borrego Niquiojuaano, nojori cuara maniniuhuaqueetasaria pueyaracaanu! ¡Puetunu casaajanaa cuara tojtiaara nojori pueyaracaanu! ¡Nojori cuara timitiasaariajuhuaj! ¡Saa nojorijia cuara na cumaaca jitiiaara pueyaracaanura!

<sup>14</sup> Jiyacaritij, cuno cuatro saminio casaari nojori rihuaneriquiaa saniniuujia:

—¡Taaquiriirinij! ¡Cuara naa quiiratej!

Cuno veinticuatro niishijiaa jiyaniijianucuaari saniniuujia mojoquetacoqueecujua cuno pueyaracaanu Quijiaacuara, nojori na shuquiritianura.

## 6

### *Jiuniososano naajionee cua seis rupanacujutasano rupareetasacari*

<sup>1</sup> Na nuhuaji, cua shootiasacari, Borrego Niquiojuaari coteenujanaa cuno naajionee-jinia rupanacutasano rupartaree. Naa miiriiri cua niqutishaanura taa mijiria quiniaa miishaanutaniya jyanohua naquiyani, quera nio jiya puequesacari. Jiyacaritij, janiyari tamonu cuno cuatro saminio casaajinijinio tojirii sequeyanoni: “¡Miji!” Na pocuanuuri juhua miacana majanu tojishano quiriquiaa. <sup>2</sup> Naa na sequesacaritij, janiyari cohua-johuana caballo niquirii nocua canujayanoni. Na nijinia cajiniaari balista cacariquiaa. Jiyacaritij, jiyaniijiaari shipinishano nacaque cushitishaareeri. Na nuhuaji, na caballoori na netetaaree jiyocua na quianura, tii na miaquejonura Pueyaso paraa. Majaari quenaaja na nujuatasaanu quiniutianiya.

<sup>3</sup> Na nuhuaji, Borrego Niquiojuaari segundo rupanacutasano rupartaree. Janiyari jiyacari segundo saminio casaajinijinio tojirii sequeyanoni: “¡Miji!” <sup>4</sup> Naa na sequesacaritij, naatuhuana caballoori nocua canujumaa. Na nijinia cajiniaari cumaaca niqutiosaare. Naacuajitij, nojuajaari mijiria quijiaa tojetenutaniya tama nojori miaquetojonurajaaja. Cunora, nojuajaari puereetunee nijiniaquetucujaja mueruu niqutiosaaree.

<sup>5</sup> Na nuhuaji, Borrego Niquiojuaari tercero rupanacutasano rupartaree. Janiyari jiyacari tercero cuno saminio casaajinijinio tojirii sequeyanoni: “¡Miji!” Jiyacaritij, janiyari

mueruhua caballo niquirii nocua canujiyanoni. Na nijinia cajiniaari niiquia shanacujutaja jaasutetariquiaa, mijiria quiniaara miajajau shanacujusaanura nojori serotasaanura. <sup>6</sup>Jiyacaritij, janiyari cuno cuatro saminio casaa tajiniji rupaa tojirii naa sequeyanoni:

–Niquiriyatu juuca poonijionu sami, cuaara niqutiosaaria saaja niquiriyatu kilo trigo jajau. Jaara trigo jajau paniyaquiri, cuaara niqutiosaaria tres kilo cebada jajau. Saniniuuja, majaari shiyocua shanacujunu cutara, vinonio. Cunocujaari queraatia quiniutianiya cutara.

<sup>7</sup> Na nuhuaji, Borrego Niquiojuuari cuarto rupanacutasano rupartaree. Jiyacaritij, janiyari cuarto saminio casaa tojirii naa sequeyanoni: “iMiji!” <sup>8</sup> Janiyari jiyacari tiirihuana caballo niquirii nocua canujiyanoni. Na nijinia cajinia sesaari quiriquiaa “Cusojuaana”. Macunucua Quiquioori na neteyotariquiaa, Cusojuaana puecoosano na rijionura na miitiasocoriquiano. Nojoriiri cumaaca niqutiosaaree jiyanoehua queraatia pueya na cusojuanura. Naacuajitij, jiyanoehua queraatia pueyari puecoosaanutaniya miaquetoojosacari. Tamasacaari cusonuunutaniya jiyanoehua miaajesacari. Tamasacaari paaqueja casonu cusonuunutaniya. Naajuhuj, tamasaacari sareya sootesaanutaniya. Sacocua satejosaanutaniyajaariuhuj. Naacuajitij, jiyanoehua jiyanoehua queraatia pueyari cusojusaanutaniya. Na nuhuaji, puetunu macunucujanaa jaara serojosaare, puetunu nojorijianaari na cajiniocua quiniutianiya puetunu mijiria quijiaca pueya cajiniocujajinijuuanaa.

<sup>9</sup> Na nuhuaji, Borrego Niquiojuuari quinto rupanacutasano rupartaree. Jiyacaritij, janiyari Pueyasocua catijiasaqui juhuacutu cariquiaco niquirii Pueyaso pueya sohuanuhua, noo pojori canapuate puecoosaaquiaricuaajani Pueyaso Rupaa tojijiaca nojori quiniucua, Jesucristojiniji nojori pohuatanuucujuhuj. <sup>10</sup> Jiyacaritij, nojoriiri naa jiyanoehua nacaree:

–¡Jiyaniijianaa! ¡Quiaari saa maninija! Quiaari quia sequesano miijia seetanujuaana. ¿Taa quia tarishiniutianiyaajara canaa puecooana quia nequesoreenurani, nojori quia naminiuria canaacua saniniuuja?

<sup>11</sup> Jiyacaritij, puetunu nojorijianaari cohuaaque toqueya niqutiojosaaree. Nojoriiri naa sequesaree:

–Socua rupaquijia nia samaaterejaara, Pueyaso saquiriojosano niarta Pueyaso pueyajiniocua cuaara puecoosaaria nia shiriajaatijia, taa nia puecoosaaquiaricuaani.

<sup>12</sup> Na nuhuaji, Borrego Niquiojuuari sexto rupanacutasano rupartaree. Jiyacaritij, rijiaari jiya jiuquuijutiaree jiyanoehua. Janiyari na niquiriquiaani. Pananuuri mueruucara quiqiii juhua mueruque toque. Racaari naatuucara quiqiii juhua nanaca. <sup>13</sup> Riyari jiya cajiniocuaaji toteree jiyocua, taa satuna totequiaa jiyanoehua paratucarcuaani. <sup>14</sup> Jiya cajiniocuaari shaajequeehujuhuj, juhua tucuaanee naajioneeri jiuniosaaaree. Shoniniacu caminiyajinia, puetunu jiya tucuaatiajajanaa, puetunu tuhuananuhua-juhuj, puetunu cunojuanaari jiyajeetaquee na nujuatusaquiji. <sup>15</sup> Nojori puerenuta, mijiria jiyaniijianucuaari raacajinia jamaatiushii, sai tajinia tuhuananuhujajiniuhuj. Naa jamaatiushiijaariuhua noo pojori: pueyacia paaretajaca na cumaatej, soldadoehua jiyaniijianucua, jiyanoehua casamiriaca pueya, pueya tojishano pueya, poonitijosano pueyajuhuj, puetunu narta pueyajanaano. Puetunu pueyajanaari naa mashiriquiaa juucua. <sup>16</sup> Nojoriiri tuhuananuhua sequeriquiaa, sainio:

–¡Canaacua nia tiyare canaa nia jamonura cunoocuaaji, na cajitiujinia cajiya na shacantuuca cumaacajiniani! ¡Canaa nia jamojore maja na niqiuara canaa quiniuria, naajuhuj, maja Borrego Niquiojua saniitionura canaa, jiyanoehua na juashacari!

<sup>17</sup> Quiarijiacujaari Pueyaso saniitionu juuca. Jiyanoehua puereeta. ¿Cante na naata na nujuatanuni? Shaaqui.

## 7

*Pueyaso saquiriojosano pueyajiniji pohuatasano, Israel niqiuhuacuajinio supueno pueyajinijinio*

<sup>1</sup> Naa cua niqiniuhuaajitij, janiyari socua cuatro Pueyaso seya niquirii nio jiya shocua nujuatiuyano tuhuaquini, pananu muetasamaji, na tiuquishocora, na muetasamaji na muenecara na miaquetajarano. Nojoriiri na nujuatusaquiji paratu tenujuriquiaa maja na piyaronura jiya, shoniniacu caminia, nacuhuanio. <sup>2</sup> Jiyacarijuuhuj, janiyari socua tamonu Pueyaso seru niquirii jiya pajamaji niyanoni. Pueyaso naajio jiriataja casaa cacariquiaari. Nojuajaari narta cuatro Pueyaso seyacua nacaree jiyanoehua, noo pojoricua canapuate cumaacaraca quiriquiaacuaajani nojori sesonura jiya, shoniniacu camini-ano. Naa nojori sequesereeri:

<sup>3</sup>—¡Cuaara! ¡Maja juhuanojuaja jiya nia sesonu, shoniniacu caminia, nacuhuanio, canaa niyojiaquishacaríjia Pueyaso sesa, na pueya jiníjia, na niishishaanura nojoriiri Pueyaso pueya!

<sup>4</sup>Janiyari jiyacari tojiriini taa pueyate na jiníjia jirioosaareeni. Puetunu supuetana Israel doce niquiohuacuajinio supueno pueyapuejinijinioori ciento cuarenta y cuatro mil pueya jirioosaaree. <sup>5</sup>Naacuaajitij, supuetana Judá niquiohuacuajinio supueno pueyajinijinioni, doce mil pueyari jirioosaaree. Supuetana Rubén niquiohuacuajinio supueno pueyajinijinio, doce miljuhuaj. Supuetana Gad niquiohuacuajinio supueno pueyajinijinio, doce miljuhuaj. <sup>6</sup>Supuetana Aser niquiohuacuajinio supueno pueyajinijinio, doce miljuhuaj. Supuetana Manasés niquiohuacuajinio supueno pueyajinijinio, doce miljuhuaj. <sup>7</sup>Supuetana Simeón niquiohuacuajinio supueno pueyajinijinio, doce miljuhuaj. Supuetana Leví niquiohuacuajinio supueno pueyajinijinio, doce miljuhuaj. Supuetana Isacar niquiohuacuajinio supueno pueyajinijinio, doce miljuhuaj. <sup>8</sup>Supuetana Zabulón niquiohuacuajinio supueno pueyajinijinio, doce miljuhuaj. Supuetana José niquiohuacuajinio supueno pueyajinijinio, doce miljuhuaj. Supuetana Benjamín niquiohuacuajinio supueno pueyajinijinio, doce miljuhuaj. Puetunu nio pojorijianaari na jiníjia jirioosaaree.

*Cohuajaque toqueya cushitishano pueya maanu*

<sup>9</sup>Naa cua niquitishaanu nuhuajitij, janiyari jiyanoehua queraatia pueya niquiríi maanoni juhua tereya. Nojoriiri puetunu nio tiquiyocua jiyacajinijiniojuanaa pueya quiriquiaa, puetunu tamaatiuucua pueyapuejinijiniojuanaano. Quiriquiaajaariuhua puetunu tamaatia rupaaca pocuajacajinijiniojuanaa, puetunu tiquiyocua tiacajinijiniojuanaano. Naa tojetaarucujanaa jiyanoehua queraatia nojori quiniuucuatej, majaari na naata serojosaanu quiriquiaa. Nojoriiri Pueyaso shacantuuca cajitíu tajoji nujuaturiquiaa, Borrego Niquiojuaja tacojinio. Puetunu nojorijianaari tucuaqueya cohuajaque toqueyaraca quiriquiaa. Shuquiriaatia nojori quiniuucua, nojoriiri juhua teruhuanajaquera niquishano mueetacoriqiaa. <sup>10</sup>Puetunu nojorijianaari naa mariyata sequeriquiaa na nacanuta:

—¡Jiyanoehua maniniaari pa Que Pueyaso, na shacantuuca cajitíu jinia cajiyani, Borrego Niquiojuajuhua. Nojoricuajaari pa jiyanoocuaari, tojetaarucujanaa quiariniora jatanishano pa quiniuria!

<sup>11</sup>Naajuhua, puetunu Pueyaso seyajanaa, canapueete shacantuuca cajitíu shocua nujuaturiquiaacuajani, niishijiaa jiyaniijianucua shocujuhua, cuno cuatro saminio casaa shocuanio, nojoriiri Pueyasocuaari jacamaturee nojori timitianura nojuaja. <sup>12</sup>Pueyaso na timitiatuacari, naa sequeteereri:

—¡Taaquiririnj, seetanujuanaacua! ¡Canaari pueyaracaanu quia maniniuhuaqueetanutaniyani! ¡Quiaacuajaari canaa timitiasano! ¡Saaja quiajaniyari seetanujuanaa niishijia cutara! ¡Paacarasho, canaa Pueyasonaa! ¡Quiaa cuaara tojishaaria pueyaracaanu! ¡Quiaari canaa Jiyaniijijajanaa pueyaracaanura! ¡Quiaari puetunu cumaacaracajanaa maninia quia jitianura quia shipinishano! ¡Cuaara naa quiiria pueyaracaanu, pueyaracaanutej!

<sup>13</sup>Jiyacaritij, tamonu cuno veinticuatro niishijiaa jiyaniijianucujinijinioori cua nequesotaree:

—¿Canapueete cuno pojorini, cohuajaque toqueyaracani? ¿Tejenote nojorini?

<sup>14</sup>Janiyari na riucaaree saajani:

—Quiaa cutara na niishiya, jiyaniijianaa.

Cua sequeteereri:

—Nojoricuajaari jiyajinijinio pueya. Jiyajinia nojori quishacaríjia, nojoriiri cuno jiyanoehua naquiya miishacari rejeretajaca quiquiaari. Nojori tiuuniuucua Borrego Niquiojuaacua, nojoriiri puetunu sesa nojori miishanojiníjia juhua nojori toqueya jeequejoquiaari Borrego Niquiojuaja nanacajinia. Naacuaajitij, nojoriiri cohuajaqueya toqueya cushiyonuya. <sup>15</sup>Naa Pueyaso jiyanooshano pueya nojori quiniuucuatej, nojoriiri Pueyaso cajishaqui tajoji quijiaa. Nojoriiri pueyaracaanu tii Pueyaso Secojoua tijinia miqúiaa Pueyaso panishano, juuca, niucuanio, nojori timitiasacari nojuaja. Na shacantuuca cumaacajinia cajijiani, nojuajaari na cumaaca tetentutaniya nojori caco, jatiqui na quiniuria nojoritia pueyaracaanu. <sup>16</sup>Naacuaajitij, majaari socua nojori miaajenu quiniutianiya, jiyamuenuri. Pananuuri maja socua nojori na catijianu quiniutianiya. Naajuhua, majaari socua nasaatia pananu jartanu nojori niishiniu quiniutianiya. <sup>17</sup>Borrego Niquiojuacuajani, jiyaniijijajanaa cajitíu jiuujajinia cajijiani, nojuajanaari nojori jitianutaniya juhua tama na borregohuaaja. Nojuajaari nojori rucuanejotanutaniya, nojori na raatenura pueya samiitianijia mohuaca pacartajinjijia, pueyaracaanu shuquiriaatia

quijiaca nojori quiniuria. Pueyasojuanaacuajaari nojori namijiaaca tujuunutaniya nojori namijiajiniji.

## 8

*Séptimo rupanacutasanojiniji pahuatasano, shanhua jaanutaja patajajinijinio*

<sup>1</sup> Borrego Niquiojua jaara séptimo rupanacutasano rupartaree, cuno naajione saacata-nura puetunujuanaa, tojetaarucujanaa sanaacara quiquiri jiyocuacaanu pueyaracaanura. Maja cua niishiniu, media horaruhua. <sup>2</sup> Na nuhuaji, Pueyaso tajoji, janiyari siete Pueyaso seya niquirii nujuatiuyanoni. Nojoriiri jiyacari siete trompeta niqutiosaaaree. <sup>3</sup> Na nuhuaji, socua tamonu Pueyaso seruuri shanhua jaanutaja pataja pamaa, orojiniji shipinishano. Orojiniji shipinishano Pueyasoocua catijiaja casaa tajoji nujuaseeri, Jijanjiajanaa cajituu tajoji. Queraatia shanhua jaanutaja niqutiosaaareeri Pueyasoocua na catijianura. Jaanutajaari catijiasaariquiano puetunu Pueyaso pueya secosonuu sanotajanaa, Pueyasoocua na jaanujunura cuno catijiaja casaajiniji. <sup>4</sup> Naacuajitij, Pueyaso seruuri Pueyaso pueya secosonano tacanirii Pueyasoocua, shanhua jaanujua najacata. <sup>5</sup> Na nuhuaji, cuno Pueyaso seruuri catijiaja casaajiniji na shanhua jaanutaja pataja mishinirii nishiyata. Jijanhua na majiriataree nio jiyacuaari. Miacanaari ritia nunujuquee. Jijanhua majacureeri. Jijanhua cojuatunereeri. Rijiaari jiuquiujuatiaree-juhuaj.

*Trompetaa jonenejosacari*

<sup>6</sup> Cuno siete Pueyaso seya, trompetaa cacariquiaani, nojoriiri jeeacanecoree na trompetaa na jonenenura. <sup>7</sup> Jiyacaritij, niquiriyatu cuno Pueyaso serujinijioori na trompeta jonenenu coteeree. Jiyacaritij, miacanajaa shiniitujiaacaari, mariyata mani cocitishano nanacata jiyocua jartasaaree. Jiyari quera na cajiniocua cateree, puetunu na nacihuatajanaa, na jiyasocuatiano.

<sup>8</sup> Segundo Pueyaso seruuri na trompeta joneneere. Jiyacaritij, casaa juhua puereetuua tuhananu noshiyanoori shoniniacu caminiajinia jataasaaree. Quera shoniniacu caminia cajiniocuaari nanacara quiquii. <sup>9</sup> Puetunu shoniniacu caminiajinia quijiaca casaajanaari, quera na cajiniocua cusunuree. Naajuhuj, shoniniacu caminiajinia ruhanetasano puereetuua buqueyajinijioori, quera puetunu na cajiniocujanaa sesosaaree.

<sup>10</sup> Tercero Pueyaso seruuri na trompeta joneneere. Jiyacaritij, puereetuua rijiaari jiyocuacaanuji tiqii, jijanhua nishitiuucua juhua shucuenaja jaamasu noshitishano. Tiyareeri quera na cajiniocua nio jiyacua moocujajina, mijiria cuariyajinijuhuj. <sup>11</sup> Cuno rijia sesaari quiriqiaa "Piiqia". Cunora, tee cuno rijia tiyareeni, puetunu cuno mohuacajanaari piiqiara quiquii. Pueya ratusacari cuno mohuaca, queraatia pueyari saaja cusunuree.

<sup>12</sup> Cuarto Pueyaso seruuri na trompeta joneneere. Jiyacaritij, casaari pananuucua pitiaree, racaacia, quera na cajiniocua riyacuanio. Cunora, puetunu mijiria cuhuatajaca casaajanaari quera na cajiniocua sesosano quiquii. Quera na cajiniocuaari ninishiqui quiriqiaa. Cunora, pananuuri maja na cuhuatanu quiriqiaa quera juuca cajiniocua. Naajuhuj, riya, racanio, majaari na cuhuatanu quiriqiaa quera niucua cajiniocujuhuj.

<sup>13</sup> Na nuhuaji, janiyari juhua puereetuua surohua miooru niquirii jiya cajiniocuani. Na jaasacari naa nacariqiaa jijanhuaari:

—jPuereeta, puereeta, puereeta! Seetanujuanaa jijanhua puereeta quiniutianiyari jiyacua quijiaca pueyara, jiuujanaraca curecono Pueyaso seya jaara joneneere, canapuate joneneyaquiyajaa juhuanajuacujajani.

## 9

*Quinto trompeta jonesacari*

<sup>1</sup> Na nuhuaji, quinto Pueyaso seruuri na trompeta joneneere. Jiyacaritij, janiyari jiyocuacaanuji jiyocua tinio rijia niquiriini. Cuno rijiaari tiotuu riatataja niqutiosaaaree, puequeetuujuu raa na riatanura. <sup>2</sup> Na riatasacari, najacaari nojoma juhua puereetuua cuhuariquia sesacari. Pananu namijia tiomaari. Jiya cajiniocuaari mueruucara quiqui-ijuhuj. <sup>3</sup> Sequeruuri cuno najacajiniji mueratumaa. Puetunu nio jiyacuajanaa paaque-maari. Sequeruuri cumaaca niqutiosaaaree nojuaraca na quiniuria juhua turucuanini. <sup>4</sup> Sequeruuri rootasaaree maja nojori miaquenura jiyasocua, nacuhua jaamasujuhuj, puetunu moritajaca jaamasunio. Sequeru cutaraari jiyaramiquishaare puetunu pueyapuejanaa na sojonura, canapuate na jiniji jirioyaquishoo quiriqiaa Pueyaso sesatacua-jani. <sup>5</sup> Sequeruuri rootasaareejuhuj, maja nojori cusojuanura pueya. Cinco raca cuaraa

nojori shocojoora cutara, pueyaracaanu sequeru saashi noosacari. Cuno sequeru saashiiri juhua turucuaniniu saashi noonutaniya.

<sup>6</sup> Naa pueya miishacari naquiya na noonutatej, pueyari cusonu paniniutianiya juucua. Saaja cusoyaquiniutianiyari. Jiyanoehua na shaajenu panishacari juucua, nojoriiri saaja rishiniutianiya, jiyanoehua naquiya nojori miishacari.

<sup>7</sup> Sequeruuri puereeta niquishano quiriquiaa juhua miaquetojonura jeenucuasano caballohua. Sequeruuri casaa jiitariquiaa na nacajinia juhua jiyaniijianucua ora-jiniji shipinijosano nacaqueya. Nojori jiquiooori juhua pueyano jiquioo niquishano quiriquiaa. <sup>8</sup> Nojoriiri juhua maaji muecacaraca quiriquiaa, tucamuejarujuri. Juhua jurunu sare quiacaraca quiriquiaajaariuhuj. <sup>9</sup> Nojori jiriquiaqueeri cumueeca quiriquiaa juhua turtuco. Nojori jaacuatusacari, na nesuhuari jiyanoehua cojuatuneriquiaa juhua caballohua jayotasacari queraatia rucanejotaruhua, miaquetojonuucua na netecuatusacari. <sup>10</sup> Cuno sequeruuri juhua turucuaniniu nojuacaraca quiriquiaa. Jiyanoehua noonacuracajuhuj. Jaara nojori saare, cunoori quiquiaari nojori na noonura cinco raca. <sup>11</sup> Cuno sequeruuri jiyaniijiaraca quiriquiaa. Nojuajaari Sesaaca seru. Cuno puereeta puequeetuuj raa camarujaariuhuj. Hebreo rupaajinia, na sesaari “Abadón”. Griego rupaajinia saniniuujia “Apolión”. Pueyano rupaajinia saniniuujia, niiori sequeya “Pueya Puecoona”.

<sup>12</sup> Janyari naa niqutishaareeni taa coteenujanaa naquiya miishaanu quiniutianiyani, cuno jiuujianaraca naquiya miishocoriquianojiniji. Socua caapiquiiri cureyajaa na nuhuajiria.

### *Sexto trompeta jonesacari*

<sup>13</sup> Sexto Pueyaso seruuri na trompeta jonereee. Janyari jiyacari rupaa tojirii pocuaanoni, shanohua jaanutaja catijaja juhuacutu cuatro tuhuajaa tajiniji, Pueyaso tacoji nujuatajani, orojiniji shipinishanoni. <sup>14</sup> Cua tojishano rupaani, noo sexto Pueyaso seru sequereeri, na trompeta cacariquiaani:

—Cuno cuatro Sesaaca seya quia saacarajore, puereetuca Eufates moo shuriucua morojosano quiyani.

<sup>15</sup> Jiyacaritij, cuno cuatro Sesaaca seyari samaacarajosaaree jiyanoehua queraatia pueya nojori puecoonura, quera na cajiniocua puetunu mijiria quijiaa pueyajinijinojuanaa. Cuno Sesaaca seyari tariucuaaanu naa morojosano quiquiaari, jeenucuasano nojori quiniuria namitia jiyacari nojori cartesaanura, cuno hora, cuno juuca, cuno racara, cuno marijia. <sup>16</sup> Janyari tojiriini cuno cuatro Sesaaca seya soldadohuari, doscientos millones pueya quiriquiaa saa caballohuaracaja.

<sup>17</sup> Janyari cuno caballohua niqutishaaree juhua cua maquenujiniani, na nijinia cajitiuniaanio. Jiyanoehua tamaatia niquishano quiriquiaari. Puetunu nojori jiriquia-cajanaari turtucojiniji shipinijosano casaata mishiquiojosano quiriquiaa. Cuno, nojori naatiyaquishaanuucuj nojori cushiyosano turtuconi, cunoori puereeta niquishano quiriquiaa; naatuuca juhua mani, nentuuca juhua jacinto saajia, pocojuaaque juhua azufrejuhuaj. Puetunu cuno caballohua nacacajanaari juhua juurunu sare nacaca niquishaariquiaa. Maniiri nojori rupaamaji rimianacuriquiaa. Najacaari nojonuucuariquiaajuhuj, azufrenio. <sup>18</sup> Cuno jiuujianaraca puereeta casaata quera na cajiniocua puetunu pueyajinijinojuanaari cusojuasaaree. <sup>19</sup> Naacujitij, caballohuari cumaaca jiitariquiaa na rupaama, na pitijiniajuhuaj, nojori puecoonura pueya. Na piticuuaari juhua sacocua niquishano quiriquiaa. Juhua sacocua nacacaraca quiriquiaajaariuhuj pueya na sajitiajara.

<sup>20</sup> Cureeno pueya, canapuete maja na puecoosaanu quiri cuno jiuujianaraca puereeta casaatani, nojoriiri sesa miiniu tarinitiaaquiriquiaa saaja. Nojoriiri samaruhua seconu tarinitiaaquiriquiaa. Naajuhuj, nojoriiri orojiniji shipinijosano casaa shuquiri-tiariquiaa Pueyaso niti, platajiniji shipinishano, broncejiniji, saajajinijijuhuj, macajini-jinio. Puetunu cunujuanaa, nojori jiyatano tama na pueyasohuarajajani, cunoori maja na niquniu. Majaari na tojinu. Majaari na rucuanenujuhuaj. <sup>21</sup> Naajuhuj, majaari pueya tarinitianu quiriquiaa narta pueya monu, shimiojonujuhuj. Naajuhuj, majaari nojori tarinitianu quiriquiaa na camishoo maajipohua numuetucujunu, maajishuriu numuetucujunujuhuj. Nohuasejonu tarinitiatuquiquiaajaariuhuj.

## 10

### *Pueyaso seru mueetasano tucuanee naajioneeniyojuajiniji pohuatasano*

<sup>1</sup> Na nuhuaji, janyari socua tamonu jiyanoehua cumaacaraca Pueyaso seru niquirii jiyocuaanuji roseyanoni. Cohuaja najacajinia cuhuajaatiariquiaari. Na nacaacua camarucuteriquiaa naashiiri. Na jiquiooori jiyanoehua shacantuuca quiriquiaa juhua

pananu. Na cashacucuaari juhua mani niquishano quiriquiaa, naatej, taa mani nujuaa na noshishacaritij. <sup>2</sup> Na miaquetajara mueetariquiaa shiitianiyojua naajioneeri, tariucua riatasano. Nio jiyacua nujuaseeri. Na miaquetajara na niohuaca niaree shoniniacu caminiaacu. Tacujua niaree nio jiyacua saniniuurijia. <sup>3</sup> Nocua na nujuasacari, jiyanoehua nacareeri juhua juurunu sare sariyocuanu. Na nacasacari, siete miacanaari jiyacari majacuree, juhua pueyano pocuanu. <sup>4</sup> Cuno siete miacana pocuanu nuhuaji, janiyari na sequesano naajiotanu paniriquiaa tari juucuanu. Jiyacaritij, janiyari tamonu rupaa tojirii jiyocuaaanuji naa cua sequeyano saajani:

—¡Maja pueya niishitiniu cuno siete miacana sequesano! ¡Maja na naajiotanu! Tama quioojiajiniajaaja quia racatare.

<sup>5</sup> Jiyacaritij, Pueyaso seru cua niquishano shoniniacu caminiaacua nujuaanoni, nio jiyacuajuhua, nojuajaari na miaquetajara na juaashiquia shiitioree jiyocuaaanu, seetanujuanaa na sequenura. <sup>6</sup> Naa sequereeri:

—Cuno, pueyaracaanu Quijiani, nojuajaari jiya cajiniocua shipininia, jiya shipininia, shoniniacu caminia shipinijuhua, puetunu tii quijiaca casaajanaa shipiniano. Nojuajaari seetanujuanaa naa cua pohuataniya: “Majaari tari na tarishiniu quiniutianiya. <sup>7</sup> Séptimo Pueyaso seru coteesacari jonenenu na trompeta, cuno juucaja, puetunu jiyasohuaja Pueyaso miiniu panishanojuanaari tari tohuateesano quiniutianiya. Naa quiniutianiyaari taa na pohuataquiaari na sequenu panishano caminiujunua pueyacuajani”.

<sup>8</sup> Cua tojishano rupaa jiyocuaaanuji pocuaanoni, socua cua pacuterohua naa sequenuri:

—Pueyaso seruucua quia quiaare, cuno, shoniniacu caminiaacua nujuaani, jiyacuanio. Nojuaja quia masetasee cuno riatasano naajioneeniyojua, na mueetaani.

<sup>9</sup> Janiyari Pueyaso seruucua quiaareeni. Janiyari na seqeseeni na naajioneeniyojua na niqutionura janiya. Cua riucareeri:

—Jajaa, quia patare. Quia miaquerenoj. Shoqueeca quiniutianiya quia rupaamaari juhua samiyatu. Quia seecojinia jatanutaniya piiquiara saniniuurijia. Cunoori, pueya na saniitotaja rupaa na quiniucua.

<sup>10</sup> Janiyari jiyacari cuno naajioneeniyojua pataree Pueyaso seru juaashiquiajinijini. Janiyari na miaquereeni. Seetanujuanaa shoqueeca quiriquiaari juhua samiyatu. Cua miacacari, cua seecojinia jatasee piiquiaraari. <sup>11</sup> Jiyacaritij, janiyari naa sequesareeni:

—Quiocua Pueyaso sequesano caminiujiuriohua pohuatanu queraatia pueyapue niquiara, queraatia tamaatia jiyacajinia quiniaa niquiara, queraatia tamaatia rupaaca pocuajaca niquiarajuhua, queraatia jiyaniijianucua niquiaranio.

## 11

### *Caapiqui Pueyaso sequesano caminiujunua miishanojiniji pohuatasano*

<sup>1</sup> Na nuhuaji, janiyari tia shanacujutaja naajua niqutiosaareeni, juhua nataca niquishano. Janiyari naa sequesareeni:

—Quiarjia cutara quia quiaare Jerusalén tiacajinia. Tii nujuataja Pueyaso Secojoua tia quia shanacujusee quia shanacujutajata, orojiniji shipinishano shanohua jaanutaja catijianio. Quia serojorejuhua puetunu Pueyaso secojonuujuacajanaa tii. <sup>2</sup> Maja cutaraari quia shanacujunu Secojoua tia carijiniacuma. Cunocuaari taucuaa niqutiosaarucuaa tari. Pueyaso soojeaca taucuaari Pueyaso saquirojosano na tiacaran jitianutaniya pueyaracaanu, cuarenta y dos raza cuaara na shocojorejaatijia. <sup>3</sup> Janiyari caapiqui cua saquirojosano pueya jiyaronutaniyani, janiyajiniji nojori pohuatanura pueya niquiara. Nojoriiri janiyajiniji pohuatanutaniya cuaara shocojorejaatijia mil doscientos sesenta juca. Nojoriiri cocuaque toqueya cushiniutianiya taa pueya cushiyoquiaacuajani nojori taraajesacari.

<sup>4</sup> Cuno caapiqui janiyajiniji pohuatanaani, nojoriiri cuno caapiqui olivo naana, tariucuaaanu Pueyaso Rupaajinia pohuatashiyacuajani. Naajuhua, nojoriiri cuno caapiqui samari nujuatacojua, Jiyaniijajanaa tajoji nujuatacojua. Cuno, nojori Jiyaniijiani, nojuajaari jiya Jiyaniijajuhua. <sup>5</sup> Tamonu jaara sesa miiniu paniri cuno caapiqui pueya, nojoriiri na paraa catijanutaniya nojori rupaamaji mueranacujua manitia, nojori na puecoonura. Nojoriiri saaja naa cusojuanutaniya noo pojori, canapuate nojori miiniu pania sesa juucuaacuajani. <sup>6</sup> Nojori, janiyajiniji pohuatanaani, nojoriiri cumaaca jitianutaniya maja na nitiniuria maru pueyaracaanu mijiria nojori pohuatasacari Pueyaso rupaa. Naajuhua, nojoriiri cumaaca jitianutaniya mohuaca na jataniniuria nanacara. Nojoriiri cumaaca jitianutaniyajuhua nojori sesonura jiya puetunu puereeta tamaatia casaatajanaa. Nojoriiri pueyaracaanu naa mijionutaniya nojori panishacari. <sup>7</sup> Nojori jaara janiyajiniji pohuatanu tucutare, jiyacaritij, puequeetuuju raamaji tohuatariquiano



pueresano sacuaraatia Casaani, cunoori nojori paracaaniutianiya. Nojori shocotanutaniyari. Naacuajitij, nojori puecoonutaniya socuaari. <sup>8</sup> Nojori queteeri cuno puereetuuca niishishano tiaca nuucujinia pojoconutaniya, tee nojori Jiyaniijia mosaaquiiaari niyacutesanojinia teetesanoajani. Cuno tiacaari miriqui jiyaniquishiya Sodomata, Egiptotanio. <sup>9</sup> Naacuajitij, jiuujianaraca juuca, socua niqiriyaatu juuca cajiniocuanio, queraatia tamaatiuucua pueyari nojori quete shootianutaniya. Naa nojori queteya shootianutaniyari queraatia tiqiyocua tiacajinijinio pueya, tamaatiuucua rupaaca pocuajaca pueyajuhaaj, queraatia tamonu jiyacajinijinio pueyano. Nojori paraari maja na shanacunu quiniutianiya nojori jamojosaanura. <sup>10</sup> Puetunu mijiria quiniaajanaari shuquiritiuniutianiya, macunucua cuno caapiqui Pueyaso sequesano caminiujiuniaa quishacari. Pueyari jiyanoehua timiquionutaniya, naquiya nojori miitiajaca puecoosaanucua. Naaratej, mijiria quijiaaari tama na casamijiniijiaaja nareja niqitiojotoonutaniya nojori shuquiriniutia.

<sup>11</sup> Naajaa, jiuujianaraca juuca, socua tamonu juuca cajiniocua nuhuaji, Pueyasoori nojori samiitianiijorohua. ¡Nojoriiri na matusaqui saneecuatuohua! Puetunu nojori niqiniiaajanaari jiyanoehua shiriqituri. <sup>12</sup> Jiyacaritij, cuno caapiqui Jesucristojini pohuatanaari puereetuuca rupaa tojitiurii jiyocuaaanuji pocuaano. Naa nojori sequeriquiaari:

—¡Miji nia tacatama!

¡Jiyacaritij, nojoriiri na paraa niqiuara tacataquee cohujajinia jiyocuaaanura! <sup>13</sup> Na paraa shootiasacari nojori, jiyacaritij, rijiaari jiyanoehua jiuuquiuutiaree. Naa rijia jiuuquiuutiasacari, Jerusalén tiacajinia queraatia tiacaari niyarequetaquee. Siete mil pueyari tii cusuuree. Cureeno pueyari jiyanoehua jiuujiateree Pueyasoocuai. Nojoriiri jiyacari niishirii Jiyocuaaanu Quijiaari seetanujuanaa Pueyaso cutara.

<sup>14</sup> Janiyari naa segundo naquiya miiniu niqitishaareejaaniuhuaaj, taa na nuhuaji na miishaanutaniyacajani. Tercero naquiya miishacariiri quera ritia cuno nuhuajjia quiniutianiya.

### *Séptimo trompeta jonesacari*

<sup>15</sup> Séptimo Pueyaso seruuri na trompeta jonerere. Jiyacaritij, puereetuuca rupaacaari jiyocuaaanu tojishaaree. Naa sequeturiquiaari:

—¡Quiarijiani, pa Jiyaniijia Pueyasoori tari jitianutaniya puetunu jiyacua jiyaniijianucua jitiiasanojuanaa! ¡Nojuajaari pa Jiyaniijia Cristota Jiyaniijianucuaajanaa quiniutianiya! ¡Nojoricuaajari pueyaracaanu Jiyaniijiajanaa quiriquiano!

<sup>16</sup> Jiyacaritij, cuno veinticuatro niishijiaa jiyaniijianucua, shanohua cajitujinia cajituriquiaa Pueyaso tacojini, nojoriiri Pueyasoocuaa jacamateree jiyanoehua na shuquiritanuta nojuaja. <sup>17</sup> Naa sequeteree Pueyasoori:

—¡Paacarasho canaa Jiyaniijianaa! ¡Quiaari puetunu cumaacaracajanaa! ¡Quiaari quijiajuhanajaj! ¡Quiaari pueyaracaanu quijia! ¡Quiaari tari juhuacatecara quia cumaaca poonijioteree, Jiyaniijiajanaa quia quiniuria pueyaracaanu! <sup>18</sup> Cunora, puetunu jiyacua jiyaniijianucuaajanaaari juaaquiyoa. Naajaa, quarijiaari quia juaashacari cutara. Quiarijiaari macunucua quia nequesoreenu jucajuhuaj. Saniniujia, quiaari pueyara quia sequesano caminiujiuniaa pueya niqitiojonutaniya nojoriirano quia riuriotaca, puetunu quia saquiriojosano pueyajanaajuhuaaj, puetunu quia timitiajaca pueyajanaano, jiyaniijianucua, narejaca pueyano. Naajuhuaaj, quiaari jiya sesojuaca pueya shaajanutaniya.

<sup>19</sup> Jiyacarijuhuaj, jiyocuaaanu Pueyaso Secojoua tiaari riataaaree. Janiyari Pueyaso Quishaquijianaa niqiriini. Tii matariquiaari Pueyaso caaja, seetanujuanaa na Rupaajanaa na racataja. Cuno na Rupaari na pueya na jyanootiaja, na tojyashijiaa na saniitotajajuhuaaj. Jiyacaritij, miacanaari nunujuree. ¡Jiyanoehua majacureeri! ¡Pueereetatej, jiyanoehua cojuata! ¡Rijiaari jiyacari jiuuquiuutiaree! ¡Jiyanoehua queraatia miacanajaa shiniitujiaaari juhua maru toterejuhuaj! ¡Jiyanoehua puereetaari quiriquiaa!

## 12

*Miriqui pohuatasano maajijini, puereetuuca Naaquerujiniijiuhuaj, juhua cohuaniquia niquishano*

<sup>1</sup> Na nuhuaji, pueya jiuujiatenura, casaari jiya cajiniocua niquishaaree. Maajiiri quiriquiaa cuno, cua niquishanoni. Juhua toqueta pananujinia cuhuajaatiariquiaari. Racaacua nuuariquiaari. Doce riyari na nacaque quiriquiaa. <sup>2</sup> Cuno maajiiri manajaraca quiriquiaa. Nooriquiaari. Cunora na sariyojotariquiaari quera na ranu panishacari. <sup>3</sup> Jiyacaritij, janiyari socua tamonu casaa niqitishaaree jiya cajiniocuan. ¡Pueereetuuca Naaqueruuri quiriquiaa, naatuhuaa! Juhua cohuaniquia niquishano quiriquiaari.

Siete nacacaracari quiriquiaa, diez tuhujaaracanio. Jiyaniijianucuaara shipinijiosano nacaqueya niquitiacoriquiaari na siete nacacaacua. <sup>4</sup> Cuno naatuhuana Naaqueruuri quera na cajiniocua riyajinijinio nocuara rerecoree jiyocuacaanuji na pititua. Nio jiyocua na jacutareeri. Naaqueruuri rariquiano maaji taccoji shanacuriquiaa. ¡Na sashiriquiaari cuara raara, mueya na mianura jaara rasaare! <sup>5</sup> Maajiiri cayaniojua raree. Nojuajaari puetunu mijirja quijia pueyapuejanaa Jiyaniijijanaa quiriquiano. Nojuajaari pueyaracaanu na maca mueturiquiano, na tojijashijiaa na piyotajira. Mueyari na nucua jaariutiasaaree Naaqueruucuaaji. Pueyasoori na shuriucuaara na ririi, tii na cajitiniuria, Jiyaniijia quiriquianoni. <sup>6</sup> Maajiiri saniniuujia cariiquia jiyajinia mashirii, tee Pueyaso jeenucuajiaari tari nocuaji na quijiaracuajani, tii na mianuutesaanurajuhua, cuara shocojorejaatijia mil dosciento sesenta juuca.

<sup>7</sup> Na nuhuaji, janiyari Pueyaso seya jiyaniijia Miguel niquirii narta Pueyaso seyatani, cuno naatuhuana Naaquerujuhuaj puetunu na seyatajanaa. Puetunu nojorijianaari puereeta quiaquetooriquiaa jiyocuacaanu. Cuno Naaqueruuri na seyata jiyanhua quiaqueriquiaa Pueyaso seya juucua. <sup>8</sup> Naajaa, majaari nojori naata quiriquiaa Pueyaso seya shocotanu. Pueyaso seya paracaaniuucua jiyanhua nojori, majaari quiquico quiniu quiriquiaa socua nojoriria jiyocuacaanu. <sup>9</sup> Naacuajitij, cuno Naaqueruuri jiyocuacaanuji taanusaaree. Nojuacuajaari cuno tariucuaaanu Soconu, Eva sapojoquiaari. Cuno Sesaaca seque sesaari “Satanás”. Nojuajaari puetunu mijirja quiniaajanaa sapojoquiaa. Pueyaso seya shocotanuucua nojuaja, nojuajaari puetunu na seyatajanaa nio jiyacua quejooaaree.

<sup>10</sup> Jiyacaritij, janiyari jiyocuacaanu quijiaa queraatia pueya rupaa tojiriini. Juhua niquiriyatu rupaari tojishaariquiaa jatiqui nojori paaretasacari na rupaa. Naa seque-turiquiaari:

—¡Pueyasoori parta Pueyaso pueyacuara Saquirojotana jataree tari! Nojuajaari pueyara-caanu Pueyaso saquirojotaja Pueyaso pueyacuara, juuca, niucuanio. Naa pa Paraca jatasaanuucuatej, Pueyasoori quiarjia tohuateenutaniya puetunu na sequesanojuanaa na jiyanooshano pueyara. ¡Nojuajaari maninia jiiitianutaniya pajaniya, jiyanhua na cumaacata! ¡Pa Jiyaniijia Cristoori tari jiyatesaaree Jiyaniijijanaa na quiniuria! Naa na miishaanuni, cunoori na Que saquirojosano na quiniuucua.

<sup>11</sup> ¡Pueyaso Borrego na quiniuucua, nojuajaari na nanaca shootequiaari, tojetaarucujanaa jiyanooshano pa quiniuria sesa pa miishanojiniji! Naacuajitij, Satanás saquirojotasacari parta Pueyaso pueyacuara, nojoriiri na sanaajaquiaari nojori tiu-niuucua Jesucristoocua. Nojoriiri na shocotaquiaariijanaa, nojori pohuatuaniucua Jesucristoocua nojori tiuuniujiniji. Nojoriiri maja na puereu quijia na mosaanura. Nojoriiri seetanujuanaa juhuajaniya tama na cuaqueyajaaja panitiaquiaari nojori mosaanura. <sup>12</sup> ¡Naaratej, jiyocuacaanuna, shuquiriaatia quia quiri! ¡Naa Sesaaca jatasaanuucuatej, nia timiquiore jiyocuacaanu quijiacanaa! ¡Niajaninya saniniuujia, jiyacua quijiacanaa, shoniniacu caminiajinia quijiacanio, jiyanhua nia taraajere! ¡Sesaaca niishishacari maja puera Pueyaso tarishiniu quiniutianiya na saniitionura nojuaja, nojuajaari niaacua roseyarucuaa jiyanhua na juaniutia!

<sup>13</sup> Cuno puereeta niquishano Naaqueruuri niishishacari nojuaja tari jatasaaree jiyocua, nojuajaari cuno mueya nucua neteyojotanu coteere na mianura juucua. <sup>14</sup> Cuno maajiiri querajaa puereetuca nesu niquitiosaaree saaja, juhua jiyanhua puereetuca surohua miooru nesu. Cuno nesuta, maajiiri na quiquiojiniana jaaree cariiquia jiyajinia, tu-cuacaanu cuno Naaqueruucuaaji. Tii mianuutesaanutaniya pueyaracaanuuri cuara na shocojorejaatijia jiuujianaraca marijja, socua seis racanio. <sup>15</sup> Jiyacaritij, Naaqueruuri mohuaca quecaree juhua moo, maaji nuhuaji na saquitiniuria, maaji na jaatinitianura juucua. <sup>16</sup> Jiyari maaji naacutaree. Jiyari juhua na rupaa riataree. Naaqueruuri rupaa-maji pojuaretaano moo raturee saajaari. <sup>17</sup> Naaqueruuri jiyamitia maajiicua macaarii jiyanhua. Quiaareeri maajiicujainio supueno pueyata miaquetojonura. Cuno por-oricuajaari Pueyaso rootasano tojtijajaca, canapete Jesucristoocua nojori tiuuni see-taashijiacacuajani.

<sup>18</sup> Naaqueruuri shoniniacu caminia casaqueyaji nujuasee.

## 13

*Caapiqui puereeta niquishano Casaajiniji pohuatasano*

<sup>1</sup> Na nuhuaji, janiyari puereeta niquishano Casaa niquirii shoniniacu caminiajiniji tacaanoni. Siete nacacaraca quiriquiaari, diez nacajaaracanio. Puetunu na diez naca-jaacua jiiitariquiaa jiyaniijianucuaara shipinijiosano nacaqueyari. Puetunu na naca-caacuajanaa, sesacaari nocua naajiotasano quiriquiaa. Na nacacaacua naajiotasano

sesacani, cunoori Pueyaso rerequeteriquiaa, juhua Pueyaso shocotaja na quiniuucua. <sup>2</sup> Janiyara, cuno cua niquishano puereeta niquishano Casaani, cunoori juhua marucatuque sare niquishano quiriquiaa. Na niohuacaari juhua oso niohuaca niquishano quiriquiaa, tucuaocua juaashococuaraca. Na rupaari juhua juurunu sare rupaa quiriquiaajuhua. Cuno tari cua pohuatasano naatuhuana juhua cohuaniquia niquishano Naaqueruuri na cumaaca na niquitooree. Tama na cajitiujiniaaja na cajitiriiri jiyaniijijanaa na quiniuria jiyacua. <sup>3</sup> Cuno puereeta niquishano Casaa siete nacacaracani, niquiriyatu na nacacajinjinioori pishano quiriquiaa na mosaanura juucua. ¡Cuno puereetua cua piyashi na nacaacua quiriquiaani, saaja cushiriikiiri! Puetunu mijiria quiniaa pueyajanaari jiuujiateree na cushiriishacariuhua. Cunora, puetunu nojorijianaari cuno puereeta Casaa tojjiiacara quirii. <sup>4</sup> Jiyacaritij, mijiria quiniaa pueyari cuno naatuhuana Naaqueruucuaa jacamaturee juhua Pueyasoocua, cuno puereeta niquishano Casaa na jiyatenuucua nojori jiyaniijijanaa na quiniuria. Pueyari cuno siete nacacaraca puereeta niquishano Casaacuaa jacamatureejuhua. Nojoriiri naa sequetooree tamajaaja:

–Maja socua tamonu jiyaniijia quiniu juhua nio pa jiyaniijia. ¿Tamonu jiyaniijiateeri cumaacaraca, nata na miaquetoojonura? Shaaqui.

<sup>5</sup> Jiyacaritij, cuno naatuhuana Naaqueruuri cuno siete nacacaraca puereeta niquishano Casaa niishitiojeree sacuraatia na rimiaaquenura Pueyasoocua, Pueyaso na rerequetenurajuhua. Naa miiriiri na jyanishacari nojuajaari socua maninia quijia Pueyasojiniji. Naajaa, nojuajaari jiyaniijiaa jiyatesaaree saaja cuarenta y dos racara. <sup>6</sup> Naacuajitij, cuno puereeta niquishano Casaari Pueyaso rerequetenu coteeree. Pueyasoocuaa rimiaaquereeri. Jesuucua tiuujiaca pueya sesacareejaariuhua, jiyocuacaanu Pueyaso quiquionio. <sup>7</sup> Mijiria quijiaa Pueyaso saquiriojosano pueya paracaatishaareejaariuhua. Cumaquishaareejaariuhua Pueyaso pueya na shocotanura. Cumaaca niquitiosaareejaariuhua jiyaniijijanaa na quiniuria, puetunu tamaatiuucua pueyapuejianaa na jiiitanura, puetunu tiquyocua tiacajinjiniio pueyajanaa, puetunu tamaatia rupacaa pocuajaca pueyajuhua, puetunu tamonu jiyacajiniajanaa quijiacanio. <sup>8</sup> Naacuajitij, puetunu mijiria quijiaa pueyajanaari cuno puereeta niquishano Casaacuaa jacamaturee na shuquiritianura nojuaja, nojori pueyaso na quiniuucua. Cuno pojoriiri maja Pueyaso saquiriojosano pueya. Naaratej, jiya shipinishaanujiniji, nojori sesacaari maja na naajiotasaanu quiquiaari Borrego Niquiojua jiiitasano naajioneejinia, cante pocuara mosaaquiaaricujani. Pueyaso muerasu sesaca cutaraari cuno naajioneejinia naajiotasaaquiaari jiya shipinishaacarijiyojua, pueyaracaanu rishijiaa pa quiniuria.

<sup>9</sup> Cante numaaracani, nojuaja cuaara tojiiria nio: <sup>10</sup> “Cante Pueyaso jiyatesano quiasocoriquianoni, nojuajaari seetanujanaa quiasano pueyano quiniutianiya. Naajuhua, cante nijiniaquetucujaja mueruuta mosocoriquianoni, seetanujanaa naa mosaanutaniyari”. Naaratej, Pueyaso pueya cuaara puetunu casaajanaa rejeretajaca quiiria, seetanujanaa nojori tiushacari Pueyasoocua.

<sup>11</sup> Na nuhuaji, janiyari tamonu puereeta niquishano Casaa niquirii jiyajiniji mue-taanoni. Caapiqui nacajaraca quiriquiaari, juhua borrego niquiojua nacajaa niquishano. Juhua cumaacaraca jiyaniijia na rupaa paaretariquiaari. <sup>12</sup> Jyanohua cumaacaraca quiriquiaari, juhua narta puereeta niquishano Casaa, teyano naca pishanotucujaja cushiriiriohuani. Nojuajaari na naca cushiriinohua narta puereeta niquishano Casaa naacuriquiaa. Naacuajitij, nojuajaari puetunu mijiria quiniaa pueyajanaa mojuquetanijioree juhua Pueyasoocua, nojori timitianura na naca pishano cushiriinohua puereeta niquishano Casaa. <sup>13</sup> Naajuhua, nojuajaari na cumaacata miiri jiyajenete casaa pueya jiuujiatenura nocuaji. Jyanohua cumaacaraca na quiniuucua, pueya niquiara, nojuajaari mani tinirii jiyocuacaanuji jiyocua. <sup>14</sup> Naa na cumaacata na miiniuucua cuno na naca cushiriinohua puereeta niquishano Casaa tacobitij, puetunu mijiria quiniaa pueyajanaa sapojoreeri. Naacuajitij, nojuajaari pueya shipinitirii casaa. Juhua cuno siete nacacaraca puereeta niquishano Casaari quiriquiaa, teyanote na nacajinia mueruuta pishano na quishacari samitiarohua saajacujani. <sup>15</sup> Jiyacaritij, nojuajaari cumaaca niquitiosaaree pueya shipinishano Casaa na jiyatenua saminiora, pocuajara na quiniuria, nocuara jacamatiuyashijiaa na puecootenurajuhua. <sup>16</sup> Naajuhua, cuno caapiqui nacajaraca puereeta niquishano Casaari na pueya sequeree nojori naajiotanura puetunu pueyacuajanaa narta puereeta niquishano Casaa sesa. Naajiotasaareeri nojori miaquetaja juaashiquiaacua. Jaara nojori juaashiquiaacua naajiotaaquishaare, nojori jiniji naajiotasaareeri. Naacuajitij, puetunu mijiria quiniaa pueyacuajanaa naa naajiotasaareeri, tojiyaquishoo pueyacu, tojishano pueyacu, casamiriaca pueyacu, casamijiuniucua pueyacu, tama nojoriria poonijionuuacajaja pueyacuajuhua, poonijiotasano pueyacuanio. <sup>17</sup> Jiyacaritij, canapete cuno puereeta niquishano Casaa sesa naajiotasano jiiitaaquiriquiaa na cuaqueyacuani, nojoriiri maja na naata na panishano masenu quiriquiaa na cumaneecata. Naa-

juhuaj, majaari nojori naata na casami niquitiojonu quiriquiaa na cumaneecara. Pueya jaara cuno puereeta niquishano Casaa sesa jittiaquiri naajiotasano na cuaqueyacia, na naata na sesa número jittianu nocua naajiotasano.

<sup>18</sup> Nio niishishaanura maninia, jiyanoehua niishitiajaari panishiya cutara. Niishijiaa pueya cuaara serojoora puereeta niquishano Casaa sesa número. Na númeroori pueyano sesa número. Cuno númeroori seiscento sesenta y seis. ¡Cunora pueyanaa, tama nia cuaqueyajaaja nia cojuare maja cuno puereeta niquishano Casaa sesa naajiotasaanura niaacuajuhua!

## 14

### *Borrego Niquiojua cojiniaajiniji pohuatasano*

<sup>1</sup> Na nuhuaji, janiyari Borrego Niquiojua niquiriini, Sión tuhuananuucua nujuaanoo. Ciento cuarenta y cuatro mil pueyari na cojiriquiaa. Borrego Niquiojua sesaari naajiotasano quiriquiaa puetunu nojori jinijijianaa, na Que Pueyaso sesajuhua. <sup>2</sup> Na nuhuaji, janiyari casaa tojirii juhua sararojua cojuatuneyano jiyocuacaanujini, juhua miacana majacuyano, juhua queraatia pueya arpa taquinionuyanojuhuaj. <sup>3</sup> Cua tojishanoori quiarinio jaaquequejosano quiriquiaa. Jaaquequenuunaari Pueyaso cajitiu tacoji jaaquequenuuriquiaa, cuno cuatro saminio casaa tacojijuhua, cuno veinticuatro niishijiaa jiyaniijianucua tacojinio. Majaari quenaaja tamonu naata quiriquiaa cuno jaaquequejosano niishiniu nojori jaaquequejonurajuhua. Saaja cuno ciento cuarenta y cuatro mil pueya cutaraari cuno jaaquequejosano niishiriquiaa. Cuno pojoricuajaari mijiria quini-aajinijinio saquiriojosaaquiaari Pueyaso pueya nojori quiniuria. <sup>4</sup> Nojoriiri tojetaarucuaajanaa maaji numetuqueyashijiaa quiquiaari, saaja pocuaji Tacunaacua jiaatiajaca nojori quiniucua. Naaratej, tiqiyocua Borrego Niquiojua rucanejosacari, nojoriiri pueyaracaanu na cojiquiaa. Nojoriiri saquiriojosaaquiaari mijiria quiniaa pueyajinijinio, saaja Pueyasora nojori quiniuria, Borrego Niquiojuara nojori quiniurijuhua. Nojoriiri socua Pueyaso timitiasano pueya puetunu Pueyaso saquiriojosano pueyajinijinojuanaa, taa pa shuquiritiaa shushajanaa pa carojosano pa nataujinijicuaani. <sup>5</sup> Nojoriiri tojetarucuaajanaa sapojonu niishiyashijiaa quiquiaari, tojetarucuaajanaa sesa miyashijiaa nojori quiniucua.

### *Jiuujianaraca Pueyaso seya pohuatasano*

<sup>6</sup> Na nuhuaji, janiyari tamonu Pueyaso seru niquirii jiya cajiniocua jaanoni. Jaariquiaari mijiria quijiaa pueya niquiara na pohuatanura Pueyaso Rupaa, puetunu jiyacajinia quiniaa pueyarajanaa, puetunu tamaatiucua pueyapuerajanaa, puetunu tamaatia rupaaca pocuajaca pueyarajanaajuhua, puetunu tiqiyocua tiacajinia quijiaa pueyarajanaano. Na pohuatasanoori seetanu rupaajanaa pueyaracaanura. <sup>7</sup> Pueyaso seruuri mijiria quiniaa pueyacia nacariquiaa naatej:

—¡Pueyaso puerejaca nia quiriquia! ¡Nojuaja nia maniniuhuaqueetare! ¡Quiarijiaari na nequesoreesacari pueya! ¡Nocua nia mojoquetacore nia shuquiritianura nojuaja! ¡Nojuacuajaari jiyocuacaanu shipinina, nio jiya, puereetuuca shoniniacu caminijuhua, puetunu samocua nacaa pacartacojuacajanaano!

<sup>8</sup> Jiyacaritij, tamonu Pueyaso seruuri narta Pueyaso seru nuhuajimiaajuhua. Naa miriqui sequeriquiaa Roma tiacajinijiiri:

—¡Babilonia tiaca tari saniitioshiya! ¡Cuno puereetuuca tiaca tari saniitioshiya! Babilonia tiacaari puetunu jiyacajinia pueyajanaa niishitiojua, sacuaaratia nojori miiniuria juhua nojuajuhua. Babilonia tiacani, nojuajaari puetunu sesa casaa na miijosanotajanaa juhua mashaasequetejoquiaari puetunu mijiria quijiacajanaa. Naacuajitij, puetunu pueyajanaari tama na cuaqueya miini panishanojuaja miijiacara quiquiaari, jiyanoehua nojori jiaatianuta sacuaaratia casaa na miiniuria, taa Babilonia tiacajinia quiniaa miijioquiaacuaani.

<sup>9</sup> Na nuhuaji, socua tamonu Pueyaso seruuri narta caapiqui na puetanaa Pueyaso seya nuhuajimiaajuhua. Mijiria quiniaa pueyacia nacaree naari:

—¡Jiyanoehua puereeta quiniutianiyari noo pojoriria, canapuate cuno puereeta niquishano na naca pishano cushiriinohua Casaacuara mojoquetacojua juhua Pueyasoocarani! ¡Jiyanoehua puereeta quiniutianiyari noo pojoririjuhua, canapuate juhua na naca cushiriinohua niquishano shipinishano Casaacuara jacamatujacani! ¡Naajuhua, puereeta quiniutianiyari noo pojoriria, canapuate na cuaqueya tarinitiajani, cuno puereeta niquishano Casaa sesa naajiotasaanura nojori jinijini, nojori juashiquiaacua so! <sup>10</sup> ¡Pueyasoori puetunu cuno pueyajanaa saniitionutaniya jiyanoehua na juaaniutia! ¡Majaari quenaaja Pueyaso jiuujiaaniu quiniutianiya nojori! ¡Pueyaso seya niquiara, Borrego Niquiojua niquiarajuhua, nojoriiri pueyaracaanu naquiya

miishaanutaniya manitia, azufretanio! <sup>11</sup> ¡Naa Pueyaso miitiasacari nojoritij, najacaari pueyaracaanu nojonutaniya! ¡Majaari quenaaja nojori samaraatasaanu quiniutianiya juuca, niucuanio! ¡Naquiya miiniuuri naa nojori miitianutaniya pueyaracaanu! ¡Naa miishaanutaniyari cuno pojori, canapuate na naca pishano cushiriinohua puereeta niquishano Casaacuara jacamatujuaa juhua Pueyasooocarani, juhua nojuaja niquishano shipinishano Casaacuarajuhua! ¡Naa miishaanutaniyajaariuhaj noo pojori, canapuate cuno puereeta niquishano Casaa sesa naajiotaniniutianiya tama nocuajajani!

<sup>12</sup> Cunora, Pueyaso saquiriojosano pueyani, canapuate na rootasano tojitiajacani, Jesuucua tiuuniu tarinitiaashijiacajuhua, nojori cuaara juhuaianiya rejeretaara naquiya nojori miishacari.

<sup>13</sup> Jiyacaritij, janiyari rupaa tojiriri jiyocuacaanuji naa cua sequeyanoni:

–Nio quia naajiotare: “¡Quiarijiani, jiyanoehua shuquiriaatia quijiaca cutaraari cuno macunucua, canapuate tariucua jiyaniijia Jesucristoocua tiuujiaa cusonuunutaniyani!” Pueyaso Sohuanuuri naa sequeyajuhua: “¡Taaquiriirini! Nojoriiri samaateya, pueyaraacaanu na jiyaniijara na poonijionuunu nuhuaji. Maninia nojori miishanocujaari niyaje-taaquishaanutaniya. Cunora, nojoriiri maninia miishaanutaniya”.

*Pueyaso seya senoosacari pueya juhua nataacuaca nio jiyajiniji*

<sup>14</sup> Na nuhuaji, janiyari cohuaja najaca niquiriini. Cuno cohuaja najaca caco cajiniaari juhua Pueyaso Niyanu niquishano quiriquiaa. Jiyaniijara shipinishano nacaque cushitiriquiaari, orojiniji shipinishano. Nataacuaca na senootajara shamaticuaja jacatunee mueruu mueturiquiaari. <sup>15</sup> Jiyacaritij, tamonu Pueyaso seruuri Pueyaso Quishaquiji tohuatamaa. Cohuaja najaca caco cajiyanoocua nacaree jyanohuari. Naa na sequereeri:

–¡Quia mueruuta quia canuujure, nataacuaca quia senoonura! ¡Jiyajinia nataacuacacua-jari tari noshuriujua! ¡Cuaara quiarijia senoosaaria!

<sup>16</sup> Jiyacaritij, cohuaja najaca caco cajiyanoori na jacatunee mueruuta canuujuree jya caco. Nataacuaca senooreeri. Cuno nataacuacaari Pueyaso pueyacuaja. Nojoriiri naa rijisaanutaniya jiyocuacaanu.

<sup>17</sup> Jiyacaritij, socua tamonu Pueyaso seruuri tohuatamaa jiyocuacaanu Pueyaso Quishaquiji. Nojuajaari shamaticuaja jacatunee mueruu mueturiquiaajuhua. <sup>18</sup> Na nuhuaji, socua tamonu Pueyaso seruuri tohuatamaa Pueyasooacara catijiaja casaajiniji. Nojuajaari mani camaru. Nojuajaari narta Pueyaso seruucua nacaree, shamaticuaja mueruu muetuyanoocua. Na sequereeri:

–¡Quia shamaticuaja mueruuta uva quia carojotare, jiyajinia moritiaconuni! ¡Tari noshuriujacuaja!

<sup>19</sup> Jiyacaritij, Pueyaso seruuri uva carojotaree na mueruuta, puetunu nio jiyajinia cuhuariquiacajinijianaa. Uva jaapuejoree saajiajinia quejasano puereetuca surocohuamaari. Pueyasoori tii na rapijiotenutaniya jyanohua na juaaniutia. Cuno uvani, nojoriiri Pueyaso ruuretajaca pueyacuaja. <sup>20</sup> Cuno uvaari rapijiosaree tucuaaanu naata tiacajiniji. Uva rapijiosaquiji, nanacaari tojetaarucujanaa jaateriquiaa juhua mohuaca. Jyanohua nanaca quiniucua, cabolohua rupaacuma puecariquiaari. Pueyaso tojiyashijiaa pueya nanacaari jyanohua tucuaaanu jaateree juhua moo. Tresciento kilometro jaatereeri.

## 15

*Siete Pueyaso seya, siete naquiya miitiaja na mueetacosacari*

<sup>1</sup> Na nuhuaji, janiyari jiya cajiniocua socua niquitishaareeni, cua niishiniuria taa mijiria quiniaa saniitiosaanu tucuatasaanutaniyani. Cua niquishanoori jyanohua puereeta quiriquiaa. Janiyari nocuaji jiuujiatereeni. Janiyari siete Pueyaso seya niquiriini. Siete Pueyaso naquiya miitiaja mueetacoriquiaari. Pueyaso jaara cuno siete casaata naquiya miitiri pueya, nojuajaari cunota na juaaniu tucuatanutaniya puetunujuanaa.

<sup>2</sup> Janiyari casaa niquiriijiaaniuhua juhua puereetuca caminia motiiquiojiniji shipinishano. Manitia cojitishanoori quiriquiaa. Pueyari cuno caminia shocua nujuaturiquiaa. Nojoriiri noo pojori quiriquiaacuaja, canapuate na naca pishano cushiriinohua Casaa shocotaquiaaricujani, juhua nojuaja niquishano shipinishano Casaajuhua. Naajuhua, nojoriiri maja na shanacunu quiquiaari cuno Casaa sesa naajiotasaanura nojoriicua. Puetunu nojorijianaari Pueyaso niquitiojosano arpaa taquinonuuriquiaa. <sup>3</sup> Nojoriiri Pueyaso seru Moisés jaaquequejosano jaaquequenuuriquiaa, Borrego Niquiojua jaaquequejosanonio. Nojoriiri naa jaaquequenuuriquiaa:

–Jiyaniijianaa, puetunu quia miishanojuanaari jyanohua maninia, nocuaji jiuujiate-sano. ¡Quiaari seetanujuanaa puetunu cumaacaracajanaa! Casaa quia miishacari, quiaari

maninia na miiquiaa. Majaari quenaaja quia jiyajenenu. Quiaacuajaari puetunu jiyacajinia quijiaa pueya Jiyaniijijanaa. <sup>4</sup> ¡Quiaari pueresano, Jiyaniijijanaa! ¡Quiaari tojetaarucujajanaa maniniuhuaqueetasano seetanujanaa! ¡Saaja quiajaniya cutaraari tojetaarucujajanaa maninia miiija pueyaracaanu! Naaratej, puetunu jiyacajinjiniio pueyajanaari quiocua nijionutaniya nojori shuquiritianura quiajaniya, maninia quia saniitiojonuucua quia paraajuhuaaj.

<sup>5</sup> Naa cua tojinuu nuhuajitij, janiyari jiyocuacaanu Pueyaso Quishaquijijanaa niquiriri riateyanoni, tee cuniqui seetanu Pueyaso rupaajanaa racatasano quiyacuajani. <sup>6</sup> Cua niquishacari, cuno siete Pueyaso seyari Pueyaso Quishaquijijanaa tohuareetariquiaa, canapueete cuno siete naquiya miitijaja patootariquiaacuajani. Nojoriiri tojetaarucujajanaa cohuaaja linojiniji toqueyaraca quiriquiaa, shacantuqueya. Nojoriiri orojiniji shipinijosano casaa na jiriquiacajinia camarucuteriquiaa. <sup>7</sup> Jiyacaritij, niquiriyatu cuno cuatro saminio casaajinjiniioori miacojuua niqutiojoree puetunu cuno siete Pueyaso seyajanaa. Cuno miacojuuari orojiniji shipinijosano quiriquiaa. Pueyaracaanu rishijia Pueyaso juaaquiacaata mishinijosano quiriquiaari. <sup>8</sup> Jiyacaritij, Pueyaso Quishaquijijanaa maatia najacata mishiquimimaa. Cunora, majaari tamonu na naata Pueyaso Quishaqui tiuquiniu quiriquiaa, cuno siete Pueyaso seya cuara puecaarajaatijia naquiya nojori miitijajaca pueya. Cuno najacaari Pueyaso shacantuca cumaacajinjiji quiriquiaa, naa na saniitiojosacari na paraa.

## 16

### *Saniitionujiniji pahuatasano*

<sup>1</sup> Jiyacaritij, janiyari tamonu rupaa tojirii Pueyaso Quishaquiji nacaanoni. Naa cuno siete Pueyaso seya sequereeri:

—¡Nia siete miacojuajinjiji Pueyaso juaaquiaca nia taroosee jiyocua!

<sup>2</sup> Niquiriyatu Pueyaso seruuri juhuacatecara coteeree. Quiaareeri. Na miacojuajinjiji jaapueese jiyocuaari. Jiyacaritij, jiyanohua nootuca sapueyari pueyaca supuee. Noo pueyaca supueeeri, canapueete nocua naajiotasano jitiariquiaa na naca pishano cushiriinohua puereeta niquishano Casaa sesacuajani. Sapueyaraca pueyari cuno puereeta niquishano shipinishano Casaacuara jacamatujuaca quiriquiaajuhuaaj. Jiyanohua nootujuaca sapueyari quiriquiaa.

<sup>3</sup> Segundo Pueyaso seruuri na miacojuajinjiji Pueyaso juaaquiaca jaapueese puereetuca shoniniacu caminiajinia. Mohuacaari puetunu nanacara quiquijijanaa, juhua shusha mosano pueyano nanaca. Cunora, puetunu shoniniacu caminiajinia quijia casaajanaari cusuuree.

<sup>4</sup> Tercero Pueyaso seruuri miacojuajinjiji Pueyaso juaaquiaca jaapueese puetunu moocujinijajanaa, puetunu samocua nacaca pacartacojuacajinijajanaano. Jiyacaritij, nanacara jataquee puetunujuanaari. <sup>5</sup> Cuno nuhuaji, janiyari mohuaca camaru Pueyaso seru tojirii naa Pueyaso sequeyanoni:

—Pueyasonaa, quiaari quijiajuhanajaj. Majaari quia supueni quiquiaari. Quiaari tojetaarucujajanaa maninia. Naa quia miitiasacari quia tojitiaashijacatej, quiaari seetanujanaa maninia namirii nojori. <sup>6</sup> Nojoricuajaari quia saquiriojosano pueyajinjiniio nanaca shootejoquiari pueyaracaanu, quia sequesano caminiujunijiaa nanacanio. Quiarjia saniniuuja, naa miiijaca nojori quiniuucatej, quiaari nojori raatejoree nanaca. ¡Maniniacuaja Jiyaniijijanaa!

<sup>7</sup> Jiyacaritij, janiyari Pueyasocuara catijiaja casaa tojirii juhua pueyano pocuaanoni. Naa sequeriquiaa Pueyasoori:

—Taaquiriirini Jiyaniijijanaa, puetunu cumaacaracajanaa Pueyasonaa. Quiaacuajaari maninia saniitioeree quia tojiyashijiaa, taa quia sequequiaari tariucuacaanu nojoricuajani, quiaari quia tojiyashijiaa saniitionutaniya. Quiaari seetanujanaa sequequiaari quia miishocoriquiano. Quiaari puetunu sesa nojori miishanojuanaa miishijia.

<sup>8</sup> Na nuhuaji, cuarto Pueyaso seruuri miacojuajinjiji Pueyaso juaaquiaca jaapueese pananuucua. Naacuajitij, pananuuri socua jiyanohua naseecara quiqui, pueya na catijianura juhua mani. <sup>9</sup> Naa pananu januuca jiyanohua nasaatiatej, pueyari jiyanohua cateree. Nojoriiri Pueyaso sesacaree saaja, cumaacaraca na quiniuucua, naa nojori na saniitionuucatej. Majaari quenaaja nojori pishiniu quirii sesa nojori miiniujinjiji, nojori tacatonuhara noojia Pueyasocuua, nojori jiyaniijijara nojori jiyatenura Pueyaso. Pueyaso rerequeteturee saajaari.

<sup>10</sup> Na nuhuaji, quinto Pueyaso seruuri miacojuajinjiji Pueyaso juaaquiaca jaapueese. Na naca pishano cushiriinohua puereeta niquishano Casaa cajishaqui na jaapueeeri, tee cuniqui juhua jiyaniijijajanaa na cajiriquiaacuajani. ¡Jiyacaritij, puetunu na jitiiasano

jiyacajanaari ninishiquiria quiquii! Cunora, na pueyari na niti saaquioriquiaa jiyanoehua nooeta naquiya na miquiosacari. <sup>11</sup> Naa Pueyaso saniitosacari nojoritij, naajaa, majaari nojori pishiniu quiriquiaa sesa nojori miiniujiniji. Nojori nootunenuucua, nojoriiri jiyocuaaanu quijia Pueyaso sesacaree saaja, nootujuuaca sapueyaraca nojori quiniuucujuhuaaj.

<sup>12</sup> Cuno nuhuaji, sexto Pueyaso seruuri miacojuajiniji Pueyaso juaaquiaca jaapuesee cuno puereetuca Eufrates moojinia. Moori joojequetaquee jiya pajamaji niriqiano jiyaniijianucua niutiatajara.

<sup>13</sup> Jiyacarijihuaaj, janiyari jiuujianaraca samaruhua niqiriini, juhua sacarohua niqishano. Cuno samaruhuari tohuareetariquiaa juhua cohuaniquia niquishano naatuhuaana Naaqueru rupaamaji. Tohuareetariquiaajaariuhua na naca pishano cushiriinohua puereeta niquishano Casaa rupaamaji, narta puereeta niquishano Casaa rupaamajinio. Cuno puereeta niquishano Casaa miijiria quiniaa pueya saפוריוריקיאאצא, nojori tojinuria na naca pishano cushiriinohua puereeta niquishano Casaa. <sup>14</sup> Cuno jiuujianaraca samaruhuari cumaacaraca quiriquiaa, na cumaacata nojori miiniuria nocuaji jiuujiate-sano casaa, pueya tiuniuria nojori sequesanoocua. Nojoriiri naa miiriquiaatej, puetunu miijiria jiyaniijianucujanaa nojori rerejotenura. Jiyaniijianucuaari naa rerejotesaaree nojori miaquetojonura puetunu cumaacaracajanaa quijia Pueyasota. Pueyasocujajari tariucuaaanu niishiriojoquiaari naa cuno juuca na miaquetojonura nojortia. Naa paniquiaaricujajari na paraa na puecoonura.

<sup>15</sup> Jiyacaritij, janiyari pa Jiyaniijajanaa tojirii naa sequeyanoni:

—Cua tojitiaree cua pueyanaa. Janiyari canashiyaquiji tuquiniutianihuani nia niishiyaquishacari. Janiyari naa niaacua tuquiniutianihuani taa nohuasejojua tuquiquiaa casami nohuasenuucuaacuaani, juhujaniya casami camaru quishacari. Shuquiriaatia quijia cutaraari noo pueyano, cante juhua suteja quiquiaani, pueyaracaanu na secosacari, na sashishacari janiya. Tojetaarucujanaa sesa miyaquijia nia quiri, niaa mariqui cua tuquishacariuhua cararaatia juhua juhuasunucua quiri na niquiaari.

<sup>16</sup> Cua Jiyaniijia sequesano cua tojinuu nuhuaji, janiyari cuno samaruhua niqiriini miijiria jiyaniijianucua rerejoteyanoni. Hebreo rupaaajinia, nojori rerejosaqui sesaari, “Armagedón”.

<sup>17</sup> Séptimo Pueyaso seruuri miacojuajiniji Pueyaso juaaquiaca jaapuesee paratujinia. Jiyacaritij, jiyocuaaanu Pueyaso Quishaquijianaa Jiyaniijia cajitujiniji, janiyari rupaa tojirii naa nacaanoni:

—¡Tari miishaaree puetunujuanaacujaja!

<sup>18</sup> Jiyacaritij, miacanaari nunujuree. ¡Jiyanohua majacureeri! Cojuataari quiriquiaa puereeta. Rijiaari tojetaarucujanaa jiyanoehua jiuuquiujiutiaaree. Pueyano shipin-ishaanujiniji, majaari naa rijia jiuuquiujiutianu quijia juhua nio rijia. <sup>19</sup> ¡Naa rijia jiuuquiujiutianuucua jiyanoehuatej, cuno puereetuca tiacaari neequeresetaquee! Jiuujianaracara raquitiijiquiiri. Puetunu jiyacajinia tiacajanaari niyarequetaree. Jiyacaritij, Pueyasoori cuno puereetuca Babilonia tiaca saniitioree, taa tariucuaaanu na niishiriojoquiaari cuno juuca na saniitonuracujani. ¡Jiyanohua na juacuaniutia na saniitioreeri! Niya sequeshiya Babilonia tiacatani, cunoori Roma tiacacujaja. <sup>20</sup> Jiyacarijihuaaj, puetunu shoniniacu caminiaajinia jiya tucuaatiajacajanaari shaajeequee, puetunu tuhuananuhua-janaano. <sup>21</sup> Naajuhuaaj, jiyocuaaanuji jiyanoehua puereetujuaaca miacanajaa shiniitujiaacaari totere pueyacua. ¡Noojiaqueyari jiyanoehua niiquia quiriquiaa; cuarenta kilo! Mi-jiria quiniaa pueyari Pueyaso sesacaree, naa nojoriicua na totinijianuucua shiniitujiaaca miacanajaatej.

## 17

### *Miriqui pohuatasano Roma tiacajiniji, juhua paanatu*

<sup>1</sup> Na nuhuaji, cucua nimiaari niquiriyatu cuno siete Pueyaso seyajinijinio, canapete siete miacojua patootariquiaacujani. Cua sequeeseeri:

—Miji quia nimia. Janiya quia niqitiniutianiyani taa Pueyaso saniitonutaniya cuno Paanatuni, puetunu jiyajinia mohuacaacujanaa cajiyani. <sup>2</sup> Miijiria jiyaniijianucuaari cuno Maaji numuetucujuuaca. Sacuaraatia cuno Paanatu niishitiojosanota, nojuajaari juhua mashaasequetojojua puetunu jiyacua quiniaa pueyajanaa. Naacuajitij, nojoriiri sacuaraatia miijiacara quiquiaari, juhua nojuajuhuaaj.

<sup>3</sup> Pueyaso seru niqitiniuria janiya na niqitini panishano, nojuajaari cua sohuano jiyataare cariiquia jiyajinia. Janiyari ti niquishii Maajini, naatuhuaana puereeta niquishano Casaa nijinia cajiyano. Queraatia sesacaari cuno naatuhuaana Casaa cuaqueyacua

quiriquiaa, Pueyaso rerequeteja sesaca, juhua Pueyasora na jiyatesacari tama na cuaequeyajaaja. Siete nacacaracaari quiriquiaa, diez tuhuajaaracanio. <sup>4</sup> Cuno Maajiri shanohua toqueya cushiriquiaa, naatuque, shaaruquejuhuaj, juhua jiyaniijianucua cushishano. Queraatia shanohua maniniushitiaja casaa cushitariquiaari: orojiniji shipinijiosano casaa, shanohua saijiniji shipinijiosano tujiaujuhua, noturu shipinijiosano saijiniji tiujiaunio. Orojiniji shipinishano miacojua mueetariquiaari. Mishaja quiriquiaari puetunu sacuaraatia na miijiosano casaatajanaa, numuetucujusaanu porocua na quiniucua. <sup>5</sup> Na sesaari miriqui naajiotasano quiriquiaa na jiniji. Naa naajiotasano quiriquiaari: “Janiyari puereetuca Babilonia tiacani. Janiyari paanaturjuri nuacuani, puetunu mijiria sacuaraatia miishanojuanaa coretanijiojua nuacuano”. <sup>6</sup> Maninia cua niquishacari, cuno Paanatuuri juhua mashaaseca quiriquiaa na puecootesano Pueyaso pueya nanacata. Nojuajaari jiyanojuaa timijia, Jesujiniji pohuatanaa puecoonu porocua na quiniucua.

Naa cua niquishacari nojuajatej, janiyari jiyanojuaa jiuujiatereeni. <sup>7</sup> Pueyaso seruuri jiyacari cua sequeree:

—¿Casaara quia jiuujiateya nocuajini? Quiarijia quia pohuatereera quia niquishanojiniji. Cuno puereeta niquishano Casaa, siete nacacaracani, diez nacajaaracanio, Maaji cajitiya na nijiniani, puetunu cunajuanaari miriqui. <sup>8</sup> Cuno puereeta Casaa quia niquishanoni, cunoori tariucuaaanujiniji quijia quiquiaari. Quiarijia saniniuujia, majaari tari na quiniu. Naajaa, quera tacanutaniuhua cuno puequeetuuj raamajiri, seetanujuanaa puetunujuanaa na shaajasaanuhua cutara. Pueyaso ruuretajaca pueyari jiyanojuaa shiriqutiuniutianiya nojori jaara cuno puereeta niquishano Casaa niquiri tacatehuano, teyanote tariucuaaanu quijia quiquiaaricujani, quiarijia saniniuujia majaari na quiniu. Jia shipinijiaquishacarijia, cuno pueya sesacuaajaari Pueyaso saquiriojosano pueya sesaca naajiotasaku naajiotasoo quiquiaari.

<sup>9</sup> Cante niishijiani, nojuaja cuara niishiiria cua pohuatasano. Cuno puereeta niquishano Casaa, na siete nacacani, cunoori siete jiyaca jiyaniijianucua, mariyata siete tuhuananuhua, teyanocua cuno Paanatu cajiyacuajani. <sup>10</sup> Cuno siete jiyaniijianucuaajinijinioni, cinco nojorijinijinioori tari shaajasaquiaari. Cuno caapiqui cureenojinijini, niquiriyatuuri jiyaniijia quia quiarijia. Tamonuuri supueyojua. Nojuaja jaara supuere, saaja rupaquijia rishiniutianiyari jiyaniijia na quishacari. <sup>11</sup> Cuno puereeta niquishano Casaa, teyanote tariucuaaanu quijia quiquiaaricujani, nojuajaari cuno cinco shaajaso jiyaniijianucuaajinijinio quiquiaaricujaja. Majaari quiarijia na quiniu. Na nuhuaji supenutaniuhuari octavo jiyaniijia na quiniuria rupaquijia. Na nuhuaji shaajasaanutaniya cutaraari.

<sup>12</sup> Cuno diez nacajaa quia niquishanojanuihuaj, cunoori diez jiyaniijianucuaranocujaja. Nojoriiri cumaaca niquitosaanutaniya saaja niquiriyatu hora jiyaniijianucua nojori quiniuria cuno puereeta niquishano Casaata. <sup>13</sup> Cuno diez jiyaniijianucuaari mariyata niishiriojonutaniya nojori cumaquiniuria cuno puereeta niquishano Casaa puetunu nojori cumaacatajanaa, jiyaniijiajanaa cuno puereeta niquishano Casaa quiniuria. <sup>14</sup> Nojoriiri Borrego Niquiojuata miaquetoojonutaniya. Borrego Niquiojuuari nojori shocotanutaniya saaja, seetanujuanaa jiyaniijiajanaa na quiniucua. ¡Nojuajaari puetunu jiyaniijianucuajanaa jiyaniijia! Nata quiniaa pueyari Pueyaso saquiriojosano pueya, Neyanu tojitiajatuahuaj.

<sup>15</sup> Pueyaso seruuri socua cua sequeree:

—Quiaacuajaari cuno Paanatu niquirii puetunu mohuacaacuajanaa cajiyano. Cuno mohuacaacuajaari queraatia tiaca, tamaatiucua pueyapue, tamaatia rupaaca pocuajacajuahuaj, tamaatia jiyacajinia quijia pueyano. <sup>16</sup> Cuno puereeta niquishano Casaa quia niquishanoni, na diez nacajaanio, nojoriiri cuno Paanatu niquiniu paniaquiniutianiya tojetaarucujanaa. Na cartetunutaniyari. Tojetaarucujanaa juhuasu na tiujatunutaniyari. Nojoriiri cuno Paanatu miaquenutaniya. Na nuhuaji, na nuchua catijiatunutaniyari. <sup>17</sup> Pueyasojuanaacuajaari cuno Paanatu paraa niishitiniutianiya naa nojori miiniuria cuno Paanatutej, taa Pueyaso pania na miishaanuracuajani. Naajuhua, Pueyasoori cuno diez jiyaniijianucua niishiriojotenutaniya jatiqui. Naacuajitij, cuno jiyaniijianucuaari roojotoonutaniya nojori cuara cumaquijia cuno puereeta niquishano Casaa puetunu nojori cumaacatajanaa. Naacuajitij, Pueyaso panishanoori tohuateesaanutaniya taa na sequequiaaricujani. <sup>18</sup> Naajuhua, cuno Paanatu quia niquishanoni, nojuajaari cuno puereetuca Roma tiacacujaja, miriqui sequehiya Babiloniatani. Nojuajaari puetunu mijiria jiyaniijianucuaajanaa tojitiquiaa nojuaja.



<sup>1</sup> Naa Pueyaso seru niquitiniyu nuhuaji janiyatej, janiyari socua tamonu Pueyaso seru niquirii jiyocuacaanuji roseyanoni. Jiyanoehua cumaacaracaari quiriquiaa. Na shacantuuca cumaacaari jiya cuhuatariquiaa. <sup>2</sup> Jiyocuacaanuji na rupaa paaretaree jiyanoehuari. Seetanujuanaa miishocoriquiano na sequesano quiniuucua, nojuajaari juhua tariucua miishano na nacatariquiaa:

—¡Tari saniitiosaaree Babilonia tiaca! ¡Juhua niyarequetasaareeri cuno puereetuuca tiaca! Samaruhua quiquiorea jatanishaaree quiaririja saniniuurija. Naaquiya quiquiorea quiniutianiyajaariuhua, puetunu pueya soosano pueresano jaacuatujuaca casaajanaa quiquioranio. <sup>3</sup> Puetunu jiyacajiniinijiojuanaa pueyari sapojonuusaajaari Babilonia tiacajiniinjo niishitiojosanota, juhujaniya sacuaraatia miijiaa nojori quiniurijuhua, juhua mashaaseca. Naajuhua, jiyaca jiyaniinijianucuaari Babilonia tiacajinia sacuaraatia miijosano miijioquiaajuhua, cuno paanatu shiniujiuniuucua nojori. Babilonia tiacajinia quiniaa pueyari puetunu na panishano casamijanaa masejoquiaa puetunu jiyacajiniinijiana, saaja tama nojori cuaqueyajaaja nojori shuquiritiniuria. Naacuajitij, cumaneecara na casami niquitiojonuuca pueyari jiyanoehua cumaneecaraca pueya.

<sup>4</sup> Na nuhuaji, janiyari tamonu rupaa tojirii jiyocuacaanujini. Babilonia tiacajinia quiniaa Pueyaso pueya sequereeri:

—¡Cua muerasunaa, cuno tiacajiniji nia quiojore, niaa mariqui sesa miijicara quiriohuari, cuno sesa miijiaa nia cojinuuca! Nojorijiniji nia carajere, niaa mariqui puetunu nojoritajanaa cojritiasaare naquiya miiniuri. Nojoricujaari quera saniitioshiya. <sup>5</sup> Cuno tiacajinia sacuaraatia miishanoori puera jiyanoehua caneyaree. Juhua tuhuanuuri maashiyaree jiyocuacaanura. Pueyasocujaari sacuaraatia nojori miijosano niishiya. Majaari socua tari na naata rejeretanu. <sup>6</sup> Babilonia cuara namishaaria taa naquiya na miijioquiaa tamascuaani. ¡Nojuaja cuara saniitionu caminiujiushaaria saniniuuja, sesa na miiniuucua tamasaca! Babiloniaari juhua pueya raatejoquiaari sacuaraatia na niishishano, sesa miijiaa nojori quiniuria juhua nojuajuhua. Cunora, nojuaja cuara puetunu Pueyaso juaaquiacaanaa raatesaaria, tama na suhuocojinijaja miishinshanoni. <sup>7</sup> Naatej, taa tama na cuaqueyajaaja na shuquiritiquiaa sacuaraatia na miishacaricaani, saniniuuja cuara naa jiyanoehua miitiasaariajuhua. ¡Jiyanoehua tama na cuaqueyajaaja timitaja na quiniuucujuhua, cuara saniitiosaaria! Nojuajaari tama sequequiaajaacujua: “Janiyari niya cajiya shuquiriaatiani, cumaacaraca maaji, pueya tojishano jiyaniija. Janiyari maja mashiquioni. Majaari quenaaja cua taraajenu quiniutianiya”. <sup>8</sup> Cunora, niquiriyatu juacajiniija, cuno Paanatuuri jiyanoehua taraatia miitiasaanutaniya. Jiyacaritij, cusonuunuuri quiniutianiya, naquiya miiniu, miaajenujuhua. Jiyacari catijiatasaanutaniyaariuhua. Jiyanoehua cumaacaraca Jiyaniija Pueyaso quiniuucua, nojuajaari naa saniitionutaniya cuno Paanatu.

<sup>9</sup> Mijiria jiyaniinijianucuaari sacuaraatia miiniuria cojiquiaa cuno Paanatucaaja, tama nojori cuaqueyajaaja nojori shuquiritiniuria. Cunora, nojoriiri jiyanoehua nujuquetunutaniya cuno Paanatu jaara saniitiosaare. Nojori niquishacari najaca tacaano jiya cajiniocua, Babilonia tiaca catesacari, nojoriiri nocua sapiyonuunutaniya. <sup>10</sup> Nojoriiri na puerenuta na shootianutaniya tucuacaanuji, nojori mariqui saniitiosaarejaariuhua. Nojoriiri jiyacari naa sequenutaniya Babilonia tiaca:

—¡Juhuej! ¡Quiaa taraatia miishiya tiaca maniniunaa! ¡Quiaari jiyanoehua cumaacaraca quijia juuca Babiloniana! ¡Quiaari canashyaquiji saniitiosaare!

<sup>11</sup> Puetunu jiyacajinijanaa, cumaneecara na casami niquitiojanaa pueyari Babilonia tiacaacua nujuquetunutaniya. Nojoriiri jiyanoehua taraatia quiniutianiya nojori niishishacari, nojoritiucua tee na casami niquitiojore na cumaneecarani. <sup>12</sup> Tucuacaanuji Babilonia tiacajiniara nojori nitiasano casami quijiaari nio: oro, plata, jiyanoehua panishano saijjuhua, noturu shipinijosano sainio. Nitiasaaquiaajaariuhua maniniuqui toqueya linojiniji, sedajiniji toqueya, shaaruque toqueyajuhua, juhua jiyaniija cushishano, naatuque toqueyano. Nitiasaaquiaajaariuhua puetunu tamaatia shanohua jaanujua juhuana raquiquia, elefante quiaajiniji shipinijosano casamijuhua, shanohua naanajiniji shipinijosano casaminio. Nitiasaaquiaajaariuhua broncejiniji shipinijosano casami, cumueeca casaajiniji shipinijosano casamijuhua, shanohua mármol saajiajiniji shipinijosano casaminio. <sup>13</sup> Naajuhua, nio shanohua jaanujua casami: canela, muesa nunacuhua, catijiasocoriquiano shanohua jaanujua casaa, mirrajuhua, cuaqueyacua shuquiujiutiasano shanohua jaanutajano. Nitiasaaquiaajaariuhua jereeca uva caaca, shiyocua, maninia cashojuajuhua, trigo jajaunio. Nitiasaaquiaajaariuhua casami niyotesano seya, borregohua, caballohua, caballohua jayotasocoriquiano shipinijosano casaanio, cumaneecara niquitiosocoriquiano pueyajuhua seya nojori quiniuria. <sup>14</sup> Jiyacaritij, Babilonia tiacaari naa sequesaanutaniya:

—¡Majaari socua quia mioonu quiniutianiya jiyanhohua quia maniniucuasano naana jajau, jiyanhohua quioojia jiaatiasano nocuani! ¡Puetunu quia timitiasano casaajanaari maja tari na quini quiniutianiya quiara, shanhohua niquishano casami, jiyanhohua cumaneecata quia masasano casamini!

<sup>15</sup> Puetunu cuno casami niqutiojonaa pueyajanaari jiyanhohua casamiriaca quiya Babilonia tiacajinia quiniaa masejonuucua nojori casami. Maja nojori saniitiosaanurajuhua, cuno pojoriiri tucuaaanuji na puerenuta nocua nujuquetunutaniya. Nojoriiri na sapuenuta naa na sohwarejotanutaniya:

<sup>16</sup> —¡Juhuej! ¡Babiloniaari tiaca maniniu quijia juucua! Jiyanhohua shanhohua niquis-hano quijiaari, taa casamiriaca maajicuaani, na cushishacari na maniniushitiaja casaa. Naa shanhohua niquishiyari juhua maaji linojiniji cohuajaque toqueya cushitishano, shaaruque toqueya, naatuque toqueyano juhua jiyaniijia cushishano, orojiniji shipinishano casaata na maniniushishacarijuhuaj, noturu shipinijiosano saitiajuhuaj, shanhohua niquishano saitianio. <sup>17</sup> ¡Jiyanhohua queraatia puetunu na jiiatiasano casamijianaari canashiyaquiji catijiasaaree juhua sohuanatuu!

Puetunu pueyajanaa, canapuate shoniniacu caminiajinia poonijionaa na cumaneecaracujani, nojoriiri tucuaaanuji shootiariquiaa Babilonia tiaca catetasacari. Naa shootiatuquiaaariuhua casami jaqueroojuaca tamaquiiuca tiaca tacatajajiniaqueya, rucoonaa pueya, buquejinia poonijionaa pueyajuhua, nojori camarucuanio. Puetunu cuno pojorijianaari tucuaaanuji shootiariquiaa Babilonia tiaca catetasacari. <sup>18</sup> Nojori niquishacari najaca nujuanaa jiya cajiniocuara, nojoriiri naa sariyocuaturee:

—¿Socua tamonu tiacateeri quiya juhua cuno Babilonia tiacajuhua? ¡Shaaqui!

<sup>19</sup> Jiyanhohua nojori taraajenuta, nojoriiri jiyojua nanooree na nacaacua. Nojori nujuquenuta, nojoriiri naa sariyocuaturee:

—¡Juhuej! ¡Babiloniaari tiaca maniniu quijia juucua! ¡Puetunu shoniniacu caminiajinia buque jiiatianaajanaari jiyanhohua casamiriaca quiya, jiyanhohua casamiriaca Babilonia quiniuuca! ¡Quiarjia saniniuuja, canashiyaquiji puetunujuanaari shaajasaaree!

<sup>20</sup> Jiyacaritij, Pueyaso seruuri naa nacaree:

—¡Nia shuquiri, jiyocuacaanu quijiacanaa! ¡Babilonia saniitiosaanuucua nia timiquiore, Pueyaso saquirojosano pueyanaa, Jiyaniijia Jesu jiyaramiquishano pueyajuhua, Pueyaso sequesano caminiujuniaanio! ¡Pueyasocujaaari niaacua namirii Babilonia!

<sup>21</sup> Jiyacaritij, cumueeca Pueyaso seruuri jiyanhohua puereetuca saajia paree, juhua trigo jajau jacanojotaja saajia. Shoniniacu caminiajinia na jatasacari, naa sequereeri:

—¡Taa cua jatasano saajia shaajemaa shoniniacu caminia queronijiniacuani, quiaari naa shaajasaanutaniya canashiyaquijijuhua, Babilonia tiacanaa! ¡Majaari socua quia niquishaanu quiniutianiya! <sup>22</sup> ¡Quia nuucuaari tojetaarucujanaa sanaaca quiniutianiya! ¡Majaari arpa taquiniojonu tojishaanu quiniutianiya socua, turequenaco jone-nenuunjuhuaj, trompeta jonenenuunio! ¡Puetunu tamaatia poonijiosano niishijiaa juaashiquiaraca pueyajanaari shaajasaanutaniyajuhua! ¡Majaari quenaaja niquiriyatu cureenu quiniutianiya quia quishaqui! ¡Naajuhua, majaari socua riqiniuniunu tojishaanu quiniutianiya! <sup>23</sup> ¡Majaari quenaaja niquiriyatu samaritu niquishaanu quiniutianiya noshiyano quia quishaqui! ¡Naajuhua, majaari camishacari queranacunuunu cojuatunenu tojishaanu quiniutianiya socua! ¡Quiaari naa saniitiosaaareequij, jiyanhohua cumaacaraca quia casami niqutiojonaa pueya quiniuuca puetunu jiyacajinijanaa! ¡Naajuhua, quiaari puetunu jiyacajinia quijia pueyajanaa shimiojona, sapojosano nojori quiniuria puetunu sacuaraatia casaa quia miijiosanotajanaa! <sup>24</sup> ¡Quiarjia saniniuuja, quiocua tiutiashiyari pueyara Pueyaso sequesano caminiujuniaa puecoosaanu, Pueyaso saquirojosano pueya puecoosaanujuhua, puetunu jiyacajinijanaa pueya puecoosaanunio!

## 19

<sup>1</sup> Naa cua tojinu nuhuajitij, jiyari jiyocuacaanu tojirii queraatia rupaacani. Naa sequeturiquiaa jiyanhohuari:

—¡Jiyanhohua maninia pa Pueyaso! ¡Nojuaja pa shuquiritiare! ¡Nojuacuajaaari pa Jiyanoojia! ¡Nojuajaari jiyanhohua shacantuuca, tojetaarucujanaa maninia miijia na quiniuuca! ¡Puetunu cumaacaracajaaariuhua! <sup>2</sup> ¡Maninia na niishiniuuca puetunu cuno Paanatu miishano sacuaraatijanaa, nojuajaari maninia na saniitioree! ¡Cuno Paanatuuri jiyacu quijia pueya sesoquiaari tojetaarucujanaa, sacuaraatia na miijiosano na niishitiojosanota! ¡Pueyasoori cunora na saniitioree! ¡Naajuhua, Babilonia puecoo-ucua Pueyaso tojtiajaca pueya, Pueyasoori na namirijijuhua!

<sup>3</sup> Jiyocuacaanuji rupaaca cua tojishanoni, nojoriiri naa sequerohuacuhua:

—Jiyanohua maninia pa Pueyaso! ¡Nojuaja pa timitiariquia pueyaracaanu! ¡Pueyaracaanu cuno Paanatu saniitiosacari, majaari na najaca turetano quiniutianiya quenaaja!

<sup>4</sup> Cuno veinticuatro niishijiaca jiyaniijianucua, cuno cuatro saminió casaajuhua, nojori-iri jiyacari jiyocuara jacamaturee Pueyasocuara. Nojoriiri naa timitiaree Pueyaso, cante na shacantuca cumaacajinia cajiriquiaacuajani. Nojoriiri naa na sequeturiquiaa:

—¡Cuara naa quiiriatej! ¡Pa Jiyaniijia cuara timitiasaaria pueyaracaanu!

<sup>5</sup> Jiyacaritij, tamonu rupaari tojishaaree Pueyaso cajishaquijijiana. Naa sequeriquiaari:

—¡Pa Pueyaso nia timitiariquia, puetunu na tojtiajaca pueyanaa! ¡Nojuaja nia shuquiri-tiare, tojishano pueyanaa, nijaniyajuhua, tojishoo pueyanaa!

*Borrego Niquiojua camishocoriquiano maaji maniniushishacari*

<sup>6</sup> Jiyacaritij, janiyari queraatia pueya tojirii jiyanoehua nacaanoni, juhua puereetuca sararojua, juhua miacana majacunujuhua. Puetunu nojorijianaari naa sequeriquiaa:

—Jiyanohua maninia pa Jiyaniijia Pueyaso! ¡Nojuaja pa timitiariquia pueyaracaanu! ¡No-juacuajaari Jiyaniijijianaa! ¡Puetunu cumaacaracajanaajuhua! <sup>7</sup> ¡Pa shuquiriri! ¡Pa timiri! ¡Quiarijiacuajaari Borrego Niquiojua caminiu juuca, pueyaracaanu na saquiriojosano pueya rupenura nojuaja! ¡Cunora, nojuaja pa timitiaree jiyanoehua! Necoranoori tari maniniushirii na caminiuria. <sup>8</sup> Maniniuqui lino toque cushitishaa-reeri, cohuajaque shacantuque. Necoranoni, nojoricuajaari puetunu nocua tiuu-jiaca pueyajanaa. Naajuhua, cuno cohuajaque na toqueni, cunocuajaari puetunu maninia nojori miijiosanojuanaa.

<sup>9</sup> Pueyaso seruuri jiyacari cua sequeree:

—Quia naajiotare nio: “Shuquiriaatia quiijaca cutaraari noo pojori, canapuate Borrego Niquiojua camishacari queranacujajiniara masusanoni”.

Naa cua sequeree socuari:

—Cua sequesano, cunoori seetanu Pueyaso rupaajanaa.

<sup>10</sup> Jiyacaritij, janiyari Pueyaso seruuacuara mojoquetareeni, juhua Pueyasocuara, no-juaja cua timitianura juucua. Cua sequeree saajaari:

—¡Maja pueyananaa! ¡Maja naa quia miiniu! Janiyari nareja Pueyaso seruni taa quiajanacuanaa, juhua quia tapueyocujuhua, noo pojori canapuate pa Jiyaniijia Jesujiniji pohuatanu tarinitiaashijacani. ¡Pueyasocuara quia mojoquetare cutara, quia timitianura nojuaja! Puetunu Jesujiniji pohuatasanojuanaa, cunoori Pueyaso Sohuanu niishitishano na pohuataanaa, janiya, nijaniyajuhua.

*Cohuajohuana caballo nijinia cajiniainiji pohuatasano*

<sup>11</sup> Na nuhuaji, janiyari jiyocuaaanu Pueyaso quiquio niquirii tariucua riatasano. Janiyari tii niquirii cohuajohuana caballoni. Na nijinia cajiniaari caapiqui sesacaraca quiriquiaa. Nioori na sesaca: “Na sequesano miijia”, “Seetanu sequejajanaa”. Naari na sesaca. Tojetaarucujanaa maninia miijia na quiniucua, puetunu niishijajanaa-juhua, nojuajaari seetanujanaa maninia saniitiojua sesa miijia. Naajuhua, majaari najuhua na miaquetojonu na paraata. <sup>12</sup> Puetunu casaajanaa niquijia na quiniucua, na namijiaari juhua mani rimianacuyano niquishaariquiaa. Jiyaniijianucuarano ship-inijiosano nacaqueya pasacoriquiaa na nacaacuari. Cunoori seetanujanaa Jiyaniijia-janaa na quiniucua. Tamonu na sesaari naajiotasano quiriquiaajuhua. Cuno sesaari tama na niishishanojuaja cutara. <sup>13</sup> Na toqueeri nanacatuque quiriquiaa. Nojuajaari tariucuaaanu nio sesaraca quiijacuaja, “Pueyaso Rupaa”. <sup>14</sup> Jiyocuaaanu nata quiniaa na soldadohuari na nuhuaji sacuriquiaa. Puetunu nojorijianaari cohuajohuanaca caballohua nijinia cajituriquiaa. Naajuhua, nojoriiri linojiniji cohuajaquijiasano toque-yaraca quiriquiaa, jiyanoehua cohuajaqueya tojetaarucujanaa. <sup>15</sup> Nojori Jiyaniijijianaa rupaamaji, nijiniaquetucua mueruuri puereeta mueranacuriquiaa. Cunoori puetunu mijiria jiyacajinijianaa na tojtiaashijiaa na puetujutajara. Nojuajaari jiyacari nojori Jiyaniijijianaa quiniutianiya, nojori na jitianura jiyanoehua na cumaacata. Puetunu cumaacaracajanaa Pueyaso juaaquiacata nojori saniitionutaniyari, naatej, taa uva rapi-jioshiya na caaca shoonuracuaani. <sup>16</sup> Na tucuaque toqueecua, na ruhuajacuucujuhua, naa naajiotasanoori quiriquiaa: “Jiyaniijianucua Jiyaniijijianaa”, “Camarucua Camarnu-juanaa”.

<sup>17</sup> Na nuhuaji, janiyari tamonu Pueyaso seru niquirii pananuucua nujuaanoni. No-juajaari puetunu jiya cajiniocua jaacatujuaca casaajanaa jiquioonuuriquiaa jiyanoehua, teyano jaacatujuacate shu miojonuuacuajani. Naa cuno jaacatujuaca casa sequeriquiaari:

—¡Miji, niya nia rerejosee! ¡Pueyasoori nia queranacutenutaniya! <sup>18</sup> ¡Nojuajaari queraatia shu nia mianuutenutaniya! ¡Cuno shuuri jiyaca jiyaniijianucua shu, soldadohua camarucua shu, jiyanohua cumueeca puereyaquijiaca shu, caballohua shu, na nijinia cajitiuniaa pueya shujihuaaj! ¡Camarucuaaju pueya shuuri quiniutianiyajuhuaaj, poonijjotesano pueya shu, tojishoo pueya shujihuaaj, tojishano pueya shunio!

<sup>19</sup> Jiyacaritij, janiyari cuno puereeta niquishano Casaa niquiriini, mijiria jiyaca jiyaniijianucuanio, puetunu nojori soldadohuatajanaa. Puetunu nojorijianaari tariucua rerejonu quiriquiaa na miaquetoojonura cohuajohuana caballo nijinia cajiyanta, nata quiniaa na soldadohuatania. <sup>20</sup> Cuno na naca pishano cushiriiniohua puereeta niquishano Casaari jiyacari quiasaaree, narta puereeta niquishano Casaanio. Nojuajaari cumaacaraca quiriquiaacuaja mijiria quijiaca pueya na sapojonura na cumaacata na miishanota, nojori na tiuutiniuria na naca pishano cushiriiniohua Casaacua. Naa na sapojonucua mijiria quijiaca pueyatej, nojoriiri nojori cuaqueya tarinitiaquiaari na naca pishano cushiriiniohua Casaa sesa naajiotasaanura nojoriicua. Naajuhuaaj, nojoriiri juhua cuno puereeta niquishano shipinishano Casaacuara mojoquetacoja quiquiaari juhua Pueyasooacara. Jiyacaritij, cuno caapiqui puereeta niquishano Casaari azufreta noshiyano mani quiquiojina quejoosaaree saminiucua. Nojoriiri tii pueyaracaanu naquiya miishaanutaniya. <sup>21</sup> Puetunu nojoritia quiniaajanaari saniniuujia puecoosaaree nijiniaquetucua mueruuta, teyanote cohuajohuana caballo nijinia cajiyano rupaamaji mueranacuriquiaacuajani. Puetunu jiya cajiniocua jaacuatujaca casaajanaari nojori shu tooquioree jiyanohua.

## 20

### *Mil marijara Satanás morosaanujiniji pahuatasano*

<sup>1</sup> Na nuhuaji, janiyari tamonu Pueyaso seru niquirii jiyocuaanuji roseyanoni. Puequeetuaju raa riatataja patariquiaari, puereetiuyocua cumayocua shipinishano casaanio, Pueyaso Paraca na morotajara. <sup>2</sup> Pueyaso seruuri cuno naatuhuaana Naaqueru juhua cohuaniquia niquishano quiasee. Na morojoreeri mil marijara. Nojuacuajaari cuno tariucuaanuu Soconu, samaruhua jiyaniijajanaatuhuaaj. Na sesaari “Satanás”. <sup>3</sup> Maninia na morojonu nuhuaji, Pueyaso seruuri puequeetuaju raama na jartaree. Raa tiotiu mishiquiorohuari. Tiotiu rupanacureeri, maja na riataसानura. Sesaacari naa mishiquiosaareequij mijiria quijiaca pueya na sapojyaquiniucuaaji cuaara na shocojore-jaatijia mil marijia. Cuno mil marijia jaara na shocojore, rupaquijjara cartesaanutaniuhuari na saniitiosaanuhuarajanaa cutara.

<sup>4</sup> Janiyari jiyacari queraatia pueya niquirii jiyaniijia cajitiucuaajinia cajitiuyanoni. Nojoriiri nequesoreenaara Pueyaso jiyatesano pueya quiriquiaa, mijiria quijiaca nojori jitianura. Janiyari noo pojori sohuunuhua niquiriijiaaniuhuaaj, canapete naca-reesaacquiaaricuaajani nojori pojojotanuucua pa Jiyaniijia Jesujiniji, Pueyaso rupaa tojitiajaca nojori quiniucuaajuhuaaj. Nojori cutaraari cuno na naca pishano cushiriiniohua Casaacuara jacamatiyuaquiquiaari tojetaarucuaajanaa, juhua nojuaja niquishano shipinishano Casaacuarajuhuaaj. Naajuhuaaj, majaari nojori shanacunu quiquiaari cuno puereeta niquishano Casaa sesa naajiotasaanura nojoriicua. ¡Cua niquishacari, nojoriiri cua niquiara samiiticoquee, jiyaniijianucua nojori jiyatesaanura! Mil marijiaari nojori shocojoree, jiyaniijianucua nojori quishacari pa Jiyaniijia. <sup>5</sup> Saniniuujia, narta macunucuaari maja na samiitianijiosaanu quiriquiaa cuno mil marijia cuaara shocojore-jaatijia. Nio macunucua samiitianijiosacari cua niquishanoni, cunoori coteenujananaa Pueyaso samiitianijiosacari pueya. <sup>6</sup> Shuquiriaatia quijiaca cutaraari noo pojori, canape Pueyaso samiitianijionutaniya coteenujanaacuajani. Nojoriiri jiyacari tojetaarucuaajanaa maninia quijiacara jatanishaanutaniya pueyaracaanu rishijia nojori quiniuria. Naacuajitij, Pueyaso ruuretajaca pueya jaara puetunu shaajasaarejanaa, jiyacari majaari Pueyaso pueya pacutenu quiniutianihua cusonu. Saniniuujia, nojoriiri pueyaracaanu shamaatia timitianutaniya Pueyaso, Cristonio. Naajuhuaaj, nojoriiri jiyaniijianucua quiniutianiya Cristota, mijiria quijiaca nojori jitianacari cuno mil marijara.

### *Sesaaca saniitiosacarijanaa cutara*

<sup>7</sup> Cuno mil marijia shocojonu nuhuaji, Satanásri tohuatesaanutaniuhua na nujuate-saquiji. <sup>8</sup> Nojuaja jaara tohuatesaare, quianutaniyari puetunu jiyacajinia quijiaca pueyajanaa na sapojonura, Gog pueya, Magog pueyanio. Nojori na sapojonuta, nojuajaari puetunu jiyaca jiyaniijianucuaajanaa rerejotenutaniya, puetunu nojori soldadohuatajanaa, nojori miaquetoojonura pa Jiyaniijia, puetunu na pueyatajanaanio. Nojori soldadohuari jiyanohua queraatia pueya quiniutianiya, juhua shoniniacua caminia shuruquico paajia jaaquia. Majaari na naata serojosaanu.

<sup>9</sup> Cua niquishacari, tojetaarucujanaa jiyanoehua queraatia pueyari nijioriquiaa. Jiya pueturiquiaa puetunujanaari, juhua tereya nojori quiniuucua. Nojoriiri Pueyaso panishano tiaca cosejoree, cuno tiaca shocua quijiaca Pueyaso pueyano. Jiyacaritij, maniiri jiyocuaaanuji tinishaare nojoriicua. Puetunu cuno pueyajanaari catijiasaaree tojetaarucujanaa. <sup>10</sup> Satanás, cante puetunu cuno pueyajanaa sapojoreecujani, nojuajaari caminiajinia jatsaaree tee cuniqui mani noshiya azufretacujani. Tariucuaaanu tii jaqueroosaaquiaaricuaajaari na naca pishano cushiriinohua Casaa, narta puereeta niquishano Casaanio. Cunocuaajaari mijiria quijiaca pueya sapojoquiaaricuaaja, na naca cushiriinohua Casaacuaara jacamatujaca nojori quiniuria. Nojoriiri tii miitiasaanutaniya tojetaarucujanaa pueyaracaanura, juuca, niucuanio.

*Macunucua nequesoreesacari cohuaja cajituu tacoji*

<sup>11</sup> Na nuhuaji, janiyari Jiyaniijajanaa cohuaja puereetuca cajituu niqiriini, tii cajiniano. Na niquiara, jiyari puetunu shaajequeejanaa, jiya cajiniocuanio. Majaari socua na niquishaanu quiriohua. <sup>12</sup> Jiyacaritij, janiyari puetunu macunucujanaa niqiriini nujuatuyano cuno cohuaja cajituu tacojini; jiyaniijianucua, tojishoo quijiaca pueyano. Jiyacaritij, na cohuaja cajituijina cajiniaari na nequesoreetuneece riataquere, socua tamonu nequesoreetuneece. Cuno nequesoreetuneece naajiotasano quiyacuaajaari Pueyaso saquiriojosano pueya sesaca, pueyaracaanu rishijiaca nojori quiniuria. Puetunu cuno tariucuaaanu macunucujanaari nequesoreesaaree puetunu nojori miishanojinijijanaa, taa cuno nequesoreetuneececajina na naajiotasaaquiaaricujani. <sup>13</sup> Cua niquiara, macunucua quiquiojina racatasano puetunu cusonuano sohuanuhujanaari na cuaqueya ruputesaarohua, shoniniacu caminiajinia moquecono, jiyacua moquecononio. Puetunu nojorijianaari nequesoreesaaree taa miijica nojori quiquiaaricujani. <sup>14</sup> Na nuhuaji, Cusojuana, macunucua Quiquiojuhuj, nojoriiri mani noshiyano caminiajinia jaqueroosaaree. Canapuete cuno mani noshiyano caminiajinia quejosocoriquiano pueyacujani, nojoriiri cusonuunu pacuteriquianocuaaja. <sup>15</sup> Naacujitij, canapuete Pueyaso samiitianijiosocoriquianohua nequesoreetuneece naajiotasoo quiquiaani, nojoriiri mani noshiyano caminiajinia quejoosaaree pueyaracaanura.

## 21

*Quiarinio jiya cajiniocujiniji pohuatasano, quiarinio jiyajinijinio*

<sup>1</sup> Na nuhuaji, janiyari quiarinio jiya cajiniocua niqiriini, quiarinio jiyano. Co-teenujanaa jiya cajiniocuaari tari shaajasano quiriquiaa, jiyano. Naajuhuj, majaari shoniniacu caminia quini quiriqiaa tari. <sup>2</sup> Janiyari jiyacari quiarinio Jerusalén tiaca niqiriini Pueyaso Quishaquiji roseyanoni. Tojetaarucujanaa shanohua maniniushitshano quiquiaari, juhua neyacarano camishocoriquiano niyacoo. <sup>3</sup> Naajuhuj, janiyari Jiyaniijajanaa cajituijini tojirii jiyanoehua nacanuni. Naa sequeriquiaari:

—¡Pueyaso Quiquioori pueya tajinia quiya tari! ¡Nojuajanaari nojoritia quiniutianiya! ¡Nojoriiri na pueya quiniutianiyajuhuj! ¡Nojuajaari nojori cojiniutianiya, nojori Jiyaniijajanaa na quiniuria, maninia na jitianura nojori! <sup>4</sup> ¡Nojuajaari puetunu nojori namijiaacajanaa tuujunutaniya! ¡Jiyacaritij, majaari pueya niishiniu quiniutianiya shaajenu, sapuenu, taraajenu, nootunenunio! ¡Puetunu cuno taraatia miiniucuaajaari tari shaajasano quiriquiaa!

<sup>5</sup> Na nuhuaji, Jiyaniijajanaa cajituijina cajiniaari naa sequere:

—¡Cua tojiri! ¡Janiyari quiariniora miijia puetunu casaajanaani!

Cua sequerejaariuhuj:

—Cua sequesano quia naajiotare. Seetanujanaari cua sequesano. Janiyacuaajaari cua sequesano tohuateequiaa pueyaracaanuni.

<sup>6</sup> Cua sequerohuariuhuj:

—Cua sequesano cua miishocoriquianoni, janiyari tari na tucuatere miiniuni. Janiyari quiijajuhuanani. Janiyari pueyaracaanu quiquianojuhuj. Janiyari puetunu casaajanaa coretanijiani, na shaajajuhuj. Cante jiyamueyani, janiyari pueyaracaanu pacartaja samo nacajiniji na raatenutaniyani, na naatanuhua. Cuno samiitianijia mohuacani, cunoori cua Sohuanucuaaja. Janiyari nareja na niqitioquiaani. Majaari na sami cua masenu quiquiaa na ratuna. <sup>7</sup> Cante puetunu casaajanaa rejeretaja quijiani, cua tojijia na quiniuucua, nojuajaari puetunu cua jitiananojuanaa jitianana quiniutianiya. Nera, janiyari na Pueyaso quiniutianiyani. Nojuajaari quiyanu quiniutianiyacujua. <sup>8</sup> Sesa pueya saniniuujia, nojoriiri puetunu quejoosaariquianojuanaa azufreta noshiyano mani caminiajinia. Naa quejoosaanutaniyari nio pojori: Pueyaso tojitiaashijiaca pueya, puerejaca nojori

quiniuucua, Pueyaso Rupaacua tiuyashijiaca, soosano pueya tama sesa nojori miiniuucuaajaaja seseno, pueya moojuaca, na camishoo maajipohua numuetucunuujuaa, shimiacuri, shipinijosano casaacuara jacamatujuaca juhua Pueyasooacuara, puetunu cuaracashijionuujuaca pueyajanaanio. Puetunu cuno pojorijianaa jaara neqesoreesaare, nojoriiri puetunu taanuusaanutaniyajanaa Pueyaso shuriucuaji. Nojoriiri mani noshiyano caminajinia quejoosaanutaniya, pueyaracaanu naquiya nojori miishaanura tii. Cunocuajaari sequeshiya, “pueya pacutesacariuhua cusonu”.

*Quiarinio Jerusalén tiacajiniji pohuatasano*

<sup>9</sup> Janiyacuajaari tari nia pohuataree cuno siete Pueyaso seyajinijini, canapueete siete miacojua patootanaa quiquiaaricuajani, mishaja Pueyaso saniitotajata. Niquiriyatu nojorijinijinoori cucua nimiaa. Nojuajaari cua sequeese:

–Miji. Quia niqutiriiria Borrego Niquiojua niquiorano. Nojuacuajaari pa Jiyaniijia pueya, na quiquojaariuhuj.

<sup>10</sup> Jiyacaritij, nojuajaari cua sohanu jiyataaree jiyanoehua puereetuca jijaconaja tuhananuucua. Tiji cua niqutiriiria cuno puereetuca quiarinio Jerusalén tiacaari, Pueyaso shuriucuaji roseyano. Tojetaarucujanaa shanohua maniniushitishano quiquiaari. <sup>11</sup> Nenecuariquiaari Pueyaso shacantuca cumaacata. Na nenecuanuuri juhua jiyanoehua panishano saajia nenecuanu quiquiaa, juhua jaspe saajia. Maatia niquishiyari na tamajiria, juhua cohuaja motiquito. <sup>12</sup> Cuno tiaca shocua matacaari jiyanoehua puereetuca quiquiaa, jijaconajajuhuj. Tiaca shocua matacaari doce tiotiuhuaraca quiquiaa. Niquiriyatu Pueyaso seruuri puetunu cuno tiotiuujinijianaa nujuaturiquiaa. Naajuhuj, supuetana Israel doce niqiohuacuajinio supueno doce pueyapue sesacaari puetunu cuno tiotiuhuacuajanaa naajiotasano quiquiaa. <sup>13</sup> Jiuujianaraca tiotiuhuari pananu muetasamajiria quiquiaa, cuno tiaca matacaacua. Socua jiuujianaraca tiotiuhuari quiquiaa pananu muetasamaji miaquetajara. Naajuhuj, socua jiuujianaraca tiotiuhuari pananu muetasamaji muenecara quiquiaa. Socua jiuujianaraca tiotiuhuari quiquiaa pananu tiuquishocora. <sup>14</sup> Cuno tiaca matacaari doce puereetujuaca saicua nujuaturiquiaa. Borrego Niquiojua doce jiyaramiquishano pueya sesacaari cuno doce saicua naajiotasano quiquiaa.

<sup>15</sup> Cuno Pueyaso seru cuata pocojoriquiaani, nojuajaari orojiniji shipinishano shanacujutaja maca mueturiquiaa. Na mueturiquiaari nata na shanacujunura cuno tiaca, na tiotiuhua, tiaca shocua matacanio. <sup>16</sup> Cuno tiacaari jiyanoehua tucuhuana quiquiaa. Na cajiniocuaari mariyata juhua na tucuhuana quiquiaajuhuj. Maninia tiasano quiquiaari, maja milajata. Pueyaso seru shanacujunu nuhuaji puetunu cuno tiacajanaa, mariyata dos mil dosciento kilómetro quiquiaari na tucuhuana, na jijaconaja, na cajiniocuanio. <sup>17</sup> Na nuhuaji, tiaca mataca shanacujureejaariuhuj. Setenta y cinco metro jitiariquiaari. Pueyaso seru shanacujutaja tucaneeri mariyata juhua mijiria pueyano shanacujutaja quiquiaa. <sup>18</sup> Cuno tiaca matacaari puetunu jaspe saijinijianaa shipinishano quiquiaa. Tiacaari saniniujia saaja orojiniji shipinishano quiquiaa, maja quenaaja tamonu casaata cojitishano. Naacuajitij, cuno oroori juhua cohuaja motiquito quiquiaa. Maatia niquishiyari na tamajiria. <sup>19</sup> Cuno mataca nujuataja doce sairi queraatia tamaatiujiaaca shanohua niquishano saitia maniniushitishano quiquiaa. Cuno mataca nujuataja doce saijinijinioni, coteenu saajiaari jaspe saitia maniniushitishano quiquiaa. Jaspe sairi neeruca cojitishano pocojuanaqueta. Segundo saajiaari zafiro saitia maniniushitishano quiquiaa. Zafiro sairi nentujuaaca naata. Tercero saajiaari ágata saitia maniniushitishano quiquiaa. Ágata sairi jetatujuaaca neeruca. Cuarto saajiaari ónice saitia maniniushitishano quiquiaa. Ónice sairi pocojuanaque naatuca cojitishano. Sexto saajiaari naatuca cornalina saitia maniniushitishano quiquiaa. Séptimo saajiaari crisólito saitia maniniushitishano quiquiaa. Crisolito sairi tiijaaca. Octavo saajiaari berilo saitia maniniushitishano quiquiaa. Berilo sairi neerujuaaca juhua naashi. Noveno saajiaari topacio saitia maniniushitishano quiquiaa. Topacio sairi jiyanoehua pocojuanaque. Décimo saajiaari crisoprasa saitia maniniushitishano quiquiaa. Crisoprasa sairi jiyanoehua neerujuaaca. Undécimo saajiaari jacinto saitia maniniushitishano quiquiaa. Jacinto sairi jariya naata naatuca. Duodécimo saajiaari jiyanoehua nentuca amatista saitia maniniushitishano quiquiaa. Puetunu cuno saijianaari jiyanoehua shanohua sai, shacantujuaaca. <sup>21</sup> Tiaca shocua mataca doce tiotiuhuari noturu shipinijosano saijiniji shipinijosano quiquiaa. Niquiriyatu tiotiuuri niquriyatu noturu saajajiniji shipinishano quiquiaa. Naa shipinijosano quiquiaari puetunu cuno doce tiotiuhuajanaa. Tiaca nuucuacaari tojetaarucujanaa orojiniji shipinishano quiquiaa.

Jiyanohua maninia cuno oro quiniuucua, Pueyaso shacantuucaari na tohuariquiquiaa, juhua motiiquio cohuajaco na quiniuucua.

<sup>22</sup> Cuno tiacajinia, majaari cua niqiniu quirii Pueyaso Quishaqui, tii pa rupuenura nojuaja. Cuniqii, majaari socua Pueyaso Secojoua tia panishaanu. Puetunu cumaacacajanaa Pueyasojuanaari tii quiyacuaja, Borrego Niquiojuajuhua. Puetunu cuno tiacajanaari nojori quishaquicuaja, pueyaracaanu nojori rupesano pa quiniuria. <sup>23</sup> Cuno tiacaari maja na paniniu pananu na cuhuatariquiano, racajuhua. Pueyaso shacantuuca cumaacacuajaari na cuhuataa. Borrego Niquiojuacuajaari na cuhuatana. <sup>24</sup> Puetunu jiyacajinia quijiaca pueyajanaari cuno tiaca caaniuji quijiaca quiniutianiya. Puetunu jiyaca jiyaniijianucujanaari socua nojori panishano casami patootanutaniya nojori cuhuatana tiacajiniara, Jiyaniijajanaa nojori niqutiosocoriquiano. <sup>25</sup> Cuno tiaca tiotiuhuari pueyaracaanu riataquesano quiniutianiya, juuca na quiniuucua pueyaracaanu. Cuniqii, majaari quenaaja niucua niishishaanu quiniutianiya. <sup>26</sup> Jiyajinia quijiaca pueyari socua na panishano casami patootanutaniya cuno tiacajiniara. Cuno tiacaari jiyanoohua nojori timitiasano quiniutianiya. <sup>27</sup> Saniniuujia, maja cutaraari sesa casaa tiuquinishaanu quiniutianiya cuno tiacajinia. Naajuhua, majaari sesa miijiaca tiuquiniu quiniutianiya tii, sapojonuujacanio. Saaja noo pojori cutaraari tii tiuquitanutaniya canapue sesacate pueyaracaanu rishijiacarano Borrego Niquiojuua naajioneejinia naajiotasano quiyacuajani.

## 22

<sup>1</sup> Na nuhuaji, Pueyaso seruuri cua niqutirii pueya samiitianijiotaja moo, cohuajanacu tojearucujanaa. Nenecuariquiaari. Cuno mohuacaari Jiyaniijia Pueyaso cajitujini pacartariquiaa, tee Borrego Niquiojuua cajiyajaniuhua. <sup>2</sup> Samiitianijia naanaari tiaca nuu jiuujiaaco nujuaturiquiaa, cuno moo shuriuquicojuhuaj, niqijiria, na taquijiriano. Cuno naanaari puetunu racarajanaa muetjuaca. Naacaujiti, puetunu marijarajanaa, doce caminiujiya muetunuuri. Na muecacaari maninia, puetunu jiyacajinia quijiaca pueyajanaa naarajotajara. <sup>3</sup> Cuniqii, majaari socua Pueyaso sesacasano casaa quiniu quiniutianiya. Naacaujiti, Pueyasojuanaa, Borrego Niquiojuajuhua, nojoricuajaari cuno tiacajinia quijiaca quiniutianiya, Jiyaniijajanaa cajitii quiniuucua tii. Nojori tojtiaja-caari nojori timitianutaniya pueyaracaanu tii. <sup>4</sup> Nojori Pueyaso jiquico shootiajaca quiniutianiya. Na sesaari nojori jini naajiotasano quiniutianiya. <sup>5</sup> Cuniqii, majaari niucua niishishaanu quiniutianiya. Tii quijiaca pueyari maja na paniniu quiniutianiya samaritiu, pananunio. Jiyaniijia Pueyasojuanaacuajaari nojori cuhuatanutaniya. Nojori jiyaniijianucua quiniutianijuhua, puetunu Pueyaso shipinishanojuanaa nojori jitianura pueyaracaanura.

### *Jesucristo quera tiuquihua*

<sup>6</sup> Na nuhuaji, Pueyaso seruuri cua sequeree:

—Cua niqutishano quiajaniyani, cua sequesanojuhuaj, puetunu cunojuanaari seetanujuanaa. Puetunujuanaari tohuateeriquiano. Pueyasoori na Sohuanuta niishitiquiaa na sequesano caminiujiuniaa pueya, nojori pohuatanura pueya niqiuara na niishitiniu panishano. Naajuhua, nojuacuajaari quiarjia na seru jiyaroree, na tojtiajaca na niishitiniuria taa quiar naataja nojuaja tucuatanutaniya puetunu na sequesanojuanaa. <sup>7</sup> Pa Jiyaniijiacuajaari naa sequerea: “Janiya quera tiuquihua niaacuani”. Shuquiriatia quijiaca cutaraari noo pojori, canapueete nio naajioneejinia Pueyasojiniji niishitishano tojijiacani.

<sup>8</sup> Janiyajanaacuajaari nio cua naajiotasano niquiniani, na tojiniajuhuaj. Janiya Juanni. Naa cua niqiniu nuhuajiti, cua tojiniu nuhuajijuhua, janiyari Pueyaso seru pajama mojoquetareeni. Janiyari naa mojoquetaree nojuaja cua timitianura juucuan, juhua Pueyaso. <sup>9</sup> Nojuajaari cua sequequee saaja:

—¡Maja naa miiniu pueyanonaa! Janiyari Pueyaso serujuhuaj, juhua quiajanijuhua, juhua puetunu quiarta Pueyaso sequesano caminiujiuniaa pueyajuhua. Naajuhua, nio naajioneejinia naajiotasano tojijia pueyani, nojori cuarta Pueyaso seyajuhua. ¡Pueyasojuanaa quia timitiare cutara!

<sup>10</sup> Cua sequereejaariuhua:

—Pueyaso niishitishano nio naajioneejinia quia naajiotasanoi, cunoori maja saa quiaraja. Puetunu pueyajanaa cuara na niishiirianoj. Puetunu niya naajiotasanocua-jaari quera tohuateya. <sup>11</sup> Naacaujiti, canapueete sesa na miiniu tarinitianu paniaquiyani, sacuraatia miijiojuacajuhua, cuara na tarinitiaaquiriaqui. Saniniuujia, canapueete maninia miijiojuaca cutarani, saaja Pueyasora poonijionujuacajuhua, nojori cuara tarinitiaaquiria maninia nojori miiniuujuhua.

<sup>12</sup> Pa Jiyaniijiacuajaari naa pa sequeya:

—¡Taaquiriirinij! ¡Quera tiuquihuanijia! Janiyari cua tojtiajaca cua niqutiojosocoriquiano casaa tiuquitianutaniuhanani. Janiyari puetunu nojorijianaa nareja niqutiojonutaniyani, maninia nojori miiniuucua quiria, nojori miishano jaara maninia quiri. <sup>13</sup> Pueyaso Rupaa cua quiniuucua, janiyari puetunu Pueyaso sequenu panishanojuanaa caminiujiuniani. Janiyari quijiajuhanani. Majaari cua supenu quiquiaari. Janiyari puetunu casaajanaa coretanijiani, na shaajariquianojuhuaj.

<sup>14</sup> 'Shuquiriaatia quijiaa cutaraari noo pojori, canapue te juhuacarijia nojori jiuujia jeequecanu Borrego Niquiojua nanacatani. Nojoriiri juhua cohuajaque toqueyaraca quiniutianiya cua niquiara. Naacuajitij, nojoriiri tiuquitianishaanutaniya Pueyaso quijia tiacajinia, nojori mioonura pueyaracaanu pueya rishitijia naanajiniji. <sup>15</sup> Saniniuujia, nio pojoriiri Pueyaso tiaca mataca tamajiria jateenutaniya: sacuaraatia casaa mijiaa, shimiacuri, na camishoo maajipohua numuetucunuujaca, narta pueya puecoojuaca, shipinijiosano casaacuara jacamatujuaca juhua Pueyasoocuara, cuaracashijionu porocua pueyano.

<sup>16</sup> Janiyacuajaari cua seru jiyarorucuaa quiocuan, na niishitiniuria quiajaniya puetunu niya quia naajiotasanojuanaa, saniniuujia Pueyaso pueya maapue niquiara na caminiujiushaanura. Janiyacuajaari Jesuni, supuetana David niquihuacuajinio caneno pueyajinijinio supueno, Jiyaniijiajanaa cua quiniuria David niti. Naajuhuj, Pueyaso Niyanu cua quiniuucua, janiyari noo rijiani, joojeatej, taa janiyajiniji naajiotasano quiya tariucuaaanu Pueyaso Rupaajiniacuajani.

<sup>17</sup> Pueyaso Sohuanuuri Borrego Niquiojua niqioranota naa sequetiuya: “¡Miji Jiyaniijianaa!” Canapue te naa nio naajioneejinia naajiotasano tojiyani, nojori cuaara naa sequeerajuhuj: “¡Miji!” Cante jiyamueyani, nojori cuaara niiria, Pueyaso samitianiijiotaja mohuacajiniji nojori ratunura. Na ratunaa pueyari, maja na ratunu sami na cumaneeca mashiniquishaanu.

<sup>18</sup> Cante nio naajioneejinia juhuacarijia Pueyaso niishitishano tojiriini, taa Pueyaso miiniutianiyan, janiyajanaari nia numooteyani, majaari quenaaja na pohuatasano nia jataniniu. Cante niya pohuatasano maateya socuani, Pueyasoori na saniitionutaniya nio naajioneejinia na pohuatasano naquiya na miitaja casaata. <sup>19</sup> Naajuhuj, cante nio naajioneejinia pohuatasano cuaracashitijiani, Pueyasoori cuno pueyano taanuunutaniya, maja na quijia tiacajinia na tiuquiniuria. Naacuajitij, majaari nojori mioonu quiniutianiya cuno tiacajinia naana jajau, pueyaracaanu rishijiaa nojori quiniuria, taa nio naajioneejinia na pohuatashiyacuajani.

<sup>20</sup> Cante nio sequeyacuajani, nojuajaari naa sequeya: “Taaquiriirinij, quera tiuquihuanijia”.

Jaa, Jiyaniijia Jesunaa. ¡Naacuaaquinatejaj! ¡Ritia quia nimiohua canaacua!

<sup>21</sup> Pa Jiyaniijia Jesu cuaara puetunu niajanijajanaa cumaquiiria na Sohuanuta.